


# Molima New Testament



The New Testament in the Molima Language of Papua New Guinea

**Molima New Testament**  
The New Testament in the Molima Language of Papua New Guinea  
Nupela Testamen long tokples Molima long Niugini

copyright © 2010 Folk&Språk and Swedish Mission Alliance

© 2010 Folk&Språk and Swedish Mission Alliance

Language: Molima

Translation by: Folk&Språk

Contributor: The Molima Translation Committee

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

---

PDF generated using Haiola and XeLaTeX on 4 Mar 2019 from source files dated 22 Dec 2018

fa4298de-51e6-508c-88a7-73c29a6d8004

## Contents

. . . . .	1
Madiu . . . . .	3
Maki . . . . .	59
Luke . . . . .	94
Ioni . . . . .	155
Viaqa . . . . .	198
Loma . . . . .	253
1 Kolinita . . . . .	285
2 Kolinita . . . . .	313
Galetia . . . . .	331
Efeso . . . . .	340
Filifai . . . . .	349
Kolose . . . . .	355
1 Tesalonaika . . . . .	362
2 Tesalonaika . . . . .	367
1 Timoti . . . . .	371
2 Timoti . . . . .	379
Taitusi . . . . .	385
Filimoni . . . . .	389
Ibeliu . . . . .	391
Iemesa . . . . .	413
1 Fita . . . . .	421
2 Fita . . . . .	429
1 Ioni . . . . .	434
2 Ioni . . . . .	442
3 Ioni . . . . .	444
Iuda . . . . .	446
Ve'ita . . . . .	449
. . . . .	480

Yaubada ena vona gwalagwalana  
The New Testament in the Molima language of Papua New Guinea  
Nupela Testamen long tokples Molima long Niugini

Folk&Språk and Swedish Mission Alliance

*Yaubada ena vona gwalagwalana*

The New Testament in the Molima language of Papua New Guinea  
[mox]

Translation by Folk&Språk and Swedish Mission Alliance

© 2010, Folk&Språk and Swedish Mission Alliance  
<http://www.folk.se>

Print publication, 2010 by Folk&Språk and Swedish Mission Alliance

Web version  
2014, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>  
[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

Your are free to share – to copy, distribute and transmit the text under the following conditions:

- Attribution. You must attribute the work to *Folk&Språk and Swedish Mission Alliance* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice – For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

Yaubada ena vona gwalagwalana

page

## Madiu

### *Buki ana alamani weaqina*

Madiu wese ana wawa Libai. Tauna Diu 'olotona, ta ena fewa takesi 'ewa'ewa dadana me Diu 'idiega Loma gabemani weaqidi. Ba'e 'iuna 'inega me Diu Madiu ge ida 'awahaqiaqiea, ta Iesu nuakolokoloyea 'inega gabei mai 'inaya ta 'abibodea.

Buki ba'e Iesu Valena weaqina Madiu 'wayavia ena tomotauyavo me Diu weaqidi. 'Inega yani qabuna Iesu ena vi'oi 'inega be tautauya ana laba ya'itoto 'evivi 'aligege weaqina 'wayavia 'idia. 'Inega ena ve'ita waiwaina be, ena viaqa 'ebenuavoqana be waiwaidi ta wese ena 'aliga 'etoluai 'inaya weaqina simana 'ifoqeyedi ena 'wayavi qabuna 'idiega.

Ibeliu bonadiega Yaubada Natuna igabea To'etoyavua (Mesaia) ta Guliki bonadiega ana alamani Keliso. Tauna Mesaia nana me Diu iba'eba'eyea vonigo totutaya namai be na'etoyavuidi Loma gabemani edi luvine waiwaina 'inega. Me Diu edi tovanugwetayavo Iesu ena mai 'iuna ivemwageyea, ta wese tomotau qabudi nuadi voqana. Ta Madiu nuanuana ena tomotauyavo nave'itedi Iesu tauna vonahaqiaqi Keliso, me Diu edi Toluvine Qiduana, 'inega simana 'idia Iesu ena 'evivi mai ana tuta 'inaya na'ifoqe kavona Kini 'idewani.

Ta wese vaina vona fofofola nugwenugweina 'inamedi Yaubada ena venua'ivina weaqina, ta vona diavona adi aqiaqi ve'ifoqeyea Iesu 'inega.

Madiu vaina yani 'ena'ena'ina weaqidi 'wayavia 'idewani Iesu ena ve'ita ve'aidega weaqina Yaubada ena yo'o gamonaya. Ta wese ena vona sesebai 'eala 'wai'waividi tomotau edi lugu mahala ena 'Ebeluvine gamonaya weaqina.

### Buki gamona

1:1–2:23 Iesu Keliso tubunavo ta wese ena vi'oi weaqina

3:1–12 Ioni Togivebabitaiso ena viaqayavo

3:13–4:11 Iesu ena babitaiso ta wese ana sitonova

4:12–18:35 Iesu ena viaqayavo tomotau nuanidia di'we Galili 'inaya

19:1–20:34 Iesu Galili nogea ta tauya Ielusalema 'inaya

21:1–27:66 Iesu ena wiki 'ebeluvine

28:1–15 Iesu ena ya'itoto 'evivi 'aligege ta wese ena 'ifoqe tomotau 'idia

28:16–20 Iesu ana tovetumaqanayavo adi veyoveyoa neidi

### *Iesu 'aqegiginavo*

*(Luke 3:23-28)*

<sup>1</sup>\* Ba'e Iesu Keliso ena gadeyavo. Tauna Deibida ena gade 'inega, ta Deibida nana tubuna Ebelamo. <sup>2</sup>'Inega ba'e 'edewani:

Ebelamo natuna Aisake,  
ta Aisake natuna Iakobo,  
ta Iakobo natuna Iuda ma tainavo ivi'oi.

<sup>3</sup>\* 'Inega Iuda nana natunavo Felesi ta Sela,  
ta inadi Temali.

Felesi natuna Esiloni,  
ta Esiloni natuna Lemi.

<sup>4</sup>'Inega Lemi natuna Aminadaba,  
ta Aminadaba natuna Nasoni,  
ta Nasoni natuna Salimoni.

<sup>5</sup>\* 'Inega Salimoni moqanena Leabi ta natudi Boasa,  
ta Boasa moqanena Ludi ta natudi Obedi,  
ta Obedi natuna Iese,

\* 1:1: 1Yani 17:11; Nug 22:18      \* 1:3: Nug 38:29-30; Lud 4:18-22      \* 1:5: Lud 4:13-17

- <sup>6</sup>\* ta Iese natuna Deibida, tauna toluvine qiduana.  
 Ta Deibida nana Ulaia wada'ena Betisiba vaqidi, 'inega natudi ivenatunea Solomoni,  
<sup>7</sup>be Solomoni natuna Lioboama,  
 ta Lioboama natuna Abaya,  
 ta Abaya natuna Asa,  
<sup>8</sup>ta Asa natuna Iosefata,  
 ta Iosefata natuna Iolama,  
 ta Iolama natuna Usaia.  
<sup>9</sup>Ta Usaia natuna Iotama,  
 ta Iotama natuna Easa,  
 ta Easa natuna Esekaia,  
<sup>10</sup>ta Esekaia natuna Manasa,  
 ta Manasa natuna Emoni,  
 ta Emoni natuna Iosaia,  
<sup>11</sup>\* ta Iosaia natuna Iekonaia ma tainavo, taudi edi tutaya me Babiloni imai me Diu  
 iluqoqonidi itauyedi Babiloni 'inaya.  
<sup>12</sup>\* Tuta nana Babiloni 'inaya itoatoa,  
 'inega Iekonaia natuna Salatieli vi'oi,  
 ta Salatieli natuna Selubabela,  
<sup>13</sup>ta Selubabela natuna Ebiuda,  
 ta Ebiuda natuna Eliakimi,  
 ta Eliakimi natuna Esoli,  
<sup>14</sup>ta Esoli natuna Sadoka,  
 ta Sadoka natuna Akimi,  
 ta Akimi natuna Eliuda,  
<sup>15</sup>ta Eliuda natuna Eliesa,  
 ta Eliesa natuna Matani,  
 ta Matani natuna Iakobo,  
<sup>16</sup>ta Iakobo natuna Iosefa, tauna Meli moqanena, ta Meli natudi Ieisu, ta Ieisu tauna  
 igabea To'etoyavua.  
<sup>17</sup>Ta Ebelamo 'inega kana avodi namai Deibida 'inaya lagata 14 adi yau i'ifoqe, ta wese  
 Deibida 'inega be tuta nana me Babiloni me Diu iluqoqonidi itauyedi Babiloni 'inaya wese  
 lagata adi yau 14 i'ifoqe, ta edi toa nana Babiloni 'inaya be ana laba Ieisu ena tutaya wese  
 lagata adi yau 14.

*To'etoyavua Ieisu ena vi'oi*  
*(Luke 2:1-7)*

- <sup>18</sup>\* Ieisu ena vi'oi ba'e 'idewani 'ifoqe: Ieisu inana Meli ta Iosefa maega igwaledi  
 ta nawale 'wafina ge dagitonovi, ta Meli vebaea tawa valagata Niboana Gwalagwalana  
 'inega. <sup>19</sup>'Inega Iosefa nuana vita. Ta ena ilivu tunutunuqina, 'inega ge nuana Meli  
 nagiveiniyauyauyei ta 'esi 'waivega nuanua vonigo Meli nanogea. <sup>20</sup>Nawale Iosefa nuana  
 'ivi ivina noga weaqina, 'inega velovelovana 'inaya ve'wayoqega Yaubada ena tovale'ewa  
 'ifoqe 'inaya vonaya, "Iosefa, o'a Deibida tubuna, ge una nuavita Meli ena valagata  
 weaqina, mana bena'ena Niboana Gwalagwalana ena waiwaiega valagata, 'inega una  
 'ebe'ewea moqaneu. <sup>21</sup>\* Nawale natuna me'olotona navi'oi ana wawa una gabea Ieisu,  
 mana tauna ena tomotauyavo edi luveifana 'inega na'etoyavuidi."  
<sup>22</sup>Yani ba'e 'ifoqe be navevona aqiaqi, mana lova taha tovesimasimana Yaubada ena  
 vona Buki Nugwenugweina gamonaya 'wayavia vonaya,  
<sup>23</sup>\* "Iahaba matayauyona navalagata be natuna me'olotona navenatunea ina gabea ana  
 wawa Imanueli."  
 Ta wawa nana ana alamani "Yaubada ita'a maega". <sup>24</sup>'Inega Iosefa 'enovila ta Yaubada  
 ena tovale'ewa ena vona vetumaqanea, 'inega Meli maega ivaqi ta 'ebe'ewedi tauyedi

\* 1:6: 2Sam 12:24 \* 1:11: 2Kin 22:1-24:20; 2Yani 36:10; Iel 27:20 \* 1:12: Esa 3:2 \* 1:18: Lk 1:27,35 \* 1:21:  
 Lk 1:31; 2:21 \* 1:23: Ais 7:14

ena vanuea. <sup>25</sup> \* Ta Iosefa Meli 'wafidi ge dagitonovi ana laba iuweta, 'inega Iosefa gwama nana gabea ana wawa Ieisu.

## 2

### *Toalamani qiduqiduadi Ieisu ivayausia*

<sup>1</sup> Ta Ieisu vi'oi 'abaga Bedeliema 'inaya di'we Iudia ena 'ebeluvine gamonaya, Elodi ena tuta vetoluvine 'inaya. 'Inega vaina toalamani qiduqiduadi baba'au ena 'ebeyayaqega imai 'abaga qiduana Ielusalema 'inaya ivetala'aiea ivonaya, <sup>2</sup> \* "Ma'inaya me Diu edi Kini vauvauna toatoa? Ahalamania tawa vi'oi mana ana 'wadima a'itea baba'au ena 'ebeyayaqega vanemai. 'Inega amai sabi iwa'odu 'inaya."

<sup>3</sup> Ta tuta nana Elodi edi vona noqolia 'inega nuana vita, ta wese me Ielusalema qabudi giwalidi a'ala ba'e vona nana weaqina. <sup>4</sup> 'Inega Elodi toveguba qiduqiduadi be luvine ana tove'itayavo gaba va'auqidi imai, 'inega vetala'aiedi vonaya, "Ma'inaya To'etoyavua nana navi'oi?" <sup>5</sup> Ena vetala'ai ive'iea ivonaya, "Abaga Bedeliema di'we Iudia 'inaya. Lova tovesimasimana ena simana Buki Nugwenugweina gamonaya vonaya,

<sup>6</sup> \* 'Bedeliema 'abaga goyona gamonega nawale me Isileli edi Kini na'ifoqe, tauna egu tomotauyavo navanugweted. Ba'e weaqina Bedeliema 'abaga kaikaiwabuna ta qiduana Iudia 'abaganavo gamodiega.' "

<sup>7</sup> Elodi edi vona noqolia 'inega toalamani diavona gabedi imai ta 'waivega vetala'ai aqiaqiedi totutaya 'wadima nana 'ifoqe. <sup>8</sup> 'Inega Elodi ena vetala'ai 'wadima nana weaqina ive'iea, e 'inega tauna luvinedi vonaya, "Ona tauya Bedeliema 'inaya nuanuagu gwama nana ona sali aqiaqiei be ona lobe, e 'inega ona mai ona vonegu, 'inega ya'a wese ena tauya ena iwa'odu 'inaya." <sup>9</sup> Elodi ena vona lu'ovoia 'inega i'ifoqe, ta lova 'wadima nana i'itea wese vanugweted itauya, ta to'edia gwama nana 'eno'eno debanaya lua'u. <sup>10</sup> Tuta nana toalamani diavona 'wadima nana i'itea iqaiawa gegoyo. <sup>11</sup> \* 'Inega ilugu vanuea ta gwama ma inana Meli i'itedi, 'inega 'amayabega isobadi ta ihiwa'odu 'inaya. Ta 'abiboda edi veyoluba kodeyega i'ewedi ia'uya gwama nana 'iawanaya. Ta kulufa diavona dabo kaikaiwabuna ana wawa goula, ta wese mulo be inisenisi.

<sup>12</sup> 'Abiboda Yaubada ve'wayoqega vematamagilafuyedi be ge ida 'evivi Elodi 'inaya, ta 'esi mali 'edega i'evivi itauya edi 'abagaya.

### *Iosefa be gwama ma inana idena itauya di'we Itifita 'inaya*

<sup>13</sup> Ta edi tauya 'abibodanaya Yaubada ena tovale'ewa taha ve'wayoqega Iosefa 'inaya 'ifoqe 'inega voneaya, "Uya'itoto, be gwama ma inana una 'ebe'ewedi 'inega ona dena ona tauya di'we Itifita 'inaya. Be omo'idia ona toatoa ana laba ena vonemi, mana Elodi nawale bena'e gwamana nasalia be vonigo naluve'aligia."

<sup>14</sup> 'Inega velovelovana 'inaya Iosefa ya'itoto ta gwama nana ma inana 'ebe'ewedi 'inega itauya Itifita 'inaya. <sup>15</sup> \* Ta Itifita 'inaya itoatoa ta iba'eba'e ana laba Elodi yawaina nagumwala, 'inega Yaubada ena vona ana aqiaqi 'ifoqe, mana lova tovesimasimana taha madusimanea vonaya, "Itifita 'inega Natugu yagabei mai."

<sup>16</sup> Elodi toalamani diavona nawale ba'eba'eyedi, ta ge ida 'evivi mai 'inaya. 'Inega nuana 'eqa'uya ge wese ina mai be ina vonei gwama nana weaqina. 'Inega diana vilei be ena luvine a'uya vonigo gogama me'ome'olotodi adi ya'wala magilafudi ta 'ayanaya ina luve'aligidi Bedeliema 'abaganavo 'idia, mana toalamaniavo edi simana 'inega ni'a alamanian gwama nana ena tuta vi'oi weaqina.

<sup>17</sup> Ta Elodi ena luvine ba'e 'inega tovesimasimana Ielemaia ena vona adi aqiaqi 'ifoqe vonaya,

<sup>18</sup> \* "Duvoyavoya kanoqonoqolia 'abaga Lama 'inega, visiqā ta mataelu maega iduduvoyavoya,

\* 1:25: Lk 2:21    \* 2:2: Naba 24:17    \* 2:6: Mai 5:2; Ion 7:42    \* 2:11: Same 72:10-15; Ais 60:6    \* 2:15: Ose 11:1    \* 2:18: Iel 31:15; Nug 35:19



Liteli\* me ena gadeavo idoudou natudiavo weaqidi,  
 'inega ge nuanuadi taha toga nuadi nagenoi  
 mana natudiavo ni'a i'aliga."

*Itifitayega i'evivi itauya Nasaleta*

<sup>19</sup> Elodi ni'a 'aliga, ta Iosefa ena susu maega nawale Itifita 'inaya itoatoa. 'Inega 'wayoqega Yaubada ena tovale'ewa taha 'ifoqe Iosefa 'inaya vonaya, <sup>20</sup> "Uya'itoto, gwama ma inana una 'ebe'ewedi ta ona 'evivi Isileli bwa'onaya, mana gwama nana ana avia ni'a 'aliga." <sup>21</sup> 'Inega Iosefa ya'itoto ta gwama ma inana 'ebe'ewedi i'evivi Isileli 'inaya.

<sup>22</sup> Tuta nana i'evivi imaimai Iosefa vale noqolia Elodi natuna Akeleasi tamana luve'iea ta vetoluvine Iudia 'inaya. 'Inega Iosefa mwaniniva ge nuana ina tauya di'we nana 'inaya. Ta ve'wayoqega Yaubada vonea ina tauya di'we Galili 'inaya. <sup>23</sup> \* Tuata Nasaleta 'inaya ive'abaga. 'Inega tovesimasimanayavo edi simana adi aqiaqi 'ifoqe vonaya, "Tauna ina gabea Nasaleta 'olotona."

3

*Ioni Togivebabitaiso ena lugaihi*

(Maki 1:1-8; Luke 3:1-18; Ioni 1:19-28)

<sup>1</sup> Tuta nana Ieisu Nasaleta 'inaya toatoa, 'inega Ioni Togivebabitaiso 'ifoqe di'we 'ava'avanaya Iudia gamonaya lugaihi vonaya, <sup>2</sup> \* "Emi ilivu luveifana 'idiega ona nuagivila, mana mahala ena 'Ebeluvine tuta goyona na'ifoqe."

<sup>3</sup> \* Lova tovesimasimana Aisea ba'e Ioni nana weaqina simana vonaya,  
 "Bona taha vevegabagaba di'we 'ava'avanega vonaya,  
 'Kaiwabu ena 'eda ona da'ea ta ona givetunuqia.' "

<sup>4</sup> \* Ta Ioni ana kaleko yubai kameli vutuvutudi 'inega, ta ana gadi'wana yubai 'wafidi 'inega, be ana 'abwagayavo wakifou ta wese mu'awa. <sup>5</sup> 'Inega tomotau Ielusalemega, be di'we Iudia ena 'ebeluvineyega ta wese go'ila Iolidani di'wenega 'abagadiavo 'idiega imai Ioni 'inaya. <sup>6</sup> E edi ilivu luveifadi isimana 'ifoqeyedi ta 'inega Ioni givebabitaisodi go'ila Iolidani 'inaya.

<sup>7</sup> \* Ta Falisi be Sadusi qabudi wese imai sabi babitaiso, e Ioni 'itedi 'inega vonedia, "Omi'a 'idewani mwata natudiavo! Ta onuaia vonigo nawale Yaubada ana diavilavila 'inega ami fata ona dena, waisa? <sup>8</sup> Ta nugweta emi nuagivila ona ve'ita 'ifoqeyedi emi veilivu aqiaqi 'idiega. <sup>9</sup> \* Ge taumiega ona nuavane ta ona vonaya, 'Ita'a Ebelamo tubunavo, 'inega Yaubada nanuakolokoloyeda.' Gebu'e otaqa! Yavona aqiaqiemi, Yaubada ana fata ba'e dabodiavo 'idiega Ebelamo tubunavo naviaqidi. <sup>10</sup> \* Ta 'eguma ge ona veilivu aqiaqi, 'inega tuta goyona 'inaya Yaubada naluvematasabumi. 'Idewani 'aiwe, 'eguma ge davuaqa aqiaqi 'inega tomotau ina talaqi ta ina gabu yavulea.

<sup>11</sup> \* "Ta 'eguma ona nuagivila 'inega ya'a go'ilega ena givebabitaisomi. Ta vonahaqiaqi, nawale taha 'oloto 'abibodaguyega maimai, tauna veago va'inegu, 'inega ge agu fata ana 'aqeyafayafa ena 'avaledi. Tauna Niboana Gwalagwalana 'inega be wese 'aiwe saesaelina 'inega nagivebabitaisomi. <sup>12</sup> Ta 'oloto ba'e ena daimayega witi nagivutuqidi be vuaqina aqiaqidi navedododi sailakaya, ta witi qainina 'aiwe 'ala'alata vatayana 'inaya nagabu yavuledi."

*Ioni Togivebabitaiso Ieisu givebabitaisoya*

(Maki 1:9-11; Luke 3:21-22)

\* 2:18: Liteli "Rachel" - taudi Iakobo moqanena taha, ta veyolubedi qiduana. Taudi Iosefa ta Beniamina inadi.

\* 2:23: Ais 11:1; 53:2; Lk 2:39; Ion 1:45 \* 3:2: Md 4:17; Mk 1:15 \* 3:3: Ais 40:3 \* 3:4: 2Kin 1:8 \* 3:7: Md 12:34; 23:33 \* 3:9: Ion 8:33,39; Lom 4:12 \* 3:10: Md 7:19; Lk 13:6-9 \* 3:11: Ion 1:26-27,33; Via 1:5

<sup>13</sup> 'Inega Galiliega Ieisu mai Ioni 'inaya sabi babitaiso Iolidani 'inaya. <sup>14</sup> Ta Ioni nuanuana Ieisu nahawatayea 'inega vonaya, "Ma'oda 'inega umai 'iguya be ena givebabitaisou, ta 'esi luaqiaqiea 'eguma o'a uda givebabitaisogu?"

<sup>15</sup> Ta Ieisu Ioni ena vona ve'evivia vonaya, "Ge 'idewani una nuanua 'aiqa ta 'esi una givebabitaisogu, mana ba'e 'inega Yaubada ena nuanua aqiaqi kana 'abibodea." E 'inega Ioni Ieisu givebabitaisoya.

<sup>16</sup>\* Gumwala, 'inega Ieisu go'ilega fweula, ta tuta nana fweula 'inega mahala 'elalamia, 'inega Yaubada Niboanina 'itea webuwebui mai 'inaya, ana 'ita 'idewani malasi. <sup>17</sup>\* 'Inega bona taha mahalega 'ifoqe vonaya, "Ba'e Natu Otaqigu. Tauna weaqina yaqaiawa qiduana."

## 4

*Ieisu sitonova lobea Seitani 'inega*  
(Maki 1:12-13; Luke 4:1-13)

<sup>1</sup>\* 'Inega Yaubada Niboanina Ieisu 'ebe'ewei tauyeya di'we 'ava'avaya be yaqisa Seitani nasitonovia. <sup>2</sup>\* Ta 'aubena be velovana 40 gamodia Ieisu vedede 'ai 'inega, ta botana qiduana lutonovia.

<sup>3</sup> 'Inega tositonova 'ifoqe ta voneaya, "Eguma o'a Yaubada Natuna ba'e dabo diavona una vonedi be ina ve'abwaga."

<sup>4</sup>\* 'Inega Ieisu vonaya, "Buki Nugwenugweina ena simana vonaya, 'Gebu 'abwaga namo 'inega tomotau iula ina lobei yawaidi weaqina, ta 'esi Yaubada ena vonayavo qabudi wese 'idiega.' "

<sup>5</sup> 'Inega Seitani Ieisu 'ebe'ewei tauyeya 'Abaga Gwalagwalana Ielusalema 'inaya, 'inega ivane Vanue Gwalagwalana 'ubutetenaya, <sup>6</sup>\* 'inega Seitani vonaya, "Eguma o'a Yaubada Natuna ba'e 'inega una fifieu ta gebu una veilaeqe. Mana Buki Nugwenugweina simana vonaya, 'Yaubada ena tovale'ewayavo naluvinedi ina 'itamakiu', be wese vonaya,

'Nimadiega ina 'alagamoiu 'inega ge 'aqeu navelubai daboya.' "

<sup>7</sup>\* Ta Ieisu Seitani ena vona ve'iea vonaya, "Vona taha wese Buki Nugwenugweina 'inaya 'eno'eno vonaya, 'Eu Kaiwabu Yaubada ge una sitonovi!' "

<sup>8</sup> 'Inega Seitani wese Ieisu 'ebe'ewei tauyeya taha bwanaga qiduana debanaya, ta omo'e 'inaya bwa'obwa'o ena di'we qabudi adi 'ita aqiaqi otaqidi ve'itea, <sup>9</sup> ta sitonovia 'inega voneaya, "Eguma 'iawaguya una sobadi ta una iwa'odu ba'e yani diavona ena neuu."

<sup>10</sup>\* 'Inega Ieisu voneaya, "Seitani, unogegu! Buki Nugwenugweina gamonaya luvine 'eno'enova vonaya, 'Eu Kaiwabu Yaubada ana 'aidega otaqa una iwa'odu 'inaya, ta wese una vetofewa 'inaya.' "

<sup>11</sup> 'Inega Seitani Ieisu nogei tauya, ta 'abibodanaya Yaubada ena tovale'ewayavo i'ifoqe ta Ieisu ihiulea.

*Ieisu ena fewa ve'alea di'we Galili 'inaya*  
(Maki 1:14-15; Luke 4:14-15)

<sup>12</sup>\* Tuta nana Ieisu Ioni valena noqolia ni'au ia'uluguyeya vanue 'ebeyoqona 'inaya, 'inega 'evivi tauya di'we Galili 'inaya. <sup>13</sup> 'Inega Nasaleta nogei ta mai ve'abaga Kafaneumi 'inaya, lavu di'wenaya. 'Abaga nana gade Sebuloni be wese gade Nafitalai edi bwa'obwa'o. <sup>14</sup> Ba'e 'inega tovesimasimana Aisea ena vona adi aqiaqi 'ifoqe, vonaya,

\* 3:16: Ion 1:32 \* 3:17: Same 2:7; Ais 42:1; Md 12:18; 17:5; Lk 9:35 \* 4:1: Ibe 2:18; 4:15 \* 4:2: 'Ifo 34:28  
\* 4:4: Luve 8:3 \* 4:6: Same 91:11-12 \* 4:7: Luve 6:16 \* 4:10: Luve 6:13 \* 4:12: Md 14:3; Mk 6:17; Lk 3:19-20

15\* “Sebuloni ena gade ta wese Nafitalai ena gade edi bwa’obwa’oyega lavu ana ’eda tauya go’ila Iolidani mali di’wea, ta bwa’obwa’o nana di’we Galili ena ’ebeluvine gamonaya, ta omo’e ’inaya taudi ge me Diu wese itoatoa.

16 Ta tomotau dina velovelovana ’inaya itoatoa ba’e ’itagana simatala qiduana tawa i’itea. Taudi ’aliga ena ’abaga luveifana ’inaya itoatoa, ba’e ’itagana simatala ni’au yayaqa ’idia.”

17\* Tuta omo’e ’inega Iesu ena lugaihi ve’alea vonaya, “Emi ilivu luveifadi ’idiega ona nuagivila, mana mahala ena ’Ebeluvine ni’a vadi’wemi!”

*Iesu tolu’iqana gabedi*

*(Maki 1:16-20; Luke 5:1-11)*

18 Taha tuta ’inaya Iesu lavu Galili balabalanega luluivila, e ’inega tolu’iqana magilafudi ma taina ’itedi igomagomana, taha ana wawa Saimoni tauna wese igabea Fita, ta wese taina ana wawa Anidulu. 19 ’Inega gabedi vonaya, “Omai, ona ’abibodegu, be ena ve’itemi ma’oda tomotau ona ’ona ’aiqedi.” 20 ’Inega lukwayavonega edi gomana inogedi ta Iesu i’abibodea. 21 ’Inega wese Iesu vavanaqo togomana toidi ’itedi wagaya edi gomana i’iva’ava’aidi adi wawa Iemesa be Ioni ma tamadi Sebedi. ’Inega Iesu Iemesa ma taina gabedi, 22 ’inega lukwayavonega edi waga be wese tamadi inogedi, ta Iesu i’abibodea.

*Iesu tomotau qabudi iuledi*

*(Luke 6:17-19)*

23\* Iesu luvivila di’we Galili ’abaganavo ’idia, ta edi vanue tafwalolo ’idia lugaihi Vale Aqiaqina Yaubada ena ’Ebeluvine weaqina, ta wese tomotau qabudi adi vihiqayavo ’idiega giveaqiaqiedi. 24\* Ta Iesu Valena yawala di’we Silia ’abaganavo ’idia. ’Inega toveviihiqayavo adi vihiqa taha taha ediavo imimiedi Iesu ’inaya. Vaina ’wafidi ’idia yuvaqa qiduana, ta vaina niboana luveifana ni’a lugu ’idia, ta vaina itafetafefwai, ta wese vaina veilage be vihiqa give’enovidi imiedi. Ta Iesu toveviihiqa diavona qabudi giveaqiaqiedi. 25\* Ba’e ’iuna ’inega yo’o qiduadi Iesu itala’obe dadanea Galili ’inega be, Dikafoliega be, Ielusalemega be, Iudiayega ta wese Iolidani mali di’wenega.

## Iesu ena ve’ita bwanagaya

### 5

*(Madiu 5:1-7:29)*

1 Iesu qabu qiduadi ’itedi, ’inega ’watovu bwanagaya ta omo’e ’inaya toabui, ta ana to’abibodayavo wese i’watovu ’inaya. 2 ’Inega Iesu ve’ale ve’itedi vonaya,

*Qaiawa vataya weaqina*

*(Luke 6:20-23)*

3\* “Aiqabu nuanuadi ’ena’ina Niboana Gwalagwalana naluveagatuna’idi ina qaiawa, mana mahala ena ’Ebeluvine taudi weaqidi.

4\* Aiqabu ba’itaga me edi dou nawale ina qaiawa, mana Yaubada nalu’ai’aiedi.

5\* Aiqabu edi ilivu nuvana ina qaiawa, mana nawale Yaubada bwa’obwa’o qabuna naneidi.

6\* Aiqabu nuanuadi ilivu aqiaqina be tunutunuqina nave’ena’i ’idia ina qaiawa, mana Yaubada ilivu nana nagive’ifoqeyea ’idia.

7 Aiqabu tonuakolokolo ina qaiawa, mana Yaubada wese nanuakolokoloyedi.

\* 4:15: Ais 9:1-2 \* 4:17: Md 3:2; 10:7 \* 4:23: Md 9:35; Mk 1:39; Via 10:38 \* 4:24: Mk 6:55 \* 4:25: Mk 3:7-8 \* 5:3: Ais 57:15 \* 5:4: Ais 61:2-3; Ve 7:17 \* 5:5: Same 37:11 \* 5:6: Ais 55:1-2

<sup>8</sup> Aiqabu giwalidi vunavunaqidi ina qaiawa,  
mana nawale Yaubada ina 'itea.

<sup>9</sup> Aiqabu togivenuadaumwala ina qaiawa,  
mana nawale Yaubada na'awanatunedi.

<sup>10</sup> \* Aiqabu vita ilobelobea tomotau 'idiega edi fewa tunutunuqina Yaubada weaqina e  
ina qaiawa,  
mana nawale mahala ena 'Ebeluvine 'inaya ina lugu.

<sup>11</sup> \* "Ta 'eguma tomotau ina vegilemi be vita taha taha ina give'ifoqeyea 'imia ta wese  
u'vega ina 'awaluveifemi mana omi'a agu to'abibodayavo, e 'inega tua omi'a ona qaiawa.

<sup>12</sup> \* Luaqiaqiemi be ona qaiawa qiduana, mana ami ve'ia 'ena'ina mahalaya 'eno'eno.  
Mana ba'e ilivu diavona tomotau lova wese iviaqia Yaubada ena tovesimasimanayavo  
'idia.

*Ve'ita mwade'wa be simatala weaqina*  
(Maki 9:50; Luke 14:34-35)

<sup>13</sup> "Omi'a 'idewani mwade'wa totoa bwa'obwa'o weaqidi. Ta ona nuaia, 'eguma  
mwade'wa nu'wana nagumwala ge wese ana fata navedibidibi 'evivi, waisa? 'Inega  
nagibwa ta kana guiwaqa yavulea ta tomotau ina vavefwayefwayea.

<sup>14</sup> \* "Ta wese omi'a kavonaya simatala totoa bwa'obwa'o weaqidi. Vonahaqiaqi, omi'a  
kavona taha 'abaga simasimalina bwanaga debanaya, ta 'abaga nana tomotau qabudi  
adi fata ina 'itea. <sup>15</sup> \* Ta 'eguma lamufa ni'a kagabuya 'inega gebu 'ulena gamonaya  
kana talakabubui, ta 'esi luaqiaqiea be 'ebea'u debanaya kana a'uya ta 'inega vanue  
gamona nasimatala aqiaqiea. <sup>16</sup> \* Ta omi'a wese 'idewanina luaqiaqiemi be emi ilivu  
simasimalidi ona ve'itayedi tomotau 'idia, be yaqisa ina 'itedi ta Tamami mahalaya ina  
awatuboya.

*Ve'ita luvine weaqina*

<sup>17</sup> \* "Ge ona vonaya be ya'a yamai Mosese ena luvine ta wese tovesimasimana edi ve'ita  
sabi 'ewa yavulidi. Ta 'esi yamai sabi give'ifoqe aqiaqiedi. <sup>18</sup> \* Vonahaqiaqi, mahala be  
bwa'obwa'o ina awala, ta ge taha yani goyosikwa otaqina luvine gamonega nahawala ana  
laba Yaubada ena nuanua na'ifoqe luvine nana 'inega. <sup>19</sup> \* Ta 'eguma togama luvine dina  
'idiega taha yani goyosikwana nanogea be tomotau wese 'idewani nave'itedi ina viaqia,  
'inega tauna ana wawa navegoyo otaqa mahala ena 'Ebeluvine gamonaya. Ta 'esi 'eguma  
taha toga luvine dina namatayaga aqiaqiedi ta nave'itayedi tomotau 'idia, e tauna ana  
wawa naveqidua mahala ena 'Ebeluvine gamonaya. <sup>20</sup> \* Ta wese yavonemi, 'eguma omi'a  
emi ilivu ge naveaqiaqi va'ine taudi Falisiavo be luvine ana tove'itayavo edi ilivu 'idiega,  
e 'inega ge ami fata mahala ena 'Ebeluvine 'inaya ona lugu.

*Ve'ita diavilavila ta luv'e'aliga weaqina*  
(Luke 12:57-59)

<sup>21</sup> \* "Luvine 'itu'ituwaina tubudavo edi tutaya ni'a onoqolia vonaya,  
'Ge una luv'e'aliga. Ta 'eguma taha toga una luv'e'aligia nawale luvine una lobe'a.'

<sup>22</sup> \* "Ta ya'a yavonemi 'eguma taha toga taina 'inaya nanualuveifa luvine nalobea.  
Ta wese 'eguma taha toga iana na'awaluveifea luvine nalobea kaniselayavo 'idiega. Ta  
wese 'eguma taha toga iana navona ve'alatea, e nawale nalugu 'aiwe 'ala'alata 'inaya.  
<sup>23</sup> \* 'Inega 'eguma eu nei kavovo umimiea 'ebeveguba Yaubada 'inaya sabi a'una, ta taiu  
ena luviefana 'iuya unuaia, <sup>24</sup> e 'inega luaqiaqieu eu nei kavovo una a'uya 'ebeveguba  
di'wenaya ta una madutauya taiu 'inaya be maega ona veiana 'evivi. 'Inega 'abiboda una  
'evivi mai be eu nei kavovo una a'uya 'ebeveguba nana 'inaya.

\* 5:10: 1Fit 3:14 \* 5:11: 1Fit 4:14 \* 5:12: 2Yani 36:16; Via 7:52 \* 5:14: Ion 8:12; 9:5 \* 5:15: Mk 4:21;  
Lk 8:16; 11:33 \* 5:16: Efe 5:8-9; 1Fit 2:12 \* 5:17: Lom 3:31 \* 5:18: Lk 16:17; 21:33 \* 5:19: Iem 2:10  
\* 5:21: 'Ifo 20:13; Luv'e 5:17 \* 5:22: 1Ion 3:15 \* 5:23: Mk 11:25

<sup>25</sup> “Inega ’eguma voalau natauyeu toluvine matanaya kotu weaqina, ’inega nugweta lukwayavonega ona madugivetunuqia maega. Ta ’eguma gebu, nawale voalau natauyeu toluvine ’inaya be toluvine nana nave’ineieu vanue ’ebeyoqona ana to’itamaki ’idia, ta ina fela luguyeu vanue nana ’inaya. <sup>26</sup> Ta ge wese ina awafeleu be una ’ifoqe ana laba au aga una vemaisa ’ovoia.

*Ve’ita luabu weaqina*

<sup>27</sup> \* “Luvine ’itu’ituwaina ni’a onoqolia vonaya, ‘Ge ona luabu!’ <sup>28</sup> Ta ya’a yavonemi ’eguma taha ’oloto vaqivaqina vavine na’itea ta nuanega nainabo ’waivea, e ’inega tauna giwalinega luabu ni’a viaqia. <sup>29</sup> \* Inega ’eguma matau au ’ataqiega nagivebe’uyeu, ’inega una giou yavulea. Mana ge taha yani qiduana ’eguma ’wafiu du’una ta’a mona una ’ita’avea. Ta vonahaqiaqi, yani luveifa otaqina ’eguma mabubuyau ina felawebuiieu ’aiwe ’ala’alata ’inaya. <sup>30</sup> \* Wese ’idewani ’eguma nima ’ataqiu nagivebe’uyeu, ’inega una da’a yavulea. Mana ge taha yani qiduana ’eguma ’wafiu du’una ta’a mona una ’ita’avea. Ta vonahaqiaqi, yani luveifa otaqina ’eguma mabubuyau ina fela webuiieu ’aiwe ’ala’alata ’inaya.

*Ve’ita sa’ila weaqina*

(Madiu 19:9; Maki 10:11-12; Luke 16:18)

<sup>31</sup> \* “Luvine ’itu’ituwaina wese vonaya,  
‘Eguma taha toga nuanuana moqanena nasa’iledi, ’inega sa’ila ana leta namadu’wayavia ta moqanena naneidi.’

<sup>32</sup> \* “Ta yavonemi, ’eguma taha ’oloto nuanuana moqanena nasa’iledi ta taudi ge luabu ida viaqi mali ’oloto maega, e ’inega ’oloto nana ni’a luveifana viaqia ’eguma taudi ina vaqi ukamana ’oloto vauvauna ’inaya, e ’inega ’oloto vauvaunana wese luabu ilivuna viaqia.

*Ve’ita vona fofofola weaqina*

<sup>33</sup> \* “Wese ni’a onoqolia luvine ’itu’ituwaina vonaya,  
‘Eguma Yaubada ’inaya ovona fofofola, gebu emi vona diavona ona qeunidi ta ’esi ona ’itamakidi be ona viaqidi.’

<sup>34</sup> \* “Ta ya’a yavonemi, ge ona vona fofofola mahala ’inega, mana oa’ena Yaubada ena ’ebetoa. <sup>35</sup> \* Ta wese gebu bwa’obwa’o ’inega ona vona fofofola, mana ba’ena Yaubada ’aqena ana ’ebea’u, be wese gebu Ielusalema ’inega, mana ’abaga omo’ena Kini qiduana ena ’abaga. <sup>36</sup> Wese gebu ’unu’unumi ’inega ona vona fofofola, mana ge ami fata debami ’aidegana ona givilei be nalu’wadaeyei nage nalukwausi. <sup>37</sup> Eguma taha yani ami fata ona viaqia ’inega ona vona ‘Ao’, ta ’eguma ge ami fata ’inega ona vona ‘Gebu’. Mana ’eguma emi vona nave’eala e vona nana Seitani ’inega.

*Ve’ita mebu weaqina*

(Luke 6:29-30)

<sup>38</sup> \* “Ni’a onoqolia luvine ’itu’ituwaina vonaya,  
‘Eguma taha toga matau naluveifea ’inega wese matana una luveifea. Wese ’eguma taha toga alau na’aumweddia ’inega o’a alana una ’aumweddia.’

<sup>39</sup> “Ta ya’a yavonevonemi, ’eguma taha toga ilivu luveifana ’iuya naviaqia ge nimana una ve’iei. Ta ’inega ’eguma togama ’ae’aeu navunuqia, ’inega una awafelei ta wese di’wenega navunuqia. <sup>40</sup> Ta wese ’eguma togama ena nuenuega na’ebe’eweu natauyeu vetala’ai ’inaya ta au kaleko na’ewea, e ’inega wese au kwakwalufai una awafelei na’ewea. <sup>41</sup> Wese ’eguma taha toga naluvineu ena kulufa una ’avala ona tauya taha ’abaga ’inaya, e ’inega wese una awafeleu be ’abaga vemagilafuna ’inaya maega ona tauya. <sup>42</sup> Ta wese

\* 5:27: ’Ifo 20:14; Luve 5:18 \* 5:29: Md 18:9; Mk 9:47 \* 5:30: Md 18:8; Mk 9:43 \* 5:31: Luve 24:1-4; Mk 10:4 \* 5:32: 1Kol 7:10-11 \* 5:33: Luve 23:21; Luvi 19:12; Naba 30:2 \* 5:34: Ais 66:1; Iem 5:12; Md 23:22 \* 5:35: Same 48:2; Ais 66:1 \* 5:38: ’Ifo 21:24; Luvi 24:20; Luve 19:21

'eguma taha toga 'iuya navenoqi taha yani weaqina 'inega yani nana una neia, ta gebu una vegagalei.

*Ada aviayavo kana veyolubedi*

*(Luke 6:27-28,32-36)*

<sup>43</sup>\* “Luvine 'itu'ituwaina ni'a onoqolia vonaya, 'Emiavo ona veyolubedi, ta ami aviayavo ona vevoalanedi.’

<sup>44</sup>\* “Ta ya'a yavonemi voalamiavo ona veyolubedi, ta wese taudi iveaviemi weaqidi ona venoqi. <sup>45</sup> Ba'e 'inega Tamami mahalaya na'awanatunemi, mana tauna veyoluba 'iuna be 'inega tauna ena baba'au nagiveyayaqia toaqiaqidi ta wese toluveifadi 'idia, ta wese 'wei awafelea taudi tunutunuqidi ta wese ge tunutunuqidi 'idia. <sup>46</sup> Ta 'eguma emiavo dimo ona veyolubedi ge ana fata ve'ia Yaubada 'inega ona 'ewei, mana takesi ana to'ewa wese ediavo iveyolubedi. <sup>47</sup> Ta wese 'eguma emiavo dimo ona veiaianedi, 'inega ge ami ve'ia ona 'ewei, mana vaina tomotau Yaubada ge ida vetumaqanea taudi wese ediavo iveiaianedi. 'Inega taudi be omi'a emi ilivu lelelea. <sup>48</sup>\* Ta omi'a luaqiaqiemi be emi ilivu naveaqiaqi otaqa 'idewani Tamami mahalaya.”

## 6

*Ve'ita nei kavovo weaqina*

<sup>1</sup>\* Ta Iesu wese vonaya, “Eu nei kavovo ge una a'uya tomotau matadia, mana 'eguma 'idewani una viaqa 'aiqa 'inega ge taha ve'ia Tamau mahalaya naneiu. <sup>2</sup> 'Inega tuta nana ona nei kavovo ge ona vevonavonayei 'idewani togagasa, mana taudi vanue tafwalolo gamonaya nage 'abagaya ineinei kavovo, ta 'abiboda tomotau 'idia ivonavonayea, mana nuanuadi tomotau ina awatubodi. Vonahaqiaqi, tawa adi ve'ia i'ewa vatayea ba'idia. <sup>3</sup> Ta 'inega omi'a 'waivega ona nei kavovo lukwalukwa 'idia. <sup>4</sup> 'Inega tomotau emi nei kavovo ge ina 'itei, ta Tamami ana 'aidega tauna 'ita kwaivemi ni'a alamania, 'inega 'abiboda ve'ia aqiaqina naneimi.”

*Ve'ita noqi weaqina*

*(Luke 11:2-4)*

<sup>5</sup>\* Ta wese Iesu vonaya, “Tuta nana ona noqi Yaubada 'inaya ge tou'ava ona vetutumedi, mana taudi nuanuadi vanue tafwalolo gamonaya wese 'abagaya tomotau matadia ina ya'itoto be ina noqi, 'inega tomotau ina awatubodi. Vonahaqiaqi, adi ve'ia ni'a i'ewa vatayea.

<sup>6</sup> “Ta 'esi o'a, tuta nana una noqi nugweta una lugu eu vanue gamonaya ta 'awa una bagini, be 'inega 'waivega una venoqi Tamau 'inaya. 'Inega tauna 'waivega 'iteuya nawale ve'ia aqiaqina naneiu. <sup>7</sup>\* Ta wese tuta nana unoqinoqi ge eu vona una lu'evi'eviviei 'idewani taudi totoa velovelovana iavoavo kavokavovo. Taudi ivonaya be edi vona kuekuena 'inega ve'ia aqiaqina ina lobe. <sup>8</sup>\* Gebu taudi 'aqedi ona talaqi, mana ami vitayavo Tamami madualamanidi ta 'abiboda weaqidi onoqinoqi.

<sup>9-13</sup>\* “'Inega ba'idewani ona noqi 'aiqa:

Tamama, utoatoa mahalaya.

Au wawa gwalagwalana ana 'amayabea.

Nuanuama una luvinema.

Nuanuama totoa bwa'obwa'o eu nuanua ana viaqidi,

'idewani totoa mahala eu nuanua iviaviaqidi.

Nuanuama ama 'abwaga tuta qabuna una neima.

Ta ema luveifana una nuataqodi,

'idewani ima'a tomotau iveilivu veifa 'imaya anuataqodi.

\* 5:43: Luvi 19:18 \* 5:44: 'Ifu 23:4-5; Lk 23:34; Via 7:60; Lom 12:14,20 \* 5:48: Luvi 19:2; Luve 18:13 \* 6:1: Md 23:5 \* 6:5: Md 23:5; Lk 18:10-14 \* 6:7: 1Kin 18:25-29 \* 6:8: Md 6:32 \* 6:9-13: Lk 22:42; Md 18:21-35; Lk 22:40; Iem 1:13; Ion 17:15; 2Te 3:3; 2Tim 4:18

'Ebeu'ava 'inaya gebu una awafelema,  
ta nuanuama toluveifana 'inega una vabodebodema.

14 \* 'Eguma omi'a tomotau edi luveifana 'imia ona nuataqodi 'inega Tamami mahalaya wese emi luveifana nanuataqodi. 15 Ta 'eguma tomotau edi luveifana 'imia ge ona nuataqodi 'inega wese Tamami emi luveifana gebu nanuataqodi.

*Ve'ita vedede weaqina*

16 \* "Tuta nana ona vedede 'ai 'inega be yaqisa Yaubada namai di'wemia, 'inega ge ami 'ita ona givedumedumei tou'ava 'idewani, mana taudi nuanuadi adi 'ita dawalilina 'inega tomotau ina alamania vonigo taudi ivevedede. Vonahaqiaqi, taudi adi ve'ia tawa i'ewea. 17 Ta 'esi tuta nana ona vedede 'inega 'iawami ta wese debami dede'wega ona 'abia, 18 'inega tomotau emi vedede gebu ina alamania, ta 'esi Tamami ge ana 'itamami emi viaqa qabuna 'wai'waividi 'ite'itedi, e 'inega tauna nawale ve'ia aqiaqina naneimi.

*Ve'ita mahala ana kaikaiwabu weaqidi*  
(Luke 12:33-36)

19 \* "Emi kulufa kaikaiwabudi ge ona luveaqedi bwa'obwa'oya, mana kwamukwamu be ganagana ina luveifedi, ta wese tovanawala vanue ina baia ina lugu ta kulufa diavona ina vanawalidi. 20 \* Ta 'esi emi kaikaiwabuyavo mahalaya ona luveaqedi, mana omo'e 'inaya kwamukwamu be ganagana ta wese tovanawala ge adi fata ina luveifedi. 21 Ta ona nuave'avinia ma'inaya emi kaikaiwabu 'eno'eno, e omo'e 'inaya emi nuanua wese natautauya.

*'Wafi ana simatala*

22 "Matami kavona lamufa 'wafimi weaqina. Ta 'eguma matami aqiaqidi, e 'inega wese 'wafimi qabuna nasimatala. 23 Ta 'eguma matami naluveifa 'inega wese 'wafimi qabuna navelovanea. Ta 'eguma lamufa nana na'weu 'inega nawale velovana qidua otaqina na'ifoqe.

*Ge ona nuanua vaina yani weaqina*  
(Luke 16:13; 12:22-31)

24 "Ge taha toga ana fata navetofewa kaiwabu magilafudi 'idia. 'Inega taha nanogei ta taha naveyolubea. Ta wese taha na'awahaqiaqiea ta taha na'awaluveifea. 'Inega ge taha toga ana fata navetofewa Yaubada ta wese bwa'obwa'o ana kaikaiwabu 'idia.

25 \* "Inega yavonemi, ge ona nuanua emi toa bwa'obwa'oya weaqina, 'idewani 'abwaga be go'ila ta wese 'wafimi ana kaleko weaqidi. Mana yawaimi yani 'ena'ina, ta kulufa diavona 'wafi weaqina ge yani 'ena'ina. 26 \* Ona nuaidi manu, ge ida vaoqa, ta ge wese ida bolimana, ta wese ge edi sailakamo. Manuqa yani goyona, ta tuta qabuna Tamami mahalaya veve'ainidi. Ta omi'a yani 'ena'ina Yaubada 'inaya, 'inega wese ana fata nave'ainimi.

27 "Ge taha toga ana fata ena toa bwa'obwa'oya nagivekuei ena nuanuayavo 'idiega. 28 'Inega tola'ai weaqina onuanua qiduana ami kaleko weaqidi? Taha wese 'ebe'ita libi idina edi tabo weaqina ona nua'ivinidi, mana gebu ida fewafewa ta wese gebu adi kaleko ida viaviaqidi. 29 \* Ta yavona aqiaqiemi, toluvine qiduana kaikaiwabuna Solomoni ana kaleko ta wese ana 'ivala adi 'ita aqiaqina, ta libi idina adi 'ita aqiaqi otaqina. 30 'Inega ona nuaia Yaubada ena 'itamaki weaqimi. 'Itaga Yaubada libi idina ve'ivalidi aqiaqina ka'itedi, ta 'ibe namwatuqu 'inega tomotau ina tuinidi. Ta omi'a libi oveaqiaqi va'inedi, 'inega vonahaqiaqi ami kaleko naneimi. 'Inega tola'ai weaqina emi vetumaqana Yaubada 'inaya goyona?

31 "Inega ge ona nuanua ta ona vonaya, 'Tola'ai kana 'ai, be tola'ai kana numa ta wese tola'aiega kana vekaleko?' 32 \* Vona ba'ena 'idewani taudi velovelovanaya itoatoa edi

\* 6:14: Mk 11:25-26 \* 6:16: Ais 58:5-9 \* 6:19: Iem 5:1-3 \* 6:20: Md 19:21; Lk 18:22 \* 6:25: Fil 4:6; 1Tim 6:6-8; 1Fit 5:7 \* 6:26: Md 10:29-31; Lk 12:6-7 \* 6:29: 1Kin 10:4-7; 2Yani 9:3-6 \* 6:32: Md 6:8

vona. Ta ba'e yani diavona weaqidi ge onuanua, mana Tamami mahalaya ni'a alamani aqiaqiedi. <sup>33</sup> \* 'Inega nugweta Yaubada ena 'Ebeluvine ona salia ta wese ena ilivu tunutunuqina ona 'abibodei 'inega yani diavona Yaubada naneimi.

<sup>34</sup> ""Inega ge ona nuanua 'ibe weaqina, mana 'ibe 'aubena nana ana vita dumadumana, e 'inega ba'itagana ana vitayavo be ana nuanuayavo bena'e ta'iwa ami 'etofwafwa.

## 7

*Ve'ita* 'awaluveifa weaqina  
(*Luke 6:37-38,41-42*)

<sup>1</sup> \* "Gebu tomotau ona 'awaluveifedi fole nawale Yaubada wese na'awaluveifemi, <sup>2</sup> \* mana toyani weaqina tomotau ona 'awaluveifedi 'inega nawale Yaubada wese 'idewani na'awaluveifemi. Ta wese ma'oda ona veilivu 'aiqa tomotau 'idia nawale Yaubada wese 'idewana naveilivu 'aiqa 'imia. <sup>3</sup> Ta tola'ai weaqina taiu matana 'inaya 'aiwe kisemanina weaqina uvonavona ta o'a tau'u matauya kigabugabu 'eno'eno'ova ta ge uda 'itea? <sup>4</sup> 'Inega ge daluaqiaqieu be taiu una vonei 'aiwe kisemanina matanega una 'ewa yavulea, mana o'a matauya kigabugabu 'eno'eno'ova. <sup>5</sup> O'a taha tou'ava, nugweta matauyega kigabugabuna una 'ewa yavulei ta 'inega una 'ita aqiaqi, ta 'abiboda taiu matanega kisemana una 'ewei ta una felea. <sup>6</sup> 'Eguma taha yani aqiaqina kedewa kana neidi, nawale ina luveifea ta wese ina 'uteda. Ta wese 'idewani ami bagi gebu bawe ona neidi mana nawale ina vavefwayefwayea. Ta wese 'idewani Yaubada ena yani aqiaqina ge ona neidi tovegwavu'ai 'idia mana nawale ina veyani kavokavovoyedi.

*Una noqi* 'inega Yaubada naneiu  
(*Luke 11:9-13*)

<sup>7</sup> \* "Ona venoqi 'inega Yaubada naneimi, ta wese ona sali 'inega ona lobe'a, ta wese ona 'auveida'a 'inega 'awa na'ewa'ea weaqimi. <sup>8</sup> \* Mana tomeqabu inoqinoqi Yaubada naneidi, ta tomeqabu isalisali nawale ina lobe'a, ta wese tomeqabu 'away'a i'au'auveida'a nawale na'ewa'ea weaqidi. <sup>9</sup> Ta ma'oda omi'a 'eguma natumiavo 'abwaga weaqina inoqinoqi 'imia nage dabo ona neidi? <sup>10</sup> Ta wese 'idewani 'eguma 'iqana weaqina inoqinoqi 'imia nage bunelala ona neidi? Gebu'e otaqa! <sup>11</sup> \* Vonahaqiaqi, omi'a luveluveifami ta natumiavo 'idia ni'au oalamaniana yani aqiaqi dimo ona neidi, 'inega ona alamani aqiaqiea tomeqabu inoqinoqi Tamami mahalaya ena 'iwavo aqiaqi otaqina naneidi. <sup>12</sup> \* Ta tola'ai nuanuami tomotau ina viaqia 'imia, e wese omi'a 'idewana ona viaqa 'aiqa 'idia. Mana ba'e ilivu nana ana viaqa 'inega Mosese be tovesimasimanayavo edi luvineavo adi alamani oveve'itayea.

'Awa ta 'eda magilafudi weaqidi  
(*Luke 13:24*)

<sup>13</sup> ""Awa sadana 'inega ona lugu ta gebu 'awa bababana 'inega. Ta 'awa bababana wese ana 'eda bababana, 'inega tomotau qabudi 'awanegana ilugulugu ta itautauya. Ta ba'e 'eda nana 'ebeveilaqe ana 'eda. <sup>14</sup> Ta yawai aqiaqina ana 'awa goyona ta ana 'eda sadana, 'inega tomotau 'evisa dimo ba'e yawai nana ilobelobe'a.

'Aiwe ta vuaqina  
(*Luke 6:43-44*)

<sup>15</sup> \* "Ona 'itamakimi tovesimasimana 'e'eu'au'avididi weaqidi, mana nawale ina mai 'imia kavona sifi gumegumeidi 'idewana, ta 'esi gamodia 'idewana yubai sasasadi. <sup>16</sup> \* Ta edi fewayavo 'idiega nawale ona alamanidi, mana talitali gebu ana fata be vuaqina navena'qo'ai, ta wese 'ue 'idewana gebu ana fata be vuaqina nave'ala'ai. <sup>17</sup> Ta wese

\* 6:33: 1Kin 3:11-14; Same 37:4,25; Lom 14:17 \* 7:1: Lom 2:1; 1Kol 4:5; Iem 4:11-12 \* 7:2: Mk 4:24 \* 7:7: Mk 11:24; Ion 14:13; 15:7; 16:23-24 \* 7:8: 1Ion 3:22; 5:14-15 \* 7:11: Iem 1:17 \* 7:12: Md 22:39-40; Lk 6:31; Lom 13:8-10 \* 7:15: Md 24:24; Via 20:29; 2Fit 2:1 \* 7:16: Gal 5:19-22; Iem 3:12



'idewani 'aiwe aqiaqidi wese vuaqidi aqiaqidi, ta 'aiwe veifadi vuaqidi wese veifadi. <sup>18</sup> Vonahaqiaqi, 'aiwe aqiaqidi ge ana fata vuaqa veifadi ina vuaqayei, ta wese 'aiwe veifadi 'idewana ge ana fata vuaqidi aqiaqina ina vuaqayei. <sup>19</sup> \* 'Inega 'eguma taha 'aiwe ge davuaqa aqiaqi kana talaqa yavulei be kana gabuya. <sup>20</sup> \* 'Idewana wese tovesimasimana luveifadi vuaqidi 'idiega ana fata ona alamanidi.

*To'abiboda ge aqiaqidi weaqidi*  
(Luke 13:25-27)

<sup>21</sup> \* "Tomotau 'eala i'awa'awa Kaiwabuyegu, ta 'idiega ge qabudi ina lugu mahala ena 'Ebeluvine 'inaya, ta 'esi aiqabu Tamagu mahalaya ena nuanua imatamatayagea e taudina adi 'aidega ina lugu. <sup>22</sup> Vona Vetala'ai ana tuta 'inaya tomotau 'eala ina vonaya, 'Kaiwabu, afewa weaqiu ta au wawega asimana ta wese niboana luveifadi tomotau 'idiega a'wavi 'ifoqeyedi, ta wese fewa 'ebenuavoqana 'eala aviaqidi.' <sup>23</sup> \* 'Inega ena vonedi, 'Omi'a toluveifami, otauaya! Ya'a ge taha ana tufwa eda alamanimi!"

*Ve'ita vanue ana to'eyoqona weaqidi*  
(Luke 6:47-49)

<sup>24</sup> Ta wese Iesu vonedi vonaya, "Vona diavona yaveveqayedi 'eguma aiqabu ina noqolidi ta ina viaqidi, e 'inega taudi 'idewana taha to'eyoqona ena vanue nayoqonia ena alamani aqiaqi 'inega. Nugweta ena avutugu aqiaqina navenua'ivinia ta wese ena 'oqola falafaladi 'idewana agumo naluda'edi. Ta 'inega bwa'obwa'o aqiaqinaya navetovolodi ta vanue nana nayoqonia. <sup>25</sup> E 'inega 'eguma 'wei na'wei ta seuseu nainoqa ge nayagwei. Ta wese 'eguma yaqina natoa ge ana fata vanue nana nabuini, mana bwa'obwa'o falafalana ta wese 'oqola aqiaqidi ta waiwai. <sup>26</sup> Ta 'eguma aiqabu egu vona inoqonoqolidi ta ge ida viaqidi, e 'inega taudi 'idewani to'eyoqona veifa, mana to'eyoqona nana ge ena avutugu davenua'ivina aqiaqiei ta wese ena 'oqolayavo gebu 'aiwe falafaladi. <sup>27</sup> Ta wese vanue nana yoqonia gelasaya ta go'ila di'wenaya, 'inega tuta nana 'wei 'ena'ina nawebui ta seuseu nainoqa be wese yaqina natoa, 'inega vanue nana na'avala qeunia."

<sup>28</sup> Tuta nana Iesu ena ve'ita ba'e lu'ovoidi 'inega tomotau qabudi nuadi voqana qiduana, <sup>29</sup> \* ta ivonaya, "Luvine ana tove'itayavo edi ve'ita dawalilina, ta 'esi ba'e 'oloto nana me ena luvine ta wese me ena waiwai veve'ita."

## 8

*Iesu 'oloto 'wago'wagoina giveaqiaqiea*  
(Maki 1:40-45; Luke 5:12-16)

<sup>1</sup> Tuta nana Iesu bwanagega webui mai 'inega qabu qiduadi i'abibodea. <sup>2</sup> 'Inega taha 'oloto 'wago'wagoina mai Iesu 'inaya tuqatuqanega sobadi 'iawanaya ta vonaya, "Kaiwabu, 'eguma eu nuanua 'inega una giveaqiaqiegu, mana o'a au fata."

<sup>3</sup> 'Inega Iesu nimana si'otoia ta 'oloto nana 'wafina gitonovi ta vonaya, "Aqiaqina, eu nuanua ena viaqia, uvevunavunaqa ta uveaqiaqi!" 'Inega lukwayavonega veaqiaqi. <sup>4</sup> \* 'Inega Iesu vonea vonaya, "Una tauya, ta ge taha toga 'inaya una vesimasimanei tola'ai ni'a yaviaqa 'iuya, ta 'esi tunutunuqina una tauya toveguba 'idia una ve'itayeu ta ina 'awahaqiaqie, 'inega eu nei kavovo Yaubada 'inaya una a'ui 'idewani Mosese ena luvine vonavona. 'Inega nei kavovo nana nave'ebe'ita tomotau 'idia ta ina alamania vonigo ni'au uveaqiaqi."

*Iesu toluavia adi tovatatana ena tofewa giveaqiaqiea*  
(Luke 7:1-10)

<sup>5</sup> Ta Iesu ni'a 'ifoqe 'abaga Kafaneumi 'inaya, 'inega taha toluavia me Loma adi tovatatana mai Iesu 'inaya ta venoqiea vonaya, <sup>6</sup> "Kaiwabu, taha egu tofewa vihiqa

\* 7:19: Md 3:10; Lk 3:9; Ion 15:6 \* 7:20: Md 12:33 \* 7:21: Lk 6:46; Iem 1:25 \* 7:23: Same 6:8; 2Tim 2:19  
\* 7:29: Mk 1:22; Lk 4:32 \* 8:4: Luvi 14:1-32; Md 9:30; Lk 17:14

qiduana 'ewea ta vanuea lulumutula. Ta 'wafinaya visiqa 'ena'ina, ta wese ge ana fata nawayaqa."

<sup>7</sup> 'Inega leisu voneaya, "Aqiaqina, ena wai ta ena givea qiaqiaea."

<sup>8</sup> 'Inega tovatatana nana leisu ena vona ve'iea vonaya, "Kaiwabu, ge wese daluaqiaqiegu be una mai egu vanuea, ta 'esi una vonamo be 'inega egu tofewa navea qiaqi 'evivi. <sup>9</sup> Mana ya'a wese egu tovatatana qiduquadi 'ayadia yatoatoa, ta edi vona ya'abi'abibodea, ta wese ya'a egu toluaviayavo 'ayaguya itoatoa ta yaluviluvinedi. 'Inega 'eguma togama 'inaya ena vonaya, 'Utauya!' e natauya. Ta wese 'eguma togama 'inaya ena vonaya, 'Umai!' e 'inega namai, ta wese 'eguma egu tofewa 'inaya ena vonaya, 'Ba'e uviaqi!' e 'inega naviaqia."

<sup>10</sup> Tovamatana nana ena vona 'inega leisu nuana voqana aqiaqi, 'inega ana to'abibodayavo qabudi vonedi, vonaya, "Vonahaqiaqi, ge taha toga me Isileli 'imiega eda 'ita lobei ena vetumaqana ba'e 'idewani. <sup>11</sup> \* Ta yavonemi nawale tomatou 'eala di'we qabudi 'idiega ina va'auta Ebelamo be Aisake ta wese Iakobo maega Yaubada ena 'Ebeluvine sagalina 'inaya. <sup>12</sup> \* Ta aiqabu lova Yaubada vena'ivinidi ena 'Ebeluvine ana lugu weaqina nawale ge ina lobei, ta 'esi Yaubada ena tovale'ewayavo ina fela webuedi 'abaga velovelovanina 'inaya. Omo'e 'inaya ina dou ta aladi navetalakikokiko."

<sup>13</sup> 'Inega leisu tovatatana nana voneaya, "U'evivi utauya eu vanuea, ta eu tofewa navea qiaqi eu vetumaqana 'inega." Ta tuta nana 'inaya tofewa nana ni'a vea qiaqi 'evivi.

*Isisu tomatou qabudi givea qiaqiedi*  
(Maki 1:29-34; Luke 4:38-41)

<sup>14</sup> 'Inega leisu tauya Fita ena vanuea ta lugu, 'inega Fita lawana 'itedi 'wafidi lu'wea'weava ta 'ivia i'eno'eno. <sup>15</sup> Ta leisu toveviihika dina nimadi gitonovia, 'inega 'atuvulihidi. 'Inega iya'itoto ta 'abwaga i'iva'ava'aia leisu weaqina.

<sup>16</sup> Mata'au lavilavi 'inaya tomatou ediavo imiedi leisu 'inaya, taudi niboana luvefadi ni'a i'wahalidi. 'Inega leisu ena vonega 'wavi 'ifoqeyedi, ta wese toveviihika qabudi givea qiaqiedi. <sup>17</sup> \* leisu ena viaqa ba'e 'inega tovesimasimana Aisea ena vona ana aqiaqi 'ifoqe vonaya,  
"Tauna eda visiqa be wese ada vihiqayavo 'ewa yavuledi."

*Tomotou nuanuadi leisu ina 'abibodea ta ge adi fata*  
(Luke 9:57-62)

<sup>18</sup> Tuta nana leisu tomatou qabudi 'itedi itoa vivilia 'inega ana to'abibodayavo vonedi ina luvivila lavu di'wenaya. <sup>19</sup> 'Inega taha luvine ana tove'ita mai leisu 'inaya ta voneaya, "Tove'ita, ma'inaya utautauya nuanuagu be ena 'abibodeu."

<sup>20</sup> \* 'Inega leisu tomatou nana ve'iea vonaya, "Bwadu'e ma adi vetoa ta wese manu ma adi nevuqa, ta ya'a Tomotou Natuna ge taha egu 'ebeveyawaimo."

<sup>21</sup> \* Wese to'abiboda taha mai leisu 'inaya ta vonaya, "Kaiwabu, nuanuagu ena 'abibodeu ta nugweta una awafelegu be tamagu ena ba'eyei yawaina nagumwala ta ena tavunia, e 'inega ena 'abibodeu."

<sup>22</sup> 'Inega leisu ve'iea vonaya, "Aqiaqina u'abibodegu, ta tomeqabu niboanidi 'ali'aligidi e taudiega edi to'aligayavo ina tavunidi."

*Isisu yaqina waiwaina givedaumwalia*  
(Maki 4:35-41; Luke 8:22-25)

<sup>23</sup> leisu ana to'abibodayavo maega igelu wagaya, <sup>24</sup> ta tuta nana ivavaukamana 'inega yaqina qiduana 'ifoqe ta wese nufula luveafedi tuta goyona ida damana. Ta leisu 'eno motaiva waga gamonaya. <sup>25</sup> 'Inega to'abiboda dina idivanoya ivoneaya, "Kaiwabu, una iuleda mana tuta goyona kana damana!"

\* 8:11: Lk 13:29 \* 8:12: Md 22:13; 25:30; Lk 13:28 \* 8:17: Ais 53:4 \* 8:20: 2Kol 8:9 \* 8:21: 1Kin 19:20

<sup>26</sup> \* Ta Ieisu ve'iedi vonaya, "Tola'ai weaqina omwanimwaniniva? Omi'a emi vetumaqana goyona." 'Inega Ieisu ya'itoto ta yaqina be wese nufula lugwaeyedi vonaya, "Olua'u!" Tuata yaqina be wese nufula 'avalagwaedi, 'inega lavu nana lu'otea.

<sup>27</sup> 'Inega nuadi voqana ta ivonaya, "To'oloto ba'e, mana yani qabuna ivelumatamatayagea, ta wese yaqina be nufula bonana ivematamatayagea?"

*Ieisu niboana veifadi* 'wavi 'ifoqeyedi

(*Maki 5:1-20; Luke 8:26-39*)

<sup>28</sup> Ieisu ma enavo ivaukamana lavu di'wenaya ta ilugu me Gelasine edi di'we 'inaya. 'Inega 'oloto magilafudi niboana luveifadi ni'a i'wahalidi deba'unuyega i'ifoqe. Ta edi ilivu veifana 'ebegaululu 'inega ge taha toga ana fata di'we omo'e 'inaya natauya. <sup>29</sup> \* Magilafudina Ieisu i'itea 'inega ivegabegabea ivonaya, "Ei, o'a Yaubada Natuna, tola'ai una viaqi 'imaya? Luvematasabu ana 'aubena nawale, ta o'a nage ni'a umaimai sabi luvematasabuma?"

<sup>30</sup> Ta di'wenaya bawe 'eala iduaduala ta adi to'itamakiavo itoatoa. <sup>31</sup> 'Inega niboana luveifa dina Ieisu ivenoqiea ivonaya, "Eguma ana 'wavi 'ifoqeyema, e 'inega nuanuama una luvetunema ana tauya bawe 'idia ana lugu."

<sup>32</sup> 'Inega Ieisu vonedia, "Otau!" Tuata 'oloto magilafudina 'idiega niboana luveifadi i'ifoqe 'inega itauya ilugu bawe 'idia. 'Inega bawe diavona ivihila iwebui dabega i'elube'u lavuya ta ifonu. <sup>33</sup> 'Inega bawe adi to'itamakiavo idena itauya edi 'abagaya, ta yani diavona ni'a i'itedi ediavo 'idia iveqaeyedi. Ta wese ivelulu'uyayea ma'oda 'inega 'oloto magilafudina iveaqiaqi 'aiqa niboana luveifadi 'idiega. <sup>34</sup> Ta totoa 'abaga qabudi itauya Ieisu 'inaya sabi 'itana, ta tuta nana ilobea 'inega ivona waiwai 'inaya vonigo edi di'we nanogei ta natauya mali di'we 'inaya.

## 9

*Ieisu 'oloto belubeluna giveaiaqiea*

(*Maki 2:1-12; Luke 5:17-26*)

<sup>1</sup> \* 'Inega Ieisu wagaya gelu vaukamana 'evivi ena 'abagaya. <sup>2</sup> 'Inega taha 'oloto belubeluna vaina tomotau ma 'ivina i'avalei imiea Ieisu 'inaya. Ta Ieisu to'ovala dina edi vetumaqana 'itea 'inega tovevihuq nana vonea vonaya, "Natugu, ge una nuavita, mana eu luveifayavo ni'a yanuataqodi."

<sup>3</sup> Ta vaina luvine ana tove'itayavo Ieisu ena vona inoqolia, e taudiega ivetala'aiedi ivonaya, "Oloto ba'e ena vona 'inega taunega givaneyea kavona tauna Yaubada 'idewani."

<sup>4</sup> \* Edi nuanua Ieisu ni'au alamania ta vonedi vonaya, "Tola'ai weaqina giwalimiega nuanua veifadi weaqidi onuanua? <sup>5</sup> Ta isana ma'oda ena vona 'aiqa 'oloto ba'e 'inaya, nage ena vonaya, 'Eu ilivu luveifana ni'au yanuataqodi', nage ena vonaya, 'Uya'itoto utauya!' <sup>6</sup> \* Ta nuanuagu ona alamani aqiaqiea ya'a Tomotau Natuna me egu luvine waiwaina, ta luvine nana ena vefewea bwa'obwa'oya, 'inega wese agu fata tomotau edi ilivu luveifana ena nuataqodi." 'Inega Ieisu belubelu nana vonea vonaya, "Uya'itoto, eu 'ebana u'avalei ta utauya eu 'abagaya." <sup>7</sup> 'Inega 'oloto nana ya'itoto ta tauya ena 'abagaya.

<sup>8</sup> Tuta nana qabu diavona ba'e viaqa nana i'itea 'inega nuadi voqana 'ena'ina, mana ialamani aqiaqiea vonigo Yaubada ena waiwai ba'e 'oloto nana neia ta vetunei mai tomotau 'idia. 'Inega Yaubada iawatuboya ba'e yani nana weaqina.

*Ieisu Madiu gabea*

(*Maki 2:13-17; Luke 5:27-32*)

<sup>9</sup> Ieisu di'we ba'e nogea ta tautauya, 'inega takesi ana to'ewa 'itea ana wawa Madiu vanue 'ebefewa 'inaya toatoa. 'Inega Ieisu vonea vonaya, "Umai u'abibodegu!" 'Inega Madiu ya'itoto ta Ieisu 'abibodea.

\* 8:26: Md 14:31; Same 89:9    \* 8:29: Mk 1:24; Lk 4:34    \* 9:1: Md 4:13    \* 9:4: Lk 9:47; Ion 2:25    \* 9:6: Ion 17:2

<sup>10</sup> Ta tuta nana Iesu ma ana to'abibodayavo ilugu Madiu ena vanuea sabi 'ai, 'inega takesi ana to'ewayavo 'eala be wese toveilivu veifa imai, ta Iesu ma ana to'abibodayavo maega i'ai. <sup>11</sup> \* Ta vardi Falisi Iesu i'itea, 'inega ana to'abibodayavo ivetala'aiedi ivonaya, "Tola'ai weaqina emi Tove'ita takesi ana to'ewayavo ta wese toluveifadi maega i'ai'ai?"

<sup>12</sup> Ta Iesu edi vona ba'e noqolia 'inega vonedi vonaya, "Taudi aqiaqidi ge daluaqiaqiedi be ina tauya togiveaqiaqi 'idia, ta 'esi tovevhiqa nuanuadi togiveaqiaqi. <sup>13</sup> \* Ta luaqiaqiemi be Yaubada ena vona Buki Nugwenugweina gamonaya ona 'itea 'inega ona alamaniana ta ona nuaia, vonaya, 'Yubai ovegubayedi 'iguya ge nuanuagu, ta 'esi nuanuagu tomotau ona nuakokoloyedi.' "Ya'a ge eda mai tunutunuqidi weaqidi, ta 'esi yamai toluveifadi sabi iuladi."

*Vetala'ai vedede weaqina*  
(Maki 2:18-22; Luke 5:33-39)

<sup>14</sup> \* 'Inega Ioni Togivebabitaiso ana to'abibodayavo imai Iesu 'inaya ivetala'aiea ivonaya, "Ima'a ta wese Falisiavo maega vaina tuta 'inaya avevedede, ta ma'oda 'inega au to'abibodayavo ge ida vedede?"

<sup>15</sup> 'Inega Iesu vona sesebaiega vonedi vonaya, "Tola'ai ana aqiaqi 'eguma vaqi ana toyo'oyavo ina nuavita tuta nana tovaqi me'olotona maega itoatoa? Ge taha wese ana aqiaqi! Ta nawale tuta maimai 'inaya vaina tomotau tovaqi nana ina kafia ina tauyea, 'inega enavo me edi nuavita ina vedede."

<sup>16</sup> Ta wese vona sesebaiega vonedi vonaya, "Ge ana fata be kaleko vauvauna matavusinega kaleko 'itu'ituwaina kana bwabwadei. Ge daluaqiaqiea mana nawale kana 'utuya 'inega bwabwada vauvauna nabwagogoma ta kaleko 'itu'ituwainana ena eabu nagive'ena'ia." <sup>17</sup> Wese 'idewani 'oine wagen a yubai 'wafidiega weaqina Iesu vonedi vonaya, "Eguma 'oine vauvauna wage 'itu'ituwaina 'inaya kana iwaqia 'inega nawale wage nana nanabahabuya, ta 'oine nana naguiwaqa ta wese wage nana naluveifa. Ta 'esi luaqiaqiea be 'oine vauvauna kana iwaqia wage vauvauna gamonaya, 'inega magilafudi tuta kuena ina 'eno'eno."

*Iesu vivine magilafudi giveaqiaqiedi*  
(Maki 5:21-43; Luke 8:40-56)

<sup>18</sup> Iesu nawale vonavona 'idia, 'inega me Diu edi toluvine taha mai, ta Iesu 'iawanaya tuqatuqanega sobadi ta voneaya, "Kaiwabu, natugu mevavinena yawaina ni'a gumwala, ta nuanuagu una mai be nimauyega 'wafina una gitonovi 'inega nayawaha 'evivi." <sup>19</sup> 'Inega Iesu ya'itoto ta toluvine nana maega itutuvila itauya, ta wese ana to'abibodayavo 'idewani.

<sup>20</sup> Nawale itautauya 'inega taha vavine gwavudiega mai ta Iesu ana kwakwalufai noyana gitonovia. Vavine nana vihiqa 'ena'ina 'ewea 'inega sulalina inoinoqa ya'wala tuwelo gamonaya, <sup>21</sup> \* ta nuanega vonaya, "Eguma Iesu ana kwakwalufai ena gitonoviamo e 'inega ena veaqiaqi."

<sup>22</sup> 'Inega Iesu givila ta vavine nana 'itea vonaya, "Novugu, ge una nuanua ta 'esi una qaiawa, eu vetumaqana 'inega ni'a uveaqiaqi." Ta omo'e tuta nana 'inaya vavine nana veaqiaqi.

<sup>23</sup> 'Inega Iesu 'ifoqe lugu toluvine nana ena vanuea, 'inega todou ta wese to'ewabamu 'itedi ta bonadi veago va'ine. <sup>24</sup> 'Inega Iesu vonedi vonaya, "O'ifoqe! Gwama ba'e ge da'aliga ta 'esi 'eno motaiva 'eno'eno." 'Inega todou Iesu idagiea. <sup>25</sup> 'Inega qabu diavona i'ifoqe ta Iesu lugu gwamana 'inaya ta nimanaya kafi, e 'inega gwama nana ya'itoto. <sup>26</sup> Ta 'abiboda vale ba'e yawala di'we qabuna 'idia.

*Iesu matakwaya magilafudi giveaqiaqiedi*

<sup>27</sup> \* Iesu omo'e di'we nana noega ta tautauya, 'inega matakwaya magilafudi i'abi'abi-bodea ta igabagaba ivonaya, "Deibida tubuna ye, uda nuakokoloyema!"

\* 9:11: Lk 15:2    \* 9:13: Md 12:7; Ose 6:6    \* 9:14: Lk 18:12    \* 9:21: Md 14:36    \* 9:27: Md 20:29-34

<sup>28</sup> 'Inega vanuea lugu ta magilafudina imai 'inaya ta Ieisu vonedi vonaya, "Ma'oda, nage ovetumaqanegu be agu fata matami ena giveaqaqiedi?"

Ta ive'iea ivonaya, "Ao Kaiwabu, au fata."

<sup>29</sup> 'Inega Ieisu matadi gitonovia ta vonedia, "Emi vetumaqana 'inega matami ina veaqaqi", <sup>30</sup>\* 'inega magilafudi matadi 'eaea ta Ieisu luvine waiwaina neidi vonaya, "Ge taha toga 'inaya ona vonayei ba'e weaqina!" <sup>31</sup> Ta itutuvila itauya, 'inega Ieisu Valena iyawala dadanea di'we qabuna 'idia.

#### *Ieisu nakunaku taha giveaqaqiea*

<sup>32</sup> 'Oloto magilafudina ni'a itauya ta Ieisu ma ana to'abibodayavo nawale itoatoa, 'inega vaina tomotau taha 'oloto imiea Ieisu 'inaya. 'Oloto ba'e ge ana fata naveqae mana niboana luveifana meana givilea. <sup>33</sup>\* Ta tuta nana Ieisu niboana luveifana 'wavi 'ifoqeyea 'inega 'oloto nana veaqaqi ta veveqae. Ta tomotau qabudi nuadi voqana 'inega ivonaya, "Tuta lova 'inega be ana laba ba'itagana ge taha toga ena viaqa ba'e 'idewani kada 'itea Isileli gamonaya."

<sup>34</sup>\* Ta Falisi ivonaya, "Tauna niboana luveifadi 'wavi'wavi 'ifoqeyedi niboana luveifadi edi kaiwabu ena waiwaiega."

#### *Ieisu tomotau nuakokoloyedi*

<sup>35</sup>\* 'Inega Ieisu 'abaga agoagodi be goyogoyodi 'idia luvivila ta edi vanue tafwalolo 'idia ve'ita ta lugaihi Yaubada ena 'Ebeluvine valena weaqina, ta wese vihiqa qabudi tomotau 'idiega giveaqaqiedi. <sup>36</sup>\* Ta tuta nana Ieisu qabu qidwana 'itedi 'inega 'ita nuaduyedi, mana me edi nuavita itoatoa ta wese ge adi toiulamo, 'inega qabu dina kavona sifi luluve'waividi ge adi to'itamakimo. <sup>37-38</sup>\* 'Inega ana to'abibodayavo vonedia, "Bolimana qidwana ana tuta ni'a 'ifoqe ta toala ge 'ealidi, 'inega bolimana ana Kaiwabu 'inaya ona venoqi be yaqisa tofewa 'eala navetunedi ena vaoqaya sabi ala."

## 10

#### *Ieisu ena tovaletuyana adi wawayavo*

*(Maki 3:13-19; Luke 6:12-16)*

<sup>1</sup>\* Ieisu ana to'abibodayavo adi yau tuwelo gabedi ta ena luvine be wese ena waiwai neidi, 'inega adi fata niboana luveifadi tomotau 'idiega ina 'wavi 'ifoqeyedi, ta wese vihiqa qabudi tomotau 'idiega ina giveaqaqiedi. <sup>2</sup> Tovaletuyana tuwelo dina adi wawa ba'e: Nugweta Saimoni tauna igabea Fita, 'inega taina Anidulu be wese Iemesa ma taina Ioni, taudi tamadi Sebedi. <sup>3</sup> Ta wese Filifi be, Batolomio be Tomasi ta wese Madiu, tauna takesi ana to'ewa. Ta wese Iemesa tauna Alifio natuna be Tadiasi, <sup>4</sup> ta wese Saimoni tauna Seloti edi qabu 'idiega, be wese Iudasa Isakaliota, tauna Ieisu ana tosuluva.

#### *Tovaletuyana edi fewa*

*(Maki 6:7-13; Luke 9:1-6)*

<sup>5</sup> Ieisu tuwelo dina vebibinedi ta vetunedi vonaya, "Ge ona tauya taudi ge me Diu 'idia, ta wese gebu Samelia 'abaganavo 'idia ona lugu. <sup>6</sup>\* Ta 'esi ona tauya me Isileli 'idia, mana vaina qabu 'idiega edi toa kavona sifi luluve'waividi. <sup>7</sup>\* 'Inega ona tauya ona lugaihi 'idia ona vonaya, 'Yaubada ena 'Ebeluvine tuta goyona na'ifoqe.' <sup>8</sup> Tovevhiqayavo ona giveaqaqiedi be to'aliga ona giveya'itoto 'eviviedi be 'wago'wagoidi ona giveaqaqiedi ta ina vevunavunaqa, be wese niboana luveifadi tomotau 'idiega ona 'wavi 'ifoqeyedi. Yaubada ena veyoluba ni'au nei kavovomi 'inega wese luaqiaqiemini omi'a ona fewa kavovo tomotau 'idia, ta ge ve'ia weaqina ona nuanua.

\* 9:30: Md 8:4 \* 9:33: Mk 2:12 \* 9:34: Md 12:24; Mk 3:22; Lk 11:15 \* 9:35: Md 4:23; Mk 1:39 \* 9:36: Sek 10:2; Naba 27:17; 1Kin 22:17; Md 14:14; Mk 6:34 \* 9:37-38: Lk 10:2 \* 10:1: Mk 6:7; Lk 9:1 \* 10:6: Iel 50:6 \* 10:7: Md 3:2; 4:17; Lk 10:9,11

<sup>9</sup>\* “Ta emi luvivila ’inaya gebu mane ona dodoi emi kodekodea ’abwaga weaqina, <sup>10</sup>\* ta ge emi kode ona ’ewei, ta wese ge ami kaleko vemagilafuna. Ta wese ’aqeyafayafa be kewala ge ona ’ewedi, mana tofewa ba’e yani diavona adi fata ina lobedi tomotau ’idiega. <sup>11</sup> Ta ’eguma ’abaga agona nage goyona ’inaya ona tauya nugweta ona sali togama ena ilivu aqiaqina, ’inega maega ona toatoa ana laba ’abaga nana ona nogea. <sup>12</sup>\* Ta ’eguma taha vanue ’inaya ona lugu ’inega nugweta tonivanue ona lukaiwa ’idia, <sup>13</sup> ta ’eguma ena susuyavo edi ilivu aqiaqina ’inega ona vona veyolubedi, ta ’eguma gebu ’inega ge taha tola’ ai ona vonei ’idia. <sup>14</sup>\* Ta ’eguma ge taha toga na’ebe’ewemi ena vanuea nage emi vona ge nanoqonoqoli, e ’inega ’abaga nana ona nogei, ta ’aqemiega fwayafwaya ona vavutuvutuqia ta ona tauya.

<sup>15</sup>\* “Vonahaqiaqi, nawale vetala’ ai ana ’aubena ’inaya Yaubada me Sodoma be wese me Gomola naluvematasabudi, ta yavona aqiaqiemi tomeqabu ge ida ’ebe’ewemi edi vanuea nawale ’aubena nana ’inaya luvematasabu ago va’inena ina lobe a Yaubada ’inega.

*Isisu ena tovaletuyanayavo nawale vita ina lobe a*

*(Maki 13:9-13; Luke 21:12-17)*

<sup>16</sup>\* “Onoqolia! Omi’a yavevetunemi kavona sifi ’idewani yubai sasasadi nuanidia. ’Inega ona ’itamaki aqiaqiemi ta tuta qabuna ona veilivu aqiaqi. <sup>17</sup>\* Vonahaqiaqi, ona ’itamakimi, mana nawale tomotau ina tauyemi kotu ’inaya be vanue tafwalolo ’inaya ina vunuqa dadanemi wayo metametanega. <sup>18</sup> Ta wese tomotau ina tauyemi toluvineavo be kiniavo ’iawadia ta ina ve’ewemi, mana omi’a agu to’abibodayavo. Ta omo’e tuta nana ’inaya Valegu Aqiaqina ona simanea ’idia, ta wese taudi ge me Diu ’idia. <sup>19</sup> Ta tuta nana ina ve’ewemi toluvineavo ’iawadia ge ona nuanua ma’oda ona vona ’aiqa, mana nawale tuta nana ’inaya Yaubada emi vona naneimi, <sup>20</sup>\* ta omi’a ge ona vona, ta ’esi Yaubada Niboanina ’imia toatoa navonavona.

<sup>21</sup>\* “Inega ’oloto taina nasuluvei toluvineavo ’idia be ina luve’aligia, be wese tauna natuna nasuluvea be ina luve’aligia, ta wese gogama inadiavo be tamadiavo ina vevoalanedi ’inega ina awafeledi toluve’aliga ’idia. <sup>22</sup> Ta tomotau qabudi ina vevoalanemi mana omi’a agu to’abibodayavo. Ta tomeqabu ina tovololo’i’ita ana laba tuta ana ’ebelu’ovoa ’inaya, e taudi yawai vataya ina lobe a. <sup>23</sup> Ta ’eguma taha ’abaga ’inaya ina veilivu veifa ’imia, ’inega ona dena mali ’abaga ’inaya. Yavona aqiaqiemi, emi fewa nana ge ona lu’ovoi ’abaga qabudi Isileli gamonaya ana laba ya’a Tomotau Natuna ena ’evivi ena mai.

<sup>24</sup>\* “To’abiboda gebu ana fata ena tove’ita naveago va’inei, ’idewani wese tofewa gebu ana fata ena kaiwabu naluvinei. <sup>25</sup>\* Tola’ ai ’ifo’ifoqe ya’a emi Tove’ita ’iguya, e nawale wese ’idewani na’ifoqe ’aiqa omi’a to’abiboda ’imia. Ta tola’ ai ’ifo’ifoqe kaiwabu taha ’inaya, e wese ’idewani na’ifoqe ena tofewa ’inaya. Ta ya’a emi Kaiwabu ni’a i’awaluveifegu ivonaya be vonigo ya’a niboana luveifadi edi kaiwabu Belisibubi, e ’inega nawale omi’a egu qabuyavo wese ’idewani ina ’awaluveifa aqiaqiemi.

*Mwaniniva weaqina*

*(Luke 12:2-7)*

<sup>26</sup>\* “Inega taudi togivegaululu gebu ona mwaninivedi, mana yani qabuna ’wai’wavididi nawale Yaubada nave’ifoqeyedi, ta tola’ ai edi nuanua ’inaya i’waivea wese nave’ifoqeyedi. <sup>27</sup> Inega tola’ ai velovelovana ’inaya yasimanea ’imia, ’aubenaya ona simanayea tomotau qabudi ’idia, ta tola’ ai yave’awahayayayea ’imia omi’a ona simana ’ifoqeyea.

<sup>28</sup>\* “Ta taudi nuanuadi ’wafimi ina luve’aligia gebu ona mwaninivedi, mana taudi ’wafi mimo ana fata ina luve’aligia ta niboaniami gebu. Ta ’esi luaqiaqiemi be Yaubada

\* 10:9: Lk 10:4 \* 10:10: Lk 10:7; 1Kol 9:14 \* 10:12: Lk 10:5-6 \* 10:14: Lk 10:10-12; Via 13:51 \* 10:15: Md 11:24; Iud 7 \* 10:16: Lk 10:3; Lom 16:19 \* 10:17: Mk 13:9-11; Lk 12:11-12; 21:12-15 \* 10:20: Ion 14:26 \* 10:21: Mai 7:6; Md 10:35; Mk 13:12; Lk 21:16 \* 10:24: Lk 6:40; Ion 13:16; 15:20 \* 10:25: Md 9:34; 12:24; Mk 3:22; Lk 11:15 \* 10:26: Mk 4:22; Lk 8:17 \* 10:28: Iem 4:12

ona mwaninivea, mana tauna ana fata 'aiwe 'ala'alata 'inaya 'wafimi ta wese niboanimi naluveawalidi. <sup>29</sup> Dagedage magilafudi kagimwanedi adi ve'ia siliba 'aigedanega ta tua Yaubada 'ita'itamakidi, ta 'eguma taha 'idiega na'aliga e Tamami ni'a alamania. <sup>30</sup> Ta wese Yaubada debami adi yau tawa alamanidi. <sup>31</sup>\* 'Inega gebu giwalimi naha'ala tomotau weaqidi mana omi'a Yaubada ena yani qiduana, ta 'abiboda dagedage.

<sup>32</sup> "Eguma tomeqabu ina 'awahaqiaqiegu tomotau matadia, nawale wese ya'a Tamagu mahalaya matanaya ena 'awahaqiaqiedi. <sup>33</sup>\* Ta 'eguma tomeqabu ina vegeqegu tomotau matadia, nawale wese ya'a Tamagu mahalaya matanaya ena vegeqedi.

*Vevoalana gade nuanidia*

(Luke 12:51-53; 14:26-27)

<sup>34</sup> "Ge ona vonaya be ya'a eda mai bwa'obwa'oya be toadaumwala eda miei, ta 'esi egu mai 'inega vetoatoasi'i na'ifoqe tomotau nuanidia. <sup>35</sup>\* Ta egu mai nana 'inaya, 'Gwama me'olotona tamana navevoalanea,

ta wese gwama mevavinena inana navevoalaneli,

ta vavine vaqivaqidi lawadi ina vevoalaneli,

<sup>36</sup> ta taha 'oloto ena gade gamodiega ina vevoalanea.'

<sup>37</sup> "Eguma taha toga veveyolubegu ta ena veyoluba tamana be inana 'idia veqidua va'inegu 'inega ge ana fata na'abibodegu. Ta wese 'idewani 'eguma taha toga veveyolubegu ta ena veyoluba natuna me'olotona nage mevavinena 'idia veqidua va'inegu e 'inega ge ana fata be na'abibodegu. <sup>38</sup>\* Ta 'eguma togama yawaina ge nahawafela aqiaqiei 'iguya ta ge nuanuana yuvaqa be veilage nalobei 'idewani ya'a nawale ena lobe a 'etoluai 'inaya, e tauna ge agu fata be ena 'awanatunea. <sup>39</sup> 'Eguma taha toga taunega yawaina weaqina fewafewa nawale yawaina naluve'waivia, ta 'esi 'eguma taha toga yawaina naluve'waivia weaqigu e nawale yawai aqiaqina nalobe a.

*Ve'ia weaqina*

(Maki 9:41)

<sup>40</sup>\* "Ta omi'a 'eguma taha toga na'ebe'ewemi 'inega tauna wese na'ebe'ewegu. Ta 'eguma taha toga na'ebe'ewegu 'inega wese agu Tovetune na'ebe'ewea. <sup>41</sup> Ta 'eguma taha tomotau taha tovesimasimana na'ebe'ewea mana tauna Yaubada ena tovesimasimana, 'inega tomotau nana nawale ana ve'ia na'ewea 'idewani tovesimasimana ana ve'ia. Ta wese 'eguma taha tomotau taha 'oloto tunutunuqina na'ebe'ewea mana tauna 'oloto tunutunuqina, e 'inega nawale tomotau nana ana ve'ia nalobe a 'idewani 'oloto tunutunuqina ana ve'ia. <sup>42</sup> Ta 'eguma taha tomotau agu to'abiboda vauvauna go'ila fay'o'una navenumea mana tauna agu to'abiboda, 'inega yavona aqiaqiemi tomotau nana nawale ana ve'ia aqiaqina na'ewea."

## 11

<sup>1</sup> Iesu ena lugaihi lu'ovoia ana to'abibodayavo tuwelo 'idia, 'inega di'we nana nogea ta luvivila 'abaga taha taha 'idia, ta omo'e 'inaya veve'ita ta wese lulugaihi.

*Ioni Togivebabitaiso Iesu Valena noqolia*

(Luke 7:18-35)

<sup>2</sup> Ioni Togivebabitaiso ni'au ia'uya vanue 'ebeyoqona 'inaya, ta tuta nana To'etoyavua ena fewa valena noqolia, 'inega vaina ana to'abibodayavo vetunedi itauya Iesu 'inaya, <sup>3</sup> ta ivetala'aiea ivonaya, "Ima'a To'etoyavua Keliso aba'eba'eyea. Nage o'a tau'u To'etoyavuauna, nage mali 'oloto weaqina ana ba'eba'e?"

<sup>4</sup> 'Inega edi vona Iesu ve'evivia vonaya, "Ona 'evivi Ioni 'inaya ta yani diavona ni'au o'itedi ta onoqolidi ona veqaeyea 'inaya, 'idewani <sup>5</sup>\* matadi kwayakwayana ni'au i'ita'ita aqiaqi ta wese 'aqedi veifana ni'au iveaqiaqi iyabayaba, wese 'wago'wagoidi 'wafidi

\* 10:31: Md 6:26 \* 10:33: Mk 8:38; Lk 9:26; 2Tim 2:12 \* 10:35: Mai 7:6 \* 10:38: Md 16:24-25; Mk 8:34-35; Lk 9:23-24; 17:33; Ion 12:25 \* 10:40: Mk 9:37; Lk 10:16; Ion 13:20 \* 11:5: Ais 35:5-6; 61:1

veaqiaqi 'evivi, ta taniqadi kwavakwavana ni'au vona inoqonoqolia, ta to'aliga iyawaha 'evivi, ta wese lukwalukwadi vale aqiaqina ni'au inoqolia. <sup>6</sup> 'Inega ona tauya Ioni 'inaya ta ona vonea ge wese navenuana magilafu ya'a togama, mana 'eguma taha toga ena vetumaqana weaqigu gebu nadawalili 'inega tauna naqaiawa."

<sup>7</sup> Tuta nana Ioni ana to'abibodayavo i'evivi itautauya, 'inega leisu qabu diavona Ioni weaqina simana 'idia vonaya, "Lova qabumi di'we 'ava'avaya otauva Ioni sabi noqolina, ta tola'ai ovonaya be oda 'itei? Nage otauva taha 'oloto dawalilina kavona didiala yaqina dayueyuei sabi 'itana? Ana 'ita gebu. <sup>8</sup> Nage otauva taha 'oloto ana kaleko kaikaiwabuna sabi 'itana? Gebu, mana taudi adi kaleko kaikaiwabuna toluvine qidududuadi edi vanuea itoatoa. <sup>9</sup> Ta tola'ai weaqina otauva di'we 'ava'avaya? Nage onuaia vonigo tovesimasimana taha oda 'itei? Vonahaqiaqi, 'oloto nana ni'a o'itea tovesimasimanayavo qabudi veqidua va'inedi. <sup>10</sup> \* Ioni nana weaqina lova Yaubada ena vona Buki Nugwenugweina 'inaya ba'e 'idewani simanea vonaya, 'Ba'e egu tovaletuyana ena vetunea natauya ta eu 'eda naqadalia.' "

<sup>11</sup> 'Inega leisu wese vonaya, "Vonahaqiaqi, Ioni Togivebabitaiso tauna totoa bwa'ob-wa'o qabudi veqidua va'inedi, ta taudi ge adi wawa 'ena'ina mahala ena 'Ebeluvine gamonaya Ioni iveqidua va'inea. <sup>12</sup> \* Ta Ioni Togivebabitaiso ena tuta 'inega be ana laba ba'itagana tomotau nuanuadi edi waiwaiega mahala ena 'Ebeluvine ina 'ewea. <sup>13</sup> Lova tovesimasimanayavo qabudi edi vonayavo be Mosese ena luvineavo 'idiega ivetalasimasimanea 'Ebeluvine nana weaqina ana laba Ioni mai. <sup>14</sup> \* Ta 'eguma nuanuami be tovesimasimanayavo edi vona ona 'awahaqiaqiea 'inega ona alamani aqiaqiea Ioni tauna Ilaitia. Mana taudi tovesimasimana diavona ena mai weaqina lova isimanea. <sup>15</sup> 'Inega 'eguma ma teniqami vona ba'e ona noqolidi!

<sup>16</sup> " 'Inega omi'a lagata ba'e ma'oda ena vetalatutula 'aiqa weaqimi? Nage ena vonaya vonigo omi'a 'idewana gogama 'ebevegimwane ana 'abaga gamonaya ilahalaha ta ediavo 'idia igabagaba ivonavonaya,

<sup>17</sup> 'Emavo, ma'oda 'inega alavulavua ta ge oda ouou.

Ta wese a'ewa'ewabamu ta ge oda doudou.'

<sup>18</sup> Vetalatutula ba'e ana alamani, Ioni mai ta ge da'ai ta wese ge danuma, ta 'inega omi'a ovonaya, 'Niboana veifana lugu Ioni 'inaya.' <sup>19</sup> \* Ta ya'a Tomotau Natuna yamai be ya'ai'ai ta yanumanuma ta wese weaqigu olugwae ovonavonaya, "Oloto ba'ena to'ai ta tonuma va'ine, ta wese takesi ana to'ewayavo be wese luveluveifadi veiaianedi.' Nawale tomotau Yaubada ena alamani aqiaqi ina 'itea vuaqa aqiaqina 'inega."

*Vaina* 'abaga luveifadi adi luvematasabu

(*Luke 10:13-15*)

<sup>20</sup> Iesu 'abaga taha taha 'idia viaqa waiwaidi viaqidi, ta 'abaga diavona adi totoayavo ge ida nuagivila edi luveifayavo 'idiega, 'inega lugwaeyedi vonaya, <sup>21</sup> \* "Omi'a me Kolesini be wese me Bedesaida nuakokolomi, mana 'ebenuavoqana diavona ni'au yaviaqidi 'imia ta ge oda nuagivila. Ta 'eguma me Taia be wese me Saidoni ba'e viaqa diavona lova eda viaqidi matadia e 'inega ida nuagivila ta edi vaiqavu 'inega taudiega ida ve'itayedi tawa edi ilivu luveifana 'idiega ni'a inuagivila. <sup>22</sup> Ta yavona aqiaqiemi, vetala'ai ana 'aubena 'inaya nawale me Taia be wese me Saidoni Yaubada naluvematasabudi, ta omi'a luvematasabu qidua va'inena ona lobe. <sup>23</sup> \* Ta me Kafaneumi omi'a ma'oda? Vonigo taumiega ogivaneyemi mahalaya, wa? Ta ge ami fata! Ta 'esi nawale to'aliga edi 'abagaya ina a'uwebuiemi, mana 'ebenuavoqana dina ni'au yaviaqidi 'imia ge oda nuagivila 'idiega. Ta 'eguma lova me Sodoma 'idia ba'e viaqa diavona eda viaqidi ida nuagivila, 'inega Yaubada ge daluveawalidi ta ba'itagana edi 'abaga nawale kada

\* 11:10: Mal 3:1; Lk 1:76 \* 11:12: Lk 16:16 \* 11:14: Mal 4:5; Md 17:10-13; Mk 9:11-13 \* 11:19: Md 9:10  
\* 11:21: Ais 23:1-18; Isi 26:1-28:26; Ioe 3:4-8; Emo 1:9-10; Sek 9:2-4 \* 11:23: Ais 14:13-15; Nug 19:24-28



'itea da'eno'eno. <sup>24</sup>\* 'Inega vetala'ai ana 'aubena 'inaya Yaubada nawale me Sodoma naluvematasabudi, ta omi'a luvematasabu qidua va'inena ona lobeia."

*Toa aqiaqina Iesu 'inega*  
(*Luke 10:21-22*)

<sup>25</sup>\* Ba'e vona diavona 'abibodanaya Iesu venoqi vonaya, "Kaiwa Tamagu, o'a mahala ta bwa'obwa'o adi Toluvine, alamani ba'e ua'ukwaivea toalamaniavo ta tonua'eqa'u 'idia, ta 'esi tomotau kavokavovo alamani nana ni'a ugive'ifoqeyea 'idia. <sup>26</sup> Tamagu, vonahaqiaqi ba'e eu nuanua aqiaqina." <sup>27</sup>\* Ta wese vonaya, "Yani qabuna Tamagu ni'a a'uya nimaguya. Ge taha toga dahalamanigu ta Tamagu ana 'aidegamo. Ta wese ge taha toga Tamagu dahalamaniana, ta ya'a agu 'aidega. Ta wese 'eguma tomeqabu Tamagu nuanuadi ina alamania 'inega ya'a alamani nana ena give'ifoqeyea 'idia.

<sup>28</sup>\* "Ta omi'a emi 'onena vitana ona mai 'iguya be veyawai ena neimi. <sup>29</sup> Egu 'ebe'ava la bai'wana ona 'ewei ona 'avalayea, ta ona vetutumegu mana ya'a tonuawebui ta egu ilivu nuvana, 'inega veyawai 'iguyega ona lobeia yawaimi weaqina. <sup>30</sup>\* Mana egu bai'wana ge vitana, ta wese egu 'onena meaqana."

## 12

*Iesu Sabate ana Kaiwabu*  
(*Maki 2:23-28; Luke 6:1-5*)

<sup>1</sup>\* Ge tuta kuena 'abibodanaya taha Sabate 'inaya Iesu ana to'abibodayavo maega vaoqa gamonega itautauya, ta to'abiboda dina ma botanidi 'inega witi vuaqina ma walona i'egigoluya ta i'ai'ai. <sup>2</sup>\* Ta tuta nana Falisiavo i'itedi 'inega Iesu ivoneaya, "Kaiwabu u'itei, au to'abibodayavo Sabate ana luvine ibaia ba'e viaqa nana 'inega, waisa?"

<sup>3</sup>\* Ta Iesu edi vona ve'evivia vonaya, "Nage ge oda avoi Buki Nugwenugweina 'inaya i'wayavia, Deibida ma enavo taudi wese 'edewani ibotana? <sup>4</sup>\* 'Inega Yaubada ena vanuea lugu ta beledi gwalagwalana 'ewei 'inega i'ainia, ta beledi nana ma ana luvine vonigo toveguba dimo adi luaqiaqi be ina 'ainia. 'Inega ge ana fata Deibida ma enavo beledi nana ina 'ai, ta ibotana 'inega tua i'ainia. <sup>5</sup>\* Nage wese ge oda avoi Mosese ena luvine gamonaya vonigo Vanue Gwalagwalana ana tovegubayavo Sabate 'aidega 'aidega Sabate ana luvine iqeueunia edi veyoveyoa 'inega, ta ge taha adi ve'ewamo? <sup>6</sup>\* Ta yavona aqiaqiemi, Vanue Gwalagwalana yani qiduana, ta taha tomotau ni'a mai toatoa, ta tauna vanue nana veqidua va'inea. <sup>7</sup>\* Buki Nugwenugweina ena vona vonaya, 'Nuakolokolo nuanuagu ta ge guba yubai 'idiega.'

"'Eguma vona ba'e ana alamani oda alamania 'inega gebu agu to'abibodayavo oda ve'ewedi, mana ge taha luveifana ida viaqi. <sup>8</sup> Mana ya'a Tomotau Natuna Sabate ana Kaiwabu."

*Iesu 'oloto nimana belubeluna giveaqiaqiea*  
(*Maki 3:1-6; Luke 6:6-11*)

<sup>9</sup>'Inega Iesu 'abaga nana nogea ta tauya edi vanue tafwalolo 'inaya lugu. <sup>10</sup>\* E omo'e 'inaya taha 'oloto 'itea nimana belubeluna toatoa. Ta Falisiavo nuanuadi taha luveifana ina lobeia Iesu 'inaya, be yaqisa adi fata ina ve'ewea 'inega ivetala'aiea ivonaya, "Kaiwabu, nage ana fata Sabate 'inaya tovevihiqa kana giveaqiaqiedi?" Ta ivonaya be Iesu ena vona 'evivi 'inega ina tauyeya toluvine 'idia ta ina vekotuya.

<sup>11</sup>\* 'Inega Iesu vona 'eviviedi vonaya, "Omi'a 'eguma taha toga 'imiega ena sifi 'aidegana Sabatea nabe'u vetoaya 'inega nuanuana nalihi vaneyea, waisa? <sup>12</sup> Vonahaqiaqi, sifi

\* 11:24: Md 10:15; Lk 10:12 \* 11:25: 1Kol 1:26-29 \* 11:27: Md 28:18; Ion 1:18; 3:35; 10:15; 17:2 \* 11:28: Iel 31:25 \* 11:30: 1Ion 5:3 \* 12:1: Luve 23:25 \* 12:2: 'Ifo 20:10 \* 12:3: 1Sam 21:1-6 \* 12:4: Luvi 24:5-9 \* 12:5: Naba 28:9-10 \* 12:6: Md 12:41-42 \* 12:7: Ose 6:6; Md 9:13 \* 12:10: Lk 14:3 \* 12:11: Lk 14:5

yani goyona, ta tomotau yani qiduana 'inega ana fata Sabatea iula aqiaqina kana neidi kana viaqi."

<sup>13</sup> 'Inega Ieisu 'oloto nana vonea vonaya, "Nimau usi'otoi!" Tuata 'oloto nana nimana si'otoia 'inega veaqaqi 'evivi 'edewani nimana di'wena. <sup>14</sup> \* 'Inega Falisiavo vanuega i'ifoqe ta adi 'aidega idima govaqa ma'oda Ieisu ina luve'aliga 'aipei.

*Yaubada ena tofewa vevenua'ivinina*

<sup>15</sup> Ta edi dima Ieisu ni'au alamania 'inega 'abaga omo'e nokea tauya mali di'we 'inaya. Ta tomotau 'eala i'abibodea, ta omo'e 'inaya tovevihiqa qabudi giveaqaqiedi, <sup>16</sup> \* ta wese luvinedi ge ina vevonavonayei tomotau 'idia. <sup>17</sup> Ba'e 'inega tovesimasimana Aisea Yaubada ena vona ana aqiaqi ve'ifoqeyea Ieisu weaqina, mana lova vonaya,

<sup>18</sup> \* \* "Ba'e egu Tofewa yavenua'ivinea

ta me egu qaiawa giwaliguyega yaveveyolubea.

Niboanigu ena a'uya 'inaya, be luvine tunutunuqina 'iguyega nasimanea taudi ge me Diu 'idia.

<sup>19</sup> Tauna nawale ge nave'ae'aetoga ta wese ge navekolukolua,

be wese 'abaga gamonaya ge bonana qiduanega navonavona.

<sup>20</sup> Ta tomeqabu dawalilidi 'idewani didiala baibaina gebu nanogedi,

ta wese taudi edi vetumaqana dawalilina kavona odamu niginigina

ge nanogedi ina 'weu, ta 'esi naiuledi,

ana laba tauna luvine tunutunuqina nave'ifoqeyea ena waiwai 'inega.

<sup>21</sup> Ta wese tauna ana wawa 'inega di'we taha taha ana totoayavo ina lu'ita vane 'etoyavua weaqina."

*Ieisu ta Belisibubi*

*(Maki 3:20-30; Luke 11:14-23)*

<sup>22</sup> 'Inega taha 'oloto lova niboana luveifadi edi fewega matana ikwayea ta wese meana igivilea 'inega ge ana fata naveqae imiea Ieisu 'inaya ta giveaqaqiea. 'Inega 'abiboda 'oloto nana ana fata naveqae ta wese na'ita. <sup>23</sup> 'Inega tomotau qabudi nuadi voqana Ieisu ena viaqa weaqina ivonaya, "Nage ba'e 'oloto nana Deibida tubuna?"

<sup>24</sup> \* Ta Falisiavo Ieisu ena viaqa ba'e valena inoqolia ivonaya, "Ba'e yani nana ana fata, mana niboana luveifadi edi kaiwabu ana wawa Belisibubi ena waiwaiega niboana luveifadi 'wavi'wavi 'ifoqeyedi."

<sup>25</sup> Ta Ieisu edi nuanua ni'au alamania 'inega vonedi vonaya, "Belisibubi tauna enavo ge nuanuana na'wavi 'ifoqeyedi." Ta wese vonaya, "Eguma taha 'ebeluvine 'inaya tomotau nuanidia ve'eto'eto'idi 'ifoqe ta taudiega ivevedavi, 'inega nawale 'ebeluvine nana nadawalili ta naluveifa. Wese 'eguma 'abaga nage gade 'idewana nuanidia 'eto'idi na'ifoqe nawale ina toasi'i be edi toa naluveifa. <sup>26</sup> Seitani wese 'idewana 'eguma ma enavo taudiega ina vedavi 'inega edi toa naluveifa ta wese ena 'ebeluvine naqunia. <sup>27</sup> Ni'a ovonaya vonigo ya'a Belisibubi ena waiwaiega niboana luveifadi ya'wavi 'ifoqeyedi, ta ami to'abibodayavo togama isana ena waiwaiega i'wavi'wavi 'ifoqeyedi? Belisibubi 'inega nage Yaubada 'inega? Ba'e weaqina ona nuanua, 'inega wese nuami na'eqa'uya vonigo emi ve'ewa 'iguya ge taha ana vonahaqiaqi! <sup>28</sup> \* Ta ya'a Yaubada Niboanina ena waiwaiega niboana luveifadi ya'wavi'wavi 'ifoqeyedi, 'inega ona alamania vonigo Yaubada ena 'Ebeluvine ni'au 'ifoqe mai 'imia.

<sup>29</sup> "Ebevetalatutula ba'e ona noqolia: 'Oloto waiwaina ena vanuea ge taha toga ana fata nalugu be ena kulufa na'ewedi. Ta 'esi 'eguma tovanawala nugweta wayoyega tovewaiwai nana nimana be wese 'aqena nayoqonia, e 'inega 'abiboda ana fata vanuea nalugu be ena kulufa na'ekilidi. <sup>30</sup> \* 'Eguma taha toga gebu agu toiula 'inega tauna agu

\* 12:14: Ion 5:16 \* 12:16: Md 8:4; Mk 3:12 \* 12:18: Ais 42:1-4 \* 12:18: Md 3:17 \* 12:24: Md 9:34; 10:25  
\* 12:28: Via 10:38; 1Ion 3:8 \* 12:30: Mk 9:40; Lk 9:50

avia. Ta wese 'eguma taha toga ge naiulegu ta tomotau ge nava'auqidi namiedi 'iguya, e tauna egu fewa ana togiveluveifa.

<sup>31</sup>\* “Inega ba'e yavona aqiaqiemi, tomotau edi luveifana ta wese edi vona veifa qabuna Yaubada nanuataqodi. Ta 'eguma taha toga Niboana Gwalagwalana na'awaluveifea 'inega Yaubada ge ana fata tomotau nana nanuataqoi. <sup>32</sup>'Eguma taha toga ya'a Tomotau Natuna na'awaluveifegu 'inega Yaubada nawale tomotau nana nanuataqoya. Ta 'eguma taha toga Niboana Gwalagwalana na'awaluveifea 'inega Yaubada ge ana fata nanuataqoi tuta ba'e 'inaya ta wese tuta maimai 'inaya.”

'Aiwe vuaqidi

(Luke 6:43-45)

<sup>33</sup>\* Ta Iesu wese vonedi, “Eguma 'aiwe aqiaqina 'inega wese vuaqina aqiaqina, ta 'eguma 'aiwe luveifana wese vuaqina luveifana. 'Inega 'aiwe taha taha kana alamanidi vuaqidi 'idiega. <sup>34</sup>\* Omi'a mwata natunavo, 'inega gebu ami fata vona aqiaqidi ona von-ayedi mana omi'a luveluveifami. Ta tola'ai luveifana giwalimia 'eno'eno va tuta qabuna 'awamiega i'ifo'ifoqe. <sup>35</sup>Taha 'oloto aqiaqina giwalinega nuanua aqiaqidi i'ifo'ifoqe, ta wese 'idewani 'oloto luveifana giwalinega yani veifadi i'ifo'ifoqe. <sup>36</sup>'Inega yavonemi vetala'ai ana 'aubena 'inaya omi'a emi vona kavokavovo weaqina Yaubada navetala'aiemi 'inega ona vona 'ifoqeyedi. <sup>37</sup>Emi vonayavo 'idiega Yaubada na'awahaqiaqiemi nage na'awaluveifemi.”

Tomotau nuanuadi 'ebe'ita

(Maki 8:11-12; Luke 11:29-32)

<sup>38</sup>\* 'Inega vaina Falisi ta wese luvine ana tove'itayavo Iesu ivonea ivonaya, “Tove'ita, nuanuama 'ebe'ita taha una viaqi ana 'itea.”

<sup>39</sup>\* Ta Iesu vonedi, “Omi'a ba'e lagata luveifami, ta ge nuanuami Yaubada ena nuanua ona 'abibodei. 'Inega ni'a ovonegu be 'ebe'ita taha ena viaqia, ta ge nuagu! Ta yavonemi tovesimasimana Iona ona nuave'avinia tauna 'ebe'ita ana 'aidegamo 'imia. <sup>40</sup>\* Mana Iona nana 'aubena toi be wese velovelovana toi 'idia 'iqana qiduana gamonaya toatoa, ta ya'a Tomotau Natuna wese 'idewani 'aubena toi be velovelovana toi 'idia bwa'obwa'o gamo otaqinaya ena toatoa. <sup>41</sup>\* Nawale vetala'ai ana 'aubena 'inaya me Ninibe ina tovololo be lagatamina ba'e ina ve'ewemi, mana Iona 'idia lugaihi ta edi ilivu luveifanega inuagivila, ta taha 'oloto omi'a nuanimia toatoa ena lugaihi aqiaqi otaqina ta 'abiboda Iona, ta gebu oda nuagivila.

<sup>42</sup>\* “Wese 'idewani taha vavine kaikaiwabudi bolimana ana 'awayaqiega imai Solomoni ena alamani sabi noqolina, ta vetala'ai ana 'aubena 'inaya ina tovololo ta omi'a lagatamina ina ve'ewemi, mana taudi luvvai otaqega imai Solomoni ena alamani sabi vineneqina. Ta ba'e 'itagana taha tomotau nuanimia toatoa ena alamani qidua va'inena, ta 'abiboda Solomoni. Ta omi'a ge nuami tomotau nana ena vona ona noqoli.

Niboana luveifana 'evivi mai taha 'oloto 'inaya

(Luke 11:24-26)

<sup>43</sup>\* “Eguma niboana veifana 'oloto taha 'inega na'ifoqe, 'inega 'oloto nana naveaqiaqi ta niboana veifana nana nayabayaba kavokavovo go'ila geqanaya, ta ena 'ebeveyawai salisalia, ta ge ana fata nalobei. <sup>44</sup>'Inega niboana nana taunega 'inaya vonaya, 'Ana 'ita ena 'evivi egu 'ebetoa nugwenugweina 'inaya.' 'Inega 'evivi ta 'ebetoa nana lobeia kawakawana ta vunavunaqina ta wese 'i'iva'ava'aina.

<sup>45</sup>\* “Inega 'ifoqe tauya ta enavo niboana adi yau seveni luveifa otaqidi wese 'ebe'ewedi miedi, 'inega qabudi ilugu 'ebetoa nana 'inaya itoatoa. 'Inega 'oloto nana ena toa

\* 12:31: Ibe 6:4-6 \* 12:33: Md 7:16-20 \* 12:34: Md 3:7; 15:18; Lk 3:7; 6:45 \* 12:38: Md 16:1; Lk 11:16; Ion 6:30 \* 12:39: Md 16:4; Mk 8:12 \* 12:40: Ioa 1:17 \* 12:41: Ioa 3:5 \* 12:42: 1Kin 10:1-10 \* 12:45: 2Fit 2:20

igiveluveifa otaqia, lova ge 'idewani. Omi'a lagata ba'ena wese 'idewani luveifami, ta tuta 'ebeluv'ova 'inaya emi toa naluveifa otaqa."

*Ieisu inana ta wese tainavo*  
(Maki 3:31-35; Luke 8:19-21)

<sup>46</sup> Ieisu nawale yo'o 'idia vonavona ta inana be tainavo maega imai. 'Inega 'atamanaya itovotovololo ta nuanuadi Ieisu maega ina veqae. <sup>47</sup> 'Inega 'oloto taha valedi miea Ieisu 'inaya vonaya, "Inau taimwavo maega itovotovololo 'abagaya nuanuadi ina voneu."

<sup>48</sup> Ta Ieisu 'oloto nana ena vona ve'evivia vonaya, "Togama inagu ta tomeqabu taigwavo?" <sup>49</sup> 'Inega Ieisu nimana si'otoi yo'o dina 'idia ta 'oloto nana voneaya, "Ba'e tomotau diavona inagu be taigwavo. <sup>50</sup> \* Mana tomeqabu Tamagu mahalaya ena nuanua i'abi'abibodea e taudi taigwavo be novugwavo ta wese inagwavo."

## 13

*Vona sesebai witi vewanina weaqina*  
(Maki 4:1-9; Luke 8:4-8)

<sup>1</sup> 'Aubena nana 'inaya Ieisu vanuega 'ifoqe ta iqa balabalaya toabui. <sup>2</sup> \* Ta qabu qiduadi iva'auta 'inaya tuata wagaya gelu toabui ta qabu dina balabalaya itovotovololo. <sup>3</sup> 'Inega vona sesebaiega yani 'eala ve'itedi, ta wese vonedi vonaya, "Oloto taha tauya vaoqaya witi vewanidi sabi veyavulina. <sup>4</sup> E 'inega ve'ale veyavuledi, ta vaina vewana 'edabalaya iavuta 'inega manuqa i'itedi iwebui i'ainidi. <sup>5</sup> Ta vaina vewana iavuta bwa'o dabodabonaya, ta 'abiboda itabo kwayavona, mana bwa'obwa'o yalalayana. <sup>6</sup> Ta tuta nana baba'au vanemai 'inega guve'aligidi, mana kwalamidi ge dawebui bwa'obwa'o gamo otaqinaya. <sup>7</sup> E vaina vewana talitali gamonaya iavuta ta maega itabo vefofo, 'inega talitali nana vewaiwai ta witi ge ana fata navuaqa. <sup>8</sup> Ta wese vaina vewana bwa'obwa'o aqiaqina 'inaya iavuta itabo ta ivuaqa, 'inega vewana diavona 'idiega vaina ivuaqa 100 'idewani, ta vaina 60 ta wese vaina 30. <sup>9</sup> Ta 'eguma ma taniqami ba'e vona nana ona noqolidi."

*Vona sesebai ena 'ifoqe 'iuna*  
(Maki 4:10-12; Luke 8:9-10)

<sup>10</sup> 'Inega Ieisu ana to'abibodayavo imai 'inaya ta ivoneaya, "Tola'ai weaqina tomotau vona sesebaiega uveve'itedi?"

<sup>11</sup> 'Inega Ieisu vonaya, "Omi'a Yaubada awafelemi be vaina yani 'wai'waividi ena 'Ebeluvine weaqina ni'a oalahalamania, ta ba'e qabu diavona gebu. <sup>12</sup> \* Aiqabu vaina yani 'idia nawale givetomana ago va'inena ina lobe, ta aiqabu ge yani agona 'idia, e nawale Yaubada wese na'ewa yavulea 'idiega. <sup>13</sup> Ba'e 'iuna 'inega vona sesebaiega yaveve'ita 'idia, mana matadiega i'ita'ita ta ge ida 'ita aqiaqiea. Ta wese ivivineneqa ta ge ida noqoli be ge ida alamania.

<sup>14</sup> \* "Tovesimasimana Aisea ena vona ana aqiaqi ni'a 'ifoqe, mana lova tauna ba'e tomotau diavona weaqidi madusimanea vonaya, 'Nawale ivivineneqa ta nuadi ge da'eqa'ui, wese i'ita'ita ta ge ida 'itei.

<sup>15</sup> Mana ba'e tomotau diavona edi nuanuayavo 'eluatufa, ta teniqadi 'elukwava ta wese matadi 'elukwava.

Ta 'eguma matadiega ida 'ita'ita ta teniqadiega ida noqonoqola 'inega ida nuagivila 'iguya be eda giveaqiaqiedi.'

<sup>16</sup> \* Ta omi'a me emi qaiawa, mana matamiega o'ita'ita ta wese teniqamiega onoqonoqolia. <sup>17</sup> Vonahaqiaqi, ba'e yani diavona ni'a o'itedi be onoqolidi lova tovesimasimanayavo ta wese tomeqabu edi ilivu tunutunuqina nuanuadi qiduana ida 'itei ta wese ida noqolia, ta ge adi fata ida lobei.

\* 12:50: Lom 8:29 \* 13:2: Lk 5:1-3 \* 13:12: Md 25:29; Mk 4:25; Lk 8:18; 19:26 \* 13:14: Ais 6:9-10; Ion 12:40; Via 28:26-27 \* 13:16: Lk 10:23-24

*Ieisu ena vona sesebai givesimatalia*  
(Maki 4:13-20; Luke 8:11-15)

<sup>18</sup> “Inega vona sesebai vewana ana veyavula weaqina ana alamani ona noqolia.  
<sup>19</sup> Eguma taha toga Yaubada ena 'Ebeluvine valena nanoqolia ta nuana ge da'eqa'ui, e tauna 'idewani vewana dina iavuta 'edabalaya, 'inega toluveifana maimai ta vona diavona 'oloto nana giwalinaya 'eno'eno 'ewa'ewa yavuledi. <sup>20-21</sup> Ta vaidi tomotau Valena Aqiaqina inoqolia ta lukwayavonega me edi qaiawa iawafeledi Yaubada 'inaya. Ta 'abiboda tuta nana vita nage vevoalana ilobea Vale nana weaqina wese lukwayavonega edi vetumaqana ina nogea, mana taudi kavona vewana dina dabodabo 'inaya i'eluavuta ta kwalamidi ge davave'abi bwa'obwa'oya. <sup>22</sup> \* Vaidi tomotau Valena Aqiaqina inoqolia ta i'ewa aqiaqiea, ta 'abiboda bwa'obwa'o ana kaikaiwabuyavo be wese edi toa bwa'obwa'oya weaqina nuadi 'ewea, 'inega taudi edi vetumaqana inuafania ta ge adi fata be ina vuaqa, mana ba'e tomotau diavona kavona vewana dina i'eluavuta talitali gamonaya. <sup>23</sup> Ta 'esi vaidi tomotau Valena Aqiaqina inoqolia ta nuadi 'eqa'uya 'inega ivuaqa aqiaqi, ta vuaqidi vaina 100 ta vaina 60 ta wese vaina 30, mana omo'e tomotau diavona kavona vewana dina bwa'obwa'o aqiaqina 'inaya i'eluavuta.”

*Vona sesebai witi be libi weaqina*

<sup>24</sup> Inega taha wese vona sesebai Ieisu tomotau vonedi vonaya, “Mahala ena 'Ebeluvine kavona taha 'oloto witi vewanina aqiaqina veyavulea ena vaoqa 'inaya. <sup>25</sup> Ta velovelovana 'inaya ena tofewayavo maega i'eno motaiva ta ana avia taha mai vaoqaya ta libi vewanidi veyavuledi witi otaqa gamonaya, 'abo tauya. <sup>26</sup> Yani qabuna 'elutabo ta wese ivuaqa, 'inega tofewa diavona libi nana i'ita 'inanea.

<sup>27</sup> “Inega tonivaoqa ena tofewayavo imai ta ivoneaya, 'Kaiwabu, vewana aqiaqina eu vaoqaya lova uveyavuledi, ta ma'oda 'inega libi maega itabo viniviniyoa?” <sup>28</sup> Ta tonivaoqa vonaya, 'Ba'e taha voalagu ena viaqa.' 'Inega ena tofewayavo ivetela'aiea ivonaya, 'Ma'oda, nage libi dina ana luabu yavuledi?’ <sup>29</sup> Ta tonivaoqa vonaya, “Etobala, mana 'eguma libi diavona ona luabuya 'inega wese vaina witi maega ona abu yavuledi. <sup>30</sup> Ta 'esi bolimana ana tutaya egu toda'ayavo ena vonedi libi diavona ina vavutuqidi witi 'idiega, 'inega libi diavona ina gabu yavuledi, ta 'esi witi daisina ina va'auqidi ta egu sailakaya ina vedododi.’ ”

*Vewana goyona ana giveago vona sesebaina*  
(Maki 4:30; Luke 13:18-19)

<sup>31</sup> Wese Ieisu taha vona sesebaiega tomotau vonedi vonaya, “Mahala ena 'Ebeluvine kavona taha 'oloto te'wa vewanina na'ewei ta ena talaqa 'inaya na'wadia. <sup>32</sup> Vonahaqiaqi, te'wa vewanina yani goyona, ta 'eguma kana 'wadia 'inega ena tabo 'inaya yani qabuna vaoqaya naveqidua va'inedi kavona 'aiwe be 'inega manuqa ina mai ta laqanaya ina nevuqa.”

*Falawa ana 'ebegiveago isiti vona sesebaina*  
(Luke 13:20-21)

<sup>33</sup> Inega Ieisu wese vona sesebaiega vonedi vonaya, “Mahala ena 'Ebeluvine kavona taha vavine falawa ana 'ebegiveago ana wawa isiti goyona na'ewei ta falawa qidua maega nawayavilea, 'inega falawa nana nadidina.”

*Ieisu ena vona sesebai 'iuna*  
(Maki 4:33-34)

<sup>34</sup> Ieisu tuta qabuna vona sesebaiega tomotau veve'itedi. Tauna ge taha yani davonedi mali vona 'inega, ta 'esi tuta qabuna vona sesebaiega veve'itedi. <sup>35</sup> \* Ba'e 'inega tovesimasimana taha ena vona ana aqiaqi 'ifoqe, mana lova madusimanea vonaya, “Vona sesebaiega tomotau ena vonedi, be tola'ai yanidiavo Yaubada a'ugovaqedi bwa'obwa'o ana 'iva'ava'ata 'unuyega ena vona 'ifoqeyea 'idia.”

\* 13:22: Lk 12:16-21; 1Tim 6:9-10,17 \* 13:35: Same 78:2

*Ieisu libi vona sesebaina givesimatalia*

<sup>36</sup> 'Inega Ieisu qabu diavona nogedi ta lugu vanuea, ta ana to'abibodayavo imai 'inaya ta ivonaya, "Vona sesebai libi vaoqaya ana alamani una givesimatalia 'imaya."

<sup>37</sup> 'Inega Ieisu vonedi vonaya, "Witi vewanina aqiaqina ana toveyavula, tauna ya'a Tomotau Natuna. <sup>38</sup> Ta vaoqa nana kavona bwa'obwa'o qabuna, ta vewana aqiaqina taudi Yaubada ena 'Ebeluvine ana tomotauyavo, ta libi taudi toluveifana ena tomotauyavo. <sup>39</sup> Ta libi ana toveyavula bena'e Seitani. Ta bolimana ana tuta bena'e tuta ana 'ebeluvine, ta tobolimana taudi Yaubada ena tovale'ewayavo. <sup>40</sup> \* Be tuta ana 'ebeluvine 'inaya toluveifadi taudi 'idewani libi Yaubada ena tovale'ewayavo ina va'auqidi be ina gabu yavuledi.

<sup>41</sup> \* "Ta ya'a Tomotau Natuna egu tovale'ewayavo ena vetunedi be toluveifana ena tove'itayavo be ena tofewayavo ina va'auqidi ta ina 'wavinidi Yaubada ena 'Ebeluvine 'inega. <sup>42</sup> \* Ta ina felawebuiedi 'aiwe 'ala'alaina gamonaya, ta 'inaya visiqi ina lutonovi be ina dou ta wese aladi navetalakikokiko. <sup>43</sup> \* Ta 'abiboda taudi tunutunuqidi Tamadi ena 'Ebeluvine gamonaya ina simatala baba'au 'idewana. 'Eguma ma taniqami ba'e vona nana ona noqolia.

*Yani toi vona sesebaidi*

<sup>44</sup> "Mahala ena 'Ebeluvine ba'e 'idewani. Taha 'oloto yani kaikaiwabu otaqina lobe bwa'obwa'o gamonaya, ta wese a'ukwaiva 'eviviea. 'Inega me ena qaiawa tauya ta ena kulufayavo qabuna vegimwaneyedi ta adi ve'ia 'ewea, 'inega bwa'obwa'o nana gimwaneana.

<sup>45</sup> "Ta wese mahala ena 'Ebeluvine kavona taha tomotau nuanuana taha mwali aqiaqina nagimwaneana. <sup>46</sup> Ta tuta nana taha mwali aqiaqi otaqina lobe, e 'inega ena kulufa qabuna vegimwaneyedi be yaqisa mwali nana ana fata nagimwaneana.

<sup>47</sup> "Ta wese mahala ena 'Ebeluvine 'idewani togomana edi gomana ibwa'uya lavuya, ta 'iqana taha taha i'onedu. <sup>48</sup> Ta tuta nana 'iqana gomana iluveagatuna'ia 'inega ilihi vaneyea balabalaya, ta 'inega itoabui ta 'iqana qabudi ivavutuqidi. 'Inega 'iqana aqiaqidi kwalisi 'inaya ivedododi ta 'iqana veiveifadi iveyavuledi. <sup>49</sup> Ta wese 'idewani tuta ana 'ebeluvine 'inaya Yaubada ena tovale'ewayavo ina mai ta tomotau luveifadi ina vavutuqidi tomotau aqiaqidi 'idiega. <sup>50</sup> \* Ta tomotau luveifadi ina felawebuiedi 'aiwe 'ala'alaina gamonaya, ta 'inaya visiqi ina lutonovi be ina dou ta aladi navetalakikokiko."

*Kulufa kaikaiwabu vauvaudi ta 'itu'ituwaidi*

<sup>51</sup> 'Inega Ieisu vetala'aiedi vonaya, "Ma'oda, nage vona sesebai qabuna ba'e ni'a oalamanidi?" ta ivonaya, "Ao, 'edewana."

<sup>52</sup> Ta wese vonedia, "Inega ona alamani aqiaqiea 'eguma luvine ana tove'ita taha ni'a veto'abiboda mahala ena 'Ebeluvine weaqina, e 'inega taunana kavona taha tonivanue lugu vanue gamonaya ta ena kulufa vauvauna ta wese 'itu'ituwaina 'ewa 'ifoqeyedi."

*Tomotau Ieisu inogea*

(Maki 6:1-6; Luke 4:16-30)

<sup>53</sup> Tuta nana Ieisu ena vona sesebai lu'ovoidi 'inega omo'e di'we nana nogea. <sup>54</sup> \* 'Inega 'evivi ena 'abagaya ta vanue tafwalolo 'inaya lugu ta ve'itedi. Ta tomotau qabudi nuadi voqana 'inega ivonaya, "Oloto ba'e ma'inega ena alamani 'ewei, ta wese ma'inega waiwai 'ewea 'inega ana fata yani 'ebenuavoqana viaviaqidi?" <sup>55</sup> \* Ta wese ivonaya, "Bena'e 'oloto nana tauna to'eyoqona natuna, waisa? Ta inana Meli ta tainavo Iemesa be Iosefa be Saimoni ta wese Iudasa, wa? <sup>56</sup> Ta wese novunavo maega katoatoa. Ta ma'inega ena alamani be ena waiwai 'ewei?"

<sup>57</sup> \* 'Inega inogea, ta Ieisu vonedi vonaya, "Tovesimasimana adi 'amayaba ilobelobe mali 'abaga 'idia, ta edi 'abagaya ta wese edi gadeavo 'idiega ge taha 'amayaba ida

\* 13:40: Ion 15:6 \* 13:41: Md 24:31; 25:31; Mk 13:27 \* 13:42: Md 8:12 \* 13:43: Dan 12:3 \* 13:50: Md 13:42; Lk 13:28 \* 13:54: Ion 7:15 \* 13:55: Ion 6:42 \* 13:57: Ion 4:44

lobei.”<sup>58</sup> 'Inega Ieisu 'abaga nana 'inaya ge viaqa waiwaidi 'eala daviaqidi, mana ge ida vetumaqanea.

## 14

*Ioni Togivebabitaiso ena 'aliga*

*(Maki 6:14-29; Luke 9:7-9)*

<sup>1</sup> Lova Elodi Ioni kafia ta vanue 'ebeyoqona 'inaya a'uya. Ta Ioni ana kafi 'iuna taha vavine adi wawa Elodiasa, taudi Elodi tuana Filifi moqanena. <sup>2</sup> Ta Elodi luabuyedi 'inega vaqidi ta Ioni Elodi voneaya, “Ba'e ge ilivu aqiaqina mana tuau moqanena uvaqidi, 'inega o'a luvine ubwegea!” <sup>3\*</sup> Omo'e 'iuna 'inega Elodi nuanuana vonigo Ioni naluve'aligia, ta tomotau qabudi Ioni i'awatovesimasimanea 'inega Elodi gaululu tomotau weaqidi 'inega Ioni ge daluve'aligi ta 'esi a'uluguyea vanue 'ebeyoqonaya.

<sup>4</sup> 'Abiboda Elodi ena vi'oi ana 'aubena ana 'ebenuave'avina sagalina 'inaya tomotau ni'a iva'auta, ta Elodiasa natudi mevavinena qabu matadia ouou, ta ena ou weaqina Elodi qaiqaiawa. <sup>5\*</sup> 'Inega Elodi iahaba nana 'inaya vona fofofola vonaya, “Tola'ai eu nuanua e ana fata ena neiu”, ta wese 'awatamatamana ba'e vona nana weaqina.

<sup>6</sup> 'Inega Elodiasa natudi 'inaya ive'awahayahaya edi nuanua weaqina, ta 'inega iahabana Elodi voneaya, “Nuanuagu Ioni Togivebabitaiso 'unu'ununa ma gaebana una neigu.” <sup>7</sup> 'Inega Elodi nuana vita qiduana, ta ni'a tamada 'inane ta wese tolusagali ena vona fofofola ni'a inoqolia 'inega iahaba nana ena vona awafelea. <sup>8</sup> Ta ena tofewayavo luvetunedi itauya vanue 'ebeyoqona 'inaya, ta Ioni magana ida'ea. <sup>9</sup> Ta 'unu'ununa gaebaya ia'uya 'inega iahabana 'inaya imiea 'ewea, ta 'inega inana neidi. <sup>10</sup> Ta Ioni ana to'abibodayavo imai 'inega Ioni 'wafina i'ewei itavunia. Ta 'abiboda itauya Ieisu 'inaya, 'inega yani qabuna ivonayea Ioni weaqina.

<sup>11</sup> Ta tuta nana toluvine Elodi Ieisu Valena noqolia, <sup>12</sup> 'inega ena tofewayavo vonedia, “Omo'e 'oloto nana ana 'ita tauna Ioni Togivebabitaiso ta 'aligega ni'a ya'itoto 'evivi, mana me ena waiwai yani 'ebenuavoqana viaviaqidi.”

*Qabu qiduadi Ieisu ve'ainidi*

*(Maki 6:45-52; Ioni 6:15-21)*

<sup>13</sup> Ieisu Ioni Togivebabitaiso ena 'aliga valena noqolia, 'inega 'abaga nogea ta wagaya gelu tauya di'we tomotau geqana 'inaya. Ta tomotau Ieisu ena tauya valena inoqolia, 'inega 'abaga taha taha 'idiega 'aqediega itauya 'inaya. <sup>14</sup> Ta tuta nana Ieisu wagega vawebui balabalaya 'inega qabu qidua va'inedi 'itedi ta nuakolokoloyedi. 'Inega toveviihqa qabudi giveaqiaqiedi.

<sup>15</sup> Ni'a velavilaviea 'inega ana to'abibodayavo imai Ieisu 'inaya ivonea ivonaya, “Kaiwabu, di'we ba'ena tomotau geqana, tuta goyona naboinia 'inega qabu ba'e una vetunedi ina tauya, ta adi 'abwaga ina gimwane omo'e 'abaganavo di'wedega.”

<sup>16</sup> Ta Ieisu vonedia, “Ge ina tauya, ta 'esi omi'a 'abwaga ona neidi ina 'ai.”

<sup>17</sup> 'Inega ivona 'eviviea ivonaya, “Gebu, mana ima'a ama 'abwaga ge 'eala, u'itei beledi nima 'aidegana ta wese 'iqana magilafudimo.”

<sup>18</sup> Ta 'inega Ieisu vonaya, “Beledi ta wese 'iqana oneigu!” <sup>19\*</sup> 'Inega tomotau qabudi vonedi libia ina toabui ta beledi nima 'aidegana ta 'iqana magilafudi 'ewedi ta 'ita vane mahalaya, 'inega 'abwaga dina weaqidi lukaiwa. Ta 'abiboda beledi gitomwedi ta ana to'abibodayavo neidi, 'inega beledi nana tomotau 'idia ivewila'ayea. <sup>20</sup> 'Inega qabudi i'ai ta gamodi 'elukoko. 'Ai gumwala, 'inega to'abiboda diavona 'awagigi iva'auqidi, ta kwalisi tuwelo iluveagatuna'idi. <sup>21</sup> To'ai diavona gamodiega 'oloto dimo iavodi adi yau 5,000 'idewani, ta vivine be wese gogama qabudi ge adi avomo.

*Ieisu mwade'wa debanega tauya*

*(Maki 6:45-52; Ioni 6:15-21)*

\* 14:3: Luvu 18:16; 20:21; Lk 3:19-20 \* 14:5: Md 21:26 \* 14:19: Md 15:35-39; Mk 8:6-10

<sup>22</sup> 'Inega ana to'abibodayavo luvetunedi wagaya ina igelu ina nugweta ta ina vauka-mana mali di'wea. Ta tauna nawale tomotau qabudi vevematamagilafuyedi ina 'evivi edi 'abagaya. <sup>23</sup> \* 'Inega to'abiboda dina wagaya igelu ta Iesu qabu dina vetunedi itauya. 'Abibodanaya tauna ana 'aidega bwanagaya 'watovu sabi venoqi Yaubada 'inaya. 'Inega ni'a velovelovanea ta Iesu ana 'aidega toatoa. <sup>24</sup> Ta to'abiboda dina edi waga ni'a inevayei itete malavetaya, 'inega nufula qiduana ilobea. 'Inega edi waga 'ubuibuinia ta wese yaqina 'au'ia'ia'iwedi.

<sup>25</sup> Ta manu bodobodoya Iesu mwade'wa debanega mai ana to'abibodayavo di'wedea 'ifoqe. <sup>26</sup> \* 'Omo'e 'inaya Iesu ana to'abibodayavo i'itea mwade'wa debanega maimai 'inega imwaniniva qiduana idiula ta ivonaya, "Ieii, o'itei otala omo'e maimai!"

<sup>27</sup> Ta Iesu vonedia, "Ge ona mwaniniva, ya'a ba'e taugu emi Kaiwabu."

<sup>28</sup> 'Inega Fita vonaya, "Kaiwabu, 'eguma vonahaqiaqi o'a tau'una e 'inega una gabegu ta mwade'wa debanega ena wai 'iuya."

<sup>29</sup> Ta Iesu voneaya, "Umai!" 'inega Fita wagega vawebui ta mwade'wa debanega ve'ale natauya Iesu 'inaya.

<sup>30</sup> Tuta nana tautauya ta nufula qiduana 'itea 'inega mwaniniva ta mwade'waya ve'ale damana 'inega gaba vonaya, "Kaiwabu, uiulegu!"

<sup>31</sup> \* 'Inega Iesu lukwayavonega nimana si'otoia Fita kafia ta voneaya, "Eu vetumaqana goyona, tola'ai weaqina uvenuana magilafu?" <sup>32</sup> 'Inega magilafudi wagaya igelu ta yaqina 'avalaulihia.

<sup>33</sup> Ta to'abiboda dina wagaya itoatoa ihiwa'odu Iesu 'inaya ta ivonaya, "Vonahaqiaqi, o'a Yaubada Natu Otaqina."

*Iesu tovevihuq qabudi giveaqiaqiedi Genasaleta 'inaya*

*(Maki 6:53-56)*

<sup>34</sup> 'Inega ivaukamana i'ifoqe 'abaga Genasaleta 'inaya ta wagega ivawebui bwa'ob-wa'oya. <sup>35</sup> Ta 'abaga nana ana totoayavo Iesu i'ita 'inanea, 'inega valena iyawala dadanea 'abaga qabudi 'idia, ta totoa 'abaga edi tovevihuqayavo qabudi imiedi 'inaya. <sup>36</sup> \* Ta Iesu inoqiea ivonaya, "Kaiwabu, nage ana fata tovevihuq ba'e au kaleko matavusina ina gitonovia?" Tuata Iesu awafeledi, 'inega aiqabu ana kaleko igitonovia e iveaqiaqi.

## 15

*Me Diu tubudiavo edi ilivu weaqina*

*(Maki 7:1-13)*

<sup>1</sup> 'Abibodanaya Falisi ta wese luvine ana tove'itayavo 'abaga Ielusalema 'inega imai Iesu 'inaya ta ivoneaya, <sup>2</sup> "Tola'ai weaqina au to'abibodayavo 'ai ana tuta 'inaya nimadi ge ida 'utu'utudi ta 'abwaga i'ai'ai, bena'ena viaqa nana 'inega tubudavo edi ilivu iqueuqunia?"

<sup>3</sup> Ta Iesu vonedia, "Omi'a Yaubada ena luvine oqueuqunia, mana tubumiavo edi ilivu o'abi'abibodea. <sup>4</sup> \* Yaubada ena luvine magilafuna ba'e vonaya, 'Inau ta tamau una 'amayabedi', ta wese vonaya,

'Eguma togama tamana nage inana navona ve'alatedi  
luaqiaqiea be ona luv'e aligia'.

<sup>5</sup> "Ta omi'a ovonaya 'eguma taha toga tamana ta wese inana navonedi navonaya, 'Ya'a egu kulufayavo ni'au yahawafeledi Yaubada 'inaya, 'inega gebu agu fata ena iulemi'. Ta ba'e vona nana 'inega ovonaya be ina be tama adi 'itamaki gebu yani qiduana 'iuya. <sup>6</sup> Ba'e 'idewanina tubumiavo edi luvine o'abibodea, ta Yaubada ena luvine obwegebwegea. <sup>7</sup> Vonahaqiaqi, omi'a to'eu'au'ava! Lova tovesimasimana Aisea weaqimi simanayea, vonaya,

\* 14:23: Lk 6:12; 9:28    \* 14:26: Lk 24:37    \* 14:31: Md 8:26; Mk 4:39    \* 14:36: Md 9:20-21    \* 15:4: 'Ifo 20:12; 21:17; Luv 5:16



<sup>8</sup>\* ‘Tomotau ba’e ’awadiega i’amayabegu  
ta giwalidiega itoa luluvai ’iguyega.

<sup>9</sup> Ta wese ’iguya itafwalolo kavovo,  
mana edi ve’ita luvine weaqina ge ya’a ’iguyega  
ta ’esi tomotau edi nuenuega ’ifoqe.’”

*Isisu ena ve’ita toyani tomotau nagivebwavudi  
(Maki 7:14-23)*

<sup>10</sup> Inega Isisu qabu qiduana gabedi imai vonedi vonaya, “Vona ba’e ona noqolia inega nuami na’eqa’uya! <sup>11</sup>\* ’Abwaga ’awadega ka’ai’ainidi gebu ana fata nagivebwavuda, ta ’esi eda vonayavo ’awadega i’ifoqe mai ana fata ina givebwavuda.”

<sup>12</sup> Inega Isisu ana to’abibodayavo imai inaya ta ivoneaya, “Kaiwabu, nage Falisiavo u’itedi eu vona ba’e weaqina diadi vilea?”

<sup>13</sup> Ta Isisu vonaya, “Tamagu mahalaya totoa aiwe diavona ge da’wadidi nawale ena tovale’ewayavo ina abu yavuledi. <sup>14</sup>\* Ta Falisiavo ona nogedi, mana taudi tovanugweta matadi kwayakwayana. Ta ’eguma matakwaya taha iana wese matana kwayakwayana navanugwetea e inega nawale magilafudina gulia ina be’u.”

<sup>15</sup> Inega Fita vetala’aiea vonaya, “Vona sesebai ba’e ana alamani una givesimatalia imaya.”

<sup>16</sup> Ta Isisu vonaya, “Nage omi’a wese nawale nuami ge dasimatala? <sup>17</sup> Mana tola’ai ’awadega ka’ai’aini ta lugulugu gamodaya e yani nana ’abiboda tautauya avuqainaya.

<sup>18</sup> Ta vonahaqiaqi, tola’ai tomotau giwalidiega ’ifo’ifoqe ta ’awadiega ivonavonayea, e ba’e vona diavona idiega ana fata taudiega ina givebwavudi. <sup>19</sup> Mana giwalidiega nuanua luveifadi ’ifo’ifoqe idewana luve’aliga be, luabu be, velamo’eno kavokavovo be, vanawala be, ’eu’au’ava ta wese awagila. <sup>20</sup> Ba’e yani diavona tomotau gigivebwavudi, ta ’eguma nimada ge kana utudi ai ana tuta inaya ge ana fata nagivebwavuda.”

*Kenani vavinedi edi vetumaqana  
(Maki 7:24-30)*

<sup>21</sup> Isisu ena viaqayavo ’abibodanaya di’we nana nokea ta tauya di’we Taia ta Saidoni idia. <sup>22</sup> Ta di’we nana inega Kenani vavinedi taha i’ifoqe imai Isisu inaya ta igaba ivonaya, “Kaiwabu, o’a kini Deibida tubuna uda nuakokoloyegu, mana niboana luveifana natugu mevavinena wahalia ta gigiveluveifa aqiaqiea.”

<sup>23</sup> Ta Isisu vavine dina edi gaba ge taha vona inega dave’evivia. Inega ana to’abibodayavo imai ta Isisu ivoneaya, “Vavine dina una vonedi ina tauya, mana edi vegabagaba inega igivesiniqaiqaiema.”

<sup>24</sup>\* Ta Isisu vonaya, “Yaubada vetunegu yamai sifi luluve’waividi Isileli ena ’ebeluvine gamonaya adi aidega weaqidi.”

<sup>25</sup> Inega vavine dina imai Isisu matanaya tuqatuqadiege isobadi ta ivonaya, “Kaiwabu uda iulegu!”

<sup>26</sup> Ta Isisu vonaya, “Ge daluaqiaqiei be gogama adi ’abwaga kana ’ewei idiega ta kana felei kedewa idia.”

<sup>27</sup> Ta vavine dina ivonaya, “Kaiwabu, eu vona ba’e vonahaqiaqi, ta ’abwaga salimuguna avuavuta kaiwabu ena ’ebe’aiege inega ena kedewayavo i’ai’ainia?”

<sup>28</sup> Inega Isisu vavine dina edi vona ve’evivia vonaya, “Vavine, emi vetumaqana waiwaina, inega emi venoqi ana ve’ia na’ifoqe.” Ta tuta ba’e inaya vavine dina natudi veaqiaqi evivi.

*Tovevhiqqa qabudi Isisu giveaqiaqiedi*

<sup>29</sup> Inega Isisu di’we nana nogei ta lavu Galili balabalanega luvivila ta ’watovu bwana-gaya ta oade toabui. <sup>30</sup> Ta qabu qiduadi wese i’watovu ta edi tovevhiqayavo imiedi taudi aqedi luveifana be, matadi kwayakwayana be, tovenakunaku ta wese tovevhiqqa

\* 15:8: Ais 29:13 \* 15:11: Md 12:34 \* 15:14: Lk 6:39; Lom 2:19 \* 15:24: Md 10:6

'eala Ieisu matanaya ia'udi. Ta qabudi giveaiaqiedi. <sup>31</sup>\* 'Inega qabu diavona nuadi voqana qiduana, mana tovenakunaku ivonavona be, 'aqedi luveifana itautauya ta matadi kwayakwayana wese i'ita 'evivi. 'Inega qabu diavona me Isileli edi Yaubada iawatuboya.

*Ieisu qabu qiduadi ve'ainidi*

*(Maki 8:1-10)*

<sup>32</sup>\* 'Inega Ieisu ana to'abibodayavo gabedi imai ta vonedia, "Qabu ba'ena yanu-akolokoloyedi mana ni'a 'aubena toi ba'idia maega atoatoa ta ge adi 'abwagamo. 'Inega ge nuanuagu ma botanidi ena vetunedi ina 'evivi fole nawale 'edaya 'ai weaqina ina 'elutava."

<sup>33</sup> Ta ana to'abibodayavo ivoneaya, "Di'we ba'ena tomotau geqana, ta ma'oda qabu qiduadi ba'e adi 'abwaga kana loba 'aipei, be tola 'aiega kana ve'ainidi?"

<sup>34</sup> 'Inega Ieisu vetala'aiedi vonaya, "Evisa beledi 'imia 'eno'eno?"

'Inega ivoneaya, "Beledi seveni ta wese vaina 'iqana goyogoyodi maega."

<sup>35</sup> 'Inega Ieisu qabu diavona vonedi bwa'obwa'oya ina toabui. <sup>36</sup> Ta beledi seveni dina be wese 'iqana dina 'ewedi ta vona lukaiwa Yaubada 'inaya weaqidi. 'Inega gitomwedi ta neidi ana to'abibodayavo 'idia, 'inega ivewila'ayea qabu diavona 'idia, <sup>37</sup> ta i'ai ana laba gamodi 'elukoko. 'Abibodanaya Ieisu ana to'abibodayavo 'abwaga 'awagigidi iba'auqidi, ta kwalisi seveni iluveagatuna'idi. <sup>38</sup> To'ai diavona 'oloto dimo adi yau 4,000, ta vivine be gogama ge adi avomo. <sup>39</sup> Ieisu qabu dina vetunedi itauya, 'inega wagaya gelu ta tauya di'we Magadana 'inaya.

## 16

*Tomotau nuanuadi 'ebe'ita waiwaina ina 'itea*

*(Maki 8:1-13; Luke 12:54-56)*

<sup>1</sup>\* Taha 'aubena 'inaya Falisiavo ta wese Sadusiavo imai Ieisu 'inaya sabi sitonovina, 'inega ivetala'aiea ivonaya, "Nage au fata 'ebe'ita taha mahalega una viaqi ana 'itea, be 'inega ana 'awahaiaqieiu vonigo eu waiwai Yaubada 'inega mai."

<sup>2</sup> 'Inega Ieisu vonaya, "Omi'a 'eguma lavilavi 'inaya baba'au ona 'itea nalia'unuva ta mahala nalubwealia, 'inega ni'au oalamaniana 'ibe mahala ive. <sup>3</sup> Ta 'eguma 'awa'awai 'inaya waumana kwaukwausina mahala naumabodea ona 'itea, e 'inega ni'au oalamaniana nawale 'wei na'wei. Vonahaiaqi, mahala ana 'ita 'inega ni'a oalamaniana tola'ai na'ifoqe, ta tola'ai ba'itagana matamia i'ifo'ifoqe adi alamani weaqina nuami nawale ge da'eqa'ui. <sup>4</sup>\* Lagata ba'e omi'a luveifami ta wese Yaubada ge nuanuami ona alamaniana. Omi'a ovetala'aiegu 'ebe'ita taha weaqina. Ta ge taha wese 'ebe'ita ena neimi, ta 'esi Iona tauna ta'iwa emi 'ebe'ita." 'Inega Ieisu nogedi ta tauya.

*Ieisu ena vona sesebai Falisi be Sadusi weaqidi*

*(Maki 8:14-21)*

<sup>5</sup> 'Inega lavu di'wenaya italaukamana ta Ieisu ana to'abibodayavo adi beledi ivenu-afania ge ida 'ewei. <sup>6</sup>\* 'Inega Ieisu vonedia, "Falisiavo be Sadusiavo edi isiti 'inega ona 'itamakimi."

<sup>7</sup> 'Inega to'abiboda dina taudiege iveqae ivonaya, "Ana 'ita Ieisu ba'e 'idewani vonavona 'aiqa, mana ada beledi ge kada 'ewei."

<sup>8</sup> Ta Ieisu edi nuanua ni'a alamaniana 'inega vonedi, "Omi'a emi vetumaqana goyona. Tola'ai weaqina taumiege oveveqae vonigo ge ami beledimo? Ya'a ge eda vonavona beledi weaqina. <sup>9</sup>\* Nage nawale nuami ge da'eqa'uya? Nage ni'a ovenuafania tuta nana beledi faibi 'inega tomotau 5,000 yave'ainidi? Ta wese 'abwaga 'awagigidi ova'auqidi, e 'inega kwalisi 'eala oluveagatuna'idi. <sup>10</sup>\* Ta wese beledi seveni 'inega tomotau adi yau 4,000 yave'ainidi, ta 'awagigidi ova'auqidi ta kwalisi 'eala oluveagatuna'idi, waisa?"

\* 15:31: Mk 7:37 \* 15:32: Md 14:14 \* 16:1: Md 12:38; Lk 11:16 \* 16:4: Md 12:39; Lk 11:29 \* 16:6: Lk 12:1 \* 16:9: Md 14:17-21 \* 16:10: Md 15:34-38

11 'Inega tola'ai weaqina ge oda alamania ya'a ge beledi weaqina eda vonavona? Ta 'esi Falisiavo be Sadusiavo edi isiti 'inega ona 'itamakimi." 12 E omo'e 'inega nuadi 'eqa'uya ta ialamania Ieisu ge davonedi be ina 'itamakidi beledi ana isiti weaqina, ta 'esi Falisiavo be Sadusiavo edi ve'itayavo 'idiega ina 'itamakidi.

*Fita ena alamani Ieisu weaqina simana 'ifoqeyea*  
(Maki 8:27-31; Luke 9:18-21)

13 Tuta nana Ieisu mai taha di'we 'abaga Sisalia Filifai di'wenaya, 'inega ana to'abibodayavo vetala'aiedi vonaya, "Ma'oda tomotau ivonavona 'aiqa ya'a Tomotau Natuna weaqigu?"

14 \* 'Inega ive'iea ivonaya, "Vaina tomotau ivonaya be o'a Ioni Togivebabitaiso, ta vaina ivonaya be o'a Ilaitia, ta vaina ivonaya be o'a Ielemaia, ta wese vaina ivonaya nage o'a taha tovesimasimana nugwenugweina."

15 'Inega Ieisu vetalamatanedi vonaya, "Ta omi'a, ma'oda emi nuanua vonigo ya'a togama?"

16 \* 'Inega Saimoni Fita vona 'eviviea vonaya, "O'a To'etoyavua, Yaubada mayawaina Natuna!"

17 \* Ta Ieisu Fita vonea vonaya, "Saimoni o'a Ioni natuna, vonahaqiaqi una qaiawa, mana ba'e eu alamani ge tomotau 'idiega da'ifoqe ta 'esi Tamagu mahalaya neiu. 18 \* Ta wese yavoneu, o'a au wawa Fita ta ana givila dabo, 'inega dabo nana debanaya egu 'ekalesia ena yoqonia, 'inega 'aliga ena waiwai gebu ana fata egu 'ekalesia naqeuni. 19 \* Wese mahala ena 'Ebeluvine ana 'ebesiva'a ena neiu, 'inega tola'ai bwa'obwa'oya una yoqonia wese mahalaya Yaubada nayoqonia. Ta wese tola'ai bwa'obwa'oya una yavua wese mahalaya Yaubada nayavua." 20 Omo'e 'inaya Ieisu ana to'abibodayavo vona waiwaina neidi vonedia, "Ge taha toga 'inaya ona simanegu vonigo ya'a To'etoyavua."

*Ieisu ena 'aliga weaqina simana 'ifoqeyea*  
(Maki 8:31-9:1; Luke 9:22-27)

21 Tuta omo'e 'inega Ieisu ana to'abibodayavo ve'ale ve'itedi vonaya, "Ya'a luaqiaqiegu be ena tauya Ielusalema 'inaya, ta visiqa qiduana ena lobe'a abaga ana tovanugwetayavo be toveguba qiduduadi ta wese luvine ana tove'itayavo 'idiega. Omo'e 'inaya ina luv'e'aligigu ta 'aubena vetoina 'inaya Yaubada nagiveyawah'a 'eviviegu."

22 'Inega Fita Ieisu 'ebe'ewei vanaqoyea ta lugwaeyea vonaya, "Kaiwabu, ba'e yani diavona gebu na'ifoqe 'iuya!"

23 'Inega Ieisu tunugivila Fita 'inaya ta voneaya, "O'a 'idewani Seitani, 'inega unogegu! Ge una awatayegu, mana eu nuanua tomotau edi nuanua 'idewani, ta gebu Yaubada 'inega."

24 \* 'Abiboda Ieisu ana to'abibodayavo vonedi vonaya, "Eguma taha toga nuanuana na'abibodegu luaqiaqiea be tauna ena nuanua nanogea 'inega taunega ana 'etoluai na'avalea ta na'abibodegu. 25 \* 'Inega togama yawaina navegagalea nawale yawaina naluv'e'waivia, ta togama yawaina weaqigu nahawafelea nawale yawai aqiaqina nalobe'a. 26 \* 'Eguma taha toga bwa'obwa'o ana kulufayavo qabudi na'ewedi ta 'abiboda na'aliga, tola'ai ana aqiaqina? Mana ge ana fata yawaina na'ewa 'eviviei ena kaikaiwabu 'idiega.

27 \* "Nawale ya'a Tomotau Natuna egu tovale'ewayavo maega ana 'evivi ana mai Tamagu ena simatala kaikaiwabuna 'inega, ta tomotau edi viaqayavo ana ve'ia ena neidi. 28 Yavona aqiaqi 'imia, nawale tomotau vaina 'imiega gebu ona 'aliga ana laba ya'a Tomotau Natuna kavona Kini ena 'evivi ena mai me egu luvine."

\* 16:14: Md 14:1-2; Mk 6:14-15; Lk 9:7-8 \* 16:16: Ion 6:69 \* 16:17: Gal 1:15-16 \* 16:18: Ion 1:42; Efe 2:20  
\* 16:19: Md 18:18; Ion 20:23 \* 16:24: Md 10:38; Lk 14:27 \* 16:25: Md 10:39; Lk 17:33; Ion 12:25 \* 16:26: Md 4:8-9 \* 16:27: Md 25:31; Same 62:12; Vos 24:12; Lom 2:6; Ve 22:12

## 17

*Leisu ana* 'ita vedumaduma  
(*Maki 9:2-3; Luke 9:28-36*)

<sup>1</sup> 'Aubena sikisi gumwala Fita ta wese Iemesa ma taina Ioni, leisu 'ebe'ewedi maega i'watovu bwanaga taha kuena debanaya. <sup>2</sup> \* Itoatoa 'inega matadia leisu ana 'ita vedumaduma ta 'iawana simatala baba'au 'idewana, ta wese ana kaleko luwadaeyea ana 'ita namanamala otaqina. <sup>3</sup> Ta ba'e tuta nana 'inaya Mosese be Ilaitia i'ifoqe imai ta leisu maega iveveqae. <sup>4</sup> 'Inega Fita leisu 'inaya vonaya, "Kaiwabu, ba'idia ana toa aqiaqi otaqina, 'inega 'eguma nuanuau didi toi ena yoqonidi taha o'a weaqiu, taha Mosese weaqina ta wese taha Ilaitia weaqina."

<sup>5</sup> \* Fita nawale vonavona, 'inega gawata wadawadaea otaqina umedi 'inega taha bona gawatega 'ifoqe vonaya, "Ba'e Natu otaqigu, tauna weaqina yaqaiawa qiduana. 'Inega tauna ena vona ona noqolia."

<sup>6</sup> Ta to'abiboda dina vona nana inoqolia 'inega imwaniniva ge goyo ta igivelukabwebwe bwa'obwa'oya. <sup>7</sup> 'Inega leisu mai gitonovidi vonedi vonaya, "Ge ona mwaniniva, oya'itoto!" <sup>8</sup> Ta tuta nana itunuvane leisu ana 'aigeda tovtovolo i'itea.

<sup>9</sup> Tuta nana bwanagega iwebui mai 'inega leisu luvine waiwaina neidi vonedi vonaya, "Yani diavona ni'a o'itedi ge taha toga 'inaya ona vonavonayei ana laba ya'a Tomotau Natuna 'aligega ena ya'itoto 'evivi."

<sup>10</sup> \* Ta leisu ana to'abibodayavo ivetala'aiea ivonaya, "Tola'ai weaqina luvine ana tove'itayavo ivonavona Ilaitia nanugweta namai ta 'abiboda To'etoyavua namai?"

<sup>11</sup> 'Inega leisu vonaya, "Vonahaqiaqi, Ilaitia nugweta namai, 'inega yani qabudi nagivetunuqidi, <sup>12</sup> \* ta yavona aqiaqiemi Ilaitia nana ni'a mai ta tomtau ge ida 'inanea, ta 'esi iveyani kavokavovoyea edi nuenuega, nawale wese ya'a Tomotau Natuna 'idewani ina veilivu 'aiqegu." <sup>13</sup> \* 'Inega to'abiboda dina inuaia leisu Ioni Togivebabitaiso weaqina vonavona 'idia.

*Taha gwama niboana luveifana* 'wahalia leisu giveaqiaqiea  
(*Maki 9:14-29; Luke 9:37-43a*)

<sup>14</sup> 'Inega leisu ana to'abibodayavo maega imai qabu 'idia, ta taha 'oloto mai ta tuqatuqanega sobadi leisu 'iawanaya, <sup>15</sup> ta vonea vonaya, "Kaiwabu, natugu me'olotona una nuakolokoloyea, mana lugelabo 'ewea 'abo tuta qabuna vevekaoya ta tafetafefwai. Ta wese 'wafina visivisiqa qiduana, 'inega vaina tuta be'ube'u 'aiwe 'ala'alaina 'inaya ta wese go'ilaya. <sup>16</sup> 'Inega au to'abibodayavo 'idia yamiea ta ge adi fata ida giveaqiaqiei."

<sup>17</sup> Ta leisu vonedi, "Omi'a ma'oda? Debami 'i'wanina! Nage ge oda vetumaqanegu, waisa? Ta emi deba 'i'wana 'inega 'wafigu siniqaiqai. Omiei gwamana eda 'itei!"

<sup>18</sup> 'Inega leisu niboana luveifana luvetunei 'ifoqe gwama nana 'inega, ta tuta ba'e 'inega veaqiaqi 'evivi.

<sup>19</sup> \* 'Abiboda leisu ana to'abibodayavo adi 'aidega imai 'inaya ivetala'aiea ivonaya, "Kaiwabu, tola'ai weaqina ima'a ge ama fata niboana luveifana ada 'wavi 'ifoqeyei?"

<sup>20</sup> \* Ta leisu vonaya, "Omi'a emi vetumaqana dawalilina, 'inega ge ami fata. Ta yavona aqiaqiemi, 'eguma emi vetumaqana kavona te'wa vewanina ana fata 'idewana, e 'inega meaqana 'imia be bwanaga omo'e 'inaya ona vonaya, 'Ba'inega utoaiqo oi'idia! ta namatayagemi. 'Inega ami fata yani qabuna ona viaqia. <sup>21</sup> Ta yavona aqiaqiemi, noqi ta wese vedede 'inega ami fata ba'e niboana diavona ona 'wavi 'ifoqeyedi. Ta ge taha wese yani 'inega."

*Leisu ena vona vemaqilafuna ena* 'aliga weaqina  
(*Maki 9:30-32; Luke 9:43b-45*)

\* 17:2: 2Fit 1:16-18 \* 17:5: Same 2:7; Ais 42:1; Md 3:17; Mk 1:11; Lk 3:22; Luve 18:15 \* 17:10: Mal 4:5 \* 17:12: Md 11:14 \* 17:13: Lk 1:17 \* 17:19: Md 10:1 \* 17:20: Md 21:21; Mk 11:23; Lk 17:6; 1Kol 13:2

22-23\* Tuta nana Ieisu ana to'abibodayavo maega di'we Galili 'inaya itoa va'auta, 'inega vonedi vonaya, "Ya'a Tomotau Natuna nawale agu tosuluva nave'ineiegu tomotau 'idia be ina luve'aligigu, ta 'aubena vetoina 'inaya Yaubada mayawaigu nagiveya'itoto 'eviviegu." 'Inega Ieisu ana to'abibodayavo nuadi vita qiduana ba'e vonana weaqina.

*Vanue Gwalagwalana ana takesi weaqina*

24\* Tuta nana Ieisu ma ana to'abibodayavo imai 'abaga Kafaneumi 'inaya, 'inega Vanue Gwalagwalana ana takesi ana to'ewa imai Fita 'inaya ivetala'aiea ivonaya, "Ma'oda, nage eu tove'ita taketakesi, nage gebu?"

25 Ta Fita vonaya, "E, tauna ena takesi a'ua'uya."

'Inega lugu vanuea ta Ieisu iana Fita vetala'aiea vonaya, "Saimoni, ma'oda unuanua 'aiqa bwa'obwa'o ana toluvineavo weaqidi? Aiqabu 'idiega takesi i'ewe'ewei, taudi edi tomotau 'idiega, nage mali tomotau 'idiega?"

26 'Inega Fita vonaya, "Mali tomotau 'idiega."

'Inega Ieisu wese vona 'evivi vonaya, "Vonahaqiaqi, ta ba'e ilivu nana 'inega edi tomotauyavo edi toa igigivemeaqania. 27 Ta takesi ana to'ewayavo adi lutionova ge kana giveluveifei. 'Inega bani una 'ewei ta una tauya lavuya ta 'iqani nana umadu'onea e 'awana una gila'ei, 'inega mane una lobe a ta una 'ewei. 'Inega una tauya takesi ana to'ewa 'idia ta mane nana una neidi ita'a weaqida."

## 18

*Togama ana wawa 'ena'ina mahala ena 'Ebeluvine gamonaya?*

*(Maki 9:33-37; Luke 9:46-48)*

1\* 'Aubena omo'e 'inaya Ieisu ana to'abibodayavo imai ta ivetala'aiea ivonaya, "Kaiwabu, togama ana wawa 'ena'ina mahala ena 'Ebeluvine gamonaya?"

2 'Inega Ieisu taha gwama gabei mai ta nuanidia vetovoi, 3-4\* vonedia, "Yavona aqiaqiemi, omi'a 'eguma ona nuawebui gwama ba'ena 'idewani, 'inega omi'a ami wawa nave'ena'i mahala ena 'Ebeluvine gamonaya. Ta 'eguma ge ona nuawebui gogama goyogoyodi 'idewani, e nawale ge wese ona lugu 'Ebeluvine nana 'inaya. 5\* 'Inega 'eguma togama taha gwama kavona ba'e gwama nana na'ebe'ewea ya'a agu wawega, e tauna ya'a wese 'ebe'ewegu.

*Sitonova luveifana ana viaqa weaqina*

*(Maki 9:42-48; Luke 17:1-2)*

6 "Ta 'eguma taha tomotau ba'e gwama nana 'idewani nagivebe'uyea be ena vetu-maqana 'iguya nanogea, e 'inega tomotau nana luaqiaqiea be dabo agona 'ebefiaqa maganaya ina yoqoni, ta ma dabona ina felawebuiea malavetaya nadamana nawebui. 7 Omi'a totoa bwa'obwa'o nuakokololomi, mana 'ebebe'u 'eala 'eno'eno. Vonahaqiaqi, sitonova tuta qabuna 'ifo'ifoqe, ta 'eguma taha 'oloto enavo sitonovega nagivebe'udi e nawale 'oloto nana veilaqe qiduana nalobe a.

8\* "Ta 'eguma nimau nage 'aqeu ina givebe'uyeu 'inega una da'a yavuledi. Mana ge taha ana luveifana 'eguma nimau nage 'aqeu da'ada'adi ta yawai vataya una lobe a, ta 'esi ge taha au luaqiaqi 'eguma ma bubuyau ina felawebuieu 'aiwe 'ala'alata vatayana 'inaya. 9 Matau wese 'idewani 'eguma nagivebe'uyeu una bwaqi yavulea. Luaqiaqie u 'eguma matau 'aidegana ta yawai vataya una lobe a, ta ge daluaqiaqie u 'eguma matau magilafudi ta ina felawebuieu 'aiwe 'ala'alata vatayana 'inaya.

10\* "Gogama ba'e 'idewanina gebu taha 'idiega ona dikinekeinei. Yavona aqiaqi 'imia, gogama qabudi edi tovale'ewayavo tuta qabuna mahalaya Tamagu 'iawanaya itoatoa ta i'ite'itea.

\* 17:22-23: Md 16:21 \* 17:24: 'Ifu 30:13; 38:26 \* 18:1: Lk 22:24 \* 18:3-4: Md 19:14; Mk 10:15; Lk 18:17  
\* 18:5: Md 10:40; Lk 10:16; Ion 13:20 \* 18:8: Md 5:29-30 \* 18:10: Ibe 1:14

*Vona sesebai sifi luluve'waivina weaqina*  
(Luke 15:3-7)

<sup>11</sup>\* “[Ta ya’a Tomotau Natuna yamai luluve’waividi sabi ’etoyavuidi.] <sup>12</sup> Ta ona nuaia ’eguma taha ’oloto ena sifiavo adi yau 100 ta ’aigedana ’idiega naluve’waiva, ’inega ma’oda naviaqa ’aiqa? Yavona aqiaqiemi, nawale 99 dina bwanaga veanaya navalovedi ina toatoa ta natauya luluve’waivi nana sabi salina. <sup>13</sup> Ta yavona aqiaqiemi, tuta nana naloba ’eviviea ’inega naqaiawa qiduana, ta ’abiboda 99 dina, mana taudi aqiaqidi itoatoa. <sup>14</sup> Inega ona alamani aqiaqiea, Tamami mahalaya ge nuanuana gogama ba’e ’idiega taha naluve’waiva tomotau edi sitonova ’inega.

*Luveifana ana givetunuqa weaqina*

<sup>15</sup>\* “Eguma iau luveifana naviaqia ’iuya, ’inega una tauya ’inaya ta magilafumi ami ’aidega ena luveifana ona givetunuqia. Ta ’eguma eu vona nanoqolia ’inega ni’a maega oveiana ’evivi. <sup>16</sup>\* Ta ’eguma ge nuana be eu vona nanoqoli ’inega tomotau ’aidegina nage magilafudi una ’ebe’ewedi ta maega ona tauya iau ’inaya. ’Inega o’a eu ve’ewa iau ’inaya una simana ’ifoqeyea togivetunuqa magilafudina matadia, ’inega taudi adi fata ve’ewa nana ina alamani aqiaqiei be ina ’awahaqiaqieu. <sup>17</sup> Ta ’eguma ge nuanuana emi vona nanoqoli ’inega iau nana ona tauyea ’ekalesia ’idia ta vita nana weaqina ona vematamagilafuyedi. Ta ’eguma ge nuanuana edi vona nanoqoli ’inega ona nogea natoa ’ifoqe ’idewani takesi ana to’ewayavo, nage aiqabu ge Yaubada ida vetumaqanea.

<sup>18</sup>\* “Yavona aqiaqi ’imia, ’eguma tola’ai bwa’obwa’oya oyoqoyoqonidi ’inega yani diavona nawale wese mahalaya Yaubada nayoqonidi. Ta wese ’eguma tola’ai bwa’obwa’oya oyavuyavuidi nawale yani diavona wese mahalaya Yaubada nayavuidi.

<sup>19</sup>\* “Ta wese yavonemi, ’eguma bwa’obwa’oya tomotau magilafumi taha yani weaqina nuanua ’aideganega ona venoqi Yaubada ’inaya, e ’inega Tamagu mahalaya emi nuanua nave’iea. <sup>20</sup> Mana ’eguma tomotau magilafudi nage toidi agu wawega ina toava’auta, ’inega ya’a wese nuanidia yatoatoa.”

*Nuataqo weaqina*

<sup>21</sup> Inega Fita mai ta Ieisu vonea vonaya, “Kaiwabu, ’eguma iagu tuta qabuna ’iguya luveifana viaviaqia ’inega ’evisa tuta ena nuataqoi, nage tuta seveni ana yau?”

<sup>22</sup>\* Ta Ieisu vonaya, “Ge seveni ana yau, ta ’esi tuta qabuna una nuanuataqoya, <sup>23</sup> mana nuataqo ilivu nana ba’e ’idewani mahala ena ’Ebeluvine ’inaya, ovivineneqa! Toluvine qiduana taha nuanuana ena tofewayavo adi aga ana buki na’itea ’inega nahalamani aqiaqiea ’evisa mane lova i’ewei ’inega.

<sup>24</sup> “Ta buki nana ’ite’itei, ’inega ena tofewa taha imiea ’inaya, ta tofewa nana ana aga ’evisa milioni ’idewani. <sup>25</sup> Ta ge ana fata nave’iei, ’inega ena kaiwabu luvinea vonaya, ‘O’a eu susuyavo maega emi kulufa qabuna ona vegimwaneyedi be mane nana una neigu au aga weaqina!’ <sup>26</sup> Ta tofewa nana me ena nuavita tuqatuqanega sobadi venoqi ’inaya vonaya, ‘Kaiwabu, tua uda nuakolokoloyegu ta nawale aga nana ena vemaisa ’eviviea ’iuya.’ <sup>27</sup> Inega kaiwabu nana nuakolokoloyea ta ana aga qabuna nuataqoya, ta ’inega awafelea webui tauya.

<sup>28</sup> “Tofewa nana ni’a webui, ’inega iana taha ’ita lobe, ta tauna ana aga goyona kavona ’aubena ’aidegana ana ve’ia lova ’inega ’ewea. ’Inega maganaya kafi givegaululuya ta voneaya, ‘O’a au aga ba’itagana una ve’iea ’iguya!’ <sup>29</sup> Inega iana tuqatuqanega sobadi ta venoqiea vonaya, ‘Tua uda nuakolokoloyegu ta nawale aga nana ena vemaisa ’eviviea ’iuya.’ <sup>30</sup> Ta ena venoqi ge danoqolia ta ’esi vanue ’ebeyoqona ’inaya a’uluguyea be omo’e ’inaya natoa ana laba ana aga qabuna nalu’ovoia.

<sup>31</sup> “Ta wese vaidi tofewa ba’e ilivuna i’itea ’inega nuadi vita qiduana. ’Inega itauya edi kaiwabuna ’inaya ta yani qabuna ni’a i’itea isimana ’ifoqeyea. <sup>32</sup> Inega kaiwabu nana ena

\* 18:11: Lk 19:10      \* 18:15: Lk 17:3; Gal 6:1      \* 18:16: Luve 19:15; Ion 8:17      \* 18:18: Md 16:19; Ion 20:23  
\* 18:19: Mk 11:24; Ion 15:7      \* 18:22: Nug 4:24; Lk 17:4

tofewa gabei mai ta voneaya, 'O'a tofewa veifa otaqiu, mana uvenoqiegu vonigo au aga qabuna ena nuataqodi, ta eu nuanua ni'a yaviaqia. <sup>33</sup> 'Inega o'a wese luaqiaqieu 'eguma iau nana uda nuakolokoloyea be ana aga 'iuya uda nuataqoi 'idewani ya'a ni'a yaviaqia 'iuya, waisa?' <sup>34</sup>\* 'Inega kaiwabu nana diana vilei ta vanue 'ebeyoqona ana to'itamakiavo luvinedi ba'e tofewa nana vanue nana 'inaya wese ina a'uluguyea, ta ina luvematasabuya ana laba ana aga nana qabuna navemaisa 'ovoia." <sup>35</sup>\* 'Inega Ieisu ena vona lu'ovoia vonaya, "Tamagu mahalaya wese ba'e 'idewani naviaqa 'aiqa 'imia 'eguma emiavo ge ona nuakolokoloyedi be edi luveifayavo ona nuataqodi."

## 19

### *Ieisu ena ve'ita sa'ila weaqina*

*(Maki 10:1-12)*

<sup>1</sup> Tuta nana Ieisu ba'e ve'ita diavona lu'ovoia, 'inega di'we Galili nogei ta lugu di'we Iudia gamonaya, ta taha di'we 'inaya toatoa go'ila Iolidani di'wenaya. <sup>2</sup> 'Inega qabu qiduadi Ieisu i'abibodea, ta omo'e 'inaya tovevihiqa qabudi giveaqiaqiedi.

<sup>3</sup> Ta Falisiavo imai Ieisu 'inaya sabi sitonovina, 'inega ivetala'aiea ivonaya, "Nage ana fata taha 'oloto taunega ena 'iu kavokavovo 'inega moqanena navesa'ilidi?"

<sup>4</sup>\* Ta Ieisu edi vona ve'evivia vonaya, "Ni'a oalamanina Buki Nugwenugweina 'inaya i'wayavia tuta 'ebeve'ale 'unu 'inaya To'iva'ava'ata tomotau magilafudi viaqidi me'olotona ta wese mevavinena", <sup>5</sup>\* ta vonaya,

"Ba'e 'iuna 'inega 'oloto tamana wese inana nanogedi ta moqanena maega ina luvetuba, 'inega magilafudi 'wafidi nave'aidega. <sup>6</sup> Lova edi toa kavona magilafudi 'idewani, ta 'esi ba'itagana 'wafidi ni'a ve'aidega, 'inega tola'ai Yaubada ni'a luvetubea ge taha toga navetoasi'iei."

<sup>7</sup>\* 'Inega Falisi ivonaya, "Tola'ai weaqina Mosese ena luvine a'uya vonigo 'oloto taha ana fata leta 'inaya ena noga na'wayavia ta moqanena naneidi 'inega nasa'iledi?"

<sup>8</sup> Ta Ieisu vonedi, "Emi vedeba 'i'wana weaqina Mosese awafelemi be moqanemiavo ona vesa'ilidi. Ta lova tuta ana 'ebeve'ale 'inaya gebu wese taha awafela da'eno'eno sa'ila weaqina. <sup>9</sup>\* Ta yavonemi, 'eguma taha 'oloto moqanena ge taha luveifana ida viaqi ta tua moqanena navesa'ilidi ta navaqi ukamana mali vavine 'inaya, e 'inega 'oloto nana luabu ilivuna ni'a viaqia."

<sup>10</sup> 'Inega Ieisu ana to'abibodayavo ivoneaya, "Eguma vaqi ana luvine ba'e 'idewani 'inega luaqiaqiea be ge taha toga navaqi."

<sup>11</sup> Ta Ieisu vonedi, "Ve'ita ba'e gebu tomotau qabudi adi fata be ina 'awahaqiaqiedi, ta 'esi tomeqabu Yaubada alamani ni'a neidi ba'e yani diavona weaqina, e taudi adi fata ve'ita nana ina 'awahaqiaqiedi. <sup>12</sup> Tomotau vaina ge ida vaqi edi 'iu taha taha 'idiega. Nage taha 'oloto tubu veiveifana 'inega ge ana fata navaqi, ta wese taha 'oloto ge ana fata navaqi mana vaina tomotau yani ni'a iviaqia 'wafina 'inaya. Ta wese taha 'oloto taunega vaqi nogea, mana nuanuana Yaubada weaqina navetofewa. 'Inega 'eguma taha toga ba'e vona nana na'awahaqiaqiedi e 'inega ona awafelea be na'awahaqiaqiedi."

### *Ieisu gogama vona veyolubedi*

*(Maki 10:13-16; Luke 18:15-17)*

<sup>13</sup> 'Inega tomotau gogama imiedi Ieisu 'inaya nuanuadi nagitonovidi be weaqidi nanoqi Yaubada 'inaya. Ta ana to'abibodayavo tomotau diavona gogama imiedia iawatayedi. <sup>14</sup>\* Ta Ieisu vonedi vonaya, "Gogama ona awafeledi be ina mai 'iguya, ta ge ona 'etobodedi, mana gogama ba'e 'edewanina mahala ena 'Ebeluvine taudi weaqidi." <sup>15</sup> 'Inega Ieisu gogama diavona gitonovidi ta vona veyolubedi, 'inega 'abaga nana nogei ta tauya.

\* 18:34: Md 5:25-26 \* 18:35: Md 6:15; Mk 11:25; Efe 4:32; Kol 3:13 \* 19:4: Nug 1:27; 5:2 \* 19:5: Nug 2:24; Efe 5:31 \* 19:7: Luve 24:1-4; Md 5:31 \* 19:9: Md 5:32; 1Kol 7:10-11 \* 19:14: Md 18:2-3

*Taha 'oloto kaikaiwabuna weaqina  
(Maki 10:17-31; Luke 18:18-30)*

<sup>16</sup> 'Abiboda 'oloto taha mai Iesu 'inaya ta vonaya, "Tove'ita, tola'ai aqiaqina ena viaqi be 'inega yawai vataya ena 'ewei?"

<sup>17</sup> \* Ta Iesu vonaya, "Tola'ai weaqina uvevetala'aiegu ilivu aqiaqina ana viaqa weaqina? Mana Yaubada ana 'aidega aqiaqi otaqina toatoa, ta 'eguma nuanuau yawai vataya una lobe'a 'inega tauna ena luvineavo una 'abibodedi."

<sup>18</sup> \* 'Inega 'oloto nana vetala'aiea vonaya, "Isana 'ai luvine?"

'Inega Iesu vonea, "Ge una luve'aliga, ge una luabu, ge una vanawala, ta wese kotu ana tuta 'inaya iau ge u'vega una ve'ewa kavovoi. <sup>19</sup> \* Ta tamau be inau una 'amayabedi, be wese emwavo una veyolubedi 'idewani tau'u uveveyolubeu."

<sup>20</sup> 'Inega 'oloto nana vonaya, "Luvine ba'e qabudi ni'a ya'abiboda aqiaqiedi, ta tola'ai wese ena viaqi?"

<sup>21</sup> 'Inega Iesu voneaya, "Eguma nuanuau eu ilivu navetunutunuqa aqiaqi 'inega una 'evivi eu 'abagaya be eu kulufa qabudi una vegimwaneyedi. Ta mane nana una 'ewei una vewila'ayea lukwalukwa 'idia, ta 'inega una mai una 'abibodegu, be 'inega kaikaiwabu mahalaya una lobe'a."

<sup>22</sup> 'Oloto nana Iesu ena vona ba'e noqolia 'inega me ena nuavita 'evivi tauya, mana ena kulufayavo vegagaledi.

<sup>23</sup> 'Inega Iesu ana to'abibodayavo vonedi, "Yavona aqiaqiemi, taudi tovekaikaiwabu edi lugu Yaubada ena 'Ebeluvine 'inaya vitana. <sup>24</sup> Ta wese yavonemi yubai kameli ena lugu saima vetoana 'inega vitana, ta taudi tovekaikaiwabu edi lugu Yaubada ena 'Ebeluvine 'inaya vita otaqina."

<sup>25</sup> Iesu ana to'abibodayavo ena vona ba'e inoqolia 'inega nuadi voqana qiduaana ta ivonaya, "Eguma vonahaqiaqi ba'e 'idewanina, 'inega togama ana fata 'etoyavua nalobei?"

<sup>26</sup> \* Ta Iesu 'itedi ta vonaya, "Yani ba'e tomotau ge adi fata, ta Yaubada 'inaya yani qabuna ana fata!"

<sup>27</sup> 'Inega Fita vonaya, "Kaiwabu, ta ima'a ma'oda, mana ema kulufayavo qabudi ni'au anogedi ta a'abi'abibodeu?"

<sup>28</sup> \* Ta Iesu vonedia, "Vonahaqiaqi, nawale bwa'obwa'o ana givevauvau 'inaya ya'a Tomotau Natuna agu galiva kaikaiwabuna 'inaya ena toabui. Ta omi'a agu to'abibodayavo ami galiva tuwelo 'idia wese ona toabui, be me Isileli edi gade tuwelo ona luvinedi.

<sup>29</sup> "Eguma tomeqabu omi'a emi vanueavo nage taimiavo nage novumiavo nage tamamiavo be inamiavo nage natumiavo nage ami talaqayavo onogedi ya'a weafigu, 'inega ba'e yani diavona ni'a onogedia nawale ona loba 'eviviedi ma ana luvetomana, ta wese yawaimi vataya maega. <sup>30</sup> \* Ta tomeqabu ba'itaga inugwenugweta nawale 'eala 'idiega ina 'abiboda, ta taudi ba'itaga i'abi'abiboda nawale ina nugweta.

## 20

*Vaoqa ana tofewa adi ve'ia weaqina*

<sup>1</sup> "Mahala ena 'Ebeluvine ba'e 'edewana: Taha 'oloto 'awa'awai otaqaya ya'itoto tauya 'abaga 'ebetoava'auta 'inaya ta vaina tomotau gaba va'auqidi imai ta vetala'aiedi sabi fewa ena vaoqa 'inaya. <sup>2</sup> 'Inega iveqae adi ve'ia weaqina, ta tonivaoqa awafela adi ve'ia 'aubena 'aidegana weaqina nawale naneidi. 'Inega vetunedi itauya ena vaoqaya sabi fewa.

<sup>3</sup> "Inega baba'au tawa vanemai, 'inega tonivaoqa nana 'evivi tauya 'abaga 'ebetoava'auta 'inaya, 'inega vaina tomotau 'itedi itoatoa kavokavovo, <sup>4</sup> 'inega gabedi vonaya, 'Omi'a wese kana tauya egu vaoqaya ona fewa ta ami ve'ia aqiaqina 'iba'igo ena neimi.'

\* 19:17: Luvi 18:5; Lk 10:28 \* 19:18: 'Ifu 20:13-16; Luve 5:17-20 \* 19:19: 'Ifu 20:12; Luvi 19:18

\* 19:26: Iob 42:2 \* 19:28: Md 25:31; Lk 22:30; Ve 3:21 \* 19:30: Md 20:16; Lk 13:30



'Inega maega itauya vaoqaya. <sup>5</sup> Ta baba'auya ta wese 'idewani baba'au yewavilea 'inaya 'evivi tauya 'ebetova'auta nana 'inaya, ta wese vaina tomotau lobedi 'inega 'ebe'ewedi tauyedi vaoqaya sabi fewa. <sup>6</sup> 'Inega wese lavilavi lu'evivi tauya ta vaina tomotau wese lobedi vetala'aiedi vonaya, 'Tola'ai weaqina 'aubena qabuna ba'idia otoatoa kavokavovo?'

<sup>7</sup> "Ta 'inega ivoneaya, 'Ima'a ge taha toga dagabema fewa weaqina.'

"'Inega tonivaoqa vonaya, 'Omai, omi'a wese egu vaoqaya ona fewa.'

<sup>8</sup>\* "Tuta nana ni'a velovanea 'inega tonivaoqa ena tofewa adi to'itamaki vonea vonaya, 'Tofewa qabudi una gabedi ina mai adi ve'ia una neidi. Ta taudi i'abiboda imai 'idiega una ve'ale una maduneidi, 'inega natauya ana laba una lu'ovoa tonugweta 'idia.'

<sup>9</sup> "Tomeqabu lavilavi 'inaya imai ive'ale ifewa adi ve'ia 'aubena 'aigedana weaqina i'ewea. <sup>10</sup> 'Inega tofewa nugwenugweidi 'awa'awai 'inaya ive'ale ifewa ivonaya be adi ve'ia ma ana givetomana ina 'ewei, ge taudi imai 'abibodadia adi ve'ia 'idewani. Ta gebu, mana taudi wese ve'ia 'aubena 'aidegana weaqina i'ewea. <sup>11</sup> 'Inega adi ve'ia i'ewea i'itea ta weaqina ge ida qaiawa, 'inega tonivaoqa 'inaya ilugwae ivonaya, <sup>12</sup> 'Tomotau vauvaudi imai ifewa tuta kusakusana, ta ima'a 'aubena kuena wese baba'au valema ta afewa, 'inega ama ve'ia agona ada 'ewea. Ta ma'oda 'inega ama ve'ia lelelea alobei?'

<sup>13</sup> "'Inega tonivaoqa tofewa taha voneaya, 'Iagu, ge taha luveifana eda viaqi 'imia, mana egu awafela ami ve'ia 'aubena 'aidegana weaqina tawadega yavonemi ta o'awahaqiaqiea, waisa? <sup>14</sup> 'Inega au ve'ia ba'e una 'ewea una tauya. Ya'a egu luvine ba'e 'idewani, tomeqabu imai lavilavi adi ve'ia yaneidi o'a wese au ve'ia 'idewana. <sup>15</sup> Vonahaqiaqi, ya'a luaqiaqiegu be egu 'ebeluvine 'inaya agu 'aidega yaluluvine, waisa? Ta omi'a egu veyoluba tomotau 'idia weaqina ge ona nualuveifa.'

<sup>16</sup>\* Ta Ieisu ena vona lu'ovoia vonaya, "'Inega aiqabu i'abi'abiboda nawale ina nugweta, ta aiqabu inugwenugweta nawale ina 'abiboda.'

*Ieisu ena vona vetoina ena 'aliga weaqina*

*(Maki 10:32-34; Luke 18:31-34)*

<sup>17</sup> Tuta nana Ieisu Ielusalema weaqina nawale 'wato'watovu 'inega ana to'abibodayavo tuwelo vanaqoyedi 'eda nanavinaya ta vematamagilafuyedi, <sup>18</sup>\* vonaya, "Katautauya oade Ielusalema 'inaya ta ya'a Tomotau Natuna ina ve'ineiegu toveguba qiduquduadi be luvine ana tove'itayavo 'idia. Ta taudi ina luvine egu 'aliga weaqina. <sup>19</sup> 'Inega 'abiboda ina ve'ineiegu taudi ge me Diu 'idia, ta ina givenu'wegu be wayoyega ina vunuqa dadanegu, 'inega 'etoluai 'inaya ina tutuve'ewegu. Ta 'aubena vetoina 'inaya Yaubada 'aligege nagiveya'itoto 'eviviegu."

*Ieisu ena ve'ita vetofewa weaqina*

*(Maki 10:35-45)*

<sup>20</sup> 'Inega Sebedi moqanena ma natudiavo imai Ieisu 'inaya ta tuqatuqadiega isobadi nuanuadi Ieisu ina venoqiea taha yani weaqina. <sup>21</sup>\* 'Inega Ieisu vonaya, "Tola'ai nuanuami?"

'Inega vavine dina ivonaya, "Egu nuanua be natugwavo una awafeledi eu 'Ebeluvine gamonaya di'weuya ina toabui taha au 'ataqia ta taha au kelia."

<sup>22</sup>\* 'Inega Ieisu natudiavo vonedia, "Omi'a emi noqi ba'e ana alamani aqiaqi ge oda 'ewei, mana nawale visiqia vedina 'inega ena numa. Nage omi'a wese ami fata vedi nana 'inega ona numa?"

Ta ivonaya, "Ama fata."

<sup>23</sup> 'Inega Ieisu vonaya, "Vonahaqiaqi, vedi nana 'inega ena numa omi'a wese 'inega ona numa. Ta ge agu fata tomotau ena venua'ivinidi aiqabu nawale egu 'Ebeluvine 'inaya agu 'ataqiege wese agu keliege ina toabui. Ta 'esi Tamagu ana 'aigeda 'ebetova diavona ni'a 'iva'ava'aidi tomotau weaqidi."

\* 20:8: Luvi 19:13; Luve 24:15 \* 20:16: Md 19:30; Mk 10:31 \* 20:18: Md 16:21; 17:22-23 \* 20:21: Md 19:28; Lk 22:30 \* 20:22: Md 26:39; Ion 18:11

<sup>24</sup> 'Inega to'abiboda ediavo adi yau teni, Iemesa ma taina Ioni edi noqi inoqolia 'inega diadi vilea. <sup>25</sup>\* 'Inega Iesu gaba va'auqidi vonedi vonaya, "Omi'a ni'a oalamaniana bwa'obwa'oya toluvine qiduiduadi edi tomotauyavo tuta qabuna iluviluvinedi ta luvine falafalana ineineidi. <sup>26</sup>\* Egwavo, omi'a ge wese 'idewana ona veilivu 'aiqa. Ta 'esi 'eguma taha toga 'imiega nuanuau una vetoluvine, 'inega emwavo weaqidi una vetofewa.

<sup>27</sup> "Ta wese 'eguma togama 'imiega nuanuau una vetovanugweta 'inega luaqiaqieu emwavo weaqidi una vetofewa. <sup>28</sup>\* Wese 'idewana ya'a Tomotau Natuna ge eda mai bwa'obwa'oya be vonigo tomotau weaqigu ina vetofewa, ta 'esi yamai sabi vetofewa tomotau weaqidi, ta wese ni'a yahawafelegu be ena 'aliga tomotau qabumi ami 'etoyavua weaqina."

*Matakwaya magilafudi Iesu giveaqiaqiedi*

*(Maki 10:46-52; Luke 18:35-43)*

<sup>29</sup> 'Inega Iesu ma ana to'abibodayavo Ieliko inogea ta qabu qiduadi Iesu i'abi'abibodea. <sup>30</sup> Ta 'oloto magilafudi matadi kwayakwayana 'eda nanavinaya itoabui itoatoa, ta Iesu maimai valena inoqonoqolia 'inega igabea ivonaya, "Deibida tubuna ye, uda nuakolokoloyema!"

<sup>31</sup> 'Inega qabu diavona edi gaba nana inoqolia ta ilugwaeyedi ivonaya, "Omi'a olua'u, ge ona gaba."

Ta magilafudina igaba bonadi qiduanega ivonaya, "Kaiwabu, o'a Deibida natuna ye uda nuakolokoloyema!"

<sup>32</sup> 'Inega Iesu veutovolo ta gabedi imai vonedia, "Tola'ai nuanuami ena viaqi weaqimi?"

<sup>33</sup> Ta ivonaya, "Kaiwabu, nuanuama matama una giveaqiaqiedi be yaqisa ama fata ana 'ita!"

<sup>34</sup> 'Inega Iesu nuakolokoloyedi 'abo matadi gitonovia 'inega matadi lukwayavonega 'eaea ta i'ita aqiaqi, 'inega Iesu i'abibodea.

## 21

*Iesu ena lugu Ielusalema 'inaya*

*(Maki 11:1-11; Luke 19:28-40; Ioni 12:12-19)*

<sup>1</sup> Tuta nana Iesu ma ana to'abibodayavo itautauya Ielusalema weaqina, 'inega i'ifoqe 'abaga Bedifegi bwanaga Olibe 'inaya. 'Abaga nana ge luluvai Ielusalemayega, 'inega Iesu ana to'abibodayavo magilafudi vetunedi ina nugweta, <sup>2</sup> ta vebibinedi vonaya, "Abaga 'iawadaya ona tauya, ta tuta nana ona 'ifoqe yubai doniki ma natuna ona 'itedi 'aiwe 'inaya yoqoyoqonidi itovotovolo, ta magilafudi ona li'emidi ona miedi 'iguya. <sup>3</sup> Ta 'eguma togama navetala'aiemi tola'ai weaqina doniki o'ewe'ewedi, 'inega ona vonaya, 'Ema Kaiwabu ena nuanua 'idewani', 'inega tovetala'ai nana nahawafeledi 'imia."

<sup>4</sup> Ba'e yani nana 'ifoqe be 'inega tola'ai lova tovesimasimana isimanea ana aqiaqina na'ifoqe, e ba'e 'idewani ivonaya,

<sup>5</sup>\* "Saioni tomotaudi ona vonedi ona vonaya,  
'O'itea, emi Kini maimai 'imia.

Tauna tonuawebui doniki natudi gwavunaya gelu.

Ta doniki nana me'olotona ta kekeyavauna 'inaya.' "

<sup>6</sup> Iesu ana to'abibodayavo ena vona i'abibodea tuata itauya. <sup>7</sup> 'Inega doniki nana ma natuna ilobedi 'abo imiedi, ta adi kalekoyega doniki gwavudi ita'uli, 'abo Iesu gelu.

<sup>8</sup> Ta qabu diavona wese adi kaleko 'edaya ita'ulidi ta vaina magimagi 'waedi ida'edi ta 'eda nana ita'ulia. <sup>9</sup>\* Iesu qabu nuanidia maega itautauya, ta qabu diavona koluega iawahawatuboya ivonaya,

"Osana! Kaiwa qiduana o'a Deibida tubuna 'iuya!

\* 20:25: Lk 22:25-26 \* 20:26: Md 23:11; Mk 9:35 \* 20:28: Lk 22:27; Fil 2:7 \* 21:5: Sek 9:9 \* 21:9: Same 118:25-26; 148:1

Yaubada, nuanuama tauna maimai Kaiwabu ana wawega una vona veyolubea.

Yaubada Toatoa Vane Otaqiu ahawahawatubou!”

<sup>10</sup> Tuta nana Iesu lugu Ielusalema tomotau qabudi divelegudi ta givenuavoqanidi ivonaya, “Isana omo’ena togama?”

<sup>11</sup> Ta qabu dina Iesu maega itautauya tonuavoqana dina edi vona ive’evivia ivonaya, “Ba’e tauna tovesimasimana ana wawa Iesu, tauna Nasaleta ’olotona di’we Galili ’inega mai.”

*Iesu lugu Vanue Gwalagwalana ’inaya*

*(Maki 11:15-19; Luke 19:45-48; Ioni 2:13-22)*

<sup>12</sup> ’Inega Iesu lugu Vanue Gwalagwalana ’inaya, ta togimwaneavo ta wese tovegimwaneavo qabudi ’wavinidi. Ta mane ana tosenisiavo edi ’ebea’u ta wese bunebune adi tovegimwaneavo edi ’ebetoa ’e’ubuini, <sup>13</sup> \* ta vonedi vonaya, “Buki Nugwenugweina gamonaya Yaubada ena vona i’wayavia vonaya, ‘Egu vanue ina gabea vanue ’ebevenoqi’, ta omi’a ogivilea vonigo tovanawala adi vatu’ubu ’idewani.”

<sup>14</sup> Iesu nawale toatoa Vanue Gwalagwalana ’inaya, ’inega matadi kwayakwayana ta wese ’aqedi veifana imai Iesu ’inaya ’abo qabudi giveaqaqiedi. <sup>15</sup> Ta toveguba qiduquadi ta wese luvine ana tove’itayavo Iesu ena viaqa aqiaqina ta waiwaina i’itedi, ta wese gogama bonadi inoqolia Vanue Gwalagwalana gamonaya ivevekolukolua, ivonavonaya, “Deibida tubuna kana awatuboya!”

<sup>16</sup> \* ’Inega toveguba dina Iesu ivetala’aiea ivonaya, “Nage gogama ba’e edi vona unoqolia?”

’Inega Iesu vona ’eviviedi vonaya, “Ao, ni’au yanoqolia, ta nage Buki Nugwenugweina gamonaya ge oda avoya vonaya, ‘Gogama agoagodi ta wese sususudi ni’a uve’itedi ma’oda ’inega ’awadiega ina awatubo aqiaqieu.’”

<sup>17</sup> ’Inega Iesu tomotau nogedi Ielusalema ’inaya, ta ’ifoqe tauya Bedani ’inaya, ta omo’e ’inaya ’enova.

*Iesu ’ala’ai vona ve’alatea*

*(Maki 11:12-14,20-24)*

<sup>18</sup> Ta mahala ahalia Iesu ya’itoto ’evivi tautauya Ielusalema weaqina, ta ’edaya botana lutonovia. <sup>19</sup> Nawale tautauya, ’inega taha ’ala’ai ’itea ’eda nanavinaya ’abo vanaqo ’itea vuaqa geqana, ta ’esi ’waenamomo. ’Inega Iesu ’aiwe nana vona ve’alatei vonaya, “Nawale ge wese una vuaqa ’evivi!” Ta ’inega ’aiwe nana mwatuqu kwayavona.

<sup>20</sup> Ta tuta nana Iesu ana to’abibodayavo ba’e viaqa nana i’itea ’inega nuadi voqana ta ivoneaya, “Ma’oda ’inega ’aiwe nana mwatuqu kwayavona?”

<sup>21</sup> \* Ta Iesu vonedi, “Yavona aqiaqiemu, ’eguma me emi vetumaqana ta ge ona venuana magilafu, ’inega tola’ai ni’a yaviaqia ba’e ’aiwe nana ’inaya, omi’a wese ami fata ’idewanina ona viaqia. Ta wese ’eguma bwanaga ba’e ’inaya ona vonaya, ‘Utovalo utoaiqo mwade’waya!’ e ’inega ’idewani naviaqia. <sup>22</sup> \* ’Eguma me emi vetumaqana ona noqi Yaubada ’inaya vaina yani weaqina, e ’inega yani diavona ona lobe.”

*Iesu ivetala’aiea ena luvine ’iuna weaqina*

*(Maki 11:27-33; Luke 20:1-8)*

<sup>23</sup> ’Inega Iesu Vanue Gwalagwalana ’inaya ’evivi lugu ta veve’ita. ’Inega toveguba qiduquadi wese ’abaga ana tovanugwetayavo imai ’abo Iesu ivetala’aiea ivonaya, “Uvonema togama ena luvineyega ba’e ’idewana ufewafewa ’aiqa? Ta wese togama ena waiwaiega yani ba’e uviaviaqidi?”

<sup>24</sup> Ta Iesu vonedi vonaya, “Nugweta taha yani ena vetala’aiemi, ta ’eguma egu vona ona ve’ia aqiaqiea e ’inega ya’a wese ena vonemi egu luvine weaqina. <sup>25</sup> Egu vetala’ai ba’e,

\* 21:13: Ais 56:7; Iel 7:11 \* 21:16: Same 8:2 \* 21:21: Md 17:20; Lk 17:6; 1Kol 13:2 \* 21:22: Md 7:7-11; 18:19

'Togama ena luvineyega Ioni tomotau givebabitaisodi, Yaubada 'inega nage tomotau 'idiega?' ”

'Inega taudi adi 'aidega iveqae ivonaya, “Ma'oda ena vona kana ve'evivi 'aiqei? Mana 'eguma kana vonaya 'Yaubada 'inega', e nawale navona 'evivieda navonaya, 'Inega tola'ai weaqina Ioni ge oda vetumaqanei?” <sup>26</sup> \* Ta wese 'eguma kana vona, 'Tomotau 'inega', e nawale qabu ina nualuveifa 'idaya mana qabudi Ioni i'awatovesimasimanea.”

<sup>27</sup> 'Inega Iesu ena vetala'ai ive'evivia ivonaya, “Ge ada alamania.”

'Inega Iesu wese vonedi vonaya, “'Inega ya'a wese ge ena vonemi togama ena luvineyega ba'e 'idewani yaviaviaqa 'aiqa.”

*Vona sesebai 'oloto natunavo magilafudi weaqidi*

<sup>28</sup> 'Inega Iesu wese vonedi, “Ba'e egu vona ona nuaia. Taha 'oloto natunavo me'olotodi magilafudi itoatoa. 'Inega tamadi natuna 'unutauna vonea vonaya, 'Natugu, 'itaga una tauya vaoqaya una fewa',

<sup>29</sup> “ta 'unutau nana tamana ena vona ve'evivia vonaya, 'Iko'i', ta 'abiboda nuana givila 'abo tauya ve'ale fewa.

<sup>30</sup> “'Oloto nana natuna tugamwanina wese 'idewanina vonea vonaya, 'Natugu, 'itaga una tauya talaqaya una fewa',

“'abo natuna vonaya, 'E aqiaqina 'idewani, nawale ena tauya', ta ge datauya.

<sup>31</sup> “'Inega magilafudi 'idiega togama tamadi ena vona 'abibodei?”

Ta tovegubayavo wese 'abaga ana to'itamakiavo ivonaya, “'Unutauna”.

'Inega Iesu vonedi vonaya, “'Vonahaqiaqi, toluveifadi taudi takesi ana to'ewayavo be wese tokodada nawale ina madulugu Yaubada ena 'Ebeluvine 'inaya, ta omi'a 'abiboda.

<sup>32</sup> \* Mana lova Ioni 'eda tunutunuqina ve'itemi ta ge oda vetumaqanea, ta 'esi takesi ana to'ewayavo be wese tokodada ivetumaqanea. Matamiega wese o'itedi inuagivila, ta omi'a ge oda nuagivila ta nawale ge oda vetumaqanea, waisa?”

*Vona sesebai vaoqa ana to'itamaki weaqidi*

*(Maki 12:1-12; Luke 20:9-19)*

<sup>33</sup> \* Ta Iesu wese vonedi vonaya, “Taha vona sesebai wese ona noqolia tonivaoqa taha weaqina. Tonivaoqa nana 'oine ana loi 'wadia ena vaoqa gamonaya, ta 'ali vivilia ta wese 'oine ana 'ebememe viaqia. 'Inega gweda vaoqa gamonaya yoqonia ta tomotau 'ewedi be vaoqa ina 'itamakia, ta tauna tauya mali di'we 'inaya. <sup>34</sup> Ta bolimana ana tuta 'inaya ena tofewayavo vaina vetunedi ena vaoqaya 'oine vuaqina sabi 'ewadi ena to'itamakiavo 'idiega.

<sup>35</sup> “E tuta nana itauya vaoqaya 'inega to'itamakiavo tofewa dina ikafidi, ta taha ivunuqia ta vemagilafuna iluve'aligia ta vetoina iludaboya. <sup>36</sup> 'Abiboda tonivaoqa nana wese ena tofewayavo tufwana qabudi vetunedi, ta to'itamaki diavona wese 'idewana iveilivu 'aiqedi. <sup>37</sup> Ta tuta vetoina 'inaya tonivaoqa nana natuna me'olotona vetunea 'idia ta taunega vonaya, 'Ba'e natu otaqigu, 'inega ina 'amayabea.’

<sup>38</sup> \* “Ta tuta nana natuna 'ifoqe i'itea 'inega to'itamaki diavona ma ediavo iveveqae ivonaya, 'Emavo, 'oloto omo'e maimai tauna kaiwabu nana natu otaqina, 'inega kana luve'aligia be yaqisa ita'a taudega ba'e vaoqa nana kana luvinea.’ <sup>39</sup> \* 'Inega ikafia vaoqega ifelawe buiea 'ali gwavunaya ta iluve'aligia.

<sup>40</sup> “'Inega ona nuaia tuta nana tonivaoqa na'evivi namai tola'ai naviaqi ena to'itamakiavo 'idia?”

<sup>41</sup> 'Inega Iesu ena vetala'ai ive'evivia ivonaya, “Tauna toluve'aliga diavona nawale naluve'aligidi be ena vaoqa nahawafelei to'itamaki aqiaqidi 'idia, 'inega bolimana ana tuta 'oine vuaqina tonivaoqa nana ina neia.”

\* 21:26: Md 14:5 \* 21:32: Lk 3:12; 7:29-30 \* 21:33: Ais 5:1-2 \* 21:38: Md 27:1 \* 21:39: Ibe 13:12

<sup>42\*</sup> 'Inega Ieisu wese vona sesebaiega vonedi vonaya, "Nage Buki Nugwenugweina ena simana 'inega onuave'avinia vonaya, 'Lova 'oqola nana to'eyoqona inogea, ta ba'itagana 'oqola qabudi luviluvinedi.

Ba'e eda Kaiwabu ena viaqa,

ta viaqa nana ana 'ita aqiaqi otaqina 'idaya.'

<sup>43</sup> "Yavona aqiaqiemi, Yaubada 'imiega ena 'Ebeluvine na'ewa yavulea ta mali qabu naneidi, be taudi 'idiega vuaqa aqiaqina na'ifoqe. <sup>44</sup> 'Eguma taha toga 'oqola nana 'inaya nalutuhuyei ta nabe'u nawale luluna nabaidi, ta wese 'eguma 'oqola nana nabuinia taha toga debanaya nawale namemea."

<sup>45</sup> Ieisu ena vona sesebai ba'e toveguba qiduqiduadi ta wese Falisiavo inoqolidi ta ialamania vonigo taudi weaqidi vonavona. <sup>46</sup> 'Inega 'eda isalia nuanuadi Ieisu ina kafia, ta imwaniniva qabu weaqidi, mana Ieisu i'awatovesimasimanea.

## 22

*Vona sesebai vaqi 'abwagana weaqina*

*(Luke 14:15-24)*

<sup>1</sup> Taha wese vona sesebai Ieisu neidi vonaya, <sup>2</sup> "Mahala ana 'Ebeluvine 'idewani taha kaiwabu 'abwaga 'iva'ava'aia natuna me'olotona ena vaqi weaqina. <sup>3</sup> 'Inega ena tofewayavo luvetunedi itauya tomeqabu taudi lova vematamagilafu ni'a i'ewea 'abwagana weaqina sabi 'ebe'ewadi, ta inoga.

<sup>4</sup> "Inega wese ena tofewayavo vaina luvetunedi itauya taudi lova wese vematamagilafu i'ewea 'idia. 'Inega i'aionidi ivonaya, 'Kaiwabu ena 'abwaga tawa 'iva'ava'aia, 'inega ena bulumakau qiduana be vaina kekeyauvaudi maega ni'au luguhudi lubudedi. Ta yani qabuna ni'au 'elumeo, 'inega ona mai kana tauya 'ai nana weaqina.' <sup>5</sup> Ta inoga ge ida mai, ta 'esi itutuvila itauya edi nuanua sabi viaqidi. 'Inega taha 'oloto tauya ena vaoqaya, ta wese taha 'oloto tauya ena sitoa 'inaya.

<sup>6\*</sup> "Ta kaiwabu nana wese vaina ena tofewayavo luvetunedi tomotau sabi 'aionidi, ta taudi wese inoga ta itovolo tofewa diavona iveilivu veifedi ta iluve'aligidi. <sup>7</sup> 'Inega kaiwabu nana diana vilea ta ena toluviayavo luvetunedi itauya toluve'aliga diavona ifofolidi ta edi 'abaga ituini 'alaia.

<sup>8</sup> "Abiboda kaiwabu nana ena tofewayavo 'idia vonaya, 'Vaqi 'abwagana tawa 'i'iva'ava'aina, ta taudi lova yavematamagilafuyedi edi ilivu veifana 'inega ge adi fata ina mai. <sup>9</sup> 'Inega 'eda magalua 'inaya ona tauya ta tomeqabu ona lobedi ona 'ebe'ewedi ona miedi vaqi 'abwagana ina vayavulei ina 'ainia.' <sup>10</sup> 'Inega i'ifoqe 'edaya 'abo tomotau qabudi igaba va'au'auqidi vaina luveifadi ta vaina aqiaqidi imai 'abo vaqi ana vanue iluveagatuna'ia.

<sup>11</sup> "Tuta nana kaiwabu mai 'abwaga ana to'ai sabi 'itadi 'inega 'oloto taha 'ita lobege ge ana kaleko aqiaqidi ta 'esi bwavubwavudi. <sup>12</sup> 'Inega vetala'aiea vonaya, 'Iagu, ma'oda 'inega ulugu mai 'aiqa, mana ba'e kaleko diavona ge daluaqiaqiei vaqi 'abwagana weaqina, waisa?' Ta 'oloto nana gebu ana fata vetala'ai ba'e nave'evivia.

<sup>13\*</sup> "Inega kaiwabu ena tofewayavo vonedia, "Oloto omo'e ona kafia ta nimana be wese 'aqena ona yoqonidi ta ona inoqei na'ifoqe velovelovanaya, omo'e 'inaya tomotau qabudi idoudou ta aladi kikokiko be wese visiqa vataya ilobelobe.' <sup>14</sup> Mana tomotau qabudi Yaubada gabedi, ta 'idiega ge 'ealidi venua'ivinedi."

*Vetala'ai takesi weaqina*

*(Maki 12:13-17; Luke 20:20-26)*

<sup>15\*</sup> 'Inega Falisi adi 'aidegamo itoava'auta ta idima govaqa ma'oda Ieisu ina vetala'aiei, be edi vona ana ve'ia 'inega ena luveifana ina lobei be yaqisa adi fata ina kafia. <sup>16</sup> 'Inega

\* 21:42: Same 118:22-23; Lom 9:33; 1Fit 2:6-8 \* 22:6: Md 21:35 \* 22:13: Md 8:12; 25:30; Lk 13:28 \* 22:15: Mk 3:6

adi to'abibodayavo ta wese toluvine qiduana Elodi ena qabuyavo maega iluvetunedi itauya Ieisu 'inaya ivonaya, "Tove'ita ni'a ahalamaniu eu ilivu tunutunuqina, Yaubada ena nuanua uveve'ita aqiaqiea ta wese tomotau edi waiwai weaqina gebu uda mwaniniva, ta tua vonahaqiaqi ululugaihiea tomotau qabudi 'idia. <sup>17</sup> Ma'oda unuanua 'aiqa, nage luaqiaqiea be ita'a me Diu kana takesi me Loma edi toluvine agona Sisa 'inaya, nage gebu? Nuanuama ana alamaniana."

<sup>18</sup> Ta Ieisu edi nuanua luveifana ni'a alamaniana, 'inega vonaya, "Omi'a tou'ava. Tola'ai weaqina sitonova omimiei 'iguya? <sup>19</sup> Ta mane taha emi 'ebetakesi weaqina ove'itegu." 'Inega mane nana ineia. <sup>20</sup> 'Inega Ieisu vonedi vonaya, "Ovonegu, ba'e mane nana 'inaya, togama 'aye'ayewana ta ma'oda ana wawa?"

<sup>21</sup> \* Ta ivonaya, "Toluvine qiduana Sisa." Tuata Ieisu vonedia, "Inega Sisa ena yani Sisa ona nei 'eviviea, ta Yaubada ena yani wese Yaubada ona nei 'eviviea." <sup>22</sup> Ieisu ena vona inoqolia ta nuadi voqana, 'inega inogei ta itauya.

*To'aliga edi ya'itoto 'evivi*  
(Maki 12:18-27; Luke 20:27-40)

<sup>23</sup> \* 'Aubena nana 'inaya vaina Sadusiavo taudi ge ida vetumaqana to'aliga edi ya'itoto 'evivi weaqina, imai Ieisu 'inaya ta ivetala'aiea ivonaya, <sup>24</sup> \* "Kaiwabu, Mosese ena luvine vonaya,

'Eguma taha 'oloto ma moqanena itoatoa ta natu geqadi ta 'oloto nana yawaina nagumwala, 'inega luaqiaqiea be to'aliga nana wada'ena taina na'ebe'ewei ta maega ina vaqi, 'inega vavine ina venatuna ta natudiavo to'waiva nana lusean-ina.'

<sup>25</sup> "Inega ba'e wese ema velulu'uya una noqolia. Taha 'oloto ma tainavo adi yau seveni maega atoatoa, ta 'oloto nana vaqi ta yawaina gumwala ta natu geqana 'inega to'waiva nana ana gwavu'ifo wada'ena maega ivaqi. <sup>26</sup> 'Inega tauna wese yawaina gumwala ta wese ge natunamo, ta 'idewani tainavo qabudi wada'e nana ivaqia. <sup>27</sup> Ta 'abibodadiega vavine wese yawaina gumwala. <sup>28</sup> 'Inega ya'itoto 'evivi ana 'aubena 'inaya seveni dina 'idiega to'oloto moqane otaqina, mana vavine nana 'oloto diavona vaqidi ta wada'eyedi?"

<sup>29</sup> Ta Ieisu edi vetala'ai ba'e ve'evivia vonaya, "Omi'a Buki Nugwenugweina ta wese Yaubada ena waiwai ge oda alamaniana, 'inega emi vetala'ai ba'e ge aqiaqina. <sup>30</sup> Mana ya'itoto 'evivi ana 'aubena 'inaya tomotau ge ina vaqi, ta vonahaqiaqi, edi toa nawale kavona Yaubada ena tovale'ewa qabudi mahalaya itoatoa 'idewani. <sup>31</sup> Nage Yaubada ena vona Buki Nugwenugweina 'inaya ya'itoto 'evivi weaqina ge oda avoi, vonaya,

<sup>32</sup> \* 'Ya'a Ebelamo ena Yaubada, be Aisake ena Yaubada ta wese Iakobo ena Yaubada. Vonahaqiaqi, Yaubada ge to'aliga edi Yaubada, ta 'esi tomotau mayawaidi edi Yaubada.'

<sup>33</sup> Ieisu ena vona ba'e tomotau qabudi inoqolia 'inega nuadi voqana ena ve'ita waiwaina weaqina.

*Luvine qiduana weaqina*  
(Maki 12:28-34; Luke 10:25-28)

<sup>34</sup> Ta Falisiavo inoqolia ma'oda Ieisu Sadusiavo edi vetala'ai 'inaya ni'a 'egibodedi ena ve'ia 'inega. E 'inega Falisiavo dina wese nuanuadi Ieisu ina vetala'aiea vaina yani weaqina 'inega imai 'inaya. <sup>35</sup> Ta 'idiega taha luvine ana toalamani aqiaqi nuanuana vetala'aiega Ieisu nasitonovia, 'inega vonaya, <sup>36</sup> "Tove'ita, luvine qabuna 'idiega ai luvine 'ena'i otaqina?"

<sup>37</sup> \* Ta Ieisu vonaya,

\* 22:21: Lom 13:7 \* 22:23: Via 23:8 \* 22:24: Luve 25:5 \* 22:32: 'Ifo 3:6; Md 8:11 \* 22:37: Luve 6:5

“Eu Kaiwabu Yaubada una veyolubei giwaliuyega ta niboaniuyega ta wese eu nuanua qabuna 'idiega. <sup>38</sup> Ba'e luvine nana luvine nugwenugweina, ta luvine qabudi veqidua va'inedi.

<sup>39</sup>\* “Ta taha wese luvine qiduana ba'e 'idewani vonaya, 'Tomotau una veyolubedi 'idewani tau'uyega uveveyolubeu.’ <sup>40</sup>\* Ba'e luvine magilafudina luvine qabudi ta wese tovesimasimana edi vona qabudi adi avutugu.”

*To'etoyavua tauna Deibida ena gadeyega*  
(Maki 12:35-37; Luke 20:41-44)

<sup>41</sup> Falisiavo nawale itoatoa 'inega Iesu vetala'aiedi vonaya, <sup>42</sup>\* “Ma'oda emi nuanua To'etoyavua Keliso weaqina? Tauna toga ena gadeyega 'ifoqe?”

Ta ivonaya, “Kini Deibida ena gadeyega.”

<sup>43</sup> 'Inega Iesu vonaya, “Ma'oda 'inega lova Niboana Gwalagwalana ena venuaha'u 'inega Deibida To'etoyavua nana 'awa-Kaiwabuyea vonaya,

<sup>44</sup>\* 'Yaubada egu Kaiwabu 'inaya vonaya, 'Ataqiguya utoabui

ana laba voalamwavo ena a'uwebuiedi, 'inega una luvinedi.’

<sup>45</sup> Ta 'eguma Deibida Keliso 'awa-Kaiwabuyea, 'inega ma'oda ana fata be To'etoyavua Keliso Deibida ena gadeyega 'ifoqe?”

<sup>46</sup> Iesu ena vetala'ai ba'e ge taha toga ana fata dave'iei. Ta ba'e tuta nana 'inega ge taha toga datovoi be Iesu davetala'aiei, mana ena alamani weaqina imwaninivea.

## 23

*Iesu luvine ana tove'itayavo be wese Falisiavo lumaqi'aiedi*  
(Maki 12:38-40; Luke 11:39-46,52; 20:45-47)

<sup>1</sup> 'Inega Iesu qabu ta wese ana to'abibodayavo vonedi vonaya, <sup>2</sup> “Lova Mosese me Isileli luviluvinedi, ta 'itaga luvine ana tove'itayavo ta wese Falisiavo 'idewanina iluviluvine 'aiqemi. <sup>3</sup>\* 'Inega tola'ai iveve'itemi ona 'abibodedi, ta edi viaqayavo ge ona 'abibodei, mana taudi iveve'itamo, ta edi ve'itayavo dina taudiega ge ida viaqidi. <sup>4</sup> Taudi 'ava'avala vitadi tomotau ineineidi, ta ge taha tola'ai ida viaqi be ina iuledi ta vita nana ina 'avalei.

<sup>5</sup>\* “Ta Buki Nugwenugweina 'inega Yaubada ena vona i'waya'wayavidi ta taka goyogoyona gamonaya idodododi ta adi kiaya be wese nimadia iyoqoyoqonidi ta i'ava'avala dadanedi. Ta wese adi kaleko matavusina kuekuedi maega iveveaqedi, mana nuanuadi tomotau ina 'itedi. <sup>6</sup> Ta sagali ana tutaya nuanuadi selovaya ina toabui, be wese vanue tafwalolo 'inaya nuanuadi 'ebetoa aqiaqina. <sup>7</sup> Ta wese 'eguma 'ebegimwane 'inaya itautauya nuanuadi vonigo tomotau qabudi ina lukaiwa 'idia ta wese ina 'awatove'itayedi. <sup>8</sup> Ta omi'a ge daluaqiaqiemu be tomotau ina 'awatove'itayemi, mana qabumi lelelea ta emi Tove'ita 'aidegana namo. <sup>9</sup> Ta ge taha toga bwa'obwa'oya ona 'awatamanei, mana Tamami ana 'aidega mahalaya toatoa. <sup>10</sup> Ta ge wese daluaqiaqiemu be tomotau ina 'awakaiwabuyemi, mana Keliso tauna ana 'aidega emi Kaiwabu otaqa. <sup>11</sup>\* Ta 'esi 'eguma toga 'imiega navetovanugweta, 'inega tauna navetofewa 'imia. <sup>12</sup>\* 'Eguma taha toga 'imiega nanuavane nawale nawebui, ta toga nanuawebui nawale navaneqa.

<sup>13</sup> “Omi'a luvine ana tove'itayavo be wese Falisiavo nuakolokolomi, mana emi u'avayavo 'idiega tomotau oawatayedi be 'inega mahala ena 'Ebeluvine 'inaya ge ina lugu. Ta wese aiqabu nuanuadi be ina lugu o'etobodedi. 'Inega omi'a wese ge ami fata be ona lugu. <sup>14</sup> [Omi'a luvine ana tove'itayavo be wese Falisi nuakolokolomi. Omi'a tou'ava!

\* 22:39: Luvi 19:18; Md 7:12      \* 22:40: Lom 13:10; Gal 5:14      \* 22:42: Ion 7:42      \* 22:44: Same 110:1; Md 26:64

\* 23:3: Mal 2:7-8      \* 23:5: Md 6:1; 'Ifo 13:9; Luve 6:8; Naba 15:38-39      \* 23:11: Md 20:26; Mk 9:35; Lk

22:26      \* 23:12: Iob 22:29; Vos 29:23; Lk 14:11; 18:14

Mana u'avega wadawada'e edi kulufayavo edi vanueavo 'idiega ovanawalidi, be wese ovevenoqi kuena mana nuanuami tomotau ina awatubomi.]

<sup>15</sup> “Omi'a luvine ana tove'itayavo be wese Falisiavo nuakolokolomi. Omi'a tou'ava! Tuta qabuna oluluyaba dadana 'abaga qabudi 'idia be vonigo ami to'abiboda taha ona lobe, be 'abiboda tomotau nana taumi emi nuenuaga ona ve'itea. Ta emi ve'ita luveifana 'inega nawale luvematasabu ona lobe, ta tomotau nana luvematasabu qidua va'inena nalobe.

<sup>16</sup> \* “Vonahaqiaqi, nuakolokolomi! Mana omi'a tovanugweta matami kwayakwayana ovonaya, “Eguma taha toga Vanue Gwalagwalana ana wawega na'awatamatamana be-na'e ge taha yani 'ena'ina, ta 'esi 'eguma taha toga Vanue Gwalagwalana ana goula 'inega na'awatamatamana e ba'e yani agona.” <sup>17</sup> Ta yavona aqiaqiemi, omi'a kwavakwavami ta matami kwayakwayana. Tola'ai tauna yani qiduana? Nage goula, nage Vanue Gwalagwalana, mana vanue nana ana fata be goula nagivegwalea?

<sup>18</sup> “Ta wese ovonaya, “Eguma taha toga 'ebeveguba ana wawega na'awatamatamana be-na'e ge yani qiduana, ta 'esi 'eguma taha toga na'awatamatamana nei kavovo 'inega 'ebeveguba 'inaya e ba'e yani qiduana. 'Inega luaqiaqiea be tola'ai ni'a vona fofofolayea, e wese naviaqi.” <sup>19</sup> Omi'a kwavakwavami! Tola'ai yani qiduana? Nage nei kavovo, nage 'ebeveguba nana tauna 'inega nei kavovo nana ana fata nagivegwalea? <sup>20</sup> 'Inega 'eguma taha toga 'ebeveguba ana wawega na'awatamatamana e 'inega tauna wese yani qabuna i'eno'eno 'ebeveguba nana debanaya 'idiega 'awatamatamana. <sup>21</sup> Ta wese 'eguma taha toga Vanue Gwalagwalana ana wawega na'awatamatamana e tauna wese Yaubada 'inaya 'awatamatamana, mana Vanue Gwalagwalana Yaubada ena 'ebetoea. <sup>22</sup> \* Ta 'eguma taha toga mahala ana wawega na'awatamatamana, e 'inega tomotau nana Yaubada ana galiva 'inega 'awatamatamana, ta wese galiva nana ana Totoa 'inega 'awatamatamana.

<sup>23</sup> \* “Omi'a luvine ana tove'itayavo wese Falisiavo nuakolokolomi. Omi'a tou'ava, mana emi nei kavovo dina emi yani qabudi 'idiega, ta wese yani goyogoyodi 'idewani 'e'e be, wayove ta wese dobala 'idiega. Ta luvine toi qiduadi ovenuafanidi, 'idewani ilivu tunutunuqina be, nuakolokolo be wese gwavubiga. Luaqiaqiemi be yani ba'e qiduadi ona viaqidi, ta wese yani goyona ge ona venuafanidi. <sup>24</sup> Ta omi'a tovanugwetayavo matami kwayakwayana. Ami du'wa 'inega kwakwakwa o'ewa'ewa yavuledi, ta yubai qiduana 'idewana kameli otonetoned.

<sup>25</sup> \* “Omi'a luvine ana tove'itayavo wese Falisiavo nuakolokolomi! Omi'a tove-mehaqila! Mana ami vedi be ami gaeba gwavuna olu'utudi ta gamona bwavubwavudi. Ta ba'e bwavu nana ana alamani emi ilivu luveifadi kavonaya be vemanuguba be 'ailugu 'idewani. <sup>26</sup> Omi'a Falisiavo matami kwayakwayana. Ami vedi be wese ami gaeba gamodi ona 'utu nugweted, 'inega gwavudi wese navevunavunaqa.

<sup>27</sup> \* “Omi'a luvine ana tove'itayavo wese Falisiavo nuakolokolomi! Omi'a tove-mehaqila, mana omi'a kavona deba'unu debana ana 'ita wadawadaeadi ta aqiaqidi, ta gamodia to'aliga davulidi ta luludi 'eno'eno. <sup>28</sup> \* Ta omi'a wese 'idewanina, mana ami 'ita aqiaqi otaqina tomotau matadia, ta giwalimia u'ava ta wese luveifana qabudi 'eno'eno.

*leisu simana* 'ifoqe adi luvematasabu weaqina

(*Luke 11:47-51*)

<sup>29</sup> “Omi'a luvine ana tove'itayavo be Falisiavo nuakolokolomi. Omi'a tove-mehaqila! Lova tubumiavo tovesimasimana nugwenugweidi iluve'aligidi, ta omi'a adi gudumayavo 'idia 'ebenuave'avina oviaqidi. Ta wese Yaubada ena tomotau tunutunuqidi iluveawalidi, ta omi'a adi deba'unuyavo ove'ivalidi, <sup>30</sup> ta 'inega ovonaya, “Eguma lova tubudavo edi tutaya kada toatoa, 'inega ge kada iuledi be Yaubada ena tovesimasimanayavo kada luv'e'aligidi.” <sup>31</sup> \* Emi vona ba'e 'inega taumiega osimana 'ifoqeyemi vonigo omi'a

\* 23:16: Md 15:14    \* 23:22: Ais 66:1; Md 5:34    \* 23:23: Luvi 27:30; Mai 6:8    \* 23:25: Mk 7:4    \* 23:27: Via 23:3    \* 23:28: Lk 16:15    \* 23:31: Via 7:52



tovesimasimanayavo adi toluve'aliga tubudiavo. <sup>32</sup> 'Inega omi'a taudi edi fewayavo nawale ona lu'ovoia.

<sup>33</sup> \* "Omi'a mwata natunavo! Nage ovonaya be vonigo ami fata 'aiwe 'ala'alainega ona dena, waisa? <sup>34</sup> 'Inega tovesimasimanayavo be toalamaniavo wese tove'itayavo ena vetunedi 'imia be 'inega vaidi ona luve'aligidi, ta vaidi 'etoluai 'inaya ona tutuve'ewedi be vaidi emi vanue tafwalolo 'inaya wayo metametanega ona vunuqa dadanedi, be 'abaga taha taha 'idia ona 'wavi dadanedi. <sup>35</sup> \* Ta ba'e 'inega Yaubada ena tomotau tunutunuqidi adi luve'aliga ana ve'ia omi'a lagatamina nawale ona lobe'a 'oloto tunutunuqina Eibolo ana luve'aliga 'inega e ana laba Balakaya natuna tunutunuqina Sakalaia ana luve'aliga 'inaya. Tauna oluve'aligia Vanue Gwalagwalana be 'ebeveguba nuanidia. <sup>36</sup> Vonahaqiaqi, ba'e luve'aliga diavona adi ve'ia omi'a ba'e lagatami ona lobe'a.

*Ieisu duvoyavoya me Ielusalema weaqidi*

*(Luke 13:34-35)*

<sup>37</sup> "Me Ielusalema ye, me Ielusalema ye! Omi'a tovesimasimana oluve'aligidi, ta wese taudi Yaubada vetunedi imai 'imia oludabodi. Tuta qabuna nuanuagu omi'a ena gaba va'auqimi ona mai kavona kamukamu natunavo fafenega 'au'aubodedi, ta onogegu. <sup>38</sup> \* Ta emi noga weaqina Yaubada emi Vanue Gwalagwalana nanogea be navetomotau geqa. <sup>39</sup> \* Ta yavonemi, ge wese ona 'ita 'eviviegu ana laba ona vonaya, 'Tauna kana awatuboya Yaubada ana wawega maimai.' "

## 24

*Ieisu ena vona Vanue Gwalagwalana ana bwega yavula weaqina*

*(Maki 13:1-2; Luke 21:5-6)*

<sup>1</sup> 'Inega Ieisu webui tautauya Vanue Gwalagwalana 'inega, ta ana to'abibodayavo imai be nuanuadi ina ve'itea yani qabuna aqiaqina Vanue Gwalagwalana weaqina. <sup>2</sup> \* Ta Ieisu vonedia, "Ba'e yanidiavo o'ite'itedia nawale ina bwega 'ovoidi, be ge taha dabo ena 'ebetoa 'inaya ona 'ita 'eviviei."

*Tuta vitana nawale na'ifoqe*

*(Maki 13:3-13; Luke 21:7-19)*

<sup>3</sup> 'Abibodanaya Ieisu bwanaga Olibe 'inaya toabui ta ana to'abibodayavo imai 'inaya ivetala'aiea ivonaya, "Uvonema, totuta ba'e yani diavona na'ifoqe, ta tola'ai nave'ebe'ita eu tuta 'evivi ta wese tuta ana 'ebelulo'ova weaqina?"

<sup>4</sup> 'Inega Ieisu vonaya, "Ona 'itamakimi, be yaqisa ge taha toga na'eu'au'avemi, <sup>5</sup> \* mana nawale tomotau 'eala agu wawega ina mai ina vonaya, 'Ya'a Keliso To'etoyavua!' ta edi vona 'inega vaina qabu ina u'avedi. <sup>6</sup> Ta wese vale ona noqolidi avia di'wemia ta luluvaia weaqidi, ta ba'e yani diavona weaqidi giwalimi ge naha'ala, mana ba'e yani diavona ina madu'ifoqe, ta 'abiboda bwa'obwa'o ana 'ebelulo'ova. <sup>7</sup> Nawale mali qabu be mali qabu maega ina luavia, ta wese mali di'we be mali di'we maega ina luavia. Ta botana qidwana ta wese mwani'ini'i na'ifoqe di'we taha taha 'idia. <sup>8</sup> Ba'e yani diavona tuta vitadi ana 'ebeve'ale.

<sup>9</sup> \* " 'Inega omi'a nawale tomotau ina vevoalanemi ta ina kafimi be ina luve'aligimi. Ta wese mali qabu ina veaviemi mana omi'a agu tovetumaqanayavo. <sup>10</sup> Tomotau 'eala 'imiega edi vetumaqana ina nogei, ta ma ediavo taudiega nuanidia ina vesulusuluvedi. Ta wese vevoalana na'ifoqe nuanidia. <sup>11</sup> \* Ta wese tovesimasimana 'e'eu'au'avidi 'eala ina 'ifoqe ta ina vanugweta veifemi. <sup>12</sup> 'Inega ilivu luveifadi nave'ena'i, ta tomotau 'eala edi veyoluba navegoyo. <sup>13</sup> \* Ta 'eguma togama natovolo'i'ita ana laba tuta 'ebelulo'ova 'inaya

\* 23:33: Md 3:7; 12:34; Lk 3:7 \* 23:35: Nug 4:8; 2Yani 24:20-21 \* 23:38: 1Kin 9:7-8; Iel 22:5 \* 23:39: Same 118:26 \* 24:2: Lk 19:44 \* 24:5: Md 24:23-24; 1Ion 2:18 \* 24:9: Md 10:22 \* 24:11: Md 24:5,24; 1Ion 4:1 \* 24:13: Md 10:22

e tauna 'etoyavua nalobe. <sup>14</sup>\* Ta Yaubada ena 'Ebeluvine valena ina simana dadanea di'we taha taha ana tomotauyavo 'idia, ta 'abiboda tuta ana 'ebeluvina na'ifoqe."

*Tuta vitana ta 'ebegaululu weaqina*  
(Maki 13:14-23; Luke 21:20-24)

<sup>15</sup>\* Ta wese Iesu vonedi vonaya, "Tovesimasimana Daniela simanea taha yani bwavubwavuna ta wese 'edugaugaululuna Vanue Gwalagwalana 'inaya natovolo. (Ta tomeqabu vona ba'e ina avoya luaqiaqiedi be ana alamani ina sali aqiaqiea.) <sup>16</sup> Omo'e tuta nana 'inaya Iudia ana tomotauyavo luaqiaqiedi be bwanagaya ina dena. <sup>17</sup>\* Ta 'eguma taha toga selovaya toatoa nalukwayavoni nadena, ta ge nalugu 'evivi vanuea ena kulufa sabi 'ewana. <sup>18</sup> Ta wese toga ena vaoqaya fewafewa ge na'evivi vanuea ana kwakwalufai sabi 'ewana. <sup>19</sup> Tuta omo'e 'inaya vivine gamwegamwe'idi be tovesusuyavo nuakokolodi. <sup>20</sup> Yaubada Tamada 'inaya ona venoqi yaqisa ge ona dena 'wei ana tutaya ta wese Sabate 'inaya.

<sup>21</sup>\* "Vonahaqiaqi, omo'e tutana 'inaya vita qiduana na'ifoqe, mana bwa'obwa'o ana 'ebeve'ale 'inega be ana laba tuta ba'e 'inaya ge taha wese vita ba'e 'idewana da'ifoqe, ta wese tuta maimai 'inaya vita ba'e 'idewana ge na'ifoqe 'evivi. <sup>22</sup> Omo'e vita nana 'eguma Yaubada ana tuta ge dagivekusei e nawale tomotau qabudi ida 'aliga. Ta Yaubada 'aubena dina nagivekusedi ena tomotau vevenua'ivinidi weaqidi. <sup>23</sup>\* Ta omo'e tutanaya 'eguma togama 'iuya navonaya, 'U'itei, ba'e tauna Keliso!' nage 'Omo'e tauna!' 'inega vona diavona ge una vetumaqanedi. <sup>24</sup>\* Mana vaina tomotau to'eu'au'ava ina vonaya 'Ya'a Keliso!' ta wese ina vonaya 'Ya'a tovesimasimana!' Nawale ina 'ifoqe ta ve'ita 'ebenuavoqana ina viaqidi. Ta vonigo 'eguma adi fata 'inega wese Yaubada ena tomotauyavo vevenua'ivinidi ina u'avedi. <sup>25</sup> Ta to'eu'au'ava diavona weaqidi ni'a yamaduvonemi, mana nawale ina 'ifoqe 'imia.

<sup>26</sup>\* "Wese 'eguma tomotau ina vonemi, 'Keliso toatoa di'we tomotau geqanaya', 'inega ge ona tauya. Ta wese 'eguma ina vonemi, 'Keliso vanue gamonaya toatoa', e ge ona vetumaqanedi. <sup>27</sup>\* Ya'a Tomotau Natuna egu mai 'evivi ana 'ita kavona namala 'idewani na'waia ta mahala naguvesimatalia baba'au ena 'ebeyayaqega be ena 'ebewebui 'inaya.

<sup>28</sup>\* "Yubai 'ali'aligina ena 'ebe'eno ni'a kahalamania, mana omo'e 'inaya bwayobwayo ivava'auta.

*Iesu ena 'evivi mai weaqina*  
(Maki 13:24-27; Luke 21:25-28)

<sup>29</sup>\* "Tuta vitana nalu'ovoa ta lukwayavonega baba'au navelovanea, ta wai'ena ena simatala na'weu, be 'wadi'wadima mahalega ina avuta, ta wese yani qabuna waiwai mahalaya itoatoa ina dedela.'

<sup>30</sup>\* "Ya'a Tomotau Natuna, omo'e tutana 'inaya 'ebe'ita weaqigu mahalaya na'ifoqe, ta tomotau qabudi bwa'obwa'oya ina nuavita ina dou. Ta gawatega ena gelu 'inega tomotau ina 'itegu egu waiwai 'inega be wese egu simatala aqiaqi otaqina 'inega yamaimai. <sup>31</sup>\* Ta tuta nana bea nanunuqa 'inega egu tovale'ewayavo ena vetunedi bwa'obwa'o ena 'ebeve'ale 'inega be ena 'ebeluvina 'inaya ta wese mahalega egu tomotau vevenua'ivinidi ina va'auqidi.

*'Ebevetalatutula mafa*  
(Maki 13:28-31; Luke 21:29-33)

<sup>32</sup>\* "Ebevetalatutula mafa 'inega ena ve'itemi. Tuta nana mafa 'waena nave'ale sabi galu 'inega ni'a oalamaniania ive ana tuta ni'au vadi'weda. <sup>33</sup> Ta wese 'idewani 'eguma ba'e

\* 24:14: Md 28:19 \* 24:15: Dan 9:27; 11:31; 12:11 \* 24:17: Lk 17:31 \* 24:21: Dan 12:1 \* 24:23: Md 24:5  
\* 24:24: Luve 13:1-3; 2Te 2:8-9; Ve 13:13-14 \* 24:26: Lk 17:23-24 \* 24:27: Md 24:37-39 \* 24:28: Lk 17:37  
\* 24:29: Ais 13:10; 34:4; Isi 32:7; Ioe 2:10,31; 2Fit 3:10; Ve 6:12-13 \* 24:30: Sek 12:10; Ve 1:7; Dan 7:13 \* 24:31: 1Kol 15:52; 1Te 4:16

'ebe'ita diavona ni'a yavonemia ona 'itedi, e 'inega ona alamanianu egu 'evivi mai ana tuta ni'a vadi'wea. <sup>34</sup>\* Vonahaqiaqi lagata ba'e ge ona 'aliga ana laba ba'e yani diavona ina 'ifoqe. <sup>35</sup>\* Mahala be bwa'obwa'o nahawala, ta ya'a egu vona ge taha ana tufwa nahawala ta 'esi na'eno vataya.

*Isisu ena mai 'evivi ana tuta ge taha toga dahalamanianu*  
(Maki 13:32-37; Luke 17:26-30,34-36)

<sup>36</sup>\* "Ge taha toga dahalamanianu totuta nage to'ubena 'inaya ena 'evivi ena mai, ta wese Yaubada ena tovale'ewayavo mahalaya ge ida alamanianu, be wese ya'a Tomotau Natuna ge eda alamanianu. Ta 'esi Tamagu ana 'aidega alamanianu. <sup>37</sup>\* Ya'a Tomotau Natuna egu 'evivi ana tuta lova Noa ena tutaya 'idewani. <sup>38</sup> Mana Noa ena tutaya tomotau i'ai'ai be inumanuma ta wese 'oloto be vivine ivaqivaqi ta wese tomotau natudiavo ivevevaqiedi ana laba Noa ena wagaya gelu. <sup>39</sup>\* Ta seuseu luveafedi 'inega tomotau qabudi idamanu, e ya'a Tomotau Natuna egu mai 'evivi wese 'idewani na'ifoqe.

<sup>40</sup> "Tuta nana 'inaya 'eguma 'oloto magilafudi edi bwa'o ina talatalaqa 'inega taha 'idiega ena 'ebe'ewea ta taha natoa. <sup>41</sup> Ta wese vivine magilafudi 'abwaga ina dabitabi 'inega taha 'idiega ena 'ebe'ewea ta taha natoa. <sup>42</sup>\* 'Inega ona 'itamaki aqiaqiemi mana ya'a emi Kaiwabu egu 'evivi mai ana tuta ge oda alamanianu. <sup>43</sup>\* Ona nuave'avinia, 'eguma tonivanue nahalamanianu totuta tovanawala nalugu ena vanuea, e vonahaqiaqi me ena 'iva'ava'ata natoatoa, 'inega tovanawala nana ge ana fata ena vanue naqeuni ta nalugu. <sup>44</sup> 'Inega omi'a wese 'idewani me emi 'iva'ava'ata ona toatoa, mana tuta nana 'inaya tomotau ina vonaya, 'Ge wese namai!' e 'inega ya'a Tomotau Natuna ena luveafedi ena 'ifoqe.

*Tofewa ena gwavubiga ta ena gwavu'ai weaqina*  
(Luke 12:41-48)

<sup>45</sup> "Eguma taha tofewa ma ana vetumaqana ta me ena alamanianu toatoa, 'inega tauna ena kaiwabu navenua'ivinea be enavo na'itamakidi ta wese adi 'abwaga naneidi 'ubena 'aidega 'aidega 'idia. <sup>46</sup> Ta tuta nana ena kaiwabu na'evivi namai 'inega tofewa nana ana veyoveyoo na'itea viaviaqa aqiaqiea, e 'inega weaqina naqaiawa. <sup>47</sup>\* Yavona aqiaqiemi, ba'e kaiwabu nana ena kulufa be wese ena kaikaiwabu qabudi ena tofewa nimanaya naha'udi be na'itamakidi.

<sup>48</sup> "Ta 'eguma tofewa nana naveilivu veifa ta navonaya, 'Egu kaiwabu tauya ta nawale gigive'ove'o', <sup>49</sup> 'inega ve'ale enavo vunuuqidi, ta tovekwavakwava 'ebe'ewedi imai ta maega i'ai'ai ta wese inumanuma. <sup>50</sup> Ta tuta nana ena kaiwabu na'evivi namai 'inega naluveafea ta ena ilivu veifana na'itedi. <sup>51</sup> 'Inega navunuqia be na'wavinia na'ifoqe tou'ava edi di'we 'inaya, ta omo'e 'inaya tou'ava dina maega adi luvematasabu 'aidegana ina lobe, 'inega tauna nadou be alana navetalakikokiko."

## 25

*Vona sesebai iahaba teni weaqidi*

<sup>1</sup>\* Ta Isisu wese vonedi vonaya, "Mahala ena 'Ebeluvine ba'e 'idewana: Iahaba adi yau teni edi lamufa i'ewedi itauya tovaqi me'olotona ena vaqi 'abwagana weaqina sabi'itana. <sup>2</sup> 'Idiega adi yau faibi kwavakwavadi ta wese faibi me edi alamanianu. <sup>3</sup> Tovekwavakwava dina edi lamufa gebu ana go'ila ana luvetomana ida 'ewei. <sup>4</sup> Ta toalamanianu dina edi go'ila ma botolina i'ewedi edi lamufa ana luvetomana weaqidi. <sup>5</sup> Ta tovaqi me'olotona i'ive'ove'o, 'inega iahaba teni dina matadi dunedune 'abo i'eno motaiva.

\* 24:34: Md 16:28 \* 24:35: Md 5:18 \* 24:36: Via 1:7; 1Te 5:1-2 \* 24:37: Nug 6:5-8 \* 24:39: Nug 7:21-23  
\* 24:42: Md 25:13 \* 24:43: Lk 12:39-40; Ve 16:15 \* 24:47: Md 25:21,23 \* 25:1: Ve 19:7; Lk 12:35

<sup>6</sup> “Inega tou gamonaya taha tomotau gaba vonaya, ‘Ei qabumi oya’itoto, tovaqi nana ni’a maimai ’inega ka’itei ka’ebe’ewei!’ <sup>7</sup> Inega iahaba diavona iya’itoto edi lamufa sabi giaqiaqiedi.

<sup>8</sup> “Ta kwavakwava dina ediavo ivenoqiedi ivonaya, ‘Emavo, lamufa ana go’ila dibuna oda neima mana ema simatala mo’ita na’weu.’

<sup>9</sup> “Ta toalamani dina ivona ’eviviedi ivonaya, ‘Eguma ema go’ila dibuna ana neimi e ’inega ima’a ana kusa, ’inega ona tauya tovegimwaneavo ’idia be emi go’ila ona gimwane.’ <sup>10</sup> Ta tuta nana itautauya sabi gimwane, ’inega tovaqi nana ’ifoqe ta taudi ni’au i’iva’ava’ata maega ilugu vaqi ’abwagana weaqina. Ta ’awa iguduya.

<sup>11</sup> \* “Ta ’abiboda iahaba kwavakwava dina i’evivi imai ivonaya, ‘Kaiwabu, ’awa usiwa’ei ta ana lugu wai.’

<sup>12</sup> \* “Inega tovaqi nana edi vona ve’evivia vonaya, ‘Yavona aqiaqiemi, ya’a ge eda alamanimi.’”

<sup>13</sup> \* Ieisu ena vona lu’ovoia ’inega ana to’abibodayavo vonedi vonaya, “Ona ’itamaki aqiaqiemi, mana egu ’evivi ana ’aubena be ana tuta ge oda alamania.

*Vona sesebai tofewa toidi weaqidi*  
(Luke 19:11-27)

<sup>14</sup> “Mahala ena ’Ebeluvine wese ba’e ’idewani. Taha kaiwabu nuanuana natauya mali di’wea, ’inega ena tofewayavo gaba va’auqidi imai ta vonedi ena ’ebeluvine ina ’itamakia.

<sup>15</sup> \* Inega ena tofewa mane ma kodekodena adi yau faibi neia, ta wese tofewa taha mane ma kodekodena magilafuna neia, ta wese tofewa vetoina mane ma kodekodena ’aigedana neia, mana toi dina edi waiwai ta wese edi alamani ana fata ’inega neidi, e ’abiboda kaiwabu nana nogedi ta tauya.

<sup>16</sup> “Inega tofewa nana mane ma kodekodena ana yau faibi lukwayavonega vefewedi, ta adi luvetomana wese mane ma kodekodena ana yau faibi lobedi. <sup>17</sup> Ta tofewa vemagilafuna wese ’idewani mane ma kodekodena magilafuna vefewedi, ’inega ana luvetomana kodekode magilafuna wese lobedi. <sup>18</sup> Ta tofewa vetoina mane ma kodekodena ’aidegana ’eweaya, e tauna bwa’obwa’o alei ta ena kaiwabu ena mane ivuya gamonaya.

<sup>19</sup> “Ta edi kaiwabu tufwana tuta kuena di’we nana ’inaya toatoa, ta ’inega ’evivi mai. Inega ena tofewayavo wese gaba va’auqidi mana nuanuana nahalamaniamana ma’oda ena mane ivefewa ’aiqedi. <sup>20</sup> Inega tofewa nana mane ma kodekodena ana yau faibi mai be ana luvetomana mane ma kodekodena ana yau faibi wese miedi ta vonaya, ‘Kaiwabu, o’a mane ma kodekodena ana yau faibi uneigu, ta ya’a yavefewea ’inega wese mane ma kodekodena faibi adi luvetomana yalobea, e ’inega eu mane ma kodekodena teni ba’e.’

<sup>21</sup> \* “Ta kaiwabu nana vonaya, ‘Aqiaqina, o’a tofewa aqiaqiu ta ma au vetumaqana, mana o’a uvetafewa yani goyona ’idiega, e ’inega yani agodi ena neiu ta una luvinedi be una ’itamakidi. Ba’e ’inega una lugu mahalaya ta kana qaiawa vataya.’

<sup>22</sup> “Inega tofewa nana lova mane ma kodekodena magilafuna ’ewedi lugu mai ena kaiwabu ’inaya, ta vonaya, ‘Kaiwabu, lova mane ma kodekodena magilafuna uneigu, ta mane nana yavefewea, ’inega wese mane ma kodekodena adi yau magilafuna adi luvetomana yalobea, e ’inega eu mane ma kodekodena foa ba’e.’

<sup>23</sup> “Inega kaiwabu nana vonaya, ‘Aqiaqina, o’a tofewa aqiaqiu ta ma au vetumaqana, mana ni’au uvetafewa yani goyona ’idiega, e ’inega yani agodi ena neiu ta una luvinedi be una ’itamakidi. Ba’e ’inega una lugu mahalaya ta kana qaiawa vataya.’

<sup>24</sup> “Inega tofewa vetoina ena mane ma kodekodena ’aidegina lugu mai ta vonaya, ‘Kaiwabu, yahalamaniamana o’a lumaqimaqi’ ai ’avau, ta eu kaikaiwabu u’ewa’ewa kavovodi mali tomotau edi fewa ’idiega. <sup>25</sup> Inega yamwaniniveu ta yatauya eu mane ma kodekodena ’aidegina bwa’obwa’o gamonaya yaivuya, e eu mane ba’e.’

\* 25:11: Lk 13:25-27 \* 25:12: Md 7:23 \* 25:13: Md 24:42 \* 25:15: Lom 12:6 \* 25:21: Md 24:45-47; Lk 16:10

<sup>26</sup> “Ta ena kaiwabu lugwaeyea vonaya, ‘Tofewa luveifau ta gwavu’ ai otaqiu, uala-manigu vonigo egu kaikaiwabu ya’ewe’ ewea mali tomotau edi fewa ’inega. <sup>27</sup> Ta ’esi luaqiaqieu ’eguma mane nana uda a’uya mane ana vanue ’inaya, be ’inega ’itagana ma ana luvetomana eda lobe, ta gebu.’

<sup>28</sup> “’Inega ena tofewayavo vaina ’idia vonaya, ‘Ba’e ’olotona ’inega mane ma kodekodena ’aidegina ona ’ewei be ona neia tauna ’oloto nana mane ma kodekodena teni ’inaya.’

<sup>29</sup>\* “Yavona aqiaqiem, tomeqabu tola’ ai ni’ a i’ ewea ta ivefewa aqiaqiea, e taudi nawale adi luvetomana wese ina lobe, ’inega naveago va’ine. Ta tomeqabu ge ma adi vetumaqana toyani goyona ’idia ’eno’ eno nawale na’waiva ’idiega. <sup>30</sup>\* ’Inega kaiwabu nana ena tofewayavo vonedi tofewa luveifana ina fela ’ifoqeyea di’ we velovelovanina ’inaya. Ta omo’e ’inaya nadou ta alana navetalakikokiko.

*leisu totoa bwa’obwa’o qabudi nawale nagivutuqidi*

<sup>31</sup>\* “Ya’a Tomotau Natuna nawale egu simatala aqiaqi otaqina ’inega egu tovale’ewayavo maega ana mai, be ’inega agu galiva kaikaiwabuna ’inaya ena toabui sabi givutuqa. <sup>32</sup>\* Be tomotau bwa’obwa’oya ina va’auqidi ina mai mataguya be ena a’uvidividinidi ’idewani sifi adi to’itamaki a’uvidividinidi goti ’idiega. <sup>33</sup> Be tomotau tunutunuqidi ena givutuqidi agu ’ataqia ta veiveifadi agu kelua.

<sup>34</sup> “’Inega ya’a Kini luaqiaqiegu taudi agu ’ataqia itoatoa ena vonedia, ‘Omi’a Tamagu ena veyoluba ’ayanaya otoatoa ona qaiawa. Omai, ta ena ’Ebeluvine ona ’ewea. Ba’e ’Ebeluvine nana lova kuyavata qabudi adi ’iva’ava’ata ’unu ’inega Yaubada ’iva’ava’aia weaqimi. <sup>35</sup>\* Mana lova ’ai weaqina yabotana ta ove’ainigu, wese magagu luayahaya ta ovementegu, ta wese ge oda alamanigu, ta tua o’ebe’ewegu yamai emi vanuea. <sup>36</sup> Ta wese ge agu kalekomo ta ovekalekogu, be wese yavevihuqa ta o’itamakigu, ta wese vanue ’ebeyoqona ’inaya yatoatoa ta ovayausigu.’

<sup>37</sup> “’Inega tunutunuqi dina ’iguya ina vonaya, ‘Kaiwabu, totutaya a’iteu ma botaniu ta ave’ainiu, ta wese totutaya magau luayahaya ta go’ila aneiu? <sup>38</sup> Totutaya avemwageyeu ema ’abagaya ta tua agabeu umai vanuea? Totutaya a’iteu ge au kalekomo ta avekalekou? <sup>39</sup> Ta totutaya ma au vihuqa a’iteu? Ta wese totutaya vanue ’ebeyoqona ’inaya utoatoa ta avayausiu?’

<sup>40</sup>\* “’Inega ena vonedi, ‘Vonahaqiaqi, ’eguma tomotau kavokavovo ni’a oiuledi, e ’inega ya’a wese ni’au oiulegu.’

<sup>41</sup>\* “Ta taudi agu kelua itoatoa ena vonedia, ‘Onogegu! Omi’a tawa Yaubada vona ve’alate mi be vematasabu qiduana ona lobe, ’inega ona tauya ’aiwe ’ala’alata vataya ’inaya. Omo’e di’we nana lova Yaubada ni’a ’iva’ava’ata vatayea Seitani me ena tofewayavo weaqidi. <sup>42</sup> Mana lova yabotana ta gebu oda ve’ainigu, ta wese magagu luayahaya ta go’ila ge oda neigu. <sup>43</sup> Ta lova yavewagawaga yamai emi ’abagaya ta ge oda ’ebe’ewegu emi vanuea, be o’itegu ge agu kalekomo ta ge oda vekalekogu, ta wese yavevihuqa be vanue ’ebeyoqona ’inaya yatoatoa ta ge oda vayausigu.’

<sup>44</sup> “’Inega taudi egu vona ba’e ina ve’iei ina vonaya, ‘Kaiwabu, totuta a’iteu ma botaniu nage magau luayahaya? Ta totutaya uvewagawaga umai ema ’abagaya? Totutaya a’iteu ge au kalekomo? Ta totutaya uvevihuqa? Ta wese totutaya vanue ’ebeyoqona ’inaya utoatoa ta gebu ada iuleu?’

<sup>45</sup> “’Inega ena vonedi, ‘Yavona aqiaqiem, lova tuta nana tomotau ge adi wawa ’ena’ina ba’e vita diavona ilobedi ta omi’a ge oda iuledi, ’inega wese ya’a ge oda iulegu.’ <sup>46</sup>\* ’Inega todewa kavokavovo edi ilivu veifana weaqina ina tauya visiq vataya ’inaya, ta ’esi taudi tunutunuqidi yawai vataya ina lobe.”

\* 25:29: Md 13:12; Mk 4:25; Lk 8:18 \* 25:30: Md 8:12; Lk 13:28 \* 25:31: Md 16:27; 19:28 \* 25:32: Isi 34:17; Ve 20:11-13 \* 25:35: Ais 58:7 \* 25:40: Vos 19:17; Md 10:42; Mk 9:41 \* 25:41: Md 7:23 \* 25:46: Dan 12:2; Ion 5:29

## 26

*Toluvineavo nuanuadi Iesu ina luve'aligia**(Maki 14:1-2; Luke 22:1-2; Ioni 11:45-53)*

<sup>1</sup> Tuta nana Iesu ana to'abibodayavo yani qabuna tuta ena 'ebeluo'ova weaqina ve'itedi gumwala 'inega vonedi vonaya, <sup>2</sup> \* "Ni'a oalamanian 'aubena magilafuna nagumwala 'inega 'Auvivia Sagalina nave'ale, be 'inega agu tosuluva naneiegu agu aviayavo 'idia, be 'etoluai 'inaya ya'a Tomotau Natuna ina tutuve'ewegu."

<sup>3</sup> Ta ba'e tuta nana 'inaya toveguba qiduiduadi be 'abaga ana tovanugwetayavo iva'auta toveguba edi tovanugweta Kaiafa ena vanuea. <sup>4</sup> 'Inega adi 'aidega idima govaqa ma'oda 'waivega Iesu ina kafi 'aipei 'abo ina luve'aligia. <sup>5</sup> Ta ivonaya, "Ge 'Auvivia Sagalina ana tuta 'inaya Iesu kana kafia, mana 'eguma 'idewani nawale tomotau diadi navilea ta ina manini 'idaya."

*Vavine taha Iesu dede'wega iwaqia 'abaga Bedani 'inaya**(Maki 14:3-9; Luke 22:3-6)*

<sup>6</sup> Iesu Bedani 'inaya toatoa Saimoni ena vanuea, tauna lova to'wagota taha. <sup>7</sup> \* Ta 'ai ana tuta 'inaya taha vavine me ena dede'wa mai lugu vanuea, ta dede'wa nana ana maisa qiduana ma botolina viaviaqina alabasita 'inega. Ta vavine nana ba'e dede'wa nana iwaqia Iesu debanaya.

<sup>8</sup> Ta tuta nana Iesu ana to'abibodayavo vavine nana ena viaqa Iesu 'inaya i'itea 'inega ilugwaeyea ivonaya, "Tola'ai weaqina dede'wa uiwaqa kavovoi mana ana maisa gegoyo? <sup>9</sup> Luaqiaqiea be dede'wa nana davegimwaneyea be ana ve'ia agona da'ewea be davewila'ayea lukwalukwa 'idia."

<sup>10</sup> Iesu edi nuanua ni'a alamanian ta vonaya, "Gebu vavine ona lugwaeyei mana ba'e yani aqiaqi otaqina 'iguya viaqia. <sup>11</sup> \* Lukwalukwa dina tuta qabuna maega otoatoa, ta ya'a ge tuta kuena omi'a maega kana toatoa. <sup>12</sup> Tuta nana vavine ba'e 'wafigu dede'wega iwaqia, 'inega 'iva'ava'aigu agu tavuna weaqina. <sup>13</sup> Yavona aqiaqiemi, ma'inaya Valegu ina lugaihi dadanea di'we taha taha bwa'obwa'o debanaya, e omo'e 'inaya wese vavine ba'e ena viaqa 'iguya ina velulu'uyayea 'inega tomotau ina nuave'avinia."

*Iudasa nuanuana Iesu nasuluvea**(Maki 14:10-11; Luke 22:3-6)*

<sup>14</sup> Iesu ena vona ba'e lu'ovoia 'inega Tuwelo dina 'idiega taha ana wawa Iudasa Isakaliota tauya toveguba qiduiduadi 'idia, <sup>15</sup> \* 'inega vonedi vonaya, "Evisa ve'ia ona neigu 'eguma Iesu ena ve'ineiea 'imia?" 'Inega mane siliba ana yau 30 ineia. <sup>16</sup> E tuta ba'e 'inega Iudasa tuta aqiaqina vewa'ia be 'inega Iesu nasuluvea 'idia 'abo ina kafia.

*Iesu ma enavo 'Auvivia Sagalina ana 'abwaga i'ainia**(Maki 14:12-21; Luke 22:7-13,21-23; Ioni 13:21-30)*

<sup>17</sup> \* Beledi ge ana isitimo Sagalina ana 'aubena nugweta 'inaya Iesu ana to'abibodayavo imai ivetala'aiea ivonaya, "Kaiwabu, ma'inaya nuanuau 'Auvivia Sagalina 'abwagana ana 'iva'ava'aia weaqiu?"

<sup>18</sup> 'Inega Iesu vonaya, "Ona tauya Ielusalema 'inaya, ta taha 'oloto ona 'ita 'inanea ta ona vonea. Ema tove'ita ena vona ba'e 'idewani: Egu tuta ni'a mai ta nuanuagu 'Auvivia Sagalina ana 'abwaga ma agu to'abibodayavo eu vanuea ana 'ai." <sup>19</sup> E to'abiboda dina Iesu ena vona imatayagea, 'inega 'oloto nana ena vanuea 'Auvivia Sagalina ana 'abwaga i'iva'ava'aia.

<sup>20</sup> 'Inega lavilavi otaqaya Iesu Tuwelo dina maega ilugu, 'abo 'abwaga nana i'ai. <sup>21</sup> Ta tuta nana i'ai'ai 'inega Iesu vonaya, "Egwavo, yavona aqiaqi 'imia, nawale taha 'imiega nasuluvegu."

\* 26:2: 'Ifo 12:1-27; Md 20:18 \* 26:7: Lk 7:37-38 \* 26:11: Luve 15:11 \* 26:15: Sek 11:12; Ion 11:57

\* 26:17: 'Ifo 12:14-20

<sup>22</sup> Iesu ena vona ba'e weaqina nuadi vita aqiaqi, 'inega 'aidega 'aidega Iesu ivetala'aiea ivonaya, "Kaiwabu, togama, nage ya'a?"

<sup>23</sup> \* Ta Iesu vonedia, "Oloto nana tauna maega gaeba ma du'wana gamonaya ama beledi a'au'aubwa'uya ta a'ai'ai, e tauna nawale nasuluvegu. <sup>24</sup> Ya'a Tomotau Natuna nawale 'aliga ana 'edega ena tauya 'idewani lova Buki Nugwenugweina 'inaya maduvon-ayea, ta tauna agu tosuluva nana nuakolokolona, ta 'esi luaqiaqiea 'eguma lova inana ge ida venatunei."

<sup>25</sup> 'Inega ana tosuluva, Iudasa vonaya, "Kaiwabu, to'oloto, nage ya'a?"  
'Inega Iesu voneaya, "Ni'a tau'uyega usimanayeu."

*Kaiwabu ena 'ai 'ebenuave'avina*  
(Maki 14:22-26; Luke 22:14-20; 1 Kolinita 11:23-25)

<sup>26</sup> Nawale i'ai'ai 'inega Iesu beledi 'ewei ta vona veyolubea 'inega gitomwea 'abo ana to'abibodayavo neidi, vonedia, "Ba'e 'wafigu, ta ona 'ewei ona 'ai." <sup>27</sup> 'Abiboda 'oine ma vedina wese 'ewei 'inega lukaiwa Yaubada 'inaya 'abo neidi ta vonaya, "Qabumi ona numea, <sup>28</sup> \* ba'e sulaligu inoinoqa luvine vauvauna weaqina, ta sulala nana tomotau qabumi emi luveifana ana nuataqo weaqina. <sup>29</sup> Ta yavonemi, ge wese 'oine ena numa 'eviviei ana laba omi'a maega 'oine vauvauna kana numea Tamagu ena 'Ebeluvine 'inaya." <sup>30</sup> \* 'Ai gumwala 'inega 'evosi taha i'evosiea 'abo i'ifoqe ta i'watovu bwanaga Olibe 'inaya.

*Iesu madusimanea Fita ena vegeqa weaqina*  
(Maki 14:27-31; Luke 22:31-34; Ioni 13:36-38)

<sup>31</sup> \* Ta Iesu vonedi vonaya, "Ba'e velovana nana 'inaya qabumi ona dena ta ona nogegu 'idewana Buki Nugwenugweina ena vona vonaya, "To'itamaki sifi ena luve'aligia  
be sifi qabudi ina yavula dadana."

<sup>32</sup> \* "Ta egu ya'itoto 'evivi 'aligega 'abibodanaya ena nugweta ena tauya Galili 'inaya, ta omi'a ona 'abibodegu ona wai."

<sup>33</sup> 'Inega Fita vona 'evivi vonaya, "Eguma nawale qabudi ina dena 'iuyega, ya'a agu 'aidega ena toa."

<sup>34</sup> \* 'Inega Iesu Fita vonea vonaya, "Yavona aqiaqieu, velovana ba'e 'inaya nawale una vegeqegu ana yau toi, ta 'abiboda kamukamu nadou."

<sup>35</sup> Ta Fita vonaya, "Kaiwabu, ge ena vegeqeu! 'Eguma ina luve'aligiya ya'a wese maega ina luve'aligigu." Ta to'abibodayavo qabudi edi vona wese 'idewani.

*Gedesemani 'inaya Iesu noqinoqi Tamana 'inaya*  
(Maki 14:32-42; Luke 22:39-46)

<sup>36</sup> 'Inega Iesu ma ana to'abibodayavo itauya di'we taha ana wawa Gedesemani 'inaya, ta vonedi vonaya, "Ba'idia ona toatoa, ta ya'a yatautauya ena venoqi Yaubada 'inaya."

<sup>37</sup> 'Inega Iesu Fita ta wese Sebedi natunavo magilafudi 'ebe'ewedi itauya tufinaya. 'Inega Iesu me ena giwali visiqta ta me ena nuavita vonedi vonaya, <sup>38</sup> \* "Giwaligu visivisiqa qiduana, ta agu lutonova luveifa otaqa, 'inega ba'idia ona toatoa ta ge matami nadune."

<sup>39</sup> 'Inega Iesu vanaqo ta givelukabwebwe venoqi vonaya, "Tamagu ye, 'eguma ana fata visiqta vedina ba'e 'iguyega una 'ewa yavulea, ta gebu ya'a egu nuanua ta 'esi o'a eu nuanua 'idewana ena viaqia."

<sup>40</sup> 'Inega 'evivi ana to'abibodayavo toidi 'idia ta 'itedi i'eno motaiva, ta Iesu Fita divanoya, vonaya, "Tola'ai weaqina o'eno'eno! Ma'oda, nage ge ami fata be tuta

\* 26:23: Same 41:9 \* 26:28: Sek 9:11; 'Ifo 24:8; Iel 31:31-34; 1Kol 10:16 \* 26:30: Lk 22:39; Ion 18:1  
\* 26:31: Sek 13:7; Ion 16:32 \* 26:32: Md 28:7,16 \* 26:34: Md 26:69-75 \* 26:38: Ion 12:27

kukusana namo oda vevekova ta oda ba'eba'eyegu, waisa?" <sup>41</sup> Ta wese vonedi vonaya, "Luaqiaqiemi be matami ge nadune ta 'esi ona vevenoqi be 'inega Seitani ge nasitonovimi. Vonahaqiaqi, niboanimi nuanuana, ta 'wafimi dawalili."

<sup>42</sup> 'Inega Iesu tuta vemagilafuna naqo 'evivi sabi venoqi vonaya, "Tamagu, vonahaqiaqi 'eguma ge taha wese 'eda da'eno'eno tomotau adi 'etoyavua weaqina, 'inega ba'e visiqā vedinega ena numa be yaqisa eu nuanua ena viaqia."

<sup>43</sup> Ta Iesu wese 'evivi ana to'abibodayavo 'idia 'inega lobedi i'eno motaiva, mana matadi tawa dunedune. <sup>44</sup> 'Inega tuta vetoina wese 'evivi sabi venoqi, ta tawadega ma'oda venoqi 'aiqa wese lu'eviviea 'idewani.

<sup>45</sup> Ta wese 'evivi ana to'abibodayavo divanodi vonaya, "Ma'oda, nage nawale o'eno'eno ta oveveyawai, waisa? O'itei, ya'a Tomotau Natuna egu tuta tawa 'ifoqe be ina ve'ineiegu tomotau luveifadi 'idia. <sup>46</sup> \* Oya'itoto katauya, mana agu tosuluva maimai."

### *Iesu ikafia*

*(Maki 14:43-50; Luke 22:47-53; Ioni 18:3-12)*

<sup>47</sup> Ta Iesu nawale vonavona, 'inega taha 'oloto Tuwelo dina 'idiega tauna Iudasa qabu qiduana maega i'ifoqe. Ta ba'e qabu diavona toveguba qiduqiduadi be wese 'abaga ana tovanugwetayavo edi luvine 'inega ivetunedi imai Iesu ana kafi weaqina me edi kefata be wese me edi gita. <sup>48</sup> Ta Iudasa toluavia ni'a vonedia, "Tomotau nana nawale ena talafafea e tauna Iesu, 'inega ona kafia." <sup>49</sup> 'Inega tauya tunutunuqina Iesu 'inaya vonaya, "Kaiwabu, kaiwa!" 'inega talafafea.

<sup>50</sup> Ta Iesu vonaya, "Iagu, tola'ai nuanuau una viaqia ase uviaqā kwayavoni." 'Inega toluavia imai Iesu 'inaya 'abo ikafia.

<sup>51</sup> \* 'Inega taha 'oloto Iesu ena qabu 'inega ena kefata siwaia ta toveguba edi tovanugweta ena tofewa teniqana 'ilaufea. <sup>52</sup> \* Ta Iesu 'oloto nana vonea, "Ta'iwa! Eu kefata una a'u'eviviea ana umaya, mana toluaviayavo taudi luaviayega i'ali'aliga. <sup>53</sup> Ona alamania vonigo 'eguma nuanuagu Tamagu 'inega ena noqi iula weaqina, e nawale ena tovale'ewa qabu ago va'inedi navetunedi 'iguya. <sup>54</sup> Ta gebu, mana 'eguma 'idewanina 'inega ma'oda Buki Nugwenugweina ena simana weaqigu ana aqiaqi na'ifoqe 'aiqa?"

<sup>55</sup> \* 'Inega Iesu ana tokafi qabudi vonedi vonaya, "Nage ya'a kavona tovanawala taha, 'inegana me emi kefata be wese me emi gita omai sabi vunuqigu? Lova 'aubena qabuna 'idia Vanue Gwalagwalana 'inaya yatoatoa ta yaveve'ita tomotau 'idia, ta tola'ai weaqina ge oda kafigu tuta diavona 'idia? <sup>56</sup> Ta ba'e yani diavona i'ifoqe be 'inega tovesimasimanayavo edi simana Buki Nugwenugweina gamonaya ana vonahaqiaqi na'ifoqe."

'Inega ana to'abibodayavo qabudi Iesu inogei ta idena.

### *Iesu tovolō me Diu edi kaniselayavo 'iawadia*

*(Maki 14:53-65; Luke 22:54-55,63-71; Ioni 18:13-14,19-24)*

<sup>57</sup> Qabu diavona Iesu ni'au ikafia ta imiea toveguba edi tovanugweta ana wawa Kaiafa 'inaya, ta wese luvine ana tove'itayavo be 'abaga ana tovanugwetayavo ni'a iva'auta ena 'abagaya. <sup>58</sup> Fita tufwana luluvaiega Iesu tala'obeā ta mai toveguba edi tovanugweta ena 'abagaya, 'inega lugu ta toabui Vanue Gwalagwalana ana to'itamakiavo maega 'ebekotu di'wenaya be vonigo Iesu ana luvine nanoqolia. <sup>59</sup> Taudi toveguba qiduqiduadi ta wese kaniselayavo nuanuadi Iesu ana tove'ewayavo ina lobedi be edi 'eu'au'ava 'inega Iesu ina luve'aligia. <sup>60</sup> 'Inega tomotau 'eala imai, ta edi u'ava 'inega toluvineavo ge adi fata be Iesu ina luvinei mana u'ava dina ivego'ila.

Ta 'abiboda 'oloto magilafudi imai itovolo, <sup>61</sup> \* ta ivonaya, "Iesu lova vonaya, 'Agu fata be Yaubada ena Vanue Gwalagwalana ena qeu yavulea, be 'aubena toi 'idia ena yoqona 'eviviea."

\* 26:46: Ion 14:31    \* 26:51: Ion 18:26    \* 26:52: Nug 9:6; Ve 13:10    \* 26:55: Lk 19:47; 21:37    \* 26:61: Ion 2:19-21



<sup>62</sup> 'Inega toveguba edi tovanugweta agona tovololo ta vonaya, "Tomotau omo'e edi ve'ewa 'iuya ni'au unoqolia, waisa? 'Inega 'evisa eu ve'ia?" <sup>63</sup> \* Ta Ieisu ge taha vona da'inanei.

'Inega toveguba nana wese Ieisu vonea vonaya, "Uvonahaqiaqi Yaubada mayawaina matanaya, nage o'a To'etoyavua ta Yaubada Natuna, nage gebu?"

<sup>64</sup> \* 'Inega Ieisu vonea, "Ni'au bena'e uvona, ta wese yavonemi vonigo ya'a Tomotau Natuna nawale ona 'itegu Tovewaiwai otaqa ana 'ataqia ena toatoa be wese mahalega waumana debanega ena mai."

<sup>65</sup> \* 'Inega toveguba edi tovanugweta diana vila veiveifea e taunega ana kaleko kuena abuya ta vonaya, "Ena vona veifana ni'a onoqolia. Vonahaqiaqi, 'oloto ba'e ena vona 'inega taunega givaneyea kavona tauna Yaubada. Ta'iwa, ge taha wese tove'ewayavo ina vonavona ena luveifanayavo weaqidi. <sup>66</sup> \* Ma'oda emi nuanua Ieisu weaqina?"

Ta taudi ivonaya, "Luaqiaqiea be na'aliga, mana me ena luveifana!" <sup>67</sup> \* 'Inega 'iawana igida'wea ta ivunuqa dadanea nimadiega, ta wese vaina i'au'ae'aea,

<sup>68</sup> ta ivonavonaya, "Eguma o'a vonahaqiaqi To'etoyavua 'inega usimana 'ifoqe 'imaya togama vunuvunuqiu."

### *Fita Ieisu vegeqea*

*(Maki 14:66-72; Luke 22:56-62; Ioni 18:15-18,25-27)*

<sup>69</sup> Fita nawale toatoa 'ebekotu di'wenaya, 'inega tofewa iahaba taha 'ifoqe mai ta vetala'aiea vonaya, "O'a wese lova Ieisu Galili 'olotona maega oluluyaba dadana, waisa?"

<sup>70</sup> Ta tomotau qabudi matadia Fita vegeqea vonaya, "Ba'e yani nana uveveqeyea ya'a ge eda alamaniamia."

<sup>71</sup> 'Inega 'ifoqe masu'edanaya ta taha wese iahaba 'itea Fita 'inega vonaya, "Oloto omo'e lova Ieisu Nasaleta 'olotona maega itoatoa."

<sup>72</sup> 'Inega wese Fita vegeqea ta 'awatamatamana vonaya, "Ba'e 'oloto nana ya'a ge eda alamaniamia."

<sup>73</sup> Ge tuta kuena 'abibodanaya vaina 'oloto itovotovololo Fita di'wenaya ta ivoneaya, "Vonahaqiaqi, o'a Ieisu taha ena tomotau, mana bonau ana noqola kavona me Galili bonadi."

<sup>74</sup> 'Inega Fita vonaya, "Tamada! 'Oloto ba'e ya'a ge eda alamaniamia! 'Eguma egu vona ge vonahaqiaqi nawale Yaubada naluvematasabugu."

Tuta omo'e 'inaya kamukamu dou. <sup>75</sup> \* 'Inega Fita Ieisu ena vona nuaia, "O'a nawale tuta toi ana yau una vegeqegu, ta 'abiboda kamukamu nadou." 'Inega Fita me ena nuavita 'ifoqe 'abagaya ta dou.

## 27

### *Ieisu itauyeya Failato matanaya*

*(Maki 15:1; Luke 23:1-2; Ioni 18:28-32)*

<sup>1</sup> Ni'a mahala vulihia 'inega toveguba qiduquduadi wese 'abaga ana tovanugwetayavo qabudi iluvine vonigo Ieisu ina luve'aligia. <sup>2</sup> 'Inega Ieisu nimana iyoqonia itauyeya me Loma edi gavana Failato 'inaya nuanuadi ina keiea be liuna ina baia ta Ieisu naluvinei 'aliga 'inaya.

### *Iudasa ena 'aliga*

*(Viaqa 1:18-19)*

<sup>3</sup> Tuta nana Iudasa nuana 'eqa'uya vonigo Ieisu ina luve'aligia, 'inega nuagivila ta nuanuana siliba 30 dina nanei 'eviviedi toveguba qiduquduadi be 'abaga ana tovanugwetayavo 'idia, <sup>4</sup> 'inega tauya 'idia ta vonaya, "luveifana ni'a yaviaqia, mana 'oloto aqiaqina yasuluvea 'imia."

\* 26:63: Ais 53:7; Md 27:12      \* 26:64: Same 110:1; Dan 7:13; Md 24:30      \* 26:65: Md 9:3; Ion 10:33      \* 26:66: Luvi 24:16; Ion 19:7      \* 26:67: Ais 50:6; 53:5      \* 26:75: Md 26:34

Ta ivona 'eviviea, "Ima'a ge taha ada nuanua ba'e yani nana weaqina, ta 'esi o'a tau'u eu luveifana weaqina una nuanua." <sup>5\*</sup> 'Inega Iudasa siliba 30 dina feledi Vanue Gwalagwalana gamonaya, ta 'ifoqe tauya 'inega taunega magana sikwea 'abo 'aliga.

<sup>6</sup> Toveguba qiduquadi siliba dina igwagwedi ivonaya, "Ge ana fata be ba'e siliba dina kana a'udi mane ana 'ebeluveaqe 'inaya, mana luvine 'eno'eno vonaya vonigo mane luve'aliga 'inega ge ana fata be kana vefewei Vanue Gwalagwalana weaqina." <sup>7</sup> Ta edi veqae 'abibodanaya iluvine be mane nana 'inega taha to'abi 'ulena ena bwa'obwa'o ina gimwane, ta bwa'obwa'o nana wagawaga adi deba'unu weaqidi. <sup>8</sup> 'Inega bwa'obwa'o nana igabea Sulala Bwa'obwa'ona, ta wawa nana nawale 'eno'eno.

<sup>9\*</sup> Omo'e 'inega tovesimasimana Ielemaia ena vona ana aqiaqi 'ifoqe, mana lova Buki Nugwenugweina 'inaya vonaya,

"Me Isileli tauna ana ve'ia ia'uya siliba adi yau 30 'idewani. Ta mane nana i'ewedi, <sup>10</sup> 'inega to'abi 'ulena ena bwa'obwa'o igimwane, 'idewani egu Kaiwabu ena vematamagilafu 'iguya."

*Failato Iesu vetala'aiea*

*(Maki 15:2-5; Luke 23:3-5; Ioni 18:33-38)*

<sup>11</sup> 'Inega Iesu me Loma edi gavana Failato 'iawanaya tovolu ta Failato vetala'aiea vonaya, "Uvonegu, nage o'a me Diu edi Kini?"

'Inega Iesu vonaya, "Ni'a uvona 'idewani." <sup>12\*</sup> 'Inega toveguba qiduquadi wese 'abaga ana tovanugwetayavo Iesu ive'ewea Failato matanaya, ta Iesu ge taha tola'ai weaqina davona 'eviviedi.

<sup>13</sup> 'Inega Failato vonaya, "Ma'oda, nage edi ve'ewa 'iuya unoqolia?" <sup>14</sup> Ta Iesu ge taha tola'ai davonei edi ve'ewayavo weaqina, 'inega Failato nuana voqana qiduana.

*Failato Iesu awafelea ina luve'aligia*

*(Maki 15:6-15; Luke 23:13-25; Ioni 18:39-19:16)*

<sup>15</sup> Ya'wala 'aidega 'aidega 'idia 'Auvivia Sagalina 'inaya gavana ena ilivu ba'e 'idewani: Tomotau qabudi luaqiaqiedi be taha tomotau ina vena'ivinea be na'ifoqe vanue 'ebeyoqona 'inega, e 'inega gavana nana tomotauna nayavua naha'u'ifoqeyea 'idia.

<sup>16</sup> Tuta ba'e 'inaya 'oloto taha vanue 'ebeyoqona 'inaya totoa ana wawa Balabasi, ta tomotau qabudi ni'a ialamania tauna 'oloto veifa otaqina. <sup>17</sup> 'Inega tomotau iva'auta ta Failato vetala'aiedi vonaya, "To'oloto nuanuami ena yavui weaqimi, nage Balabasi nage Iesu tauna igabea To'etoyavua?" <sup>18\*</sup> Ta Failato ena vetala'ai ba'e 'iuna, mana ni'a alamani aqiaqiea Iesu ive'ifi'ifiea, 'inega ikafia ta imiea 'inaya sabi luvinena.

<sup>19</sup> Tuta nana Failato nawale totoa 'ebevekotu ana 'ivi 'inaya ta qabu diavona vevetala'aiedi, ta 'inega moqanena vale ivetunei ivonaya, "Ge taha tola'ai una viaqi ba'e 'oloto nana 'inaya, mana velovanaya ve'wayoqega visiqa qiduana yalutonovia weaqina, 'inega yahalamania tauna totoa maiqina."

<sup>20</sup> Ta toveguba qiduquadi be wese 'abaga ana tovanugwetayavo qabu diavona iluvetuvetunedi ina venoqi Failato 'inaya be Balabasi nayavui 'idia ta 'esi Iesu 'aliga nalobea. <sup>21</sup> 'Inega Failato qabu diavona wese vetala'aiedi, "Magilafudi 'idiega togama nuanuami ena yavui weaqimi?"

'Inega ivoneaya, "Nuanuama Balabasi!"

<sup>22</sup> Ta Failato vonaya, "Tola'ai ena viaqi Iesu 'inaya, tauna igabea To'etoyavua?"

'Inega tomotau qabudi ena vona ive'evivia ivonaya, "Etoluai 'inaya kana tutuve'eweal!"

<sup>23</sup> 'Inega Failato vonedi, "Tola'ai ena luveifana 'inega na'aliga?"

Ta qabu diavona ikolua qiduana ivonaya, "Etoluai 'inaya kana tutuve'eweal!"

<sup>24\*</sup> 'Inega Failato tawa alamania ge ana fata be qabu diavona nuadi nagivilei, mana 'itedi Iesu ena 'aliga weaqina i'alaweloweloloyea be tuta goyona vedavi na'ifoqe. 'Inega

\* 27:5: Via 1:18-19; Md 26:14-15 \* 27:9: Sek 11:12-13 \* 27:12: Ais 53:7 \* 27:18: Ion 11:47-48; 12:19

\* 27:24: Luve 21:6-9

go'ilega nimana 'utuya qabu dina matadia 'abo vonaya, "Ge taha wese vona ena 'inane'i 'imia ba'e 'oloto nana ena 'aliga weaqina. 'Inega ya'a toatoa maiqigu, ta 'esi taumiega ona luvinea."

<sup>25</sup>\* Ta qabudi ivonaya, "Ta'iwa, ena 'aliga ana vita ima'a natumavo maega ana 'avalea."

<sup>26</sup>'Inega Failato Balabasi yavuia 'idia, ta Iesu ve'ineiea ena toluaviayavo 'idia ta vonedi wayo metametanega ina vunuqa dadanea, ta 'abiboda ina tutuve'ewea 'etoluai 'inaya.

*Toluaviayavo Iesu igivenu'wea*

(Maki 15:16-20; Ioni 19:2-3)

<sup>27</sup>'Inega gavana Failato ena toluaviayavo Iesu itaueya edi 'ebetoa 'inaya, ta ediavo qabudi igaba va'auqidi imai Iesu itovolo vivilia. <sup>28</sup>\* 'Inega ana kaleko ivaulia ta kaleko bweabweala otaqina ivekalekoya, <sup>29</sup>ta ana biatuli talitaliega iviaqia 'inega 'unu'ununaya ia'uya, ta kewala ana 'ataqiega ivekafia ta wese 'iawanaya tuqatuqadiega isobadi ta igivenu'wea ivonaya, "Kaiwa, o'a me Diu edi Kini Qiduana." <sup>30</sup>\* E wese igida'wea be ena kewala i'ewea 'inega 'unu'ununa ivunuqia. <sup>31</sup>'Inega igivenu'wei gumwala 'abo kaleko bweabwealina ivata'ia ta ana kalekoyega ivekaleko 'eviviea, 'inega itaueya sabi tutuve'ewana.

*Iesu itutuve'ewea 'etoluai 'inaya*

(Maki 15:21-32; Luke 23:26-43; Ioni 19:17-27)

<sup>32</sup>Tuta nana Iesu i'ifoqeyei ta itautauyea 'edaya e 'inega Sailini 'olotona taha ana wawa Saimoni ilobea, ta iluvetunei be Iesu ana 'etoluai na'avalea. <sup>33</sup>'Inega 'avalea ana laba i'ifoqe 'abaga Goligota 'inaya, ta Goligota ana givila "Unu'unu ana 'abaga". <sup>34</sup>\* 'Inega 'oine be taha yani yuyuna maega iwayavilea ta Iesu ineia vonigo danuma, ta 'alatonovia 'inega nogea.

<sup>35</sup>\* 'Inega 'etoluai 'inaya Iesu itutuve'ewea. 'Abibodanaya toluaviayavo Iesu ana kaleko i'ewedi ta nuanidia taha laha iviaqia be togama nanugweta 'inega kaleko nana na'ewedi. <sup>36</sup>E 'abiboda omo'e 'inaya itoabui ta Iesu i'itamakia. <sup>37</sup>Ta ana 'etoluai debanaya ena 'aliga 'iuna i'wayavia ba'e 'idewani,

BA'E IESU TAUNA ME DIU EDI KINI

<sup>38</sup>\* Ta wese tovanawala magilafudi Iesu maega itutuve'ewedi, taha ana 'ataqiega ta taha ana keliega.

<sup>39</sup>\* 'Inega tomotau ivevedelideli ta Iesu idagidagiei ta wese ivevegilea ivonaya, <sup>40</sup>\* "O'a uvona vonigo Vanue Gwalagwalana una qeunia, ta 'aubena toi 'inaya wese una yoqona 'eviviea. Ta 'eguma o'a Yaubada Natuna 'inega tau'uyega una 'etoyavuii ta 'etoluaiega una webui mai."

<sup>41</sup>Wese 'idewanina toveguba qiduquadi be luvine ana tove'itayavo ta wese 'abaga ana tovanugwetayavo Iesu igivenu'wea ivonaya, <sup>42</sup>"Tauna mali tomotau 'etoyavuidi ta taunega ge ana fata na'etoyavui. 'Eguma tauna vonahaqiaqi me Isileli edi Kini, 'inega 'etoluaiega nawebui mai e 'inega kana vetumaqanea. <sup>43</sup>\* Tauna vonigo Yaubada 'inaya vetumaqana ta vonaya, 'Ya'a Yaubada Natuna', 'inega ka'itei nage Yaubada na'awahaqiaqiei be na'etoyavui, waisa?"

<sup>44</sup>Ta tovanawala dina Iesu maega ni'a itutuve'ewedi, taudi wese 'idewani igivenu'wea.

*Iesu ena 'aliga*

(Maki 15:33-41; Luke 23:44-49; Ioni 19:28-30)

<sup>45</sup>Baba'auyega be ana laba baba'au yewavilea 'inaya 'abaga qabuna velovana bodea. <sup>46</sup>\* 'Inega 3 koloki 'idewani Iesu bonana qiduanega gaba vonaya, "Eloi, Eloi, lama sabakitani?" Ta ana givila vonaya, "Egu Yaubada, egu Yaubada, tola'ai weaqina unogegu?"

\* 27:25: Via 5:28 \* 27:28: Lk 23:11 \* 27:30: Ais 50:6 \* 27:34: Same 69:21 \* 27:35: Same 22:18 \* 27:38: Ais 53:12 \* 27:39: Same 22:7; 109:25 \* 27:40: Md 26:61; Ion 2:19 \* 27:43: Same 22:8 \* 27:46: Same 22:1

<sup>47</sup> 'Inega vaina tomotau di'wenaya itovotovolo ena gaba inoqolia e ivonaya, "Onoqoli, 'oloto ba'e Ilaitia gabegabea."

<sup>48</sup> \* 'Inega taha 'idiega lukwayavoni vihila kikifa 'ewei ta 'oine yuyuna 'inaya 'aubwa'ui, 'inega taha 'aiwe 'inaya 'idawayea ta ve'etovaneyea Iesu 'awanaya vonigo davenumea. <sup>49</sup> Ta enavo ivonaya, "Ta'iwa, ta kana ba'e tonova, nage Ilaitia namai na'etoyavua." <sup>50</sup> 'Inega Iesu wese bonana agonega gaba 'evivi 'abo yawaina gumwala.

<sup>51</sup> \* Ta tuta nana Iesu yawaina gumwala, 'inega Vanue Gwalagwalana gamonaya 'awa ana bagina kaleko eabu magilafuyea debanega be webui 'ayanaya ta wese mwani'ini'i veni'i, 'inega dabo qiduquadi fisala yavuledi, <sup>52</sup> ta wese deba'unu 'awadi 'elu'eqauya. Ta tovetumaqana 'eala lova yawaidi gumwala mayawaidi iya'itoto 'evivi. <sup>53</sup> 'Inega Iesu ena ya'itoto 'evivi 'abibodanaya toya'itoto 'evivi dina wese 'abaga gwalagwalana Ielusalema 'inaya ilugu, ta tomotau 'eala i'itedi. <sup>54</sup> Toluavia dina me edi tovanugweta nawale Iesu i'ita'itamakia ta tuta nana mwani'ini'i be yani qabuna i'ifoqe, 'inega imwaniniva qidwana ta ivonaya, "Vonahaqiaqi, 'oloto ba'ena Yaubada Natu Otaqina."

<sup>55</sup> \* Ta vivine 'eala ba'e yani diavona luluvaiega ivevekovedi, taudi lova Galiliega Iesu i'abibodea ana toiulayavo 'idewani. <sup>56</sup> Vivine diavona 'idiega taha ana wawa Meli Magidala, ta wese taha Meli taudi Iemesa ma taina Iosefa inadi. Ta wese Sebedi moqanena maega ivevekova.

#### *Iesu itavunia*

*(Maki 15:42-47; Luke 23:50-56; Ioni 19:38-42)*

<sup>57</sup> Ni'a velavilaviea 'inega taha 'oloto kaikaiwabuna ana wawa Iosefa 'ifoqe, tauna Alimatia 'olotona ta wese Iesu ana to'abiboda. <sup>58</sup> \* 'Inega Iosefa tauya gavana Failato 'inaya, ta venoqiea Iesu 'wafina weaqina. 'Inega Failato awafela ta ena toluaviayavo vonedi Iesu 'wafina ina neia. <sup>59</sup> 'Inega Iosefa ma enavo Iesu 'wafina i'ewea ta kaleko kuena ta wadawadaeana 'inega iumea. <sup>60</sup> \* 'Inega Iosefa nana ana deba'unu 'evauna 'inaya Iesu a'uya. Ta deba'unu nana lova dabo 'inaya alea ana 'ita kavona vetoa. A'u gumwala, 'inega dabo 'ena'ina ta beabeana 'inega deba'unu nana 'aubodea, ta 'abibodanaya tauya. <sup>61</sup> Ta Meli Magidala ma waviana deba'unu nana di'wenaya itoabui ta ivevekova.

#### *Deba'unu i'itamakia*

<sup>62</sup> Iesu itutuve'ewea me Diu edi 'aubena 'iva'ava'ata 'inaya. Ta mahala vulihia 'inega edi 'aubena tafwalolo 'inaya toveguba qiduquadi ta wese Falisiavo itauya gavana Failato 'inaya sabi 'itana, <sup>63</sup> \* ta ivoneaya, "Kaiwabu, tou'ava nana lova tuta nana nawale mayawaina toatoa ena vona anuave'avinia vonaya, "Aubena toi 'abibodanaya 'aligega ena ya'itoto 'evivi." <sup>64</sup> 'Inega nage ana fata be toluaviayavo una luvetunedi be deba'unu nana ina 'itamaki aqiaqiea ana laba 'aubena toi ina gumwala, fole Iesu ana to'abibodayavo ina mai be 'wafina ina vanawali, e 'inega tomotau ina u'avedi vonigo Iesu 'aligega tawa ya'itoto 'evivi. 'Inega ba'e u'ava nana u'ava nugwenugweina naveqidua va'inea."

<sup>65</sup> Failato edi nuanua 'awahaqiaqiea, 'inega vonedia, "Emi to'itamakiavo egu toluavia 'idiega ona 'ewedi ona tauyedi be deba'unu nana ina 'itamaki aqiaqiea."

<sup>66</sup> 'Inega taudi Falisi be toveguba ta wese toluavia itauya deba'unu nana 'inaya ta 'awana ana 'auboda 'inaya taha 'ebe'ita ia'uya 'inega ge taha toga ana fata 'auboda nana nagitonovi. 'Inega toluavia dina ivetovolodi deba'unu nana 'inaya be ina 'itamaki aqiaqiea, 'abo itauya.

\* 27:48: Same 69:21 \* 27:51: 'Ifo 26:31-33; Ibe 10:19-20 \* 27:55: Lk 8:2-3 \* 27:58: Luve 21:22-23  
\* 27:60: Ais 53:9 \* 27:63: Md 12:40; 16:21; Mk 9:31; 10:33-34; Lk 9:22; 18:31-33; Ion 2:19-21

## 28

*Isisu ya'itoto 'evivi 'aligega*

*(Maki 16:1-10; Luke 24:1-12; Ioni 20:1-10)*

<sup>1</sup> Me Diu edi Sabate tawa gumwala, 'inega wiki ana 'aubena nugweta 'inaya 'awa'awai otaqaya Meli Magidala ma waviana iya'itoto itauya Isisu ana deba'unu sabi 'itana. <sup>2</sup> 'Inega mwani'ini'i qiduana 'ifoqe, mana Kaiwabu ena tovale'ewa mahalega webui mai ta deba'unu ana 'auboda dabo 'uvekawawa naqoyei, 'inega vane debanaya toabui. <sup>3</sup> Ta tovale'ewana ana 'ita kavonaya namala 'wai'waia be wese ana kaleko wadawadaea otaqina. <sup>4</sup> Deba'unu ana to'itamakiavo tovale'ewa nana i'itea 'inega giwalidi a'ala ta idedela igivelukabwebwe bwa'obwa'oya adi 'ita kavona ida 'aliga 'idewani.

<sup>5</sup> 'Inega tovale'ewa nana vivine magilafudi vonedi vonaya, "Ge ona mwaniniva! Ni'a yahalamania omi'a Isisu osalisalia tauna itutuve'ewea 'etoluai 'inaya. <sup>6</sup> \* Ta tauna ge ba'idia, ta 'esi ni'a ya'itoto 'evivi 'aligega, lova ena vona 'idewani. Omai o'itei ana 'ivimo. <sup>7</sup> Ta ona lukwayavoni ona tauya ana to'abibodayavo ona vonedi, 'Isisu ni'au 'aligega ya'itoto 'evivi, ta nanugweta di'we Galili 'inaya ta omi'a ona 'abiboda, ta omo'e 'inaya ona 'itea'. Tola'ai ni'a yavonemi e ona nuave'avinia."

<sup>8</sup> 'Inega vivine dina ilukwayavoni deba'unu inogea ta me edi mwaniniva ta wese me edi qaiawa itauya Isisu ana to'abibodayavo 'idia sabi vonadi. <sup>9</sup> Nawale itautauya, 'inega Isisu 'ifoqe 'idia vonaya, "Kaiwa." 'Inega inaqo 'inaya ta tuqatuqadiega isobadi ta 'aqenaya ikafi ta ihiwa'odu 'inaya. <sup>10</sup> \* Ta Isisu vonedi vonaya, "Ge ona mwaniniva, ta ona tauya egwavo 'idia be ona vematamagilafuyedi ina tauya Galili 'inaya, be omo'e 'inaya ina 'itegu."

*Deba'unu ana to'itamaki edi vematamagilafu*

<sup>11</sup> Vivine dina nawale itautauya 'edayta deba'unu ana to'itamaki vaina itauya 'abaga Ielusalema 'inaya, ta tola'ai ni'a 'ifoqe i'itea wese ivematamagilafu toveguba qidugiduadi 'idia. <sup>12</sup> 'Inega tovegubayavo ta wese 'abaga ana tovanugwetayavo itoava'auta adi 'aidega idima govaqa, 'abo mane 'ena'ina deba'unu ana to'itamakiavo ineidi, <sup>13</sup> ta ivonedi ivonaya, "Tomotau ona vonedi ona vonaya, 'Velovelovanaya a'eno motaiva a'eno'eno ta 'inega Isisu ana to'abibodayavo imai ta 'wafina ivanawalia!" <sup>14</sup> Ta wese ivonedi ivonaya, "Eguma gavana Failato vale ba'e nanoqolia nawale ana u'avea 'inega ge diana navilei 'imia." <sup>15</sup> 'Inega to'itamaki edi mane i'ewei ta tovegubayavo be wese 'abaga ana tovanugwetayavo edi nuanua i'abibodea. 'Inega ba'e u'ava nana Isisu 'wafina weaqina valena yawala dadana me Diu 'idia, ta ba'itaga wese 'idewani ivonavona dadanea.

*Isisu ana to'abibodayavo adi veyoveyoya neidi*

<sup>16</sup> \* 'Inega Isisu ana to'abibodayavo adi yau leveni itauya Galili 'inaya 'abo bwanagana Isisu ni'a vetalatutulea 'inaya i'watovu. <sup>17</sup> Ta tuta nana Isisu i'itea 'inega ihiwa'odu 'inaya. Ta vaina 'idiega nawale me edi venuana magilafu.

<sup>18</sup> \* 'Inega Isisu mai di'wedida ta vonedi vonaya, "Tamagu ena waiwai ta ena luvine ni'a neigu be yani qabuna mahalaya ta wese bwa'obwa'oya ena luvinedi. <sup>19</sup> \* 'Inega ona tauya di'we qabuna 'idia ona lugaihi tomotau 'idia be ina veto'abiboda weaqigu. Ta wese ona givebabitaisodi Tamagu ana wawega be Natuna ya'a agu wawega ta wese Niboana Gwalagwalana ana wawega. <sup>20</sup> Ta luvine qabudi ni'a yaneimi ona ve'itedi ta ina matayagedi. Vonahaqiaqi, ya'a tuta qabuna omi'a maega kana toatoa ana laba bwa'obwa'o ana 'ebelu'ovoa 'inaya."

\* 28:6: Md 12:40; 16:21 \* 28:10: Md 26:32 \* 28:16: Md 26:32 \* 28:18: Ion 13:3; Efe 1:20-22 \* 28:19: Mk 16:15-16; Via 1:8

## Maki

### *Buki ana alamani weaqina*

Maki ena 'wayavi ana 'ebeve'ale 'inaya vonaya, "Ba'e Vale Aqiaqina ana 'ebeve'ale Ieisu Keliso weaqina, tauna Yaubada Natuna."

'Inega ba'e ena buki 'inaya Ieisu ena viaqa waiwaiidi be 'ebenuavoqana weaqidi 'wayavidi, 'idewani ma'oda 'inega Ieisu niboana luveifadi luvinedi be 'wavi 'ifoqeyedi tomotau 'idiega. Ta wese ma'oda 'inega Ieisu tomotau edi luveifana weaqina nuataqodi ta giveaqiaqiedi. Ieisu taunega gabea Tomotau Natuna, ta ena ve'ita 'inega givesimatalia ena mai bwa'obwa'oya weaqina, ta ena mai nana 'iuna yawaina awafelea tomotau qabudi adi 'etoyavua weaqina. Mana tuta nana sulalina inoqa 'etoluaia e 'inega tomotau edi luveifana 'idiega 'utu yavulea. 'Inega tomeqabu Ieisu ena viaqayavo be wese ena vonayavo ivetumaqanedi taudi luaqiaqiedi be ba'e 'etoyavua nana ina lobe.

Maki ena 'wayavi ba'e 'inaya simana taudi Falisiavo be, luvine ana tove'itayavo be, Sadusiavo be, toveguba qiduquduadi be wese 'abaga ana tovanugwetayavo nuanuadi Ieisu ina ve'ewei ta ina luve'aligia. Ta ge taha ena luveifamo, ta tua gavana Failato Ieisu awafelea 'inega itutuve'ewea 'etoluai 'inaya. Ta Maki Ieisu ena ya'itoto 'aligega weaqina wese simana aqiaqiea.

### Buki gamona

1:1-13 Ieisu Valena Aqiaqina ana 'ebeve'ale

1:14-9:50 Ieisu ena viaqayavo tomotau nuanidia di'we Galili 'inaya

10:1-52 Ieisu Galili nogea ta tauya Ielusalema weaqina

11:1-15:47 Ieisu ena wiki 'ebel'ovoa Ielusalema 'inaya

16:1-8 Ieisu ena ya'itoto 'evivi 'aligega weaqina

16:9-20 Ieisu ena 'ifoqe tomotau matadia ta ena vaneqa mahalaya

### *Ioni Togivebabitaiso ena lugaihi*

(Madiu 3:1-12; Luke 3:1-18; Ioni 1:19-28)

<sup>1</sup> Ba'e Vale Aqiaqina ana 'ebeve'ale Ieisu Keliso weaqina, tauna Yaubada Natuna. <sup>2</sup> \* Lova Yaubada ena tovesimasimana Aisea Ieisu Valena madu'wayavia vonaya,

"Ba'e egu tovaletuyana  
yavetunei nugwenugweta weaqiu  
be 'eda naqadalia.

<sup>3</sup> \* Ta di'we 'ava'avaya  
bonana qiduanega vegabagaba, vonaya,  
'Kaiwabu ena 'eda ona qadalia  
ta ona givetuvetunuqia.' "

<sup>4</sup> \* 'Inega Ioni Togivebabitaiso 'ifoqe mai di'we 'ava'avana 'inaya ta lugaihi tomotau 'idia vonaya, "Emi ilivu luveifadi 'idiega ona nuagivila ta 'inega ena givebabitaisomi ta Yaubada emi ilivu diavona nanuataqodi." <sup>5</sup> Ta tomotau Ielusalemega ta wese di'we Iudia 'abaganavo 'idiega iva'auta imai Ioni ena gaihi sabi noqolina. Ta wese edi ilivu luveifadi isimana 'ifoqeyedi, e 'inega givebabitaisodi go'ila Iolidani 'inaya. <sup>6</sup> \* Ta Ioni ana kaleko yubai kameli vutuvutudiega, ta ana gadi'wana yubai 'wafidiega, ta ana 'abwagayavo wakifou be wese mu'awa. <sup>7</sup> \* Ta Ioni lugaihi vonaya, "Tauna 'abibodaguyega maimai veago va'inegu, 'inega ge daluaqiaqiegu be 'aqenaya ena iwa'odu ta ana 'aqeyafayafa ena li'ami. <sup>8</sup> Ya'a go'ilega yagigivebabitaisomi ta tauna Niboana Gwalagwalanega nagivebabitaisomi."

\* 1:2: Mal 3:1 \* 1:3: Ais 40:3 \* 1:4: Via 13:24; 19:4 \* 1:6: 2Kin 1:8; Md 11:8 \* 1:7: Via 13:25

*Iesu ena baibitaiso**(Madiu 3:13-14:11; Luke 3:21-22; 4:1-13)*

<sup>9</sup>Ta omo'e tutana 'inaya Iesu di'we Galili gamonaya 'abaga Nasaleta nokea ta mai go'ila Iolidani 'inaya, e 'inega Ioni Iesu givebabitaisoya. <sup>10</sup>Ta Iesu ni'au go'ilega fweula, 'inega 'ita vane mahala 'itea 'elalamia, ta Niboana Gwalagwalana ana 'ita kavona malasi webui mai 'inaya. <sup>11</sup>\* 'Inega taha bona mahalega vonaya, "O'a Natu aqiaqigu yaveloyubeu ta weaqiu yaqaiawa qiduana."

*Seitani Iesu sitonovia**(Madiu 4:1-11)*

<sup>12</sup>Ta tuta omo'e 'inaya Yaubada Niboanina Iesu luvetunea tauya di'we 'ava'ava 'inaya. <sup>13</sup>\* Ta 'aubena 40 omo'e 'inaya toatoa, ta 'aubena diavona 'idia Seitani Iesu sitonovia, ta di'we nana 'inaya wese yubai sasasadi itoatoa, ta Yaubada ena tovale'ewayavo Iesu i'itamakia.

*Tolu'iqana adi yau foa Iesu gabedi**(Madiu 4:12-22; Luke 4:14-15; 5:1-11)*

<sup>14</sup>\* Toluvine qiduana Elodi Anitifasi ena luvineyega Ioni ni'a ia'uluguyea vanue 'ebey-oqona 'inaya. 'Inega Iesu 'evivi tauya di'we Galili 'inaya ta Vale Aqiaqina Yaubada 'inega lugaihiea, <sup>15</sup>\* vonaya, "Tuta ni'a 'ifoqe, be Yaubada ena 'Ebeluvine ni'a mai di'wedaya. 'Inega emi luveifayavo 'idiega ona nuagivila ta Vale Aqiaqina ona vetumaqaneal!"

<sup>16</sup>'Inega taha tuta Iesu lavu Galili balabalanega luvivivila, 'inega 'oloto magilafudi Saimoni ma taina Anidulu 'itedi ta edi gomana ibwa'ubwa'uya, mana taudi tolu'iqana. <sup>17</sup>Ta Iesu gabedi vonaya, "Omai, ona 'abibodegu ta ena 'iva'ava'aimi 'inega omi'a tomotau ona 'onedi." <sup>18</sup>'Inega lukwayavonega edi gomana inogedi ta Iesu i'abibodea. <sup>19</sup>'Inega wese tufwana vanaqo ta Iemesa be Ioni, taudi Sebedi natunavo wagaya itoatoa ta edi gomana i'iva'ava'aidi. <sup>20</sup>Ta tuta nana Iesu 'itedi 'inega wese 'idewani gabedi, ta tamadi me ena tofewayavo wagaya inogedi ta Iesu i'abibodea.

*Iesu niboana luveifana 'wavini 'ifoqe taha 'oloto 'inega**(Luke 4:31-37)*

<sup>21</sup>Iesu ma ana to'abibodayavo imai 'abaga Kafaneumi 'inaya ta Sabatea vanue tafwaloloya Iesu lugu ta ve'ale ve'ita. <sup>22</sup>\* Ta tomotau qabudi nuadi voqana ena ve'ita weaqina, mana gebu luvine ana tove'itayavo edi ve'ita 'idewani, ta 'esi me ena luvine ta wese me ena waiwai veve'itedi. <sup>23</sup>Ta vanue tafwalolo nana 'inaya taha 'oloto toatoa, tauna niboana luveifana ni'a luguya, 'inega tuta ba'e 'inaya 'oloto nana Iesu gabea, <sup>24</sup>\* vonaya, "Iesu, o'a Nasaleta 'olotou, tola'ai weaqina umai 'imaya? Nuanuau vonigo una fofolima, waisa? Ta ni'a yahalamaniu, o'a Yaubada Natuna Gwalagwalau."

<sup>25</sup>Ta Iesu luvinea vonaya, "Eloveu! 'Oloto bena'e 'inega u'ifoqe mai!" <sup>26</sup>\* 'Inega niboana luveifana 'oloto nana luvededeli, ta me ena kolua 'oloto nana 'inega 'ifoqe.

<sup>27</sup>Ta tomotau qabudi nuadi voqana ta taudiega iveveqae ivonaya, "Ba'e ai ve'ita, mana yani vauvauna ka'itea! Ta 'oloto nana me ena luvine waiwaina, ta wese niboana luveifadi luvinedi ta ena vona ivematamatayagea." <sup>28</sup>\* Ta Iesu ena viaqa valena lukwayavonega yawala dadana di'we Galili 'abaganavo 'idia.

*Iesu tomotau qabudi giveaqiaqiedi**(Madiu 8:14-17; Luke 4:38-41)*

<sup>29</sup>Iesu ma ana to'abibodayavo vanue tafwaloloyega i'ifoqe, 'inega Saimoni ma taina Anidulu ediavo Iesu be Iemesa ta wese Ioni i'ebe'ewedi itauyedi edi vanuea. <sup>30</sup>Ta Saimoni lawana 'wafidi lu'wea'weava ta me edi vihiqa 'ivia i'eno'eno, 'inega Iesu ivematamagilafuyea tovevihiqa dina weaqidi. <sup>31</sup>'Inega Iesu lugu 'idia ta nimadia kafi ta

\* 1:11: Same 2:7; Ais 42:1; Md 12:18; Mk 9:7 \* 1:13: Same 91:11-13 \* 1:14: Mk 6:17 \* 1:15: Md 3:2 \* 1:22: Md 7:28-29 \* 1:24: Mk 5:7 \* 1:26: Mk 9:26 \* 1:28: Md 4:24

siveya'itotodi, ta vavine adi vihiqa awala. Ni'a iveaiaqi 'inega 'abwaga i'iva'ava'aia Ieisu ma enavo weaqidi. <sup>32</sup> Ni'au baba'au lia 'unuva 'inega tomotau edi toveviihiqayavo ta wese tomeqabu niboana luveifadi i'wahalidi maega imiedi Ieisu 'inaya. <sup>33</sup> Ta wese 'abaga nana ana totoayavo qabudi iva'auta imai vanue nana masu'edaninaya. <sup>34</sup> \* Ta Ieisu tomotau mali vihiqa be mali vihiqa 'idiega giveaiaqiedi. Ta wese niboana luveifadi 'wavinidi i'ifoqe ta awatayedi ge ina vevonavonayei, mana ni'a ialamania tauna Yaubada Natuna.

*Ieisu Galili 'abaganavo 'idia lugaihi*  
(*Luke 4:42-44*)

<sup>35</sup> \* 'Awa'awai otaqa matavelovelovanaya Ieisu ya'itoto ta ana 'aidega vanuega 'ifoqe, ta tauya taha di'we tomotau geqanaya sabi venoqi. <sup>36</sup> 'Inega Saimoni ma enavo wese iwebui, ta Ieisu isalia. <sup>37</sup> Ta tuta nana ilobea ivoneaya, "Tomotau qabudi isalisaliu!"

<sup>38</sup> Ta Ieisu vonedia, "Kana tauya vaina 'abaga di'wedaya, ta 'idia ena lugaihi, mana tauna fewana weaqina yamai." <sup>39</sup> \* 'Inega Ieisu tauya Galili 'abaganavo 'idia ta edi vanue tafwalolo 'idia lugaihi ta wese niboana luveifadi 'wavinidi i'ifoqe.

*Ieisu 'oloto 'wago'wagoina giveaiaqiea*  
(*Madiu 8:1-4; Luke 5:12-16*)

<sup>40</sup> Taha 'oloto 'wago'wagoina mai Ieisu 'inaya ta tuqatuqanega sobadi ta venoqi vonaya, "Eguma nuanuau una giveaiaqiege, mana o'a au fata."

<sup>41</sup> 'Inega Ieisu nuakolokoloyea ta nimana si'otoia ta 'oloto nana 'wafina gitonovia ta vonaya, "Ao eu nuanua ena viaqia, uvevunavunaqa ta uveaiaqi!" <sup>42</sup> Ta 'oloto nana ana 'wagota lukwayavonega 'evutuqia ta veaiaqi. <sup>43</sup> Ta Ieisu 'oloto nana luvetunea natauya ta wese luvine waiwaina neia vonaya, <sup>44</sup> \* "Ge taha toga 'inaya una vesimasimanegu, ta 'esi tunutunuqina una tauya toveguba 'inaya ta tau'u una ve'itayeu. 'Inega toveguba nana na'iteu na'awahaqiaqieu, ta wese mali tomotau ina alamania ni'a uveaiaqi. Ta wese eu guba una 'ewea be una vegubayea Yaubada 'inaya, lova 'idewani ada luvine Mosese 'inega."

<sup>45</sup> Ta 'oloto nana Ieisu ena luvine ge da'abibodei, ta 'esi tomotau qabudi 'idia vesimasimanea. Ba'e 'iuna 'inega Ieisu ge ana fata davasimasimatala 'abaga diavona 'idia, ta 'inega tauya di'we tomotau geqana 'idia. Ta tua nawale tomotau imaimai 'inaya 'abaga taha taha 'idiega.

## 2

*Ieisu 'oloto belubeluna giveaiaqiea*  
(*Madiu 9:1-8; Luke 5:17-26*)

<sup>1</sup> 'Aubena vaina gumwala 'inega Ieisu 'evivi mai Kafaneumi 'inaya. Ta valena tomotau ni'a inoqolia vanuea toatoa. <sup>2</sup> 'Inega tomotau qabudi iva'auta vanue nana gamonaya ta wese masu'edaninaya, ta Ieisu Yaubada ena vona lugaihiea 'idia. <sup>3</sup> Ta 'abaga nana 'inaya taha 'oloto toatoa du'una qabudi belubeluna, ta enavo adi yau foa i'avalei imiea Ieisu 'inaya. <sup>4</sup> Ta ge adi fata iadi ida luguyei mana qabu qidua va'inedi vanue nana iluveagatuna'ia. 'Inega i'avalei ivaneqea vanue debanaya 'abo 'ubu iqa'uya ta ma 'ivina wayoyega ivekalilia webui Ieisu 'iawanaya. <sup>5</sup> Ta Ieisu to'avala dina edi vetumaqana 'itea, 'inega 'oloto belubelu nana 'inaya vonaya, "Natugu, eu luveifayavo ni'a yanuataqodi!"

<sup>6</sup> Ta vaina luvine ana tove'itayavo Ieisu di'wenaya itoatoa ena vona inoqolia ta taudiega ivetala'aiedi ivonaya, <sup>7</sup> "Ma'oda ba'e 'oloto nana vonavona 'aiqa? Vonahaqiaqi, taunega givaneyea kavona Yaubada 'idewani. Mana Yaubada ana 'aidega otaqa ana fata luveifana nanuataqodi."

<sup>8</sup> Ta Ieisu nuanega edi nuanua ni'a alamania 'inega vonedi vonaya, "Tola'ai weaqina bena'e 'idewani onuanua 'aiqa? <sup>9</sup> Ta isana ma'oda ena vona 'aiqa 'oloto belubeluna ba'e 'inaya? Nage ena vonaya, 'Eu ilivu luveifana ni'au yanuataqodi', nage ena vonaya,

\* 1:34: Mk 3:10-12 \* 1:35: Md 14:23; Mk 6:46 \* 1:39: Md 4:23; 9:35 \* 1:44: Luvu 14:1-32



'Uya'itoto, eu 'ebana u'avaleta utauya?' <sup>10</sup> Ta nuanuagu ona alamaniana ya'a Tomotau Natuna me egu luvine waiwaina bwa'obwa'oya, 'inega luaqiaqiegu be tomotau edi ilivu luveifana ena nuataqodi." 'Inega Iesu belubelu nana vonea vonaya, <sup>11</sup> "Yavoneu, uya'itoto eu 'ebana u'avalei ta utauya eu 'abagaya."

<sup>12</sup> 'Inega ya'itoto ta ena 'ebana 'ewei, ta qabu matadiega 'ifoqe tauya. E omo'e 'inaya tomotau qabudi nuadi voqana ta Yaubada iawatuboya ivonaya, "Lova ba'e yanina ge taha tuta kada 'itea."

*Iesu Libai gabea*

*(Madiu 9:9-13; Luke 5:27-32)*

<sup>13</sup> 'Inega Iesu 'evivi lavu Galili 'inaya, ta balabalaya toatoa. E 'inega tomotau qabudi imai 'inaya ta itoa vivilia, 'inega ve'ale ve'itedi. <sup>14</sup> Ve'itedi gumwala 'inega tautauya, ta taha takesi ana to'ewa 'itea vanue 'ebefewa 'inaya toatoa. Ana wawa Libai, tauna Alifio natuna, ta Iesu voneaya, "Umai u'abibodegu!" 'Inega Libai ya'itoto ta Iesu 'abibodea.

<sup>15</sup> Ta tuta nana Iesu ma ana to'abibodayavo ilugu Libai ena vanuea sabi 'ai, 'inega takesi ana to'ewayavo 'eala be wese toveilivu veifa maega itoabui ta i'ai, mana ba'e tomotau diavona qabudi Iesu i'abibodea. <sup>16</sup> \* 'Inega Falisi taudi luvine ana tove'itayavo Iesu i'itea, 'inega ana to'abibodayavo ivetala'aiedi ivonaya, "Tola'ai weaqina emi tove'ita takesi ana to'ewayavo be wese toluveifadi maega i'ai'ai?"

<sup>17</sup> Ta Iesu edi vona ba'e noqolia 'inega vonedi vonaya, "Taudi aqiaqidi ge nuanuadi togiveaqiaqi, ta 'esi tovevhiqa nuanuadi togiveaqiaqi. Ya'a ge eda mai tunutunuqidi weaqidi ta 'esi yamai toluveifadi sabi iuladi."

*Vedede ana vetala'ai weaqina*

*(Madiu 9:14-17; Luke 5:33-39)*

<sup>18</sup> Ioni Togivebabitaiso ana to'abibodayavo ta wese Falisiavo vaina tuta ivedede edi tafwalolo weaqina. 'Inega vaina tomotau imai Iesu 'inaya ta ivetala'aiea ivonaya, "Tola'ai weaqina o'a au to'abibodayavo ge ida vedede, mana Ioni ana to'abibodayavo ta wese Falisiavo adi to'abibodayavo ivevedede?"

<sup>19</sup> 'Inega Iesu vona sesebaiega vonedi vonaya, "Tola'ai ana aqiaqi 'eguma vaqi ana toyo'oyavo ina vedede tuta nana tovaqi me'olotona maega itoatoa? Ge taha wese ana aqiaqi! Mana tauna ma enavo qabudi ina qaiawa. <sup>20</sup> Ta nawale tuta maimai 'inaya tovaqi nana ina kafia be ina tauyea, 'inega enavo me edi nuavita ina vedede."

<sup>21</sup> Ta wese vona sesebaiega vonedi vonaya, "Ge ana fata be kaleko vauvauna matavusinega kaleko 'itu'ituwaina kana bwabwadei. Ge daluaqiaqiea, mana nawale kana 'utuya 'inega bwabwada vauvauna nabwagogoma, ta kaleko 'itu'ituwainana ena eabu nagive'ena'ia. <sup>22</sup> Ta wese ge taha toga 'oine vauvauna naiwaqa ukamaneige wage 'itu'ituwaina yubai 'wafidiega 'inaya, mana nawale nanabahabuya, e 'inega 'oine nana ta wese wage nana ina luveifa. Ta 'esi luaqiaqiea be 'oine vauvauna kana iwaqia wage vauvauna yubai 'wafidiega gamonaya."

*Iesu tauna Sabate ana Kaiwabu*

*(Madiu 12:1-8; Luke 6:1-5)*

<sup>23</sup> Sabate taha 'inaya Iesu ma ana to'abibodayavo vaoqa gamonega itautauya ta witi vuaqina ma walona i'egigoluya ta i'ai'ai. <sup>24</sup> \* Ta Falisi i'itedi 'inega Iesu ivonea ivonaya, "Tola'ai weaqina au to'abibodayavo ifewafewa ta Sabate ana luvine iludewa kavokavoyei?"

<sup>25</sup> \* 'Inega Iesu ve'iedi vonaya, "Nage ge oda avoi Buki Nugwenugweina 'inaya tola'ai Deibida ma enavo iviaqia tuta nana botana gegoyo ilutonovia? <sup>26</sup> \* Yaubada ena vanuea lugu ta beledi gwalagwalana 'ewei 'abo 'ai. Ta beledi nana ma ana luvine toveguba dimo adi luaqiaqi be ina 'ainia. Ta tua mana ibotana, 'inega Deibida beledi nana 'ewei ta wese

\* 2:16: Md 11:19 \* 2:24: Luve 23:25 \* 2:25: 1Sam 21:1-6 \* 2:26: Luvi 24:5-9

enavo neidi 'abo i'ai. Ta ba'e yani nana iviaqia lova toveguba edi tovanugweta Abiata ena tutaya."

<sup>27</sup>\* 'Inega Iesu vonedi vonaya, "Yaubada Sabate viaqia tomotau weaqidi, ta tomotau ge daviaqidi Sabate weaqina. <sup>28</sup> Ta yavona aqiaqiemi, ya'a Tomotau Natuna yani qabuna yaluviluvinedi, ta wese ya'a Sabate ana Kaiwabu."

### 3

*Iesu 'oloto nimana belubeluna giveaiaqiea*

*(Madiu 12:9-14; Luke 6:6-11)*

<sup>1</sup> Ta 'inega wese Iesu 'evivi mai vanue tafwalolo 'inaya, ta 'oloto taha nimana belubeluna 'itea toatoa. <sup>2</sup> Ta Falisi vaina Iesu ivevekovea 'eguma ba'e 'oloto nana nagiveaiaqiea Sabatea, be 'inega ina ve'ewei ta ina kafia. <sup>3</sup> 'Inega Iesu 'oloto nana vonea vonaya, "Umali ba'idia, ta tomotau matadia utovololo!"

<sup>4</sup>\* 'Inega Iesu Falisi vetala'aiedi vonaya, "Toyani luaqiaqieda be kana viaqi Sabatea? Nage yani aqiaqina kana viaqi, nage luveifana kana viaqi? Nage tomotau kana 'etoyavuidi, nage kana luve'aligidi?" Ta Iesu ena vona ba'e ge ida ve'iea.

<sup>5</sup> 'Inega Iesu me ena gamosoala 'ita givila ta 'ita makimakidi, ta wese nuana vita edi vedeba 'i'wana weaqina. 'Inega 'oloto nana voneaya, "Nimau usi'otoi!" 'Inega nimana si'otoia ta veaqiaqi 'evivi. <sup>6</sup>\* 'Inega Falisiavo i'ifoqe itauya toluvine qiduana Elodi ena tomotauyavo 'idia, ta adi 'aidega idima govaqa ma'oda Iesu ina luve'aliga 'aipei.

*Tomotau qabudi iva'auta lavu Galili 'inaya*

<sup>7</sup> 'Inega Iesu nogedi ta ma ana to'abibodayavo itauya lavu 'inaya, ta qabu qiduana Galili 'inega itala'obea. <sup>8</sup> Ta wese vaina qabu Iesu ena viaqayavo valena inoqolia, 'inega Iudia be, Ielusalema be, Idumea be Iolidani di'wenavo 'idiega ta wese Taia be Saidoni 'abaganavo 'idiega iva'auta imai. <sup>9-10</sup>\* Ta Iesu ana to'abibodayavo vonedi waga taha goyona ina miea weaqina, mana tovevhiqa qabudi ni'a giveaiaqiedi, 'inega wese vaidi tovevhiqa ivevetunuefaefala nuanuadi Iesu ina gitonovia. <sup>11</sup>\* Ta tuta nana tomotau diavona niboana luveifadi ni'au i'wahalidi Iesu i'itea 'inega matanaya igivelukabwebwe ta ikolua ivonaya, "O'a Yaubada Natuna."

<sup>12</sup>\* 'Inega Iesu niboana luveifadi luvine waiwaina neidi vonaya, "Ge tomotau 'idia ona vevonavonayegu ya'a togama!"

*Iesu ena tovaletuyana adi yau Tuwelo venua'ivinedi*

*(Madiu 10:1-4; Luke 6:12-16)*

<sup>13-14</sup> Ta 'abibodanaya Iesu 'watovu taha bwanaga 'inaya, ta ena nuenuaga tomotau gabedi ta imai 'inaya. Ta tomotau diavona 'idiega Iesu 'oloto adi yau tuwelo venua'ivinedi, ta vonedi vonaya, "Omi'a tuwelo mina yavenua'ivinemi egu tovaletuyanayavo, ta omi'a be ya'a maega kana toa, ta 'abiboda ena vetunemi tomotau 'idia ona lugaihi. <sup>15</sup> Ta egu waiwai ena neimi 'inega ami fata niboana luveifadi tomotau 'idiega ona 'wavinidi ina 'ifoqe." <sup>16</sup>\* Tuwelo diavona adi wawayavo ba'e: Saimoni (tauna Iesu gabea Fita), <sup>17</sup>\* ta wese Iemesa ma taina Ioni, taudi Sebedi natunavo ta Iesu gabedi Bonagesi (ta wawa nana ana alamani yavalata natunavo), <sup>18</sup> ta wese Anidulu be, Filifi be, Batolomio be, Madiu be, Tomasi ta wese taha Iemesa, tauna Alifio natuna, ta wese Tadiasi be, Saimoni tauna Seloti edi qabu gamonega, <sup>19</sup> ta wese Iudasa Isakaliota, tauna Iesu ana tosoluva.

*Iesu ta Belisibubi*

*(Madiu 12:22-32; Luke 11:14-23; 12:10)*

<sup>20</sup> 'Inega Iesu 'evivi mai ena 'abagaya, ta qabu qiduana iva'auta 'inaya, e 'inega ge ana fata ma ana to'abibodayavo ida 'ai. <sup>21</sup> Ta tuta nana Iesu ena susuyavo valena inoqolia

\* 2:27: Luve 5:14 \* 3:4: Lk 14:3 \* 3:6: Md 22:15-16 \* 3:9-10: Md 14:36 \* 3:11: Lk 4:41 \* 3:12: Mk 1:34 \* 3:16: Ion 1:42 \* 3:17: Lk 9:54

ena fewa 'inega ge daveyawaia, 'inega imai sabi 'ebe'ewana ta taudiega ivonaya, "Ni'au vekwavakwava."

<sup>22</sup>\* Ta luvine ana tove'itayavo Ielusalemega iwebui mai ivonaya, "Belisibubi tauna ni-boana luveifadi adi tovanugweta. Ta Belisibubi nana ni'a Ieisu luguya, ta ena waiwaiega ni-boana luveifadi 'wavi'wavi 'ifoqeyedi."

<sup>23</sup>'Inega Ieisu tomotau qabudi gabedi imai ta vona sesebaiega vonedi vonaya, "Seitani ge ana fata Seitani na'wavi 'ifoqeyei." <sup>24</sup>Ta wese vonaya, "Eguma 'ebeluvine taha 'inaya tomotau ina vetoatoasi'i, 'inega nawale 'ebeluvine nana nadawalili ta nabe'u. <sup>25</sup>Ta wese 'eguma susu taha nuanidia vetoatoasi'i na'ifoqe e nawale edi toa naluveifa otaqa. <sup>26</sup>Seitani wese 'idewana, 'eguma ma enavo taudiega ina vedavi 'inega edi toa naluveifa ta wese ena 'ebeluvine nahawala."

<sup>27</sup>Wese vona sesebaiega Ieisu vonedi vonaya, "Vonahaqiaqi, ge taha toga ana fata taha 'oloto waiwaina ena vanuea nalugu ta ena kulufa navanawalidi. Ta 'eguma tovanawala taha nuanuana nalugu, e 'inega nugweta tovewaiwai nana nimana be wese 'aqena nayoqonidi, 'inega ana fata vanue nana 'inaya nalugu ta kulufa qabuna navanawalidi. <sup>28</sup>Ta yavona aqiaqiemi, tomotau edi luveifana ta wese edi vona veifa qabuna Yaubada nanuataqodi, <sup>29</sup>ta 'eguma taha toga Niboana Gwalagwalana na'awaluveifea 'inega Yaubada ge ana fata tomotau nana nanuataqoi, ta 'esi ena luveifana na'eno vataya."

<sup>30</sup>Ba'e 'idewana Ieisu vona 'aiqa mana luvine ana tove'itayavo ivonaya, "Niboana luveifana ni'a lugu Ieisu 'inaya, e 'inega ena waiwaiega fewafewa."

*Ieisu inana ta tainavo imai 'inaya*

*(Madiu 12:46-50; Luke 8:19-21)*

<sup>31</sup>\* 'Inega Ieisu inana ta wese tainavo imai ta vanue masu'edaninaya itovolo, 'inega vale ivetunei 'inaya be vanuega na'ifoqe mai ina veqae. <sup>32</sup>Ta tomotau qabudi Ieisu itoa vivilia vale nana inoqolia 'inega ivoneaya, "Tove'ita, inau be taimwavo isalisaliu."

<sup>33</sup>'Inega Ieisu vonedi vonaya, "Togama inagu ta tomeqabu taigwavo?"

<sup>34</sup>'Inega Ieisu qabu dina itoa vivilia 'ita makimakidi ta vonedi vonaya, "Omi'a taumi inagwavo ta taigwavo. <sup>35</sup>Mana tomeqabu Tamagu ena nuanua i'abi'abibodea e taudi taigwavo be, novugwavo ta wese inagwavo."

#### 4

*Vona sesebai vewana ana toveyavula weaqina*

*(Madiu 13:1-9; Luke 8:4-8)*

<sup>1</sup>\* Ieisu 'evivi mai lavu Galili balabalanaya ta wese ve'ale ve'ita. Ta tomotau qabudi iva'auta imai 'inaya, e 'inega Ieisu wagaya gelu ta tufwana talatete, ta tomotau qabudi nawale balabalaya itovotovolo. <sup>2</sup>\* Ta Ieisu qabu dina vona sesebai 'inega yani 'eala weaqidi ve'itedi, ta ve'ita diavona 'idiega taha yani weaqina vonedi vonaya, <sup>3</sup>"Ovineneqa! Toveyavula taha tauya ena vaoqaya witi vewanina sabi veyavulina. <sup>4</sup>Ta tuta nana veyavuledi 'inega vaina vewana iavuta 'edabalaya, ta manuqa i'itedi iwebui ta i'ai 'ovoidi. <sup>5</sup>Ta vaina iavuta bwa'o dabodabona 'inaya, ta 'inega itabo kwayavona mana bwa'obwa'o yalalayana. <sup>6</sup>Ta tuta nana baba'au vanemai 'inega guvekwavuqidi, mana kwalamidi ge ida webui bwa'obwa'o gamonaya. <sup>7</sup>Ta wese vaina vewana talitali gamonaya iavuta ta maega itabo vefofo, 'inega witi ge adi fata ida vuaqa, mana talitali nana vewaiwai ta fai ve'aligidi. <sup>8</sup>Ta vaina vewana bwa'obwa'o aqiaqinaya iavuta itabo ta ivuaqa, 'inega vewana diavona 'idiega vaina ivuaqa 30 'idewani, ta vaina 60, ta wese vaina 100."

<sup>9</sup>'Inega Ieisu vonedi, "Eguma ma teniqami vona ba'e ona noqolia."

*Vona sesebai ena 'ifoqe 'iuna*

*(Madiu 13:10-17; Luke 8:9-10)*

\* 3:22: Md 9:34; 10:25    \* 3:31: Mk 6:3; Ion 2:12; Via 1:14    \* 4:1: Mk 3:7-9; Lk 5:1-3    \* 4:2: Md 13:34; Mk 4:33-34

<sup>10</sup> Ta ena ve'ita nana 'abibodanaya Iesu ana 'aidega toatoa, 'inega Tuwelo dina ta wese vaina tomotau maega iva'auta Iesu 'inaya ta ivetala'aiea vona sesebai adi alamani weaqina. <sup>11</sup> Ta Iesu vonaya, "Omi'a Yaubada ena 'Ebeluvine gamona ana alamani aqiaqi ni'au neimi. Ta tomotau qabudi gebu, 'inega yani qabuna vona sesebaiega yavonevoned, <sup>12</sup>\* ta lova tovesimasimana Aisea ba'e qabu diavona weaqidi madusimana vonaya,

'Egu vona inoqonoqolia  
ta nuadi ge da'eqa'ui,  
ta wese egu viaqayavo i'ite'itedi  
ta ana alamani ge ida lobei.

Mana 'eguma ida alamaniana  
'inega edi luveifayavo 'idiega  
ida nuagivila be  
'inega Yaubada danuataqodi.' "

*Toveyavula vona sesebaina ana alamani weaqina*  
(Madiu 13:18-23; Luke 8:11-15)

<sup>13</sup> 'Inega Iesu vetala'aiedi vonaya, "Nage egu vona sesebai ba'e ge oda nua'eqa'ui? Be ma'oda 'inega vona sesebai gabudi ona alamani 'aiqedi? <sup>14</sup> Ta ena givesimatalia 'imia, e ba'e: Tovaoga nana tauna Yaubada ena vona ana toveyavula. <sup>15</sup> Vaina tomotau Yaubada ena vona inoqolia, 'inega Seitani mai ta 'idiega vona diavona 'ewa yavuledi, mana ba'e tomotau diavona kavona vewani dina iavuta 'edabala 'inaya. <sup>16-17</sup> Ta vaina tomotau Yaubada ena vona inoqolia, ta me edi qaiawa iawafeledi Vale nana 'inaya. Ta vona diavona ge dalugu aqiaqi 'idia, 'inega tuta kukusana namo 'idia 'enova, mana tuta nana vita nage vevoalana ina lobeia vona diavona weaqina, e 'inega edi vetumaqana lukwayavonega ina nokea, mana ba'e tomotau diavona kavona vewani dina iavuta bwa'obwa'o yalalayana 'inaya. <sup>18</sup> Ta vaina tomotau Yaubada ena vona inoqolia, <sup>19</sup>\* ta kulufa kaikaiwabudi be wese bwa'obwa'o ana nuanuayavo nuadi 'ewea ta vona diavona inuafania 'inega ge adi fata ina vuaqa, mana ba'e tomotau diavona kavona vewana talitali gamonaya iavuta. <sup>20</sup> Ta 'esi vaina tomotau Yaubada ena vona inoqolia ta i'awahaqiaqia, 'inega vaina ivuaqa 30 'idewani, ta vaina 60, ta wese vaina 100, mana taudi kavona vewana diavona iavuta bwa'obwa'o aqiaqina 'inaya."

*Vona sesebai lamufa weaqina*  
(Luke 8:16-18)

<sup>21</sup>\* Ta Iesu wese vonedi vonaya, "Lamufa kana gabuya, ta gebu 'ulenega kana talakabubui nage 'ivi 'ayanaya kana a'ukwaivei. Ta 'esi luaqiaqia kana a'uvaneqea 'ebea'u debanaya be 'inega vanue gamona nasimatala. <sup>22</sup>\* Yani qabuna 'wai'waividi nawale ina 'ifoqe vunavunaqaya. Ta wese yani qabuna bwabwahadi nawale ina 'ifoqe 'atamanaya. <sup>23</sup> 'Eguma ma teniqami vona ba'e ona noqolia!"

<sup>24</sup>\* Ta wese vonedia, "Tola'ai ni'a onoqolia ona nuave'avina aqiaqia. Ta 'eguma Yaubada ena vona ona noqola aqiaqia, e 'inega Yaubada ena vona ona alamaniana, ta ba'e alamani nana nagiveqiduea. <sup>25</sup>\* Mana 'eguma taha toga ena alamani qiduana Yaubada ena vona weaqina, e nawale Yaubada wese nagiveqiduea 'inaya. Ta 'eguma taha toga Yaubada ena vona ge nanoqola aqiaqia, e nawale ena alamani goyona wese Yaubada na'ewa yavulea 'inega."

*Vona sesebai vewana tabotabona weaqina*

<sup>26</sup> 'Inega Iesu vonedi vonaya, "Yaubada ena 'Ebeluvine kavonaya taha 'oloto witi vewanina veyavuledi talaqaya. <sup>27</sup> Ta mali fewa be mali fewa vesitaqoya 'inega 'evisa 'aubena 'abibodanaya vewana diavona 'itedi ni'a i'elutabo, ta 'oloto nana ge taha yani daviaqia edi tabo weaqina, ta tua taudiega itabotabo, <sup>28</sup> mana bwa'obwa'o taunega

\* 4:12: Ais 6:9-10; Via 28:26-27 \* 4:19: Md 19:23-24 \* 4:21: Md 5:15; Lk 11:33 \* 4:22: Md 10:26; Lk 12:2

\* 4:24: Md 7:2 \* 4:25: Md 13:12; 25:29; Lk 19:26

witi nana vevevuaqia. Nugweta tolobwana naha'uya, ta 'abiboda lovena nasiveyavula, be 'ebeluo'ova witi walona naludiditanaha. <sup>29</sup> \* Ta tuta nana witi na'wauqia 'inega 'oloto nana ena naifiega nabolimanidi, mana bolimana ana tuta ni'a 'ifoqe."

*Vewana goyona ena veago vona sesebaina*  
(Madiu 13:31-32,34; Luke 13:18-19)

<sup>30</sup> Ieisu wese vonedi vonaya, "Ma'oda 'inega Yaubada ena 'Ebeluvine ena givesimatala 'aiqei 'imia? <sup>31</sup> Nage ba'e 'idewana ena vetalatutula 'aiqea: Yaubada ena 'Ebeluvine kavona te'wa vewanina, mana vewani nana yani goyona. <sup>32</sup> Ta 'eguma kana 'wadia e 'abiboda natabo ta yani qabuna vaoqaya itabotabo naveqidua va'inedi. Ta wese nalaqa, 'inega manu ina va'auta ta ina nevuqa 'inaya."

*Ieisu tomotau tuta qabuna vona sesebaiega ve'itedi*

<sup>33</sup> Ieisu ena lugaihi tomotau 'idia tuta qabuna vona sesebai 'inega veve'itedi. Ta Ieisu edi alamani ana fata 'inega veve'itedi. <sup>34</sup> Vonahaqiaqi, ge taha tuta mali ve'ita 'inega dave'itedi. Ta 'abiboda 'eguma Ieisu ma ana to'abibodayavo adi 'aidega itoatoa 'inega vona sesebai qabuna gigivesimatalia 'idia.

*Ieisu yaqina be nufula givedaumwalia*  
(Madiu 8:23-27; Luke 8:22-25)

<sup>35</sup> Ta ni'a velavilaviea 'inega Ieisu wagega ena lugaihi lu'ovoia, ta ana to'abibodayavo vonedi vonaya, "Omai ogelu, kana vaukamana lavu di'wenaya." <sup>36</sup> 'Inega igelu ta tomotau qabudi balabalaya inogedi, ta wese vaina tomotau me edi waga maega itauya. <sup>37</sup> 'Inega yaqina waiwaina ve'ale, ta nufula qidwana waga gamonaya goi 'ebo'ebodea, 'abo tuta goyona ida damana. <sup>38</sup> Ta Ieisu waga yiqunaya ana kunukana ni'a a'ui ta 'eno motaiva. 'Inega to'abiboda dina idivanoya ivoneaya, "Kaiwabu, nage ge uda nuanua weaqida, mana tuta goyona kana damana!"

<sup>39</sup> 'Inega Ieisu tovolu ta yaqina be nufula lugwaeyedi vonaya, "Elovemi!" Tuata yaqina be nufula 'egwaedi ta daumwala 'ifoqe.

<sup>40</sup> 'Inega ana to'abibodayavo vonedi vonaya, "Tola'ai weaqina omwanimwaniniva? Ana 'ita nawale ge oda vetumaqanegu?"

<sup>41</sup> Ta to'abiboda dina imwaniniva qidwana ta taudi 'idia ivonaya, "To'oloto ba'ena, mana yani qabuna ena vona imatayagea, ta wese yaqina be nufula bonana ivematamatayagea?"

## 5

*Ieisu niboana luveifadi 'wavi 'ifoqeyedi*  
(Madiu 8:28-34; Luke 8:26-39)

<sup>1</sup> 'Inega Ieisu ma ana to'abibodayavo lavu mali di'wenega ivaukamana ta me Gelasine edi di'we 'inaya ilugu. <sup>2</sup> Ta omo'e 'inaya taha 'oloto niboana luveifadi ni'a i'wahalia deba'unuya toatoa. Ta tuta nana Ieisu wagega webui, 'inega 'oloto nana deba'unuyega 'ifoqe mai 'inaya. <sup>3</sup> Tomotau tuta qabuna 'aqena be nimana seniega iyoqoyoqonidi, <sup>4</sup> ta tua 'eluhufeufedi, 'inega ge taha toga ana fata nakafia be nayoqona 'eviviei. <sup>5</sup> 'Aubena wese velovelovana 'idia yabayaba bwanagaya ta wese deba'unuya ta tuta qabuna vevekolukolua ta ginausega taunega luluda'ea.

<sup>6</sup> Ieisu nawale luluvaiega maimai 'inega 'oloto nana 'ita naqo 'itea. 'Inega vihila tauya ta Ieisu 'iawanaya tuqatuqanega sobadi ta iwa'odu. <sup>7-8</sup> \* 'Inega Ieisu vonea vonaya, "Niboana luveifau, 'oloto ba'e 'inega u'ifoqe!" Ta niboana luveifana bonana qiduanega vonaya, "Ei Ieisu, o'a Yaubada Toatoa Vanena Natuna, tola'ai nuanuau una viaqi 'iguya? Ta Yaubada ana wawega una vona fofofola 'iguya gebu una luvematasabugu."

<sup>9</sup> 'Inega Ieisu niboana luveifana vetala'aiea vonaya, "Ma'oda au wawa?"

\* 4:29: Ioe 3:13; Ve 14:15      \* 5:7-8: Mk 1:24

E tauna vonaya, “Agu wawa 'Ea'ealima, mana 'oloto ba'e gamonaya qabuma atoatoa.  
<sup>10</sup> Ta wese avevenoqieu ge una 'wavi 'ifoqeyema ba'e di'we nana 'inega.”

<sup>11</sup> Ta omo'e bwanaga lilivanaya bawe qabudi iduaduala. <sup>12</sup> 'Inega niboana luveifa dina inoqi Ieisu 'inaya ivonaya, “Una vetunema be ana lugu omo'e bawe 'idia!” <sup>13</sup> 'Inega Ieisu awafeledi ta niboani dina 'oloto nana 'inega i'ifoqe, e bawe 'idia ilugu. 'Inega bawe dina qabudi ivihila itauya ta dabega ibe'u iwebui lavuya idamana. Ta bawe dina adi yau 'idewani 2,000.

<sup>14</sup> Ta bawe adi to'itamakiavo idena itauya 'abaga qiduquadi be goyogoyodi 'idia, ta tola'ai ni'a i'itea isimana 'ifoqe tomotau qabudi 'idia. 'Inega totoa 'abaga dina imai nuanuadi matadiega ina 'itea tola'ai 'ifoqe. <sup>15</sup> Imai Ieisu 'inaya ta 'oloto nana lova niboana luveluveifadi iluvekwavea i'itea ta imwaniniva, mana aqiaqina toatoa ta ni'a vekaleko, be wese 'unu'ununa veaqiaqi. <sup>16</sup> 'Inega taudi yani qabuna ni'a i'itea matadiega e isimana tomotau 'idia ma'oda 'oloto nana veaqiaqi 'aiqa, ta wese bawe weaqidi isimana ma'oda iveilaqe 'aiqa. <sup>17</sup> 'Inega totoa 'abaga Ieisu ivonea ivonaya, “Nuanuama una tauya ta ema 'abaga una nogea!”

<sup>18</sup> Tutana Ieisu wagaya gelu, 'inega 'oloto nana lova niboana i'wahalia mai Ieisu 'inaya venoqiea vonaya, “Kaiwabu, ya'a nuanuagu o'a maega kana tauya.”

<sup>19</sup> 'Inega Ieisu voneaya, “Ge ana fata, ta 'esi una 'evivi una tauya eu gadeavo 'idia. Ta ma'oda Yaubada ena nuakolokoloyega giveaqiaqi 'aiqeu una simanea 'idia, ta ina noqolia.” <sup>20</sup> 'Inega 'oloto nana tauya Dikafoli 'abaganavo 'idia ta Ieisu ena viaqa waiwaina tauna 'inaya weaqina simanayea, e tomotau qabudi inoqolia 'inega nuadi voqana.

*Ieisu vivine magilafudi giveaqiaqiedi*  
 (Madiu 9:18-26; Luke 8:40-56)

<sup>21</sup> Ta Ieisu ma ana to'abibodayavo ivaukamana 'evivi lavu Galili di'wenaya. Omo'e 'inaya qabu qiduadi iva'auta balabalaya ta Ieisu itoa vivilia. <sup>22</sup> 'Inega taha 'oloto ana wawa Yailo, tauna vanue tafwalolo ana tovanugweta, mai Ieisu 'inaya ta 'iawanaya iwa'odu, <sup>23</sup> ta noqinoqi waiwai vonaya, “Kaiwabu, natugu mevavinena goyona nawale yawaina nagumwala, 'inega nuanuagu una mai ta nimauyega una gitonovia 'inega naveaqiaqi be mayawaina natoatoa.”

<sup>24</sup> 'Inega Ieisu ya'itoto ta toluvine nana maega itutuvila itauya, ta tomotau qabudi i'abi'abibodea ta ivevetunuefala 'eday. <sup>25</sup> Ta qabu diavona gamodia taha vavine ma ana vihiqa sulalina inoinoqa ya'wala tuwelo 'idia, ta nawale inoinoqa ge dalua'u. <sup>26</sup> Tuta qabuna tauya togweli qabudi 'idia, ta ena kulufa 'idia vegumwalia ta ge daveaqiaqi, ta 'esi ana vihiqa ve'ena'i. <sup>27-28</sup> Tutana vavine nana Ieisu valena noqolia qabu maega itautauya, 'inega vavine nana Ieisu 'abibodanega maimai ta ena nuanua gamonaya vonaya, “Eguma Ieisu ana kwakwalufai ena gitonoviamo 'inega ena veaqiaqi.” 'Inega mai Ieisu gwavunaya ta ana kwakwalufai gitonovia. <sup>29</sup> Ta tuta nana gitonovia 'inega sulalina yafaha kwayavonia ta lutonovia ni'a veaqiaqi.

<sup>30</sup> \* Ni'au Ieisu lutonovia ena waiwai 'ifoqe, 'inega tunugivila vetala'aiedi vonaya, “Togama gitonovigu?”

<sup>31</sup> 'Inega ana to'abibodayavo ivonaya, “Kaiwabu, tola'ai weaqina uvetala'ai togama au kaleko gitonovi, ta ge uda 'itedi tomotau qabudi ivatafutafufuda.”

<sup>32</sup> Ta Ieisu nawale 'ita givigivila tomotau nuanidia nuanuana na'itea togama gitonovi. <sup>33</sup> Ta vavine nana ni'a alamania tola'ai 'ifoqe 'inaya, 'inega mai Ieisu 'inaya ta 'aqenaya iwa'odu. Ta me ena mwaniniva tatava, ta yani qabuna weaqina simana aqiaqiea 'inaya.

<sup>34</sup> \* Ta Ieisu vonaya, “Natugu, eu vetumaqana 'inega ni'a uveaqiaqi. Uya'itoto, ge una nuanua mana au vihiqa ni'a awala.”

<sup>35</sup> Ieisu nawale vonavona, 'inega Yailo tauna vanue tafwalolo ana tovanugweta ena vanuega vaina tomotau i'ifoqe imai ta ivoneaya, “Natuhu yawaina ni'a gumwala, 'inega Tove'ita ge una ve'aqe visiqi.”

\* 5:30: Lk 6:19 \* 5:34: Mk 10:52; Lk 7:50; 17:19

<sup>36</sup> Ta Ieisu wese valena noqolia ta Yailo vonea vonaya, “Ge giwaliu naha’ala, ta ’esi una vetumaqanamo.”

<sup>37</sup> Inega Ieisu qabu awatayedi ge ina tala’obei, ta to’abiboda toidi maega itautauya, taudi Fita be Iemesa ma taina Ioni. <sup>38</sup> Itautauya ta Yailo ena vanuea i’ifoqe inega to’ewabamu be wese todou bonadi ’ena’ina inoqolia. <sup>39</sup> Inega Ieisu lugu e vonedia, “Tola’ ai weaqina odoudou ta ovevekolukolua? Gwama ba’e ge da’aliga ta ’esi ’eno motaiva ’eno’eno.” <sup>40</sup> Ta todou Ieisu idagiea.

Inega Ieisu ’wavinidi i’ifoqe, ta gwama tamana be inana ta wese ana to’abibodayavo toidi Ieisu maega ilugu gwama ana ’ivia. <sup>41</sup> \* Ta Ieisu gwama nimanaya kafi e vonaya, “Talita koum!” (Ana alamani “Iodi uya’itoto!”) <sup>42</sup> Ba’e gwama nana ni’au ya’wala tuwelo lobe. Ta tuta nana Ieisu divanoya inega lukwayavonega tovololo ta yaba dadana. Tamana be inana ta wese ana to’abibodayavo nuadi voqana aqiaqi. <sup>43</sup> Inega Ieisu awatayedi vonaya, “Ge taha toga inaya ona simanayegu egu viaqa ba’e weaqina, ta ana ’abwaga ona neia na’ ai.”

## 6

### *Me Nasaleta Ieisu inogea*

(Madiu 13:53-58; Luke 4:16-30)

<sup>1</sup> Ieisu Yailo ena vanue nokea, inega ma ana to’abibodayavo itauya ena ’abagaya. <sup>2</sup> \* Omo’e inaya itoatoa ta ’aubena Sabate i’ifoqe. Inega lugu vanue tafwaloloya ta ve’ale ve’ita, e tomotau qabudi inoqolia nuadi voqana, inega ivonaya, “Oloto ba’e, to’edega ena alamani lobei ta wese ena viaqa waiwai ’ebenuavoqana tola’aiege ’ewei?” <sup>3</sup> Ta wese ivonaya, “Oloto ba’e, tauna to’eyoqona, waisa? Ta inana Meli be tainavo Iemesa be Iosefa be Iudasa ta wese Saimoni. Ta wese novunavo maega katoatoa, waisa?” Inega tomotau Ieisu inogea.

<sup>4</sup> \* Inega Ieisu vonedi vonaya, “Tovesimasimanayavo adi ’amayaba ilobelobe mali ’abagega, ta edi ’abagayavo ta wese edi gadeavo ’idiega ge taha ’amayaba ida lobe.” <sup>5-6</sup> Ta Ieisu nuana voqana mana tomotau ge ida vetumaqanea. Inega ge ana fata viaqa ’ebenuavoqana ’eala daviaqidi, ta tovevhiqa ’evisa dimo gitonovidi ta giveaqiaqiedi. Inega Ieisu luvivila ’abaga taha taha ’idia ta veve’ita.

### *Ieisu Tuwelo dina vetune* i’ifoqeyedi

(Madiu 10:5-15; Luke 9:1-6)

<sup>7</sup> Ieisu Tuwelo dina gaba va’auqidi, inega lualua vetunedi ina luvivila ’abaga taha taha ’idia. Ta ena luvine be wese ena waiwai neidi, inega adi fata niboana luveifadi tomotau ’idiega ina ’wavi i’ifoqeyedi. <sup>8-9</sup> \* Inega Ieisu lu’aqetutudi vonaya, “Ge taha tola’ ai ona ’ewei emi luvivila weaqina. Ge ’abwaga, ge kode, ge ami kaleko vemagilafuna, ta wese ge mane. Ta emi kewala namo nimamia ta wese ami ’aqeyafayafa ona ve’aqe.” <sup>10</sup> Inega wese vonedi vonaya, “Eguma ina gabemi taha vanue inaya ona lugu, e inega vanue nana inaya ona toatoa ana laba ’abaga nana ona nokea. <sup>11</sup> \* Ta ’eguma ’abaga vaina inaya ona i’ifoqe ta totoa ’abaga ge ina ’ebe’ewemi ina tauyemi edi vanuea, ta wese ’eguma ge nuanuadi ina vineneqemi, e inega ’aqemiega fwayafwaya ona vavutuvutuqia, ta ona nogedi. Ba’e inega ona ve’itedi nawale vita na’ifoqe ’idia.”

<sup>12</sup> Inega ana to’abibodayavo iluvivila ’abaga qabudi ’idia ta tomotau ilugaihidi be edi ilivu luveifana ina nogedi ta ina nuagivila. <sup>13</sup> \* Ta niboana luveifadi ’eala tomotau ’idiega i’wavi i’ifoqeyedi, ta wese tovevhiqa qabudi dede’wega ’wafidi i’e’abi’abia ta iveaqiaqi.

### *Ioni Togivebabitaiso ena* ’aliga

(Madiu 14:1-12; Luke 9:7-9)

<sup>14</sup> Vonahaqiaqi, lova Elodi taunega luvine a’uya ta Ioni ikafia ia’uluguyea vanue ’ebeyoqona inaya. Ta Ioni ana kafi i’una taha vavine adi wawa Elodiasa. Taudi Elodi

\* 5:41: Lk 7:14 \* 6:2: Ion 7:15 \* 6:4: Ion 4:44 \* 6:8-9: Lk 10:4-11 \* 6:11: Via 13:51 \* 6:13: Iem 5:14

tuana Filifi moqanena, ta Elodi luabuyedi ta vaqidi. <sup>15</sup>\* 'Inega Ioni Elodi vonea vonaya, "Bena'e ilivu ge aqiaqina, mana tuau moqanena uvaqidi, 'inega luvine ubwegea." <sup>16</sup> Ta Ioni ena lugaihi 'inega vavine dina diadi vilea nuanuadi ina luve'aligia. Ta ge adi fata, <sup>17</sup> mana Elodi Ioni 'amayabea ena ilivu gwalagwalana be tunutunuqina weaqina. Ta wese alamania tauna Yaubada ena tofewa taha. 'Inega Elodi Ioni tufwana mwaninivea ta vabodebodea. Elodi nuanuana Ioni ena lugaihi nanoqolia, ta weaqina giwalina a'ala.

<sup>18</sup> 'Inega Elodi ena 'aubena vi'oi ana nuave'avina 'ifoqe. Ta Elodiasa 'aubenana 'inaya 'eda ni'au inua'eqa'uya ma'oda 'inega Ioni ina luve'aligi. Ta 'aubena nana weaqina 'abwaga 'ena'ina i'iva'ava'aia. 'Inega Elodi ena tomotauyavo 'idewani toluvineavo be toluavia adi tovamatanayavo ta wese Galili 'abaganavo ana kaiwabuyavo gabedi imai. <sup>19</sup> Tuta nana Elodi totoa va'auta maega i'ai'ai, 'inega Elodiasa natudi mevavinena lugu mai matadia tovolu, ta ouyega gigiveqaiawedi. 'Inega Elodi iahaba nana vonea vonaya, "Eguma taha yani nuanuau ta weaqina una noqiegu, e ena neiu." <sup>20</sup> 'Inega vona fofofola ta wese Tamada 'inanea vonaya, "Vonahaqiaqi, tola'ai weaqina una noqi 'iguya ena neiu, ta wese ana fata egu 'ebeluvine di'wena ena da'ei ena neiu!"

<sup>21</sup> 'Inega iahaba nana 'ifoqe tauya inana 'idia ta vetala'aiedi vonaya, "Inagu, toyani weaqina ena noqi Elodi 'inaya?"

Ta inana ivonaya, "Elodi una voneaya, 'Nuanuagu Ioni Togivebabitaiso 'unu'ununa una neigu."

<sup>22</sup> 'Inega iahabana lukwayavoni 'evivi Elodi 'inaya ta vonaya, "Nuanuagu ba'itaga Ioni Togivebabitaiso 'unu'ununa gaeba 'inaya una dodoi una neigu."

<sup>23</sup> 'Inega Elodi nuana vita aqiaqi ta ge ana fata nanoga mana ni'au Tamada 'inanea totoa va'auta matadia. <sup>24</sup> 'Inega Elodi toluavia taha luvetunei natauya vanue 'ebeyoqona 'inaya, ta luvine neia be Ioni 'unu'ununa namiea. 'Inega 'oloto nana tauya ta Ioni magana da'ea, <sup>25</sup> ta 'unu'ununa gaebaya dodoi ta 'avalei miea 'abo iahaba nana neia. 'Ewei tauya ta inana neidi. <sup>26</sup> Ta Ioni ana to'abibodayavo ena 'aliga valena inoqolia, 'inega imai ta Ioni 'wafina i'ewei e itavunia.

<sup>27</sup> Ta Ieisu ena viaqa waiwaidi valena tomotau iyavula dadanea di'we qabuna 'idia, ta Elodi wese vale nana noqolia. Ta vaina tomotau ivonaya, "Ioni Togivebabitaiso 'aligege ni'a ya'itoto 'evivi, ta ba'e 'inega ana fata yani diavona 'ebenua voqana wese viaviaqidi."

<sup>28</sup> Ta vaina ivonaya, "Tauna Ilaitia."

Ta wese vaina tomotau ivonaya, "Tauna tovesimasimana taha kavona lova tovesimasi-mana nugwenugweidi 'idewana."

<sup>29</sup> Ta tuta nana Elodi mali vona be mali vona tomotau 'idiega noqolia 'inega vonaya, "Lova Ioni Togivebabitaiso yaluve'aligia, ta ni'a 'aligege ya'itoto 'evivi."

#### *Qabu qiduadi Ieisu ve'ainidi*

*(Madiu 14:13-21; Luke 9:10-17; Ioni 6:1-14)*

<sup>30</sup>\* Tovaletuyana dina ni'au i'evivi mai Ieisu 'inaya ta itoa vivilia. 'Inega edi fewa be wese edi ve'ita weaqina isimana 'inaya. <sup>31</sup> Ta tomotau qabudi tuta qabuna imaimai 'evi'evivi. 'Inega Ieisu me ena tovaletuyanayavo ge adi fata ida veyawai ta ida 'ai. 'Inega Ieisu vonedi vonaya, "Omai 'iguya, be kana tauya di'we taha tomotau geqana 'inaya, ta omo'e 'inaya ada 'aidega kana veyawai." <sup>32</sup> 'Inega taha waga 'inaya igelu sabi tauya di'we tomotau geqana 'inaya. <sup>33</sup> Ta tuta nana italatete malavetaya tomotau 'eala i'ita 'inamedi. 'Inega qabudi ta wese 'abaga taha taha 'idiega tomotau 'aqediega ivihilamo imadu'ifoqe. <sup>34</sup>\* Tuta nana Ieisu wagega vawebui balabalaya 'inega qabu qidua va'inedi 'ita nuaduyedi, mana taudi kavona sifi luluve'waividi ge adi to'itamakimo. Ta 'inega ve'ale ve'itedi yani 'eala weaqidi.

<sup>35</sup>\* Ta ni'a lulaviea 'inega Ieisu ana to'abibodayavo imai ivoneaya, "Kaiwabu, di'we ba'ena tomotau geqana ta baba'au ni'au lialia 'unuva. <sup>36</sup> 'Inega tomotau qabudi una

\* 6:15: Luvu 18:16 \* 6:30: Lk 10:17 \* 6:34: Naba 27:17; Md 9:36 \* 6:35: Mk 8:1-9



vetunedi ina 'evivi ina tauya 'abaga vaina di'wedaya, ta taudiega adi 'abwaga ina sali ta ina gimwane."

<sup>37</sup> 'Inega Ieisu vona 'eviviedi vonaya, "Omi'a 'abwaga ona neidi ina 'ai!"

'Inega Ieisu ive'iea ivonaya, "Ge ama fata tomotau qabudi adi 'abwaga ana gimwanei, mana ana ve'ia qidua va'inena. Ta 'esi 'eguma mane qiduana 'imaya da'eno'eno kavona 'oloto adi yau 8 edi fewa wai'ena 'aidegana weaqina ana ve'ia, e 'inega ba'e tobotana dina adi 'abwaga ama fata ada gimwane."

<sup>38</sup> 'Inega Ieisu vetala'aiedi vonaya, "Beledi 'evisa 'imia? Otauya o'elo'ita."

Ta ni'a ilobe'a 'inega ivoneaya, "Beledi nima 'aidegana ta wese 'iqana magilafudi."

<sup>39</sup> 'Inega Ieisu ana to'abibodayavo vonedi tomotau qabudi ina luvinedi be ina toabui libia guguna 'inega. <sup>40</sup> Ta vaina guguna itoava'auta 'idewana 100, ta vaina 50. <sup>41</sup> 'Inega Ieisu beledi nima 'aidegana ta 'iqana magilafudi 'ewedi ta 'ita vane mahalaya 'inega lukaiwa ta beledi gitomwedi. 'Inega ana to'abibodayavo neidi, ta ivewila'ayea ma 'iqanina tomotau qabudi 'idia. <sup>42</sup> 'Inega qabudi i'ai ta gamodi 'elukoko. <sup>43</sup> Ta to'abiboda dina beledi be 'iqana 'awagigidi iva'auqidi ta 'onena adi yau tuwelo iluveagatuna'idi. <sup>44</sup> Ta to'ai diavona 'idiega 'oloto dimo adi yau 5,000 'idewani.

#### *Ieisu tautauya lavu debanega*

*(Madiu 14:22-33; Ioni 6:15-21)*

<sup>45</sup> Ta ge tuta kuena 'abibodanaya Ieisu ana to'abibodayavo lubibinedi vonaya, "Wagaya ona gelu be ona nugweta ona vaukamana mali di'wea Bedesaida 'inaya. Ta ya'a tomotau qabudi ena vematamagilafuyedi be ina ve'iyavula edi 'abagayavo 'idia." <sup>46\*</sup> 'Inega igelu ta Ieisu qabu diavona luvetunedi iyavula, ta 'abiboda 'watovu bwanagaya sabi venoqi. <sup>47</sup> Ta ni'a velovanea 'inega ana to'abibodayavo nawale lavu malavetanaya wagaya itautauya, ta tauna ana 'aidega nawale oade bwanagaya toatoa. <sup>48</sup> 'Inega Ieisu 'itedi inevaneva ta ge adi fata ina vihila, mana yaqina 'au'ia'iaiwedi. 'Inega manu 'a'alaya Ieisu lavu debanega maimai 'idia tuta goyona nanogedi. <sup>49\*</sup> Ta tuta nana Ieisu i'itea 'inega ivonaya be otala. 'Inega imwaniniva ta idiula, <sup>50</sup> ta Ieisu lukwayavoni vonedia, "Elovemi, ya'a ba'e taugu emi Kaiwabu, 'inega ge ona mwaniniva!" <sup>51\*</sup> 'Inega Ieisu wagaya gelu 'abo yaqina lua'u. Ta to'abiboda dina nuadi voqana qiduana, <sup>52</sup> mana nawale nuadi ge da'eqa'uya Ieisu ena fewa waiwaina weaqina tuta nana tomotau qabudi ve'ainidi beledi nima 'aidegana 'inega, mana edi vetumaqana goyona ta wese debadi i'wanina.

#### *Ieisu tovevihuq qabudi giveaqiaqiedi Genasaleta 'inaya*

*(Madiu 14:34-36)*

<sup>53</sup> 'Inega ivaukamana lavu di'wenaya 'abaga Genasaleta 'inaya, ta waga iluifwea. <sup>54</sup> Ta tutana ivawebui totoa 'abaga Ieisu i'inanea. <sup>55</sup> 'Inega tomotau diavona ivihila itauya 'abaga qabuna 'idia, ta Ieisu Valena isimanayea tomotau 'idia ma'inaya totoa. 'Inega tovevihuq qabudi ma 'ividi i'avaledi itauyedi Ieisu 'inaya. <sup>56</sup> Ta Ieisu luvivila di'we taha taha 'idia, 'abaga qiduiduadi be 'abaga goyogoyodi, ta wese vaoqaya. Ta tovevihuqayavo imiedi 'ebetoava'auta 'idia, ta ivenoqi 'inaya 'eguma ana fata ana kwakwalufai matavusinamo ida gitonovia. 'Inega Ieisu awafela 'idia, ta aiqabu igitonovia e iveaqiaqi.

## 7

#### *Me Diu tubudiavo edi ilivu weaqina*

*(Madiu 15:1-9)*

<sup>1</sup> 'Abiboda Falisiavo ta wese luvine ana tove'itayavo maega imai Ielusalemega, ta Ieisu 'inaya iva'auta itoa vivilia. <sup>2\*</sup> Ta Ieisu ana to'abibodayavo i'itedi i'ai'ai, 'inega diadi vilea mana nimadi ge ida 'utudi. <sup>3</sup> (Falisiavo ta wese me Diu qabudi tubudiavo edi ilivu ikafikafia. 'Inega ge taha toga ana fata na'ai 'eguma nimana ge ana 'utumo. <sup>4\*</sup> Ta 'eguma

\* 6:46: Lk 5:16 \* 6:49: Lk 24:37 \* 6:51: Mk 4:39 \* 7:2: Lk 11:38 \* 7:4: Md 23:25

'abaga 'ebegimwane 'inega ina mai, e nugweta ina uweta 'inega ina 'ai. Ta wese luvine qabuna tubudiavo 'idiega gaeba be vedi be wese 'ulena adi 'utu weaqina i'abi'abibodedi.)

<sup>5</sup> 'Inega Falisiavo be luvine ana tove'itayavo Ieisu ivetala'aiea ivonaya, "Tola'ai weaqina au to'abibodayavo tubudavo edi ilivu ge ida 'amayabedi, mana nimadi bwavubwavuna ta i'ai'ai?"

<sup>6</sup>\* 'Inega Ieisu vona 'eviviedi vonaya,  
 "Omi'a tovemeahaqila!  
 Lova tovesimasimana Aisea  
 weaqimi maduvona fofofolayea  
 tuta nana Yaubada ena vona 'wayavia,  
 ta ba'e 'idewana vonaya,

'Tomotau ba'e 'awadiega i'amayabegu,  
 ta giwalidiega itoa luluvai 'iguyega.

<sup>7</sup> Ta wese 'iguya ihiwaiwa'odu kavokavovo,  
 mana edi ve'ita luvineavo weaqina  
 tomotau edi nuenuega,  
 ta ge ya'a 'iguyega.'"

<sup>8</sup> 'Inega Ieisu vonedi vonaya, "Vonahaqiaqi, omi'a Yaubada ena luvineavo ge oda 'abibodedi, mana tubumiavo edi ilivu nawale okafi'ihia."

<sup>9</sup> Ta wese vonedi vonaya, "Vonigo onuaia omi'a toalamani aqiaqi, ta gebu! Mana Yaubada ena luvineavo onogenogedi, ta 'esi tubumiavo edi ilivu o'abi'abibodedi. <sup>10</sup>\* Lova Mosese Yaubada ena luvine simanea vonaya, "Tamau wese inau una 'amayabedi.' Ta wese vonaya, "Eguma togama tamana wese inana navona ve'alatedi e luaqiaqiea be na'aliga."

<sup>11</sup> Ta omi'a ovonaya vonigo taha toga tamana be inana ana navonedi navonaya, 'Soli qiduana, ya'a egu kulufayavo ni'au yahawafeledi Yaubada 'inaya, 'inega ge agu fata ena iulemi.' <sup>12</sup> Ta ba'e vona nana 'inega tomotau adi iula tamadiavo be inadiavo 'idia oawahawatayedi. <sup>13</sup> Yavona aqiaqiem, tubumiavo edi ilivu ba'e 'inega ta wese emi ve'ita qabudi 'idiega Yaubada ena vona olukavokavovoyea."

*Toyani ana fata tomotau nagivebwavudi Yaubada 'iawanaya*  
 (Madiu 15:10-20)

<sup>14</sup> 'Inega wese Ieisu tomotau qabudi gabedi imai 'inega vonedi vonaya, "Qabumi egu vona ba'e ona noqolia ta ona nua'eqa'uya! <sup>15</sup>\* Tola'ai ka'ai'ainia ge ana fata nagivebwavuda. Ta 'esi tola'ai 'awadega 'ifo'ifoqe mai e ana fata nagivebwavuda."

<sup>16</sup> ["Eguma ma teniqami vona ba'e ona noqolia!"]

<sup>17</sup> 'Inega Ieisu qabu qiduadi nogedi ta ma ana to'abibodayavo ilugu taha vanue 'inaya, e 'inega ivetala'aiea ena vona nana tomotau 'idia ana alamani weaqina. <sup>18</sup> 'Inega Ieisu vonedi vonaya, "Nage omi'a wese nuami nawale ge da'eqa'uya? Ta ona alamani aqiaqiea tola'ai ka'ai'ainia lugulugu gamodaya ge ana fata nagivebwavuda. <sup>19</sup> Mana 'abwaga ge dalugulugu giwalidaya, ta 'esi tautauya gamodaya, 'inega 'abiboda tautauya avuqainaya." (Ena ve'ita ba'e 'inega Ieisu givesimatalia 'idia 'abwaga qabuna vunavunaqidi.)

<sup>20</sup> Ta Ieisu wese vonedi vonaya, "Tola'ai 'ifo'ifoqe tomotau eda nuenuega e ana fata nagivebwavuda, <sup>21</sup> 'edewani nuanua luvefadi be, velamo'eno kavokavovo be, vanawala be, luve'aliga be, <sup>22</sup> luabu be, vemanuguba be, nuanua kavokavovo be, vediavilavila be, u'ava be, ve'ifi'ifi be, vemwakoloai be, gagasa be, vegila ta wese vaina ilivu kavokavovo. <sup>23</sup> Ba'e ilivu diavona luvefadi i'ifo'ifoqe tomotau edi nuenuega ta gigivebwavudi Yaubada matanaya."

*Vavine taha edi vetumaqana Ieisu 'inaya*  
 (Madiu 15:21-28)

<sup>24</sup> 'Inega Ieisu di'we Galili nogea ta tauya Taia 'abaganavo 'idia. Ta taha vanue 'inaya lugu, mana ge nuanuana taha toga ena mai weaqina nahalamaniana. Ta ge ana fata

\* 7:6: Ais 29:13 \* 7:10: 'Ifo 20:12; 21:17; Luve 5:16 \* 7:15: Via 10:14-15

naoukwaiva mana valena tomotau ni'a inoqolia. <sup>25-26</sup> 'Inega wese taha vavine Iesu ena mai valena inoqolia. Taudi ge Diu vavinedi, ta lova ivi'oi 'abaga Finisia 'inaya di'we Silia gamonaya. Ta natudi goyona mevavinena niboana luveifana ni'a 'wahalia, 'inega inana imai Iesu 'inaya ta 'aqenaya igivelukabwebwe. Ta ivenoqiea niboana luveifana na'wavi 'ifoqeyea natudi 'inega. <sup>27</sup> 'Inega Iesu vonedi vonaya, "Nugweta egu tomotauyavo me Diu ena iuledi. Ta ge daluaqiaqiea be gogama adi 'abwaga ena 'ewei 'idiega ena felei kedewa 'idia ta ina 'aini."

<sup>28</sup> 'Inega vavine dina ivona 'eviviea ivonaya, "Kaiwabu vonahaqiaqi, ta kedewa tuta qabuna 'ebe'ai 'ayanaya gogama adi 'abwaga salimuguna 'inega i'ai' ai."

<sup>29</sup> 'Inega Iesu vonedi vonaya, "Emi vona vonahaqiaqi, 'inega ona 'evivi ona tauya ta niboana luveifana natumi 'inega ni'a 'ifoqe ta veaqiaqi."

<sup>30</sup> 'Inega iya'itoto itauya edi vanuea ta natudi i'itea 'ivia 'eno'eno. Ta niboana luveifana ni'a dena tauya.

*Iesu taha 'oloto nakunakuna giveaqiaqiea*

<sup>31</sup> 'Inega Iesu Taia nokea ta tauya Saidoni 'inaya, 'inega 'evivi tauya lavu Galili ta vaikamana di'we Dikafoli 'abaganavo 'idia. <sup>32</sup> 'Inega vaina tomotau taha 'oloto imiea Iesu 'inaya. Ta 'olotona teniqana kwavana ta wese ge ana fata navona. 'Inega Iesu ivenoqiea be nagitonovia. <sup>33</sup> Ta Iesu tovenakunakuna qabu 'idiega 'ebe'ewei ta magilafudi ivaduma adi 'aidega. 'Inega Iesu nimanoyana 'oloto nana teniqanaya a'uluguyea. E 'abiboda wese nimana gida'wei ta tovenakunaku nana meana gitonovia. <sup>34</sup> Gumwala, 'inega Iesu 'ita vane mahalaya yawaina lihia ta vonaya, "Efata!" (Ta vona nana ana givila "Eqa'uhu!")

<sup>35</sup> Ta tuta nana 'inaya 'oloto nana teniqana 'eqa'uya ta noqola aqiaqi, ta wese meana ni'a tunuqa be ana fata naveqae. <sup>36\*</sup> 'Inega Iesu tomotau qabudi awatayedi ge taha toga navevonavonayei. Ta awataya nana inoqolia ta ge ida 'abibodei, 'inega ivesimasimana dadanea tomotau 'idia. <sup>37\*</sup> Ta tomotau qabudi nuadi voqana aqiaqi, 'inega ivonaya, "Iesu ena viaqayavo aqiaqi otaqidi ta 'ebenuavoqana, mana teniqadi kwavana vona inoqonoqolia, ta wese taudi ge adi fata ina veqae meadi giveaqiaqiedi 'inega iveveqae."

## 8

*Iesu qabu qiduadi ve'ainidi*

*(Madiu 15:32-39)*

<sup>1\*</sup> Tuta omo'e 'inaya wese taha qabu qiduadi iva'auta Iesu 'inaya, ta ge adi 'abwagamo. 'Inega ana to'abibodayavo gabedi imai ta vonedi vonaya, <sup>2</sup> "Tomotau ba'ena yanu-akolokoloyedi, mana 'aubena toi ba'idia maega katoatoa, ta adi 'abwaga ni'au gumwala. <sup>3</sup> 'Inega 'eguma ma botanidi ena vetunedi ina 'evivi nawale 'edaya ina tafefwai, mana vaina 'idiega luluvaiega imai."

<sup>4</sup> Ta ana to'abibodayavo ivonea ivonaya, "Di'we ba'ena tomotau geqana ta ma'oda qabu qiduana ba'e adi 'abwaga kana loba 'aiqei?"

<sup>5</sup> 'Inega Iesu vetala'aiedi vonaya, "Evisa ami beledi 'eno'eno?"  
Ta ivoneaya, "Ana yau seveni."

<sup>6</sup> 'Inega Iesu qabu luvinedi be bwa'obwa'oya itoabui. 'Inega beledi seveni dina 'ewedi vona lukaiwa Yaubada 'inaya. 'Inega gitomwedi ta ana to'abibodayavo neidi ta ivewila'ayedi qabu 'idia. <sup>7</sup> Ta wese vaina 'iqana goyogoyodi i'eno'eno, 'inega 'ewedi be weaqidi vona lukaiwa ta ana to'abibodayavo neidi, e 'inega ivewila'ayedi tomotau qabudi 'idia. <sup>8</sup> 'Inega qabu diavona i'ai ta gamodi 'elukoko. Ta 'abiboda to'abiboda dina 'abwaga 'awagigidi iva'auqia e 'onena adi yau seveni iluveagatuna'idi. <sup>9</sup> Ta to'ai diavona 'idiega 'oloto dimo adi yau 'idewani 4,000. 'Inega Iesu qabu vetune 'eviviedi itauya, <sup>10</sup> ta ma ana to'abibodayavo taha waga igeluya, ta itauya di'we Dalamana 'inaya.

\* 7:36: Mk 1:43-45 \* 7:37: Ais 35:5 \* 8:1: Mk 6:35-44

*Falisi nuanuadi* 'ebe'ita waiwaina ina 'itea  
(Madiu 12:38-42; 16:1-4)

<sup>11</sup> 'Inega Falisi imai Iesu 'inaya maega ive'ae'aetoga ta nuanuadi ina sitonovia. 'Inega iluvetuvetunea vonigo taha 'ebe'ita naviaqia 'idia ina 'itea 'inega ina alamania Yaubada 'inega ena waiwai 'ifoqe. <sup>12</sup>\* 'Inega Iesu nuana vita vonedi vonaya, "Tola'ai weaqina lagata omi'a ba'e nuanuami 'ebe'ita taha ena viaqi 'imia? Yavona aqiaqiemi, ge taha 'ebe'ita ena neimi ona 'itei." <sup>13</sup> 'Inega nogedi ta wagaya gelu 'evivi, e ma ana to'abibodayavo italatalaukamana lavu mali di'wenaya.

*Iesu ena vona sesebai Falisiavo be wese Elodi weaqidi*  
(Madiu 16:5-12)

<sup>14</sup> Ta Iesu ana to'abibodayavo adi 'abwaga ge ida 'ewei mana nuadi fani, ta beledi 'aideganamo waga gamonaya 'eno'eno. <sup>15</sup>\* 'Inega Iesu vona sesebaiega vematamagilafu waiwaina neidi vonaya, "Falisiavo be Elodi adi beledi ana 'ebegiveago isiti 'inega ona 'itamakimi!"

<sup>16</sup> 'Inega to'abiboda dina taudiege iveqae ivonaya, "Nage Iesu ba'e 'idewani vona 'aiqa, mana ada beledi kanuafania?"

<sup>17</sup>\* Ta Iesu edi nuagovaqa ni'a alamania 'inega vonedi vonaya, "Tola'ai weaqina taumiege oveveqae vonigo ge ami beledimo? Beledi weaqina ya'a ge eda vonavona. Nage nawale nuami ge dasimatala, waisa? <sup>18</sup> Omi'a ma matami ta ge oda 'ita'ita, ta wese ma teniqami ta ge oda noqonoqoli! Nage ni'a ovenuafania egu viaqayavo tuta nana qabu qiduadi beledi 'inega yave'ainidi, waisa? <sup>19</sup>\* Taha tuta 'inaya beledi nima 'aidegina 'inega tomotau 5,000 yave'ainidi, ta 'awagigidi 'onena 'evisa oluveagatuna'idi?"

'Inega ivoneaya, "Tuwelo."

<sup>20</sup> Ta wese Iesu vetala'aiedi vonaya, "Ta wese taha tuta 'inaya beledi seveni 'inega tomotau 4,000 yave'ainidi, ta 'awagigidi 'onena 'evisa oluveagatuna'idi?"

Ta ivoneaya, "Ana yau seveni."

<sup>21</sup> 'Inega Iesu vonedi vonaya, "Vonahaqiaqi, omi'a nuami nawale ge da'eqa'uya, waisa?"

*Iesu matakwaya taha giveaqiaqiea Bedesaida* 'inaya

<sup>22</sup> Iesu ma ana to'abibodayavo imai ilugu Bedesaida 'inaya. 'Inega vaina tomotau taha 'oloto matana kwayakwayana i'ebe'ewei imiea Iesu 'inaya, ta inoqiea vonigo dagitonovia. <sup>23</sup> Ta Iesu matakwaya nana nimanaya kafi 'inega i'ifoqe itauya 'abaga nanavinaya. 'Inega Iesu 'oloto nana matana gida'wea ta nimanega matana gitonovia, e 'inega voneaya, "Au fata una 'ita nage gebu?"

<sup>24</sup> 'Inega 'oloto nana 'ita givigivila ta vonaya, "Tomotau ya'itedi iyabayaba ta adi 'ita kavona 'aiwe."

<sup>25</sup> 'Inega Iesu 'oloto nana matana gitonova 'eviviea, ta 'inega matana 'eaea ta yani qabuna 'ita aqiaqiedi. <sup>26</sup> 'Inega Iesu voneaya, "Una tauya eu vanuea, ta tauya nana 'inaya ge wese una lugu 'abaga gamonega!"

*Fita ena simana Iesu weaqina*  
(Madiu 16:13-20; Luke 9:18-21)

<sup>27</sup> Iesu ma ana to'abibodayavo iluvivila Sisalia Filifai 'abaganavo 'idia. Ta 'edaye vetala'aiedi vonaya, "Ma'oda tomotau edi vona weaqigu vonigo ya'a toga?"

<sup>28</sup>\* 'Inega to'abiboda dina ivoneaya, "Tomotau vaina ivonaya o'a Ioni Togivebabitaiso. Ta vaina ivonaya o'a Ilaitia. Ta wese vaina ivonaya o'a tovesimasimana nugwenugweidi taha 'idiege."

<sup>29</sup>\* 'Inega wese Iesu vetala'aiedi vonaya, "Ta omi'a ma'oda emi nuanua vonigo ya'a toga?"

'Inega Fita vona 'eviviea vonaya, "O'a Keliso To'etoyavua."

\* 8:12: Md 12:39; Lk 11:29 \* 8:15: Lk 12:1 \* 8:17: Mk 6:52 \* 8:19: Mk 6:41-44 \* 8:28: Mk 6:15 \* 8:29: Ion 6:68-69

<sup>30</sup> \* 'Inega Iesu ana to'abibodayavo luvine waiwaina neidi vonedi vonaya, "Ge taha tomeqabu 'idia ona vevonavonayegu!"

*Iesu simanea ena 'aliga weaqina*  
(Madiu 16:21-28; Luke 9:22-27)

<sup>31</sup> 'Inega Iesu ana to'abibodayavo ve'ale ve'itedi vonedia, "Ya'a Tomotau Natuna nawale visiqa agona ena lobe. Mana nawale 'abaga ana tovanugwetayavo be tovege-uba qiduquadi ta wese luvine ana tove'itayavo ina ve'ineiegu toluvine 'idia be ina luv'e'aligigu. Ta 'aubena toi 'abibodanaya ena ya'itoto 'evivi." <sup>32</sup> Iesu ena vona ba'e 'inega simana 'ifoqe aqiaqia ena 'aliga weaqina. 'Inega Fita Iesu 'ebe'ewei maega ivanaqo tufinaya ta awatayea vonaya, "Iesu, ba'e yani diavona ge wese na'ifoqe 'iuya."

<sup>33</sup> 'Inega Iesu tunugivila ta ana to'abibodayavo 'itedi, ta Iesu Fita lugwaeyea voneaya, "O'a 'idewani Seitani, 'inega unogegu! Eu nuanua kavona tomotau edi nuanua, ta ge Yaubada ena nuanua 'idewani."

<sup>34</sup> \* 'Inega Iesu tomotau qabudi wese ana to'abibodayavo maega gabedi imai e vonedi vonaya, "Eguma taha toga nuanuana be na'abibodegu, luaqiaqia tauna ena nuanua nanogedi 'inega taunega ana 'etoluai na'avalea ta na'abibodegu. <sup>35</sup> 'Inega togama yawaina navegagalea e nawale yawaina naluve'waivia, ta togama yawaina nahawafelea weaqigu ta wese Valegu weaqina nawale yawai aqiaqina nalobe. <sup>36</sup> 'Eguma taha toga bwa'obwa'o ana kulufa kaikaiwabuna qabudi na'ewedi ta 'abiboda na'aliga, tola'ai ana aqiaqina? Gebu'e otaqa! <sup>37</sup> Mana ge taha toga ana fata taha yani 'inega yawaina na'ewa 'eviviei. <sup>38</sup> \* Ba'itagana ana tomotauyavo Yaubada ilugwavu'aiea ta wese ilivu luveifana tuta qabuna iviaviaqidi. 'Inega 'eguma taha toga weaqigu ta wese egu ve'ita weaqina nainiyauyau ta navegeqegu tomotau matadia, e nawale ya'a Tomotau Natuna wese tomotau nana ena vegeqea tuta nana Tamagu ena simatala aqiaqi otaqina 'inega ena 'evivi ena mai Yaubada ena tovale'ewa gwalagwaladi maega."

## 9

<sup>1</sup> \* Ta Iesu wese vonedi vonaya, "Yavona aqiaqi 'imia, tomotau vaimi ge ona 'aliga ana laba Yaubada ena 'Ebeluvine me ena waiwai nave'ifoqeyea ona 'itea."

*Iesu ana 'ita vedumaduma*  
(Madiu 17:1-13; Luke 9:28-36)

<sup>2</sup> \* 'Inega 'aubena sikisi 'abibodanaya Iesu ana to'abibodayavo toidi Fita be Iemesa ma taina Ioni 'ebe'ewedi e maega i'watovu bwanaga taha kuena 'inaya, ta adi 'aidega itoatoa. 'Inega Iesu matadia ana 'ita vedumaduma. <sup>3</sup> Ta ana kaleko luwadawadaea otaqia. Ge taha toga bwa'obwa'oya ana fata kaleko na'utui be naluwadaeyei 'idewana.

<sup>4</sup> 'Inega Ilaitia be Mosese i'ifoqe ta Iesu maega iveveqae. <sup>5</sup> 'Inega Fita Iesu voneaya, "Tove'ita, eda toa ba'idia aqiaqi otaqina, ana 'ita didi toi kana viaqia. Taha o'a weaqiu, ta taha Mosese weaqina ta wese taha Ilaitia weaqina." <sup>6</sup> (Fita ba'e 'idewani vona 'aiqa, mana ma enavo imwaniniva, 'inega ge dahalamania tola'ai navonayei.)

<sup>7</sup> 'Inega gawata 'ifoqe 'afwalidi ta taha vona gawatega 'ifoqe vonaya, "Ba'e Natugu, tauna yaveyolubea. Tauna ena vonayavo ona noqolia!" <sup>8</sup> 'Inega lukwayavonega i'ita givigivila ta ge taha toga ida 'itei, ta 'esi Iesu ana 'aidega maega itoatoa.

<sup>9</sup> Iesu ma ana to'abibodayavo bwanagega iwebuwebui mai 'inega luvine neidi vonedia, "Ge taha toga ona vonevonei tola'ai ni'a o'itea bwanagaya weaqina, ana laba ya'a Tomotau Natuna 'aligege ena ya'itoto 'evivi." <sup>10</sup> 'Inega vona nana ia'ukwaivea, ta taudimo iveqae Iesu ena ya'itoto 'evivi 'aligege ana alamani weaqina.

<sup>11</sup> \* 'Inega Iesu ivetala'aiea ivonaya, "Tola'ai weaqina luvine ana tove'itayavo ivonavona vonigo Ilaitia namadumai ta 'abiboda To'etoyavua namai?"

<sup>12</sup> \* 'Inega Iesu vona 'eviviedi vonaya, "E 'idewana, Ilaitia nanugweta namai ta

\* 8:30: Mk 9:9 \* 8:34: Md 10:38-39; Lk 14:27 \* 8:38: Md 10:33 \* 9:1: Mk 13:30 \* 9:2: 2Fit 1:17-18; Via 3:22 \* 9:11: Mal 3:1 \* 9:12: Mal 4:5-6; Same 22:1-18; Ais 53:3

yani qabuna nagivetunuqidi. Ta tola'ai weaqina Buki Nugwenugweina 'inaya i'wayavia vonigo Tomotau Natuna visiqa qiduana nalobei ta tomotau ina veilivu veifea? <sup>13</sup>\* Ta yavonevonemi, Ilaitia ni'a mai ta tomotau edi nuenuega iveilivu kavokavovo 'inaya, 'idewana Buki Nugwenugweina madusimanea tauna weaqina."

*Gwama taha niboana luveifana* 'wahalia Iesu giveaqiaqiea  
(Madiu 17:14-21; Luke 9:37-43a)

<sup>14</sup> Iesu ana to'abiboda toidi maega bwanagega ni'a iwebui mai dumi'aya, 'inega qabu qiduana 'itedi ana to'abibodayavo itoa vivilidi, ta luvine ana tove'itayavo maega iveve'ae'aetoga. <sup>15</sup> Ta tuta nana qabu diavona Iesu i'itea 'inega me edi qaiawa ivihila 'inaya sabi 'ebe'ewana.

<sup>16</sup> 'Inega Iesu ana to'abibodayavo vetala'aiedi vonedia, "Toyani weaqina luvine ana tove'itayavo maega oveve'ae'aetoga?"

<sup>17</sup> 'Inega 'oloto taha qabu diavona 'idiega ve'ia voneaya, "Tove'ita, edi ve'ae'aetoga 'iuna natugu me'olotona weaqina, mana niboana luveifana ni'a 'wahalia 'inega ge ana fata navona. <sup>18</sup> Ta tuta qabuna tafetafefwai ta niboana nana vevekaoya. Ta 'awanega fulofulo 'ifo'ifoqe be alana kikokiko ta wese 'wafina 'e'elutolele. Au to'abibodayavo yanoqiedi be vonigo niboana veifana ida 'wavi 'ifoqeyea, ta ge adi fata."

<sup>19</sup> 'Inega Iesu vonedia, "Tuta kuenta omi'a maega katoatoa ta nawale nuami ge da'eqa'uya, ta tola'ai weaqina ge oda vetumaqanegu? Debami 'i'wanina, 'inegana 'wafigu siniqaiqai. Ta gwamana omiei eda 'itei!"

<sup>20</sup> 'Inega gwama nana imiea Iesu 'inaya. Ta tuta nana niboana luveifana Iesu 'itea, 'inega gwama nana vunuaqia ta be'u bwa'obwa'oya 'eno'eno buibui ta 'awanega fulofulo 'ifo'ifoqe.

<sup>21</sup> 'Inega Iesu gwama nana tamana vetala'aiea vonaya, "Totutaya yani ba'e ve'ale?"

'Inega tamana vonaya, "Ena tuta goyonega. <sup>22</sup> Ta niboana luveifana tuta qabuna 'aiwe 'ala'alainaya ta wese go'ilaya felafela webuie vonigo daluluve'aligia. Nage au fata taha yani una viaqia ta una nuakokoloyema be una iulema?"

<sup>23</sup>\* 'Inega Iesu 'oloto nana voneaya, "Tola'ai weaqina uvevetala'aiegu 'eguma ya'a agu fata? Ta yavona aqiaqieu, 'eguma taha toga me ena vetumaqana e yani qabuna ana fata naviaqia."

<sup>24</sup> 'Inega 'oloto nana lukwayavonega vonaya, "Tawa yavetumaqana, ta nuanuagu vetumaqana nana una giveqiduea."

<sup>25</sup> Tutana Iesu qabu qiduana 'itedi lukwayavonega imai sabi 'itana tola'ai naviaqia, e 'inega Iesu niboana veifana lugwaeyea vonaya, "O'a niboana teniqau kwavana ta nakunakuhu, yaluvineu u'ifoqe mai ba'e gwama nana 'inega, ta ge wese una lugu 'evivi 'inaya!"

<sup>26</sup>\* 'Inega niboana luveifana kolua ta gwama nana vunuaqia be'u bwa'obwa'oya dededela, ta gamonega 'ifoqe. Ta gwama nana ana 'ita kavona to'aliga 'idewana. 'Inega tomotau qabudi ivonaya, "Yawaina ni'a gumwala." <sup>27</sup> Ta Iesu gwama nana nimanaya kafi siveya'itotoya.

<sup>28</sup> 'Inega Iesu lugu vanuea, ta ana to'abibodayavo adi 'aidega maega itoatoa. 'Inega ivoneaya, "Tola'ai weaqina ima'a ge ama fata niboana nana ada 'wavini da'ifoqe?"

<sup>29</sup> 'Inega Iesu vona 'eviviedi vonaya, "Ba'e niboana diavona ana fata venoqi namo 'inega kana 'wavinidi ina 'ifoqe."

*Iesu tuta vemagilafuna simana ena* 'aliga weaqina  
(Madiu 17:22-23; Luke 9:43b-45)

<sup>30</sup>\* 'Inega Iesu ana to'abibodayavo maega 'abaga nana inogea ta itauya di'we Galili 'abaganavo 'idia. Ta Iesu ge nuanuana tomotau ina alamaniana to'edia itoatoa, <sup>31</sup>\* mana ana to'abibodayavo veve'itedi. 'Inega Iesu vonedi vonaya, "Nawale ya'a Tomotau Natuna

\* 9:13: Md 11:14 \* 9:23: Md 21:21; Mk 11:23 \* 9:26: Mk 1:26 \* 9:30: Ion 7:1 \* 9:31: Mk 8:31; 10:32-34

agu tosuluva nave'ineiegu tomotau 'idia ina luve'aligigu, ta 'aubena toi 'abibodanaya 'aligege ena ya'itoto 'evivi." <sup>32</sup>\* Ta ena vona ba'e weaqina nuadi ge dasimatala. 'Inega nuanuadi ina vetala'aiea vona nana ana alamani weaqina. Ta ge ida vetala'aiei, mana Ieisu ena ve'ia 'idia weaqina imwaniniva.

*Togama qiduana?*

*(Madiu 18:1-5; Luke 9:46-48)*

<sup>33</sup> Ieisu ma ana to'abibodayavo i'ifoqe 'abaga Kafaneumi 'inaya, 'inega ilugu vanue gamonaya, ta Ieisu vetala'aiedi vonaya, "Toyani weaqina ove'ae'aetoga 'edayaya?"

<sup>34</sup> Ta ena vetala'ai 'idia ge ida ve'iei, mana edi ve'ae'aetoga 'iuna vonigo togama 'idiega qidua otaqina. <sup>35</sup>\* 'Inega Ieisu toabui ta Tuwelo dina gaba va'auqidi imai 'inaya. 'Inega vonedi vonaya, "Eguma taha toga o'a nuanuau una veqidua e luaqiaqieu tau'u una a'uwebuieu ta tomotau weaqidi una vetofewa."

<sup>36</sup> 'Inega Ieisu taha gwama 'ebe'ewei miea 'avalea ta vonedi vonaya, <sup>37</sup>\* "Eguma taha toga gwama ba'e 'idewana agu wawega una 'ebe'ewea, e 'inega 'idewana ya'a wese u'ebe'ewegu. Ta 'eguma ni'a u'ebe'ewegu 'inega wese agu Tovetune ni'a u'ebe'ewea."

*Tomeqabu ge ina vevoalaneda e taudi ada toiula*

*(Luke 9:49-50)*

<sup>38</sup> 'Inega Ioni Ieisu voneaya, "Tove'ita, 'oloto taha a'itea au wawega niboana luveifadi 'wavi 'ifoqeyedi tomotau taha 'inega. Ta ahawatayea mana tauna ita'a ge 'idega."

<sup>39</sup> Ta Ieisu voneaya, "Ge ona awatayei! 'Eguma taha toga viaqa 'ebenuavoqana agu wawega naviaqia, 'inega 'abiboda ge wese ana fata na'awaluveifegu. <sup>40</sup>\* Mana 'eguma taha toga ge davevoalaneda e tauna ada toiula. <sup>41</sup>\* Ta yavona aqiaqiemi, 'eguma taha toga agu wawega go'ila naneimi mana omi'a ya'a Keliso egu tomotauyavo, 'inega tauna nawale ana ve'ia aqiaqina nalobea.

*Ilivu luveifana eda vetumaqana nagiveluveifea*

*(Madiu 18:6-9; Luke 17:1-2)*

<sup>42</sup> "Ta yavona aqiaqiemi, 'eguma taha gwama vevetumaqanegu kavona ba'e gwama nana, ta taha tomotau gwama nana nasitonovia ta nagivebe'uyea luveifana 'inaya, e 'inega tositonova nana luaqiaqiea be dabo qiduana 'ebefiaqa maganaya ina yoqonia ta malavetaya ina felawebuiea 'abo nadamana nawebui. <sup>43</sup>\* 'Inega 'eguma nimau nagivebe'uyeu luaqiaqieu be una da'a yavulea. Mana ge taha ana luveifana 'eguma nimau da'ada'ana ta yawai vataya una lobea. Ta 'esi ge daluaqiaqieu 'eguma nimau magilafuna ta wese ma du'u wabolau ta Yaubada nafelawebuieu 'aiwe 'ala'alata vatayana 'inaya. <sup>44-45</sup> Wese 'idewana 'eguma 'a'egu nagivebe'uyeu, luaqiaqieu be una da'a yavulea. Mana ge taha ana luveifana 'eguma 'a'egu da'ada'ana ta yawai vataya una lobea. Ta 'esi ge daluaqiaqieu 'eguma 'a'egu magilafuna ta ma du'u wabolau ta Yaubada nafelawebuieu 'aiwe 'ala'alata vatayana 'inaya. <sup>46-47</sup>\* Ta wese 'eguma matau nagivebe'uyeu una bwaqi yavulea, ge wese ana luveifana. Mana ge taha ana luveifana 'eguma matau 'aidegana ta Yaubada ena 'Ebeluvine una lobea. Ta 'esi ge daluaqiaqieu 'eguma matau magilafuna ta Yaubada nafelawebuieu 'aiwe 'ala'alata vatayana 'inaya.

<sup>48</sup>\* "Ta 'abaga nana 'inaya  
mwatanwata itoatoa  
ta wese 'aiwe saesaela vatayana ge ena 'weumo."

<sup>49</sup> Ta egu tovetumaqana qabudi ina vevunavunaqa 'aiwe 'ala'alaina 'inega, 'idewana mwade'wa ana fata 'abwaga ena tuta nagivekuea ta ge namadu'wala. <sup>50</sup>\* Mwade'wa yani aqiaqina 'abwaga weaqina, mana ana fata 'abwaga nana ana 'ai nagivedibidibia ta wese ana fata be 'abwaga ena tuta nagivekuea 'inega ge wese na'wala. Ta 'eguma mwade'wa

\* 9:32: Lk 9:45 \* 9:35: Lk 22:24-26; Md 20:25-27; Mk 10:43-44 \* 9:37: Md 10:40 \* 9:40: Md 12:30; Lk 11:23  
\* 9:41: Md 10:42 \* 9:43: Md 5:30 \* 9:46-47: Md 5:29 \* 9:48: Ais 66:24 \* 9:50: Md 5:13; Lk 14:34

ena waiwai nahawala be wese nagibwa, e 'inega ma'oda kana viaqa 'aiqa be navewaiwai 'evivi be wese navedibidibi? Ta Yaubada nuanuana omi'a yawaimi kavona mwade'wa 'idewani, 'inega emi toa ma emiavo navenua'ewa'ewa, ta wese ge naluveifa.

“Ta emiavo maega ona toadaumwala.”

## 10

*Isisu ena ve'ita sa'ila weaqina*

*(Madiu 19:1-12; Luke 16:18)*

<sup>1</sup> 'Inega Isisu Kafaneumi nogei tauya di'we Iudia 'inaya ta 'ifoqe go'ila Iolidani di'wenaya. 'Inega wese qabu qiduadi iva'auta imai 'inaya. 'Inega ve'ale ve'itedi 'idewana tuta qabuna veve'ita tomotau 'idia.

<sup>2</sup> Ta Falisiavo vaina imai Isisu 'inaya sabi sitonovina. 'Inega ivetala'aiea ivonaya, “Eguma taha 'oloto moqanena navesa'ilidi nage luvine nabwegei nage gebu?”

<sup>3</sup> 'Inega Isisu vona 'eviviedi vonaya, “Ma'oda Mosese ena luvine 'inaya vona 'aiqa sa'ila weaqina?”

<sup>4</sup>\* 'Inega Falisiavo ivonaya, “Mosese awafela 'eguma 'oloto taha nuanuana moqanena navesa'ilidi, 'inega luaqiaqiea be nugweta leta na'wayavia ena noga weaqina, ta 'abiboda ana fata nanogedi.”

<sup>5</sup> Ta Isisu vonedia, “Idewani. Ta yavona aqiaqiemi, Mosese ba'e luvine nana 'wayavia omi'a emi vedeba 'i'wana weaqina.

<sup>6</sup>\* “Ta ona nuaia tuta 'ebeve'ale 'inaya Yaubada tomotau magilafudi viaqidi me'olotona be wese mevavinena. <sup>7</sup>\* 'Inegana 'oloto tamana be inana nanogedi ta moqanena maega ina ve'aidega. <sup>8</sup> Ta magilafudi 'wafidi nave'aidega, mana lova magilafudi itoa dumaduma, ta 'itagana ni'a ive'aidega. <sup>9</sup> 'Inegana tola'ai Yaubada ni'a luvetubedi ge taha toga navetoasi'iedil!”

<sup>10</sup> 'Abiboda Isisu ana to'abibodayavo maega i'evivi imai vanuea. Ta 'inega wese Isisu ivetala'aiea sa'ila weaqina. <sup>11</sup>\* 'Inega Isisu vonedi vonaya, “Eguma taha 'oloto moqanena navesa'ilidi ta navaqi ukamana mali vavine 'idia, e 'inega 'oloto nana ena ilivu 'inega luabu ilivuna ni'a viaqia moqanena nugwenugweidi 'idia, mana edi vaqi bwegea. <sup>12</sup> Ta wese 'idewana 'eguma vavine taha moqanedi ina sa'ilea ta ina vaqi ukamana taha 'oloto 'inaya, e 'inega taudi wese luabu ilivuna tawa iviaqia.”

*Isisu gogama vona veyolubedi*

*(Madiu 19:13-15; Luke 18:15-17)*

<sup>13</sup> Tomotau gogama goyogoyodi imiedi Isisu 'inaya nuanuadi nagitonovidi. Ta ana to'abibodayavo tomotau diavona iawatayedi. <sup>14</sup> Tutana Isisu awataya nana noqolia, 'inega nuana luvveifa ta lugwaeyedi vonaya, “Gogama ge ona awatayedi ta 'esi ona awafeledi ina mai 'iguya, mana Yaubada ena 'Ebeluvine taudi weaqidi. <sup>15</sup>\* Yavona aqiaqiemi, 'eguma taha toga Yaubada ena 'Ebeluvine ge na'awahaqiaqiei kavona gogama 'ebeluvine nana i'awahaqiaqiea, e 'inega tomotau nana ge wese ana fata be nalugu 'inaya.” <sup>16</sup> 'Inega Isisu gogama 'esilagaidi ta nimanega gitonovidi be vona veyolubedi.

'Oloto taha kaikaiwabuna weaqina

*(Madiu 19:16-30; Luke 18:18-30)*

<sup>17</sup> 'Inega Isisu tutuvila tauya, ta tauya nana 'inaya taha 'oloto vihila mai 'inaya tuqatuqanega sobadi ta voneaya, “Tove'ita aqiaqiu, tola'ai ena viaqi be 'inega yawaigu vataya ena lobei?”

<sup>18</sup> Ta Isisu voneaya, “Ma'oda 'inega u'awahaqiaqiegu, mana ge taha toga aqiaqina ta 'esi Yaubada ana 'aidegamo. <sup>19</sup>\* Ta o'a Yaubada ena luvineavo ni'a ualamanidi, Ge una luv'e'aliga.

\* 10:4: Luv 24:1-4; Md 5:31 \* 10:6: Nug 1:27; 5:2 \* 10:7: Nug 2:24; Efe 5:31-33 \* 10:11: Md 5:32 \* 10:15: Md 18:3 \* 10:19: 'Ifo 20:12-17; Luv 5:16-20



Ge una luabu.

Ge una vanawala.

Ge u'avega tomotau una 'awaluveifedi.

Ge u'avega tomotau edi kulufa una 'ewedi.

Ta wese tamau be inau una 'amayabedi."

<sup>20</sup> 'Inega 'olotona vonaya, "Tove'ita, egu tuta gwama'unu 'inega ba'e luvine diavona qabudi ya'abiboda aqiaqiedi."

<sup>21</sup> 'Inega Iesu 'oloto nana 'ita makimakia ta voneaya, "Iagu yaveyolubeu, ta yani 'aideganamo 'inega uva'waqi. 'Inega una 'evivi eu 'abagaya ta eu kulufa qabudi una vegimwaneyedi be adi ve'ia una 'ewei una vewila'ayedi lukwalukwa 'idia, ta 'inega una mai una 'abibodegu. 'Inega eu kaikaiwabu mahalaya una lobe." <sup>22</sup> Iesu ena vona ba'e 'oloto nana noqolia, 'inega me ena nuavita 'evivi tauya, mana ena kaikaiwabu vegagalea.

<sup>23</sup> 'Inega Iesu 'itagivila ta ana to'abibodayavo vonedi vonaya, "Tomeqabu me edi kaikaiwabu edi lugu Yaubada ena 'Ebeluvine 'inaya vitana."

<sup>24</sup> Ta Iesu ena vona ba'e weaqina ana to'abibodayavo nuadi voqana. 'Inega Iesu wese vonaya, "Natugwavo, Yaubada ena 'Ebeluvine ana lugu vitana. <sup>25</sup> 'Inega 'ebvetalatutula ba'e ona noqolia: Yubai kameli ena lugu saima vetoana 'inega vitana, ta taudi kaikaiwabudi edi lugu Yaubada ena 'Ebeluvine 'inaya vita otaqina."

<sup>26</sup> 'Inega wese to'abiboda dina nuadi voqana qidwana Iesu ena vona weaqina ta ivonaya, "Inega togama ana fata 'etoyavua vataya nalobei?"

<sup>27</sup> Ta Iesu 'itedi vonedia, "Tomotau taudiega ge adi fata. Ta Yaubada 'inaya yani qabuna ana fata."

<sup>28</sup> 'Inega Fita voneaya, "Kaiwabu, ima'a ma'oda, mana ema kulufayavo qabudi ni'a anogedi ta a'abi'abibodeu?"

<sup>29</sup> Ta Iesu vonedia, "Yavona aqiaqiemi, 'eguma tomeqabu edi vanueavo nage taidiavo be, novudiavo be, inadiavo be, tamadiavo be, natudiavo, ta wese edi vaoqayavo ni'a inogedi Valegu aqiaqina ana simana weaqina, <sup>30</sup> e 'inega adi ve'ia ma ana luvetomana 'idewani edi vanueavo be, taidiavo be, novudiavo be, inadiavo be, natudiavo be wese edi vaoqayavo 100 'idewani ina lobe. Ta ba'e yani diavona ina lobedi vaina vita maega, 'inega tuta maimai 'inaya yawai vataya ina 'ewea. <sup>31</sup> \* Ta tomeqabu ba'itaga inugwenugweta nawale ina 'abiboda, ta tomeqabu ba'itaga i'abi'abiboda nawale ina nugweta."

*Iesu ena simana vetoina ena 'aliga weaqina*

*(Madiu 20:17-19; Luke 18:31-34)*

<sup>32</sup> \* Nawale 'edaya itautauya sabi 'watovu Ielusalema 'inaya, ta Iesu ana to'abibodayavo 'abibodanega itautauya me edi nuavoqana, mana lova Iesu ena vona 'idia weaqina inuanua. Ta wese vaina tomotau me edi mwaniniva 'edaya i'abi'abibodedi. 'Inega Iesu Tuwelo dina gaba va'auqidi imai ta 'ewedi ivanaqo 'eda tufinaya sabi vemata-magilafuyedi tola'ai nawale na'ifoqe 'inaya. <sup>33</sup> 'Inega vonedi vonaya, "Ka'wato'watovu Ielusalema 'inaya, ta omo'e 'inaya ya'a Tomotau Natuna agu tosuluva nasuluvegu toveguba qiduquadi be luvine ana tove'itayavo 'idia. Ta taudimo ina dima govaqa egu 'aliga weaqina, be 'abiboda ina ve'ineiegu taudi ge me Diu 'idia. <sup>34</sup> Ta ina givenu'wegu be ina gida'wegu ta wese wayo metametanega ina vunua dadanegu, 'inega ina luve'aligigu. Ta 'aubena toi 'abibodanaya ena ya'itoto 'evivi."

*Iemesa be Ioni edi vetala'ai*

*(Madiu 20:20-28)*

<sup>35</sup> 'Inega Iemesa be Ioni, taudi Sebedi natunavo, imai Iesu 'inaya ivoneaya, "Tove'ita, anoqinoqieu taha yani una viaqia weaqima."

<sup>36</sup> Ta Iesu vonedi vonaya, "Tola'ai nuanuami ena viaqi 'imia?"

\* 10:31: Md 20:16; Lk 13:30 \* 10:32: Mk 8:31; 9:31

<sup>37</sup> Ta ivoneaya, “O’a tuta nana una toatoa eu ’Ebeluvine aqiaqi otaqina gamonaya ’inega nuanuama ima’a una awafelema be di’weuya ana toabui, taha au ’ataqia ta taha au kelias.”

<sup>38</sup> \* ’Inega Iesu vona ’eviviedi vonaya, “Omi’a emi noqi ba’e ana alamani ge oda alamania. Nawale visiqa vedina ’inega ena numa, nage omi’a wese ami fata vedi nana ’inega ona numa? Ta wese visiqa ana babitaiso ’inega ena babitaiso, nage omi’a wese ami fata ’idewani ona babitaiso ’aiqa?”

<sup>39</sup> \* Ta ivonaya, “Ama fata!”

’Inega Iesu vonedi vonaya, “Vonahaqiaqi, vedi nana ’inega ena numa omi’a wese ’inega ona numa. Ta wese babitaiso nana ’inega ena babitaiso omi’a wese ona babitaiso.

<sup>40</sup> Ta ge agu fata ba’itaga ena venua’ivina tomeqabu nawale agu ’ataqia be wese agu kelias ina toabui, gebu’e! Mana lova Yaubada ena tomotauyavo ni’a venua’ivinedi ’inega edi ’ebetoa ni’a ’iva’ava’aia.”

<sup>41</sup> ’Inega to’abibodayavo teni Iemesa be Ioni edi noqi inoqolia ta diadi vilea ’idia.

<sup>42</sup> \* ’Inega Iesu to’abiboda dina gaba va’auqidi imai vonedi vonaya, “Ni’a oalamanian bwa’obwa’o ana toluvineavo taudiega adi wawa igivaneyea, ta luvine falafalana edi tomotauyavo ineineidi. <sup>43</sup> \* Ta omi’a ge wese ’idewana ona viaqa ’aiqa. Ta ’esi ’eguma taha toga ’imiega nuanuau una veqidua eu qabu gamonaya, e luaqiaqieu be nugweta emwavo qabudi una vetofewa weaqidi. <sup>44</sup> Ta wese ’eguma togama ’imiega nuanuau una vetovanugweta e luaqiaqieu tomotau qabudi weaqidi una vetofewa. <sup>45</sup> Mana ya’a Tomotau Natuna wese ’idewana yamai bwa’obwa’oya gebu tomotau weaqigu ina vetofewa, ta ’esi ya’a tomotau ena vetofewa ’idia. Ta wese yawaigu yagubaufayea emi luveifana weaqina sabi ’etoyavuimi.”

*Iesu Batimio matana giveaqiaqiea*

*(Madiu 20:29-34; Luke 18:35-43)*

<sup>46</sup> ’Inega Iesu ma ana to’abibodayavo imai ’abaga Ieliko ’inaya ilugu. Ta ’abiboda ’abaga nana inogea ta qabu qiduana maega itauya. ’Inega taha ’oloto tomatakwaya ana wawa Batimio, tauna Timio natuna, ’eda nanavinaya toatoa. Ta tauna tuta qabuna vevenoqi mane be wese kulufa weaqidi. <sup>47</sup> Ta tuta nana noqolia Iesu Nasaleta ’olotona ’ifoqe maimai ’inega gaba vonaya, “Iesu ye, o’a Deibida natuna, uda nuakolokoloyegu!”

<sup>48</sup> Tomotau qabudi Batimio iawatayea ivoneaya, “Aia, ulua’u!”

Ta tua wese bonana qiduanega gaba vonaya, “Deibida natuna ye, uda nuakolokoloyegu!”

<sup>49</sup> ’Inega Iesu veutovolo ta vonaya, “Ogabei mai!”

’Inega tomotau matakwaya nana igabea ivoneaya, “Me eu qaiawa una ya’itoto mana Iesu gabegabeu.” <sup>50</sup> ’Inega ana kwakwalufai vata’ia yavulei, ta lukwayavonega ya’itoto mai Iesu ’inaya.

<sup>51</sup> ’Inega Iesu vetala’aiea vonaya, “Nage tola’ai nuanuau ena viaqi ’iuya?”

’Inega matakwaya nana vonaya, “Tove’ita, nuanuagu matagu una giveaqiaqiedi be yaqisa agu fata ena ’ita.”

<sup>52</sup> \* ’Inega Iesu vonea vonaya, “Una tauya, mana eu vetumaqana ’inega matau ni’a veaqiaqi.” Ta omo’e tutana ’inaya ’oloto matana ’eaea ta ’ita aqiaqi, ’inega ’edaya Iesu ’abibodea.

## 11

*Iesu ena lugu Ielusalema ’inaya*

*(Madiu 21:1-11; Luke 19:28-40; Ioni 12:12-19)*

<sup>1</sup> Iesu ma ana to’abibodayavo tuta goyona ina lugu ’abaga qiduana Ielusalema ’inaya. Ta tutana i’ifoqe ’abaga goyogoyona Bedifegi ta wese Bedani ’idia bwanaga Olibe ’inaya, ’inega Iesu ana to’abiboda magilafudi luvetunedi, <sup>2</sup> ta vonedi vonaya, “Ona tauya taha

\* 10:38: Mk 14:36; Lk 12:50 \* 10:39: Via 12:2; Ve 1:9 \* 10:42: Lk 22:25-26 \* 10:43: Md 23:11; Mk 9:35

\* 10:52: Mk 5:34

'abaga 'iawamia ta tutana ona 'ifoqe ona 'itea yubai doniki kekeyavauna yoqoyoqonina toatoa, ge taha toga lova dagelu tonovi. 'Inega ona li'ami ona miea ba'idia. <sup>3</sup> 'Eguma taha toga navetala'aiemi navonaya, 'Tola'ai weaqina doniki oli'ali'ami?' 'Inega omi'a ona voneaya, 'Kaiwabu nuanuana ta nawale nave'evivia namai.' ”

<sup>4</sup> 'Inega magilafudi itauya ta doniki nana yoqoyoqonina ilobea tovtovolo 'eda nanav-inaya taha vanue masu'edaninaya. Doniki nana ni'a ive'ale ili'ali'ami, <sup>5</sup> ta 'inega vaina tomotau di'wediala itovotovolo ivetala'aiedi ivonaya, "Tola'ai weaqina doniki oli'ali'ami?"

<sup>6</sup> 'Inega magilafudi totoa 'abaga ivonedi tola'ai Ieisu ni'a vonedi 'idewani. 'Inega doniki nana iawafelea ta magilafudina i'ebe'ewei itauyea Ieisu 'inaya. <sup>7</sup> Ta adi kwakwalu-fai ivata'ia ta doniki nana gwavunaya ita'ulia, ta Ieisu gelu. <sup>8</sup> 'Inega tomotau qabudi wese adi kwakwalufaiega 'eda ita'ulia. Ta wese vaina tomotau 'aiwe laqana vaoqega ida'edi ta 'inega 'eda ita'ulia. <sup>9</sup>\* Vaina tomotau Ieisu inugwetea ta wese vaina i'abibodea, ta qabudi ikolukolua ivonaya,

“Osana, osana! Kaiwa qiduana!

Yaubada, nuanuama tauna maimai Kaiwabu ana wawega una vona veyolubea.

<sup>10</sup> Aqaiawa qiduana mana nawale

tubuma Deibida ena 'Ebeluvine na'ifoqe.

'Inega Yaubada Toatoa Vanena

'evosiega ahawahawatuboya.”

<sup>11</sup> Ieisu ni'a 'ifoqe Ielusalema ta lugu Vanue Gwalagwalana 'inaya, ta yani qabuna 'elo'itedi. Ta ni'a velavilaviea 'inega Tuwelo dina maega i'evivi Bedani 'inaya sabi veyawai.

*Ieisu 'ala'ai vona ve'alatea*

*(Madiu 21:18-19)*

<sup>12</sup> Ta ni'a mahala ahalia 'inega Bedani inogea ta wese i'evivi itautauya Ielusalema weaqina, ta 'edaya Ieisu botana. <sup>13</sup>\* 'Inega tufwana luluvaiega 'ala'ai 'waena 'itea, 'inega vanaqo di'wenaya ta nuanuana vuaqina nalobea. Ta ge taha vuaqina da'itei ta 'wae 'ava'avana, mana ge 'ala'ai ena tuta vuaqa. <sup>14</sup> 'Inega Ieisu 'aiwena vona ve'alatea vonaya, “Tuta maimai 'inaya ge taha tuta una vuaqa 'evivi be tomotau ina 'ai.” Ta Ieisu ana to'abibodayavo vona nana inoqolia.

*Ieisu tovegimwane 'wavinidi Vanue Gwalagwalana 'inega*

*(Madiu 21:12-17; Luke 19:45-48; Ioni 2:13-22)*

<sup>15</sup> Ieisu ma ana to'abibodayavo ni'a i'ifoqe Ielusalema 'inaya. 'Inega lugu Vanue Gwalagwalana 'inaya ta tovegimwane be wese togimwane 'wavinidi i'ifoqe. Ta mane ana tosenisiavo edi 'ebea'u 'e'auinidi ta wese bunebune adi tovegimwaneavo edi 'ebetoa 'e'auinidi. <sup>16</sup> 'Inega tomotau 'etobodedi ge wese taha toga me ena kulufa nalugu Vanue Gwalagwalana 'inaya sabi vegimwane. <sup>17</sup>\* 'Inega ve'itedi vonaya,

“Buki Nugwenugweina gamonaya

Yaubada ena vona 'waya'wayavina vonaya,

'Egu vanue ina gabea vanue 'ebevenoqi

tomotau qabudi weaqidi.

Ta omi'a ogivilea tovanawala adi watu'ubu.’ ”

<sup>18</sup>\* Ta toveguba qiduquadi be wese luvine ana tove'itayavo Ieisu ena vona ba'e inoqolia, 'inega imwaninivea, mana tomotau nuadi 'ewea ena ve'ita weaqina. Ta adi 'aidega idima govaqa ma'oda 'inega Ieisu ina luv'e'aliga 'aiqei. <sup>19</sup> Ta ni'au baba'au lia'unuva 'inega Ieisu ana to'abibodayavo maega Ielusalema inogea.

*Vetumaqana ena waiwai*

*(Madiu 21:20-22)*

\* 11:9: Same 118:25-26; 148:1 \* 11:13: Lk 13:6 \* 11:17: Ais 56:7; Iel 7:11 \* 11:18: Mk 14:1

<sup>20</sup> Ta mahala ahalia Iesu ma ana to'abibodayavo i'evivi itautauya Ielusalema weaqina. 'Inega 'edaya 'aiwe 'ala'ai i'itea galunega be webui kwalamina 'inaya qabuna ni'a kwavuqa. <sup>21</sup> 'Inega Fita Iesu ena vona nuave'avinia ta voneaya, "Tove'ita, u'itei! 'Aiwe nana goluanaya uvona ve'alatea ni'a kwavuqa!"

<sup>22</sup> 'Inega Iesu voneaya, "Yaubada ona vetumaqanea! <sup>23</sup> \* Yavona aqiaqiemi, 'eguma me emi vetumaqana 'inega bwanaga omo'e ona voneaya, 'Utovolo utoaiqo mwade'waya!' ta ge ona venuana magilafu, e 'inega emi vona namatayagea. <sup>24</sup> \* 'Inega yavona aqiaqiemi, 'eguma me emi vetumaqana taha yani weaqina ona venoqi, e 'inega Yaubada ana fata yani nana naneimi. <sup>25</sup> \* Ta tutana ona venoqi Yaubada 'inaya e nugweta tomotau ona nuataqodi edi luveifana 'imia weaqina, be yaqisa Tamami mahalaya omi'a wese emi luveifana nanuataqodi." <sup>26</sup> (-)\*

*Iesu ivetala'aiea ena luvine 'iuna*  
(Madiu 21:23-27; Luke 20:1-8)

<sup>27</sup> Iesu ma ana to'abibodayavo wese i'evivi imai Ielusalema. Ta Iesu Vanue Gwalagwalana 'atamaninaya luluyaba dadana, 'inega toveguba qidududuadi be luvine ana tove'itayavo ta wese 'abaga ana tovanugwetayavo imai 'inaya. <sup>28</sup> 'Inega Iesu ivetala'aiea ivonaya, "Ei, o'a toga ena luvineyega tovegimwaneavo u'wavi 'ifoqeyedi? Ta wese togama eu luvine neiu 'inega ba'e 'idewana uviaviaqa 'aiqa?"

<sup>29</sup> 'Inega Iesu vonedi vonaya, "Nugweta ena vetala'aiemi be 'eguma ona ve'iea, e 'inega wese ya'a ena vonemi egu luvine weaqina. <sup>30</sup> Egu vetala'ai ba'e, togama ena luvineyega Ioni tomotau givebabitaisodi, nage mahalega nage tomotau 'idiega?"

<sup>31</sup> 'Inega taudiega iveveqae ivonaya, "Eguma kana vonaya, 'Mahalega', 'inega nawale navona 'evivieda navonaya, 'Tola'ai weaqina Ioni ge oda vetumaqanei?" <sup>32</sup> Ta 'eguma kana vonaya, 'Tomotau 'idiega', e nawale tomotau qabudi ina nualuveifa 'idaya, mana qabudi Ioni i'awahaqiaqiea tauna tovesimasimana aqiaqi." <sup>33</sup> 'Inega Iesu ivona 'eviviea ivonaya, "Ima'a ge ada alamania."

'Inega Iesu vonedia, "Eguma omi'a egu vetala'ai ge oda ve'iei, e 'inega ya'a wese ge ena vonemi togama ena luvine 'inega ba'e 'idewani yaviaviaqa 'aiqa."

## 12

*Vona sesebai vaoqa ana to'itamaki weaqidi*  
(Madiu 21:33-46; Luke 20:9-19)

<sup>1</sup> \* 'Inega Iesu vona sesebaiega vonedi vonaya, "Taha 'oloto 'oine ana loi 'wadia ena vaoqa gamonaya, 'inega wese 'alia ta 'oine ana 'ebememe 'iva'ava'aia. Ta wese gweda taha kuena 'ebevekova vaoqa gamonaya yoqonia. 'Inega tomotau 'ewedi ta ena vaoqa i'itamakia, ta tauna tauya mali di'we 'inaya.

<sup>2</sup> "Ta bolimana ana tutaya tonivaoqa nana ena tofewa vetunea ena vaoqaya vaina 'oine vuaqina sabi 'ewadi to'itamaki 'idiega. <sup>3</sup> Ta vaoqa ana to'itamakiavo tofewa nana i'itea 'inega ikafia ta ivunuqia. 'Inega iluvetune 'eviviei tauya nima 'ava'avana. <sup>4</sup> 'Inega tonivaoqa ena tofewa wese taha luvetunei tauya, ta ana kiaya ivunuqia ta iveilivu veifea. <sup>5</sup> 'Inega wese taha tofewa luvetunea 'idia, ta tauna iluve'aligia. Ta wese ena tofewa qabudi luvetunedi ta vaina ivunuqidi be wese vaina iluve'aligidi.

<sup>6</sup> "Ta wese tonivaoqa nana natu otaqina toatoa ta veyolubea qiduana. 'Inega ena nuenuega vonaya, 'Ba'e natu otaqigu, 'inega ina 'amayabea', 'abo vetunei tauya. <sup>7</sup> 'Inega to'itamaki diavona natuna i'itea maimai 'idia ta taudimo idima govaqa ivonaya, 'Emavo, 'oloto omo'e maimai tauna kaiwabu natuna 'unutauna. Tauna nawale bwa'obwa'o

\* 11:23: Md 17:20 \* 11:24: Md 7:7 \* 11:25: Md 6:14-15 \* 11:26: Maki ena buki taunega 'wayavia, ta 'abiboda vaidi to'wayavi buki nana i'wayavi 'eviviea, 'inega vaidi laba 26 wese ia'uuya, ta ana noqola ba'e 'idewani: "Ta 'eguma tomotau ge ona nuataqodi, 'inega Tamami mahalaya ge wese nanuataqomi emi luveifana weaqina." \* 12:1: Ais 5:1-2

qabuna na'ewe. Ta kana luve'aligia e 'inega ita'a ba'e vaoqa nana taudega kana luvinea.'  
<sup>8\*</sup> 'Inega ikafia ta iluve'aligia, ta vaoqega ifelawebuiea 'ali gwavuya."

<sup>9</sup> Iesu ena velulu'uya ba'e lu'ovoia 'inega vetala'aiedi vonaya, "Tola'ai nawale toni-vaoqa nana naviaqi to'itamaki diavona 'idia?" Ta Iesu taunega vona 'eviviedi vonaya, "To'itamaki diavona nawale naluve'aligidi be 'oine vaoqina nahawafelea mali tomtou 'idia." <sup>10\*</sup> 'Inega Iesu wese vonedi vonaya,  
 "Nage Buki Nugwenugweina ena simana  
 ge oda nuave'avinia vonaya,  
 'Taha 'oqola lova vanue ana to'eyoqona inogea,  
 ta ba'itagana Kaiwabu ni'au 'oqola nana vetovolo nugwetea  
 be 'oqola qabudi luviluvinedi.

<sup>11</sup> Ba'ena eda Kaiwabu ena viaqa, ta viaqa nana ana 'ita aqiaqi otaqina 'idaya.' "

<sup>12</sup> Iesu ena vona sesebai ba'e toveguba qiduquduadi be luvine ana tove'itayavo ta wese 'abaga ana tovanugwetayavo inoqolia, ta ni'a ialamania vonigo taudi weaqidi vonavona. 'Inega nuanuadi taha 'eda ina salia ta ina kafia. Ta ge ida kafia, mana imwaniniva qiduana tomtou qabudi weaqidi, 'inega Iesu inogea ta itauya.

*Vetala'ai takesi weaqina*

*(Madiu 22:15-22; Luke 20:20-26)*

<sup>13\*</sup> Ta 'abibodanaya tovanugweta diavona vaina Falisi ta wese Elodi ena tomtouyavo iluvetunedi Iesu 'inaya sabi sitonovina. Mana nuanuadi Iesu ena vona weaqina vonigo ina kafia. <sup>14</sup> 'Inega imai Iesu 'inaya ta ivonaya, "Tove'ita tawa ahalamaniu, o'a 'oloto tunutunuquiu ta eu ilivu aqiaqina. Ta wese tomtou ge uda mwaniniva edi waiwai weaqina. Ta Yaubada ena 'eda vonahaqiaqi 'inega uveve'itayea. 'Inega nuanuama ana vetala'aieu taha yani weaqina. Ma'oda luaqiaqiea be toluvine agona Sisa 'inaya takesi kana a'uya nage gebu? <sup>15</sup> Nage takesi kana vemaisi nage gebu?"

Ta Iesu edi nuanua luveifana ni'a alamania ivevemeaqila, 'inega vonedi vonaya, "Tola'ai weaqina 'aqegu olihilihia? Ta mane taha omiei eda 'itei!" <sup>16</sup> 'Inega mane nana ineia ta Iesu vetala'aiedi vonaya, "Ovonegu, mane ba'ena toga 'aye'ayewana ta ma'oda ana wawa?"

'Inega ivoneaya, "Toluvine qiduana Sisa."

<sup>17\*</sup> 'Inega Iesu vonedi vonaya, "E 'inega toluvine Sisa ena yani Sisa ona neia, ta Yaubada ena yani wese Yaubada ona neia!" 'Inega Iesu ena vona ba'e weaqina nuadi voqana qiduana.

*Vetala'ai to'aliga edi ya'itoto 'evivi weaqina*

*(Madiu 22:23-33; Luke 20:27-40)*

<sup>18\*</sup> 'Inega vaina Sadusiavo, taudi ge ida vetumaqana to'aliga edi ya'itoto 'evivi weaqina, imai Iesu 'inaya ivetala'aiea, <sup>19\*</sup> ivonaya, "Tove'ita, lova Mosese ena luvine a'uya vonaya, "Eguma taha 'oloto na'aliga ta natu geqana, e 'inega taina wada'ena maega ina vaqi, ta natudiavo to'waiva nana ana luseana.' "

<sup>20</sup> 'Inega 'ebevetalatutula taha Iesu ineia ivonaya, "Taha 'oloto ma tainavo adi yau seveni itoatoa. Ta 'oloto nana vavine taha maega ivaqi, ta 'abiboda yawaina gumwala ta natu geqana. <sup>21</sup> 'Inega to'waiva nana ana gwavu'ifo wada'ena maega ivaqi. Ta tauna wese yawaina gumwala ta natu geqana. Ta wese vetoina 'idewani. <sup>22</sup> 'Inega tainavo qabudi 'idewani wada'ena ivaqia ta i'waiva 'ovoa ta qabudi wese natu geqadi. Ta 'abiboda wada'e nana wese yawaina gumwala ta natu geqana. <sup>23</sup> Ta 'eguma tomtou ina ya'itoto 'evivi, 'inega ba'e vavine nana to'oloto nawale moqane otaqina, mana ma tainavo qabudi ivaqia?"

\* 12:8: Ibe 13:12 \* 12:10: Same 118:22-23 \* 12:13: Lk 11:53-54 \* 12:17: Lom 13:7 \* 12:18: Via 23:8  
 \* 12:19: Luve 25:5

<sup>24</sup> Ta Iesu edi vetala'ai ve'iea vonaya, "Omi'a emi nuanua luveifana, mana Buki Nugwenugweina ena simana ta wese Yaubada ena waiwai ge oda alamania. <sup>25</sup> Ta ya'itoto 'evivi ana 'aubena 'inaya tomotau ge wese ina vaqi. Vonahaqiaqi, edi toa nawale Yaubada ena tovale'ewa qabudi mahalaya itoatoa 'idewani. <sup>26</sup> \* Nage ge oda avoya Yaubada ena vona 'imia ya'itoto 'evivi weaqina tuta nana taunega 'ifoqe Mosese 'inaya 'aiwe yamwayamwana 'inega, vonaya, 'Ya'a Ebelamo ena Yaubada ta Iakobo ena Yaubada ta wese Aisake ena Yaubada.' <sup>27</sup> Inega yavona aqiaqiemi, Yaubada ge tomotau 'ali'aligidi edi Yaubada ta 'esi tomotau mayawaidi edi Yaubada. Ta omi'a emi ve'ita yani ba'e weaqina luveifa otaqina."

*Luvine qidua va'inena*

*(Madiu 22:34-40; Luke 10:25-28)*

<sup>28</sup> \* Inega luvine ana tove'ita taha mai ta Iesu be Sadusiavo edi ve'ae'aetoga noqolia. Ta wese Iesu ena ve'ita aqiaqina Sadusiavo 'idia noqolia 'inega vetala'aiea vonaya, "Tove'ita, luvine qabuna 'idiega ai luvine qidua va'inena?"

<sup>29</sup> \* Inega Iesu voneaya, "Luvine qidua va'inena ba'e, 'Omi'a me Isileli, ona noqola aqiaqi, Kaiwabu eda Yaubada ana 'aidega Yaubada otaqa. <sup>30</sup> Eu Kaiwabu Yaubada una veyolubei giwalia qabuna 'inega be, niboaniu qabuna 'inega be, eu nuanua qabuna 'inega ta wese eu waiwai qabuna 'inega.' <sup>31</sup> \* Ta taha wese luvine qiduana 'eno'eno vonaya, 'Tomotau una veyolubedi 'idewani tau'uyega uveveyolubeu.' Ge taha wese luvine ana fata ba'e luvine dina naveqidua va'inedi."

<sup>32</sup> Inega 'oloto nana Iesu ena vona ve'iea vonaya, "Tove'ita, eu vona ba'e vonahaqiaqi. Yaubada ana 'aidega otaqa, ta ge taha wese Yaubada datoatoa. <sup>33</sup> \* Inega luaqiaqieda Yaubada kana veyolubea giwalida qabuna 'inega, ta nuada qabuna 'inega ta eda waiwai qabuna 'inega. Ta wese tomotau kana veyolubedi 'idewana taudega kaveveyolubeda. Lova veguba yubai gabugabudi 'idiega yani 'ena'ina weaqimi, ta luvine magilafudina ba'e adi matayaga guba qabudi veqidua va'inea."

<sup>34</sup> Ta 'inega Iesu 'oloto nana ena vona ve'iea vonaya, "O'a toalamani aqiaqiu, ge tuta kuena 'inaya Yaubada ena 'Ebeluvinea una lugu." Ta tuta ba'e 'abibodanaya ge taha toga Iesu davetala'aiei, mana ena alamani weaqina imwaniniva.

*To'etoyavua Keliso Deibida ena gadeyega*

*(Madiu 22:41-46; Luke 20:41-44)*

<sup>35</sup> Tutana Iesu Vanue Gwalagwalana 'atamaninaya veve'ita tomotau 'idia 'inega vetala'aiedi vonaya, "Ma'oda 'inega luvine ana tove'itayavo ivonavona To'etoyavua Keliso tauna Deibida natuna? <sup>36</sup> \* Mana Deibida taunega Niboana Gwalagwalana 'inega simana vonaya,

'Yaubada egu Kaiwabu 'inaya vonaya,  
"Ataqiguya una toabui ana laba voalamwavo  
ena a'uwebuiedi ta una luvinedi."'

<sup>37</sup> Ta Deibida nana ena Kaiwabu Keliso. 'Inega ma'oda ana fata Deibida ena gadeyega Keliso 'abibodanaya na'ifoqe?"

*Luvine ana tove'itayavo edi ilivu weaqina*

*(Madiu 23:1-36; Luke 20:45-47)*

Ta tomotau qabudi Iesu ena ve'ita inoqolia ta nuadi 'ewea. <sup>38</sup> Inega Iesu tomotau qabudi vonedi vonaya, "Luvine ana tove'itayavo edi ilivu ge ona 'abibodei. Mana taudi iyabayaba 'abaga 'ebeva'auta 'inaya, ta nuanuadi adi kwakwalufai ta aqiaqina tomotau ina 'itea ta ina 'amayabedi be ina lukaiwa 'idia. <sup>39</sup> Ta wese nuanuadi vanue tafwalolo 'inaya 'ebetoa aqiaqina 'idia ina toabui, ta wese sagali ana tutaya nuanuadi tomotau qiduiduadi edi 'ebetoya ina toabui. <sup>40</sup> Ta wese nuanuadi tomotau ina 'awahaqiaqiedi

\* 12:26: 'Ifo 3:2,6 \* 12:28: Lk 10:25-28 \* 12:29: Luve 6:4-5 \* 12:31: Luvi 19:18 \* 12:33: 1Sam 15:22;

Osé 6:6 \* 12:36: Same 110:1

edi venoqi kuena tomotau matadia weaqina. Ta wese wadawada'e 'waivega iu'avedi ta edi kulufa ivanawalidi. Ta vonahaqiaqi nawale luvematasabu waiwaina Yaubada 'inega ina lobeana edi ilivu luveifana weaqina."

*Wada'e taha ena nei kavovo*  
(Luke 21:1-4)

<sup>41</sup> Iesu Vanue Gwalagwalana 'atamaninaya mane ana 'ebea'u di'wenaya toabui, ta tomotau qabudi vevekovedi tuta nana edi nei kavovo ia'ua'udi 'ebea'u gamonaya. Ta tovekaikawaiwabu edi mane qiduana ia'udi. <sup>42</sup> Ta Iesu wada'e lukwalukwana taha 'itea mai ta ena nei kavovo mane goyogoyodi magilafuna a'uya.

<sup>43</sup> \* 'Inega Iesu ana to'abibodayavo gaba va'auqidi vonedi vonaya, "Vonahaqiaqi, wada'e ba'e ena nei kavovo 'inega tomotau qabudi edi nei kavovo veqidua va'inedi. <sup>44</sup> Mana qabudi edi mane qiduana nawale 'eno'eno, ta wada'e lukwalukwana ba'e ena mane qabuna a'uya, ta ge taha wese da'eno'eno 'inaya ana 'abwaga ana gimwane weaqina."

## 13

*Tuta vitana nawale na'ifoqe*  
(Madiu 24:1-14; Luke 21:5-19)

<sup>1</sup> Tutana Iesu Vanue Gwalagwalanega 'ifoqe 'inega ana to'abiboda taha vonea vonaya, "Tove'ita u'itei, vanue ba'e ana viaqa aqiaqi otaqina. Ta dabo qiduiduadi 'idiega iyogonia!"

<sup>2</sup> \* 'Inega Iesu vonaya, "Ba'e yani diavona ba'itaga u'ite'itedi nawale ina qeu'ovoidi, ge taha ana dabo naluve'avina be una 'ita 'eviviei."

<sup>3</sup> 'Abiboda Iesu Olibe bwanagaya toabui ta 'inega Vanue Gwalagwalana Ielusalema 'inaya 'ita naqo 'itea. 'Inega Fita be, Iemesa be, Ioni ta wese Anidulu adi 'aidega imai Iesu 'inaya maega iveveqae, 'inega ivoneaya, <sup>4</sup> "Kaiwabu, una vonema, totutaya ba'e Vanue Gwalagwalana ina qeuni? Ta wese una vonema to'ebe'ita na'ifoqe matamaya be yaqisa yani diavona ni'a uvonayedi ana alamani aqiaqiedi adi tuta ni'a mai?"

<sup>5</sup> 'Inega Iesu vonedi vonaya, "Ona 'itamakimi, mana nawale vaina tomotau ina u'avemi tuta 'ebeluo'ova weaqina! <sup>6</sup> Agu wawega nawale tomotau 'eala ina mai ina vonaya, 'Ya'a ba'e taugu to'etoyavua nana! Ta tomotau qabudi ina u'avedi, ta ina 'abibodedi. <sup>7</sup> Ta wese vale ona noqolidi avia luluvaia be di'wedaya weaqidi. Ta ge ona mwaniniva mana ba'e yani diavona ina madunugweta ta 'abibodanaya tuta 'ebeluo'ova na'ifoqe. <sup>8</sup> Mali qabu be mali qabu maega ina luavia, ta wese mali di'we be mali di'we maega ina luavia. Ta wese mwani'ini'i be botana di'we taha taha 'idia na'ifoqe. Ba'e yani diavona tuta vitana ana 'ebeve'ale.

<sup>9</sup> \* "Ta ona 'itamakimi, nawale tomotau ina kafimi ta ina tauyemi kotu weaqina. Ta wese vanue tafwalolo 'inaya ina vunuqa dadanemi. Nawale agu wawa weaqina ina vetovolomi toluvineavo be wese kiniavo matadia. Ta omo'e tuta nana 'inaya Valegu Aqiaqina ona simanea 'idia. <sup>10</sup> Ta yavona aqiaqiemi, nugweta Valegu Aqiaqina nayawala di'we qabuna 'idia, ta 'abiboda tuta ana 'ebeluo'ova na'ifoqe. <sup>11</sup> \* Ta tuta nana ina vetovolomi vetala'ai weaqina ge ona nuanua ma'oda ona vona 'aiqa, mana omi'a ge emi nuenuega ona vona, ta 'esi Yaubada Niboanina Gwalagwalana 'inega emi vona naneimi.

<sup>12</sup> \* "Ta wese tuta maimai 'idia tomotau edi gade gamonaya avia na'ifoqe. 'Inega taha 'oloto taina nasuluvea ta ina luve'aligia. Ta wese tama natuna nasuluvea ta ina luve'aligia. Wese gogama inadiavo be tamadiavo ina vevoalanedi ta ina awafeledi 'aliga 'inaya. <sup>13</sup> \* Ta tomotau qabudi ina vevoalanemi mana omi'a agu to'abibodayavo. Ta tomeqabu ina tovoloi'ita ana laba tuta ana 'ebeluo'ova 'inaya yawai vataya ina lobeana."

\* 12:43: 2Kol 8:12 \* 13:2: Lk 19:44 \* 13:9: Md 10:17-20 \* 13:11: Lk 12:11-12 \* 13:12: Md 10:21  
\* 13:13: Md 10:22; Ion 15:21

*Vita qiduana**(Madiu 24:15-18; Luke 21:20-24)*

<sup>14</sup> \* Wese Iesu vonedi vonaya, “Tuta maimai ’inaya taha yani bwavubwavuna ana ’ita ’ebegaululu ina a’uya ’abaga Gwalagwalana ’inaya, ta ’abaga nana ge daluaqiaqiei mana ’ebe’iwa’odu kavokavovo. (Ta tomeqabu ba’e vona nana ina avoya luaqiaqiedi be nuadi na’eqa’uya ana alamani weaqina.) ’Inega Iudia ana tomtauyavo luaqiaqiedi be ina dena bwanagaya. <sup>15</sup> \* Ta ’eguma taha toga selovaya toatoa nalukwayavoi nadena, ta ge nalugu ’evivi vanuea ena kulufa sabi ’ewana. <sup>16</sup> Ta wese ’eguma taha toga vaoqaya fewafewa e ge na’evivi vanuea ana kwakwalufai sabi ’ewana. <sup>17</sup> \* Tuta omo’e ’inaya vivine gamwegamwe’idi be tovesusuyavo nuakolokolodi.

<sup>18</sup> “Ta ona venoqi Yaubada ’inaya ba’e vita diavona ge ina ’ifoqe guga’u ana tutaya, <sup>19</sup> \* mana tuta ana ’ebeve’ale ’inega be ana laba tuta ba’e ’inaya ge taha wese vita ’idewana da’ifoqe. Ta ’abibodanaya vita ba’e ’idewani ge wese na’ifoqe ’evivi. <sup>20</sup> Vita omo’e ana tutaya ’eguma Yaubada ge nagivekusei nawale tomtau qabudi ina ’aliga. Ta Yaubada tuta nana nagivekusea ena tomtau vevenua’ivinidi weaqidi.

<sup>21</sup> “Ta tuta omo’e ’inaya ’eguma taha toga navoneu navonaya, ‘U’itei, ba’e Keliso!’ nage ‘Omo’e tauna!’ ’inega ena vona ge una vetumaqanei. <sup>22</sup> \* Mana vaina tomtau ’e’eu’au’avidi ina vonaya, ‘Ya’a Keliso!’ ta wese ina vonaya, ‘Ya’a ba’e taugu tovesimasi-mana nana!’ Taudi ve’ita ’ebenuavoqana ina viaqidi, ta ’eguma adi fata wese Yaubada ena tomtauyavo vevenua’ivinidi ’aqedi ina lihia. <sup>23</sup> ’Inega ona ’itamaki aqiaqiemi! Ba’e yani diavona ni’a yamadusimanea ’imia be yaqisa to’eu’au’ava dina ge ona vetumaqanedi.

*Iesu ena ’evivi mai weaqina**(Madiu 24:29-31; Luke 21:25-28)*

<sup>24</sup> \* ‘Tuta vitana nagumwala ta ’abiboda  
vala navelovanea,  
ta wai’ena ena simatala na’weu,  
<sup>25</sup> ta ’wadi’wadima mahalega ina avuta,  
ta wese yani qabuna waiwai mahalaya itoatoa  
ina dedela.’

<sup>26</sup> \* “’Inega totoa bwa’obwa’oya ya’a Tomotau Natuna ina ’itegu gawatega ena mai me egu waiwai qiduana, ta wese me egu simatala aqiaqi otaqina. <sup>27</sup> \* ’Inega egu tovale’ewayavo ena vetunedi be egu tomtau vevenua’ivinidi ina va’auqidi mahalega ta wese bwa’obwa’o ena di’we qabuna ’idiega.

*’Ebevetalatutula mafa**(Madiu 24:32-35; Luke 21:29-33)*

<sup>28</sup> “’Ebevetalatutula mafa ’inega ena ve’itemi. Tuta nana mafa ’waena vauvaudi galugalul ’inega ni’a oalamaniam tuta goyona ive ana tuta na’ifoqe. <sup>29</sup> Ta wese ’eguma ba’e ’ebe’ita diavona ni’a yavonemi ina ’ifoqe ’imia, e ’inega ona alamaniam ya’a tuta goyona ena ’evivi mai. <sup>30</sup> Vonahaqiaqi, lagata ba’e ge ona ’aliga ana laba ba’e yani diavona ina ’ifoqe. <sup>31</sup> Mahala be bwa’obwa’o ina awala, ta ya’a egu vona ge taha ana tufwa ’idiega nahawala, ta ’esi na’eno vataya.

*Iesu ena ’evivi mai ana tuta ge taha toga dahalamania**(Madiu 24:36-44)*

<sup>32</sup> “Ge taha toga dahalamania totuta nage to’aubena ’inaya ena ’evivi ena mai, ta wese Yaubada ena tovale’ewayavo mahalaya ge ida alamaniam, be wese ya’a Tomotau Natuna ’aubena nana ge eda alamaniam. Ta ’esi Tamagu ana ’aidega alahalamania. <sup>33</sup> ’Inega me emi ’iva’ava’ata ona toatoa ta ona ’itamakimi, mana egu tuta ’evivi ge oda alamaniam.”

\* 13:14: Dan 9:27; 11:31; 12:11 \* 13:15: Lk 17:31 \* 13:17: Lk 23:29 \* 13:19: Dan 12:1; Ve 7:14 \* 13:22: Ve 13:13 \* 13:24: Ais 13:10; Ioe 2:10,31; 3:15; Ve 6:12-13 \* 13:26: Ve 1:7 \* 13:27: Md 13:41



<sup>34</sup> 'Inega Iesu 'ebevetalatutula taha wese neidi vonaya, "Egu 'evivi mai kavona taha 'oloto kaikaiwabuna ena vanue nanogei ta natauya mali di'we 'inaya. Ta nugweta ena tofewayavo naluvinedi ta edi fewa navewila'ayedi be ena vanue ina 'itamakia. Ta wese vanue ana 'ebelugu ana to'itamaki vonea vonaya, 'Ge una 'eno, ta 'esi una vevekoval'  
<sup>35</sup> \* 'Inega tuta qabuna ona 'itamakimi, mana ge oda alamania totutaya ena 'evivi mai, nage velovelovanaya nage tou gamonaya nage tuta nana kamukamu idoudou nage manu bodobodoya. <sup>36</sup> Ge nuagu ona 'eno'eno ta ena luveafemi tuta nana ena mai. <sup>37</sup> Tola'ai yavonavonayedi 'imia wese 'idewani tomotau qabudi 'idia yavonedi yavonaya, 'Ona 'itamaki aqiaqiemil' "

## 14

### *Toluvineavo nuanuadi Iesu ina luve'aligia*

(Madiu 26:1-5; Luke 22:1-2; Ioni 11:45-53)

<sup>1</sup> 'Auvivia Sagalina ana 'ebenuave'avina ta wese Beledi ge ana isitimo Sagalina 'aubena magilafuna 'inaya nave'ale. 'Inega toveguba qiduquadi be wese luvine ana tove'itayavo 'eda isalisalia ma'oda Iesu ina u'vei ta ina kafia be ina luve'aligi, <sup>2</sup> ta ivonaya, "Ge 'Auvivia Sagalina ana tutaya Iesu kana kafia, mana nawale tomotau diadi navilea ta ina manini 'idaya."

### *Taha vavine dede'wega Iesu iwaqia 'abaga Bedani 'inaya*

(Madiu 26:6-13; Ioni 12:1-8)

<sup>3</sup> \* Iesu 'abaga Bedani 'inaya toatoa iana Saimoni ena vanuea ta i'ai'ai. Ta Saimoni nana igabea 'wago'wagoina, mana tauna lova to'wagota. 'Inega taha vavine mai lugu ta nimanaya dede'wa ma botolina viaviaqina alabasita 'inega kafikafia. Ta dede'wa nana ana wawa nadi meilana aqiaqina ta ana ve'ia agona. 'Inega botoli nana budona gibaia, ta dede'wa nana 'inega Iesu debana iwaqia.

<sup>4</sup> Ta vaina tomotau itoatoa vavine nana ena viaqa i'itea ta diadi vilea ivonaya, "Tola'ai weaqina dede'wa iwaiwaqa kavokavovoi? <sup>5</sup> Mana dede'wa nana ana ve'ia qiduana, kavona taha 'oloto ena mane na'ewea ena fewa weaqina ya'wala 'aidegina 'inaya. Ta 'esi luaqiaqiea 'eguma dede'wa nana kada vegimwaneyei be ana ve'ia qiduana kada 'ewei be lukwalukwadi 'idia kada vewila'ayea."

<sup>6</sup> 'Inega Iesu vonedi vonaya, "Ta'iwa olua'u, vavine ge ona givenuavitei mana yani aqiaqi otaqina viaqia 'iguya. <sup>7</sup> \* Omi'a lukwalukwa dina tuta qabuna maega otoatoa, ta totuta nuanuami ona iuledi e ami fata be ona iuledi. Ta ya'a ge tuta kuena omi'a maega kana toatoa. <sup>8</sup> \* Ta vavine ba'e yani qiduana viaqia 'iguya tuta nana 'wafigu dede'wega iwaqia, mana madu'iva'ava'aigu agu tavuna weaqina. <sup>9</sup> Yavona aqiaqiemil, tuta nana valegu ina lugaihiea di'we qabudi 'idia, e 'inega wese vavine ba'e ena viaqa 'iguya valena ina velulu'uyayea 'inega tomotau vavine nana ina nuave'avinia."

### *Iudasa nuanuana Iesu nasuluvea*

(Madiu 26:14-16; Luke 22:3-6)

<sup>10</sup> 'Inega Tuwelo dina 'idiega taha ana wawa Iudasa Isakaliota tauya toveguba qiduquadi 'idia nuanuana Iesu nasuluvea. <sup>11</sup> Ta Iudasa ena vona inoqolia 'inega iqaiawa qiduana ta ivona fofofola 'inaya ana ve'ia ina neia. 'Inega Iudasa tuta aqiaqina ba'eyea be Iesu nasuluvei ta ina kafia.

### *Iesu Tuwelo dina maega 'Auvivia Sagalina 'abwagana i'ainia*

(Madiu 26:17-25; Luke 22:7-14,21-23; Ioni 13:21-30)

<sup>12</sup> \* Beledi ge ana isitimo Sagalina ana 'aubena nugweta 'inaya me Diu sifi natudiavo lami ivunuqidi 'Auvivia Sagalina ana 'ebenuave'avina weaqina, mana edi ilivu 'idewana. 'Inega 'aubena nana 'inaya Iesu ana to'abibodayavo imai ivetala'aiea ivonaya, "Ma'inaya 'Auvivia Sagalina ana 'abwaga ana 'iva'ava'aia weaqiu be una 'ai?"

\* 13:35: Lk 12:38 \* 14:3: Lk 7:37-38 \* 14:7: Luve 15:11 \* 14:8: Ion 19:40 \* 14:12: 'Ifo 12:6

<sup>13</sup> 'Inega Iesu ana to'abiboda magilafudi luvetunedi ta vonedia, "Ona tauya Ielusalema 'inaya ta taha 'oloto ona 'itea go'ila ana 'ebegoi kayokayo 'avalea, e tauna ona 'abibodea!

<sup>14</sup> Ta 'oloto nana maega ona lugu vanuea, be tonivanue ona voneaya, 'Ema Tove'ita no-qinoqi 'iuya vonaya, "Tosifaufa una awafelea 'iguya be yaqisa 'inaya agu to'abibodayavo maega 'Auvivia Sagalina ana 'abwaga ana 'ai?" <sup>15</sup> Be 'inega sifaufa qiduana ulawanaya nave'itemi tawa 'i'iva'ava'aina. Ta omo'e 'inaya ada 'abwaga ona 'iva'ava'aia weaqida."

<sup>16</sup> 'Inega ana to'abibodayavo magilafudi itauya ilugu Ielusalema, ta yani qabuna Iesu ni'a vonedia 'idewana ilobedi. 'Inega 'Auvivia Sagalina ana 'abwaga i'iva'ava'aia weaqina.

<sup>17</sup> Ni'a velavilaviea 'inega Iesu taudi Tuwelo dina maega ilugu sifaufa nana 'inaya. <sup>18</sup> \* Ta itoabui i'ai'ai 'inega vonedi vonaya, "Yavona aqiaqiemi, nawale taha 'imiega maega ka'ai'ai naneiegu agu aviayavo 'idia."

<sup>19</sup> 'Inega Iesu ena vona weaqina nuadi vita, ta 'aidega 'aidega Iesu ivetala'aiea ivonaya, "Kaiwabu, ya'a gebu, waisa?"

<sup>20</sup> 'Inega Iesu vona 'eviviedi vonaya, "Agu tosuluva omi'a Tuwelo mina 'imiega. Tauna nawale ya'a maega gaeba 'aideganega beledi ana 'aubwa'ui ana 'ai. <sup>21</sup> Ta ya'a Tomotau Natuna ena tauya 'edana 'inega lova Buki Nugwenugweina 'inaya madusimanea. Ta agu tosuluva nana nuakokolona, mana nawale veilae qiduana nalobe, ta luaqiaqiea 'eguma lova inana ge ida venatunei."

*Kaiwabu ena 'ai*

*(Madiu 26:26-30; Luke 22:14-20; 1 Kolinita 11:23-25)*

<sup>22</sup> Tutana nawale i'ai'ai 'inega Iesu beledi 'ewei ta vona lukaiwa Yaubada 'inaya, 'inega gitomwei ta ana to'abibodayavo neidi ta vonedia, "Ba'e 'wafigu ta ona 'ewei ona 'ai!"

<sup>23</sup> 'Abibodanaya 'oine ma vedina 'ewei e 'inega wese lukaiwa ta neidi be qabudi inumea, <sup>24</sup> \* ta Iesu vonedia, "Ba'e sulaligu nainoqa tomotau qabumi weaqimi, ta wese ba'ena luvine vauvauna ana 'ebeve'ale. <sup>25</sup> Yavona aqiaqi 'imia, tuta ba'e 'inega ta 'abiboda ge wese 'oine vuaqina 'inega ena numa 'eviviei ana laba 'oine vauvauna ena numea Yaubada ena 'Ebeluvine 'inaya."

<sup>26</sup> 'Ai gumwala 'inega 'evosi taha i'evosiei ta i'ifoqe, 'inega i'watovu bwanaga Olibe 'inaya.

*Iesu vona 'ifoqe ana vegeqa weaqina*

*(Madiu 26:31-35; Luke 22:31-34; Ioni 13:36-38)*

<sup>27</sup> \* 'Inega Iesu ana to'abibodayavo vonedia,

"Nawale emi vetumaqana 'iguya nabe'u

'idewana Buki Nugwenugweina

ena simana vonaya,

'To'itamaki sifi ena luv'e'aligia

ta ena sifiavo ina yavula dadana.'

<sup>28</sup> \* Ta egu ya'itoto 'evivi 'abibodanaya Galili 'inaya ena nugweta, ta omi'a 'abibodaguyega ona wai."

<sup>29</sup> 'Inega Fita vonaya, "Eguma nawale qabudi 'iuyega ina dena ta ya'a agu 'aidegana ge ena dena."

<sup>30</sup> 'Inega Iesu vona 'eviviea vonaya, "Vonahaqiaqi, o'a ba'itaga velovelovanaya tuta toi una maduvegeqegu, ta 'abiboda kamukamu ena dou navemagilafuya."

<sup>31</sup> \* Ta Fita bonana falafalanega voneaya, "Ge ana fata ena vegeqeu! 'Eguma ina luv'e'aligiu ya'a wese maega ina luv'e'aligigu." 'Inega to'abiboda qabudi wese 'idewani ivona 'aiqa.

*Iesu vevenoqi Gedesemani 'inaya*

*(Madiu 26:36-46; Luke 22:39-46)*

\* 14:18: Same 41:9 \* 14:24: 'Ifo 24:8; Sek 9:11; Iel 31:31-34; 1Kol 10:16; Ibe 9:20 \* 14:27: Sek 13:7 \* 14:28: Md 28:16; Mk 16:7 \* 14:31: Ion 11:16

<sup>32</sup>\* 'Inega leisu ma ana to'abibodayavo itauya taha di'we ana wawa Gedesemani 'inaya, ta vonedia, "Ba'idia ona toatoa ta ya'a ena venoqi Yaubada 'inaya." <sup>33</sup> 'Inega leisu enavo Fita be, Iemesa ta wese Ioni 'ebe'ewedi itauya, ta me ena giwali visiqā be me ena nuavita vonedia, <sup>34</sup>\* "Giwaliḡu visivisiqā qiduana, ta agu luttonova kavona tuta goyona ena 'aliga. 'Inega ba'idia ona toatoa ta ona vevekova."

<sup>35</sup> 'Inega leisu tufwana vanaqo givelukabwebwe ta vevenoqi 'eguma ana fata visiqā ba'e Yaubada da'ewa yavulei ta vonaya, <sup>36</sup>\* "Tamagu ye, yani qabuna au fata, 'inega visiqā vedina ba'e 'iguyega una 'ewa yavulea. Ta ge ya'a egu nuenuega ta 'esi o'a eu nuanua una viaqia."

<sup>37</sup> 'Inega 'evivi mai toidi 'idia ta 'itedi i'eno motaiva ta leisu Fita divanoya voneaya, "Saimoni, ma'oda 'inega u'eno'eno, nage ge au fata tuta kukusana namo uda toatoa ta uda vevekova, waisa?" <sup>38</sup> Ta leisu toidi vonedia, "Ona 'itamakimi be yaqisa matami ge nadune ta ona vevenoqi, fole Seitani nasitonovimi. Niboanimi nuanuana fewa aqiaqina naviaqia, ta 'wafimi me ena dawalili."

<sup>39</sup> 'Inega leisu wese vanaqo ta ena venoqi Yaubada 'inaya lu'eviviea. <sup>40</sup> 'Inega 'evivi mai ana to'abibodayavo 'idia ta wese lobedi i'eno nuafani mana matadi dune fanifani. 'Inega leisu divanodi, ta ge taha tola'ai ida vonei.

<sup>41</sup> Ta tuta vetoina leisu wese 'evivi naqo sabi venoqi, 'inega 'evivi mai ta wese lobedi i'eno nuafani i'eno'eno ta vonedia, "Ma'oda nawale o'eno'eno ta oveveyawai, waisa? Ta'iwa, ta ya'a Tomotau Natuna egu tuta ni'a 'ifoqe be ina ve'ineiegu tomotau luveifadi nimadia. <sup>42</sup> Oya'itoto kawai, agu tosuluva ni'a 'ifoqe maimai."

#### *leisu ana kafi weaqina*

(Madiu 26:47-56; Luke 22:47-53; Ioni 18:3-12)

<sup>43</sup> leisu nawale vonavona 'inega Iudasa va'ifoqe mai, tauna taha to'abiboda Tuwelo dina 'idiega. Ta toveguba qiduqiduadi be luvine ana tove'itayavo ta wese 'abaga ana tovanugwetayavo qabu qiduana iluvetunedi Iudasa maega imai leisu sabi kafina. Ta qabudi me edi kefata ta wese me edi gita imai.

<sup>44</sup> Ta Iudasa lova toluavia 'ebe'ita taha weaqina ni'a vonedi vonaya, "Taha 'oloto ena talafafea, e bena'e tauna leisu, 'inega ona kafia ona 'itamakia ta ona tauyea." <sup>45</sup> 'Inega tauya tunutunuqina leisu 'inaya voneaya, "Tove'ita!" 'abo talafafea. <sup>46</sup> 'Inega qabu dina i'ifoqe mai ta leisu ikafia. <sup>47</sup> 'Inega taha 'oloto leisu ena qabu 'inega di'wenaya tovtovolo ta ena kefata siwaia ta toveguba edi tovanugweta ena tofewa teniqana talayo'ea.

<sup>48</sup> 'Inega leisu qabu dina vonedia, "Ma'oda, nage ya'a tovanawala taha, 'inega me emi kefata be me emi gita omai ona kafigu? <sup>49</sup>\* Tola'ai weaqina ge oda kafigu tutana nuanimia yatoatoa ta yaveve'ita qabu 'idia Vanue Gwalagwalana 'atamaninaya? Ta tola'ai lova tovesimasimana ivona fofofolea Buki Nugwenugweina 'inaya ana aqiaqi ba'itagana 'ifo'ifoqe emi viaqayavo 'idiega."

<sup>50</sup>\* 'Inega leisu ana to'abibodayavo qabudi idena iyavula.

<sup>51</sup> Ta taha kilakai toluaviayavo i'itea, tauna wese leisu ana to'abiboda taha. Nuanuadi ina kafia ta ana kaleko 'aidega otaqina, <sup>52</sup> 'inega tuta nana igi'waqiea e ana kalekomo ilihi mwainia, 'inega ma'igonegonena dena tauya.

#### *leisu ivetovoloya kaniselayavo 'iawadia*

(Madiu 26:57-68; Luke 22:54-55,63-71; Ioni 18:13-14,19-24)

<sup>53</sup> 'Inega leisu itauyea toveguba qiduana ena 'abaga 'inaya ta ilugu. Ta toveguba edi tovanugweta be 'abaga ana tovanugwetayavo ta wese luvine ana tove'itayavo ni'a iva'auta itoatoa. <sup>54</sup> Ta Fita tufwana luluvaiega leisu tala'obeā 'inega wese lugu toveguba nana ena 'abagaya. Ta Fita 'ebevekotu 'atamaninaya toabui 'abaga ana to'itamakiavo maega ta 'aiwea ivevetaluvala.

\* 14:32: Ion 18:1      \* 14:34: Ion 12:27      \* 14:36: Mk 10:38; Ion 6:38      \* 14:49: Lk 19:47; 21:37; Ion 18:20  
\* 14:50: Same 31:11

<sup>55</sup> Ta toveguba qiduiduadi be me Diu edi kaniselayavo qabudi nuanuadi Iesu ana 'ebeve'ewa ina salia 'inega ana fata ina luve'aligia, ta ge taha ena luveifana ida lobei.

<sup>56</sup> Tomotau qabudi Iesu iveve'ewe ta edi vona ge dave'aidega mana qabudi iu'au'ava.

<sup>57</sup> 'Inega vaina itovolo ta Iesu u'avega ive'ewe ivonaya, <sup>58</sup>\* "Iesu ena vona anoqolia vonaya, 'Vanue Gwalagwalana ba'ena tomotau iyoqonia nawale ena qeu yavulea, ta 'aubena toi 'abibodanaya wese taha vanue gwalagwalana ena yoqona 'eviviea, ta ge tomotau nimadiega.'" <sup>59</sup> Ta taudi wese edi vona ba'e yani nana weaqina ge dave'aidega.

<sup>60</sup> 'Inega toveguba edi tovanugweta toluvineavo matadia ya'itoto ta Iesu vetala'aiea vonaya, "Tomotau omo'e edi ve'ewa 'iuya ni'a unoqolia, waisa? Tola'ai weaqina ge uda vona 'eviviedi?" <sup>61</sup> Ta Iesu nuanamo gado.

'Inega wese toveguba edi tovanugweta vetala'ai 'eviviea vonaya, "Nage o'a To'etoy-avuauna Yaubada Gwalagwalana Natuna, nage gebu?"

<sup>62</sup> 'Inega Iesu voneaya, "Ya'a ba'e taugu. Nawale ya'a Tomotau Natuna ona 'itegu Tovewaiwai Otaqa ana 'ataqia ena toabui be wese mahala gawainavo debanega ena 'evivi mai."

<sup>63-64</sup>\* 'Inega toveguba edi tovanugweta diana vilea ta taunega ana kaleko siabui ta vonaya, "Ena vona luveifa ni'a onoqolia. 'Oloto ba'e ena vona 'inega taunega givaneyea 'idewana tauna Yaubada! Ta'iwa, ge taha wese tove'ewa edi simana kana noqoli ena luveifana weaqina."

'Inega qabudi 'elagaidi ivonaya, "Luaqiaqiea be na'aliga!"

<sup>65</sup> 'Inega vaina Iesu igida'wei ta matana kalekoyega i'afwalia ta nimadiega ilavua dadanea ivonaya, "Eguma o'a tovesimasimana taha e 'inega usimana toga vunuvunuqiu!" 'Inega ana to'itamakiavo ikafia ta ivunuqa dadanea.

*Fita ena vegeqa Iesu weaqina*

*(Madiu 26:69-75; Luke 22:56-62; Ioni 18:15-18,25-27)*

<sup>66</sup> Ta Fita nawale 'abaga gamonaya toatoa, 'inega toveguba edi tovanugweta ena tofe-wayavo 'idiega taha iahaba 'ifoqe mai. <sup>67</sup> 'Inega iahabana Fita 'itea 'aiwea vevetaluvala ta 'ita makimakia voneaya, "O'a wese Nasaleta 'olotona Iesu maega otoatoa."

<sup>68</sup> 'Inega Fita vegeqa vonaya, "Yani bena'e uvonevonea ya'a ge eda alamanial!" 'Inega Fita dena 'ifoqe 'abaga ana 'ali 'awanaya.

<sup>69</sup> 'Inega wese iahaba nana Fita 'itei ta tomotau di'wenaya itoatoa vonedi vonaya, "Omo'e 'oloto nana tauna wese Iesu ana qabu 'idiega."

<sup>70</sup> 'Inega Fita wese vegeqa vonaya, "Ya'a gebu!"

Ta tuta kusakusana 'abibodanaya taudi Fita di'wenaya itoatoa ivoneaya, "Vonahaqiaqi, ni'a ahalamaniu o'a wese Iesu ana to'abiboda taha mana o'a Galili 'olotou!"

<sup>71</sup> 'Inega Fita ve'ale 'awatamatamana gaba vane vonaya, "Tamada, 'oloto nana ovonevonea ya'a ge wese eda alamanial!"

<sup>72</sup> Ta tuta omo'e 'inaya kamukamu ena dou vemagilafuna. 'Inega Fita Iesu ena vona nuai vonaya, "O'a tuta toi una maduvegeqegu ta 'abiboda kamukamu ena dou navemagilafuya." 'Inega Fita nuana vita qiduanu ta dou.

## 15

*Iesu imiea gavana Failato 'inaya*

*(Madiu 27:1-2,11-14; Luke 23:1-5; Ioni 18:28-38)*

<sup>1</sup>\* Manu bodobodoya toveguba qiduiduadi be 'abaga ana tovanugwetayavo be luvine ana tove'itayavo ta wese kanisela qabudi itoa va'auta iveveqae Iesu weaqina. Veqae gumwala, 'inega edi nuanua 'aideganega luvine ia'uya ta Iesu nimana iyoqonia itauyei ta ineiea me Loma edi gavana Failato nimanaya, tauna di'we Iudia ana toluvine.

<sup>2</sup> 'Inega Failato Iesu vetala'aiea vonaya, "Nage o'a me Diu edi Kini?"

Ta Iesu ve'iea vonaya, "Ni'a uvona 'idewana."

\* 14:58: Ion 2:19-21 \* 14:63-64: Luvu 24:16; Ion 19:7 \* 15:1: Lk 22:66

<sup>3</sup> Ta toveguba qiduqiduadi Iesu ive'ewea yani taha taha 'idiega. <sup>4</sup> 'Inega wese Failato Iesu vetala'aiea vonaya, "Tomotau ba'e yani 'eala weaqidi ive'eweu, ta tola'ai weaqina ge uda vona ve'iedi?"

<sup>5</sup> \* Ta tua Iesu edi ve'ewayavo 'inaya ge taha tuta dave'iedi, 'inega Failato nuana voqana agona.

*Failato Iesu awafelea ina luve'aligia*

*(Madiu 27:15-26; Luke 23:13-25; Ioni 18:39-19:16)*

<sup>6</sup> Ya'wala 'aidega 'aidega 'Auvivia Sagalina ana tuta 'inaya di'we Iudia ana gavana ena ilivu ba'e 'idewana. Vanue 'ebeyoqonega taha 'oloto nayavuia na'ifoqe tomotau edi nuana 'inega. <sup>7</sup> Tutana 'inaya toluve'aligia taha ana wawa Balabasi ma enavo itoatoa vanue 'ebeyoqona gamonaya. Taudi ge nuadi me Loma ina luvinedi, 'inega lova vaina ifofolidi. 'Inega luvine ni'a ilobe luve'aligia weaqina.

<sup>8</sup> 'Inega tomotau qabudi iva'auta imai gavana Failato 'inaya ta ivoneaya, "Taha 'oloto una yavuia 'imaya vanue 'ebeyoqona 'inega 'idewana ya'wala 'aidega 'aidega uviaviaqa 'aiqa, waisa?"

<sup>9</sup> 'Inega Failato vonedia, "Nage nuanuami me Diu edi Kini ena 'etoyavuia 'imia?"

<sup>10</sup> Failato ena vetala'ai 'idia 'idewana mana ni'a alamania toveguba qiduqiduadi Iesu ive'ifi'ifia 'inega nuanuadi ina luve'aligia. <sup>11</sup> \* Ta toveguba qiduqiduadi tomotau qabudi nuadi igiqa'uaya, mana nuanuadi Balabasi ina 'inanea, ta Iesu gebu.

<sup>12</sup> 'Inega Failato tomotau qabudi vetala'aiedi vonaya, "Ta 'eguma Balabasi ena 'etoyavuia 'imia, 'inega ma'oda ena viaqa 'aiqa tauna ogabea me Diu edi Kini weaqina?"

<sup>13</sup> Ta qabudi igaba vane ivonaya, "Etoluai 'inaya una tutuve'ewea!"

<sup>14</sup> 'Inega wese Failato vetala'aiedi vonaya, "Tola'ai ena luveifana?"

'Inega wese igaba vane ta bonadi agonega ivonaya, "Una tutuve'ewea, una tutuve'ewea!"

<sup>15</sup> 'Inega Failato tomotau adi giveqaiawa weaqina Balabasi yavuia 'idia. Ta ena luvineyega Iesu wayo metametanega ivunuqa dadanea, ta 'abiboda Failato ve'ineia me Loma toluaviayavo 'idia sabi tutuve'ewana.

*Toluaviayavo Iesu igivenu'wea*

*(Madiu 27:27-31; Ioni 19:2-3)*

<sup>16</sup> 'Inega toluaviayavo Iesu itauyea edi vanue 'ebetoava'auta 'inaya gavana Failato ena 'abaga qiduana gamonaya, ta ediavo qabudi igaba va'auqidi imai. <sup>17</sup> 'Inega taha kaleko kuena qimwaqimwalina 'inega Iesu ivekalekoya, ta wese ana biatuli talitaliega iviaqia ta 'unu'ununaya ia'uaya. <sup>18</sup> Ta givenu'wega i'amayabea ivonaya, "Kaiwa, kaiwa me Diu edi Kini!" <sup>19</sup> Ta 'abiega ana kiaya ilavulavua ta wese i'egidagida'wea. Be wese tuqatuqadiega isobadi ta givenu'wega ihiwa'odu 'inaya. <sup>20</sup> Tuta nana Iesu igivenu'wea gumwala, 'inega kaleko qimwaqimwalina i'ewa yavulei ta tauna ana kalekoyega ivekaleko 'eviviea. Ta 'inega i'ewa 'ifoqeyea itauyea sabi tutuve'ewana.

*Iesu itutuve'ewea 'etoluai 'inaya*

*(Madiu 27:32-44; Luke 23:26-43; Ioni 19:17-27)*

<sup>21</sup> \* Tutana itautauya 'edaya 'inega taha Sailini 'olotona ilobe maimai ena 'abagega Ielusalema 'inaya. Ana wawa Saimoni, tauna Alekisana be Lufoso tamadi. Ta toluavia dina iluvetunea Iesu ana 'etoluai na'avalea. <sup>22</sup> 'Inega Iesu itauyea taha 'abaga ana wawa Goligota 'inaya, ta wawa nana ana alamani "Unu'unu ana 'abaga". <sup>23</sup> 'Inega 'oine be mulo maega iwayavilea ta Iesu inea vonigo danuma be yaqisa ge yuvaqa qiduana nalutonovi, ta Iesu noga.

<sup>24-25</sup> \* Tuta nana Iesu itutuve'ewea baba'au ni'a vane mai 9 koloki 'inaya. Ta ana kalekoyavo ana 'ewa weaqina taha laha iviaqia ina 'itea togama tokaleko na'ewea. <sup>26</sup> Ta ana 'etoluai debanaya ana ve'ewa 'iuna i'wayavia vonaya, "BA'E ME DIU EDI KINI." <sup>27-28</sup> \*

\* 15:5: Ais 53:7; Mk 14:61 \* 15:11: Via 3:13-14 \* 15:21: Lom 16:13 \* 15:24-25: Same 22:18 \* 15:27-28: Ais 53:12

Ta wese toluveifana magilafudi Iesu maega itutuve'ewedi taha ana 'ataqiega, ta taha ana keliega.

<sup>29</sup> \* Tomotau ivevedelideli ta iveve'unulewalewa be idagidagi ta wese Iesu igigivenu'wea ivonaya, "Ei nuakolokolou! Uvonaya vonigo Vanue Gwalagwalana una qeu yavulei ta 'aubena toi 'inaya wese una yoqona 'eviviea. <sup>30</sup> 'Inega tau'uyega u'etoyavuii ta 'etoluaiega uwebui mai!"

<sup>31</sup> Ta wese 'idewani toveguba qiduiduadi be luvine ana tove'itayavo Iesu igivenu'wea ta nuanidia ivonaya, "Ma'oda tauna mali tomotau 'etoyavuidi ta taunega ge ana fata na'etoyavui. <sup>32</sup> Tauna vonea To'etoyavua ta di'we Isileli ana Kini, ta 'eguma 'etolui 'inega dawebui mai kada 'itea kada vetumaqanea."

Ta toluveifana magilafudina Iesu maega itutuve'ewedi e taudi wese 'idewana Iesu igivenu'wea.

*Iesu ena 'aliga*

*(Madiu 27:45-56; Luke 23:44-49; Ioni 19:28-30)*

<sup>33</sup> Baba'auyega be lavilavi 3 koloki 'inaya bwa'obwa'o qabuna velovana bodea. <sup>34</sup> \* Ta omo'e tuta nana 'inaya Iesu bonana qiduanega gaba vonaya, "Eloi, Eloi, lama sabakitani?", ta ana alamani, "Egu Yaubada, egu Yaubada, tola'ai weaqina unogenogegu?"

<sup>35</sup> Ta vaina tomotau di'wenaya itovotovololo ena gaba inoqolia ivonaya, "Onoqoli, Ilaitia gabegabeal!"

<sup>36</sup> \* 'Inega taha 'oloto vihila tauya kikifa 'ewei ta 'oine yuyuna 'inaya 'aubwa'ui 'inega taha 'aiwe 'inaya 'idawayei e ve'etovaneyea Iesu 'awanaya be datomwase'u'uya. 'Inega 'oloto nana vonaya, "Tua 'etobala, ta ka'itei 'eguma Ilaitia namai ta 'etoluaiega na'etoyavuii."

<sup>37</sup> 'Inega Iesu wese bonana qiduanega gaba ta yawaina gumwala. <sup>38</sup> Ta tuta nana 'inaya Vanue Gwalagwalana ana bagina kaleko eabu magilafuyea debanega be webui 'ayanaya. <sup>39</sup> Toluaviayavo adi tovatatana Iesu 'iawanaya tovatovololo, ta tuta nana 'itea ma'oda 'aliga 'aiqa 'inega vonaya, "Vonahaqiaqi, 'oloto ba'ena Yaubada Natuna."

<sup>40-41</sup> \* Vivine tufwana qabudi lova di'we Galili 'inaya Iesu i'abibodea ta ihiulea, ta taudina wese Iesu maega ni'a i'watovu mai Ielusalema 'inaya. Ta ba'e qabu dina gamodia Meli Magidala ta wese waviana Meli, taudi Iemesa be Iosese inadi ta wese Salome. Ta vivine diavona tufwana luluvaiega itovololo ta ivevekova naqo, ta yani qabuna Iesu 'inaya 'ifoqe i'itea.

*Iesu ana tavuna weaqina*

*(Madiu 27:57-61; Luke 23:50-56; Ioni 19:38-42)*

<sup>42-43</sup> 'Aubena nana Iesu itutuve'ewea me Diu igabea 'aubena 'ebe'iva'ava'ata, mana navulihia 'inega Sabate na'ifoqe. 'Inega lavilavi 'inaya taha Alimatia 'olotona ana wawa Iosefa 'ifoqe mai. Tauna me Diu edi toluvine agona taha, ta Yaubada ena 'Ebeluvine weaqina ba'eba'eyea. Ta me ena giwalifatu 'ifoqe tauya gavana Failato 'iawanaya ta venoqiea Iesu 'wafina weaqina. <sup>44</sup> Tuta nana Failato Iosefa ena noqi noqolia 'inega nuana voqana, ta vonaya, "Oo, nage Iesu ni'a 'aliga?"

'Inega Failato toluavia adi tovatatana gabea 'ifoqe mai ta vetala'aiea vonaya, "Ma'oda, nage Iesu ni'a 'aliga?"

<sup>45</sup> Ta 'oloto nana vona ve'iea vonaya, "Edewani".

'Inega Failato Iosefa awafela 'inaya be Iesu 'wafina na'ewea. <sup>46</sup> 'Inega Iosefa kaleko wadawadaeana gimwaneana miea, ta Iesu 'wafina 'ewa webuiea 'etoluaiega 'abo kaleko nana 'inega umea. Lova deba'unu taha ialea kavona vatu'ubu dabo qiduanega gamonaya, 'inega ba'e deba'unu nana 'inaya Iosefa Iesu 'wafina a'uya. Gumwala, 'inega dabo qiduanega deba'unu 'awana 'aubodea. <sup>47</sup> Ta Meli Magidala ma waviana Meli taudi Iosese inana ivevekova, ta ma'inaya Iesu 'wafina a'uya i'itea.

\* 15:29: Same 22:7; 109:25; Mk 14:58 \* 15:34: Same 22:1 \* 15:36: Same 69:21 \* 15:40-41: Lk 8:2-3

## 16

*Isisu ena ya'itoto 'evivi 'aligege*

*(Madiu 28:1-8; Luke 24:1-12; Ioni 20:1-10)*

<sup>1</sup> Sabate ni'a gumwala, 'inega Meli Magidala be waviana Meli Iemesa inana, ta wese Salome maega dede'wa meilana aqiaqina igimwane, mana nuanuadi Isisu 'wafina ina vedede'wea. <sup>2</sup> 'Inega baba'au ena yayaqa 'unu 'awa'awai otaqaya wiki ana 'aubena 'ebeve'ale 'inaya vivine dina me edi dede'wa itauya Isisu ana deba'unuya.

<sup>3</sup> Nawale 'edaya itautauya ta taudimo iveveqae ivonaya, "Togama naiuleda be dabo qiduana nabuini deba'unu 'awanega?"

<sup>4</sup> Ta tutana i'ita naqo 'inega deba'unu nana ana dabo qiduana i'itea buibui naqona. <sup>5</sup> 'Inega ilugu deba'unu nana gamonaya ta adi 'ataqia taha kilakai i'itea toatoa ma ana kaleko kuena ta wadawadaea otaqina, 'inega imwaniniva veiveifa.

<sup>6</sup> Ta kilakai nana vonedi vonaya, "Ge ona mwaniniva! Isisu Nasaleta 'olotona itutuve'ewea 'etoluai 'inaya osalisalia. Tauna gebu ba'idia datoatoa, ta 'esi ni'a ya'itoto 'evivi 'aligege. O'itei, ba'idia 'wafina ia'uya, ta ba'itagana gebu'ena. <sup>7</sup>\* Ta omi'a ona tauya Fita ta wese to'abiboda qabudi 'idia ta ona vonedia, 'Isisu nugwenugweta Galili 'inaya, om'e 'inaya ona 'itea, lova ena vona 'imia 'idewana.' "

<sup>8</sup> 'Inega vivine dina me edi mwaniniva ta wese me edi nuavoqana i'ifoqe idena deba'unuyega. Ta 'edaya ge taha toga ida vonei, mana imwaniniva gegoyo.

*Isisu ena 'ifoqe Meli 'inaya*

*(Madiu 28:9-10; Ioni 20:11-18)*

<sup>9</sup> [Tuta nana Isisu ya'itoto 'evivi 'awa'awai otaqaya wiki ana 'aubena 'ebeve'ale 'inaya, e 'inega madu'ifoqe Meli Magidala 'inaya. Lova Isisu niboana luveifadi seveni adi yau 'wavi 'ifoqeyedi ba'e vavine nana 'inega.

<sup>10</sup> 'Inega Meli tauya Isisu ana to'abibodayavo 'idia ta vematamagilafuyedi. Ta taudi nawale me edi nuavita ta wese me edi dou Isisu weaqina itoatoa. <sup>11</sup> Ta Meli vonedi vonaya, "Isisu mayawaina toatoa, ni'a ya'itea!" Ta ena vona ge ida vetumaqanei.

*Isisu ana to'abibodayavo magilafudi maega 'edaya iveloba*

*(Luke 24:13-35)*

<sup>12</sup> Ta 'abiboda wese Isisu 'ifoqe ana to'abiboda magilafudi 'idia. Taudi Ielusalemega ni'a i'ifoqe itautauya mali di'we 'inaya. Ta tutana Isisu 'ifoqe 'idia ivemwageyea mana ana 'ita vedumaduma. <sup>13</sup> Nawale itautauya, 'inega nuadi 'eqa'uya vonigo tauna edi Kaiwabu, e 'inega lukwayavonega i'evivi ediavo 'idia ta ivematamagilafuyedi. Ta edi simana 'idia ge taha toga davetumaqanei.

*Isisu ana to'abibodayavo edi fewa neidi*

*(Madiu 28:16-20; Luke 24:36-49; Ioni 20:19-23; Viaqa 1:6-8)*

<sup>14</sup> \* 'Abibodanaya Isisu ana to'abibodayavo leveni i'ai'ai ta 'ifoqe 'idia. 'Inega lugwaeyedi edi vedeba i'wana weaqina, vonedi vonaya, "Eguma taudi egu tavolo 'evivi 'abibodanaya ni'a i'itegu ta ivematamagilafuyemi, 'inega tola'ai weaqina ge oda vetumaqanedi?"

<sup>15</sup> \* 'Inega Isisu luvine neidi vonedia, "Omi'a ona tauya di'we qabuna 'idia ta Vale Aqiaqina ona lugaihiea tomotau qabudi 'idia. <sup>16</sup> \* Ta tomeqabu ina vetumaqanegu e ona givebabitaisodi, 'inega nawale 'etoyavua ina lobe. Ta tomeqabu ge nuanuadi ina vetumaqanegu nawale ve'ia vitana ina lobe.

<sup>17</sup> \* "Ta agu tovetumaqanayavo 'ebe'ita waiwaiidi ina viaqidi. 'Inega agu wawega niboana luveifadi ina 'wavi 'ifoqeyedi tomotau 'idiega, ta wese adi fata bona vauvauna ina alamania ta ina veqaeyea. <sup>18</sup>\* Ta adi fata mwata ina kafidi ta ge ina veilaqe, ta 'eguma

\* 16:7: Md 26:32; Mk 14:28 \* 16:14: 1Kol 15:5 \* 16:15: Via 1:8 \* 16:16: Via 2:38 \* 16:17: Via 2:4; 8:7  
\* 16:18: Lk 10:19; Via 28:3-6

go'ila badabadana ina numea 'inega ge ina 'aliga. Be wese tovevhiqayavo nimadiega ina gitonovidi ta ina veaqiaqi.”

*Isisu vaneqa mahalaya*  
(*Luke 24:50-53; Viaqa 1:9-11*)

<sup>19</sup>\* Kaiwabu Iesu ena vona lu'ovoia 'idia, 'inega Yaubada 'ebe'ewea vaneqa mahalaya, ta Tamana ana 'ataqia toabui. <sup>20</sup>\* 'Inega ana to'abibodayavo itauya di'we taha taha 'idia ta Vale Aqiaqina ilugaihiea tomotau 'idia. Ta Kaiwabu edi lugaihi 'awahaqiaqiea 'inega ena waiwaiega wese viaqa 'ebenuavoqana ta waiwaidi iviaviaqidi.]\*

---

\* 16:19: Via 1:9-11; 2:33-34 \* 16:20: Via 14:3; Ibe 2:3-4 \* 16:20: Ba'e buki nana da'a 16 be laba 9-20 'idia vaidi leta nugwenugweidi adi to'wayaviavo ge ida 'wayavidi. 'Inega vaidi toalamani ivonaya be nage ge Maki taunega laba diavona da'wayavidi, ta 'esi 'abibodanaya vaina to'wayavi taudi edi nuenuega ia'udi.



## Luke

### *Buki ana alamani weaqina*

Iesu Valena Aqiaqina Luke 'wayavia. Tauna ge Diu 'olotona, ta 'esi Guliki 'olotona. Tauna ena fewa 'inaya tovevhiqa adi togiveaqiaqi. Luke ana 'aidega 'wayavia Iesu ena tuta gwama weaqina. Ta ena buki 'inaya Iesu ena nuakolokolo lukwalukwadi be, vivine be, tomotau kavokavovo ta wese tovevhiqa weaqidi 'wayavia. Ta wese Iesu ena vona sesebai 'eala Luke 'wayavia, ta vaina 'idiega ge taha toga wese da'wayavidi, ta 'esi Luke ana 'aidega, 'idewani Samelia 'olotona ena ilivu aqiaqina vona sesebaina, be wese taha kaiwabu natuna me'olotona luluve'waivina vona sesebaina.

Tuta nana Faulo luvivila Luke ena di'we 'inaya, 'inega Iesu Valena noqolia ta vetumaqanea. 'Inega Faulo 'weabuya ta iulei maega ifewa. 'Inega 'abiboda Iesu Valena 'wayavia ta simanea tauna tomotau qabuda ada To'etoyavua. Ta Luke nana taha wese buki 'wayavia eda Buki Gwala gamonaya, tauna buki nana ana wawa Viaqa.

### *Buki gamona*

1:1-4 Luke ena 'wayavi 'iuna weaqina simanea

1:5-2:52 Ioni Togivebabitaiso be Iesu edi vi'oi ta wese edi tuta gogama weaqina

3:1-20 Ioni Togivebabitaiso ena viaqayavo

3:21-4:13 Iesu ena babitaiso ta wese ana sitonova

4:14-9:50 Iesu ena iula me Galili 'idia Yaubada ena waiwaiega

9:51-19:27 Iesu di'we Galili nogea ta tauya Ielusalema 'inaya

19:28-23:56 Iesu ena wiki ana 'ebel'ovoa Ielusalema 'inaya be wese vaina 'abaga di'wenaya

24:1-53 Iesu ena ya'itoto 'evivi 'aligea be ena 'ifoqe, ta wese ena vaneqa mahalaya weaqina

### *Luke ena 'wayavi 'iuna*

<sup>1</sup> \* Kaiwabu Tiofilasi ye, tomotau qabudi Iesu Valena ni'au i'wayavia, ta Yaubada ena viaqa 'idaya weaqina isimana 'ifoqeyea edi alamani 'inega. <sup>2</sup> Ta to'wayavi dina edi 'wayavi i'ewea to'abiboda nugwenugweidi 'idiega, mana yani qabuna imadu'itea ta 'inega isimana 'ifoqeyea ta wese ivelulu'uyayea 'imaya. <sup>3</sup> Ta yani qabuna Iesu weaqina ena tuta vi'oi 'inega be ana laba vaneqa mahalaya yasali aqiaqiedi ta yahalamani aqiaqiedi. 'Inega ya'a wese nuanuagu ena 'wayavidi be yani qabuna ena simana aqiaqiedi 'iuya. <sup>4</sup> O'a ve'ita ni'a u'ewea Iesu ena viaqayavo be wese ena vonayavo weaqidi, ta ba'e egu 'wayavi 'inega una alamani aqiaqiedi be una 'awahaqiaqiedi.

### *Elisabeti ena valagata weaqina*

<sup>5</sup> Egu velulu'uya ana 'ebeve'ale ba'e 'idewana: Tuta nana kini Elodi di'we Iudia luvinea, 'inega taha toveguba toatoa ana wawa Sakalaia, tauna toveguba Abaya ena qabu 'idiega. Ta moqanena ana wawa Elisabeti, tauna wese Eloni ena gade 'inega. <sup>6</sup> Ta magilafudi edi ilivu tunutunuqina Yaubada matanaya, ta tuta qabuna ena luvine ivematamatayaga aqiaqiedi. <sup>7</sup> Ta natu geqadi, mana Elisabeti gagala voaqia, ta wese magilafudi ni'au ivekofekofe.

<sup>8-9</sup> \* 'Inega taha 'aubena Sakalaia me ena qabuyavo adi veyoveyoa iviaqia Vanue Gwalagwalana 'inaya. Ta edi ilivu 'inega taha 'oloto adi qabu 'inega ina venua'ivinea be guba naviaqia Yaubada 'iawanaya. 'Inega taha laha iviaqia ta Sakalaia nugweta be guba nana naviaqia. 'Inega tauna ana 'aidega ana fata nalugu Sifaufa Gwalagwala Otaqina 'inaya ta dede'wa meilana aqiaqina nagabuya Kaiwabu weaqina. <sup>10</sup> Ni'a lugu be dede'wa nana gabugabuya, ta ba'e tuta nana 'inaya wese qabu qidwana ivevenoqi vanue sifefenaya.

\* 1:1: Via 1:1 \* 1:8-9: 'Ifo 30:7

<sup>11</sup> 'Inega Yaubada ena tovale'ewa taha 'ifoqe ta dede'wa ana 'ebeveguba 'ataqinega tovotovololo. <sup>12</sup> Ta tuta nana Sakalaia 'itea 'inega yo'alia ta wese mwaniniva qiduana. <sup>13</sup> Ta tovale'ewa nana voneaya, "Sakalaia, ge una mwaniniva. Yaubada eu venoqi ni'au noqolia. Nawale moqaneu Elisabeti natuhu me'olotona navenatunea, ta una gabea ana wawa Ioni.

<sup>14</sup> "Inega o'a gwama nana weaqina una qaiawa qiduana, ta wese tomotau qabudi ina qaiawa ena vi'oi weaqina, <sup>15</sup> \* mana tauna nawale ana wawa qiduana Yaubada 'iawanaya. Ta gebu 'oine be wese go'ila waiwaina nanumedi, ta ena tuta vi'oi 'inega Niboana Gwalagwalana naluveagatuna'ia. <sup>16</sup> Ta tauna me Isileli 'eala na'ebe'ewedi ina 'evivi edi Kaiwabu Yaubada 'inaya. <sup>17</sup> \* Ta tauna nawale me ena waiwai ta me ena giwalifatu tomotau giwalidi na'iva'ava'aia Kaiwabu ena mai weaqina. Ta ena waiwai lova tovesimasimana Ilaitia 'idewana. Ta ena lugaihi 'inega tama ina nuagivila natudiavo 'idia. Ta wese taudi tovmatayaduqa ina nuagivila, 'inega ina tauya Yaubada ena 'eda tunutunuqina 'inaya."

<sup>18</sup> 'Inega Sakalaia tovale'ewana voneaya, "Vona ba'e ana alamani weaqina nuagu voqana, mana ya'a moqanegu maega tawa avekofekofe."

<sup>19</sup> \* 'Inega tovale'ewa nana vona 'eviviea vonaya, "Ya'a Gebeliela, tuta qabuna ya-tovotovololo Yaubada 'iawanaya, ta tauna luvetunegu yamai ta vale aqiaqina ba'e ni'au yasimana 'ifoqeyea 'iuya. <sup>20</sup> Ta o'a vale nana ge uda vetumaqanei, 'inega ba'e 'itaga 'awau navita ge au fata una vona ana laba vale nana ana alamani aqiaqi na'ifoqe 'iuya, 'inega wese una vona 'evivi."

<sup>21</sup> Tomotau qabudi Sakalaia iba'eba'eyea ta inuanua tola'ai weaqina tuta kuena Vanue Gwalagwalana gamonaya toatoa. <sup>22</sup> Ta tuta nana Sakalaia 'ifoqe ge ana fata naveqae, 'inega nimanega veveqae 'idia. Ba'e 'inega ni'a ialamania taha ve'ita kavona 'wayoqa 'ifoqe 'inaya Sifaufa Gwalagwala Otaqina gamonaya.

<sup>23</sup> Ta tuta nana Sakalaia ena fewa ana tuta lu'ovoa, e 'inega 'evivi tauya ena 'abagaya. <sup>24</sup> 'Inega tuta ba'e 'abibodanaya moqanena Elisabeti valagata, ta wai'ena faibi gamonaya ge dayabayaba ta vanuea toatoa. <sup>25</sup> Ta vonaya, "Ba'e agu iula Yaubada 'inega, mana lova gagaligu 'inega yainiyauyau tomotau 'idia, ta ba'e 'itagana agu iniyauyau ni'a awala."

#### *Meli ena venatuna valena*

<sup>26</sup> Elisabeti ena wai'ena vesikisina ni'a lobe, 'inega Yaubada ena tovale'ewa Gebeliela wese vetunei mai 'abaga Nasaleta 'inaya di'we Galili gamonaya. <sup>27</sup> \* 'Inega 'ifoqe taha iahaba matayauyona 'inaya ana wawa Meli. Ta iahaba nana taha 'oloto ana wawa Iosefa maega igwaledi, ta 'oloto nana Deibida ena gade 'inega. <sup>28</sup> Ta tovale'ewa nana voneaya, "Kaiwa Meli, Yaubada ena veyoluba qiduana 'iuya. Ta o'a Kaiwabu maega."

<sup>29</sup> 'Inega Meli nuana voqana ta wese nuana vetonovea vona nana ana alamani weaqina. <sup>30</sup> Ta tovale'ewa nana Meli voneaya, "Gebu una mwaniniva, mana Yaubada ena veyoluba qiduana 'iuya. <sup>31</sup> \* Nawale una valagata ta natuhu me'olotona una venatunea ta ana wawa una gabea Iesu. <sup>32</sup> \* Nawale tauna naveqidua va'ine ta tomotau ina gabea Toatoa Vanena Natuna. Ta Kaiwabu Yaubada nawale ena waiwai naneia ena vetoluvine weaqina 'idewana lova tubuna Deibida 'abiluvine. <sup>33</sup> 'Inega me Isileli naluvinedi, ta ena 'Ebeluvine gebu nahawala."

<sup>34</sup> Ta Meli tovale'ewa nana voneaya, "Ma'oda 'edewana ena valagata 'aiqa, mana ya'a nawale matayauyogu ta ge eda vaqi?"

<sup>35</sup> 'Inega tovale'ewa nana Meli voneaya, "Niboana Gwalagwalana nawale nawebui mai 'iuya ta Yaubada Toatoa Vanena ena waiwai 'inega una valagata. 'Inega natuhu gwalagwalana una venatunea, tauna ina gabea Yaubada Natuna. <sup>36</sup> Ta una nuaia nibaiu Elisabeti ni'a vekofekofe ta gagalina be tomotau ivonea ge ana fata navenatuna. Ta tauna tawa vegamwegamwe'i ta ena wai'ena vesikisina ni'a lobe. <sup>37</sup> \* Mana yani qabuna

\* 1:15: Naba 6:2-3      \* 1:17: Mal 3:1; 4:5-6; Md 17:11-13      \* 1:19: Dan 8:16; 9:21      \* 1:27: Md 1:16,18      \* 1:31: Ais 7:14; Md 1:21-23      \* 1:32: 2Sam 7:12,13,16; Ais 9:7      \* 1:37: Nug 18:14

Yaubada ana fata!”

<sup>38</sup> 'Inega Meli voneaya, “Ya'a Yaubada ena tofewa taha, 'inega tola'ai ni'au usimanea na'ifoqe 'iguya.” 'Inega tovale'ewa nana Meli nogei ta tauya.

*Meli ena vayausa Elisabeti* 'inaya

<sup>39</sup> Ta ge tuta kuena 'abibodanaya Meli lukwayavonega tutuvila tauya ta di'we Iudia bwanaganavo 'evataonidi, 'inega taha 'abaga 'inaya 'ifoqe. <sup>40</sup> 'Inega Sakalaia ena vanuea lugu ta nibaina Elisabeti lukaiwa 'inaya. <sup>41</sup> Ta tutana Elisabeti Meli ena vekaiwa noqolia 'inega gwama gamonaya nidoa ta Niboana Gwalagwalana Elisabeti luveagatuna'ia. <sup>42</sup> Ta bonana qiduanega gaba vonaya, “O'a Yaubada vivine qabudi 'idiega ni'au venua'ivineu ta veveyolubeu, ta natuhu nawale una venatunea tauna Yaubada veveyolubea. <sup>43</sup> Yaqaiaqaiawa qiduana mana ya'a vavine kavokavovo ta o'a Yaubada ena venua'ivina nawale egu kaiwabu una venatunea, ta umai sabi vayausigu! <sup>44</sup> Tuta nana eu lukaiwa yanoqolia, 'inega gwama me ena qaiawa gamoguya nidoa. <sup>45</sup> Ta o'a toveyoluba aqiaqi, mana Kaiwabu ena vale 'iuya uvetumaqanea 'inega nawale ana aqiaqi na'ifoqe.”

*Meli ena* 'evosi awatubo Yaubada 'inaya

- <sup>46</sup> \* Ta Meli vonaya,  
 “Tuta qabuna giwaliguyega  
 Kaiwabu yahawahawatuboya,  
<sup>47</sup> ta yaqaiaqaiawa Yaubada  
 tauna agu To'etoyavua 'inaya.  
<sup>48</sup> Mana tauna 'ita webui mai 'iguya  
 ya'a ena tofewa tonuawebui.  
 'Inega tuta maimai 'idia  
 lagata 'evaudi ina 'awahaqiaqiegu  
 ya'a toveyoluba,  
<sup>49</sup> mana Yaubada tauna Tovewaiwai otaqa  
 ta yani waiwaina viaqia weaqigu.  
 Tauna ana wawa gwalagwalana.  
<sup>50</sup> \* Tauna ana to'amayabayavo  
 lagata 'aidega 'aidega 'idia  
 ena nuakolokolo ge nahawala  
 ta 'esi na'eno vataya.  
<sup>51</sup> \* Ta vonahaqiaqi, taudi tonuavane  
 nimana waiwaina 'inega 'auefaledi.  
<sup>52</sup> \* Tauna toluvine kaikaiwabudi a'uwebuedi  
 edi 'ebetoa kaikaiwabuna 'inega,  
 ta taudi tonuawebui givaneyedi.  
<sup>53</sup> \* Ta wese tobotana ve'ainidi  
 'abo gamodi 'elukoko,  
 ta tovekaikaiwabu nima 'ava'avadi  
 vetune 'eviviedi.  
<sup>54</sup> \* Ta tauna ena vona fofofola  
 ge danuafania,  
 'inega ita'a me Isileli  
 nuakolokoloyeda be iuleda.  
<sup>55</sup> \* Vonahaqiaqi,  
 'aqegigidavo  
 Ebelamo me ena gadeavo  
 Yaubada vona fofofola 'idia

\* 1:46: 1Sam 2:1-10 \* 1:50: Same 103:13,17 \* 1:51: 2Sam 22:28 \* 1:52: Iob 12:19; 5:11; Same 147:6 \* 1:53: Same 34:10 \* 1:54: Same 98:3 \* 1:55: Mai 7:20; Nug 17:7

be nanuakolokolo vatayeda.”

<sup>56</sup> Meli ena vonayavo lu'ovoidi, 'inega nibaina maega itoa wai'ena toi 'idia, 'inega 'abiboda 'evivi ena 'abagaya.

*Ioni Togivebabitaiso ena vi'oi*

<sup>57</sup> Elisabeti ena tuta ni'a lobe'a 'inega gwama me'olotona venatunea. <sup>58</sup> Ta edi gadeavo wese ediavo Yaubada ena veyoluba 'idia weaqina inoqolia 'inega qabudi iqaiawa qiduana.

<sup>59</sup>\* Ta gwama nana ena 'aubena ve'etitina (8) ni'a lobe'a, 'inega ena qabuyavo iva'auta mai 'wafina sabi da'ana, 'idewana lova Yaubada luvine Ebelamo neia. Ta wese nuanuadi ina gabea tamana Sakalaia waviana. <sup>60</sup> 'Inega inana iawatayedi ivonedia, “Gebu, gwama ba'e kana gabea ana wawa Ioni.”

<sup>61</sup> 'Inega qabu diavona ivonaya, “Bena'e wawa nana omi'a gademina ge ami wawa.” <sup>62</sup> 'Inega venima giyoyowega tamana ivetala'aiea ma'oda gwama ana wawa nagaba 'aipei.

<sup>63</sup> 'Inega Sakalaia 'ebe'wayavi weaqina noqi ta ineia, 'inega gwama nana ana wawa 'wayavia ba'e 'idewana, “Ana wawa Ioni.” <sup>64</sup> Ta omo'e tuta nana 'inaya Sakalaia meana meaqana 'evivi, 'inega veqae ta Yaubada awatuboya. 'Inega qabu koyadi wawa nana i'itea 'abo nuadi voqana qiduana.

<sup>65</sup> Ta totoa 'abaga qabudi ba'e yani diavona weaqina nuadi voqana qiduana. 'Inega tomotau edi veqae 'inega valena yawala dadana di'we Iudia bwanaganavo 'idia. <sup>66</sup> Ta tomeqabu vale ba'e inoqolia nuadi ivetonovea, 'inega taudiega ivetala'aiedi ivonaya, “Tola'ai nawale na'ifoqe ba'e gwama nana 'inaya ta ma'oda naviaqa 'aiqa?” Mana i'itea Yaubada ena waiwai 'inaya 'eno'eno.

*Sakalaia ena simana*

<sup>67</sup> Ta Ioni tamana Sakalaia Niboana Gwalagwalana luveagatuna'ia 'inega simana 'ifoqe vonaya,

<sup>68</sup>\* “Kaiwabu kana awatuboi,  
tauna me Isileli eda Yaubada,  
mana ni'au vayausida  
be toa vita 'inega li'amida.

<sup>69</sup>\* 'Inega Yaubada ena tofewa  
tubuda Deibida ena gadeyega  
ada To'etoyavua  
ve'ifoqeyea 'idaya,  
ta tauna Tovewaiwai va'ine.

<sup>70</sup> Yaubada ena vona diavona ba'e  
lova tovesimasimana nugwenugweidi  
imaduvonayedi,

<sup>71</sup>\* vonigo na'etoyavuida  
ada aviayavo  
ta wese ada tonogayavo 'idiega.

<sup>72</sup>\* Ta wese lova vona fofofola  
be vonigo tubudavo  
nanuakolokoloyedi  
ta ena vona fofofola gwalagwalana  
ge nanuafania.

<sup>73</sup>\* Ta ba'e vona fofofola nana Yaubada  
tubuda Ebelamo neia,  
<sup>74</sup> be vonigo nayavuida  
ada aviayavo 'idiega  
be yaqisa me eda giwalifatu  
kana fewa weaqina.

\* 1:59: Nug 17:12; Luvi 12:3; Lk 2:21 \* 1:68: Same 72:18 \* 1:69: Same 18:2 \* 1:71: Same 106:10 \* 1:72:  
Nug 17:7; Same 105:8-9 \* 1:73: Nug 22:16-17

75\* Ta tuta qabuna eda ilivu aqiaqina  
ta tunutunuqina Yaubada matanaya.

76\* Ta o'a natugu,  
ina gabeu Yaubada Toatoa Vanena  
ena tovesimasimana,  
mana o'a nawale una nugweta  
be eda Kaiwabu ena 'eda  
una 'iva'ava'aia.

77\* Ta wese ena tomotauyavo  
una vematamagilafuyedi  
be edi ilivu luveifana nanuataqodi,  
'inega adi fata 'etoyavua ina lobe.

78\* Yaubada ena ilivu nuvana  
be wese Tonuakolokolo,  
'inega 'etoyavua ana simatala  
nayayaqa 'idaya.

79 'Inega tomeqabu  
velovelovana be wese 'aliga  
ena di'wea itoatoa  
naguvesimatalidi,  
be 'inega qabuda navanugweteda  
toadaumwala ana 'eda 'inaya."

80 Ta gwama nana veqidua ta niboanina wese vewaiwai. 'Inega ana 'aidega di'we  
tomotau gegana 'inaya tauya toatoa be ana laba 'ifoqe me Isileli 'idia.

## 2

### *Iesu ena vi'oi* (Madiu 1:18-25)

<sup>1</sup> Ta Ioni ena tuta gwama 'inaya me Loma edi toluvine qiduana Sisa Ogosito toa-  
toa, ta ena luvine a'uya vonigo ena 'ebeluvine gamonaya 'abaga 'aidega 'aidega ana  
tomotauyavo adi wawayavo ina 'wayavidi. <sup>2</sup> Lova ge taha luvine ba'e 'edewani da'ifoqe  
tomotau adi wawa weaqina, ta 'esi tuta nana gavana Kuliniasi di'we Silia luluvinea ba'e  
luvine nana 'ifoqe. <sup>3</sup> 'Inega tomotau qabudi itauya aha tamadia adi wawa sabi 'wayavidi.  
<sup>4</sup> Ta wese Iosefa 'abaga Nasaleta di'we Galili 'inega tutuvila tauya taha 'abaga ana wawa  
Bedeliema 'inaya di'we Iudia gamonaya, mana Bedeliema kini Deibida ana tuvada, ta  
Iosefa tauna Deibida ena gade 'inega.

<sup>5</sup> 'Inega ana gabuinoqa Meli maega itauya 'abaga nana 'inaya be adi wawa ina  
'wayavidi, ta Meli nana ma gamona. <sup>6</sup> Ta tuta nana Bedeliema 'inaya i'ifoqe 'inega  
edi 'ebetoa isalisalia, mana Meli ena wai'ena ni'a lobe, be tuta goyona nauweta. Ta  
wagawaga edi vanue ni'a iluveagatuna'ia, 'inega yubai edi vanue 'inaya itoatoa. <sup>7</sup> Ta  
omo'e 'inaya Meli ena 'unutau me'olotona venatunea. 'Inega gwama nana kalekoyega  
i'afwalia, ta yubai edi 'ebe'ai 'inaya ive'enovia.

### *Sifi adi to'itamakiavo itauya Iesu sabi 'itana*

<sup>8</sup> Ta di'we nana 'inaya sifi adi to'itamakiavo itoatoa mahala ta edi sifiavo i'ita'itamakidi.  
<sup>9</sup> 'Inega Kaiwabu ena tovale'ewa taha 'ifoqe luveafedi ta Kaiwabu ena simatala waiwaina  
guyayaidi 'inega qabudi imwaniniva. <sup>10</sup> 'Inega tovale'ewa nana vonedi vonaya, "Ge ona  
mwaniniva, ta 'esi ona qaiawa qiduana mana vale aqiaqina yamiea 'imia, ta nawale tomo-  
tau qabudi wese edi 'ebeqaiawa. <sup>11</sup> Ta vale nana ba'e 'idewana, ba'e 'itaga velovelovana  
'inaya Deibida ena 'abagaya ami To'etoyavua ni'au vi'oi. Tauna eda Kaiwabu Keliso.

\* 1:75: Tai 2:12-14 \* 1:76: Ais 40:3 \* 1:77: Iel 31:34 \* 1:78: Ais 60:1-2

<sup>12</sup> 'Inega ana 'ebealamani ba'e 'idewani, gwama nana kalekoyega i'afwalia ta yubai edi 'ebe'ai 'inaya ive'enovia ona 'itea 'eno'eno. E bena'e tauna gwama nana."

<sup>13</sup> Ta tuta nana 'inaya wese tovale'ewa qabudi i'ifoqe ta Yaubada iawahawatuboya, <sup>14</sup>\*

ivonaya,

"Yaubada mahalaya kana awatuboya

ta tomeqabu bwa'obwa'oya ena nuakolokolo 'idia 'eno'eno

e taudi toadaumwala ina lobe."

<sup>15</sup> Ta ni'au tovale'ewa dina i'evivi ivane mahalaya, 'inega sifi adi to'itamakiavo taudiege ivonaya, "Emavo, kana tauya Bedeliema 'inaya be yani nana Kaiwabu ni'a voneda kana 'itea."

<sup>16</sup> 'Inega ilukwayavoni itauya, ta Meli be Iosefa ilobedi, ta wese gwama nana yubai edi 'ebe'ai 'inaya i'itea. <sup>17</sup> I'itea ta 'abibodanaya tola'ai ni'a inoqolia gwama nana weaqina isimana 'ifoqeyea tomtau 'idia. <sup>18</sup> Ta tomeqabu vale ba'e inoqolia nuadi voqana sifi adi to'itamakiavo edi vona weaqina. <sup>19</sup>\* Ta Meli ba'e vona diavona giwalidia ia'uuya, ta weaqidi nuadi tonovea.

<sup>20</sup> 'Inega sifi adi to'itamakiavo i'evivi itauya ta Yaubada iawatuboya ta ana wawa igivaneyea, mana tovale'ewa nana ena vona 'idia ni'a inoqolia vonahaqiaqi, ta wese ana aqiaqi ni'au i'itea.

<sup>21</sup>\* Ta 'aubena 'eita (8) 'abibodanaya gwama nana 'wafina ida'ea ta igabea Iesu, tauna wawa nana lova Yaubada ena tovale'ewa taha Meli neidi tutana nawale ge ida valagata.

*Iesu i'ebe'ewea itauyeya Vanue Gwalagwalana 'inaya*

<sup>22-24</sup>\* Iesu ena vi'oi 'aubena 40 'abibodanaya Meli igivevunavunaqidi Mosese ena luvine 'inega. Gumwala 'inega Iosefa ma moqanena itauya Ielusalema ta edi guba ina a'uuya Yaubada 'inaya 'idewana lova ena luvine a'uuya vonaya, "Malasi magilafudi nage bunebune kekeyavaudi magilafudi ona vegubayedi." Ta wese ba'e tuta nana 'inaya gwama Iesu ina ve'ineiea Kaiwabu 'inaya, mana lova taha wese luvine Mosese 'inega a'uuya vonaya, "Gogama 'unutaudi me'olotodi 'aidega 'aidega ona awafeledi Kaiwabu 'inaya."

*Simioni ena awatubo be ena simana*

<sup>25</sup> Ta omo'e 'aubena nana Ielusalema 'inaya taha 'oloto ana wawa Simioni toatoa. Yaubada Simioni nana ni'a 'awatunutuqea, ta 'oloto nana Yaubada 'amayabea qiduna. Ta me ena bibitaqo ba'eba'e me Isileli adi To'etoyavua weaqina. Ta 'oloto nana Niboana Gwalagwalana ni'a luveagatuna'ia, <sup>26</sup> ta tawa ve'itea be ge na'aliga ana laba To'etoyavua Kaiwabu na'ita nugwetea.

<sup>27</sup> Ta Iosefa be Meli gwama Iesu ni'au imiea Vanue Gwalagwalana 'inaya be natudi weaqina ina viaqia tola'ai 'edewana me Diu adi luvine 'eno'eno. 'Inega Niboana Gwalagwalana Simioni venuaha'uuya 'inega lugu Vanue Gwalagwalana 'inaya. <sup>28</sup> 'Inega Simioni gwama nana 'avalei ta Yaubada awatuboya vonaya,

<sup>29</sup> "Kaiwabu, eu vona fofofola 'iguya

ni'au yalobe,

'inega tuta ba'e 'inaya

una awafelegu

be me egu qaiawa ena 'aliga,

<sup>30</sup>\* mana ni'a taugu mataguyega

To'etoyavua ya'itea.

<sup>31</sup> Ba'e tauna u'iva'ava'aia

ta ni'au ua'u'ifoqeyea qabuma 'iawamaya.

<sup>32</sup>\* Tauna taudi ge me Diu

adi togivesimatala

\* 2:14: Lk 19:38 \* 2:19: Lk 2:51 \* 2:21: Lk 1:31 \* 2:22-24: Luvi 12:1-8; 'lfo 13:2,12; Luvi 12:8

\* 2:30: Ais 52:10; Lk 3:6; Tai 2:11 \* 2:32: Ais 42:6; 49:6; 52:10

'inega ina alamaniana o'a togama,  
ta wese ima'a eu tomotauyavo  
me Isileli ina awatuboma  
mana To'etoyavua nana 'imega 'ifoqe."

<sup>33</sup> Ta Iesu tamana be inana nuadi voqana Simioni ena vonayavo natudi weaqina.  
<sup>34</sup> \* 'Inega Simioni vona veyolubedi ta 'abiboda Meli vonedi vonaya, "Ona 'itea, ba'e gwama nana Yaubada venua'ivinea be 'inega me Isileli vaina nagivebe'uyedi, ta wese vaina edi vetumaqana 'inega Yaubada ena veyoluba ina lobeana. Ta Yaubada gwama nana ni'a vetunea mai 'idaya nave'ebe'ita ena nuanua weaqina, ta tomotau ge ina 'awahaqi-aqiei. <sup>35</sup> 'Inega tauna edi nuanua 'wai'waividi nagive'ifoqeyedi. Ta omi'a Meli nawale emi nuavita kavonaya gita na'idawemi."

*Ana edi lukaiwa*

<sup>36</sup> Omo'e 'inaya taha tovesimasimana mevavinedi itoatoa adi wawa Ana. Ta taudi Fanuela natuna, Aseli ena gadeyega. Ta vavine dina ni'au ivekofekofe, mana lova ivaqi ta moqanedi maega itoa ya'wala seveni 'idewana. <sup>37</sup> Ta moqanedi ni'au 'aliga, 'inega ivewadawada'e itoatoa ta ya'wala 84 ni'a ilobeana. Ta vavine dina Vanue Gwalagwalana ge ida nogea, ta Yaubada i'amayabea ta iawahawatuboya 'aubena be wese velovelovana qabuna 'idia, ta ivevedede Yaubada weaqina. <sup>38</sup> Simioni ena vona ni'a lu'ovoia, e 'inega vavine dina imai Meli be Iosefa 'idia ta ilukaiwa Yaubada 'inaya. Ta tomeqabu iba'eba'e Ielusalema ana 'etoyavua weaqina isimana 'idia ivonaya, "Ada To'etoyavua ba'e ni'a mai!"

*Edi 'evivi Nasaleta 'inaya*

<sup>39</sup> \* Ba'e 'idewana Yaubada ena luvine 'inega yani qabuna ni'au iviaqidi. 'Inega i'evivi di'we Galili 'inaya mana taudi me Nasaleta. <sup>40</sup> 'Inega gwama nana veago me ena waiwai ta wese me ena alamani, ta Yaubada ena veyoluba qiduana gwama nana 'inaya 'eno'eno.

*Gwama Iesu tove'itayavo maega iveqae*

<sup>41</sup> \* Ya'wala 'aidega 'aidega 'idia Iesu inana be tamana i'wato'watovu Ielusalema 'inaya 'Auvivia Sagalina weaqina. <sup>42</sup> Ta tutana Iesu ana ya'wala tuwelo lobeana, 'inega maega i'watovu sagali nana weaqina, mana edi ilivu 'edewana.

<sup>43</sup> 'Auvivia Sagalina ana tuta ni'a gumwala, e 'inega Meli be Iosefa i'evivi itautauya edi 'abaga weaqina. Ta Iesu tamana be inana ge ida alamaniana gwama nana nawale Ielusalema 'inaya toatoa, <sup>44</sup> ta ivonaya be tauna yo'o maega ida tautauya. 'Inega itauya ana laba velovanea, 'inega Iesu isalia edi qabuyavo ta wese ediavo 'idia. <sup>45</sup> Ta gwama nana ge ida lobei, 'inega mahala vulihia i'evivi itauya Ielusalema 'inaya sabi salina.

<sup>46</sup> Isalisalia, ta 'aubena vetoina 'inaya ilobeana Vanue Gwalagwalana 'atamaninaya, ta me Diu edi tove'itayavo maega itoatoa ta vivineneqedi be wese vevetala'aiedi. <sup>47</sup> Ta tomeqabu ena vona aqiaqidi ta tunutunuqidi inoqolia inuavoqana aqiaqi, mana ena alamani qiduana. Ta tove'ita diavona yani qabuna weaqina ivetala'aiea, ta edi vetala'ai qabuna ana fata ve'iedi.

<sup>48</sup> Ta wese tutana tamana be inana i'itea nuadi voqana e 'inega inana ivoneaya, "Natugu, tola'ai weaqina ba'e 'idewani uviaviaqi 'imaya, 'inega me ema nuavita tamau maega asalisaliu?"

<sup>49</sup> 'Inega Iesu vonedia, "Tola'ai weaqina osalisaligu? Nage ge oda alamaniana ya'a luaqiaqiegu be Tamagu ena vanuea ena toatoa?" <sup>50</sup> Ta tamana be inana ge nuadi da'eqa'ui ena vona weaqina.

<sup>51</sup> \* 'Inega maega i'evivi Nasaleta 'inaya ta edi vona vematamatayagedi. Ta yani qabuna ni'a 'ifoqe natudi 'inaya ia'uya giwalidia ta nuadi tonovea.

<sup>52</sup> \* Ta Iesu ve'ena'i ta wese ena alamani veqidua, 'inega Yaubada qaiawa weaqina, ta

\* 2:34: Ais 8:14; Md 21:42; 1Fit 2:8 \* 2:39: Md 2:23 \* 2:41: 'Ifo 12:24-27; 23:14-17; Luve 16:1-8

\* 2:51: Lk 2:19 \* 2:52: 1Sam 2:26; Vos 3:4

tomotau i'awahaqiaqiea ta wese 'edewani iqaiawa.

### 3

*Ioni Togivebabitaiso ena lugaihi*

*(Madiu 3:1-12; Maki 1:1-8; Ioni 1:19-28)*

<sup>1</sup> Toluvine qiduana Sisa Taibilia me Loma edi 'ebeluvine ni'a luvine ya'wala 15 'inaya, ta 'ayanaya Fonitio Failato di'we Iudia ana gavana, ta Elodi Anitifasi di'we Galili ana toluvine, ta tuana Filifi di'we Itulia be Tilakonitia adi toluvine, ta Lisania di'we Abileni ana toluvine. <sup>2</sup> Ta ba'e toluvine diavona edi tuta luvine 'inaya toveguba qiduquadi Anasa be Kaiafa wese itoatoa, ta edi tuta 'inaya Yaubada ena vona mai Sakalaia natuna Ioni 'inaya tuta nana di'we tomotau geqana 'inaya toatoa. <sup>3\*</sup> 'Inega Ioni tovolu tauya go'ila Iolidani di'wenavo 'idia 'inega tomotau qabudi lugaihi 'idia vonaya, "Emi ilivu luveifana 'idiega ona nuagivila ta ena givebabitaisomi be 'inega Yaubada emi luveifana nanuataqodi."

<sup>4\*</sup> 'Idewani Buki Nugwenugweina 'inaya tovesimasimana Aisea simana 'ifoqeyea vonaya,

"Tovegabagaba taha di'we 'ava'avaya  
bonana qiduana 'inega vonaya,  
'Kaiwabu ena 'eda ona qadalia  
ta ona givetuvetunuqia.

<sup>5</sup> Ta bwanaga qabudi  
ona aledi be ina vedumi'a,  
ta 'awagou qabudi ona yamunidi,  
ta wese 'eda komwakomwadi  
ona givetunutunuqidi  
ta wese 'eda 'awa'awagoudi  
ona luvuyovuyoidi.

<sup>6</sup> Ta 'inega tomotau qabudi  
Yaubada ena 'etoyavua ina 'itea.' "

<sup>7\*</sup> 'Inega tomotau qabudi itauya Ioni 'inaya sabi babitaiso ta Ioni nana vonedi vonaya, "Omi'a tou'ava 'idewana mwata natunavo! Ta onuaia vonigo nawale Yaubada ena gamohoqala 'inega ona dena, waisa? Ta togama vonemi? <sup>8\*</sup> 'Inega luaqiaqiemi be emi nuagivila aqiaqi ona ve'itayea emi ilivu aqiaqidi 'idiega, ta ge ona vonaya, 'Ima'a Ebelamo 'aqegiginavo 'inega Yaubada nanuakolokoloyema.' Gebu otaqa! Yavona aqiaqiemi, Yaubada ana fata ami luseana dabo ba'e 'idiega Ebelamo 'aqegiginavo na'iva'ava'aidi. <sup>9\*</sup> Ta 'eguma emi ilivu ge aqiaqidi nawale Yaubada naluvematasabumi 'idewani 'aiwe 'eguma ge navuaqa aqiaqi nawale tomotau ina talaqa yavulei be 'aiwe 'ala'alata 'inaya ina felei na'alai."

<sup>10</sup> 'Inega qabudi Ioni ivetala'aiea ivonaya, "Isana ma'oda ana viaqa 'aiqa?"

<sup>11</sup> Ta Ioni vonedi vonaya, "Eguma toga o'a au kaleko magilafudi ta iau ge ana kalekomo, e 'inega taha una neia. Ta wese 'idewani 'eguma toga au 'abwaga 'eala e 'inega dibuna iau una neia."

<sup>12\*</sup> Ta wese vaina takesi ana to'ewayavo imai sabi babitaiso, ta 'inega Ioni 'inaya wese ivetala'aiea ivonaya, "Tove'ita, ima'a ma'oda ama luvine?"

<sup>13</sup> 'Inega Ioni vonedia, "Takesi ana luvineyega mane ona 'ewea tomotau 'idiega, ta ge taumiega luvetomana ona a'ui be ona 'ewe'ewei."

<sup>14</sup> Ta wese vaina toluavia ivevetala'aiea ivonaya, "Ta ima'a ma'oda ama luvine?"

'Inega Ioni vonedi vonaya, "Omi'a ami ve'ia ni'au ami fata ta weaqidi ona qaiawa. Ta ge u'avega be givemwaninivega ana luvetomana ona 'ewe'ewei."

\* 3:3: Via 13:24 \* 3:4: Ais 40:3-5 \* 3:7: Md 12:34; 23:33 \* 3:8: Ion 8:33,39 \* 3:9: Md 7:19 \* 3:12: Lk 7:29



<sup>15</sup> Ta tomotau me edi vetumaqana lova 'inega iba'eba'e To'etoyavua Keliso ena mai weaqina. Ta Ioni i'itea 'inega qabudi ivenuana magilafu ta ivonaya, "Nage tauna To'etoyavua nana nage gebu?"

<sup>16</sup> \* 'Inega Ioni vonedi vonaya, "Ya'a go'ilega ena givebabitaisomi ta taha 'oloto 'abibodaguyega maimai be Niboana Gwalagwalana ta wese 'aiwe 'ala'alata 'inega nage givebabitaisomi. Tauna qidua va'inena, 'inega ge daluaqiaqiegu be ana 'aqeyafayafa ena giyavui. <sup>17</sup> Ta 'oloto ba'e ena daimayega witi nagivutuqidi be vuaqina nahavuta 'aideganaya 'inega 'abiboda vuaqina aqiaqidi navedododi ena sailakaya, ta qainina 'aiwe 'ala'alata vatayana 'inaya na'alaidi."

<sup>18</sup> Ta wese vona qabuna 'inega Ioni tomotau qabudi vebibinedi ta wese vale aqiaqina lugaihiea 'idia. <sup>19</sup> \* Ta wese Ioni kini Elodi lugwaeyea, mana tauna tuana moqanena adi wawa Elodiasa vaqidi. Ta wese vaina ena ilivu luveifana weaqina lugwaeyea. <sup>20</sup> 'Inega Elodi diana vilei ta Ioni vanue 'ebeyoqona 'inaya a'uluguyea. Vonahaqiaqi, Elodi ilivu luveifana qabudi ni'a viaqidi, ta ba'e yani nana 'inega Elodi wese taha luveifana viaqia.

*Ioni Iesu givebabitaisoya*  
(Madiu 3:13-17; Maki 1:9-11)

<sup>21</sup> Ioni tomotau qabudi nawale gigivebabitaisodi, 'inega wese Iesu givebabitaisoya. Ta yani ba'e nugweta 'ifoqe ta 'abibodanaya Elodi Ioni a'uluguyea vanue 'ebeyoqona 'inaya. Ta tuta nana Iesu Yaubada 'inaya vevenoqi 'inega mahala 'elalamia, <sup>22</sup> \* ta Niboana Gwalagwalana ana 'ita 'idewani malasi webui mai Iesu 'inaya. 'Inega taha bona mahalega mai vonaya, "O'a Natu Otaqigu, ta weaqiu yaqaiqaiawa qiduana ta yaveveyolubeu."

*Iesu 'aqegiginavo weaqidi*  
(Madiu 1:1-17)

<sup>23</sup> \* Iesu ana ya'wala 30 'idewani ni'a lobe, 'inega ana veyoveyoya tomotau 'idia ve'ale viaqidi. Ta tomotau i'inanea vonigo tauna tamana Iosefa,

ta Iosefa tamana Eli,

<sup>24</sup> ta Eli tamana Matadi,  
ta Matadi tamana Libai,  
ta Libai tamana Meliki,  
ta Meliki tamana Ianai,

ta Ianai tamana Iosefa,  
<sup>25</sup> ta Iosefa tamana Matadaya,  
ta Matadaya tamana Emosi,  
ta Emosi tamana Neumi,  
ta Neumi tamana Esili,  
ta Esili tamana Nagai,

<sup>26</sup> ta Nagai tamana Mati,  
ta Mati tamana Matadaya,  
ta Matadaya tamana Semeni,  
ta Semeni tamana Ioseki,  
ta Ioseki tamana Ioda,

<sup>27</sup> ta Ioda tamana Ioanai,  
ta Ioanai tamana Lisa,  
ta Lisa tamana Selubabela,  
ta Selubabela tamana Salatieli,  
ta Salatieli tamana Neli,

<sup>28</sup> ta Neli tamana Meliki,  
ta Meliki tamana Adi,  
ta Adi tamana Kosami,  
ta Kosami tamana Elimadami,  
ta Elimadami tamana Eli,

<sup>29</sup> ta Eli tamana Iosua,

\* 3:16: Via 13:25 \* 3:19: Md 14:3-4; Mk 6:17-18 \* 3:22: Ion 1:32 \* 3:23: Lk 4:22; Ion 6:42

ta Iosua tamana Eliesa,  
 ta Eliesa tamana Iolima,  
 ta Iolima tamana Matadi,  
 ta Matadi tamana Libai,  
<sup>30</sup> ta Libai tamana Simioni,  
 ta Simioni tamana Iuda,  
 ta Iuda tamana Iosefa,  
 ta Iosefa tamana Ionami,  
 ta Ionami tamana Eliakimi,  
<sup>31</sup> ta Eliakimi tamana Melea,  
 ta Melea tamana Mena,  
 ta Mena tamana Matata,  
 ta Matata tamana Nedani,  
 ta Nedani tamana Deibida,  
<sup>32</sup> \* ta Deibida tamana Iese,  
 ta Iese tamana Obedi,  
 ta Obedi tamana Boasa,  
 ta Boasa tamana Salimoni,  
 ta Salimoni tamana Nasoni,  
<sup>33</sup> ta Nasoni tamana Aminadaba,  
 ta Aminadaba tamana Adamina,  
 ta Adamina tamana Ani,  
 ta Ani tamana Esiloni,  
 ta Esiloni tamana Felesi,  
 ta Felesi tamana Iuda,  
<sup>34</sup> ta Iuda tamana Iakobo,  
 ta Iakobo tamana Aisake,  
 ta Aisake tamana Ebelamo,  
 ta Ebelamo tamana Tila,  
 ta Tila tamana Naoli,  
<sup>35</sup> ta Naoli tamana Selugi,  
 ta Selugi tamana Leu,  
 ta Leu tamana Felegi,  
 ta Felegi tamana Ibeli,  
 ta Ibeli tamana Sila,  
<sup>36</sup> \* ta Sila tamana Kenani  
 ta Kenani tamana Afakisadi,  
 ta Afakisadi tamana Semi,  
 ta Semi tamana Noa,  
 ta Noa tamana Lemeki  
<sup>37</sup> ta Lemeki tamana Metusela,  
 ta Metusela tamana Inoki,  
 ta Inoki tamana Ieledi,  
 ta Ieledi tamana Malaleli,  
 ta Malaleli tamana Kenani,  
<sup>38</sup> \* ta Kenani tamana Inosi,  
 ta Inosi tamana Seti,  
 ta Seti tamana Adama,  
 ta Adama tamana Yaubada.

## 4

*Seitani Ieisu sitonovia*  
*(Madiu 4:1-11; Maki 1:12-13)*

<sup>1</sup> Niboana Gwalagwalana Ieisu ni'a luveagatuna'ia, 'inega Iolidaniega 'ebe'ewe tauea di'we 'ava'avaya. <sup>2</sup> 'Inega 'aubena be velovelovana 40 'idia Seitani Ieisu sitonovia vonigo Ieisu dagivebe'uea. Ta 'aubena diavona 'idia Ieisu ge da'ai'ai, 'inega botana qiduana lutionia.

\* 3:32: Lud 4:17-22    \* 3:36: Nug 11:10-26    \* 3:38: Nug 4:25-26

<sup>3</sup> Ta Seitani Iesu voneaya, “Eguma o’a Yaubada Natuna dabo ba’ena una vonei nave’abwaga.”

<sup>4</sup>\* Inega Iesu vona ’eviviea vonaya, “Gebu, mana Buki Nugwenugweina ’inaya taha vona ’eno’eno vonaya, ‘Tomotau yawaidi gebu ’abwaganamo ’inega ina lobei.’ ”

<sup>5</sup> Inega Seitani Iesu ’ebe’ewei i’watovu taha bwanaga qiduana debanaya ta omo’e ’inaya bwa’obwa’o ena di’we qabudi lukwayavonega ve’itea ta voneaya, <sup>6-7</sup> “Ba’e di’we diavona adi ’ita aqiaqi otaqidi ena neiu ’eguma ’iguya una iwa’odu, mana qabuna egu ’ebeluvine, ta ’eguma toga nuanuagu ena neia, e ana fata ena neia.”

<sup>8</sup>\* Ta Iesu vona ’eviviea vonaya, “Gebu, mana Buki Nugwenugweina gamonaya luvine ’eno’eno vonaya, ‘Eu Kaiwabu Yaubada ana ’aidega ’inaya una iwa’odu, ta wese una vetofewa ’inaya.’ ”

<sup>9</sup> Inega Seitani wese Iesu ’ebe’ewei tauyea Ielusalema ’inaya, ta Vanue Gwalagwalana deba otaqinaya vaneqea ta voneaya, “Eguma o’a Yaubada Natuna, ba’e ’inega una fifieu una webui ta ge una veilae. <sup>10</sup>\* Mana Buki Nugwenugweina simana vonaya,

‘Yaubada ena tovale’ewayavo  
naluvinedi ina ’itamakiu.

<sup>11</sup> Ta wese ena tovale’ewayavo  
ina ’alagamoiu ’inega ’aqeu  
gebu navelubai daboya.’ ”

<sup>12</sup>\* Ta Iesu ve’iea vonaya, “Buki Nugwenugweina vonaya, ‘Eu Kaiwabu Yaubada ge una sitonovi!’ ”

<sup>13</sup>\* Tutana Seitani ena sitonova qabuna Iesu ’inaya lu’ovoia, ’inega nogei ta tauya, ta mali tuta ’inaya wese na’evivi namai.

*Iesu ena viaqa di’we Galili ’inaya ve’ale  
(Madiu 4:12-17; Maki 1:14-15)*

<sup>14</sup> Inega Iesu Niboana Gwalagwalana ena waiwaiegea ’evivi tauya di’we Galili ’inaya, ta omo’e ’inaya valena yawala ’abaga taha taha ’idia. <sup>15</sup> Inega me Galili edi vanue tafwalolo ’idia ve’ita, ta tomotau qabudi iawatuboya.

*Me Nasaleta Iesu inogea  
(Madiu 13:53-58; Maki 6:1-6)*

<sup>16</sup> Ta ’abiboda mai Nasaleta ’inaya, omo’e ’abaga nana ’inaya lova vekilakai. ’Inega Sabatea lugu vanue tafwaloloya, mana tauna ena ilivu ’idewani. ’Inega ya’itoto Buki Nugwenugweina sabi avona. <sup>17</sup> Inega tovesimasimana Aisea ena ’wayavi ineia, ’abo tanaia ta ’wayavi nana lobeia vonaya,

<sup>18</sup>\* “Kaiwabu Niboanina ’iguya toatoa,  
mana tauna venua’ivinegu  
be luvetunegu yamai  
vale aqiaqina sabi simanina lukwalukwa ’idia.

Ta yoqoyoqonidi wese vetunegu ’idia,  
adi ’etoyavua weaqina sabi simanina.

Ta wese vetunegu matadi kwayakwayana  
’idia sabi giveaqiaqidi.

Ta wese luvetunegu  
totoa vita ’idia sabi ’etoyavuidi  
adi aviayavo nimadiege,  
<sup>19</sup> ta wese yamai  
Kaiwabu ena nuakolokolo sabi simanina ’imia  
vonigo ana tuta ni’a ’ifoqe.”

\* 4:4: Luve 8:3    \* 4:8: Luve 6:13-14    \* 4:10: Same 91:11-12    \* 4:12: Luve 6:16; 1Kol 10:9    \* 4:13: Ibe 2:18;  
4:15    \* 4:18: Ais 61:1-2; 58:6

<sup>20</sup> Ta Ieisu ni'a 'wayavi diavona avo 'ovoidi 'abo nunumia, 'inega buki ana to'itamaki nei 'eviviei ta toabui. Ta tovineneqa qabudi nuadi 'ewea ta ivekova makimakia, <sup>21</sup> 'inega vonedi vonaya, "Vona ba'e yahavoavodi lova imadu'wayavia ni'au onoqolia, ta ba'e 'itagana ana aqiaqi ni'a 'ifoqe 'imia."

<sup>22</sup> \* 'Inega tomotau qabudi Ieisu i'awahaqiaqiea ta nuadi voqana qiduana ena vona aqiaqidi weaqina ta ivonaya, "Oloto ba'e Iosefa natuna waisa, 'inega ma'oda ba'e yanidiavo ana fata?"

<sup>23</sup> 'Inega Ieisu vonedi vonaya, "Ni'a yahalamanimi nawale vona sesebai ba'e 'inega ona voneguya, 'O'a tovevihuqa adi togiveaqiaqi, 'inega tau'u una giveaqiaqieu!' Ta wese ona voneguya, 'Viaqa waiwai 'abaga Kafaneumi 'inaya uviaqidi, 'inega 'idewana wese ba'idia eu 'abagaya una viaqidi.' "

<sup>24</sup> \* Ta Ieisu wese vonedi vonaya, "Yavona aqiaqiemi, tovesimasimana taha ena 'abaga ana totoayavo 'idiega ge taha 'awahaqiaqi dalobea. <sup>25</sup> \* Ta ona nuave'avinia lova Yaubada gebu Ilaitia davetunei taha Isileli vavinena 'inaya tutana kulaka qiduana 'ifoqe ta ya'wala toi ta wai'ena sikisi gamonaya ge taha 'wei dawebei. <sup>26</sup> \* Ta 'esi taha wada'e 'abaga Salefati 'inaya di'we Saidoni gamonaya Yaubada Ilaitia vetunei sabi 'itamakidi. <sup>27</sup> \* Ta wese tovesimasimana Ilaisa\* ena tutaya tomotau qabudi 'wago'wagoidi Isileli 'inaya itoatoa. Ta gebu taha toga 'idiega daveaqiaqi, ta ana 'aidega Silia 'olotona Yaubada giveaqiaqiea, ana wawa Nemani†. Mana Yaubada wese taudi ge me Diu nuakolokoloyedi."

<sup>28</sup> Ieisu ena vonayavo ba'e 'idiega totafwalolo qabudi diadi vevilea. <sup>29</sup> 'Inega itovolo 'abo Ieisu ikafia ta 'abagega ilih'i 'ifoqeyea itauyeya edi 'abaga ana bwanaga 'inaya, 'abo bwanaga debanaya ivetovoloji ta vonigo ida 'auefalei dabega dabe'u. <sup>30</sup> Ta tauna qabu diavona wanai ta nuanidiega tauya.

*Ieisu taha 'oloto giveaqiaqiea niboana veifana 'inega*  
(Maki 1:21-28)

<sup>31</sup> 'Inega 'abiboda webui 'abaga Kafaneumi 'inaya di'we Galili gamonaya, ta Sabatea ve'ale tomotau ve'itedi. <sup>32</sup> \* Ta tomotau qabudi nuadi voqana ena ve'ita weaqina, mana me ena luvine ta wese me ena waiwai yeve'itedi.

<sup>33</sup> Ta vanue tafwalolo 'inaya taha 'oloto toatoa niboana luveifana ni'a 'wahalia, ta bonana qiduanega gaba vonaya, <sup>34</sup> "Ei Ieisu, o'a Nasaleta 'olotona, ta tola'ai weaqina umai 'imaya? Nage nuanuau una giveluveifema, waisa? Ni'a yahalamaniu, o'a Yaubada Natuna Gwalagwalana."

<sup>35</sup> Ta Ieisu luvinea vonaya, "Ulua'u, ta 'oloto bena'e 'inega uwebui mai!" 'Inega qabu matadia niboana luveifana 'oloto nana 'abifelei be'u bwa'obwa'oya, ta 'inega niboana nana 'ifoqe mai, ta 'oloto nana ge daveilaqe.

<sup>36</sup> 'Inega qabudi yo'alidi 'abo taudiega ivetala'aiedi ivonaya, "Ma'oda 'idewani ve'ita ba'e? Tauna me ena luvine ta wese me ena waiwai, 'inega ena vonega niboana luveifadi luvinedi i'ifoqe." <sup>37</sup> 'Inega Ieisu Valena yawala dadana Galili di'wenavo 'idia.

*Ieisu tovevihuqa qabudi giveaqiaqiedi*  
(Madiu 8:14-17; Maki 1:29-34)

<sup>38</sup> 'Inega Ieisu vanue tafwalolo 'inega webui tauya Saimoni ena vanuea ta lugu. Ta Saimoni lawana ivevihuqa 'wafidi lu'wea'weava. 'Inega Ieisu inoqiea sabi iuladi. <sup>39</sup> 'Inega Ieisu lugu ta tunuwebui tovevihuqa dina 'idia ta vihiqa nana luvinea. 'Inega 'wafidi ena lu'wea'weava awala. Ta lukwayavonega itovolo 'abo adi 'abwaga i'iva'ava'aia.

<sup>40</sup> Tutana baba'au ni'a lia'unuva 'inega tomotau edi tovevihuqayavo adi vihiqa taha taha i'ebe'ewedi imiedi Ieisu 'inaya. Ta Ieisu tovevihuqa 'aidega 'aidega nimanega

\* 4:22: Lk 3:23; Ion 6:42 \* 4:24: Ion 4:44 \* 4:25: 1Kin 17:1,7 \* 4:26: 1Kin 17:8-16 \* 4:27: 2Kin 5:1-14 \* 4:27: Ilaisa "Elisah" - tauna Yaubada ena tovesimasimana di'we Isileli gamonaya. (1Kin 19:16-21, 2Kin 2:1-25) † 4:27: Nemani "Naaman" - tauna di'we Silia 'olotona ta toluavia adi tovatatana ta 'wafina 'wago'wagoina. \* 4:32: Md 7:28-29

gitonovidi 'abo iveaiaqi. <sup>41</sup>\* Ta wese tomotau qabudi 'idiega niboana luveifadi i'ifoqe ta ivegabagaba ivonaya, "O'a Yaubada Natuna!"

'Inega Iesu awatayedi ge 'edewani ina vona 'aiqa, mana ni'a ialamania tauna To'etoy-avua nana Yaubada 'inega.

*Iesu lugaihi* 'abaga taha taha 'idia  
(Maki 1:35-39)

<sup>42</sup> Ta ni'a mahala vulihia 'inega Iesu 'abaga nana nogei ta tauya di'we tomotau gegana 'inaya. Ta tomotau qabudi Iesu isalia, ta tutana ilobea ivonea ivonaya, "Gebu una nogema ta o'a maega kana toatoa."

<sup>43</sup> 'Inega Iesu vonedi vonaya, "Vaina wese 'abaga 'idia ena tauya be Yaubada ena 'Ebeluvine valena ena lugaihiea, mana tauna weaqina Yaubada vetunegu yamai."

<sup>44</sup>\* 'Inega tutuvila tauya Iudia 'abaganavo qabudi 'idia, ta edi vanue tafwaloloyavo gamodia lugaihi dadana.

## 5

*Iesu ana to'abibodayavo gabedi*  
(Madiu 4:18-22; Maki 1:16-20)

<sup>1</sup>\* Taha tuta 'inaya Iesu tovtovolo lavu Genasaleta nanavinaya ta yo'o qabudi imai itoa vivilia ta Yaubada ena vona ivivineneqea. <sup>2</sup> 'Inega Iesu waga magilafudi 'itedi balabalaya mana togomana ni'a ivawebui ta edi gomana i'utu'utudi. <sup>3</sup> 'Inega Iesu taha waga geluya, ta toniwaga Saimoni vonei natalateteyea goyona balebalega. 'Inega Iesu toabui ta tomotau qabudi ve'itedi waga nana 'inega.

<sup>4</sup> Tuta nana ena ve'ita lu'ovoia 'inega Iesu Saimoni vonea vonaya, "Una talatete qawanaya eu gomana una bwa'uya ta 'iqana una 'onedi."

<sup>5</sup>\* Ta Saimoni voneaya, "Kaiwabu, velovelovana kuena gamonaya agomana 'wayoqa, ge taha 'iqana ada 'onei! Ta o'a eu vona weaqina gomana ena bwa'u 'eviviedi."

<sup>6</sup> Ibwa'uya 'inega 'iqana 'eala va'inedi i'onedi ta gomana dina tuta goyona ida abuya. <sup>7</sup> 'Inega ediavo edi waga di'wedea ilu'wayedi ina mai ina iuledi. 'Inega imai ta waga magilafudi iluveagatuna'idi be tuta goyona ida damana. <sup>8</sup> Ta tutana Saimoni Fita 'iqana adi yau 'itedi, 'inega Iesu 'aqenaya tuqatuqanega sobadi ta voneaya, "Kaiwabu unogegu, mana ya'a 'oloto luveifagu."

<sup>9</sup> Fita ba'e 'idewana vona 'aiqa mana enavo maega nuadi voqana qiduana 'iqana ni'a i'onedi weaqidi, <sup>10</sup> ta Saimoni Fita enavo Iemesa be Ioni taudi Sebedi natunavo wese inuavoqana. 'Inega Iesu Fita vonea vonaya, "Ge giwaliu naha'ala, ba'e 'itaga 'inega wese 'idewani tomotau una 'ona 'aiqedi."

<sup>11</sup>\* 'Inega edi waga ilihia vaneyedi 'awaboqea, ta edi kulufayavo qabudi inogedi ta Iesu i'abibodea.

*Iesu 'oloto taha 'wago'wagoina giveaiaqiea*  
(Madiu 8:1-4; Maki 1:40-45)

<sup>12</sup> Ta tutana Iesu toatoa taha 'abaga 'inaya, 'inega taha 'oloto 'wago'wagoina mai. Ta tuta nana Iesu 'itea 'inega givelukabwebwe 'aqenaya ta venoqiea vonaya, "Kaiwabu, 'eguma eu nuanua una giveaiaqiegu, mana o'a au fata!"

<sup>13</sup> Ta Iesu nimana si'otoia ta 'oloto nana 'wafina gitonovia voneaya, "E 'idewani, eu nuanua ena viaqia, uvevunavunaqa ta uveaiaqii!" 'Inega 'oloto nana ana 'wagota lukwayavonega 'evutuqia. <sup>14</sup>\* 'Inega Iesu 'oloto nana vematamagilafuyea voneaya, "Ge taha toga una vonevonei, ta una tauya toveguba 'inaya be una ve'itayeu. Ta 'inega eu guba una a'uya Yaubada 'inaya eu veaiaqii weaqina 'idewana ada luvine Mosese 'inega 'ebe'ita tomotau 'idia. 'Inega ina alamania ni'a uveaiaqii 'evivi."

\* 4:41: Md 8:29; Mk 3:11-12 \* 4:44: Md 4:23 \* 5:1: Md 13:1-2; Mk 3:9-10 \* 5:5: Ion 21:3-8 \* 5:11: Md 19:27 \* 5:14: Luvi 14:1-32

<sup>15</sup> Ta Ieisu Valena veqidua va'ine ta tomotau qabudi imai ena vona sabi noqolina, ta wese nuanuadi adi vihiqayavo nagiveaqaqiedi. <sup>16</sup> Ta Ieisu vaina tuta tomotau 'idiega tautauya taha di'we tomotau geqana 'inaya ta vevenoqi Yaubada 'inaya.

*Ieisu 'oloto belubeluna giveaqaqiea*

*(Madiu 9:1-8; Maki 2:1-12)*

<sup>17</sup> Taha 'aubena 'inaya Ieisu qabu veve'itedi. Ta vaina Falisiavo be luvine ana tove'itayavo imai 'abaga Ielusalema 'inega ta wese di'we Galili be Iudia 'idiega, ta tomotau qabudi maega itoatoa ta ivivineneqa. Ta tutana 'inaya Ieisu tovevihiqa giveaqaqiedi Kaiwabu ena waiwaiega.

<sup>18</sup> 'Inega vaina tomotau taha 'oloto belubeluna ma 'ivina i'avalei imiea nuanuadi ina lugueya Ieisu 'iawanaya ina a'uuya. <sup>19</sup> Ta ge adi fata mana qabu qidua va'inedi itoatoa, 'inega tovevihiqa nana i'avalei ivaneqea vanue debanaya, ta ana 'ubu iqeuni ta 'inega ma 'ivina ivekeuli webui tomotau qabudi nuanidia ta Ieisu 'iawanaya ia'uuya. <sup>20</sup> \* Ta Ieisu to'avala dina edi vetumaqana 'itea, 'inega tovevihiqa nana voneaya, "Iagu, eu luveifayavo ni'a yanuataqodi."

<sup>21</sup> Ta luvine ana tove'itayavo be Falisiavo taudiega ivetala'aiedi ivonaya, "Ba'e to'oloto, vonigo taunega ana wawa givaneqea kavona tauna Yaubada 'idewani. Mana Yaubada ana 'aidega otaqa ana fata luveifana nanuataqodi."

<sup>22</sup> Edi nuanua Ieisu ni'au alamania 'inega vonedi vonaya, "Tola'ai weaqina giwalimiega 'idewani onuanua 'aiqa? <sup>23</sup> Ta isana ma'oda ena vona 'aiqa 'oloto ba'e 'inaya, nage ena vonaya, 'Eu ilivu luveifana ni'au yanuataqodi', nage ena vonaya, 'Uya'itoto utauya'? <sup>24</sup> \* Ta nuanuagu ona alamania ya'a Tomotau Natuna me egu luvine waiwaina bwa'obwa'oya, 'inega agu fata tomotau edi ilivu luveifana ena nuataqodi." 'Inega Ieisu belubelu nana voneaya, "Yavoneu, uya'itoto eu 'ebana u'avalei ta utauya eu 'abagaya."

<sup>25</sup> 'Inega lukwayavonega ya'itoto tomotau qabudi 'iawadia ena 'ebe'eno 'avalei ta tauya ena 'abagaya, ta me ena qaiawa Yaubada awahawatuboya. <sup>26</sup> Ta tomotau qabudi nuadi voqana 'ena'ina ta me edi 'amayaba Yaubada iawatuboya ta ivonaya, "Ba'itagana taha yani 'ebenuavoqana ni'a ka'itea."

*Ieisu Libai gabea*

*(Madiu 9:9-13; Maki 2:13-17)*

<sup>27</sup> Ta 'abiboda Ieisu vanuega 'ifoqe ta taha takesi ana to'ewa ana wawa Libai 'itea ena 'ebefewa ana vanue 'inaya toatoa, 'inega voneaya, "Umai, u'abibodegu!" <sup>28</sup> 'Inega Libai ya'itoto ta yani qabuna nogedi 'abo Ieisu 'abibodea.

<sup>29</sup> 'Inega Libai 'abwaga qiduana 'iva'ava'aia ena vanuea Ieisu weaqina. Ta takesi ana to'ewayavo 'eala be wese vaina tomotau maega imai ena vanuea, ta qabudi i'ai. <sup>30</sup> \* Ta Falisi be wese luvine ana tove'itayavo qabudi maega itoatoa. Taudi Ieisu ana to'abibodayavo ilugwaeyedi ivonedia, "Tola'ai weaqina takesi ana to'ewayavo be wese toluveifadi maega o'ai'ai ta onumanuma?"

<sup>31</sup> 'Inega Ieisu edi vona ve'iea vonaya, "Taudi aqiaqidi ge nuanuadi togiveaqaqi, ta 'esi tovevihiqa nuanuadi togiveaqaqi. <sup>32</sup> Ya'a ge eda mai tunutunuqidi weaqidi, ta 'esi yamai toluveifadi sabi iuladi be yaqisa ina nuagivila."

*Ieisu ena vona vedede weaqina*

*(Madiu 9:14-17; Maki 2:18-22)*

<sup>33</sup> 'Inega Ieisu ivonea ivonaya, "Ioni ana to'abibodayavo vaina tuta ivevedede ta ivevenoqi Yaubada 'inaya. 'Idewani wese Falisiavo adi to'abibodayavo iviaviaqia. Ta ma'oda 'inega o'a au to'abibodayavo ge ida vedede, ta 'esi i'ai'ai be inumanuma kavokavovo?"

<sup>34</sup> \* 'Inega Ieisu vona sesebaiega vona 'eviviedi vonaya, "Ge wese daluaqiaqiea 'eguma vaqi ana qabuyavo ina vedede tuta nana tovaqi me'olotona maega itoatoa, waisa? <sup>35</sup> Ta

\* 5:20: Lk 7:48; Ais 43:25    \* 5:24: Ion 5:8    \* 5:30: Lk 15:1-2    \* 5:34: Ion 3:29

nawale tuta maimai 'inaya tovaqi nana ana aviayavo ina kafia ta ina tauyea, 'inega enavo me edi nuavita ina vedede.”

<sup>36</sup> Ta wese taha vona sesebai neidi vonedia, “Ge ana fata kaleko vauvauna matavusinega kaleko 'itu'ituwaina kana bwabwadei, mana nawale kaleko nana kana 'utuya 'inega matavusi vauvaunana nabwagogoma ta kaleko 'itu'ituwaina naeabu 'eviviea, ta wese matavusina vauvaunana naeabu kavovoya. <sup>37</sup> Ta wese ge taha toga 'oine vauvauna naiwaqa ukamanei wage nugwenugweina yubai 'wafidiega 'inaya, mana nawale 'oine vauvauna wage nana nanabahabuya ta 'inega 'oine nana naguiwaqa. <sup>38</sup> Ta 'esi luaqiaqiea be 'oine vauvauna kana iwaqia wage vauvauna yubai 'wafidiega gamonaya. <sup>39</sup> Ta wese 'eguma taha toga 'oine nugwenugweina numanuma nawale ge 'oine vauvauna nuanuana ta navonaya, “Oine nugwenugweina ana numa aqiaqi otaqina.””

## 6

*Isisu ana to'abibodayavo Sabate* 'inaya witi walona i'egigoluya  
(Madiu 12:1-8; Maki 2:23-28)

<sup>1</sup> \* Sabate taha 'inaya Iesu ana to'abibodayavo maega vaoqa gamonega itautauya. 'Inega ana to'abibodayavo witi walona i'egigoluya ta nimadiega iluqosodi ta i'ainidi.

<sup>2</sup> \* Ta vaina Falisi i'itedi 'inega ivonedia, “Tola'ai weaqina Sabate ana luvine ge oda 'amayabei ta 'esi oqeuqeuni?”

<sup>3</sup> \* 'Inega Iesu Falisiavo edi vona ve'iea vonaya, “Nage ge oda avoi Buki Nugwenugweina 'inaya Deibida weaqina tutana ma enavo ibotana? <sup>4</sup> \* 'Inega Yaubada ena vanue 'inaya lugu ta beledi gwalagwalana 'ewei ta 'ainia. Beledi nana ma ana luvine vonigo toveguba dimo luaqiaqiedi be ida 'ainia. Ta Deibida enavo wese ibotana 'inega neidi maega i'ainia.”

<sup>5</sup> 'Inega Iesu wese vonedi vonaya, “Ya'a Tomotau Natuna Sabate ana Kaiwabu!”

*Isisu 'oloto nimana belubeluna giveaqiaqiea*  
(Madiu 12:9-14; Maki 3:1-6)

<sup>6</sup> Wese taha Sabate 'inaya Iesu lugu vanue tafwalolo 'inaya veve'ita. Ta vanue nana 'inaya 'oloto taha toatoa nimana ana 'ataqi belubeluna. <sup>7</sup> Ta vaina luvine ana tove'itayavo be wese Falisiavo Iesu ivekova makimakia 'eguma 'oloto nana nagiveaqiaqiea Sabate 'inaya. Nuanuadi vonigo taha 'iuna ina lobei be ina ve'ewea. <sup>8</sup> Ta edi nuanua Iesu ni'au alamania 'inega 'oloto nana voneaya, “Uya'itoto umai ta utovolo tomotau 'iawadia!” 'Inega Iesu ena vona 'abibodea.

<sup>9</sup> 'Inega Iesu Falisi ma ediavo vonedi vonaya, “Ba'e egu vetala'ai 'imia, tola'ai luaqiaqieda Sabate 'inaya kana viaqi, nage yani aqiaqina kana viaqi, nage yani luveifana, nage tomotau kana 'etoyavuidi nage kana giveluveifedi?”

<sup>10</sup> 'Inega Iesu tomotau qabudi 'ita makimakidi ta 'oloto nana voneaya, “Nimau usi'otoi!” 'Inega nimana si'otoia ta veaqiaqi. <sup>11</sup> Omo'e 'inega Falisi ma ediavo igamosoala aqiaqi, 'inega taudiega iveqae tola'ai ina viaqi Iesu 'inaya be ina givelua'ui.

*Isisu ena tovaletuyanayavo tuwelo venua'ivinedi*  
(Madiu 10:1-4; Maki 3:13-19)

<sup>12</sup> Tuta omo'e 'inaya Iesu 'watovu taha bwanaga 'inaya. 'Inega velovelovana gamonaya vevenoqi Yaubada 'inaya. <sup>13</sup> Ta mahala ahalia 'inega ana to'abibodayavo qabudi gabedi imai. Ta gamodiega adi yau tuwelo dimo venua'ivinedi be ina vetoaletuyana 'inaya, ta adi wawayavo ba'e: <sup>14</sup> Saimoni (tauna wese Iesu gabea Fita), ta taina Anidulu. Ta wese Iemesa be, Ioni be, Filifi be, Batolomio be, <sup>15</sup> Madiu be, Tomasi be, mali Iemesa tauna Alifio natuna, ta wese mali Saimoni tauna wese igabea Seloti, <sup>16</sup> ta wese Iudasa (tauna mali Iemesa natuna), ta 'ebeluo'ova Iudasa Isakaliota, tauna nawale Iesu nasuluvea.

\* 6:1: Luve 23:25 \* 6:2: Ion 5:10 \* 6:3: 1Sam 21:1-6 \* 6:4: Luvi 24:5-9

*Isisu tovevihuqa qabudi giveaqaqiedi*  
(Madiu 4:23-25)

<sup>17</sup> 'Inega Iesu ena tovaletuyanayavo maega bwanagega iwebui ta dumi'aya itovoto-  
volo. Ta dumi'a nana 'inaya ana to'abibodayavo qabudi ta wese yo'o qiduadi itoatoa.  
Taudi imai Ielusalema 'inega, ta wese di'we Iudia 'abaganavo 'idiega. Ta wese mwade'wa  
ana totoayavo Taia ta Saidoni 'abaganavo 'idiega iva'auta. <sup>18</sup> Taudi imai Iesu ena vona  
sabi noqolina, ta wese adi vihiqayavo nuanuadi nagiveaqaqiedi. Ta wese tomotau taudi  
niboana luveifadi ni'a 'wahalidi maega imai. <sup>19</sup> Ta qabu dina nuanuadi Iesu ina gitonovi  
'inega adi vihiqa nahawala ta wese niboana luveifadi ina 'ifoqe 'idiega, mana tuta qabuna  
Iesu 'inega waiwai 'ifo'ifoqe, e 'inega ana fata tomotau qabudi nagiveaqaqiedi.

*Nuavita nagivilea qaiawa*  
(Madiu 5:1-12)

<sup>20</sup> 'Abibodanaya Iesu ana to'abibodayavo 'ita makimakidi ta vonedi vonaya,  
"Omi'a lukwalukwami ona qaiawa,  
mana Yaubada ena 'Ebeluvine omi'a weaqimi.

<sup>21</sup> \* Ta omi'a ma botanimi ona qaiawa,  
mana nawale gamomi nakoko.

Ta wese omi'a ba'itagana odoudou ona qaiawa,  
mana nawale ona dagi.

<sup>22</sup> \* Ona qaiawa 'eguma tomotau ina vevoalanemi  
nage ina nogemi  
nage ina vegilemi  
nage ina 'awaluveifemi  
emi 'abiboda ya'a Tomotau Natuna weaqigu.

<sup>23</sup> "Ta tuta nana vita diavona ina 'ifoqe weaqidi ona qaiawa be ona ou ta ona lavua,  
mana ami ve'ia 'ena'ina mahalaya 'eno'eno. Ta ona nuave'avinia toveilivu luveifa  
diavona tubudiavo lova tovesimasimana iveilivu luveifedi, e 'edewanina omi'a tuta omo'e  
'inaya wese tomotau ina veilivu veifemi.

<sup>24</sup> "Ta omi'a tovekaikaiwabu nuakokolomi,  
mana emi toa meaqana ni'au olobea,  
ta nawale gebu.

<sup>25</sup> Ta tomeqabu omi'a tuta ba'e 'inaya  
gamomi kokoya nuakokolomi,  
mana nawale botana qiduana ona lobe.

Ta wese 'eguma tuta ba'e 'inaya  
odagidagi nuakokolomi,  
mana nawale ona nuavita ta ona dou.

<sup>26</sup> Nuakokolomi 'eguma tomotau qabudi  
ina 'awahaqiaqiemi,  
mana lova tubudiavo wese 'edewanina  
tosimana 'e'eu'au'avidi i'awahaqiaqiedi.

*Voalamiavo ona veyolubedi*  
(Madiu 5:38-48; 7:12a)

<sup>27</sup> "Egu ve'ita ba'e ona noqolia: Voalamiavo ona veyolubedi, ta wese tomeqabu  
inogenogemi ona veilivu aqiaqiedi. <sup>28</sup> Ta wese tomeqabu ivona ve'alamatemi ona vona  
veyolubedi, ta taudi iveilivu veifemi weaqidi ona venoqi Yaubada 'inaya. <sup>29</sup> Ta 'eguma  
taha tomotau 'ae'aeuya navunuqa 'inega nimana ge una ve'iei, ta 'esi una tunugivila una  
awafelei wese di'wenaya navunuqa. Ta wese 'eguma taha toga au kaleko na'ewea, 'inega  
ge una awatayei ta 'esi au kwakwalufai wese una neia. <sup>30</sup> Ta wese 'eguma taha tomotau  
'iuya nanoqi yani taha weaqina, e 'inega yani nana una neia. Ta 'eguma taha toga eu

\* 6:21: Ve 7:16-17; Same 126:5-6; Ais 61:3      \* 6:22: Ion 15:19; 16:2; 1Fit 4:14



kulufa na'ewe ta 'inaya 'eno'eno, e 'inega kulufa nana weaqina ge una noqi 'eviviei.  
<sup>31</sup>\* Ta tola'ai nuanuami tomotau ina viaqia 'imia, e wese omi'a 'idewana ona viaqa 'aiqa 'idia.

<sup>32</sup> "Ta 'eguma vaina tomotau iveyolubemi ta taudimo oveyoluba 'eviviedi 'inega ge taha wese ana aqiaqi 'imia, mana toluveifadi wese ediavo iveyolubedi, 'inega taudi ta omi'a emi ilivu 'aidegana. <sup>33</sup> Ta wese 'edewani 'eguma vaina tomotau ihiulemi ta wese taudimo oiuledi, 'inega ge taha wese ana aqiaqi 'imia, mana toluveifadi wese ediavo ihiuledi. 'Inega taudi ta omi'a emi ilivu 'aidegana. <sup>34</sup> Ta ma'oda ana aqiaqi 'eguma tomotau emi veyoluba ni'a oneidi ta nuanuami ina nei 'eviviemi? Ge wese aqiaqina, mana 'idewani toluveifadi iviaqia ediavo 'idia ta inuaia ve'ia ina loba 'eviviea.

<sup>35</sup> "Ta omi'a luaqiaqiem be voalamiavo ona veyolubedi ta ona veilivu aqiaqiedi. Ta wese 'eguma taha yani ona neidi ta 'idia 'eno'eno, e 'inega gebu yani nana weaqina ona ba'eba'e be ina nei 'eviviemi. 'Eguma 'idewani ona viaqia e 'inega nawale ami ve'ia qiduana ona lobe, be 'inega omi'a Toatoa Vanena natunavo. Mana Yaubada tomotau aqiaqiedi ta toluveifadi be wese taudi ge nuanuadi ina lukaiwa 'inaya nuakolokoloyedi.

<sup>36</sup> "Inega omi'a wese tomotau ona nuakolokoloyedi 'idewani Tamami nuakolokoloyemi.

*Tomotau ge ona 'awaluveifedi*  
*(Madiu 7:1-5)*

<sup>37</sup>\* "Tomotau ge ona 'awaluveifedi, 'inega nawale Yaubada ge wese na'awaluveifemi. Ta wese tomotau gebu ona ve'ewedi, be 'inega omi'a wese ge ve'ewa ona lobei. Ta 'esi tomotau ona nuataqodi be 'inega omi'a wese Yaubada nanuataqomi. <sup>38</sup>\* Ta omi'a tomotau emi veyoluba ona nei kavovodi, 'inega wese Yaubada nanei kavovomi ta ena veyoluba qidua va'inena 'imia naguiwaqia, mana tola'ai ona viaqia tomotau 'idia, e wese 'edewani Yaubada naviaqa 'aiqa 'imia."

<sup>39</sup>\* 'Inega Iesu vona sesebai ba'e neidi vonaya, "Nage ana fata taha matakwaya iana wese matana kwayakwayana navanugwetea? Gebu! Mana 'eguma 'edewanina, nawale magilafudina guli gamonaya ina be'u. <sup>40</sup>\* Ta wese 'edewani tosikulu taha gebu ana fata be ena tove'ita ena alamani naveqidua va'inei. Ta 'eguma tosikulu nana ena alamani naveqidua 'inega magilafudi edi alamani nave'aidega.

<sup>41</sup> "Ge daluaqiaqieu be taiu una voneaya, 'O'a matauya 'aiwe kismanina 'eno'eno', mana o'a wese matauya kigabugabu 'eno'eno ta ge uda 'itei? <sup>42</sup> 'Inega taiu ge una voneaya, 'Taigu, 'aiwe kismanina matauyega ena 'ewa yavulea', mana o'a wese kigabugabu qiduana matauya 'eno'eno ta ge uda 'itei. Vonahaqiaqi, o'a tou'ava! Ta 'esi luaqiaqieu be o'a kigabugabu matauyega una madu'ewa yavulei be yaqisa una 'ita aqiaqi, ta 'abiboda taiu matanega 'aiwe kismanina una 'ewa yavulea.

*'Aiwe vuaqina*  
*(Madiu 7:16-20; 12:33-35)*

<sup>43</sup> "Aiwe aqiaqina gebu ana fata navuaqa veifa. Ta wese 'edewana 'aiwe luveifana gebu ana fata navuaqa aqiaqi. <sup>44</sup> 'Inega 'aiwe 'aidega 'aidega vuaqidi 'idiega kana alamanidi to'aiwe aqiaqina ta to'aiwe luveifana. Vonahaqiaqi, gebu ana fata 'ue 'inega 'ala'ai vuaqina kana lobei, ta wese talitali 'inega ge ana fata mwakikoi vuaqina kana lobei. <sup>45</sup> Ta tomotau edi ilivu wese 'edewani. 'Eguma taha 'oloto ena nuanua aqiaqina, e 'inega wese ena ilivu qabuna aqiaqina. Ta 'eguma taha 'oloto ena nuanua luveifana, e 'inega wese ena ilivu qabuna luveifana. Mana 'eguma nuanua luveifadi giwalimia i'eno'eno 'inega wese tuta qabuna 'awamiega vona luveluveifadi i'ifo'ifoqe.

*Vanue ana to'eyoqona magilafudi*  
*(Madiu 7:24-27)*

\* 6:31: Md 7:12 \* 6:37: Md 6:14 \* 6:38: Mk 4:24 \* 6:39: Md 15:14 \* 6:40: Md 10:24-25

<sup>46</sup>\* “Ta tola’ ai weaqina o’awa-Kaiwabuyegu, ta egu vona gebu oda matayagedi?”

Ta wese Iesu vonedi vonaya, “Vona diavona yaveveqaeeyedi ’eguma aiqabu ina noqolidi ta ina viaqidi, e ’inega taudi ’idewana taha to’eyoqona ena vanue nayoqonia ena alamani aqiaqi ’inega. Nugweta ena avutugu aqiaqina navenua ’ivinia ta wese ena ’oqola falafaladi ’idewana agumo naluda’edi. Ta ’inega bwa’obwa’o aqiaqinaya navetovolodi ta vanue nana nayoqonia. <sup>47</sup> Ta ’eguma taha toga namai ’iguya ta egu vona nanoqolidi ta naviaqidi, ’inega tauna ’edewani taha to’eyoqona ena vanue nayoqonia ena alamani aqiaqi ’inega. E tauna weaqina ena ve’itemi. <sup>48</sup> Tauna ena avutugu aqiaqina nugweta navenua ’ivinia, ’inega ena ’oqola ’idewani agumo miedi ta vetovolodi, ta ’inega ena vanue yoqonia. Ta tuta nana ’wei qiduana webui ta seuseu inoqa be yaqina vunuqa ’inega ge ana fata daqeu yavulei, mana ena vanue yoqonia bwa’obwa’o aqiaqina ’inaya ta wese ’oqola falafaladi ’inega.

<sup>49</sup> “Ta ’eguma taha toga egu vona nanoqolia ta ge naviaqidi, e tauna ’edewani to’eyoqona vanue gelasa ’inaya ena vanue yoqonia ta ’oqola kavokavovo vetovolodi gelasaya. Ta tutana ’wei qiduana webui ta seuseu inoqa, ’inega vanue nana buini ta qeu yavulea ge taha da’eno.”

## 7

### *Iesu toluavia edi tovatatana ena tofewa giveaqiaqiea*

*(Madiu 8:5-13)*

<sup>1</sup> Iesu ena vona tomatou ’idia ni’a lu’ovoia ’inega nogedi ta lugu ’abaga Kafaneumi ’inaya. <sup>2</sup> Ta ’abaga nana ’inaya toluavia me Loma edi tovatatana taha me ena tofewa itoatoa. Tovamatana nana ena tofewa ba’e veyoluba aqiaqiea, ta vihiqa qiduana lobe be tuta goyona na’aliga. <sup>3</sup> Ta tovatatana nana Iesu ena mai valena noqolia. ’Inega vaina me Diu taudi ’abaga ana tovanugwetayavo vetunedi Iesu ’inaya ina noqiei namai be ena tofewa nagiveaqiaqiea. <sup>4</sup> Ta kaiwabu diavona ni’au imai Iesu ’inaya ta ivenoqiea ivonaya, “Kaiwabu, nuanuama qiduana una mai kana tauya iama taha ’inaya, ta ana vita una givemeaqania, mana tauna ’oloto aqiaqina <sup>5</sup> ta me Diu qabuma veveyolubema, ta wese ema vanue tafwalolo ni’au yoqonia weaqima.”

<sup>6</sup> Inega Iesu awafela ta maega itautauya. Tuta goyona ina ’ifoqe tovatatana nana ena vanuea, ’inega wese enavo vaina vetunedi Iesu ’inaya sabi awatayana ta imai ivoneaya, “Kaiwabu, ema tovatatana vonaya o’a ’oloto qiduau ’inega ge daluaqiaqieu be una lugu ena vanuea. <sup>7</sup> Ta wese ge daluaqiaqieu be tauna maega ’edaya ona veloba. Ta nuanuana ba’ade una vonamo ta ’inega ena tofewa naveaqiaqi. <sup>8</sup> Mana tauna wese ni’a alamania luvine ana ’abiboda weaqina ta ana tovatatana qiduqiduadi ’abi’abibodedi. Ta wese ena toluaviayavo luluvinedi, ta ’eguma taha navoneaya, ‘Utayua!’ e natauya, ta ’eguma taha wese navoneaya, ‘Umai!’ e namai. Ta wese ’eguma ena tofewa taha navoneaya, ‘Ba’e uviai!’ e ’inega naviaqia.”

<sup>9</sup> Ba’e vona diavona Iesu ni’a noqolia, ta nuana voqana aqiaqi, ’inega tunugivila tomatou qabudi i’abi’abibodea ’idia ta vonedi vonaya, “Vonahaqiaqi, lova ge wese taha toga eda ’ita lobei me Isileli ’imiega ena vetumaqana ’oloto ba’e ’idewani!”

<sup>10</sup> Inega tovatatana enavo i’evivi itauya ena vanuea, ta tofewa nana i’itea ni’au veaqiaqi.

### *Iesu wada’e natudi me’olotona ’aligea giveya’itoto ’evivia*

<sup>11</sup> Ta ge tuta kuena ’abibodanaya Iesu tauya taha ’abaga ’inaya ana wawa Neini. Ta ana to’abibodayavo be wese yo’o qiduadi i’abibodea. <sup>12</sup> Inega ’ifoqe ’abaga nana ana ’ebelugu ’iawanaya, ’inega taha to’aliga tomatou i’avalei i’ifo’ifoqe miea ’abagega. Ta to’aliga nana tauna wada’e natuna me’olotona ’aidega otaqina. ’Inega wada’e nana tomatou qabudi maega ’abagega itautauya sabi tavunina. <sup>13</sup> Tutana Iesu wada’e nana ’itea ’inega nuakolokoloyea voneaya, “Ge una dou.” <sup>14</sup> Inega vanaqo ta to’aliga nana ana uma gitonovia ta to’avala dina iveutovolo. Inega Iesu vonaya, “Kilakai, yavoneu

\* 6:46: Md 7:21

uya'itoto!" <sup>15</sup>\* 'Inega 'aligege ya'itoto 'evivi ta ve'ale veqae. 'Abo Ieisu kilakai nana inana nei 'eviviedi.

<sup>16</sup>\* Omo'e 'inaya tomotau qabudi me edi 'amayaba Yaubada imwaninivea ta iawatuboya ivonaya, "Tovesimasimana qiduana ni'au 'ifoqe mai nuanidaya. Ba'e Yaubada ena iula ita'a ena tomotauyavo 'idaya."

<sup>17</sup> Ta Ieisu Valena yani ba'e weaqina iyawalea di'we Iudia 'abaganavo 'idia, ta wese di'we taha taha 'idia.

*Ioni Togivebabitaiso ena vetala'ai Ieisu weaqina*  
(Madiu 11:2-19)

<sup>18</sup> Ta Ioni ana to'abibodayavo Ieisu ena viaqayavo weaqina isimanea 'inaya. 'Inega Ioni ana to'abiboda magilafudi gabedi imai <sup>19</sup>\* ta luvetunedi ina tauya Kaiwabu 'inaya ta ina vetala'aiea ina vonaya, "Nage o'a To'etoyavua nana tauna weaqina aba'eba'e, nage mali 'oloto weaqina ana ba'eba'eyea?" 'Abo itutuvila itauya.

<sup>20-21</sup> Ta omo'e tutana 'inaya Ieisu tovevihuqayavo adi vihiqa taha taha 'idiega giveaqaqiedi, ta wese niboana luveifadi tomotau 'idiega 'wavi 'ifoqeyedi. Ta wese matadi kwayakwayana giveaqaqiedi. 'Inega tuta nana magilafudina imai Ieisu 'inaya ivoneaya, "Ioni Togivebabitaiso vetunema amai sabi vetala'aieu nage o'a To'etoyavua nana, nage mali 'oloto ana ba'eyea?"

<sup>22</sup>\* 'Inega magilafudi edi vetala'ai Ieisu ve'iea vonaya, "Ona 'evivi be Ioni ona vematamagilafuyea yani diavona ni'au onoqolidi ta o'itedi weaqina, mana matadi kwayakwayana ni'a i'ita aqiaqi be, 'aqedi belubeluna itauya aqiaqi be, 'wago'wagoidi ni'a 'wafidi ve'evau 'evivi be, teniqadi kwavana vona ni'a inoqolia be, to'aliga iya'itoto 'evivi mayawaidi, ta wese lukwalukwadi vale aqiaqina ni'au inoqolia. <sup>23</sup> 'Inega ona tauya Ioni ona vonea weaqigu ge navenuana magilafu, mana 'eguma taha toga ena vetumaqana 'iguya ge nadawalili e tauna naqaiawa."

*Ieisu simana Ioni weaqina*

<sup>24</sup> Ioni ana to'abibodayavo ni'a i'evivi itauya, 'inega Ieisu ve'ale tomotau qabudi 'idia Ioni weaqina simana vonaya, "Lova qabumi di'we tomotau geqana 'inaya otauva Ioni ena vona sabi noqolina, ta tola'ai nuanuami vonigo oda 'itei? Nage taha 'oloto dawalilina kavona didiala yaqina yueyuea o'itea? Gebu! <sup>25</sup> Nage otauva taha 'oloto ana kaleko kaikaiwabuna sabi 'itana? Gebu, mana taudi ma adi kaleko kaikaiwabuna ta edi kulufa qiduana tolumine qiduquadi edi vanue 'ena'ena'ina 'idia itoatoa. <sup>26</sup>\* 'Inega tola'ai weaqina otauva di'we tomotau geqana 'inaya? Nage onuaia vonigo tovesimasimana taha oda 'itea, waisa? Vonahaqiaqi, 'oloto nana ni'a o'itea tovesimasimana qabudi veqidua va'inedi. <sup>27</sup>\* Ioni nana weaqina lova Yaubada Buki Nugwenugweina 'inaya ba'e 'idewani maduvonayea,

'Egu tovale'ewa ena vetunei nanugweta,  
be eu 'eda naqadalia.'"

<sup>28</sup> 'Inega Ieisu wese vonaya, "Ioni tauna totoa bwa'obwa'o qabudi veqidua va'inedi, ta tomeqabu Yaubada ena 'Ebelumine gamonaya itoatoa taudi Ioni iveqidua va'inea."

<sup>29</sup>\* 'Inega yo'o dina ta wese takesi ana to'ewayavo Ieisu ena vona ba'e inoqolia ta Yaubada ena 'eda i'awahaqiaqiea ta iawatuboya, mana taudi lova Ioni givebabitaisodi.

<sup>30</sup>\* Ta Falisiavo be luvine ana toalamaniavo Yaubada ena nuanua weaqidi inogea, mana taudi ge nuanuadi lova Ioni dagivebabitaisodi.

<sup>31</sup> 'Inega Ieisu vonedia, "Omi'a lagata ba'e 'itaga ma'oda otoatoa 'aiqa, ta ma'oda 'inega ena giveleleqa 'aiqemi emi ilivu weaqina? <sup>32</sup> Nage ena vonemi omi'a kavona gogama 'ebevegimwane gamonaya ilahalaha ta ediavo 'idia ivegabagaba ivonaya, 'Emavo ma'oda, ima'a alavulavua

\* 7:15: 1Kin 17:23; 2Kin 4:36 \* 7:16: Lk 1:68 \* 7:19: Same 40:7; Mal 3:1; Ve 1:8 \* 7:22: Ais 35:5-6; 61:1; Lk 4:18 \* 7:26: Lk 1:76 \* 7:27: Mal 3:1 \* 7:29: Lk 3:12 \* 7:30: Md 21:32

ta ge oda ouou,  
ta wese a'ewa'ewabamu  
ta ge oda doudou.'

<sup>33</sup> Ba'e 'ebevetalatutula nana ni'a yavonemi, mana Ioni Togivebabitaiso mai ta beledi ge da'ai'ai ta 'oine ge danumanuma. Ta 'inega omi'a ovonaya be Ioni niboana luveifana da'wahali. <sup>34</sup>\* Ta ya'a Tomotau Natuna yamai ya'ai'ai ta yanumanuma ta wese weaqigu olugwae ovonaya, "Oloto ba'e 'ai 'avana ta wese numa 'avana, ta wese takesi ana to'ewayavo be tomotau luveluveifadi veiaianedi.' <sup>35</sup> Tomeqabu Yaubada ena alamani qiduana ialamani aqiaqiea, e taudi alamani nana wese i'awahaqiaqiea ta i'abi'abibodea."

*Taha vavine toluveifana Ieisu* 'aqena dede'wega iwaqia

<sup>36</sup> Taha tuta Falisi taha ana wawa Saimoni Ieisu 'ebe'ewei maega ina 'ai. 'Inega Ieisu lugu ena vanuea ta toabui sabi 'ai. <sup>37</sup>\* Ta omo'e 'abaga nana 'inaya taha vavine ena ilivu luveifana toatoa. Vavine nana ni'au alamania Falisi ena vanuea Ieisu 'ai'ai. 'Inega dede'wa meilana aqiaqina ta ana maisa agona ma botolina miea viaviaqina alabasita 'inega. <sup>38</sup> 'Inega lugu ta tuqatuqanega sobadi Ieisu 'aqenaya doudou ta mataelunega Ieisu 'aqena vebutea ta debana kueni 'inega talaveayea, ta wese Ieisu 'aqena yaoqia 'inega 'abiboda dede'wa nana 'ewei ta 'aqena iwaqia. <sup>39</sup> 'Inega Falisi nana nuana tonovea Ieisu weaqina ta taunega vonaya, "Oloto ba'e 'eguma tauna tovesimasimana, e 'inega nahalamanian vavine ba'e ni'a gigitonovia tauna toluveifana."

<sup>40</sup> Ta Ieisu voneaya, "Saimoni, nuanuagu taha yani weaqina ena voneu."

Ta Saimoni vonaya, "Kaiwabu, uvonegu."

<sup>41</sup> 'Inega Ieisu voneaya, "Tomotau magilafudi iloaga tovekaikaiwabu taha 'inaya. Taha tomotau ana aga qiduana kavona ya'wala 'aidegina nafewa ana ve'ia 'idewani. Ta wese iana ana aga tufwana goyona kavonaya wai'ena 'aidegina nafewa ana ve'ia 'idewani. <sup>42</sup> Ta magilafudina adi aga ge adi fata ina ve'iei, 'inega kaiwabu nana magilafudina adi aga nuavetavunia. 'Inega ena vetala'aieu magilafudina 'idiega togama kaiwabu nana nalukaiwa qiduana 'inaya?"

<sup>43</sup> 'Inega Saimoni Ieisu ena vona ve'iea vonaya, "Nage 'oloto nana tauna ana aga qiduana nalukaiwa qiduana kaiwabu nana 'inaya."

Ta Ieisu voneaya, "Vonahaqiaqi, eu nuanua tunutunuqina."

<sup>44</sup> 'Inega Ieisu tunugivila vavine nana 'inaya ta vonaya, "Saimoni, ba'e vavine nana ena viaqa weaqigu u'itea gebu 'idewani o'a, mana eu vanuea yaluguwai ta go'ila 'aqegu ana 'utu weaqina gebu uda neigu. Ta vavine ba'e mataelunega 'aqegu 'utudi ta debanega talaveayedi. <sup>45</sup> Ta wese eu lukaiwa ge uda ve'itaye'i 'iguya yaoqega, ta 'esi tauna tuta nana ya'ifoqe ve'ale 'aqegu 'eyaoyaoqidi. <sup>46</sup> Ge wese dede'wa uda iwaqia 'iguya ta tauna ena dede'wa meilana aqiaqinega 'aqegu iwaqidi. <sup>47</sup> Tauna ena luveifana qabuna ni'au yanuavetavunidi, 'inega veveyolubegu qiduana. Ta 'eguma togama ena luveifana goyona ena nuataqoya, 'inega wese ena veyoluba 'iguya goyona."

<sup>48</sup> 'Inega Ieisu vavine nana voneaya, "Eu luveifana ni'au yanuataqoya."

<sup>49</sup> Ta tomotau diavona nawale i'ai'ai Ieisu ena vona inoqolia ta taudiega iveveqae ivonaya, "Isana to'oloto ba'e, mana luveifana qabuna nuanuataqodi?"

<sup>50</sup>\* 'Inega Ieisu vavine nana voneaya, "Eu vetumaqana 'inega ni'au 'etoyavua ulobe'a, 'inega me eu nuadaumwala una tauya."

## 8

*Vivine vaina Ieisu ma enavo ihiiuiledi*

<sup>1</sup> 'Abiboda Ieisu tutuvila tauya 'abaga qiduqiduadi be goyogoyodi 'idia ta Yaubada ena 'Ebeluvine valena aqiaqina lugaihiea. Ta Tuwelo dina maega itauya. <sup>2</sup>\* Ta wese vaina vivine maega iluvivila, taudi lova 'idiega niboana luveifadi Ieisu 'wavinidi i'ifoqe, ta wese

\* 7:34: Lk 15:2    \* 7:37: Md 26:7; Mk 14:3; Ion 12:3    \* 7:50: Lk 8:48; 18:42    \* 8:2: Md 27:55-56; Mk 15:40-41; Lk 23:49

adi vihiqayavo giveaqiaqiedi. Taudi vivine dina adi wawayavo ba'e: Meli Magidala, lova tauna 'inega niboana luveifadi adi yau seveni Ieisu 'wavinidi i'ifoqe,<sup>3</sup> ta wese Ioana, taudi kini Elodi ena tofewa ana wawa Kusa moqanena, ta wese Susana be vaina vivine maega. Ba'e vivine dina edi kulufayega Ieisu ma enavo ihiuledi ta i'itamakidi.

*Witi vewanina vona sesebaina*  
(Madiu 13:1-9; Maki 4:1-9)

<sup>4</sup> Taha tuta 'inaya qabu qiduadi 'abaga taha taha 'idiega imai ta itoava'auta Ieisu 'inaya. 'Inega vona sesebaiega ve'itedi vonaya,

<sup>5</sup> "Tovaoqa taha ena vaoqaya tauya ta witi vewanina veyavuledi, ta vaina vewana 'edabalaya iavuta, 'inega tomotau 'aqediega i'evaosoqosodi, ta manu i'itedi 'inega iwebui mai ta i'ainidi. <sup>6</sup> Ta vaina vewana dabodabo 'inaya iavuta ta ge bwa'obwa'o qiduana, 'inega itabo ta 'abiboda imwatuqu, mana bwa'obwa'o nana ge niginigina. <sup>7</sup> Ta wese vaina vewana talitali gamonaya iavuta, ta maega itabo viniviniyoa, 'inega talitali vewaiwai ta fai ve'aligidi. <sup>8</sup> Ta wese vaina vewana bwa'obwa'o aqiaqina 'inaya iavuta ta itabo ta iveqidua 'inega ivuaqa. Ta 'idiega bolimana aqiaqina lobe, mana vewana 'aidega 'aidega 'idiega 100 lobedi."

'Inega Ieisu tomotau qabudi vonedi vonaya, "Eguma ma taniqami vona ba'e ona noqolia."

*Vona sesebai ena 'ifoqe 'iuna*  
(Madiu 13:10-17; Maki 4:10-12)

<sup>9</sup> Ta 'abiboda Ieisu ana to'abibodayavo ivetala'aiea ivonaya, "Vona sesebai ba'e, ma'oda ana alamani?"

<sup>10</sup> \* 'Inega Ieisu vonedia, "Omi'a Yaubada ena 'Ebeluvine gamo aqiaqina ana alamani ni'a awafelea 'imia.

'Ta mali tomotau vona sesebaiega yaveve'itedi, mana inoqonoqolia  
ta nuadi ge da'eqa'ui,  
ta wese ma matadi,  
ta ge ida 'ita aqiaqiea.' "

*Witi vewanina vona sesebaina Ieisu givesimalia*  
(Madiu 13:18-23; Maki 4:13-20)

<sup>11</sup> 'Inega Ieisu vonaya, "Vona sesebaina ana giyavua ba'e 'edewana: Vewani nana ni'a ya'inanea tauna Yaubada ena vona. <sup>12</sup> Ta vaina tomotau kavona vewana dina 'edabalaya iavuta, mana Yaubada ena vona inoqolia, ta Seitani maimai ta vona nana giwalidiega 'ewa'ewa yavulea, 'inega ge adi fata Yaubada ina vetumaqanei be 'etoyavua ina lobei. <sup>13</sup> Ta vaina tomotau kavona vewana dina iavuta bwa'obwa'o ma dabodabona 'inaya, mana Yaubada ena vona inoqolia ta weaqina iqaiawa. Ta kwalamidi gebu, 'inega tuta kukusana 'inaya ivetumaqana, ta tuta nana Seitani nasitonovidi 'inega ina be'u kwayavona. <sup>14</sup> Ta vaina tomotau kavona vewana dina talitali gamonaya iavuta, mana taudi Yaubada ena vona inoqolia, ta edi toa be wese kaikaiwabu weaqina inuanua, ta wese bwa'obwa'o ana qaiawa 'inaya iawafeledi, 'inega Yaubada ena vona ge davuaqa 'idia. <sup>15</sup> Ta 'esi vaina tomotau kavona vewana dina bwa'obwa'o aqiaqina 'inaya iavuta. Taudina aqiaqi otaqidi ta giwalidi iawafelea Yaubada 'inaya, mana ena vona inoqolia ta ikafi'i'ihia, e 'inega vuaqa aqiaqina 'ifo'ifoqe 'idiega."

*Lamufa vona sesebaina*  
(Maki 4:21-25)

<sup>16</sup> \* 'Inega wese Ieisu vonedi vonaya, "Gebu taha toga lamufa nagabui naha'ukwaivei 'ulena nage 'ivi 'ayanaya, ta 'esi vunavunaqaya naha'ui be 'inega tomeqabu ilugu vanuea nasimalidi.

\* 8:10: Ais 6:9-10 \* 8:16: Md 5:15; Lk 11:33

<sup>17</sup>\* “Mana yani qabuna ’wai’waivina be a’ua’ukwaivina nawale na’ifoqe vunavunaqaya ta tomotau qabudi ina ’itea ta wese ina alamani aqiaqiea.

<sup>18</sup>\* “’Inega yani qabuna onoqonoqolia e ona nuave’avina aqiaqiea. Mana tomeqabu egu vona inoqola aqiaqiea e nawale edi alamani nave’ena’i. Ta tomeqabu egu vona ge ida noqolia, e nawale edi alamani goyona ’idia ’eno’eno Yaubada na’ewa yavulea.”

*Isisu inana be tainavo isalia*  
(Madiu 12:46-50; Maki 3:31-35)

<sup>19</sup>’Abibodanaya Iesu inana be tainavo imai sabi ’itana. Ta qabu qidua va’inedi itoatoa, ’inega ge adi fata ina lugu Iesu ’inaya. <sup>20</sup>’Inega taha tomotau Iesu voneaya, “Kaiwabu, inau be taimwavo ’atamanaya itovotovolo, ta nuanuadi ina ’iteu.”

<sup>21</sup>’Inega Iesu vonedi vonaya, “Tomeqabu Yaubada ena vona inoqolia ta ivelumata-matayagea, e taudi inagwavo be wese taigwavo.”

*Isisu wedilia wese nufula givedaumwalia*  
(Madiu 8:23-27; Maki 4:35-41)

<sup>22</sup>Taha tuta ’inaya Iesu ana to’abibodayavo vonedi vonaya, “Kana gelu kana vauka-mana lavu di’wenaya.” ’Inega taha waga igelui ’abo itauya. <sup>23</sup>Tuta nana ivavabala Iesu matana dune ta ’eno’eno waga gamonaya. ’Inega yaqina waiwaina ’ifoqe ta nufula qiduadi waga gamonaya goi vedodoya, ’abo tuta goyona ida damana.

<sup>24</sup>’Inega to’abiboda dina idivanoya ivoneaya, “Kaiwabu, Kaiwabu, uya’itoto mana tuta goyona kana damana!”

’Inega Iesu ya’itoto, ta yaqina be nufula lugwaeyedi vonedia, “Olua’u!” Tuata yaqina be nufula ’avalagwaedi.

<sup>25</sup>’Inega Iesu ana to’abibodayavo vonedi vonaya, “Ma’oda? Nage ge oda vetu-maqanegu, waisa?”

Ta taudi imwaniniva ta wese nuadi voqana, ’abo taudiega ivonaya, “To’oloto ba’e, mana yani qabuna luluvinedi, ta wese yaqina be nufula bonana ivematamatayagea?”

*Isisu taha ’oloto gamonega niboana luveifadi ’wavi ’ifoqeyedi*  
(Madiu 8:28-34; Maki 5:1-20)

<sup>26</sup>Ta ni’au di’we Galiliega ivaukamana ilugu me Gelasine edi di’we ’inaya. <sup>27</sup>Iesu ni’a webui balabalaya, ’inega taha ’abaga nana ana ’oloto ’ifoqe mai ’inaya. Ta ’oloto nana niboana luveifadi ni’a i’wahalia. Ta tuta kuena ge davekaleko ta wese vanuea ge datoatoa, ta ’esi tuta qabuna deba’unu ’idia toatoa. <sup>28-29</sup>Ta tuta kuena ’inaya niboana luveifana ’oloto nana luvekwavekwavea, ’inega tomotau nimana be ’aqena iyoqonidi seniega ta i’itamakia. Ta seni nana ’eluhufeufedi ta niboana luveifana ’ebe’ewei tauyea di’we ilumakavinaya ’idia.

Ta tutana ’oloto nana Iesu ’itea ’inega ’alabwau ta ’aqenaya givelukabwebwe. ’Inega Iesu voneaya, “Niboana luveifana, ’oloto bena’e ’inega u’ifoqe mai!”

’Inega niboana nana bonana qiduanega gaba vonaya, “Ei Iesu, o’a Yaubada Toatoa Vanena Natuna, tola’ai nuanuau una viaqi ’iguya? Yavevenoqieu, visiqe ge una neigu.”

<sup>30</sup>’Inega Iesu vetala’aiea voneaya, “Ma’oda au wawa?”

’Inega vonaya, “Agu wawa ’Ea’ealima”, mana niboana luveifadi koyadi ni’au ilugu ’oloto nana gamonaya ta itoatoa.

<sup>31</sup>Ta niboani dina Iesu ’inaya ivenoqi waiwai ivonaya, “Gebu una felawebuiema vetoa ge ana ’ebel’ovoamo ana wawa Abisi ’inaya.”

<sup>32</sup>Ta taha bwanaga veanaya bawe qabudi iduaduala. ’Inega niboana luveifadi Iesu ivenoqiea nahawafeledi ina lugu bawe ’idia, e ’inega Iesu awafeledi. <sup>33</sup>’Inega i’ifoqe ’oloto nana gamonega ta bawe ’idia ilugu, ta bawe diavona ikwava ta koyadi ivegaligali’wa’wa itauya dabega iwebui lavuya ’abo igavivila.

\* 8:17: Md 10:26; Lk 12:2      \* 8:18: Md 25:29; Lk 19:26

<sup>34</sup> Bawe adi to'itamakiavo yani qabuna 'ifoqe ni'a i'itea, 'inega ivihila itauya, ta valena isimana dadanea 'abaga qiduquadi be goyogoyodi ana totoayavo 'idia. <sup>35</sup> 'Inega imai be nuanuadi wese taudi matadiega ina 'itea tola'ai ni'a 'ifoqe. Ta tutana imai leisu 'inaya 'inega 'oloto nana i'itea lova niboana luveifadi iluvekwavea. Tauna ena nuanua ni'au veaqiaqi ta vekaleko 'abo Iesu 'aqenaya toabui toatoa. Ta tomotau qabudi imwaniniva.

<sup>36</sup> Ta tomotau diavona Iesu ena viaqayavo ni'a i'itedi 'abibodanaya i'evivi edi 'abagaya ta 'oloto nana lova niboana luveifadi i'wahalia ena veaqiaqi weaqina ivelulu'uyayea ediavo 'idia. <sup>37</sup> 'Inega me Gelasine qabudi imwaniniva qiduana ta Iesu ivonea vonigo nanogedi ta edi di'we 'inega natauya. 'Inega Iesu wagaya gelu 'evivi nogedi tauya. <sup>38</sup> Ta 'oloto nana tawadega veaqiaqi mai Iesu 'inaya venoqiea vonaya, "Nage ana fata ena 'abibodeu?"

'Inega Iesu 'oloto nana luvetunei voneaya, <sup>39</sup> "Ge au fata una 'abibodegu, ta 'esi una 'evivi una tauya eu 'abagaya, ta Yaubada ena veyoluba qiduana 'iuya weaqina una velulu'uyayea."

E 'inega 'oloto nana tauya, ta tola'ai Iesu ni'a viaqia 'inaya simana dadanea 'abaga nana gamonaya.

*Yailo natuna vevihia*

*(Madiu 9:18-19; Maki 5:21-24)*

<sup>40</sup> Tutana Iesu ma ana to'abibodayavo i'evivi Galili 'inaya, 'inega qabu qiduadi me edi qaiawa Iesu i'ebe'ewea, mana tauna weaqina iba'eba'e. <sup>41</sup> 'Inega taha 'oloto ana wawa Yailo, tauna vanue tafwalolo ana tovanugweta, mai Iesu 'aqenaya iwa'odu ta venoqiea maega ina tauya ena vanuea, <sup>42</sup> mana natuna mevavinena 'aidega otaqina tuta goyona na'aliga. Ta gwama nana ana ya'wala tuwelo 'idewana ni'a lobeaa.

'Inega Yailo maega 'edaya itautauya, ta wese qabu qidua va'inedi i'abibodedi ta Iesu ivelia'ia.

*Vavine taha nuanuana Iesu ana kaleko nagitonovia*

*(Madiu 9:20-22; Maki 5:25-34)*

<sup>43</sup> Ta qabu dina nuanidia taha vavine ma ana vihiqa maega itautauya. Ta ana vihiqa sulalina inoqa ya'wala tuwelo 'idia, ta nawale inoinoqa, mana ge taha toga ana fata dagiveaqiaqiei. <sup>44</sup> 'Inega vavine nana Iesu 'abibodanega mai 'abo ana kwakwalufai noyana gitonovia, ta omo'e tutana 'inaya sulalina yafaha kwayavonia.

<sup>45</sup> 'Inega Iesu vonaya, "Togama gitonovigu?"

'Inega qabudi ivegeqa ta Fita voneaya, "Kaiwabu, u'itedi qabu qiduadi ivevelia'avala 'inega ilu'oneu."

<sup>46</sup> Ta Iesu voneaya, "Taha toga agu kwakwalufai gitonovia, mana yalutonovia 'iguyega egu waiwai 'ifoqe."

<sup>47</sup> Ta vavine nana nuanuana naoukwaiva, ta ge ana fata mana Iesu ni'a alamania ena waiwai vaukamana 'inaya. 'Inega vavine nana me ena tatava mai Iesu 'inaya ta 'aqenaya iwa'odu. 'Inega tomotau qabudi 'iawadia simana 'ifoqeyea tola'ai weaqina Iesu ana kwakwalufai gitonovi, ta ma'oda 'inega veaqiaqi kwayavona.

<sup>48</sup> \* 'Inega Iesu vavine nana voneaya, "Natugu, eu vetumaqana 'inega ni'a uveaqiaqi. Uya'itoto me eu nuadaumwala una tauya."

*Yailo natuna 'aligea Iesu giveya'itotoya*

*(Madiu 9:23-26; Maki 5:35-43)*

<sup>49</sup> Iesu nawale vonavona vavine nana 'inaya, 'inega vanue tafwalolo ana tovanugweta Yailo ena vanuega taha tomotau vale miea 'inaya vonaya, "Natuhu yawaina ni'a gumwala, 'inega Tove'ita ge una ve'aqe visiqi."

<sup>50</sup> Vale ba'e Iesu noqolia 'inega Yailo vonea vonaya, "Ge giwaliu naha'ala, ta 'esi una vetumaqanamo, natuhu nawale naveaqiaqi."

\* 8:48: Lk 7:50

<sup>51</sup> 'Inega itutuvila itauya 'abo vanuea i'ifoqe. Ta Ieisu tomotau qabudi awatayedi ge taha toga nalugu. Ta nuanuana Fita be, Ioni be Iemesa ta wese gwama nana tamana be inana maega ina lugu. <sup>52</sup> Ta vaina tomotau nawale idoudou ta wese i'ewa'ewabamu gwama nana weaqina. 'Inega Ieisu vonedia, "Elovemi, ge ona dou! Gwama ba'e ge da'aliga ta 'esi'eno motaiva 'eno'eno."

<sup>53</sup> 'Inega todou Ieisu idagiea, mana ialamania gwama ba'e ni'a 'aliga. <sup>54</sup> 'Inega ilugu ta Ieisu gwama nimanaya kafi ta voneaya, "Natugu, uya'itoto!" <sup>55</sup> 'Inega gwama nana yawaha 'evivi ta lukwayavonega ya'itoto. 'Inega Ieisu gwama inana be tamana vonedi 'abwaga ina neia na'ai. <sup>56</sup> Yani ba'e weaqina tamana be inana nuadi voqana aqiaqi. Ta Ieisu luvinedi vonedia, "Gebu taha toga 'inaya ona simana egu viaqa ba'e weaqina."

## 9

### *Ieisu Tuwelo dina vetunedi (Madiu 10:5-15; Maki 6:7-13)*

<sup>1</sup> Ieisu Tuwelo dina gaba va'auqidi, 'inega ena luvine be wese ena waiwai neidi, 'inega adi fata niboana luveifadi tomotau 'idiega ina 'wavinidi ina 'ifoqe, ta wese adi vihiqayavo ina giveaqiaqiedi. <sup>2</sup> 'Inega vetunedi itauya ta Yaubada ena 'Ebeluvine valena ina lugaihiea tomotau 'idia, ta wese tovevihiqayavo ina giveaqiaqiedi. <sup>3</sup> \* 'Inega vonedi vonaya, "Ge taha yani ona 'ewei emi luvivila 'inaya, ge emi kewala, nage kode, nage 'abwaga, nage mane, nage ami kaleko vemagilafuna. <sup>4</sup> Ta 'eguma taha toga na'ebe'ewemi ena vanuea, 'inega ona lugu 'inaya, ta ona toatoa ana laba 'abaga nana ona nogea. <sup>5</sup> Ta 'eguma tomotau ge ina 'ebe'ewemi edi vanuea, 'inega tutana 'abaga nana ona nogei 'aqemiega fwayafwaya ona vavutuvutuqa yavulei. Ta ba'e viaqa nana nave'ebe'ita 'idia nawale vita ina lobe." <sup>6</sup> 'Inega Tuwelo dina itutuvila itauya, ta 'abaga taha taha 'idia vale aqiaqina ilugaihiea, ta wese tovevihiqayavo igiveaqiaqiedi.

### *Kini Elodi nuana voqana Ieisu weaqina (Madiu 14:1-12; Maki 6:14-29)*

<sup>7</sup> \* Ta tuta ba'e 'inaya kini Elodi Ieisu ena viaqayavo valena noqolia, 'inega nuana voqana qiduana ta giwalina a'ala mana vaina tomotau ivonaya, "Ioni Togivebabitaiso 'aligege ya'itoto 'evivi."

<sup>8</sup> Ta vaina tomotau ivonaya, "Ilaitia wese 'ifoqe 'evivi."

Ta wese vaina ivonaya, "Nage tauna tovesimasimana nugwenugweidi taha 'idiega, ta ba'itagana ni'a ya'itoto 'evivi."

<sup>9</sup> \* Ta Elodi vonaya, "Lova ya'a egu luvineyega Ioni magana ida'ea, ta isana to'oloto ba'e tomotau valena ivonavonayei?" 'Inega Elodi sali waiwai nuanuana Ieisu na'itea.

### *Ieisu tomotau qabudi ve'ainidi (Madiu 14:13-21; Maki 6:30-44; Ioni 6:1-14)*

<sup>10</sup> Tutana Ieisu ena tovaletuyanayavo edi luvivila 'inega i'evivi imai, 'inega edi fewa qabuna weaqina isimana 'inaya. Ta 'abiboda Ieisu 'ebe'ewedi ta maega itauya taha 'abaga ana wawa Bedesaida 'inaya, nuanuana adi 'aidega omode ina toatoa. <sup>11</sup> Ta tomotau qabudi valena inoqolia, 'inega taudi wese Ieisu itala'obei itauya 'inaya. 'Inega Ieisu 'ebe'ewedi imai ta Yaubada ena 'Ebeluvine weaqina ve'itedi, ta wese adi vihiqayavo giveaqiaqiedi.

<sup>12</sup> Ta baba'au ni'a lia'unuva, 'inega Tuwelo dina imai Ieisu 'inaya ivoneaya, "Kaiwabu, ba'e di'we nana tomotau geqana, e 'inega yo'o ba'ena una luvetunedi ina tauya 'abaga taha taha di'wedaya 'idia, ta adi 'abwaga be edi 'ebe'eno ina sali."

<sup>13</sup> 'Inega Ieisu vonedi vonaya, "Omi'a 'abwaga ona neidi ina 'ai."

\* 9:3: Lk 10:4-11    \* 9:7: Md 16:14; Mk 8:28; Lk 9:19    \* 9:9: Lk 23:8



Ta taudi ivoneaya, “Ima’a ama ’abwaga ge ’ealina, u’itei beledi nima ’aidegana ta ’iqana magilafudimo i’eno’eno. Nage nuanuau ana tauya ta qabu diavona adi ’abwaga ana gimwaneana, waisa?”

<sup>14</sup> Inega Iesu ana to’abibodayavo vonedia, “Tomotau qabudi ona vonedi ina toabui adi yau 50 guguna taha taha ’idia.” Ta qabu diavona ’oloto adi yau 5,000 ’idewani.

<sup>15</sup> Inega Iesu ena luvine i’abibodei, ta tomotau qabudi itoabui guguna taha taha ’idia. <sup>16</sup> Inega Iesu beledi nima ’aidegana ta wese ’iqana magilafudi ’ewedi ta ’ita vane mahalaya ta weaqidi lukaiwa ta gitomwedi. Inega ana to’abibodayavo neidi ta ivewila’ayea tomotau qabudi ’idia, <sup>17</sup> abo qabu dina i’ai ta gamodi ’elukoko. Ta ’abiboda Iesu ana to’abibodayavo ’abwaga ’awagigidi iva’auqia ta ’onena tuwelo iluveagatuna ’idi.

*Fita ena simana Iesu weaqina*

*(Madiu 16:13-19; Maki 8:27-29)*

<sup>18</sup> Ta taha ’aubena ’inaya Iesu ana to’abibodayavo maega itoatoa, ta Iesu ana ’aidega vevenoqi Yaubada ’inaya. Ta ’abiboda ana to’abibodayavo vetala’aiedi vonaya, “Ma’oda tomotau edi vona weaqigu ya’a togama?”

<sup>19</sup> \* Ta ana to’abibodayavo ivoneaya, “Tomotau vaina ivonaya vonigo o’a Ioni Togivebabitaiso, ta vaina ivonaya vonigo o’a Ilaitia, ta vaina wese ivonaya vonigo o’a taha tovesimasimana ’aligega uya’itoto ’evivi.”

<sup>20</sup> \* Inega wese vetala’aiedi vonedia, “Ta omi’a, ma’oda emi nuanua vonigo ya’a togama?”

Ta Fita voneaya, “O’a To’etoyavua Yaubada ’inega.”

*Iesu ana ’abiboda weaqina*

*(Madiu 16:20-28; Maki 8:30-9:1)*

<sup>21</sup> Omo’e ’inaya Iesu ana to’abibodayavo luvine waiwaina neidi be ba’e yani nana weaqina ge ina vevonavonayei tomotau ’idia. <sup>22</sup> \* Inega Iesu wese vonedi vonaya, “Ya’a Tomotau Natuna nawale visiqa ’ena’ina ena lobeana ’abaga ana tovanugwetayavo be toveguba qiduquadi ta wese luvine ana tove’itayavo ’idiega, mana nawale ina nogegu be ina luve’aligigu, ta ’aubena vetoana ’inaya Yaubada nagiveya’itoto ’eviviegu ’aligega.”

<sup>23</sup> \* Inega Iesu tomotau qabudi vonedi vonaya, “Eguma taha toga nuanuana na’abibodegu ’inega ge tauna weaqina nanuanua, ta ’esi luaqiaqiea be taunega ana ’etoluai na’avalei ta ’aubena ’aidega ’aidega na’abibodegu. <sup>24</sup> \* Ta ’eguma taha toga yawaina navegagalea nawale yawaina naluve’waivia, ta ’eguma taha toga yawaina nahawafelea weaqigu ta na’aliga, e nawale yawaina naloba ’eviviea. <sup>25</sup> Ta ’eguma taha toga bwa’obwa’o ana kaikaiwabu qabuna na’ewedi ta ’abiboda yawaina naluve’waivia, ’inega tola’ai ana aqiaqina? Gebu!

<sup>26</sup> \* “Ya’a Tomotau Natuna ’eguma taha toga weaqigu ta wese egu ve’ita weaqina nainiyauyau ta navegeqegu, e ya’a wese tauna ena vegeqea tuta nana ya’a me egu simatala qiduana, ta wese Tamagu ena tovale’ewayavo edi simatala aqiaqi otaqinega ena ’evivi mai. <sup>27</sup> Yavona aqiaqi ’imia, tomotau vaina ’imiega ba’idia otovotovololo ge ona ’aliga ana laba Yaubada ena ’Ebeluvine matamiega ona ’itea.”

*Iesu ana ’ita vedumaduma*

*(Madiu 17:14-18; Maki 9:14-27)*

<sup>28</sup> Iesu ana ’abiboda weaqina ve’itedi gumwala. Inega ’aubena ’eita (8) ’abibodanaya Fita be Ioni ta wese Iemesa Iesu ’ebe’ewedi maega i’watovu taha bwanaga ’inaya sabi venoqi. <sup>29</sup> Tutana Iesu nawale vevenoqi ’inega ’iawana ana ’ita vedumaduma ta wese ana kaleko vewadawadaeya otaqa kavonaya namala simatalina. <sup>30</sup> Inega ’oloto magilafudi Mosese be Ilaitia i’ifoqe, <sup>31</sup> \* ta edi ’ifoqe kavona taha simatala qiduana dayayaqa. Ta Iesu maega iveveqae ena ’aliga weaqina nawale Ielusalema ’inaya.

\* 9:19: Lk 9:7-8 \* 9:20: Ion 6:68-69 \* 9:22: Lk 9:44; 18:32-33 \* 9:23: Md 10:38; Lk 14:27 \* 9:24: Md 10:39; Lk 17:33; Ion 12:25 \* 9:26: Md 10:33; Lk 12:9 \* 9:31: Lk 9:22

<sup>32</sup> \* Ta Fita ma enavo 'wafidi lu'wata'wata 'abo i'eno nuafani i'eno'eno. Ta tuta nana iya'itoto 'inega Iesu simatalina qiduana i'itea, ta wese 'oloto magilafudi di'wenaya itovotovolo i'itedi. <sup>33</sup> Tuta goyona magilafudi Iesu ina nogei, 'inega Fita Iesu 'inaya vonaya, "Kaiwabu, luaqiaqieda 'eguma ba'idia kana toatoa! 'Inega didi toi ana yoqonidi, taha o'a weaqiu ta taha Mosese weaqina ta wese taha Ilaitia weaqina." Ba'e 'idewani Fita vona 'aiqa, mana ge dahalamaniana tola'ai vonevonei.

<sup>34</sup> Fita nawale vonavona, 'inega debadia taha gawata webui mai talakabubudi 'inega to'abiboda dina imwaniniva. <sup>35</sup> \* 'Inega gawatega taha bona inoqolia vonaya, "Ba'e Natu Otaqigu vevenua'ivinina. Tauna ena vona ona noqolia!"

<sup>36</sup> Ta bona nana ni'a awala, 'inega Iesu ana 'aidega i'itea tovotovolo. Ta tola'ai matadiega ni'a i'itea ge taha toga 'inaya ida vevonavonayei, ta 'esi yani qabuna nuadia i'waivea. Ta 'abibodanaya isimana 'ifoqeyea.

*Isesu taha gwama giveaqiaqiea niboana luveifana 'inega*  
(Madiu 17:14-18; Maki 9:14-27)

<sup>37</sup> Ni'au mahala vulihia 'inega Iesu ma ana to'abibodayavo toidi bwanagega iwebui mai, 'inega yo'o qiduadi maega ivellobaloba. <sup>38</sup> 'Inega taha 'oloto yo'o dina gamodiega Iesu 'itea 'inega gabea voneaya, "Tove'ita, yanoqinoqi 'iuya nuanuagu natugu me'olotona una 'itea, mana tauna natugu 'aidega otaqina. <sup>39</sup> Ta tuta qabuna niboana luveifana ena waiwaiega natugu kafikafia ta 'inega doudou, ta wese vevekaoya ta tafetafefwai, be wese 'awanega fulofulo 'ifo'ifoqe. Ta niboana nana tuta qabuna gamonaya toatoa, 'inega visiqa qiduana lulutonovia ta tuta goyona na'aliga. <sup>40</sup> Ta au to'abibodayavo yavenoqiedi vonigo ida 'wavini da'ifoqe, ta ge adi fata."

<sup>41</sup> 'Inega Iesu vonedi vonaya, "Omi'a ma'oda, tuta kuena ya'a maega katoatoa ta nuami nawale ge da'eqa'ui, ta tola'ai weaqina ge oda vetumaqanegu? Debami 'i'wanina 'inega 'wafigu siniqaiqai!" 'Inega Iesu 'oloto nana voneaya, "Natuhu umiei ba'idia eda 'itei."

<sup>42</sup> Ta tutana gwama nana mai Iesu 'inaya, 'inega niboana luveifana felei webui bwa'obwa'oya ta vevekaoya. Ta Iesu niboana nana lugwaeyei ta 'wavi 'ifoqeyea. 'Inega gwama nana veaqiaqi 'abo Iesu nei 'eviviea tamana 'inaya. Ta tomotau qabudi nuadi voqana qiduana Yaubada ena waiwai weaqina.

*Isesu tuta vemagilafuna simana ena 'aliga weaqina*  
(Madiu 17:22-23; Maki 9:30-32)

<sup>43</sup> Tomotau qabudi nawale inuavoqana qiduana Iesu ena fewa weaqidi. 'Inega ana to'abibodayavo vonedi vonaya, <sup>44</sup> \* "Egu vona ba'e ena vonemi ona noqola aqiaqiea! Nawale taha toga ya'a Tomotau Natuna nasuluvegu ta nave'ineiegu agu aviayavo nimadia." <sup>45</sup> \* Ta Iesu ena vona ba'e ge ida alamaniana, mana ena vona a'ua'ukwaivina 'idia. 'Inega nuadi ge da'eqa'ui vona nana weaqina. Ta wese imwaniniva 'inega ge nuanuadi Iesu ina vetala'aiei.

*Togama qiduana?*

(Madiu 18:1-5; Maki 9:33-37)

<sup>46</sup> \* Iesu ana to'abibodayavo ive'ale taudiega ive'ae'aetoga vonigo toga gamodiega naveqidua va'ine. <sup>47</sup> Ta Iesu edi nuanua ni'a alamaniana, 'inega taha gwama 'ebe'ewei miea ta di'wenaya vetovoloya ta vonedia, <sup>48</sup> \* "Gwama ba'e ona 'itea, 'eguma taha toga gwama ba'e 'idewana agu wawega veveyolubea, e 'inega wese veveyolubegu. Ta 'eguma taha toga veveyolubegu 'inega tauna agu Tovetune wese veveyolubea. 'Inega 'eguma taha toga 'imiega ana wawa goyona, e tauna qidua va'inena."

*Togama ana fata Iesu ana wawa navefewei?*  
(Maki 9:38-40)

\* 9:32: 2Fit 1:16-18 \* 9:35: Lk 3:22 \* 9:44: Lk 9:22 \* 9:45: Lk 18:34 \* 9:46: Lk 22:24 \* 9:48: Md 10:40

<sup>49</sup> Ta Ioni Ieisu voneaya, “Kaiwabu, taha ’oloto a’itea au wawega niboana luveifadi ’wavinidi i’ifoqe tomotau ’idiega. ’Inega ahawatayea mana ’oloto nana tauna ge iada.”

<sup>50</sup> \* Ta Ieisu voneaya, “Ge ona awatayei! Mana ’eguma taha toga ge davevoalaneda e tauna ada toiula.”

*Me Samelia vaina Ieisu inogea*

<sup>51</sup> Ieisu ena ’evivi mahalaya ana tuta ni’a vadi’wea, ’inega vemanini tutuvila natauya Ielusalema weaqina. <sup>52</sup> Ta nawale tautauya ’inega Ieisu vaina tomotau kavona tovale’ewa vetunedi inugweta itauya me Samelia edi ’abaga taha ’inaya nuanuana vaina yani ina ’iva’ava’aia weaqina. <sup>53</sup> Ta totoa ’abaga ge nuanuadi Ieisu nalugu edi ’abagaya, mana ialamania tauna tautauya Ielusalema ’inaya. <sup>54</sup> \* Ta ana to’abibodayavo Iemesa ta Ioni vale ba’e inoqolia ’inega Ieisu ivoneaya, “Kaiwabu, nage nuanuau ’aiwe ’ala’alata mahalega ana gabei nawebui mai ’inega ’abaga nana ana totoayavo na’ala ’ovoidi?”

<sup>55</sup> Ta Ieisu tunugivila ta awatayedi, <sup>56</sup> ’inega itauya mali ’abagaya.

’Oloto toidi nuanuadi Ieisu ina ’abibodea  
(*Madiu 8:19-22*)

<sup>57</sup> Ta nawale itautauya ’inega taha ’oloto mai Ieisu ’inaya ta voneaya, “Ma’inaya utautauya nuanuagu be ena ’abibodeu.”

<sup>58</sup> ’Inega Ieisu ’oloto nana ena vona ve’iea vonaya, “Bwadu’e ma adi vetoa ta wese manu ma adi nevuqa, ta ya’a Tomotau Natuna ge taha egu ’ebeveyawaimo.”

<sup>59</sup> ’Inega taha wese ’oloto mai, ta Ieisu voneaya, “U’abibodegu!”

’Inega ’oloto nana vonaya, “Kaiwabu, una awafelegu ena ’evivi ’abagaya tamagu ena tavuna nugwetea, ta ’abiboda ena mai ena ’abibodeu.”

<sup>60</sup> Ta Ieisu voneaya, “Eguma uvetumaqana aqiaqiegu una ’abibodegu, ta tomeqabu niboanidi ’ali’aligidi e taudiega edi to’aligayavo ina tavunidi. Ta o’a una tauya ta una simana Yaubada ena ’Ebeluvine weaqina.”

<sup>61</sup> \* Ta taha wese ’oloto mai vonaya, “Kaiwabu, ena ’abibodeu ta nugweta una awafelegu ena ’evivi ’abagaya egu gadeavo ena lukafoiedi ta ’abiboda ena mai ena ’abibodeu.”

<sup>62</sup> ’Inega Ieisu ’oloto nana voneaya, “Eguma taha toga nuanuana Yaubada ena ’Ebeluvine weaqina nafewa, ta ena kulufa be wese ena susu nanuaidi, e ’inega tauna ge ana fata.”

## 10

*Ieisu ana to’abibodayavo adi yau 72 luvetunedi*

<sup>1</sup> \* Ieisu ena vona gumwala, ’inega to’abiboda adi yau 72 wese venua’ivinedi ’abo lua be lua luvetunedi ina nugweta ’abaga taha taha ’idia, ta tomotau qabudi ina ’iva’ava’aidi Ieisu ena mai ’idia weaqina.

<sup>2</sup> \* ’Inega Ieisu vona sesebaiega vonedi vonaya, “Bolimana qiduana ana tuta ni’a ’ifoqe ta toala ge ’ealidi, ’inega bolimana ana Kaiwabu ’inaya ona venoqi be yaqisa tofewa ’eala navetunedi ena vaoqaya sabi ala.

<sup>3</sup> \* “Ona tauya, ta ge ona nuafania ya’a yavevetunemi kavona lami yubai sasasadi nuanidia. <sup>4</sup> \* Ta ge mane nage kode nage ami ’aqeyafayafa ona ’ewedi. Ta wese tauya nana ’inaya ge ona vavenuana ta ona lukaiwa tomotau ’idia.

<sup>5</sup> “Ta tuta nana ona lugu taha vanue ’inaya, e nugweta tonivanue ona vona veyolubea ona vonaya, ’Nuadaumwala ’iuya ta wese eu gadeavo maega!’ <sup>6</sup> Ta ’eguma tonu-adaumwala totoa e ’inega emi veyoluba ’inaya na’eno vataya. Ta ’eguma tonivanue nana ’oloto luveifana e ’inega veyoluba nana na’evivi namai ’imia. <sup>7</sup> \* ’Inega tonuadaumwala

\* 9:50: Md 12:30; Lk 11:23 \* 9:54: 2Kin 1:9-16 \* 9:61: 1Kin 19:20 \* 10:1: Mk 6:7 \* 10:2: Md 9:37-38; Ion 4:35 \* 10:3: Md 10:16 \* 10:4: Md 10:7-14; Mk 6:8-11; Lk 9:3-5 \* 10:7: 1Kol 9:6-14; 1Tim 5:18

'inaya ona toatoa ta 'abwaga be go'ila 'iawamia naha'uya e ona 'ai, mana tofewa luaqiaqiedi adi ve'ia ina lobe. Ta ge ona lugu kavokavovo vanue taha taha 'idia.

<sup>8</sup>\* “Ta 'eguma taha 'abaga 'inaya ona lugu ta ina 'ebe'ewemi 'idia, e 'inega tola'ai wese 'iawamia ina a'uya e ona 'ai. <sup>9</sup> Ta wese 'abaga nana ana totoayavo edi tovevhiqayavo ona giveaiaqiedi, ta ona vonedi ona vonaya, 'Yaubada ena 'Ebeluvine ni'a mai di'wemia.’ <sup>10</sup> Ta 'eguma taha 'abaga 'inaya ona 'ifoqe ta ge nuanuadi omi'a, tua ta ona lugu ta ona vonedi ona vonaya, <sup>11</sup>\* ‘O'itei, emi 'abaga fwayafwayana 'aqemega avavutuvutuqa yavulea emi noga weaqina. Ta ona alamani, Yaubada ena 'Ebeluvine ni'a vadi'wemi!’ <sup>12</sup>\* Yavona aqiaqiem, nawale vetala'ai ana tuta 'inaya me Sodoma luvine ina lobe, ta tomeqabu ge nuanuadi ina 'ebe'ewemi edi 'abagaya e taudina luvine qidua va'inena ina lobe, ta 'abiboda Sodoma.”

*Iesu ena vona waiwaina vaina 'abaga weaqidi*

*(Madiu 11:20-24)*

<sup>13</sup> 'Inega Iesu 'abaga diavona ana totoayavo weaqidi vonaya, “Me Kolesini be me Bedesaida nuakolokolomi, mana 'ebenuavoqana ni'a yaviaqidi 'imia ta ge oda nuagivila. Ta 'eguma me Taia be me Saidoni 'idia lova 'idewani eda maduviaqia ida nuagivila, be edi vaiqavu 'inega taudiega ida ve'itayedi ni'a edi ilivu luveifana 'idiega inuagivila. <sup>14</sup> Ta vetala'ai ana tutaya me Taia be me Saidoni luvine ina lobe, ta omi'a luvine qidua va'inena ona lobe, ta 'abiboda Taia be Saidoni. <sup>15</sup> Ta me Kafaneumi omi'a ma'oda? Nage onuaia vonigo Yaubada ami wawa nagivaneyea mahalaya, waisa? Gebu! Nawale ona webui 'aiwe 'ala'alata 'inaya.”

<sup>16</sup>\* 'Inega Iesu ana to'abibodayavo vonedia, “Eguma taha toga emi vona nanoqolia e 'inega wese egu vona nanoqolia. Ta 'eguma taha toga nanogemi, e 'inega ya'a wese nanogegu ta wese tauna agu Tovetune nanogea.” Iesu ena vona gumwala 'inega luvetunedi itauya.

*To'abiboda 72 dina i'evivi imai Iesu 'inaya*

<sup>17</sup> Ta to'abiboda 72 dina me edi qaiawa ni'a i'evivi imai Iesu 'inaya ta ivoneaya, “Kaiwabu, ema luvivila 'inaya yani qabuna 'ebenuavoqana aviaqidi, ta wese niboana luveifadi imatayagema i'ifoqe tuta nana au wawega a'wavinidi.”

<sup>18</sup>\* 'Inega Iesu vonedia, “Idewani, mana lova Seitani ya'itea mahalega 'avalata'ia webui mai kavona namala. <sup>19</sup>\* Ta wese egu luvine be egu waiwai ni'a yaneimi, 'inega ami fata ona vewaiwai ta ami avia Seitani ena waiwai ona vewaiwai va'inea, ta wese mwata be bunelala ona vataqodi ta ge ona veilaqe. <sup>20</sup>\* Ta ge ona qaiawa niboana luveifadi edi matayaga 'imia weaqina, ta 'esi ona qaiawa qiduana mana ami wawayavo Yaubada ni'a 'wayavia mahalaya.”

*Iesu ena qaiawa*

*(Madiu 11:25-27; 13:16-17)*

<sup>21</sup> Tuta omo'e 'inaya Nihoana Gwalagwalana ena qaiawa qiduana lugu Iesu 'inaya ta giveqaiawe, 'inega Iesu vonaya, “Tamagu, yahawahawatubou, o'a mahala be bwa'obwa'o ana Kaiwabu! Yani ba'e ua'ukwaivea toalamaniavo 'idiega, ta 'esi gogama gogoyodi 'idia uve'itayea. Vonahaqiaqi Tamagu, ba'e eu nuanua aqiaqina.”

<sup>22</sup>\* Ta wese vonaya, “Tamagu yani qabuna nimaguya ni'a a'uya. Ge taha toga dahalamanigu, ta Tamagu ana 'aidega. Ta wese ge taha toga Tamagu dahalamaniana, ta ya'a agu 'aidega yahalamaniana. Ta wese tomeqabu nuanuagu ena venua'ivinedi be Tamagu ena ve'itayea 'idia, e taudi wese Tamagu ina alamania.”

\* 10:8: 1Kol 10:27 \* 10:11: Via 13:51; 18:6 \* 10:12: Nug 19:24-25; Md 10:15; 11:24 \* 10:16: Md 10:40; Lk 9:48; Ion 5:23 \* 10:18: Ion 12:31; Ve 12:8-9 \* 10:19: Same 91:13; Mk 16:18 \* 10:20: Fil 4:3; Ve 3:5 \* 10:22: Ion 3:35; 10:15

<sup>23</sup> 'Inega Iesu tunugivila ana to'abibodayavo 'idia vonaya, "Omi'a ona qaiawa qiduana, mana yani qabuna matamiega ni'au o'itedi. <sup>24</sup> Yavona aqiaqiemi, lova tovesimasi-manayavo ta toluvine qiduquduadi qabudi nuanuadi ba'e yani diavona ina 'itedi ta ge ida 'itei. Ta wese vona nana ni'au onoqolia taudi wese nuanuadi ina noqolia, ta ge ida noqoli."

*Samelia* 'olotona aqiaqina vona sesebaina

<sup>25</sup> \* Taha tuta luvine ana toalamani qiduana mai Iesu 'inaya nuanuana nasitonovia 'inega voneaya, "Tove'ita, tola'ai ena viaqi be yawaigu vataya ena lobei?"

<sup>26</sup> 'Inega Iesu voneaya, "Luvine qabudi Mosese 'wayavidi Buki Nugwenugweina 'inaya nage ni'a ualamanidi, waisa?"

<sup>27</sup> \* 'Inega 'oloto nana voneaya, "Vonahaqiaqi, ba'e 'idewana vonaya, 'Kaiwabu eu Yaubada una veyolubea giwaliuyega be, niboaniuyega be, eu waiwaiega ta wese eu nuanua qabuna 'inega.' Ta wese vonaya, 'Iau una veyolubea 'idewani tau'u uveveyolubeu.' "

<sup>28</sup> \* Ta Iesu voneaya, "Vonahaqiaqi, 'inega 'eguma 'idewani una viaqa 'aiqa yawaiu vataya una lobeal!"

<sup>29</sup> Ta 'oloto nana ni'a alamania luvine dina ge da'abiboda aqiaqiedi, 'inega nuanuana ena luveifana weaqina taunega navata'ita'iea, 'inega vetala'ai taha vitana Iesu neia, ta voneaya, "Isana toga iagu?"

<sup>30</sup> 'Inega Iesu vona sesebaiega 'oloto nana vonea vonaya, "Taha 'oloto Ielusalemega tutuvila tautauya Ieliko weaqina. Ta 'edaya tovanawala ilobei ta ikafia, 'inega ana kaleko iabu yavulei ta ivunuqa veiveifea tuta goyona da'aliga, 'abo inogei ta itauya. <sup>31</sup> Nawale 'edaya 'eno'eno 'inega taha toveguba mai 'edanegana, ta 'ita naqo toveilae nana 'itea ta vakesi tauya. <sup>32</sup> Ta wese 'idewani taha 'oloto mai 'edanegana, tauna Libai ena gadeyega, ta ba'e gade dina taudi toveguba adi toiulayavo. Ta tauna wese toveilae nana 'ita naqoyeamo ta tauya.

<sup>33</sup> "Ta 'abiboda taha Samelia 'olotona wese mai 'edanegana 'inega toveilae nana 'itea ta nuakokoloyea. <sup>34</sup> 'Inega naqo di'wenaya ta dede'wa be 'oine 'ewedi 'abo ana 'abia 'awanaya iwaqidi ta fainidi. 'Inega ena donikia vegelui, ta magilafudi itauya wagawaga edi vanuea ta omo'e 'inaya 'itamakia.

<sup>35</sup> "Ta mahala vulihia 'inega mane magilafuna vanue nana ana to'itamaki neia ta voneaya, 'Toveilaqe ba'e una 'itamakia weaqigu, ta 'eguma 'evisa mane wese una a'uya toveilae nana weaqina, 'inega tuta nana ena 'evivi ena mai e ena ve'ieu.' "

<sup>36</sup> 'Inega Iesu toalamani nana vetala'aiea vonaya, "Ba'e 'oloto diavona toidi 'idiega, toga toveilae nana ia otaqina?"

<sup>37</sup> 'Inega toalamani nana vonaya, "Tauna toveilae nana ana tonuakokoloko."

'Inega Iesu voneaya, "Vona aqiaqi, 'inega una tauya ta wese 'idewana una viaqa 'aiqa."

*Iesu ena vayausa Meli be Mata* 'idia

<sup>38</sup> Ta Iesu ma ana to'abibodayavo wese itutuvila itautauya, 'inega taha 'abaga 'inaya i'ifoqe. Ta vavine taha ana wawa Mata Iesu 'ebe'ewei itauya ena vanuea. <sup>39</sup> \* Ta vavine nana taina ana wawa Meli wese vanuea toatoa. Ta Meli nana mai Iesu 'aqenaya toabui ta ena vona vivineneqea. <sup>40</sup> Ta Mata 'abwaga 'iva'ava'aia ta fewa qabuna viaviaqia, 'inega mai Iesu 'inaya ta voneaya, "Kaiwabu, ma'oda taigu o'a maega otoatoa, ta ge daiulegu. 'Inega una vonei naiulegu!"

<sup>41</sup> 'Inega Iesu voneaya, "Mata, Mata, tola'ai weaqina yani qabuna weaqidi unuanua? <sup>42</sup> \* Ta 'esi yani 'aideganamo weaqina una nuanua, 'idewani taiu Meli. Tauna ena nuanua 'inega yani aqiaqi otaqina ni'a venua'ivinea mana nuanuana egu vona nanoqolidi, 'inega ge taha toga nahawatayei."

\* 10:25: Md 22:35-40; Lk 18:18      \* 10:27: Luve 6:5; Luvi 19:18      \* 10:28: Luvi 18:5      \* 10:39: Ion 11:1; 12:2-3  
\* 10:42: Md 6:33

## 11

*Leisu ena ve'ita venoqi weaqina*

*(Madiu 6:9-13; 7:7-11)*

<sup>1</sup> Taha tuta leisu ana 'aidega di'we taha 'inaya vevenoqi. Ta ena venoqi 'abibodanaya ana to'abiboda taha voneaya, "Kaiwabu, venoqi weaqina una ve'itema 'edewana Ioni ana to'abibodayavo ve'ita 'aiqedi."

<sup>2</sup> Inega leisu vonedia,  
"Ba'e 'edewana ona noqi 'aiqa,  
'Tamama,

au wawa gwalagwalana ana 'amayabea,  
ta nuanuama una luvinema.

<sup>3</sup> Nuanuama ama 'abwaga  
tuta qabuna una neima.

<sup>4</sup> Ta ema luveifana una nuataqodi  
'idewana ima'a tomotau  
iveilivu veifa 'imaya anuataqodi.

'Ebesitonova 'inaya gebu una awafelema.' "

<sup>5</sup> Ta leisu wese vonedia, "Ebevetalatutula taha ena neimi venoqi ana alamani weaqina, e ba'e 'edewani: 'Eguma taha iau luluvaiega tou gamonaya namai 'iuya, ta ge taha tola'ai 'iuya da'eno'eno be una neia na'ai. 'Inega taha iau 'inaya una tauya be una venoqiea una vonaya, 'Iagu, nage ana fata una iulegu be beledi toi una neigu, <sup>6</sup> mana iagu taha luluvaiega mai ta ge taha kulaqea 'iguya be ena neia na'ai."

<sup>7</sup> "Inega 'oloto nana vanue gamonega eu vona nave'iea navonaya, 'Iagu, ge una vedivanovano, mana natugwavo maega a'eno'eno ta wese 'awa ni'au yagibodea, 'inega ge agu fata be ena iuleu.' <sup>8</sup> Ta yavona aqiaqiemi, 'eguma iau navemanuguba, 'inega o'a una 'alataya 'inaya, 'inega naya'itoto ta tola'ai weaqina uvevenoqiea naneiu, mana ge nuanuana nawale tomotau ina 'awaluveifei.

<sup>9</sup> "Inega yavonemi, ona venoqi 'inega Yaubada naneimi, wese ona sali 'inega ona lobe, ta wese ona 'auveida'a 'inega 'awa na'ewa'ea weaqimi. <sup>10</sup> Mana tomeqabu inoqinoqi Yaubada naneidi, ta tomeqabu isalisali nawale ina lobe, ta wese tomeqabu 'away a i'au'auveida'a nawale na'ewa'ea weaqidi.

<sup>11</sup> "Ta ma'oda omi'a, 'eguma natumiavo 'iqana weaqina inoqinoqi nage dadabweta ona neidi? <sup>12</sup> Ta wese 'eguma fo'u weaqina ina venoqi 'imia nage bunelala ona neidi? Gebu'e otaqa! <sup>13</sup> Vonahaqiaqi, omi'a luveluveifami, ta ni'a oalamanianatumiavo 'idia yani aqiaqi dimo ona neidi, 'inega ona alamani aqiaqiea tomeqabu inoqinoqi Tamami mahalaya ena 'iwavo aqiaqi otaqina naneidi. 'Inega 'eguma tomeqabu ina venoqiea Niboana Gwalagwalana weaqina e 'inega naneidi."

*Leisu be niboana luveifadi edi kaiwabu*

*(Madiu 12:22-30; Maki 3:20-27)*

<sup>14</sup> Taha tuta 'inaya leisu taha 'oloto lobe niboana luveifana meana givilea 'inega ge ana fata navona. Ta leisu niboana luveifana 'wavini 'ifoqe, 'inega 'oloto nana meana tunuqa ta veqae. Ta tomotau qabudi yani nana i'itea inuavoqana qiduana. <sup>15-16</sup> \* Ta tomotau vaina nuanuadi leisu ina sitonovia 'eguma 'ebe'ita taha mahalega naviaqi ina 'itea. Ta wese vaina taudiega ivonaya, "Niboana luveifadi edi kaiwabu Belisibubi ena waiwaiega leisu niboana luveifadi 'wavi'wavi 'ifoqeyedi."

<sup>17</sup> Ta leisu edi nuanua ni'a alamanian 'inega vonedia, "Belisibubi ge ana fata enavo na'wavinidi ina 'ifoqe. Ta 'eguma taha 'ebeluvine 'inaya tomotau ina ve'eto'eto'idi ta taudiega ina vevedavi, e nawale 'ebeluvine nana nadawalili ta nabe'u. Ta wese 'edewani 'eguma taha gade taudiega ina vevedavi nawale edi toa luveifa otaqina ina lobe. <sup>18</sup> Seitani wese 'edewani 'eguma ma enavo taudiega ina vevedavi, nawale ena 'ebeluvine nadawalili ta nabe'u. Ta ya'a egu vona ba'e 'idewani mana omi'a ovonaya

\* 11:15-16: Md 9:34; 10:25; Md 12:38

be ya'a Belisibubi ena waiwaiega niboana luveifadi eda lulu'wavina 'ifoqeyedi. <sup>19</sup> Omi'a ba'e 'idewani oveve'ewegu, ta ma'oda omi'a ami to'abibodayavo nage wese oveve'ewedi vonigo niboana luveifadi ilulu'wavina 'ifoqeyedi Belisibubi ena waiwaiega? 'Inega ami to'abibodayavo wese ni'a ialamania omi'a emi vona ge tunutunuqina. <sup>20</sup> Ta 'esi ya'a Yaubada ena waiwaiega niboana luveifadi yalulu'wavina 'ifoqeyedi, e 'inega ona alamania Yaubada ena 'Ebeluvine ni'au 'ifoqe 'imia.

<sup>21</sup> "Seitani tauna kavonaya taha 'oloto waiwaina me ena kulufa 'ebeluvia ta ena vanue agona ta kaikaiwabuna 'ita'itamakia, 'inega ge taha toga ana fata ena kulufayavo navanawalidi. <sup>22</sup> \* Ta 'eguma taha 'oloto waiwai otaqina na'ifoqe namai, e nawale 'oloto nana Seitani navunuqi ta ena 'abiyavo nimanega naneboi ta ena kulufa qabudi naluqonidi navewila'ayedi enavo 'idia.

<sup>23</sup> \* "Eguma taha toga ge ya'a maega e tauna agu avia. Ta wese 'eguma taha toga ge naiulegu be tomtotau ge nava'auqidi, e tauna egu fewa ana togiveluveifa."

*Niboana luveifana* 'evivi taha 'oloto 'inaya

(Madiu 12:43-45)

<sup>24</sup> "Ta tuta nana niboana luveifana 'oloto taha 'inega 'ifoqe ta 'oloto nana veaqi-aqi, 'inega niboana nana tauya di'we go'ila geqana 'inaya yabayaba dadana be ena 'ebeveyawai salisalia ta ge taha dalobei. 'Inega taunega vonaya, 'Ana 'ita ena 'evivi lova egu 'ebetoaya.' <sup>25</sup> 'Inega 'evivi lova ena 'ebetoa 'inaya ta 'itea vunavunaqina ta 'i'iva'ava'aina. <sup>26</sup> 'Inega 'evivi tauya ta niboana luveifa otaqidi adi yau seveni 'ebe'ewedi miedi maega ilugu 'oloto nana 'inaya ta itoatoa. 'Inega 'oloto nana ena toa igiveluveifa aqiaqiea, ge 'edewani lova."

<sup>27</sup> \* Ieisu ba'e 'idewani nawale vonavona tomtotau qabudi 'idia, 'inega taha vavine qabu dina 'idiega bonana qiduanega gaba Ieisu 'inaya vonaya, "Kaiwabu, vavine dina ivenatuneu ta wese ivesusuhu veyoluba qiduanu 'idia!"

<sup>28</sup> Ta Ieisu voneaya, "Tomeqabu Yaubada ena vona inoqolia ta ivelumamatayagea, e taudi toqaiawa aqiaqi."

*Iona tauna* 'ebe'ita 'idaya

(Madiu 12:38-42)

<sup>29</sup> \* Ta ni'au tomtotau adi yo'o veqidua va'ine 'inega Ieisu vonedi vonaya, "Lagata ba'e omi'a luveluveifami! Nuanuami 'ebe'ita taha ona 'itea. Ta 'ebe'ita 'aideganamo ena neimi lova Iona 'idewani nawale ona 'itea, ta'iwa! <sup>30</sup> Mana Iona tauna me Ninibe edi 'ebe'ita, ta ya'a Tomotau Natuna omi'a lagata ba'e emi 'ebe'ita. <sup>31</sup> \* Vonahaqiaqi, vetala'ai ana tuta 'inaya me Siba edi kwini naya 'itoto be omi'a lagata ba'e nave'ewemi, mana vavine nana luluvaiega lova mai toalamani qiduanu Solomoni ena vona sabi noqolina. Ta ba'e 'itaga taha 'oloto Solomoni ena alamani veqidua va'inea mai toatoa, ta ena vonayavo omi'a ge nuanuami ona noqolidi.

<sup>32</sup> \* "Wese 'edewani vetala'ai ana tuta 'inaya me Ninibe ina ya'itoto ta omi'a lagata ba'e ina ve'ewemi, mana Iona 'idia lugaihi, 'inega edi ilivu luveifana 'idiega inuagivila. Ta ba'itagana lugaihi aqiaqi otaqina onoqonoqolia taha 'oloto 'inega, tauna Iona ena lugaihi veqidua va'inea, ta omi'a ge oda nuagivila."

*Lamufa vona sesebaina*

(Madiu 5:15; 6:22-23)

<sup>33</sup> \* "Ge taha toga lamufa nagabui ta naha'ukwaivei, nage 'ulenega natalakabubui, ta 'esi luaqiaqiea 'ebea'u debanaya naha'uya, be 'inega taudi vanuea ilugulugu navesi-matalidi. <sup>34</sup> Ba'e 'idewani matau 'wafiu ana simatala, ta 'eguma matau aqiaqina 'inega 'wafiu qabuna simasimatalina. Ta 'eguma matau luveifana 'inega wese 'wafiu qabuna navelovelovanea. <sup>35</sup> 'Inega una 'itamaki aqiaqieu be yaqisa eu lamufa gamouya ge

\* 11:22: Kol 2:15      \* 11:23: Lk 9:50      \* 11:27: Lk 1:28,42,48      \* 11:29: Md 16:4      \* 11:31: 1Kin 10:1-10  
\* 11:32: Ioa 3:5-10      \* 11:33: Mk 4:21; Lk 8:16

na'weu'weu. <sup>36</sup> 'Inega 'eguma 'wafiu qabuna 'inaya simatala 'eno'eno ta ge taha wese velovelovana 'inaya, e 'inega 'wafiu qabuna simasimatalina, kavonaya lamufa qiduana ena simatala."

*Falisiavo be luvine ana toalamaniavo Iesu lugwaeyedi*

*(Madiu 23:1-36; Maki 12:38-40)*

<sup>37</sup> Ta tuta nana Iesu ena vona lu'ovoa 'inega taha Falisi Iesu 'ebe'ewea itauya sabi 'ai. 'Inega Iesu lugu 'abo toabui 'ebe'ai 'inaya. <sup>38</sup> Ta Falisi nana nuana voqana mana 'itea Iesu nimana ge da'utui ta 'ai'ai. <sup>39</sup> Ta Iesu Falisi nana ena nuanua ni'a alamania 'inega voneaya, "Omi'a Falisiavo kavonaya vedi be kaivoe gwavu dimo 'utu'utudi ta gamodi ge adi 'utumoma, mana giwalimi bwavubwavudi 'inega vemanuguba be ilivu luveifadi giwalimiega 'ifo'ifoqe. <sup>40</sup> Kwavakwavami! Mana ni'au oalamanian gwavumi be giwalimi adi To'iva'ava'ata Yaubada. <sup>41</sup> Ta luaqiaqiem be giwalimi ona awafeledi lukwalukwa 'idia be 'inega ona vevunavunaqa aqiaqi.

<sup>42</sup> "Ta omi'a Falisiavo nuakolokolomi! Vonahaqiaqi, emi nei kavovo aqiaqina oneinei kavovo be ana luvine qabuna o'itamaki aqiaqiea. Ta vaina yani goyogoyodi Yaubada 'inaya o'ua'udi 'edewani mali fai be mali fai 'idiega. Ta luvine magilafudi onufanidi 'idewani ma'oda Yaubada ona veyoluba 'aiqi, ta wese ma'oda tomotau ona vanugweta 'aiqedi luvine 'aideganega.

<sup>43</sup> "Omi'a Falisiavo nuakolokolomi! Mana vanue tafwalolo 'inaya 'ebetoa aqiaqidi 'idia otoatoa, ta wese tutana otautauya 'ebegimwane 'idia nuanuami tomotau qabudi ina lukaiwa 'imia ta ina 'amayabemi. <sup>44</sup> Nuakolokolomi, mana omi'a kavonaya tomotau 'ali'aligidi ta ami deba'unu debanaya tomotau iyabayaba, ta ge ida alamanian bwa'obwa'o gamonaya o'eno'eno."

<sup>45</sup> 'Inega taha luvine ana toalamani qiduana Iesu vonea vonaya, "Tove'ita, eu vonayavo ba'e 'idiega ima'a wese uinalima."

<sup>46</sup> Ta Iesu voneaya, "Omi'a luvine ana toalamaniavo qiduami wese nuakolokolomi, mana luvine qabudi 'idiega tomotau 'ava'avala vitadi oneineidi, ta omi'a taumiega ge nuanuami ona awafelemi be vita diavona 'idiega ona iuledi. <sup>47</sup> Nuakolokolomi, mana tubumiavo tovesimasimana iluve'aligidi, ta omi'a deba'unudia adi 'ebenuave'avina oviaqia. <sup>48</sup> Ta yani ba'e 'inega tubumiavo edi ilivu luveifana o'awahaqiaqiea, mana taudi tovesimasimana iluve'aligidi ta omi'a adi deba'unu oveve'ivala aqiaqiedi. <sup>49</sup> Yani ba'e weaqidi Yaubada ena alamani qiduana vona 'ifoqeyea tutana vonaya, "Tovesimasimana be tovaletuyana ena vetunedi ina wai be vaina ina luv'aligidi ta wese vaina ina vevoalanedi."

<sup>50</sup> "Inega lagata ba'e omi'a nawale luvematasabu qiduana ona lobe tovesimasimana qabudi sulalidi weaqina bwa'obwa'o ana tuta 'ebeve'ale 'inega. <sup>51</sup> Eibolo ana luv'aliga 'inega be mai Sakalaia ana luv'aliga 'inaya, tauna iluve'aligia Vanue Gwalagwalana ta 'ebeveguba nuanidia. Vonahaqiaqi, luv'aliga diavona adi ve'ia lagata ba'e omi'a ona 'avalea.

<sup>52</sup> "Ta omi'a luvine ana toalamani qiduqiduami, nuakolokolomi! Mana alamani ana 'awa ana 'ebesiba'wa'oluvewaivia. 'Inega omi'a ge ami fata ona lugu, ta wese taudi nuanuadi be ina lugu oawatayedi."

<sup>53</sup> Ta tutana Iesu di'we omo'e nokea, 'inega luvine ana tove'itayavo ta wese Falisiavo edi nualuveifa 'inega ive'ale i'awaluveifea ta ivetala'aiea yani taha taha weaqina. Ta edi vetala'ai qabuna 'idiega itoho waiwai <sup>54</sup> nuanuadi Iesu ena ve'ia 'inega ena luv'eifana ina lobei ta ina kafia.

## 12

*Iesu ena lugaihi*

*(Madiu 10:26-27)*

<sup>1</sup> Qabu qidua va'inedi iva'auta 'aideganaya ta di'we nana iveliave'alaia. Ta Iesu ana to'abibodayavo 'idia vonaya, "Ona 'itamakimi, mana Falisiavo edi 'eu'au'ava kavona



falawa ana isiti 'idewani, 'inega ge ona 'abibodedi. <sup>2</sup>\* Ta yani dina 'wai'waividi nawale Yaubada nagive'ifoqeyedi ona 'itedi ta ona alamanidi. <sup>3</sup> Ta wese tola'ai velovelovana 'inaya ovonayea nawale 'aubena 'inaya tomotau ina noqolia. Ta tola'ai ni'au ove'awahayahayayea vanue gamonaya nawale tomotau qabudi 'idia 'atamanaya ona vona 'ifoqeyea.

*Togama kana mwaninivea?*  
(Madiu 10:28-31)

<sup>4</sup> "Egwavo, yavona aqiaqiemi tomeqabu adi fata 'wafimi ina luve'aligia ge ona mwaninivedi, mana adi fata 'wafi mimo ina luve'aligia ta niboaniami gebu. <sup>5</sup> Ta 'esi Yaubada ona 'amayabea, mana tauna ana fata ena luvineyega tomotau naluve'aligidi ta 'abiboda nafelawebuiedi 'aiwe 'ala'alata 'inaya. Vonahaqiaqi, ana 'aidega me emi 'amayaba ona mwaninivea.

<sup>6</sup> "Dagedage adi yau faibi kana vegimwaneyedi ta adi ve'ia mane goyosikwana, ta manu dina Yaubada ge wese 'aidegana 'idiega nanuafania. <sup>7</sup>\* 'Inega ge giwalimi naha'ala, mana omi'a Yaubada ena yani qiduana, ta 'abiboda dagedage. Ta omi'a ge ami fata ami kia 'inaya debami adi yau ona alamanidi, ta 'esi Yaubada adi yau ni'a alamanidi.

*Tomotau vaina Iaisu i'awahaqiaqiea be wese vaina ivegeqea*  
(Madiu 10:19-20; 10:32-33; 12:32)

<sup>8</sup> "Ta yavona aqiaqiemi, 'eguma taha toga tomotau 'iawadia na'awahaqiaqiegu, e 'inega wese ya'a Tomotau Natuna Yaubada ena tovale'ewayavo 'iawadia ena 'awahaqiaqiea. <sup>9</sup> Ta 'eguma taha toga navegeqegu tomotau 'iawadia, 'inega ya'a wese nawale Yaubada ena tovale'ewayavo 'iawadia tauna ena vegeqea.

<sup>10</sup> "Ya'a Tomotau Natuna 'eguma taha toga na'awaluveifegu ta 'abibodanaya nanuagivila, e 'inega ana fata Yaubada nanuataqoya. Ta 'eguma taha toga Niboana Gwalagwalana na'awaluveifea, e 'inega Yaubada gebu nanuataqoi.

<sup>11</sup> \* "Ta tutana tomotau ina tauyemi vanue tafwalolo 'inaya ta ina vetala'aiemi emi vetumaqana weaqina kaiwabuyavo be toluvineavo 'iawadia, 'inega ge ona nuanua ma'oda edi vetala'ai 'imia ona vona 'evivi 'aiqedi, <sup>12</sup> mana tuta nana 'inaya Niboana Gwalagwalana namai 'imia nave'itemi tola'ai ona vonayea 'idia."

*Vona sesebai tovekaikaiwabu kwavakwavana weaqina*

<sup>13</sup> Ta qabu dina 'idiega taha 'oloto Iaisu 'inaya vonaya, "Tove'ita, tuagu una vonei be 'ebeluvine dibuna naneigu, lova tamama 'inega 'ewea."

<sup>14</sup> Ta Iaisu 'olotona ena vona ve'iea voneaya, "Oloto, ya'a gebu agu fata ena luvine emi 'ebeluvine weaqina." <sup>15</sup> \* 'Inega Iaisu wese tomotau qabudi vonedi vonaya, "Ona 'itamaki aqiaqiemi vekaikaiwabu 'inega, mana nawale vekaikaiwabu nana 'inega ona vemanuguba, ta ge taha toga ana fata ena kulufa qiduana 'inega yawai aqiaqina nalobei."

<sup>16</sup> 'Inega 'ebvetalatutula taha vona sesebaiega neidi vonaya, "Taha kaiwabu ena vaoqa 'idiega bolimana qiduana lobe. <sup>17</sup> 'Inega 'oloto nana taunega nuana vetonovea vonaya, 'Bolimana qiduana 'iguya, ta egu sailakayavo gebu adi fata. 'Inega tola'ai ena viaqi? <sup>18</sup> Ana 'ita ba'e 'idewana ena viaqia. Nugweta sailaka 'itu'ituwaidi ena qeu yavuledi ta 'esi sailaka vauvaudi be qiduquadi ena yoqonidi, 'inega 'abwaga ta wese egu kulufa qabudi 'idia ena vedododi. <sup>19</sup> Ta 'abiboda me egu qaiawa tauguyega ena vonaya, "Ya'a taha tovekaikaiwabu, yani qabudi aqiaqidi ni'a yaluveaqedi ana fata ya'wala 'evisa nalobe. 'Inega ena veyawai fewa 'inega ta me egu qaiawa ena toatoa, ta nonoqina ena 'ai'ai be ena numanuma." ' <sup>20</sup> Ta Yaubada 'oloto nana 'inaya vonaya, 'O'a 'oloto kwavakwavau! Velovelovana ba'e 'inaya una 'aliga ta kulufa dina ni'au uluveaqedi togama na'ewedi? "

\* 12:2: Lk 8:17 \* 12:7: Lk 12:24; Via 27:34 \* 12:11: Mk 13:11; Lk 21:12-15 \* 12:15: 1Tim 6:9-10

<sup>21</sup> \* 'Inega Ieisu tomotau qabudi vonedi vonaya, "Vonahaqiaqi, 'eguma taha toga ena kulufa kaikaiwabuna na'iva'ava'aia taunega weaqina, ta ge nuanuana Yaubada maega ina veiaiana aqiaqi, e tauna kwavakwavana!"

*Ge una nuanua yani taha taha weaqina*

*(Madiu 6:25-34)*

<sup>22</sup> 'Inega Ieisu ana to'abibodayavo vonedia, "Emi toa bwa'obwa'oya weaqina ge ona nuanua qiduana ami 'abwaga nage ami kaleko weaqidi. <sup>23</sup> Mana Yaubada yawaida ni'a neida, e 'inega wese ana fata nave'ainida be navekalekoda. <sup>24</sup> Ba'e taha 'ebvetalatutula ona nuaia bwayobwayo weaqidi. Taudi ge ida dauna ta ge ida bolimana ta wese ge edi sailakamo, ta tuta qabuna Yaubada adi 'abwaga neineidi. Ta ona nuave'avinia omi'a yani 'ena'ina Yaubada 'inaya, ta 'abiboda manu.

<sup>25</sup> "Nage taha toga 'imiega ana 'abwaga be wese ana kaleko ana 'ewa 'ibe weaqina nuanua qiduana. Ta yavona aqiaqiemi ge taha toga ana fata ba'e nuanua nana 'inega taunega ena tuta nagivekuei bwa'obwa'oya. <sup>26</sup> Ta 'eguma ge ana fata yani goyona 'idewani ona viaqia, e 'inega ge wese ona nuanua yani qabuna weaqina.

<sup>27</sup> "Ta wese ona nuaia libi idina edi tutulagata weaqina. Taudi ge ida fewa, ta wese adi kaleko ge ida viaqidi. Ta vonahaqiaqi, kini Solomoni ana kaleko be wese ana 'ivalayavo adi 'ita aqiaqidi, ta libi idina adi 'ita aqiaqi otaqidi. <sup>28</sup> 'Inega ona nuave'avinia Yaubada ena 'itamaki 'imia weaqina. Tauna ba'itagana libi idina veve'ivala aqiaqiedi, ta 'ibe ina mwatuqu be ina gabudi. Ta omi'a libi idina oveaqiaqi va'inedi, 'inega vonahaqiaqi ami kaleko naneimi. Omi'a emi vetumaqana Yaubada 'inaya dawalilina.

<sup>29</sup> "Ta gebu ona nuanua qiduana nage giwalimi naha'ala 'abwaga be go'ila weaqidi, <sup>30</sup> mana tomeqabu ge ida vetumaqana ba'e yani diavona weaqidi inuanua qiduana. Ta Tamami Yaubada 'wafimi ana iula weaqina ni'a alamania, 'inega ami 'abwaga be ami go'ila ta wese ami kaleko neinei kavovomi. <sup>31</sup> Ta 'esi luaqiaqiemi Yaubada ena 'Ebeluvine ona sali nugwetea, 'inega 'abiboda ba'e yani diavona wese naneimi.

*Kaikaiwabu mahalaya*

*(Madiu 6:19-21)*

<sup>32</sup> "Ta omi'a 'idewani Yaubada ena sifiavo, 'inega ge ona mwaniniva, mana me ena qaiawa qiduana nuanuana ba'e 'itaga na'ebe'ewemi ena 'Ebeluvine 'inaya. <sup>33-34</sup> \* Ta ona nuave'avinia ma'inaya emi kaikaiwabu 'eno'eno, e omo'e 'inaya emi nuanua wese natautauya. 'Inega emi kulufayavo ona vegimwaneyedi be manedi lukwalukwa 'idia ona vewila'ayea be 'inega mahalaya emi kaikaiwabu na'eno vataya. Ta kaikaiwabu nana mahalaya 'eno'eno ge wese ena awalamo, mana ge taha wese tovanawala be nayanaya 'abaga nana 'inaya ida toatoa be ina giveluveifei.

*'Iva'ava'ata weaqina*

<sup>35</sup> \* "Inega omi'a ona 'iva'ava'ata aqiaqiemi ta wese emi lamufa na'ala'alata ta ona ba'eba'e. <sup>36</sup> Ta ona ba'eba'e kavona tofewa edi lamufa 'ala'alata ta iba'eba'e edi kaiwabu ena 'evivi mai vaqi 'abwagana 'inega. Ta tuta nana na'ifoqe be 'awaya na'auveida'a ina lukwayavoni 'awa nana ina siwa'ei ta nalugu. <sup>37</sup> Ta luaqiaqiedi 'eguma edi kaiwabu nalobedi me edi 'iva'ava'ata itoatoa iba'eba'eyea, e 'inega nawale ina qaiawa. Vonahaqiaqi, edi kaiwabu nawale mali kaleko naveaqedi ta ena tofewa navonedi ina toabui ta tauna weaqidi nafewa ta adi 'abwaga naneidi. <sup>38</sup> Ta 'eguma wese tou gamonaya nage manu bodobodoya nalobedi me edi 'iva'ava'ata itoatoa e nawale wese ina qaiawa qiduana. <sup>39</sup> \* Ta wese yani ba'e ona alamania, 'eguma tonivanue dahalamaniamania totutaya tovanawala lugu ena vanuea, 'inega tauna da'iva'ava'ata aqiaqi ta ena vanue da'itamakia be 'inega ge taha tovanawala ana fata daqeuni ta dalugu. <sup>40</sup> 'Inega omi'a wese ona 'iva'ava'ata aqiaqiemi be ona ba'eba'e egu tuta 'evivi mai weaqina, mana tuta omo'e

\* 12:21: Md 6:19-20 \* 12:33-34: Lk 18:22 \* 12:35: Md 25:1-13 \* 12:39: Md 24:43-44; 1Te 5:2

'inaya tomotau ina vegeqa ina vonaya, 'Ana 'ita ge namai! E 'inega ya'a Tomotau Natuna ena 'ifoqe ena luveafedi."

*Tofewa magilafudi weaqidi*  
(Madiu 24:45-51)

<sup>41</sup> 'Inega Fita vonaya, "Kaiwabu, eu vona sesebai bena'ena nage ima'a mamu weaqima uvonavona, nage tomotau qabudi weaqidi?"

<sup>42</sup> 'Inega leisu vonaya, "Ya'a togwavubiga be toalamani weaqina yavonavona. Tauna ena kaiwabu navenua'ivinea ta ena vanue na'itamakia be tofewa qabudi adi 'abwaga naneidi 'aubena 'aidega 'aidega 'idia. <sup>43</sup> Ba'e tofewa nana nawale naqaiawa, mana tuta nana ena kaiwabu na'evivi namai nalobea fewafewa aqiaqina. <sup>44</sup>\* Yavona aqiaqiemi, nawale kaiwabu nana ena tofewa navonea ena kulufa ta wese ena kaikaiwabu qabudi adi luvine naneia be na'itamakidi. <sup>45</sup> Ta 'esi 'eguma tofewa nana taunega navonaya, 'Egu kaiwabu nawale gigive'ove'o 'inega taugu egu nuanua ena viaqidi.' 'Inega tofewa me'olotodi be vivivinedi 'efofolidi ta ge wese adi 'abwaga daneidi, ta ana 'aidega 'ai'ai ta go'ila waiwaina numanuma 'inega vekwavakwava. <sup>46</sup> Ta taha 'aubena ena kaiwabu naluveafei namai ta ena fewa luveifana na'ita lobea. 'Inega luvematasabu qiduana naneia ta na'wavini natauya taudi tovegwavu'ai edi di'wea.

<sup>47</sup>\* "Ta 'eguma tofewa nana ena kaiwabu ena nuanua ni'a alamania ta ana veyoveyoya ge daviaqidi, e tauna nawale luvematasabu qiduana nalobea. <sup>48</sup> Ta 'eguma taha toga ena kaiwabu ena nuanua ge nahalamanian ta nafewa veifa, nawale wese luvematasabu nalobea, ta 'esi tufwana goyona. Ta wese 'idewana 'eguma tofewa taha ana veyoveyoya qiduana, e luaqiaqiea be ena kaiwabu weaqina nafewa qiduana. Ta wese 'idewani 'eguma taha tofewa ana veyoveyoya qidua va'inena 'inega wese fewa qidua otaqina naviaqia ena kaiwabu weaqina."

*Iesu weaqina ve'eto'eto'idi na'ifoqe*  
(Madiu 10:34-36)

<sup>49</sup> Ta Iesu wese vonedi vonaya, "Ya'a yamai vonigo 'aiwe ena mu'ea ba'ade bwa'obwa'oya, ta nuanuagu qiduana 'aiwe nana na'alata kwayavona. <sup>50</sup>\* Ta tuta goyona 'inaya taha babitaiso vitana ena lobea. 'Inega nuagu vita qiduana ana laba babitaiso nana 'iguya ina viaqa 'ovoia. <sup>51</sup> Ta omi'a ma'oda, nage emi nuanua vonigo egu mai bwa'obwa'oya 'inega toadaumwala ona lobea? Gebu! Ta 'esi nawale vedavi be ve'eto'eto'idi 'imia na'ifoqe. <sup>52</sup> Ta tuta ba'e 'inega gade gamodia ve'eto'eto'idi na'ifoqe. Ta gade nana gamodia 'eguma tomotau adi yau faibi itoatoa nawale 'idiega toidi ina toasi'i ta wese magilafudi ina toasi'i. <sup>53</sup>\* 'Inega wese 'idewani tama natuna me'olotona navevoalanea, ta wese nawale natuna tamana navevoalanea. 'Idewani wese ina natudi mevavinena maega ina vevoalana, ta wese nawale natudi navevoalaneli. Ta wese vivine lawadiavo maega ina vevoalana be ina vetoatoasi'i."

*Tuta adi alamani weaqina*  
(Madiu 16:2-3)

<sup>54</sup> Ta Iesu wese tomotau qabudi 'idia vonaya, "Tuta nana gawata kwaukwausina ona 'itea yavalata 'inega nagalu navanevane 'inega ovonaya be nawale na'wei, e bena'e vonahaqiaqi. <sup>55</sup> Ta wese bolimana ana tuta 'inaya yaqina natoa 'inega ovonaya be tuta goyona ive na'ifoqe, ta bena'e wese vonahaqiaqi. <sup>56</sup> Omi'a tovemeahaqila, mana bwa'obwa'oya yani qabuna adi 'ebe'ita ni'au oalamanidi. Ta tola'ai weaqina egu viaqayavo ni'au o'itedi weaqidi nuami ge da'eqa'ui?

*Givetunuqa weaqina*  
(Madiu 5:25-26)

<sup>57</sup> "Ta tola'ai weaqina taumiega ge oda nuanua aqiaqi vonigo toyani aqiaqina be toyani luveifana? <sup>58</sup> 'Inega 'eguma au tove'ewa maega otautauya sabi kotu, luaqiaqieu be yani

\* 12:44: Md 25:21,23 \* 12:47: Iem 4:17 \* 12:50: Mk 10:38-39 \* 12:53: Mai 7:6

qabuna ona madugivetunuqia be 'inega tove'ewa nana maega ona veiaiana 'evivi, fole nawale natauyeu toluvine matanaya, ta nave'ineieu folisi 'idia be ina a'uluguyeu vanue 'ebeyoqona 'inaya. <sup>59</sup>Ta yavoneu, ge wese una 'ifoqe ana laba ena mane qabuna una ve'ia 'ovoidil!"

## 13

### *Ve'ita nuagivila weaqina*

<sup>1</sup>Omo'e tutana 'inaya vaina tomotau imai Iesu 'inaya, ta ivematamagilafuyea me Galili vaina weaqidi ivoneaya, "Kaiwabu, vaina me Galili yubai ifofolidi ta iveguba Yaubada 'inaya, ta Failato ena toluviayavo luvetunedi ta toveguba dina iluve'aligidi."

<sup>2\*</sup>'Inega Iesu vonedi vonaya, "Ta omi'a nage onuaia taudi toveguba diavona me Galili qabudi edi luveifana qidua va'inena, 'inega omo'e luvematasabu nana qiduana ilobe, waisa? <sup>3</sup>Gebu! Ta omi'a 'eguma ge ona nuagivila emi ilivu luveifana 'idiega nawale wese veilae qiduana ona lobe. <sup>4</sup>Ta ma'oda omi'a onuanua 'aiqa taudi me Sailoama adi yau 18 weaqidi tuta nana taha vanue kuena 'avalaquni webui luve'aligidi? Ta nage onuaia vonigo taudi edi ilivu luveifana qidua va'inena me Ielusalema qabudi 'idiega, ta 'inega veilae nana ilobe, waisa? <sup>5</sup>Gebu! Ta omi'a 'eguma emi ilivu luveifana 'idiega ge ona nuagivila, e nawale qabumi wese 'idewani veilae qiduana ona lobe."

'Ala'ai vuaqa geqana

<sup>6</sup>'Inega Iesu taha vona sesebai neidi vonedia, "Taha 'oloto ena vaoqaya 'aiwe 'ala'ai 'wadia 'oine ana loi nuanidia. Ta tuta qabuna maimai 'aiwe nana 'inaya vuaqina sabi goluna ta ge taha wese vuaqina dalobe. <sup>7\*</sup>'Inega ena vaoqa ana to'itamaki vonea vonaya, 'Ni'au ualamanua ya'wala toi 'idia yamaimai ba'e 'inaya 'ala'ai nana weaqina sabi goluna, ta vuaqina ge taha tuta eda lobe. 'Inega ba'e 'itaga una talaqa yavulea, mana bwa'obwa'o aqiaqina tovolobodea.' <sup>8\*</sup>Ta vaoqa ana to'itamaki ena kaiwabu ve'iea vonaya, 'Kaiwabu, 'eguma ana fata 'aiwe nana ge ena talaqa yavulei, ta 'esi ena ve'avui be ena 'itamaki tonovia, 'inega omo'e ya'wala nana 'inaya kana 'itea. <sup>9</sup>Ta 'eguma navuaqa e natovolo, ta 'eguma ge navuavuaqa e 'inega kana talaqa yavulea.'"

### *Sabatea Iesu vavine taha giveaqiaqiea*

<sup>10</sup>Taha Sabate 'inaya Iesu vanue tafwalolo taha 'inaya lugu 'inega veve'ita. <sup>11</sup>Ta vanue nana 'inaya taha vavine wese toatoa, tauna ya'wala 18 gamonaya niboana luveifana giveluveifea, 'inega vevihia ta tuta qabuna ena tauya gwavuna kuyukuyu ta tautauya, ge ana fata natunuvane be natauya tunutunuqa. <sup>12</sup>Ta tuta nana Iesu vavine nana 'itea 'inega gabea vonaya, "Vavine umai, au vihiqa ni'a awala." <sup>13</sup>Ta Iesu nimanega vavine nana gitonovia, 'inega lukwayavoni tunuvane ta Yaubada awatuboya.

<sup>14\*</sup>Ta vanue tafwalolo ana tovanugweta Iesu ena viaqa 'itea, 'inega diana vilea mana Sabatea tovevihia giveaqiaqiea. 'Inega totafwalolo 'idia simana vonaya, "Vonahaqiaqi, 'aubena sikisi 'idia eda fewa kana viaqidi, 'inega luaqiaqiea be 'aubena diavona 'idia ona mai ami giveaqiaqi weaqina, ta ge wese Sabate 'inaya ona mai yani ba'e weaqina!"

<sup>15\*</sup>Ta Iesu ena vona ni'au noqolia 'inega vonaya, "Omi'a toveamehaqila, mana Sabate 'aidega 'aidega 'idia emi yubai qabudi adi 'aliega oli'ali'amidi ta 'inega i'ifo'ifoqe 'abagaya ta adi go'ila ovevenumedi. <sup>16</sup>Ta ma'oda onuanua 'aiqa vavine ba'e weaqina? Nage ge ana fata ana vihiqa 'inega ena li'ami Sabatea be 'etoyavua nalobei 'edewani emi yubaiavo? Mana vavine ba'e Ebelamo ena gadeyega, ta Seitani ya'wala 18 'idia ni'a yoqonia." <sup>17</sup>Iesu ena vona ba'e 'inega tolugwae diavona giveiniyauyaunidi, ta tomotau qabudi iqaiawa qiduana Iesu ena viaqa aqiaqina weaqidi.

*Iesu ena vona sesebai magilafuna Yaubada ena 'Ebeluvine weaqina*  
(Madiu 13:31-33; Maki 4:20-32)

\* 13:2: Ion 9:2 \* 13:7: Lk 3:9 \* 13:8: 2Fit 3:9,15 \* 13:14: 'Ifo 20:9-10; Luve 5:13-14 \* 13:15: Lk 14:5

<sup>18</sup> 'Inega qabu dina 'idia wese vonaya, "Ma'oda 'inega Yaubada ena 'Ebeluvine ena giveleleqa 'aiqei 'imia, nage 'ebevetalatutula taha ba'e 'edewana: <sup>19</sup> Yaubada ena 'Ebeluvine kavona taha 'oloto te'wa vewanina 'ewei vaoqaya 'wadia, 'inega tabo vane veqidua, ta 'abiboda manu imai 'abo ilunevuqa laqanaya."

<sup>20</sup> 'Inega Iesu wese vonedi vonaya, "Ma'oda wese ena givesimatala 'aiqei 'imia be 'inega Yaubada ena 'Ebeluvine ona alamaniana, nage 'ebevetalatutula taha ba'e 'edewana: <sup>21</sup> Yaubada ena 'Ebeluvine kavonaya falawa ana isiti goyona taha vavine 'ewei 'abo falawa qiduana maega wayavilea 'inega falawa didina."

'Ebelugu sadana yawai vataya weaqina

(Madiu 7:13-14,21-23)

<sup>22</sup> 'Inega Iesu wese tutuvila tautauya Ielusalema weaqina, ta 'edaya vaina 'abaga qiduiduadi be goyogoyodi 'idia 'ifoqe, 'abo veve'ita totoa 'abaga 'idia. <sup>23</sup> 'Inega taha 'oloto Iesu vetala'aiea voneaya, "Kaiwabu ma'oda, nage nawale tomtotau lutoidi yawai vataya mahalaya ina lobe, waisa?"

'Inega Iesu voneaya, <sup>24</sup> "Mahala ana 'awa sadana. 'Inega ona vetafe'wa waiwai ana lugu weaqina, mana tomtotau qabudi itohotoho waiwai vonigo nuanuadi ina lugu. <sup>25</sup> \* Ta tuta nana tonivanue 'awa nana nabaginia 'inega omi'a emi give'ove'o 'inega masu'edanaya ona tovoloto ta ona 'auveida'a be ona noqi ona vonaya, 'Kaiwabu, 'awa usiwa'ei be ima'a wese ana lugu wai.' 'Inega navona 'eviviemu navonaya, 'Omi'a tomeqabu? Ya'a ge taha ana tufwa eda alamanimi!' <sup>26</sup> Ta omi'a ona voneaya, 'Ima'a lova maega ka'ai'ai kanumanuma, ta wese ema 'abaga 'inaya uve'ita 'imaya.' <sup>27</sup> \* Ta 'inega tonivanue navonemi navonaya, 'Vonahaqiaqi, ge eda alamanimi, ma'inega omai? Onogegu, mana omi'a tomtotau luveluveifami!'

<sup>28</sup> \* "Inega omi'a ona dou ta alami navetalakikokiko tuta nana 'abaga gwavunaya ina felawebuiemi. Ta omo'e 'inega ona 'ita naqo Ebelamo be, Aisake be, Iakobo ta wese tovesimasimana qabudi ona 'itedi Yaubada ena 'Ebeluvine 'inaya itoatoa. <sup>29</sup> \* Ta di'we qabuna 'idiega tomtotau ina mai ta edi 'ebetoa aqiaqidi ina 'ewedi Yaubada ena 'Ebeluvine sagalina 'inaya. <sup>30</sup> \* Vonahaqiaqi, tomeqabu ba'e 'itaga inugwenugweta nawale ina 'abiboda, ta tomeqabu taudi ba'e 'itaga i'abi'abiboda, e nawale ina nugweta."

*Iesu ena nuavita Ielusalema weaqina*

(Madiu 23:37-39)

<sup>31</sup> Tuta omo'e 'inaya vaina Falisiavo imai Iesu 'inaya ivoneaya, "Una tutuvila 'abaga ba'e una nogea, mana Elodi nuanuana naluve'aligi."'

<sup>32</sup> 'Inega Iesu vonedi vonaya, "Elodi nana tauna kavona waqiwai, ta ya'a 'iguya tauna yani kavokavovo, e 'inega ona 'evivi ona tauya 'inaya be ona vonea vonigo ba'itagana niboana luveifadi tomtotau 'idiega ya'wavinidi i'ifoqe ta tovevihuqayavo yagiveaqiaqiedi, ta wese 'ibe 'edewani, ta 'aubena vetoina 'inaya egu viaqa qabuna ena lu'ovoa. <sup>33</sup> Vonahaqiaqi, ya'a ba'itagana yatautauya Ielusalema weaqina, ta 'ibe be wese navulihia 'inega ena 'ifoqe, ta omo'e 'inaya ena 'aliga, mana tovesimasimana qabuma ge daluaqiaqiema be mali 'abagaya ana 'aliga, ta 'esi Ielusalema namo 'inaya."

'Inega Iesu nuana vita Ielusalema weaqina dou vonaya, <sup>34</sup> "Ielusalema ye, Ielusalema ye! O'a tovesimasimanayavo uluve'aligidi, ta wese taudi Yaubada vetunedi imai 'iuya daboyega uluve'aligidi. Tuta qabuna nuanuagu be eu tomtotauyavo ena gaba va'auqidi kavonaya kamukamu natudiavo fafediega i'aubwaedi, ta eu tomtotauyavo inogegu. <sup>35</sup> \* 'Inega Yaubada nawale nanogeu ta yavoneu ge wese una 'ita 'eviviegu ana laba eu tomtotauyavo ina 'awahaqiaqiegu be ina vonaya, 'Tauna Kaiwabu ana wawega maimai kana awatuboya.'"

\* 13:25: Md 25:10-12 \* 13:27: Same 6:8 \* 13:28: Md 8:11-12 \* 13:29: Same 107:3 \* 13:30: Md 19:30  
\* 13:35: Same 118:26

## 14

*leisu Sabatea taha* 'oloto giveaiaqiea

<sup>1</sup> Sabate taha 'inaya leisu tauya sabi 'ai Falisiavo edi tovanugweta taha ena vanuea. Ta tutana lugulugu 'inega tomotau qabudi leisu ivevekova aqiaqiea. <sup>2</sup> Ta leisu 'iawanaya taha tovevihuqa toatoa vayovayoqa 'inega 'wafina qabuna 'elulolonea. <sup>3</sup> \* 'Inega leisu luvine ana toalamaniavo be Falisiavo vetala'aiedi vonedia, "Ma'oda onuanua 'aiqa, nage ana fata 'aubena Sabate 'inaya tovevihuqa kana giveaiaqiedi nage gebu?"

<sup>4</sup> Ta tomotau qabudi igenu'wana, 'inega leisu tovevihuqa nana nimanega gitonovia 'abo giveaiaqiea, 'inega luvetunei tauya. <sup>5</sup> \* 'Inega leisu vetala'aiedi vonaya, "Eguma taha toga 'imiega natuna me'olotona nage ena bulumakau Sabate 'inaya nabe'u gulia e 'inega ona lihi vaneyea, waisa?"

<sup>6</sup> Ta taudi ge taha tola'ai wese ida vonei.

*Ge taha* 'ebetoa aqiaqina taumiega ona venua'ivinei

<sup>7</sup> 'Ai nana gamonaya leisu totoa va'auta vaina 'itedi nuanuadi 'ebetoa aqiaqina 'inaya ina toabui, 'inega taha vona sesebai neidi vonaya, <sup>8</sup> \* "Eguma taha toga nagabeu vaqi 'abwagana weaqina ge una toabui tovekaikaiwabu edi 'ebetoya, mana nawale nage taha 'oloto qiduana namai. <sup>9</sup> 'Inega 'eguma ni'a utoabui nawale toni'abwaga namai navoneu, 'Uya'itoto mana 'oloto kaikaiwabuna ba'e 'inaya natoabui!' 'Inega o'a me eu iniyauyau una 'evivi masu'edanaya ta una toabui. <sup>10</sup> Ta 'esi 'eguma taha toga nagabeu 'ai weaqina, 'inega 'ebetoa kavokavovo 'inaya una toabui, 'inega toni'abwaga namai na'iteu 'inega navoneu, 'Iagu, utoa vanemai 'ebetoa aqiaqinaya.' 'Inega me eu qaiawa una toa vane tomotau qabudi matadia ta ina 'awahaqiaqieu. <sup>11</sup> \* Ba'e 'inega kana alamania, 'eguma taha toga taunega ana wawa nagivaneqea e nawale Yaubada naha'uwebuiea, ta 'eguma taha toga taunega ana wawa naha'uwebuiea nawale Yaubada nagivaneqea."

<sup>12</sup> 'Inega leisu Falisi nana voneaya, "Tutana 'ai una viaqia 'inega ge emwavo nage taimwavo nage eu gadeavo nage tovekaikaiwabu daisidi una gabedi 'ai nana 'inaya, mana taudi nawale ina gaba 'evivieu sabi 'ai, 'inega au 'abwaga ina ve'iea. <sup>13</sup> Ta 'esi tuta nana 'abwaga una viaqia 'inega wese taudi lukwalukwadi be, belubeludi be, 'aqedi veifana ta wese matadi kwayakwayana una gabedi ina 'ai. <sup>14</sup> \* 'Inega veyoluba qiduana una lobeia, mana taudi ge adi fata be eu veyoluba nana ina ve'iei 'iuya, ta 'esi Yaubada 'inega au ve'ia una lobeia tuta nana tunutunuqidi ina ya'itoto 'aligea."

'Abwaga qiduana vona sesebaina

*(Madiu 22:1-10)*

<sup>15</sup> \* Ta nawale i'ai'ai 'inega totoa va'auta taha 'idiega leisu ena vona ba'e noqolia 'inega voneaya, "Vonahaqiaqi, tomeqabu ina lugu Yaubada ena 'Ebeluvine 'inaya 'ai qiduana weaqina taudi ina qaiawa qiduana."

<sup>16</sup> 'Inega leisu 'oloto nana voneaya, "Taha kaiwabu 'abwaga qiduana 'iva'ava'aia ta tomotau qabudi ve'aionidi. <sup>17</sup> Ta 'abwaga ana 'iva'ava'ata ni'a lu'ovoa, 'inega ena tofewa vetunea taudi lova ni'a vematamagilafuyedi 'idia, 'inega vonedi vonaya, 'Ona mai kana tauya, mana toni'abwaga yani qabuna ni'a 'iva'ava'aia omi'a weaqimi!' <sup>18</sup> Ta tomotau diavona inoga ta vona taha taha ineia, ta taha vonaya, 'Ya'a bwa'obwa'o vauvauna yagimwaneia, 'inega nuanuagu ena tauya ena 'itea. Kaiwa qiduana, ta ana 'ita ge ena wai.' <sup>19</sup> Ta taha wese vonaya, 'Kaiwa qiduana, ta ana 'ita ya'a ge ena wai, mana bulumakau 'alabwatadi adi yau teni ni'a yagimwanedi, 'inega yatautauya be ena vefewa tonovidi.'

<sup>20</sup> \* Ta wese taha vonaya, 'Ya'a vauvaugu yavaqi 'inega ge ana fata ena wai.'

<sup>21</sup> "Inega tofewa nana 'evivi 'abo ena kaiwabu 'inaya simana voneaya, 'Qabudi inoga.' 'Inega toni'abwaga gamosoala ta ena tofewa voneaya, 'Ulukwayavoni utauya 'abaga

\* 14:3: Lk 6:9 \* 14:5: Md 12:11; Lk 13:15 \* 14:8: Vos 25:6-7 \* 14:11: Md 23:12; Lk 18:14 \* 14:14: Ion 5:29 \* 14:15: Lk 13:29 \* 14:20: 1Kol 7:33

qiduana ana 'edayavo 'idia be tomotau una lobedi lukwalukwadi nage belubeludi nage 'aqedi veifana nage matadi kwayakwayana e qabudi una 'ebe'ewedi una miedi ina 'ai.' <sup>22</sup> 'Inega tofewa nana ena kaiwabu ena nuanua viaqia, ta 'abiboda 'evivi mai ta voneaya, 'Tomotau dina yagabedi ni'a imai, ta eu vanue ge ida luveagatuna'ia.' <sup>23</sup> 'Inega kaiwabu nana wese voneaya, "Eda qiduqiduadi ta goyogoyodi 'idia una tauya ta tomotau una vonedi be ina mai, ta 'inega egu vanue ina luveagatuna'ia. <sup>24</sup> Yavona aqi-aqiemi, tomotau dina yamadugabedi ta inogaya ge taha 'idiega nalugu be 'abwaga nana nagudatonovi.' "

*Isisu ana 'abiboda weaqina*  
(Madiu 10:37-38)

<sup>25</sup> Yo'o qiduadi leisu maega itautauya, 'inega tunugivila 'idia vonaya, <sup>26</sup>\* "Eguma taha toga nuanuana na'abibodegu 'inega namaduveyolubegu qiduana ta 'abiboda tamana be, inana be, moqanena be, natunavo be, tainavo ta novunavo wese naveyolubedi. Ta wese 'eguma yawaina navegagalea 'inega tauna ge ana fata na'abibodegu. <sup>27</sup> Ta 'eguma taha toga ge nuanuana taunega ana 'etoluai na'avalei be vita nalobei 'idewana ya'a, e 'inega tauna ge ana fata na'abibodegu.

<sup>28</sup> "Ta wese 'edewana 'eguma taha toga nuanuana be vanue qiduana nayoqonia, e nugweta ana maisa ta wese yani qabuna na'iva'ava'aidi vanue nana ana yoqona weaqina. <sup>29</sup> Mana 'eguma 'oqola namo navetovolodi ta ge vanue qabuna nalu'ovoi, 'inega nawale tomotau ina 'itea 'abo 'oloto nana ina givenu'wea, <sup>30</sup> ta ina vonaya, "Oloto ba'e lova 'oqola 'evetovolodi, ta ge ana fata vanue qabuna dalu'ovoi, mana ena mane ge damadu'iva'ava'aia vanue nana ana yoqona weaqina.'

<sup>31</sup> "Ta wese 'eguma taha kini me ena toluavia adi yau 10,000 ina tauya sabi luavia taha wese kini maega, ta omo'e kini nana me ena toluavia adi yau 20,000. 'Inega 10,000 dina edi kini ma'oda nanuanua 'aiqa? Nugweta natoabui ta nanuanua 'eguma adi fata 20,000 dina ina vewaiwai va'inedi, waisa? <sup>32</sup> Ta 'eguma ge ana fata, e 'inega vaina tomotau navetunedi ina tauya 20,000 dina edi kini 'inaya nawale luluvaia itoatoa, be 'inega ina venoqi 'inaya toadaumwala weaqina."

<sup>33</sup> 'Inega leisu ena vona lu'ovoia 'idia vonaya, "Eguma nuanuau be una 'abibodegu e nugweta yani qabuna 'iuya 'eno'eno una 'abifeledi."

*Mwade'wa weaqina*  
(Madiu 5:13; Maki 9:50)

<sup>34</sup> "Mwade'wa yani aqiaqina, ta 'eguma nagibwa 'inega ge wese ana fata navedibidibi 'evivi. <sup>35</sup> Ta wese ge ana fata be bwa'obwa'o ena waiwai nagive'ena'ia nage nagiveaqi-aqiei, 'inega luaqiaqiea be kana guiwaqa yavulea. 'Eguma ma taniqami vona ba'e ona noqolia!"

## 15

*Sifi luluve'waivina vona sesebaina*  
(Madiu 18:12-14)

<sup>1</sup> Taha tuta takesi ana to'ewayavo ta wese toluveifadi itoava'auta leisu 'inaya ena vona sabi noqolina. <sup>2</sup>\* 'Inega Falisi be wese luvine ana tove'itayavo taudiega ilulumugi ivonaya, "Oloto ba'e toluveifadi veiaianedi ta wese maega i'ai'ai."

<sup>3</sup> 'Inega edi lumugi weaqina leisu vona sesebai toi ba'e neidi vonedia, <sup>4</sup>\* "Ma'oda 'eguma taha toga 'imiega ena sifi adi yau 100 itoatoa, ta 'aidegana naluve'waiva, 'inega 99 dina nanogedi ta sifi luluve'waivina nasalia ana laba nalobea, waisa? <sup>5</sup> Ta tutana nalobea me ena qaiawa 'avalanaya naha'ui <sup>6</sup> be na'evivi 'abagaya. 'Inega enavo nagaba va'auqidi be navonedia, 'Egu sifi luluve'waivina ni'a yalobea, 'inega weaqina kana qaiawa.' <sup>7</sup> Ta yavonemi, wese 'edewana 'eguma tomotau 100 itoatoa ta 99 'idiega ni'a

\* 14:26: Lk 9:23 \* 15:2: Lk 5:30 \* 15:4: Isi 34:11,16; Lk 19:10

inuagivila, ta ta'a mona gebu. 'Inega 'eguma tauna ana 'aidega wese nanuagivila, 'inega totoa mahalaya ina qaiawa gegoyo weaqina, ta 'abiboda taudi 99 dina, mana lova inuagivila, 'inega Yaubada matanaya ni'au ivetunutunuqa.

*Mane luluve'waivina vona sesebaina*

<sup>8</sup> “Edewana wese vavine taha ena mane siliba ana yau 10 'inaya 'eno'eno. Ta 'eguma 'aidegana naluve'waivia, 'inega tola'ai naviaqi be naloba 'eviviei? Mana ba'e siliba nana kavona taha tomotau ana ve'ia na'ewe'a 'aubena 'aidegana ana fewa weaqina. Ana 'ita lamufa nagabuya be vanue gamona nalo'ilia ta nasali aqiaqiea ana laba nalobea, waisa? <sup>9</sup> Ta tutana nalobea 'inega enavo nagaba va'auqidi be navonedea, 'Egwavo, qabuda kana qaiawa, mana egu mane luluve'waivina ni'a yalobea!’ <sup>10</sup> 'Edewana wese Yaubada ena tovale'ewayavo iqaiqaiawa qiduana tuta nana toluveifana taha nanuagivila.”

*Taha kaiwabu natuna me'olotona luluve'waivina vona sesebaina*

<sup>11</sup> Ta leisu wese vona sesebaiega vonedi vonaya, “Taha kaiwabu natunavo me'olotodi magilafudi maega itoatoa, <sup>12</sup> ta natuna keke'ina tamana 'inaya vonaya, 'Tamagu, nuanuagu ba'e 'itaga agu vaufa una neigu eu 'ebeluvine be eu kulufayavo 'idiega.' 'Inega tamadi yani qabuna vewila'ayea natunavo 'idia.

<sup>13</sup> “'Inega ge tuta kuenta 'abibodanaya natuna keke'ina ena kulufa vegimwaneyedi ta manedi 'ewei. 'Inega tutuvila tauya luluvaia taha di'we 'inaya, 'abo qaiawa kavokavovo nuana 'ewei ta ena mane vegumwalia. <sup>14</sup> Ta ni'au ena mane qabuna vegumwalidi 'abo nima 'ava'avana toatoa. Ta tuta nana 'inaya kulaka qiduana di'we nana 'inaya 'ifoqe, 'inega ve'ale botana lutonovia.

<sup>15</sup> “'Inega ena fewa sali 'abo di'we nana gamonaya kaiwabu taha lobea, 'inega vetunea be ena baweavo na'itamakidi. <sup>16</sup> Ta toluve'waiva nana nuanuana bawe adi 'abwagega na'ai ta gamona nakoko, mana ge taha toga ana 'abwaga daneia.

<sup>17</sup> “'Inega nuana 'eqa'uya ta taunega 'inaya vonaya, 'Vonahaqiaqi, tamagu ena tofewayavo adi 'abwaga qiduana ge adi fata ina 'ai'ovoi, ta ya'a ba'idia botana qiduana vunuvunuqigu. <sup>18</sup> \* 'Inega ena tutuvila ena 'evivi tamagu 'inaya be ena voneaya, “Tamagu, ni'au luveifana qiduana yaviaqia Yaubada 'inaya ta wese o'a 'iuya. <sup>19</sup> 'Inega ge daluaqiaqiege be una 'awanatunegu ta 'esi una gabegu ya'a eu tofewa 'idewana.”

<sup>20</sup> “Ba'e 'idewana nuana tonovea, 'inega ya'itoto e tamana 'inaya tauya. Ta luluvaiega tamana natuna 'itea maimai. 'Inega me ena nuakolokolo vihila 'inaya ta talafafei maega ivedoudou.

<sup>21</sup> “'Inega natuna tamana vonea vonaya, 'Tamagu, ni'au yaluveifa Yaubada matanaya ta wese o'a 'iuya, 'inega ge daluaqiaqiege be una 'awanatunegu.’

<sup>22</sup> “Ta tamana ena tofewayavo gabedi imai vonedia, 'Olukwayavoni be kaleko aqiaqi otaqina omiei natugu ona vekalekoi be mwali ona miei be 'ataqinaya ona veaqea. Ta wese 'aqeyafayafa 'aqenaya ona yoqonia. <sup>23</sup> Ta wese bulumakau kekeyavauna ta bilabilana ona vunuqi ona miei ta 'abwaga qiduana kana viaqi, be 'inega me eda qaiawa natugu maega kana 'ai 'aideganaya. <sup>24</sup> \* Mana natugu ba'e kavonaya lova da'aliga, ta ba'itagana mayawaina kaloba 'eviviea.' 'Inega me edi qaiawa itoa va'auta ta i'ai'ai.

<sup>25</sup> “Ta natuna 'unutauna nawale vaoqaya fewafewa, ta tutana 'abaga di'wenaya 'ifo'ifoqe 'evosi be lavua butuna noqolidi. <sup>26</sup> 'Inega taha tofewa gabei mai vetala'aiea voneaya, 'Tola'ai 'iuna 'inega iqaiqaiawa?’

<sup>27</sup> “Ta tofewa nana voneaya, 'Taiu ba'e 'itaga 'evivi mai 'inega tamau bulumakau kekeyavauna ta bilabilana vunucia maega a'ai'ai ta aqaiqaiawa, mana taiu mayawaina ta aqiaqina loba 'eviviea.’

<sup>28</sup> “Ta tuta nana vona ba'e noqolia 'inega diana vilea ta ge nuana nalugu vanuea. 'Inega tamana webui ta natuna 'unutauna venoqi waiwai maega ina lugu vanuea. <sup>29</sup> Ta wese noga mana diana vilea, 'inega tamana 'inaya vonaya, 'Tamagu, ya'wala 'eala 'idia weaqiu yafewafewa be tuta qabuna eu nuanua ya'abibodea. Ta ge taha wese yubai uda neigu

\* 15:18: Same 51:4 \* 15:24: Efe 2:1,5



be ma egwavo ada 'ai ta ada qaiawa. Gebu'e otaqa! <sup>30</sup> Ta natuhu ba'e eu kulufa qabuna 'eluveyaveyavuledi toyafwauta 'idia, 'inega tola'ai weaqina bulumakau kekeyavauna ta bilabilana uvunuqi maega o'ai'ai ta oqaiqaiawa?"

<sup>31</sup> "Ta 'inega kaiwabu nana natuna 'unutauna 'inaya vonaya, 'Natugu una alamania, o'a tuta qabuna di'weguya utoatoa, ta ya'a egu kulufa be egu bwa'obwa'o o'a wese eu kulufa be eu bwa'obwa'o, waisa? <sup>32</sup> Ta taiu lova kavona 'aliga ta ba'e 'itaga mayawaina toatoa, ta wese lova luluve'waivina ta ba'e 'itagana ni'a kaloba 'eviviea. 'Inega luaqiaqieda be maega kana qaiawa.' "

## 16

### *Vona sesebai to'itamaki luveifana weaqina*

<sup>1</sup> Ieisu ana to'abibodayavo 'idia vonaya, "Taha 'oloto kaikaiwabuna ena kulufa ana to'itamaki maega itoatoa. 'Inega taha tuta 'inaya tomotau vaina vale imiea kaiwabu nana 'inaya ivonaya, 'Kaiwabu, eu to'itamaki eu mane ta eu kulufayavo 'eluveyaveyavuledi.'

<sup>2</sup> "Inega kaiwabu nana ena to'itamaki gabei mai ta voneaya, 'Vaina vona luveifadi weaqiu yanoqolidi, 'inega ge ana fata weaqigu una fewa. 'Inega ba'e 'itagana taha fefwai una 'wayavia egu kulufayavo weaqidi 'evisa nawale i'eno'eno, ta 'inega una webui.'

<sup>3</sup> "Inega to'itamaki nana nuana tonovea ta taunega vonaya, 'Ma'oda ba'e 'itaga ena viaqa 'aiqa, mana egu kaiwabu egu fewa 'inega ni'au a'uwebuiegu? Ta gebu agu fata be ena vaoqa mana ge waiwaigu, ta wese yainiyauyau 'eguma ena tauya tomotau 'idia be 'abwaga weaqina ena venoqinoqi.' <sup>4</sup> 'Inega taha nuanua lobeia ta vonaya, 'E ba'e 'edewanina ena viaqa 'aiqa tutana fewa ba'e 'inega ena webui, 'inega nawale tomotau ina gabegu edi vanuea.'

<sup>5</sup> "Inega to'itamaki nana taudi lova iloaga gabedi imai ta 'aidega 'aidega adi loaga weaqina vetala'aiedi. 'Inega taha 'idiega nugweta lugu, ta to'itamaki nana voneaya, 'Evisa au loaga ba'idia 'eno'eno egu kaiwabu 'inaya?'

<sup>6</sup> "Ta 'oloto nana voneaya, 'Dede'wa ma wagedi 'ena'ena'idi ana yau 100 yaloagedi.'

"Inega to'itamaki nana voneaya, 'Uluwayavoni, eu fefwai ba'e 'inaya au loaga 50 una 'wayavia.'

<sup>7</sup> "Inega 'oloto vemagilafuna lugu vetala'aiea voneaya, 'Ta o'a wese 'evisa au loaga?'

"Ta 'oloto nana vonaya, 'Abwaga ma fwatadi ana yau 100 yaloagedi.'

"Inega to'itamaki nana wese voneaya, 'Eu fefwai ba'e 'inaya au loaga adi yau 80 una 'wayavia.' Ba'e 'edewani toloaga qabudi adi loaga wese a'uwebuiedi.

<sup>8</sup> "Inega ena kaiwabu ena viaqa ba'e weaqina noqolia 'abo awatuboya ena alamani aqiaqina weaqina."

Ta Ieisu vonaya, "Vona sesebai ba'e ve'iteda totoa bwa'obwa'o ialamani aqiaqiea bwa'obwa'o ana kaikaiwabu ma'oda 'inega ina vefewedi, ta Yaubada ena qabuyavo edi alamani yani ba'e weaqina tufwana ge aqiaqina."

<sup>9</sup> 'Inega Ieisu wese vonedi vonaya, "Bwa'obwa'o ana kaikaiwabuyavo 'inega tomotau luveifana iviaqia. Ta omi'a kaikaiwabu dina 'idiega ona vefewedi emi veiaiana tomotau maega. 'Inega nawale tutana kaikaiwabu dina ina awala emiavo ina 'ebe'ewemi mahalaya, ta ina qaiawa weaqimi. <sup>10</sup> \* 'Eguma taha toga yani goyona na'itamaki aqiaqiea e wese yani qiduana nawale ana fata na'itamakia. Ta 'eguma taha toga yani goyona ge na'itamakia, wese nawale yani qiduana weaqina ge na'itamakia.

<sup>11</sup> "Inega omi'a wese 'idewana, 'eguma bwa'obwa'o ana kaikaiwabu weaqidi gebu ona 'itamaki aqiaqi, nawale Yaubada wese ge kaikaiwabu aqiaqina naneimi mahalega. <sup>12</sup> Ta 'eguma wese tomotau edi kaikaiwabu weaqina gebu oda 'itamaki aqiaqiedi, e 'inega ge wese taha toga emi kaikaiwabu naneimi be ona 'itamakia.

<sup>13</sup> \* "Ge taha toga ana fata navetofewa kaiwabu magilafudi 'idia. Mana 'eguma 'idewanina nawale taha nanogea ta taha naveyolubea. Ta wese taha na'awahaqiaqiea

\* 16:10: Lk 19:17-26 \* 16:13: Md 6:24

ta taha na'awaluveifea. 'Inega omi'a ge ana fata be Yaubada ta wese bwa'obwa'o ana kaikaiwabu weaqidi ona vetofewa."

*Iesu wese vaina ve'ita Falisiavo neidi  
(Madiu 11:12-13; 5:31-32; Maki 10:11-12)*

<sup>14</sup> Tutana Falisiavo Iesu ena vona inoqolia 'inega igivenu'wea, mana taudi nuanuadi qiduana mane. <sup>15</sup> \* 'Inega Iesu vonedia, "Omi'a onuaia vonigo emi ilivu aqiaqina tomotau 'iawadia, ta vonahaqiaqi luveifana qabuna giwalimia 'eno'eno Yaubada ni'a alamanidi. Mana tola'ai tomotau nuadi 'ewe'ewea ta Yaubada matanaya yani kavokavovo.

<sup>16</sup> \* "Ta vonahaqiaqi, Mosese ena luvineavo ta wese tovesimasimana edi 'wayaviavo 'imia i'nova ana laba Ioni Togivebabitaiso mai. Ta tuta omo'e 'inega be ba'e 'itaga 'inaya vale aqiaqina Yaubada ena 'Ebeluvine weaqina ana lugaihi nawale tautauya. Ta 'Ebeluvine nana weaqina tomotau qabudi edi waiwaiega ilugulugu. <sup>17</sup> \* Mahala be bwa'obwa'o ana fata ina awala, ta Mosese ena luvineavo 'idiega ge taha yani goyosikwa otaqina nahawala.

<sup>18</sup> "Eguma taha 'oloto moqanena nasa'iledi ta navaqi ukamana mali vavine 'inaya, e tauna luabu ilivuna ni'a viaqia. Ta wese 'idewana 'eguma taha 'oloto vavine sa'isa'ilidi navaqidi, e 'inega ba'e 'oloto nana wese luabu ilivuna ni'a viaqia."

*Taha 'oloto kaikaiwabuna ta Lasalo*

<sup>19</sup> Ta Iesu wese vonedi vonaya, "Taha tuta 'inaya taha 'oloto kaikaiwabuna toatoa 'abagaya. Ta ana kaleko aqiaqi otaqidi ta wese ana 'abwaga 'eala ta aqiaqidi. 'Inega 'aubena 'aidega 'aidega 'idia me ena qaiawa 'ai'ai, ta me ena kulufa qiduana toatoa.

<sup>20</sup> "Ta kaiwabu nana ena vanue masu'edanaya taha 'oloto lukwalukwana ana wawa Lasalo toatoa. Ta 'wafina qabuna lubonubonu, 'inega kedewa imai ta bonuna iluyamoidi. <sup>21</sup> Ta Lasalo nuanuana be kaiwabu nana ana 'abwaga salimugunega na'ai, ta ge taha yani daneia.

<sup>22</sup> "Ta tuta nana Lasalo 'aliga 'inega Yaubada ena tovale'ewayavo i'ebe'ewea itauyea mahalaya Ebelamo di'wenaya. Ta 'abiboda kaiwabu nana wese 'aliga ta itavunia. <sup>23</sup> 'Inega me ena visiqa qiduana 'aiwe 'ala'alata 'inega 'ita vane ta luluvaia Lasalo 'itea Ebelamo maega itoatoa. <sup>24</sup> 'Inega bonana qiduanega gaba voneaya, 'Ei tamagu Ebelamo! Uda nuakolokoloyegu, be Lasalo uda vetunei damai ta go'ila fayou'una 'inaya nimana da'aubwa'ui damiei ta meagu dagivefayo'uni, mana visiqa qidua va'inena 'aiwe 'ala'alata 'inaya yalulutonovia.'

<sup>25</sup> "Ta Ebelamo voneaya, 'Natugu, una nuave'avina lova bwa'obwa'oya tuta qabuna me eu qaiawa utoatoa, ta Lasalo lova ge taha wese 'ebeqaiawa dalobei. Ta 'itaga Lasalo me ena qaiawa ba'idia toatoa, ta o'a visiqa qiduana ululutonovia. <sup>26</sup> Ta wese una alamania daba kuena nuanidaya vetoasi'ieda. 'Inega gebu ana fata ba'e 'inega ima'a ana vaukamana wai. Ta wese omi'a ge ami fata be ona vaukamana mai 'imaya.'

<sup>27</sup> "Ta kaiwabu nana Ebelamo 'inaya vonaya, 'Eguma ge ana fata tua, ta nuanuagu Lasalo uda vetunei datauya egu qabuyavo 'idia. <sup>28</sup> Ta taigwavo adi yau faibi navebibinedi ina nuagivila, be yaqisa taudi ge wese ina mai visiqa ena di'we ba'e 'inaya.'

<sup>29</sup> "Inega Ebelamo kaiwabu nana voneaya, 'Gebu, mana Mosese be tovesimasimana edi vona Buki Nugwenugweina gamonaya 'eno'eno yani ba'e weaqina, 'inega taimwavo 'eguma taudi edi vona inoqola aqiaqiedi e 'inega ge ina 'ifoqe ba'idia, ta ge nuanuadi vona diavona ina noqolidi!'

<sup>30</sup> "Inega kaiwabu nana voneaya, 'Tamagu Ebelamo, ana 'ita gebu, mana debadi 'i'wana. Ta 'esi 'eguma taha toga 'aligege naya'itoto 'evivi ta natauya 'idia, e omo'e 'inega ina nuagivila aqiaqi.'

<sup>31</sup> "Ta Ebelamo kaiwabu nana 'inaya wese vonaya, 'Eguma taimwavo Mosese be tovesimasimana edi vona ge nuanuadi ina noqoli, e 'inega ge wese nuadi na'eqa'ui 'eguma taha toga 'aligege naya'itoto 'evivi be natauya 'idia.'

\* 16:15: Md 23:28; Lk 18:9-14 \* 16:16: Md 11:12-13 \* 16:17: Md 5:18

## 17

*Isisu ena ve'ita ilivu luveifana weaqina*  
(Madiu 18:6-7,21-22; Maki 9:42)

<sup>1</sup> Isisu ana to'abibodayavo vonedi vonaya, "Ebesitonova qabudi nawale ina mai 'imia ta ina givebe'uyemi, ta aiqabu 'ebesitonova diavona 'idiega ina 'ifoqe e taudi nuakokolodi. <sup>2</sup> Ta 'esi luaqiaqiea 'eguma togivebe'u dina dabo qiduana 'ebefiaqa magadia ina yoqonidi ta malavetaya ina felawe buiedi 'inega ge ana fata be gogama ina givebe'uyedi.

*Nuataqo weaqina*

<sup>3</sup> \* "Inega ona 'itamakimi, ta 'eguma taiu ilivu luveifana naviaqia 'iuya, e 'inega una tauya 'inaya ta una vonei be nalua'u, ta 'eguma nanuagivila 'inega ena luveifana una nuataqoya. <sup>4</sup> Ta wese 'eguma 'aubena 'aidegana 'inaya luveifana seveni ana yau 'iuya naviaqia, ta wese tuta seveni ana yau nanuagivila be navenoqi 'iuya nuataqo weaqina, e 'inega luaqiaqieu be ena luveifana qabuna una nuataqodi."

*Vetumaqana weaqina*

<sup>5</sup> 'Inega Isisu ena tovaletuyanayavo ivoneaya, "Ema vetumaqana una givewaiwaiea."

<sup>6</sup> \* Ta Isisu vonedi vonaya, "Eguma omi'a emi vetumaqana goyona kavona te'wa vewanina, e 'inega ami fata be omo'e 'aiwe nana qiduana ona voneaya, 'Tau'u uabuhu be mwade'waya una 'wadiu!' E 'inega emi vona namatayagea."

*Tofewa edi viaqayavo*

<sup>7</sup> Ta wese Isisu 'idia vonaya, "Ona nuaia, 'eguma taha kaiwabu me ena tofewa itoatoa ta tofewa nana geogeoava nage bawe 'ita'itamakidi, ta lavilavia na'evivi namai vanuea, 'inega kaiwabu nana ge navonei na'ai nugweta, <sup>8</sup> ta 'esi navoneaya, 'Agu 'abwaga una 'iva'ava'aia ta una 'itamakigu 'inega ena 'ai be ena numa, ta 'abibodanaya o'a wese una 'ai.' <sup>9</sup> Ta nage tofewa nana ena fewa ba'e weaqina lukaiwa nalobei ena kaiwabu 'inega? Gebu, mana tauna tofewa. <sup>10</sup> Ta omi'a wese 'edewani, tutana Yaubada ena nuanua qabuna oviaqa 'ovoidi 'inega ona simana ona voneaya, 'Ima'a eu tofewa kavovo, ta lova ama veyoveyoya uneima, e 'idewani ni'a aviaqia.' "

*Isisu tomotau* 'wago'wagoidi adi yau teni giveaqiaqiedi

<sup>11</sup> Isisu nawale tautauya Ielusalema weaqina, 'inega tauya di'we Samelia be Galili nuanidia. <sup>12</sup> Ta tutana taha 'abaga 'inaya lugu, 'inega 'oloto 'wago'wagoidi adi yau teni Isisu 'itedi tufwana luluvaia itoatoa. <sup>13</sup> \* 'Inega bonadi qiduanega ivegabagaba ivonaya, "Kaiwabu Isisu, uda nuakokoloyema."

<sup>14</sup> \* Ta Isisu 'ita makimakidi vonedia, "Ona tauya toveguba 'idia ta taumiega ona ve'itayemi!" Ta tuta nana itautauya 'edayadi 'wagota 'evutuqidi ta 'wafidi veaqiaqi.

<sup>15</sup> Ta teni dina 'idiega taha 'oloto 'wafina 'itea ni'a veaqiaqi, 'inega 'evivi mai ta bonana qiduanega Yaubada awatuboya. <sup>16</sup> 'Inega Isisu 'aqenaya iwa'odu ta lukaiwa. Ta tauna Samelia 'olotona. <sup>17</sup> 'Inega Isisu 'oloto nana voneaya, "Tawadega ami yau teni yagiveaqiaqiemi ta ma'inaya emwavo adi yau naeni itoatoa? <sup>18</sup> Tola'ai weaqina ge ida 'evivi ida mai be Yaubada 'inaya ida lukaiwa? Ta o'a ge Diu 'olotou, ta tua umai sabi lukaiwa Yaubada 'inaya." <sup>19</sup> 'Inega Isisu voneaya, "Uya'itoto utauya, eu vetumaqana 'inega ni'a uveaqiaqi."

*Yaubada ena* 'Ebeluvine ena mai weaqina  
(Madiu 24:23-28,37-41)

<sup>20</sup> Taha tuta Falisiavo vaina imai Isisu ivetala'aiea totuta 'inaya Yaubada ena 'Ebeluvine na'ifoqe namai. 'Inega Isisu edi vetala'ai ve'iea ba'e 'idewana vonaya, "Yaubada ena 'Ebeluvine ena mai ge ana fata tomotau matadiega ina 'itei. <sup>21</sup> Ta wese ge adi fata be ina vonaya, 'O'itei ba'e!' nage, 'Omo'inaya!' mana ni'au Yaubada ena 'Ebeluvine giwalimia toatoa."

\* 17:3: Md 18:15 \* 17:6: Md 17:20; 21:21 \* 17:13: Luvi 13:45-46 \* 17:14: Luvi 14:2-3; Md 8:3-4

<sup>22</sup> 'Inega ana to'abibodayavo vonedi vonaya, "Nawale ena nogemi ta 'abiboda nuanuami qiduana vonigo ya'a Tomotau Natuna maega kada toatoa, ta 'esi ona 'ita 'avegu. <sup>23</sup> \* Ta nawale tomatou ina vonaya, 'Keliso ba'idial!' nage 'Keliso omo'e!' ta gebu ona 'abibodedi. <sup>24</sup> Mana lukwayavonega ena 'evivi ena mai, ta mahala ana 'ita kavonaya namala 'idewana nasimatala 'ava'ava. <sup>25</sup> Ta nugweta lagata ba'e ina nogegu, ta visiqqa qiduana ena lutonovia 'idiega.

<sup>26</sup> "Ta egu 'evivi mai ana tuta kavonaya Noa ena tuta 'inaya 'edewana. <sup>27</sup> Mana lova Noa ena tutaya tomatou i'ai'ai ta inumanuma, ta wese 'oloto be vivine ivaqivaqi ta wese ivevevaqiedi ana laba Noa me ena susuyavo ena wagaya igelu ta seuseu 'ifoqe 'inega tomatou qabudi luvegwamumuidi. Ta ya'a Tomotau Natuna egu 'evivi mai wese 'edewana.

<sup>28</sup> \* "Ta wese lova Lota ena tutaya 'edewana, tomatou qabudi i'ai'ai ta inumanuma ta wese igimwagimwane be ivevegimwane, ta ivaovaoqa be wese edi vanueavo i'e'eyoqonidi. <sup>29</sup> Ta tutana Lota Sodoma noega 'inega 'aiwe 'ala'alata be dabo salofa 'wea'weavidi mahalega iavuta 'edewani 'wei, 'abo tomatou qabudi luvegwamumuidi. <sup>30</sup> Ba'e veilage diavona lova i'ifoqe tomatou 'idia nawale wese 'edewana na'ifoqe 'aiqa tutana Tomotau Natuna na'evivi namai.

<sup>31</sup> \* "Ta tutana 'inaya 'eguma taha toga selovaya veveyawai ge wese vanuea nalugu sabi kulufa. Wese 'idewanina 'eguma taha toga talaqaya fewafewa ge wese na'evivi 'abagaya ena kulufa weaqina. <sup>32</sup> \* Ta ona nuaia lova tola'ai 'ifoqe Lota moqanena 'idia. <sup>33</sup> \* 'Eguma taha toga yawaina navegagalea nawale yawaina naluve'waivia, ta 'esi 'eguma taha toga yawaina nahawafelea be naluve'waivia e nawale naloba 'eviviea. <sup>34</sup> Ta yavona aqiaqiemi, velovelovana omo'e 'inaya tomatou magilafudi 'ivi 'aidegana 'inaya ina 'eno'eno, 'inega taha ena 'ebe'ewea ta taha natoa. <sup>35-36</sup> Wese 'edewanina vivine magilafudi ina dabidabi, 'inega taha ena 'ebe'ewea ta taha natoa."

<sup>37</sup> 'Inega Iesu ana to'abibodayavo ivetala'aiea ivonaya, "Kaiwabu, ma'inaya ba'e yani diavona na'ifoqe?"

'Inega Iesu vonedia, "Ma'inaya to'aliga 'wafina 'eno'eno e omo'e 'inaya bwayobwayo ina va'auta."

## 18

### *Wada'e taha ena venoqi* 'alataya toluvine 'inaya

<sup>1</sup> \* 'Inega taha vona sesebai Iesu ana to'abibodayavo neidi nuanuana nave'itedi me edi bibitaqo tuta qabuna ina vevenoqi ta ge ina lua'u. <sup>2</sup> 'Inega vonedi vonaya, "Taha 'abaga 'inaya taha toluvine toatoa, tauna Yaubada ana 'amayaba be ana mwaniniva 'inaya ge da'eno'eno, ta wese tomatou weaqidi ge danuanua.

<sup>3</sup> "Ta 'abaga nana 'inaya wese taha wada'e toatoa, ta tuta qabuna tautauya toluvine nana 'inaya ta vevenoqi ana iula weaqina vonevoneaya, 'Kaiwabu, uda iulegu mana taha tomatou veilivu veifegu, ta nuanuagu una luvinea.'

<sup>4</sup> "Aubena 'aidega 'aidega 'edewana lulu'evi'evivi ta toluvine nana ge nuanuana naiulei. Ta taha tuta 'inaya 'wafina siniqaiqai wada'e ena 'alataya weaqina, 'inega taunega 'inaya vonaya, 'Tua Yaubada ge eda mwaninivei ta wese tomatou ge eda nuanua weaqidi, <sup>5</sup> ta wada'e ba'e ena 'alataya 'iguya weaqina ena iulea ana avia 'inega, mana ge nuanuagu wese nave'wafi siniqaiqaiegu!"

<sup>6</sup> 'Inega Iesu wese vonedi vonaya, "Kaiwabu ba'e ena vona weaqina ona nuaia. Vonahaqiaqi, tauna 'oloto luveifana ta tua wada'e iulea. <sup>7</sup> Ta Yaubada aqiaqi otaqina, 'inega nawale ena tomatouyavo vevenua'ivinidi ge nanogedi. Ta tutana ina noqi 'evi'evivi 'inaya 'aubena ta wese velovelovana 'idia e 'inega naiuledi. <sup>8</sup> Ta yavona aqiaqiemi, lukwayavonega Yaubada ena iula tunutunuqina tovenoqi naneidi. Ta tutana

\* 17:23: Mk 13:21; Lk 21:8 \* 17:28: Nug 18:20; 19:25 \* 17:31: Md 24:17-18 \* 17:32: Nug 19:17,26 \* 17:33: Lk 9:24 \* 18:1: Kol 4:2; 1Te 5:17

ya'a Tomotau Natuna ena 'evivi mai bwa'obwa'oya 'evisa tomotau me edi vetumaqana ena lobedi itoatoa?"

*Taha Falisi ta takesi ana to'ewa vona sesebaidi*

<sup>9</sup> Tomotau vaina inuaia vonigo taudi tunutunuqidi, ta mali tomotau i'itedi iawawe-buiedi, 'inega leisu vona sesebai ba'e neidi vonaya, <sup>10</sup> "Taha tuta taha Falisi ta wese takesi ana to'ewa taha ilugu Vanue Gwalagwalana 'inaya sabi venoqi Yaubada 'inaya. <sup>11</sup> 'Inega Falisi nana ya'itoto ta taunega weaqina venoqi vonaya, 'Yaubada, yalulukaiwa 'iuya mana ya'a gebu 'edewana vaina tomotau edi ilivu, mana taudi tovevanuguba ta to'eu'au'ava ta wese tovelamo'eno, ta wese ya'a gebu takesi ana tova'auta ba'e 'idewana. <sup>12</sup> \* Mana ya'a wiki 'aidega 'aidega 'idia 'aubena magilafuna ge eda 'ai'ai ma botanigu yavevedede ta wese egu kulufa qabuna 'idiega dibuna yaneineiu Mosese ena luvine 'idewani.'

<sup>13</sup> \* "Ta takesi ana to'ewa tufwana luluvaiega tovoloto ta me ena iniyauyau lumalumana tutuya 'inega tunuiwa'odu ta venoqi vonaya, 'Yaubada ye, ni'au ualamanigu ya'a luveifagu 'inega uda nuakolokoloyegu."

<sup>14</sup> \* 'Inega leisu vonedi vonaya, "Vonahaqiaqi, 'oloto ba'e 'evivi tauya ena vanuea, ta ena venoqi weaqina Yaubada 'awahaqiaqiea, ta Falisi nana gebu. Mana 'eguma taha toga taunega ana wawa nagivaneyea nawale Yaubada nagiwebuiea, ta 'eguma taha toga taunega ana wawa naha'uwebuiea e nawale Yaubada nagivaneyea."

*Gogama leisu vona veyolubedi*  
(Madiu 19:13-15; Maki 10:13-16)

<sup>15</sup> Vaina tomotau natudiavo gogoyodi imiedi leisu 'inaya nuanuadi nagitonovidi, ta ana to'abibodayavo tomotau diavona i'itedi 'inega iawatayedi. <sup>16</sup> Ta leisu gogama gaba va'auqidi ta to'abiboda dina vonedia, "Gogama ge ona awatayedi ta ona awafeledi ina mai 'iguya. Mana Yaubada ena 'Ebeluvine gogama ba'e 'idewana weaqidi. <sup>17</sup> \* Yavona aqiaqiemi, 'eguma tomotau edi vetumaqana gebu gogama ba'e edi vetumaqana 'edewanina, e 'inega ge wese adi fata ina lugu Yaubada ena 'Ebeluvine 'inaya!"

*Taha 'oloto kaikaiwabuna weaqina*  
(Madiu 19:16-30; Maki 10:17-31)

<sup>18</sup> \* Me Diu edi toluvine taha mai leisu 'inaya vetala'aiea vonaya, "Tove'ita aqiaqi, tola'ai ena viaqi be 'inega yawaigu vataya ena lobei?"

<sup>19</sup> Ta leisu voneaya, "Tola'ai weaqina uvonaya ya'a aqiaqigu? Mana ge taha toga aqiaqina, ta 'esi Yaubada ana 'aidega. <sup>20</sup> \* Yaubada ena luvineavo ni'au ualamanidi, vonaya, 'Ge una luabu, ge una luve'aliga be, ge una vanawala, ta ge u'avega una simana mali tomotau weaqidi kotu ana tutaya', ta wese, 'Tamau be inau una 'amayabedi.' "

<sup>21</sup> 'Inega 'oloto nana voneaya, "Egu tuta gwama 'inega ta mai ba'e 'itagana luvine diavona ya'abiboda aqiaqiedi."

<sup>22</sup> Ena vona ba'e leisu noqolia 'inega voneaya, "Yani 'aideganamo nawale ge uda viaqia, 'inega 'eguma eu kulufa qabuna una vegimwaneyedi ta manedi una 'ewei una vewila'ayea lukwalukwa 'idia, ta 'inega una mai una 'abibodegu be nawale eu kaikaiwabu mahalaya una lobe." "

<sup>23</sup> Tutana ba'e vona nana noqolia, 'inega nuana vita, mana ena kulufa qiduana vegagalea.

<sup>24</sup> Ta ena nuavita leisu ni'a alamania 'inega vonaya, "Tomeqabu taudi me edi kaikaiwabu qiduana edi lugu Yaubada ena 'Ebeluvine 'inaya vita otaqina. <sup>25</sup> Vonahaqiaqi, kameli yubai qiduana ta ena lugu saima vetoana 'inega vitana. Ta tovekaikaiwabu edi lugu Yaubada ena 'Ebeluvine 'inaya vita otaqina."

<sup>26</sup> Ta qabu dina leisu maega itoatoa vona nana inoqolia 'inega ivetala'aiea ivonaya, "Eguma ba'e 'edewanina, 'inega togama ana fata 'etoyavua nalobei?"

\* 18:12: Ais 58:1-4; Md 23:23 \* 18:13: Same 51:1 \* 18:14: Md 23:12 \* 18:17: Md 18:3 \* 18:18: Lk 10:25

\* 18:20: 'Ifo 20:12-16; Luve 5:16-20

<sup>27</sup> 'Inega Ieisu vonedia, "Tola'ai tomotau ge adi fata ina viaqi, e Yaubada 'inaya ana fata!"

<sup>28</sup> Ta 'inega Fita Ieisu voneaya, "Kaiwabu, ta ima'a ma'oda? Mana ni'au ema 'abagayavo be ema kulufayavo anogedi ta a'abibodeu."

<sup>29</sup> Ta Ieisu vonedia, "Yavonahaqiaqi 'imia, aiqabu omi'a 'eguma emi 'abagayavo nage moqanemiavo nage taimiavo nage tamamiavo nage inamiavo nage natumiavo ni'a onogedi ta Yaubada ena 'Ebeluvine 'inaya oawafelemi, <sup>30</sup> 'inega ba'e yani diavona ni'au onogedi nawale Yaubada ma ana luvetomana nanei 'evivemi tutana bwa'obwa'oya otoatoa, ta wese tuta maimai 'inaya yawai vataya ona 'ewea."

*Ieisu ena simana vetoina ena 'aliga weaqina*

*(Madiu 20:17-19; Maki 10:32-34)*

<sup>31</sup> \* Ieisu Tuwelo dina gaba va'auqidi ivanaqo tufinaya ta vonedia, "Ba'e 'itaga ka'wato'watovu Ielusalema 'inaya, ta yani qabuna lova tovesimasimana i'wayavidi ya'a Tomotau Natuna weaqigu nawale ana aqiaqi na'ifoqe be ona 'itea. <sup>32</sup> \* 'Inega ina ve'ineiegu taudi ge me Diu 'idia, ta ina givenu'wegu be ina gida'wegu be ina 'awalu-veifegu, <sup>33</sup> ta wese wayo metametanega ina vunuqa dadanegu ta 'inega ina luve'aligigu. Ta 'aubena vetoina 'inaya 'aligega ena ya'itoto 'evivi."

<sup>34</sup> \* Ta ana to'abibodayavo ena vona ba'e ge ida nua'eqa'ui, mana vona nana ana alamani weaqidi 'wai'waivina. 'Inega tola'ai Ieisu tawa vonedi ge ida alamania.

*Ieisu taha matakwaya giveaqaqiea*

*(Madiu 20:29-34; Maki 10:46-52)*

<sup>35</sup> Ieisu ma ana to'abibodayavo tuta goyona ina 'ifoqe Ieliko 'inaya. 'Inega taha 'oloto matana kwayakwayana 'eda nanavinaya toatoa ta tomotau 'idia vevenoqi mane be wese kulufa weaqidi. <sup>36</sup> Ta tutana matakwayana Ieisu me ena qabuyavo bonadi noqolia 'inega vetala'aiedi vonedia, "Tomeqabu omi'a?"

<sup>37</sup> 'Inega ivoneaya, "Ima'a Ieisu Nasaleta 'olotona maega amaimai."

<sup>38</sup> 'Inega matakwaya nana me ena waiwai gaba vonaya, "Ieisu ye, o'a Deibida natuna uda nuakokoloyegu!"

<sup>39</sup> Ta taudi inugwenugweta 'oloto nana iawatayea ivoneaya, "Eloveu, gebu una vegabagaba!"

Ta tauna wese bonana qiduanega gaba waiwai vonaya, "Deibida natuna ye, uda nuakokoloyegu!"

<sup>40</sup> 'Inega Ieisu veutovolo ta tomotau vonedi be 'oloto nana ina miea 'inaya. 'Inega mai Ieisu di'wenaya ta matakwaya nana vetala'aiea voneaya, <sup>41</sup> "Tola'ai nuanuau ena viaqi 'iuya?"

'Inega voneaya, "Kaiwabu, nuanuagu matagu una giveaqaqiedi be yaqisa agu fata ena 'ita."

<sup>42</sup> Ta Ieisu voneaya, "Tuta ba'e 'inaya matau na'ea, mana eu vetumaqana 'inega ni'a uveaqaqi."

<sup>43</sup> Ta ba'e tuta nana 'inaya matana veaqaqi kwayavona. 'Inega Ieisu 'abibodea ta Yaubada awahawatuboya. Ta tomeqabu yani ba'e i'itea taudi wese Yaubada iawatuboya.

## 19

*Ieisu ta Sakiusa*

<sup>1</sup> Ta Ieisu qabu maega ni'a ilugu Ieliko 'inaya ta 'abaga gamonega itautauya. <sup>2</sup> 'Abaga nana 'inaya takesi ana to'ewayavo adi tovanugweta toatoa, ana wawa Sakiusa, tauna taha tovekaikawaiwabu. <sup>3</sup> Ta Sakiusa nuanuana Ieisu na'itea ta gebu ana fata, mana tauna 'oloto kukusana ta wese yo'o qiduadi maega itautauya. <sup>4</sup> 'Inega vihila nugweta taha 'aiwe ana wawa sikamole\* 'inaya vaneqa Ieisu sabi 'itana, mana 'edanegana maimai. <sup>5</sup> Ta

\* 18:31: Lk 24:44 \* 18:32: Lk 9:22,44 \* 18:34: Mk 9:32 \* 19:4: Sikamole "sycamore" ena tabo kukusana ta ma'wae lu'uvina, ta wese ana vane meaqana mana 'ale'itunega laqalia vane.

tutana Ieisu mai 'aiwe nana di'wenaya 'inega 'ita vane ta Sakiusa 'itea 'inega voneaya, "Sakiusa, ulukwayavoni uwebui mai, mana nuanuagu ba'itagana eu vanuea kana toa."

<sup>6</sup> 'Inega Sakiusa lukwayavoni webui ta me ena qaiawa Ieisu 'ebe'ewea. <sup>7</sup> \* Ta tutana tomotau qabudi yani ba'e i'itea 'inega ilumugi ivonaya, "Ma'oda 'inega Ieisu lugu toluveifana ena vanuea?"

<sup>8</sup> \* Ta Sakiusa ya'itoto ta Ieisu 'inaya vonaya, "Kaiwabu, ba'itaga 'inega egu kulufayavo dibuna ena vewila'ayea lukwalukwa 'idia. Ta wese 'eguma lova togama 'inega taha yani u'vega ya'ewa kavovoya e 'inega ana luvetomana foa maega ena nei 'eviviea."

<sup>9</sup> \* 'Inega Ieisu voneaya, "Ba'e 'itagana vanue ba'e 'inaya 'etoyavua ni'a 'ifoqe, mana 'oloto ba'e ena vetumaqana tubuna Ebelamo 'idewana. <sup>10</sup> \* Vonahaqiaqi, ya'a Tomotau Natuna yamai luluve'waividi sabi salidi adi 'etoyavua weaqina, 'idewani 'oloto ba'e."

*Vona sesebai tofewa aqiaqidi be luveifadi weaqidi*

*(Madiu 25:14-30)*

<sup>11</sup> Nawale tomotau qabudi Ieisu ivivineneqea. 'Inega vona sesebai ba'e neidi tutana Ielusalema ivadi'wea, mana tomotau inuaia vonigo Yaubada ena 'Ebeluvine tuta goyona nave'ale. <sup>12</sup> Vonaya, "Taha 'oloto kaikaiwabuna 'iva'ava'ata be natauya di'we taha luluvaia, ta omo'e 'inaya luvine na'ewei navetoluvine, ta 'abiboda wese na'evivi namai. <sup>13</sup> 'Inega ena tofewayavo teni gaba va'auqidi ta ena mane qiduana tofewa 'aidega 'aidega vevewila'edi ta vonedia, 'Mane ba'e ona 'itamakidi ta ona vefewedi ta adi luvetomana ona lobedi ana laba ena 'evivi ena mai.'

<sup>14</sup> "'Inega kaiwabu nana tauya, ta ena tomotauyavo ivevoalanea, ge nuanuadi na'evivi navetoluvine 'idia, 'inega vale ivetunei ivonaya, "Oloto bena'e ge nuanuama na'evivi namai be navetoluvine 'imaya!'

<sup>15</sup> "Ta tuta nana 'evivi mai 'inega ena tofewayavo gaba va'auqidi imai nuanuana nahalamaniana mane nana lova vewila'ayea 'idia 'evisa ana luvetomana ni'a ilobedi. <sup>16</sup> 'Inega taha tofewa nugweta mai ena kaiwabu 'iawanaya tovolu ta voneaya, 'Kaiwabu, eu mane lova uneiguya ba'e ana luvetomana teni yalobedi.'

<sup>17</sup> \* "'Inega kaiwabu nana vonaya, 'Vonahaqiaqi, o'a ma au vetumaqana, mana yani goyona u'itamaki aqiaqiea ta ugiveqiduea 'inega au ve'ia ena neiu ta 'abaga teni 'idia una vetoluvine.'

<sup>18</sup> "'Inega tofewa vemagilafuna wese mai voneaya, 'Kaiwabu, eu mane lova uneiguya ba'e ana luvetomana faibi yalobedi.'

<sup>19</sup> "'Inega ena kaiwabu voneaya, 'O'a 'abaga faibi 'idia una vetoluvine.'

<sup>20</sup> "Ta wese vetoina mai voneaya, 'Kaiwabu, eu mane ba'e kaleko matavusinega ya'afwalia ta yaha'ukwaiva aqiaqiea. <sup>21</sup> Ta vonahaqiaqi, yamwaniniveu mana o'a 'oloto falafalau ta eu kaikaiwabu u'ewe'ewedi mali tomotau edi fewa 'idiega.'

<sup>22</sup> "'Inega kaiwabu nana voneaya, 'O'a tofewa luveifau. Tau'u eu vona 'inega au luvine ena neiu. Vonahaqiaqi, ni'au ualamanigu ya'a 'oloto falafalagu, ta egu kaikaiwabu yalobelobea mali tomotau edi fewa 'idiega. <sup>23</sup> Ta tola'ai weaqina gebu mane ana sailakaya egu mane uda a'ui, be yaqisa tuta nana ni'a ya'evivi yamai mane nana ma ana luvetomana eda lobeaa?"

<sup>24</sup> "'Inega taudi kaiwabu nana di'wenaya itovotovolovoneidi vonaya, 'Egu mane tofewa luveifana 'inega ona 'ewei ta tofewa nana tauna luvetomana teni lobeaa e ona neia.'

<sup>25</sup> "'Inega ivoneaya, 'Kaiwabu, ge nuanuama ana neia mana tauna ni'au luvetomana teni lobeaa, 'inega ta'iwa ana fata.'

<sup>26</sup> \* "Ta kaiwabu nana wese 'idia vonaya, 'Yavona aqiaqiemi, 'eguma taha toga yani ena neia ta navefewa aqiaqiea, e nawale wese ana luvetomana nalobeaa. Ta 'eguma taha toga yani ena neia ta ge navefewa aqiaqiei, e nawale toyani goyona 'inaya 'eno'eno wese

\* 19:7: Lk 15:2 \* 19:8: 'Ifu 22:1; Naba 5:6-7 \* 19:9: Via 16:31; Lk 13:16 \* 19:10: Lk 15:4; Ion 3:17; 1Tim 1:15 \* 19:17: Lk 16:10 \* 19:26: Md 13:12; Lk 8:18

ena 'ewa yavulea. <sup>27</sup> 'Inega tuta ba'e agu aviayavo lova inogegu vonigo ge nuanuadi ena vetoluvine 'idia e taudi ona gaba va'auqidi ina mai 'iawaguya ta ona luve'aligidi.' "

*Iesu lugulugu Ielusalema 'inaya*

*(Madiu 21:1-11; Maki 11:1-11; Ioni 12:12-19)*

<sup>28</sup> Iesu ena vona ba'e lu'ovoia, 'inega ana to'abibodayavo nugwetedi maega itauya Ielusalema weaqina. <sup>29</sup> Nawale itautauya ta tuta goyona ina 'ifoqe 'abaga Bedifegi be Bedani 'idia bwanaga Olibe 'inaya. 'Inega ana to'abibodayavo magilafudi luvetunedi vonedia, <sup>30</sup> "Abaga nana oa'e 'iawadaya 'inaya ona tauya, ta tutana ona 'ifoqe yubai doniki ona 'itea kekeyavauna yoqoyoqonina toatoa, lova ge taha toga dagelu tonovia, ta yubai nana ona yavui ona miea 'iguya. <sup>31</sup> Ta 'eguma taha toga navetala'aiemi navonaya, 'Tola'ai weaqina yubai bena'e oyavuyavui?' 'Inega 'oloto nana ona voneaya, 'Kaiwabu nuanuana.' "

<sup>32</sup> 'Inega magilafudi itutuvila itauya 'abo yani qabuna ilobedi 'edewani Iesu ni'a vonedi. <sup>33</sup> Tutana doniki iyavuyavui 'inega toniyubai i'ifoqe ivetala'aiedi ivonaya, "Ma'oda 'inega ema yubai oyavuyavui?"

<sup>34</sup> 'Inega ivonedia, "Kaiwabu nuanuana."

<sup>35</sup> 'Inega yubai nana i'ewei itauyea Iesu 'inaya, ta adi kwakwalufaiyega gwavuna ita'ulia, 'inega Iesu 'inaya gelu ta tauya. <sup>36</sup> Ta tutana itautauya tomotau qabudi adi kwakwalufai wese 'edaya ita'ulidi.

<sup>37</sup> 'Inega ni'au imai Ielusalema di'wenaya ta iwebuwebui bwanaga Olibe ana 'eda 'inaya, 'inega to'abiboda qabudi bonadi qiduanega me edi qaiawa Yaubada iawatuboya, mana ni'au ena viaqa waiwai 'ebenuavoqana i'itedi 'inega ivonaya,

<sup>38</sup> \* "Yaubada, nuanuama Kini nana maimai Kaiwabu ana wawega una vona veyolubea. Toadaumwala mahalaya

ta simatala qiduana mahala deba otaqinaya!"

<sup>39</sup> 'Inega Falisiavo vaina qabu dina 'idiega Iesu ivonea ivonaya, "Tove'ita, au to'abibodayavo uvonedi ilua'u!"

<sup>40</sup> Ta Iesu vonedia, "Gebu ena awatayedi, mana 'eguma ena awatayedi e nawale dabo ba'e bonadi qiduanega ina kolua."

*Iesu ena dou Ielusalema weaqina*

<sup>41</sup> Iesu ni'a 'ifoqe Ielusalema di'wenaya ta 'abaga nana 'itea. 'Inega nuana vita ta weaqina dou vonaya, <sup>42</sup> "Ielusalema ye, eu tomotauyavo nuakolokolodi. Mana lova toadaumwala ana 'eda aqiaqi ge ida alamania. Ta ba'itagana tuta ni'au vekusakusa be toadaumwala ana 'eda matadiega ge adi fata ida lobei, mana 'eda nana 'wai'waivina 'idiega. <sup>43</sup> Ta vonahaqiaqi, tuta maimai 'idia au aviayavo ina mai ina toa viviliu ta ina luvatubodeu, 'inega ge wese taha toga ana fata nadena. <sup>44</sup> \* 'Inega o'a natumwavo maega ina luvegwamumuimi, ta wese vanue qabudi ina qeu yavuledi. Yani ba'ena nawale na'ifoqe 'iuya, mana Yaubada ena 'etoyavua vetunei mai natumwavo 'idia ta ge ida 'inanea."

*Iesu tovegimwane Vanue Gwalagwalanega 'wavinidi*

*(Madiu 21:12-17; Maki 11:15-19; Ioni 2:13-22)*

<sup>45</sup> 'Inega Iesu lugu Vanue Gwalagwalana 'atamaninaya ta vebutu tovegimwane 'wavi 'ifoqeyedi ta vonedia, <sup>46</sup> \* "Buki Nugwenugweina 'inaya Yaubada ena vona 'waya'wayavina vonaya, 'Egu vanue ba'e vanue 'ebevenoqi', ta omi'a ogivilea vonigo tovanawala adi watu'ubu."

<sup>47</sup> \* E 'inega 'aubena 'aidega 'aidega Vanue Gwalagwalana 'inaya veve'ita, ta toveguba qiduiduadi be luvine ana tove'itayavo ta wese tomotau adi tovanugwetayavo nuanuadi qiduana Iesu ina luve'aligia. <sup>48</sup> Ta ge adi fata taha 'eda ida lobei be Iesu ina luve'aligi, mana ena ve'itayavo tomotau qabudi nuadi 'ewea.

\* 19:38: Same 118:26; Lk 2:14 \* 19:44: Lk 21:6 \* 19:46: Ais 56:7; Iel 7:11 \* 19:47: Lk 21:37



## 20

*Isisu ena luvine ta ena waiwai weaqina  
(Madiu 21:23-27; Maki 11:27-33)*

<sup>1</sup> Taha tuta 'inaya Isisu veve'ita Vanue Gwalagwalana 'inaya ta lulugaihiea tomotau 'idia. 'Inega toveguba qiduiduadi be luvine ana tove'itayavo ta wese 'abaga ana tovanugwetayavo imai ta Isisu ivevetala'aiea, <sup>2</sup> ivoneaya, "O'a eu luvine ta eu waiwai to'edega u'ewei 'inega yani qabuna ba'e uviaviaqidi? Togama eu luvine neiu?"

<sup>3</sup> Ta Isisu vonedia, "Nugweta ya'a wese taha yani ena vetala'aiemi ta ona vona 'eviviegu. <sup>4</sup> Ioni Togivebabitaiso togama ena luvine 'inega ena givebabitaiso 'ifoqe, nage Yaubada 'inega nage tomotau 'inega?"

<sup>5</sup> 'Inega taudiega iveveqae ivonaya, "Ena vona ma'oda kana ve'ia 'aiqei? Mana 'eguma kana vonaya, 'Yaubada 'inega', e nawale navona 'evivieda navonaya, "Inega tola'ai weaqina Ioni ge oda vetumaqanei?" <sup>6</sup> Ta 'eguma kana vonaya, 'Tomotau 'inega', e nawale tomotau qabudi daboyega ina fofolida, mana edi vetumaqana waiwaina Ioni tauna taha tovesimasimana." <sup>7</sup> 'Inega Isisu ena vetala'ai ge ida ve'iei, ta ivoneaya, "Avodi, ge ada alamania to'edega babitaiso nana 'ifoqe."

<sup>8</sup> 'Inega Isisu vonedi vonaya, "Inega ya'a wese ge ena simana 'ifoqeyei 'imia togama ena luvineyega yani qabuna yaviaviaqidi."

*Vona sesebai kaiwabu ena vaoqa ana to'itamakiavo weaqidi  
(Madiu 21:33-46; Maki 12:1-12)*

<sup>9</sup>\* 'Inega Isisu tomotau diavona vona sesebai neidi vonedia, "Taha 'oloto ana talaqaya 'oine ana loi vaoqidi, 'inega tomotau vaina 'ewedi imai luvine neidi be ana talaqa ina 'itamakia. Ta tauna tauya mali di'wea ta omode tuta kuena toatoa. <sup>10</sup> Ta bolimana ana tutaya kaiwabu nana ena tofewa taha vetunea ta 'oine vuaqina vaoqa ana to'itamakiavo ina neia. 'Inega tauya ta ivunuqia ta nima 'ava'avana iluvetunei 'evivi. <sup>11</sup> 'Inega kaiwabu nana taha wese tofewa vetunei 'idia. Ta tauna wese ivunuqia ta iveilivu veifea ta nima 'ava'avana iluvetunei 'evivi. <sup>12</sup> Ta wese 'idewani vetoina vetunei 'idia ta tauna wese ivunuqia ta talaqega ifelawebeua.

<sup>13</sup> "Inega tonivaoqa nana taunega vonaya, 'Tola'ai ena viaqi? Ana 'ita natu otaqigu tauna yaveyolubea qiduana ena vetunei 'idia, mana tauna ina 'amayabea.'

<sup>14</sup> "Ta tutana to'itamaki dina kaiwabu natuna i'itea maimai taudiega iveveqae ivonaya, "Oloto omo'e maimai tauna kaiwabu natuna ana 'aidega otaqa. 'Inega ba'itagana kana luv'e'aligia be yaqisa ita'a taudega vaoqa kana luvinea.' <sup>15</sup> 'Inega ikafia ta vaoqega ifelei webui talaqa gwavunaya ta iluve'aligia."

Ta Isisu ena vona sesebai lu'ovoia 'inega tomotau qabudi vetala'aiedi vonaya, "Tola'ai nawale kaiwabu nana ana to'itamakiavo 'idia naviaqi?"

<sup>16</sup> Ta Isisu taunega vona 'eviviedi vonaya, "Vonahaqiaqi, kaiwabu nana namai be to'itamaki dina naluve'aligidi be 'inega vaoqa nana mali tomotau naneidi."

Tutana tomotau qabudi Isisu ena vona ba'e inoqolia taudiega ivonaya, "Vonahaqiaqi, ita'a ge wese 'idewani kana viaqi!"

<sup>17</sup>\* 'Inega Isisu 'ita makimakidi ta vonedia, "Inega Buki Nugwenugweina 'inaya 'wayavi ba'e ma'oda ana alamani, vonaya?

"Oqola nana lova to'eyoqona inogea,  
ba'itagana ni'au vetamana 'oqola qabudi 'idia.'

<sup>18</sup>\* Tomeqabu 'oqola ba'e 'inaya ina lutuhuyedi ta ina be'u luludi na'evelubai, ta 'eguma 'oqola nana nabuini nawebui taha toga debanaya nawale natutumemea."

*Takesi toluvine qiduana Sisa weaqina  
(Madiu 22:15-22; Maki 12:13-17)*

\* 20:9: Ais 5:1 \* 20:17: Same 118:22 \* 20:18: Ais 8:14-15

<sup>19</sup> Omo'e 'inaya toveguba qiduquduadi ta luvine ana tove'itayavo 'eda isalia be ma'oda 'inega Ieisu ina kafi kwayavoni, mana ni'a ialamania Ieisu ena vona sesebai taudi weaqidi. Ta ge ida kafia, mana imwaniniva yo'o 'idia.

<sup>20</sup> \* Ta me Diu adi toluvineavo nuanuadi Ieisu ina 'itamaki aqiaqiea. 'Inega vaina tomotau iluvetunedi Ieisu 'inaya ta u'vega iveiaiane, ta ivevekovekovea 'eguma ena vona 'inega ena luveifana ina lobe. 'Inega ina simana toluvine 'idia, ta 'abiboda ina luvetunea me Loma edi gavana 'inaya. <sup>21</sup> 'Inega tovekovakova imai ta Ieisu ivetala'aiea ivonaya, "Tove'ita, vonahaqiaqi o'a eu vonayavo be eu ve'itayavo qabudi tunutunuqidi, ta wese ahalamania o'a ge uda mwaniniva tomotau 'ena'ena'idi edi vona nage edi nuanua weaqina, ta 'esi Yaubada ena nuanua uve'ita aqiaqiea tomotau qabudi 'idia. <sup>22</sup> 'Inega ma'oda luaqiaqiea be toluvine qiduana Sisa 'inaya takesi kana a'uya nage gebu?"

<sup>23</sup> Ta Ieisu edi nuanua luveifana ni'a alamania 'inega vonedia, <sup>24</sup> "Mane taha omiei eda 'itei." 'Inega ineia ta Ieisu vonedia, "Ona vonegu ba'e toga 'aye'ayewana ta ma'oda ana wawa mane nana 'inaya?"

<sup>25</sup> Ta taudi ivoneaya, "Toluvine qiduana Sisa."

'Inega Ieisu vonedia, "Idewana, 'inega Sisa ena yani tauna 'inaya ona neia, ta wese Yaubada ena yani tauna 'inaya ona neia."

<sup>26</sup> Ieisu ena vona ba'e tunutunuqina tomotau matadia, ta ge taha vona luveifana da'inanei be 'inega ida kafia. Ta ena vona 'evivi weaqina nuadi voqana ta igenu'wana.

*To'aliga edi ya'itoto 'evivi weaqina*

*(Madiu 22:23-33; Maki 12:18-27)*

<sup>27</sup> 'Inega vaina Sadusiavo imai Ieisu 'inaya, taudi ge ida vetumaqana to'aliga edi ya'itoto 'evivi weaqina, ta Ieisu ivetala'aiea ivonaya, <sup>28</sup> \* "Tove'ita, luvine ba'e 'idewani Mosese 'wayavia weaqida vonaya, 'Eguma taha 'oloto navaqi ta natu geqana ta na'aliga, 'inega 'oloto nana taina wada'ena navaqia be 'inega 'eguma vavine nana navenatuna natudiavo to'waiva nana ana ilafa."

<sup>29</sup> 'Inega taha 'ebevetalatutula Ieisu ineia ivoneaya, "Taha 'oloto ma tainavo itoatoa, ta qabudi adi yau seveni. Ta 'unutauna vaqi ta natu geqana ta 'abiboda 'aliga. <sup>30</sup> 'Inega ana tubutaqotaqo wada'e nana maega ivaqi itoatoa ta wese natu geqana ta 'abiboda 'aliga. <sup>31</sup> 'Inega wese tugamwanina wada'e nana vaqia ta wese 'idewani natu geqana ta 'aliga. Ta wese 'idewana tainavo qabudi wada'e nana ivaqia, ta natu geqadi ta i'aliga. <sup>32</sup> Ta 'abiboda wese vavine 'aliga. <sup>33</sup> 'Inega nuanuama ana vetala'aiea, 'eguma tomotau 'aligega ina ya'itoto 'evivi e to'oloto vavine nana moqane aqiaqina, mana seveni dina lova ivaqia?"

<sup>34</sup> 'Inega Ieisu vona 'eviviedi vonaya, "Tuta ba'e 'inaya vavine be 'oloto ivaqiaqi ta ivevevaqiedi. <sup>35</sup> Ta tuta maimai 'inaya Yaubada ena tomotauyavo venua'ivinidi vivine be 'oloto 'aligega ina ya'itoto 'evivi, ta ge ina vaqi ta wese ge taha toga ina vevaiei. <sup>36</sup> Mana taudi ni'au iya'itoto 'evivi 'aligega nawale ina toa Yaubada ena tovale'ewayavo 'idewani, 'inega ge wese ana fata ina 'aliga 'evivi. Ta tomeqabu ni'au iya'itoto 'aligega Yaubada na'awanatunedi.

<sup>37</sup> \* "Ta Buki Nugwenugweina ni'a ve'ita aqiaqieda to'aliga edi ya'itoto 'evivi weaqina tutana Mosese di'we tomotau geqana 'inaya tauya ta Yaubada 'aiwe saesaelina 'inega vonea vonaya, 'Ya'a Ebelamo be Aisake be Iakobo edi Yaubada.' <sup>38</sup> Ba'e 'inega kana alamania Yaubada ge to'aliga edi Yaubada, ta 'esi mayawaidi edi Yaubada, mana Yaubada ana fata tomotau qabudi nagiveyawaha 'eviviedi."

<sup>39</sup> Omo'e 'inaya vaina luvine ana tove'itayavo ivonaya, "Tove'ita, eu vonayavo aqiaqi otaqina!" <sup>40</sup> Ta gebu taha wese vetala'ai ida neia.

*To'etoyavua Ieisu Deibida ena gade 'inega*

*(Madiu 22:41-46; Maki 12:35-37)*

\* 20:20: Lk 11:54 \* 20:28: Luve 25:5 \* 20:37: 'Ifo 3:6

<sup>41</sup> 'Inega Iesu vetala'aiedi vonaya, "Ma'oda 'inega vaina tomotau ivonaya vonigo To'etoyavua Keliso tauna Deibida tubuna? <sup>42</sup> \* Mana buki Same 'inaya Deibida vonaya, 'Kaiwabu egu Kaiwabu 'inaya vonaya,

"Ataqiguya una toabui

<sup>43</sup> ana laba au aviayavo

ena a'uwebuiedi 'a'geu 'ayanaya

ta una luvinedi." ' "

<sup>44</sup> Ba'e 'inega Deibida Keliso 'awa-Kaiwabuyea, ta isana ma'oda Keliso nana Deibida natuna?"

*Luvine ana tove'itayavo edi ilivu*

*(Madiu 23:1-36; Maki 12:38-40)*

<sup>45</sup> Tomotau qabudi nawale Iesu ena vona ivivineneqea, 'inega ana to'abibodayavo 'idia vonaya, <sup>46</sup> "Luvine ana tove'itayavo edi ilivu ge ona 'abibodei, mana taudi nuanuadi adi kaleko kuekuedi ina veaqedi be tomotau nuanidia ina yabayaba be nuanuadi totoa va'auta ina 'amayabedi. Ta wese nuanuadi 'ebetoa aqiaqidi vanue tafwalolo 'inaya ina toabui, ta wese sagali ana tutaya nuanuadi tomotau qiduqiduadi edi 'ebetoya ina toabui.

<sup>47</sup> Ta wese tomotau matadia Yaubada 'inaya ivevenoqi kuena, ta edi venoqi ge aqiaqina, mana edi venoqi 'iuna nuanuadi tomotau ina 'awahaqiaqiedi. Ta 'abiboda 'waivega wadawada'e iu'au'avedi be edi kulufayavo i'ewe'ewedi edi vanue 'idiega. 'Inega nawale Yaubada ve'ia luveifa otaqina naneidi."

## 21

*Wada'e taha ena nei kavovo*

*(Maki 12:41-44)*

<sup>1</sup> Tutana Iesu tunuvane 'inega tovekaikaiwabu 'itedi edi nei kavovo mane ana 'ebea'u 'inaya ia'ua'udi. <sup>2</sup> 'Inega taha wada'e 'itea 'watovu ta ena nei kavovo mane goyogoyona magilafuna a'uuya. <sup>3</sup> \* 'Inega Iesu vonaya, "Yavona aqiaqiemi, yo'o dina 'idiega wada'e omo'e ena nei kavovo veqidua va'inedi, <sup>4</sup> mana tovekaikaiwabu edi mane 'ena'ina nawale 'eno'eno, ta wada'e omo'e lukwalukwana ena mane ni'a a'u'ovoia, 'inega ge taha wese ena tufwa da'eno'eno be 'inega ana 'abwaga nagimwanei."

*Tuta vitana nawale na'ifoqe*

*(Madiu 24:1-2; Maki 13:1-2)*

<sup>5</sup> Ta Iesu ana to'abibodayavo vaina 'idiega Vanue Gwalagwalana ana 'ita aqiaqina i'itea 'inega Iesu ivoneaya, "Kaiwabu, Vanue Gwalagwalana ana 'ita aqiaqi otaqina, mana dabo adi 'ita aqiaqidi 'idiega iviaqia. Ta wese tomotau edi kulufa aqiaqina iawafelea Yaubada 'inaya ta 'idiega vanue nana ive'ivalia."

Ta Iesu 'idia vonaya, <sup>6</sup> \* "Vanue nana ba'itagana o'ite'itea, ta tuta maimai 'inaya ada aviayavo ina qeu yavulea ta ge wese taha ana dabo naluve'avina be ona 'ita 'eviviei."

*Tuta vitana be vevoalana*

*(Madiu 24:3-14; Maki 13:3-13)*

<sup>7</sup> 'Inega Iesu ivetala'aiea ivonaya, "Tove'ita, uvonema totuta 'inaya yani qabuna ba'e na'ifoqe, ta to'ebe'ita ana 'itei be 'inega ana alamania yani nana ni'a uvonayedi ina 'ifoqe?"

<sup>8</sup> 'Inega Iesu vonedia, "Ona 'itamakimi, mana nawale tomotau qabudi agu wawega ina mai ta ina vanugweta veifemi ta ina vonaya, 'Ya'a ba'e to'etoyavua!' ta wese ina vonaya, 'To'etoyavua ena tuta ni'a 'ifoqe mai!' Ta ge ona vetumaqanedi. <sup>9</sup> Ta wese tutana vedavi valedi ona noqolidi ge giwalimi naha'ala mana yani ba'e ina madu'ifoqe, ta bwa'obwa'o ana 'ebeluvine be 'ebeluvine be mali 'ebeluvine maega ina luavia. <sup>11</sup> Ta tuta nana 'inaya

<sup>10</sup> Ta Iesu wese vonedi vonaya, "Nawale mali qabu be mali qabu maega ina luavia, ta wese mali 'ebeluvine be mali 'ebeluvine maega ina luavia. <sup>11</sup> Ta tuta nana 'inaya

\* 20:42: Same 110:1 \* 21:3: 2Kol 8:12 \* 21:6: Lk 19:44

mwani'ini'i be kulaka ta wese vihiqa qiduana ina 'ifoqe di'we qabudi 'idia. Ta wese 'ebe'ita qiduadi ta 'ebemwaniniva mahalega ina 'ifoqe. <sup>12</sup> Ba'e yani diavona ina 'ifoqe, ta nugweta taudi ge ida vetumaqanegu ina salimi nuanuadi ina veilivu veifemi. Ta vanue tafwalolo be wese vanue 'ebeyoqona 'idia 'imega ina tauyemi sabi vetala'aiemi. Ta wese ina tauyemi tolumineavo be kiniavo matadia ya'a agu wawa weaqina. <sup>13</sup> Ta omo'e tuta nana 'inaya Valegu Aqiaqina ona simanea 'idia. <sup>14</sup>\* Ta ge ona nuanua edi ve'ewa 'imia weaqina be 'inega ma'oda ona vona 'aiqa 'idia, <sup>15</sup>\* mana ya'a emi vona tunutunuqidi ta wese alamani aqiaqi ena neimi. 'Inega ami aviayavo ge adi fata ina vona 'eviviem nage u'avega ina 'awaluveifemi. <sup>16</sup>\* Ta tuta nana 'inaya wese tamamiavo be, inamiavo be, taimiavo be, emi qabuyavo ta wese emiavo ina suluvemi, ta vaina 'imiega ina luve'aligimi. <sup>17</sup> Ta wese tomotau qabudi ina vevoalanemi mana omi'a agu tovetumaqanayavo. <sup>18</sup> Vonahaqiaqi, nuanuadi 'wafimi qabuna ina giveluveifea, ta ge adi fata. Ta wese ge adi fata debami 'aidegana ina 'ewa yavulei. <sup>19</sup> 'Inega omi'a ona tovoloi'ita be 'inega yawai vataya ona lobe.

*Ielusalema ana giveluveifa*

(Madiu 24:15-21; Maki 13:14-19)

<sup>20</sup> "Ta tutana toluavia ona 'itedi Ielusalema ni'a ivavivilia, 'inega ni'a oalamaniana 'abaga nana ana tuta luveawala ni'a 'ifoqe. <sup>21</sup> 'Inega di'we Iudia ana totoayavo luaqiaqiedi be ina dena bwanaga 'idia. Ta Ielusalema ana totoayavo luaqiaqiedi be 'abagega ina 'ifoqe, ta wese taudi talaqaya ifewafewa gebu ina lugu 'evivi 'abagaya. <sup>22</sup>\* Mana omo'e tuta nana 'inaya luvematasabu ana tuta, 'idewani lova Buki Nugwenugweina maduvon-ayea ana aqiaqi na'ifoqe. <sup>23</sup> Tuta omo'e 'inaya tovegamwegamwe'i be tovesusuyavo nuakokolodi, mana di'we ba'ena ana totoayavo tuta vita otaqina ina lobe, be omo'e 'inaya nawale Yaubada ena gamosoala 'inega luvematasabu qiduana ina lobe. <sup>24</sup>\* Omo'e tutana 'inaya taudi ge me Diu tomotau ina luve'aligidi ta wese vaina ina kafidi be di'we taha taha 'idia ina tauyedi. Ta wese ina vewaiwai be Ielusalema ina luvinea ana laba taudi edi tuta nagumwala.

*Iesu ena 'evivi mai weaqina*

(Madiu 24:29-31; Maki 13:24-27)

<sup>25</sup>\* "Ta wese 'ebe'ita na'ifoqe baba'au be wai'ena ta wese 'wadi'wadima 'idiega. Be wese nufula agoagodi butudi ena nunuqa 'inega totoa bwa'obwa'o qabudi ina mwaniniva ta ina tafefwai. <sup>26</sup> 'Inega tomotau me edi mwaniniva ta wese me edi nuavoqana qiduana itoatoa tuta nana yani luveifana i'itea bwa'obwa'oya 'ifo'ifoqe, mana yani qabudi waiwai mahalaya ina 'eludedela ta ina avuta. <sup>27</sup>\* Ya'a Tomotau Natuna tuta omo'e 'inaya bwa'obwa'o ana totoayavo qabudi ina 'itegu gawatega ena webui mai me egu waiwai ta wese me egu simatala qiduana. <sup>28</sup> Ta tutana yani qabuna ba'e nave'ale be ona 'itedi, 'inega ge ona mwaniniva ta 'esi me emi giwalifatu ona lu'ita vane, mana ami 'etoyavua ni'a vadi'wemi."

*Mafa vona sesebaina*

(Madiu 24:32-35; Maki 13:28-31)

<sup>29</sup> 'Inega Iesu taha vona sesebai neidi vonedia, "Mafa ta wese vaina 'aiwe adi tuta ona nuaidi. <sup>30</sup> Tutana 'aiwe 'waedi ona 'itedi igalugalu 'evivi 'inega ni'a oalamaniana tuta goyona ive nave'ale. <sup>31</sup> Ta wese 'idewani tutana ba'e 'ebe'ita diavona ona 'itedi 'inega ona alamaniana Yaubada ena 'Ebeluvine tuta goyona na'ifoqe.

<sup>32</sup> "Yavona aqiaqiem, lagata ba'e ge ona awala ana laba ba'e 'ebe'ita diavona nugweta ina 'ifoqe. <sup>33</sup> Mahala be bwa'obwa'o ina awala ta ya'a egu vonayavo gebu taha tuta ina awala.

\* 21:14: Lk 12:11-12 \* 21:15: Via 6:10 \* 21:16: Md 10:21-22 \* 21:22: Iel 5:29; 46:10; Ose 9:7 \* 21:24: Same 79:1; Ve 11:2 \* 21:25: Ais 13:10; Isi 32:7; Ioe 2:31; Ve 6:12-13 \* 21:27: Dan 7:13; Md 26:64; Ve 1:7

'Itamaki be 'iva'ava'ata weaqina

<sup>34</sup> “Ona 'itamaki aqiaqiemi, ta ge ona qaiawa kavokavovo toyafwauta 'idewani, be ge go'ila waiwaina ana numa 'inaya ona awafelemi. Ta wese emi toa bwa'obwa'oya weaqina ge ona nuanua 'ena'ina. Mana 'eguma 'edewani ona viaqia 'inega nawale Yaubada ena 'aubena qiduana 'inaya naluveafemi be kavona si'wa 'inega nasi'wemi ta ona veilaqe. <sup>35</sup> Mana 'aubena nana luveafega na'ifoqe totoa bwa'obwa'o qabudi 'idia. <sup>36</sup> 'Inega ona 'iva'ava'ata vataya! Ta tuta qabuna ona noqinoqi Yaubada 'inaya be nagivewaiwaiemi, 'inega ami fata ona tovolu'i'ita ya'a Tomotau Natuna 'iawaguya.”

<sup>37</sup> Ta 'aubena 'aidega 'aidega 'idia Iesu Vanue Gwalagwalana 'inaya veve'ita, ta lavilavi 'aidega 'aidega tautauya taha bwanaga ana wawa Olibe 'inaya. <sup>38</sup> Ta tomotau qabudi 'awa'awai otaqaya imai Vanue Gwalagwalana 'inaya Iesu ena vona sabi vineneqina.

## 22

*Iudasa nuanuana Iesu nasuluvea*

*(Madiu 26:1-5,14-16; Maki 14:1-2,10-11; Ioni 11:45-53)*

<sup>1</sup> Ta ni'au Beledi ge ana isitimo Sagalina wese igabea ana wawa 'Auvivia Sagalina ana tuta ludi'wea. <sup>2</sup> Tuta nana 'inaya toveguba qiduquadi be luvine ana tove'itayavo 'eda isalisalia ma'oda 'inega be Iesu ina kafia ta 'waivega ina luve'aligi. Ta ge adi fata mana qabu qiduadi imwaninivedi.

<sup>3</sup> \* Ta tuta omo'e 'inaya Seitani lugu Iudasa 'inaya, tauna taha Tuwelo dina gamodiega. Ta ba'e Iudasa nana wese igabea ana wawa Isakaliota. <sup>4</sup> 'Inega Iudasa tauya toveguba qiduquadi be Vanue Gwalagwalana ana to'itamaki adi tovanugwetayavo 'idia, ta maega iveqae ma'oda 'inega Iesu nasuluva 'aiqei 'idia. <sup>5</sup> 'Inega Iudasa ena vona weaqina iqaiawa ta ivona fofofola 'inaya ana ve'ia mane 'evisa nawale ina neia. <sup>6</sup> Ta Iudasa ve'ia nana weaqina awafela, 'inega tuta aqiaqina ba'eyea be Iesu nasuluvea 'idia 'inega adi fata ina kafia. Ta gebu tomotau matadia.

'Auvivia Sagalina

*(Madiu 26:17-25; Maki 14:12-21; Ioni 13:21-30)*

<sup>7</sup> \* Ni'au Beledi ge ana isitimo Sagalina 'ifoqe, ta 'aubena nana wese sifi natudiavo lami ivunuqidi 'Auvivia Sagalina ana 'ebenuave'avina weaqina. <sup>8</sup> 'Inega Iesu ana to'abibodayavo Ioni be Fita vematamagilafuyedi vonedia, “Ona tauya be 'Auvivia Sagalina 'abwagana weaqida ona 'iva'ava'aia.”

<sup>9</sup> 'Inega ivetala'aiea ivonaya, “Ma'inaya nuanuau 'abwaga nana ana 'iva'ava'aia weaqida?”

<sup>10</sup> 'Inega Iesu vonedia, “Ona tauya Ielusalema 'inaya, ta tutana ona 'ifoqe taha 'oloto ona 'itea go'ila ana 'ebegoi 'ava'avalea. Ta 'oloto nana ona 'abibodea be tovanue 'inaya lugulugu, e omi'a wese 'inaya ona lugu. <sup>11</sup> Ta tonivanue ona voneaya, 'Ema Tove'ita ba'e 'edewani vona 'aiqa vonaya, “Tosifaufa gamonaya una awafelei be 'inaya ma agu to'abibodayavo 'Auvivia Sagalina 'abwagana ana 'ainia?” <sup>12</sup> 'Inega sifaufa qiduana debanaya ni'a 'i'iva'ava'aina nave'itemi, e tauna 'inaya 'abwaga nana ona 'iva'ava'aia weaqida.”

<sup>13</sup> 'Inega to'abiboda dina itauya ta tola'ai Iesu ni'a simanea 'idia, e 'idewani yani qabuna ilobedi. 'Inega sifaufa nana 'inaya 'Auvivia Sagalina 'abwagana i'iva'ava'aia.

*Kaiwabu Tuwelo dina maega i'ai'ai*

*(Madiu 26:26-30; Maki 14:22-26; 1 Kolinita 11:23-25)*

<sup>14</sup> Ta yani qabuna ni'au i'iva'ava'aia, 'inega Iesu me ena tovaletuyanayavo itoa va'auta 'abo maega i'ai'ai. <sup>15</sup> Ta edi 'ai gamonaya Iesu vonedi vonaya, “Lova 'inega nuanuagu qiduana be omi'a ya'a maega 'Auvivia Sagalina ana 'abwaga ba'e kana 'aini, ta 'abiboda visiqa qiduana ena lobei. <sup>16</sup> Yavona aqiaqiemi, ge wese 'Auvivia Sagalina 'abwagana

\* 22:3: Ion 13:2,27 \* 22:7: 'Ifo 12:1-27

ena gudatonova 'eviviei ana laba ana alamani aqiaqi na'ifoqe tuta nana Yaubada ena 'Ebeluvine namai."

<sup>17</sup> 'Inega 'oine ma vedina 'ewea 'abo weaqina lukaiwa Yaubada 'inaya ta 'abiboda vonedia, "Vedi ba'e o'ewei ta qabumi 'inega ona numa. <sup>18</sup> Ta yavonemi, tuta ba'e 'inega ge wese 'oine ena numa 'eviviei ana laba Yaubada ena 'Ebeluvine namai!"

<sup>19</sup> 'Inega beledi 'ewei 'abo weaqina lukaiwa Yaubada 'inaya, ta 'abiboda gitomwei ta ena tovaletuyanayavo vewila'ayea 'idia ta vonedia, "Ba'e 'wafigu, ta yaneineimi omi'a weaqimi ona 'ewea, ta 'abiboda wese 'idewani ona viaqia agu 'ebenuave'avina weaqina."

<sup>20</sup> Ta ni'a i'ai gumwala 'inega wese 'idewani vedi 'ewei ta vonedia, "Sulaligu ba'ena luvine 'evauna ana avutugu, ta inoinoqa weaqimi.

<sup>21</sup> \* "Ta o'itei, 'olotona nawale nasuluvegu ba'idia toatoa, ta tuta ba'e 'inaya tauna maega a'ai'ai. <sup>22</sup> Ya'a Tomotau Natuna nawale ena tauya 'eda nana lova Yaubada vena'ivinia weaqigu. Ta agu tosuluva nana nuakolokolona!"

<sup>23</sup> Ena tovaletuyanayavo vona ba'e inoqolia 'inega taudiega ivetala'aiedi ivonaya, "Isana toga tauna omo'e 'edewana naviaqa 'aiqa?"

#### *Togama ana wawa qiduana?*

<sup>24</sup> \* 'Inega tovaletuyana dina ive'ale taudiega ive'ae'aetoga vonigo toga 'idiega ana wawa naveqidua. <sup>25</sup> \* 'Inega Ieisu vonedia, "Taudi ge me Diu edi toluvine qiduquadi edi tomotauyavo iluviluvinedi ta luvine vitana ineineidi, ta tua nuanuadi edi tomotauyavo ina 'awahaqiaqiedi. <sup>26</sup> \* Ta omi'a ge wese 'edewana ona viaqa 'aiqa. Ta 'esi 'eguma taha toga 'imiega ana wawa qiduana, 'inega taunega nagiwebuiea, ta emi tovanugwetayavo ina vetofewa weaqimi. <sup>27</sup> \* Ta ona nuaia, 'eguma taha toga natoabui sabi 'ai, ta taha tomotau ana 'abwaga namiei 'inaya 'abo na'ai, 'inega togama 'idiega 'oloto qiduana? Ana 'ita to'ai nana, waisa? Ta ya'a ba'e 'itaga nuanimia yatoatoa emi tofewa ta ami toiula 'idewani.

<sup>28</sup> "Vonahaqiaqi, omi'a egu tuta vita 'idiega otovolo'i'ita di'weguya, 'inega ba'itagana omi'a ya'a maega katoatoa. <sup>29</sup> Tamagu ena 'Ebeluvine ni'a awafelea 'iguya, 'inega ya'a wese 'idewani yahawafelemi 'Ebeluvine nana 'inaya, <sup>30</sup> \* be 'inega nawale omo'e 'inaya ya'a omi'a maega kana 'ai be kana numa, be wese 'ebetoa kaikaiwabuna 'idia ona toabui be me isileli edi gadeavo tuwelo ona luvinedi."

#### *Fita ena vegeqa Ieisu vona 'ifoqeyea*

*(Madiu 26:31-35; Maki 14:27-31; Ioni 13:36-38)*

<sup>31</sup> 'Inega wese Ieisu vonaya, "Saimoni, Saimoni, uvineneqa, Seitani ni'au awafela 'ewea be qabumi nasitonovimi, 'edewani tovaoqa ena witiavo givutuqidi aqiaqidi be luveifadi.

<sup>32</sup> \* Ta 'ebesitonova 'inaya ge una dawalili aqiaqi, ta weaqiu ni'au yanoqi waiwai vonigo eu vetumaqana ge nagumwala. Be tutana una givila 'evivi 'iguya 'inega taimwavo wese una givewaiwaiedi."

<sup>33</sup> 'Inega Fita vonaya, "Kaiwabu, ni'au ya'iva'ava'aigu, be 'eguma vanue yoqona 'inaya ina a'uluguyeu, ya'a wese o'a maega. Ta wese 'eguma ina luve'aligiu, e 'inega ya'a wese 'edewani ina luve'aligigu."

<sup>34</sup> Ta Ieisu voneaya, "Fita, yavona aqiaqi 'iuya, ba'itaga velovelovanina 'inaya o'a una maduvegeqegu ana yau toi, ta 'abiboda kamukamu nadou."

<sup>35</sup> \* 'Inega Ieisu qabudi vetala'aiedi vonaya, "Lova yavetune 'ifoqeyemi ta yavonemi ge emi mane ana kodekode nage emi kode nage ami 'aqeyafayafa ona 'ewedi. Ta ma'oda tuta nana 'inaya nage vita olobea?"

'Inega ivoneaya, "Ge taha wese tola'ai."

\* 22:21: Same 41:9; Ion 13:21-22 \* 22:24: Lk 9:46 \* 22:25: Md 20:25-27; Mk 10:42-45 \* 22:26: Md 23:11; Mk 9:35 \* 22:27: Ion 13:12-15 \* 22:30: Md 19:28 \* 22:32: Ion 17:15 \* 22:35: Lk 9:3; 10:4

<sup>36</sup> 'Inega Iesu wese vonedia, "Ta 'esi ba'itagana emi mane ana kodekode be wese emi kode ona 'ewedi. Ta 'eguma toga 'imiega ge ena kefatamo, e 'inega ana kaleko navegimwaneyei be ana ve'ia 'inega ena kefata nagimwaneana.

<sup>37</sup> \* "Mana tuta ni'au vekusakusa, be Buki Nugwenugweina 'inaya lova taha vona weaqigu i'wayavia ana aqiaqi na'ifoqe vonaya, 'Tauna i'inanea kavonaya be tovanawala 'idewani. Be wese vona qabudi weaqigu ana aqiaqi na'ifoqe.' "

<sup>38</sup> 'Inega taudi ena vona ive'iea ivonaya, "Kaiwabu, ema kefata magilafudi ba'e."

Ta Iesu vonedia, "Bena'e ana fata."

*Iesu vevenoqi Yaubada 'inaya*

*(Madiu 26:36-46; Maki 14:32-42)*

<sup>39</sup> 'Inega Iesu sifaufa nana noega ta Ielusalema 'inega tauya bwanaga Olibe 'inaya, mana tuta qabuna ena ilivu 'idewana, ta ana to'abibodayavo i'abibodea. <sup>40</sup> Di'we nana 'inaya i'ifoqe 'inega Iesu ana to'abibodayavo vonedi vonaya, "Ona venoqi Yaubada 'inaya be yaqisa ge Seitani nasitonovimi!"

<sup>41</sup> Ta 'abiboda 'idiega vasi'i tauya tufwana luluvai kavona dabo kainoqei tauya 'idewani, 'abo tuqatuqanega sobadi ta venoqi Tamana 'inaya vonaya, <sup>42</sup> "Tamagu ye, 'eguma nuanuau visiqqa vedina ba'e 'iguyega uda 'ewa yavulei. Ta gebu ya'a egu nuanua 'inega, ta 'esi o'a tau'u eu nuanua 'inega uda viaqi." <sup>43</sup> 'Inega tovale'ewa taha mahalega 'ifoqe 'abo Iesu givewaiwaiea. <sup>44</sup> Ta nuana vita 'ena'ina 'inega noqi waiwai 'abo ana muyamuya ana 'ita kavonaya sulala dakabukabu bwa'obwa'oya.

<sup>45</sup> 'Inega ya'itoto ta 'evivi ana to'abibodayavo 'idia, ta edi nuavita qiduana 'inega lobedi ni'au i'eno nuafani. <sup>46</sup> 'Inega divanodi ta vetala'aiedi vonaya, "Tola'ai weaqina o'eno'eno? Ta ona ya'itoto be ona venoqi! Mana 'eguma ge ona venoqi e nawale Seitani ena sitonova 'inaya ona lugu."

*Iesu ikafia*

*(Madiu 26:47-56; Maki 14:43-50; Ioni 18:3-11)*

<sup>47</sup> Iesu nawale vonavona 'inega qabu qiduadi Iudasa maega i'ifoqe imai, tauna taha tovaletuyana Tuwelo dina 'idiega, ta qabu dina vanugweted. Ta Iudasa mai Iesu di'wenaya sabi talafafana. <sup>48</sup> 'Inega Iesu Iudasa voneaya, "Iudasa, umaimai vonigo nuanuau ya'a Tomotau Natuna talafafega una suluvegu ta una ve'ineiegu tomotau nimadia, waisa?"

<sup>49</sup> Ta tutana Iesu ana to'abibodayavo yani ba'e i'itea 'inega nuadi 'eqa'uya tola'ai tuta goyona 'inaya na'ifoqe ta ivonaya, "Kaiwabu, nage kefataga ana fofolidi?" <sup>50</sup> 'Inega taha 'idiega ena kefata lulagai 'abo toveguba edi tovanugweta ena tofewa teniqana ana 'ataqiega da'a yavulea.

<sup>51</sup> Ta Iesu voneaya, "Ta'iwa! Ge wese 'edewani una viaqa 'aiqa!" 'Inega Iesu 'oloto nana teniqana gitonovi ta giveaqiaqiea.

<sup>52</sup> 'Inega Iesu ana tokafi diavona taudi toveguba qiduqiduadi be Vanue Gwalagwalana ana to'itamaki adi tolumineavo, be wese 'abaga ana tovanugwetayavo vonedi vonaya, "Nage ya'a taha tovanawala, 'inega me emi kefata be me emi gita omai sabi kafigu?"

<sup>53</sup> Ta tola'ai weaqina ge oda kafigu 'aubena dina qabudi nuanimia yatoatoa Vanue Gwalagwalana 'atamaninaya ta yaveve'ita tomotau 'idia? Ta ba'itagana emi tuta ni'a mai be ona kafigu, mana luvine velovelovanina ana tuta tawa 'ifoqe."

*Fita Iesu vegeqea*

*(Madiu 26:57-58,69-75; Maki 14:53-54,66-72; Ioni 18:12-18,25-27)*

<sup>54</sup> \* 'Inega Iesu ikafia 'abo itauyea toveguba edi tovanugweta ena vanuea. Ta Fita tufwana luluvaiega tala'obedi. <sup>55</sup> Ta 'abaga nana ana 'ebetoe va'auta gamonaya toluavia 'aiwe imu'ei ta qabudi ivevetaluvala, ta Fita 'itedi ta di'wediea toabui. <sup>56</sup> 'Inega taha tofewa mevavinena Fita 'itea ta vonaya, "Oloto ba'e lova Iesu maega ya'itedi."

<sup>57</sup> Ta Fita vegeqa vonaya, "Vavine, ge eda alamani toga bena'e weaqina uvonavona."

\* 22:37: Ais 53:12 \* 22:54: Mk 14:53-54

<sup>58</sup> 'Abiboda taha 'oloto wese Fita 'itea 'inega vonea vonaya, "O'a taha wese ana to'abiboda."

'Inega Fita vonaya, "'Ia, ya'a gebu!"

<sup>59</sup> Ta tufwana tuta kuena 'abibodanaya wese taha 'oloto bonana waiwaina 'inega enavo vonedi vonaya, "Vonahaqiaqi, 'oloto ba'e Iesu ana to'abiboda taha, mana tauna wese Galili 'olotona."

<sup>60</sup> Ta Fita vonaya, "Aa gebu, 'oloto nana weaqina uvonavona ya'a ge eda alamania." Nawale vonavona 'inega kamukamu dou.

<sup>61</sup> Tuta ba'e 'inaya Iesu tunugivila ta Fita 'itea, e omo'e 'inaya Fita nuave'avinia Kaiwabu ena vona lova tutana vonaya, "Ba'e 'itaga velovelovana 'inaya o'a una vegeqegu ana yau toi, ta 'abiboda kamukamu nadou." <sup>62</sup> 'Inega Fita nuana vita 'ena'ina 'abo 'ifoqe 'abagaya ta dou.

*Iesu igivenu'wea ta ivunuqia*

*(Madiu 26:67-68; Maki 14:65)*

<sup>63</sup> 'Inega Iesu ana to'itamakiavo ive'ale igivenu'wei ta ivunuqia, <sup>64</sup> ta wese matana kalekoyega iumei 'abo ivetala'aiea ivonaya, "Uvonema, toga vunuvunuqiu? Mana ni'a uvona vonigo o'a tovesimasimana." <sup>65</sup> Ta wese yani qabuna weaqina Iesu i'awaluveifea.

*Iesu me Diu edi toluvineavo matadia*

*(Madiu 26:59-66; Maki 14:55-64; Ioni 18:19-24)*

<sup>66</sup> Mahala ahalia, 'inega 'abaga ana tovanugwetayavo be toveguba qiduquadi be wese luvine ana tove'itayavo iva'auta, 'abo Iesu imiea matadia. <sup>67</sup> \* Ta ivetala'aiea ivonaya, "Usimana 'imaya, ma'oda o'a tau'u To'etoyavua nage gebu?"

'Inega Iesu vonedi vonaya, "Eguma ena simana 'imia 'inega ge ona vetumaqanegu, <sup>68</sup> ta wese 'eguma ena vetala'aiemi egu vona ge ona ve'iei. <sup>69</sup> \* Ta ona alamania vonigo tuta ba'e 'inega ya'a Tomotau Natuna ena toabui Yaubada Tovewaiwai 'ataqinaya."

<sup>70</sup> 'Inega qabudi ivetala'aiea ivonaya, "Nage o'a Yaubada Natuna?"

Ta Iesu edi vona ve'iea vonaya, "Ni'a ovona aqiaqi."

<sup>71</sup> 'Inega taudi ivonaya, "Ni'au ena vona luveifana kanoqolia, 'inega ge wese ana tove'ewayavo weaqidi kana nuanua, mana taunega ni'a simanea vonigo tauna Yaubada Natuna."

## 23

*Iesu Failato 'iawanaya*

*(Madiu 27:1-2,11-14; Maki 15:1-5; Ioni 18:28-38)*

<sup>1</sup> 'Inega totoa va'auta qabudi iya'itoto 'abo Iesu itauyea me Loma edi gavana ana wawa Failato 'iawanaya. <sup>2</sup> 'Inega Iesu ive'ale ive'ewei ta ivonaya, "'Oloto ba'e a'itea ima'a me Diu qabuma ve'ita veifema ta awatayema vonigo toluvine qiduana Sisa weaqina takesi ge ana a'ui, ta wese vonaya vonigo tauna Kini be To'etoyavua."

<sup>3</sup> 'Inega Failato Iesu vetala'aiea vonaya, "O'a vonahaqiaqi me Diu edi Kini, waisa?"

'Inega Iesu vona 'eviviea vonaya, "Bena'e ni'au uvona aqiaqi."

<sup>4</sup> Ta 'abiboda Failato toveguba qiduquadi be tomotau qabudi vonedi vonaya, "'Oloto ba'e ge taha ena luveifana eda lobei."

<sup>5</sup> Ta taudi edi waiwaiega ivonaya, "Tauna ena ve'ita 'inega ita'a me Diu u'au'aveda be eda di'we nidonidoea 'inituna. Mana Galili 'inega ena u'ava ve'alea ta ni'a 'ifoqe mai 'abaga ba'e Ielusalema 'inaya."

<sup>6</sup> Tutana edi vona ba'e Failato noqolia 'inega vetala'aiedi vonaya, "Oo, nage tauna Galili 'olotona?"

<sup>7</sup> \* Ta ivonaya, "Ao, 'edewana."

\* 22:67: Ion 3:12 \* 22:69: Via 7:56 \* 23:7: Lk 3:1



'Inega Failato vonedi vonaya, "Galili bena'ena Elodi Anitifasi ena 'ebeluvine. 'Inega Ieisu ona tauyei 'inaya be taunega naluvinea, mana ba'itagana Elodi wese Ielusalema 'inaya toatoa."

<sup>8</sup>'Inega itauyea Elodi 'inaya 'abo tuta nana Ieisu 'itea qaiawa qiduana, mana tuta kuena nuanuana be Ieisu na'itea, mana valenamo noqonoqolia. Ta ena nuanua 'iuna vonigo Ieisu taha 'ebe'ita naviaqi na'itea. <sup>9</sup>'Inega Elodi Ieisu vetala'ai 'eala neia, ta ge taha wese dave'iea. <sup>10</sup>Toveguba qiduqiduadi be luvine ana tove'itayavo Elodi maega itoatoa Ieisu iala'i'ihia. <sup>11</sup>Ta Elodi me ena toluaviayavo Ieisu iawawebuiei ta igivenu'wea. Ta 'abiboda taha kaleko aqiaqi otaqina 'inega ivekalekoya, 'idewana kini adi kaleko, 'abo ivetune 'eviviei tauya Failato 'inaya. <sup>12</sup>Lova tuta kuena 'inaya Elodi be Failato ivevoalana, ta omo'e 'aubena nana 'inaya iveiana 'evivi.

*Tomotau nuanuadi Failato Ieisu natutuve'ewea 'etoluai 'inaya*  
(Madiu 27:15-26; Maki 15:6-15; Ioni 18:39-19:16)

<sup>13</sup>'Inega Failato toveguba qiduqiduadi be tafwalolo ana tovanugwetayavo ta wese tomotau qabudi gaba va'auqidi imai, <sup>14</sup>ta vonedia, "Oloto ba'e 'iguya ni'a omiea ta osimana vonigo tauna tomotau ve'ita veifedi be givenidonidoedi. Ta matamia ya'a ni'a yavetala'aiea be ge taha ena luveifana eda lobei emi ve'ewa weaqina. <sup>15</sup>Elodi wese ge taha luveifana 'inaya dalobei, 'inega 'idaya vetune 'eviviea. 'Inega ge wese luve'aliga daluaqiaqiei. <sup>16-17</sup>E 'inega ena luvematasabuyamo ta 'abiboda ena yavui natauya."

<sup>18</sup>'Inega qabu dina bonadi qiduanega ikolua ivonaya, "Ieisu na'aliga, ta 'esi Balabasi una 'etoyavua weaqima!" <sup>19</sup>Ta Balabasi nana vanue 'ebeyoqona 'inaya ni'a toatoa, mana lova 'abaga nana 'inaya ma enavo me Loma maega ivedavi 'abo vaina tomotau iluve'aligidi.

<sup>20</sup>Ta Failato nuanuana be Ieisu na'etoyavua 'inega yo'o wese vetala'aiedi. <sup>21</sup>Ta taudi wese bonadi qiduanega ivonaya, "Etoluai 'inaya una tutuve'ewea, 'etoluai 'inaya una tutuve'ewea!"

<sup>22</sup>'Inega Failato tuta vetoina vonedi vonaya, "Tola'ai isana ena luveifana 'inega luaqiaqiea be na'aliga? Ge taha wese luveifana 'inaya eda lobei. 'Inegana ena luvematasabuyamo be 'abiboda ena 'etoyavua."

<sup>23</sup>Ta qabu dina nawale ikolukolua qiduana ivonaya, "Etoluai 'inaya una tutuve'ewea!" 'Abo qabu dina edi vona vewaiwai, <sup>24</sup>'inega edi nuanua weaqina Failato awafela 'idia, 'inega ena toluaviayavo luvinedi be Ieisu ina tutuve'ewei 'etoluai 'inaya. <sup>25</sup>Ta 'oloto nana nuanuadi Failato na'etoyavui weaqidi e 'etoyavua, tauna toluve'aliga nana vanue 'ebeyoqona 'inaya lova ia'uya tutana me Loma edi gabemaniavo luavia 'idia.

'Inega Failato yo'o nimadia Ieisu a'uya, ta ba'e 'inega tomotau edi nuanua viaqia.

*Ieisu 'etoluai 'inaya itutuve'ewea*  
(Madiu 27:32-44; Maki 15:21-32; Ioni 19:17-27)

<sup>26</sup>Tutana Ieisu i'ebe'ewea itauyea sabi tutuve'ewana, 'inega 'edaya taha 'oloto ana wawa Saimoni ilobe, tauna Sailini 'olotona muta'wega 'ifoqe mai 'abo tautauya 'abagaya. Ta toluavia Saimoni ivedidigea 'inega Ieisu ana 'etoluai 'avalea ta 'abibodanega tauya.

<sup>27</sup>Ta wese qabu qiduadi Ieisu i'abibodea, ta qabu dina 'idiega wese vivine qabudi itautauya ta idoudou me edi nuavita Ieisu weaqina. <sup>28</sup>Ta Ieisu tunugivila 'abo vivine dina vonedia, "Omi'a Ielusalema vivinemi ge weaqigu ona dou, ta omi'a taumi weaqimi be natumiavo weaqidi ona dou. <sup>29</sup>\* Mana tuta maimai 'inaya vita na'ifoqe, ta taudi gagalidi be ge ida venatuna ta wese taudi lova ge ida vesusu nawale aqiaqina ina lobe. <sup>30</sup>\* Ta tuta omo'e 'inaya nawale tomotau bwanaga 'idia ina vona, 'Bwanaga, o'avalata'i debamaya ta oyamunima!"

<sup>31</sup>Vonahaqiaqi, ya'a nawale ena veilaqe, ta omi'a nawale ona veilaqe veiveifa. Mana tola'ai nawale tomotau ina viaqi 'iguya kavona 'aiwe mama'ina ina gabui ta na'alata

\* 23:29: Lk 21:23 \* 23:30: Ose 10:8; Ve 6:16

'weu'weu. Ta 'esi omi'a emi veilaqe qiduana, mana omi'a kavona 'aiwe kwavuvina na'alata ukamana be naveqidua."

<sup>32</sup> Ta toluveifadi magilafudi wese itauyedi, be Iesu maega ina luve'aligidi. <sup>33</sup> 'Inega taha di'we 'inaya i'ifoqe ana wawa igabea 'Unu'unu, ta di'we nana 'inaya Iesu itutu-ve'eweana ana 'etoluai 'inaya. Ta toluveifa diavona magilafudi wese adi 'etoluai 'idia itutu-ve'ewedi, taha Iesu ana 'ataqiega ta taha ana keliega. <sup>34</sup> \* 'Inega Iesu vonaya, "Tamagu ye, una nuataqodi, mana ge ida alamania tola'ai iviaviaqia."

Ta toluavia diavona Iesu ana kaleko i'eweana, 'inega taha laha ilahayea 'abo togama nanugweta e 'inega kaleko dina na'ewedi.

<sup>35</sup> \* Omo'e 'inaya tomotau itovotovoloto ta ivevekova, ta me Diu adi tovanugwetayavo Iesu igivenu'wea ivonaya, "Mali tomotau 'etoyavuidi, ta ba'itagana taunega na'etoy-avua 'eguma vonahaqiaqi tauna To'etoyavua Keliso Yaubada ena venua'ivina."

<sup>36</sup> \* Toluaviayavo wese Iesu igivenu'wea 'abo 'oine yuyuna imiea ive'etovaneyea, <sup>37</sup> ta ivoneaya, "Eguma o'a me Diu edi Kini tau'u una 'etoyavuiu."

<sup>38</sup> Ta wese ana 'etoluai debanaya i'wayavia vonaya, "OLOTO BA'ENA ME DIU EDI KINI".

<sup>39</sup> Ta toluveifana magilafudi taha 'idiega Iesu givenu'wea voneaya, "Nage o'a To'etoy-avua, waisa? 'Inega una 'etoyavuida!"

<sup>40</sup> Ta toluveifana iana lugwaeyea vonaya, "Ma'oda o'a, nage Yaubada ge uda mwaninivei? Mana toidana ada luvine 'aidegana ineida, <sup>41</sup> ta luvine nana o'a be ya'a luaqiaqieda mana ita'a luveluveifada, ta 'oloto ba'ena ge taha wese ena luveifamo."

<sup>42</sup> 'Inega 'oloto nana Iesu voneaya, "Iesu, tuta nana una 'evivi mai be una ve-Kini, e 'inega ge una nuafanigu."

<sup>43</sup> Ta Iesu voneaya, "Yavona aqiaqieu, o'a be ya'a ba'itaga Faladaisi 'inaya kana toatoa."

#### *Iesu ena 'aliga*

*(Madiu 27:45-56; Maki 15:33-41; Ioni 19:28-30)*

<sup>44</sup> Ta baba'au ni'a vane 12 koloki 'idewana, 'inega baba'au ena simatala 'weu, ta velovelovana qiduana bwa'obwa'oya 'ifoqe tauya ana laba lavilavi 'edewani 3 koloki 'inaya. <sup>45</sup> \* Ta Vanue Gwalagwalana gamonaya Sifaufa Gwalagwala Otaqina ana bagina kaleko eabu magilafuyea. <sup>46</sup> 'Inega Iesu bonana qiduanega gaba vonaya, "Tamagu ye, niboanigu nimauya yaha'ua'uya." Ena vona ba'e 'inanea 'inega yawaina gumwala.

<sup>47</sup> Ta toluaviayavo edi tovatatana yani qabuna ni'a 'itea, 'inega Yaubada awatuboya vonaya, "Vonahaqiaqi, 'oloto ba'e tunutunuqina."

<sup>48</sup> Ta tomotau qabudi di'we nana 'inaya ni'a iva'auta sabi vekova, taudi wese Iesu i'itea yawaina ni'a gumwala, 'inega me edi nuavita qiduana nimadiega lumalumadi itutudi ta i'evivi edi 'abagaya. <sup>49</sup> Ta Iesu enavo be wese vivine dina lova Galiliega i'abibodea, taudi luluvaia itovotovoloto ta yani qabuna 'ifo'ifoqe i'itea.

#### *Iesu itavunia*

*(Madiu 27:57-61; Maki 15:42-47; Ioni 19:38-42)*

<sup>50-51</sup> Taha 'oloto ana wawa Iosefa toatoa, tauna Iudia 'olotona ta ena 'abaga goyona Alimatia. Tauna 'oloto aqiaqina ta Yaubada matanaya tunutunuqina. Ba'e Iosefa nana me Diu edi kaniselayavo 'idiega, ta ba'eba'e Yaubada ena 'Ebeluvine weaqina. Lova tutana me Diu edi tovanugwetayavo nuanuadi vonigo Iesu ida luve'aligia, ta Iosefa nana edi nuanua ge da'awahaqiaqiea.

<sup>52</sup> Ta Iosefa tauya Failato 'inaya 'abo Iesu 'wafina weaqina venoqi nuanuana na'eweana. <sup>53</sup> 'Inega Failato awafela 'abo Iosefa Iesu 'wafina 'etoluai 'inega 'ewa webuiea 'abo umea kaleko wadawadaeana 'inega, ta 'abiboda a'uya deba'unu vauvauna 'inaya. Ta deba'unu nana ana 'ita kavona vatu'ubu ni'a ialea dabo qiduana gamonaya. <sup>54</sup> Ba'e yani diavona 'ifoqe 'aubena 'ebe'iva'ava'ata 'inaya, ta tuta goyona Sabate nave'ale.

\* 23:34: Same 22:18 \* 23:35: Same 22:7-8 \* 23:36: Same 69:21 \* 23:45: Ibe 6:19-20; 10:19-20

<sup>55</sup> Ta vivine dina lova Galiliega Ieisu maega imai Ielusalema 'inaya, e taudi Iosefa itala'obe'a 'abo Ieisu ana deba'unu ta wese 'wafina ma'oda ia'u 'aiqea i'itea. <sup>56</sup>\* 'Inega i'evivi 'abagaya, 'abo dede'wa meilana aqiaqina i'iva'ava'aia Ieisu 'wafina weaqina.

'Inega mahala vulihia Sabate 'ifoqe ta iveyawai mana 'aubena nana ana luvine nuanuadi ina 'abibodea.

## 24

*Ieisu ena ya'itoto 'evivi*

*(Madiu 28:1-10; Maki 16:1-8; Ioni 20:1-10)*

<sup>1</sup> Mahala vulihia wiki ana 'aubena nugweta 'awa'awai otaqaya vivine dina dede'wa i'iva'ava'aina i'ewei ta itauya deba'unuya. <sup>2</sup> Tuta nana i'ifoqe 'inega deba'unu ana 'auboda dabo ni'au 'u'uvekawawa naqona i'itea. <sup>3</sup> 'Inega gamonaya ilugu, ta Kaiwabu Ieisu 'wafina i'ita 'avea.

<sup>4</sup> Ta nawale gamonaya me edi nuavoqana itoatoa, mana ge ida alamania tola'ai ni'a 'ifoqe. 'Inega lukwayavonega 'oloto magilafudi ma adi kaleko namanamalidi be simasimalidi i'ifoqe di'wedid itovolo. <sup>5</sup> Ta vivine dina imwaniniva qiduana ta tuqatuqadiege isobadi ta ihiwa'odu bwa'obwa'oya. 'Inega 'oloto dina ivonedid, "Tola'ai weaqina tomotauna osalisalia to'aliga edi 'ebetoaya?" <sup>6</sup>\* Tauna ba'idia ge datoatoa, ta 'esi mayawaina ni'a ya'itoto 'evivi. Ta lova ena vona 'imia ona nuave'avinia tutana Galili 'inaya maega otoatoa, mana vonaya, <sup>7</sup> 'Tomotau Natuna ina ve'ineiea tomotau luveluveifadi nimadia be 'etoluai 'inaya ina tutuve'ewea, ta 'aubena vetoina 'aligege naya'itoto 'evivi.'" <sup>8</sup> E 'inega vivine dina Ieisu ena vona ba'e inuave'avinia.

<sup>9</sup> 'Inega deba'unu inoega ta itauya Ieisu ana to'abibodayavo leveni dina ma ediavo 'idia, 'abo isimana tola'ai 'idewana deba'unuya 'idia 'ifoqe. <sup>10</sup> Tovematamagilafu dina taudi Meli Magidala be Ioana be taha wese Meli, tauna Iemesa inana, ta wese vaina vivine maega Ieisu ena ya'itoto 'evivi weaqina ana tovaletuyanayavo ivonedid. <sup>11</sup> Ta to'abibodayavo vivine dina edi vona ge ida vetumaqaneid, ta ivonaya vonigo edi vona kavona vona kavokavovo 'idewani. <sup>12</sup> Ta Fita tovolov vihila tauya deba'unuya 'inega 'ita lugu vekova dadana ta kaleko namo 'itedi ta ge taha wese tola'ai da'itei. 'Inega tola'ai ni'au 'ifoqe matanaya weaqina nuana voqana 'abo 'evivi tauya.

'Oloto magilafudi Ieisu maega iveloba 'eda Emausa 'inaya

*(Maki 16:12-13)*

<sup>13</sup> 'Aubena omo'e 'inaya Ieisu ana to'abibodayavo magilafudi itautauya taha 'abaga ana wawa Emausa 'inaya. 'Abaga nana ana luvuvai Ielusalema 'inega kavona 'eguma 'awa'awaia kana tutuvila be 'awa'awai nana nuandinaya kana 'ifoqe. <sup>14</sup> Magilafudina nawale itautauya ta iveveqaelia yani diavona ni'a 'ifoqe Ieisu 'inaya weaqina. <sup>15</sup> 'Inega Ieisu ana 'aidega 'idia 'ifoqe 'abo maega itautauya, <sup>16</sup> ta ge adi fata ina 'inaneid.

<sup>17</sup> Ta Ieisu magilafudina vetala'aiedi vonedia, "Toyani weaqina oveveqaelia?"

'Inega iveutovolov ta adi 'ita kavona todou 'idewana. <sup>18</sup> 'Inega taha 'idiega ana wawa Kaliofasa Ieisu ena vona ve'iea voneaya, "Wagawaga qabudi imai Ielusalema 'inaya yani qabuna ni'au ialamania, ta ana 'ita o'a au 'aidega ge uda alamania tola'ai ni'a 'ifoqe 'aubena toi gumwala 'idia?"

<sup>19</sup> 'Inega Ieisu ve'iedi vonaya, "Isana tola'aia?"

'Abo taudi ivonaya, "Yani dina Ieisu Nasaleta 'olotona 'inaya 'ifoqe. 'Oloto ba'ena tauna tovesimasimana taha, ta wese Yaubada be tomotau qabudi matadia ena vonayavo be ena viaqayavo waiwaidi viaqidi. <sup>20</sup> Ta ema toveguba qidudiduidi be ema tovanug-wetayavo 'oloto nana ikafia ta ive'ineiea Failato 'inaya, ta tomotau iluvine nuanuadi na'aliga. Ta 'abiboda toluaviayavo itutuve'ewea 'etoluai 'inaya. <sup>21</sup>\* Ta avetumaqaneid vonigo tauna ima'a me Isileli da'etoyavuima, ta yani ba'ena 'aubena toi gumwala 'ifoqe.

\* 23:56: 'Ifo 20:10; Luvu 5:14 \* 24:6: Lk 9:22 \* 24:21: Lk 19:11; Via 1:6

<sup>22</sup> “Ta vaina vivine 'imega nuama igivevoqania, mana tawadega 'awa'awai otaqaya itauya deba'unuya, <sup>23</sup> ta Iesu 'wafina ge ida lobei. 'Inega i'evivi imai 'imaya ta ivonema deba'unuya Yaubada ena tovale'ewayavo i'itedi kavona ve'wayoqa. Ta tovale'ewa dina isimana 'idia leisuna 'aligega ni'au ya'itoto 'evivi mayawaina toatoa. <sup>24</sup> \* 'Inega wese vaina emavo itauya deba'unu nana 'inaya 'abo i'itea 'idewana vivine dina edi simana 'imaya, ta tomotauna ge ida 'itea.”

<sup>25</sup> 'Inega Iesu vonedi vonaya, “Omi'a kwavakwavami ta debami 'i'wanina, mana tovesimasimana edi vona lova ge oda vetumaqanei. <sup>26</sup> \* Mana isimana aqiaqi edi 'wayavi 'inaya vonigo Keliso luaqiaqiea be nugweta visiqa nalobedi ta 'abiboda nalugu 'abaga simasimalina 'inaya.”

<sup>27</sup> \* 'Inega Iesu ve'ale givesimatalia 'idia taunega weaqina Mosese be tovesimasi-manayavo edi bukiavo 'idiega, ta wese buki qabudi 'idiega givesimatalia tauna weaqina.

<sup>28</sup> Ta tuta goyona ina 'ifoqe 'abaga Emausa 'inaya, 'abo Iesu vonedi vonaya, “Omi'a otoatoa, ta ya'a yatautauya.”

<sup>29</sup> 'Abo taudi inoqiea ivonaya, “Gebu, ge una tauya, ba'idia kana 'eno, mana tawa velovanea.” 'Inega awafela ta lugu edi vanuea.

<sup>30</sup> Edi tuta 'ai 'inaya Iesu beledi 'ewei ta weaqina vona lukaiwa, e 'abiboda gitomwea 'abo neidi. <sup>31</sup> Omo'e 'inaya nuadi 'eqa'uya ta Iesu i'inanea, tuata 'idiega 'waiva. <sup>32</sup> 'Inega magilafudi taudimo ivonaya, “Vonahaqiaqi, tutana 'edaya kamaimai ta Buki Nugwenugweina giyavuyavua weaqida e 'inega ada lutonova vedumaduma wawasai kavonaya 'aiwe giwalidaya dasaesaela.”

<sup>33</sup> 'Inega itovolo kwayavona ta i'evivi itauya Ielusalema 'inaya ta ediavo adi yau leveni ilobedi ta wese to'abiboda vaina maega. <sup>34</sup> \* Ta leveni dina ivonedi ivonaya, “Vonahaqiaqi, Kaiwabu Iesu 'aligega ni'a ya'itoto 'evivi, ta wese taunega ve'ifoqeyea Saimoni matanaya.”

<sup>35</sup> 'Inega wese magilafudi ive'ale isimanea tola'ai 'edaya 'idia 'ifoqe, ta wese ma'oda Iesu beledi gitomwei be 'inega i'inanea weaqina ivelulu'uyayea.

*Iesu 'ifoqe ana to'abibodayavo 'idia*

*(Madiu 28:16-20; Maki 16:14-18; Ioni 20:19-23; Viaqa 1:6-8)*

<sup>36</sup> Nawale ediavo 'idia ivevelulu'uya 'inega Iesu 'ifoqe nuanidia tovolu ta vonedia, “Ge ona mwaniniva ta toadaumwala yaneineimi!”

<sup>37</sup> \* Ta qabudi imwaniniva gegoyo ta ivonaya be otala taha da'ifoqe. <sup>38</sup> Ta Iesu vonedia, “Tola'ai weaqina ovenuana magilafu ta wese giwalimi a'ala? <sup>39</sup> Nimagu be 'aqegu ona 'itedi, ya'a ba'e taugu. Ta wese ona gitonovigu mana otala vei'o geqana ta wese lulu geqana, ta ge 'edewani ona 'ita lobei ya'a 'iguya, mana ya'a ma 'wafigu yatoatoa.”

<sup>40</sup> Iesu ena vona ba'e lu'ovoia, 'inega nimana be 'aqena ve'itedi. <sup>41</sup> 'Inega iqaiawa qiduana ta wese nawale me edi venuana magilafu, 'inega Iesu vetala'aiedi vonaya, “Evisa 'abwaga 'eno'eno oda neigu eda 'ai?” <sup>42</sup> 'Abo taha 'iqana meomeona i'ewei ineia. <sup>43</sup> 'Inega 'ewei ta matadia 'ainia.

<sup>44</sup> \* 'Inega vonedi vonaya, “Lova omi'a maega katoatoa ta yavonemi yani qabuna i'wayavia weaqigu Mosese ena luvine 'inaya be tovesimasimana edi bukiavo 'idia ta wese buki Same 'inaya na'ifoqe. E 'inega ba'e 'itaga edi 'wayaviavo ana alamani aqiaqi ni'a 'ifoqe.”

<sup>45</sup> 'Inega Iesu nuadi giqa'uya 'abo Yaubada ena vona qabuna Buki Nugwenugweina gamonaya ialamani aqiaqiedi. <sup>46</sup> 'Inega vonedia, “Ba'e 'edewani i'wayavia ivonaya, 'Keliso visiqa be 'aliga nalobedi, ta 'aubena vetoina 'inaya 'aligega naya'itoto 'evivi, <sup>47</sup> 'inega ana wawega ina ve'ale Vale Aqiaqina ina lugaihiea Ielusalema 'inega be di'we qabudi bwa'obwa'oya 'idia, be tomeqabu ina nuagivila e Yaubada edi luveifana

\* 24:24: Ion 20:3-10 \* 24:26: Lk 9:22 \* 24:27: Same 22:1-21; Ais 53 \* 24:34: 1Kol 15:4-5 \* 24:37: Md 14:26 \* 24:44: Lk 9:22

nanuataqodi.’ <sup>48</sup>\* Ta omi’a ba’e yani diavona ni’a o’itedi, ’inega ona simana ’ifoqeyedi tomotau qabudi ’idia. <sup>49</sup>\* Ta yavonemi, ya’a nawale mahalega Niboana Gwalagwalana ena vetunei ’imia, lova Tamagu ena vona fofofola ’idewani. Ta omi’a Ielusalema ’inaya ona ba’eba’e ana laba Yaubada ’inega waiwai ona ’ewa nugwetea.”

*Iesu vaneqa mahalaya*

*(Maki 16:19-20; Viaqa 1:9-11)*

<sup>50</sup> Iesu ena vona ba’e lu’ovoia ’inega ’ebe’ewedi maega itauya Bedani ’inaya. ’Inega ni-mana silagaia ta vona veyolubedi. <sup>51</sup> Ta nawale vonavona veyolubedi ’inega ve’ale vaneqa ta Yaubada ’ebe’ewei vaneyea mahalaya. <sup>52</sup> ’Inega Iesu ana to’abibodayavo ihiwa’odu ’inaya ta iawahawatuboya, ta ’abiboda me edi qaiawa i’evivi itauya Ielusalema ’inaya. <sup>53</sup> Ta tuta qabuna Vanue Gwalagwalana ’inaya itoatoa ta Yaubada iawahawatuboya.

---

\* 24:48: Ion 15:27; Via 1:8      \* 24:49: Ion 14:16; 15:26; Via 1:4

## Ioni

### *Buki ana alamani weaqina*

Ioni ena buki ba'e 'wayavia be yaqisa ana toavoyavo Iesu Valena Aqiaqina ina vetumaqanea vonigo tauna Yaubada Natuna ta To'etoyavua vonavona fofofolina. Ta edi vetumaqana tauna 'inaya 'inega yawai vataya ina lobe. (20:31)

Ba'e buki nana ge wese Madiu be, Maki be Luke edi 'wayaviavo 'idewani, mana Iesu ena vona taunega weaqina Ioni simana 'ifoqeyedi, 'idewani Iesu tauna Vona mayawaina be, beledi mayawaina be, go'ila mayawaina be, sifi adi To'itamaki be wese simatala aqiaqi. Ta wese Iesu ena lugaihi be, ena ve'ita be, ena viaqa waiwai be, ena 'aliga be, ena ya'itoto 'evivi weaqina 'waya'wayavidi i'eno'eno buki nana gamonaya.

Vonahaqiaqi, Ioni tauna Iesu ana to'abiboda, ta ena 'wayavi 'inaya ge taha tuta taunega ana wawa da'inanea, ta 'esi vona sesebaiega taunega weaqina simana, 'idewani "To'abiboda nana Iesu veyoluba aqiaqiea", nage "Fita ma iana", be wese vaina vona 'idiega.

### *Buki gamona*

1:1-18 Iesu tauna Vona 'eno'eno vatayana mai bwa'obwa'oya tomotau edi simatala

1:19-51 Ioni Togivebabitaiso ta wese Iesu ana to'abiboda weaqidi

2:1-12:50 Iesu ena viaqayavo be wese ena vonayavo tomotau nuanidia

13:1-19:42 Iesu ena tuta 'ebeluvoo Ielusalema 'inaya ta wese 'abaganavo 'idia

20:1-21:25 Kaiwabu Iesu ena ya'itoto 'evivi 'aligege be wese ena 'ifoqe tomotau 'idia

### *Vona vetomotau bwa'obwa'oya*

<sup>1</sup> \* Tuta ana 'ebeve'ale 'inaya Vona ni'a toatoa, ta Vona nana Yaubada maega, ta Vona nana tauna Yaubada. <sup>2</sup> Ta tauna tuta ana 'ebeve'ale 'inaya Yaubada maega itoatoa.

<sup>3</sup> \* Kuyavata qabudi i'ifoqe tauna 'inega. Ge taha yani da'ifoqe kavovo, ta 'esi tauna 'inega yani qabuna i'ifoqe. <sup>4</sup> \* Tauna 'inega yani qabuna mayawaidi i'ifoqe, ta yawai nana tomotau qabudi bwa'obwa'oya edi simatala. <sup>5</sup> \* Ba'e simatala nana guguesimatala velovana gamonega, ta velovana nana ge ana fata be simatala nana nagive'weuni.

<sup>6</sup> \* Taha 'oloto 'ifoqe ana wawa Ioni, tauna Yaubada vetunei mai <sup>7</sup> tomotau 'idia sabi simana simatala nana weaqina be yaqisa simatala nana valena ina noqoli ta ina vetumaqanea. <sup>8</sup> Ta ba'e Ioni nana tauna gebu simatala nana, ta 'esi tauna simatala nana ana tovesimasimana. <sup>9</sup> \* Ta ba'e simatala nana aqiaqi otaqina mai bwa'obwa'oya, ta tauna totoa bwa'obwa'o qabudi edi simatala. <sup>10</sup> Ta Vona nana ni'au mai bwa'obwa'oya toatoa, ta tauna bwa'obwa'o ana Toviaqa, ta totoa bwa'obwa'o qabudi ge ida 'ita 'inanei. <sup>11</sup> Ta tuta nana mai ena 'abaga otaqaya, 'inega 'abaga nana ana totoayavo ge ida 'awahaqiaqiea, ta wese tauna ena tomotauyavo inogea.

<sup>12</sup> Ta tomeqabu ivetumaqanea ta i'awahaqiaqiea, e taudina awafeledi adi luaqiaqi be taudiega Yaubada ina 'awa-Tamana. <sup>13</sup> \* 'Inega ba'e tomotau diavona kavona ida vi'oi 'evivi. Ta ba'e vi'oi nana gebu vivine edi uweta 'idewani, nage 'oloto ma moqanena edi nuanua 'inega, ta 'esi vi'oi nana Yaubada 'inega. <sup>14</sup> \* Ta Vona nana vetomotau ta toatoa nuanidaya bwa'obawa'o ba'e debanaya. Ta tauna veyoluba be wese vonahaqiaqi 'avana, ta wese ena aqiaqi otaqa ni'a a'itea, ta ba'e aqiaqi nana 'ewea Tamana Yaubada 'inega, mana tauna ana 'aidega otaqa Yaubada Natuna.

<sup>15</sup> Ta Ioni Togivebabitaiso tomotau 'idia Yaubada Natuna weaqina bonana qiduanega vonedia, "Ba'e 'oloto nana weaqina lova yavonemi yavonaya, 'Tauna 'abibodaguyega maimai veqidua va'inegu, mana 'abiboda be ena vi'oi, ta tauna ni'a toatoa.'" <sup>16</sup> Tauna

\* 1:1: Ion 17:5; 1Ion 1:1-2; Ve 19:13      \* 1:3: 1Kol 8:6; Kol 1:16-17; Ibe 1:2      \* 1:4: Ion 5:26      \* 1:5: Ion 3:19  
\* 1:6: Md 3:1; Lk 1:13-17,76      \* 1:9: Ion 8:12      \* 1:13: Ion 3:3-6; 1Fit 1:23      \* 1:14: Fil 2:7

luluveagatuna'ina veyoluba 'inega, e 'inega ena veyoluba qiduana weaqida ge taha tuta kada 'ita 'avea. <sup>17</sup>\* Yaubada ena luvine neida Mosese 'inega, ta Iesu Keliso 'inega ena veyoluba be wese ilivu tunutunuqina ana 'eda neida. <sup>18</sup>\* Ge taha toga Yaubada da'itei, ta 'esi Natu Otaqina Keliso tauna wese Yaubada, ta di'wenaya toatoa, 'inega Keliso nana taunega Tamana ni'a ve'itayea 'idaya.

*Ioni Togivebabitaiso simasimana Iesu weaqina  
(Madiu 3:1-12; Maki 1:1-8; Luke 3:1-18)*

<sup>19</sup> Me Diu edi tovanugwetayavo itoatoa Ielusalema 'inaya vaidi tovegubayavo be wese vaidi Libai ena gadeyega ivetunedi itauya Ioni 'inaya sabi vetala'aina 'eguma tauna To'etoyavua.

<sup>20</sup> 'Inega Ioni me ena giwalifatu simana 'ifoqe vonedia, "Ya'a gebu To'etoyavua."

<sup>21</sup>\* 'Inega wese ivetala'aiea ivonaya, "Isana o'a togama? Nage o'a llaitia?"

Ta vona ve'iedi vonaya, "Gebu!"

'Inega wese ivoneaya, "Nage o'a tovesimasimana nana?"

Ta wese vegeqedi vonaya, "Gebu!"

<sup>22</sup> "Isana o'a toga? Ve'ia una neima be yaqisa ama fata ama tovetune ana vonedi weaqiu. 'Inega tau'uyega una vonema o'a togama!"

<sup>23</sup>\* Ta Ioni edi vetala'ai ve'iea Aisea ena vona 'inega vonaya, "Ya'a bonagu qiduanega yagabagaba di'we 'ava'ava 'inaya ta yavonavonaya, 'Kaiwabu ena 'eda ona givetunuqia!'"

<sup>24-25</sup> Ta wese vaidi Falisiavo vetuvetunedi imai Ioni 'inaya ta taudi wese ivetala'aiea, ivonaya, "Eguma o'a ge To'etoyavua nana nage ge llaitia nana nage ge Tovesimasimana nana, 'inega tola'ai weaqina ugigivebabitaiso?"

<sup>26</sup> 'Inega Ioni vonedi vonaya, "Ya'a go'ilega tomotau yagigivebabitaisodi, ta taha 'oloto ge oda alamania nuanimia tovtovolo. <sup>27</sup>\* Omo'e 'oloto nana 'abibodaguyega maimai, ta ya'a ge daluaqiaqiege be ana 'aqeyafayafa ana wayo ena giyavui."

<sup>28</sup> Ba'e yani diavona 'ifoqe 'abaga Bedani 'inaya, ta Bedani nana kana lobege go'ila Iolidani mali di'wea. Ta omo'e 'inaya Ioni tomotau gigivebabitaisodi.

*Iesu tauna Yaubada ena Lami*

<sup>29</sup>\* Mahala vulihia 'inega Ioni Iesu 'itea 'iawanega maimai 'inaya, ta 'inega Ioni tomotau vonedi vonaya, "O'itei, omo'e 'oloto nana tauna Yaubada ena Lami, ta tauna totoa bwa'obwa'o edi luveifana 'ewa'ewa yavulea 'idiega. <sup>30</sup>\* Ba'e 'oloto nana weaqina ni'a yamaduvonemi yavonaya, 'Taha 'oloto 'abibodaguyega namai tauna veqidua va'inegu, mana 'abiboda be ena vi'oi, ta tauna ni'a toatoa.' <sup>31</sup> Lova tauna ge eda alamania, ta tua ya'a yamai ta go'ilega tomotau yagivebabitaisodi sabi ve'ita 'ifoqena omi'a me Isileli 'imia be yaqisa ona alamani aqiaqiea."

<sup>32</sup>\* 'Inega Ioni Iesu weaqina simana 'ifoqe vonaya, "Niboana Gwalagwalana ya'itea ana 'ita 'idewani malasi mahalega webui mai ta Iesu 'inaya toabui. <sup>33</sup> Lova ge eda alamania vonigo tauna Keliso. Ta tuta nana Yaubada vetunegu yamai go'ilega sabi givebabitaiso, 'inega taunega 'iguya simanayea vonaya, 'Nawale Niboanigu una 'itea nawebui mai taha 'oloto 'inaya natoabui, ta ba'e 'oloto nana Niboana Gwalagwalana 'inega tomotau nagivebabitaisodi.'" <sup>34</sup>\* Ta Ioni wese vonedia, "Ba'e yani diavona mata otaqiguyega ya'itedi, 'inega yasimasimana aqiaqi 'imia tauna vonahaqiaqi Yaubada Natuna."

*Iesu ana to'abiboda nugwenugweidi gabedi*

\* 1:17: 'Ifo 34:28; Lom 6:14 \* 1:18: 'Ifo 33:20; Ion 6:46; 1Tim 6:16 \* 1:21: Luve 18:15,18; Md 11:14 \* 1:23: Ais 40:3 \* 1:27: Ion 1:15 \* 1:29: Ais 53:6-7; 1Fit 1:18-19 \* 1:30: Ion 1:15 \* 1:32: Md 3:16 \* 1:34: Md 3:17

<sup>35</sup> Mahala vulihia 'inega Ioni Togivebabitaiso ma ana to'abiboda magilafudi ni'a i'evivi ta omo'e 'inaya itovotovolovolo. <sup>36</sup> 'Inega Iesu mai tautauya, ta tutana Ioni 'itea 'inega vonedia, "O'itei, omo'e taunana Yaubada ena Lami."

<sup>37</sup> Ta tuta nana magilafudina Ioni ena vona inoqolia 'inega Iesu i'abibodea. <sup>38</sup> 'Inega Iesu tunugivila ta 'itedi italatala'obe, 'abo vetala'aiedi vonaya, "Tola'ai nuanuami?"

Ta taudi ive'iea ivonaya, "Labai\*, ma'inaya utoatoa?" (Labai ana alamani Tove'ita).

<sup>39</sup> Ta Iesu vonedi vonaya, "Omai, ta ena ve'itemi."

'Inega lavilavi 'idewani 4 koloki itutuvila itauya ena 'ebetoa sabi 'itana. Ta Iesu maega itoatoa ana laba velovanea.

<sup>40</sup> \*Magilafudina 'idiega taha ana wawa Anidulu, tauna tawadega Ioni ena vona noqolia Iesu weaqina ta 'abibodea. Ta ba'e Anidulu nana tauna Saimoni Fita taina. <sup>41</sup> Ta ba'e Anidulu nana ge taha yani daviaqa nugwetei, ta 'esi lukwayavonega tauya tuana Saimoni sabi salina, ta tuta nana lobe 'inega voneaya, "Tuagu, ima'a Mesaia ni'a alobea." (Mesaia ana alamani Keliso). <sup>42</sup> \* 'Inega wese 'ebe'ewei ta miea Iesu 'inaya, ta omo'e 'inaya Iesu Saimoni 'itea, 'inega voneaya, "O'a Ioni natuna Saimoni, ta au wawa vauvauna ena gabeu Fita." (Fita ana givila Dabo.)

<sup>43</sup> Mahala vulihia 'inega Iesu nuanuana natauya Galili 'inaya. Ta tauya nana 'inaya Filifi maega iveloba, ta Iesu vonea vonaya, "U'abibodegu!" <sup>44</sup> Ta Filifi ena 'abaga Bedesaida, ta 'abaga nana wese Anidulu be Fita adi tuvada.

<sup>45</sup> \* 'Inega Filifi tauya Nataniela sabi salina ta lobe, 'inega voneaya, "Ni'a ualamaniamosese ena luvineavo gamodia taha 'oloto weaqina vonavona, ta wese tovesimasimana 'oloto nana weaqina isimasimana. Ta ima'a ba'e 'oloto nana ni'a alobea, tauna Nasaleta 'olotona, ta ana wawa Iesu, tauna Iosefa natuna."

<sup>46</sup> 'Inega Nataniela Filifi ve'iea vonaya, "Nage taha yani aqiaqina ana fata Nasaleta 'inega na'ifoqe?"

'Inega Filifi voneaya, "Umai, ta tau'uyega 'oloto nana una 'itea."

<sup>47</sup> Nawale imaimai, ta tuta nana Iesu Nataniela 'itea 'inega weaqina vonaya, "Oloto nana maimai tauna Isileli aqiaqi 'olotona, ta ge taha u'ava 'inaya da'eno'eno."

<sup>48</sup> 'Inega Nataniela Iesu vetala'aiea vonaya, "Ma'oda ualamaniamai'iqegu?"

'Inega Iesu ve'iea vonaya, "Abiboda be Filifi nagabeu, ta ya'a yamadu'iteu tuta nana 'ala'ai 'ayanaya utoatoa."

<sup>49</sup> \* 'Inega Nataniela Iesu 'inaya vona 'ifoqe, vonaya, "Tove'ita, o'a vonahaqiaqi Yaubada Natuna, ta wese me Isileli ema Kini."

<sup>50</sup> Ta Iesu vetala'aiea vonaya, "Nage uvetumaqanegu mana yavoneu ni'a ya'iteu 'ala'ai 'ayanaya utoatoa, waisa? Ta yavona aqiaqieu, nawale yani 'ebenuavoqana 'ena'ena'idi una 'itedi, ta 'abiboda ba'e yani nana." <sup>51</sup> \* Ta Iesu wese vonaya, "Yavona aqiaqi 'imia, nawale mahala 'egegena ona 'itea, ta wese Yaubada ena tovale'ewayavo ona 'itedi i'wato'watovu be iwebuwebui mai ya'a Tomotau Natuna 'iguya."

## 2

### Vaqi 'abwagana 'abaga Kena 'inaya

<sup>1</sup> 'Aubena magilafuna 'abibodanaya taha vaqi 'abwagana iviaviaqia 'abaga Kena 'inaya di'we Galili gamonaya, ta Iesu inana wese ilugu 'ai nana gamonaya. <sup>2</sup> Ta Iesu ma ana to'abibodayavo wese i'ebe'ewedi vaqi nana 'inaya. <sup>3</sup> Ta tomotau dina edi 'ai nuaninaya adi go'ila 'oine ni'a gumwala, 'inega Iesu inana ivoneaya, "Natugu, 'oine qabuna ni'a ilu'ovoia."

<sup>4</sup> \* 'Inega Iesu vonedia, "Inagu, ge ana fata ona luvinegu be tola'ai ena viaqi, mana egu viaqayavo adi tuta nawale ge dave'ale."

\* 1:38: Me Diu edi kaiwabayavo be edi toalamaniamo igabedi Labai "Rabbi" sabi 'amayabadi. \* 1:40: Md 4:18-20 \* 1:42: Md 16:18 \* 1:45: Luve 18:18; Ais 7:14; 9:6; Iel 23:5; Isi 34:23 \* 1:49: Md 14:33; 16:16; Mk 3:11 \* 1:51: Nug 28:12 \* 2:4: Ion 7:30; 8:20



<sup>5</sup> 'Inega Ieisu inana tofewa kavovo ivonedi ivonaya, "Tola'ai Ieisu navonayea 'imia, e 'edewani ona viaqia."

<sup>6</sup> Ta di'wedia 'ulena viaviaqidi daboyega go'ila weaqina adi yau sikisi itovotovolo, ta 'ulena taha taha 'inaya ana fata go'ila kavona anidedi (100) lita ina luveagatuna'ia. Ta ba'e 'ulena diavona me Diu ivefewedi edi ilivu adi givevunavunaqa weaqina. <sup>7-8</sup> 'Inega Ieisu tofewa kavovo dina vonedi vonaya, "Ulena qabudi go'ilega ona luveagatuna'idi!" Ta tuta nana 'awadi yayea 'inega wese vonedia, "Goyona ogoini ta vaqi nana ana tovanugweta oneia." Ta ena vona imatayagea.

<sup>9</sup> 'Inega tovanugweta nana numa tonovia ta go'ila nana ni'a ve'oine. Ta ge dahalamanian ma'inega 'ifoqe, ta 'esi tofewa kavovo dimo ialamania. 'Inega tovanugweta nana tovaqi me'olotona gabea mai 'inaya. <sup>10</sup> 'Inega voneaya, "Ita'a eda ilivu vonigo 'oine aqiaqina tomotau kana nei nugweted, ta 'abiboda tuta nana ni'a tufwana ikwava 'inega 'oine kavokavovo kana neidi. Ta o'a 'oine aqiaqi otaqina 'iuya 'eno'eno ana laba ba'itagana uve'ifoqeyea?"

<sup>11</sup> Ba'e viaqa nana 'inega Ieisu ena fewa 'ebenuavoqana nugwenugweina give'ifoqeyea 'abaga Kena 'inaya di'we Galili gamonaya. Ta ba'e 'inega ena waiwai ve'itayea tomotau 'idia, ta ana to'abibodayavo ivetumaqanea. <sup>12</sup> \* Ta ba'e vaqi nana 'abibodanaya Ieisu ma inana ta ma tainavo ta wese ana to'abibodayavo maega itauya 'abaga Kafaneumi 'inaya. Ta 'aubena ge dave'eala 'idia omo'e 'inaya itoatoa.

*Ieisu tovegimwane* 'wavinidi Vanue Gwalagwalana 'inega  
(*Madiu 21:12-13; Maki 11:15-17; Luke 19:45-46*)

<sup>13</sup> \* Me Diu edi 'aubena 'Auvivia Sagalina weaqina ni'a vadi'wedi'wea. 'Inega Ieisu 'watovu Ielusalema 'inaya. <sup>14</sup> 'Inega Vanue Gwalagwalana gamonaya lugu ta tovegimwane 'itedi taudi bulumakau be, sifi be malasi ivevegimwaneyedi. Ta wese mane ana tovesenisi itoatoa. <sup>15</sup> 'Inega Ieisu taunega 'ebevunuqa wayoyega metea, ta tomotau be yubai Vanue Gwalagwalana 'inega 'wavinidi, ta wese tovesenisi edi mane ana 'ebea'u 'elubuinidi ta edi mane vetueyavulea. <sup>16</sup> Ta malasi ana tovegimwane lugwaeyedi vonaya, "Emi manuyavo qabudi ona 'ewa 'ifoqeyedi, ta Tamagu ena vanue ge ona vefewei kavona emi 'ebevegimwane 'idewani."

<sup>17</sup> \* Ta ana to'abibodayavo taha vona Buki Nugwenugweina gamonaya inuave'avinia vonaya, "Yaubada ye, eu vanue aqiaqi otaqina ba'e nuagu 'ewea, ta kavona 'aiwe da'ala'alata giwaliguya tuta nana yanuanua weaqina."

<sup>18</sup> 'Inega me Diu adi tovanugwetayavo imai ta Ieisu ivetala'aiea ivonaya, "Togama eu luvine be eu waiwai neiu be 'inega ba'e 'idewani au fata una viaqa 'aiqa? Ta nuanuama taha yani 'ebenuavoqana una viaqia be yaqisa tau'u una ve'ita 'ifoqeyeu o'a vonahaqiaqi Yaubada 'inega eu luvine ni'a u'ewea."

<sup>19</sup> \* Ta Ieisu ve'iedi vonaya, "Eguma omi'a Vanue Gwalagwalana ba'ena ona qeu yavulea, e 'inega ya'a 'aubena toi 'idia ena yoqona 'eviviea." <sup>20</sup> 'Inega bonadi qiduanega ive'iea ivonaya, "Ma'oda o'a? Nage ge uda alamania ba'e vanue nana ya'wala 46 gamonaya iyoqona 'ovoia! Ta o'a uvonaya vonigo 'aubena toi namo 'inaya una yoqona 'eviviea."

<sup>21</sup> \* Ta ba'e vona diavona 'idiega Ieisu ge davonavona Vanue Gwalagwala otaqina weaqina, ta 'esi vona sesebai 'wafina weaqina vonavona. <sup>22</sup> \* Ta Ieisu ena ya'itoto 'evivi 'aligega ana tuta 'inaya ana to'abibodayavo ena vona ba'e Vanue Gwalagwalana weaqina inuave'avinia ta nuadi 'eqa'uya. E 'inega ena simana qabudi ta wese Yaubada ena vona Buki Nugwenugweina 'inaya ivetumaqana aqiaqiedi.

<sup>23</sup> \* Ta tutana Ieisu nawale toatoa Ielusalema 'inaya 'Auvivia Sagalina weaqina, e 'inega tomotau qabudi ena viaqa 'ebenuavoqana i'itedi, 'inega ivetumaqanea vonigo

\* 2:12: Md 4:13 \* 2:13: 'lfo 12:1-27 \* 2:17: Same 69:9 \* 2:19: Md 26:61; 27:40 \* 2:21: 1Kol 6:19  
\* 2:22: Lk 24:6-8; Ion 12:16 \* 2:23: Ion 7:31

tauna Keliso To'etoyavua. <sup>24-25</sup> Ta Iesu ge davetumaqanedi, mana qabudi edi nuanua ni'au alamania. 'Inega ge taha toga daluaqiaqiei be nasimana Iesu 'inaya tomotau edi nuanuayavo giwalidia weaqina, mana tauna tomotau edi ilivu ni'a madualamania.

### 3

#### *Nekodimo Iesu lobe*

<sup>1-2</sup>\* Velovelovana taha 'inaya taha 'oloto ana wawa Nekodimo tauya Iesu 'inaya sabi veqae. Tauna Falisi edi qabu 'inega, ta wese me Diu edi toluvine taha. Mai Iesu 'inaya 'inega vonaya, "Kaiwabu, ahalamania o'a Tove'ita Yaubada 'inega, mana ge taha toga ana fata be viaqa waiwaidi naviaqidi 'idewana o'a 'eguma ge Yaubada maega."

<sup>3</sup>\* 'Inega Iesu ve'iea vonaya, "Yavona aqiaqieu, 'eguma ge una vi'oi 'evivi 'inega ge wese Yaubada ena 'Ebeluvine una 'itei."

<sup>4</sup> Ta Nekodimo Iesu vetala'aiea vonaya, "Ma'oda ya'a 'oloto agogu ta vonigo ena vi'oi 'evivi? Vonahaqiaqi, ge wese ana fata be inagu gamodia ena lugu ta ina venatuna 'eviviegu."

<sup>5</sup>\* Ta Iesu vona 'eviviea vonaya, "Yavona aqiaqi 'iuya, ge taha toga ana fata nalugu Yaubada ena 'Ebeluvine gamonaya 'eguma tomotau nana ge namaduvi'oi go'ila ta wese Niboana Gwalagwalana 'idiega. <sup>6</sup>\* Tomotau ivi'oi tomotau 'inega, ta 'esi niboanida ena vi'oi 'evivi Yaubada Niboanina 'inega. <sup>7</sup>'Inega ge una nuavoqana egu vona weaqina, mana ni'a yavoneu au luaqiaqi be una vi'oi 'evivi. <sup>8</sup> Yaubada Niboanina kavona yaqina ena toa, mana taunega luviluvinea. Yaqina nununuqa ada fata be kana noqolia, ta ge taha toga ana fata be nasimana aqiaqi to'edega maimai nage ma'inaya tautauya. E 'inega wese 'idewani ge taha toga ana fata nagivesimalatia ma'oda tomotau ivi'oi 'evivi 'aiqa Niboana 'inega."

<sup>9</sup>'Inega Nekodimo Iesu vetala'aiea vonaya, "Eu vona ba'e ma'oda ana alamani?"

<sup>10</sup> Ta Iesu vonaya, "O'a me Isileli edi tove'ita, ta egu vona ba'e weaqina nawale ge nuau da'eqa'ui. <sup>11</sup> Yavona aqiaqi 'iuya, yani diavona ni'a a'itedi ta ahalamanidi, 'inega asimasimandedi 'imia, ta ema vonayavo ge oda vetumaqanedi. <sup>12</sup> 'Eguma vaina yani i'ifo'ifoqe bwa'obwa'oya ta weaqidi yasimasimana 'imia 'inega ge oda vetumaqanedi, 'inega ma'oda ona vetumaqana 'aiqa 'eguma vaina yani i'ifo'ifoqe mahalaya weaqidi ena ve'ita 'imia? <sup>13</sup> Mana ge taha toga mahalaya davaneqa, ta 'esi ya'a Tomotau Natuna taugumo mahalega yawebui mai.

<sup>14</sup>\* "Tuta lova 'inaya di'we 'ava'avaya Mosese taha mwata silagaia, ta wese 'idewani ya'a Tomotau Natuna ina silagaigu, <sup>15</sup>\* be yaqisa tomeqabu ivetumaqanegu yawaidi vataya ina lobe. <sup>16</sup>\* Mana Yaubada tomotau qabudi bwa'obwa'oya veyoluba va'inedi, 'inega Natuna 'aidega otaqina awafelea be yaqisa tomeqabu ivetumaqanea gebu ina 'aliga, ta 'esi yawai vataya ina lobe. <sup>17</sup>\* Mana Yaubada Natuna ge davetunei bwa'obwa'o ana totoayavo sabi luvinedi, ta 'esi vetunei mai totoa bwa'obwa'o sabi 'etoyavuidi.

<sup>18</sup>\* "Ta tomeqabu Yaubada Natuna ivetumaqanea ge wese luvine ina lobei, ta 'esi tomeqabu ge ida vetumaqanea ni'a ilugu luvine 'inaya, mana taudi ge ida vetumaqana Yaubada Natuna ana 'aidega otaqa 'inaya. <sup>19</sup>\* Ba'e luvine nana 'iuna, mana simatala mahalega ni'a mai bwa'obwa'oya, ta tomotau simatala nana ge nuadi da'ewea, ta 'esi nuanuadi qiduana velovelovana, mana edi ilivu luveifa otaqina. <sup>20</sup>'Inega tomeqabu ilivu luveifana iviaviaqia taudi simatala ivevoalanea. Taudi ge nuanuadi ina toa simatala 'inaya, mana imwaniniva simatala nana edi ilivu luveifana nave'ita 'ifoqeyea. <sup>21</sup> Ta tomeqabu ilivu tunutunuqina iviaviaqia imaimai simatala nana 'inaya, be yaqisa tomotau qabudi edi ilivu ina 'ita aqiaqiea ta ina alamania taudi Yaubada ena nuanua 'inega ilivu diavona iviaviaqidi."

\* 3:1-2: Ion 7:50; 19:39 \* 3:3: Md 18:3; 1Fit 1:23 \* 3:5: Isi 36:25-27 \* 3:6: Ion 1:13 \* 3:14: Naba 21:9; Ion 8:28; 12:32-34 \* 3:15: Ion 20:31 \* 3:16: Ion 3:36; 10:28; Lom 5:8; 8:32; 1Ion 4:9-10 \* 3:17: Lk 19:10 \* 3:18: Ion 5:24 \* 3:19: Ion 1:5,9; 8:12

*Ioni Togivebabitaiso ena simana Ieisu weaqina*

<sup>22</sup> \* Ta ba'e yani diavona 'abibodanaya Ieisu ana to'abibodayavo maega Ielusalema inogea ta itauya di'we agona Iudia 'inaya. Ta omode itoatoa vaina 'aubena 'idia, ta tomotau givebabitaisodi. <sup>23</sup> Ta wese Ioni tomotau givebabitaisodi Ainoni 'inaya Selimi di'wenaya, mana omo'e 'inaya go'ila agona. 'Inega tomotau qabudi imaimai 'inaya sabi babitaiso. <sup>24</sup> 'Abiboda be Ioni ina a'uluguyea vanue 'ebeyoqona 'inaya, ta nugweta ba'e yani nana viaqia.

<sup>25</sup> Ta omo'e tuta nana 'inaya taha Diu 'olotona Ioni ana to'abibodayavo maega ive'ae'aetoga tomotau edi ilivu vevunavunaqa go'ilega weaqina. <sup>26</sup> 'Inega Ioni ana to'abibodayavo itauya 'inaya, ta ivoneaya, "Tove'ita, una nuaia, lova Iolidani mali di'wenaya taha 'oloto maega oveloba, ta 'imaya usimana 'ifoqe 'oloto nana weaqina. E tauna ba'itagana tomotau gigivebabitaisodi, ta tomotau 'eala itautauya 'inaya sabi babitaiso."

<sup>27</sup> Ta Ioni vonedi vonaya, "Yaubada ena venua'ivina 'inega tomotau 'aidega 'aidega edi fewa neidi. <sup>28</sup> \* Ta omi'a ni'a oalamaniana lova yamaduvonemi ya'a gebu Keliso nana. Ta wese ni'a oalamaniana ya'a Yaubada vetune nugwetegu Keliso nana ena mai sabi 'iva'ava'aina. E 'inega tola'ai ni'a onoqolia 'iguyega ami fata ona simana 'ifoqeyea tomotau 'idia. <sup>29</sup> Gabuinoqa mevavinena natauya gabuinoqa me'olotona 'inaya sabi vaqi. Ta gabuinoqa me'olotona iana tovtovolo di'wenaya ba'eba'e ta vivineneqa, ta tuta nana bonana nanoqolia, e 'inega naqaiawa qiduana. Ta wese ya'a 'idewana yaqaiqaiawa qiduana, mana ba'itagana Ieisu ena viaqia valena ni'a yanoqolia. <sup>30</sup> 'Inega tauna ana wawa nave'ena'i, ta ya'a agu wawa navegoyo."

*Tauna mahalega mai Yaubada ena vona simasimanea*

<sup>31</sup> \* Ta wese Ioni vonaya, "Tauna debanega maimai tomotau qabudi veqidua va'inedi. Ta togama bwa'obwa'oyega 'ifoqe e tauna wese bwa'obwa'o tomotauna, ta bwa'obwa'o ana nuanuayavo weaqidi vonavona. Ta tauna mahalega webui mai tomotau qabudi adi toludebana, <sup>32</sup> \* ta tola'ai ni'au 'itedi ta noqolidi weaqidi simasimana 'ifoqe, ta ge taha toga vona nana davetumaqanea. <sup>33</sup> Ta tomeqabu ena simana ivetumaqanea, e taudina Yaubada i'awahaqiaqiea vonigo tauna ma ana vetumaqana. <sup>34</sup> Mana Ieisu mai Yaubada ena luvetune 'inega, ta ena vona simasimanea, mana Yaubada Niboanina 'inega ni'a luveagatuna'i aqiaqiea. <sup>35</sup> \* Yaubada Natuna veyolubea, 'inega ena luvine be ena waiwai neia be yaqisa yani qabuna 'ayanaya ina toatoa. <sup>36</sup> \* 'Inega tomeqabu tauna ivetumaqanea yawai vataya ina lobe. Ta tomeqabu inogenogea ge wese yawai vataya ina lobei. Ta 'esi Yaubada ana diavilavila 'idia ge nahawala."

4

*Ieisu ta vavine Samelia edi velobaloba*

<sup>1</sup> \* Taudi Falisi inoqolia Ieisu tomotau qabudi givebabitaisodi 'inega ana to'abibodayavo iveve'eala wawasai, ta Ioni ana to'abibodayavo ge ida ve'eala. <sup>2</sup> Ta Ieisu taunega ge taha toga dagivebabitaisoi, ta 'esi ana to'abibodayavo babitaiso nana iviaqia. <sup>3</sup> Ta tuta nana Ieisu ni'a alamaniana tola'ai tomotau ivonavona weaqina, e 'inega Iudia nogei ta 'evivi tauya Galili weaqina.

<sup>4</sup> Ta 'evivi nana 'inaya di'we Samelia 'abaganavo nuanidiega tauya, <sup>5</sup> \* 'inega 'ifoqe taha 'abaga ana wawa Saika 'inaya. Ta omo'e 'inaya lova Iakobo taha bwa'obwa'o natuna Iosefa neia, ta Saika nana ge luluvai bwa'obwa'o nana 'inega. <sup>6</sup> Ta wese di'we nana 'inaya Iakobo ena salufa 'eno'eno. Ta Ieisu baba'auya 'ifoqe di'we nana 'inaya, ta ni'au lu'wata'wata 'inega toabui sabi veyawai. <sup>7-8</sup> Omo'e tuta nana 'inaya ana to'abibodayavo ni'au itauya 'abaga agona 'inaya adi 'abwaga sabi gimwane, 'inega ana 'aidega toatoa. Ge tuta kuena

\* 3:22: Ion 4:1-2 \* 3:28: Ion 1:20; Md 11:10 \* 3:31: Ion 8:23 \* 3:32: Ion 3:11 \* 3:35: Md 11:27; Ion 5:20  
\* 3:36: Ion 3:16-18; 1Ion 5:12 \* 4:1: Ion 3:22 \* 4:5: Nug 33:19; Ios 24:32

'abibodanaya taha Samelia vavine nana venoqiea vonaya, "Go'ila uneigu eda numal!"

<sup>9</sup>\* 'Inega vavine nana Iesu ve'iea vonaya, "O'a Diu 'olotou ta ya'a Samelia vavinegu, 'inega tola'ai weaqina unoqinoqiegu be go'ila ena neiu sabi numa?" (Ba'e 'idewani vona 'aiqa, mana me Diu be me Samelia ge ida veiaiana.)

<sup>10</sup>\* 'Inega Iesu vona ve'iea vonaya, "Eguma o'a uda alamania tola'ai Yaubada nuanuana naneiu, ta wese 'eguma uda alamania togama vevenoqiegu go'ila weaqina, e 'inega o'a tauna uda venoqiea be go'ila mayawaina daneiu."

<sup>11</sup>'Inega vavine nana vonaya, "Kaiwabu, o'a ge eu 'ebegoimo, ta salufa nana webui wawasai, 'inega ma'oda go'ila mayawaina una 'ewa 'aiqi? <sup>12</sup>\* Nage o'a uvonavona vonigo tubuda Iakobo uveqidua va'inea, waisa? Vonahaqiaqi, Iakobo salufa nana neima, ta wese taunega ma natunavo salufa nana 'inega inuma, ta wese edi yubaiavo go'ila nana edi 'ebenuma."

<sup>13</sup>Ta Iesu voneaya, "Eguma taha toga ba'e go'ila nana 'inega nanuma magana naluayahaya 'evivi. <sup>14</sup>\* Ta togama go'ila 'iguyega nanumea ge wese magana naluayahaya 'evivi. Vonahaqiaqi, go'ila nana ena neia tauna giwalinaya navesalufa ta navu'uvu'ula yawai vataya weaqina."

<sup>15</sup>'Inega vavine nana Iesu 'inaya vonaya, "Kaiwabu, go'ila nana uda neigu, be yaqisa magagu ge naluayahaya 'evivi, 'inega ge wese ena 'evivi mai ba'e salufa nana 'inaya go'ila sabi goi."

<sup>16</sup>Ta Iesu voneaya, "Utauaya moqaneu una vonei ta maega ona 'evivi mai."

<sup>17</sup>'Inega vavine nana Iesu vonea vonaya, "Ya'a ge moqanegumo."

Ta Iesu wese voneaya, "Eu vona bena'e vonahaqiaqi, o'a ge moqaneumo, <sup>18</sup>mana o'a 'oloto adi yau faibi maega omaduvaqi, ta ba'itagana 'oloto nana maega otoatoa tauna ge moqane otaqiu. 'Inega tola'ai ni'au uvonayea vonahaqiaqi."

<sup>19</sup>Ta vavine nana Iesu ena vona ve'iea vonaya, "Kaiwabu, nuagu ni'a 'eqa'uya o'a vonahaqiaqi taha tovesimasimana. <sup>20</sup>\* 'Inega una givesimatalia 'iguya, tola'ai weaqina omi'a me Diu ovonaya vonigo Ielusalema namo 'inaya tomotau qabuda Yaubada kana iwa'odu 'inaya, mana ima'a me Samelia tubumavo edi 'ebeiwa'odu ba'e bwanaga nana debanaya?"

<sup>21-24</sup>\* Ta Iesu vona 'eviviea vonaya, "Vavine, egu vona ba'e una vetumaqanea. Nawale tuta maimai 'inaya ge taha yani qiduana 'eguma tomotau ina iwa'odu Samelia bwanagana ba'e 'inaya, nage Ielusalema 'inaya. Tuta maimai 'inaya toiwa'odu aqiaqi Tamada 'inaya ina iwa'odu niboanidiega ta vonahaqiaqi 'inega. Ta tuta nana ni'a 'ifoqe mai. Yaubada tauna Niboana, 'inega salisali togama ba'e 'idewani naiwa'odu 'aiqa 'inaya. 'Inega tomeqabu ihiwaiwa'odu 'inaya, luaqiaqiedi be niboanidiega ta wese vonahaqiaqi 'inega ina iwa'odu.

"Ta omi'a me Samelia ge oda alamani aqiaqiea togama 'inaya oiwaiwa'odu, ta 'esi ima'a me Diu ni'a ahalamani aqiaqiea togama 'inaya aiwaiwa'odu, mana ima'a me Diu 'imega 'etoyavua 'ifo'ifoqe."

<sup>25</sup>\* Ta vavine nana Iesu voneaya, "Ni'au yahalamania nawale To'etoyavua namai tauna igabea Keliso, ta tuta nana namai 'inega tauna yani qabuna weaqidi nagivesimatalia 'idaya."

<sup>26</sup>\* 'Inega Iesu voneaya, "Ya'a ba'e tauguna To'etoyavua nana yavonavona 'iuya."

<sup>27</sup>Tuta omo'e 'inaya Iesu ana to'abibodayavo i'evivi imai ta edi Kaiwabu i'itea taha vavine maega iveveqae. 'Inega nuadi voqana, ta ge taha toga 'idiega davetala'aiei tola'ai ena nuanua, nage tola'ai weaqina vavine nana maega iveveqae. <sup>28</sup>Ta vavine nana ena 'ebego nogeta 'evivi tauya 'abagaya, ta tomotau vonedia, <sup>29</sup>"Omai, taha 'oloto ona 'itea,

\* 4:9: Esa 4:1-5 \* 4:10: Ion 7:37-38; Ve 21:6 \* 4:12: Ion 8:53 \* 4:14: Ion 6:35 \* 4:20: Luve 12:5-14; Same 122:1-5 \* 4:21-24: 2Kin 17:29-41; Ais 2:3; Lom 9:4-5; 2Kol 3:17; Lom 12:1; Fil 3:3 \* 4:25: Ion 1:41 \* 4:26: Mk 14:61-62

tauna yani qabudi ni'au yaviaqidi alamani aqiaqiedi ta simana 'ifoqeyedi 'iguya. Ta ana 'ita kavona tauna To'etoyavua nana.”<sup>30</sup> 'Inega tomotau edi 'abagega i'ifoqe ta itauya Ieisu sabi 'itana.

<sup>31</sup> Nawale tomotau imaimai ta Ieisu ana to'abibodayavo i'alakeikeiea ivonaya, “Kaiwabu, 'abwaga ba'e una 'ai!”

<sup>32</sup> Ta edi vona ve'evivia vonaya, “Agu 'abwaga 'eno'eno ena 'ainia, ta omi'a 'abwaga nana ge oda alamania.”

<sup>33</sup> 'Inega to'abiboda dina nuadi voqana ta taudiege ivonaya, “Ma'oda, nage taha toga ana 'abwaga ni'a miea?”

<sup>34</sup> \* 'Inega Ieisu vonedia, “Egu vona agu 'abwaga weaqina ana alamani ba'e: Agu Tovetune ena nuanua ena viaqia, be wese ena fewa ena lu'ovoia. <sup>35</sup> \* Ta ge ona vonaya, 'Ana 'ita wai'ena adi yau foa ina gumwala ta 'inega bolimana ana tuta.' Ta yavona aqiaqiemu, o'ita vane be 'abwaga vaoqaya ona 'itedi ni'a fa'alidi, 'inega luaqiaqiea be ona bolimana. <sup>36</sup> Tomeqabu ibolimana adi ve'ia ina lobe. Ta ba'e bolimana nana vaoqina ge 'abwaga, ta 'esi tomotau edi toa vataya weaqina. 'Inega vaoqa nana ana todauna be wese ana tobolimana qabudi 'aideganaya ina qaiawa. <sup>37</sup> Kuluwadawada ni'a oalamaniana vonaya, 'Taha 'oloto todauna, ta taha 'oloto tobolimana.' 'Inega ba'e vona nana vonahaqiaqi! <sup>38</sup> Ya'a yavetunemi sabi bolimana taha vaoqa 'inaya, ta omi'a taumiege ge oda dauni, ta 'esi mali tomotau vaoqa nana ni'a idaunia, ta edi fewa 'inega omi'a bolimanina ona 'ewea.”

*Me Samelia* 'eala Ieisu ivetumaqanea

<sup>39</sup> Vavine nana ena simana 'inega Me Samelia qabudi 'abaga Saika 'inega Ieisu ivetumaqanea, mana ni'a vonedia, “Tauna egu ilivu be egu viaqayavo qabuna simana 'ifoqeyedi.”<sup>40</sup> 'Inega me Samelia Ieisu 'inaya imai ta inoqiea be maega ina toa. 'Inega Ieisu 'aubena magilafuna taudi maega itoatoa. <sup>41</sup> Ta wese tomotau qabudi Ieisu ena vona weaqidi ivetumaqanea.

<sup>42</sup> \* 'Inega tomotau diavona vavine nana ivoneaya, “Nugweta o'a eu vona 'inega ba'e 'oloto nana avetumaqanea, ta ba'itagana avetumaqana aqiaqiea, mana taumega ena vona ni'a anoqolidi. Ta ahalamani aqiaqiea vonigo tauna totoa bwa'obwa'o qabuda ada To'etoyavua.”

*Ieisu taha kini ena toluvine natuna giveaqiaqiea*

<sup>43</sup> Ta 'aubena magilafudina 'abibodanaya Ieisu di'we nana nokea ta tauya Galili weaqina, <sup>44</sup> \* mana taunega ni'a simana 'ifoqeyea vonaya, “Tovesimasimana ge taha 'amayaba dalobei ena di'we 'inaya.”<sup>45</sup> \* Tuta nana Galili 'inaya 'ifoqe 'inega me Galili me edi qaiawa i'ebe'ewea, mana lova taudi wese itauya Ielusalema 'inaya 'Auvivia Sagalina weaqina, ta omo'e 'inaya Ieisu ena viaqa taudiege ni'a i'itedi.

<sup>46-47</sup> \* 'Inega wese Ieisu 'evivi 'abaga Kena 'inaya di'we Galili gamonaya. Lova 'abaga nana 'inaya ena waiwaiege go'ila givilei 'inega ve'oine. Ta omo'e 'inaya taha kini ena toluvine totoa, mana tuta nana noqolia Ieisu di'we Iudia 'inega mai Galili 'inaya e 'inega tauya Kena 'inaya Ieisu sabi 'itana. Ta ena tauya 'iuna mana natuna vevihia ena 'abagaya.

'Inega mai Ieisu 'inaya ta venoqiea vonaya, “Eguma au fata kana tauya Kafaneumi 'inaya be natugu me'olotona una giveaqiaqiea, mana tuta goyona na'aliga.”

<sup>48</sup> \* Ta Ieisu tomotau qabudi vonedia, “Omi'a ge ona vetumaqanegu 'eguma taumiege egu viaqa waiwai ge oda 'itedi.”

<sup>49</sup> 'Inega toluvine nana wese 'alakeikeiea vonaya, “Kaiwabu, ulukwayavoni katauya fole natugu yawaina nagumwala.”

\* 4:34: Ion 6:38 \* 4:35: Lk 10:2 \* 4:42: 1Ion 4:14 \* 4:44: Md 13:57 \* 4:45: Ion 2:23 \* 4:46-47: Ion 2:1-11; Md 8:5-6 \* 4:48: Ion 2:18; 1Kol 1:22

<sup>50</sup>\* Ta Ieisu voneaya, “U’evivi utauya eu ’abagaya ta natuhu mayawaina una ’itea.” Ta tolumine nana Ieisu ena vona vetumaqanea ’inega tutuvila ’evivi tauya.

<sup>51</sup> Nawale tautauya ’edaya ’inega ena tofewayavo maega iveloba ta vale ineia ivonaya, “Natuhu mayawaina toatoa ta ana vihiqa ni’a awala.”

<sup>52</sup> ’Inega vetala’aiedi vonaya, “Totuta ’inaya natugu ana vihiqa lua’u?”

Ta taudi ive’iea ivonaya, “Goluanaya baba’auya ’idewani ’wafina ena ’wea’weava lua’u.”

<sup>53</sup> ’Inega gwama nana tamana nuaia goluanaya omo’e tuta nana ’inaya Ieisu voneaya, “Natuhu mayawaina una ’itea.” ’Inega me ena gadeavo Ieisu ivetumaqanea. <sup>54</sup>\* Ba’e Ieisu ena fewa waiwaina vemagilafuna viaqia tuta nana Iudia ’inega maimai Galili ’inaya.

## 5

*Ieisu taha* ’oloto belubeluna giveaiaqiea qawana Betesaida ’inaya

<sup>1</sup> Vaina tuta ’abibodanaya Ieisu ’watovu ’abaga qiduana Ielusalema ’inaya me Diu edi ’ebenuave’avina taha weaqina. <sup>2</sup> Ta Ielusalema gamonaya taha ’awa ana wawa Sifi edi ’Ebelugu di’wenaya qawana taha ’eno’eno, ta qawana nana me Diu bonadiega igabea Betesaida. Ta di’we nana ’inaya vanue ’ebeveyawai adi yau faibi i’eno’eno qawana nana nanavinaya. <sup>3</sup> Ta vanue diavona ’idia tovevihiqa ’eala i’eno’eno taudi matadi kwayakwayana be belubeludi ta wese ’aqedi veifana. <sup>4</sup> Ta omo’e ’inaya iba’eba’e qawana nana ena nidoa weaqina, mana totuta ’inaya Kaiwabu ena tovale’ewa na’ifoqe nanidoea, ’inega togama namaduvawebui qawana nana gamonaya naveaiaqia.

<sup>5</sup> Ta taha ’oloto tovevihiqa dina ’idiega ya’wala 38 ’idia me ena vihiqa toatoa. <sup>6</sup> ’Inega Ieisu ’ifoqe, ta tuta nana Ieisu ’oloto nana ’itea ta wese noqolia ya’wala kuena ’idia me ena vihiqa toatoa, ’inega vetala’aiea vonaya, “Nage nuanuau una veaiaqia?”

<sup>7</sup> ’Inega tovevihiqa nana vonaya, “Kaiwabu, ge taha agu toiulamo be naha’uwebuiegu tuta nana qawana ba’e ve’ale nidonidoa. Ta ya’a yatoho waiwai be vonigo tauguyega ena webui, ta ge agu fata, ta ’esi tuta qabuna tovevihiqa taha taha ivavayabugu iwebuwebui.”

<sup>8</sup>\* ’Inega Ieisu ’oloto nana voneaya, “Uya’itoto, eu ’ebana u’ewei ta utauya!” <sup>9</sup> Omo’e tuta nana ’inaya ’oloto nana veaiaqia, ’inega ena ’ebana ’ewei ta tutuvila tauya. Ta ba’e yani nana ’ifoqe ’aubena Sabate ’inaya.

<sup>10</sup>\* Ta me Diu adi tovanugwetayavo ’oloto nana i’itea ’inega ivoneaya, “Nage eda luvine ge uda alamania vonigo ’aubena Sabate ’inaya ge daluaiaqieiu be eu ’ebana una ’avalei?”

<sup>11</sup> ’Inega edi vona ve’iea vonaya, “Agu togiveaiaqia voneguya, ‘Eu ’ebana u’avala utauya!’”

<sup>12</sup> Ta wese ivetala’aiea ivonaya, “Isana to’oloto ba’e ’idewana vona ’aiqeu?”

<sup>13</sup> Ta toveaiaqia nana ge dahalamanian togama giveaiaqiea, mana qabu qiduana itoatoa, ta Ieisu ni’au va’waiva qabu diavona nuanidiega.

<sup>14</sup> Ta ’abibodanaya Ieisu ’oloto nana lobeia Vanue Gwalagwalana gamonaya ta voneaya, “U’itei, ni’au uveaiaqia, ta ge wese una luveifa ’evivi. Mana ’eguma luveifana una viaqa ’evivia e ’inega luveifana qidua va’inena na’ifoqe ’iuya.” <sup>15</sup> ’Inega ’oloto nana tauya me Diu adi tovanugwetayavo ’idia ta simana ’ifoqe ana togiveaiaqia weaqina vonigo tauna Ieisu.

<sup>16</sup> Ba’e ’iuna ’inega me Diu Ieisu ivevoalanea, mana ’aubena Sabate ’inaya fewa nana viaqia.

<sup>17</sup> ’Inega Ieisu me Diu vonedi vonaya, “Tamagu tuta qabuna fewafewa, ’inega ya’a wese ’idewani yafewafewa.” <sup>18</sup>\* Ta Ieisu ena vona ba’e weaqina me Diu itoho waiwai be ma’oda ’inega ina luve’aliga ’aiqei. Mana Sabate ana luvine veyawai weaqina ni’a qeunia, ta wese vonaya vonigo Yaubada tauna Tama otaqina. Ta ba’e ’inega kavona taunega davanaya be vonigo Yaubada maega ida velelelea.

\* 4:50: Md 8:13    \* 4:54: Ion 2:11    \* 5:8: Md 9:6    \* 5:10: Iel 17:21-22; Nie 13:19    \* 5:18: Md 26:4; Ion 7:1; 10:30

*Iesu vonedi tauna Yaubada Natuna*

<sup>19</sup>\* 'Inega Iesu tomotau diavona vonedi vonaya, "Yavona aqiaqiemi, ya'a Natuna ge agu fata be taha yani taugumo ena viaqi, ta 'esi Tamagu ena viaqayavo ya'ite'itedi 'inega yaviaviaqidi, mana tola'ai Tamagu viaviaqia e ya'a Natuna wese yaviaviaqia. <sup>20</sup> Tamagu ya'a Natuna veveyolubegu qiduana, ta ena viaqa qabudi veve'itegu. Ba'itagana viaqa taha waiwaina ni'a o'itea, ta yavona aqiaqiemi, nawale Tamagu wese vaina viaqa qidua va'inedi nave'itegu, ta viaqa diavona weaqidi nuami navoqana qiduana, <sup>21</sup> mana Tamagu to'aliga gigiveya'itoto 'eviviedi ta yawaidi neineidi, ta wese 'idewani ya'a Natuna taugu egu venua'ivina 'inega tomotau yawaidi ena neidi.

<sup>22</sup>\* "Ta wese tomotau adi luvine ge ina 'ewei Tamagu 'inega, ta 'esi ena luvine ni'a neigu be ya'a agu 'aidega tomotau qabudi ena luvinedi, <sup>23</sup>\* be yaqisa tomotau qabudi ya'a Natuna ina 'amayabegu 'idewani Tamagu i'amayabea. Ta 'eguma taha toga ge nuanuana na'amayabegu 'inega tomotau nana 'inaya ge wese 'amayaba da'eno'eno agu Tovetune Tamagu weaqina.

<sup>24</sup>\* "Inega yavona aqiaqiemi, tomeqabu egu vona inoqonoqolidi ta wese agu Tovetune ivevetumaqanea e taudi yawaidi vataya ina lobe. Ta wese luvine luvematasabu weaqina ge ina lobei, mana 'aliga ena di'we 'inega ni'a ivaukamana yawai vauvauna 'inaya. <sup>25</sup> Ta ona alamani aqiaqiea taha tuta maimai, ta vonahaqiaqi tuta nana ni'a 'ifoqe mai, be 'inega to'aliga ya'a Yaubada Natuna bonagu ina noqolia. Ta taudi bonagu inoqolia ta i'awahaqiaqiea mayawaidi ina toatoa, <sup>26</sup> mana Tamagu taunega yawai 'iuna, 'inega wese 'idewani Tamagu ena waiwai ni'a neigu be yaqisa ya'a wese tomotau yawaidi 'iuna. <sup>27</sup> Ta wese ena luvine neigu tomotau qabudi sabi luvinedi, mana ya'a Tomotau Natuna.

<sup>28</sup> "Inega ge ona nuavoqana ba'e yani diavona weaqidi, mana tuta maimai 'inaya to'aliga qabudi deba'unuyega bonagu ina noqolia. <sup>29</sup>\* 'Inega ina 'ifoqe mai, ta tomeqabu viaqa aqiaqina iviaqia taudi ina ya'itoto ta yawai vataya ina lobe, ta tomeqabu viaqa luveifana iviaqidi taudi ina ya'itoto ta luvematasabu ina lobe. <sup>30</sup>\* Ya'a ge taha yani tauguyega eda viaqia, ta 'esi Yaubada ena nuanua 'inega tomotau yaluluvinedi, 'inega egu luvine tunutunuqina matanaya. Mana ge nuanuagu be taugu egu nuanua ena viaqidi, ta 'esi nuanuagu agu Tovetune ena nuanua ena viaqia.

*Iesu ana tosimanayavo*

<sup>31</sup> "Eguma tauguyega weaqigu ena simana 'ifoqe 'imia, 'inega egu vonayavo ge taha adi aqiaqimo. <sup>32</sup> Ta 'esi Tamagu simasimana 'ifoqe weaqigu, ta yahalamani aqiaqiea ena simana qabudi weaqigu vonahaqiaqi.

<sup>33</sup> "Lova omi'a vaina tomotau kavona tovale'ewa ovetunedi Ioni Togivebabitaiso 'inaya, ta tauna ena simana qabuna weaqigu wese vonahaqiaqi."

<sup>34</sup> Ta wese Iesu vonedi vonaya, "Ya'a tomotau edi vona weaqigu ge eda 'awahaqiaqiei, ta tua Ioni ena simana weaqigu ni'a yavonemi be yaqisa 'etoyavua ona lobe. <sup>35</sup> Ta Ioni nana ena vona weaqigu kavona odamu dadidiyayata, ta omi'a tuta kukusana namo oawafelemi simatala nana 'inaya ta weaqina oqaiawa. <sup>36</sup>\* Ioni ena simana weaqigu yani aqiaqina, ta ya'a egu ve'ita be egu viaqa 'ebenuavoqana Ioni ena simana veqidua va'inedi, mana Tamagu agu veyoveyoa neigu 'inega yani diavona yaviaviaqidi. Ta viaqa diavona taudiega ive'ita 'ifoqeyea vonigo ya'a Tamagu vetunegu yamai.

<sup>37</sup>\* "Ta wese Tamagu taunega simana weaqigu, ta omi'a ge taha tuta bonana oda noqolia nage 'iawana oda 'itea, <sup>38</sup> ta wese ena vona giwalimia ge da'eno'eno, mana ge oda vetumaqanegu vonigo ya'a Yaubada ena luvetune 'inega yamai weaqimi.

<sup>39</sup>\* "Omi'a tuta qabuna Buki Nugwenugweina oavoavoya, mana ovonaya vonigo buki diavona 'idiega yawaimi vataya ona 'ewea. Ba'e buki diavona isimasimana weaqigu, <sup>40</sup> ta tua nawale ge nuanuami ona mai 'iguya yawai vataya sabi 'ewana. <sup>41</sup> Ya'a ge eda nuanua

\* 5:19: Ion 5:30 \* 5:22: Ion 5:27; Via 10:42 \* 5:23: Fil 2:10-11; 1Ion 2:23 \* 5:24: Ion 3:15-18 \* 5:29: Dan 12:2; Md 16:27; Via 24:15 \* 5:30: Ion 5:19; 6:38 \* 5:36: Ion 14:11 \* 5:37: Md 3:17; Ion 5:32; 8:18 \* 5:39: Lk 24:27

qiduana tomotau edi 'awahaqiaqi 'iguya weaqina, <sup>42</sup> mana ni'au yahalamani aqiaqiemini omi'a Yaubada ana veyoluba ge taha da'eno'eno giwalimia.

<sup>43</sup> "Ya'a Tamagu ana wawega yamai, ta ge oda 'awahaqiaqiegu. Ta 'esi 'eguma taha toga tauna ana wawega namai 'imia, 'inega tauna o'awa'awa aqiaqiea. <sup>44</sup> Ba'e 'inega ge ana fata be ona vetumaqanegu, mana omi'a nuanuami ma emiavo taumiega ona veawahawatuboyemi, ta awatubo aqiaqi Yaubada ana 'aidega otaqa 'inaya ge oda nuanua weaqina.

<sup>45</sup> "Ta ge ona nuanua vonigo ya'a ena ve'ewemi Tamagu matanaya. Omi'a olulu'ita vane Mosese ena iula 'imia weaqina, ta vonahaqiaqi ba'e Mosese nana omi'a ami tove'ewa. <sup>46</sup>\* Ta 'eguma Mosese ovetumaqana aqiaqiea 'inega ya'a wese 'idewana ona vetumaqanegu, mana tauna lova Buki Nugwenugweina 'inaya weaqigu 'wayavia. <sup>47</sup> Ta 'eguma ena 'wayavi nana ge oda vetumaqanea, 'inega ma'oda egu vona ona vetumaqana 'aiqei?"

## 6

### *Iesu qabu qiduana ve'ainidi*

*(Madiu 14:13-21; Maki 6:30-44; Luke 9:10-17)*

<sup>1</sup> Ta vaina tuta 'abibodanaya Iesu gelu vaukamana lavu Galili mali di'wenaya, ta lavu nana wese igabea ana wawa mwade'wa Taibilia. <sup>2</sup> Ta qabu qidua va'inedi Iesu i'abiboda dadanea, mana ena viaqa waiwai tovevihuqia weaqidi ni'a i'itedi. <sup>3</sup> 'Inega Iesu ma ana to'abibodayavo bwanagaya i'watovu itoabui, <sup>4</sup> ta tuta goyona me Diu edi 'ebenuave'avina 'Auvivia Sagalina ana tuta na'ifoqe.

<sup>5</sup> 'Inega Iesu 'ita givigivila ta qabu diavona 'itedi imaimai. 'Inega Iesu Filifi vonea vonaya, "Filifi, ma'inega ana fata beledi kana gimwanei be ba'e qabu dina kana ve'ainidi?" <sup>6</sup> Iesu ena vetala'ai ba'e 'inega nuanuana nanoqolia ma'oda Filifi navona 'aiqa, mana Iesu taunega ni'a alamania tola'ai 'iba'igo naviaqia qabu dina weaqidi.

<sup>7</sup> 'Inega Filifi ve'iea vonaya, "Eguma beledi kana gimwanedi tomotau qabudi weaqidi 'inega ana maisa navaneqa kavona tomotau adi yau 200 edi fewa 'aubena 'aidegina ana maisa 'idewani, ta tua ana 'ita mane nana 'inega tomotau qabudi ge ana fata be ina 'ai ta gamodi nakoko."

<sup>8</sup> 'Inega Saimoni Fita taina Anidulu tauna wese Iesu ana to'abiboda vonaya, <sup>9</sup> "Gwama me'olotona ba'e beledi ana yau faibi ta wese 'iqana magilafudi 'inaya 'eno'eno, ta 'abwaga nana 'inega ge ana fata ba'e qabu dina kana ve'ainidi."

<sup>10</sup> 'Inega Iesu vonedi vonaya, "Tomotau qabudi ovonedi ina toabui libia." mana di'we nana 'inaya libi aqiaqina. 'Inega qabudi itoabui ta 'idiega 'oloto dimo adi yau 'idewana faibi tausani (5,000).

<sup>11</sup> 'Inega Iesu beledi diavona 'ewedi ta weaqidi lukaiwa Yaubada 'inaya, ta vewila'ayedi tomotau 'idia. Ta wese 'iqana magilafudi weaqidi lukaiwa ta vewila'ayedi qabu dina 'idia ta i'ainidi 'inega gamodi 'elukoko. <sup>12</sup> Ta 'ai 'abibodanaya Iesu ana to'abibodayavo vonedi, "Tomotau 'awagigidi ona va'auqidi be yaqisa ge taha wese 'idiega kana mudali." <sup>13</sup> 'Inega Iesu ana to'abibodayavo beledi faibi dina 'idiega tomotau 'awagigidi 'onena tuwelo iluveagatuna'idi.

<sup>14</sup> Ta tuta nana tomotau diavona Iesu ena viaqa waiwaina ba'e i'itea 'inega i'alabwau ivonaya, "Vonahaqiaqi, ba'e tovesimasimana nana ena mai bwa'obwa'oya weaqina Buki Nugwenugweina madusimanea." <sup>15</sup>\* Ta Iesu tomotau edi nuanua ni'a alamania tuta goyona 'i'imega ina kafia be ina vekinia weaqidi, 'inega va'waiva nuanidiega ta ana 'aidega tufwana wese 'watovu bwanaga nana debanaya.

### *Iesu tautauya lavu debanega*

*(Madiu 14:22-33; Maki 6:45-52)*

\* 5:46: Via 3:22 \* 6:15: Ion 18:36



<sup>16</sup> Ta mata'au lavilavia ana to'abibodayavo iwebui lavu Galili 'inaya, <sup>17</sup> ta igelu wagaya sabi vaukamana Kafaneumi weaqina. Ni'a velovanea, ta Iesu nawale ge damai, 'inega ive'ale ivavaukamana.

<sup>18</sup> Ta nawale itautauya malavetaya 'inega yaqina be nufula qiduana ilobe. <sup>19</sup> Ta ni'a ivaluluvai kavona 5 nage 6 kilomita 'idewana, 'inega Iesu i'itea lavu debanega maimai edi waga di'wenaya, ta qabudi imwaniniva. <sup>20</sup> 'Inega Iesu vonedia, "Ge ona mwaniniva! Ya'a tauguna." <sup>21</sup> E 'inega iawafelea ta gelu wagaya, ta tuta nana gelu 'inega lukwayavonega waga nana lugu 'abaga nana ana 'awaboqea.

#### *Tomotau Iesu isalisalia*

<sup>22</sup> Ta qabu diavona nawale itoatoa di'we nana 'inaya. 'Inega mahala vulihia iva'auta ta iba'eba'e Iesu sabi 'itana, mana ialamania goluanaya Iesu ma ana to'abibodayavo imai edi di'wea waga 'aideganega. Ta wese ialamania to'abiboda dina edi 'evivi 'inaya Iesu ge dagelu ta 'esi taudimo igelu ta ivaukamana. <sup>23</sup> 'Inega vaina waga Taibilia 'inega imai, ta di'we nana goluanaya Kaiwabu beledi weaqina lukaiwa ta qabu ve'ainidi 'inaya ilugu. <sup>24</sup> Ta omo'e 'inaya tomotau qabudi Iesu ma ana to'abibodayavo isali 'wayoqedi, 'inega nuadi 'eqa'uya Iesu ge datoatoa di'we nana 'inaya. E 'inega wagega i'elugelu ta ivaukamana Kafaneumi 'inaya Iesu sabi salina.

#### *Iesu tauna beledi mayawaina*

<sup>25</sup> Ta tuta nana ilobe lavu mali di'wenaya 'inega ivetala'aiea ivonaya, "Kaiwabu, totutaya umai ba'idia?"

<sup>26</sup> 'Inega Iesu ve'iedi vonaya, "Yavona aqiaqiem, omi'a ge oda salisaligu egu viaqa waiwai di weaqidi, ta 'esi emi sali 'iuna mana beledi diavona 'idiega o'ai gamofata. <sup>27</sup> \* Omi'a ge ona fewa 'abwaga awahawalina weaqina, ta 'esi ona vetafe'wa 'abwaga 'eno'eno vatayana yawaimi weaqina. Ta ya'a Tomotau Natuna ba'e 'abwaga nana ena neimi, mana Yaubada Tamagu venua 'ivinegu ta 'awahaqiaqiegu ba'e fewa nana weaqina."

<sup>28</sup> Ta taudi ivonea ivonaya, "Tola'ai luaqiaqiem be ana viaqi 'eguma Yaubada ena nuanua ana viaqi?"

<sup>29</sup> \* 'Inega Iesu vonedia, "Yaubada ena nuanua ba'e 'idewani: Ya'a vetunegu, ta nuanuana ona vetumaqanegu."

<sup>30</sup> \* Ta ivoneaya, "O'a luaqiaqieu be taha yani 'ebenuavoqana una viaqia ana 'itea be 'inega ana vetumaqaneu. 'Inega tola'ai una viaqia weaqima? <sup>31</sup> \* Lova tubumavo 'abwaga taha ana wawa mana di'we 'ava'avaya i'ainia, 'idewani Buki Nugwenugweina 'inaya vonaya, 'Beledi mahalega neidi ta i'ai."

<sup>32</sup> 'Inega Iesu tomotau diavona vonedi vonaya, "Yavona aqiaqiem, beledi mahalega Mosese ge daneimi, ta 'esi Tamagu beledi aqiaqi mahalega neineimi. <sup>33</sup> Ta beledi aqiaqi nana Yaubada 'inega ni'a mai bwa'obwa'oya, ta tauna tomotau yawaidi neineidi."

<sup>34</sup> Ta wese Iesu ivonea ivonaya, "Kaiwabu, tuta ba'e 'inega bena'e beledi nana una neima!"

<sup>35</sup> \* 'Inega Iesu vonedi vonaya, "Ya'a beledi mayawaina, ta 'eguma taha toga namai 'iguya 'inega ge wese nabotana, ta 'eguma taha toga navetumaqanegu 'inega ge wese magana naluayahaya. <sup>36</sup> Ta ni'a yavonemi, omi'a ni'a o'itegu ta nawale ge oda vetumaqanegu. <sup>37</sup> Ta tomeqabu Tamagu ena nuanua 'inega neineigu, taudina ina mai 'iguya, ta ge wese ena veni'oledi. <sup>38</sup> Mana ya'a mahalega yamai ge taugu egu nuanua sabi viaqina, ta 'esi yamai agu Tovetune ena nuanua sabi viaqina. <sup>39</sup> \* Agu Tovetune nana egu tomotau neigu, ta ena nuanua vonigo ge taha toga 'idiega ena nuafania be naluve'waiva, ta 'esi tuta ana 'ebel'u'ovoa 'inaya ena giveya'itoto 'eviviedi. <sup>40</sup> Mana Tamagu nuanuana tomeqabu ya'a Natuna i'itegu ta ivetumaqanegu yawai vataya ina lobe, ta tuta ana 'ebel'u'ovoa 'inaya ena giveya'itoto 'eviviedi."

\* 6:27: Ion 6:48-58 \* 6:29: 1Ion 3:23 \* 6:30: Md 16:1; Ion 2:18 \* 6:31: 'Ifo 16:14-15; Naba 11:7-9; Same 78:24 \* 6:35: Ion 4:14 \* 6:39: Ion 10:28-29; 17:12

<sup>41</sup> Ta ena vona ba'e weaqina me Diu ivetalabeula, mana ni'a vonaya, "Ya'a tauguna ba'e beledi nana mahalega yawebui mai." <sup>42</sup>\* Ta wese taudi ivonaya, "Ba'e 'oloto nana tauna Iosefa natuna leisu, waisa? Tamana be inana ni'a kahalamanidi, ta ma'oda 'inega vonaya vonigo tauna mahalega dawebui mai?"

<sup>43</sup> 'Inega leisu vonedi vonaya, "Ge ona vetalabeula egu vonayavo weaqidi, <sup>44</sup>\* mana Tamagu tauna ya'a agu Tovetune, ta ge taha toga ana fata namai 'iguya 'eguma Tamagu tomotau nana ge namiei 'iguya, ta ya'a tuta ana 'ebeluo'ova 'inaya ena giveya'itoto 'eviviea. <sup>45</sup>\* Vona ba'ena lova ni'a tovesimasimana i'wayavia Buki Nugwenugweina 'inaya ivonaya, 'Tomotau qabudi Yaubada 'inega ve'ita ina 'ewea, ta tomeqabu ena ve'ita inoqolia ta nuadi na'eqa'uya, e taudina ina mai 'iguya.' <sup>46</sup>\* Ge taha toga Tamagu da'itei ta 'esi ya'a taugumo, mana ya'a tauna 'inega yamai.

<sup>47</sup>\* "Yavona aqiaqiemi, togama vevetumaqanegu tauna yawai vataya ni'a lobe, <sup>48</sup>\* mana ya'a yawai ana beledi. <sup>49</sup> Lova di'we 'ava'avaya tubumiavo 'abwaga ana wawa mana i'ainia ta tua i'elu'aliga. <sup>50</sup> Ta 'esi beledi ba'e mahalega webui mai, ta 'eguma taha toga na'ainia ge wese na'aliga. <sup>51</sup> Ya'a ba'e taugu beledi mayawaina ta mahalega yawebui mai. 'Eguma taha toga ba'e beledi nana 'inega na'ai tauna toa vataya nalobe. Ta ba'e beledi nana tauna vei'ogu, ta yave'ineiea totoa bwa'obwa'o qabumi yawaimi weaqina."

<sup>52</sup> 'Inega me Diu taudiega ive'ale ive'ae'aetoga nuanidia ta ivonaya, "Ma'oda ba'e 'oloto nana vonigo vei'ona naneida kana 'ainia?"

<sup>53</sup> 'Inega leisu vonedi vonaya, "Yavona aqiaqiemi, ya'a Tomotau Natuna, ta 'eguma vei'ogu ge ona 'aini ta wese 'eguma sulaligu ge ona numei 'inega ge ana fata yawaimi vataya ona 'ewei. <sup>54</sup> Ta 'eguma taha toga vei'ogu na'ainia ta sulaligu nanumea tauna yawaina vataya na'ewea. Ta tuta ana 'ebeluo'ova 'inaya ena giveya'itoto 'eviviea. <sup>55</sup> Mana vei'ogu 'abwaga aqiaqi, ta sulaligu go'ila aqiaqi. <sup>56</sup> Ta 'eguma taha toga vei'ogu na'ainia ta sulaligu nanumea e tauna maega ni'a ave'aidega, 'inega tauna 'iguya toatoa, ta ya'a wese 'inaya yatoatoa. <sup>57</sup>\* Tamagu mayawaina vetunegu yamai, ta tauna 'inega tuta qabuna yawaigu ya'ewe'ewea. 'Inega wese 'idewani 'eguma taha toga tuta qabuna 'ai'ainigu tauna wese yawaina 'iguyega na'ewea. <sup>58</sup> Ba'e beledi nana mahalega webui mai. Omi'a tubumiavo mana nana i'ainia ta i'elu'aliga. Ta 'eguma taha toga ba'e beledi nana 'inega na'ai tauna toa vataya nalobe."

<sup>59</sup> Ba'e yani diavona leisu simana 'ifoqeyedi tuta nana veve'ita vanue tafwalolo gamonaya 'abaga Kafaneumi 'inaya.

#### *To'abiboda* 'eala leisu inogea

<sup>60</sup> Ta tuta nana leisu ana to'abibodayavo ba'e vona diavona inoqolidi, 'inega taudiega nuanidia ivonaya, "Ba'e vona diavona adi noqola vitana, ta toga ana fata na'awahaqi-aqiedi?"

<sup>61</sup> leisu ni'a alamania ena vonayavo weaqina ina lugwae, 'inega vonedi vonaya, "Nage ba'e vona diavona igivenuavitemi? <sup>62</sup> Ta ma'oda 'eguma ya'a Tomotau Natuna ona 'itegu ena vane 'evivi agu tuvadaya! <sup>63</sup> Vonahaqiaqi, Niboana Gwalagwalana yawai neineimi, ta tomotau edi waiwaiega ge adi fata toa vataya ina lobei. Ta ba'e egu vona diavona 'idiega ana fata Yaubada Niboanina ona 'ewea, ta Niboani nana 'inega yawaimi ona lobe. <sup>64</sup>\* Ta tua vaina 'imiega nawale ge oda vetumaqanegu!" leisu ba'e 'idewani vona 'aiqa, mana tuta ana 'ebeve'ale 'inega ni'a madualamania tomeqabu ge ida vetumaqanei, ta wese ana tosuluva ni'a alamania.

<sup>65</sup>\* 'Inega wese vonedi vonaya, "Ba'e 'iuna weaqina lova yavonemi ge taha toga ana fata namai 'iguya 'eguma Tamagu ge da'awahaqiaqiea."

\* 6:42: Md 13:55 \* 6:44: Ion 6:65 \* 6:45: Ais 54:13 \* 6:46: Ion 1:18 \* 6:47: Ion 3:15-16 \* 6:48: Ion 6:32,58 \* 6:57: 1Ion 3:24 \* 6:64: Ion 13:11 \* 6:65: Ion 6:44

<sup>66</sup> Ba'e tuta nana 'inega Ieisu ana to'abibodayavo 'eala wawasai ilugwavu'aiea ta inogea. <sup>67</sup> 'Inega Ieisu tunugivila ta Tuwelo dina vonedi vonaya, "Nage omi'a wese ona nogegu, waisa?"

<sup>68</sup> \* 'Inega Saimoni Fita Ieisu vonea vonaya, "Kaiwabu! Isana togama 'inaya ana tauya? Mana o'a au 'aidega otaqa eu vonayavo 'idia yawai vataya 'eno'eno. <sup>69</sup> Ta ima'a ni'a avetumaqaneu ta alamaniu vonahaqiaqi o'a Yaubada Natuna Gwalagwalau."

<sup>70</sup> Ta Ieisu vonaya, "Vonahaqiaqi, ya'a omi'a Tuwelo mina yavenua'ivinemi, ta tua taha 'imiega kavona diaboloto taha." <sup>71</sup> Ba'e 'idewani Ieisu vonavona Iudasa weaqina, tauna Saimoni Isakaliota natuna. Ta Iudasa nana tauna wese Tuwelo dina 'idiega, ta tua nawale ena Kaiwabu nasuluvea.

## 7

*Ieisu tainavo ge ida vetumaqanei*

<sup>1</sup> \* Ta ba'e yani diavona 'abibodanaya Ieisu Galili 'abaganavo 'idia luvivila. Ta ge nuanuana natauya di'we Iudia 'inaya, mana me Diu edi kaiwabuyavo nuanuadi ina luv'e'aligia. <sup>2</sup> \* Ta tuta nana me Diu edi 'ebenuave'avina ana wawa Didi Sagalina vadi'wea, <sup>3</sup> 'inega Ieisu tainavo ivonea ivonaya, "Di'we ba'e 'inega una tauya Iudia 'inaya be yaqisa au to'abibodayavo eu viaqa waiwaiidi ina 'itedi." <sup>4</sup> Ta wese ivoneaya, "Una alamania 'eguma taha toga nuanuana ana wawa nave'ena'i 'inega ena viaqayavo ge wese 'wai'waivinega naviaqidi, ta 'esi 'eguma o'a nuanuau be totoa bwa'obwa'o koyadi ina alamaniu, e 'inega luaqiaqieu be tau'u una ve'itayeu 'idia." <sup>5</sup> \* Tainavo ba'e 'idewani ivona 'aiqea, mana taudi wese ge ida vetumaqanei.

<sup>6</sup> 'Inega Ieisu vonedi vonaya, "Ya'a egu tuta nawale ge dave'ale be ena tauya di'we nana 'inaya, ta 'esi omi'a ge taha 'etoboda da'eno'eno emi tauya weaqina, ta taumiega emi nuanua 'inega ami fata be ona tauya. <sup>7</sup> Mana ge taha 'iuna da'eno'eno be totoa bwa'obwa'o ina vevoalanemi, ta ya'a 'esi ina vevoalanegu mana edi ilivu luv'eifana yasimana 'ifoqeyea 'idia. <sup>8</sup> 'Inega omi'a taumimo ona tauya Ielusalema 'inaya Didi Sagalina weaqina. Ta ya'a ge wese ena wai 'inaya, mana egu tuta aqiaqi nawale ge da'ifoqe." <sup>9</sup> Ba'e 'idewani tainavo vona 'aiqedidi 'inega itauya, ta tauna Galili 'inaya toa.

*Ieisu ena viaqa Didi Sagalina 'inaya*

<sup>10</sup> Ieisu tainavo ni'au itauya sagali nana 'inaya. Ta 'abiboda Ieisu wese 'waivega tauya, ta di'we nana 'inaya 'ifoqe. Ta ge nuanuana tomotau ina 'itei. <sup>11</sup> Ta me Diu edi kaiwabuyavo Ieisu isalisalia Didi Sagalina gamonaya ta ivonaya, "Oloto nana ma'inaya totoa?"

<sup>12</sup> Tomotau qabudi nuanidiega iveve'awahayahaya Ieisu weaqina ta dibudi ivonaya, "Tauna 'oloto aqiaqina!"

Ta wese dibudi ivonaya, "Gebu, mana tauna tomotau veveaqiledi!"

<sup>13</sup> Ta ge taha toga Ieisu weaqina davona 'ifoqe tomotau matadia, mana me Diu edi kaiwabuyavo imwaninivedi. <sup>14</sup> Ta Ieisu ge dava'ifoqe Vanue Gwalagwalana 'inaya ana laba sagali nana ana tuta nuaninaya, 'inega lugu ta ve'ale ve'ita.

<sup>15</sup> \* Omo'e 'inaya me Diu nuadi voqana 'ena'ina ta ivonaya, "Ma'inega 'oloto ba'e ena alamaniu qiduanu 'ewei, mana ge taha tuta dasikulu Mosese ena luvine weaqina!"

<sup>16</sup> \* 'Inega Ieisu vonedia, "Ya'a ge tauguyega egu nuanua 'inega eda veve'ita, ta 'esi agu Tovetune ena nuanua 'inega. <sup>17</sup> Ta 'eguma taha toga 'imiega nuanuana Yaubada ena nuanua naviaqia, 'inega ana fata na'ita lobe'a 'eguma ya'a egu vona yavonavonayea Yaubada ena nuanua 'inega nage taugu egu nuenuaga. <sup>18</sup> \* 'Eguma taha toga nuanuana awatubo nalobe'a, e 'inega taunega weaqina navona. Ta ya'a nuanuagu agu Tovetune ena awatuboya, e 'inega ge wese u'vege eda vona, ta 'esi vonahaqiaqi 'inega tuta qabuna yavonavona.

\* 6:68: Md 16:16 \* 7:1: Ion 5:18 \* 7:2: Luvi 23:34 \* 7:5: Via 1:14 \* 7:15: Md 13:54; Lk 2:47 \* 7:16: Ion 12:49; 14:10 \* 7:18: Ion 8:50

<sup>19</sup>\* “Lova Mosese ami luvine neimi, ta ge taha toga ’imiega da’abiboda aqiaqiei. ’Inega tola’ ai weaqina nuanuami be ona luve’aligigul!”

<sup>20</sup>\* Ta qabu dina ena vona ive’iea ivonaya, “Ta isana togama nuanuana vonigo naluve’aligi? O’a niboana luveifana ni’a ’wahaliu, ’inega bena’e ’idewani uvonavona ’aiqa!”

<sup>21</sup> ’Inega Ieisu vona ve’iedi, vonaya, “Omi’a nuami luveifa, mana ’aubena Sabate ’inaya taha ’oloto ni’a yagiveaqiaqiea. <sup>22</sup>\* Ta omi’a emi viaqa ’aubena Sabate ’inaya ma’oda? Mana Mosese ena luvineyega natumiavo me’olotodi ’wafidi oluluda’edi. (Ta vonahaqiaqi, luvine ba’ena ge Mosese ’inega, ta ’esi lova me Diu tubudiavo ’idiega maimai.) <sup>23</sup>\* Ta omi’a luda’a nana oviaviaqia ’aubena Sabate ’inaya Mosese ena luvine ’inega, waisa? E ’inega tola’ ai weaqina ogamosoalegu tuta nana taha ’oloto Sabatea yagiveaqiaqiea? <sup>24</sup> Ba’e egu vona diavona ta wese egu viaqayavo ona nuanua aqiaqi weaqidi, ’inega ona ’ita lobe a ya’a yani aqiaqi otaqina ni’a yaviaqia.”

*Tomotau inuanua Ieisu tauna togama*

<sup>25</sup> Ta omo’e tuta nana ’inaya vaidi me Ielusalema taudiega iveveqae ivonaya, “Nage ba’e ’oloto nana tauna eda tovanugwetayavo nuanuadi vonigo ina luve’aligia, waisa?

<sup>26</sup> Ta o’itei, ni’au tomotau nuanidia tovotovoloto ta vonavona ’idia ta ge taha toga ena vona dave’iea. ’Inega ma’oda, nage eda tovanugwetayavo ni’a i’awahaqiaqiea vonigo tauna To’etoyavua, waisa? <sup>27</sup>\* Ta nage gebu, mana ba’e ’oloto nana ena ’ebemai qabuda ni’a kahalamania, ta ’esi tuta nana To’etoyavua nana na’ifoqe ’inega ge taha toga nahalamania ma’inega mai.”

<sup>28</sup>\* Ieisu nawale veve’ita Vanue Gwalagwalana gamonaya, ’inega bonana qiduanega vonaya, “Vonahaqiaqi, ni’au oalamanigu, ta wese oalamania todi’we ’inega yamai. Ta ya’a ge eda mai ba’idia taugu egu nuenuaga, ta ’esi agu Tovetune ena luvine ’inega yamai. Tauna ma ana vetumaqana, ta omi’a ge oda alamania. <sup>29</sup> Ta ya’a yahalamania, mana tauna ’inega yamai, ta wese tauna agu Tovetune.”

<sup>30</sup>\* Ena vona gumwala, ’inega tovanugweta diavona itovoi be vonigo ida kafia, ta ge taha toga ’wafina dagitonovi, mana tauna ana tuta kafi nawale ge damai. <sup>31</sup> Ta tomotau qabudi ivetumaqanea ’inega ivonaya, “Vonahaqiaqi, ’oloto ba’ena To’etoyavua, mana ge taha toga ana fata be tauna ena viaqa naveqidua va’inei.”

<sup>32</sup> Ta tuta nana Falisiavo tomotau edi ve’awahayahaya Ieisu weaqina inoqolia, e ’inega taudi be wese toveguba qiduquidua edi nuanua ’aideganega Vanue Gwalagwalana ana to’itamakiavo ivetunedi Ieisu sabi kafina. <sup>33</sup> Ta Ieisu vonaya, “Ya’a tuta kukusana namo omi’a maega kana toatoa, ta ’abiboda ena ’evivi agu Tovetune ’inaya. <sup>34</sup>\* Ta omi’a ona saligu, ta ge wese ona lobegu, mana di’we nana ’inaya yatoatoa omi’a ge ami fata ona wai ’inaya.”

<sup>35</sup> Ta me Diu taudiega nuanidia ivonaya, “Ba’e ’oloto nana ma’inaya natauya be ge ada fata kana lobei? Nage nuanuana eda di’we nanogei be natauya eda tomotauyavo mali di’wea itoatoa sabi ve’itadi? Nage nuanuana natauya taudi ge me Diu edi di’we ’inaya ta nave’itedi? <sup>36</sup> Ena vona ba’e tola’ ai ana alamani? Mana vonaya, ‘Nawale ona saligu ta ge wese ona lobegu’, ta wese vonaya, ‘Di’we nana ’inaya yatoatoa omi’a ge ami fata ona wai ’inaya.’”

*Ieisu vonavona Yawai ana Go’ila weaqina*

<sup>37</sup>\* Didi Sagalina ana ’aubena ’ebel’ovoa ni’a ’ifoqe, ta ’aubena nana ’ebeqaiawa qiduana totoa va’auta weaqidi. ’Inega Ieisu tovalo ta bonana qiduanega gaba vonaya, “Eguma taha toga magana naluayahaya ’inega namai ’iguya be nanuma. <sup>38</sup>\* Ta tomeqabu ivetumaqanegu ina mai ’iguya ta ina numa, ’idewani Buki Nugwenugweina

\* 7:19: Via 7:53; Lom 2:21-24 \* 7:20: Ion 8:48; 10:20 \* 7:22: Luvi 12:3; Nug 17:9-13 \* 7:23: Ion 5:8-10,16  
\* 7:27: Ion 7:41; 9:29 \* 7:28: Md 11:27; Ion 8:55 \* 7:30: Ion 7:44 \* 7:34: Ion 8:21; 13:36 \* 7:37: Luvi 23:36; Ais 55:1; Ion 4:14 \* 7:38: Ais 58:11

simana tovetumaqanayavo weaqidi vonigo giwalidiega yawai ana go'ila nainoqa.”<sup>39\*</sup> Ieisu ena vona ba'e go'ila nana weaqina vona sesebai 'inega Niboana Gwalagwalana weaqina vonavona, mana nawale nalugu ana tovetumaqanayavo 'idia. Ta ba'e tuta nana 'inaya Niboani nana nawale ge dalugu 'idia, mana Ieisu nawale ge davaneqa ena di'we simasimatalina 'inaya.

<sup>40\*</sup> Ieisu ena vona tomotau qabudi inoqolia 'inega vaidi ivonaya, “Vonahaqiaqi, 'oloto ba'ena tauna tovesimasimana nana ivonavonayea.”

<sup>41-42\*</sup> Ta wese vaidi ivonaya, “Tauna To'etoyavua nana.”

Ta wese vaidi 'idiega ivonaya, “To'etoyavua nana ge Galili 'inega namai, waisa? Mana Buki Nugwenugweina 'inaya ni'au simana vonigo To'etoyavua nana tauna kini Deibida ena gadeyega namai be wese ena 'abaga Bedeliema 'inaya navi'oi.”<sup>43</sup> 'Inega vetoasi'i 'ifoqe tomotau nuanidia, mana nuadi ge dave'aidega Ieisu weaqina. <sup>44</sup> 'Inega vaidi nuanuadi be Ieisu ina kafia ta ge taha toga 'wafina dagitonovi.

### *Me Diu edi toluvineavo Ieisu ge ida vetumaqanei*

<sup>45</sup> 'Inega Vanue Gwalagwalana ana to'itamakiavo nima 'ava'avadi i'evivi toveguba qiduquadi be Falisiavo 'idia, ta ivonaya, “Tola'ai weaqina 'oloto nana ge oda miei?”

<sup>46\*</sup> Ta to'itamaki diavona ivonedi ivonaya, “'Oloto omo'e ena vona vonahaqiaqi. Ge taha toga ena vona 'idewani tauna!”

<sup>47</sup> 'Inega Falisiavo wese ivonaya, “Ana 'ita kavona omi'a wese ena u'ava nuami 'ewea.

<sup>48\*</sup> Ta ona alamani aqiaqiea ima'a toluvineavo be Falisiavo 'imega ge taha toga Ieisu davetumaqanei. <sup>49</sup> Ta ba'e qabu dina Ieisu ivetumaqanea, mana Mosese ena luvine ge ida alamania, 'inega Yaubada ena vona ve'alata 'inega ina veilaqe vataya.”

<sup>50\*</sup> Ta wese Nekodimo toatoa, tauna wese toluvine dina adi qabu 'inega, ta lova taha velovana 'inaya tauya Ieisu 'inaya ta maega iveqae. Ta Nekodimo nana enavo vonedi, <sup>51</sup> vonaya, “Ge daluaqiaqieda be taha toga kana maduluvinei, ta 'esi luaqiaqieda be tomotau nana kana vekotu nugwetea be kana noqolia, ta 'abibodanaya ena vona 'inega kana luvinea.”

<sup>52\*</sup> 'Inega toluvine diavona be wese Falisiavo Nekodimo ilugwaeyea ivonaya, “Nage o'a wese Galili 'olotou, waisa? Ta Buki Nugwenugweina una avoya 'inega una 'ita lobeava vonigo ge taha tovesimasimana Galili 'inega namai.”

<sup>53</sup> [‘Inega qabudi ive'iyavula i'evivi edi 'abaga taha taha 'idia.\*

## 8

### *Taha vavine ilobeava velamo'eno ilivuna viaqia*

<sup>1</sup> Ta Ieisu tauya bwanaga Olibe 'inaya. <sup>2</sup> Ta mahala vulihia 'inega Ieisu 'evivi lugu Vanue Gwalagwalana gamonaya, ta tomotau qabudi ivavivilia ta Ieisu toabui sabi ve'itadi. <sup>3</sup> Tuta nana veve'ita, 'inega luvine ana tove'itayavo ta wese Falisiavo taha vavine imiea, mana ni'a ilobeava luabu ilivuna 'inaya, ta vavine nana ivetovoloya qabu dina matadia. <sup>4</sup> 'Inega Ieisu ivonea ivonaya, “Tove'ita, vavine ba'e ni'au alobeava luabu ilivuna 'inaya. <sup>5\*</sup> Ta Mosese ena luvine vonaya vonigo ba'e vivine diavona 'idewani kana 'auve'aligidi daboyega. Ta o'a, ma'oda una vona 'aiqa ba'e yani nana weaqina?”

<sup>6</sup> Ta edi vetala'ai 'iuna mana nuanuadi Ieisu ena vona 'inega adi fata be ina ve'ewea. Ta 'esi Ieisu tunuwebui ta nimanega ve'ale 'waya'wayavi gelasaya. <sup>7\*</sup> Ta nuanuadi navona

\* 7:39: Ion 16:7; 20:22; Via 2:4 \* 7:40: Ion 6:14 \* 7:41-42: Ion 1:46; Same 89:3-4; Mai 5:2 \* 7:46: Mk 1:22 \* 7:48: Ion 12:42 \* 7:50: Ion 3:1-2 \* 7:52: Ion 7:41-42 \* 7:53: Da'a 7:53 'inega be ana laba da'a 8:11 'inaya ge ana lobamo 'wayavi nugwenugweina 'idia. Ana alamani ba'e: Ioni ena buki taunega 'wayavia ta 'abibodanaya tomotau qabudi ivetutumea ta wese i'wayavia, ta 7:53-8:11 ge ana lobamo tomotau edi 'wayavi nugwenugweina 'idia. 'Inega ge kada alamania 'eguma laba diavona Ioni 'wayavidi, nage 'abibodanaya i'ifoqe tomotau edi 'wayavi 'inega. \* 8:5: Luvi 20:10; Luve 22:22-24 \* 8:7: Luve 17:7

'eviviedi 'inega wese ivevetala'aiea, tuata Ieisu tunuvane vonedi vonaya, "Eguma taha toga 'imiega ge taha luveifana daviaqia 'inega o'a dabo una maduinoqea 'inaya." <sup>8</sup> Vonedi gumwala 'inega wese tunuwebui 'evivi ta gelasaya 'waya'wayavi. <sup>9</sup> Ena vona inoqolia, 'inega 'aideganega ive'iyavula, ta ve'iyavula nana ve'ale 'eva'evaledi 'idiega ana laba qabudi ilu'ovoa, ta Ieisu ana 'aidega vavine nana maega ilutufwa, ta vavine nana nawale Ieisu 'iawanaya tovotovolovolo.

<sup>10</sup> Ieisu tunuvane 'evivi ta vavine nana vetala'aiea, vonaya, "Vavine, ma'inaya au tove'ewayavona? Nage taha toga 'idiega luvine neiu?"

<sup>11</sup> \* 'Inega ve'iea vonaya, "Kaiwabu, ge taha."

Ta Ieisu wese voneaya, "Ya'a wese 'idewani, ge taha luvine 'iguyega una lobei. 'Inega una tauya, ta ge taha wese luveifana una viaviaqi.]"

*Ieisu tauna tomotau edi simatala*

<sup>12</sup> \* 'Inega Ieisu wese vona 'evivi tomotau 'idia, vonaya, "Ya'a totoa bwa'obwa'o edi simatala. 'Eguma taha toga na'abibodegu ge wese velovelovana 'inaya natautauya, ta 'esi simatala nana yawaina weaqina ni'a 'ewea."

<sup>13</sup> Ta Falisiavo ivonaya, "Tau'uyega weaqiu usimana 'ifoqe, ta ge taha toga davelueu, 'inega eu vonayavo ge taha adi aqiaqimo."

<sup>14</sup> \* Ta Ieisu vona 'eviviedi vonaya, "Ge taha tola'ai 'eguma tauguyega weaqigu yavonavona 'ifoqe, ta tua egu vona qabuna vonahaqiaqi, mana yahalamaniana to'edega yamai, ta wese ma'inaya yatautauya. Ta omi'a ge taha oda alamaniana to'edega yamai ta ma'inaya yatautauya. <sup>15</sup> \* Omi'a tomotau oluvinedi emi alamani ana 'etofwafwa 'inega, ta ya'a ge taha toga eda luluvinei. <sup>16</sup> \* Ta 'eguma taha toga eda luvinea, e 'inega egu nuanua tunutunuqina 'inega eda luvinea, mana ge agu 'aidega eda toatoa, ta 'esi agu Tovetune maega atoatoa. <sup>17</sup> \* Omi'a ami luvine 'waya'wayavina 'inaya ovonaya vonigo 'eguma tomotau magilafudi edi nuanua 'aideganega ina simana e 'inega o'awahaqiaqiea. <sup>18</sup> \* 'Inega ya'a tauguyega weaqigu yasimana 'ifoqe, ta egu simana nana ana tovelua tauna Tamagu agu Tovetune."

<sup>19</sup> 'Inega ivetala'aiea ivonaya, "Ta ma'inaya tamauna?"

Ta Ieisu ve'iedi vonaya, "Omi'a ge oda alamanigu, 'inega wese Tamagu ge oda alamaniana. Ta 'eguma oda alamanigu 'inega wese Tamagu oda alamaniana."

<sup>20</sup> \* Ieisu ba'e vona diavona neidi tuta nana veve'ita Vanue Gwalagwalana gamonaya taha sifaufa di'wenaya, ta sifaufa nana ana wawa igabea nei kavovo ana 'ebeluveaqe. Ta omo'e 'inaya ge taha toga dakafia, mana ana kafi ana tuta nawale ge da'ifoqe.

*Me Diu Ieisu ivemwageyea*

<sup>21</sup> \* Ta wese Ieisu vonedi vonaya, "Ya'a yatautauya mali di'wea, ta omi'a ona saligu, ta emi luveifana weaqina ona 'aliga. Ta ma'inaya yatautauya omi'a ge ami fata ona wai 'inaya."

<sup>22</sup> Ena vona ba'e weaqina me Diu taudiega nuanidia ivonaya, "Nage nuanuana taunega naluve'aligia?"

Ta wese ivonaya, "Oloto nana wese vonedaya, 'Ma'inaya yatautauya omi'a ge ami fata ona wai 'inaya.' Ta ba'e vona nana ma'oda ana alamani?"

<sup>23</sup> \* 'Inega Ieisu wese vonedia, "Omi'a ba'inega omai, ta ya'a debanega yamai. Omi'a bwa'obwa'o ana tomotauyavo, ta ya'a ge bwa'obwa'o ana tomotau. <sup>24</sup> Ni'a yavonemi omi'a ona 'aliga emi luveifana weaqina. Vonahaqiaqi, 'eguma ge oda vetumaqanegu ya'a ba'e taugu weaqigu yavonavona, e 'inega emi luveifana weaqina ona 'aliga."

<sup>25</sup> 'Inega ivetala'aiea ivonaya, "O'a togama?"

\* 8:11: Ion 5:14 \* 8:12: Ais 49:6; Ion 1:4-9; 9:5; 12:46 \* 8:14: Ion 5:31-32; 7:28 \* 8:15: Ion 12:47 \* 8:16: Ion 5:30; 8:29 \* 8:17: Luve 19:15 \* 8:18: Ion 5:9 \* 8:20: Ion 7:30 \* 8:21: Ion 7:34; 13:33 \* 8:23: Ion 3:31

Ta Ieisu ve'iedi vonaya, "Tuta nana yave'ale yagivesimatalia 'imia taugu weaqigu be ana laba ba'itagana ni'a yavonemi ya'a togama, ta wese yavona aqiaqiemi bena'e ya'a tauguna. <sup>26</sup> Agu fata be vona kuena eda 'inanea omi'a weaqimi, ta wese agu fata be yani taha taha weaqidi eda luviniemi. Ta ba'e yani diavona weaqina ge ena vonemi, ta 'esi tola'ai agu Tovetune ni'a vonegu ta yanoqolia e ba'e yani diavona weaqidi omi'a totoa bwa'obwa'o ena vonemi. Ta Tovetune nana ma ana vetumaqana!"

<sup>27</sup> Ta nuadi nawale ge da'eqa'ui vonigo Ieisu Tamana weaqina vonavona 'idia. <sup>28</sup>\* 'Inega vonedi vonaya, "Omi'a tuta nana ya'a Tomotau Natuna ona silagaigu 'etoluai 'inaya, e 'inega nuami na'eqa'uya vonigo ya'a ba'e taugu weaqigu yasimasimana. Ta wese ona alamania ya'a ge taha yani eda viaviaqia taugu egu nuenuaga, ta 'esi egu vona qabuna Tamagu ena ve'ita 'iguya 'inega yavonavonayedi. <sup>29</sup> Ta ya'a agu Tovetune maega atoatoa. Tauna tuta qabuna di'weguya, mana egu viaqa qabudi yaviaviaqidi sabi giveqaiawana."

<sup>30</sup> Ieisu nawale vonavona, ta vona diavona 'idiega tomotau 'eala edi vetumaqana ia'uya tauna 'inaya.

### *Ebelamo natunavo*

<sup>31</sup> 'Inega me Diu 'idiega tomeqabu Ieisu ivetumaqanea taudina 'idia vonaya, "Eguma egu ve'ita tuta qabuna ovelumatamatayagedi, 'inega omi'a agu to'abiboda aqiaqi. <sup>32</sup> 'Inega omi'a vonahaqiaqi ona alamania, ta vonahaqiaqi nana nali'amimi ta yavuyavuimi ona toatoa."

<sup>33</sup>\* 'Inega ivona ve'iea ivonaya, "Ima'a Ebelamo tubunavo, ta ge taha tuta kavona yoqoyoqonima ada fewa kavovo mali qabu weaqidi. 'Inega tola'ai weaqina uvonevonema vonigo toa yavuyavuina ana lobe?"

<sup>34</sup>\* Ta Ieisu vona 'eviviedi vonaya, "Yavona aqiaqiemi, tomeqabu luveifana iviaviaqidi, e taudi wese kavona tofewa kavovo luveifa nana 'inaya, mana ge adi fata viaqa nana ina lua'ui. <sup>35</sup> Tofewa kavovo ge tuta qabuna datoatoa susu taha gamonaya, ta 'esi natu otaqina me'olotona tuta vataya ena susuyavo maega itoatoa. <sup>36</sup> 'Inega 'eguma ya'a Yaubada Natuna ena li'amimi, e 'inega toa yavuyavua otaqina ona lobe! <sup>37</sup> Ni'a yahalamania omi'a Ebelamo tubunavo. Ta tua ni'a o'iva'ava'ata sabi luve'aligigu, mana egu vona ge taha ena 'ebe'enomo giwalimia. <sup>38</sup> Ta tola'ai ni'a ya'itea tuta nana yatoatoa Tamagu maega yasimasimanea 'imia. Ta omi'a tamami ena ve'ita o'abi'abibodea ta oviaviaqia."

<sup>39</sup>\* Ta ive'iea ivonaya, "Ima'a tamama Ebelamo!"

'Inega Ieisu vonedia, "Eguma omi'a Ebelamo natunavo 'inega ena viaqayavo wese oda vetutumedi. <sup>40</sup> Ya'a vonahaqiaqi yanoqolidi Yaubada 'inega ta ni'au yasimamedi 'imia. Ta tua omi'a emi waiwiaega otovotovoi sabi luve'aligigu. Ta Ebelamo ge taha tuta ba'e 'idewani daviaqa 'aiqa. <sup>41</sup>\* Ta 'esi omi'a tamami ena viaqa ovevetutumedi."

'Inega ivonaya, "Ima'a ge tamatama gegama. Ta tamama 'aideganamo toatoa, e tauna Yaubada."

<sup>42</sup> 'Inega Ieisu vonedi vonaya, "Eguma omi'a tamami Yaubada 'inega oda veveyolubegu, mana ya'a Yaubada 'inega yamai ta ba'itagana omi'a maega katoatoa. Ya'a ge taugu egu nuenuaga eda mai 'imia, ta 'esi Yaubada vetunegu. <sup>43</sup> Tola'ai weaqina nuami ge da'eqa'ui egu vonayavo weaqidi? 'Iuna mana vona diavona ge nuanuami ona noqolidi ta ona 'awahaqiaqiedi. <sup>44</sup>\* Omi'a tamami Seitani, ta nuanuami tauna ena nuanua ona viaqia. Tuta ana 'ebeve'ale 'unu 'inega tauna toluve'aliga, ta wese Yaubada ena vonahaqiaqi vevevoalanea, mana ge taha ana tufwa vonahaqiaqi da'eno'eno 'inaya. Tauna ena u'avayavo bonanega vona 'ifoqeyedi, mana tauna tovemeahaqila aqiaqi ta wese tauna u'ava tamana.

<sup>45</sup> "Ta 'esi ya'a vonahaqiaqi yavonavonayea, 'inegana ge ami fata egu vonayavo ona 'awahaqiaqiedi. <sup>46</sup>\* Nage taha toga 'imiega ana fata vonahaqiaqi 'inega nave'ewegu taha

\* 8:28: Ion 3:14 \* 8:33: Md 3:9 \* 8:34: Lom 6:16,20 \* 8:39: Md 3:9 \* 8:41: Ais 63:16 \* 8:44: 1Ion 3:8 \* 8:46: 2Kol 5:21; 1Fit 2:22

luveifana weaqina? Gebu! Ta 'eguma ya'a tuta qabuna vonahaqiaqi 'inega yasimasimana 'imia, 'inega tola'ai weaqina ge oda vetumaqanegu? <sup>47\*</sup> 'Eguma taha toga Yaubada ena tomotau, 'inega tauna Yaubada ena vona noqonoqolia ta 'abi'abibodea. Ta omi'a Yaubada ena vona ge oda noqolia, mana omi'a gebu ena tomotauyavo!"

*Me Diu Ieisu ive'ewea* 'inega taunega vata'ita'iea

<sup>48\*</sup> 'Inega me Diu Ieisu ivona 'eviviea ivonaya, "O'a Samelia 'olotou ta niboana luveifana ni'a 'wahaliu! Ema vona ba'ena ge au fata be una vegeqei, waisa?"

<sup>49</sup> 'Inega ve'iedi vonaya, "Ya'a ge taha niboana luveifana da'wahaligu, ta 'esi ya'a Tamagu ya'amayabea, ta omi'a ge oda 'amayabegu. <sup>50</sup> Ya'a ge eda salisali taugu agu awatubo weaqina, ta 'esi taha toga salisali ana awatubo weaqina, ta tauna Toluvine nana. <sup>51\*</sup> Yavona aqiaqiemi, 'eguma taha toga egu vona kafi'i'ihidi ta matamatayagedi, e omo'e tomotau nana ge wese na'aliga."

<sup>52</sup> Ta tuta nana Ieisu ba'e vona diavona veqaeyedi 'inega me Diu i'alabwau ivonaya, "Ba'itagana ni'a ahalamani aqiaqiea vonigo o'a niboana luveifana 'wahaliu ta luvek-waveu! Mana ni'a uvonema 'eguma taha toga eu vona nakafi'i'ihidi 'inega ge wese 'aliga na'ita lobei. Ta Ebelamo 'aliga lobeia, ta wese tovesimasimana qabudi 'idewani. <sup>53</sup> 'Inega ma'oda, nage unuaia vonigo o'a tamada Ebelamo uveqidua va'inea, waisa? Mana lova Ebelamo 'aliga, ta tovesimasimana qabudi wese i'aliga. Ta tola'ai weaqina ba'e 'idewani tau'u ugivaneqeu, o'a isana togama waisa?"

<sup>54</sup> Ta Ieisu ve'iedi vonaya, "Eguma ya'a taugu eda givaneqegu 'inega givane nana ge taha ana aqiaqimo. Ta 'esi Tamagu gigivaneqegu, tauna weaqina omi'a ovonaya be emi Yaubada. <sup>55</sup> Ta omi'a ge taha tuta tauna oda alamania, ta 'esi ya'a tauna yahalahalamanian. 'Eguma ya'a eda vona vonigo tauna ge eda alamania, 'inega ya'a taha tou'ava 'idewani omi'a. Ta ya'a tauna yahalahalamanian, ta ena vona yamatamatayagea. <sup>56</sup> Omi'a tamami Ebelamo lova me ena qaiawa luba'e egu tuta mai weaqina, ta tuta nana 'itea 'inega qaiawa."

<sup>57</sup> 'Inega me Diu ive'iea ivonaya, "O'a au ya'wala nawale ge 50 uda lobei, 'inega ma'oda au fata be uvonevonema vonigo o'a Ebelamo ni'a u'itea?"

<sup>58\*</sup> Ta Ieisu vonedia, "Yavona aqiaqiemi, lova tuta nana Ebelamo nawale ge davi'oi, ta ya'a yatoatoa."

<sup>59</sup> 'Inega dabo i'ewedi sabi ludabona, ta Ieisu va'waiva ta Vanue Gwalagwalana 'inega 'ifoqe.

## 9

*Ieisu matakwaya taha givaeaqiaqiea*

<sup>1</sup> Ieisu nawale tautauya 'inega matakwaya taha 'itea. Ta 'oloto nana matana kwayak-wayana vi'oi. <sup>2\*</sup> 'Inega ana to'abibodayavo ivetala'aiea ivonaya, "Tove'ita, 'oloto ba'ena ena tuta vi'oi 'inega matana 'edewani. Ta una givesimatalia 'imaya, togama ena luveifana 'inega vita nana lobeia, nage taunega, nage inana be tamana edi luveifana 'inega?"

<sup>3\*</sup> Ta Ieisu vonedia, "Gebu tauna ena luveifana 'inega ta wese ge inana nage tamana 'idiega. Ta 'esi ba'e yani nana 'ifoqe be yaqisa tomotau Yaubada ena viaqa waiwaidi ina 'itedi bena'e 'oloto nana 'inega. <sup>4</sup> Ita'a qabuda luaqiaqieda be 'aubena qabuna agu Tovetune ena fewa kana viaqia, mana tuta goyona navelovanea ta ge taha toga ana fata nafewa. <sup>5\*</sup> Ta ya'a nawale ba'ade bwa'obwa'oya yatoatoa, ta egu toa nana 'inaya ya'a totoa bwa'obwa'o edi simatala."

<sup>6\*</sup> 'Abibodanaya Ieisu gida'wa bwa'obwa'oya, ta wayavilea bwa'obwa'o maega ta vemwatefula, 'inega 'oloto nana matana 'e'abi'abidi. <sup>7</sup> 'Inega voneaya, "Una tauya qawana Sailoama 'inaya ta matau una 'utudi!" (Ta wawa nana ana givila Vetune). Tuata

\* 8:47: 1Ion 4:6 \* 8:48: Mk 3:21-22 \* 8:51: Ion 5:24 \* 8:58: Ion 1:1 \* 9:2: Isi 18:20; Lk 13:2,4 \* 9:3: Ion 11:4 \* 9:5: Md 5:14; Ion 8:12 \* 9:6: Mk 8:23



'oloto nana tauya ta matana lu'utudi, 'abo 'elu'eaedi, ta ana fata na'ita, 'inega 'evivi tauya 'abagaya.

<sup>8</sup> Lova totoa 'abaga ta wese mali tomotau 'oloto nana tuta qabuna i'ite'itea toatoa ta vevenoqinoqi iula weaqina. Ta ba'itagana i'ita 'eviviea 'inega taudiega nuanidia ivonaya, "Ana 'ita kavona tauna tovenoqinoqi nana, waisa?"

<sup>9</sup> Ta vaidi tomotau ivonaya, "Vonahaqiaqi, taunana!"

Ta wese vaidi ivonaya, "Ana 'ita kavona tauna, ta 'esi tauna mali tomotau!"

Ta 'oloto nana taunega vona 'ifoqeyea, vonaya, "E, ya'a ba'e tauguna!"

<sup>10</sup> 'Inega ivetala'aiea ivonaya, "Ma'oda 'inega matau 'elu'eaedi?" <sup>11</sup> Ta ve'iedi vonaya, "Oloto nana ana wawa leisu mwatefula viaqia ta matagu 'e'abi'abidi. 'Inega vonegu be ena tauya Sailoama 'inaya sabi 'utudi. Tuata yatauya ta ya'utudi, 'inega agu fata ena 'ita."

<sup>12</sup> 'Inega wese ivetala'aiea ivonaya, "Ma'inaya 'oloto nana?"

Ta tauna vonedia, "Avodi."

*Falisiavo* 'oloto nana ena veaqiaqi ana alamani isali aqiaqiea

<sup>13-14</sup> Iesu 'aubena Sabate 'inaya mwatefula nana viaqia ta 'oloto nana matana giveaqiaqiea. 'Inegana ba'e tomotau diavona 'oloto nana lova matana kwayakwayana itaueya Falisiavo 'idia. <sup>15</sup> 'Inega taudi wese 'oloto nana ivetala'aiea ma'oda 'inega matana 'eaha 'aiqei. 'Inega tauna vonedi vonaya, "Mwatefulega matagu 'e'abi'abidi, 'inega 'iawagu ya'utuya, ta ba'itagana agu fata ena 'ita."

<sup>16</sup> 'Inega vaidi Falisi ivonaya, "Ba'e toviaqa nana tauna ge wese Yaubada 'inega damai, mana luvine Sabate weaqina ge damatayagea!"

Ta wese vaidi ivonaya, "Ma'oda 'inega ana fata viaqa waiwaina be 'ebenuavoqana ba'e 'idewani naviaqia 'eguma tauna taha toluveifana?" 'Inega taudiega nuanidia vetoatoasi'i 'ifoqe.

<sup>17</sup> \* 'Inega Falisi 'oloto nana wese ivetala'aiea ivonaya, "Ta o'a ma'oda unuanua 'aiqa matau ana togiaha weaqina? Tauna togama?"

'Inega ve'iedi vonaya, "Tauna taha tovesimasimana."

<sup>18</sup> Ta taudi me Diu dina nawale ivenuana magilafu 'oloto nana weaqina, ta ivonaya be tauna lova ge wese matana dakwaya ta ba'itagana matana da'aei, 'inega inana be tamana adi vale ivetunea ta imai. <sup>19</sup> 'Inega me Diu ivetala'aiedi ivonaya, "Nage ba'e 'oloto nana natumi? Nage tauna vi'oi matana kwayakwayana? Ta 'eguma matana kwayakwayana vi'oi, 'inega ma'odana ba'itagana 'ita'ita?"

<sup>20</sup> 'Inega inana be tamana ive'iedi ivonaya, "Vonahaqiaqi, taunana natuma, ta wese ahalamani aqiaqiea tauna matana kwayakwayana vi'oiea. <sup>21</sup> Ta ima'a ge ada alamania ma'oda 'inega ba'itagana 'ita'ita nage togama matana giaea. Ta 'esi taumiega ona vetala'aiea, mana ni'a vekilakai ta ana fata taunega weaqina navona." <sup>22</sup> Ta inana be tamana ba'e 'idewani ivona 'aiqa mana me Diu imwaninivedi. Ta edi mwaniniva 'iuna, mana me Diu ni'a isimana 'ifoqe 'eguma taha toga navona 'ifoqe vonigo leisu tauna To'etoyavua, e 'inega tomotau nana ina a'u'ifoqeyea vanue tafwalolo 'inega. <sup>23</sup> E ba'e 'iu nana 'inega inana be tamana ivonaya, "Taumiega ona vetala'aiea, mana ni'a vekilakai ta ana fata taunega weaqina nasimana."

<sup>24</sup> Ta wese tuta vemagilafuna me Diu 'oloto nana tauna lova matana kwayakwayana igaba 'eviviea ta ivoneaya, "Una 'awatamatamana Yaubada ana wawega be una vonahaqiaqi 'imaya. Mana ima'a ni'a ahalamania vonigo leisu tauna taha toluveifana."

<sup>25</sup> Ta 'oloto nana ve'iedi vonaya, "Ya'a ge eda alamania 'eguma tauna toluveifana nage gebu. Ta 'esi taha yani yahalamani aqiaqiea vonigo lova matagu kwayakwayana, ta ba'itagana yani qabuna ya'ita aqiaqiedi!"

<sup>26</sup> 'Inega ivetala'aiea ivonaya, "Tola'ai viaqi 'iuya? Ma'oda giveaqiaqi 'aiqeu?"

\* 9:17: Ion 4:19

<sup>27</sup> 'Inega ve'iedi vonaya, "Ya'a ni'a yamaduvonemi ta omi'a ge oda noqolia. 'Inega tola'ai weaqina nuanuami wese egu simana ona noqola 'eviviei? Ana 'ita kavona omi'a wese nuanuami be ona veto'abiboda 'inaya, waisa?"

<sup>28</sup> 'Inega me Diu i'awaluveifea vona koyadi 'idiega, ta ivonaya, "O'a tau'una 'oloto nana ana to'abiboda! Ta ima'a Mosese ana to'abiboda! <sup>29</sup> Ima'a ni'a ahalamania vonigo lova Yaubada Mosese maega iveqae, ta ba'e 'oloto nana weaqina ge taha ada alamania, ta wese ge ada alamania ma'inega mai."

<sup>30</sup> Ta 'oloto nana vonedi vonaya, "Emi vona bena'e 'ebenuavoqana, mana omi'a ge oda alamania ma'inega mai, ta tua tauna matagu giaea. <sup>31</sup> \* It'a ni'a kahalamania vonigo Yaubada toluveifadi edi vona ge danoqolia. Ta 'esi tomeqabu ihiwaiwa'odu 'inaya ta ena nuanua iviaviaqia edi vona noqonoqolia. <sup>32</sup> Bwa'obwa'o ana 'ebeve'ale 'inega be ana laba ba'itagana ge taha toga ana fata be matakwaya taha matana dagiaei 'eguma taunana matana veifana 'idewani vi'oiea. <sup>33</sup> 'Inega 'eguma ba'e 'oloto nana ge damai Yaubada 'inega, e 'inega ge wese ana fata ba'e yani nana daviaqi!"

<sup>34</sup> \* Ta ena vona ba'ena me Diu ive'iea ivonaya, "O'a luluveifau eu vi'oi 'inega ana laba ba'itagana! Nage unuaia vonigo o'a au fata taha yani una ve'itema, waisa?" 'Inega 'oloto nana i'wavinia vanue tafwaloloyega.

#### *Vona sesebai matakwaya ta wese ma matadi weaqidi*

<sup>35</sup> Iesu 'oloto nana valena noqolia vonigo Falisiavo ni'a i'wavina 'ifoqeyea vanue tafwaloloyega. Ta tuta nana lobea 'inega vetala'aiea vonaya, "Nage o'a Tomotau Natuna uvetumaqanea?"

<sup>36</sup> 'Inega 'oloto nana ve'iea vonaya, "Kaiwabu, tauna togama? Ta 'eguma una vonegu 'inega egu vetumaqana ena a'uya 'inaya!"

<sup>37</sup> 'Inega Iesu voneaya, "Tawa u'ite'itea, mana tuta ba'e 'inaya tauna maega oveveqae."

<sup>38</sup> 'Inega 'oloto nana iwa'odu Iesu 'iawanaya ta voneaya, "Kaiwabu, yavetumaqana aqiaqieul!"

<sup>39</sup> Ta Iesu voneaya, "Ya'a yamai bwa'obwa'oya tomotau sabi luvinedi. 'Inega matadi kwayakwayana ina 'ita, ta ma matadi ena ve'itedi taudi kavona matadi kwayakwayana 'idewani."

<sup>40</sup> \* Ta Falisiavo vaidi di'wenaya itovotovolo Iesu ena vona ba'e inoqolia ta ivonea ivonaya, "Tola'ai uvonevonei, nage ima'a matakwayakwayama, waisa?"

<sup>41</sup> 'Inega Iesu ve'iedi vonaya, "Eguma omi'a matami kwayakwayana 'inega ge wese ami 'ebeve'ewamo luveifana weaqina. Ta 'esi omi'a ovonaya be vonigo ma matami, 'inega emi luveifana nawale 'eno'eno 'imia."

## 10

#### *Sifi adi to'itamaki aqiaqina me ena sifiavo*

<sup>1</sup> 'Inega Iesu vonaya, "Yavona aqiaqiemi, 'eguma taha toga yubai sifi adi 'ali ge ana 'awega nalugu ta 'esi ana 'ali nana navane taonia, e taunana tovanawala ta toveilivu veifa.

<sup>2</sup> Ta 'esi sifi adi to'itamaki lugulugu 'ali nana ana 'awega. <sup>3</sup> 'Inega 'awa ana to'itamaki 'awa nana nasiwa'ea weaqina. Ta ena sifiavo 'aidega 'aidega adi wawega nagabedi ta navanugwetedi ina 'ifoqe 'ali nana 'inega. <sup>4</sup> Ena sifiavo ni'a va'au'auqidi gumwala, 'inega vavamatanedi ta sifi diavona italatala'obe, mana bonana ialamani aqiaqiea. <sup>5</sup> Ta 'eguma taha toga sifi diavona navamatanedi ta 'oloto nana ge ida alamania, e 'inega ge wese ina tala'obei, ta 'esi ina denea, mana bonana ge ida alamania." <sup>6</sup> Iesu ba'e 'idewani vona sesebaiega vonedi, ta taudi nuadi ge da'eqa'ui vona nana weaqina.

<sup>7</sup> 'Inegana Iesu wese vonedi vonaya, "Yavona aqiaqiemi, ya'a ba'e taugu sifi adi 'awa. <sup>8</sup> \* Lova tomeqabu imadumai sifi dina 'idia taudi tovanawala be toveilivu veifa, ta sifi diavona toluveifadi bonadi ge ida matayagea. <sup>9</sup> Ya'a 'awa nana, ta tomeqabu ilugulugu 'iguyega 'etoyavua ina lobea. Taudi ina lugu ta wese ina 'ifoqe, ta adi 'abwaga ina lobea.

\* 9:31: Same 34:15 \* 9:34: Same 51:5 \* 9:40: Md 15:14 \* 10:8: Iel 23:1-2; Isi 34:2-3

<sup>10</sup> Ta tovanawala nana ena mai 'iuna, mana nuanuana navanawala be, naluve'aliga ta wese nagiveluveifa. Ta 'esi ya'a yamai tomotau yawaidi sabi neidi be yaqisa edi toa naveaqiaqi otaqa.

<sup>11</sup> \* "Ya'a sifi adi to'itamaki aqiaqigu. Ta to'itamaki aqiaqina yawaina awafelea ena sifiavo weaqidi. <sup>12</sup> \* Ta 'eguma mali 'oloto vevemaisina namai sabi 'itamakidi ta kedewa waqiwaqi na'ifoqe mai, 'inega to'itamaki nana sifi diavona nanogedi nadena, mana tauna ge tamadi. 'Inega waqiwaqi nana sifi dina natala'avudi ta nalelewanedi. <sup>13</sup> Vonahaqiaqi, 'oloto nana nanogedi ta nadena, mana tauna ni'a maisa 'ewe ta ge danuanua sifi diavona weaqidi.

<sup>14</sup> "Ya'a sifi adi to'itamaki aqiaqigu. Egu sifiavo yahalamani aqiaqiedi, ta wese sifi diavona ialamani aqiaqiegu, <sup>15</sup> \* 'idewani Tamagu alamani aqiaqiegu, ta ya'a wese Tamagu yahalamani aqiaqiea. Ta ya'a yawaigu yahawafelea sifi diavona weaqidi. <sup>16</sup> \* Ta ya'a egu sifiavo vaidi ge ida toatoa ba'e 'ali nana gamonaya. Luaqiaqiegu be ba'e sifi diavona wese ena miedi ba'e 'ali nana gamonaya, 'inega taudi wese bonagu ina noqolia. 'Inega sifi qabudi ena gaba va'auqidi 'aideganaya, ta wese adi to'itamaki 'aidegamo.

<sup>17</sup> \* "Ya'a Tamagu veveyolubegu qiduana, mana ya'a me egu qaiawa yawaigu yahawafelea be yaqisa ena 'ewa 'eviviea. <sup>18</sup> Ge taha toga ana fata be yawaigu na'ewei 'iguyega. Ta 'esi ya'a yawaigu nana taugu egu nuenuaga yahawafelea. Mana ya'a taugu egu 'abiluvine 'inega yahawafelea, ta wese egu 'abiluvine nana 'inega yawaiguna ena 'ewa 'eviviea. Ta ba'e yani diavona ena viaqidi Tamagu ena nuanua 'inega."

<sup>19</sup> Ta Iesu ena vona diavona ba'e 'idiega ve'ae'aetoga give'ifoqeyea me Diu nuanidia.

<sup>20</sup> 'Inega vaidi 'idiega Iesu weaqina ivonaya, "Niboana luveifana ni'a 'wahalia ta luvekwavea. 'Inega ena vona ge wese kana noqoli!"

<sup>21</sup> Ta wese vaidi i'awahaqiaqiea ivonaya, "Ge taha toga ana fata ba'e 'idewani navona 'aiqa 'eguma tauna ni'a vekwawakwava niboana luveifana 'inega. Ta wese niboana luveifana ge ana fata be matakwaya taha matana nagiaei!"

*Iesu simana* 'ifoqe vonigo tauna Yaubada Natuna

<sup>22</sup> Guga'u ana tuta ni'a 'ifoqe, ta Vanue Gwalagwalana Sagalina ana wawa Anuka iviaqia Ielusalema 'inaya. <sup>23</sup> Ta Iesu tautauya vanue nana gamonaya taha di'we ana wawa Solomoni ena 'Ebevebasekwa 'inaya. <sup>24</sup> Ta wese me Diu omo'e 'inaya itoatoa ta Iesu ivavivilia ivoneaya, "O'a totutaya una vona aqiaqiema tau'u weaqiu? Ima'a nawale aba'eba'eyeu eu simana 'ifoqe weaqina, mana tomotau inuanua kavokavovo. Ta 'eguma o'a To'etoyavua nana, e 'inega una simana aqiaqi 'imaya!"

<sup>25</sup> 'Inega Iesu ve'iedi vonaya, "Ya'a ni'a yavonemi, ta omi'a egu vona ge oda vetumaqanea. Ya'a viaqa 'ebenuavoqana yaviaviaqidi Tamagu ana wawega, ta viaqa diavona ive'ita 'ifoqeyea ya'a togama. <sup>26</sup> Ta ge oda vetumaqanegu, mana omi'a gebu egu sifiavo. <sup>27</sup> Ya'a egu sifiavo bonagu inoqola aqiaqiea, ta ya'a yahalahalamanidi, ta taudina i'abi'abibodegu. <sup>28</sup> \* Ya'a yawai 'eno'eno vatayana yaneineidi, ta ge taha tuta ina 'aliga. Ta wese ge taha toga ana fata na'ewa 'eviviedi nimaguyega. <sup>29</sup> Tamagu sifi diavona ni'a neigu, ta tauna yani qabuna veqidua va'inedi, 'inega ge taha toga ana fata na'ewedi Tamagu nimanega. <sup>30</sup> Ta Tamagu be ya'a kavona 'aidegama."

<sup>31</sup> Ta Iesu ena vona ba'e weaqina me Diu wese dabo i'ewedi sabi ludabona. <sup>32</sup> Ta Iesu vonedia, "Ya'a Tamagu ena nuanua 'inega viaqa aqiaqi otaqidi ni'a yaviaviaqidi. Ta 'idiega, toviaqa weaqina nuanuami ona luve'aligigu?"

<sup>33</sup> \* 'Inega ive'iea ivonaya, "Ge wese eu viaqa weaqina ana ludabou, ta 'esi eu vona luveifana weaqina, mana o'a tomotau otaqa, ta tau'u uvonavane vonigo o'a Yaubada."

\* 10:11: Same 23:1; Ve 7:17 \* 10:12: Via 20:29 \* 10:15: Md 11:27; 1Ion 3:16 \* 10:16: Ais 56:8; Isi 34:23  
\* 10:17: Fil 2:8-9 \* 10:28: Ion 3:16; 6:39 \* 10:33: Luvu 24:16

<sup>34</sup> \* 'Inega Ieisu vonedi vonaya, "Omi'a emi luvine 'waya'wayavina 'inaya Yaubada vaina ami tovanugwetayavo 'idia vonaya, 'Ni'a yavonemi omi'a kavona vaina yaubadayavo.' <sup>35</sup> Ta wese ni'a oalamanian Yaubada ena vona ge ana fata be navedumaduma. Tovanugweta diavona Yaubada ena vona i'ewe, ta 'eguma Yaubada 'inamedi kavona vaina yaubadayavo 'idewani, <sup>36</sup> 'inega tola'ai weaqina omi'a ovonaya be ya'a eda vonaveifa tuta nana yavonaya vonigo ya'a Yaubada Natuna? Mana Yaubada ya'a Gwalagwalagu vetunegu yamai omi'a totoa bwa'obwa'o 'imia sabi iulami. <sup>37</sup> Ta yavona aqiaqiemi, ge daluaqiaqiemi be ona vetumaqanegu 'eguma ya'a ge Tamagu ena nuanua 'inega viaqa diavona eda viaqidi. <sup>38</sup> \* Ta 'eguma ya'a vaina yani 'ebenuavoqana nage viaqa waiwai di yaviaviaqidi ta omi'a ge oda vetumaqanegu, 'inega luaqiaqiemi be viaqa diavona ona vetumaqanedi. Ta ba'e 'inega ana fata ona alamanian vonigo ya'a be Tamagu 'aidegama."

<sup>39</sup> 'Inega wese itovoi vonigo ida kafia, ta igi'waqiea 'abo dena tauya.

<sup>40</sup> \* 'Inega Ieisu 'evivi tauya go'ila Iolidani mali di'wenaya, lova di'we nana 'inaya Ioni Togivebabitaiso tomotau givebabitaisodi, ta omo'e 'inaya toa. <sup>41</sup> Ta ena toa nana 'inaya tomotau koyadi imai 'inaya ta ivoneaya, "Ioni ge taha viaqa waiwai di daviaqidi, ta 'esi ena vonayavo Ieisu weaqina yani qabuna vonahaqiaqi." <sup>42</sup> Ta tomai diavona 'idiega wese qabudi ivetumaqana Ieisu 'inaya.

## 11

### *Lasalo ena 'aliga weaqina*

<sup>1-2</sup> \* Taha 'oloto ana wawa Lasalo 'abaga Bedani 'inaya totoa ma novunavo Meli ta Mata. Ta ba'e Meli nana lova bunama meilana aqiaqi otaqina guiwaqia Kaiwabu 'inaya, ta debanega 'aqena talaveayea. Ta Lasalo nana vihiqa ni'a lobe. <sup>3</sup> 'Inega novunavo Ieisu ana vale ivetunea ivonaya, "Kaiwabu, ia otaqiu ni'a vevihiaq."

<sup>4</sup> \* Ta tuta nana Ieisu valena noqolia 'inega vonaya, "Iagu Lasalo ba'e vihiqa nana 'inega ge wese yawaina nagumwala. Ta 'esi ba'e 'inega Yaubada awatubo nalobe tomotau 'idiega, ta wese ya'a Natuna ba'e yani nana 'inega awatubo ena lobe."

<sup>5</sup> Mata ma taina Meli ta novudi Lasalo Ieisu veyolubedi qiduana. <sup>6</sup> Ta tuta nana Lasalo ena vihiqa valena noqolia ge datauya 'idia, ta 'esi toaya 'aubena magilafuna di'we nana 'inaya.

<sup>7</sup> 'Inega ana to'abibodayavo vonedi vonaya, "Kana 'evivi di'we Iudia 'inaya!"

<sup>8</sup> Ta ive'iea ivonaya, "Tove'ita, ge tuta kuena gumwala me Diu nuanuadi be ina ludabou, 'inega tola'ai weaqina nuanuau una 'evivi omo'e 'inaya?"

<sup>9</sup> Ta Ieisu vonedia, "Aubena 'aidega 'aidega 'idia simatala kana 'itea 'awa'awai 'inega be lavilavi 'inaya, e 'inega tomotau adi fata be ina luyaba dadana ta ge ina veilaqe, mana bwa'obwa'o ana simatala ni'a mai ta ba'e simatala nana 'inega i'ita'ita. <sup>10</sup> Ta 'esi 'eguma velovelovana gamonaya itautauya 'inega 'aqedi ina vetufea, mana ge taha simatala da'eno'eno."

<sup>11</sup> Ieisu ba'e 'idewani vona 'aiqa, ta 'abiboda wese ena vona luvetomanea vonaya, "Iada Lasalo ni'a 'eno motaiva, ta ena tauya 'inaya sabi divanona."

<sup>12</sup> 'Inega ana to'abibodayavo ena vona ive'iea ivonaya, "Kaiwabu, 'eguma 'eno'eno 'inega wese naveaqiaqi." <sup>13</sup> Ieisu ba'e vona diavona 'idiega Lasalo ena 'aliga weaqina vonavona, ta ana to'abibodayavo ivonaya be davonavona 'wafi ena 'eno motaiva weaqina.

<sup>14</sup> 'Inega Ieisu vona tunutunuqina 'inega vonedia, "Lasalo yawaina ni'a gumwala. <sup>15</sup> Ta ge eda tauya 'inaya tuta nana nawale mayawaina totoa, ta ba'e weaqina yaqiaqaiawa, mana ba'e 'inega emi vetumaqana 'iguya ana fata navewaiwai. 'Inega ada luaqiaqi be kana tauya 'inaya kana 'itea."

\* 10:34: Same 82:6 \* 10:38: Ion 14:10-11 \* 10:40: Ion 1:28 \* 11:1-2: Lk 10:38-39; Ion 12:3 \* 11:4: Ion 9:3

<sup>16</sup>\* To'abiboda taha ana wawa Tomasi, ta wese igabea Didimasi (wawa nana ana givila didilualua), tauna to'abiboda enavo vonedi vonaya, "E ita'a wese katauya, ta Iesu maega kana 'aliga!"

*Iesu iana Lasalo novunavo Mata be Meli vona iuledi*

<sup>17</sup> Ta tuta nana Iesu ni'a 'ifoqe 'abaga Bedani 'inaya, 'inega tomotau edi veqae 'inega noqolia vonigo Lasalo 'aubena foa gumwala ni'a itavunia. <sup>18</sup> Ta Bedani ge daveluluvai Ielusalema 'inega ta ana kue kavona kilomita toi 'idewani, <sup>19</sup> ta me Diu qabudi ni'a imai Mata ma taina Meli 'idia sabi vona iuladi, mana inuavita novudi ena 'aliga weaqina.

<sup>20</sup> Tuta nana Mata Iesu ena mai valena noqolia 'inega vanuega 'ifoqe tauya sabi 'itana, ta Meli nawale vanuea toatoa. <sup>21</sup> 'Inega Mata Iesu 'inaya vonaya, "Kaiwabu, 'eguma o'a ba'idia uda toatoa, 'inega novugu ge wese da'aliga. <sup>22</sup> Ge uda mai, ta tua yahalamani aqiaqiea ba'itagana 'eguma toyani weaqina una venoqi Yaubada 'inaya e wese naneiu."

<sup>23</sup> 'Inega Iesu voneaya, "Novuhu mayawaina naya'itoto 'evivi."

<sup>24</sup>\* Ta Mata ve'iea vonaya, "E ni'a yahalamania nawale 'aubena 'ebeluo'ova 'inaya novugu to'aliga qabudi maega ina ya'itoto 'evivi."

<sup>25</sup> 'Inega Iesu vonea vonaya, "Ya'a ya'itoto 'evivi ta wese yawai vataya 'iuna. 'Eguma taha toga vevetumaqanegu ta na'aliga, 'inega tauna mayawaina nawale toatoa. <sup>26</sup> Ta togama mayawaina toatoa ta vevetumaqana 'iguya ge wese na'aliga. Mata, nage egu vona ba'e uvetumaqanea?"

<sup>27</sup>\* 'Inega Mata vonaya, "Kaiwabu, vonahaqiaqi, tuta qabuna yavevetumaqaneu o'a To'etoyavua nana Yaubada Natuna. O'a lova Yaubada vona fofofola eu mai bwa'obwa'oya weaqina."

<sup>28</sup> Ena vona ba'e 'abibodanaya 'evivi tauya vanuea ta taina Meli gabea mai itauya tufinaya ta voneaya, "Tove'ita nana ni'a mai ta nuanuana na'iteu." <sup>29</sup> Ta tuta nana Meli ba'e noqolia 'inega lukwayavonega ya'itoto tauya Iesu sabi 'itana. <sup>30</sup> Iesu nawale ge dalugu 'abaga nana gamonaya ta 'esi Mata maega edi 'ebeveloba 'inaya nawale toatoa. <sup>31</sup> Ta me Diu Meli maega itoatoa vanuea sabi vona iulana taudi i'itea lukwayavonega 'ifo'ifoqe 'inega ivonaya be datautauya deba'unuya sabi dou. 'Inega itala'obeia itauya omo'e 'inaya.

<sup>32</sup> Tuta nana Meli ni'a 'ifoqe ta Iesu 'itea 'inega iwa'odu 'aqenaya ta voneaya, "Kaiwabu, 'eguma o'a ba'idiana 'inega novugu ge wese da'ali'aliga."

<sup>33</sup> Ta tuta nana Iesu Meli ena dou 'itea ta wese tomotau qabudi edi duvoyavoya noqolia 'inega nuana vita qiduana. <sup>34</sup> 'Inega Iesu vetala'aiedi vonaya, "Ma'inaya 'wafina oa'uya?" Ta ivoneaya, "Kaiwabu umai, ana ve'iteu." <sup>35</sup> Ta Iesu dou.

<sup>36</sup> 'Inega me Diu ivonaya, "O'itei, iana veveyolubea qiduana!" <sup>37</sup>\* Ta vaidi 'idiega ivonaya, "Ba'e 'oloto nana lova matakwaya taha matana giaea, 'inega luaqiaqiea be iana ba'e wese daiulei be yaqisa ge da'aliga, waisa?"

*Iesu Lasalo giveya'itotoya 'aligega*

<sup>38</sup> Ta wese Iesu giwalinaya visiqqa qiduana lutionia, 'inega tauya Lasalo ana deba'unuya. Ta deba'unu nana kavona vatu'ubu, ta 'awana dabo beabeanege ni'a ivetovolo bodea. <sup>39</sup> 'Inega Iesu vonedia, "Dabo nana o'uvekawawei!"

Ta to'aliga nana novuna Mata vonaya, "Kaiwabu, ni'a 'aubena foa gumwala ia'ukwaivea, 'inega meila luveifa otaqina nawale na'ifoqe."

<sup>40</sup> Ta Iesu ve'iea vonaya, "Mata, tawadega yavoneu 'eguma o'a ni'a uvetumaqanegu 'inega ana fata Yaubada ena waiwai una 'itea."

<sup>41</sup> Tuata dabo nana i'uvekawawe. 'Inega Iesu 'ita vane mahalaya ta vonaya, "Tamagu, yalulukaiwa 'iuya mana o'a unoqonoqoligu. <sup>42</sup> Ta yahalamani aqiaqiea o'a tuta qabuna unoqonoqoligu, ta tua bonagu qiduanega ni'a yalulukaiwa 'iuya, be yaqisa ba'e tomotau diavona ina vetumaqana vonigo o'a uvetunegu yamai 'idia."

\* 11:16: Mk 14:31 \* 11:24: Ion 6:40 \* 11:27: Ion 6:69 \* 11:37: Ion 9:6-7

<sup>43</sup> Ieisu Tamana vonea gumwala, 'inega bonana qiduanega gaba vonaya, "Lasalo, u'ifoqe mai!" <sup>44</sup> 'Inega to'aliga nana 'ifoqe mai, ta nimana be wese 'aqena umaumadi kaleko wadawadaeadi 'idiega. Ta wese 'iawana ma umana kalekoyega.

Ta Ieisu vonedi vonaya, "Deba'unu ana kalekoyavo ona 'ewa yavuledi ta ona 'abifelei natauya yavuyavuina."

*Idima govaqa ma'oda Ieisu ina luve'aliga 'aipei*  
(Madiu 26:1-5; Maki 14:1-2; Luke 22:1-2)

<sup>45</sup> \* Me Diu diavona taudi imai Meli sabi vayausina vita nana weaqina Ieisu ena viaqa waiwaina i'itea, 'inega 'idiega 'eala edi vetumaqana ia'uya 'inaya. <sup>46</sup> \* Ta 'esi vaidi 'idiega itauya Falisiavo 'idia ta isimana 'ifoqe Ieisu ena viaqa weaqina. <sup>47</sup> 'Inega toveguba qiduquadi ta wese Falisiavo edi kaniselayavo igaba va'auqidi sabi veqae Ieisu weaqina. 'Inega taudiega nuanidia ivonaya, "Ma'oda kana viaqa 'aiqa? Omo'e 'oloto nana viaqa waiwaidi 'ebenuavoqana viaviaqidi tomotau matadia. <sup>48</sup> 'Eguma kana 'iteamo nawale tomotau qabudi ina vetumaqanea, ta 'inega me Loma ina mai ta eda Vanue Gwalagwalana ta wese eda tomotauyavo ina luvegwamumuidi."

<sup>49</sup> Ta omo'e ya'wala nana 'inaya toveguba edi tovanugweta ana wawa Kaiafa tauna wese taha kanisela vonedi vonaya, "Ma'oda 'inega ovevekwavakwava? <sup>50</sup> Nage nuami ge da'eqa'ui vonigo ge yani aqiaqina 'eguma tomotau qabuda kana veilae, ta 'esi yani aqiaqi otaqina 'eguma 'oloto 'aideganamo na'aliga tomotau qabuda weaqida." <sup>51</sup> Ta Kaiafa nana ge taunega ena nuanua 'inega ba'e vona nana da'inanei, ta 'esi Yaubada ena venuaha'u 'inega ba'e 'idewani Ieisu weaqina madusimana 'ifoqe, mana tauna toveguba edi tovanugweta ba'e ya'wala nana gamonaya.

<sup>52</sup> \* Ta ba'e simana nana Ieisu ena 'aliga weaqina ge me Isileli dimo weaqidi davon-avona, ta 'esi Yaubada nuanuana natunavo itoatoa mali di'we be mali di'we 'idia nava'auqidi naluvetubedi ta ina ve'aidega 'aliga nana 'inega. <sup>53</sup> \* Ta omo'e tuta nana 'inega me Diu edi kaniselayavo idima govaqa ma'oda Ieisu ina luve'aliga 'aipei. <sup>54</sup> Ta edi dima govaqa weaqina Ieisu ena viaqayavo tomotau nuanidia givelua'uya ta Ielusalema nogea. 'Inega tauya taha 'abaga ana wawa Efilami 'inaya, ta 'abaga nana di'we 'ava'ava di'wenaya. Ta omo'e 'inaya ana to'abibodayavo maega itoa.

<sup>55</sup> Me Diu edi 'ebenuave'avina qiduana ana wawa 'Auvivia Sagalina ni'a vadi'wea, 'inega tomotau qabudi di'we taha taha 'idiega i'watovu imai Ielusalema 'inaya sabi givevunavunaqidi viaqa taha taha 'idiega, mana edi ilivu 'idewani.

<sup>56</sup> Me Diu edi kaniselayavo nawale Ieisu isalisalia. Ta Vanue Gwalagwalana 'inaya itoatoa iveveqae, ta taudiega nuanidia ivetala'aiedi ivonaya, "Ma'oda onuanua 'aiqa, nage Ieisu nana namai ba'e sagali nana gamonaya, nage gebu?" <sup>57</sup> Ta toveguba qiduquadi be wese Falisiavo edi luvine waiwaina ia'uya 'eguma taha toga Ieisu na'ita lobe, e 'inega lukwayavonega navematamagilafuyedi be yaqisa ina kafia.

## 12

*Meli bunama iwaqia Ieisu 'inaya*  
(Madiu 26:6-13; Maki 14:3-9)

<sup>1</sup> \* 'Aubena sikisi 'inaya 'Auvivia Sagalina nave'ale, 'inega Ieisu lugu 'evivi Lasalo ena 'abaga Bedani 'inaya. Ta ba'e Lasalo nana Ieisu lova giveya'itoto 'eviviea 'aligega.

<sup>2</sup> \* 'Abwaga ni'a i'iva'ava'aia Ieisu sabi 'amayabana. 'Inega Mata 'abwaga nana dedea, ta tomotau ni'a itoa vivilia 'ai nana 'inaya, ta wese Lasalo toabui Ieisu maega sabi 'ai. <sup>3</sup> \* 'Inega Meli taha bunama ana wawa nadi ma botolina tufwana 'ena'ina 'ewea.

Bunama nana ana ve'ia qiduana ta meilana aqiaqina. Ta Meli Ieisu 'aqenaya guiwaqia,

\* 11:45: Ion 7:31 \* 11:46: Lk 16:31 \* 11:52: Ion 10:16 \* 11:53: Ion 5:18 \* 12:1: Ion 11:1,43 \* 12:2: Lk 10:40 \* 12:3: Lk 7:37-38

ta 'abiboda debanega talaveayea. Ta bunama nana 'inega meila aqiaqi otaqina 'ifoqe, ta vanue gamona qabuna tu 'i'ihia.

<sup>4</sup> Ta Iesu ana to'abiboda taha ana wawa Iudasa Isakaliota nawale Iesu nasuluvea wese toatoa, ta ba'e Iudasa nana Meli ena viaqa ge da'awahaqiaqiea, 'inega vonaya, <sup>5</sup> "Tola'ai weaqina ba'e bunama nana ge davegimwaneyei, ta manena lukwalukwadi daneidi? Mana ana ve'ia qiduana, kavona tofewa taha ana ve'ia ya'wala 'aidegana gamonaya."

<sup>6</sup> Ena vona ba'e 'edewani mana tauna to'abiboda dina edi mane ana to'itamaki. Ta tauna ge danuanua lukwalukwadi weaqidi, ta 'esi ba'e 'idewani vona 'aiqa, mana tuta qabuna taunega mane nana 'idiega vanavanawala.

<sup>7</sup> Ta Iesu Iudasa ena vona ve'iea vonaya, "Unogeamo! Ba'e viaqa nana 'inega 'iva'ava'aigu agu tavuna weaqina. <sup>8</sup> \* Omi'a emi toa bwa'obwa'o 'inaya tuta qabuna lukwalukwadi maega otoatoa, ta ya'a ge tuta qabuna ba'idia omi'a maega kana toatoa."

<sup>9</sup> Iesu nawale vonavona 'inega tomotau qabudi valena inoqolia 'inega imai sabi 'itana. Ta wese nuanuadi Lasalo ina 'itea, mana lova Iesu 'oloto nana giveya'itoto 'eviviea 'aligega. <sup>10</sup> 'Inega toveguba qiduiduadi wese ivedimadima govaqa Lasalo sabi luv'e'aligina, <sup>11</sup> \* mana tauna ana giveya'itoto 'evivi 'inega me Diu 'eala ivavaukamana Iesu 'inaya ta edi vetumaqana ia'ua'uya 'inaya.

*Iesu ena lugu Ielusalema 'inaya*

*(Madiu 21:1-11; Maki 11:1-11; Luke 9:28-40)*

<sup>12</sup> Mahala vulihia 'inega 'Auvivia Sagalina ana toyo'oyavo Iesu ena mai Ielusalema weaqina valena inoqolia, <sup>13</sup> \* 'inega magimagi 'waena i'ewedi ta i'ifoqe 'abagega sabi 'ebe'ewana, ta ikolua ivonaya,

"Osana!

Yaubada kana awatuboya!

Yaubada, nuanuama tauna maimai

Kaiwabu ana wawega una vona veyolubea.

Tauna ima'a me Isileli

ema Kini una vona veyolubea!"

<sup>14</sup> Iesu taha yubai doniki kekeyavauna lobeana ta geluya, 'idewani vona 'waya'wayavina 'eno'eno Buki Nugwenugweina 'inaya vonaya,

<sup>15</sup> \* "O'a Saioni natuna mevavineu,  
ge una mwaniniva,  
u'itei, eu Kini doniki kekeyavauna  
gwavunaya gelu maimai."

<sup>16</sup> \* Ta tuta nana ba'e yani nana 'ifoqe Iesu 'inaya, 'inega ana to'abibodayavo ge nuadi da'eqa'ui ana alamani weaqina. Ta 'esi 'abibodanaya, tuta nana Yaubada ena viaqa aqiaqi otaqina 'inega Iesu 'aligega giveya'itoto 'eviviea, e 'inega Buki Nugwenugweina ena simana Iesu weaqina inuave'avinia vonigo ba'e yani nana na'ifoqe 'inaya.

<sup>17</sup> Ta tomotau qabudi lova Iesu maega itoatoa tuta nana Lasalo gabea deba'unuyega ta giveya'itotoya 'aligega, taudina nawale Iesu Valena iyawayawala dadanea tomotau 'idia. <sup>18</sup> Ta ena viaqa waiwaina be 'ebenuavoqana tomotau qabudi inoqolia, 'inega i'ifoqe 'abagega sabi damwabodana. <sup>19</sup> 'Inega Falisiavo taudiega nuanidia ivonaya, "O'itei, ita'a ge ada fata kana givelua'ui! Tomotau qabudi i'abi'abibodea!"

*Iesu madusimana ena 'aliga weaqina*

<sup>20</sup> Ta wese vaidi me Guliki ni'a i'watovu mai sabi tafwalolo sagali nana 'inaya. <sup>21</sup> Ta wese Filifi ni'a mai sagali nana 'inaya, tauna ena 'abaga Bedesaida di'we Galili gamonaya. Ta me Guliki dina itauya Filifi 'inaya, ta ivoneaya, "Kaiwabu, ima'a nuanuama Iesu ana 'itea." <sup>22</sup> Ta Filifi iana Anidulu vonea me Guliki edi nuanua weaqina. 'Inega magilafudina itauya Iesu 'inaya ta ivonea me Guliki weaqidi.

\* 12:8: Luve 15:11    \* 12:11: Ion 11:45    \* 12:13: Same 118:25-26; Ion 1:49    \* 12:15: Sek 9:9    \* 12:16: Ion 2:22

<sup>23</sup>\* 'Inega Ieisu vonedi vonaya, "Tuta ni'a mai be Yaubada nave'ita 'ifoqeyea Natuna ena aqiaqi otaqa. <sup>24</sup>\* Yavona aqiaqiem, 'eguma witi vewanina ge nahavuta bwa'obwa'o gamonaya be na'aliga, e 'inega ge wese naveve'eala. Ta 'esi 'eguma na'aliga e 'inega wese vewanina nave'eala. <sup>25</sup>\* Tomeqabu edi tuta toa bwa'obwa'oya ta yawaidi ivegagalea ina luv'e waivia. Ta 'esi tomeqabu yawaidi ina awafelea taudina yawai vataya ina lobe. <sup>26</sup> Ta wese tomeqabu ivetofewa weafigu luaqiaqiedi be ina 'abibodegu, ta ma'inaya yatoatoa e omo'e 'inaya wese egu tofewa kavovo ina toatoa. Ta tomeqabu ivetofewa weafigu taudina wese Tamagu na'amayabedi.

<sup>27</sup>\* "Giwalguyega nuavita qidwana yalulutonovia. 'Inega nuagu voqana ta ge eda alamania tola'ai ena vonei. Nage ena vonaya, "Tamagu, una 'etoyavuigu ba'e vita nana 'inega.' Ta gebu, mana ya'a yamai ba'e vita nana weaqina, ta ge wese mali 'iu weaqina. <sup>28</sup> Tamagu, ba'e 'inega au wawa awatubo nalobe."

'Inega taha bona mahalega 'ifoqe, vonaya, "Ya'a awatubo ni'a yalobe agu wawa 'inega. Ta wese nawale agu wawa awatubo naloba 'evivia."

<sup>29</sup> Ta qabu diavona omo'e 'inaya itoatoa ta bona nana inoqolia ivonaya be yavalata danununuqa, ta wese vaidi ivonaya be Yaubada ena tovale'ewa taha davonavona Ieisu 'inaya. <sup>30</sup> 'Inega Ieisu qabu dina vonedi vonaya, "Omo'e bona nana ena vona omi'a ami iula weaqina, ta ge ya'a agu iula weaqina. <sup>31</sup> Ba'itagana luvine ana tuta ni'a 'ifoqe totoa bwa'obwa'o 'idia. Ta wese ba'itagana Yaubada bwa'obwa'o ana toluvine na'wavina 'ifoqeyea. <sup>32</sup>\* Ta tuta nana ina givaneqegu bwa'obwa'oyega 'inega ya'a tomotau qabudi ena miedi 'iguya." <sup>33</sup>\* Ba'e vona nana 'inega ve'itayea ma'oda tauna na'aliga 'aiqa.

<sup>34</sup>\* 'Inega qabu diavona ive'iea ivonaya, "Ima'a ema luvine 'inaya ni'a anoqolia vonigo Keliso natoa vataya, 'inega o'a tola'ai weaqina uvonaya be Tomotau Natuna ina givaneqea? Ta ba'e Tomotau Natuna, tauna togama?"

<sup>35</sup>\* 'Inega Ieisu vonedi, vonaya, "Omi'a simatala nana tuta kukusana namo 'imia na'eno'eno, 'inega ona tauya tuta nana simatala nana nawale 'eno'eno 'imia, mana tuta goyona 'inaya velovelovana navewaiwai va'inemi. Ta 'eguma taha tomotau tautauya velovelovana 'inaya, 'inega ge dahalamaniam ma'inaya tautauya. <sup>36</sup>\* Ta 'esi emi vetumaqana ona a'uya simatala nana 'inaya tuta nana nawale 'imia 'eno'eno, be yaqisa omi'a kavona simatala nana natunavo."

Ieisu ena vona ba'e lu'ovoia, 'inega nogedi ta 'waiva 'idiega.

*Me Diu nawale ge ida vetumaqana Ieisu 'inaya*

<sup>37</sup> Ieisu viaqa waiwai ni'a viaqidi matadia, ta tua ge nuanuadi ina vetumaqanea. <sup>38</sup>\* Ta ba'e 'inega tovesimasimana Aisea ena vona ana aqiaqi 'ifoqe, vonaya, "Kaiwabu,

togama ema lugaihi davetumaqanei?

Ge taha toga!

Ta wese eda Kaiwabu ena waiwai

ve'ita 'ifoqeyea,

ta ge taha toga da'awahaqiaqiea."

<sup>39</sup> Ta ba'e 'iu nana 'inega ge adi fata ina vetumaqana, mana Aisea wese Buki Nugwenugweina 'inaya simana vonaya,

<sup>40</sup>\* "Yaubada matadi ni'a givekwayea

ta wese giwalidi givefa'alia,

'inega ge adi fata

matadiega ina 'ita,

ta wese ge adi fata

\* 12:23: Ion 13:31-32; 17:1 \* 12:24: 1Kol 15:36 \* 12:25: Md 16:25 \* 12:27: Same 6:3; 42:5; Md 26:38

\* 12:32: Ion 3:14 \* 12:33: Ion 19:6 \* 12:34: Same 110:4; Ais 9:7; Dan 7:14 \* 12:35: Ion 8:12 \* 12:36: Efe

5:8 \* 12:38: Ais 53:1 \* 12:40: Ais 6:10



nuadi na'eqa'ui giwalidiega,  
ta ge adi fata ina nuagivila 'iguya,  
mana 'eguma ida nuagivila  
'inega ya'a eda giveaiaqiedi."

<sup>41</sup> \* Aisea ba'e vona diavona 'wayavidi, mana tauna lova Ieisu ena aqiaqi otaqa 'itea 'inega wese weaqina simana. <sup>42</sup> \* Ta wese me Diu edi tovanugwetayavo koyadi Ieisu ivetumaqanea. Ta edi vetumaqana weaqina ge ida simana 'ifoqeyea, mana imwaniniva Falisi weaqidi vonigo ina a'u'ifoqeyedi vanue tafwalolo 'inega. <sup>43</sup> \* Mana tovanugweta diavona nuanuadi qiduana ina tovoloto motau matadia ta ina 'awahaqiaqiedi, ta ge ida nuanua qiduana Yaubada ena 'awahaqiaqi 'idia weaqina.

<sup>44</sup> 'Inega Ieisu bonana qiduanega vonaya, "Eguma taha toga vevetumaqanegu, 'inega tomotau nana ge ya'agumo davevetumaqanegu, ta 'esi agu Tovetune wese vevetumaqanea. <sup>45</sup> \* Ta tuta nana tovetumaqana nana 'ite'itegu, 'inega wese agu Tovetune 'ite'itea. <sup>46</sup> Ya'a yamai bwa'obwa'oya kavona simatala 'idewani, be yaqisa tomeqabu ivevetumaqanegu ge wese velovelovana 'inaya ina tautauya.

<sup>47</sup> \* "Ta 'eguma taha toga egu vona noqonoqolia ta ge damatayagea, 'inega ge wese ena luvinei, mana ya'a ge eda mai bwa'obwa'oya tomotau sabi luvinedi, ta 'esi yamai sabi 'etoyavuidi. <sup>48</sup> Ta tomeqabu inogenogegu ta egu vona ge ida 'awahaqiaqiea adi tolumine toatoa. Ta egu vona diavona ni'a ya'inatedi taudi ina luvinedi 'aubena ana 'ebel'ovoa 'inaya. <sup>49</sup> Ba'e egu vona diavona vonahaqiaqi, mana ge taugu egu luvine 'inega eda vonavona, ta 'esi agu Tovetune Tamagu ena nuanua 'inega luvinegu tola'ai ena vonayea ta wese ma'oda 'inega vona diavona ena vona 'aiqedi. <sup>50</sup> Ta yahalamani aqiaqiea vonigo ba'e luvine nana 'inega tomotau toa vataya ina lobe. 'Inega tola'ai Tamagu vonayea 'iguya ya'a wese 'idewani yavonavonayea."

## 13

*Ieisu ana to'abibodayavo* 'aqedi lu'utuya

<sup>1</sup> Tuta goyona 'inaya 'Auvivia Sagalina nave'ale. Ta Ieisu ni'a alamania ena tuta ni'a 'ifoqe be bwa'obwa'o nanogea ta natuya Tamana 'inaya. 'Inega nuanuana ena veyoluba qidua va'inena nave'itayea ana to'abibodayavo 'idia. <sup>2</sup> \* Lavilavi 'inaya iva'auta 'ai ve'wani weaqina. Ta Seitani ena nuanua ni'a a'uya Saimoni Isakaliota natuna Iudasa giwalinaya be Ieisu nasuluea. <sup>3</sup> \* Ta Ieisu ni'a alamania Tamana yani qabuna a'uya ena luvine 'ayanaya. Ta wese ni'a alamania tauna mai Yaubada 'inega, ta wese na'evivi 'inaya. <sup>4</sup> 'Inega 'ai nana nuaninaya Ieisu ya'itoto, ta ana kwakwalufai valilia 'inega tawelo 'ewea ta tolobwanaya yoqonia. <sup>5</sup> 'Abiboda go'ila guiwaqia gaebaya ta ana to'abibodayavo 'aqedi lu'utuya, ta tawelo nana tolobwanaya 'inega 'aqedi talaveayedi.

<sup>6</sup> 'Inega wese mai Saimoni Fita 'inaya 'aqena sabi 'utuna, 'inega Saimoni voneaya, "Kaiwabu, nage o'a 'aqegu una lu'utudi?"

<sup>7</sup> Ta Ieisu ve'iea vonaya, "Ba'itagana ge nuau da'eqa'uya tola'ai yaviaviaqia 'iuya, ta 'esi nawale una alamania."

<sup>8</sup> 'Inega Saimoni Fita vonaya, "Gebu, ge wese daluaqiaqieu be 'aqegu una lu'utudi!"

Ta Ieisu ve'iea vonaya, "Eguma ya'a ge ena 'utuhu, 'inega o'a ge wese egu tomotau aqiaqi."

<sup>9</sup> 'Inega Fita voneaya, "Kaiwabu, ge 'aqegumo una lu'utudi, ta 'esi nimagu ta wese 'unu'unugu maega."

<sup>10</sup> \* Ta Ieisu voneaya, "Eguma taha tomotau ni'a uweta, 'inega 'wafina qabuna ni'a vevunavunaqa ta 'esi 'aqenamo nalu'utudi. Ta omi'a qabumi vunavunaqimi, ta 'esi ta'a mona 'imiega ge wese vunavunaqina." <sup>11</sup> Ieisu ba'e 'idewani vona 'aiqa, mana

\* 12:41: Ais 6:1 \* 12:42: Ion 9:22 \* 12:43: Ion 5:44 \* 12:45: Ion 14:9 \* 12:47: Ion 3:17 \* 13:2: Lk 22:3; Ion 13:27 \* 13:3: Ion 3:35; 16:28 \* 13:10: Ion 15:3; 6:64,70-71

ni'au alamania togama nawale nasuluvea, ta ba'e 'inega vonedi ta'a mona 'idiega ge vunavunaqina.

<sup>12</sup> 'Aqedi lu'utudi gumwala, 'inega ana kwakwalufai 'autaona 'eviviea ta toabui ena 'ebetoaya. 'Inega vetala'aiedi vonaya, "Nage omi'a nuami 'eqa'uya tola'ai yaviaviaqia 'imia? <sup>13</sup> Omi'a ogabegu Tove'ita ta wese Kaiwabu. Ta aqiaqina be 'idewana ona gabegu, mana ya'a emi Tove'ita ta wese emi Kaiwabu. <sup>14</sup> \* 'Inega 'eguma ya'a emi Tove'ita ta wese emi Kaiwabu 'aqemi ni'a yalu'utudi, 'inega omi'a wese luaqiaqiemu be taumiega emiavo 'aqedi ona lu'utudi. <sup>15</sup> \* Ya'a 'ebe'ita taha ni'a yave'itemi be yaqisa omi'a ona vetutumegu. <sup>16</sup> \* Yavona aqiaqiemu, ge taha tofewa kavovo ena kaiwabu daveqidua va'inei, ta wese 'idewani ge taha tovaletuyana ana tovetune daveqidua va'inei. <sup>17</sup> Ba'e yani diavona ni'a oalamanidi, ta Yaubada navona veyolubemi 'eguma ona viaviaqidi.

*Isisu ana suluva weaqina vonavona*

*(Madiu 26:20-25; Maki 14:17-21; Luke 22:21-23)*

<sup>18</sup> \* "Ta ya'a ge eda vonavona qabumi weaqimi. Ta omi'a vevenua'ivini ni'a yahalamanimi. Ta ba'e 'inega Buki Nugwenugweina ana aqiaqi na'ifoqe, vonaya, "Oloto nana ya'a maega a'ai'ai, taunana ni'a vevoalanegu." <sup>19</sup> \* Ba'e yani nana weaqina yamaduvonemi, ta 'abiboda nalu'ifoqe aqiaqi, be yaqisa tuta nana ni'a 'ifo'ifoqe ona vetumaqanegu ya'a tauguna weaqigu yavonavona. <sup>20</sup> \* Yavona aqiaqiemu, 'eguma ya'a taha toga ena vetunei ta tomotau ina 'awahaqiaqiea, e 'inega ya'a wese i'awahaqiaqiegu. Ta tomeqabu i'awahaqiaqiegu taudi wese agu Tove'ita i'awahaqiaqiea."

<sup>21</sup> Isisu ena vona ba'e 'abibodanaya nuavita qiduana lutanovia giwalinaya 'inega simana 'ifoqe vonedia, "Yavona aqiaqiemu, omi'a tuwelo mina nuanimiega taha iami nawale nasuluvegu."

<sup>22</sup> 'Inega ana to'abibodayavo ive'ita matana, ta inuanua togama weaqina Isisu vonavona. <sup>23</sup> Isisu ana to'abiboda taha veveyolubea qiduana, ta ba'e to'abiboda nana toatoa teboloya Isisu di'wenaya. <sup>24</sup> Ta Saimoni Fita nuanuana nahalamaniamia togama weaqina Isisu vonavona, e 'inega Saimoni to'abiboda nana lumata'ifilagatea be Isisu navetala'aiea yani nana weaqina. <sup>25</sup> 'Inega to'abiboda nana tununaqo Isisu 'inaya ta vetala'aiea vonaya, "Kaiwabu, togama 'imega weaqina uvonavona?"

<sup>26</sup> 'Inega Isisu ve'iea vonaya, "Ya'a beledi ena 'ewei ena 'aubwa'uya du'waya, ta togama weaqina yavonavona e taunana beledi nana ena neia."

'Inega Isisu beledi 'ewei ta 'aubwa'uya ta ve'ineiea Iudasa Isakaliota 'inaya, tauna Saimoni natuna. <sup>27</sup> \* Ta tuta nana Iudasa beledi nana 'ewea, 'inega Seitani lugu 'inaya.

'Inega Isisu voneaya, "Tola'ai 'iba'igo una viaqi, e 'inega lukwayavonega una viaqia."

<sup>28</sup> Ta Isisu ena vona Iudasa 'inaya weaqina ge taha toga to'ai diavona 'idiega danua'eqa'ui. <sup>29</sup> 'Inega vaidi inuaia vonigo Isisu davanavona Iudasa 'inaya 'abwaga sabi gimwanena 'Auvivia Sagalina weaqina, ta wese vaidi ivonaya be Isisu davanavona 'inaya natauya lukwalukwadi sabi iuladi, mana Iudasa to'abiboda dina edi mane 'ita'itamakia. <sup>30</sup> Tuta nana Iudasa beledi nana 'ewea 'inega tutuvila tauya. Ta ni'a velovanea.

*Isisu luvine vauvauna neidi*

<sup>31</sup> \* Iudasa ena tauya 'abibodanaya Isisu vonaya, "Ba'itagana Tomotau Natuna ena aqiaqi otaqa ni'a 'ifoqe, ta wese ba'itagana Yaubada ena aqiaqi otaqa ni'a 'ifoqe Tomotau Natuna 'inega. <sup>32</sup> \* Ta 'eguma Yaubada ena aqiaqi otaqa Tomotau Natuna 'inega ni'a 'ifoqe, 'inega Yaubada wese Tomotau Natuna ena aqiaqi otaqa tauna 'inega nave'itayea tomotau 'idia. Ta ba'e yani nana Yaubada naviaqia lukwayavonega." <sup>33</sup> \* Natugwavo, tuta kukusana namo ya'a omi'a maega kana toa. Ta 'inega omi'a ona saligu, ta ona sali

\* 13:14: Md 20:28; Lk 22:27 \* 13:15: Fil 2:5; Kol 3:13; 1Fit 2:21 \* 13:16: Md 10:24 \* 13:18: Same 41:9

\* 13:19: Ion 14:29; 16:4 \* 13:20: Md 10:40 \* 13:27: Ion 13:2 \* 13:31: Ion 12:23 \* 13:32: Ion 17:5

\* 13:32: Ba'e laba nana ana 'ebeve'ale ge da'eno'eno 'wayavi nugwenugweidi 'idia. \* 13:33: Ion 7:33-34

'wayoqegu. Lova tola'ai me Diu yavonedi e ba'itagana omi'a wese 'idewani yavonavona 'aiqemi yavonaya, 'Ma'inaya yatautauya omi'a ge ami fata be ona wai 'inaya.'

<sup>34</sup>\* "Taha luvine vauvauna yaneineimi ta ana alamani ba'e: Omi'a taumiega ma emiavo ona veyolubemi. Omi'a egu veyoluba qiduana 'imia ni'a oalamani aqiaqiea, ta omi'a wese mali tomotau 'idewani ona veyoluba 'aiqedi. <sup>35</sup> Ta 'eguma taumiega ma emiavo 'idewani ona veveyolubemi, 'inega tomotau qabudi ina 'itemi ta ina alamania omi'a vonahaqiaqi agu to'abibodayavo."

*Ieisu simana* 'ifoqe Fita ena vegeqa weaqina  
(*Madiu 26:31-35; Maki 14:27-31; Luke 22:31-34*)

<sup>36</sup> 'Inega Saimoni Fita vetala'aiea vonaya, "Kaiwabu, ma'inaya utautauya?"

Ta Ieisu ve'iea vonaya, "Ba'itagana to'edia yatautauya o'a ge au fata una 'abibodegu, ta 'esi nawale una 'abibodegu."

<sup>37</sup> 'Inega wese vetala'aiea vonaya, "Kaiwabu, tola'ai weaqina ba'itagana ge agu fata ena 'abibodeu? Vonahaqiaqi, ya'a agu fata yawaigu ena awafelea o'a au ilafa weaqina."

<sup>38</sup> 'Inega Ieisu voneaya, "Nage o'a ni'a u'iva'ava'au be au fata una 'aliga weaigu, waisa? Ta 'esi yavona aqiaqieu, o'a tuta toi 'idia una vegeqegu, ta 'abiboda kamukamu nadou."

## 14

*Ieisu tauna* 'Eda Yaubada 'inaya

<sup>1</sup> 'Inega Ieisu vonedi vonaya, "Ge ona nuanua, ta 'esi Yaubada ona vetumaqanea, ta wese ya'a ona vetumaqanegu. <sup>2</sup> Tamagu ena vanuea sifaufa 'eala i'eno'eno, ta ya'a yatautauya 'inaya emi 'ebetoa sabi 'iva'ava'aina. Ta 'eguma egu vona ba'e ge vonahaqiaqi, 'inega ge wese eda vonevonemi. <sup>3</sup>\* 'Inega ena tauya ta ena 'iva'ava'aia, ta 'abiboda ena 'evivi ena mai sabi 'ebe'ewami be yaqisa omi'a tuta qabuna ya'a maega egu di'we 'inaya kana toatoa. <sup>4</sup> Ta omi'a di'we nana 'inaya yatautauya ana 'eda ni'au oalamania."

<sup>5</sup> 'Inega Tomasi Ieisu 'inaya vonaya, "Kaiwabu, ima'a ge ada alamania ma'inaya utautauya, 'inega ma'oda 'eda nana ana alamani 'aiqei?"

<sup>6</sup>\* 'Inega Ieisu vonea vonaya, "Ya'a 'Eda nana be Vonahaqiaqi ta wese Yawai 'iuna. Ta ge taha toga ana fata be nalugu Tamagu 'inaya mali 'edega, ta 'esi ya'a agu 'aidega otaqa 'iguyega nalugu. <sup>7</sup>\* 'Eguma o'a uda alamania ya'a togama, 'inega wese Tamagu uda alamania. Ta 'esi tuta ba'e 'inega ni'au ualahalamanian, ta wese ni'au u'ite'itea!"

<sup>8</sup> 'Inega Filifi vonaya, "Kaiwabu, Tamau nana una ve'itema ta matamega ana 'itea, 'inega bena'e ta'iwa ta ge wese taha tola'ai weaqina ana vetala'aieu."

<sup>9</sup>\* 'Inega Ieisu ve'iea vonaya, "Filifi, ya'a omi'a maega tuta kuena katoatoa, ta nage o'a nawale ge uda alamanigu, waisa? Ta 'eguma taha toga ya'a ni'a 'itegu, e 'inega tauna wese Tamagu ni'a 'itea. 'Inega tola'ai weaqina uvonaya, 'Tamau uve'itema'? <sup>10</sup>\* Nage ge uda vetumaqanegu vonigo ya'a be Tamagu kavona 'aidegama, ge taha ada vedumaduma? Ta ba'e egu vonayavo 'iuya ge taugumo egu nuenuega eda vonavonayedi, ta 'esi Tamagu mayawaina 'iguya toatoa ena nuanua viaviaqia 'iguyega. <sup>11</sup>\* Ta tuta nana yavonevoneu vonigo ya'a be Tamagu kavona 'aidegama 'inega una vetumaqanegu. Ta 'eguma ge au fata be ba'e vona nana una vetumaqanei, 'inega luaqiaqieu be una vetumaqanegu egu viaqa 'ebenuavoqana be viaqa waiwaidi 'idiega.

<sup>12</sup>\* "Yavona aqiaqiemi, 'eguma taha toga vevetumaqanegu 'inega tauna ana fata egu viaqa waiwaidi wese naviaqidi. Ta wese ana fata viaqa waiwai va'inedi naviaqidi, ta 'abiboda egu viaqayavo, mana ya'a yatautauya Tamagu 'inaya. <sup>13</sup>\* Ta 'eguma agu wawega toyani weaqina ona venoqiegu, 'inega ya'a ena ve'iea, mana ya'a egu viaqayavo 'idiega

\* 13:34: Ion 15:12,17; 1Ion 3:23; 2Ion 5 \* 14:3: Ion 12:26 \* 14:6: Ion 11:25; Lom 5:1-2 \* 14:7: Ion 8:19  
\* 14:9: Ion 12:45; Kol 1:15; lbe 1:3 \* 14:10: Ion 12:49 \* 14:11: Ion 10:38 \* 14:12: Mk 16:19-20 \* 14:13:  
Md 7:7; Ion 15:16

Tamagu awatubo lobelobea. <sup>14</sup> Vonahaqiaqi, 'eguma yani taha taha weaqina agu wawega ona venoqiegu, e 'inega ya'a wese ena ve'iea.

*Isisu ena vona fofofola Niboana Gwalagwalana weaqina*

<sup>15</sup> \* “Ta 'eguma omi'a oveveyolubegu 'inega tola'ai ni'a yavonayedi 'imia ona matayagedi. <sup>16</sup> \* 'Inega Tamagu ena venoqiea ta Toiula taha wese navetunei namai 'imia ta tuta qabuna maega ona toatoa, <sup>17</sup> \* ta tauna vonahaqiaqi Niboanina. Ta bwa'obwa'o ana tomotauyavo Niboani nana ge ina 'awahaqiaqiei, mana ge ida 'itei ta ge ida alamaniana. Ta 'esi omi'a ni'a oalamaniana, mana tauna omi'a maega otoatoa, ta wese tauna giwalimia 'eno'eno. <sup>18</sup> Ta ya'a ge wese ena nogemi be ona vetamatama geqa, ta 'esi ena mai 'imia. <sup>19</sup> Tuta kukusana 'inaya totoa bwa'obwa'o ge wese ina 'itegu, ta 'esi omi'a ona 'itegu, mana ya'a ena yawaha 'evivi ta 'inega omi'a wese mayawaimi ona toatoa. <sup>20</sup> \* Ta tuta nana ena ya'itoto 'evivi 'aligega, 'inega omi'a ona alamani aqiaqiea vonigo ya'a be Tamagu 'aidegama, ta wese omi'a be ya'a 'aidegada. <sup>21</sup> Ta tomeqabu egu vonayavo ivelumamatayagedi taudina wese iveveyolubegu. Ta Tamagu naveyolubedi, mana taudi iveveyolubegu, ta ya'a wese ena veyolubedi. Ta tauguyega ena ve'ita 'ifoqeyegu taudi 'aidega 'aidega matadia.”

<sup>22</sup> Ta Iesu ana to'abiboda 'idiega Iudasa magilafudi itoatoa. Taha Iudasa Isakaliota ta wese mali Iudasa. 'Inega mali Iudasa nana Iesu 'inaya vonaya, “Kaiwabu, tola'ai weaqina ima'a mamu 'imaya una ve'ita 'ifoqeyeu, ta gebu totoa bwa'obwa'o qabudi 'idia?”

<sup>23</sup> Ta Iesu voneaya, “Eguma taha toga veyoluba aqiaqiegu 'inega egu vonayavo namatayagedi. 'Inega Tamagu naveyolubea ta ima'a ana mai 'inaya ta maega ana toa. <sup>24</sup> \* Ta 'eguma taha toga ge daveyolubegu taunana egu vonayavo ge nuanuana namatayagedi. Ta ona nuave'avinia be ya'a egu vonayavo ge taugu 'iguyega ida 'ifo'ifoqe, ta 'esi ba'e simana nana agu Tovetune Tamagu 'inega i'ifo'ifoqe.

<sup>25</sup> “Ya'a nawale omi'a maega katoatoa, e 'inega ba'e yani diavona weaqidi ba'itagana yavonevonemi. <sup>26</sup> Tamagu agu wawa 'inega Niboana Gwalagwalana tauna ami Toiula navetunei 'imia, ta Toiula nana yani taha taha weaqina nave'itemi, ta wese egu vonayavo qabudi 'imia weaqidi nagivenuaha'uyemi. <sup>27</sup> Ya'a nuadaumwala 'iuna, ta yatautauya be nuadaumwala nana ba'idia yaha'uya omi'a maega. Ya'a nuadaumwala nana yaneineimi. Ta egu nuadaumwala nana ge wese totoa bwa'obwa'o adi fata be ina neimi, mana egu nuadaumwala ge davelelelea totoa bwa'obwa'o edi nuadaumwala maega. 'Inega ge ona nuanua ta wese ge ona mwaniniva. <sup>28</sup> \* Ta ni'a egu vona onoqolia tuta nana yavonemia, 'Ya'a yatautauya, ta ena 'evivi mai 'imia.' 'Eguma omi'a oda veyoluba aqiaqiegu 'inega oda qaiawa qiduana egu tauya Tamagu 'inaya weaqina, mana tauna veqidua va'inegu. <sup>29</sup> \* Ba'e yani diavona weaqidi ba'itagana ni'a yavonevonemi ta 'abiboda ana tuta na'ifoqe. Ba'e 'idewani yamaduvonemi be yaqisa ona vetumaqanegu tuta nana ana aqiaqi ona 'itea. <sup>30</sup> Ge agu fata be wese ena veqae 'imia tuta kuena, mana bwa'obwa'o ana tolumine maimai. Tauna ge wese ana fata navewaiwai va'inegu, <sup>31</sup> ta totoa bwa'obwa'o luaqiaqiedi be ina alamaniana vonigo ya'a Tamagu yaveveyolubea. Ba'e 'iuna 'inega ena vona qabudi 'iguya yaviaviaqidi.

“Omai, vanue ba'ena kana nogea.

## 15

*Isisu tauna wayo 'oine aqiaqina*

<sup>1</sup> “Ya'a wayo 'oine aqiaqina, ta Tamagu tauna tovaoqa. <sup>2</sup> \* Tauna laqa vuaqa geqadi da'ada'a yavuledi, ta 'esi laqa ma vuaqidi ya'evidi goyogoyodi da'ada'a yavuledi be yaqisa vuaqidi nave'eala wawasai. <sup>3</sup> Ta omi'a egu vona 'imia 'inega ni'a ya'etalaya'evimi be yaqisa vuaqimi nave'eala. <sup>4</sup> Omi'a ya'a maega ni'a katubwe, 'inega tubwetubwemi ona

\* 14:15: Ion 15:10; 1Ion 5:3 \* 14:16: Ion 14:26; 15:26; 16:7 \* 14:17: Ion 16:13 \* 14:20: Ion 17:21-23  
\* 14:24: Ion 7:16 \* 14:28: Ion 20:17 \* 14:29: Ion 13:19 \* 15:2: Md 3:10

toatoa 'iguya, 'inega ya'a wese tubwetubwegu ena toatoa 'imia. Laqa daisina ge ana fata navuaqa 'eguma ge datubwe wayo nana maega. Ta wese omi'a 'idewanina ge ami fata be ona vuaqa aqiaqi 'eguma ge oda tubwe'i'ita 'iguya.

<sup>5</sup> “Ya'a wayo 'oine ta omi'a laqanavo. Ta 'eguma taha toga tubwetubwena natoatoa 'iguya, 'inega ya'a wese 'inaya ena toatoa, 'inega navuaqa aqiaqi. Ta ge ami fata taha yani aqiaqina ona viaqi 'eguma ona toasi'i 'iguyega. <sup>6</sup>\* Ta 'eguma taha toga ge datubwe 'iguya, e tauna kavona laqa da'ada'a yavulina ta kwavuuqina. Ba'e laqa diavona ina lu'auqidi ta ina fela luguyedi 'aiwea ta na'ala 'ovoidi. <sup>7</sup>'Eguma omi'a ya'a maega katubwe aqiaqi katoatoa, ta wese egu vonayavo itubwe omi'a maega, 'inega ami fata yani taha taha weaqina ona venoqi, ta ya'a emi venoqi nana ena ve'iea 'imia. <sup>8</sup>\* Omi'a agu to'abiboda 'eguma vuaqa aqiaqi otaqina na'ifoqe 'imiega. Ta wese ba'e 'inega Tamagu ena aqiaqi otaqa ona ve'ita 'ifoqeyea tomotau 'idia.

<sup>9</sup> “Ya'a egu veyoluba 'imia kavona Tamagu ena veyoluba 'iguya 'edewani. 'Inega egu veyoluba nana 'inaya ona toatoa. <sup>10</sup>\* Ta 'eguma egu luvineavo ona matayagedi 'inega egu veyoluba tuta qabuna 'inaya ona toatoa, 'idewani ya'a Tamagu ena luvineavo yamatamatayagedi ta ena veyoluba 'inaya tuta qabuna yatoatoa. <sup>11</sup> Ba'e yani diavona ni'a yavonemi be yaqisa ya'a egu qaiawa 'imia na'eno'eno, 'inega emi qaiawa naveqidua kavona ya'a egu qaiawa 'idewani.

<sup>12</sup>\* “Ta egu luvine ana alamani ba'e: Omi'a taumiega ma emiavo ona veyolubemi, 'idewani ya'a yavevevolubemi! <sup>13</sup>\* 'Eguma taha toga yawaina nahawafelea iana weaqina, 'inega taunana ena veyoluba qidua va'inena ve'ita 'ifoqeyea 'aliga nana 'inega. Ta ge taha toga ana fata ena veyoluba 'inega ba'e veyoluba nana naveqidua va'inei. <sup>14</sup>\* 'Eguma omi'a egu luvine ona viaqidi 'inega omi'a egwavo. <sup>15</sup> Ya'a ge wese ena gabemi tofewa kavovo, mana tofewa kavovo edi kaiwabuyavo edi viaqayavo fo'una ge ida alamani aqiaqiei. Ta 'esi yagabemi egwavo, mana yani qabuna yanoqolia Tamagu 'inega ni'a yasimana 'ifoqeyedi 'imia. <sup>16</sup> Omi'a ge oda venua'ivinegu, ta 'esi ya'a yavenua'ivinemi ta ami veyoveyoa yaneimi be ona tauya tomotau 'idia ta 'imiega vuaqa aqiaqina na'ifoqe, ta vuaqa nana ge wese nadavula. 'Inega toyani weaqina ovevenoqi Tamagu 'inaya agu wawega wese naneimi. <sup>17</sup>\* Ta egu luvine ba'e: Taumiega ma emiavo ona veyolubemi.”

*Totoa bwa'obwa'o Iesu ana to'abibodayavo ivevoalanedi*

<sup>18</sup> Ta wese Iesu vonedi vonaya, “Eguma totoa bwa'obwa'o ina vevoalanemi 'inega ona nuave'avinia ya'a imaduvevoalanegu. <sup>19</sup>\* Totoa bwa'obwa'o ida veyolubemi 'eguma omi'a edi tomotauyavo. Ta omi'a ge totoa bwa'obwa'o edi tomotauyavo, ta 'esi 'idiega ni'a yavenua'ivinemi, ta ba'e weaqina ivevevoalanemi. <sup>20</sup>\* Ta egu vonayavo ni'a ya'inatedi 'imia ge ona nuafanidi, ta vona diavona ba'e: 'Tofewa kavovo ena kaiwabu ge daveqidua va'inea.' Ta 'eguma ya'a ivevoalanegu, 'inega omi'a wese ina vevoalanemi. Ta 'eguma egu ve'ita imatamatayagea, 'inega omi'a wese emi ve'ita ina matayagea. <sup>21</sup> Ba'e 'idewanina ina veilivu 'aiqemi agu wawa weaqina, mana agu Tovetune ge ida alamaniana. <sup>22</sup> 'Eguma ya'a ge eda maimai totoa bwa'obwa'o 'idia ta ge wese eda vonavona 'idia, 'inega ge wese adi ve'ewamo edi luveifana weaqina. Ta vonahaqiaqi, ni'a yamai 'idia ta yave'itedi 'inega ge wese taha toga ana fata ena luveifana navegeqei.

<sup>23</sup>\* “Eguma taha toga vevevoalanegu, 'inega tauna wese Tamagu vevevoalanea. <sup>24</sup> Ya'a egu viaqa waiwaidi ni'a yaviaviaqidi lova ge taha toga 'idewani daviaqia. Ta 'eguma ge ida 'itegu ba'e viaqa diavona yaviaviaqidi, 'inega ge wese adi 'ebeve'ewamo. Ta 'esi ni'a i'itegu viaqa diavona yaviaviaqidi, ta tua nawale ivevevoalanegu ta wese Tamagu ivevevoalanea. <sup>25</sup>\* Ta me Diu ba'e edi ilivu 'inega edi luvine 'waya'wayavina ana aqiaqi

\* 15:6: Md 7:19; 13:42 \* 15:8: Md 5:16 \* 15:10: Ion 14:15; 11on 2:5 \* 15:12: Ion 13:34 \* 15:13: Ion 10:11; 11on 3:16 \* 15:14: Md 12:50 \* 15:17: Ion 13:34 \* 15:19: Ion 17:14 \* 15:20: Ion 13:16 \* 15:23: Lk 10:16 \* 15:25: Same 35:19; 69:4

'ifoqe vonaya, 'Taudi edi vevoalana 'iguya ge wese ana 'iumo.' <sup>26</sup>\* Ta ya'a ami Toiula ena vetunea 'imia, tauna vonahaqiaqi Niboanina. Tauna namai 'imia Tamagu 'inega, ta yani qabuna weaqigu nasimana 'ifoqeyea 'imia. <sup>27</sup> Ta omi'a wese 'idewani yani qabuna weaqigu ona simana 'ifoqeyea tomotau 'idia, mana omi'a ya'a maega katoatoa egu ve'ita ana 'ebeve'ale 'inega be ana laba ba'itagana.

## 16

<sup>1</sup> "Ba'e egu vona diavona ni'a yavonemi weaqidi be yaqisa ge ona tauya gei. <sup>2</sup>\* Ta ina 'wavi 'ifoqeyemi edi vanue tafwalolo 'idiega, ta wese yavona aqiaqiemu nawale taha tuta maimai 'inaya ina luve'aligimi, ta toluve'aliga dina ina nuaia vonigo edi luve'aliga 'inega Yaubada ena nuanua be ena fewa ida viaviaqi. <sup>3</sup>\* Ba'e yani diavona ina viaqidi, mana Tamagu be ya'a ge ida alamanima. <sup>4</sup> Egu vona 'imia ba'e 'idewani be yaqisa tuta nana ba'e yani diavona ona lobedi 'inega ona nuave'avinia vonigo ya'a ni'a yamaduvonemi vita nana weaqina. Ta ba'e yani diavona weaqina lova ge eda vonemi mana ya'a omi'a maega katoatoa.

### *Niboana Gwalagwalana ena fewa*

<sup>5</sup> "Ta ba'itagana yatautauya agu Tovetune 'inaya, ta ge taha toga 'imiega davetala'aiegu ma'inaya yatautauya. <sup>6</sup> Ta 'esi egu vona diavona weaqidi nuami vita qiduana. <sup>7</sup>\* Ta yavona aqiaqiemu, ya'a omi'a emi toa aqiaqina weaqina yatautauya. Mana 'eguma ge ena tauya, 'inega ami Toiula ge wese namai, ta 'esi 'eguma yatautauya 'inega ena vetunei namai 'imia. <sup>8</sup> Ta tutana Toiula nana namai 'inega tauna totoa bwa'obwa'o edi luveifana nave'ita 'ifoqeyea 'idia, ta wese nave'itedi taudi Yaubada ena ilivu tunutunuqina ge ida alamania, ta wese nave'itedi Yaubada ena luvine weaqina toveilivu veifa 'idia. <sup>9</sup> Ta totoa bwa'obwa'o edi luveifana 'iuna mana ge ida vetumaqanegu. <sup>10</sup> Ta wese Yaubada ena ilivu tunutunuqina ge ida alamania, mana ya'a yatautauya Tamagu 'inaya, ta omi'a ge wese ona 'itegu. <sup>11</sup>\* Ta wese luvine tunutunuqina weaqina ge ida alamania, mana Yaubada bwa'obwa'o ana toluvine ni'a luvinea.

<sup>12</sup>\* "Nuanuagu wese yani qabuna weaqidi ena vonemi, ta ba'itagana ge ami fata be nuami na'eqa'ui vona diavona weaqidi. <sup>13</sup> Ta tuta nana vonahaqiaqi Niboanina namai, 'inega wese vonahaqiaqi qabuna nave'itemi. Tauna ge taunega navonavona, ta 'esi tola'ai noqonoqolia Yaubada 'inega nasimana 'ifoqeyea 'imia, ta wese navonemi tuta maimai weaqina. <sup>14</sup> Ta tauna egu aqiaqi otaqina nave'itayea 'imia, mana vona diavona 'iguyega nanoqonoqolidi, ta navonavonayedi 'imia. <sup>15</sup> Yani qabuna Tamagu 'inaya 'eno'eno wese ya'a egu yaniavo. E ba'e 'inega ni'a yamaduvonemi toyani 'iguyega Niboana 'ewe'ewe wese nave'ifoqeyea 'imia."

### *Nuavita nagivilea qaiawa 'inaya*

<sup>16</sup>\* Ta wese Iesu ana to'abibodayavo vonedia, "Ya'a tuta goyona ena nogemi, ta omi'a ge wese ona 'itegu. 'Inega tuta kukusana 'abibodanaya wese ona 'ita 'eviviegu."

<sup>17</sup> 'Inega to'abiboda dina taudiega ivetala'aiedi ivonaya, "Ma'oda vonavona 'aiqa tuta nana vonedaya, 'Ya'a tuta goyona ena nogemi, ta omi'a ge wese ona 'itegu. 'Inega tuta kukusana 'abibodanaya wese ona 'ita 'eviviegu.' Ta wese vonedia vonaya, 'Mana ya'a yatautauya Tamagu 'inaya.'" <sup>18</sup> Ta wese taudiega ivetala'aiedi ivonaya, "Iesu ena vona, 'tuta goyona', ma'oda ana alamani? Ita'a ge wese nuada da'eqa'ui."

<sup>19</sup> Iesu ni'a alamania taudi nuanuadi ina vetala'aiea, 'inega vonedi vonaya, "Nage omi'a ovevetala'ai nuanimia egu vona weaqina? Mana ni'a yavonemi tuta goyona 'inaya ena nogemi, ta ge ona 'itegu. 'Inega tuta kukusana 'abibodanaya ona 'ita 'eviviegu. <sup>20</sup> Yavona aqiaqiemu, omi'a ona duvoyavoya ta ona nuavita, ta 'esi totoa bwa'obwa'o qabudi ina qaiawa. Omi'a ona dou, ta dou nana nagivilea ona qaiawa.

\* 15:26: Ion 14:26 \* 16:2: Md 24:9; Lk 6:22; Ion 9:22 \* 16:3: Ion 15:21 \* 16:7: Ion 14:16 \* 16:11: Ion 12:31 \* 16:12: 1Kol 3:1-2 \* 16:16: Ion 14:19

<sup>21</sup> “Tovenatuna visiqa ilulutonovia edi uweta ana tuta 'inaya, ta 'esi gwama ena vi'oi 'abibodanaya visiqa nana inuafania ta iqaiqaiawa natudi weaqina, mana taudi tomotau vauvauna ni'a ive'ifoqeyea bwa'obwa'o 'inaya. <sup>22</sup> Ta omi'a wese tovenatuna nana 'idewani, mana ba'itagana onuavita qiduana, ta nawale ya'a omi'a maega kana veloba 'evivi, e 'inega wese ona qaiawa aqiaqi. Ta ba'e qaiawa nana ge taha toga ana fata be na'ewa yavulei 'imiega. <sup>23</sup> \* Ta omo'e tuta nana 'inaya ge wese ona venoqiegu yani taha taha weaqina, mana ami fata be tunutunuqina ona tauya Tamagu 'inaya ta agu wawega ona venoqiea yani nana weaqina ta tauna nave'iem. <sup>24</sup> Lova ge taha tuta oda venoqiegu yani taha taha weaqina agu wawega, ta 'esi ba'itagana luaqiaqiemi be ona venoqi agu wawega. 'Inega emi venoqiavo nave'iedi be yaqisa ge taha toga ana fata emi qaiawa na'ewa yavulei 'imiega.

<sup>25</sup> “Egu vona diavona ba'ena vona sesebai 'inega yavonayedi 'imia, ta nawale taha tuta 'inaya vona tunutunuqina 'inega ena vonemi Tamagu weaqina. <sup>26</sup> 'Inega Tamagu ona venoqiea ya'a agu wawega, ta ge wese ena venoqi weaqimi Tamagu 'inaya, <sup>27</sup> \* mana Tamagu taunega veveyolubemi qiduana. Ta ena veyoluba qiduana 'imia 'iuna, mana omi'a oveyolubegu ta wese ovetumaqana vonigo ya'a Yaubada 'inega yamai. <sup>28</sup> Lova Tamagu 'inega yamai bwa'obwa'oya, ta ba'itagana ba'e bwa'obwa'o yanogenogea ta ya'evivi yatautauya Tamagu 'inaya.”

<sup>29</sup> 'Inega leisu ana to'abibodayavo ivonea ivonaya, “Ba'itagana ge vona sesebai 'inega uda vonavona 'imaya, ta 'esi vona tunutunuqina 'inega. <sup>30</sup> Ta wese ba'itagana ni'a ahalamania o'a yani qabuna ualamani aqiaqiedi. 'Inega 'eguma tomotau taha yani weaqina nuanuadi ina vetala'aieu, ta nawale ge ida voneu, 'inega o'a vetala'ai nana ni'a umadualamania. Ta ba'e 'inega avetumaqaneu o'a Yaubada 'inega umai.”

<sup>31</sup> 'Inega leisu vonedia, “Ba'itagana omi'a ovetumaqana aqiaqiegu, waisa? <sup>32</sup> \* Vonahaqiaqi, taha tuta namai, ta tuta nana ni'a 'ifoqe, 'inega omi'a qabumi ona nogegu ta ona ve'iyavula emi 'abagayavo 'idia. Ta ya'a ge agu 'aidega otaqa ena toa, mana ya'a Tamagu maega atoatoa. <sup>33</sup> \* Ba'e yani diavona weaqina ni'a yavonemi be yaqisa eda ve'aidega 'inega nuadaumwala ona lulutonovia. Vonahaqiaqi, vita taha taha ona vebaedi emi toa ba'e bwa'obwa'o 'inaya. Ta 'esi me emi giwalifatu ona toatoa, mana ya'a bwa'obwa'o ana tovewaiwaiavo ni'a yavewaiwai va'inedi.”

## 17

### *leisu taunega weaqina vevenoqi Tamana 'inaya*

<sup>1</sup> leisu ena vona to'abiboda dina 'idia gumwala, 'inega 'ita vane mahalaya ta venoqi vonaya,

“Tamagu, ni'a egu tuta mai. 'Inega ya'a Natuhu egu aqiaqi otaqa una ve'ifoqeyea, be yaqisa ya'a wese eu aqiaqi otaqa 'iguyega ena ve'ifoqeyea 'iuya. <sup>2</sup> Mana o'a 'abiluvine ni'a uneigu 'inega ya'a tomotau qabudi bwa'obwa'oya adi Toluvine. 'Inega tomotau qabudi ni'a uneigu ya'a agu fata toa vataya ena neidi. <sup>3</sup> \* Ta toa vataya ana alamani ba'e: Vonigo o'a ina alamani aqiaqieu, mana o'a au 'aidega otaqa Yaubada aqiaqi. Ta wese ina alamanigu ya'a leisu keliso o'a au vevetune. <sup>4</sup> \* Ta agu veyoveyoa lova uneigu adi viaqa 'ovoa 'inega eu aqiaqi otaqa yave'itayea tomotau 'idia. <sup>5</sup> \* Tamagu, una 'ebe'ewegu eu di'we aqiaqina 'inaya, ta omo'e 'inaya eu 'amayaba una ve'itayea 'iguya kavona lova u'amayabegu 'idewani, be ya'a wese ya'amayabeu 'idewani tutana 'aideganaya katoatoa. Ta omo'e tuta nana 'inaya bwa'obwa'o be kuyavata qabudi nawale ge uda viaqidi.

### *leisu vevenoqi ana to'abibodayavo weaqidi*

\* 16:23: Md 7:7 \* 16:27: Ion 14:21,23 \* 16:32: Md 26:31,56 \* 16:33: Ion 14:27; Lom 5:1; 1Ion 5:4 \* 17:3: 1Ion 5:20 \* 17:4: Ion 4:34 \* 17:5: Ion 1:1

<sup>6</sup> “Ta tomeqabu ni’a uneigu totoa bwa’obwa’o qabudi ’idiega au wawa ni’a yasimana ’ifoqeyea ’idia. Lova taudina o’a eu tomotauyavo, ta uve’ineiedi ’iguya ta eu vona ni’a imatayagea. <sup>7</sup> Ta ba’itagana ni’a ialamania vonigo yani qabuna ni’a uneigu ’iuyega ’ifo’ifoqe, <sup>8</sup> mana o’a eu vonayavo ni’a uneigu wese yaneidi ta i’awahaqiaqiedi. Taudi ialamani aqiaqiea ya’a ’iuyega yamai, ta wese ivetumaqana vonigo o’a uvetunegu.

<sup>9</sup> “Yavevenoqi taudi weaqidi, ta ge eda vevenoqi totoa bwa’obwa’o weaqidi, ta ’esi yavevenoqi tomeqabu ni’a uneigu weaqidi, mana taudi o’a eu tomotauyavo. <sup>10</sup> Ta yani qabuna ’iguya ’eno’eno e wese o’a eu yaniavo, ta yani qabuna ’iuya ’eno’eno wese ya’a egu yaniavo. Ta egu aqiaqi otaqa ba’e yani diavona iveve’ifoqeyea. <sup>11</sup> Ya’a ge wese ena toatoa bwa’obwa’o ba’e ’inaya, ta ’esi egu tomotauyavo nawale itoatoa bwa’obwa’oya, ta ya’a yawaiwai ’iuya. Tamagu Gwalagwalau, una vabodebodedi au wawa ena waiwai ’inega, ta ba’e wawa nana ni’a uneigu be yaqisa taudi ina ve’aidega ’idewani o’a be ya’a ni’a kave’aidega. <sup>12</sup> \* Ta tuta nana taudi maega atoatoa ya’a yavabodebodedi ta wawa nana uneigu ’inega ya’itamaki aqiaqiedi. Ge taha toga ’idiega daluve’waiva, ta ’esi ’oloto ’aideganamo veilage vataya ana luvine lobebe yaqisa Buki Nugwenugweina ena vona ana aqiaqi na’ifoqe.

<sup>13</sup> “Ya’a ba’itagana yawaiwai ’iuya, ta ba’e egu vona diavona ni’a yavonayedi tuta nana nawale ba’idia bwa’obwa’oya yatoatoa, be yaqisa to’abiboda dina egu qaiawa qiduana taudi wese qaiawa nana giwalidia ’idewani naluveagatuna’idi. <sup>14</sup> Ya’a eu vona ni’a yaneidi, ta totoa bwa’obwa’o ivevoalenedi, mana to’abiboda dina taudi ge totoa bwa’obwa’o edi qabuyavo ’idewani ya’a wese ge totoa bwa’obwa’o edi qabu ’inega. <sup>15</sup> \* Ge eda vevenoqieu be vonigo una ’ewa ’ifoqeyedi bwa’obwa’o ’inega, ta ’esi yavevenoqieu be una vabodebodedi Seitani ’inega. <sup>16</sup> Taudi ge totoa bwa’obwa’o edi qabuyavo, ’idewani ya’a wese ge edi qabu. <sup>17</sup> Una givegwaledi eu vonahaqiaqi ’inega, mana o’a eu vona qabuna vonahaqiaqi. <sup>18</sup> \* O’a uvetunegu yamai bwa’obwa’oya, ta ya’a wese ’idewani ni’a yavetunedi totoa bwa’obwa’o ’idia. <sup>19</sup> Ta taudi weaqidi tauguyega yagivegwalege be yaqisa taudi wese ina vegwalagwala otaqa.

#### *Iesu vevenoqi tovetumaqana qabudi weaqidi*

<sup>20</sup> “Ta egu venoqi ’iuya ge to’abiboda dimo weaqidi. Ta wese tomeqabu nawale ina vetumaqanegu to’abiboda dina edi simana ’inega weaqidi yavevenoqi. <sup>21</sup> Tamagu, yavevenoqi tovetumaqana qabudi weaqidi be ina ve’aidega, ’idewani o’a be ya’a ni’a kave’aidega. Ta nuanuagu taudi ita’a maega kana ve’aidega be yaqisa totoa bwa’obwa’o ina vetumaqana vonigo o’a uvetunegu. <sup>22</sup> \* O’a lova u’amayabegu, ta ya’a wese ’idewani ’amayaba nana ni’a yave’itayea ’idia be yaqisa ina ve’aidega ’idewani o’a be ya’a ni’a kave’aidega. <sup>23</sup> Ya’a taudi maega ni’a ave’aidega, ’idewani o’a be ya’a wese ni’a kave’aidega. Ta nuanuagu una va’au’auqidi be ina ve’aidega aqiaqi totoa bwa’obwa’o sabi ve’itadi vonigo o’a uvetunegu ta uveveyolubedi ’idewani ya’a uveveyolubegu.

<sup>24</sup> “Tamagu, nuanuagu tomeqabu ni’a uneigu ya’a maega ana toatoa egu ’abaga ’inaya, ’inega egu aqiaqi otaqa ina ’itea. Ba’e aqiaqi nana lova ni’a uneigu mana umaduvevolubegu, ta ’abibodanaya bwa’obwa’o u’iva’ava’aia. <sup>25</sup> Tamagu, o’a toveilivu tunutunuqina! Toota bwa’obwa’o ge ida alamaniu, ta ’esi ya’a yahalamaniu, ta taudi ialamania o’a uvetunegu. <sup>26</sup> Ya’a au wawa ni’a yave’ita ’ifoqeyea ’idia, ta wese tuta qabuna ena veve’itayeu ’idia, be yaqisa o’a eu veyoluba weaqigu taudi wese ina alamania ta giwalidia na’eno’eno. Ta ba’e ve’ita ’ifoqe nana ’inega ni’a yatubwe aqiaqi taudi maega, ta wese taudi ya’a maega ave’aidega aqiaqi.”

## 18

### *Iesu ana kafi weaqina*

*(Madiu 26:47-56; Maki 14:43-50; Luke 22:47-53)*

\* 17:12: Ion 6:39; 13:18 \* 17:15: Md 6:13; 2Te 3:3 \* 17:18: Ion 20:21 \* 17:22: Via 4:32



<sup>1</sup> Ieisu ena venoqi lu'ovoia, 'inega ma ana to'abibodayavo itutuvila itauya 'Awagou Kidiloni 'inaya ivaukamana mali di'wenaya. Ta omo'e 'inaya 'aiwe olibe talaqina 'eno'eno, ta Ieisu ana to'abibodayavo maega ilugu 'inaya.

<sup>2</sup> Ta ana tosuluva Iudasa ba'e di'we nana alamani aqiaqiea, mana Ieisu ana to'abibodayavo maega 'evisa tuta omo'e 'inaya itautauya sabi va'auta. <sup>3</sup> 'Inega Iudasa mai talaqa nana 'inaya. Ta Iudasa nana vaina qabu vanugwetedi di'we nana 'inaya, e taudi tovedavi be wese me Diu adi tolumineavo 'idiega toveguba qiduquduadi be wese Falisiavo edi qabu 'inega miedi. Ta me edi odamu be lamufa, ta wese 'ebevedavi ikafidi imiedi.

<sup>4</sup> Ta Ieisu edi dima govaqa ni'a alamania 'inega talaqega 'ifoqe ta tufwana vanaqo qabu dina 'idia, 'inega vetala'aiedi vonaya, "Togama osalisalia?"

<sup>5</sup> Ta ive'iea ivonaya, "Ieisu Nasaleta 'olotona asalisalia!"

Ta Ieisu vonedia, "Ya'a taugu ba'e." Ta tuta nana Ieisu taunega weaqina simana 'ifoqe 'idia, e 'inega Iudasa qabu diavona maega wese itovotovololo. <sup>6</sup> Ta tuta nana Ieisu tawadega vonaya, "Ya'a taugu ba'e." E 'inega qabu diavona 'e'avala buinidi gwavudiega bwa'obwa'oyal!

<sup>7</sup> 'Inega wese tuta vemagilafuna Ieisu vetala'aiedi vonaya, "Togama weaqina osalisali, waisa?"

Ta taudi wese ive'iea ivonaya, "Ieisu Nasaleta 'olotona asalisalia."

<sup>8</sup> 'Inega Ieisu vonedia, "Tawadega yavonemi ya'a taugu ba'e. Ta 'eguma osalisaligu sabi kafigu, 'inega ba'e 'oloto diavona ona nogedi ina tauya." <sup>9</sup> \* Ta ba'e yanina 'ifoqe be yaqisa tola'ai Ieisu ni'a maduvonayea ana aqiaqi na 'ifoqe, vonaya, "Tomeqabu ni'a uneigu ge taha toga 'idiega eda luve'waivi."

<sup>10</sup> Ta Saimoni Fita me ena kefata totoa, 'inega siwaia ta toveguba edi tovanugweta ena tofewa kavovo taniqa 'ataqina da'a yavulea. (Ta tofewa nana ana wawa Makusi.) <sup>11</sup> \* 'Inega Ieisu Fita luvinea vonaya, "Eu kefata ua'u'eviviei! Tamagu veilaqe qiduana ana vedi neigu, ta ya'a agu fata be vedi nana ena numea."

*Ieisu ikafia ta itauyeya toveguba qiduana Anasa 'inaya*

<sup>12</sup> 'Inega tovedavi ma adi tovatatana, ta wese Vanue Gwalagwalana ana to'itamakiavo Ieisu ikafia ta iyoqonia. <sup>13</sup> Nugweta itauyeya Anasa 'inaya, tauna Kaiafa lawana. Ta Kaiafa nana tauna toveguba edi tovanugweta omo'e ya'wala nana 'inaya. <sup>14</sup> \* Ta Kaiafa nana tauna lova me Diu ni'a vonedi vonigo yani aqiaqina 'eguma taha tomotau ana 'aidegamo na'aliga tomotau qabudi weaqidi.

*Fita ena vegeqa*

*(Madiu 26:69-70; Maki 14:66-68; Luke 22:55-57)*

<sup>15</sup> Ta Saimoni Fita ta wese taha to'abiboda maega Ieisu italatala'obea. Ta toveguba edi tovanugweta ni'a alamania ba'e to'abiboda nana, 'inega awafelea ta Ieisu maega ilugu toveguba qiduana ena 'ebevekotu 'inaya. <sup>16</sup> Ta Fita ge ana fata nalugu, 'inega toa masu'edanaya ta ba'eba'eyedi. 'Inega to'abiboda nana 'evivi 'awaya, ta taha tofewa kavovo iahabana 'awa nana 'ita'itamakia maega iveveqae, 'inega tofewa nana Fita awafelea be ana fata wese nalugu 'ebevekotu 'inaya. <sup>17</sup> 'Inega iahaba nana Fita vetala'aiea vonaya, "Nage o'a wese ana to'abiboda taha, waisa?"

Ta Fita ve'iea vonaya, "Ya'a gebul!" <sup>18</sup> Ta tofewa kavovoyavo be wese to'itamakiavo qabudi 'aiwe ivavivilia ta ivevetaluvala, mana guga'u vunuqidi. Ta wese Fita qabu dina maega itovotovololo ta vevetaluvala.

*Toveguba qiduana Ieisu vetala'aiea*

*(Madiu 26:59-66; Maki 14:55-64; Luke 22:66-71)*

<sup>19</sup> 'Inega toveguba edi tovanugweta Ieisu vetala'aiea ana to'abibodayavo be ena ve'itayavo weaqidi. <sup>20</sup> Ta Ieisu ve'iea vonaya, "Ya'a tuta qabuna yaveve'ita me Diu edi 'ebetoa va'auta 'inaya 'idewani vanue tafwalolo ta wese Vanue Gwalagwalana 'idia. Ta

\* 18:9: Ion 17:12 \* 18:11: Md 26:39 \* 18:14: Ion 11:49-51

ge taha yani 'waivega eda vonayedi. <sup>21</sup> 'Inega tola'ai weaqina uvevetala'aiegu? Ta 'esi tomeqabu egu vona ni'a inoqolia una vetala'aiedi. Taudi ialamani aqiaqiea tola'ai ni'a yavonayea."

<sup>22</sup> Ta tuta nana Iesu ba'e 'idewani vona 'aiqa 'inega taha to'itamaki di'wenaya tovtovolo 'iawanaya vunuqa ta lugwaeyea vonaya, "Nage o'a luaqiaqieu be ba'e 'idewani una vona 'aiqa toveguba edi tovanugweta 'inaya, waisa?"

<sup>23</sup> 'Inega Iesu ve'iea vonaya, "Eguma ya'a taha vona luveifana ya'inanea e 'inega luveifa nana una simana 'ifoqeyea. Ta 'esi 'eguma ya'a egu vonayavo qabudi vonahaqiaqi, 'inega tola'ai weaqina u'au'iawegu?" <sup>24</sup> 'Inega Anasa Iesu ma yoqonina vetunea toveguba edi tovanugweta Kaiafa 'inaya.

*Fita ena vegeqa vemaqilafuna be vetoina*

*(Madiu 26:71-75; Maki 14:69-72; Luke 22:58-62)*

<sup>25</sup> Saimoni Fita nawale 'aiwea tovtovolo vevetaluvala, 'inega ivetala'aiea ivonaya, "Nage o'a wese ana to'abiboda taha, waisa?"

Ta Fita vegeqa vonaya, "Ya'a gebu!"

<sup>26</sup> Toveguba edi tovanugweta ena tofewa kavovo taha wese toatoa kotu nana 'inaya. Ba'e tofewa nana ta wese 'oloto nana Fita teniqana ni'a da'ea edi gade 'aidegana. Ta ba'e tofewa nana Fita vetala'aiea vonaya, "O'a tawadega ya'iteu Iesu maega olibe talaqina 'inaya, waisa?" <sup>27</sup> \* 'Inega wese Fita vegeqa, ta omo'e tutana 'inaya kamukamu ve'ale dou.

*Iesu ivetovoloya Failato matanaya*

*(Madiu 27:1-2,11-14; Maki 15:1-5; Luke 23:1-5)*

<sup>28</sup> 'Awa'awai otaqaya me Diu edi toveguba qiduana Kaiafa ena vanuega Iesu itauyeya me Loma edi gavana ana wawa Failato ena 'ebetoa qiduana 'inaya. Ta me Diu dina ge ida lugu gavana ena 'abaga 'inaya, mana 'eguma ina givebwavudi 'inega ge wese adi fata be ina lugu 'Auvivia Sagalina 'inaya. <sup>29</sup> 'Inega Failato vanuega 'ifoqe mai 'idia ta vetala'aiedi vonaya, "Ma'oda ba'e 'oloto nana ove'ewa 'aiqei?"

<sup>30</sup> Ta ivona 'eviviea ivonaya, "Eguma ba'e 'oloto nana ge taha toluveifana 'inega ge wese ada miei 'iuya."

<sup>31</sup> \* 'Inega Failato vonedia, "Oloto nana ona tauyeya ta taumiega emi luvine 'inega ona luvinea!"

'Inega me Diu edi toluvineavo Failato ivona 'eviviea ivonaya, "Ima'a ge daluaqiaqiema be taha toga ana luve'aligi, ta 'esi omi'a me Loma ami luaqiaqi." <sup>32</sup> \* Ta ba'e yani nana 'ifoqe be yaqisa tola'ai Iesu ni'a vonayea ena 'aliga weaqina e wese 'idewana na'aliga 'aiqa.

<sup>33</sup> 'Inega Failato 'evivi tauya ena vanuea ta vonedi be Iesu ina miea 'inaya, 'inega vetala'aiea vonaya, "Nage o'a me Diu edi Kini, waisa?"

<sup>34</sup> Ta Iesu voneaya, "Eu vona bena'e ya'a weaqigu nage tau'u eu nuenuega nage mali tomotau isimanea 'iuya?"

<sup>35</sup> \* 'Inega Failato ve'iea vonaya, "Nage ya'a taha Diu? Gebu! Ta 'esi o'a eu tomotauyavo ta eu toveguba qiduiduadi ive'ineieu 'iguya. Ta toyani luveifana uvuaqi?"

<sup>36</sup> Ta Iesu voneaya, "Ya'a egu 'Ebeluvine gebu totoa bwa'obwa'o edi 'ebeluvine 'idewani. Mana 'eguma ya'a egu 'Ebeluvine kavona totoa bwa'obwa'o edi 'ebeluvine 'idewani, 'inega tuta nana me Diu ikafigu egu tofewayavo eda luvetunedi ida vunuqidi ta ida 'etobodedi. Ta 'esi ya'a egu 'Ebeluvine mali di'we 'inega."

<sup>37</sup> 'Inega Failato vonaya, "Inega o'a taha kini, waisa?"

Ta Iesu voneaya, "O'a tau'uyega ni'a u'inanegu ya'a Kini, ta eu vona bena'e vonahaqiaqi. Ta ba'e 'iu nana weaqina yavi'oi, ta yamai bwa'obwa'oya Yaubada ena vonahaqiaqi

\* 18:27: Ion 13:38    \* 18:31: Ion 19:6-7    \* 18:32: Ion 3:14; 12:33    \* 18:35: Ion 1:11

sabi simana 'ifoqena. Ta tomeqabu vonahaqiaqi nana i'awahaqiaqiea taudi wese egu vona ivelumamatayagea."

<sup>38</sup> 'Inega Failato Ieisu vetala'aiea vonaya, "Ta vonahaqiaqi nana tola'ai ana alamani?"

*Failato Ieisu luvinea be ina luve'aligia*

*(Madiu 27:15-31; Maki 15:6-20; Luke 23:13-25)*

'Inega tunugivila ta wese 'ifoqe 'evivi tauya Me Diu 'idia ta vonedia, "Ya'a ge taha luveifana eda lobei ba'e 'oloto nana 'inaya be 'inega ena ve'ewei. <sup>39</sup> Ta omi'a emi ilivu 'inega ya'wala 'aidega 'aidega 'Auvivia Sagalina 'inaya emi nuanua 'inega ovevetala'aiegu 'eguma taha tomotau vanue 'ebeyoqona 'inega ena li'amia. 'Inega nage nuanuami me Diu edi Kini ba'ena ena li'amia weaqimi?"

<sup>40</sup> Ta me Diu dina igaba 'eviviea ivonaya, "Gebu, ba'e 'oloto nana gebu, ta 'esi Balabasi una neima!" Ba'e Balabasi nana tauna taha tovedavi ta toluve'aliga.

## 19

*Ieisu iluvinea be ina tutuve'ewea*

<sup>1</sup> Failato ena luvine 'inega Ieisu ivunuqa dadanea wayo metametanega. <sup>2</sup> \* 'Inega tovedavi talitali ilufaifainia ta Ieisu debanaya ia'uya ana biatuli. Ta wese kwakwalufai qimwaqimwalina 'inega ivetala'afwalia, <sup>3</sup> 'inega itautauya 'evi'evivi 'inaya ta ivonevoneaya, "Ei, me Diu edi Kini eu toa navekue!" Ta wese i'au'iawea.

<sup>4</sup> 'Inega wese Failato 'ifoqe mai me Diu 'idia ta vonedia, "O'itei, 'oloto nana wese ya'ifoqe miea 'imia sabi vematamagilafuyemi ya'a ge taha ena luveifana eda lobei 'inaya be 'inega luvine ena neia."

<sup>5</sup> 'Inega Ieisu 'ifoqe mai ma ana biatuli viaviaqina talitaliega, ta wese ma ana kwakwalufai qimwaqimwalina 'ifoqe mai, 'inega Failato me Diu vonedia, "Ba'e 'oloto nana ona 'itea!"

<sup>6</sup> Ta tuta nana toveguba qiduquadi ma adi to'itamakiavo Ieisu i'itea 'inega ikolua ivonaya, "Ututuve'ewei, ututuve'ewei!"

Ta Failato vona 'eviviedi vonaya, "Omi'a taumiega ona 'ewei ta ona tutuve'ewea, ta ya'a ge ena luvinei be na'aliga, mana ge taha luveifana eda lobei 'inaya."

<sup>7</sup> Ta me Diu diavona ivona 'eviviea ivonaya, "Ima'a me ema luvine, ta luvine nana ena simana vonigo tauna ana luaqiaqi be na'aliga, mana taunega weaqina simana vonigo tauna Yaubada Natuna."

<sup>8</sup> Ta tuta nana Failato edi vona noqolia 'inega ena mwaniniva veqidua va'ine, <sup>9</sup> \* ta 'evivi lugu ena vanue gamonaya ta Ieisu vetala'aiea vonaya, "O'a ma'inega umai?", ta Ieisu ge wese davona ve'iei. <sup>10</sup> 'Inega Failato voneaya, "Tola'ai weaqina unoganoga, a? Nage ge uda alamania ya'a me egu luvine, 'inega agu fata ena vona yavuiu nage ena tutuve'eweu?"

<sup>11</sup> \* Ta Ieisu voneaya, "O'a ge au fata be uda luvinegu 'eguma eu waiwai ge uda 'ewei Tovewaiwai otaqa 'inega. Ta 'esi 'oloto nana ni'a ve'ineiegu 'iuya luveifana qidua va'inena viaqia."

<sup>12</sup> \* Tuta ba'e 'inega Failato nuanuana be Ieisu na'etoyavui, ta me Diu nawale ikolukolua ivonaya, "Eguma ba'e 'oloto nana una li'amia 'inega o'a ge wese toluvine qiduana Sisa iana, mana 'eguma taha toga taunega na'awakiniea, e 'inega tomotau nana Sisa vevoalanea."

<sup>13</sup> Ta tuta nana Failato ba'e vona nana noqolia 'inega Ieisu 'ifoqe miea 'atamanaya ta toabui luvine ana galivaya. Ta galiva nana igabea ana wawa "Dabo Beabeadu Gagahanina." Ta me Ibeliu bonadiega igabea Gabata. <sup>14</sup> Ta ba'e yani nana 'ifoqe baba'auya 'Auvivia Sagalina ana 'aubena 'ebe'iva'ava'ata 'inaya.

'Inega Failato me Diu vonedi vonaya, "Emi Kini ba'e!"

<sup>15</sup> Ta wese ikolua ivonaya, "Utauyei, utauyei, ututuve'ewei!"

\* 19:2: Lk 23:11 \* 19:9: Md 27:12 \* 19:11: Ion 10:18; Via 2:23; Lom 13:1 \* 19:12: Lk 23:2; Via 17:7

'Inega Failato vetala'aiedi vonaya, "Ma'oda, nage emi Kini kana tutuve'ewea?"

'Inega toveguba qiduquduadi ikolua 'evivi ivonaya, "Ima'a ema kini ana 'aidega otaqa Sisa!"

<sup>16</sup> 'Inega Failato Ieisu ve'ineiea 'idia sabi tutuve'ewana.

*Ieisu itutuve'ewea* 'etoluai 'inaya

(*Madiu 27:32-44; Maki 15:21-32; Luke 23:26-43*)

'Inega tovedavi Ieisu ikafia ta itauyea. <sup>17</sup> Ta Ieisu taunega ana 'etoluai 'avalea ta 'ifoqe tauya taha di'we ana wawa 'Unu'unu 'inaya. Ta me Ibeliu bonadiega igabea Goligota. <sup>18</sup> Ta omo'e 'inaya Ieisu itutuve'ewea tomotau magilafudi maega. Taha 'ataqiega, ta wese taha keliega, ta Ieisu nuanidia.

<sup>19</sup> Failato taha 'wayavi ni'a 'iva'ava'aia ta miea, ta 'etoluai nana 'inaya itutuve'ewea. Ta 'wayavi nana ana noqola ba'e: IEISU NASALETA 'OLOTONA, ME DIU EDI KINI <sup>20</sup> Me Diu koyadi ba'e 'wayavi nana iavoya, mana Ieisu itutuve'ewea 'abaga qiduana gwavunaya, ta 'wayavi nana bona toi 'idiega 'idewani bona Ibeliu be, bona Latini ta wese bona Guliki 'inega. <sup>21</sup> 'Inega toveguba qiduquduadi Failato ivoneaya, "Ba'e 'wayavi nana 'Me Diu edi Kini' una givilei ta una 'wayavia ba'e 'idewani, 'Taunega vonaya, ya'a me Diu edi Kini.' "

<sup>22</sup> Ta Failato ve'iedi vonaya, "Tola'ai ni'a ya'wayavia, e bena'e 'idewani na'eno'eno."

<sup>23</sup> Tovedavi diavona Ieisu ni'a itutuve'ewea ta 'abibodanaya ana kaleko i'ewa yavuledi ta ivewila'ayedi foa dina nuanidia. Ta wese ana kwakwalufai i'ewa yavulea, ta ge ana tuyanamo, ta 'esi kaleko 'aideganamo. <sup>24</sup> \* 'Inega ivonaya, "Ba'e kulufa nana ge wese kana 'esiabuabui, ta 'esi taha laha kana viaqia 'inega kana 'itea toga 'idega nanugweta be na'ewea." Ta edi viaqa ba'e 'inega Buki Nugwenugweina ena vona ana aqiaqi 'ifoqe, vonaya,

"Agu kaleko ivewila'ayea nuanidia  
ta agu kwakwalufai laha 'inega  
ilahayea toga na'ewei."

E 'inega tovedavi diavona ba'e 'idewana iviaqia.

<sup>25</sup> \* Ta 'etoluai nana di'wenaya Ieisu inana be, taidi be, Kilofa moqanena Meli, ta wese waviadi Meli Magidala maega itovotovolo. <sup>26</sup> \* Ieisu inana ni'a 'itedi, ta di'wedida wese ana to'abiboda taha to'abiboda nana Ieisu veyolubea qiduana. 'Inega inana 'idia vonaya, "Inagu ye, natumi me'olotona bena'e." <sup>27</sup> Ta wese Ieisu to'abiboda nana 'inaya voneaya, "Inau bena'e."

Ta tuta ba'e 'inega to'abiboda nana vavine dina 'ebe'ewedi tauyedi ena vanuea sabi 'itamakidi.

*Ieisu yawaina gumwala*

(*Madiu 27:45-56; Maki 15:33-41; Luke 23:44-49*)

<sup>28</sup> \* Ieisu tawa alamania ena fewa ta wese ena viaqa qabudi ni'a lu'ovoidi. 'Inega vonaya, "Magagu luayahaya." Ta ba'e vona nana 'inega Buki Nugwenugweina ena simana ana aqiaqi Ieisu ve'ifoqeyea. <sup>29</sup> \* Ta 'oine yuyuna ma vedina 'eno'eno, 'inega kikifa i'aubwa'uya 'oine nana 'inaya, ta kikifa nana ia'uya taha 'aiwe ana wawa isofa laqanaya, 'inega ive'etovaneyea Ieisu sofanaya ivetufea. <sup>30</sup> Ta 'oine nana numa tonovia 'inega vonaya, "Yani qabuna ni'a yaviaqa 'ovoia." 'Inega 'otona 'eqalea ta yawaina gumwala.

<sup>31</sup> \* Ieisu yawaina gumwala me Diu edi 'aubena 'ebe'iva'ava'ata 'inaya. Ta adi tovanugwetayavo ge nuauadi toveilaqe dina 'etoluai ina kuekue Sabate ana 'ebeve'ale 'inaya. Mana mahala navulihia 'inega wese taha 'aubena qiduana Sabate nana gamonaya nave'ale, mana 'Auvivia Sagalina wese ina viaqia. 'Inega me Diu edi tovanugwetayavo Failato ivetala'aiea 'eguma ena toluavia toveilaqe dina 'aqedi ina 'aubaidi 'inega edi 'aliga nalukwayavoni be yaqisa 'wafidi ina 'ewa webuiedi. <sup>32</sup> 'Inega toluavia dina itauya toveilaqe 'idia, ta magilafudina Ieisu ana 'ataqiega be wese ana keliega 'aqedi i'e'aubaidi.

\* 19:24: Same 22:18 \* 19:25: Md 27:55-56 \* 19:26: Ion 13:23 \* 19:28: Same 22:15 \* 19:29: Same 69:21

\* 19:31: Luve 21:22-23

<sup>33</sup> Ta tuta nana imai Ieisu 'inaya, 'inega i'itea yawaina ni'a gumwala, 'inega 'aqena ge ida 'aubaidi. <sup>34</sup> Ta 'esi toluavia taha ena gita 'inega Ieisu leuleuna 'idawea, 'inega go'ila ta wese sulala inoqa. <sup>35</sup>\* Ba'e yani diavona taha 'oloto matanega 'itedi, 'inega simana 'ifoqe yani diavona weaqidi. Ta ena simana vonahaqiaqi, be yaqisa omi'a wese simana nana ami fata ona vetumaqanea. <sup>36</sup>\* Ta ba'e yani diavona i'ifoqe be yaqisa Buki Nugwenugweina ena simana ana aqiaqi na'ifoqe, vonaya, "Ge taha wese luluna ina baia." <sup>37</sup>\* Ta wese taha vona Buki nana 'inaya vonaya, "Tomotau nana ni'a i'idawea ina vevekovea."

*Ieisu itavunia*

(Madiu 27:57-61; Maki 15:42-47; Luke 23:50-56)

<sup>38</sup> Ta Ieisu ena 'aliga 'abibodanaya Iosefa Alimatia 'olotona mai Failato 'inaya ta venoqiea Ieisu 'wafina weaqina. Ta ba'e Iosefa nana tauna Ieisu ana to'abiboda taha. Ta tauna lova 'waivega veto'abiboda Ieisu weaqina, mana me Diu mwaninivedi. Ta Failato Iosefa ena venoqi weaqina awafela, 'inega tauya Goligota 'inaya ta Ieisu 'wafina 'ewa webuiea 'etoluaiega. <sup>39</sup>\* Ta wese Nekodimo Iosefa maega imai. Ta ba'e Nekodimo nana lova taha velovelovana 'inaya tauya Ieisu 'inaya sabi vyausina. Ta Nekodimo nana 'uluma ana 'ebe'etoboda mulo be wese aloi\* wayawayavilana miea Ieisu 'wafina weaqina. Ta kulufa dina adi vita kavona 30 kilo 'idewani. <sup>40</sup> Inega magilafudina Ieisu 'wafina ifainia kaleko wadawadaeana 'inega, ta mulo be aloi maega ifainia. Ba'e 'idewani itavuna 'aiqea me Diu edi ilivu 'inega. <sup>41</sup> Ieisu ena 'ebe'aliga ana 'abaga Goligota di'wenaya taha talaqa 'eno'eno, ta 'inaya taha deba'unu ana 'ita kavona watu'ubu 'eno'eno, lova ge taha toga ida tavuni 'inaya. <sup>42</sup> Ta omo'e 'inaya Ieisu 'wafina ia'uya, mana ba'e yani diavona i'ifoqe me Diu edi 'aubena 'Ebe'iva'ava'ata 'inaya, ta wese deba'unu nana ge luluvai Goligota 'inega.

## 20

*Deba'unu tomotau geqana*

(Madiu 28:1-8; Maki 16:1-8; Luke 24:1-12)

<sup>1</sup> Wiki ana 'aubena nugweta 'awa'awai otaqaya, nawale tufwana mata velovelovanaya, 'inega Meli Magidala tauya deba'unu nana 'inaya. Ta ana 'auboda dabo beabeana 'itea ni'a 'u'uvekawawa naqona. <sup>2</sup> 'Inega Meli 'evivi vihila tauya to'abiboda magilafudi 'idia, taudi Saimoni Fita ta wese to'abiboda nana Ieisu veyolubea qiduana. 'Inega Meli vonedi vonaya, "Eda Kaiwabu ni'a i'ewea deba'unuyega, ta ge ada alamania ma'inaya 'wafina ia'uya!"

<sup>3</sup> 'Inega Fita ma iana to'abiboda nana itutuvila itauya deba'unu nana sabi 'itana. <sup>4</sup> Magilafudina ivivihila ta Fita iana nugweta 'ifoqe deba'unu nana 'inaya. <sup>5</sup> 'Inega to'abiboda nana tunulugu ta deba'unu gamona 'itea, ta kaleko wadawadaeana 'itedi, ta ge dalugu otaqa gamonaya. <sup>6</sup> Ta 'abibodanaya wese Saimoni Fita 'ifoqe mai ta lugu deba'unu nana 'inaya. Ta tauna wese kaleko wadawadaeana Ieisu 'wafina ana 'ebeuma 'itedi i'eno'eno. <sup>7</sup> Fita wese taha kaleko kavona tawelo 'itea, ta omo'e tawelo nana 'inega Ieisu 'unu'ununa ifainia tuta nana 'wafina i'iva'ava'aia sabi tavunina. Ta tawelo nana ge da'eno'eno kaleko wadawadaeana maega, ta 'esi 'itea nununumina 'eno duma. <sup>8</sup> 'Inega to'abiboda nana tauna nugweta 'ifoqe mai deba'unu nana 'inaya wese lugu gamonaya. Ta yani diavona 'itedi 'inega vetumaqana. <sup>9</sup>\* (Ta nawale nuadi ge da'eqa'uya Buki Nugwenugweina ena vona weaqina, vonigo Ieisu luaqiaqiea be 'aligega naya'itoto 'evivi.) <sup>10</sup> 'Inega to'abiboda magilafudina i'evivi itauya edi 'ebetoaya.

*Ieisu 'ifoqe Meli Magidala matanaya*

(Madiu 28:9-10; Maki 16:9-11)

\* 19:35: Ion 21:24 \* 19:36: Same 34:20; 'Ifo 12:46; Naba 9:12 \* 19:37: Sek 12:10; Ve 1:7 \* 19:39: Ion 3:1-2 \* 19:39: Me Diu edi bunama aloi "aloe" iviaqia 'aiwe vayona 'inega edi 'ebibunama mana meilana aqiaqina, ta wese to'aliga ibunamidi adi tavuna weaqina. \* 20:9: Via 2:24-32; 1Kol 15:4

<sup>11</sup> Ta Meli tovotovololo deba'unu nana 'iawanaya ta doudou. Ta me ena dou tunulugu ta gamona 'itea. <sup>12</sup> 'Inega Yaubada ena tovale'ewayavo magilafudi ma adi kaleko wadawadaeana Meli 'itedi itoabui itoatoa Iesu 'wafina ena 'ebe'enoia, taha 'unugeinega ta taha 'aqenega.

<sup>13</sup> Ta ivetala'aiea ivonaya, "Vavine, tola'ai weaqina udoudou?"

'Inega Meli vona 'eviviedi vonaya, "Egu Kaiwabu ni'a i'ewea, ta ya'a ge eda alamania ma'inaya ia'uya." <sup>14</sup> \* Vonedu gumwala 'inega tunugivila ta Iesu 'itea gwavunaya tovotovololo, ta Meli nuana nawale ge da'eqa'ui vonigo omo'e tauna Iesu.

<sup>15</sup> 'Inega Iesu vonea vonaya, "Vavine, tola'ai weaqina udoudou? Togama usalisalia?"

Ta Meli 'oloto nana 'itea ta vonaya be tauna talaqa nana ana tofewa, 'inega voneaya, "Kaiwabu, 'eguma Iesu 'wafina ni'a u'ewea ta utauyea mali di'wea, e 'inega una vonegu ma'inaya ua'uya, be 'inega ya'a ena tauya di'we nana 'inaya ta ena 'ewea."

<sup>16</sup> Ta Iesu vonea vonaya, "Meli."

'Inega Meli valialia Iesu di'wenaya, ta me Ibeliu bonadiega voneaya, "Laboni." (Ta Laboni ana givila Tove'ita).

<sup>17</sup> \* 'Inega Iesu vonaya, "Ge una kafigu, mana nawale ge eda vane 'evivi Tamagu 'inaya. Ta 'esi una tauya taigwavo 'idia ta una vonedi vonigo ya'a yavanevane Tamagu ta Tamami 'inaya, ya'a egu Yaubada ta omi'a wese emi Yaubada 'inaya"

<sup>18</sup> 'Inega Meli Magidala 'evivi tauya Iesu ana to'abibodayavo 'idia vonedi vonaya, "Ya'a eda Kaiwabu ni'a ya'itea!" 'Inega Meli Iesu ena vona simana 'ifoqeyea to'abiboda diavona 'idia.

*Iesu 'ifoqe ana to'abibodayavo 'idia*

*(Madiu 28:16-20; Maki 16:14-18; Luke 24:36-49)*

<sup>19</sup> Ta wiki ana 'aubena nugweta velovelovana 'inaya Iesu ana to'abibodayavo edi 'ebetoa 'inaya itoa va'auta, ta 'ebetoa nana ana 'awa ilokea, mana imwaniniva me Diu adi tovanugwetayavo weaqidi. 'Inega lukwayavonega Iesu luveafedi ta tovotovololo nuanidia, ta vonedia, "Omi'a me emi nuadaumwala ona toatoa." <sup>20</sup> \* Ena vona 'abibodanaya 'inega nimana si'otoi ta nele 'awa'ivina ve'itedi, ta wese leuleunaya i'idawea ve'itedi. Ta iqaiawa qiduana tuta nana edi Kaiwabu i'itea. <sup>21</sup> 'Inega wese vonedi vonaya, "Omi'a me emi nuadaumwala ona toatoa. Lova Tamagu vetunegu yamai bwa'obwa'oya, ta ya'a wese 'edewanina yavevetunemi tomotau 'idia." <sup>22</sup> 'Inega Iesu yawainega mu'edi, ta vonedia, "Niboana Gwalagwalana o'ewei 'iguyega. <sup>23</sup> \* Ta 'eguma omi'a tomotau edi luveifana weaqina ona nuataqodi, e 'inega Yaubada wese nanuataqodi. Ta 'esi 'eguma ge ona nuataqodi, e 'inega luveifa nana nayoqona vatayedi."

*Iesu 'ifoqe Tomasi 'inaya*

<sup>24</sup> Ta tuta nana Iesu 'ifoqe mai ana to'abibodayavo 'idia, 'inega iadi taha ana wawa Tomasi ge datoatoa taudi maega. Tauna wese Tuwelo dina taha 'idiega ta igabea Didimasi (wawa nana ana givila didilualua). <sup>25</sup> 'Inega Tomasi mai to'abiboda dina 'idia, ta ivonea ivonaya, "Ima'a eda Kaiwabu ni'a a'itea!"

Ta Tomasi vonedia, "Eguma Iesu nimana nele 'awa'ivina taugu mataguyega ena 'itedi ta wese 'eguma ana fata nimagu ena a'uluguyea nele 'awa'ividi 'inaya, e 'inega emi vona ena vetumaqanea. Ta wese 'eguma leuleuna i'idawea 'awa'ivinaya nimagu ena a'uluguyei, e 'inega wese emi vona bena'e ena vetumaqanea."

<sup>26</sup> 'Inega 'aubena seveni 'abibodanaya Iesu ana to'abibodayavo wese iva'auta 'evivi vanuea, ta ba'itagana iadi Tomasi maega itoatoa. Ta vanue nana ana 'awa wese iloka aqiaqiea. 'Inega wese lukwayavonega lova 'idewani Iesu tovololo 'iawadia ta vonedia, "Omi'a nuadaumwala 'inaya ona toatoa." <sup>27</sup> 'Inega Iesu Tomasi vonea vonaya, "Nimagu una 'itedi ta nimanoyau una a'uluguyea nele 'awa'ivinaya. Ta wese nimau una a'uluguyea

\* 20:14: Lk 24:16; Ion 21:4 \* 20:17: Lom 8:29; Ibe 2:11-12 \* 20:20: Ion 16:22; 1Ion 1:1 \* 20:23: Md 16:19

leulueguya agu kima 'inaya. 'Inega ge wese una venuana magilafu ya'a weaqigu. Ta 'esi una vetumaqanegu!"

<sup>28</sup> 'Inega Tomasi bonana qiduanega vonaya, "O'a egu Kaiwabu, ta wese egu Yaubada!"

<sup>29</sup> \* 'Inega Iesu voneaya, "O'a uvetumaqanegu mana ni'a u'itegu. Ta tomeqabu ge ida 'itegu ta tua ivevetumaqanegu, e taudina adi fata be ina qaiawa qiduana."

*Buki ba'ena* 'iuna

<sup>30</sup> Iesu ana to'abibodayavo matadia viaqa waiwai di qabudi viaqidi. Ta 'idiega 'evisa dimo 'waya'wayavidi ba'e buki nana gamonaya i'eno'eno. <sup>31</sup> \* Ta ba'e 'wayavi diavona i'eno'eno be yaqisa Iesu ona vetumaqanea tauna To'etoyavua be wese Yaubada Natuna, ta ba'e vetumaqana nana 'inega yawaimi ona lobe.

## 21

*Iesu* 'ifoqe ana to'abiboda adi yau seveni 'idia

<sup>1</sup> Ta ba'e yani diavona 'abibodanaya Iesu wese 'ifoqe ana to'abibodayavo 'idia lavu Taibilia 'inaya. Ta ena 'ifoqe ana alamani ba'e 'idewani: <sup>2</sup> Iesu ana to'abibodayavo vaidi omo'e lavu nana 'inaya itoatoa, taudi Saimoni Fita ma enavo Tomasi tauna igabea Didimasi be, Nataniela tauna Kena 'olotona di'we Galili gamonaya. Ta Sebedi natunavo ta wese to'abiboda magilafudi maega itoatoa.

<sup>3</sup> \* Ta Saimoni Fita vonaya, "Ya'a yatautauya sabi gomana."

'Inega enavo sikisi dina ivoneaya, "Ima'a nuanuama wese ana wai!" 'Inega wagega itauya, ta velovelovana 'inega ana laba manu bodobodoya ge taha 'iqana ida 'onei.

<sup>4</sup> 'Inega mahala vulihia Iesu tovtovolo balabalaya, ta to'abiboda dina tomtau nana i'itea ta ge ida alamania vonigo tauna Iesu.

<sup>5</sup> 'Inega gabedi vonaya, "Ei egwavo, nage 'evisa 'iqana o'onedi?"

Ta ivona ve'iea, "Gebu'el!"

<sup>6</sup> 'Inega Iesu vonedi vonaya, "Emi gomana ona felea 'ataqimiega, 'inega 'iqana 'ea'ealidi ona 'onedi!" 'Inega vona nana imatayagea ta ge adi fata gomana nana ina lihi vaneyei wagaya, mana 'iqana gomana iluveagatuna'ia.

<sup>7</sup> \* 'Inega to'abiboda nana Iesu veyolubea qiduana Fita 'inaya vonaya, "Tauna eda Kaiwabu!" Ta tuta nana Fita iana ena vona noqolia vonaya, "Tauna eda Kaiwabu!" e 'inega ana kwakwalufai 'ewea, (mana tuta nana nawale igomagomana ana kaleko vata'ia). Ta tuta nana ni'a alamania Iesu toatoa 'inega Fita ana kwakwalufai 'autaonea 'wafinaya ta fifiea lavuya ta tauya balabalaya.

<sup>8</sup> Ta to'abiboda dina nawale wagaya itoatoa kavona 90 mita balebalega 'idewani, ta edi gomana ma 'iqanina ilihilihia. <sup>9</sup> Ni'a ivawebui balabalaya, ta 'inega 'aiwe 'alaganidolina i'itea ma 'iqanina, ta wese vaina beledi 'eno'eno. <sup>10</sup> Ta Iesu vonedi vonaya, "Vaina 'iqana ni'a o'onedia omiedi ba'idia."

<sup>11</sup> \* 'Inega Saimoni Fita gelu wagaya ta gomana lihi webuiea balabalaya. Ta gomani nana gamonaya 'iqana gegoyogoyo iluveagatuna'ia, adi yau 153. Vonahaqiaqi, gomana nana luluveagatuna'ina 'iqana 'inega, ta tua ge daeabui.

<sup>12</sup> 'Inega Iesu vonaya, "Omai, ami mase'awai ona 'ewea!" Ta ge taha toga to'abiboda dina 'idiega davegiwalifatu be davetala'aiei davonaya, "O'a togama?", mana ni'a ialamania tauna edi Kaiwabu. <sup>13</sup> 'Inega Iesu vanaqo beledi 'ewea ta neidi, ta wese 'idewani 'iqana 'ewea ta neidi.

<sup>14</sup> \* Ta ena ya'itoto 'evivi 'aligega 'abibodanaya, ba'e ena 'ifoqe vetoina ana to'abibodayavo 'idia.

*Iesu ta Fita*

<sup>15</sup> 'Ai gumwala 'inega Iesu Saimoni Fita 'inaya vonaya, "O'a Saimoni Ioni natuna, nage eu veyoluba weaqigu ba'e to'abiboda dina edi veyoluba 'iguya veqidua va'inedi?"

\* 20:29: 1Fit 1:8      \* 20:31: Ion 3:15; Lom 1:17; 1Ion 5:13      \* 21:3: Lk 5:4-7      \* 21:7: Ion 13:23; Md 14:29  
\* 21:11: Lk 5:6      \* 21:14: Ion 20:19,26

'Inega Saimoni ve'iea vonaya, "Ao Kaiwabu, 'idewani. Ni'a ualamaniana ya'a yaveveyolubeu."

'Inega Ieisu voneaya, "Egu lamiavo una 'itamakidi."

<sup>16</sup>\* Ta Ieisu ena vetala'ai lu'eviviea 'inaya vonaya, "O'a Saimoni Ioni natuna, nage uveveyolubegu?"

'Inega Saimoni wese ve'iea vonaya, "Ao Kaiwabu, 'idewanina. Ni'a ualamaniana yaveveyolubeu."

Ta Ieisu voneaya, "Egu sifiavo una 'itamakidi."

<sup>17</sup> Ta wese tuta vetoina Ieisu Saimoni vetala'aiea vonaya, "O'a Saimoni Ioni natuna, nage uveveyolubegu?"

Ta Fita nuana vita, mana tuta vetoina Ieisu vetala'aiea, "Nage uveveyolubegu?" Tuata voneaya, "Kaiwabu, yani qabuna ni'a ualamaniana, 'inega wese ualahalamaniana ya'a yaveveyolubeu!"

'Inega Ieisu voneaya, "Egu sifiavo una 'itamakidi! <sup>18</sup> Yavona aqiaqieu, lova eu tuta kilakai 'inaya tuta qabuna u'iva'ava'ata ta tau'u eu nuenuega utautauya dadana. Ta 'esi nawale eu tuta vekofekofe 'inaya nimau una si'otoidi ta taha toga nayoqonidi, ta di'we nana 'inaya ge nuanuau be una tauya, e 'inaya natauyeu." <sup>19</sup>\* Ieisu ena vona ba'ena 'inega ve'ita 'ifoqeyea ma'oda nawale Fita na'aliga'aiqa, ta'aliga nana 'inega Yaubada ena aqiaqi otaqa nave'ifoqeyea. 'Inega Ieisu Fita voneaya, "Una 'abibodegu!"

<sup>20</sup>\* Itutuvila itautauya, 'inega Fita tunugivila ta to'abiboda taha 'itea talatala'obedi. Ta Ieisu ba'e to'abiboda nana veveyolubea qiduana. Ba'e taunana lova Kaiwabu ena 'ai 'inaya tunuvahala Ieisu 'inaya ta vetala'aiea, "Kaiwabu, togama nasuluveu?" <sup>21</sup> Ta tuta nana Fita ba'e to'abiboda nana 'itea 'inega vonaya, "Kaiwabu, ta tauna ma'oda?"

<sup>22</sup> Ta Ieisu ve'iea vonaya, "Eguma ya'a egu nuanua tauna mayawaina natoatoa ana laba ena 'evivi mai, e 'inega o'a ge eu yani, waisa? Ta 'esi u'abibodegumo!" <sup>23</sup> Ta Ieisu ena vona ba'e weaqina to'abiboda ive'ale ivevonavona ivonaya be ba'e to'abiboda nana ge wese na'aliga. Ta Ieisu ge davona vonigo ba'e to'abiboda nana ge wese na'aliga, ta 'esi ni'a vonaya, "Eguma ya'a egu nuanua taunana mayawaina natoatoa ana laba ena 'evivi mai, e 'inega o'a ge eu yani."

<sup>24</sup>\* Ba'e to'abiboda nana tauna yani qabuna Ieisu weaqina simana 'ifoqeyedi, ta wese 'wayavidi. Ta ni'a ahalamaniana tauna ena simana qabuna vonahaqiaqi.

<sup>25</sup>\* Ta wese yani koyadi Ieisu viaqidi, ta 'eguma viaqa diavona qabudi ida 'wayavidi buki 'idia, e 'inega buki diavona bwa'obwa'o qabuna ge wese ana fata daluveaqedi.

\* 21:16: Via 20:28  
Ion 20:30

\* 21:19: Md 16:24-25; 2Fit 1:14

\* 21:20: Ion 13:23-25

\* 21:24: Ion 19:35

\* 21:25:



## Viaqa

### Ieisu ena tovaletuyanayavo edi viaqa

#### *Buki ana alamani weaqina*

Buki ba'e Luke ena 'wayavi vemagilafuna, mana tauna wese Ieisu Valena Aqiaqina ana buki madu'wayavia 'idewani Madiu be, Maki be wese Ioni edi 'wayaviavo. Ta ba'e buki nana 'inaya Luke simana ma'oda Niboana Gwalagwalana Ieisu ena tovaletuyana nugwenugweidi vanugweta 'aiqedi, ta Ieisu Valena iluyavuyavulea di'we taha taha 'idia. Nugweta 'abaga qiduana Ielusalema 'inaya, ta 'abiboda di'we Iudia be, Samelia, ta wese bwa'obwa'o qabuna 'idia. (1:8)

Ta yani qiduana ba'e buki nana 'inaya kana 'itea, ba'e Niboana Gwalagwalana ena mai to'abiboda 'idia Ielusalema 'inaya 'aubena Fenitikosi ana tutaya ta givewaiwaiedi Yaubada ena fewa weaqina. Ta to'abiboda dina edi vetafe'wa 'inega tomotau Ieisu Valena ivetumaqanea, 'inega di'we taha taha 'idia 'ekalesia i'wadidi. Ba'e yani diavona wese kana 'itea Faulo ena luvivila 'inaya.

Ta 'ekalesia ana 'ebeve'ale 'inaya vaidi me Diu imadunuagivila ta Vale nana ivetu-maqanea, ta 'abibodanaya wese mali qabu ilugu 'ekalesia 'inaya. Ta wese me Diu adi tovanugwetayavo tuta qabuna Ieisu ena tovaletuyanayavo ikafidi ta itauyedi me Loma gabemani 'idia sabi vekotudi, ta edi ve'ewayavo 'idia ge taha adi aqiaqimo, mana taudi Vale Aqiaqina Ieisu weaqina isimasimanea, ta ge taha luveifana ida viaqia.

#### Buki gamona

1:1-14 Ieisu ena luvine 'ebelu'ovoa be ena vona fofofola

1:15-26 Iudasa ana ilafa ivenua'ivinina

2:1-13 Niboana Gwalagwalana ena mai

2:14-8:3 Tovaletuyana edi lugaihi be edi viaqa Ielusalema 'inaya

8:4-12:25 Tovaletuyana edi viaqayavo di'we Iudia be Samelia

13:1-28:31 Faulo ena viaqayavo ena nuagivila 'abibodanaya

a. 13:1-14:28 Faulo ena luvivila nugweta Ieisu Valena weaqina

b. 15:1-35 Toa va'auta qiduana Ielusalema 'inaya

c. 15:36-18:22 Faulo ena luvivila vemagilafuna Valena weaqina

d. 18:23-21:16 Faulo ena luvivila vetoina Valena weaqina

e. 21:17-28:31 Faulo vanue 'ebeyoqona 'inaya toatoa Ielusalema be, Sisalia be Loma 'inaya

#### *Ieisu ena vona fofofola Niboana Gwalagwalana weaqina*

1-2 \* Tiofilasi ye, egu buki nugweta 'inaya Ieisu ena fewayavo be ena ve'itayavo weaqidi ya'wayavia 'iuya ana 'ebeve'ale 'inega be ana laba Yaubada 'ebe'ewea vaneqea mahalaya. Ta Ieisu ena 'aliga 'abibodanaya mayawaina 'ifoqe ena tovaletuyanayavo vevenua'ivini 'idia, ta Niboana Gwalagwalana 'inega luvine neidi edi fewa weaqina. 3\* Ta ena ya'itoto 'evivi 'abibodanaya 'aubena 40 gamodia 'ifoqe 'evi'evivi 'idia, ta 'ebe'ita taha taha 'idiega taunega ve'itayea 'idia, ta ba'e yani diavona 'idiega ena ya'itoto 'evivi 'aligege i'awahaqiaqiea. Ta wese Yaubada ena 'Ebeluvine weaqina vematamagilafuyedi.

4\* Taha tuta iva'auta Ieisu maega ta i'ai'ai, 'inega luvine neidi vonaya, "Ielusalema ge ona nogei, ta 'esi ona toatoa ana laba Yaubada ena nei kavovo lova vona fofofolea naneimi. Ba'e weaqina lova ni'au yamadusimanea 'imia. 5\* Ona nuaia, Ioni Togivebabitaiso tomotau go'ilega givebabitaisodi, ta omi'a ge tuta kuena 'inaya Niboana Gwalagwalana 'inega babitaiso ona 'ewea."

\* 1:1-2: Lk 1:3; Mk 16:19; Lk 24:49-51 \* 1:3: Lk 24:36-49; Via 10:41 \* 1:4: Lk 24:49; Ion 14:16-17; Via 2:33

\* 1:5: Md 3:11

*Ieisu vaneqa mahalaya**(Maki 16:19-20; Luke 24:50-53)*

<sup>6</sup> \* Tuta nana Ieisu me ena tovaletuyanayavo iva'auta itoatoa 'inega ivetala'aiea ivonaya, "Kaiwabu, nage ana fata tuta ba'e 'inega ita'a me Isileli eda 'ebeluvine kana 'ewa 'eviviea, be yaqisa ita'a taudamo kana luvineda?"

<sup>7</sup> \* 'Inega Ieisu vona 'eviviedi vonaya, "Omi'a ge ami luaqiaqi be tuta nana weaqina ona alamania, ta 'esi Tamagu ana 'aidega taunega ena luvine 'inega ba'e tuta nana a'uya.

<sup>8</sup> \* Ta omi'a tutana Niboana Gwalagwalana ona 'ewea, 'inega ona vewaiwai, ta weaqigu ona simana tomotau qabudi 'idia Ielusalema 'inaya, ta wese di'we Iudia be Samelia 'abaganavo 'idia be wese di'we qabudi bwa'obwa'o 'inaya." <sup>9</sup> Ieisu ena vona ba'e lu'ovoia, ta ge tuta kuena 'inaya matadiega Yaubada 'ebe'ewea vaneqa mahalaya ta gawataya lugu 'abo 'waiva.

<sup>10</sup> Nawale mahalaya i'ita'ita vane, 'inega 'oloto magilafudi adi kaleko wadawadaeana di'weddia itovotovolo, <sup>11</sup> \* ta ivonaya, "Me Galili, tola'ai weaqina ba'idia otovotovolo ta ovevekova vane oa'idiana? Ieisu o'itea ni'a vane lugu mahalaya, ta nawale na'evivi namai, be ena mai nana ena vane 'idewani tawadega o'itea."

*Iudasa ana ilafa Mataiasi**(Madiu 27:3-10)*

<sup>12</sup> \* Ieisu ena tovaletuyanayavo bwanaga Olibe 'inega 'edanega i'evivi imai Ielusalema 'inaya. Ta 'eda nana ana kue (1 kilomita) kavona me Diu adi luvine 'inega adi fata ina tauya 'aubena Sabate taha 'inaya 'idewani. <sup>13</sup> \* 'Inega ilugu vanuea ta ivane ulawanaya edi 'ebetoa taha sifaufa 'inaya. Ta adi wawayavo Fita be, Ioni be, Iemesa be, Anidulu be, Filifi be, Tomasi be, Batolomio be Madiu, ta wese Iemesa taha, tauna Alifio natuna, be Saimoni Seloti ta wese Iudasa, tauna Iemesa natuna. <sup>14</sup> Qabu ba'ena ta wese vaina vivine, be Meli Ieisu inana ta wese Ieisu tainavo maega tuta qabuna ivava'auta sabi venoqi.

<sup>15</sup> Ta taha 'aubena tovetumaqanayavo adi yau 120 itoatoa, 'inega Fita ya'itoto vonedi vonaya, <sup>16-20</sup> \* "Taigwavo, lova Niboana Gwalagwalana Deibida ena vona neia Iudasa weaqina ta Buki Nugwenugweina gamonaya 'eno'anova. Tauna eda Kaiwabu suluvei ta voalanavo vanugweteddi 'inaya ta ve'ineiea ana kafi weaqina. Ba'e Iudasa nana lova maega kafewa Ieisu weaqina. Ta 'evosi taha buki Same gamonaya Deibida ena vona Iudasa weaqina ba'e 'idewana vona 'aiqa vonaya, 'Ena 'abaga navetomotau geqa,

be yaqisa ge taha tomotau 'inaya natoatoa.'

Ta wese vonaya,

'Ana ilafa natovolo ta ena fewa na'ewea.'

'Ta luaqiaqiea be ba'e vona diavona Buki Nugwenugweina 'inega adi

aqiaqi na'ifoqe.' "

Fita ena vona ba'e 'idewana mana Iudasa tawa 'aliga. Tauna lova ena viaqa luveifana 'inega mane 'ewea, ta mane nana 'inega bwa'obwa'o taha gimwaneana. Be bwa'obwa'o nana 'inaya be'u webui givelukabwebwe ta gamona veluabu 'abo sine'una avuta. Iudasa valena me Ielusalema inoqolia 'inega bonadiega bwa'obwa'o nana igabea "Akelidama", ta ana alamani "Sulala Bwa'obwa'ona".

<sup>21</sup> Ta Fita wese vonaya, "Inega Iudasa ana luseana taha 'oloto kana venua'ivineana. Luaqiaqiea be 'oloto nana 'eguma lova tuta qabuna Ieisu be ita'a maega kafewafewa be katoatoa, <sup>22</sup> \* Ioni Togivebabitaiso ena tuta 'inega be ana laba Yaubada Ieisu vaneqa mahalaya. Mana 'oloto nana Ieisu ena ya'itoto 'evivi 'aligega weaqina maega kana simana dadanea."

<sup>23</sup> 'Inega 'oloto magilafudi ivenua'ivinidi. Taha Iosefa ana wawa Basaba, ta wese igabea Iusito. Ta wese taha 'oloto ana wawa Mataiasi. <sup>24</sup> 'Inega ivenoqi ivonaya, "Kaiwabu

\* 1:6: Lk 24:21 \* 1:7: Mk 13:32 \* 1:8: Md 28:19; Lk 24:48 \* 1:11: Md 26:64; Lk 21:27 \* 1:12: Lk 24:50-53

\* 1:13: Md 10:2-4 \* 1:16-20: Same 41:9; Same 69:25; 109:8 \* 1:22: Mk 1:9; 16:19; Ion 15:27

ye, yani qabuna weaqima ni'a ualamanina. 'Inega magilafudi 'idiega una ve'itema toga uvevenua'ivinei, <sup>25</sup> 'inega navetovaletuyana Iudasa luseanina ta maega ana fewa. Mana Iudasa luveifana viaqia 'inega ena fewa nogei ta tauya to'aliga edi di'we 'inaya."

<sup>26</sup> Edi venoqi 'abibodanaya taha laha iviaqia nuanuadi ina 'itea toga nanugweta navetovaletuyana. Ta laha nana 'inega Mataiasi ana wawa i'ewea, 'inega tauna tovololo Iesu ena tovaletuyanayavo leveni maega.

## 2

### *Niboana Gwalagwalana ena mai*

<sup>1</sup> \* Iesu ena ya'itoto 'evivi 'aligega 'aubena 50 'abibodanaya 'inega Fenitikosi ana 'aubena mai, 'inega Iesu ana tovetumaqana qabudi iva'auta mai vanue taha gamonaya. <sup>2</sup> Itoatoa 'inega lukwayavonega taha yani butuna mahalega 'ifoqe inoqolia kavona wedilia nunuqa ta vanue gamona luveagatuna'ia. <sup>3</sup> \* 'Inega taha yani i'itea ana 'ita 'idewani 'aiwe meana 'ifoqe webui mai tomotau 'aidega 'aidega debadia. <sup>4</sup> \* 'Inega Niboana Gwalagwalana luveagatuna'idi ta mali vona be mali vona 'idiega ive'ale ivonavona Niboana ena venuaha'u 'inega. Ta vona diavona lova ge ida alamanidi 'idiega iveveqae.

<sup>5</sup> Ta tuta ba'e 'inaya Yaubada ana to'amayabayavo taudi me Diu mali di'we be mali di'we 'idiega imai Ielusalema 'inaya itoatoa. <sup>6</sup> Tutana wedilia butuna tomotau inoqolia 'inega qabudi ivevivihila itauya tovetumaqanayavo 'idia. Ta 'aidega 'aidega bonadi inoqolia 'inega nuadi voqana qiduana, <sup>7</sup> ta ivonaya, "Taudi toveqae diavona qabudi me Galili, waisa? <sup>8</sup> Ta ma'oda 'inega ita'a qabuda bonadega iveveqae? <sup>9</sup> Mana vaina ita'a me Falitia be, me Midia be, me Elama be, me Mesofotemia be, me Iudia be, me Kafadosia be, me Fonito be, me Eisia be, <sup>10</sup> me Filigia be, me Famifila be, me Itifita be, me Libia 'abaga Sailini di'wenaya, ta wese vaina Loma 'inega kamai. Ta vaina ita'a me Diu ta wese vaina ge me Diu, ta eda tafwalolo 'inaya iawafeledi 'inega ive-Diu. <sup>11</sup> Ta wese vaina ita'a Kilitiega be Aleibiyega. Qabuda kamai di'we 'aidega 'aidega 'idiega, ta qabuda tauda bonadega edi vona Yaubada ena fewa waiwai weaqina kanoqonoqolia!"

<sup>12</sup> Ta edi nuavoqana 'inega taudimo iveveqae ivonaya, "Ma'oda i'aiqa? Tola'ai ana alamani?"

<sup>13</sup> Ta vaina tomotau tovetumaqanayavo igivenu'wedi ivonaya, "Nage go'ila waiwaina inuma 'inega ivekwavakwava."

### *Fita ena lugaihi tomotau 'idia*

<sup>14</sup> Ta Fita enavo leveni dina maega itovolo ta bonana qiduanega qabu vonedi vonaya, "Egwavo me Diu ta wese omi'a Ielusalema gamonaya otoatoa, 'elovemi! Ta yani ba'e ni'a 'ifoqe matamia ena givesimatalia 'imia, 'inega egu vona ona noqolia. <sup>15</sup> Emi nuanua 'inega ovonaya be ima'a go'ila waiwaina ada numa ta ada vekwavakwava. Ta gebu'e, mana ba'e nawale 'awa'awai. Ta eda ilivu ni'a oalamanina, ge 'awa'awai 'inaya kada numanuma. <sup>16</sup> Vonahaqiaqi, lova Yaubada ena tovesimasimana Ioeli 'inega vona fofofola tola'ai ni'a o'itea 'imaya weaqina, vonaya,

<sup>17</sup> \* 'Yaubada vonaya,  
Tuta 'ebelu'ovoa 'inaya  
    Niboanigu ena guiwaqia  
    tomotau qabudi 'idia.  
'Inega natumiavo me'olotodi  
    wese mevavinedi  
    egu vona ina simana 'ifoqeyedi.  
Ta emi kilakai tola'ai  
    nawale na'ifoqe  
    ena ve'itedi ta ina 'itea,  
    ta emi 'oloto kofekofedi

\* 2:1: Luvi 23:15-21; Luve 16:9-11      \* 2:3: Md 3:11      \* 2:4: Via 4:31; 10:44-46; 19:6; Mk 16:17      \* 2:17: Ioe 2:28-32

ve'wayoqega ina ve'wayoqa.

- <sup>18</sup> Tuta omo'e 'inaya  
 egu tofewayavo me'olotodi  
 wese mevavinedi  
 Niboanigu ena neidi  
 ta weaqigu  
 ina maduvona fofofola  
 tomotau 'idia.
- <sup>19</sup> Ta egu fewa waiwaidi mahalaya  
 ta wese bwa'obwa'oya  
 tomotau ena ve'itedi  
 'ebenuavoqana 'inega,  
 'idewana sulala be 'aiwe 'ala'alata  
 ta wese 'au qiduana.
- <sup>20</sup> 'Inega baba'au navelovanea,  
 ta wese wai'ena nalusulalia.  
 Ta 'inega Kaiwabu  
 ena 'aubena qiduana  
 ta simatalina na'ifoqe.
- <sup>21</sup> Ta 'eguma taha toga  
 Kaiwabu ana wawega nanoqi  
 iula weaqina  
 e 'etoyavua vataya nalobea.' ”

<sup>22</sup> Ta wese Fita vonedi vonaya, “Omi'a me Isileli, egu vona ba'e ona noqolia Ieisu Nasaleta 'olotona weaqina. Ni'a oalamaniana Yaubada ena fewa waiwaina Ieisu 'inega ve'itemi 'idewana 'ebenuavoqana be 'ebenua'ewa ta wese 'ebe'ita qabudi 'idiega. <sup>23</sup> Lova Yaubada Ieisu nimamia a'uya. Ta omi'a tokwava maega Ieisu otutuve'ewea 'etolui 'inaya ta oluve'aligia. Ta yani ba'ena Yaubada ena nuanua 'inega ni'a madualamania. <sup>24</sup> Ta Yaubada Ieisu 'aligega giveya'itoto 'evivia, ta 'aliga ena visiq'inega 'etoyavua. 'Inega 'aliga nana ge ana fata Ieisu dakafia ta da'eno vataya. <sup>25</sup>\* Lova Deibida madusimana 'ifoqe Ieisu weaqina vonaya,

'Kaiwabu tuta qabuna  
 ya'itea di'weguya toatoa  
 ta givewaiwaiegu,  
 'inega ge ana fata be  
 ena mwaniniva.

- <sup>26</sup> 'Inega yaqaiawa qiduana  
 ta yahawatuboya  
 mana 'wafigu nawale  
 naya'itoto 'evivi 'aligega,  
<sup>27</sup> mana ge una nogegu  
 be tuta kuena to'aliga  
 edi 'ebetoa 'inaya ena toa,  
 ta wese ya'a Gwalagwalagu  
 ge 'wafigu una awafelei  
 be nadavula.

- <sup>28</sup> Ta yawai vataya ana 'eda  
 ni'a uve'itegu,  
 'inega nawale qaiawa qiduana  
 ena lobea matauya.' ”

<sup>29</sup>\* Ta Fita wese vonaya, “Taigwavo, yavona aqiaqi 'imia, vona ba'e gebu tubuda Deibida weaqina, mana Deibida nana kahalamania lova 'aliga ta itavunia. Ta

\* 2:25: Same 16:8-11 \* 2:29: 1Kin 2:10

guduma nana ba'e 'itaga ka'ite'itea. <sup>30</sup>\* Deibida Yaubada ena vona ni'a alamani aqiaqiea mana tauna taha tovesimasimana. Lova Yaubada ena vona fofofola 'inaya 'awatamatamana nawale ena gadeyega taha Kini natovolo ta ena 'ebetoa kaikaiwabuna 'inaya natoabui. <sup>31</sup>\* Deibida ni'a alamania ba'e yani nana nawale na'ifoqe, 'inega vonaya, 'Yaubada gebu nanogei to'aliga edi 'ebetoa 'inaya be wese 'wafina gebu na'uluma.' Ta Deibida ena vona ba'e Keliso ena ya'itoto 'evivi 'aligega weaqina. <sup>32</sup>'Inega Yaubada Iesu giveya'itoto 'eviviea 'aligega, ta ima'a qabuma ni'a a'itea ta asimanea. <sup>33</sup>\* 'Inega Yaubada ena waiwaiega givaneqea mahalaya ta ba'itagana 'ataqinaya toatoa. Ta Tamana lova vona fofofolayea Niboana Gwalagwalana namai ena tomotauyavo 'idia, ta ba'itagana ni'a guiwaqia 'imaya. Ba'e vona fofofola nana ana aqiaqi ni'a o'ite'itea ta wese onoqonoqolia 'imega. <sup>34</sup>\* Mana Deibida gebu tauna ena vane mahalaya weaqina davona, ta 'esi Iesu weaqina simana vonaya,

'Yaubada ni'a vona  
egu Kaiwabu 'inaya,

'Ataqiguya una toabui

<sup>35</sup>ana laba au aviayavo

ena a'uwebuiedi  
ta una luvinedi.'

<sup>36</sup>\* "Ba'e weaqina me Isileli qabumi ona alamani aqiaqiea ni'a Yaubada Iesu 'awa-Kaiwabuyea ta wese tauna To'etoyavua. Ta tauna ni'a otutuve'ewea 'etoluai 'inaya."

<sup>37</sup>Tuta nana tomotau qabudi ba'e vona diavona inoqolia nuadi vita qiduana, 'inega Fita ta wese tovaletuyana leveni dina ivetala'aiedi ivonaya, "Emavo, ni'a luveifana aviaqia, 'inega ma'oda ana viaqa 'aiqa?"

<sup>38</sup>'Inega Fita vonedia, "Emi ilivu luveifadi 'idiega ona nuagivila, ta wese ona babitaiso Iesu Keliso ana wawega. 'Inega Yaubada emi luveifana nanuataqodi, ta wese Niboana Gwalagwalana naneimi. <sup>39</sup>\* Lova Yaubada vona fofofola vonigo Niboana Gwalagwalana omi'a be wese natumiavo naneimi. Ta wese Niboani nana naneidi tomeqabu luluvaia itoatoa, be wese tomeqabu Yaubada Tamada ena nuanua 'inega nagabedi 'idia."

<sup>40</sup>Ta Fita ena vonayavo waiwaidi neidi vonaya, "Omi'a taumiega ona 'etoyavuimi lagata ba'e edi luveifana 'inega!"

<sup>41</sup>\* Ta 'aubena nana 'inaya tomotau qabudi Fita ena vona ivetumaqanea, 'inega adi yau 'idewana 3,000 ibabitaiso ta iluvetuba tovetumaqanayavo maega. <sup>42</sup>\* 'Inega tovetumaqana vauvaudi iawafeledi tovaletuyana edi ve'itayavo 'idia. Ta tuta qabuna iveiaiana aqiaqiedi ta Iesu ana 'ebenuave'avina 'abwagana i'ai'aini ta wese ivevenoqi Yaubada 'inaya.

### *To'ekalesia edi ilivu*

<sup>43</sup>Tovetumaqana qabudi Yaubada i'amayabea ta tovaletuyanayavo 'ebe'ita waiwaidi ta wese 'ebenuavoqana 'eala iviaqidi. <sup>44</sup>\* Qabudi tuta qabuna itoava'auta, ta edi kulufayavo 'idiega wese iveiuiula. <sup>45</sup>Ta vaina 'idiega edi bwa'obwa'o ta wese edi kulufa iveg-imwaneyedi. 'Inega manena i'ewei ivewila'ayea lukwalukwa 'idia edi velukwalukwa ana fata 'inega. <sup>46</sup>Ta tovetumaqana tuta qabuna iva'auta Vanue Gwalagwalana gamonaya. Ta nuadi 'aideganega wese edi vanueavo 'idia me edi qaiawa Iesu ana 'ebenuave'avina 'abwagana i'ai'ai ve'wani. <sup>47</sup>\* Tuta qabuna Yaubada iawahawatuboya ta tomotau qabudi tovetumaqana diavona i'awahaqiaqiedi. 'Inega 'aubena 'aidega 'aidega 'idia tomeqabu Iesu Valena inoqolia ta ivetumaqanea Kaiwabu 'etoyavuidi. 'Inega iluvetuba tovetumaqanayavo maega ta ive'eala.

\* 2:30: 2Sam 7:12; Same 89:3-4; 132:11 \* 2:31: Same 16:10 \* 2:33: Via 5:32; 7:55-56 \* 2:34: Same 110:1

\* 2:36: Via 5:30-31 \* 2:39: Ais 57:19 \* 2:41: Via 2:47; 4:4 \* 2:42: Via 20:7 \* 2:44: Via 4:32-35 \* 2:47:

Via 6:7; 11:21

## 3

*Fita taha* 'oloto belubeluna giveaiaqiea

<sup>1</sup> Taha 'aubena lavilavi 3 koloki 'inaya Fita be Ioni itautauya Vanue Gwalagwalana 'inaya sabi venoqi, mana me Diu edi ilivu 'idewana. <sup>2</sup> 'Inega tuta nana Vanue Gwalagwalana masu'edaninaya i'ifoqe taha 'oloto 'aqena veifana lova 'idewana vi'oiea i'itea. Ta vanue nana ana 'awa 'inaya toabui toatoa ta 'awa nana igabea ana wawa "Ebelugu Gasagasana." Ta 'oloto nana enavo tuta qabuna i'ava'avalei imimiei 'awaya ia'ua'uya. 'Inega vevenoqi tologu 'idia iula weaqina. <sup>3</sup> Ta tutana Fita be Ioni 'itedi ina lugu 'inega venoqi 'idia vonigo mane ida neia. <sup>4</sup> \* 'Inega magilafudina 'oloto nana i'ita makimakia ta Fita voneaya, "U'itema!" <sup>5</sup> 'Inega 'ita naqo 'idia ta ena nuanua vonigo taha yani aqiaqina ida neia.

<sup>6</sup> \* Ta Fita voneaya, "Ge taha wese mane 'iguya ta 'esi tola'ai 'iguya 'eno'eno ena neiu." 'Inega vonaya, "Iesu Keliso Nasaleta 'olotona ana wawega yavoneu uya'itoto uyaba!" <sup>7</sup> 'Inega Fita 'oloto nana ana 'ataqia kafia ta siveya'itotoya e 'inega tuta omo'e 'inaya 'oloto nana 'aqena ta wese ana tubweavo iwewaiwai. <sup>8</sup> 'Inega yovotalaou veutovolo ta maega itauya ilugu Vanue Gwalagwalana 'inaya ta nawale luluououyei ta Yaubada awahawatuboya. <sup>9</sup> Tutana tomotau qabudi 'oloto nana i'itea yabayaba ta wese Yaubada awahawatuboya, 'inega nuadi voqana qiduana, <sup>10</sup> mana ialamania lova ge dayabayaba ta 'esi tuta qabuna toatoa Vanue Gwalagwalana masu'edaninaya igabea "Ebelugu Gasagasana" 'inaya ta vevenoqi ana iula weaqina. Ta ba'itagana ni'a veaiaqia.

*Fita ena lugaihi toyo'o* 'idia Vanue Gwalagwalana gamonaya

<sup>11</sup> 'Oloto nana ni'a veaiaqia ta Fita be Ioni nimadia nawale kafikafi, ta tomotau qabudi valena inoqolia. 'Inega ivihila imai Solomoni ena 'Ebevebasekwa 'inaya, ta tola'ai ni'a 'ifoqe weaqina nuadi voqana qiduana. <sup>12</sup> Ta tuta nana Fita tomotau qabudi 'itedi imaimai, 'inega taunega 'inaya vonaya, "Egu tuta ba'e aqiaqina lu'awaia be 'idia ena veqae." 'Inega vonedia, "Me Isileli, tola'ai weaqina nuami voqana ta ovevekovema? Nage emi nuenuaga ovonaya be 'oloto ba'e ima'a ada giveaiaqiea ema waiwaiega ta wese ema ilivu aqiaqinega, 'inega ana fata yabayaba? <sup>13</sup> \* Ta ba'e yani nana 'ifoqe tubudavo Ebelamo be Aisake ta wese Iakobo edi Yaubada 'inega, ta tauna ena tofewa Iesu ana wawa givaneeqa ba'e viaqa nana 'inega. Ta omi'a Iesu nana ove'ineia sabi luve'aligina ta wese oawawebuiea gavana Failato matanaya. Ta Failato nuanuana Iesu na'etoyavua, ta 'esi omi'a onogea. <sup>14</sup> Vonahaqiaqi, Iesu tauna Gwalagwalana ta tunutunuqina Tamana matanaya, ta omi'a onogea ta 'esi toluve'aliga taha weaqina Failato ovenoqiea. <sup>15</sup> 'Inega yawai aqiaqina ana Tonei oluve'aligia, ta Yaubada giveya'itoto 'eviviea 'aligega. E yani qabuna ni'a a'itea matamega ta asimanea. <sup>16</sup> Ta ba'e 'oloto nana o'ite'itea ni'a oalamanian lova 'aqena luveifadi. Tauna Iesu ana wawega be ena waiwaiega ni'a veaiaqia 'evivi matamia. Ta ba'e yani nana 'ifoqe mana ima'a me ema vetumaqana 'inaya.

<sup>17</sup> \* "Taigwavo, yahalamania emi vemwage 'inega Iesu oluve'aligia ami tovanugwetayavo maega, mana taudi wese ivemwage 'idewani omi'a. <sup>18</sup> Ta Yaubada ena To'etoyavua ena veilageavo weaqidi lova madusimanea ena tovesimasimanayavo qabudi 'idiega. Ta ba'e 'inega ana vonahaqiaqi ni'a 'ifoqe. <sup>19</sup> \* 'Inega omi'a luaqiaqiem be emi luveifana 'inega ona nuagivila, ta ona 'evivi Yaubada 'inaya be na'ewa yavuledi. 'Eguma 'idewanina ona viaqia e nawale Kaiwabu lutonova aqiaqina naneimi Niboana Gwalagwalana 'inega. <sup>20</sup> Ta wese To'etoyavua venuma'ivinina navetunei namai 'imia, e tauna Iesu. <sup>21</sup> Tauna ni'a tauya mahalaya natoatoa ana laba Yaubada yani qabudi wese nagivetunuqidi. Lova ena vona fofofola 'idewana ena tovesimasimanayavo gwalagwaladi 'idiega simanea, <sup>22</sup> \* mana Mosese vona fofofola vonaya, 'Nawale Kaiwabu Yaubada emi gadeyega taha 'oloto nagilagaia navetosimana 'idewana ya'a. Ta tauna ena vonayavo qabudi ona

\* 3:4: Via 14:9 \* 3:6: Via 4:10; 16:18 \* 3:13: 'lfo 3:6,15; Lk 23:13-25; Via 2:23 \* 3:17: Lk 23:34; 1Tim 1:13 \* 3:19: Via 2:38 \* 3:22: Luve 18:15,18-19

velumatamatayagedi. <sup>23</sup> Ta tomeqabu tovesimasimana nana ena vonayavo ge nuanuadi ina noqolia, e taudi Yaubada na'ewa yavula vatayedi ena tomotauyavo 'idiega.'

<sup>24</sup> "Vonahaqiaqi, tovesimasimana Samuela ena tuta 'inega tovesimasimana qabudi ni'a imadusimanea tola'ai 'ifo'ifoqe tuta ba'e 'inaya weaqina. <sup>25</sup> \* Yaubada ena vona fofofolayavo tovesimasimana ivona 'ifoqeyedi omi'a weaqimi. Lova Yaubada vona fofofola tubudavo 'idia ta wese omi'a 'imia tuta nana tubuda Ebelamo 'inaya simana vonaya, 'O'a natumwavo 'idiega nawale gade qabudi bwa'obwa'oya veyoluba ina lobe'a.' <sup>26</sup> \* Ta tutana Yaubada ena tofewa Iesu 'aligega giveya'itoto 'eviviea 'inega maduvetunea omi'a me Diu 'imia sabi givenuagivilami emi ilivu luveifana 'inega. Ta ba'e 'inega ena veyoluba qiduana neimi."

#### 4

##### *Fita be Ioni me Diu edi kaniselayavo matadia*

<sup>1</sup> Tutana Fita be Ioni nawale ivonavona qabu 'idia, 'inega toveguba ta Vanue Gwalagwalana ana to'itamakiavo adi tovatatana be wese Sadusiavo imai 'idia. <sup>2</sup> Ta me edi nualuveifa imai, mana Fita be Ioni qabu ive'itedi Iesu ena ya'itoto 'evivi 'aligega weaqina. Ta wese ive'itedi vonigo tomotau qabudi adi fata Iesu ena waiwaiega nawale ina ya'itoto 'evivi. <sup>3</sup> Omo'e 'iu nana Fita be Ioni ikafidi ta vanue 'ebeyoqona 'inaya ia'udi ana laba mahala navulihia, mana velovelovana ni'a 'ifoqe. <sup>4</sup> \* Ta qabu diavona Fita be Ioni edi lugaihi ni'a inoqolia, 'idiega tufwana qabudi edi vona ivetumaqanea Iesu weaqina. 'Inega iluvetuba tovetumaqanayavo 'idia, 'inega 'oloto daisidi adi yau ni'a vane 5,000 'idewana.

<sup>5</sup> Mahala vulihia 'inega 'abaga ana tovanugwetayavo be edi tovanugwetayavo ta wese luvine ana tove'itayavo iva'auta Ielusalema 'inaya. <sup>6</sup> Ta wese vaina tomotau maega iva'auta 'idewani toveguba edi tovanugweta Anasa ta wese Kaiafa be Ioni be Alekisana ta wese vaina tomotau Anasa ena gadeyega. <sup>7</sup> 'Inega Fita be Ioni imiedi ivetovolodi toluvineavo matadia ta ivetala'aiedi ivonaya, "Tola'aiega emi waiwai o'ewei, ta toga ana wawega 'oloto nana ogiveaiaqiaea?"

<sup>8</sup> Ta Niboana Gwalagwalana Fita ni'au luveagatuna'ia, 'inega ena waiwaiega vonedi vonaya, "Omi'a toluvineavo ta wese 'abaga ana tovanugwetayavo, <sup>9</sup> nage ema vetala'ai ba'e 'iuna mana 'oloto belubeluna aiulea be vonigo ma'oda 'inega veaqiaqi? <sup>10</sup> \* 'Inega omi'a ta wese me Isileli qabumi ona alamania, 'oloto ba'e matamia o'itea ni'a veaqiaqi Iesu Keliso Nasaleta 'olotona ana wawega. Tauna 'etoluai 'inaya otutuve'ewea, ta Yaubada giveya'itoto 'eviviea 'aligega. <sup>11</sup> \* Ta Buki Nugwenugweina Iesu weaqina simasimana vonaya,

'Tauna kavona 'oqola,  
     ta omi'a to'eyoqona  
     'oqola nana onogea,  
     ta ba'itagana vetamana  
     'oqola qabudi 'idia.'

<sup>12</sup> \* 'Inega ge taha toga wese ana fata na'etoyavuida ta 'esi Iesu ana 'aidega. Mana ge wese taha wawa bwa'obwa'oya da'eno'eno be 'inega 'etoyavua kana lobei."

<sup>13</sup> Ta me Diu edi kaniselayavo Fita be Ioni edi giwalifatu i'itea. Ta ialamania vonigo taudi tomotau kavokavovo, mana lova ge ida lugu sikulu qiduana 'inaya. 'Inega nuadi voqana qiduana ta i'ita 'inamedi lova magilafudi Iesu maega itoatoa. <sup>14</sup> Ta tutana 'oloto 'aqena belubeluna ni'a veaqiaqi i'itea Fita be Ioni di'weddia tovtovolo, 'inega ge wese adi fata be ina vona 'eviviedi. <sup>15</sup> 'Inega me Diu edi kaniselayavo Fita be Ioni ivonedi ina 'ifoqe edi vanue 'ebeva'auta 'inega, 'inega adi 'aidega idima govaqa magilafudi weaqidi. <sup>16</sup> Ta ivonaya, "Ma'oda kana viaqa 'aiqa taudi 'idia? Mana Ielusalema ana totoayavo qabudi

\* 3:25: Nug 22:18 \* 3:26: Via 13:46 \* 4:4: Via 2:41 \* 4:10: Via 3:6,13-16 \* 4:11: Same 118:22 \* 4:12: Md 1:21

ni'a ialamania 'ebenuavoqana waiwaina iviaqia. Ta viaqa nana ge ada fata kana vegeqei. <sup>17</sup> Ta 'esi kana luvinedi ge wese taha tuta tomotau 'idia ina velulu'uya Ieisu ana wawega, be yaqisa Ieisu Valena nawale ge nayawala mali tomotau 'idia."

<sup>18</sup> \* 'Inega kaniselayavo Fita be Ioni igaba 'eviviedi, ta luvine ineidi ge wese Ieisu ana wawega tomotau 'idia ina lugaihi ta wese ina ve'ita. <sup>19</sup> \* Ta Fita be Ioni ivona ve'iedi ivonaya, "Omi'a taumi ona nuanua tola'ai ama luaqiaqi be ana viaqi Yaubada matanaya. Nage omi'a emi nuanua ana matayagea, nage Yaubada ena nuanua? <sup>20</sup> Ima'a yani qabuna aqiaqi otaqidi ni'a a'itedi ta wese anoqolidi, 'inega ba'e yani diavona weaqidi ge ama fata ana lua'u lugaihi tomotau 'idia."

<sup>21-22</sup> 'Oloto nana lova 'aqena belubeluna ana ya'wala 40 ni'a lobe ta veaqiaqi. Ta me Diu edi kaniselayavo ge adi fata vematasabu vitana Fita be Ioni ina neidi, mana tomotau qabudi Yaubada iawatuboya ena fewa 'ebenuavoqana weaqina. 'Inega wese iawavedidgedi ta 'abiboda iluvinedi ina tauya.

<sup>23</sup> Ta edi vetala'ai 'abibodanaya Fita be Ioni i'evivi ediavo 'idia. Ta ivematamagilafuyedi toveguba qiduquadi be 'abaga ana tovanugwetayavo edi vona weaqina. <sup>24</sup> \* Ta ediavo yani qabuna inoqolia 'inega edi nuanua 'aideganega ta bonadi qiduanega ivenoqi Yaubada 'inaya ivonaya, "Ema Kaiwabu, o'a mahala be bwa'obwa'o ta mwade'wa ta wese yani qabudi i'eno'eno 'idia adi To'iva'ava'ata, <sup>25</sup> \* ta lova eu tofewa tubuma Deibida Niboana Gwalagwalana ena waiwaiega eu vona simana 'ifoqeyea vonaya, 'Tola'ai weaqina

di'we qabudi Kaiwabu weaqina  
diadi vilevilei?

Ta tola'ai weaqina

tomotau inuanua kavokavovo?

<sup>26</sup> Ta bwa'obwa'o ana toluvine qiduquadi  
be ana tovanugwetayavo ivava'auta  
ta i'iva'ava'ata vedavi weaqina,  
nuanuadi Kaiwabu be ena Keliso ina luaviedi.'

<sup>27</sup> \* Vonahaqiaqi, yani qabuna ba'e ni'a 'ifoqe tutana kini Elodi be gavana Fonitio Failato be me Isileli ta wese taudi ge me Diu iva'auta Ielusalema 'inaya Ieisu weaqina. Ta omo'e 'inaya eu tofewa Gwalagwalana be vevenua'ivinina ivevoalanea. <sup>28</sup> \* Ta qabu ba'e eu nuanua igive'ifoqeyea. Yani qabuna 'ifoqe eu waiwaiega ta wese eu nuenuega, mana lova umaduluvinedi be eu nuanua ina viaqia. <sup>29</sup> \* Kaiwabu ye, toluvineavo una noqolidi edi awavedidiga 'imaya eu fewa weaqina. Ta ima'a eu tofewayavo una givewaiwaiema be me ema giwalifatu eu vona ana simanea. <sup>30</sup> Ta eu waiwaiega tovevihuquna una giveaqiaqiedi be 'ebe'ita waiwaiidi ta wese 'ebenuavoqana una viaqidi tomotau 'idia eu tofewa Gwalagwalana Ieisu ana wawega."

<sup>31</sup> Venoqi gumwala 'inega 'abaga nana dedela. Ta qabudi Niboana Gwalagwala luveagatuna'idi, 'inega me edi giwalifatu Yaubada ena vona isimanea.

*Tovetumaqana edi kulufa ivewila'ayedi tomotau 'idia*

<sup>32</sup> \* Tovetumaqana qabudi yani qabuna iviaqia edi nuanua ta wese giwalidi 'aideganega. Ge taha toga gamodiega ena kulufa davemanu guba, ta 'esi yani qabuna iveiuiulayea. <sup>33</sup> Ta tovaletuyana me edi waiwai qiduana Kaiwabu Ieisu ena ya'itoto 'evivi 'aligea isimanea tomotau 'idia, ta Yaubada tovetumaqana qabudi ena veyoluba qiduana neidi. <sup>34-35</sup> \* Ta tovetumaqana dina 'idiega ge taha toga dakusa vaina yani weaqina, mana tomeqabu me edi kulufa be me edi bwa'obwa'o be wese me edi vanue ivegimwaneyedi, ta manena i'ewea tovaletuyana nimadia ia'uya. Ta 'abibodanaya ivewila'ayea tomotau 'aidega 'aidega 'idia 'eguma vaina yani 'idiega ikusa.

\* 4:18: Via 5:28 \* 4:19: Via 5:29 \* 4:24: 'Ifo 20:11; Nie 9:6; Same 146:6 \* 4:25: Same 2:1-2  
\* 4:27: Md 27:1-2; Lk 23:7-11; Via 3:13 \* 4:28: Via 2:23 \* 4:29: Efe 6:19 \* 4:32: Via 2:44 \* 4:34-35: Via 2:45



<sup>36</sup> Taha 'oloto ana wawa Iosefa tauna 'ebevetalatutula aqiaqina tovetumaqana edi ilivu weaqina. Tauna tovaletuyana igabea Banaba (ta wawa nana ana alamani, "Tovona iula"). Tauna Libai ena gade 'inega, ta ena 'ebevi'oi bwanabwana Saifilosu 'inaya. <sup>37</sup> Ta Iosefa ena bwa'obwa'o vegimwaneyea ta manena 'ewea miea tovaletuyana 'idia.

## 5

### *Ananaiasi ma moqanena Safaila edi u'ava*

<sup>1</sup> Taha 'oloto ana wawa Ananaiasi ma moqanena Safaila taudi wese edi bwa'obwa'o ivegimwaneyea. <sup>2</sup> \* Ta magilafudi edi nuanua 'aidegana 'inega vaina mane ivemanugubayea ta ia'ukwaivea. 'Inega Ananaiasi mane dibuna tauyeya tovaletuyana 'idia ta nimadia a'uya. <sup>3</sup> \* 'Inega Fita voneaya, "Ananaiasi, tola'ai weaqina giwaliu uawafelei Seitani 'inaya ta ena nuanua u'abibodei, mana uhu'ava Niboana Gwalagwalana 'inaya. Tola'ai weaqina mane dibuna uvemanugubayei eu bwa'obwa'o ana ve'ia 'inega? <sup>4</sup> Lova o'a tonibwa'obwa'o ta bwa'obwa'o nana eu 'ebeluvine, ta ni'au uvegimwaneyea e 'inega mane nana o'a au luaqiaqi be tau'u eu nuenuega uda luvinea. Ta tola'ai weaqina ba'e 'idewana uviala 'aiqa? Mana eu u'ava nana gebu ima'a tomotau 'imaya, ta 'esi Yaubada 'inaya."

<sup>5</sup> Tutana Ananaiasi Fita ena vona ba'e noqolia 'inega molita ta 'aliga. Ta tomotau qabudi valena inoqolia imwaniniva qiduana. <sup>6</sup> 'Inega vaina kilakai ilugu mai ta 'wafina kalekoyega iumea, ta 'abibodanaya i'avala 'ifoqeyei ta itavunia.

<sup>7</sup> Ta 'inega auwa toi 'abibodanaya moqanena wese ilugu mai. Ta ge ida alamania moqanedi yawaina ni'a gumwala. <sup>8</sup> 'Inega Fita mane nana ve'itedi ta vetala'aiedi vonaya, "Ona vonegu, tutana emi bwa'obwa'o ovegimwaneyea ana maisa 'evisa o'ewea, nage ba'e 'idewani?"

'Inega Safaila ivona 'eviviea ivonaya, "E 'idewana."

<sup>9</sup> 'Inega Fita vonedi vonaya, "Ma'oda 'inega omi'a magilafumi emi nuanua 'aideganega oawafelemi be Kaiwabu Niboanina ni'a ositonovia? O'itei, moqanemi ana totavunayavo ilugulugu mai ta wese omi'a ina 'avala 'ifoqeyemi." <sup>10</sup> 'Inega tuta omo'e 'inaya Safaila imolita Fita 'aqenaya 'abo i'aliga. Ta kilakai diavona ilugu mai ta i'itedi ni'a i'aliga, 'inega i'avala 'ifoqeyedi ta itavunidi moqanedi di'wenaya.

<sup>11</sup> Ta to'ekalesiyavo be wese mali tomotau valedi inoqolia 'inega imwaniniva gegoyo.

### *Tovaletuyana tovevhiqa igiveaqiaqiedi*

<sup>12</sup> \* Tovaletuyana 'ebenuavoqana ta wese 'ebe'ita waiwaiidi 'eala iviaqidi tomotau matadia. Ta tuta qabuna nuanua 'aideganega ivava'auta Vanue Gwalagwalana 'atamaninaya taha di'we igabea Solomoni ena 'Ebevebasekwa 'inaya. <sup>13</sup> Ta tomotau qabudi tovetumaqanayavo i'amayabedi ta wese tufwana imwaninivedi 'inega ge maega ida luvetuba. <sup>14</sup> Ta tua 'oloto be vivine ive'ale Ieisu ivetumaqanea, 'inega qabu qiduana tovetumaqana maega iluvetuba ta adi yau veago. <sup>15</sup> Tovaletuyana edi fewa waiwaiidi iviaqidi, ta ba'e 'iuna 'inega tomotau tovevhiqa ma 'ividi be ma sitadi imiedi ta 'eda nanavinaya ia'udi Fita ena 'ebetayuya be yaqisa Fita 'aye'ayewina igwa'una 'inega ina veaqiaqi. <sup>16</sup> 'Inega tomotau qabudi Ielusalema di'wenaya itoatoa imai, ta edi tovevhiqayavo imiedi ta wese taudi niboana luveifana 'wahalidi imiedi, ta qabudi iveaqiaqi.

### *Tovaletuyana vanue 'ebeyoqona 'inaya ia'uluguyedi*

<sup>17</sup> Ta toveguba edi tovanugweta ma enavo, taudi Sadusiavo edi qabu 'idiega diadi vilei ta tovaletuyanayavo ive'ifi'ifiedi. <sup>18</sup> 'Inega ikafidi ta ia'uluguyedi vanue 'ebeyoqona 'inaya. <sup>19</sup> \* Ta velovelovana 'inaya Kaiwabu ena tovale'ewa taha 'ifoqe ta vanue 'ebeyoqona ana 'awa siwa'ea 'inega 'ewa 'ifoqeyedi, ta vonedi vonaya, <sup>20</sup> "Ona tauya

\* 5:2: Via 4:34-35 \* 5:3: Ion 13:2 \* 5:12: Via 2:43; 14:3 \* 5:19: Via 12:7-10

Vanue Gwalagwalana 'inaya ta omo'e 'inaya ona tovolu tomotau matadia ta ona simana ilivu vauvauna Ieisu 'inega weaqina."

<sup>21</sup> Tovaletuyana tovale'ewa nana ena vona inoqolia, ta imatayagea. 'Inega 'awa'awai otaqaya itauya ilugu Vanue Gwalagwalana 'inaya, ta ive'ale tomotau ive'itedi.

'Inega toveguba edi tovanugweta ma enavo iva'auta. Ta me Diu edi kaniselayavo ta wese edi tovanugwetayavo igaba va'auqidi. 'Inega folisi iluvetunedi vanue 'ebeyoqona 'inaya tovaletuyana sabi 'ebe'ewadi kotu weaqina. <sup>22</sup> 'Inega folisi itauya vanue 'ebeyoqona 'inaya, ta ge taha toga ida 'itei. 'Inega i'evivi imai kaniselayavo 'idia ta isimana ivonaya, <sup>23</sup> "A'ifoqe vanue 'ebeyoqona 'inaya ana 'awa lokalokadi a'itedi ta wese to'itamakiavo a'itedi itovotovololu di'wedua. Ta tuta nana asiwa'edi 'inega ge taha toga gamonaya datoatoa." <sup>24</sup> Vanue Gwalagwalana ana to'itamakiavo adi tovanugweta ta wese toveguba qiduiduadi ba'e vale nana inoqolia 'inega nuadi voqana qiduaana ta taudiega inuanua vonigo tola'ai nawale wese na'ifoqe.

<sup>25</sup> 'Inega taha 'oloto mai simana 'idia vonaya, "Onoqolia! Taudi ni'a oa'uluguyedi vanue 'ebeyoqonaya ba'itagana wese itovotovololu Vanue Gwalagwalana 'inaya ta tomotau iveve'itedi." <sup>26</sup> 'Inega folisi adi tovanugweta maega i'ifoqe itauya Vanue Gwalagwalana 'inaya ta tovaletuyana me'inuadiega ikafidi, mana folisi dina tomotau imwaninivedi fole daboyega ida ludabodi.

<sup>27</sup> 'Inega imiedi ta me Diu edi kaniselayavo matadia ivetovolodi, ta toveguba edi tovanugweta vetala'aiedi vonaya, <sup>28</sup> \* "Lova ni'a ahawatayemi waiwaina ge wese Ieisu ana wawega ona veve'ita, waisa? Ta omi'a me Ielusalema qabudi oveve'itedi Ieisu weaqina, ta wese ima'a ove'ewema ena 'aliga weaqina!"

<sup>29</sup> \* 'Inega Fita tovaletuyana qabudi maega ivona 'eviviedi ivonaya, "Luaqiaqiema be Yaubada ena vona ana matayagea, ta 'abiboda tomotau edi vona. <sup>30</sup> Ta omi'a Ieisu otutuve'ewea 'aiwe 'inaya ta oluve'aligia. Ta tubudavo edi Yaubada giveya'itoto 'eviviea 'aligega. <sup>31</sup> \* 'Inega Yaubada Ieisu givaneqea ana 'ataqia 'idewani To'etoyavua ta wese Toluvine. Ba'e Yaubada ena fewa 'inega me Isileli adi fata ina nuagivila be edi luveifana nanuataqodi. <sup>32</sup> Ima'a ta wese Niboana Gwalagwalana ba'e yani diavona ni'a a'ita aqiaqiedi, mana tomeqabu Yaubada imatamatayagea Niboanina Gwalagwalana neineidi."

### *Gamelieli toluvine awatayedi*

<sup>33</sup> Ta tuta nana kaniselayavo be tovanugwetayavo Ieisu ena tovaletuyana edi vona inoqolia, 'inega diadi vilei nuanuadi ina luve'aligidi. <sup>34</sup> Ta kanisela diavona 'idiega taha iadi ana wawa Gamelieli ya'itoto matadia. Tauna Falisi ta luvine ana tove'ita taha, ta tomotau qabudi i'amayabea. 'Inega Gamelieli tovaletuyana luvinedi be tuta kukusana vanue nana 'inega ina 'ifoqe 'atamanaya. <sup>35</sup> 'Inega enavo vonedi vonaya, "Me Isileli, ona nuana aqiaqi tola'ai ona viaqi 'idia. <sup>36</sup> \* Ta ona nuave'avinia lova Tudasi 'ifoqe ta taunega ana wawa a'uvaneqea vonaya, 'Ya'a taha kaiwabu!' 'Inega 'oloto adi yau 'idewana 400 i'abibodea. Ta tomotau iluve'aligia, 'inega ana to'abibodayavo qabudi iyavula. <sup>37</sup> Vonahaqiaqi, Tudasi ni'a 'aliga. Ta 'abibodanaya tutana tomotau adi wawa i'wayavidi takesi weaqina, e 'inega Galili 'olotona taha ana wawa Iudasa 'ifoqe. Tauna ge nuanuana me Loma edi luvine na'abibodei 'inega vevoalaneli. Ta Iudasa vaina tomotau lukeiedi ta ena nuana i'ewei ta i'abibodea. 'Inega tauna wese iluve'aligia, ta ana to'abibodayavo iyavula ta yani qabuna lua'u. <sup>38</sup> 'Inega ba'itagana yavonevonemi, ba'e tomotau diavona ge taha luvine ona neidi, ta 'esi ona nogedi! Mana 'eguma edi ve'ita be edi simana taudi edi nuenuaga 'ifo'ifoqe e 'inega nawale yani qabuna nahawala. <sup>39</sup> Ta 'eguma edi fewa ba'e Yaubada 'inega, e 'inega ge ami fata ona awatayedi, mana 'eguma ona awatayedi 'inega tomotau ina nuaia Yaubada ovevevoalanea."

\* 5:28: Md 27:25 \* 5:29: Via 4:19 \* 5:31: Lk 24:47; Via 2:33-34; Ibe 2:10 \* 5:36: Via 21:38

<sup>40</sup> \* Ta Me Diu edi kaniselayavo be wese tovanugwetayavo Gamelieli ena vona i'awahaqiaqiea. 'Inega tovaletuyana igaba 'eviviedi ilugu ta wayoyega ivunuqa dadanedi. Ta 'abiboda iluvinedi ge wese Iesu ana wawega ina simana. 'Inega iluvetunedi i'ifoqe. <sup>41</sup> \* 'Inega tovaletuyana me edi qaiawa kanisela dina inogedi, mana ni'a ialamania Yaubada venua'ivinedi be yaqisa adi fata vita taha taha ina vebaedi Iesu ana wawa weaqina. <sup>42</sup> Ta tuta qabuna Vanue Gwalagwalana 'inaya ta wese edi vanueavo 'idia iveve'itayea ta isimasimanea, vonigo Iesu tauna To'etoyavua.

## 6

### *Toiula adi yau seveni ivenua'ivinidi*

<sup>1</sup> \* 'Aubena 'aidega 'aidega 'idia Iesu ana to'abibodayavo iveve'eala. Ta tuta omo'e 'inaya vita 'ifoqe 'ekalesia gamonaya, 'inega taudi tovana Guliki ivetalabudabuda tovana Ibeliu 'idia, mana edi wada'eavo ge adi wila'amo, 'inega ibotabotana. <sup>2</sup> 'Inega Tuwelo dina to'abiboda qabudi igaba va'auqidi ta ivonedi ivonaya, "Ima'a tovaletuyana luaqiaqiema be Yaubada ena vona ana lugaihi, 'inega ge daluaqiaqiema 'eguma wese 'abwaga ana vewila'ayei. <sup>3</sup> 'Inega taimavo, omi'a 'imiega 'oloto seveni ona venua'ivinedi taudi edi ilivu aqiaqina. Ta taudi me edi alamani ta wese Niboana Gwalagwalana 'idia ni'au luveagatuna'idi ona venua'ivinedi. 'Inega fewa ba'e ana neidi be ina 'itamakia. <sup>4</sup> 'Inega ima'a tuta qabuna ama fata ana venoqi ta Yaubada ena vona tomotau ana ve'itedi."

<sup>5</sup> Ta to'abiboda qabudi tovaletuyana edi nuanua i'awahaqiaqiea, 'inega 'oloto adi yau seveni ivenua'ivinedi, adi wawa ba'e 'idewana: Sitibeni, tauna ena vetumaqana qiduana ta Niboana Gwalagwalana ni'a luveagatuna'ia, ta Filifi be, Filikolo be, Nikanoli be, Taimoni be, Falimina ta wese Nikola tauna lova ge Diu, mana tauna 'abaga Anitioki 'olotona. Ta 'abiboda me Diu edi tafwalolo 'inaya lugu, ta ba'e 'itaga wese Iesu vevetumaqanea. <sup>6</sup> 'Inega seveni dina ivetovolodi tovaletuyanayavo matadia ta nimadi ia'ui 'idia ta weaqidi ivenoqi Yaubada 'inaya.

<sup>7</sup> \* 'Inega Yaubada ena vona yawala tomotau qabudi 'idia. Ta tovetumaqana Ielusalema gamonaya adi qabu veqidua va'ine. Ta wese me Diu edi tovegubayavo tufwana qabudi Yaubada ena vona imatayagea ta Iesu ivetumaqanea.

### *Sitibeni ikafia*

<sup>8</sup> Yaubada ena nuakolokoloyega Sitibeni veyolubea qiduana ta wese ena waiwai neia. 'Inega fewa waiwaidi viaqidi 'idewana 'ebenuavoqana be wese 'ebe'ita tomotau matadia. <sup>9</sup> Ta vaina tomotau imai ta Sitibeni maega ive'ae'aetoga. Taudi me Diu ta edi vanue tafwalolo igabea "Tofewa Yavuyavuidi Edi Vanue Tafwalolo". Ta vaina Sailini 'inega ta vaina Alekisanidela 'inega, ta wese vaina di'we Silisia be Eisia 'idiega imai Sitibeni 'inaya. <sup>10</sup> \* Ta Niboana Gwalagwalana alamani aqiaqi otaqina Sitibeni neia 'inega ena vona vewaiwai, ta taudi me Diu ge adi fata ena vona ina ve'iei. <sup>11</sup> 'Inega inogea ta 'waivega itauya vaina tomotau 'idia ta ivemaisidi vonigo nuanuadi Sitibeni ina ve'ewea ta ivonedia, "Ona vonaya, 'Sitibeni anoqolia Mosese be Yaubada 'awaluveifedi.' "

<sup>12</sup> Ta tou'ava dina edi vona ba'e 'inega 'abaga ana tovanugwetayavo be luvine ana tove'itayavo ta wese tomotau qabudi idivemaninidi. 'Inega Sitibeni ikafia ta itauyega edi kaniselayavo matadia.

<sup>13</sup> 'Inega kaniselayavo tou'ava dina igabedi ilugu ta isimana ivonaya, "Oloto ba'e tuta qabuna Vanue Gwalagwalana be Mosese ena luvineavo weaqidi 'awa'awa luveifedi. <sup>14</sup> Ta ena vona ni'a anoqolia vonaya, 'Iesu Nasaleta 'olotona nawale Vanue Gwalagwalana ba'e naqeu yavulea, be wese Mosese ena luvineavo lova neida nagivedumedumedi.' "

<sup>15</sup> Ta tomotau qabudi ni'a itoatoa me Diu edi kaniselayavo edi vanue 'ebetoava'auta gamonaya Sitibeni ivevekovea. Ta 'iawana i'itea ana 'ita kavonaya Yaubada ena tovale'ewa 'iawana 'idewani.

\* 5:40: Via 4:18 \* 5:41: Md 5:10-12; 1Fit 4:13 \* 6:1: Via 4:35 \* 6:7: Via 2:41; 16:5 \* 6:10: Lk 21:15

## 7

*Sitibeni ena vona kaniselayavo matadia*

<sup>1</sup> 'Inega toveguba edi tovanugweta Sitibeni vetala'aiea vonaya, "Ma'oda, edi ve'ewa 'iuya vonahaqiaqi nage gebu?"

<sup>2</sup> \* Ta Sitibeni vonedi vonaya, "Taigwavo be tamagwavo, ba'e egu vona ona noqolia. Simatala kaikaiwabuna be qiduana ana Yaubada 'ifoqe tubuda Ebelamo 'inaya tutana lova di'we Mesofotemia 'inaya toatoa, ta nawale ge datauya 'abaga Elana 'inaya. <sup>3</sup> 'Inega Yaubada Ebelamo vonea vonaya, 'Au tuvada be wese eu gade qabudi una nogedi, ta una tauya di'we taha 'inaya ta di'we nana nawale ena ve'iteu.'

<sup>4</sup> "Inega di'we Kalidia nokea ta ve'abaga Elana 'inaya. Ta Ebelamo tamana ena 'aliga 'abibodanaya Yaubada luvetunea mai di'we ba'e 'inaya ta ve'abaga omi'a wese ba'e 'itaga 'inaya otoatoa. <sup>5</sup> \* Ta Yaubada Ebelamo ge taha bwa'obwa'o ba'idia daneia ena 'ebeluvine. Ta 'esi Yaubada vona fofofola Ebelamo 'inaya nawale di'we ba'ena me ena gadeavo edi 'ebeluvine. Ta omo'e tuta nana 'inaya Ebelamo natu geqana.

<sup>6</sup> \* "Ta wese Yaubada Ebelamo voneaya, 'Nawale tubumwavo ina vewagawaga mali di'we 'inaya, ta ya'wala 400 gamonaya ina vetofewa kavovo di'we nana 'inaya, ta tonidi'we ina veilivu veifedi be vita ina lutonovia. <sup>7</sup> \* Ta di'we nana ana tomotauyavo ena luvemasabudi 'inega nawale di'we omo'e 'inega me Isileli yavuyavuidi ina 'ifoqe be ina iwa'odu 'iguya ba'e di'we nana 'inaya.'

<sup>8</sup> \* "Inega Yaubada Ebelamo maega luvine iviaqia, ta Yaubada vonea vonaya, 'Luvine nana ana 'ebe'ita ba'e 'idewani: Nawale eu gadeavo me'ome'olotodi 'wafidi ina da'a yavulea.' 'Inega Ebelamo natuna me'olotona ana wawa Aisake venatunea, ta 'aubena'eita (8) 'abibodanaya 'wafina da'ea. Ta 'abiboda Aisake natuna me'olotona ana wawa Iakobo venatunea, ta wese 'wafina da'ea. 'Inega 'abiboda Iakobo natunavo me'ome'olotodi adi yau tuwelo venatunedi ta taudi ita'a tubudavo.

<sup>9</sup> \* "Ta tubudavo dina taidi Iosefa ive'ifi'ifiea, 'inega ivegimwaneyea vaina tomotau 'idia ta 'inega itauyea Itifita 'inaya. Tauna edi tofewa kavovo, ta tuta qabuna Yaubada maega. <sup>10</sup> \* 'Inega Yaubada Iosefa ana vitayavo 'idiega 'etoyavua, ta wese ena alamani aqiaqina be qiduana neia. 'Inega me Itifita edi kini Felo Iosefa ena alamani 'ita lobe. 'Inega Felo nana Iosefa a'uvaneqea vegavana di'we Itifita gamonaya, ta wese kini nana ena kulufa qabuna ta wese ena vanueavo luvinedi. <sup>11</sup> \* Ta tuta nana kulaka qiduana 'ifoqe di'we Itifita ta wese Kenani 'idia, 'inega tuta vitana tomotau qabudi ilobe, ta tubudavo ge taha yani 'idia da'eno'eno. <sup>12</sup> Ta Iakobo vale noqolia 'abwaga Itifita 'inaya nawale 'eno'eno. 'Inega Iakobo natunavo me'ome'olotodi taudi ita'a tubudavo luvetunedi itauya Itifita 'inaya 'abwaga weaqina. <sup>13</sup> \* Ta 'abiboda wese itauya 'evivi Itifita 'inaya, 'inega Iosefa taunega simana 'ifoqeyea tuanavo 'idia vonaya, 'Ya'a taimi.' Ta 'abiboda kini Felo Iosefa ena qabuyavo valedi noqolia. <sup>14</sup> \* 'Inega Iosefa vaina tomotau luvetunedi itauya tamana Iakobo ena qabuyavo maega sabi 'ebe'ewadi Isileli 'inega ina mai Itifita 'inaya, ta adi yau 75 'idewani. <sup>15</sup> \* E 'inega Iakobo webui Itifita 'inaya, ta 'oide 'aliga, ta wese natunavo ita'a tubudavo i'aliga. <sup>16</sup> \* 'Inega to'aliga diavona 'wafidi i'avalei i'eviviea Sikemi 'inaya ta itavunidi. Ta guduma nana lova Ebelamo gimwane maneyega Emoli natunavo 'idiega.

<sup>17</sup> \* "Ta Iosefa ena 'aliga 'abibodanaya Yaubada lova ena vona fofofola Ebelamo 'inaya me Isileli edi bwa'obwa'o weaqina ana aqiaqi ni'a vadi'wedi. Ta omo'e tuta nana 'inaya me Isileli adi qabu ve'eala va'ine Itifita gamonaya. <sup>18</sup> 'Inega taha kini 'evauna tovolu Itifita

\* 7:2: Nug 11:31; 12:1      \* 7:5: Nug 12:7; 15:18; 17:8      \* 7:6: Nug 15:13-14; 'Ifo 12:40      \* 7:7: 'Ifo 3:12  
 \* 7:8: Nug 17:9-14; 21:4      \* 7:9: Nug 37:11,26-28; 39:1-3,21-23      \* 7:10: Nug 41:37-44      \* 7:11: Nug 41:54; 42:1-2  
 \* 7:13: Nug 45:1-4,16      \* 7:14: Nug 45:9-11; 46:27      \* 7:15: Nug 46:1-7; 49:33      \* 7:16: Nug 23:2-20; 33:19; los 24:32  
 \* 7:17: 'Ifo 1:7-8

gamonaya, ta tauna Iosefa valena ge dahalamaniana. <sup>19</sup>\* Ta kini nana tubudavo u'avedi ta wese ilivu luveifana viaqia 'idia, ta wese luvine neidi natudiavo goyogoyodi ivevetue yavuledi muta'waya ta omo'e 'inaya ilulu'aliga. <sup>20</sup>\* Ta ba'e tuta nana 'inaya wese Mosese vi'oi. Tauna ana 'ita aqiaqina Yaubada matanaya, ta tamana be inana i'itamaki kwaivea edi vanuea wai'ena toi gamonaya. <sup>21</sup>\* Ta 'abibodanaya Mosese ia'u'ifoqeyea vanuega, e 'inega kini nana natuna mevavinena lobeaga go'ilaya. 'Inega 'ebe'ewei tauyega edi vanuea ta fayayea kavona natuna 'idewani. <sup>22</sup> Ta me Itifita edi alamani be edi ilivu qabuna weaqina Mosese ive'itea, 'inega vewaiwai va'ine ena vona be wese ena fewa 'idia.

<sup>23</sup> "Ta tutana ana ya'wala 40 ni'a lobeaga 'inega nuanuana tainavo me Isileli navayausidi. <sup>24</sup>\* 'Inega Mosese tutuvila tauya ta taha Itifita 'olotona 'itea tauna taha Isileli 'olotona veilivu veifea ta vunuqa kavovoya. 'Inega Mosese iana vata'ita'iea ta Itifita 'olotona luve'aligia.

<sup>25</sup> "Ta Mosese nuaia enavo me Isileli ni'a ida alamaniana Yaubada na'etoyavuidi tauna 'inega, ta me Isileli nuadi nawale ge da'eqa'ui ba'e yani nana weaqina. <sup>26</sup> Ta mahala ahalia 'inega Mosese 'ifoqe tainavo magilafudi 'idia ta 'itedi ivevedavi. Ta nuanuana nagivelua'udi 'inega vonedia, 'Egwavo omi'a gade 'aidegana, ta ma'oda 'inega taumiega ovevedavi?"

<sup>27</sup> "Inega vedavi nana ana tove'ale diana vilea ta Mosese atuefalea voneaya, 'Vonigo o'a togama eu vetoluvine neiu be 'inega ululuvinema! <sup>28</sup>\* Nage nuanuau una luve'aligigu 'idewani goluanaya taha Itifita 'olotona uluve'aligia? <sup>29</sup>\* Tutana Mosese vona ba'e noqolia, 'inega Itifitayega dena tauya di'we Midiani 'inaya, ta omo'e 'inaya kavona wagawaga toatoa. Ta omo'e di'we nana 'inaya vaqi ta natunavo me'olotodi magilafudi venatunedi.

<sup>30</sup>\* "Ya'wala 40 'abibodanaya tutana Mosese yabayaba di'we tomotau geqana 'inaya bwanaga Sainai di'wenaya, 'inega Yaubada ena tovale'ewa taha 'ifoqe taha 'aiwe goyona saesaelina 'inega. <sup>31</sup> Ta tuta nana Mosese 'itea nuana voqana qiduana ta naqo di'wenaya sabi 'ita aqiaqina. 'Inega Kaiwabu bonana noqolia voneaya, <sup>32</sup> 'Ya'a tubumwavo edi Yaubada. Ebelamo be, Aisake ta wese Iakobo edi Yaubada.' 'Inega Mosese mwaniniva qiduana ta tatava ge nuanuana na'itei. <sup>33</sup> 'Inega wese Kaiwabu voneaya, 'Au'aqeyafayafa una gita'ia, mana di'we nana 'inaya utovotovolo bwa'obwa'o gwalagwalana. <sup>34</sup> Vonahaqiaqi, egu tomotauyavo edi toa vitana Itifita 'inaya ni'a ya'itea, ta wese edi duvovoyoya ni'a yanoqolia, 'inega yawebui mai sabi 'etoyavuidi. Umai, ta ba'e 'inega ena luvetuneu una 'evivi una tauya Itifita 'inaya.'

<sup>35</sup>\* "Lova me Isileli ba'e Mosese nana inogea ivonaya, 'Vonigo o'a togama eu vetoluvine neiu be una luvinema? Ta Yaubada nuanuana Mosese naluvinedi be na'etoyavuidi, 'inega gabea ena tovale'ewa taha 'inega, ta ba'e tovale'ewa nana taha 'aiwe goyona saesaelina 'inega 'ifoqe. <sup>36</sup>\* 'Inega Mosese fewa 'ebenuavoqana ta wese 'ebe'ita waiwaidi viaqidi tutana Yaubada 'ifoqeyedi Itifita 'inega be Mwade'wa Bweabwealina igayoukamaniana, ta wese tuta nana di'we tomotau geqana 'inaya ya'wala 40 gamonaya itautauya. <sup>37</sup>\* Ba'e Mosese nana lova taunega me Isileli vonedi vonaya, 'Nawale Yaubada tovesimasimana taha 'idewana ya'a nagivaneqea 'imiega.' <sup>38</sup>\* Taunana lova tubudavo maega di'we tomotau geqana 'inaya iva'auta itoatoa. Ta wese Yaubada ena tovale'ewa taha ena vona noqolia bwanaga Sainai 'inaya. Ta tauna wese vona mayawaidi Yaubada 'inega 'ewedi ta neida.

<sup>39</sup> "Ta tubudavo Mosese ena vona ge ida matayagea, ta 'esi inogea nuanuadi ina 'evivi Itifita 'inaya. <sup>40</sup>\* 'Inega Mosese tuana Eloni ivonea ivonaya, 'Nuanuama vaina 'ebeiwa'odu una viaqidi 'imaya be ina vanugweteda, mana Mosese tauna Itifita 'inega

\* 7:19: 'Ifo 1:11-22 \* 7:20: 'Ifo 2:2 \* 7:21: 'Ifo 2:3-10 \* 7:24: 'Ifo 2:11-15 \* 7:28: 'Ifo 2:14  
\* 7:29: 'Ifo 2:21-22; 18:3-4 \* 7:30: 'Ifo 3:1-10 \* 7:35: 'Ifo 2:14 \* 7:36: 'Ifo 7:3; 14:21; Naba 14:33  
\* 7:37: Luve 18:15 \* 7:38: 'Ifo 19:3 \* 7:40: 'Ifo 32:1

'ebe'eweda mieda ta ni'au 'watovu bwanagaya, ta ge kada alamanía tola'ai nage 'ifoqe 'inaya.' <sup>41</sup>\* Ta 'inega taha tokwalui iviaqia, ana 'ita kavona bulumakau natudi 'idewana. Tauna weaqina iqaiawa ta edi guba yubaiega ivegubayea 'inaya. <sup>42</sup>\* 'Inega Yaubada nogedi ta awafeledi baba'au be wai'ena ta wese 'wadi'wadima adi iwa'odu 'inaya. Lova tovesimasimana 'idewani edi buki gamonaya Yaubada ena vona isimanea ivonaya,

'Omi'a me Isileli,  
ya'wala 40 gamonaya  
di'we tomotau geqana 'inaya otoatoa.

Ta omo'e tuta nana 'inaya  
ge taha yani  
oda vegubayei 'iguya, waisa?

<sup>43</sup> Ta 'esi tuta qabuna  
vanue 'ebe'ewa'odu o'ava'avalea  
emi iwa'odu Moleke weaqina.

Ta wese emi tokwalui ana wawa Lifana  
ana 'wadima oviaqia,  
ta ba'e tokwalui diavona  
nimamiega oviaqidi sabi awatubodi.

'Inega ya'a ena luvetunemi  
ona tauya luluvaia di'we Babiloni 'inaya  
ta wese gwavunaya.' ”

<sup>44</sup> Ta Sitibeni wese vonaya, “Tutana tubudavo di'we tomotau geqana 'inaya itoatoa 'inega edi vanue 'ebe'ewa'odu ana wawa Tabenakeli tuta qabuna i'avala dadanea. Ta Yaubada Mosese vebibinea vanue nana ana viaqa weaqina e 'inega tubudavo 'idewani iyoqona 'aiqea. <sup>45</sup>\* Ta 'abiboda tubuda Iosua tubudavo maega Tabenakeli nana i'ewea ta i'avala dadanea. Ta tuta nana mali qabu maega ivedavi ta i'wavinidi Yaubada ena wai-waiega 'inega edi bwa'obwa'o ba'e i'ewea. E 'inega edi Tabenakeli imiea edi bwa'obwa'o vauvauna 'inaya. Ta omo'e 'inaya wese ivefewea Deibida ena tuta luvine 'inaya. <sup>46</sup>\* Ta Yaubada qaiawa qiduana Deibida weaqina, 'inega Deibida venoqi Yaubada 'inaya vonaya, 'O'a wese Iakobo ena Yaubada, nage una awafelegu ta eu Vanue Gwalagwalana ena yoqonia?’ <sup>47</sup>\* Ta Yaubada ge dahawafelea, ta 'esi 'abiboda natuna Solomoni vanue nana yoqonia Yaubada weaqina. <sup>48</sup> Ta ona nuave'avinia, Yaubada Toatoa Vanena ge datoatoa vanue tomotau nimadiega iyoqonia 'inaya. 'Idewani taha tovesimasimana Yaubada ena vona simanea vonaya,

<sup>49</sup>\* 'Mahala egu 'ebetoa kaikaiwabuna  
ta simasimalina,  
ta bwa'obwa'o 'aqegu ana 'ebea'u.

Nage omi'a ami fata taha vanue  
aqiaqi otaqina ba'e 'idewani ona yoqonia weaqigu  
be 'inega ena veyawai 'inaya?

Gebu!

<sup>50</sup> Mana ya'a mahala be bwa'obwa'o  
ta wese yani qabuna agu 'aidega nimaguyega yaviaqidi!’ ”

<sup>51</sup>\* Wese Sitibeni toluvineavo vonedi vonaya, “Omi'a debami 'i'wanina! Yaubada ena vona ge oda noqolia ta wese giwalimi ge oda awafelea 'inaya. E 'inega omi'a 'idewani tomotau Yaubada ge ida vetumaqanei. Lova tubumiavo Niboana Gwalagwalana ena vona inogea, ta omi'a wese ba'itagana 'idewani. <sup>52</sup>\* Tubumiavo tovesimasimana qabudi iveilivu veifedi. Ta tovesimasimana taudi imadusimanea Yaubada ena tofewa tunutunuqina ena mai weaqina wese iluve'aligidi. Ta tauna ni'a mai ta omi'a osuluvea

\* 7:41: 'Ifo 32:2-6 \* 7:42: Emo 5:25-27 \* 7:45: Ios 3:14-17 \* 7:46: 2Sam 7:1-16 \* 7:47: 1Kin 6:1-38  
\* 7:49: Ais 66:1-2 \* 7:51: Ais 63:10 \* 7:52: Md 23:31

ta oluve'aligia. <sup>53</sup> Lova Yaubada ena luvine o'ewea ena tovale'ewa 'idiega, ta ge oda 'abibodea."

*Sitibeni daboyega iluve'aligia*

<sup>54</sup> 'Inega me Diu edi kaniselayavo Sitibeni ena vona 'inega diadi vilea ta qaqadi i'alatea. <sup>55</sup> Ta Niboana Gwalagwalana Sitibeni luveagatuna'ia 'inega 'ita vane mahalaya ta Yaubada ena simatala kaikaiwabuna 'itea ta wese Yaubada ana 'ataqia Ieisu tovtovolo 'itea. <sup>56</sup> \* 'Inega Sitibeni vonedi vonaya, "Mahala 'elamina ya'ite'itea, ta Tomotau Natuna Yaubada ana 'ataqia tovtovolo ya'ite'itea."

<sup>57</sup> Ta tutana kaniselayavo vonana inoqolia ikolukolua ta teniqadi nimadiega igibodea, 'inega qabudi 'aideganega ivihila itauya Sitibeni 'inaya ta itovolo vivilia ta ikafia. <sup>58</sup> 'Inega ilih'i 'ifoqeyea 'abagaya ta iludaboya. Ta Sitibeni ana tove'ewayavo nuanuadi ina vunuaqiaqia, 'inega adi kwakwalufai ivata'idi ta ia'udi taha kilakai ana wawa Saulo 'aqenaya. <sup>59</sup> Ta nawale iluludaboi 'inega Sitibeni bonana qiduanega venoqi vonaya, "Kaiwabu Ieisu, Niboanigu nimauya."

<sup>60</sup> \* 'Inega molita ta tuqatuqanega sobadi ta gaba vane vonaya, "Kaiwabu, edi ilivu luveifana weaqina ge una ve'iedi." Ta Sitibeni ena vona lu'ovoia 'abo yawaina gumwala.

8

<sup>1-3</sup> \* Ta Saulo Sitibeni ana luve'aliga weaqina 'awahaqiaqia. Ta vaina tomtotau taudi Yaubada i'amayabea Sitibeni idounia, ta 'wafina i'ewei itavunia.

*Saulo to'ekalesia luaviedi*

Ta Sitibeni ena 'aliga 'aubena nana 'inaya vevoalana qiduana ve'ale Ielusalema ana to'ekalesia 'idia. 'Inega tovtetumaqana qabudi idena iyavula di'we Iudia be Samelia 'abaganavo 'idia. Ta tovaletuyana adi yau 12 ge ida dena ta 'esi itoa Ielusalema 'inaya.

Ta Saulo nuanuana 'ekalesia nagiveluveifedi, 'inega tauya vanue 'aidega 'aidega 'idia lugu ta 'oloto be vivine 'ekafidi 'inega 'i'imega tauyedi vanue 'ebeyoqona 'inaya a'uluguyedi.

*Filifi lugaihi di'we Samelia 'inaya*

<sup>4</sup> Ta tovtetumaqana ive'iyavula mali di'we be mali di'we 'idia. Ta todi'we 'inaya i'ifoqe, e wese Ieisu Valena aqiaqina ilugaihiea tomtotau 'idia. <sup>5</sup> 'Inega Filifi tauya 'abaga Samelia 'inaya, ta omode Keliso valena lugaihiea 'idia. <sup>6</sup> Ta tomtotau qabudi Filifi ena vona ivineneqa aqiaqia, mana ena fewa 'ebenuavoqana i'itedi. <sup>7</sup> Ta tomtotau 'eala niboana luveifadi ni'au 'wahalidi, 'inega Filifi 'wavina 'ifoqeyedi ta ma kolukoluadi i'ifoqe 'idiega. Ta taudi 'wafidi tuta qabuna tutumina be taudi 'aqedi luveifadi ge adi fata ida yabayaba wese giveaqiaqiedi. <sup>8</sup> 'Inegana tomtotau qabudi iqaiawa qiduana 'abaga nana 'inaya.

<sup>9</sup> Ta 'abaga nana 'inaya taha 'oloto ana wawa Saimoni toatoa. Tauna taha tobalavu qiduana ta tuta qabuna gweligweli, ta taunega ana wawa givaneyea. Ta me Samelia qabudi inuavoqana ena fewa waiwai weaqina. <sup>10</sup> 'Inega tomtotau kaikaiwabudi be wese lukwalukwadi Saimoni i'awahaqiaqia ta ivonaya, "Oloto ba'e tovtewaiwai otaqa Yaubada 'inega." <sup>11</sup> Ta Saimoni ena vona inoqolia ta i'abibodea, mana ena gweliega tuta qabuna givenuavoqanidi. <sup>12</sup> Ta ba'e 'itaga Filifi ni'au 'ifoqe mai ta To'etoyavua Ieisu ena waiwai ta wese Yaubada ena 'Ebeluvine weaqidi lugaihiea 'idia. 'Inega 'oloto wese vivine Filifi ena vona ivetumaqanei ta ibabitaio. <sup>13</sup> Ta Saimoni wese Yaubada vetumaqanea 'inega tauna wese babitaio 'ewea. Ta ena babitaio 'abibodanaya Filifi maega itoatoa. Ta Filifi ena fewa 'ebenuavoqana ta wese ena viaqa waiwai Saimoni 'itedi, e 'inega nuana voqana aqiaqi.

<sup>14</sup> Ieisu ena tovaletuyana 12 nawale Ielusalema 'inaya itoatoa. Ta tutana vale inoqolia me Samelia Yaubada ena vona ni'au i'awahaqiaqia, 'inega Fita be Ioni iluvetunedi itauya Samelia 'inaya. <sup>15-16</sup> Ta me Samelia Kaiwabu Ieisu ana wawamo 'inega ibabitaio, 'inega Niboana Gwalagwalana nawale ge dalugu 'idia. Ta tutana Fita be Ioni i'ifoqe 'inega

\* 7:56: Kol 3:1    \* 7:60: Lk 23:34    \* 8:1-3: Via 9:1,13; 22:4; 26:9-11

tovetumaqana vauvaudi weaqidi ivenoqi be vonigo Niboana Gwalagwalana nalugu 'idia.  
<sup>17</sup>\* Ta tutana Fita be Ioni nimadi ia'uya 'idia e 'inega Niboana Gwalagwalana lugu 'idia.

<sup>18</sup> Ta Saimoni tovaletuyana magilafudi 'itedi nimadi ia'uya tomotau 'idia ta Niboana Gwalagwalana i'ewea. 'Inega mane 'ewei ta nuanuana Fita be Ioni naneidi, 'inega vonedi vonaya, <sup>19</sup> "Bena'e waiwai nana nuanuagu ona neigu be yaqisa ya'a wese nimagu ena a'uya tomotau 'idia ta Niboana Gwalagwalana nalugu 'idia."

<sup>20</sup> 'Inega Fita vona 'eviviea vonaya, "Eu mane maega una veilaqe vataya, mana vonigo Yaubada ena nei kavovo eu maneyega nuanuau una gimwane. <sup>21</sup> Ta o'a ge au fata ima'a maega kana fewa, mana eu ilivu ge aqiaqina Yaubada matanaya. <sup>22</sup> Ta luaqiaqieu be eu luveifana 'inega una nuagivila. Ta una venoqi Kaiwabu 'inaya, 'inega nage eu nuanua luveifana 'inega nanuataqou, <sup>23</sup> mana ni'au yahalamaniana eu nuanua luveifana 'inega uve'ifi'ifiema ta wese ilivu luveifana yoqoniu."

<sup>24</sup> 'Inega Saimoni vonedi vonaya, "Ona venoqi Kaiwabu 'inaya be yani dina luveifana ni'au osimantedi ge na'ifoqe 'iguya."

<sup>25</sup> Ta omo'e 'inaya Fita be Ioni edi Kaiwabu ena vona isimana 'ifoqeyea tomotau qabudi 'idia. Ta 'abibodanaya i'evivi itauya Ielusalema 'inaya. Ta edi tauya gamonaya ilugaihiea Samelia 'abaganavo 'aidega 'aidega 'idia.

#### *Filifi di'we Itiofia* 'olotona maega iveloba

<sup>26</sup> Ta Kaiwabu ena tovale'ewa Filifi vonea vonaya, "Utovalo ta baba'auya una tauya 'eda Ielusalema webui tauya Gasa 'inaya 'ifoqe. Ta 'eda nana ba'itagana tomotau ge ida tautauya 'inega." <sup>27</sup> 'Inega Filifi tutuvila tauya, ta 'edaya Itiofia 'olotona lobe. Tauna 'wafi 'ewa'ewana, ta tua me ena luvine, mana me Itiofia edi kwini ena kulufa kaikaiwabudi 'ita'itamakidi. Lova tauya Ielusalema 'inaya sabi tafwalolo, <sup>28</sup> ta ba'itaga tafwalolo ni'a gumwala, 'inega ena waga lihilihiega 'evi'evivi ena 'abagaya. Waga nana gamonaya toatoa ta Buki Nugwenugweina avoavoya tovesimasimana Aisea ena 'wayavi 'inega.

<sup>29</sup> 'Inega Niboana Gwalagwalana Filifi vonea vonaya, "Una tauya waga lihilihi 'inaya ta di'wenega una tautauya."

<sup>30</sup> 'Inega Filifi vihila tauya waga lihilihi di'wenaya, ta 'oloto nana bonana noqolia tovesimasimana Aisea ena 'wayavi avoavoya. 'Inega Filifi vetala'aiea vonaya, "Nage ualamaniana tola'ai uavoavoya?"

<sup>31</sup> Ta 'oloto nana vonaya, "Ma'oda agu fata be eda alamani 'aiqei 'eguma ge taha toga dave'itegu?" 'Inega 'oloto nana Filifi venoqiea be wagaya nagelu, e 'inega gelu toabui di'wenaya ta Buki Gwala nana 'inega avoya.

<sup>32</sup>\* Ta avo nana ni'au Itiofia 'oloto nana avoya ba'e 'idewana vonaya,

"Tauna itauyea 'idewani sifi  
 sabi vunuqina,  
 ta kavona  
 lami vutuvutuna ana toda'a  
 'iawanaya tovalo ta genu'wana,  
 ta wese  
 ge taha vona da'ifoqe 'awanega.

<sup>33</sup> Ta ana vetala'ai 'inaya  
 ge taha toga davata'ita'iei,  
 ta wese igiveiniyauyauyea.

'Aliga ta natu geqana,  
 'inega ge wese ena susumo 'abibodanega,  
 mana yawaina ni'au gumwala bwa'obwa'oya."

<sup>34</sup> 'Inega Itiofia 'oloto nana Filifi vetala'aiea vonaya, "Uvonegu, togama weaqina tovesimasimana Aisea vonavona? Nage taunega weaqina, nage mali 'oloto weaqina?" <sup>35</sup> 'Inega

\* 8:17: Via 19:6 \* 8:32: Ais 53:7-8



Filifi ve'ale lugaihi 'oloto nana 'inaya, ta Aisea ena 'wayavi ba'e 'inega givesimatalia 'inaya, ta Ieisu Valena Aqiaqina weaqina ve'itea.

<sup>36</sup>\* Nawale 'edanegana itautauya 'inega taha go'ila 'inaya i'ifoqe, 'inega 'oloto nana Filifi voneaya, "U'itei, go'ila omo'e! Nage ana fata babitaiso ena 'ewea, waisa?"

<sup>37</sup> [Inega Filifi voneaya, "Eguma eu nuanua qabuna 'inega Ieisu uvetumaqanea, e 'inega ana fata ena givebabitaisou."

'Inega 'oloto nana vona 'eviviea vonaya, "Ni'au yavetumaqana Ieisu Keliso tauna Yaubada Natuna."]

<sup>38</sup> Inega Itiofia 'oloto nana waga ana tovevihila vonea be nagivelua'uya, 'inega Filifi maega ivawebui go'ilaya, ta Filifi 'oloto nana givebabitaisoya. <sup>39</sup> Ta tutana ivanemai go'ilega 'inega Yaubada Niboanina Filifi 'ebe'ewei tauyea, ta 'oloto nana Filifi ge wese da'ita 'eviviei. Ta ma ena qaiawa 'evivi tauya ena 'abagaya. <sup>40</sup>\* 'Inega Filifi 'ifoqe 'abaga Asota 'inaya, ta omo'e 'inaya lugaihiea. Ta wese tautauya ta lulugaihiea 'abaga taha taha 'idia ana laba 'ifoqe Sisalia 'inaya.

## 9

### *Saulo ena nuagivila*

<sup>1</sup>\* Ta Saulo nawale Kaiwabu ana to'abibodayavo luluaviedi 'ena'ina, nuanuana naluve'aligidi. 'Inega tauya toveguba edi tovanugweta 'inaya, <sup>2</sup> nuanuana leta na'wayavidi 'abaga Damasiko ana vanue tafwaloloyavo 'idia. 'Inega leta diavona tovetumaqanayavo naneidi ina avoya, be yaqisa Saulo ena luvine be ena waiwai ina alamania vonigo ana fata Ieisu ena 'Eda ana to'abibodayavo nakafidi nayoqonidi, 'oloto wese vivine, e 'inega namiedi Ielusalema 'inaya.

<sup>3</sup> Ta Saulo nawale tautauya ta tuta goyona na'ifoqe 'abaga qiduana Damasiko 'inaya, 'inega lukwayavonega simatala mahalega 'ifoqe 'inaya. <sup>4</sup> Inega be'u webui bwa'obwa'oya ta taha vona noqolia vonaya, "Saulo, Saulo, tola'ai weaqina ululuaviegu?"

<sup>5</sup> 'Inega Saulo vetala'aiea vonaya, "Kaiwabu, o'a togama?"

'Inega vona 'eviviea vonaya, "Ya'a taugu Ieisu, tauna uvevoalanea. <sup>6</sup> Ta una ya'itoto una tauya 'abagaya, ta omo'e 'inaya taha toga navoneu tola'ai una viaqia."

<sup>7</sup> Ta tomotau diavona Saulo maega itautauya nuadi voqana qiduana, 'inega itovolo vavava ta ge taha tola'ai ida vonayei. Mana bona namo inoqolia ta ge taha toga ida 'itei. <sup>8</sup> 'Inega Saulo ya'itoto bwa'obwa'oyega, ta matana kwaya ge ana fata na'ita. 'Inega nimana ikafia ta itauyea Damasiko 'inaya. <sup>9</sup> 'Inega omode 'aubena toi gamonaya ge ana fata taha tola'ai da'itei. Ta wese ge da'ai ta danuma.

<sup>10</sup> Ta Damasiko 'inaya Ieisu ana to'abiboda taha ana wawa Ananaiasi toatoa. Ta taha ve'ita kavonea dave'wayoqa 'ifoqe 'inaya vonigo Kaiwabu 'itea vonea vonaya, "Ananaiasi!"

Ta Ananaiasi ve'iea vonaya, "E Kaiwabu, ya'a ba'e."

<sup>11</sup> 'Inega Kaiwabu voneaya, "Uya'itoto, ta una tauya 'eda ana wawa 'Eda Tunutunuqina 'inaya ta una lugu Iudasa ena vanuea. Ta tuta nana una 'ifoqe una vetala'aiea taha 'oloto weaqina ana wawa Saulo. Tauna Tasisi 'olotona, ta tuta ba'e 'inaya vevenoqi 'iguya. <sup>12</sup> Ta wese Saulo kavonaya ve'wayoqa ni'au yave'itea, ta ve'wayoqa nana gamonaya taha 'oloto ana wawa Ananaiasi 'itea mai 'inaya ta gitonovia 'abo matana 'eaea ta veaqiaqi 'evivi."

<sup>13</sup> Ta Ananaiasi Kaiwabu ena vona ve'iea vonaya, "Kaiwabu, tomotau qabudi ni'a ivonegu vonigo omo'e 'oloto nana taha toluveifana, ta au tovetumaqanayavo gwalagwaladi Ielusalema 'inaya luluaviedi. <sup>14</sup> Ta ena vetoluvine 'ewea toveguba qiduquadi 'idiega 'inega mai ba'idia Damasiko 'inaya be ana fata tovetumaqana qabuma nakafima nayoqonima 'eguma au wawega avevenoqi."

<sup>15</sup>\* Ta Kaiwabu Ananaiasi voneaya, "Tua ta una tauya Saulo 'inaya, tauna ni'au yavenua'ivinea nasimana weaqigu taudi ge me Diu be edi toluvine qiduquadi, ta wese

me Isileli qabudi 'idia. <sup>16</sup>\* Ta wese ena ve'itea ena visiqā qiduana nalobea agu wawa ana simana weaqina.”

<sup>17</sup> 'Inega Ananaiasi tauya Iudasa ena vanuea lugu ta Saulo lobeā. 'Inega nimana magilafunega gitonovia voneaya, “Taigu Saulo, Kaiwabu Ieisu lova 'edaya 'ifoqe 'iuya, e tauna ba'itaga luvetunegu yamai matau adi giveaiaqi weaqina, ta wese Niboana Gwalagwalana naluveagatuna'iu.” <sup>18</sup> Ananaiasi ena vona gumwala, 'inega lukwayavonega Saulo matanega kavonaya 'iqana 'wanavidi 'eta'ia, 'inega ana fata na'ita aqiaqi. 'Inega ya'itoto ta babitaiso 'ewea. <sup>19</sup> Babitaiso 'abibodanaya 'abwaga 'ainia 'abo ena waiwai 'ewa 'eviviea.

#### *Saulo ena lugaihi Damasiko 'inaya*

Ta Saulo vaina 'aubena 'idia Ieisu ana to'abibodayavo maega itoatoa Damasiko 'inaya. <sup>20</sup> 'Inega me Diu edi vanue tafwalolo 'idia Saulo ve'ale lugaihi vonaya, “Ieisu tauna Yaubada Natu Otaqina!”

<sup>21</sup>\* Ta tovineneqayavo inuavoqana qiduana ta ivonaya, “Ei, tauna lova taudi Ieisu ana wawega ivevenoqi luaviedi Ielusalema 'inaya, e 'inega wese mai ba'idia sabi kafida be nayoqonida natauyeda Ielusalema 'inaya toveguba qiduquadi 'idia.”

<sup>22</sup>\* Ta Saulo ena lugaihi vewaiwai qiduana, ta me Diu Damasiko 'inaya itoatoa ve'itedi vonigo Ieisu tauna To'etoyavua. 'Inega me Diu 'idiega ge taha toga ana fata navona.

#### *Saulo me Diu 'idiega dena*

<sup>23</sup> Tufwana tuta kuena 'abibodanaya me Diu idima govaqa, mana nuanuadi Saulo ina luve'aligia. <sup>24</sup> Ta Saulo edi dima govaqa ni'au noqolia 'abaga ana 'ebelugu 'aubena be velovelovana i'itamaki aqiaqiedi 'eguma to'awega nuanuana nadena na'ifoqe. 'Inega ina kafia ina luve'aligia. <sup>25</sup>\* 'Inega taha velovelovana 'inaya Saulo ana to'abibodayavo ihiulei ta kwalisi 'inaya iusea ta 'abaga ana 'ali qiduana ana 'ebelubo'e 'inega ivekalilia webui gwavunaya, 'inega dena tauya.

#### *Saulo ena 'evivi Ielusalema 'inaya*

<sup>26</sup>\* 'Inega Saulo 'evivi mai Ielusalema 'inaya, ta nuanuana Ieisu ana to'abibodayavo maega ina veiaiana. Ta taudi Saulo imwaninivea, mana ge ida vetumaqanei vonigo tauna wese Ieisu ana to'abiboda aqiaqi 'idewani. <sup>27</sup>\* Ta Banaba ana 'aidegana Saulo 'ebe'ewei maega itauya Ieisu ena tovaletuyanayavo 'idia. 'Inega Banaba vematamagilafuyedi ma'oda Saulo Kaiwabu 'itea Damasiko 'edana 'inaya be nuagivila. Ta wese vonedi Kaiwabu ena vona Saulo 'inaya, ta 'inega me ena giwalifatu lugaihi Ieisu weaqina Damasiko 'inaya. <sup>28</sup> 'Inega Saulo i'awahaqiaqiea ta tuta qabuna maega Ielusalema 'inaya itoatoa, ta me ena giwalifatu lulugaihi Kaiwabu ana wawega.

<sup>29</sup> Ta Saulo me Diu vaina taudi vona Guliki ialamania maega iveveqae ta ive'ae'aetoga. Ta taudi idima govaqa be nuanuadi ina luve'aligia. <sup>30</sup> Ta edi dimana weaqina vaina tovetumaqanayavo inoqolia, e 'inega Saulo itauyea Sisalia 'inaya, ta ivetunei tauya ena 'abaga Tasisi 'inaya.

<sup>31</sup> Ta to'ekalesiayavo di'we Iudia be Galili ta wese Samelia 'idia edi toa veaqiaqi. Ta Niboana Gwalagwalana ena iula 'inega ive'aidega ta ivewaiwai, ta tuta qabuna Kaiwabu i'amayabea edi ilivuyega, e 'inega adi qabu veqidua.

#### *Fita taha 'oloto ana wawa Inia giveaiaqiea*

<sup>32</sup> Ta Fita luvivila dadana di'we qabuna 'idia. 'Inega wese mai taha 'abaga ana wawa Lida 'inaya Yaubada ena tomotauyavo sabi vayausidi. <sup>33</sup> Ta omo'e 'inaya taha 'oloto 'wafina tutumina lobeā ana wawa Inia. Tauna ya'wala 'eita (8) gamonaya 'ivia 'eno'eno, ta ge ana fata nayaba. <sup>34</sup> 'Inega Fita vonea vonaya, “Inia, Ieisu Keliso nagiveaiaqiea, 'inega uya'itoto ta eu 'ebana ununumi.” 'Inega Inia lukwayavoni tovolō. <sup>35</sup> Ta tutana Lida be dumi'a Seloni 'abaganavo adi totoayavo Inia i'itea, 'inega inuagivila Kaiwabu Ieisu 'inaya ta ivetumaqanea.

\* 9:16: 2Kol 11:23-28 \* 9:21: Via 8:3 \* 9:22: Via 18:28 \* 9:25: 2Kol 11:32-33 \* 9:26: Gal 1:17-19

\* 9:27: 1Kol 9:1

*Fita taha vavine ana wawa Tabita giveya'itoto* 'eviviea 'aligega

<sup>36</sup> Taha 'abaga ana wawa Iofa 'inaya Iesu ana to'abiboda taha vavine toatoa, ana wawa Tabita (ta me Guliki bonadiega ana alamani Dokasa). Tuta qabuna ena ilivu aqiaqi otaqina ta lukwalukwadi iula qiduana neineidi. <sup>37</sup> Ta tutana Fita nawale Lida 'inaya toatoa, 'inega Tabita vevihiqa ta yawaina gumwala. 'Inega 'wafina i'iva'ava'aia, ta 'abiboda ia'uya vanue ulawaninaya taha sifaufa gamonaya.

<sup>38</sup> Ta 'abaga Iofa ge luluvai Lida 'inega. 'Inega vaina tovetumaqanayavo Fita valena inoqolia nawale Lida 'inaya toatoa. 'Inega tomotau magilafudi iluvetunedi Lida 'inaya Fita sabi 'ebe'ewana Iofa 'inaya. Tutana Lida 'inaya i'ifoqe Fita inoqiei ivonaya, "Fita, ulukwayavoni umai katauya ema 'abagaya."

<sup>39</sup> 'Inega Fita ya'itoto maega itauya Iofa 'inaya. Ta tutana i'ifoqe 'inega tovetumaqanayavo Fita i'ebe'ewei ivane ulawanaya ta ilugu sifaufa nana 'inaya. Ta wadawada'e qabudi Fita itoa vivilia ta ivevemoqai.

Ivevemoqai ta adi kaleko ive'itayea 'inaya ivonaya, "Ba'e kwakwalufai dina be wese ba'e kaleko diavona Dokasa mayawainaya sailidi neima."

<sup>40</sup> Ta Fita luvinedi sifaufa 'inega ina 'ifoqe, 'inega tuqatuqanega sobadi ta venoqi Yaubada 'inaya. 'Inega givila Tabita 'wafina 'inaya vonaya, "Tabita, uya'itoto!" 'Inega Tabita matana 'eaea ta Fita 'itea. <sup>41</sup> Ta Fita nimanaya kafi siveya'itotoya, e 'inega tovetumaqana ta wese wadawada'e qabudi gabedi imai. 'Inega Tabita mayawaina ve'itayea 'idia.

<sup>42</sup> Ta Tabita valena yawala tauya Iofa ana tomotauyavo 'idia, 'inega tomotau qabudi ivetumaqana Kaiwabu 'inaya. <sup>43</sup> Ta Fita tufwana tuta kuena Iofa 'inaya toatoa taha 'oloto maega, ana wawa Saimoni. Ta Saimoni ena fewa yubai 'wafidiega vaina kulufa viaviaqidi.

## 10

*Fita ena vayausa Konilio* 'inaya

<sup>1</sup> 'Abaga qiduana Sisalia 'inaya taha 'oloto ana wawa Konilio toatoa. Tauna me Itali toluaviayavo adi yau 100 edi tovamatana. <sup>2</sup> Ta Konilio 'oloto aqiaqina. Tauna ena gadeavo maega Yaubada i'amayabea, ta lukwalukwadi ihiuledi ta tuta qabuna ivevenoqi Yaubada 'inaya.

<sup>3</sup> Ta taha 'aubena lavilavi 'idewana 3 koloki 'inaya ve'ita taha kavonea dave'wayoqa 'ifoqe Konilio 'inaya. 'Inega Yaubada ena tovale'ewa taha 'ita aqiaqiea 'ifoqe mai 'inaya, voneaya, "Konilio!"

<sup>4</sup> Ta Konilio me ena mwaniniva tovale'ewa nana vevekovei ta vetala'aiea vonaya, "Kaiwabu, tola'ai?"

Ta tovale'ewa nana ve'iea vonaya, "Yaubada eu noqi be eu iula lukwalukwa 'idia ni'a alamanian, ta weaqina ge danuafaniu. <sup>5</sup> 'Inega vaina tomotau una vetunedi ina tauya Iofa 'inaya, ta omo'e 'inaya taha 'oloto ana wawa Saimoni tauna wese igabea Fita ina lobe, ta ina 'ebe'ewei ina miei na'iteu. <sup>6</sup> Ta tauna toatoa waviana Saimoni ena vanuea balabalaya. Ta tonivanue nana ena fewa yubai 'wafidiega kulufa taha taha viaviaqidi."

<sup>7</sup> Ta tutana Yaubada ena tovale'ewa ni'a 'evivi tauya, e 'inega Konilio ena tofewa magilafudi gabedi imai. Ta wese taha iana ena toluaviayavo 'idiega gabea, tauna wese Yaubada ana to'amayaba agona. <sup>8</sup> 'Inega tovale'ewa nana ena vona Konilio simanea toidi 'idia, ta 'inega luvetunedi itauya Iofa 'inaya.

<sup>9</sup> Ahalia itutuvila itautauya ta tuta goyona ina 'ifoqe Iofa 'inaya. Ta baba'auya Fita vane vanue debanaya sabi venoqi. <sup>10</sup> Ta botana 'ewea nuanuana na'ai, ta 'abwaga nawale i'iva'ava'aia. 'Inega kavona ve'wayoqega taha yani 'ifoqe 'inaya. <sup>11</sup> 'Inega matanaya mahala 'elalamia, ta taha yani 'itea ana 'ita 'idewana kaleko qiduana nima susuna foa ma wayona webuwebui mai bwa'obwa'oya. <sup>12</sup> Ta kaleko nana gamonaya yubai taha taha ta vaina kawakawalidi ta wese manuqa itoatoa. <sup>13</sup> 'Inega taha bonana 'ifoqe voneaya, "Fita, uya'itoto, yubai ufolidi ta u'ai!"

<sup>14</sup> \* 'Inega Fita vona 'eviviea vonaya, "Kaiwabu, gebu ana fata! Ge taha tuta ba'e yubai diavona eda 'ainidi, mana ima'a me Diu ema luvine ba'e 'idewani."

<sup>15</sup> \* Ta bonana noqola 'eviviea voneaya, "Yaubada yani qabudi givevunavunaqidi ta 'awahaqiaqiedi, e 'inega o'a ge una 'awaluveifedi." <sup>16</sup> Ta yani nana ena 'ifoqe Fita matanaya ana yau toi, ta 'abiboda Yaubada kaleko nana 'ewa 'eviviei vaneqa mahalaya.

<sup>17</sup> Ta Fita me ena nuavoqana ba'e ve'ita nana weaqina, mana nawale nuana ge da'eqa'uya. 'Inega Konilio ena tomotauyavo toidi i'ifoqe Saimoni ena vanuea ta masu'edanaya itovolo. <sup>18</sup> Ta igaba vane ivonaya, "Ei, nage Saimoni ana wawa veluana Fita ba'idia toatoa?"

<sup>19</sup> Tutana Fita nawale nuana 'ivi'ivina ve'ita ba'e weaqina, 'inega Niboana Gwalagwalana voneaya, "Unoqoli! Tomotau toidi tawadega imai isalisaliu. <sup>20</sup> 'Inega uya'itoto uwebui maega ona tauya, ta ge una nuanua tola'ai ina vetala'aieu weaqina, mana ya'a yaluvetunedi imai 'iuya."

<sup>21</sup> 'Inega Fita vanue debanega webui 'idia vonedi vonaya, "Ya'a ba'e Fita osalisaligu, ta ma'oda 'inega omaimai?"

<sup>22</sup> Ta ivoneaya, "Taha toluavia edi tovatatana ana wawa Konilio vetunema amai 'iuya. Tauna 'oloto tunutunuqina ta Yaubada ana to'amayaba, ta wese me Diu qabudi i'awahaqiaqiea. Ta Yaubada ena tovale'ewa taha 'ifoqe Konilio 'inaya ta vematamagilafuyea vonigo o'a nagabeu una tauya ena vanuea be yaqisa ana fata eu gaihi nanoqolia." <sup>23</sup> Toi dina edi vona gumwala, e 'inega Fita 'ebe'ewedi ilugu vanuea maega i'eno.

Mahala ahalia 'inega Fita maega itutuvila itauya, ta wese vaina leisu ana tovetumaqana Iofa 'inega maega itauya.

*Fita 'ifoqe Konilio ena vanuea*

<sup>24</sup> Ta 'eda luluvai, 'inega 'edaya i'eno, ta ahalia 'inega i'ifoqe Sisalia 'inaya. Ta Konilio ba'eba'eyedi ena gadeavo be enavo maega, mana gaba va'auqidi imai ena vanuea. <sup>25</sup> Ta tutana Fita 'ifoqe masu'edanaya sabi lugu, e 'inega Konilio mai di'wenaya ta tuqatuqanega sobadi Fita 'iawanaya ta iwa'odu 'inaya. <sup>26</sup> \* 'Inega Fita Konilio siveya'itotoya ta voneaya, "Uya'itoto, ya'a wese o'a 'idewani tomotau!" <sup>27</sup> 'Inega Konilio ya'itoto ta iveqaelia ilugu vanuea, ta Fita tomotau qabudi 'itedi ni'a iva'auta itoatoa. <sup>28</sup> 'Inega vonedi vonaya, "Omi'a ni'au oalamaniamia, ima'a me Diu ema luvine ge taha toga ana fata taudi ge me Diu ana vavausidi be maega ana veiaiana. Ta Yaubada ni'au ve'itegu ya'a ge agu fata toga ena 'awaluveifei ta ena vonaya, "O'a ge vunavunaqiu Yaubada matanaya." <sup>29</sup> 'Inega tutana iada Konilio gabegu ya'a ge eda noga, ta 'esi yahawafelegu ta yamai. Ta ba'e egu vetala'ai 'imia, tola'ai weaqina ogabegu yamai?"

<sup>30</sup> 'Inega Konilio voneaya, "Aubena foa gumwala ba'e tuta nana lavilavi 3 koloki 'idewana yavevenoqi vanuea, e 'inega taha 'oloto ana kaleko wadawadaea otaqina 'iawaguya tovolu ya'itea. <sup>31</sup> Ta vonegu vonaya, 'Konilio, eu venoqi Yaubada ni'a noqolia, ta eu iulayavo lukwalukwa 'idia ni'a 'itea. Ta 'inega o'a Yaubada nuave'aviniu. <sup>32</sup> 'Inega vaina tomotau una vetunedi ina tauya Iofa 'inaya ta Saimoni wese ana wawa Fita ina 'ebe'ewei maega ina mai. Ta tauna waviana Saimoni ena vanuea toatoa. Ta wavianana yubai 'wafidi ana toviaqa, ta ena vanue balabalaya.' <sup>33</sup> 'Inega lukwayavonega vaina tomotau yaluvetunedi iwai weaqiu. 'Inega kaiwa qiduana, mana ni'a umai 'iguya. 'Inega ba'inaya ni'a ava'auta atoatoa Yaubada matanaya, ta nuanuama tola'ai Kaiwabu ni'a vonayea 'iuya una simana 'ifoqeyea 'imaya be yaqisa ana noqolia."

*Fita ena lugaihi Konilio ena vanuea*

<sup>34</sup> \* 'Inega Fita ve'ale vonedi vonaya, "Vonahaqiaqi, ni'a nuagu 'eqa'uya, Yaubada tomotau 'iva'ava'aida ita'a 'aidegada, ta ge ima'a me Diu mamo daveyolubema. <sup>35</sup> Ta 'eguma tomotau mali di'we be mali di'we 'idiega edi ilivu tunutunuqina ta Yaubada i'amayabea, e 'inega taudi wese 'awa'awa aqiaqiedi. <sup>36</sup> Ni'a yahalamaniamia omi'a Yaubada

\* 10:14: Luvi 11:1-47; Isi 4:14 \* 10:15: Mk 7:15,19 \* 10:26: Via 14:13-15; Ve 19:10 \* 10:34: Luve 10:17; Lom 2:11

'inega onoqolia ima'a me Isileli weaqima. Ta vale nana ana noqola ba'e 'idewani: Toadaumwala kana lobeia Yaubada maega Iesu Keliso 'inega, tauna tomotau qabuda eda Kaiwabu. <sup>37</sup> \* Ni'a oalamaniaman tola'ai 'ifoqe ema 'abagayavo 'idia. Nugweta Ioni Togivebabitaiso tomotau lugaihidi babitaiso weaqina di'we Galili 'inaya, ta 'abibodanaya yani qabuna ve'ale. <sup>38</sup> \* Ta wese ni'a oalamaniaman Yaubada Iesu Nasaleta 'olotona venua'ivinia. 'Inega Niboana Gwalagwalana neia ta wese waiwai neia. 'Inega Iesu tauya 'abaga taha taha 'idia ta tomotau iuledi. Ta tomeqabu Seitani giveluveifedi e Iesu giveaqiaqiedi, mana yani qabuna viaqidi Yaubada ena waiwaiega. <sup>39</sup> Ta ima'a tovaletuyana yani qabuna Iesu viaqidi ni'a a'itea be asimanea Isileli 'abaganavo 'idia ta wese Ielusalema 'inaya. Tauna 'etoluai 'inaya itutuve'ewea ta iluve'aligia. <sup>40</sup> Ta 'aubena vetoina Yaubada giveya'itotoya 'aligega, ta ve'ifoqeyea tomotau 'idia. <sup>41</sup> \* Ta tomotau qabudi Iesu ge ida 'itei, ta 'esi ima'a Yaubada venua'ivinema ama 'aidega a'itea be asimanea. Ima'a ena ya'itoto 'evivi 'aligega 'abibodanaya maega a'ai ta anuma. <sup>42</sup> \* Ta Iesu luvinema be ana lugaihiea tomotau qabudi 'idia, ta wese ana vonedi vonigo Yaubada Iesu venua'ivinea tomotau qabuda taudi 'ali'aligidi ta wese mayawaida ada Toluvine. <sup>43</sup> \* Yaubada ena tovesimasimana qabudi ivona vataya Iesu weaqina vonigo tomeqabu ina vetumaqana 'inaya edi luviefana nanuataqodi ana wawega."

*Konilio ma enavo Niboana Gwalagwalana i'ewea*

<sup>44</sup> \* Fita nawale vonavona 'inega Niboana Gwalagwalana webui mai ta lugu taudi tovineneqa 'idia. <sup>45-46</sup> \* 'Inega mali bona be mali bona 'idiega ivonavona, ta Yaubada iawahawatuboya. Ta me Diu taudi wese Iesu ivetumaqanea Fita maega imai Iofa 'inega inuavoqana qiduana, mana ni'a i'itea be inoqolia Yaubada Niboana Gwalagwalana guiwaqia wese taudi ge me Diu 'idia. 'Inega Fita vonedi vonaya, <sup>47</sup> "Egwavo, qabu ba'e Niboana Gwalagwalana ni'a i'ewea ita'a lova 'idewani. E 'inega ge ana fata taha toga 'imiega edi babitaiso go'ilega ona awatayedi, waisa?" <sup>48</sup> \* 'Inega Konilio ma enavo Fita luvinedi be ina babitaiso Iesu Keliso ana wawega. Ta babitaiso nana 'abibodanaya Fita inoqiea be vaina 'aubena maega ina toa.

## 11

*Fita 'evivi tauya Ielusalema*

<sup>1</sup> Ta tovaletuyanayavo be wese vaina tovetumaqana Iudia 'abaganavo 'idia itoatoa, vale inoqolia taudi ge me Diu Yaubada ena vona i'awahaqiaqiea. <sup>2</sup> 'Inega tutana Fita 'evivi mai Ielusalema 'inaya, e 'inega vaina tovetumaqana taudi me Diu Fita ilumugiea ivoneaya, <sup>3</sup> \* "Tola'ai weaqina taudi ge me Diu edi vanuea ulugu ta maega o'ai?" <sup>4</sup> 'Inega Fita simana aqiaqiea 'idia tola'ai ni'a 'ifoqe 'inaya vonedi vonaya,

<sup>5</sup> \* "Lova Iofa 'inaya yatoatoa, ta tutana yavevenoqi 'inega taha yani 'ifoqe 'iguya ya'itea kavona eda ve'wayoqa 'edewani. Ana 'ita kavona kaleko qiduana nima susuna foa, ta wayoyega webui mai mahalega di'weguya. <sup>6</sup> Ta tutana ya'ita lugu kaleko nana gamonaya, 'inega yubai qabudi ya'itedi 'idewana 'abaga yubaidi be yubai waqiwaqidi be kawakawalidi ta wese manuqa. <sup>7</sup> 'Inega taha bonana yanoqoli vonaya, 'Fita, uya'itoto! Yubai ufofolidi ta una 'ai!"

<sup>8</sup> "Inega yavona 'eviviea yavonaya, 'Kaiwabu, gebu agu fata! Ge taha tuta yubaidiavo eda 'ainidi, mana ima'a me Diu ema luvine 'idewana."

<sup>9</sup> "Ta bonana mahalega yanoqola 'eviviea vonaya, 'Yaubada yani qabudi givevunavunaqidi ta 'awahaqiaqiedi, e 'inega o'a ge una 'awaluveifedi." <sup>10</sup> Ba'e yani nana ena 'ifoqe 'iguya ana yau toi, ta 'abibodanaya Yaubada yani qabudi 'ewa 'eviviea vaneqea mahalaya

\* 10:37: Md 4:12-17 \* 10:38: Md 3:16; Lk 4:17-21 \* 10:41: Via 1:8; Lk 24:42-43 \* 10:42: Via 17:31; 1Fit 4:5  
 \* 10:43: Ais 53:5-6; Iel 31:34; Via 2:38 \* 10:44: Via 11:15; 15:8 \* 10:45-46: Via 2:4; 19:6 \* 10:48: Via 19:5  
 \* 11:3: Via 10:28; Gal 2:12 \* 11:5: Via 10:9-48

'waiva. <sup>11</sup> Ta tuta nana 'oloto toidi vanue nana 'inaya yatoatoa ilobea ta masu'edanaya itovolo. Ta taudi Sisalia 'inega imai weaqigu.

<sup>12</sup> "Inega Niboana Gwalagwalana voneguya, 'Ge una venuana magilafu, ta taudi maega ona tauya.' Ta edavo ba'e sikisi dina maega atauya Konilio 'inaya ta ena vanuea alugu. <sup>13</sup> 'Inega Konilio vonema vonaya, 'Yaubada ena tovale'ewa taha ya'itea 'ifoqe egu vanue gamonaya tovotovolo. Ta tovale'ewa nana vonegu vaina tomotau ena vetunedi Iofa 'inaya be Saimoni Fita ina 'ebe'ewei ina miea. <sup>14</sup> \* Tauna navoneu ma'oda 'inega o'a eu gadeavo maega qabumi 'etoyavua ona lobei.'

<sup>15</sup> \* "Ta tutana yave'ale Vale Aqiaqina yavonayea 'idia e 'inega Niboana Gwalagwalana webui 'idia 'idewana lova tuta nugweta 'idaya madumai. <sup>16</sup> \* 'Inega Kaiwabu ena vona yanuave'avinia vonaya, 'Ioni tomotau go'ilega givebabitaisodi, ta omi'a Niboana Gwalagwalanega ona babitaiso.' <sup>17</sup> Yaubada ena nei kavovo taudi ge me Diu 'idia 'idewana lova ita'a 'idaya tutana kamaduvetumaqana Kaiwabu Iesu Keliso 'inaya. 'Inega ya'a ge agu fata Yaubada ena viaqa ena awatayei."

<sup>18</sup> \* Tutana tovetumaqana me Diu Fita ena vona ba'e inoqolia, e 'inega ge wese ida ve'ae'aetoga ta 'esi Yaubada iawatuboya ivonaya, "Vonahaqiaqi, Yaubada taudi ge me Diu ni'au awafeledi be ina nuagivila 'inaya, 'inega yawai vataya ina lobeia."

#### *To'ekalesiyavo* 'abaga Anitioki 'inaya

<sup>19</sup> \* Lova tutana Sitibeni iluve'aligia 'inega tovetumaqanayavo ivevoalanedi ta iyavula itauya mali di'we be mali di'we 'idia, ta vaina luluvaia 'idewani di'we Finisia 'inaya be bwanabwana Saifilosu 'inaya ta wese 'abaga Anitioki di'we Silia 'inaya. Ta Vale Aqiaqina ilugaihiea me Diu dimo 'idia. <sup>20</sup> Ta vaina tovetumaqanayavo, taudi me Saifilosu be me Sailini 'ifoqe Anitioki 'inaya, 'inega Kaiwabu Iesu weaqina ilugaihiea me Diu ta wese taudi ge me Diu 'idia. <sup>21</sup> Ta Kaiwabu ena tovetumaqanayavo givewaiwaiedi, 'inega qabu qiduadi wese ivetumaqana ta inuagivila Kaiwabu 'inaya.

<sup>22</sup> \* Ta to'ekalesiyavo Ielusalema 'inaya taudi ge me Diu valena inoqolia ni'au ivetumaqana. 'Inega Banaba iluvetunei tauya Anitioki 'inaya sabi vayausidi. <sup>23</sup> Ta tuta nana Banaba 'ifoqe Anitioki 'inaya, 'inega Yaubada ena veyoluba qiduana tomotau 'idia 'itea, ta qaiawa qiduana. 'Inega vona iuledi vonigo ge ina venuana magilafu ta 'esi ina tovolu'i'ita me edi vetumaqana Kaiwabu 'inaya. <sup>24</sup> Ta Banaba tauna 'oloto aqiaqina ta Niboana Gwalagwalana ni'a luveagatuna'ia ta wese ena vetumaqana waiwaina. Ta ena lugaihi 'inega tomotau qabudi Kaiwabu ivetumaqanea, 'inega to'ekalesiyavo adi qabu veqidua.

<sup>25</sup> \* 'Inega Banaba tauya 'abaga Tasisi 'inaya nuanuana Saulo nalobea. <sup>26</sup> Ta tuta nana lobeia 'inega 'ebe'ewei tauyee Anitioki 'inaya. Ta ya'wala 'aidegana gamonaya Banaba be Saulo to'ekalesiyavo maega iva'auta, ta tomotau qabudi iveve'itedi. Ta Anitioki 'inaya Iesu ana to'abibodayavo tomotau imadugabedi Keliso ena tomotauyavo.

<sup>27</sup> Ta ba'e tuta nana 'inaya vaina tovesimasimana Ielusalema 'inega itauya Anitioki 'inaya. <sup>28</sup> \* Ta taha 'idiega ana wawa Agabu edi va'auta taha 'inaya tovolu ta Niboana Gwalagwalana 'inega madusimana 'ifoqe 'idia vonaya, "Nawale botana qiduana na'ifoqe di'we qabuna 'idia." ('Abiboda ba'e yani nana 'ifoqe tuta nana Sisa Kolodiasi ena vetoluvine 'inaya.) <sup>29</sup> 'Inega tovetumaqana Anitioki 'inaya nuadi 'aideganega inei kavovo ta edi iula mane ivetunea tovetumaqanayavo Iudia 'inaya. Ta toiula diavona 'aidega 'aidega adi fata 'inega iula ivetunea. <sup>30</sup> \* 'Inega mane nana Banaba be Saulo ineidi, ta itauyee Iudia 'ekalesia ana tovanugwetayavo 'idia.

\* 11:14: Via 16:31 \* 11:15: Via 2:4 \* 11:16: Via 1:5 \* 11:18: Via 13:48; 14:27 \* 11:19: Via 8:1-4  
\* 11:22: Via 4:36 \* 11:25: Via 9:30 \* 11:28: Via 21:10 \* 11:30: Via 12:25

## 12

<sup>1</sup> Tuta omo'e 'inaya kini Elodi Akalifa ve'ale to'ekalesiyavo kafidi sabi giveluveifadi. <sup>2</sup> 'Inega Iemesa, tauna Ioni taina, Elodi ena luvineyega kefatenga iluve'aligia. <sup>3</sup> Ta Elodi me Diu edi qaiawa Iemesa ena 'aliga weaqina 'itea, 'inega ena luvineyega wese Fita ikafia iyoqonia Beledi ge ana isitimo Sagalina 'inaya. <sup>4</sup> Elodi ena luvineyega Fita ni'au ikafia ta 'abibodanaya ive'ineiea toluaviayavo qabu foa 'idia. Ta qabu 'aidega 'aidega gamonaya toluavia adi yau foa itoatoa, 'inega qabudi adi yau 16. Taudi Fita vanue 'ebeyoqona taha sifaufa 'inaya ia'uluguyea. Ta Elodi nuanuana Fita navetala'aiea tomotau qabudi matadia 'Auvivia Sagalina 'abibodanaya. <sup>5</sup> Ta tutana Fita nawale vanue 'ebeyoqona gamonaya toatoa, 'inega to'ekalesiyavo ivevenoqi waiwai Yaubada 'inaya weaqina.

*Yaubada ena tovale'ewa taha Fita* 'etoyavua

<sup>6</sup> Elodi taha 'aubena ni'au venua'ivinea Fita ana vetala'ai weaqina. Ta Fita nimana seni taha noyana iyoqonia ta foqena 'inega toluavia magilafudi nimadia iyoqonidi sabi 'itamakina, ta nuanidia nawale 'eno'eno. Ta wese vaina toluavia vanue ana 'ebelugu i'ita'itamakia. <sup>7</sup> Ta velovelovana gamonaya lukwayavonega Kaiwabu ena tovale'ewa mahalega 'ifoqe tovtovolo, ta simatala qiduana sifaufa namo gamona guvesimalia. 'Inega tovale'ewa nana Fita gitonovia ta divanoya voneaya, "Ulukwayavoni uya'itoto!" 'Inega ya'itoto ta nimanega seni magilafudina taudiega 'eli'amidi ta iavuta. <sup>8</sup> 'Inega tovale'ewa nana Fita 'inaya voneaya, "Uvekaleko ta au 'aqeyafayafa uve'aqei ta una 'abibodegu!" Ta Fita ena vona matayagea. <sup>9</sup> 'Inega tovale'ewa nana vanuega 'ifoqe ta Fita 'abibodea. Ta Fita nuaia yani qabuna ni'a 'ifoqe 'inaya kavonea be dave'wayoqa, 'inega yani nana ge davetumaqanei ena 'ifoqe 'inaya weaqina. <sup>10</sup> \* Iwebui 'inega to'itamaki nugwenugweidi inogedi ta wese vemagilafuna inogedi. 'Inega i'ifoqe taha 'awa kainumu 'inaya, ta taunega 'eyavua, 'abo i'ifoqe 'abagaya. 'Edega itautauya 'inega lukwayavonega tovale'ewa nana Fita nogea.

<sup>11</sup> 'Inega Fita nuana 'eqa'uya ta nuanega vonaya, "Vonahaqiaqi, ni'a yahalamanian Kaiwabu ena tovale'ewa vetunei mai 'iguya ta Elodi nimanega 'etoyavuiigu ena luvine waiwaina 'inega, ta wese 'etoyavuiigu me Diu 'idiega tola'ai nuanuadi ina viaqia 'iguya."

<sup>12</sup> Tutana Fita nuana ni'a 'eqa'uya, 'inega tauya Meli edi vanuea, taudi Ioni inana, ta tauna wese igabea Maki. Ta omo'e 'inaya tomotau qabudi ni'a iva'auta, ta nawale ivevenoqi Yaubada 'inaya Fita weaqina. <sup>13</sup> 'Inega Fita 'ifoqe vanue masu'edanaya ta 'awa 'inaya 'aubutubutu. 'Inega taha tofewa kavovo mevavinena ana wawa Loda mai 'awa 'inaya sabi siwa'ana. <sup>14</sup> Ta tuta nana Loda Fita bonana noqolia, 'inega 'inanea ta qaiawa qiduana, 'inega nuana voqana ta 'awa ge dasi'waei, ta 'esi vihila lugu totoa va'auta 'idia vonedia, "Fita 'awaya tovtovolo!"

<sup>15</sup> Ta ivoneaya, "Kwavakwavau!" Ta tofewa nana ve'aetogedi 'inega totoa va'auta ivoneaya, "Tauna ge Fita, ta 'esi ena tovale'ewa."

<sup>16</sup> Ta Fita nawale 'au'auveida'a 'awaya. Ta tuta nana 'awa isiwa'ea 'inega Fita i'itea ta nuadi voqana qiduana. <sup>17</sup> Ta Fita nimanega lutaqodi ge ina veqae. 'Inega simana 'idia ma'oda Kaiwabu vanue 'ebeyoqona 'inega 'ebe'ewa 'ifoqeyea 'abagaya. 'Inega vonedi vonaya, "Ta omi'a Iemesa be tovtumaqana qabudi ona simana 'idia tola'ai 'ifoqe 'iguya weaqina." 'Inega Fita nogedi ta tauya mali 'abaga 'inaya.

<sup>18</sup> \* Ta mahala vulihia 'inega toluaviayavo inuavoqana ta wese giwalidi a'ala ta taudiega iveqae ivonaya, "Ma'oda Fita 'ifoqe 'aiqa?" <sup>19</sup> Ta 'inega Elodi luvine waiwaina a'uya be Fita ina sali aqiaqiea, ta ge ida lobei. 'Inega Elodi toluavia dina 16 adi yau vetala'aiedi ta luvine neidi ina 'aliga.

Ta 'abibodanaya Elodi di'we Iudia nogei ta webui 'abaga Sisalia 'inaya ta omo'e 'inaya toa.

*Elodi ena 'aliga*

\* 12:10: Via 5:19 \* 12:18: Via 5:22-24

<sup>20</sup> Ta Elodi lova me Taia be me Saidoni 'idia diana vilea. 'Inega 'abaga magilafudina 'idiega tomotau itoava'auta ive'aidega ta taha qabu iluvetunedi Elodi 'inaya nuanuadi maega ina veguba. Mana taudi tuta qabuna adi 'abwaga i'ewe'ewea Elodi ena di'we 'inega. 'Inega nugweta Elodi ena tofewa qiduana Balasito nuana i'wamilia ta maega iveiaiana.

<sup>21</sup> 'Inega Elodi taha 'aubena neidi maega ina va'auta. Ta 'aubena nana 'inaya ana vaiqavu kaikaiwabuna 'idiega vekaleko ta toabui ana galiva kaikaiwabuna debanaya. Ta tomotau qabudi matadia vonavona. <sup>22</sup> Ta qabudi ivekolukolua ivonaya, "Ba'e vona nana ge taha 'oloto ena vona, ta 'esi yaubada taha ena vona." <sup>23</sup>\* 'Inega omo'e 'inaya Kaiwabu ena tovale'ewa taha Elodi vunua, mana Yaubada ge dagivaneyea ta 'esi taunega ana wawa givaneyea, tuata vevihia ta mwatamwata i'ainia 'abo 'aliga.

<sup>24</sup>\* Ta Yaubada ena vona veve'ena'i di'we qabuna 'idia ta tomotau qabudi Vale Aqiaqina inoqolia.

<sup>25</sup>\* Ta Banaba be Saulo nei kavovo nana ive'ineiea Ielusalema 'ekalesia ana tovanugwetayavo 'idia. Ta 'inega Ioni Maki i'ebe'ewei ta maega i'evivi itauya Anitioki 'inaya.

### 13

#### *Saulo ena luvivila nugweta iana Banaba maega*

<sup>1</sup> 'Abaga Anitioki 'inaya 'ekalesia ana tovesimasimanayavo be ana tove'itayavo adi wawayavo ba'e: Banaba ta Simioni (tauna igabea 'Wafi Kwaukwausina) ta Lusiasi (tauna Sailini 'olotona), ta Maneni (tauna kini Elodi Anitifasi tamana ena fayafayaya), ta wese Saulo. <sup>2</sup>\* Taha tuta itafwatafwalolo ta ivevedede Yaubada weaqina 'inega Niboana Gwalagwalana vonedi vonaya, "Nuanuagu Banaba be Saulo ona givegwaledi weaqigu, mana ni'au yavenua'ivinidi egu fewa weaqina."

<sup>3</sup>\* Ta edi vedede be edi venoqi ilu'ovoia, 'inega nimadi ia'uya magilafudi 'idia ta 'abiboda ivetunedi itauya.

#### *Banaba be Saulo edi viaqa bwanabwana Saifilosu 'inaya*

<sup>4</sup> Niboana Gwalagwalana ni'a luvetunedi 'inega iwebui mwade'waya 'abaga Selusia 'inaya. 'Inega taha waga igeluya ta itauya bwanabwana Saifilosu 'inaya. <sup>5</sup>\* 'Inega i'ifoqe 'abaga ana wawa Salamisi 'inaya, ta omo'e 'inaya Yaubada ena vona ilugaihi dadanea me Diu edi vanue tafwaloloyavo 'idia. Ta taha adi toiula ana wawa Ioni Maki maega iluvivila.

<sup>6</sup> 'Inega bwanabwana nana 'abaganavo qabudi iluvivilidi ana laba i'ifoqe 'abaga Fafosi 'inaya. 'Inega taha tobalavu ilobe, tauna Diu 'olotona ana wawa Baieisu. Tauna tovesimasimana 'e'eu'au'avina. <sup>7</sup> Ta Baieisu nana Sagi Faulosi maega itoatoa, tauna 'abaga nana ana gavana, ta wese toalamani taha qiduana. 'Inega Sagi Faulosi Banaba be Saulo gabedi imai, mana nuanuana Yaubada ena vona nanoqolia. <sup>8</sup> Ta tobalavu nana Baieisu (me Guliki bonadiega ana wawa Elaimasi) Banaba be Saulo awatayedi, mana ge nuanuana iana Sagi Faulosi Iesu navetumaqanea. <sup>9</sup> Ta Saulo, tauna wese igabea Faulo, Niboana Gwalagwalana ni'a luveagatuna'ia 'inega tobalavu nana 'ita makimakia voneaya, <sup>10</sup> "O'a Seitani natuna, yani qabuna aqiaqidi uvevevoalaneli ta ugigiveluveifedi, nuanuau tomotau una u'avedi ta 'aqedi una lihia. 'Inega Kaiwabu ena nuanua tunutunuqidi o'a ugigiviledi tau'u eu nuanua 'inega, ta 'inega tomotau eu nuanua luveifana uveve'itedi.

<sup>11</sup>\* 'Inega ba'e 'itaga Kaiwabu nimanega naluvematasabuhu ta matau nakwaya. Ta tufwana tuta kuena 'inaya gebu au fata baba'au una 'itei."

Ta Faulo ena vona lu'ovoia 'inega kavona umauma qiduana 'ifoqe ta Elaimasi matana velovelovanea, ta 'egimuda nuanuana taha toga nimana nakafia ta navanugwetea. <sup>12</sup> Ta tutana gavana Sagi Faulosi ba'e yani nana 'itea 'inega nuana voqana qiduana ta Faulo ena ve'ita Kaiwabu weaqina noqolia 'inega Iesu vetumaqanea.

#### *Faulo ma enavo itauya Anitioki di'we Fisidia 'inaya*

\* 12:23: Dan 5:20      \* 12:24: Ais 55:11      \* 12:25: Via 11:29-30; 15:37      \* 13:2: Via 9:15      \* 13:3: Via 6:6  
\* 13:5: Via 12:12; 15:39      \* 13:11: Via 9:8



<sup>13</sup>\* Faulo ma enavo Fafosi inogei ta wagega itauya 'abaga Feliga 'inaya di'we Famifila gamonaya. Ta omo'e 'inaya Ioni nogedi ta 'evivi tauya Ielusalema 'inaya. <sup>14</sup> Ta Faulo ma enavo Feliga inogea ta itauya di'we Fisidia 'abaga Anitioki 'inaya. 'Inega Sabatea me Diu edi vanue tafwalolo 'inaya ilugu ta itoabui. <sup>15</sup> 'Inega Mosese ena luvine 'inega ta wese tovesimasimana edi 'wayavi 'inega taha 'oloto avoya. Avo gumwala e 'abiboda tafwalolo ana tovanugwetayavo vona ivetunea Faulo ma enavo 'idia ivonedia, "Emavo, 'eguma taha vona 'imiega ama givewaiwai weaqina, e 'inega luaqiaqiea ona simana 'ifoqeyea 'imaya." <sup>16</sup> 'Inega Faulo tovololo ta nimana silagaia ta vonedi vonaya,

"Taigwavo me Isileli ta wese omi'a di'we taha taha 'idiega Yaubada ana to'amayabayavo, egu vona ba'e ona noqolia. <sup>17</sup>\* Lova Yaubada tubudavo me Isileli venua'ivinedi. Ta tutana di'we Itifita 'inaya itoatoa kavona wagawaga 'idewani, 'inega adi yo'o giveqiduea. Ta 'abibodanaya ena waiwai otaqa 'inega 'ebe'ewa 'ifoqeyedi Itifitega. <sup>18</sup>\* 'Inega ya'wala 40 gamodia di'we 'ava'avaya me Isileli iyabayaba dadana ta ivevetalabudabuda ta wese iveveilivu veifa. Ta tua Yaubada ena nuakokoloyega bibitaqodi, 'inega ge danogedi ta 'esi tuta qabuna 'ita'itamakidi. <sup>19</sup>\* 'Inega Yaubada di'we Kenani ana kiniavo adi yau seveni edi 'ebeluvine bwega yavuledi, 'inega Iosua 'ebeluvine nana vewila'ayea me Isileli edi gade 12 'idia. <sup>20</sup>\* Ta ba'e yani diavona i'ifoqe me Isileli 'idia ya'wala 450 gamonaya. Ta 'abiboda Yaubada tomotau edi toluvineavo neidi ta iluvinedi mai ana laba tovesimasimana Samuela 'ifoqe.

<sup>21</sup>\* "Inega me Isileli Yaubada ivenoqiea taha kini weaqina, 'inega ve'iedi ta Saulo neidi, tauna Kisi natuna Beniamina ena gadeyega. Ta Saulo nana luvinedi ya'wala 40 'idia. <sup>22</sup>\* Ta 'abiboda Yaubada Saulo a'uwebuiea ta Deibida vetovoloya me Isileli edi kini vauvauna. Ba'e Yaubada ena vona Deibida weaqina vonaya, 'Iese natuna Deibida ni'a yalobea, tauna nuagu 'ewa aqiaqiea, ta egu nuanua qabudi naviaqidi.' <sup>23</sup>\* Ta Yaubada Deibida nana ena gadeyega me Isileli adi To'etoyavua Iesu give'ifoqeyea, lova ena vona fofofola 'idewani. <sup>24</sup>\* Ta Iesu nawale ge damai, 'inega Ioni Togivebabitaiso madu'ifoqe ta me Isileli lugaihidi ta vonedi ina nuagivila ta ina babitaiso. <sup>25</sup>\* Ta Ioni ena fewa ana 'ebeluvine 'inaya vetala'aiedi vonaya, 'Omi'a ma'oda onuanua 'aiqa ya'a togama? Ya'a gebu To'etoyavua nana. Ta 'esi To'etoyavua nana 'abibodaguyega maimai, ta ya'a tomotau kavokavovo ge agu fata be ana 'aqeyafayafa ena li'ami.'

<sup>26</sup> "Taigwavo, omi'a Ebelamo natunavo, ta wese omi'a mali di'weyega Yaubada ana to'amayabayavo, onoqoli! 'Etoyavua valena ni'a mai 'idaya. <sup>27</sup> Ta Ielusalema ana totoayavo be edi tovanugwetayavo To'etoyavua nana gebu ida 'inanea. Sabate 'aidega 'aidega 'idia tovesimasimana edi vonayavo To'etoyavua weaqina iavoavodi ta nuadi ge da'eqa'uya. Ta 'esi To'etoyavua nana iluvinea na'aliga, ta ba'e 'inega tovesimasimana qabudi edi simana nugwenugweina ana aqiaqi ive'ifoqeyea. <sup>28</sup>\* Ta taudi ge adi fata Iesu ena luveifana taha ida lobei be 'inega ina luve'aligi, ta tua ivenoqi Failato 'inaya nuanuadi naluve'aligia.

<sup>29</sup>\* "Ta tovesimasimana edi vonayavo Iesu weaqina ana aqiaqi iviaqidi ena 'aliga 'inaya. 'Inega 'wafina igita'ia 'etoluai 'inega ta itavunia deba'unuya. <sup>30</sup> Ta Yaubada giveya'itoto 'eviviea 'aligega. <sup>31</sup>\* 'Inega tufwana tuta kuena Iesu 'ifoqe ana to'abibodayavo 'idia, taudi lova maega itauya Galili 'inega be Ielusalema 'inaya. Ta ba'e to'abiboda dina tuta ba'e 'inaya isimasimana Iesu weaqina eda tomotauyavo 'idia. <sup>32</sup> Ta ima'a wese avonevonemi. Yaubada ena vona fofofola tubudavo 'idia ana aqiaqi ni'a 'ifoqe 'idaya <sup>33</sup>\* tuta nana Yaubada Iesu 'aligega giveya'itoto 'eviviea ita'a lagata 'evauna 'idaya. Ba'e weaqina Same vemagilafuna 'inaya madusimanea Iesu weaqina vonaya,

\* 13:13: Via 15:38 \* 13:17: 'Ifo 1:7; 6:6; 12:51 \* 13:18: Naba 14:34; Luve 1:31-32 \* 13:19: Luve 7:1; Ios 14:1 \* 13:20: Tolvu 2:16; 1Sam 3:20 \* 13:21: 1Sam 8:5,19; 10:20-24 \* 13:22: 1Sam 13:14; 16:12; Same 89:20 \* 13:23: 2Sam 7:12-16 \* 13:24: Md 3:1-2 \* 13:25: Ion 1:20,27 \* 13:28: Md 27:22-23 \* 13:29: Md 27:59-60 \* 13:31: Via 1:3,8 \* 13:33: Same 2:7

'O'a Natugu,

ba'itagana ya'awanatuneu.'

<sup>34</sup> \* Lova Yaubada ni'a vona fofofola vonigo nagiveya'itoto 'eviviea 'aligege ta ge wese na'aliga 'evivi ta 'wafina ge wese nadavula. Ba'e yani nana weaqina wese madusimana vonaya,

'Vona veyoluba ta wese

yani qabuna aqiaqidi ena neiu.

Ba'e lova Deibida 'inaya

yavona fofofolayea.'

<sup>35</sup> \* Ta wese taha Same 'inaya Deibida vonaya,

'Ge eu Tomotau Gwalagwalana

una awafelei

be deba'unu 'inaya nadavula.'

<sup>36</sup> "Ta ba'e vona nana ge Deibida weaqina, mana Deibida Yaubada ena nuanua qabudi viaqa 'ovoidi, 'inega yawaina gumwala ta itavunia tubunavo maega adi deba'unuya, ta 'wafina davula. <sup>37</sup> Ta 'esi vona ba'ena mali 'oloto weaqina, tauna Yaubada 'aligege giveya'itoto 'eviviea ta 'wafina ge dadavula. <sup>38</sup> 'Inega omi'a taigwavo, ona alamani aqiaqiea vonigo 'oloto nana tauna Iesu 'inega emi luveifayavo adi nuataqo ona lobe.

<sup>39</sup> \* 'Eguma taha toga Iesu navetumaqanea 'inega Yaubada na'awatunutunuqea ena luveifana 'inega, mana Mosese ena luvine ana 'abiboda 'inega ge taha toga ana fata navetunutunuqa Yaubada matanaya be na'etoyavui ena luveifana 'idiega. <sup>40</sup> 'Inega ona 'itamakimi be yaqisa tovesimasimana edi vona ge na'ifoqe 'imia, mana vona nana vonaya,

<sup>41</sup> \* 'Omi'a tovona 'ividoa,

ona noqolia!

Egu viaqa ona 'itedi

ta weaqina nuami navoqana,

ta 'abiboda ona 'aliga.

Mana ya'a vaina yani ena viaqidi

omi'a lagatamina emi tutaya,

ta 'eguma taha toga ba'e yani diavona weaqidi davonemi

'inega omi'a ge nuanuami be ona vetumaqanedi.' "

<sup>42</sup> Faulo ena lugaihi gumwala 'inega ma iana Banaba iwebui vanue tafwaloloyega, 'inega tomotau inoqiedi 'eguma Sabate maimai 'inaya wese adi fata ina 'evivi mai, ta ba'e yani diavona weaqidi ina ve'ita 'eviviedi. <sup>43</sup> 'Inega tomotau qabudi iyavula dadana, ta me Diu be wese mali tomotau ni'au iveme-Diu Yaubada iawahawatuboya ta Faulo be Banaba i'abibodedi. 'Inega tomotau qabudi vona waiwaina ineidi ivonedea, "Yaubada ena nuakolokolo 'inaya ona tovoloi'ita."

*Faulo ta Banaba ilugaihi taudi ge me Diu 'idia*

<sup>44</sup> 'Inega omo'e Sabate nana 'inaya i'evivi sabi lugaihi ta 'abaga nana ana totoayavo qabudi wese iva'auta 'evivi Kaiwabu ena vona sabi noqolina. <sup>45</sup> 'Inega me Diu adi tovanugwetayavo ba'e qabu diavona i'itedi ta ive'ifi'ifiedi, 'inega Faulo ena lugaihi weaqina maega ive'ae'aetoga ta i'awaluveifea. <sup>46</sup> \* Ta Faulo be Banaba me edi giwalifatu ivonedea vonaya, "Omi'a me Diu ami luaqiaqi be ba'e Vale nana Aqiaqina Yaubada 'inega ni'a aneimi oda madu'ewea. Ta ba'e 'itagana Vale nana ni'a onogea 'inega taumiega oluvinemi be yawai vataya mahalaya ge ami fata be ona lobei. 'Inega Vale nana aveve'ineiea taudi ge me Diu 'idia. <sup>47</sup> \* Mana Kaiwabu vonema vonaya,

'Omi'a ya'iva'ava'aimi

kavona be simatala

taudi ge me Diu weaqidi.

\* 13:34: Ais 55:3 \* 13:35: Same 16:10 \* 13:39: Lom 10:4 \* 13:41: Aba 1:5 \* 13:46: Via 3:26; 18:6

\* 13:47: Ais 49:6

'Inega tomotau qabudi  
bwa'obwa'oya 'etoyavua ana 'eda  
ona ve'itedi.' ”

<sup>48</sup> Ta tuta nana taudi ge me Diu vona nana inoqolia iqaiawa gegoyo ta ilukaiwa Kaiwabu 'inaya Vale nana weaqina. Ta tomeqabu Yaubada ni'a venua'ivinedi be yawai vataya ina lobeia mahalaya, e taudi ive'ale ivetumaqana Iesu 'inaya.

<sup>49</sup> 'Inega Kaiwabu Valena tomotau iyawala dadanea di'we nana 'abaganavo 'idia. <sup>50</sup> Ta me Diu adi tovanugwetayavo itauya vivine agoagodi taudi Yaubada ana to'amayabayavo be wese 'abaga nana ana toluvineavo 'idia ta italaveavea'iedi. 'Inega taudi Faulo be Banaba ivevoalanedi ta edi di'we 'inega i'wavinidi i'ifoqe. <sup>51</sup> \* Ta Faulo be Banaba 'aqediega kaliva ivavutuvutuqa yavulea taudi ivevoalanedi matadia kavona edi 'ebe'ita edi noga weaqina. Ta 'inega itauya 'abaga Ikoniami 'inaya. <sup>52</sup> Ta Iesu ana to'abibodayavo Anitioki 'inaya iqaiawa gegoyo ta wese Niboana Gwalagwalana luveagatuna'idi.

## 14

### *Faulo be Banaba edi lugaihi Ikoniami 'inaya*

<sup>1</sup> Faulo be Banaba ni'a i'ifoqe 'abaga Ikoniami 'inaya, 'inega ilugu me Diu edi vanue tafwalolo gamonaya. Ta edi lugaihi waiwaina, 'inega me Diu ta wese taudi ge me Diu qabudi Iesu ivetumaqanea. <sup>2</sup> Ta vaina me Diu inoga ge nuanuadi ina vetumaqana, 'inega taudi ge me Diu italavea'iedi ta Faulo be Banaba ivevoalanedi. <sup>3</sup> \* Ta tua Faulo be Banaba ge ida dena ta 'esi tuta kuena 'abaga nana 'inaya itoatoa ta me edi giwalifatu ilulugaihi Kaiwabu ena nuakolokolo weaqina. Ta ba'e lugaihi nana Kaiwabu 'awahaqiaqiea, 'inega waiwai neidi be yaqisa adi fata yani 'ebenuavoqana be wese 'ebe'ita waiwai ina viaqidi. <sup>4</sup> 'Inega Ikoniami ana tomotauyavo ivetoatoasi'i ta nuanidia yo'o magilafudi 'ifoqe, 'inega taha qabu me Diu i'awahaqiaqiedi ta taha qabu tovaletuyana i'awahaqiaqiedi.

<sup>5</sup> \* 'Inega taudi ge me Diu ta wese me Diu edi tovanugwetayavo maega ive'aidega ta luvine iviaqia vonigo Faulo be Banaba ina veilivu veifedi ta daboyega ina luve'aligidi. <sup>6</sup> Ta magilafudina ni'a inoqolia tola'ai na'ifoqe 'idia, 'inega idena itauya di'we Lakeonia 'abaganavo Lisitila be Debi 'idia, ta wese vaina 'abaga di'wenaya. <sup>7</sup> Ta omo'e 'inaya Iesu Valena Aqiaqina ilugaihi dadanea.

### *Faulo be Banaba edi viaqa Lisitila be Debi 'inaya*

<sup>8</sup> Ta 'abaga Lisitila 'inaya Faulo be Banaba taha 'oloto ilobeia. Ta ena tuta vi'oi 'inega 'aqena belubeluna ge taha tuta daya'itoto dayabayaba. <sup>9</sup> Ta 'oloto nana toabui ta Faulo ena lugaihi vivineneqea. 'Inega Faulo 'ita makimakia ta ni'a alamania ena vetumaqana Iesu 'inaya 'inega ana fata naveaqiaqi. <sup>10</sup> 'Inega Faulo bonana qiduanega gaba naqoyea vonaya, "Uya'itoto!" 'Inega ya'itoto ta luouyea 'abo yaba dadana.

<sup>11</sup> \* Ta tomotau qabudi Faulo ena viaqa i'itea 'inega bona Lakeoniega i'aladidiula ivonaya, "Yaubadayavo ni'au iwebui mai 'idaya ta adi 'ita kavona tomotau 'idewani!" <sup>12</sup> 'Inega qabu dina Banaba igabea Siusi\*, mana me Guliki edi yaubada qiduanega igabea Siusi. Ta Faulo igabea Emesi†, mana Emesi wese edi yaubada taha, ta tauna edi yaubadayavo edi toveqae. Ta Faulo wese tuta qabuna veveqae 'inega wawa nana ineia. <sup>13</sup> Ta me Lisitila edi vanue 'ebeveguba edi yaubada Siusi weaqina 'abaga nana ana 'ebelugu 'atamaninaya 'eno'eno. Ta edi toveguba vaina bulumakau 'alabwatadi ta wese 'aiwe idina suyasuyana miedi 'abaga ana 'ebelugu 'inaya, mana toveguba nana yo'o diavona maega nuanuadi bulumakauyega Faulo be Banaba ina gubedi.

\* 13:51: Md 10:14; Via 18:6 \* 14:3: Mk 16:20; Ibe 2:4 \* 14:5: Via 14:19 \* 14:11: Via 28:6 \* 14:12: Siusi "Zeus" tauna me Guliki edi yaubada taha, ta tauna edi yaubadayavo qabudi veqidua va'inedi. Ta ana wawa vemagilafuna Iufita. † 14:12: Emesi "Hermes" tauna me Guliki edi yaubada be edi 'ebeiwa'odu. Ta ivonaya be Emesi tauna edi yaubadayavo edi tovale'ewa nage edi tovona.

<sup>14</sup> Ta magilafudina toveguba nana ena nuanua ni'a ialamania ta inoga aqiaqiea ta diadi vilea, 'inega adi kaleko i'esiagia ta ma kolukoluadi ivihila i'ifoqe yo'o 'idia ta ilugwaeyedi ivonaya, <sup>15</sup> \* "Emavo, tola'ai weaqina guba ona viaqia 'imaya? Ima'a wese tomotau kavokavovo omi'a 'idewana. Ta ba'e amiea 'imia, mana nuanuama emi yaubada kavokavovo 'eala ona nogedi ta ona nuagivila Yaubada mayawaina 'inaya. Tauna mahala be bwa'obwa'o be mwade'wa ta wese yani qabuna gamodia adi To'iva'ava'ata. <sup>16</sup> \* Yaubada lova di'we qabuna ana tomotauyavo awafeledi be taudiega edi nuanua ta edi ilivu ina viaqidi. <sup>17</sup> \* Ta Yaubada 'ebe'ita vaina neidi vonigo tauna ina alamania. Ta 'ebe'ita diavona ena nuakolokoloyega wese neimi 'idewana 'wei mahalega be bolimana aqiaqina olobelobea ta 'abwaga o'ai'ai 'inega me emi qaiawa otoatoa." <sup>18</sup> Ta tuta goyona be qabu diavona guba nana ida viaqia, ta Faulo be Banaba edi noga waiwai 'inega igivelua'udi.

<sup>19</sup> \* 'Inega vaina me Diu Anitioki be Ikoniami 'abaganavo 'idiega imai, ta qabu dina maega iluvetuba ta italavea'iedi be Faulo ina vevoalanea. 'Inega daboyega iludaboya ivonaya be da'aliga. 'Inega ilihi 'ifoqeyea 'abaga gwavunaya. <sup>20</sup> Ta Iesu ana to'abibodayavo imai Faulo 'inaya itoa vivilia, e 'inega Faulo ya'itoto ta lugu 'evivi 'abagaya. Mahala ahalia 'inega ma iana Banaba Lisitila inogea ta itauya 'abaga Debi 'inaya.

*Faulo be Banaba tovetumaqanayavo igivewaiwaiiedi*

<sup>21</sup> Faulo be Banaba Iesu Valena ilugaihiea me Debi 'idia, ta tomotau qabudi Vale nana ivetumaqanea ta i'abibodea. Ta 'abiboda magilafudina i'evivi itauya 'abaga Lisitila be Ikoniami ta wese Anitioki di'we Fisidia gamonaya. <sup>22</sup> \* Ta 'abaga diavona 'idia tovetumaqanayavo igivewaiwaiiedi ta ivona iuledi edi vetumaqana 'inaya ina tovoloi'ita 'inega ivonedia, "Eguma nawale Yaubada ena 'Ebeluvine 'inaya kana lugu, e 'inega nugweta vita taha taha kana lutonovia." <sup>23</sup> Ta Faulo be Banaba 'ekalesia 'aidega 'aidega adi tovanugwetayavo ivenua'ivinedi. Ta 'abibodanaya ivedede ta ivenoqi tovanugweta diavona weaqidi, ta iawafeledi Kaiwabu nimanaya, mana vevenua'ivini dina Kaiwabu ivetumaqanea.

*Faulo be Banaba i'evivi itauya 'abaga Anitioki di'we Silia gamonaya*

<sup>24</sup> 'Inega itauya di'we Fisidia 'abaganavo 'idia ta i'ifoqe di'we Famifila 'inaya. <sup>25</sup> 'Inega wese Yaubada ena vona ilugaihiea 'abaga Feliga ana tomotauyavo 'idia, ta 'abibodanaya itauya 'abaga Atalia 'inaya. <sup>26</sup> \* Ta Atalia inogea 'inega wagega itauya 'abaga qiduana Anitioki 'inaya. Ba'e 'abaga nana ana tovetumaqanayavo lova magilafudina igivegwaledi Yaubada weaqina, 'inega iluvetunedi ta edi fewa ive'alea. Ta ba'e 'itaga edi fewa ni'au ilu'ovoia, ta yani qabuna ni'a iviaqidi Yaubada ena nuakolokolo 'inega.

<sup>27</sup> \* Ta tuta nana i'ifoqe Anitioki 'inaya, e 'inega to'ekalesia igaba va'auqidi ta isimana 'idia ma'oda Yaubada iula 'aiqedi edi luvivila gamonaya. Ta wese isimana 'idia ma'oda Yaubada taudi ge me Diu vetumaqana ana 'awa ni'a siwa'ea weaqidi, 'inega taudi wese ni'a ilugu tovetumaqana adi yo'o gamonaya. <sup>28</sup> 'Inega Faulo be Banaba tuta kuena itoa 'abaga Anitioki ana tovetumaqanayavo maega.

## 15

*'Ekalesia ana tovanugwetayavo iva'auta Ielusalema 'inaya*

<sup>1</sup> \* Faulo be Banaba nawale Anitioki 'inaya itoatoa, 'inega vaina tomotau di'we Iudia 'inega i'ifoqe imai, ta Anitioki ana to'ekalesiyavo ive'ale ive'itedi ivonedia, "Ge ami fata 'etoyavua ona lobei 'eguma ge 'wafimi ona da'ei. Ba'e lova Mosese ena luvine ve'iteda!" <sup>2</sup> \* Ta Faulo be Banaba edi ve'ita ge ida 'awahaqiaqiea 'inega me Iudia maega ive'ae'aetoga qiduana. 'Inega Anitioki ana to'ekalesiyavo Faulo be Banaba ta wese vaina

\* 14:15: Via 10:26; Same 146:6 \* 14:16: Via 17:30 \* 14:17: Iel 5:24 \* 14:19: Via 17:13; 2Kol 11:25 \* 14:22: Via 15:32; 1Te 3:3 \* 14:26: Via 13:1-2 \* 14:27: Via 15:4,12 \* 15:1: Gal 5:2 \* 15:2: Gal 2:1

tovetumaqana maega ivetunedi Ielusalema 'inaya. Ta nuanuadi yani ba'e weaqina ina veqaevea tovaletuyanayavo 12 ta wese 'ekalesia ana tovanugwetayavo maega.

<sup>3</sup> 'Inega 'ekalesia iluvetunedi itauya, ta edi luivila gamonaya di'we Finisia be Samelia ana tovetumaqanayavo ivayausidi. Ta isimana 'idia taudi ge me Diu ni'a inuagivila Yaubada 'inaya. Vona ba'e inoqolia, 'inega qabudi iqaiawa qiduana. <sup>4</sup>\* Tuta nana i'ifoqe ilugu Ielusalema 'inaya, 'inega to'ekalesiayavo be tovaletuyanayavo ta wese 'ekalesia ana tovanugwetayavo Faulo be Banaba i'ebe'ewedi. Ta magilafudi ivelulu'uyayea ma'oda edi fewa Yaubada ena waiwaiege iviaqa 'aiqedi. <sup>5</sup> Ta vaina Iesu ana tovetumaqanayavo Falisi adi qabu 'idiega itovolo ta ivonedi ivonaya, "Tomeqabu nuanuadi ina lugu Iesu ena qabu gamonaya e nugweta 'wafidi ina da'ea ta Mosese ena luvine ina matayagea." <sup>6</sup> 'Inega tovaletuyanayavo ta wese 'ekalesia ana tovanugwetayavo iva'auta ta Falisi dina edi vona ba'e weaqina nuanuadi ina veqae.

<sup>7</sup>\* Ta tufwana tuta kuena iveqae 'inega Fita tovololo ta vonedi vonaya, "Taigwavo, ni'a oalamaniana lova Yaubada 'idega venua'ivinegu Vale Aqiaqina ana lugaihi taudi ge me Diu weaqidi, 'inega tawa inoqolia ta ivetumaqana. <sup>8</sup>\* Ta Yaubada eda nuanua giwalidaya ni'a alamaniana, 'inega tauna taudi ge me Diu 'awahaqiaqiedi ta Niboana Gwalagwalana neidi lova ita'a 'idewana neida. <sup>9</sup> Ita'a me Diu ta taudi ge me Diu ge taha ana dumaduma Yaubada matanaya, mana tauna giwalidi givevunavunaqia edi vetumaqana 'inega. <sup>10</sup>\* 'Inega Iesu ana tovetumaqana vauvaudi taudi ge me Diu ge vita ona neidi fole Yaubada nanualuveifa 'idaya. Mana lova tubudavo ge adi fata Mosese ena luvineavo ina 'abibodei ta wese ita'a 'idewana. <sup>11</sup>\* Ta ita'a kavetumaqana vonigo tomotau qabuda 'etoyavua kana lobe Kaiwabu Iesu ena nuakolokoloyega, ta ge taha wese mali yani 'inega."

<sup>12</sup> Ta totoa va'auta Fita ena simana ba'e inoqolia, 'inega ge taha toga 'idiega daveqae, ta 'esi ivineneqa aqiaqi Banaba be Faulo edi velulu'uya ma'oda Yaubada 'ebe'ita ta wese 'ebenuavoqana viaqidi edi fewa 'idiega taudi ge me Diu 'idia. <sup>13</sup> Ta magilafudi edi vona ilu'ovoia, 'inega Iemesa tovololo vonedi vonaya, "Taigwavo, ovineneqa! <sup>14</sup> Fita ni'a givesimatalia 'idaya Yaubada ena mai nugwenugweina taudi ge me Diu 'idia weaqina. Ta ba'e mai nana 'inaya vaidi 'idiega ni'au 'awahaqiaqiedi ena tomotauyavo 'idewani. <sup>15</sup> Ba'e yani nana weaqina lova tovesimasimana i'wayavia, ta ba'itagana ana aqiaqi ni'a 'ifoqe, mana imadusimaneva ivonaya,

<sup>16</sup>\* "Abibodanaya ena 'evivi  
ena mai  
ta Deibida ena 'ebeluvine  
kavona vanue 'equeuneia  
ya'a ena yoqona 'eviviea.

Yani qabuna 'eno kavokavovo,  
ta ya'a ena givetovolo 'eviviea,

<sup>17</sup> be yaqisa mali qabu  
ya'a Kaiwabu ina saligu.

Ta wese taudi ge me Diu  
lova yavenua'ivinedi ina saligu.

Kaiwabu ena vona ba'e,  
<sup>18</sup> tauna tuta lova 'inega  
yani qabuna ba'e weaqidi  
ena 'wayavi 'inega simana 'ifoqeyedi.' "

<sup>19</sup> Ta wese Iemesa vonedi vonaya, "Egu luvine ba'e 'idewana: 'Eguma tomeqabu taudi ge me Diu 'idiega ina nuagivila Yaubada 'inaya, e 'inega ge taha vita kana neidi. <sup>20</sup>\* Ta 'esi taha leta kana 'wayavia 'idia kana vonedi ge taha toga ana fata 'abwaga vevegubana tokwalui 'idia 'inega na'ai, ta ge taha toga navelamo'eno kavokavovo, ta wese ge taha toga

\* 15:4: Via 14:27 \* 15:7: Via 10:1-43 \* 15:8: Via 10:44 \* 15:10: Md 11:30; Gal 3:10 \* 15:11: Gal 2:16;  
Efe 2:5-8 \* 15:16: Emo 9:11-12 \* 15:20: 'Ifo 34:15-17; Luvi 17:10-16

sulala na'ai ta wese ge yubai vei'odi ma sulalina na'aini. <sup>21</sup> Mana Mosese ena luvineavo tuta lova 'inega be ana laba ba'itagana Sabate 'aidega 'aidega 'idia ilulugaihiedi vanue tafwalolo gamonaya 'abaga qabudi 'idia."

*Leta i'wayavia taudi ge me Diu tovetumaqana 'idia*

<sup>22</sup> 'Inega Iesu ena tovaletuyanayavo ta 'ekalesia ana tovanugwetayavo be tovetumaqanayavo qabudi maega edi nuanua 'aideganega tomotau vaina ivenua'ivinedi be taudi Faulo be Banaba maega ina tauya Anitioki 'inaya. 'Inega 'oloto magilafudi 'ekalesia ana tovanugweta 'idiega ivenua'ivinedi. Taha ana wawa Iudasa tauna wese igabea Basaba, ta wese taha 'oloto ana wawa Sailasa. <sup>23</sup> 'Inega magilafudina leta nana taudi ge me Diu weaqidi i'ewei ina tauyea, ta ana noqola ba'e 'idewana vonaya,

"Emavo ye,

Vematamagilafu ba'e omi'a tovetumaqana ge me Diu 'abaga Anitioki ta di'we Silia be Silisia 'idia otoatoa weaqimi.

Ima'a emiavo tovaletuyanayavo be 'ekalesia ana tovanugwetayavo ta wese tovetumaqanayavo qabuma emi leta ba'e a'wayavia waiwai 'imia Ielusalemega, ta alulukaiwa 'imia.

<sup>24</sup> Ni'a valem anoqolia vaina tomotau 'imega iwai ta edi ve'ita 'inega inidoemi ta igivenuavitemi. Ta ima'a ge ada vebibinedi 'idewana ina viaqi 'imia, ta 'esi taudi edi nuenuaga. <sup>25</sup> 'Inega ima'a ema nuanua 'aideganega vaina tomotau ni'a avenua'ivinedi ta avetunedi iwai 'imia edavo Faulo be Banaba maega, taudi adi wawa Iudasa be Basaba ta aveveyolubedi qiduana. <sup>26</sup> Ta magilafudi yawaidi ni'a iawafelea veilage 'inaya Iesu Keliso eda Kaiwabu ena fewa weaqina. <sup>27</sup> Ta tola'ai ni'a a'wayavia leta nana 'inaya taidavo Iudasa be Basaba 'awadiega vona nana wese ina simana 'ifoqeyea 'imia. <sup>28</sup> \* Niboana Gwalagwalana be wese ima'a ema nuanua 'aidegana, 'inega ge nuanuama luvine vitadi ana neimi ta 'esi nuanuama luvine vaina namo 'idiega ona 'itamakimi. <sup>29</sup> Ta luvine diavona ba'e: 'Abwaga tomotau ni'a ivegubayea tokwalui 'idia ge ona 'aini. Wese yubai sulalidi ge ona 'aini, ta wese vei'odi ma sulalina ge ona 'aini. Ta wese ge ona velamo'eno kavokavovo. Ta 'eguma ba'e luvine diavona ona matayagedi emi toa naveaqiaqi. Emavo, ba'e ema vona ana fata.

Kafoi."

<sup>30</sup> 'Inega 'ekalesia ana tovanugwetayavo Faulo be, Banaba be, Iudasa ta wese Sailasa iluvetunedi, 'inega Ielusalema inogei ta itauya Anitioki 'inaya. Ta omo'e 'inaya to'ekalesia igaba va'auqidi imai ta leta nana ineidi. <sup>31</sup> Ta tuta nana iavoya iqaiawa qiduana, mana leta nana 'inega adi vona iula ilobea. <sup>32</sup> 'Inega Iudasa be Sailasa Yaubada ana tovesimasimana edi vonayavo 'idiega tovetumaqanayavo igivewaiwaiiedi ta wese igiveqaiawedi. <sup>33</sup> Ta Sailasa be Iudasa Anitioki 'inaya itoa tufwana tuta kuena, 'inega tovetumaqanayavo ivona veyolubedi ta ivetunedi i'evivi itauya Ielusalema 'inaya adi tovetune 'idia. [<sup>34</sup> Ta 'esi Sailasa ena nuanua be natoa 'evivi Anitioki 'inaya.]\* <sup>35</sup> Ta Faulo be Banaba Anitioki 'inaya nawale itoatoa. Taudi ta wese tomotau vaina maega Kaiwabu ena vona tomotau iveve'itedi ta ilulugaihiea 'idia.

*Faulo be Banaba ivetoasi'i*

<sup>36</sup> Ta vaina tuta 'abibodanaya Faulo iana Banaba voneaya, "Iagu, kana 'evivi 'abaga diavona lova katauya 'idia Kaiwabu Valena ana lugaihi weaqina, ta kana vayausidi kana 'itedi ma'oda edavo itoatoa 'aiqa." <sup>37</sup> \* Ta Banaba nuanuana Ioni tauna wese ana wawa Maki maega ina tauya. <sup>38</sup> \* Ta Faulo ge nuanuana, mana lova Maki nana nogedi di'we Famifila 'inaya ta 'evivi tauya Ielusalema. 'Inega ge nuana wese maega ina fewa. <sup>39</sup> 'Inega

\* 15:28: Md 23:4 \* 15:34: Vonahaqiaqi, ba'e buki nana Luke taunega madu'wayavia, ta 'abibodanaya wese vaidi tomotau leta nana ivetutumea ta i'wayavia, ta edi 'wayavi vaidi 'idia wese laba 34 iluvetomanea. \* 15:37: Via 12:12,25 \* 15:38: Via 13:13; Kol 4:10

Faulo be Banaba ive'ae'aetoga qiduana Maki weaqina, ta vetoatoasi'i 'ifoqe nuanidia. 'Inega Banaba Maki 'ebe'ewea ta wagega igelu ivenaya itauya bwanabwana Saifilosu 'inaya. <sup>40</sup> Ta Faulo Sailasa venua'ivinea. 'Inega 'abaga Anitioki ana tovetumaqanayavo magilafudina weaqidi ivenoqi Yaubada 'inaya nanuakolokoloyedi ta wese naiuledi edi luvivila 'inaya. <sup>41</sup> 'Inega itauya di'we Silia be Silisia 'abaganavo 'idia ta 'ekalesia 'aidega 'aidega iuledi ta igivewaiwaiedi.

## 16

*Faulo ena luvivila vemagilafuna* 'abaga qabudi 'idia

<sup>1</sup>\* Faulo ma iana Sailasa itauya 'abaga Debi be Lisitila 'idia. 'Inega Ieisu ana to'abiboda taha ilobeana ana wawa Timoti. Ta inana Diu vavinedi ta Ieisu ivetumaqanea, ta 'esi tamana Guliki 'olotona. <sup>2</sup>\* Ta tovetumaqana qabudi 'abaga Lisitila be Ikoniami 'idia Timoti i'amayabea qiduana ta i'awahaqiaqiea. <sup>3</sup> 'Inega Faulo nuanuana Timoti maega ina tauya, ta me Diu qabudi 'abaga diavona 'idia itoatoa ni'a ialamania Timoti tamana Guliki 'olotona ta 'wafina ge ana da'amo, 'inega natuna Timoti wese 'idewani. 'Inega Faulo Timoti 'wafina da'ea be yaqisa ina alamania me Diu edi ilivu i'amayabea. <sup>4</sup>\* 'Inega Faulo ma enavo itauya 'abaga taha taha 'idia. Ta luvine nana lova tovaletuyana ta wese 'ekalesia ana tovanugwetayavo Ielusalema 'inaya iviaqia me Anitioki 'idia wese isimana 'ifoqeyea totoa 'abaga 'idia, be ivonedi luvine nana taudi wese ina 'abibodea. <sup>5</sup> 'Inega to'ekalesiyavo 'abaga 'aidega 'aidega 'idia edi vetumaqana vewaiwai ta adi yo'o veveqidua 'aubena taha taha 'idia.

*Faulo ve'wayoqega taha Masidonia* 'olotona 'itea

<sup>6</sup>\* Faulo ma enavo itauya di'we Filigia be Galetia 'abaganavo 'idia. Ta Niboana Gwalagwalana 'etobodedi ge ina tauya di'we Eisia 'inaya Vale Aqiaqina sabi lugaihina. <sup>7</sup> Ta imai di'we Misia ana lufela 'inaya, ta nuanuadi ina lugu di'we Bitania 'inaya. Ta Ieisu Niboanina ge dahawafeledi. <sup>8</sup> 'Inega di'we ba'ena inogei ta iwebui 'abaga Tiloasi 'inaya. <sup>9</sup> Ta velovelovana 'inaya i'eno'eno 'inega Faulo ve'wayoqega taha Masidonia 'olotona 'itea mai tovotovolo di'wenaya ta voneaya, "Ubala mai Masidonia 'inaya ta una iulema!" <sup>10</sup> Ta Faulo ena ve'wayoqa ba'e 'inega ni'a alamania vonigo Yaubada gabema\* be Vale Aqiaqina ana lugaihiea me Masidonia 'idia. 'Inega alukwayavoni a'iva'ava'ata sabi vabala Masidonia 'inaya.

*Taha vavine ana wawa Lidia vetumaqana Ieisu* 'inaya

<sup>11</sup> 'Inega waga alobea agelu be Tiloasi anogei ta avabala tunutunuqina bwanabwana Samotilesi 'inaya. 'Inega mahala ahalia atauya 'abaga Niafoli 'inaya. <sup>12</sup> Ta Niafoli 'inega 'aqemega atauya 'abaga Filifai 'inaya. Ta Filifai nana 'abaga qiduana di'we Masidonia gamonaya. Ta 'abaga nana 'inaya me Loma lova imai iluluvine ta itoatoa. Ta omo'e 'inaya tufwana atoa 'amana. <sup>13</sup> Ta Sabatea 'abaga gamonega a'ifoqe awebui go'ila nanavinaya. Ta omo'e 'inaya nuanuama ana tafwalolo, mana anuaia nage vaina me Diu ana lobedi. Ta vivine qabudi ni'a iva'auta itoatoa, 'inega ima'a wese atoabui ta maega aveqae. <sup>14</sup> Ta vivine qabudi 'idiega taha ana wawa Lidia. Tauna 'abaga Tiatila vavinena ta Yaubada ana toiwa'odu taha. Ta ena fewa tuta qabuna kaleko bweabweala otaqina vevegimwaneyedi adi maisa qiduana. Ta tuta nana alugaihi 'inega Kaiwabu Lidia nuana giqa'uya ta Faulo ena vonayavo 'awahaqiaqiedi. <sup>15</sup> 'Inega Lidia nana me ena susuyavo babitaiso i'ewea, ta 'abiboda vonema vonaya, "Eguma omi'a o'awahaqiaqiegu ya'a Kaiwabu ana to'abiboda aqiaqi taha, e 'inega ona mai 'iguya ta ona vewagawaga egu vanuea." 'Inega 'alakeikeiema 'abo maega atauya ena vanuea.

\* 16:1: Via 14:6; 2Tim 1:5 \* 16:2: Fil 2:19-22,27 \* 16:4: Via 15:23-29 \* 16:6: Via 18:23 \* 16:10: Luke tauna buki ba'e ana to'wayavi. Ta tuta ba'e 'inega ma iana Faulo iluvivila di'we taha taha 'idia. 'Inega da'a 16 laba 10 ba'e 'inega wese taunega weaqina veveqae tola'ai 'ifoqe 'idia.

*Faulo be Sailasa ia'uluguyedi vanue 'ebeyoqona 'inaya*

<sup>16</sup> Taha tuta atautauya 'ebevenoqi ana di'we 'inaya, e 'inega taha iahaba maega aveloba 'eday, tauna tovekaikaiwabu edi tofewa. Lova niboana luveifana 'wahalia ta lugu 'inaya toatoa. Ta iahaba nana niboana luveifa nana 'inega ana fata namadusimanea tola'ai nawale na'ifoqe. Ta ena fewa ba'e 'inega ena kaiwabuyavo mane qidwana i'ewe'ewea tomotau 'idiega. <sup>17</sup> \* 'Inega 'abi'abibodema ta vevegabagaba vonaya, "Ba'e tomotau diavona Yaubada Toatoa Vanena ena tofewayavo, ta 'etoyavua ana 'eda aqiaqi ana tosimana." <sup>18</sup> Ta iahaba nana ba'e 'idewana vegabagaba 'aubena qabuna 'idia, 'inega Faulo 'wafina siniqaiqai ta tunugivila ta niboana luveifana voneaya, "Ieisu Keliso ana wawega yaluvineu bena'e iahaba nana 'inega u'ifoqe!" Ta omo'e tuta nana 'inaya 'ifoqe.

<sup>19</sup> Ta iahaba nana ena kaiwabuyavo diadi vilea 'imaya, mana edi mane qidwana ana 'ebe'ewa tauna iahaba nana ena fewega ilobelobe, ta Faulo ni'a giveaiaqiea, e 'inega ge wese mane adi fata be ina lobei ba'e iaba nana 'inega. 'Inega Faulo be Sailasa ikafidi ta ilih'i 'eta'etalidi ta itauyedi 'ebevegimwane 'inaya 'abaga ana toluvineavo matadia, <sup>20</sup> \* ta ivonedi ivonaya, "Ba'e me Diu tomotaudi imai 'idaya ta eda 'abaga inidonidoea initunga, <sup>21</sup> ta mali ilivu be mali ilivu eda tomotauyavo iveve'itedi, ta ita'a ilivu diavona ge daluaqiaqieda 'eguma kana 'awahaqiaqiedi be kana viaqidi, mana ita'a me Loma edi 'ebeluvine gamonaya katoatoa."

<sup>22</sup> \* 'Inega tomotau qabudi edi nuanua 'aideganega iva'auta nuanuadi Faulo ma iana ina vunuqidi, 'inega toluvineavo iluvinedi ta adi kaleko i'esiabu yavuledi ta 'abiega ilavua dadanedi. <sup>23</sup> Gumwala, ta 'abibodanaya ia'uluguyedi vanue 'ebeyoqona gamonaya. Ta ana to'itamaki iluvinei be na'itamaki aqiaqiedi. <sup>24</sup> Ta to'itamaki nana ana luvine noqola aqiaqiea, 'inega a'uluguyedi taha sifaufa gamo otaqinaya. Ta wese 'aqedi 'evesakakea 'aiwe qiduiduadi 'inega.

*Faulo ma iana Sailasa adi to'itamaki ve'ale vetumaqana Ieisu 'inaya*

<sup>25</sup> Ta tou gamonaya Faulo be Sailasa ivevenoqi ta Yaubada iawahawatuboya 'evosiega, ta wese vaina yoqoyoqonidi maega itoatoa ivivineneqedi. <sup>26</sup> 'Inega lukwayavonega mwani'ini'i qidwana ve'ale, 'inega vanue 'ebeyoqona ana avutugu veni'i. Ta vanue nana ana 'awayavo taudiega 'elu'ewa'edi, ta wese yoqoyoqonidi qabudi adi seni 'idiega 'eli'amidi. <sup>27</sup> \* 'Inega to'itamaki nana 'eno'enyega ya'itoto ta 'itea vanue 'ebeyoqona ana 'awayavo 'elu'ewa'edi ta vonaya be yoqoyoqonidi ni'au ida dena. 'Inega ena kefata 'ewei ta vonigo taunega daluve'aligia. <sup>28</sup> Ta Faulo 'itea 'inega gabea vonaya, "Ei, ge tau'uyega una luve'aligiu! Ima'a qabuma atoatoa."

<sup>29</sup> 'Inega to'itamaki nana ena tofewayavo gabedi lamufa ina miea 'inaya. 'Inega 'ewei ta me ena dedela vihila lugu sifaufa gamo otaqinaya ta tuqatuqanega sobadi Faulo be Sailasa 'iawadia. <sup>30</sup> \* Ta 'abibodanaya ya'itoto ta 'ebe'ewedi i'ifoqe ta vetala'aiedi vonaya, "Kaiwabuyavo, ovonegu tola'ai ena viaqi be 'inega 'etoyavua ena lobei."

<sup>31</sup> Ta Faulo be Sailasa ivona 'eviviea ivonaya, "Kaiwabu Ieisu 'inaya una vetumaqana, 'inega o'a me eu susuyavo qabumi 'etoyavua ona lobe." <sup>32</sup> 'Inega Faulo be Sailasa Kaiwabu Ieisu Valena isimanea to'itamaki nana 'inaya ta wese ena susuyavo 'idia. <sup>33</sup> Ta omo'e tou nana gamonaya to'itamaki nana Sailasa be Faulo 'ebe'ewedi ta bonudi lu'utuya, 'inega 'abibodanaya tauna me ena susuyavo babitaiso i'ewea. <sup>34</sup> Babitaiso gumwala, ta 'abibodanaya to'itamaki nana Faulo be Sailasa 'ebe'ewedi ena vanuea ta 'abwaga neidi. Ta to'itamaki nana me ena susuyavo iqaiawa qidwana, mana qabudi edi vetumaqana Yaubada 'inaya ni'au ilobe.

<sup>35</sup> Mahala ahalia 'inega 'abaga ana toluvineavo edi folisi iluvinedi ivonedia, "Ona tauya vanue 'ebeyoqona 'inaya, ta ana to'itamaki ona vonei Faulo be Sailasa nayavuidi."

\* 16:17: Mk 1:24    \* 16:20: Mk 13:9    \* 16:22: 2Kol 11:25; 1Te 2:2    \* 16:27: Via 12:18-19    \* 16:30: Via 2:37



<sup>36</sup> 'Inega folisi itauya to'itamaki nana 'inaya ta toluvine dina edi nuanua isimanea 'inaya. 'Inega to'itamaki nana Faulo ma iana vonedi vonaya, "Toluvineavo luvine ineigu be ena yavuimi. 'Inega ona 'ifoqe ta ma emi nuadaumwala ona tauya."

<sup>37</sup> 'Inega Faulo folisi vonedi vonaya, "Ge wese ana tauya! Mana ima'a me Loma ta ge taha ema luveifana, ta tomotau matadia ilavua dadanema 'abiega, ta vanue 'ebeyoqona 'inaya ia'uluguyema, ta ge taha kotu ida maduviaqia 'imaya. Ta tola'ai weaqina toluvineavo nuanuadi ina yavuima vanue 'ebeyoqonega be ana 'ifoqe 'waivega? Ta 'esi luaqiaqiedi taudiega ina mai be ina a'u'ifoqeyema!"

<sup>38</sup> 'Inega folisi i'evivi ta Faulo ena vona isimana 'ifoqeyea toluvine 'idia. Ta edi vona 'inega toluvine diavona imwaniniva qiduana, mana ni'au inoqolia Faulo be Sailasa taudi Loma ana tomotauyavo. <sup>39</sup> 'Inega toluvine diavona imai ilusoli Faulo be Sailasa 'idia ta wese iyavuidi. 'Inega vanue 'ebeyoqonega ia'u'ifoqeyedi ta inoqiedi be ina tauya mali di'we 'inaya. <sup>40</sup> Ta Faulo ma iana edi 'ifoqe 'abibodanaya itauya Lidia ena vanuea, ta omo'e 'inaya tovetumaqana ilobedi ta edi vona 'inega igivewaiwaiedi. Ta 'abibodanaya itutuvila itauya.

## 17

### *Faulo be Sailasa* 'abaga Tesalonaika 'inaya

<sup>1</sup> Faulo be Sailasa 'abaga Filifai inogei. 'Inega itauya 'abaga Amififoli be Afolonia 'idia, ta 'abibodanaya i'ifoqe 'abaga Tesalonaika 'inaya. Ta 'abaga nana 'inaya me Diu edi vanue tafwalolo taha 'eno'eno. <sup>2</sup> 'Inega Faulo edi vanue tafwalolo 'inaya lugu, 'edewani ena ilivu di'we qabuna 'idia viaviaqia. Ta omo'e 'inaya Sabate toi 'idia Buki Nugwenugweina 'inega veve'itedi ta maega ive'ae'aetoga. <sup>3</sup> Ta tovesimasimana edi 'wayavi nugwenugweina 'inega Faulo givesimatalia 'idia Keliso weaqina luaqiaqiea be yuvaqa nalobea ta na'aliga, ta 'abibodanaya 'aligege naya'itoto 'evivi. Ta wese vonedi vonaya, "Iesu nana yavonavonayea 'imia, e bena'e tauna To'etoyavua Keliso." <sup>4</sup> Ta vaina me Diu Faulo be Sailasa edi lugaihi nuadi 'ewea 'inega adi yo'o gamonaya ilugu. Ta wese me Guliki 'idiega Yaubada ana to'amayabayavo 'eala ilugu be wese vivine adi wawa 'ena'ena'ina tufwana qabudi ilugu ta Faulo 'elavidi maega iluvetuba. <sup>5</sup> Ta me Diu adi tovanugwetayavo Faulo be Sailasa ive'ifi'ifiedi.

'Inega vaina toluyaba kavokavovo 'abagega igaba va'auqidi imai ta maega idima govaqa, nuanuadi Faulo be Sailasa ina vevoalenedi. Ta igogona itauya Iesoni ena vanuea itala'avuya nuanuadi Faulo be Sailasa ina kafidi ta ina lihi 'ifoqeyedi 'abaga 'atamanaya tomotau 'iawadia. <sup>6</sup> Ta isali 'wayoqedi, 'inega Iesoni ta wese vaina tovetumaqana maega ikafidi ilihidi ta itauyedi 'abaga ana toluvineavo matadia. Ta bonadi qiduanega igaba ivonaya, "Ba'e tomotau diavona di'we qabuna adi togiveluveifa ni'a imai eda 'abagaya, <sup>7</sup> \* ta Iesoni 'ebe'ewedi ena vanuea ana wagawagayavo 'idewani. Ta Sisa ena luvineavo ibwegea, mana ivonaya vonigo Kini vauvauna ni'a 'ifoqe ana wawa Iesu." <sup>8</sup> Ta tuta nana tomotau qabudi ta wese 'abaga ana toluvineavo vona ba'e inoqolia 'inega diadi vilea gegoyo. <sup>9</sup> 'Inega toluvineavo Iesoni ma enavo iluvinedi mane ina a'uya edi li'ama weaqina. Ivemaisa gumwala, 'inega iawafeledi ta itauya.

### *Faulo be Sailasa itauya* 'abaga Belia 'inaya

<sup>10</sup> Ni'a velovelovana 'ifoqe 'inega Tesalonaika ana tovetumaqanayavo Faulo be Sailasa iluvetunedi itauya 'abaga Belia 'inaya. Ta tuta nana i'ifoqe 'inega magilafudi ilugu me Diu edi vanue tafwalolo 'inaya. <sup>11</sup> Lova Tesalonaika 'inaya me Diu ge nuadi Iesu Valena ina noqolia. Ta 'esi me Diu taudi ba'e Belia nana 'inaya itoatoa Vale nana i'awahaqiaqiea, ta wese nuadi 'ewea 'ena'ina. 'Inega 'aubena 'aidega 'aidega Buki Nugwenugweina iavo aqiaqiea, mana nuanuadi ina alamania 'eguma Faulo ena simana vona aqiaqina nage gebu. <sup>12</sup> Ba'e 'inega me Diu qabudi edi vetumaqana ilobea. Ta wese me Guliki vivine be 'oloto 'ena'ena'idi qabudi ba'e Vale nana ivetumaqanea. <sup>13</sup> Ta tuta nana me

\* 17:7: Lk 23:2; Ion 19:12

Diu Tesalonaika 'inaya itoatoa Faulo valena inoqolia tauna wese 'abaga Belia 'inaya ve'ale Yaubada ena vona lulugaihiea, 'inega lukwayavonega imai Belia 'inaya ta edi vona 'inega tomotau italavea'iedi nuanuadi Faulo be Sailasa ina vevoalanedi. <sup>14</sup> 'Inega tovetumaqanayavo ilukwayavoni Faulo iluvetunei tauya mwade'waya. Ta Timoti be Sailasa nawale Belia 'inaya itoatoa. <sup>15</sup> Ta Faulo ana mata 'weabuyavo maega wagega igelu itauya 'abaga qiduana Ateni 'inaya. Ta omo'e 'inaya ivalovea 'inega i'evivi itauya Belia 'inaya. Ta vale Faulo 'inega imiea Sailasa be Timoti 'idia nuanuana ina lukwayavoni ina mai, ta maega ina luvetuba Ateni 'inaya.

*Faulo ena lugaihi Ateni 'inaya*

<sup>16</sup> Faulo nawale 'abaga qiduana Ateni 'inaya toatoa ta Sailasa be Timoti ba'eba'eyedi. Ta nuana vita qiduana, mana 'abaga nana 'inaya 'ebeiwa'odu kavokavovo kavona tokwalui 'eala 'itedi. <sup>17</sup> \* 'Inega Faulo 'aubena 'aidega 'aidega vanue tafwalolo 'inaya be wese 'ebeva'auta 'idia Yaubada ana to'amayabayavo taudi me Diu ta wese me Guliki maega iluluvoya ba'e yani nana weaqina. <sup>18</sup> Ta vaina toalamani taudi igabedi Efikulo\* be Sitioki†, Faulo maega ive'ae'aetoga, mana Faulo Iesu Valena be ena ya'itoto 'evivi 'aligega weaqina simanea 'idia. 'Inega vaina 'idiega ivonaya, "Aa, kwavakwavana, ba'e tola'ai ena nuenuega vonevonei?"

Ta wese vaina ivonaya, "Nage mali yaubadayavo weaqidi luluqaihi 'idaya?" <sup>19</sup> 'Inega Faulo i'ebe'ewei itauyea Ateni ana kaniselayavo matadia, taudi wese adi wawa igabedi Alifago‡.

'Inega ivetala'aiea ivonaya, "Nage au fata eu ve'ita ba'e una givesimatalia 'imaya? <sup>20</sup> Mana yani qabuna ni'au uvonema kavona yani vauvauna 'imaya. 'Inega nuanuama eu ve'ita nana ana alamani una givesimatalia be 'inega nuama na'eqa'uya." <sup>21</sup> (Ta me Ateni be wese wagawaga 'abaga nana 'inaya itoatoa, tuta qabuna nuanua vauvaudi weaqidi nuanuadi ina noqolidi be ina veqaeyedi.)

<sup>22</sup> 'Inega Faulo tovololo kaniselayavo qabudi matadia ta vonaya, "Omi'a me Ateni, ni'a yahalamania vonigo emi 'ebeiwa'oduyavo weaqidi onuanua qiduana ta ovevetafe'wa waiwai 'idia. <sup>23</sup> Ta egu luyaba 'inaya emi 'ebeiwa'odu kavokavovo be wese emi vanue 'ebeveguba qabudi ya'itedi. 'Inega 'idiega taha 'ebeveguba ya'ita lobe ta ana 'wayavi vonaya, 'Yaubada ge ana alamanimo 'inaya.' Ta tuta qabuna ba'e Yaubada nana 'inaya oiwaiwa'odu ta ge oda alamania. E taunana weaqina nuanuagu ba'e 'itaga ena simana 'ifoqeyea 'imia.

<sup>24</sup> \* "Tauna bwa'obwa'o ta wese yani qabuna i'eno'eno bwa'obwa'oya adi To'iva'ava'ata. Ta wese bwa'obwa'o be mahala adi Kaiwabu. 'Inegana tauna ge datoatoa vanue 'ebeiwa'odu tomotau nimadiega iyoqonidi gamonaya. <sup>25</sup> \* Ita'a tomotau ge ada fata taha yani kana viaqi kana neia, mana tauna ge taha yani 'idiega dakusa. Ta yani qabuna Yaubada nimanega i'ifoqe, ta tauna wese yawaida 'iuna. <sup>26</sup> Yaubada taha 'oloto ana wawa Adama maduviaqia, 'inega mali qabu be mali qabu 'oloto nana 'inega i'ifoqe, ta Yaubada a'udi mali di'we be mali di'we 'idia. Ta wese Yaubada ena nuenuega edi toa ana tuta 'ebeluvine diavona 'idia taunega maduvenua'ivinea. <sup>27</sup> \* Yaubada ba'e 'idewani viaqia, be yaqisa ita'a tomotau kana salia ta ada lutonova 'inega kana lobe ta kana tauya 'inaya. Ta Yaubada ge taha toga 'inega datoa luluvai. <sup>28</sup> 'Mana tauna 'inega yawaida ka'ewe'ewei ta kayabayaba be wese katoatoa.' 'Idewani lova vaina emi to'wayavi ivonaya, 'Ita'a wese Yaubada natunavo.'

\* 17:17: Via 18:19 \* 17:18: Taudi Efikulo "Epicurean" taha qabu, ta taudiega igabedi toalamani aqiaqidi. Ta tuta qabuna yani taha taha weaqina inuanua, ta wese nuanuadi ba'e yani diavona weaqina ina veqaeyedi mali qabu maega. † 17:18: Taudi Sitoike "Stoics" wese taha qabu 'abaga Ateni 'inaya, ta edi ilivu be wese edi nuanua kavona taudi Efikulo 'idewani. ‡ 17:19: Bwanaga Alifago 'eno'eno Ateni di'wenaya, ta me Ateni edi 'ebeveloba. Ta edi kaniselayavo wese igabedi Alifago, mana bwanaga nana 'inaya edi 'ebevekotu 'eno'eno. \* 17:24: 1Kin 8:27; Via 7:48 \* 17:25: Same 50:12 \* 17:27: Same 145:18; Iel 23:23

<sup>29</sup>\* “Vonahaqiaqi, ita’a Yaubada natunavo. ’Inega ge ona vonaya be Yaubada tauna kavona taha tokwalui tomotau nimadiega iviaqia goula be siliba nage dabo ’idiega. <sup>30</sup>Lova tuta nana tomotau Yaubada ge ida alamania ’inega edi ilivu luveifana bibitaqoya, ta ba’itagana Yaubada tomotau qabuda di’we qabudi ’idia luvineda be eda ilivu luveifana ’inega kana nuagivila. <sup>31</sup>\* Mana Yaubada taha ’aubena ni’au venua’ivinea tomotau qabuda ada vekotu weaqina. ’Inega ada luvine tunutunuqina naneida taha ’oloto vevenua’ivinina ’inega. Ta Yaubada ba’e yani nana ana ’awahaqiaqi weaqina ni’a ve’iteda tuta nana ’oloto nana ’aligegea giveya’itoto ’eviviea.”

<sup>32</sup> Ta vaina me Ateni Faulo idageia be wese igivenu’wea tuta nana ena vona inoqolia ya’itoto ’evivi ’aligegea weaqina. Ta ’esi vaina ivoneaya, “Nuanuama ba’e yani diavona weaqina wese una lu’eviviei ta ana noqolia.” <sup>33</sup> Ta Faulo totoa va’auta dina ’idiega webui tauya. <sup>34</sup> Ta vaina tomotau Faulo ena vona ivetumaqanea ta ana yo’o gamonaya ilugu. Ta taha ’idiega ana wawa Dionisi, tauna taha kanisela Alifago ana qabuyavo ’inega. Ta wese taha vavine ana wawa Damali be wese vaina tomotau maega Faulo ena vona ivetumaqanea.

## 18

### *Faulo ena viaqa* ’abaga Kolinita ’inaya

<sup>1</sup> ’Abibodanaya Faulo Ateni nogea ta tauya ’abaga qiduana Kolinita ’inaya. <sup>2</sup>\* Omo’e ’inaya taha Diu ’olotona lobeana wawa Akwila, ta tauna ena ’ebevi’oi di’we Fonito ’inaya. Ma moqanena Filisila tawadega imai di’we Italiiega, mana Sisa Kolodiasi me Diu qabudi luvine neidi Loma ’inega ina ’ifoqe. ’Inega Faulo Akwila ma moqanena vayausidi. <sup>3</sup>\* Ta taudi edi fewa yubai ’wafidiega be wese vutuvutudiega didi isaisailidi, ta wese Faulo ena fewa ’edewana. ’Inega vewagawaga edi vanuea ta qabudi ifewa ’aideganega. <sup>4</sup> Ta Sabate ’aidega ’aidega Faulo me Diu edi vanue tafwalolo ’inaya veveqae me Diu ta wese me Guliki ’idia, mana nuanuana qabudi nuadi na’eqa’uya ta ina vetumaqana Iesu ’inaya.

<sup>5</sup>\* Faulo nawale toatoa Kolinita ’inaya, ’inega Timoti ma iana Sailasa Masidonia ’inega imai ’inaya. Ta Faulo nawale lulugaihi me Diu ’idia, ta tuta qabuna simasimana ’idia Iesu tauna To’etoyavua. <sup>6</sup>\* Ta me Diu Faulo ena simana ge ida ’awahaqiaqiea, ’inega i’awaluveifea. ’Inega Faulo ana kaleko fwayaqauna matadia ’aubutubutu yavulea, e bena’e edi ’ebe’ita edi noga weaqina, ta vonedi vonaya, “Omi’a nawale ona veilae emi vedeba ’i’wana weaqina. Ta veilae nana weaqina taumiega ona ve’ewemi, mana ya’a ’ilumaiqigu yatoatoa. ’Inega tuta ba’inega ena nogemi be ena tauya taudi ge me Diu ’idia!”

<sup>7</sup> ’Inega edi vanue tafwaloloya nogedi ta vanaqo Taitio Iusito ena vanuea ta maega itoatoa. Ta Taitio nana Yaubada ana toawatubo taha. <sup>8</sup> Ta vanue tafwalolo ana tovanugweta ana wawa Kilisifo, tauna ena vanue ana totoayavo maega Kaiwabu Iesu ivetumaqanea. Ta wese me Kolinita ’eala Faulo ena lugaihi ’inega ive’ale vetumaqana Iesu ’inaya, ’inega babitaiso i’ewea.

<sup>9</sup> ’Inega taha velovelovana ’inaya Faulo kavona ve’wayoqega Kaiwabu Iesu ’itea voneaya, “Faulo, ge giwaliu naha’ala. Vale Aqiaqina nawale una simana ’ifoqeyea, ta ge una lua’u, <sup>10</sup>\* mana ya’a o’a maega katoatoa. Ta ge taha toga ana fata navunuqiu, mana ba’e ’abaga nana ’inaya tomotau ’eala ivetumaqanegu ta taudi egu qabuyavo.” <sup>11</sup> ’Inega Faulo omo’e ’inaya totoa wai’ena 18 ’idia, ta Yaubada ena vona veve’itedi.

<sup>12</sup> Ta tuta nana Galio vegavana me Guliki edi di’we Akaya ’inaya, e ’inega vaina me Diu ive’aidega ta Faulo ivevoalanea ikafia ta itauyea sabi vekotuna Galio matanaya. <sup>13</sup> ’Inega Faulo ive’ewea ivonaya, “Ba’e ’oloto nana tomotau lulukeiedi ta veve’itedi mali ’eda Yaubada ana awatubo weaqina, ge ita’a eda luvine ’edewana.”

\* 17:29: Ais 40:18-20; 44:10-17; Via 19:26 \* 17:31: Same 96:13 \* 18:2: Lom 16:3 \* 18:3: Via 20:34 \* 18:5: Via 17:14-15 \* 18:6: Via 13:46,51; 20:26 \* 18:10: Ios 1:9; Ais 41:10

<sup>14</sup> Tuta goyona be Faulo davona 'eviviedi, 'inega Galio madutovolo ta me Diu vonedi vonaya, "Omi'a me Diu, ovineneqegu! 'Eguma ba'e 'oloto nana vaina luveifana daviaqidi 'idewani luve'aliga be, vanawala be, vedavi be, e 'inega luaqiaqiegu be emi ve'ewa eda noqolia. <sup>15</sup> Ta 'esi emi ve'ewa ba'e taumiega emi nuenuega vaina vona be wawa be emi luvine weaqidi, 'inega taumiega ona luvine ami vitayavo weaqidi, ta ya'a yanoga." <sup>16</sup> 'Inega Galio me Diu 'wavi 'ifoqeyedi vanue 'ebevetala'ai 'inega. <sup>17</sup> Ta tove'ewa diavona taha 'oloto ana wawa Sositeni ikafia, tauna me Diu edi vanue tafwalolo ana tovanugweta, ta ilavua dadanea toluvineavo matadia. Ta Galio ge taha danuanua ba'e yani nana weaqina.

*Faulo* 'evivi tauya 'abaga Anitioki 'inaya

<sup>18</sup> \* Ta vekotu nana 'abibodanaya Faulo vaina 'aubena 'idia nawale toatoa Kolinita 'inaya. Tuta goyona nagelu, ta nugweta 'abaga Senikila 'inaya taha tomotau Faulo debana kuena da'a yavulea. Lova Faulo debana ge dada'ei, mana taha vona fofofola 'inane Yaubada 'inaya.\* Veda'a gumwala 'inega to'ekalesiayavo lukafoiedi ta wagega gelu sabi vaukamana di'we Silia weaqina. Ta Filisila ma moqanedi Akwila maega igelu itauya. <sup>19</sup> 'Inega i'ifoqe 'abaga qiduana Efeso 'inaya ilugu, ta omo'e 'inaya Faulo Filisila ma moqanedi Akwila nogedi. Ta Faulo ena toa Efeso gamonaya tauya me Diu edi vanue tafwalolo 'inaya ta lugu sabi veqae taudi maega. <sup>20</sup> 'Inega Faulo ivenoqiea 'eguma ana fata tufwana tuta kuena maega ina toa, ta vonedi ge ana fata, <sup>21</sup> vonedia, "Eguma Yaubada nahawafelegu nawale ena 'evivi ena mai." 'Inega me Efeso lukafoiedi ta gelu 'evivi tauya.

<sup>22</sup> Ta 'inega lugu 'abaga Sisalia 'awaboqea. 'Inega 'watovu Ielusalema 'inaya ta to'ekalesiayavo vayahusidi. Vayahusidi gumwala 'inega 'evivi mai ena 'abaga qiduana Anitioki 'inaya. <sup>23</sup> Ta Faulo tufwana tuta kuena Anitioki 'inaya toatoa. 'Inega tauya di'we Galetia be Filigia 'idia, ta 'abaga taha taha 'idia luvivila dadana ta Iesu ana tovetumaqanayavo givewaiwaiiedi.

*Afolosa ena lugaihi Efeso* 'inaya

<sup>24</sup> 'Inega taha Diu 'olotona ana wawa Afolosa mai Efeso 'inaya. Tauna ena 'ebevi'oi 'abaga qiduana Alekisanidela di'we Itifita gamonaya. Tauna tolugaihi aqiaqina ta Buki Nugwenugweina ana toalamani aqiaqi. <sup>25</sup> Ta Afolosa lova ve'ita 'ewea Kaiwabu ena 'eda weaqina, 'inega tuta qabuna me ena qaiawa tomotau ve'ita tunutunuqina neineidi Iesu weaqina. Ta ge dahalamanian babitaiso Iesu ana wawega weaqina, mana lova Ioni ena babitaisomo valena noqolia. <sup>26</sup> 'Inega Afolosa me ena giwalifatu ve'ale lugaihi me Diu edi vanue tafwalolo 'inaya. Ta Filisila ma moqanedi Akwila ena lugaihi inoqolia. 'Inega i'ebe'ewea itauyea edi vanuea ta Yaubada ena 'eda weaqina ive'ita aqiaqiea, e 'inega Afolosa ena alamani veqidua. <sup>27</sup> Ta Afolosa nuanuana navaukamana di'we Akaya 'inaya. 'Inega Efeso ana tovetumaqanayavo edi vona 'inega igivewaiwaiiea, ta taha leta i'wayavia me Akaya ana tovetumaqanayavo 'idia ta ivonedi be Afolosa ina 'ebe'ewea. Ta tuta nana Afolosa 'ifoqe Akaya 'inaya, 'inega taudi lova Yaubada ena nuakokoloyega Iesu ivetumaqanea iula qiduana neidi ena lugaihi 'inega, <sup>28</sup> \* mana Afolosa me ena waiwai me Diu maega ive'ae'aetoga tomotau matadia. Ta Buki Nugwenugweina 'inega Afolosa me Diu edi luveifana givesimatala 'idia, ta ve'ita aqiaqiedi vonigo Iesu tauna To'etoyavua.

## 19

*Faulo ena luvivila tuta vetoina*

<sup>1</sup> \* Tuta nana Afolosa nawale Kolinita 'inaya toatoa e 'inega Faulo luvivila di'we Galetia be Filigia nuanidiega, ta 'inega 'ifoqe 'abaga Efeso 'inaya. Ta omo'e 'inaya to'abiboda

\* 18:18: Naba 6:18; Via 21:24 \* 18:18: Faulo debana ge dada'ei tuta kuena 'inaya, mana ba'e debana nana kavona 'ebe'ita ba'e vona fofofola nana weaqina. Ta vona fofofola nana ana tuta ni'au gumwala, 'inega debana da'a yavulei. Ba'e ilivu nana igabea ana wawa "Nasili vona fofofolana". \* 18:28: Via 9:22 \* 19:1: 1Kol 3:6

vaina lobedi. <sup>2</sup> \* 'Inega Faulo vetala'aiedi vonaya, "Egwavo, tuta nana Iesu ove'ale ovetumaqanea nage Niboana Gwalagwalana o'ewea nage gebu?"

'Inega ivona 'eviviea ivonaya, "Gebu, ge ada alamania Niboana Gwalagwalana datoatoa. Tauna weaqina ge ada noqolia."

<sup>3</sup> 'Inega Faulo wese vetala'aiedi vonaya, "Tobabitaio 'inega obabitaio?"

Ta ivonaya, "Ioni ena babitaio 'inega."

<sup>4</sup> \* 'Inega Faulo vonedi vonaya, "Lova Ioni ena babitaio ilivu luveifana ana nuagivila weaqina. Ta tomtau lugaihidi be ina vetumaqana tauna 'abibodanega maimai 'inaya, e taunana Iesu."

<sup>5</sup> Faulo ba'e ena vona ni'a inoqolia, 'inega tovetumaqanayavo Kaiwabu Iesu ana wawega babitaio i'ewea. <sup>6</sup> \* Ta tuta nana Faulo nimanega gitonividi 'inega Niboana Gwalagwalana mai lugu 'idia. 'Inega ive'ale ivonavona mali bona be mali bona 'idiega ta wese Yaubada ena vona ivetalasimasimanea. <sup>7</sup> Ta qabu dina 'oloto adi yau tuwelo 'idewani.

*Faulo ena viaqa Efeso 'inaya*

<sup>8</sup> Wai'ena toi gamonaya Faulo tuta qabuna me Diu edi vanue tafwalolo 'inaya lugulugu, ta me ena giwalifatu Yaubada ena 'Ebeluvine weaqina lulugaihi. Ta maega ive'ae'aetoga ta keiedi nuanuana ina nuagivila. <sup>9</sup> Ta vaina ivedeba 'i'wana vonigo ge nuanuadi ina vetumaqana, ta 'esi tomtau matadia Iesu ena 'eda ana to'abibodayavo i'awaluveifedi. 'Inega Faulo nogedi ta tovetumaqanayavo maega i'ifoqe itauya Tilano ena vanue 'ebeve'ita 'inaya. Ta omo'e 'inaya 'aubena 'aidega 'aidega 'idia veve'ita. <sup>10</sup> Ta ena lugaihi ba'e viaqia ya'wala magilafuna gamonaya, 'inega me Diu ta wese me Guliki qabudi di'we Eisia 'abaganavo 'idia Kaiwabu Iesu Valena inoqolia.

<sup>11</sup> \* Ta Yaubada Faulo 'inega viaqa 'ebenuavoqana waiwai viaviaqidi. <sup>12</sup> \* 'Inega tomtau edi kaleko matavusidi be wese edi 'ebevetalaqa Faulo 'wafina 'inaya ilu'onedi ta 'abiboda ia'udi tovevhiqayavo 'idia. 'Inega tovevhiqa dina iveaqiaqi ta wese niboana luveifana 'ifoqe tomtau 'idiega.

*Sikiva natunavo nuanuadi niboana luveifadi ina 'wavi 'ifoqeyedi*

<sup>13-14</sup> Vaina me Diu iluluvivila dadana 'abaga taha taha 'idia ta itoho waiwai vonigo Kaiwabu Iesu ana wawega niboana luveifadi ina 'wavi 'ifoqeyedi tomtau 'idiega. Ta taha me Diu edi toveguba qiduana ana wawa Sikiva natunavo me'ome'olotodi adi yau seveni wese ba'e yani nana iviaqia. Ta ba'e 'idewana ivona 'aiqa niboana luveifana 'inaya ivonaya, "Iesu nana tauna Faulo weaqina lulugaihi ana wawega aluvineu u'ifoqe!"

<sup>15</sup> Taha tuta 'inaya ba'e yani nana iviaqia taha 'oloto 'inaya, 'inega niboana luveifana 'oloto nana gamonega vona 'eviviedi vonaya, "Iesu ni'a yahalamaniana, ta wese Faulo 'idewani yahalamaniana. Ta omi'a tomeqabu?" <sup>16</sup> 'Inega 'oloto nana taunega fifiei seveni dina 'idia ta qabudi vewaiwai va'inedi ta vunuqa veveifedi, e 'inega ma'igonegonedi be ma sulasulalidi idena i'ifoqe vanuega.

<sup>17</sup> \* Ta me Diu be wese me Guliki itoatoa Efeso 'inaya vale ba'e inoqolia, 'inega imwaniniva gegoyo ta Kaiwabu Iesu ana wawa i'amayabea. <sup>18</sup> 'Inega tovetumaqana 'eala imai ta edi ilivu luveifadi isimana 'ifoqeyedi tomtau matadia. <sup>19</sup> Ta wese vaina tovetumaqana diavona 'idiega lu'afo'a ialamaniana ta iviaviaqia inuagivila, ta edi 'afo'a ma bukidi iva'auqidi ta igabu yavuledi tomtau matadia 'abaga 'atamaninaya. Ta buki diavona adi maisa iavodi ta iluvetubedi kavona 50,000 siliba 'idewani. <sup>20</sup> Ba'e yani nana 'inega Kaiwabu ena vona yawala dadana ta tomtau qabudi ivewaiwai vona nana 'inega.

*Me Efeso Faulo ivevoalanea*

<sup>21</sup> \* Ba'e yani diavona 'abibodanaya Niboana Gwalagwalana ena venuaha'u 'inega Faulo nuanuana natauya di'we Masidonia be Akaya 'abaganavo nuanidiega ta 'abiboda na'ifoqe

\* 19:2: Via 8:16 \* 19:4: Md 3:11 \* 19:6: Via 8:17; 10:44,46 \* 19:11: Via 14:3 \* 19:12: Via 5:15 \* 19:17: Via 5:11 \* 19:21: Via 23:11; Lom 1:13

Ielusalema 'inaya, 'inega vonaya, "Yanugwenugweta Ielusalema 'inaya, ta 'abibodanaya nuanuagu me Loma ena vayausidi." <sup>22</sup> 'Inega Faulo ana toiulayavo magilafudi adi wawa Timoti be wese Elasisi luvetunedi inugweta Masidonia 'inaya. Ta Faulo tufwana tuta kuena nawale toatoa di'we Eisia gamonaya.

<sup>23</sup> \* Ta tuta omo'e 'inaya vetalavoyavoya qiduana 'ifoqe Efeso 'inaya Iesu ena 'eda ana to'abibodayavo weaqidi, ta ba'e 'idewana 'ifoqe 'aiqa. <sup>24</sup> Taha 'oloto ana wawa Dimitiliasi tauna siliba ana toviaqa Efeso 'inaya toatoa, ta siliba nana 'inega vanue tafwalolo goyogoyodi viaqidi adi 'ita kavona me Efeso edi yaubada kavokavovo mevavinena ana wawa Atimesi\* ena vanue tafwalolo 'idewani. 'Inega vegimwaneyedi tomotau 'idia, ta ba'e fewa nana 'inega mane qiduana 'ewe'ewea. Ta wese vaidi tomotau ba'e fewa nana iviaqia e taudi wese mane qiduana ilobeloba.

<sup>25</sup> Ta Dimitiliasi ba'e toviaqa diavona ta wese vaidi siliba ana toviaqayavo maega gaba va'auqidi vonedi vonaya, "Egwavo, ni'a oalamanian mane qiduana ka'ewe'ewea ba'e fewa nana 'inega. <sup>26</sup> Ta Faulo nana ni'au tomotau qabudi gedi 'evi'eviviedi ta wese nuadi givilei, mana vonavona vonigo yaubadayavo tomotau nimadiega iviaviaqidi taudi gebu yaubada aqiaqi. Ta ba'e yani nana ge da'ifoqe ita'a me Efeso ada 'aidega 'idaya, ta 'esi di'we qabuna Eisia gamonaya wese 'idia. <sup>27</sup> Ta Faulo ena vona ba'e 'inega yamwaniniva nawale tomotau ge nuanuadi eda viaqayavo ina gimwanedi. Ta wese yani 'ena'ina nawale tomotau eda yaubada qiduana Atimesi ana 'amayaba navegoyo ta me Efeso ena vanue tafwalolo ina veyani kavokavovoyedi."

<sup>28</sup> Ta qabu diavona Dimitiliasi ena vona inoqolia 'inega diadi vilea qiduana ta ikolukolua ivonaya, "Ita'a me Efeso eda yaubada Atimesi toatoa vanena!" <sup>29</sup> \* Ta ge tuta kuena 'abibodanaya totoa 'abaga qabudi edi nuavoqana 'inega ivekolukolua ta ilegu kavokavovo ta kavona vetalamaqimaqi'ai 'ifoqe qabudi nuanidia. 'Inega Faulo ana mata 'weabuyavo Masidonia 'inega adi wawa Gaiusi be Alisitako me Efeso ikafidi ta ilihi 'eta'etalidi, 'inega qabudi ivihila ita'uya 'abaga ana 'ebeva'auta 'inaya. <sup>30</sup> Ta Faulo nuanuana nalugu qabu diavona matadia natovolo, ta tovetumaqanayavo i'etobodea. <sup>31</sup> Ta wese Faulo enavo, taudi di'we Eisia ana toluvineavo vale ivetunea ta ivenoqiea vonigo ge nalugu 'ebeva'auta nana 'inaya.

<sup>32</sup> Ta qabu diavona kavona ida vekwavakwava ta ivekolukolua, ta edi vekolukolua 'iuna dumadumana be dumadumana, ta qabudi ge ida alamanian tola'ai weaqina iva'auta. <sup>33</sup> Ta me Diu 'idiega taha 'oloto ana wawa Alekisana iatuefala naqoyea nuanuadi qabu matadia natovolo nagivesimatala 'idia, ta nugweta ivonea ma'oda navona 'aiqa 'idia. 'Inega Alekisana tovolu ta nimanega tovelegulegu lutaqodi ina lua'u, mana nuanuana vaina yani weaqidi nagivesimatala 'idia. <sup>34</sup> Ta yo'o diavona Alekisana i'ita 'inanea tauna Diu 'olotona, 'inega ikolua waiwai ta ilegulegu auwa magilafudi 'idewani, ta wese bonadi 'aideganega me edi waiwai ivonavona ivonaya, "Ita'a me Efeso eda yaubada Atimesi toatoa vanena!"

<sup>35</sup> 'Inega 'abaga ana tovanugweta taha qiduana 'ifoqe be qabu diavona givelua'udi vonedi vonaya, "Me Efeso, tomotau qabudi bwa'obwa'oya ni'a ialamanian vonigo eda yaubada qiduana Atimesi tovtovolo eda 'abaga ba'e ana vanue tafwalolo 'inaya. Ta wese ni'a oalamanian lova ma'ama'ayauna gwalagwalana dabo 'inega mahalega 'eta'ia, ta ita'a me Efeso ana to'itamaki ta kahawahawatuboya. <sup>36</sup> Ta ba'e yani nana ge taha toga ana fata be navegeqei. 'Inega ami luaqiaqi be na'elovemi ta ge wese ona legu kavokavovo. <sup>37</sup> Ta Faulo enavo bena'e ni'a okafidi ta omiedi ba'idia, ta magilafudina ge taha yani ida vanawalia eda vanue tafwalolo 'inega, be wese eda yaubada mevavinena ge ida 'awaluveifei. <sup>38</sup> Ta 'eguma Dimitiliasi ma enavo nuanuadi magilafudina ina ve'ewedi 'inega ina vetovolodi vekotu weaqina toluvineavo matadia, mana toluvineavo itoatoa, ta adi fata tuta ba'e 'inaya vetala'ai ina viaqia. E 'inega yani qabuna tunutunuqina. <sup>39</sup> Ta

\* 19:23: 2Kol 1:8 \* 19:24: Me Eisia edi yaubada mevavinena veguli weaqina ana wawa Atimesi "Artemis", ta wese igabea Daiana. \* 19:29: Via 20:4; 27:2; Kol 4:10; Fim 24

'eguma vaina yani weaqidi wese onualuveifa, e 'inega toluvineavo qidugiduadi maega ona va'auta, ta yani diavona ona vona 'ifoqeyedi matadia. Mana yani qabuna kana viaqia eda luvine 'idewani. <sup>40</sup> Ta yavona aqiaqiemi, ba'e vetalamaqimaqi'ai nana 'inega nawale vita kana lobe me Loma toluvineavo 'idiega, mana ilivu nana ana 'iu ge ada fata kana givesimatata 'idia."

<sup>41</sup> Ta tovanugweta nana ena vona lu'ovoia, e 'inega qabu diavona ve'iyavulidi i'ifoqe.

## 20

### *Faulo ena luvivila di'we Masidonia be Guliki 'idia*

<sup>1</sup> Vetalamaqimaqi'ai nana gumwala, e 'inega Faulo to'abibodayavo gaba va'auqidi ta ena vonega givewaiwaiedi. 'Inega lukafoiedi nogedi ta tauya di'we Masidonia 'inaya. <sup>2</sup> Ta Faulo di'we Masidonia 'abaganavo 'idia luvivila ta lugaihi be vona 'ebeiuula tovetumaqanayavo neidi. 'Inega wese webui tauya di'we Guliki 'inaya. <sup>3</sup> Ta omo'e 'inaya toatoa wai'ena toi 'idia ta nuanuana wagega natauya di'we Silia 'inaya. Ta vaina vona noqolia vonigo me Diu idima govaqa be ina kafia, e 'inega ena nuanua givilea ta 'aqenega 'evivi tauya di'we Silia 'inaya di'we Masidonia 'inega. <sup>4</sup> Ta 'evivi nana 'inaya wese vaina tomotau matana i'webuya. Ta taha 'idiega Belia 'olotona ana wawa Sofata tauna Filiasi natuna, ta wese me Tesalonaika magilafudi adi wawa Alisitako be Sekanido, ta wese Gaiusi tauna Debi 'olotona be wese Timoti. Ta wese me Eisia magilafudi adi wawa Tikiosi be Tilofimo maega itauya. <sup>5</sup> Ta tomotau diavona wagega inugweta itauya 'abaga Tiloasi 'inaya ta iba'eba'eyema omo'e 'inaya. <sup>6</sup> Ta tuta nana Beledi ge ana isitimo Sagalina aviaqi gumwala 'inega Filifaiega taha waga 'inega agelu, ta 'aubena vefaibina 'abibodanaya a'ifoqe alugu 'abaga Tiloasi 'inaya. Ta emavo nawale iba'eba'eyema 'abaga nana 'inaya alobedi ta maega atoa 'aubena ana yau seveni 'idia.

### *Kilakai taha yawaha 'evivi 'aligega Tiloasi 'inaya*

<sup>7-8</sup> Wiki ana 'aubena nugweta 'inaya qabuma ava'auta Kaiwabu Iaisu ena 'ai ana 'ebenuave'avina weaqina. Ta va'auta nana aviaqia taha vanue ana sifaufa deba otaqinaya, ta omo'e 'inaya lamufa 'eala i'ala'alata. Ta Faulo nuanua mahala navulihia 'inega natauya, e 'inega ve'ale lugaihi totoa va'auta 'idia ana laba tou gamonaya. <sup>9</sup> Ta taha kilakai ana wawa Iutiko 'ebelubo'e 'inaya toabui vanue nana ana yoqona vetoina 'inaya. Ta Faulo nawale lulugaihi 'inega kilakai nana matana dune 'eno nuafani 'abo vanue debanega 'avalata'ia webui bwa'obwa'oya. 'Inega tomotau iwebui i'avalei, ta yawaina ni'a gumwala. <sup>10</sup> Ta Faulo wese webui sabi 'itana 'inega tuqatuqanega sobadi ta Iutiko talafafea ta vonedia, "Ge giwalimi naha'ala, mana mayawaina toatoa." <sup>11</sup> 'Inega Faulo tomotau qabudi maega wese i'evivi ivane debanaya ta beledi 'ewei gitomwei neidi ta i'ai ve'wani. 'Ai gumwala 'inega Faulo wese ve'ale vonavona ana laba baba'au yayaqa, 'inega nogedi tauya. <sup>12</sup> 'Inega qabu diavona adi lutonova aqiaqina, ta me edi qaiawa kilakai nana mayawaina i'ebe'ewei itauyea ena 'abagaya.

### *Tiloasiega wagega agelu atauya Milito weaqina*

<sup>13</sup> Ima'a taha waga agelu anugweta atauya 'abaga Asosi 'inaya, ta Faulo ni'a luvinema be ana ba'eyea, mana tauna nuanuana 'aqenega namai ta maega ana luvetuba Asosi 'inaya, ta maega ana gelu. <sup>14</sup> Ta tuta nana Faulo Asosi 'inaya 'ifoqe 'inega maega agelu atauya Mitileni 'inaya alugu. <sup>15</sup> Ni'a ahalia 'inega Mitileni anogei ta wagega taha bwanabwana ana wawa Kiosi alunaqoyea ta nawale afillifili. Ta wese mahala ahala 'eviviea 'inega avaukamana bwanabwana Samosi 'inaya alugu. Ta wese vulihi 'eviviea 'inega Milito 'inaya a'ifoqe alugu. <sup>16</sup> Ta Faulo ni'au vonema 'abaga Efeso 'inaya ge ana lugu, mana ge nuanuana tuta kuena natoatoa di'we Eisia 'abaganavo 'idia. Ta 'esi nuanuana nalukwayavoni 'eguma ana fata nalugu Ielusalema 'inaya Fenitikosi ana 'aubena weaqina.

*Faulo ena lukafoi Efeso 'ekalesia ana tovanugwetayavo 'idia*

17 \* Ta Faulo Militoyega vale vetunea Efeso 'ekalesia ana tovanugwetayavo 'idia nuanuana ina mai 'inaya. 18 \* Ta tuta nana imai 'inega Faulo vonedi vonaya,

"Omi'a egu ilivu ni'a oalahalamaniana, mana ya'a omi'a maega katoatoa egu mai vauvau 'inega di'we Eisia 'inaya, be ana laba ba'e 'itagana. 19 Taudi me Diu idima govaqa weaqigu be wese vita 'idiega tuta qabuna yalobelobea. Ta tua ma mataelugu ta wese me egu nuawebui Kaiwabu 'inaya nawale yafewafewa. 20 Ta ni'a oalamaniana ge taha Kaiwabu Valena Aqiaqina weaqina eda vegagalea, mana nuanuagu Vale nana 'inega iula ona lobeana yani taha taha weaqina. Ta yani qabuna yaveve'itemi emi vanueavo 'idia, ta wese qabu matadia yalulugaihiea. 21 Ta egu ve'ita 'aidegana me Diu ta wese mali qabu 'imia, be 'inega emi ilivu luveifanega ona nuagivila Yaubada 'inaya, be eda Kaiwabu Iesu Keliso ona vetumaqanea. 22 Ta tuta ba'e 'inaya Niboana Gwalagwalana ena nuanua waiwaina 'inega yatautauya Ielusalema weaqina, ta omo'e 'inaya ge eda alamaniana ma'oda nawale na'ifoqe 'aiqa 'iguya. 23 \* Ta Niboana Gwalagwalana ena simana 'iguya 'inega ni'a yahalamania 'abaga 'aidega 'aidega 'idia nawale yuvaqa be 'ebeyoqona ena lobedi. 24 \* Ta ge nuanuagu yawaiigu ena vegagalei. Mana Kaiwabu Iesu ena fewa neigu, ta ba'e veyoveyoo nana yani qiduana 'iguya ta weaqina yanuanua be ena lu'ovoia. 'Inega Vale Aqiaqina Yaubada ena nuakolokolo be ena veyoluba weaqina ena simanea tomotau 'idia.

25 "Egwavo, ni'a oalamaniana tuta qabuna omi'a ya'a maega katoatoa ta Yaubada ena 'Ebeluvine weaqina yalulugaihi 'imia. Ta onoqolia, ni'au yahalamania nawale ge taha toga 'imiega 'iawagu na'ita 'eviviei. 26-27 Ta ba'e 'itaga Yaubada ena nuanua weaqina yasimana aqiaqi 'imia. 'Inega 'eguma nawale taha toga 'imiega veilage vataya nalobea, e 'inega ge ya'a ona ve'ewegu, ta 'esi taunega ena luveifana, mana ge taha yani eda vegagalea tomotau 'idia Yaubada ena nuanua weaqina. 28 \* 'Inega omi'a 'ekalesia ana toludebanayavo ona 'itamakimi be wese Yaubada ena sifiavo ona 'itamaki aqiaqiedi, mana Niboana Gwalagwalana emi fewa ba'e neimi be to'ekalesiyavo ona 'itamaki aqiaqiedi. Mana Yaubada sulalinea gimwanedi tuta nana Natuna 'aliga 'etoluai 'inaya. 29 \* Ta ni'a yahalamania ena nogemi ena tauya, ta 'abibodanaya tove'ita luveifadi kavona kedewa sasasadi ina 'ifoqe nuanimia ta Yaubada ena sifiavo ina tala'avudi ina fofolidi. 30 Ta wese vaina omi'a 'imiega ina ya'itoto be u'vega ina ve'ita veifemi, ta ba'e ve'ita nana 'inega nuanuadi Kaiwabu ana to'abibodayavo ina venua'ewedi be ina lugu adi yo'o gamonaya. 31 \* 'Inega omi'a ona 'itamaki aqiaqiemi. Ta egu lugaihi ona nuave'avinia, mana ya'wala toi gamodia ge eda veyawai ta 'esi yaveve'ita 'aubena be wese velovelovana qabudi 'idia, ta ma mataelugu yalulugaihimi.

32 "Ta wese yavevematamagilafuyemi tuta maimai weaqina. Tuta ba'ena Yaubada ni-manaya yaha'umi ta nuanuagu ona nua'i'ihia Yaubada ena nuakolokolo valena weaqina. Tauna 'inega ona vewaiwai, e 'inega Yaubada ena 'Ebeluvine gamonaya omi'a wese ona lugu. 33 \* Lova tuta nana ya'a omi'a maega katoatoa ge taha mane nage kaleko nuanuagu eda 'ewei 'imiega. 34 \* Ta 'esi ni'a oalamaniana ya'a taugu egu fewa nimaguyega agu 'abwaga be kulufa yalobedi. Ta wese agu toiulayavo 'eguma taha yani 'idiega ida kusa e 'inega yaiuledi. 35 Ba'e egu ilivu 'inega yave'itemi luaqiaqiemi be eda fewayavo 'idiega todawalili wese kana iuledi. Ta Kaiwabu Iesu ena vona ona nuave'avinia vonaya, "Ewa kavovo tomotau 'idiega 'ebeqaiawa goyona, ta 'esi nei kavovo tomotau 'idia 'ebeqaiawa qiduana.' "

36 Faulo ena vona ba'e lu'ovoia 'inega tuqatuqanega sobadi ta tovanugwetayavo maega ivenoqi Yaubada 'inaya. 37 Ta qabudi me edi dou ta wese me edi nuavita Faulo italafafea, 38 mana ni'a vonedi ge wese 'iawana ina 'ita 'eviviei. 'Inega itauyei waga 'inaya 'abo ivegeluya.

\* 20:17: Via 18:21 \* 20:18: Via 18:19-19:10 \* 20:23: Via 9:16; 21:11 \* 20:24: Via 21:13; 2Tim 4:7 \* 20:28: 1Tim 4:16; 1Fit 5:2-4 \* 20:29: Md 7:15; Ion 10:12 \* 20:31: 1Te 2:11 \* 20:33: 1Kol 9:11-12 \* 20:34: Via 18:3; 1Te 2:9



## 21

*Faulo tauya Ielusalema* 'inaya

<sup>1</sup> Ima'a Faulo maega 'ekalesia ana tovanugwetayavo alukafoiedi, 'inega agelu ta malavetega atauya vavava bwanabwana Kosa 'inaya ta alugu. Mahala vulihia 'inega agelu 'evivi atauya taha wese bwanabwana ana wawa Lodesi 'inaya alugu. Wese ahala 'eviviea 'inega Lodesi anogei ta avaukamana 'abaga Fatala 'inaya. <sup>2</sup> Ta Fatala 'inaya taha waga alobea navaukamana di'we Finisia 'inaya. E waga nana 'inaya agelu ta malavetega atautauya. <sup>3</sup> 'Inega bwanabwana Saifilosia ama kelias anogei ta avihila vavava atauya di'we Silia weaqina. 'Inega 'abaga Taia 'inaya alugu kulufa sabi talaiwaqidi wagega. <sup>4</sup> \* Ta omo'e 'inaya Ieisu ana to'abibodayavo alobedi ta maega atoatoa 'aubena seveni 'idewani. Ta to'abiboda dina Niboana Gwalagwalana 'inega Faulo ivenoqiea ge natauya Ielusalema 'inaya. <sup>5</sup> Ta 'aubena seveni dina ni'a igumwala. 'Inega a'evivi wagaya 'abo to'ekalesiyavo ma moqanediavo be natudiavo qabudi maega awebui 'abagega ta atauya balabalaya. Ta omo'e 'inaya tuqatuqamega asobadi avenoqi Yaubada 'inaya. <sup>6</sup> 'Inega ilukafoiema ta wese ima'a alukafoiedi ta 'inega agelu wagaya, ta taudi i'evivi itauya 'abagaya.

<sup>7</sup> 'Inega Taia anogei ta a'ifoqe alugu 'abaga Tolemasi 'inaya. 'Inega 'abaga ana to'abibodayavo alukaiwa 'idia, ta 'aubena 'aideganamo maega atoa. <sup>8</sup> \* Mahala ahalia 'inega Tolemasi anogei ta atauya 'abaga Sisalia 'inaya. Ta omo'e 'inaya atauya alugu Filifi ena vanuea ta maega atoa. Tauna Vale Aqiaqina ana toyawala, ta tauna toiula adi yau seveni 'idiega, lova tovaletuyanayavo ivenua'ivinidi 'abwaga ana vewila'a weaqina. <sup>9</sup> Ta Filifi natunavo vivivinedi adi yau foa kavona molamolabadi 'idewani itoatoa, ge ida vaqi. Ta 'esi taudi Yaubada ena vona ivetalasimasimana tomotau 'idia. <sup>10</sup> \* Nawale emavo maega atoatoa vaina 'aubena 'idia, 'inega taha 'oloto ana wawa Agabu 'ifoqe di'we Iudia 'inega. Tauna wese Yaubada ena tovesimasimana taha. <sup>11</sup> \* Ta Agabu mai 'imaya 'inega Faulo ana gadi'wana 'ewea ta taunega 'aqena be nimana yoqonidi 'inega vonedi vonaya, "Niboana Gwalagwalana vonaya, 'Nawale ba'e 'idewana me Diu Ielusalema 'inaya tonigadi'wana ina yoqonia ta ina ve'ineiea me Loma 'idia ta ina luvinea.'"

<sup>12</sup> Ta tuta nana ima'a ta wese vanue ana totoayavo ba'e vona nana anoqolia 'inega Faulo avenoqiea gebu natauya Ielusalema 'inaya. <sup>13</sup> \* Ta Faulo vonema vonaya, "Ge ona dou ta ge ona givenuavitegu. Ni'a ya'iva'ava'ata ta yahawafelegu ina yoqonigu Ielusalema 'inaya, ta wese 'aliga 'inaya yahawafelegu Kaiwabu Ieisu ana wawa weaqina."

<sup>14</sup> Ta ge ama fata ada awatayei 'inega alua'u ta avoneaya, "Tola'ai Kaiwabu nuanuana una viaqia, e tua uda viaqi!"

<sup>15</sup> 'Aubena vaina 'abibodanaya ema kulufayavo a'iva'ava'aidi ta atauya Ielusalema weaqina. <sup>16</sup> Ta vaina Ieisu ana to'abibodayavo Sisalia 'inega maega aveloba ta matama i'weabuya ta itauyema taha Saifilosia 'olotona ana wawa Nasoni ena vanuea. Tauna Ieisu ana to'abiboda taha nugwenugweina, 'abo maega atoatoa.

*Faulo* 'ifoqe Ielusalema 'inaya

<sup>17</sup> Ta ni'a a'ifoqe Ielusalema 'inaya, 'inega tovetumaqana qabudi me edi qaiawa i'ebe'ewema.

<sup>18</sup> Mahala ahalia 'inega Faulo maega atauya Iemesa ena vanuea sabi vawayasina, tauna 'ekalesia ana tovanugweta qiduana. Ta 'ekalesia ana tovanugwetayavo qabudi vanuea itoatoa alobedi. <sup>19</sup> \* Ta Faulo vona lukaiwa 'idia, 'inega yani qabuna weaqina vematamagilafuyedi Yaubada ena viaqayavo taudi ge me Diu 'idia ena fewa 'inega.

<sup>20</sup> \* Faulo ena vona inoqolia, 'inega Yaubada iawatuboya. 'Inega Faulo ivoneaya, "Iama, ni'au u'itedi me Diu 'idiega 'evisa tausani Ieisu ni'au ivetumaqanea! Ta wese ualamanias qabudi ni'a iawafela aqiaqiedi Mosese ena luvineavo 'idia. <sup>21</sup> Ta me Diu tovetumaqana ba'idia Ielusalema 'inaya maega atoatoa valeu inoqolia vonigo o'a taudi me Diu ta wese

\* 21:4: Via 20:23 \* 21:8: Via 6:5; 8:40 \* 21:10: Via 11:28 \* 21:11: Via 20:23; 21:33 \* 21:13: Via 20:24  
\* 21:19: Via 15:12 \* 21:20: Via 15:1,5

ge me Diu maega itoatoa ni'a uve'itedi Mosese ena luvine ina nogea. Ta wese ni'a inoqolia uve'itedi natudiavo me'olotodi 'wafidi ge ina da'ei ta 'esi tubudiavo edi ilivu ina nogea. <sup>22</sup> Ge tuta kuena 'inaya valeu ina noqolia vonigo o'a ni'a umai 'imaya ta ina nualuveifa 'iuya. 'Inega ma'oda kana viaqa 'aiqa? <sup>23</sup> \* Ta ema nuanua ba'e 'edewana kana viaqa: 'Oloto foa 'imega itoatoa, taudi lova ivona fofofola Yaubada 'inaya ina vetafe'wa waiwai tauna weaqina. 'Inega debadi ge ida da'ei. Ta vona fofofola nana ana tuta ni'au gumwala 'inega debadi ina da'a yavulea. <sup>24</sup> 'Inega 'oloto dina una 'ewedi ta taudi maega edi ilivu ona 'abibodei ta Yaubada matanaya ona givevunavunaqimi. Ta yani ba'e ana maisa weaqina una iuledi 'inega adi fata debadi ina da'ea. Ta ba'e 'inega tomotau qabudi ina alamania me Diu edi luvineavo u'abi'abibodedi ta wese ina alamania au 'awaluveifa ni'a inoqolidi ge vonahaqiaqi. <sup>25</sup> \* Ta lova ema nuanua 'aideganega taha leta ni'au avetunei taudi ge me Diu tovetumaqanayavo 'idia, ta ana noqola ba'e 'idewani:

"Abwaga vevegubana tokwalui 'idia ge ona 'aini. Yubai sulalidi ge ona gudatonovi. Ta yubai vei'odi ma sulalina ge ona 'aini. Ta wese ge ona velamo'eno kavokavovo." "

<sup>26</sup> \* Mahala ahalia 'inega Faulo 'oloto foa dina 'ebe'ewedi tauyedi ta taudi maega igivevunavunaqidi Yaubada matanaya. Ta 'abibodanaya tauya Vanue Gwalagwalana 'inaya toveguba 'idia sabi vematamagilafuyedi edi givevunavunaqa ana 'aubena vesevenina weaqina, mana 'aubena seveni 'idia ilivu nana iviaqia. Ta wese vonedi 'aubena nana 'inaya faibi dina ina 'evivi ta edi guba ina a'uya 'aidega 'aidega weaqidi.

#### *Faulo ikafia Vanue Gwalagwalana 'inaya*

<sup>27</sup> Ta edi 'aubena vesevenina tuta goyona nalu'ovoa. 'Inega vaina me Diu di'we Eisia 'inega Faulo i'itea Vanue Gwalagwalana 'inaya toatoa. Ta tomotau qabudi italavea'iedi ta me edi diavilavila Faulo ikafia. <sup>28</sup> 'Inega ikolukolua ta ivonaya, "Emavo me Isileli, oiulema! Mana ba'e 'oloto nana tuta qabuna tautauya di'we taha taha 'idia ta tomotau koyadi talaveavea'iedi ta veve'itedi ita'a eda luvineavo ge ina 'abibodei, ta wese vonedi vonigo Vanue Gwalagwalana yani kavokavovo. Ta wese mali tomotau taudi ge me Diu 'ebe'ewedi mimiedi Vanue Gwalagwalana gamonaya, ta ba'e 'inega eda Vanue Gwalagwalana igigivebwavuya." <sup>29</sup> \* Ta ba'e 'idewani ivona 'aiqa, mana 'aubena nana 'inaya Faulo be wese Efeso 'olotona taha imadu'itedi 'abagaya, ta 'oloto nana ana wawa Tilofimo tauna ge Diu 'olotona. Ta ivonaya be Faulo 'oloto nana da'ebe'ewei ta maega ida lugu Vanue Gwalagwalana gamonaya.

<sup>30</sup> Ta ba'e ve'ewa nana weaqina me Ielusalema qabudi ivetalamaqimaqi'ai. 'Inega ive'i-vivihila imai ta Faulo ikafia ilihii 'ifoqeyea Vanue Gwalagwalana 'inega ta lukwayavonega ana 'awayavo ia'ubodedi. <sup>31</sup> Ta tomotau qabudi tuta goyona Faulo ida luve'aligia. 'Inega taha me Loma toluavia edi tovatatana qiduana vale noqolia me Ielusalema qabudi diadi vilea be vetalamaqimaqi'ai qiduana ni'a 'ifoqe. <sup>32</sup> 'Inega lukwayavonega tovatatana nana vaina tovatatana goyogoyodi ta wese edi toluaviayavo maega ivihila iwebui tova'auta qabudi 'idia. Ta qabu dina Faulo ivunuqa veiveifea, ta tuta nana toluaviayavo i'itedi ilua'u. <sup>33</sup> 'Inega tovatatana nana mai Faulo di'wenaya ta toluavia diavona luvinedi be ina kafia. Ta wese vonedi seni magilafudi 'idiega ina yoqonia. 'Inega qabu diavona vetala'aiedi vonedia, "To'oloto ba'ena, ta ma'oda viaqa 'aiqa 'imia?" <sup>34</sup> Ta qabu diavona ivevelegulegu ta vona dumadumadi be dumadumadi ivonavonayedi 'inega tovatatana nana ge ana fata edi vona 'iuna danoqoli. 'Inega ena toluaviayavo vonedi Faulo ina kafia ina tauyeya edi balekia. <sup>35-36</sup> \* 'Inega Faulo itauyeya ta qabu diavona itala'obedi. Ta ni'a i'ifoqe edi balekia walianaya, 'inega toluavia Faulo isilagaia, mana tuta goyona qabu diavona ida vunuqa 'eviviea ta ivevekolukolua ivonaya, "Ei, kana luve'aligia, kana luve'aligia!"

#### *Faulo ena vona yo'o 'idia*

\* 21:23: Naba 6:1-20; Via 18:18    \* 21:25: Via 15:29    \* 21:26: 1Kol 9:20    \* 21:29: Via 20:4    \* 21:35-36: Lk 23:18

<sup>37</sup> Tuta goyona toluavia Faulo ina a'uluguyea balekia 'inega Faulo toluavia edi tova-matana qiduana voneaya, "Nage ana fata taha yani ena voneu?"

Ta tuta nana tovamatana nana Faulo noqolia me Guliki bonadiega veveqae 'inega yo'alia ta vonaya, "O'a kumadega vona Guliki ualamaniam! <sup>38</sup> \* Ta yavonaya be o'a Itifita 'olotona tauna ba'e goluanamo mai ta tokwava adi yau 4,000 talavea'iedi ta vanugwetedi 'inega me Loma maega ivedavi. Vedavi gumwala 'inega tauyedi 'abaga tomotau geqana 'inaya."

<sup>39</sup> Ta Faulo voneaya, "Ya'a ge tauna! Ya'a Diu 'olotogu ta egu 'abaga aqiaqi Tasisi di'we Silisia gamonaya, ta 'abaga nana 'abaga qiduana ta ya'a ana tomotau aqiaqi. Ta yanoqieuna awafelegu be ena veqae ba'e tomotau diavona 'idia?"

<sup>40</sup> 'Inega tovamatana Faulo awafelea. Ta Faulo walianaya tovololo ta nimana silagaia lutaqodi 'abo 'elovedi ta igenu'wana. 'Inega Faulo me Ibeliu bonadiega vonedi vonaya,

## 22

<sup>1</sup> "Taigwavo be tamagwavo, egu vata'ita'i emi ve'ewa 'iguya weaqina ona vineneqa."

<sup>2</sup> Ta tuta nana inoqolia bonadiega vonavona 'inega igenu'wana aqiaqi ta Faulo vonedi vonaya,

<sup>3</sup> \* "Ya'a Diu 'olotogu ta egu 'ebevi'oi 'abaga Tasisi di'we Silisia gamonaya. Ta yamai ba'e Ielusalema 'inaya yaveqidua ta wese yasikulu. Ta egu tove'ita ana wawa Gamelieli tubudavo edi luvineavo ve'ita aqiaqiegu. 'Inega yahawafela aqiaqiegu Yaubada 'inaya ta weaqina yavetofewa, 'idewani omi'a ba'itagana wese oviaviaqia. <sup>4</sup> \* Ta Ieisu ena 'Eda ana to'abibodayavo lova yavevoalanedi, ta vivine be 'oloto yakafidi yaha'uluguyedi vanue 'e-beyoqona 'inaya, ta wese vaina yaluve'aligidi. <sup>5</sup> Ta emi toveguba edi tovanugweta be emi kaniselayavo egu fewa ba'e ialamania, 'inega adi fata weaqigu ina simana aqiaqi 'imia. Mana taudi lova vaina leta ineigu toluvineavo me Diu edavo Damasiko 'inaya weaqidi. Ta luvine be waiwai ineigu 'inega yatauya be vonigo Ieisu ana tovetumaqanayavo eda kafidi eda yoqonidi Damasiko 'inaya, 'inega eda miedi Ielusalema 'inaya ta luvematasabu ida 'eweaa."

<sup>6</sup> Ta wese Faulo vonedi vonaya, "Ya'a nawale baba'auya yatautauya tuta goyona Damasiko ena 'ifoqe, ta 'inega simatala qiduana mahalega lukwayavoni 'iguya 'ifoqe ta diyayaigu. <sup>7</sup> 'Inega 'avalata'igu yabe'u bwa'obwa'oya ta bona taha yanoqolia voneguya, 'Saulo, Saulo, tola'ai weaqina uvevoalanegu?"

<sup>8</sup> "Inega yavetala'aiea yavonaya, 'Kaiwabu, isana o'a togama?"

"Ta voneguya, 'Ya'a Ieisu Nasaleta 'olotogu, ta ba'e taugu uvevevoalanegu.' <sup>9</sup> Ta agu mata'weabuyavo taudi wese simatala nana i'itea, ta tovana nana ena vona ana alamani ge ida 'ewei. <sup>10</sup> 'Inega yavoneaya, 'Kaiwabu, tola'ai ena viaqi?"

"Inega Kaiwabu voneguya, 'Uya'itoto, ta una tauya Damasiko 'inaya, ta omo'e 'inaya au veyoveyoa qabuna Yaubada 'inega una noqolia.' <sup>11</sup> Ta simatala nana ena waiwaiega matagu kwaya, ta gebu agu fata eda 'ita. 'Inega egwavo nimagu ikafia ta itauyegu Damasiko 'inaya.

<sup>12</sup> "Ta Damasiko 'inaya taha 'oloto ana wawa Ananaiasi toatoa, tauna Yaubada vetumaqana aqiaqiea, ta Mosese ena luvine ana to'abiboda. Ta me Diu qabudi Damasiko 'inaya itoatoa i'awahaqiaqiea. <sup>13</sup> 'Inega Ananaiasi mai ta di'weguya tovololo ta voneguya, 'Taigu Saulo, matau na'eaei ta una 'ita 'evivi.' Ta tutana 'inaya matagu 'eaea ta 'oloto nana ya'itea. <sup>14</sup> Ta wese vonegu vonaya, 'Tubudavo edi Yaubada vena'ivineu be ena nuanua una alamania, ta Ieisu Tunutunuqina Yaubada matanaya una 'itea ta ena vona una noqolia. <sup>15</sup> Ta tola'ai ni'a u'itei ta unoqolia tauna weaqina e tomotau qabudi 'idia una simana 'ifoqeyea. <sup>16</sup> 'Inega ge una ba'eba'e ta 'esi una ya'itoto ta ana wawa 'inaya una gaba vane, ta una babitaiso ta 'inega eu ilivu luveifana na'utu yavuledi."

<sup>17</sup> "Ta 'abiboda ya'evivi Ielusalema 'inaya. 'Inega Vanue Gwalagwalana 'inaya yavevenoqi ta kavona ve'wayoqa 'ifoqe 'iguya. <sup>18</sup> \* 'Inega Kaiwabu ya'itea von-

\* 21:38: Via 5:36-37 \* 22:3: Via 5:34 \* 22:4: Via 8:3 \* 22:18: Via 9:29-30

avona 'iguya vonaya, 'Uya'itoto ulukwayavoni Ielusalema unogei ta una tauya, mana 'abaga nana ana totoayavo eu simana weaqigu ina noqolia, ta ge ina vetumaqanei.' 19 \*

"Ta yavoneaya, 'Kaiwabu, ni'a ialamanigu lova edi vanue tafwalolo 'idia yalugu ta au tovetumaqanayavo yakafidi ta yavunuqidi 'inega vanue 'ebeyoqona 'inaya yaha'uluguyedi. 20 \* Ta wese ni'a ialamania tuta nana au tosimana Sitibeni iluve'aligia ya'a di'wenaya yatovolo ta tola'ai iviaqia ya'a wese ya'awahaqiaqiea. Ta ana toluve'aliga adi kaleko i'evata'idi ta ya'itamakidi tuta nana daboyega iluve'aligia."

21 \* "Ta Kaiwabu voneguya, 'Utauya, yavevetuneu luluvaia taudi ge me Diu 'idia.' "

*Faulo toluaviayavo vonedi tauna Loma 'olotona*

22 Ta qabu diavona Faulo ena vona qabuna ni'a inoqola aqiaqiea. Ta tuta nana ve'ale vonavona taudi ge me Diu weaqidi 'inega ive'ale bonadi qiduanega ivekolukolua ivonaya, "Olototo ba'ena kana luve'aligia, tauna ge daluaqiaqiea be bwa'obwa'oya mayawaina natoa!"

23 Ta 'idewani ikolukolua 'aiqa, ta adi kaleko ivata'idi ta wese nu'wa ilutevala vaneyedi. 24 'Inega toluavia edi tovatatana qiduana luvinedi Faulo ina a'uluguyea edi baleki gamonaya ta wayo metametanega ina vunuqa dadanea ta ina vetala'aiea, e 'inega nasimana 'ifoqe tola'ai luveifana ni'a viaqia. Mana tovatatana nana nuanuana nahalamania tola'ai weaqina ba'e 'idewani ikolukolua 'aiqa Faulo 'inaya.

25 \* Ni'a i'iva'ava'ata Faulo sabi vunuqa dadanina, ta taha tovatatana goyona di'wenaya tovtovolo 'inega Faulo voneaya, "Nage ana fata taha Loma 'olotona 'idewana ya'a ona vunuqigu ta ge oda vekotu nugwetegu be agu 'ebeve'ewa oda lobei?"

26 Ta tuta nana Faulo ena vona noqolia 'inega tauya edi tovatatana qiduana 'inaya vematamagilafuyea Faulo ena vona weaqina ta 'inega vonaya, "Tola'ai una viaqi 'oloto ba'e 'inaya? Tauna Loma 'olotona."

27 'Inega tovatatana qiduana tauya Faulo 'inaya ta vetala'aiea vonaya, "Una vona aqiaqiegu, o'a Loma 'olotou, nage gebu?"

Ta Faulo voneaya, "Ao, ya'a Loma 'olotogu."

28 'Inega tovatatana nana voneaya, "Ya'a wese Loma 'olotogu, ta nugweta mane qiduana Loma ana toluvine yaneidi ta 'abiboda iawafelegu ya'a Loma ana tomotau."

'Inega Faulo ve'iea vonaya, "Ya'a tamagu be inagu Loma ana tomotau, 'inega wese ya'a yavi'oi Loma 'olotogu 'idewani."

29 \* Ta toluavia diavona nawale iba'eba'e Faulo sabi vunuqa dadanena, ta tuta nana ena vona inoqolia vonigo tauna Loma 'olotona e 'inega idena kwayavona. Ta wese edi tovatatana qiduana mwaniniva qiduana, mana Faulo Loma 'olotona ta ena toluaviayavo ni'a luvinedi ta nimana iyoqonidi seniyega ta wese luvinedi ina vunuqa dadanea, ta ba'e 'inega tovatatana nana me Loma edi luvine ni'a bwegea.

*Faulo tovtovolo kanisela 'ena'ena'idi matadia*

30 Mahala vulihia 'inega toluavia edi tovatatana qiduana nuanuana nahalamani aqiaqiea tola'ai weaqina me Diu Faulo ive'ewei. 'Inega toveguba qiduqiduadi ta wese kaniselayavo luvinedi ina va'auta. 'Inega seni li'amia Faulo nimanega ta tauyega kanisela edi 'ebeva'auta 'inaya ta 'iawadia vetovolya.

## 23

1 'Inega Faulo 'ita naqo me Diu edi kaniselayavo 'idia ta vonedi vonaya, "Taigwavo, lova be ana laba ba'itagana agu lutonova Yaubada matanaya aqiaqina, mana tuta qabuna egu ilivu tunutunuqina." 2 \* 'Inega toveguba edi tovanugweta ana wawa Ananaiaasi taudi Faulo di'wenaya itovotovolo luvetunedi nimadiega Faulo 'awanaya ina vunuqa. 3 \* 'Inega Faulo voneaya, "O'a wese Yaubada navunuqiu, mana o'a au 'ita aqiaqina, ta gamouya eu

\* 22:19: Via 8:3; 26:9-11 \* 22:20: Via 8:1 \* 22:21: Via 9:15 \* 22:25: Via 16:37 \* 22:29: Via 16:38  
\* 23:2: Ion 18:22-23 \* 23:3: Md 23:27

nuanua luveifana. Vonigo bena'e 'inaya utoabui be Mosese ena luvineyega una luvinegu. Ta yavonahaqiaqieu luvine nana ni'a ubwegea, mana tawa uvonedi ina vunuuqigu."

<sup>4</sup> Ta taudi Faulo di'wenaya itovotovolo iawatayea ivoneaya, "Ma'oda o'a Yaubada ena toveguba edi tovanugweta 'inaya uvonavona luveifa, waisa?"

<sup>5\*</sup> 'Inega Faulo wese vonedi vonaya, "Egwavo, soli qiduana, mana ya'a ge eda alamania vonigo tauna toveguba edi tovanugweta. Vonahaqiaqi, Buki Nugwenugweina ena simana 'idewani vonaya, 'Emi toluline qiduana ge ona 'awaluveifei.' "

<sup>6\*</sup> Ta Faulo ni'a 'itedi me Diu edi kaniselayavo 'idiega vaina Sadusiavo ta wese vaina Falisiavo itoatoa, 'inega gabedi vonaya, "Taigwavo, ya'a wese taha Falisi, mana tamagu wese Falisi adi yo'o 'inega. Ta egu tovolu omi'a matamia 'iuna, mana yalulu'ita vane to'aliga edi ya'itoto 'evivi 'aligege weaqina."

<sup>7</sup> Ta Faulo ena vona ba'e weaqina Falisiavo be Sadusiavo ive'ae'aetoga 'inega vetoa-toasi'i 'ifoqe nuanidia. <sup>8\*</sup> Mana Sadusiavo ivonaya vonigo to'aliga ge ana fata ina ya'itoto 'evivi. Ta wese ivonaya be Yaubada ena tovale'ewayavo be niboniboana ge ida toatoa. Ta 'esi Falisiavo ivetumaqana aqiaqi nawale to'aliga ina ya'itoto 'evivi ta wese ivetumaqana tovale'ewa be niboana itoatoa. <sup>9</sup> Ta velegulegu qiduana 'ifoqe 'inega vaina Falisi luvine ana tove'itayavo me edi nualuveifa itovolo ta ive'ae'aetoga waiwai ivonaya, "Oloto ba'e ge taha ena luveifana ada 'ita lobei. Ana 'ita Yaubada ena tovale'ewa taha nage niboana taha ena vona neia."

<sup>10</sup> Ta ve'ae'aetoga nana veqidua va'ine qabu magilafudina nuanidia, 'inega toluavia edi tovatatana qiduana mwaniniva vonigo nawale Faulo 'wafina ina velihiea ta ina 'esiwagewagea. 'Inega ena toluaviayavo luvinedi be 'i'imega Faulo ina 'ewea kanisela diavona 'idiega ta ina tauyega edi balekia.

<sup>11\*</sup> Ta velovelovanaya Kaiwabu mai Faulo di'wenaya tovolu ta voneaya, "Faulo, giwaliu nafatu! Ni'au Valegu Ielusalem ana totoayavo 'idia usimanea, ta nawale wese 'idewanina Vale Aqiaqina 'abaga qiduana Loma ana tomotauyavo 'idia una lugaihiea."

*Me Diu idima govaqa Faulo ana luve'aliga weaqina*

<sup>12</sup> Mahala vulihia 'inega me Diu iva'auta ta idima govaqa ma'oda Faulo ina luve'aliga 'aiqi. 'Inega ma ediavo ivona fofofola ivonaya, "Tamada, nawale ge kana 'ai be wese ge kana numa ana laba Faulo kana luve'aligia!" <sup>13</sup> Ta todima govaqa dina adi yau 40 ta wese vaina ediavo maega. <sup>14</sup> 'Inega itauya toveguba qiduquadi be wese 'abaga ana tovanugwetayavo 'idia ta ivonedia, "Ima'a ni'a avona fofofola ta wese a'awatamatamana ge taha 'abwaga ana gudatonovi ana laba Faulo ana luve'aligia. <sup>15\*</sup> 'Inega nuanuama omi'a be kaniselayavo maega vale ona vetunei toluavia edi tovatatana qiduana 'inaya ta ona u'avea be Faulo na'ebe'ewei namiea 'imia kotu weaqina, mana nuanuami wese Faulo ena luveifana ona sali aqiaqiea. Ta ima'a ana 'iva'ava'ata, ta tuta nana 'edayu toluaviayavo Faulo maega imaimai, e 'inega ana kafia ana luve'aligia."

<sup>16</sup> Ta Faulo oqana me Diu edi dima govaqa valena noqolia, 'inega tauya toluaviayavo edi balekia lugu, ta Faulo 'inaya edi dima govaqa weaqina vemamatamagilafuyea. <sup>17</sup> 'Inega Faulo toluavia edi tovatatana goyona taha gabea voneaya, "Kilakai ba'e una tauyega toluaviayavo emi tovatatana qiduana 'inaya ta ena nuanua nasimanea 'inaya."

<sup>18</sup> 'Inega tovatatana nana Faulo oqana 'ebe'ewei tauyega ena tovatatana qiduana 'inaya ta voneaya, "Faulo yoqoyoqonina luvetunegu ta venoqiegu kilakai ba'e yamiea 'iuya nuanuana taha yani weaqina navoneu."

<sup>19</sup> 'Inega tovatatana qiduana Faulo oqana nimanaya kafia 'ebe'ewei maega tufwana ivanaqo adi 'aidega ta 'inega vetala'aiea voneaya, "Tola'ai eu nuanua e una simana 'iguya."

<sup>20</sup> 'Inega kilakai nana voneaya, "Me Diu vaina idima govaqa ina venoqiegu be 'ibe Faulo una 'ebe'ewei una miea me Diu edi kaniselayavo edi tova'auta 'inaya nuanuadi Faulo ena

\* 23:5: 'Ifo 22:28 \* 23:6: Via 26:5 \* 23:8: Md 22:23 \* 23:11: Via 27:24; 28:16,23 \* 23:15: Via 25:3

luveifana ina sali aqiaqiea. Ta ba'e edi u'ava qiduana. <sup>21</sup> 'Inega edi venoqi 'iuya ge una viaqi, mana me Diu adi yau 40 ta wese vaina maega 'edaya ina oukwaiva ta ina ba'eba'e Faulo ina kafia ina luve'aligia. Edi vona fofofola be wese edi 'awatamatamana 'eno' enova vonigo 'abwaga be go'ila ge ina gudatonovi ana laba Faulo ina luve'aligia. Taudi ni'a ibodaboda, ta 'eguma edi venoqi una 'awahaqiaqiea e yani nana nawale na'ifoqe."

<sup>22</sup> 'Inega tovatatana qiduana Faulo oqana luvine neia voneaya, "Kaiwa, o'a una tauya ta tola'ai ni'a usimana 'ifoqeyea 'iguya weaqina ge taha toga una vonei." 'Inega luvetunea 'abo 'ifoqe tauya.

*Faulo itauyea Sisalia* 'inaya sabi vekotuna

<sup>23</sup> 'Inega toluavia edi tovatatana qiduana tovatatana goyogoyodi magilafudi gabedi 'inega luvine neidi vonedia, "Ba'e 'itaga lavilavi 'inaya toluavia adi yau 200, ta wese toluavia me edi osi adi yau 70 ta wese to' avala gita 200 ona 'iva'ava'aidi, be velovelovana 9 koloki 'idewani ona tutuvila be Faulo ona tauyea 'abaga Sisalia 'inaya. <sup>24</sup> Ta wese vaina osi Faulo weaqina ona 'iva'ava'aidi 'inega nagelu ta ona 'itamaki aqiaqiea ona tauyea gavana Feliki 'inaya." <sup>25</sup> 'Inega tovatatana qiduana taha leta 'wayavia Feliki 'inaya, ta ana noqola ba'e 'idewana,

<sup>26</sup> "O'a kaiwabu agou gavana Feliki, me egu 'amayaba yalulukaiwa 'iuya.

<sup>27</sup> \* 'Oloto ba'e me Diu ivevoalanea 'inega ikafia nuanuadi ina luve'aligia. Ta valena yanoqolia tauna Loma 'olotona, 'inega egu toluaviayavo maega atauya ayavua nimadiega. <sup>28</sup> \* Ta nuanuagu me Diu edi ve'ewa 'iuna eda alamania, e 'inega ni'au yatauea edi kaniselayavo matadia edi vanue 'ebetoava'auta 'inaya sabi vetala'aina. <sup>29</sup> Ta edi ve'ewa 'iuna yanoqolia yani kavokavovo weaqina, taudi me Diu edi ilivu be edi luvine vaina weaqina. Ta edi ve'ewa 'inega ge ana luaqiaqi be ina luve'aligi nage ina a'uluguyei vanue 'ebeyoqona 'inaya. <sup>30</sup> \* Ta wese me Diu edi dima govaqa ni'a yanoqolia nuanuadi 'oloto nana ina luve'aligia. 'Inega lukwayavonega yaluvetunei waiwai 'iuya. Ta ana tove'ewayavo yavonedi ina 'iteu ta edi ve'ewa 'oloto nana weaqina ina simana 'ifoqeyea matauya.

Ba'e egu vona ana fata. Ya'a Kolodiasi Lisiasi."

<sup>31</sup> Toluaviayavo edi tovatatana qiduana ena luvine imatayagea. 'Inega velovelovanaya Faulo i'ebe'ewei itauyea 'abaga Anitifatili 'inaya. <sup>32</sup> Mahala vulihia 'inega toluavia diavona 'aqediega itauya, e taudina i'evivi mai edi balekia Ielusalema 'inaya. Ta osi ana togeluyavo 70 dina ge ida 'evivi, ta 'esi Faulo maega itauya Sisalia 'inaya. <sup>33</sup> 'Inega togelu osi i'ifoqe ilugu Sisalia 'inaya. Ta Faulo itauyea gavana Feliki 'inaya, ta wese ena leta ineia. <sup>34</sup> 'Inega Feliki leta nana avoi gumwala 'abo Faulo vetala'aiea vonaya, "O'a todi'we 'inega?"

Ta Faulo ve'iea vonaya, "Ya'a di'we Silisia 'inega yamai."

<sup>35</sup> 'Inega Feliki voneaya, "Au tove'ewayavo kana ba'eba'eyedi ina maiona emi kotu kana viaqia." 'Inega toluaviayavo luvinedi kini Elodi ena 'abaga kaikaiwabuna Faulo ina a'uluguyea gamonaya, ta ina 'itamaki aqiaqiea.

## 24

*Faulo ive'ewea gavana Feliki matanaya*

<sup>1</sup> Ta 'aubena faibi 'abibodanaya toveguba edi tovanugweta ana wawa Ananiasia vaina 'abaga ana tovanugwetayavo ta wese taha 'oloto luvine ana toalamani qiduana ana wawa Tetulusi maega iwebui mai 'abaga Sisalia 'inaya. Ta qabudi gavana Feliki matanaya itovolo edi ve'ewa Faulo weaqina sabi simanina. <sup>2</sup> Tuta nana Faulo igabei mai 'inega Tetulusi tovolu ta Faulo ve'ewea gavana Feliki matanaya ta voneaya,

\* 23:27: Via 21:30-33; 22:25-27 \* 23:28: Via 22:30 \* 23:30: Via 24:1-9

“Kaiwa gavana Feliki, ima’a aqaiawa qiduana mana o’a eu luvine aqiaqina ’inega yani qabuna itunuqa ima’a me Diu ema di’we ba’e gamonaya, ’inega tuta kuena atoadaumwala. <sup>3</sup> Ta yani ba’e weaqina tuta qabuna alulukaiwa qiduana ta wese mali di’we ’idia me edi qaiawa. ’Inega alulukaiwa qiduana yani qabuna weaqidi. <sup>4</sup> Ge nuagu vona ena givекuei ta yavenoqi ’iuya una nuakolokoloyema ta ema vona kukusana una noqolia. <sup>5</sup>\* ’Oloto ba’e a’ita lobe’a ’oloto luveifa otaqina ta di’we ’aidega ’aidega ’idia ima’a me Diu talaveavea’iema be vevedia vilevilema ena vona ’inega. Ta wese leisu ana tovetumaqanayavo adi yo’o igabedi qabu Nasaleta tauna adi tovanugweta. <sup>6</sup>\* Ta wese nuanuana ema Vanue Gwalagwalana dagivebwavuya ’inega akafia ta taumega ada luvineyea. <sup>7</sup> Ta toluavia edi tovamatana qiduana Lisiasi mai nimamega Faulo ’ewea, ta ’inega vonema Faulo ana tove’ewayavo ana mai ’iuya sabi vekotuna. <sup>8</sup> ’Inega tau’uyega una vetala’aiea, ta nawale ena vona ’inega una alamania tola’ai weaqina ave’ewei ta akafia.”

<sup>9</sup> ’Inega wese totoa va’auta taudi me Diu qabudi vona ba’e i’awahaqiaqiea.

*Faulo taunega vata’ita’iea gavana Feliki matanaya*

<sup>10</sup> ’Inega Feliki nimanega Faulo luvetunei navona, ’inega tovolu ta vonea vonaya,

“Gavana, ni’a yahalamania o’a di’we ba’e ya’wala ’eala uluviluvinea. ’Inega me egu qaiawa agu ve’ewa weaqina ena simana ’iuya. <sup>11</sup> ’Eguma tomotau ba’e una vetala’aiedi ina simana ’iuya vonigo ’aubena tuwelo gumwala ya’watovu Ielusalema ’inaya sabi lutafwalolo. <sup>12</sup> Ta ge wese ida ’itegu tomotau maega Vanue Gwalagwalana gamonaya ada ve’ae’aetoga. Ta ge wese vanue tafwalolo ’idia nage ’abaga Ielusalema gamonaya tomotau eda talavea’iedi. <sup>13</sup> Ta ba’e tomotau diavona ge adi fata otaqa edi ve’ewayavo ’iguya ana aqiaqi ina simana ’ifoqeyei ’iuya, mana u’avega ivonavona. <sup>14</sup> Ta ’esi vona ’aideganamo ’idiega ya’awahaqiaqiea, mana leisu ena ’eda ya’abi’abibodea. Ta ’eda nana weaqina ia’usi’iegu ta inogegu, mana ima’a leisu ana to’abibodayavo i’awaluveifema ta ivonema qabu luveifama. Ta ya’a tubudavo edi Yaubada ’inaya yaiwaiwa’odu ta wese Mosese ena luvineavo be tovesimasimanayavo edi ’wayavi qabuna yavevetumaqanedi. <sup>15</sup>\* Ta wese yavetumaqana nawale Yaubada to’aliga qabudi nagiveya’itoto ’eviviedi, taudi tunutunuqidi be wese toluveifadi maega. Ta ba’e agu tove’ewayavo edi vetumaqana wese ’edewana. <sup>16</sup> Ba’e weaqina tuta qabuna agu lutionova aqiaqina Yaubada be tomotau matadia, mana ge taha wese luveifana eda viaqia.

<sup>17</sup> “Lova ya’wala ’eala ’idia Ielusalema yanogea, ’inega ya’evivi yamai ’abagaya ta nei kavovo yamiedi egu tomotauyavo weaqidi ta wese yamai sabi veguba Yaubada ’inaya. <sup>18</sup>\* ’Inega nugweta taugu yagivevunavunaqigu Yaubada matanaya ta ’inega guba yaviaqia ’inaya Vanue Gwalagwalana gamonaya. Ta agu tove’ewayavo i’itegu ya’a ge taha qabu maega ada lugu, ta wese ge taha talavea’i da’ifoqe ’iguyega. <sup>19</sup> Ta vaina me Diu di’we Eisia ana tomotauyavo i’itegu, ’inega luaqiaqiea ’eguma taudi matauya ida tovolu be ida ve’ewegu. Ta taudi ge taha yani weaqina adi fata be ida ve’ewegu, ’inega ge ida mai. <sup>20</sup> Ta ’esi ba’e tomai diavona luaqiaqiedi be tola’ai egu luveifana i’ita lobe’a tuta nana me Diu edi kaniselayavo matadia ivetala’aiegu ida simanei ’iuya. <sup>21</sup>\* Ta tuta nana matadia yatovololu ’inega taha vona ya’inanea ta vonana weaqina ive’ewegu. Ta egu vona ba’e ’idewana yavonaya, ‘Ba’e ’itaga yatovotovololu matamia vetala’ai weaqina mana yavetumaqana nawale to’aliga ina ya’itoto ’evivi ’aligega.’”

<sup>22</sup>\* Faulo ena vona lu’ovoa, ta Feliki ni’a alamani aqiaqiea leisu ena ’eda ana to’abibodayavo edi ilivu be wese edi vetumaqana weaqina. ’Inega va’auta ba’e a’uvilea mali tuta weaqina, ta me Diu vonedi vonaya, “Toluavia edi tovamatana qiduana ana wawa Lisiasi kana ba’eyea namai, e ’inega Faulo weaqina ena venuanua ’eguma tunutunuqina nage gebu.”

\* 24:5: Via 17:6 \* 24:6: Via 21:28-30 \* 24:15: Ion 5:28-29 \* 24:18: Via 21:17-28 \* 24:21: Via 23:6  
\* 24:22: Via 23:26

<sup>23</sup> 'Inega Feliki toluavia edi tovatatana goyona voneaya, "Oloto ba'e ona 'eviviea ta ona 'itamaki aqiaqiea ta ge luvine vitana una neia. Ta 'eguma enavo nuanuadi ina mai sabi iulana ge una awatayedi."

*Faulo vonavona gavana Feliki ma moqanena 'idia*

<sup>24</sup> Ta vaina 'aubena 'abibodanaya gavana Feliki ma moqanena imai Faulo ena vona sabi noqolina. Ta moqanena adi wawa Dalusila, taudi Diu vavinedi. 'Inega Feliki taha tomotau vetunei tauya Faulo sabi 'ebe'ewana, 'inega mai ta vetumaqana Iesu Keliso 'inaya weaqina simana gavana ma moqanena 'idia. <sup>25</sup> Ta tuta nana Faulo lugaihidi ilivu tunutunuqina weaqina be ma'oda 'inega tomotau taudiega edi ilivu ina 'itamaki 'aiqei weaqina ta wese Yaubada ena vekotu tomotau qabudi 'idia weaqina, e 'inega Feliki giwalina a'ala qiduana ta voneaya, "Ta'iwa, utovolo utauya! Ta 'eguma nawale tuta aqiaqina ena lobe e 'inega wese ena gabeu." <sup>26</sup> Ta Feliki lu'ita vane vonigo mane na'ewea Faulo 'inega 'eguma nayavua ta naha'u'ifoqeyea. E 'inega tuta qabuna Faulo gabea ta maega iveveqae.

<sup>27</sup> Ta ya'wala magilafuna gumwala e 'inega Feliki webui ena fewega ta mali 'oloto ana wawa Fokiasi Fesito vetoluvine gavana 'idewani. Ta Feliki nuanuana me Diu nagiveqaiawedi, 'inega luvine a'uya Faulo nawale yoqoyoqonina natoatoa.

## 25

*Faulo tovtovolo gavana Fesito matanaya*

<sup>1</sup> Fesito ni'a mai vegavana 'abaga Sisalia 'inaya. Ta 'aubena toi 'abibodanaya 'watovu Ielusalema 'inaya. <sup>2</sup> \* Ta omo'e 'inaya toveguba qidududuadi ta wese me Diu edi tovanugwetayavo agoagodi edi ve'ewa Faulo weaqina isimana 'ifoqeyea Fesito 'inaya. <sup>3</sup> \* 'Inega Fesito inoqiea 'eguma ana fata Faulo naluvetunei na'evivi Ielusalema 'inaya. Ta ba'e 'idewani ivona 'aiqea, mana ni'a idima govaqa vonigo nawale Faulo 'edaya ina kafia ta ina luve'aligia. <sup>4</sup> Ta Fesito vona 'eviviedi vonaya, "Gebu, Faulo nawale Sisalia 'inaya natoa ta ina 'itamaki aqiaqiea, ta ya'a wese nawale ena 'evivi ena tauya 'abaga nana 'inaya! <sup>5</sup> Ta 'eguma nuanuami e 'inega omi'a tovanugweta qidududuami maega kana webui Sisalia 'inaya. Ta omode emi ve'ewa Faulo ena luveifana weaqina ona simana mataguya."

<sup>6</sup> Ta Fesito 'aubena 'eita (8) nage teni 'idia nawale Ielusalema 'inaya toatoa, ta 'abibodanaya 'evivi tauya Sisalia 'inaya. Mahala vulihia 'inega Fesito vanue 'ebevekotu ana 'ebetoa 'inaya toabui, ta Faulo imiea vetala'ai weaqina. <sup>7</sup> \* Ta tuta nana Faulo lugu ena vetala'ai weaqina, 'inega taudi me Diu Ielusalemega imai Faulo itovolo vivilia, ta edi ve'ewayavo isimantedi. Ta ge adi fata ve'ewa diavona adi aqiaqi ina simana 'ifoqeaqiea, mana ve'ewa qabudi ge taha adi 'awahaqiaqimo. <sup>8</sup> 'Inega Faulo edi ve'ewayavo vegeqedi ta vonaya, "Ya'a ge taha luvine eda bwegei, gebu me Diu edi luvine nage Vanue Gwalagwalana ana luvine nage Sisa ena luvine."

<sup>9</sup> Ta Fesito nuanuana me Diu nagiveqaiawedi 'inega Faulo vetala'aiea voneaya, "Nage nuanuau una tauya Ielusalema 'inaya, ta omo'e 'inaya una tovolu mataguya ta au ve'ewayavo ba'e weaqidi eu vetala'ai kana viaqia?"

<sup>10</sup> Ta Faulo vona 'eviviea voneaya, "Gebu, ni'au yatovotovolo me Loma edi vetala'ai 'inaya, 'inega tola'ai weaqina vetala'ai taha wese kana viaqi? Ni'a ualamaniaman aqiaqiea ya'a ge taha egu luveifana me Diu 'idia. <sup>11</sup> Vonahaqiaqi, 'eguma luvine taha eda qeunia luaqiaqiegu be eda 'aliga, e 'inega 'aliga 'inaya yahawafelegu. Ta 'eguma ge taha egu luveifana una lobei edi ve'ewa 'idiega, 'inega ge daluaqiaqiea be una ve'ineiegu me Diu 'idia. E 'inega Sisa matanaya nuanuagu ena tovolu vetala'ai weaqina."

<sup>12</sup> 'Inega Fesito webui ta enavo taudi kotu ana toalamani maega iveqae, 'inega 'evivi lugu ta ve'iea vonaya, "Aqiaqina, 'eguma nuanuau Sisa 'inaya una tovolu vetala'ai weaqina, e 'inega Sisa 'inaya ena vetuneu!"

\* 25:2: Via 24:1 \* 25:3: Via 23:15 \* 25:7: Via 24:5-6



*Gavana Fesito simana kini Akalifa* 'inaya Faulo weaqina

<sup>13</sup> Ta 'aubena vaina 'abibodanaya kini Akalifa novuna Belisi maega i'ifoqe 'abaga Sisalia 'inaya gavana Fesito sabi vayausina. <sup>14</sup>\* Ta tufwana tuta kuena magilafudi itoatoa Sisalia 'inaya, ta 'inega Fesito simana kini Akalifa 'inaya Faulo ana ve'ewayavo weaqina voneaya, "Taha 'oloto ana wawa Faulo nawale vanue 'ebeyoqona gamonaya toatoa tauna lova Feliki a'uluguyea. <sup>15</sup> Lova yatauya Ielusalema 'inaya, 'inega toveguba qiduquduadi ta wese me Diu edi 'abaga ana tovanugwetayavo maega 'oloto nana ana 'ebeve'ewayavo isimanedi 'iguya. Ta nuanuadi eda luvinei be da'aliga. <sup>16</sup> Ta yavonedia, 'Ima'a me Loma ema ilivu ge 'idewana ada viaqia, ge ana fata taha tomotau yoqoyoqonina ana ve'ineiei ana tove'ewayavo 'idia. Ta 'esi nugweta vetala'ai ana viaqia, e 'inega taunega ana fata ana tove'ewayavo navegeqedi.' <sup>17</sup> Ta tuta nana Ielusalemega imai ba'idia vetala'ai weaqina 'inega lukwayavonega ya'iva'ava'ata. Mahala vulihia 'inega vanue 'ebevekotu ana 'ebetoa 'inaya yatoabui, ta toluaviayavo yaluvinedi Faulo ina lugu miea. <sup>18</sup> Ta ana tove'ewa diavona itovolo ta isimana, ta yavonaya be yani taha luveifa otaqina weaqina ida ve'ewei, ta gebu. <sup>19</sup> Ta 'esi taudi ivona edi tafwalolo ana luvine weaqina, ta wese taha 'oloto ana wawa Iesu lova 'aliga weaqina. Ta Faulo nana vonaya vonigo Iesu nana mayawaina toatoa. <sup>20</sup> Ta yavenuana magilafu ba'e yani nana weaqina ma'oda ena luvine 'aiqa. 'Inega Faulo yavetala'aiea 'eguma nuanuana natauya Ielusalema 'inaya vetala'ai weaqina mataguya, ta noga. <sup>21</sup> Ta 'esi noqiegu 'eguma ana fata ena kotu naviaqia Sisa matanaya. 'Inega yahawafela ta yaluvinei ina 'itamaki aqiaqiea natoatoa vanuea ana laba tuta aqiaqina ena lobe'a 'abo ena vetunea Sisa 'inaya."

<sup>22</sup> 'Inega kini Akalifa gavana Fesito 'inaya voneaya, "Ya'a wese nuanuagu Faulo ena vona ena noqolia!"

Ta Fesito voneaya, "E aqiaqina, 'ibe maega ona veqae."

*Faulo tovotovolo kini Akalifa* 'iawanaya

<sup>23</sup> Mahala vulihia 'inega kini Akalifa ma novuna Belisi imai ma adi 'ivala kaikaiwabuna ta ilugu vanue 'ebeva'auta qiduana 'inaya. Ta toluaviayavo edi tovatatana qiduquduadi be wese 'abaga ana kaiwabuyavo me edi 'amayaba idamwabodedi. 'Inega gavana Fesito toluavia luvinedi be Faulo ina miea. <sup>24</sup> 'Inega Fesito vonaya, "O'a kini Akalifa ta wese omi'a tova'auta qabumi, 'oloto ba'e ona 'itea! Tauna weaqina me Diu qabudi Ielusalema 'inaya ta wese taudi ba'idia itoatoa ikolukolua qiduana vonigo 'oloto nana ge daluaqiaqiea be mayawaina natoa. <sup>25</sup> Ta ya'a ge taha luveifana eda lobei be weaqina na'aliga. Ta tauna nuanuana Sisa matanaya natovolo vetala'ai weaqina. 'Inega yaluvine be ena vetunei Sisa 'inaya. <sup>26</sup> Ta ma'oda ena 'wayavi 'aiqa Sisa ena leta 'inaya? Mana 'oloto ba'e ge agu fata eda ve'ewei taha yani luveifana weaqina. Ba'e 'inega 'oloto nana yamiea o'a kini Akalifa matauya ta wese omi'a qabumi 'imia. Ta ena kotu 'abibodanaya nage ena luveifana taha kana lobe'a, be weaqina ena 'wayavia Sisa 'inaya. <sup>27</sup> Mana nawale Sisa nadagiegu 'eguma taha yoqoyoqonina ena vetunei 'inaya, ta ge agu fata ena simana aqiaqia ana ve'ewa 'iuna weaqina."

## 26

*Faulo taunega weaqina simana kini Akalifa matanaya*

<sup>1</sup> Gavana Fesito ena vona gumwala, 'inega kini Akalifa vona Faulo 'inaya vonaya, "Yahawafeleu be tau'u weaqiu una simana."

'Inega Faulo nimana silagaia ta ba'e 'idewana vonedi vonaya, <sup>2</sup> "Kini Akalifa, ba'itagana yaqaiawa agona mana o'a matauya yatovotovolo ta egu vegeqa me Diu edi ve'ewayavo 'iguya weaqina ena voneu, <sup>3</sup> mana ima'a me Diu ema ilivu be ema nuanua taha taha ni'au ualamani aqiaqiedi. 'Inegana yanoqieu be me eu bibitaqo egu vona ba'e una noqolia.

<sup>4</sup> "Egu tuta gwama 'inega ana laba ba'itagana me Diu qabudi egu ilivu ialahalamaniana egu di'we 'inaya. Ta wese tuta nana yamai Ielusalema 'inaya e 'inega ilivu diavona wese

\* 25:14: Via 24:27

ya'abiboda aqiaqiedi. <sup>5</sup>\* Tuta kuena 'inega ni'a ialamanigu ya'a wese taha Falisi ta edi qabu gamonaya yatoatoa, ta ya'a qabu Falisi ema luvineavo ya'amayabedi ta ya'abiboda aqiaqiedi. Ta 'eguma una vetala'aiedi taudi wese ana fata 'idewani ina simana 'ifoqe weaqigu. <sup>6</sup>\* Ta egu kotu ba'e 'iuna mana yalulu'ita vane Yaubada ena vona fofofola tubudavo 'idia weaqina. <sup>7</sup> Vonahaqiaqi, ba'e vona fofofola nana weaqina me Isileli ema gade tuwelo Yaubada 'inaya ilulu'ita vane velovelovana be 'aubena qabudi 'idia, mana taudi wese nuanuadi ana aqiaqi na'ifoqe ina 'ita aqiaqiea. Ta kini u'itei, ba'e lu'ita vane nana weaqina me Diu iveve'ewegu. <sup>8</sup> Ta omi'a tova'auta, tola'ai weaqina onuaia vonigo Yaubada ge ana fata to'aliga nagiveya'itoto 'eviviedi?

<sup>9</sup>\* "Vonahaqiaqi, ya'a lova egu nuania 'aidegana vonigo Ieisu Nasaleta 'olotona ana wawa ena givelua'uya. <sup>10</sup> 'Inega nuania nana yaviaqia, mana toveguba qiduiduadi luvine be waiwai ineigu, 'inega Ieisu ana to'abiboda 'eala Ielusalema 'inaya yakafidi ta vanue 'ebeyoqona 'inaya yaha'uluguyedi. Ta tuta nana luvine ilobe'a 'aliga weaqina, e 'inega ya'a wese ya'awahaqiaqiea. <sup>11</sup> Ta wese tuta qabuna tovetumaqanayavo vanue tafwalolo qabuna 'idia yafofololidi ta wese yavonedi vonigo Ieisu ana wawa ida 'awaluveifea ta ida vegeqea. Ta weaqidi diagu vilei, 'inega wese yatauya 'abaga taha taha 'idia ta yavevoalanedi.

<sup>12</sup> "Inega toveguba qiduiduadi luvine be waiwai ineigu ta yatauya 'abaga qiduaana Damasiko 'inaya sabi kafidi. <sup>13</sup> Ta kini unoqoli, baba'auya Damasiko ana 'edaya yatauyauya, 'inega simatala qiduaana mahalega 'ifoqe ya'itea. Ta ana 'ita ge baba'au 'idewani, ta 'esi simatala nana waiwai otaqina, ta agu mata 'weabuyavo maega diayaima. <sup>14</sup> 'Inega ma egwavo abe'u bwa'obwa'oya ta taha vona me Diu bonamega yanoqolia vonaya, 'Saulo, Saulo, tola'ai weaqina uvevevoalanegu? 'Eguma bena'e 'idewana uviaviaqa 'aiqa nawale tau'uyega una veilaqe.'

<sup>15</sup> "Ta yavoneaya, 'Kaiwabu, o'a togama?'

"Inega Kaiwabu nana voneguya, 'Ya'a Ieisu, ba'e taugu uvevevoalanegu. <sup>16</sup> Ta uya'itoto, mana ni'a yavenua'ivineu be weaqigu una vetofewa. 'Inega ba'itagana ni'a ya'ifoqe 'iuya ta yaluvineu be tola'ai ba'itagana ni'a u'itedi ta wese tola'ai nawale ena ve'iteu weaqidi una simana 'ifoqeyedi tomotau 'idia. <sup>17-18</sup>\* Ta yavevetuneu una tauya eu tomotauyavo me Diu be wese taudi ge me Diu 'idia. Ta matadi una giaei be velovelovana 'inega ina givila ta ina lugu simatala 'inaya, ta wese Seitani ena waiwai 'inega ina 'ifoqe ta ina mai Yaubada 'inaya. E 'inega Yaubada edi luveifayavo nanuataqodi ta 'inega ina lugu taudi ivevetumaqanegu edi qabu gamonaya, taudi lova Yaubada venuma'ivinedi. Ta taudi ina vevoalaneu, ta ya'a ena 'etoyavuuu nimadiega.'

<sup>19</sup> "Kini Akalifa, ba'e ve'ita nana mahalega ya'a ge eda nogei ta 'esi yani qabuna yamatamatayagea. <sup>20</sup> 'Inega nugweta me Damasiko yalugaihidi, ta 'abiboda me Ielusalema ta wese tomotau di'we Iudia 'abaganavo 'idia. Ta wese taudi ge me Diu yalugaihidi. Ta qabudi yasimana 'idia be ina nuagivila ta giwalidi ina awafelea Yaubada 'inaya. 'Inega tomotau edi ilivu tunutunuqina ina 'itedi ta ina 'awahaqiaqiedi vonigo ni'a inuagivila. <sup>21</sup> Egu fewa ba'e weaqina me Diu ikafigu Vanue Gwalagwalana gamonaya vonigo ida luve'aligigu. <sup>22</sup> Ta Yaubada tuta omo'e 'inega iulegu ta tuta ba'e 'inaya nawale wese iuiulegu. 'Inega Yaubada ena iula 'inega ba'itagana yatovotovolo tomotau kaikaiwabumi be tomotau kavokavovo qabumi matamia. Ta tola'ai ni'au ya'itea yasimasimanea 'imia, ta egu simana qabudi 'idewani Mosese be tovesimasimanayavo imaduvonayea ivonaya, <sup>23</sup>\* 'To'etoyavua nawale na'aliga ta tauna 'aligege namaduya'itoto 'evivi.' Ta wese ivonaya, 'To'etoyavua Keliso simatala namiea me Diu, ta wese taudi ge me Diu 'idia.' "

<sup>24</sup> Faulo nawale vonavona, 'inega Fesito bonana qiduanega sieqalia vonaya, "Faulo o'a kwavakwavau! Ana 'ita eu sikulu qiduaana 'inega ni'a ukwava."

\* 26:5: Fil 3:5-6 \* 26:6: Via 23:6; 28:20 \* 26:9: Via 8:3 \* 26:17-18: Ais 42:16; Efe 2:2; Kol 1:13 \* 26:23: Lk 24:44-47; 1Kol 15:20

<sup>25</sup> Ta Faulo voneaya, “Fesito, o’a toluvine qiduau, ya’a ge eda vekwavakwava. Ta tola’ai yavonavonayea yani qabuna vonahaqiaqi. <sup>26</sup> Ta yahalamania egu vonayavo qabudi weaqidi kini Akalifa ni’a alamania. ’Inega me egu giwalifatu yavonavona ’inaya, mana ni’a noqolia Iesu ena ’aliga be ena ya’itoto ’evivi weaqidi. Ta yani qabuna ni’a alamania, mana yani diavona ni’a i’ifoqe vunavunaqaya. <sup>27</sup> Kini Akalifa, nage tovesimasimana edi vona uvetumaqanea, waisa? Ta ni’au yahalamania o’a vona diavona uvetumaqanedi!”

<sup>28</sup> ’Inega Akalifa vona Faulo ’inaya vonaya, “Nage unuaia vonigo tuta kukusana ’inaya eu vona ’inega nuagu una givilea ta ena ve’ale vetumaqana Iesu ’inaya, waisa?”

<sup>29</sup> Ta Faulo ve’iea vonaya, “Nage tuta kukusana nage kuena, ta yavevenoqi Yaubada ’inaya o’a ta wese tomotau qabumi ’etoyavua ona lobeja ya’a ’idewani, ta ’esi ge nuanuagu seniega ina yoqonimi kavona ya’a ba’itagana yoqoyoqonigu yatoatoa.”

<sup>30</sup> Ta Faulo ena vona lu’ovoia, ’inega kini Akalifa be gavana Fesito be Belisi ta wese tomotau qabudi iya’itoto <sup>31</sup> i’ifoqe ta taudi iveveqae ivonaya, “Ba’e ’oloto nana ge daluaqiaqiei be na’aliga nage vanue ’ebeyoqona ’inaya natoatoa, mana ge taha luveifana daviaqi.”

<sup>32</sup> ’Inega Akalifa gavana Fesito voneaya, “Oloto ba’ena ’eguma lova ge danoqi ena kotu Sisa matanaya weaqina, e ’inega ba’itagana ana fata kada yavuia.”

## 27

*Faulo wagega tauya* ’abaga qiduana Loma weaqina

<sup>1</sup> Ta ni’au iluvine be ana tauya di’we Itali ’inaya, ta Faulo be wese vaina yoqoyoqonidi maega ive’ineiedi Sisa ena toluaviayavo edi tovamatana goyona ana wawa Diuliasi ’inaya. Tauna toluavia 100 adi tovamatana. <sup>2</sup> \* ’Inega taha waga ’abaga Adilamitiomi ’inega mai ta agelu, mana waga nana ’iba’igo naluvivila natauya di’we Eisia ’abaganavo ana ’awaboqe taha taha ’idia nalugu. Ta taha ’oloto ana wawa Alisitako maega atauya. Tauna ena ’abaga Tesalonaika di’we Masidonia. ’Inega naya ilih vaneyea ta atutuvila atauya.

<sup>3</sup> Ta mahala vulihia ’inega alugu ’abaga Saidoni ’inaya. Ta Diuliasi Faulo nukolokoloyea ’inega awafelea natauya enavo ’idia sabi vyausidi, ta taudi ena nuanua weaqina ihuilea. <sup>4</sup> Ta Saidonia atutuvila ’evivi malavetega atauya, ta gwavunega bwanabwana Saifilosia avihila lu’otanega mana yaqina qiduana tutu’iawema. <sup>5</sup> ’Inega di’we Silisia be Famifila malavetanega atauya vavava ta avaukamana ’abaga Maila ’inaya alugu, ta ’abaga nana di’we Lisia gamonaya. <sup>6</sup> Ta omo’e ’inaya toluaviayavo edi tovamatana taha waga di’we Itifita ’abaga Aleksanidela ’inega lobeja nawale natauya di’we Itali ’inaya. ’Inega ’ebe’ewema ’abo ’inaya agelu.

<sup>7</sup> Ta ’aubena ’eala ’idia ema vaukamana vitana, ta tuta goyona ’abaga Nidasi ana lugu ’inaya, ta ge ama fata mana yaqina tutu’iawema. ’Inega a’evivi atauya bwanabwana Kiliti lu’otanega ta ’abaga Salimone budonega atauya. <sup>8</sup> Ta Kiliti di’wenega atauya ta ema tauya vitana. ’Inega a’ifoqe alugu taha ’awaboqe ana wawa ’Awaboqe Aqiaqina ’inaya ’abaga Lasea di’wenaya.

<sup>9</sup> Ta tuta kuena omo’e ’inaya atoatoa, mana bolimana ana tuta ni’a ’ifoqe ’inega wese tuta omo’ena tuta ’ebeveilaqe. ’Inega Faulo vematamagilafuyedi vonedia, <sup>10</sup> “Kaiwabuyavo onoqoli! Luaqiaqiea be ba’e ’inaya kana toa ’awaboqea. Ta gebu kana vemanini ’adau weaqina, mana yanuaia nawale kana veilaqe ta waga be wese kulufa naluveifa nadamana, ta nage ita’a wese kana ’aliga.”

<sup>11</sup> Toluavia edi tovamatana Faulo ena vona noqolia, ta ge nuanuana na’abibodei. Ta ’esi toniwaga be kafiteni edi vona matayagea. <sup>12</sup> Ta ’awaboqe nana ge daluaqiaqiei yaqina ana tuta ’inaya waga weaqina. ’Inega waga ana tofewayavo ta wese togelu ’eala iluvine ana gelu ’evivi wagaya. Nuanuadi ana luvivila ana tauya ’abaga Finikisa ana ’awaboqe ’inaya, mana ’abaga nana lu’iawea yalasiega be yavalatayega ta ana ’awaboqe aqiaqina yaqina ana tutaya.

\* 27:2: Via 19:29

*Wedilia ilobea mwade'waya*

<sup>13</sup> Nawale 'awaboqe nana 'inaya atoatoa, 'inega yaqina ve'ale bolimanega ta waga ana tofewayavo iveveqae nuanuadi ana tauya Kiliti 'inaya. 'Inega lomu ilih vaneyea ta dabalega avihila atauya. <sup>14</sup> Ta ge tuta kuena 'abibodanaya bwanabwanayega yaqina qidua va'inena toa webui mai baba'au ena 'ebeyayaqa kelinega. <sup>15</sup> 'Inega ge ama fata waga ana givilei mana yaqina qiduana 'au'iwema ta taunega 'aluema, 'inega fewa alua'u mana ge taha tola'ai ama fata ana viaqia. <sup>16</sup> 'Inega taha bwanabwana goyosikwana ana wawa Koda lu'otanega atauya. Ta omo'e 'inaya waga ana dinige alihi vaneyea waga debanaya ta ayoqona aqiaqiea. Ta fewa ba'e vita otaqina. <sup>17</sup> 'Inega wayo a'ewedi ta waga agona wayoyega afainia ta a'esive'alaia be yaqisa waga nana ge nabwegei. Ta waga ana tofewayavo imwaniniva gegoyo nage nawale waga natula gelasaya di'we Silitisa 'inaya. 'Inega naya ia'u webuiea ta yaqina 'inega 'alu'alua dadanema.

<sup>18</sup> Mahala vulihia ta nawale wedilia qiduana waga 'aubuibuinia 'inega ive'ale kulufa wagega ifelawebuiedi mwade'waya. <sup>19</sup> Ta 'aubena vetoina 'inaya wese waga ana kulufa vaina ifelawebuiedi. <sup>20</sup> Ta 'aubena qabuna 'idia wedilia qiduana vunuvunuqima 'inega baba'au ta wese 'wadi'wadima ge ada 'itedi. 'Inega yawaima weaqina ema nuanua kusa, ta avonaya be ana 'aliga.

<sup>21</sup> Ta tuta kuena 'inaya waga ana togeluyavo ge ida 'ai. 'Inega taha 'aubena 'inaya Faulo ya'itoto matadia ta vonedi vonaya, "Taigwavo, lova ni'au yavonemi bwanabwana Kiliti 'inaya kada toa. Ta 'eguma lova egu vona nana oda 'abibodea, e 'inega ba'itagana ge wese veilaqe nana kada lobei. <sup>22</sup> Ta yavonevonemi giwalimi ge naha'ala ta 'esi ona vewaiwai mana ge taha toga 'imiega na'aliga, ta waga namo nawale naluveifa. <sup>23</sup> Ya'a Yaubada ena tomotau, ta tuta qabuna yaiwaiwa'odu 'inaya. Ta Yaubada nana ena tovale'ewa velovelovana 'inaya 'ifoqe 'iguya voneguya, <sup>24</sup> \* 'Faulo, ge una mwaniniva! Yavona aqiaqieu, nawale tolumine qiduana Sisa matanaya una tovolu.' Ta wese Yaubada vona fofofolegu ena nuakokoloyega waga ana togeluyavo qabumi maega 'etoyavua ona lobe. <sup>25</sup> 'Inega taigwavo, ge ona mwaniniva, mana Yaubada yavetumaqana aqiaqiea tola'ai ni'au ve'itegu ena tovale'ewa 'inega wese 'idewanina nave'ifoqeyea 'idaya. <sup>26</sup> \* Ta nawale taha bwanabwana 'inaya kana tula."

*Waga tula ta qeunia*

<sup>27</sup> Ta 'aubena vefotinina (14) nawale wagaya 'alu'alua dadanema Mwade'wa Adiliati 'inaya. 'Inega tou gamonaya waga ana tofewayavo ivonaya be tuta goyona ana 'ifoqe dabala di'wenaya. <sup>28</sup> 'Inega qawana wayoyega i'etolivea ta ena webui 'idewana 40 mita. Ta wese a'eno naqo goyona 'inega wese i'etolivea ta ena webui ilobea 'edewana 30 mita. <sup>29</sup> Ta waga ana tofewayavo imwaniniva nawale dabo qiduquadi 'idia waga natula. 'Inega lomu foa adi yau ifelawebuiedi waga yiqunega, ta 'abibodanaya ivenoqi mana nuanuadi tou namaduvulihia. <sup>30</sup> Ta vaina waga ana tofewayavo nuanuadi ina dena. 'Inega waga ana dinige ivekalilia webui, ta edi 'ebeu'ava vonigo wese taha lomu waga budonega ina felawebuiea. <sup>31</sup> Ta Faulo edi 'ebeu'avana lobe 'inega toluaviayavo ma edi tovatatana vonedia, "Eguma omo'e tomotau diavona wagega ina dena, e 'inega nawale 'etoyavua ge ona lobei." <sup>32</sup> 'Inega toluavia diavona dinige nana ana wayo iluda'edi ta 'alua.

<sup>33</sup> 'Inega manu bodobodoya Faulo waga ana togeluyavo vonedi ina 'ai ta vonaya, "Aubena 14 gamonaya ge taha 'abwaga oda 'ainia, mana tuta vitana kalobea. <sup>34</sup> 'Inega yavenoqiemi 'abwaga ona 'ai ta ona vewaiwai, be yaqisa ge taha toga 'imiega naveilaqe."

<sup>35</sup> Faulo ena vona 'abibodanaya taha beledi 'ewei ta matadia Yaubada 'inaya lukaiwa, ta 'inega beledi gitomwei 'ai. <sup>36</sup> 'Inega tomotau qabuma ama lutonova veaqiaqi ta wese a'ai. <sup>37</sup> Ta waga ana togelu ama yau 276 'idewana. <sup>38</sup> Ta ni'au gamoma 'elukoko, 'inega 'abwaga witi wagega a'efelawebuiea mwade'waya, mana nuanuama waga nameaqana.

<sup>39</sup> Mahala vulihia 'inega waga ana tofewayavo balabala i'itea, ta ge ida alamania to'abaga. Ta gomwagomwa ma gelasana i'itea 'inega inuanua 'eguma ana fata waga ina

\* 27:24: Via 23:11 \* 27:26: Via 28:1

luguyea omo'e 'inaya. <sup>40</sup> 'Inega waga ana lomuyavo ana wayo iluda'edi ta inogedi, ta ana fwaloa adi wayo ili'amidi ia'uwebuiedi ta wese naya ilihi vaneqea nuanuadi ina lugu balabalaya. <sup>41</sup> Waga nawale filifili, ta gelasa mwade'wa gamonaya ge ida 'itei, 'inega waga 'inaya tula ta ge ana fata nanidoa, mana budona vefalafala gelasaya. Ta wese waga yiquna ni'a 'efisalia nufula qiduquadi edi vunuqa 'inega.

<sup>42</sup> Ta toluavia nuanuadi yoqoyoqonidi ina luve'aligidi, mana ge nuanuadi ina 'ayaqa ina lugu balabalaya ina vane 'abo ina dena. <sup>43</sup> Ta edi tovamatana Diuliasi nuanuana Faulo na'etoyavua be ge ina luve'aligi. 'Inega toluavia dina awatayedi yoqoyoqonidi ge ina luve'aligidi. 'Inega tomeqabu adi fata be ina 'ayaqa luvinedi ina fifiedi mwade'waya ta ina vane balabalaya. <sup>44</sup> Ta tomeqabu ge edi 'ayaqamo luvinedi waga ana 'aiwe 'ebwegabwegana ina 'ewei ta ina 'ayaqa, 'inega wese ina vane balabalaya. Ta ena luvine a'abibodea 'inega togelu qabuma me ema aqiaqi avane bwa'obwa'o ayahayanaya.

## 28

### *Faulo ma enavo bwanabwana Melita 'inaya*

<sup>1</sup> Ta tuta nana ni'a avane bwa'obwa'o ayahayanaya 'inega bwanabwana ana totoayavo ivonema bwanabwana nana ana wawa Melita. <sup>2</sup> \* Ta 'abibodanaya i'ebe'ewema ta edi veyoluba gegoyo ive'itayea 'imaya. 'Inega 'aiwe ilevoya ta igaba va'auqima sabi vetaluvata, mana 'wei be guga'u tomanima.

<sup>3</sup> Ta Faulo 'aiwe gwagwa dadanei mai levoi 'ala'alata, ta ena lu'wea'weava 'inega taha mwata veifana 'ifoqe ta Faulo nimanaya 'alaqaa. <sup>4</sup> Ta bwanabwana ana totoayavo i'itea mwata Faulo nimanaya kuekue. 'Inega taudimo ivonaya, "Vonahaqiaqi, 'oloto omo'ena toluxe'aliga taha. Ta ge ana fata mwade'wa ana qiduquadi 'inega nadena. Ana fata waga ena veilaqeyega dena mai, ta mwata tawa 'utea 'abo na'aliga, mana luve'aliga ana luvine tunutunuqina 'idewani nalobea." <sup>5</sup> \* Ta Faulo mwata nana nimanega luefalea webui 'aiwe saesaela gamonaya 'alaia, ta ge taha yuvaqa dalobei. <sup>6</sup> \* Ta tomotau diavona ivonaya be nimana nalolona nage natafefwai nabe'u 'abo na'aliga. 'Inega tufwana tuta kuena iba'eba'e ta ivevekovea, ta ge taha veilaqe da'ifoqe 'inaya. 'Inega edi nuanua igivilei ivonaya vonigo 'oloto nana wese taha yaubada.

<sup>7</sup> Ta bwanabwana nana ana toluvine qiduana ana wawa Fubiliyasi ena 'ebeluvine ge davekue balabala 'inega. 'Inega tauna 'ebe'ewema ena vanuea ta 'aubena toi 'idia 'ita'itamakima ta veve'ainima. <sup>8</sup> Ta Fubiliyasi tamana vevihiaqi 'inega 'wafina lu'wea'weava ta wese diafilifili 'ewea, ta ena sifaufa gamonaya toatoa. 'Inega Faulo lugu 'inaya ta weaqina venoqi Yaubada 'inaya, 'inega nimana tovevihiaqi nana 'wafinaya a'ui ta giveaqiaqiea. <sup>9</sup> 'Inega bwanabwana nana ana tovevihiaqayavo qabudi imai Faulo 'inaya, ta taudi wese giveaqiaqiedi. <sup>10</sup> Ba'e 'inega tomotau iveyolubema qiduana yani taha taha 'idiega. Ta omo'e 'inaya wai'ena toi atoatoa. Ta wese ema tuta gelu 'inaya 'abwaga qiduana ta wese vaina kulufa maega ineima 'eda weaqina.

### *Bwanabwana Melita inogei ta itauya Loma weaqina*

<sup>11</sup> Taha waga lova 'abaga qiduana Alekisanidela 'inega lugu mai Melita 'inaya, ta yaqina be guga'u weaqina ba'eba'e ana laba yaqina nalua'u. Ta tuta aqiaqina ni'a ve'ale 'inega waga nana ageluya. Ta waga nana budonaya edi tokwalui dayadayagina ana wawa yaubada didilualua 'eno'eno, ta adi wawa Kasitoli be Folukisi. <sup>12</sup> 'Inega avaukamana bwanabwana Sisili 'inaya ta alugu 'abaga Sailakusa 'inaya, ta 'abaga nana 'inaya atoatoa 'aubena toi. <sup>13</sup> 'Inega wese agelu 'evivi avaukamana 'abaga Ligiami 'inaya. Mahala vulihia bolimana toa, 'inega agelu 'evivi afilifili, ta wese mahala vulita 'eviviea 'inega alugu 'abaga Futoli 'inaya. <sup>14</sup> Ta omo'e 'inaya vaina tovetumaqana alobedi ta i'ebe'ewema maega atauya edi vanuea, ta 'aubena seveni 'idia maega atoa. Ta 'abiboda atutuvila atauya Loma weaqina. <sup>15</sup> Ta Loma ana tovetumaqanayavo valema inoqolia, 'inega imai 'edaya sabi 'itama taha 'abaga 'ebegimwane 'inaya ana wawa Afio. 'Inega wese atauya

\* 28:2: 2Kol 11:27 \* 28:5: Mk 16:18 \* 28:6: Via 14:11

ta taha 'abaga igabea Vanue Wagawaga Toidi 'inaya wese vaina tovetumaqana maega aveloba. Ta tuta nana Faulo tovetumaqana diavona 'itedi 'inega vewaiwai ta lukaiwa Yaubada 'inaya.

*Faulo ena viaqa Loma 'inaya*

<sup>16</sup> Ta tuta nana alugu Loma 'inaya, 'inega 'abaga ana toluvineavo Faulo iawafelei be toluavia 'aidegana maega ina toa taha vanue 'inaya na'itamaki aqiaqiea, mana ge nuanuadi nadena.

<sup>17</sup> Ta 'aubena toi 'abibodanaya Faulo nuanuana me Diu adi tovanugwetayavo Loma 'inaya maega ina veqae, e 'inega vona vetunea 'idia. 'Inega iva'auta imai Faulo 'inaya. 'Inega Faulo vonedi vonaya, "Taigwavo, ya'a ge taha luveifana eda viaqi eda tomotauyavo 'idia, ta wese tubudavo edi ilivu ya'a ge eda bwegei. Ta lova Ielusalema 'inaya me Diu ikafigu ta ive'ineiegu me Loma edi toluvineavo 'idia ta iyoqonigu. <sup>18</sup>\* 'Inega me Loma edi toluvineavo matadia ivekotugu, ta ge taha luveifana 'iguya adi fata ida lobei be 'inega ina luve'aligigu. 'Inega taudi nuanuadi ina awayavuigu. <sup>19</sup>\* Ta me Diu ge nuanuadi me Loma edi gavana Fesito 'inega 'etoyavua ena lobei. Ba'e 'inega yavenoqi Sisa matanaya egu kotu weaqina. Ta ge egu tomotauyavo sabi ve'ewadi nage vita ena neidi. <sup>20</sup>\* Ba'e weaqina yagaba va'auqimi nuanuagu ena 'itemi kana veqae. Vonahaqiaqi, ita'a me Isileli kavetumaqana vonigo ada 'etoyavua Yaubada 'inega na'ifoqe. Ta ba'e vetumaqana nana weaqina nimagu iyoqonidi."

<sup>21</sup> 'Inega me Diu Faulo ivoneaya, "Ima'a ge taha leta di'we Iudia 'inega weaqiu ada lobei. Ta wese emwavo Iudiyega imaimai ge valeu ida vonema, ta wese ge taha luveifana weaqiu ida simana 'ifoqeyea 'imaya. <sup>22</sup>\* Ta 'esi nuanuama tau'uyega eu nuanua weaqina una simana 'ifoqeyea 'imaya, mana ni'a ahalamania tomeqabu edi nuanua o'a 'idewani, mali tomotau di'we qabudi 'idia i'awa'awa luveifemi."

<sup>23</sup> 'Inega taha 'aubena ivenua'ivinea nawale wese ina va'auta. 'Inega 'aubena nana 'inaya me Diu qabu qiduadi imai iva'auta Faulo ena vanuea. Ta 'awa'awai 'inega ana laba velovanea ve'itedi be wese lugaihi 'idia Yaubada ena 'Ebeluvine weaqina. Ta wese ve'itedi Ieisu weaqina Mosese ena luvine 'inega, ta wese tovesimasimanayavo edi vonayavo 'idiega, nuanuana Ieisu ina vetumaqanea. <sup>24</sup> 'Inega me Diu vaina Faulo ena vona ivetumaqanea ta vaina ivedeba 'i'wana. <sup>25</sup> Ta me Diu dina ive'ae'aetoga 'inega iya'itoto sabi ve'iyavula. 'Inega Faulo ena vona 'ebeluo'ova vonedi vonaya, "Niboana Gwalagwalana tubumiavo vonahaqiaqi neidi tuta nana tovesimasimana Aisea 'inega weaqidi simana vonaya,

<sup>26</sup>\* 'Una tauya me Diu 'idia

ta una vonedi,

Tomotau omi'a nawale

egu vonayavo ona noqolia

ta ge nuami da'eqa'uya,

ta tuta qabuna egu viaqayavo

ona 'itedi ta ge nuami dasimatala.

<sup>27</sup> Tomotau ba'e giwalidi atufina.

Ta teniqadi kwavana 'inega

vona ge ida noqola aqiaqiea.

Ta wese matadi ikwayea,

'inega ge ida 'ita,

tuata nuadi ge dasimatala.

'Inega ge adi fata

ida nuagivila 'iguya

be ena giveaqiaqiedi.' "

\* 28:18: Via 26:31 \* 28:19: Via 25:11 \* 28:20: Via 26:6-7 \* 28:22: Via 24:14 \* 28:26: Ais 6:9-10; Via 25:13; 26:2,6; 27:24; Lom 1:5

<sup>28</sup> Ta wese Faulo vonedi vonaya, “Inega nuanuagu ona alamani aqiaqiea Yaubada ena ’etoyavua vetunea wese taudi ge me Diu weaqidi. Ta taudi ina noqolia ta ina ’awahaqiaqiea.” <sup>29</sup> Ta Faulo ena vona lu’ovoia ’inega me Diu iyavula ta taudiega ive’ae’aetoga qiduana Faulo ena ve’ita weaqina.

<sup>30</sup> Inega Faulo ya’wala magilafuna ’inaya vanuea toatoa, ta taunega vevemaisia ena toa weaqina. Ta tomeqabu imaimai sabi vyausina, e Faulo ’ebe’ebe’ewedi ilugulugu vanuea ta iveveiaiana. <sup>31</sup> Ta Yaubada ena ’Ebeluvine weaqina lugaihidi ta wese ve’itedi Kaiwabu Iesu To’etoyavua weaqina. Ta me ena giwalifatu tuta qabuna lugaihi ’idia, ta ge taha toga dahawatayei.

## Faulo ena leta me Loma 'idia

### *Leta ana alamani weaqina*

Faulo ena leta 'iuna mana nuanuana me Loma ina 'iva'ava'ata ena vayausa 'idia weaqina. Lova luvivila di'we taha taha 'idia Ieisu Valena weaqina, ta me Loma nawale ge taha tuta davayausidi. 'Inega ena nuanua 'abaga nana ana tovetumaqana maega ina toa ta naiuledi, ta 'abiboda natauya di'we Sifeini 'inaya. Ba'e leta nana Faulo ena leta qabudi veqidua va'inedi, mana yani qabuna to'ekalesia edi toa Yaubada maega weaqina simana aqiaqiedi, ta wese veve'itedi tovetumaqana ma'oda ina toa 'aiqa ediavo maega. Ta leta nana ana masi nage ana avutugu ba'e 'idewani: Tomeqabu ivetumaqana Ieisu 'inaya adi fata ina vetunutunuqa Yaubada matanaya vetumaqana nana 'inega. Ba'e masi nana ana alamani Faulo givesimatalia taudi me Loma weaqidi. 'Inega vonaya vonigo tomotau qabudi, taudi me Diu ta wese mali qabu luveluveifadi, e 'inega Yaubada matanaya luaqiaqiedi be ina veilage vataya. 'Inega Faulo ve'itedi taha 'eda weaqina, ta 'eda nana 'inega adi fata ina vetunutunuqa Yaubada matanaya. Ta 'eda nana ana wawa Vetumaqana ta ana alamani ba'e: 'Eguma Ieisu kavetumaqanea, e 'inega ni'a kavetunutunuqa Yaubada matanaya. Ta wese vetumaqana nana 'inega Yaubada eda luvifana ana ve'ia luvematasabu vataya ni'a 'ewa yavulea 'idega.

Ta wese Faulo Yaubada ena luvineavo 'iuna weaqina givesimatalia 'idia, mana me Diu ivonaya be Mosese ena luvine ana 'abiboda 'inega adi fata otaqa ina vetunutunuqa Yaubada matanaya. Ta Faulo ve'itedi ge luvine ana matayaga 'inega Yaubada na'awahaqiaqiedi ta 'esi edi vetumaqana namo 'inega. Ta wese Faulo givesimatalia Yaubada ena nuanua me Diu ta wese mali qabu weaqidi, mana me Diu ivonaya be taudimo aqiaqiedi Yaubada matanaya, mana lova Yaubada venua'ivinedi ena tomotauyavo 'idewana. Ta Faulo ve'ita aqiaqiedi tomotau qabudi adi fata be ina vetunutunuqa Yaubada matanaya 'eguma Ieisu ina vetumaqanea. 'Inega Faulo me Loma ve'itedi taha tuta 'inaya me Diu taudi wese Ieisu ina 'awahaqiaqiea tauna adi To'etoyavua 'idewani. Ta da'a taha taha adi 'ebeluo'ova 'idia Faulo givesimatalia tovetumaqana weaqidi ma'oda ediavo ina veilivu 'aiqedi, ta wese ve'ita aqiaqina 'wayavia tovetumaqana edi vetofewa Yaubada 'inaya weaqina, ta wese givesimatalia ma'oda edi toluvineavo be edi gabemaniavo ina 'abiboda 'aiqedi. Ta 'wayavi 'ebeluo'ova 'inaya Faulo lulukaiwa enavo qabudi 'idia, mana taudi Loma 'inaya itoatoa, ta tauna toa luluvai 'idiega di'we Guliki 'inaya.

### *Leta gamona*

1:1-17 Vona lukaiwa ta leta gamona ana nuanua weaqina

1:18-3:20 Tomotau qabudi luveluveifadi, 'inega Yaubada ena luvematasabu ina lobe

3:21-4:25 'Etoyavua ge kana lobei luvine adi 'abiboda 'inega ta 'esi vetumaqana Keliso 'inaya 'inega

5:1-8:39 'Eguma Keliso maega kana ve'aidega 'inega toa vauvauna ta wese yawai vataya kana lobe

9:1-11:36 Yaubada ena nuanua me Isileli weaqidi mana Ieisu ge ida 'awahaqiaqiea

12:1-15:13 Tovetumaqana edi ilivu weaqina tomotau nuanidia ta wese 'ekalesia gamonaya

15:14-16:27 Faulo ena vebibina ta wese ena lukaiwa enavo me Loma 'idia

### *Lukaiwa Faulo 'inega me Loma 'idia*

<sup>1</sup>\* Leta ba'e ya'a Faulo 'iguyega ya'wayavia waiwai 'imia. Ya'a Ieisu Keliso ena tofewa kavovo. Ta Yaubada ena nuanua 'inega yavetovaletuyana, ta venua'ivinegu be vetune 'ifoqeyegu ena Vale Aqiaqina sabi lugaihina tomotau 'idia. <sup>2</sup>\* Lova Vale Aqiaqina ba'e Yaubada vona fofofolea ena tovesimasimanayavo 'idiega ena Buki Nugwenugweina 'inaya. <sup>3</sup> Ba'e Vale nana Yaubada Natuna Ieisu weaqina simasimana. Tauna vetomotau

\* 1:1: Via 9:15 \* 1:2: Lom 16:25-26



mai bwa'obwa'oya, ta kini Deibida ena gade 'inega vi'oi. <sup>4</sup> Ta Yaubada ena waiwaiega eda Kaiwabu Iesu Keliso 'aligegea giveya'itoto 'eviviea. Ta ba'e giveya'itoto nana Niboana Gwalagwalana 'inega Yaubada ve'ita aqiaqieda Iesu vonahaqiaqi Natu Otaqina. <sup>5</sup> \* Ya'a toluveifana, 'inega ge daluaqiaqiegu be eda vetovaletuyana, ta 'esi Yaubada ena nuakolokolo 'inega venua'ivinegu be yavetovaletuyana taudi mali qabu 'idia, 'inega taudi wese Yaubada ina matayagea edi vetumaqana 'inega. <sup>6</sup> Ta wese omi'a Yaubada ena venua'ivina 'inega ni'a gabemi Iesu Keliso ena tomotauyavo.

<sup>7</sup> \* Leta ba'ena ya'wayavia waiwai omi'a egwavo 'abaga qiduana Loma 'inaya otoatoa weaqimi. Omi'a tovetumaqana Yaubada veyolubemi ta gabemi ena tomotauyavo. Yavevenoqi weaqimi Tamada Yaubada be eda Kaiwabu Iesu Keliso edi veyoluba be edi nuadaumwala ina neimi.

*Faulo nuanuana qiduana* 'abaga Loma ana tovetumaqanayavo navayausidi

<sup>8</sup> Egwavo, nugweta nuanuagu ena vematamagilafuyemi tomotau qabudi Loma ena 'ebeluvine gamonaya emi vetumaqana Iesu Keliso 'inaya weaqina ni'a ialamani aqiaqiea. 'Inega yalulukaiwa qiduana Yaubada 'inaya omi'a 'aidega 'aidega weaqimi. Agu fata be ba'e 'idewani ena lukaiwa 'aiqa Yaubada 'inaya Iesu ena viaqa 'idaya weaqina. <sup>9</sup> Tuta qabuna Yaubada weaqina giwaligu qabuna 'inega yafewafewa. Ta egu fewa nana 'inaya tomotau qabudi yalulugaihi 'idia Natuna Iesu Keliso Valena Aqiaqina weaqina. Ta Yaubada ni'a alamani aqiaqiea ya'a 'aubena ta wese velovana 'idia yavevenoqi 'inaya weaqimi.

<sup>10</sup> \* Tuta qabuna yavevenoqi waiwai Yaubada 'inaya 'eguma nahawafela be 'eda nasiwa'ea weaqigu 'inega ena wai sabi 'itami. <sup>11</sup> Mana egu vayausa 'inaya nuanuagu be Niboana Gwalagwalana 'inega ena iulemi. Ta iula nana 'inega ana fata ona vewaiwai eda Kaiwabu 'inaya. <sup>12</sup> Nuanuagu qiduana ena vona iulemi be 'inega emi vetumaqana navewaiwai, ta ya'a wese nuanuagu ena vewaiwai omi'a emi vetumaqana 'inega. E ba'e 'inega omi'a be ya'a kana veiuuila.

<sup>13</sup> \* Egwavo, ona alamani aqiaqiea lova ya'a nuanuagu qiduana eda vayausimi, ta ge agu fata mana vaina yoqona yalobedi ana laba ba'e 'itagana. Ta ni'a 'eyavuiqu, 'inega nuanuagu ena wai ena 'itemi ta ena fewa nuanimia, be yaqisa vuaqa aqiaqina na'ifoqe, 'idewani lova yafewa 'aiqa mali qabu nuanidia. <sup>14</sup> Ya'a agu veyoveyoa Yaubada 'inega ya'ewea, 'inega Valena Aqiaqina eda tomotauyavo me Diu ta wese taudi mali qabu 'idia yaneineidi, ta wese taudi toalamani be tovefwage 'idia. <sup>15</sup> 'Inega wese nuanuagu agona ena wai 'imia 'abaga Loma 'inaya, ta Yaubada Valena Aqiaqina ena lugaihiea 'imia.

<sup>16</sup> \* Ya'a ge eda iniyauyau Iesu Keliso Valena Aqiaqina weaqina, ta 'esi me egu giwalifatu yalulugaihiea, mana Vale nana Yaubada ena waiwai ve'itayea, 'inega ana fata tomeqabu Vale nana ivetumaqanea e taudi 'etoyavua ina lobe Yaubada ena luvematasabu 'inega — taudi me Diu ta wese taudi mali qabu. <sup>17</sup> \* Ta ba'e Vale nana veve'iteda ma'oda Yaubada ena viaqa 'inega ni'au givetunutunuqida matanaya. Ta ba'e vetunuqa nana ana avutugu vetumaqana, mana Buki Nugwenugweina 'inaya Yaubada vonaya, "Togama ni'a yahawatunutunuqea, e tauna ena vetumaqana 'iguya 'inega natoa vataya."

*Yaubada ena gamosoala ilivu luveifana weaqina*

<sup>18</sup> Ta Yaubada ena gamosoala mahalega give'ifoqeyea toveilivu veifa be tovekwavakwava 'idia. Taudi edi vekwawakwava 'inega nuanuadi Yaubada ena vona ina 'waivea mali tomotau 'idiega. <sup>19</sup> \* Taudi toluveifa diavona Yaubada ni'a ialamani aqiaqiea, mana Yaubada taunega alamani nana ni'a a'uya nuadia. <sup>20</sup> \* Mana kuyavata qabudi adi 'iva'ava'ata 'unu 'inega tomotau qabudi Yaubada ena waiwai 'eno'eno vatayana be wese

\* 1:5: Via 26:16-18; Gal 2:7-9 \* 1:7: Naba 6:25-26 \* 1:10: Via 19:21; Lom 15:23 \* 1:13: Via 19:21 \* 1:16: Mk 8:38; 1Kol 1:18-24; Via 13:46 \* 1:17: Lom 3:21-22; Aba 2:4 \* 1:19: Via 14:15-17; 17:24-28 \* 1:20: Iob 12:7-9; Same 19:1

yawaina aqiaqi otaqina ni'a i'itedi. Ta wese ena viaqayavo 'idiega taunega ve'itayea vonigo tauna vonahaqiaqi Yaubada. 'Inega ge taha toga ana fata Yaubada navegeqei ta navonaya, "Ya'a ge eda alamanía vonigo Yaubada toatoa." <sup>21</sup> \* Vonahaqiaqi, tomotau ni'a ialamanía Yaubada toatoa, ta ge nuanuadi ina awatuboi nage ina lukaiwa 'inaya ena viaqayavo weaqidi. Ta 'esi taudiega edi vekwavakwava 'inega inuanua veifa Yaubada weaqina. Ta edi nuanua diavona 'idiega taudiega igivenuavoqanidi, ta wese ge adi fata ilivu simasimalidi ina viaqidi. <sup>22</sup> \* Taudiega isimana tomotau 'idia vonigo taudi toalamani qiduadi, ta 'esi ivekwavakwava otaqa. <sup>23</sup> \* Ta wese ge nuadi Yaubada aqiaqi otaqina ta toatoa vatayana ina awatuboi, ta 'esi tokwalui dayadayaqidi adi 'ita kavona tomotau otaqa be, manuqa be, yubai ta wese mwata iawahawatubodi.

<sup>24</sup> 'Inega Yaubada awafeledi be taudiega edi nuanua ina viaqidi. 'Inega ilivu iniyauyau 'avana edi nuanua luveifadi 'idiega iviaqidi 'idewani velamo'eno kavokavovo. Ta ba'e ilivu diavona 'idiega taudiega 'wafidi igivebwavuya. <sup>25</sup> Ta tola'ai ni'a ialamanía Yaubada weaqina ge nuadi ina vetumaqanei, ta 'esi taudiega edi vetumaqana ia'uya u'ava 'inaya. Ta ba'e 'inega iawahawatubo Yaubada ena viaqayavo 'idia, ta Toviaqa nana ge ida awatuboya. Luaqiaqieda be tauna kana awatuboya tuta vataya 'idia. Vonahaqiaqi, eda nuanua 'idewani.

<sup>26</sup> Ba'e 'iuna 'inega Yaubada awafeledi edi ilivu iniyauyau 'avadi 'idia. 'Inega vivine 'eno ana luvine aqiaqina inogea ta ge nuadi 'oloto maega ina 'eno, ta 'esi vivine ediavo maega ivelamo'eno kavokavovo. <sup>27</sup> \* Ta wese 'oloto 'idewani ge nuadi vivine maega ina 'eno, ta 'esi nuanuadi qiduana 'oloto ediavo maega ilivu iniyauyau 'avana ina viaqidi. Ta ba'e ilivu diavona 'idiega taudiega iveveilaeqeyedi, mana ilivu nana ana ve'ia luvematasabu qiduana.

<sup>28</sup> Ta tuta nana edi alamanía Yaubada weaqina inogea, e 'inega Yaubada awafeledi be edi nuanua luveifadi ina viaqidi. Ta ba'e ilivu diavona ge taha toga daluaqiaqiei be naviaqi Yaubada matanaya, ta taudi tua iviaviaqidi. <sup>29</sup> Tuta qabuna ilivu luveluveifadi iviaviaqidi, 'idewani ilivu kwavakwavana be, vemanuguba be, ve'idi'idi be, ve'ifi'ifi be, luv'aliga be, vedavi be, suluva be, awagila ta wese vevonavona tomotau weaqidi. <sup>30</sup> Ta wese tomotau i'awaluveifedi be, Yaubada ivevoalanea be, tomotau iawawebuiedi be, taudiega igivaneyedi ta wese igagasa. Tuta qabuna 'eda taha taha ilivu luveifana weaqina isalisalia, ta tamadiavo be inadiavo ge ida matayagedi. <sup>31</sup> Taudi ge ida nuanua tola'ai aqiaqina nage tola'ai luveifana. Ta ge taha edi vetumaqanamo be, ge taha nuakolokolo 'idia da'eno'eno, ta wese ge taha nuataqo 'idia da'eno'eno. <sup>32</sup> Taudi ni'a ialamanía aqiaqiea Yaubada ena luvematasabu ba'e ilivu diavona adi viaqa weaqidi, ta tua tuta qabuna iviaviaqidi. Ta wese nuanuadi mali tomotau ilivu diavona ina viaqidi 'inega ivonedía, "Ei emavo, omi'a wese ba'e yani diavona ona viaqidi!"

## 2

### *Yaubada ena luvine ilivu luveifadi weaqidi*

<sup>1</sup> \* Nage ona vonaya, "Ba'e tomotau diavona luveifa otaqidi!" Ta yavonemi omi'a me Diu wese emi luveifana taudi 'idewana, 'inega ge taha toga 'imiega navonaya, "Ya'a ba'e ilivu diavona ge eda alamanía vonigo luveifadi." 'Inega tuta nana ovonaya vonigo mali qabu toluveifadi luaqiaqiedi be luvematasabu qiduana ina lobeá Yaubada 'inega, e 'inega omi'a 'idewani taumiega ami luvematasabu Yaubada 'inega oveve'ifoqeyea 'imia, mana omi'a wese ba'e yani diavona oviaviaqidi. <sup>2</sup> Ni'a kahalamani aqiaqiea vonigo Yaubada ena luvine tunutunuqina 'inega ba'e ilivu diavona adi toviaqayavo naluvematasabudi. <sup>3</sup> Nage omi'a onuaia be vonigo Yaubada mali tomotau edi ilivu luveifana weaqina naluvematasabudi, ta omi'a gebu, waisa? <sup>4</sup> \* Ana 'ita nawale nuami ge da'eqa'uya Yaubada ena nuakolokolo be ena bibitaqo qiduana 'imia weaqina, waisa? Nage ge

\* 1:21: Efe 4:17-18 \* 1:22: Iel 10:14; 1Kol 1:20 \* 1:23: Luvé 4:15-19; Same 106:20 \* 1:27: Luvi 18:22; 20:13; 1Kol 6:9 \* 2:1: Md 7:1-2; Ion 8:7 \* 2:4: Efe 1:7; 2Fit 3:15

oda alamania ba'e nuakolokolo nana 'inega nuanuana ona nuagivila emi ilivu luveifana 'idiega, be 'inega na'etoyavuimi.

<sup>5-6</sup>\* Ta omi'a emi vedeba 'i'wana 'inega ge nuanuami be ona nuagivila. 'Inega taumiega ami luvematasabu qiduana weaqina oluluveaqea. Mana nawale luvine ana 'aubena qiduana 'inaya Yaubada tauna bwa'obwa'o ana Toluvine "tomotau qabuda naluvineda eda viaqayavo 'idiega". <sup>7</sup> Vaidi tomotau tuta qabuna ilivu aqiaqidi iviaviaqidi, ta ivetafe'wa waiwai, mana nuanuadi 'amayaba be awatubo ina lobeia Yaubada 'inega. Ta wese yawai vataya isalisalia. E ba'e tomotau diavona nawale 'aubena nana 'inaya Yaubada toa vataya naneidi. <sup>8</sup>\* Ta wese vaidi tomotau tuta qabuna taudiega weaqidi inuanua. Taudi Yaubada ena ilivu tunutunuqina ana 'eda inogenogea ta tuta qabuna ilivu luveifadi iviaviaqidi. E ba'e tomotau diavona nawale Yaubada ena gamosoala qiduana 'inega naluvematasabudi. <sup>9</sup> 'Inega toluveifa diavona visiq'a ta wese veilage qiduana ina lobeia. Vonahaqiaqi, ba'e luvematasabu diavona ina madu'ifoqe me Diu 'idia, ta wese taudi mali qabu 'idia. <sup>10</sup> Ta ilivu aqiaqidi adi toviaqayavo 'amayaba be awatubo ta wese nuadaumwala ina lobeia Yaubada 'inega. Vonahaqiaqi, ve'ia aqiaqi otaqina ba'e namadu'ifoqe me Diu 'idia, ta wese taudi mali qabu 'idia, <sup>11</sup> mana Yaubada tomotau qabudi luvine 'aideganega naluvinedi edi viaqayavo aqiaqidi be luveifadi 'idiega. Vonahaqiaqi, luvine 'aideganega tomotau 'ena'ena'idi be wese tomotau kavokavovo naluvinedi.

<sup>12</sup> Vonahaqiaqi, Yaubada me Diu naluvematasabudi mana Mosese ena luvine 'eno'eno 'idia, ta tua ilivu luveifana iviaviaqidi. Ta taudi mali qabu luvine nana ge da'eno'eno 'idia wese naluvematasabudi, mana ilivu luveifana iviaviaqidi. <sup>13</sup> Yaubada ana fata ba'e yani diavona naviaqia tomotau 'idia, mana ge taha toga ana fata navetunutunuqa Yaubada matanaya luvine ana noqola 'inega. Ta 'esi tomeqabu luvine nana ivelumamatayagea, e taudi Yaubada nahawatunutuqedi. <sup>14</sup>\* Vonahaqiaqi, Yaubada ena luvine ge da'eno'eno taudi ge me Diu 'idia, ta tua taudi wese luvine nana imamatayagea, mana tomotau adi viaqa 'unu 'inega Yaubada nuanua aqiaqina a'uya nuadia, 'inega ni'a ialamani aqiaqiea tola'ai aqiaqina be tola'ai luveifana. <sup>15</sup> Ta edi viaqayavo 'idiega ive'itayea vonigo Yaubada ena luvine ana 'abiboda weaqina nuadia 'eno'eno, mana viaqa diavona 'idiega adi fata edi nuanua 'inega ve'ewa ina lutonovia ta wese 'awahaqiaqi ina lutonovia. <sup>16</sup> 'Inega kana alamani aqiaqiea, ba'e yani nana nawale na'ifoqe luvine qiduana ana 'aubena 'inaya, ta 'aubena nana 'inaya Yaubada Natuna Ieisu Keliso luvine be waiwai naneia, 'inega tomotau qabuda eda viaqayavo 'wai'waividi weaqidi naluvineda. 'Inega ba'e valena aqiaqina 'iguyega ona noqola aqiaqiea.

#### *Me Diu ta Yaubada ena luvine weaqina*

<sup>17</sup> Wese taha yani weaqina nuanuagu ena 'wayavia 'imia. Taumiega ovonaya, "Ima'a me Diu." Ta Mosese ena Luvine 'inaya otunutunuvahala ami 'etoyavua weaqina, ta ovonaya vonigo ni'a oveiaiana Yaubada maega. Ta wese ovona vane vonigo yani qabuna aqiaqi otaqina omi'a ta Yaubada nuanimia. <sup>18</sup> Vonahaqiaqi, omi'a ovonaya be Yaubada ena nuanua ni'au oda alamania, ta wese ovonaya vonigo omi'a tola'ai aqiaqina be tola'ai luveifana ni'au oalamanian, mana omi'a Yaubada ena luvine tubumiavo ni'au ive'itemi. <sup>19</sup> Ta wese taumiega ovonaya vonigo omi'a ami fata otaqa taudi mali qabu ona vanugwetedi be 'inega Yaubada ena nuanua ina alamanian. Ta wese ovonaya vonigo omi'a ami fata Yaubada ena 'eda simasimalina ona ve'itayea totoa velovelovana 'idia. <sup>20</sup>\* Omi'a ovonaya vonigo taudi mali qabu Yaubada ena nuanuayavo ge ida alamanidi ta ami fata ona vebibinidi, ta wese ovonaya vonigo taudi mali qabu kavona gogama ge taha edi alanimimo, 'inega nuanuami ona ve'itedi Yaubada weaqina. Emi vona diavona adi 'iu ba'e 'idewani, mana omi'a taumiega onuaia vonigo Yaubada ena luvine ana alamani be ana aqiaqi qabuna ni'a oalamanian aqiaqiea.

\* 2:5-6: Same 62:12; Vos 24:12; Md 16:27; 2Kol 5:10    \* 2:8: 2Te 1:8    \* 2:14: Via 10:35    \* 2:20: 2Tim 3:5

<sup>21</sup>\* Vonahaqiaqi, omi'a taudi mali qabu oveve'itedi Yaubada ena luvine weaqina, ta tola'ai weaqina taumiega ge oda ve'itemi? Ta emi lugaihi 'inaya ovonedo ovonaya, "Ge ona vanawala!" Ta tola'ai weaqina omi'a wese ovanavanawala? <sup>22</sup> Ta wese ovonedo, "Ge ona luabu!" Ta tola'ai weaqina omi'a taumiega luabu ilivuna oviaviaqia, waisa? Omi'a ovonedo, "Ge ona iwa'odu tokwalui 'idia!" Ta tola'ai weaqina omi'a mali qabu edi vanue tafwalolo 'idia olugulugu ta vanue nana ana 'ebeiwa'oduyavo ovanavanawalidi ta ovevegimwaneyedi? <sup>23</sup> Omi'a ogagasa wawasai Yaubada ena luvine ana alamani weaqina. 'Inega tola'ai weaqina omi'a Yaubada ge oda 'amayabea, ta 'esi luvine diavona oqeueunidi?

<sup>24</sup>\* 'Inegana Buki Nugwenugweina vonaya, "Taudi mali qabu Yaubada ana wawa i'awaluveifea omi'a me Diu emi ilivu luveifana weaqina."

<sup>25</sup> Ta wese nuanuagu ba'itagana 'wafi ana da'a yavula weaqina ena vonemi. Omi'a me Diu 'oloto luvine ni'a o'ewea 'wafi ana da'a yavula weaqina. Ba'e da'a nana taha 'ebe'ita vonigo omi'a Yaubada ena tomotauyavo. Ta luvine nana ge taha ana aqiaqimo 'eguma Yaubada ena luvine qabudi oqeueunidi. Mana 'eguma luvine diavona ge ona matayagedi, e 'inega omi'a kavonaya 'wafimi ge ana da'a yavulamo. <sup>26</sup>\* Ta 'eguma taudi mali qabu 'wafidi ge ana da'a yavulamo, ta vonahaqiaqi taudi Yaubada ena luvine qabuna imatamatayagedi, e taudi kavona be 'wafidi ida veda'a ta Yaubada ni'a 'awanatunedi. <sup>27</sup> Vonahaqiaqi, taudi mali qabu 'wafidi ge ana da'amo ta Yaubada ena luvine qabuna i'abi'abibodedi, e taudi nuakolokolo qiduana ina lobe Yaubada 'inega, ta 'abiboda omi'a me Diu veveda'ami, mana Yaubada ena luvine oalamani aqiaqiedi ta ge oda matayagedi.

<sup>28</sup> Ge taha toga taunega navonaya, "Ya'a Diu aqiaqi, mana tamagu be inagu taudi me Diu, ta me Diu edi ilivuyavo yaviaviaqidi, ta wese ya'a 'wafigu da'ada'ana." <sup>29</sup>\* Vonahaqiaqi, taha tomotau ana fata taunega nagabea Diu tomotau 'eguma ena nuanua qabuna ni'a vea'ugivilea Yaubada ana 'abiboda weaqina. Ta veda'a aqiaqi gebu 'wafi ana da'a yavula 'inega, ta 'esi giwali ena vevauvau Yaubada Niboanina ena viaqa 'inega. Ba'e tomotau diavona ge taha awatubo tomotau 'idiega ina lobei, ta 'esi Yaubada 'inega.

### 3

#### *Yaubada ena vona fofofola qabudi nagive'ifoqeyedi*

<sup>1</sup> 'Inega nage vaina 'imiega ona vonaya, "Eguma 'wafi ana da'a 'inega ge ama fata ana veaqiaqi Yaubada matanaya, e 'inega ima'a me Diu tola'ai ema aqiaqi Yaubada matanaya? Nage ima'a me Diu ema ilivu ge taha ana aqiaqimo?" <sup>2</sup> Ta yavona aqiaqiem, ita'a me Diu yani qiduana Yaubada matanaya, mana ena vona qabudi maduneida.

<sup>3</sup> Vonahaqiaqi, vaina me Diu edi vona fofofolayavo Yaubada 'inaya iqeunidi. Ta edi qeu nana 'inega nage ana fata Yaubada wese ena vona fofofola naqeunidi? <sup>4</sup>\* Ge wese ana fata! Tomotau qabuda bwa'obwa'oya tovemeahaqila, ta Yaubada tauna Tovonahaqiaqi. 'Idewani Buki Nugwenugweina vonaya, "Yaubada ena vona qabudi vonahaqiaqi, ta ana tove'ewayavo navewaiwai va'inedi ena vona 'inega."

<sup>5</sup> Ta vaina tomotau ivonaya, "Ema ilivu luveifana ma ana aqiaqi, mana Yaubada 'idiega nahawayavuima be 'inega tomotau ena nuakolokolo ina 'itea. E ba'e 'inega Yaubada ge ana luaqiaqi be naluvematasabuma." (Vonahaqiaqi, ba'e 'idewani vaidi tomotau ivona 'aiqa.) <sup>6</sup> Ta yavonevonemi, ge taha toga ba'e 'idewani navona 'aiqa! Mana Yaubada tauna Toluvine tunutunuqina, 'inega ana fata be nawale tomotau qabuda naluvineda. <sup>7</sup> Nage wese taha toga navonaya, "Yaubada ge daluaqiaqiea be naluvematasabugu egu u'ava 'inega, mana u'ava nana 'inega tomotau ena luvine tunutunuqina ina 'itea ta ina awatuboya." <sup>8</sup> Ta 'eguma ba'e vona diavona ona 'awahaqiaqiedi, e 'inega wese ona vonaya, "Ilivu luveifana ana viaqa 'evi'evivi yani aqiaqi otaqina!" Ta yavona aqiaqiem,

\* 2:21: Md 23:3-4 \* 2:24: Ais 52:5; Isi 36:22 \* 2:26: Gal 5:6 \* 2:29: Luve 30:6; Kol 2:11 \* 3:4: Same 51:4

tomeqabu ba'e 'idewani ivonavona 'aiqa luaqiaqiedi be luvematasabu qiduana ina lobeal  
Ta vaidi tomotau iveve'ewegu ta ivonaya vonigo ya'a egu lugaihi omo'e 'idewani. Ta edi  
ve'ewa 'inega luaqiaqiedi be Yaubada naluvematasabu aqiaqiedi.

*Ge taha toga aqiaqina*

<sup>9</sup>\* 'Inega ma'oda, nage ita'a me Diu aqiaqida, ta 'abiboda mali qabu? Gebu'e otaqa!  
Mana ni'a yave'itemi tomotau qabuda me Diu ta wese mali qabu luveluveifada. <sup>10</sup>\*

"Ge taha tomotau tunutunuqina  
Yaubada matanaya,  
vonahaqiaqi ge taha toga.

<sup>11</sup> Ge taha toga  
nuana da'eqa'u aqiaqiei  
Yaubada ena nuanua weaqina,  
ta wese ge taha toga dasalisalia  
Yaubada ana veiana weaqina.

<sup>12</sup> Tomotau qabuda Yaubada kanogea,  
ta ni'a katauya gei.  
Ge taha toga yani aqiaqina daviaqia,  
ge taha toga."

<sup>13</sup>\* "Edi vona qabuna luveifa otaqina,  
kavona 'uluma meilana  
daviivilia deba'unuyega."

"Ta meadi u'ava 'avana,  
'inega edi vona 'idiega  
tomotau iveveilaqeyedi  
kavona be mwata veifana  
tomotau edi 'ebeveilaqe."

<sup>14</sup>\* "Awadiega vona ve'alata  
be wese vona badabadana  
tuta qabuna 'ifo'ifoqe."

<sup>15</sup>\* "Nuanuadi qiduana tuta qabuna  
tomotau ina luve'aligidi.  
<sup>16</sup> Ta ma'inaya itautauya giveluveifa  
be wese toa vitana  
iveve'ifoqeyea tomotau 'idia.

<sup>17</sup> Ta toadaumwala ana ilivu  
tomotau maega ge ida alamania."  
<sup>18</sup>\* "Ta Yaubada ana 'amayaba  
ge taha 'idia da'eno'eno."

<sup>19</sup> Vonahaqiaqi, Mosese ena luvine mai ita'a me Diu 'idaya, 'inega luaqiaqieda be  
luvine dina kana 'abibodedi. Mana luvine diavona 'iudi vonigo ge taha toga ana fata  
be ena ilivu luveifana navegeqedi Yaubada matanaya, ta wese luvine diavona 'idiega  
tomotau qabuda Yaubada naluvineda. <sup>20</sup>\* Ge taha toga ana fata navetunutunuqa  
Yaubada matanaya luvine ana matayaga 'inega. Mana 'eguma luvine diavona kana  
alamani aqiaqiedi, e 'inega wese ni'a kahalamanian tuta qabuna kaqeuqeunidi.

*Keliso ada luvematasabu 'avalea*

<sup>21</sup> Vonahaqiaqi, ge taha toga ana fata navetunutunuqa Yaubada matanaya Mosese  
ena luvine ana 'abiboda 'inega. Ta 'esi ba'itagana Yaubada 'eda vauvauna ni'a ve'iteda  
eda vetunutunuqa weaqina. E ba'e 'eda nana weaqina lova Buki Nugwenugweina 'inaya

\* 3:9: Lom 1:18-2:24; 3:23 \* 3:10: Same 14:1-3; 53:1-3; Tolug 7:20 \* 3:13: Same 5:9; 140:3 \* 3:14: Same  
10:7 \* 3:15: Ais 59:7-8 \* 3:18: Same 36:1 \* 3:20: Same 143:2; Lom 7:7; Gal 2:16

Yaubada ena tovesimasimana isimana 'ifoqeyea. <sup>22\*</sup> Ta 'eda nana ana alamani ba'e: Kana vetunutunuqa Yaubada matanaya 'eguma Ieisu Keliso kana vetumaqanea be tauna ana fata eda luveifana qabuna na'ewa yavuledi. Yaubada ge da'ita'ita eda viaqayavo 'idia, nage ita'a tomeqabu, ta 'esi tomotau qabuda ada fata be 'etoyavua kana lobeia Ieisu ana 'aidega 'inega.

<sup>23</sup> Tomotau qabuda ni'a kaluveifa otaqa, ta ge taha toga 'idega Yaubada ena aqiaqi otaqa ana 'etofwafwa dalobei. <sup>24\*</sup> Vonahaqiaqi, eda luveifana qabudi 'idiega Yaubada ni'a awayavuida, mana tauna Tonuakolokolo, 'inega ge dahawafeleda luvematasabu 'inaya. Ta 'esi Ieisu Keliso ena viaqa 'inega 'etoyavuida, mana Ieisu nana eda luveifana qabuna ni'a 'ewa yavuledi. <sup>25-26</sup> Vonahaqiaqi, Yaubada Ieisu vetunei mai 'idaya eda luveifana sabi 'avalana. Ta ba'e 'inega Yaubada ena gamosoala tomotau eda ilivu luveifana weaqina givelua'uya. 'Eguma kana vetumaqanea Ieisu sulalina ena inoqa 'inega yawaina vegubayea weaqida, e 'inega kana vetunutunuqa Yaubada matanaya. Lova Yaubada ena bibitaqo 'inega tomotau edi ilivu luveifana weaqina ge daluvematasabudi, ta ba'e 'itagana ena luvine tunutunuqina 'inega tomotau eda luveifana ge naveyani kavokavovoyei lova 'idewani. 'Inega Natuna vetunei mai eda luveifana sabi 'avalana, ta tomeqabu Ieisu ni'a ivetumaqanea, e wese Yaubada 'awatunutunuqedi.

<sup>27</sup> 'Inega nage ita'a ada fata be taudega kana vonavane ada 'etoyavua ana 'ewa weaqina? Gebu'e otaqa! Mana 'etoyavua nana ge kana lobei ita'a eda viaqa aqiaqidi 'idiega, ta 'esi eda vetumaqana Ieisu 'inaya 'inega. <sup>28</sup> E 'inega ni'a kavetunutunuqa Yaubada matanaya eda vetumaqana 'inega, ta gebu luvine adi 'abiboda 'inega, mana ge taha toga ana fata luvine qabudi na'abiboda aqiaqiedi.

<sup>29\*</sup> Ana 'ita nage ge oda alamania Yaubada ge ita'a me Diu ada 'aidega eda Yaubada, ta 'esi taudi mali qabu wese edi Yaubada. <sup>30\*</sup> Vonahaqiaqi, Yaubada ana 'aidega otaqa, ta wese 'eda 'aidega otaqina 'inega na'awahaqiaqieda. Yaubada taunega tomotau qabuda ita'a me Diu ta wese taudi mali qabu givivetunuqida matanaya eda vetumaqana Ieisu 'inaya 'inega. <sup>31\*</sup> Ta ma'oda, 'eguma vetumaqana Ieisu 'inaya yani qiduana ada 'etoyavua weaqina, 'inega nage luvine adi 'abiboda kana veyani kavokavovoyedi? Gebu'e otaqa! Ta 'esi eda vetumaqana 'inega luvine qabuna ni'a kagive'ifoqe aqiaqiedi.

#### 4

'Ebevetalatutula Ebelamo weaqina

<sup>1</sup> Egwavo, kana nuaia Ebelamo weaqina, tauna ita'a me Diu tubuda qiduana. Ta ma'oda 'inega Ebelamo vetunutunuqa 'aiqa Yaubada matanaya? <sup>2</sup> Nage ena viaqa aqiaqidi 'idiega Yaubada 'awahaqiaqiea? Gebu! Mana 'eguma ena viaqayavo 'idiega davetunutunuqa Yaubada matanaya, e 'inega ana fata be davonavane taunega weaqina. Ta Yaubada 'inaya ge davetunutunuqa ena viaqayavo 'idiega. <sup>3\*</sup> Buki Nugwenugweina vonaya, "Ebelamo Yaubada vetumaqanea, e ba'e 'inega Yaubada Ebelamo 'awahaqiaqiea 'inega vetunutunuqa matanaya." <sup>4</sup> Tomeqabu ifewafewa edi mane ge nei kavovo 'inega ida 'ewedi, ta 'esi edi fewa 'inega ve'ia nana ilobelobeia. <sup>5</sup> Ta yavona aqiaqiemi, ge taha toga ana fata ena fewa 'inega navetunutunuqa Yaubada matanaya, ta 'esi ena vetumaqana 'inega Yaubada na'awahaqiaqiea.

<sup>6</sup> Lova kini Deibida ba'e yani diavona weaqina simana tuta nana toluveifadi me edi qaiawa ivetunutunuqa Yaubada matanaya, ta toqaiawa dina ge taha yani aqiaqina ida viaqi, ta tua qaiawa nana ilobeia, <sup>7\*</sup> 'inega Deibida weaqidi 'wayavia vonaya, "Tomeqabu edi luveifana

Yaubada ni'a nuataqoya,  
ana fata ina qaiawa qiduana,  
mana edi luveifana

\* 3:22: Gal 2:16    \* 3:24: Lom 5:1    \* 3:29: Lom 10:12    \* 3:30: Luve 6:4; Gal 3:20    \* 3:31: Md 5:17    \* 4:3:  
Nug 15:6; Gal 3:6    \* 4:7: Same 32:1-2

ni'a awala matanega.

<sup>8</sup> Vonahaqiaqi,  
 'ebeqaiawa qiduana  
 tomeqabu edi luveifana weaqina  
 ge taha ve'ewa ina lobei  
 eda Kaiwabu 'inega."

<sup>9</sup> 'Inega ma'oda, nage Yaubada ena veyoluba ba'e ita'a me Diu damo weaqida, nage mali qabu wese weaqidi? Vonahaqiaqi, veyoluba nana ge me Diu damo weaqida, ta 'esi wese mali tomotau maega weaqida. Kana nuaia Ebelamo weaqina, mana ni'a yavonemi Yaubada Ebelamo 'awatunutunuqea ena vetumaqana weaqina. <sup>10</sup> Ta wese kana nuaia ai tuta 'inaya Yaubada Ebelamo 'awatunutunuqea. Nage Ebelamo nugweta 'wafina ida'a yavulea, ta 'abibodanaya Yaubada 'awatunutunuqea, nage Yaubada madu'awatunutunuqea, ta 'abiboda Ebelamo 'wafi ana da'a lobeia? Egu vetala'ai ana alamani ba'e: Yaubada Ebelamo madu'awahaqiaqiea, ta 'abibodanaya 'wafi ana da'a 'ewea.

<sup>11</sup>\* Ebelamo 'abiboda 'inaya 'wafi ana da'a na'ewea, ta nugweta luvine Yaubada 'inega 'ewea da'a nana weaqina ta vetumaqanea. Ta vetumaqana nana 'inega Yaubada Ebelamo madu'awatunutunuqea, ta 'abiboda Ebelamo ilivu nana viaqia. 'Inega Ebelamo da'a nana 'ewea kavona 'ebe'ita taha Yaubada 'inega ena vetumaqana weaqina. 'Inega Ebelamo tauna tovetumaqanayavo ge adi da'amo tamadi. Mana taudi wese edi vetumaqana 'inega ni'a ivetunutunuqa Yaubada matanaya, ta ge 'wafi ana luda'a 'inega. <sup>12</sup> Ta wese Ebelamo taudi 'wafidi da'ada'ana tamadi. Ta ge adi fata be taudiega ina gabedi tunutunuqidi 'eguma edi vetumaqana ge davelelelea Ebelamo ena vetumaqana 'idewani, mana Ebelamo Yaubada madu'vetumaqanea ta 'abibodanaya veda'a 'ewea.

*Yaubada ena vona fofofola kana 'ewedi vetumaqana 'inega*

<sup>13</sup>\* Vonahaqiaqi, Yaubada Ebelamo tubunavo maega vona fofofolayedi taudi bwa'obwa'o qabuna naneidi ina 'abiluvinea. Ta ba'e vona fofofola nana Ebelamo ge da'ewei ena matayaga Mosese ena luvine 'inega, mana omo'e tuta nana 'inaya Mosese ena luvine nawale ge da'ifoqe Yaubada 'inega, ta 'esi 'ewea mana Yaubada Ebelamo 'awatunutunuqea ena vetumaqana 'inega. <sup>14</sup>\* 'Inega 'eguma ovonaya vonigo Yaubada ena vona fofofolayavo taudi luvine ana tomatayaga weaqidi, ta wese onuaia vonigo taudi ni'a ivetunutunuqa Yaubada matanaya weaqidi. E 'inega ana 'ita kavonaya be vetumaqana yani kavokavovo 'imia, ta wese Yaubada ena vona fofofolayavo ge ana aqiaqimo. <sup>15</sup>\* Ta ona nuave'avinia, tomeqabu itovotovoi be nuanuadi luvine ina 'abibodedi edi veaqiaqi Yaubada matanaya weaqina, e taudi luvematasabu ina lobeia. Mana 'eguma luvine 'eno'eno, e 'inega wese luvine ana toqeu itoatoa.

<sup>16</sup>\* 'Inega o'itei, ge taha vona fofofola Yaubada 'inega da'ifoqe luvine ana 'abiboda 'inega, ta 'esi vetumaqana namo 'inega. Yaubada ena vona fofofola neida ena nei kavovo 'inega. 'Inega ge taha tola'ai 'eguma ita'a me Diu eda ilivu kana 'abibodedi nage gebu. Ta 'eguma eda vetumaqana Ebelamo ena vetumaqana 'idewani, e 'inega Yaubada ena vona fofofola kana 'ewa aqiaqiea. Mana Ebelamo tauna tovetumaqana qabudi tamadi. <sup>17</sup>\* Ta ba'e yani nana weaqina Buki Nugwenugweina 'inaya simana tuta nana Yaubada Ebelamo vonea vonaya, "Ya'a yavenua'ivineu be una vetama bwa'obwa'o qabuna 'inaya bona taha taha ana tovonayavo weaqidi." Ba'e vona nana vonayea, mana Ebelamo Yaubada vetumaqanea tauna ana fata to'aliga nagiveyawaha 'eviviedi, ta wese vetumaqanea be ana fata vaina yani nawale ge ida 'ifoqe naveqaeyedi kavonaya be ni'a ida 'ifoqe.

<sup>18</sup>\* Vonahaqiaqi, Ebelamo ni'a vekofekofe 'inega ena nuanua venatuna weaqina ni'a dawalili. Ta tuta nana Yaubada Ebelamo vona fofofolea be navetama tomotau qabudi

\* 4:11: Nug 17:10-11 \* 4:13: Nug 17:4-6; 22:17-18; Gal 3:29 \* 4:14: Gal 3:18 \* 4:15: Lom 3:20; 5:13 \* 4:16: Gal 3:7 \* 4:17: Nug 17:5 \* 4:18: Nug 15:5

weaqidi, e 'inega Ebelamo Yaubada vetumaqanea. Ta wese Yaubada voneaya, "Eu gadeyavo ina ve'eala kavonaya be 'wadi'wadima mahalaya 'idewani." <sup>19</sup>\* Vonahaqiaqi, Ebelamo ni'a vekofekofe otaqa ta ena waiwai gumwala, mana ya'wala anidedi (100) ni'a lobe. Ta wese moqanena Sela ni'a igagala. Ta tua, Ebelamo ena vetumaqana Yaubada 'inaya ge dadawalili. <sup>20</sup> Ta wese Ebelamo ge davenuana magilafu Yaubada ena vona fofofola 'inaya weaqina, ta 'esi ena vetumaqana vewaiwai otaqa. 'Inega Ebelamo Yaubada awatuboya vona fofofola nana weaqina. <sup>21</sup> 'Inega Ebelamo taunega vonaya, "Yahalamani aqiaqiea, 'eguma Yaubada taha yani weaqina navona fofofolayea, e 'inega ana fata otaqa be yani nana naviaqia." <sup>22</sup>\* Ta Ebelamo ena vetumaqana weaqina Yaubada 'awahaqiaqiea be 'inega vetunutunuqa matanaya.

<sup>23</sup> Ta ba'e vetunutunuqa nana ge Ebelamo ana 'aidega ana fata be nalobei, <sup>24</sup> ta 'esi ita'a wese 'eguma Yaubada kana vetumaqanea tauna Ieisu Keliso eda Kaiwabu giveya 'itotoya 'aligega, e 'inega Yaubada na'awatunutunuqeda. <sup>25</sup>\* Ieisu taunega awafelea 'aliga 'inaya ita'a eda luveifana adi nuataqo weaqina, ta 'abibodanaya Yaubada giveya 'itoto 'eviviea 'aligega, mana nuanuana nave'iteda Natuna ena 'aliga 'inega ana fata be eda luveifana qabuna na'ewa yavuledi. Ta ba'e 'inega Yaubada ana fata na'awatunutunuqeda.

## 5

### *Vetumaqana vuaqina qaiawa*

<sup>1</sup> Vonahaqiaqi, ni'a kahalamania vonigo Yaubada 'awatunutunuqeda eda vetumaqana 'inaya weaqina, 'inega toadaumwala aqiaqi otaqina ni'a kaloba 'eviviea tauna maega eda Kaiwabu Ieisu Keliso ena viaqa 'inega. <sup>2</sup> Eda vetumaqana 'inega Ieisu mieda Yaubada ena nuakolokolo qidua va'inena 'inaya. Ta ba'itagana ba'e nuakolokolo nana ni'a kalulutonovia eda toa 'inaya. 'Inega luaqiaqieda be me eda qaiawa kana lu'ita vane eda toa weaqina Yaubada aqiaqi otaqina maega, mana tuta maimai 'inaya ena aqiaqi nana gamonaya kana toa.

<sup>3</sup>\* Ta wese ana fata be kana qaiawa tuta nana vita kana lobedi eda vetumaqana Ieisu 'inaya weaqina. Ba'e vita diavona yani aqiaqina weaqida, mana 'idiega bibitaqo ana ilivu kana alamani aqiaqiea. <sup>4</sup> Ta bibitaqo nana ana ilivu 'inega eda vetumaqana ge nadawalili ta 'esi kana tovoloi'ita. Ta tovoloi'ita nana eda lu'ita vane ada 'etoyavua weaqina nagivewaiwaiea, ta ba'e 'inega Yaubada na'awahaqiaqieda. <sup>5</sup> Ta ba'e lu'ita vane nana ge wese ana fata nagivenuaviteda, mana Yaubada ena veyoluba qiduana 'idaya ni'a kahalamani aqiaqiea Niboana Gwalagwalana 'inega. Mana tuta nana Niboanina Gwalagwalana neida 'inega nuada 'eqa'uya ena veyoluba qidua va'inena 'idaya weaqina.

<sup>6</sup> Lova yoqoyoqonida katoatoa be ge ada iulamo eda luveifana weaqina. Ta ba'e tuta nana 'inaya Keliso 'ifoqe mai ta ita'a toluveifada weaqida 'aliga. <sup>7</sup> Ge taha toga nuanuana be yawaina nahawafelei ta na'aliga taha tomotau aqiaqina weaqina. Ta ana fata taha toga nuanuana yawaina nahawafelei be na'aliga taha tomotau aqiaqi otaqina weaqina. <sup>8</sup>\* Ta 'esi Yaubada ena veyoluba qiduana ve'iteda mana Natuna Keliso vetunei mai 'aliga weaqida tuta nana ita'a nawale luveifada katoatoa.

<sup>9</sup>\* Ta ita'a ni'a kavetunutunuqa Yaubada matanaya Keliso sulalinega, 'inega kahalamani aqiaqiea nawale na'etoyavuida Yaubada ena luvematasabu 'inega! <sup>10</sup> Lova ita'a Yaubada kavevoalanea eda luveifana 'inega. Ta Natuna ena 'aliga 'inega veiana 'evivieda. 'Inega kahalamani aqiaqiea nawale na'etoyavuida luvematasabu vataya 'inega, mana mayawaina toatoa. <sup>11</sup> 'Inega ba'itagana kana qaiawa qiduana eda veiaiana aqiaqina be vauvauna Yaubada maega weaqina, mana eda Kaiwabu Ieisu Keliso ena viaqa qabuna 'idiega ni'a kaveiaiana aqiaqi Yaubada maega.

### *Adama ena viaqa ta wese Keliso ena viaqa*

\* 4:19: Nug 17:17 \* 4:22: Nug 15:6 \* 4:25: Ais 53:4-5 \* 5:3: Iem 1:2-3; 1Fit 1:5-7 \* 5:8: Ion 3:16; 1Ion 4:10 \* 5:9: Lom 1:18; 2:5; Efe 2:3-5



12 \* Tuta nana Adama luveifana maduviaqia, 'inega 'abibodanaya ba'e luveifa nana wese vaukamana tomotau qabudi 'idia. Ta luveifa nana 'inega wese 'aliga 'ifoqe 'idia, mana tomotau qabudi ni'a iluveifa. 13-14 \* Lova Adama ena tuta 'inaya Yaubada luvine neia 'aiwe 'aidegana vuaqina ge na'aini, ta Adama luvine nana bwegea. Ta tuta nana 'inaya Yaubada ge taha wese luvine daha'ui tomotau 'idia, 'inega ge taha luvine ida bwegei 'idewani Adama. Ta tua taudi wese i'aliga 'ovoa, mana luveifana iviaqidi, 'inega ge adi fata be 'aliga 'inega ina dena. Tuta kuena 'abibodanaya Iesu Keliso mai bwa'obwa'oya, 'inega 'eguma Adama be Keliso edi viaqayavo kana giveleleqedi ta kana 'itedi ge wese ida ve'aidega.

15 'Oloto 'aidegana tauna Adama ena luveifana 'inega 'aliga miea tomotau qabudi 'idia, ta wese 'oloto 'aidegana tauna Iesu Keliso nuataqo miea Tamana Yaubada ena nuakolokolo qiduana 'inega. 'Inega 'eguma kana 'itea ita'a eda luveifana ta Yaubada ena veyoluba qiduana 'idaya ge ida velelelea. 16 Vonahaqiaqi, Yaubada ena veyoluba be Adama ena luveifana vuaqidi ge ida ve'aidega. Mana Adama ena luveifana vuaqina 'inega tomotau qabuda 'aliga visiqina kana lutonovia, ta Yaubada ena veyoluba qiduana 'inega ana fata na'awatunutuqeda. Vonahaqiaqi, eda luveifana qiduana 'inega luaqiaqieda be luvematasabu agona kada lobe, ta veyoluba nana 'inega ni'a yavuida. 17 Ta ba'e Adama nana ena luveifana 'inega 'aliga ena waiwai 'ifoqe tomotau 'idaya ta luvineda, ta ge taha toga ana fata 'aliga nana 'inega nadena. Ta ba'itagana tomeqabu Yaubada ena nuakolokolo aqiaqi otaqina 'inega ni'a ivetunutuqqa matanaya, e taudi adi fata ilivu luveifana ta wese 'aliga ina vewaiwai va'inedi tomotau 'aidegana ena viaqa aqiaqina 'inega, e tauna ana wawa Iesu Keliso.

18 \* Vonahaqiaqi, Adama ena luveifana 'aidegana 'inega luvematasabu miea tomotau qabuda 'idaya, ta Keliso ena viaqa 'aidegana aqiaqi otaqina 'inega Yaubada ana fata be tomotau qabuda na'awatunutuqeda matanaya, ta wese ana fata viaqa nana 'inega yawai vataya kana 'ewea. 19 \* Tomotau 'aidegana Yaubada ena luvine ge damatayagei 'inega tauna ena noga 'inega tomotau qabuda luveifana kafida. Ta wese taha 'oloto ena matayaga 'inega ana fata be tomotau qabuda kana vetunutuqqa Yaubada matanaya.

20 Yaubada ena luvine tomotau neida be yaqisa nuada na'eqa'uya ta eda luveifana qiduana taudega kana 'ita lobe. Ta eda luveifana ge dalua'u, ta 'esi veve'ena'i. Ta tuta nana Yaubada eda luveifana 'itea veve'ena'i, e 'inega ena nuakolokolo weaqida wese ve'ena'i va'ine. 21 \* Lova ilivu luveifana tomotau qabudi 'abiluvinedi miedi 'aliga 'inaya, ta ba'itagana Yaubada ena nuakolokolo aqiaqi otaqina 'abi'abiluvinedi. E ba'e nuakolokolo nana 'inega ni'a kavetunutuqqa Yaubada matanaya, ta vetunutuqqa nana 'inega yawai vataya kana lobe eda Kaiwabu Iesu Keliso 'inega.

## 6

### *Iesu luveifana ena waiwai luveawalia*

1 Nage taha toga 'imiega navonaya, "Tuta qabuna luveifana kana viaviaqidi be yaqisa Yaubada ena nuataqo be wese ena nuakolokolo qiduana naneida." 2 Ta yavona 'eviviemi, gebu'e otaqa! Mana ita'a tovetumaqana eda nuanua luveifadi ni'a kanogedi, 'inega ge daluaqiaqieda be luveifa diavona kana viaqa 'eviviedi lova 'idewani. 3 \* Nuanuagu ona alamania lova tuta nana kave'ale vetumaqana be kababitaiso Iesu Keliso 'inaya sabi ve'aidega maega, e 'inega wese kavonaya be kada 'aliga tauna maega. 4 \* Mana babitaiso nana 'inega kavona kada 'aliga be wese kavona taudega kada tavunida Keliso maega. Ta Tamana ena waiwai aqiaqi otaqina 'inega giveya'itoto 'eviviea 'aligega. 'Inega ita'a wese toa vauvauna 'inaya katoatoa. 5 Iesu toa vauvauna lobe Yaubada 'inega tuta nana 'aliga 'etolui 'inaya, mana 'aliga nana 'abibodanaya Yaubada giveya'itoto

\* 5:12: Nug 3:6; Lom 6:23 \* 5:13-14: Lom 4:15 \* 5:18: 1Kol 15:22 \* 5:19: Ais 53:11 \* 5:21: Lom 6:23  
\* 6:3: Gal 3:27 \* 6:4: Kol 2:12

'eviviea. 'Inega ita'a wese nagiveya'itoto 'evivieda toa vauvauna 'inaya, mana ni'a kave'aidega Iesu maega ena 'aliga 'inega.

<sup>6</sup> \* Kana nuave'avinia tuta nana Iesu itutuve'ewea 'etoluai 'inaya, e 'inega kavona ita'a wese eda ilivu nugwenugweina Yaubada tutuve'ewea Natuna maega be yaqisa eda nuanua luveifana ena waiwai nahawala 'idega. 'Inega ba'itagana ita'a yavuyavuida be luveifana ge wese ana fata naluvineda. <sup>7</sup> Mana ni'a kahalamaniana ilivu luveifana ge ana fata be tomotau 'ali'aligidi na'abiluvinedi. 'Inega ita'a yavuyavuida eda ilivu luveifana 'idiega, mana kavonaya be kada 'aliga Iesu maega. <sup>8</sup> Ta 'eguma ni'a ka'aliga Keliso maega, e 'inega kavetumaqana aqiaqiea nawale mayawaida tauna maega toa vauvauna kana lobe. <sup>9</sup> Ba'e yani diavona kahalamani aqiaqiedi, mana Keliso ya'itoto 'evivi 'aligega, ta ge wese ana fata na'aliga 'evivi. Vonahaqiaqi, 'aliga ena waiwai ge wese ana fata be na'abiluvinei. <sup>10</sup> Keliso tuta 'aidegana 'aliga tomotau eda ilivu luveifana weaqidi. Ta 'aliga nana 'inega ilivu diavona vewaiwai va'inedi. Ta ba'e 'itagana mayawaina toatoa Tamana Yaubada ana awatubo sabi give'ena'ina. <sup>11</sup> \* 'Inega omi'a wese taumi weaqimi ona nuanua kavonaya be ni'a oda 'aliga ilivu luveifana 'idiega, ta 'esi mayawaimi Yaubada maega otoatoa ana awatubo weaqina Iesu Keliso ena viaqa 'inega.

<sup>12</sup> \* 'Inega ge ona awafelemi nuanua luveifana adi viaqa 'idia, mana 'eguma luveifa nana ona viaqia, e 'inega wese luveifa diavona ina'abiluvinemi. Ta ona nuave'avinia 'wafimi nawale ina 'aliga, ta niboanimi ge ina 'aliga. <sup>13</sup> \* Ge taha 'wafimi du'unavo ona awafeledi be ina vetoiula ilivu luveifana ana viaqayavo 'idia. Ta 'esi taumiega ona ve'ineiemi Yaubada 'inaya, mana yawai vauvauna ni'a neimi. 'Inega 'wafimi du'unavo qabudi ona awafeledi be ina vetofewa Yaubada 'inaya viaqa tunutunuqidi be aqiaqidi weaqidi. <sup>14</sup> \* Vonahaqiaqi, omi'a ba'itagana luveifana ge da'abiluvinemi, mana omi'a ge luvine ena waiwai 'ayanaya oda toatoa ami 'etoyavua weaqina. Ta 'esi omi'a Yaubada ena nuakolokolo 'inega yavuyavuimi otoatoa.

*Yaubada* 'inaya kana vetofewa

<sup>15</sup> Ni'a yave'itemi Yaubada ena nuakolokolo 'inega ni'a yavuida luvine ana 'abiboda 'inega. Ta nage taha toga 'imiega una vonaya, "Eguma Yaubada ni'a yavuida luvine ana 'abiboda 'inega, e 'inega nage ana fata be luveifana kana viaqa 'evi'eviviedi?" Ta yavona aqiaqiemi, gebu. Ge wese 'idewani ona nuanua 'aiqa! <sup>16</sup> \* Ta 'esi nuanuagu ona alamani aqiaqiea 'eguma toyani nuanuami be ona 'abibodea, e 'inega yani nana navetovanugweta 'imia, waisa? 'Inega 'eguma luveifana ona matayagea, e 'inega Yaubada maega ge ana fata be ona toa vataya. Ta 'eguma Yaubada ona matayagea, e 'inega na'awahaqiaqiemi be ilivu tunutunuqina ana 'eda 'inaya ona tauya. <sup>17</sup> Ta yalulukaiwa qiduana Yaubada 'inaya, mana lova omi'a luveifana luvinemi, ta 'abibodanaya ve'ita aqiaqi otaqina Iesu weaqina o'ewea, ta ve'ita nana emi nuanua qabuna 'inega o'awahaqiaqiea ta omatayagea. <sup>18</sup> Ta ba'e matayaga nana 'inega 'etoyavua ni'a olobea luveifana ena waiwai 'inega, ta ba'itagana ni'a ovetofewa emi Kaiwabu vauvauna weaqina, 'inega Yaubada ena ilivu tunutunuqina ana 'eda 'inaya otautauya.

<sup>19</sup> Egu ve'ita ba'e yagigivesimatalia 'imia taudi tofewa be wese kaiwabu edi ilivu 'inega, mana ve'ita diavona adi alamani tufwana meaqana. Lova omi'a ilivu bwavubwavudi be wese luvine adi qeu 'idia taumiega oawafelemi ta ovetofewa weaqidi. Ta ba'itagana luaqiaqiemi be ilivu tunutunuqina ana Kaiwabu ona nuanua weaqina be ona vetofewa 'inaya, be yaqisa emi toa navevunavunaqa Yaubada matanaya.

<sup>20</sup> Vonahaqiaqi, lova ilivu luveifana ana kaiwabu 'inaya ovetofewa, ta omo'e tuta diavona 'idia ge wese oda nuanua ilivu aqiaqidi adi viaqa weaqidi. <sup>21</sup> Ta ba'e ilivu diavona adi ve'ia tola'ai? Vonahaqiaqi, adi ve'ia ge taha yani aqiaqina, waisa? 'Inega ba'itagana oiniyauyau ba'e ilivu diavona ovaiqidi weaqidi, mana adi toviaqayavo luvematasabu

\* 6:6: Gal 5:24 \* 6:11: 2Kol 5:15; Gal 2:19 \* 6:12: Nug 4:7 \* 6:13: Lom 12:1 \* 6:14: 1Ion 3:6 \* 6:16: Ion 8:34; 2Fit 2:19

vataya ina lobe. <sup>22</sup> Ta ba'itagana Yaubada ni'a 'etoyavuimi ilivu luveifana ena waiwai 'inega, e 'inega ni'a ovetofewa kavovo tauna weaqina. Ta wese ba'e 'itagana ilivu simasimatalina ana 'eda 'inaya otautauya ta oviaviaqidi, ta ba'e 'eda nana 'inega ni'a olugu Yaubada ena qabu 'idia ta ana ve'ia yawai vataya ona 'ewea. <sup>23</sup> \* Vonahaqiaqi, ilivu luveifana ana ve'ia toasi'i vataya Yaubada 'inega. Ta Yaubada ena nei kavovo 'inega yawai vataya kana 'ewea, mana ita'a ni'a kave'aidega eda Kaiwabu Iesu Keliso maega.

## 7

*Luvine ge wese ana fata nayoqonida*

<sup>1</sup> Omi'a taigwavo be novugwavo, Mosese ena luvineavo ni'a oalamanidi, 'inega wese ni'a oalamanida tomotaudi adi luaqiaqi be luvine ina matayagedi, mana luvine diavona tomotau mayawai dimo weaqidi, ta ge 'ali'aligidi weaqidi. <sup>2</sup> Egu vona ba'ena ena givesimatalia 'imia, ona noqolia. Tuta nana taha vavine ina vaqi, e 'inega vaqi ana luvine nakafidi moqanedi maega, mana 'oloto nana mayawaina toatoa. Ta 'eguma 'oloto nana na'aliga, e 'inega vavine dina vaqi ana luvine 'idiega ni'a gumwala. <sup>3</sup> Ta 'eguma moqanedi nawale mayawaina toatoa, ta tua mali 'oloto maega ina vaqi, e 'inega vavine dina velamo'eno kavokavovo ilivuna iviaviaqia. Ta 'esi 'eguma moqanedi na'aliga, e 'inega taudi vaqi ana luvine 'inega na'eyavuidi, be adi fata mali 'oloto maega ina vaqi 'evivi. Ba'e vaqi nana ge velamo'eno kavokavovo ana ilivu 'idewani, mana moqanedi nugwenugweina ni'a 'aliga.

<sup>4</sup> \* Taigwavo be novugwavo, egu vonayavo 'iudi ba'e: Omi'a wese 'idewani vavine dina. Mana omi'a kavonaya be ni'a oda 'aliga Keliso maega ana 'etoluai 'inaya, e 'inega Mosese ena luvine ena waiwai 'ayanaya ge oda toatoa, ta 'esi ni'a 'inega odena. Ta Yaubada Iesu giveya'itoto 'eviviea 'aligege, 'inega ba'e 'itagana Iesu maega ni'a ove'aidega, e 'inega yani qabuna aqiaqina Yaubada weaqina ami fata ona viaqidi. <sup>5</sup> Lova tauda eda nuenuega katoa, 'inega eda nuanua luveifadi iluvineda, ta nuanua diavona 'idiega 'wafida kagivebwavudi. Ta Yaubada ena luvine eda nuanua sitonovidi 'inega nuanuada ilivu luveifadi kana viaqidi, e ba'e nuanua diavona 'idiega ve'ia luveifana kalobe, ta ve'ia nana ana alamani ba'e: Tuta vataya 'inaya kana toasi'i Yaubada 'inega. <sup>6</sup> \* Ta ba'itagana yavuyavuida katoatoa luvine nana 'inega, mana ita'a kavonaya be kada 'aliga Keliso maega, 'inega luvine nana ena waiwai ge wese ana fata nakafida. 'Inega ba'itagana ada fata otaqa be kana vetofewa Yaubada weaqina. Ge lova 'idewani Mosese ena luvine 'waya'wayavina 'inega, ta 'esi 'eda vauvauna 'inega, ta ba'e 'eda nana Yaubada Niboanina 'inega mai.

*Yaubada ena Luvine 'inega eda luveifana kahalamanidi*

<sup>7</sup> \* Nage taha toga 'imiega navonaya, "Ma'oda, nage Mosese ena luvine yani luveifana?" Ta yavona aqiaqiem, ge wese 'idewani ona nuanua 'aiqa! Mana luvine nana ge wese luveifana, ta 'esi luvine nana ve'itegu ilivu luveifana yani luveifa otaqina. Vonahaqiaqi, ge agu fata be egu luveifana eda alamanida 'eguma ge taha luvine da'eno'eno. Ta Yaubada ena luvineavo i'eno'eno ta taha 'idiega vonaya, "Ge mali tomotau edi kulufa weaqina ona nuanua govaqa sabi 'ewana." E 'inega yahalamani aqiaqiea ilivu nana yani luveifana. <sup>8</sup> Ta tuta nana Yaubada ena luvine ve'itegu vonigo nuagovaqa ana ilivu yani luveifana, 'inega ge eda lua'u luveifa nana ana viaqa 'inega, ta 'esi egu nuanua qiduana be yani qabuna luveifana ena viaqidi. Ta 'eguma ge taha luvine da'eno'eno e 'inega luveifa nana ena waiwai ge ana fata be naluvetuvetunegu luveifana 'inaya.

<sup>9</sup> Lova Yaubada ena luvine adi alamani weaqina nuagu ge da'eqa'ui, 'inega ge wese eda nuanua egu toa weaqina. Ta 'esi tuta nana luvine nana ana alamani ya'ewea e 'inega nuagu 'eqa'uya vonigo ya'a luvine nana ni'a yabwegea, ta Yaubada 'inega ni'a yatoasi'i. <sup>10</sup> Yaubada ena luvine aqiaqina 'iuna be namiegu yawai vataya 'inaya, ta ya'a

\* 6:23: Lom 5:12,15 \* 7:4: Lom 6:2,11 \* 7:6: Lom 8:2; 6:4 \* 7:7: 'Ifo 20:17; Luve 5:21

egu luveifana 'inega luvine nana vetoasi'iegu Yaubada 'inega. <sup>11</sup> \* Tuta nana alamani ya'ewea Yaubada ena luvine taha weaqina vonaya, "Ge taha tomotau ena kulufa weaqina ona nuanua govaqa sabi 'ewana!" E 'inega egu nuanua luveifana vewaiwai ta u'vegu vonigo Yaubada ena luvineavo adi matayaga 'inega toa vataya ena lobe. Ta 'esi egu nuanua luveifana ana matayaga 'inega toasi'i vataya Yaubada 'inega yalobe.

<sup>12</sup> \* Ta tua, Yaubada ena luvineavo nawale gwalagwaladi be tunutunuqidi ta wese aqiaqi otaqidi. <sup>13</sup> 'Inega ma'oda, nage luvine aqiaqina 'inega 'aliga ana luvine yalobe? Egwavo, ge wese 'idewani ona nuanua 'aiqa! Ta luveifana Yaubada ena luvine aqiaqina vefewea agu luvematasabu sabi give'ifoqena. Ta ba'e 'inega luveifana ena ilivu luveifa otaqina kana alamani aqiaqiea, mana Yaubada ena luvine aqiaqi otaqidi vefewedi ena viaqa luveifadi weaqina.

#### *Eda vedavi luveifana maega*

<sup>14</sup> Ni'a kahalamania Mosese ena luvineavo Yaubada Niboanina 'inega mai yani aqiaqina. 'Inega luvine nana ge taha ena luveifamo, ta 'esi ya'a taugu 'iguya luveifana 'eno'eno. Mana luvine nana niboanida weaqina, ta ya'a tomotau kavokavovo 'ali'aligigu, 'inega luveifana 'abi'abiluvinegu kavona be egu kaiwabu. <sup>15</sup> \* Vonahaqiaqi, egu viaqayavo yaviaviaqidi ge eda alamania tola'ai weaqina yaviaviaqidi. Mana 'eguma yani aqiaqina nuanuagu be ena viaqia e ba'e yani nana ge eda viaqia, ta 'esi toyani ge nuanuagu be ena viaqi, e ba'e yani nana yaviaviaqia. <sup>16</sup> Ni'a yahalamani aqiaqiea egu viaqayavo yani luveifadi. Mana tuta nana yaviaviaqidi, e 'inega 'abibodanaya agu lutonova ge aqiaqina Yaubada matanaya. 'Inega luvine diavona ya'awahaqiaqiedi yani aqiaqi otaqidi weafigu, mana iveve'itegu ya'a luveifagu. <sup>17</sup> Ta ge agu fata be ya'a taugu egu nuenuaga ena 'abiluvinegu, mana luveifa nana giwaliguya 'eno'eno tauna vavanugwetegu 'inega ba'e luveifa diavona yaviaviaqidi.

<sup>18</sup> Yahalamani aqiaqiea ge taha yani aqiaqina da'eno'eno taugu egu nuanua 'inaya, mana ya'a totoa bwa'obwa'o. Vonahaqiaqi, nuanuagu qiduana yani aqiaqina ena viaqia, ta ge agu fata yani diavona ena give'ifoqeyedi be ena viaqidi. <sup>19</sup> Mana nuanuagu be yani aqiaqina ena viaqia, ta ge eda viaqia. Ta wese yatohotoho waiwai be egu ilivu luveifana ena givelua'uya, ta ge agu fata, ta tua nawale yaviaviaqidi. <sup>20</sup> Ta 'eguma vaina yani ge nuanuagu be ena viaqidi, ta tua nawale yaviaviaqidi, e 'inega kavona ya'a ge eda viaqidi, ta 'esi luveifana 'iguya 'eno'eno luluvetuvetunegu 'inega yaviaviaqidi.

<sup>21</sup> Ana 'ita kavona ya'a egu toa bwa'obwa'oya ana luvine ba'e 'idewani: 'Eguma nuanuagu be yani aqiaqina ena viaqia, 'inega luveifana gigivelua'ugu yani aqiaqidi adi viaqa 'inega, ta 'esi luveifana yaviaviaqia. <sup>22</sup> Ya'a egu nuenuaga ta wese giwaligu qabuna 'inega yaqaiqaiawa qiduana Yaubada ena luvineavo weaqina. <sup>23</sup> \* Ta yahalamani aqiaqiea wese taha waiwai fewafewa 'wafigu 'inaya, ta ba'e waiwai nana egu nuanua vevoalanea ta vewaiwai va'inea, 'inega yavetofewa kavovo luveifa nana 'iguya 'eno'eno weaqina. <sup>24</sup> Aioi! Vonahaqiaqi, ya'a ni'a yaluveifa otaqa! Nage togama ana fata be egu luveifana 'inega na'etoyavuiqu? <sup>25</sup> \* Ta kana lukaiwa Yaubada 'inaya, mana egu vetala'ai ana ve'ia ba'e: Iesu Keliso eda Kaiwabu 'inaya 'etoyavua kana lobe. Ya'a giwaligu qabuna 'inega nuanuagu qiduana Yaubada ena luvine weaqina ena vetofewa, ta mana luveifana egu nuanua 'inaya 'eno'eno, 'inega luveifa nana vefewegu ena nuanua 'inaya.

## 8

#### *Yawai aqiaqina Yaubada Niboanina 'inega*

<sup>1</sup> Yani qabuna ni'a yave'itemi eda vetunutunuqa Yaubada matanaya weaqina, 'inega ona alamani aqiaqiea tomeqabu ni'a ive'aidega Iesu Keliso maega taudi ge wese luvematasabu ina lobei Yaubada 'inega. <sup>2</sup> Ba'e vona nana vonahaqiaqi, mana Yaubada Niboanina ena waiwaiega toa vauvauna ni'a neida. Ta ba'e toa nana 'inega yavuida ilivu

\* 7:11: Nug 3:13 \* 7:12: 1Tim 1:8 \* 7:15: Gal 5:17 \* 7:23: Gal 5:17; 1Fit 2:11 \* 7:25: 1Kol 15:57

luveifadi adi viaqa 'idiega, e omo'e 'inega luveifana ena waiwai ge wese ana fata be navetoasi'ieda Yaubada 'inega. <sup>3</sup> Mosese ena luvineavo Yaubada 'inega ge adi fata be ina givelua'uda ilivu luveifana adi viaqa 'idiega. Ita'a ge ada fata be luvine diavona kana 'abibodedi, mana 'wafi ena nuanua ka'abibodedi 'inega ita'a dawalilida. Ta Yaubada ena nuenuega mali 'eda give'ifoqeyea ada 'etoyavua weaqina. 'Inega Natu Otaqina vetunei mai bwa'obwa'oya ta vetomotau ita'a 'idewani. Ta ita'a me eda luveifana, ta tauna ge taha ena luveifamo. 'Inega Yaubada Natuna vegubayea eda luveifana weaqina, ta ba'e 'inega luveifana ena vetoluvine 'idaya luveawalia.

<sup>4</sup>\* Yaubada ba'e yani diavona viaqia be yaqisa ena nuanua ena luvine weaqina ana aqiaqi na'ifoqe. Ta ba'e yani nana na'ifoqe tomeqabu Yaubada Niboanina ena nuanua iviaviaqia 'idia, ta ge luveifana ana toviaqayavo 'idia. <sup>5</sup> Tomeqabu viaqa luveifana 'abi'abiluvinedi taudi tuta qabuna yani luveifana weaqina inuanua, ta tomeqabu Niboana Gwalagwalana ni'a 'abi'abiluvinedi, e taudi tuta qabuna inuanua yani aqiaqina weaqina, ta ba'e 'inega Yaubada Niboanina igiveqaiawea. <sup>6</sup> Ta 'eguma viaqa luveluveifadi emi nuanua i'abi'abiluvinea, 'inega ge ami fata ona toa vataya Yaubada maega. Ta 'eguma Yaubada Niboanina 'abi'abiluvine, e 'inega ana ve'ia toadaumwala be wese yawai vataya Yaubada maega ona lobe. <sup>7</sup> Nuanuagu egu vona ena givesimatalia 'imia, mana tomotau edi viaqa luveifana 'idiega tuta qabuna Yaubada iveaviea, ta ge taha tuta ena luvine ida matayagea, ta wese tuta maimai 'idia ge ina matayagei. <sup>8</sup> Ba'e 'iuna 'inega tomeqabu taudi nawale viaqa luveifana ena luvine 'ayanaya itoatoa ge adi fata be Yaubada ina giveqaiawei.

<sup>9</sup>\* Ta omi'a ge oda toatoa viaqa luveifana ena 'abiluvine 'ayanaya. Vonahaqiaqi, omi'a Niboana ena 'abiluvine 'ayanaya otoatoa 'eguma Yaubada Niboanina ni'a o'ewea ta giwalimia 'eno'eno. 'Inega ona nuave'avinia 'eguma taha toga Keliso Niboanina 'inaya ge da'eno'eno, e 'inega tomotau nana ge wese Keliso ena tomotau. <sup>10</sup>\* Vonahaqiaqi, nawale 'wafimi ina 'aliga emi luveifana 'inega. Ta 'eguma Keliso Niboanina 'imia toatoa 'inega niboanimi ge wese na'aliga, mana omi'a ni'a ovetunutunuqa Yaubada matanaya. <sup>11</sup> Yaubada Niboanina Iesu giveya'itotoya 'aligega, ta ba'e Niboana nana 'imia toatoa. Vonahaqiaqi, 'wafimi yani 'ali'aligina, ta Yaubada ba'e Niboana nana 'inega 'wafimi nawale nagiveyawaha 'eviviedi 'idewani lova Keliso giveya'itotoya 'aligega.

<sup>12</sup> 'Inega taigwavo be novugwavo, omi'a ge ami luaqiaqi be tola'ai 'wafimi ena nuanua nakeiemi be ona viaqidi, ta 'esi Yaubada Niboanina ena nuanua ona viaviaqidi. <sup>13</sup>\* Mana 'eguma 'wafimi ena nuanua ona 'abibodea 'inega ona veilage vataya. Ta 'eguma Niboana Gwalagwalana ena waiwaiega 'wafimi ena nuuanuayavo luveifadi ona nogedi, e 'inega ona toa vataya Yaubada maega, <sup>14</sup> mana tomeqabu Yaubada Niboanina vavanugwetedi e taudi Yaubada natunavo.

<sup>15</sup>\* Omi'a Yaubada Niboanina ni'a o'ewea, ta ba'e Niboani nana ge ana fata nayoqona 'evivieki kavona tofewa kavovo 'idewani, ta wese ge ana fata nagivemwaninivemi. Ta 'esi ba'e Niboani nana 'inega Yaubada ni'a fayayemi natunavo 'idewani, ta ena susu gamonaya otoatoa, 'inega ona voneaya, "Tamagu, o'a Tama otaqigu!" <sup>16</sup>\* Mana Yaubada Niboanina Gwalagwalana vonavona giwali otaqidaya vonahaqiaqi ita'a natunavo. <sup>17</sup> E 'inega yani qabuna 'eno'eno vatayadi 'inaya i'eno'eno kana 'ewedi, mana ita'a natunavo. 'Inega yani diavona Yaubada Keliso ni'a neia, e ita'a wese nawale naneida. Ta 'eguma nuuanuada yani qabuna aqiaqi otaqidi kana lobedi Yaubada 'inega, e 'inega nugweta wese Keliso ena veilage visiqina kana vebaea 'idewani tauna ni'a vebaea.

*Tuta maimai ana aqiaqi otaqa kana* 'itea

<sup>18</sup> Ta ba'itagana visiqi diavona kavevebaedi ge kana giveleleqedi Yaubada ena aqiaqi otaqa maega, mana tuta maimai 'inaya Yaubada ena aqiaqi otaqa nave'ifoqeyea 'idaya,

\* 8:4: Gal 5:16,25 \* 8:9: 1Kol 3:16; 12:3 \* 8:10: Gal 2:20 \* 8:13: Gal 6:8; Kol 3:5 \* 8:15: 2Tim 1:7; Mk 14:36 \* 8:15: Gal 4:5-7; Ve 21:7 \* 8:16: 2Kol 1:22

ta ba'e aqiaqi nana visiqa diavona veqidua va'inedi. <sup>19</sup> Vonahaqiaqi, kuyavata qabuna me edi 'iva'ava'ata iba'eba'e Yaubada ena simana 'ifoqe yani taha weaqina, mana ba'e simana nana 'inega ina alamani aqiaqiea tomeqabu Yaubada natu otaqinavo. <sup>20-21</sup> \* Mana kuyavata qabudi Yaubada ena nuanua ana 'etofwafwa weaqidi ge ida lobei 'inega iveyani kavokavovo. Ta ge taudiega edi nuenuega ida veyani kavokavovo, ta 'esi Yaubada ena nuanua 'inega, mana Yaubada nuanuana kuyavata dina ina lu'ita vane 'inaya adi yoqona ana 'ewa yavula weaqina, 'inega ge wese ina 'aliga nage ina davula. Ta 'abibodanaya Yaubada nave'ifoqeyedi 'etoyavua aqiaqi otaqina 'inaya natunavo maega. <sup>22</sup> Mana ni'a kahalamania lova 'inega be ana laba ba'e 'itagana kuyavata qabudi ihidaida'alo'alolo kavona be vivine visiqa ivevebaea edi venatuna 'inaya. <sup>23</sup> \* Ta wese ita'a tovetumaqana nuadega kaidaida'alo'alolo ada 'etoyavua weaqina. Vonahaqiaqi, Niboana Gwalagwalana ni'a ka'ewea Yaubada ena nei kavovo 'inega, ta ba'e nei nana 'inega Yaubada ena veyoluba ni'a kalutonovia, ta ena veyoluba qabuna nawale ge kada 'ewa aqiaqiei, mana tuta maimai 'inaya Yaubada na'awahaqiaqieda natunavo 'idewani, mana ni'a fayayeda. Ta omo'e tuta nana 'inaya ena aqiaqi otaqa qabuna kana 'ita lobe. Ta wese ni'a vona fofofolea omo'e tuta nana 'inaya 'wafi vauvauna naneida, ta 'wafi nana ge ena vekofekofemo be wese ge ena 'aligamo. <sup>24</sup> Ita'a Yaubada ni'a 'etoyavuida, 'inega me eda nuave'avina kalulu'ita vane eda toa yavuyavuina weaqina. Mana yavui nana 'eguma ni'a kada 'ewea, e 'inega ge ana aqiaqimo be kana ba'eba'e yavui nana weaqina. <sup>25</sup> Ta 'esi 'eguma taha yani weaqina kalulu'ita vane, ta yani nana nawale ge kada 'ewei, e 'inega ge kana lua'u ta 'esi me eda bibitaqo kana ba'eba'e yani nana weaqina.

<sup>26</sup> Ta wese 'idewani tuta nana niboanida idawalili, e 'inega Niboana Gwalagwalana iuiuleda, mana ita'a ge kada alamania ma'oda kana venoqi 'aiqa. 'Inega Niboani nana ge vona 'inega davevenoqi weaqida, ta 'esi ena ida'alo'alolo 'inega vevenoqi weaqida. <sup>27</sup> \* Yaubada ita'a tomotau eda nuanua qabuna giwalidaya ni'a alamani aqiaqiedi, ta wese Niboana Gwalagwalana ena nuanua alahalamania, mana Niboana nana vevenoqi ita'a tovetumaqana weaqida Yaubada ena nuanua 'inega.

<sup>28</sup> \* Ta ni'a kahalamania vaina tuta yani aqiaqina i'ifo'ifoqe ta vaina tuta yani luveifana i'ifo'ifoqe tomotau 'idaya, ta Yaubada ana fata ba'e yani diavona navefewedi be 'inega vuaqa aqiaqina ina 'ifoqe 'idiega. Yaubada ba'e yani nana naviaqia tomeqabu iveveyolubea 'idia. Ba'e tomotau diavona Yaubada ena nuenuega ni'a venuma'ivinedi, be ena nuanuayavo ina viaqidi. <sup>29</sup> \* Yaubada tomotau diavona madualamanidi, ta wese ena nuanua 'inega maduvenua'ivinedi be ina veilivu Natuna ena ilivu 'idewani, be yaqisa Natuna leisu nave'unutau ta vevenua'ivini dina kavona tainavo be novunavo 'idewani. <sup>30</sup> Ta Yaubada taudi vevenua'ivini dina wese gabedi ina mai 'inaya. Ta gaba nana 'abibodanaya wese 'awatunutunuqedi, 'inega taudina wese vona fofofolea ena aqiaqi otaqa ina 'ita lobe tauna 'inaya.

*Ge taha yani ana fata naha'usi'ieda Yaubada ena veyoluba 'inega*

<sup>31</sup> \* Ta egu vona diavona adi alamani aqiaqi ba'e: 'Eguma ita'a Yaubada maega ni'a kave'aidega, e 'inega ge taha toga nage ge taha yani ana fata be navewaiwai va'ineda. <sup>32</sup> Yaubada Natu Otaqina ge davegagalei, ta 'esi ve'ineiea ana aviayavo nimadia ta iluve'aligia eda luveifana sabi 'ewa yavulidi. Ta 'eguma Yaubada ba'e yani nana viaqia ita'a eda veaqiaqi weaqina, e 'inega kana alamani aqiaqiea wese yani qabuna nanei kavovoda eda toa aqiaqina weaqina. <sup>33</sup> \* Ta 'eguma vaina tomotau Yaubada matanaya ina tovolu ta ina ve'eweda eda luveifana weaqina, 'inega Yaubada edi ve'ewayavo ge wese na'awahaqiaqiedi. Vonahaqiaqi, ita'a qabuda Yaubada ena luvine ni'a kabwegea, ta Yaubada ena nuakolokoloyega ni'a 'awatunutunuqeda. <sup>34</sup> 'Inega ge taha toga ana fata be navonaya, "Yaubada ena tomotauyavo luvematasabu ina 'ewea." Ta wese leisu Keliso

\* 8:20-21: Nug 3:17-19 \* 8:23: 2Kol 5:2-4 \* 8:27: Same 139:1 \* 8:28: Efe 1:11 \* 8:29: Kol 1:18; Ibe 1:6  
\* 8:31: Same 118:6 \* 8:33: Ais 50:8-9

ge 'idewani navona 'aiqa, mana tauna weaqida 'aliga, ta Yaubada giveyawaha 'eviviea weaqida, ta ba'e 'itagana Tamana ana 'ataqia toatoa, ta vevenoqi weaqida. <sup>35</sup> 'Inega ge taha toga nage ge taha yani ana fata be naha'usi'ieda Keliso ena veyoluba 'inega, mana Ieisu ge wese nanogeda 'eguma vita kana lobedi. Ta wese ge nanogeda 'eguma tomotau ina vevoalaneda. Ta wese ge nanogeda tuta nana botana navunuqida. Ta wese ge nanogeda 'eguma ge ada kalekomo. Ta wese ge nanogeda tuta nana veilage taha taha kalobelobedi. Ta wese ge nanogeda 'eguma tomotau ivevevonavona sabi luve'aligida. Vonahaqiaqi, ba'e yani diavona kana vebaedi, <sup>36</sup>\* mana Buki Nugwenugweina vonaya, "Keliso, o'a au wawa weaqina

tuta qabuna a'ali'aliga 'waqi.  
Ima'a kavonaya sifi  
aba'eba'e ema 'aliga weaqina."

<sup>37</sup> Vonahaqiaqi, ge taha tola'ai 'eguma ba'e vita diavona kana lobedi ta kana vebaedi, mana Keliso veveyolubeda, ta tauna 'inega ada fata be yani diavona kana vewaiwai va'inedi.

<sup>38</sup> Ta yahalamani aqiaqiea vonigo ge taha yani ana fata be Keliso ena veyoluba 'inega naha'usi'ieda. Ge taha tola'ai 'eguma 'ali'aligida nage mayawaida katoatoa. Ta wese taudi tovale'ewa luveluveifadi be toluvine waiwai bwa'obwa'o be mahala nuaninaya itoatoa, ge adi fata be ina vetoasi'ieda Keliso ena veyoluba 'inega. Ta niboana luveluveifadi ge wese adi fata ina vetoasi'ieda Keliso ena veyoluba 'inega. Ta wese egu nuanua ba'itagana be 'ibe weaqina ge ana fata navetoasi'iegu Keliso ena veyoluba 'inega. Ba'e yani diavona ge adi fata be ina a'usi'ieda Keliso ena veyoluba 'inega. <sup>39</sup> Ta wese ge taha yani mahala debanaya nage bwa'obwa'o 'aya otaqinaya adi fata be Yaubada 'inega ina vetoasi'ieda. 'Inega ge taha yani kuyavata qabuna 'inega ana fata be ina vetoasi'ieda Yaubada ena veyoluba 'inega. Ta ba'e veyoluba nana Yaubada ve'ifoqeyea 'idaya eda Kaiwabu Ieisu Keliso ena viaqayavo 'idiega.

## 9

### *Me Diu ta Yaubada weaqidi*

<sup>1</sup> Nuanuagu ena vonemi ma'oda egu tomotauyavo me Diu Yaubada inoga 'aiqi. Ta egu vona ba'e vonahaqiaqi mana Niboana Gwalagwalana vona diavona 'awahaqiaqiedi, 'inega ge wese 'wamomo eda lutonovia Yaubada matanaya vona diavona weaqidi. Ta ge eda u'au'ava, mana ya'a Keliso maega ni'a ave'aidega. <sup>2-3</sup>\* Ya'a giwaliguya yanuvita qidwana ta tuta qabuna yadoudou egu tomotauyavo weaqidi, taudi taigwavo be novugwavo me Diu. Ta 'eguma Yaubada davetoasi'iegu Keliso 'inega be vetoasi'i nana 'inega me Diu 'etoyavua ida lobe, e 'inega egu nuanua 'idewani Yaubada naviaqia egu tomotauyavo adi iula weaqina. <sup>4</sup>\* Vonahaqiaqi, egu tomotauyavo me Diu Yaubada ena nuenuega venua'ivinedi natu otaqinavo. Ta ena simatala aqiaqi otaqina ve'ita 'ifoqeyea 'idia. Ta awafela viaqia taudi maega, ta wese ena luvineavo neidi. Taudi adi luaqiaqi be ina awatuboya Vanue Gwalagwalana 'inaya, ta wese ena vona fofofola aqiaqi otaqidi ni'a i'ewedi. <sup>5</sup> Tubudiavo 'idewani Ebelamo be Aisake ta wese Iakobo taudi Yaubada ena tomotauyavo 'ena'ena'idi. Ta wese Keliso tauna Diu 'olotona, mana me Diu edi gade 'inega vi'oi. Keliso nana tauna Yaubada, ta tauna kuyavata qabuna luviluvinedi, ta luaqiaqiea be tuta qabuna ana awatubo 'eno'eno vatayana nalobelobea tomotau 'idega! Vonahaqiaqi, eda nuanua 'idewani.

<sup>6</sup> Vonahaqiaqi, egu tomotauyavo me Diu 'idiega vaina Keliso ge ida 'awahaqiaqiea. 'Inega ma'oda, nage Yaubada ena vona fofofolayavo Ebelamo ta tubunavo 'idia ge ana fata be dave'ifoqeyedi? Ta ge wese 'idewani ona nuanua 'aiqa, mana tomotau ivi'oi me Diu edi gade gamonaya vaidi ge wese Yaubada ena tomotauyavo. <sup>7</sup>\* Ta wese 'idewani vaina me Diu ivonaya, "Ima'a Ebelamo tubunavo, 'inega ima'a wese natu otaqinavo!"

\* 8:36: Same 44:22 \* 9:2-3: 'Ifo 32:32 \* 9:4: 'Ifo 4:22; Luve 7:6; 14:1-2; Lom 3:2; 8:15 \* 9:7: Nug 21:12

Ta gebu, mana Buki Nugwenugweina 'inaya Yaubada Ebelamo voneaya, "Tubumwavo natuhu Aisake namo 'inega ina 'ifoqe, e taudi 'idewani natu otaqimwavo." 8\* Egu vona ana alamani ba'e: Ebelamo tubunavo ena gadeyega i'ifoqe vaidi ge Yaubada natunavo. Vonahaqiaqi, tomeqabu Yaubada ena vona fofofola 'inega i'ifoqe, e taudi Ebelamo natunavo. 9\* Mana Yaubada vona fofofola Ebelamo 'inaya vonaya, "Omo'e ya'wala nana 'inaya ena 'evivi ena mai 'imia, ta tuta nana 'inaya moqaneu Sela natuhu me'olotona ina venatunea."

10 Ta ba'e gwama nana 'aqegigida Aisake. Ta tuta nana ni'a vekilakai 'inega Libeka\* vaqidi, ta natunavo didilualua ivenatunedi. 11-12\* Libeka natudiavo didilualua Iso be Iakobo nawale ge ida venatunedi, 'inega gogama diavona ge taha yani aqiaqina nage luveifana ida viaqi, ta nugweta Libeka vale i'ewea Yaubada 'inega vonedia, "Nawale natumi 'unutauna ena gadeyavo ina vetofewa keke'ina ena gadeyavo 'idia." Ba'e vale nana 'inega kana alamani aqiaqiea Yaubada ena venua'ivina ge daviaqia tomotau edi fewa aqiaqina nage luveifana 'idiega, ta 'esi tauna ena nuanua 'inega. 13\* Mana Buki Nugwenugweina 'inaya Yaubada vonaya, "Keke'ina Iakobo yaveyoluba aqiaqiea, ta 'abiboda 'unutauna Iso."

14 'Inega nage taha toga 'imiega una vonaya, "Yaubada ena venua'ivina ge tunutunuqina!" Ta yavonemi, ge wese 'idewani ona nuanua 'aiqa, 15\* mana Yaubada Mosese voneaya,

"Tomeqabu ya'a egu venua'ivina  
'inega nuanuagu  
be ena nuakokoloyedi,  
e taudi ena nuakokoloyedi.

Ta tomeqabu ya'a egu venua'ivina  
'inega nuanuagu be ena iuledi,  
e taudi ena iuledi."

16\* 'Inega Yaubada ena vona fofofola adi 'ewa ge ita'a eda yani. Ge ada fata taudega eda venua'ivina 'inega kana 'ewedi, nage eda vetafe'wa waiwai 'inega ada fata kana 'ewedi, ta 'esi Yaubada ena nuakokololo veve'itayea taudi vevenua'ivinidi 'idia.

17\* Mana Buki Nugwenugweina 'inaya Yaubada Mosese 'inega me Itifita edi kini Felo 'inaya vonaya, "Ni'a yavenua'ivineu be una vetoluvine ta egu waiwai ena ve'itayea 'iuyega, be yaqisa agu wawa Valena nayawala tomotau qabudi di'we taha taha 'idia." 18 'Inega o'itei, tomeqabu Yaubada nuanuana nanuakokoloyedi, e 'inega nuakokoloyedi, ta wese tomeqabu nuanuana nagivedeba 'i'wanidi, e 'inega givedeba 'i'wanidi 'idewani kini Felo.

#### *Yaubada ena gamosoala be ena nuakokololo*

19 'Inega nage taha toga 'imiega navonaya, "Yaubada taunega tomotau venua'ivineda be ma'oda kana toa 'aiqa. 'Inega tola'ai weaqina Yaubada tomotau veve'ewedi edi deba 'i'wana weaqina, mana ana 'ita kavona tovedeba 'i'wana diavona lova Yaubada ena venua'ivina 'inega ivedeba 'i'wana, 'inega ena nuanua iviaviaqia, waisa?" 20\* Ta ge wese 'idewani ona vona 'aiqa! Mana ge daluaqiaqieda be ita'a tomotau Yaubada kana lugwaeyei! Ita'a tomotau Yaubada ena 'iva'ava'ata. 'Inega nage ita'a ada fata be To'iva'ava'ata nana kana voneaya, "Tola'ai weaqina ba'e 'idewani uviaqia 'aiqegu?" 21\* Ba'e vona diavona ena givesimatalia 'imia 'ulena ana viaqa 'inega. Tuta nana 'ulena ana toviaqia 'ulena 'abi'abia bwa'obwa'o bwedibwedinega, e 'inega luaqiaqiea be bwa'obwa'o nana 'inega tauna ena nuenuega 'ulena taha ana 'ita aqiaqina sagali weaqina naviaqia, ta wese taha 'ulena 'aubena kavokavovo weaqina naviaqia.

\* 9:8: Gal 4:23 \* 9:9: Nug 18:10,14 \* 9:10: Libeka "Rebecca" taudi Aisake moqanena, ta lawadi Liteli. Libeka dina natudiavo didilualua Iso be Iakobo. \* 9:11-12: Nug 25:23 \* 9:13: Mal 1:2-3 \* 9:15: 'Ifo 33:19  
\* 9:16: Efe 2:8 \* 9:17: 'Ifo 9:16 \* 9:20: Ais 29:16; 45:9 \* 9:21: Iel 18:6



<sup>22</sup> Yaubada luaqiaqiea be tauna ena nuanua 'inega ena luvine be wese ena waiwai nave'ifoqeyea tomotau luveifadi adi luvematasabu weaqina. Ta wese Yaubada ena nuanua 'inega ana fata toluveifadi nabibitaqodi. Vonahaqiaqi, adi luaqiaqi be luvematasabu ina lobealukwayavonega, ta tua Yaubada me ena bibitaqo ba'eba'eyedi. <sup>23</sup> Ta wese Yaubada nuanuana ena aqiaqi otaqa nave'ita 'ifoqeyea ena tomotauyavo vevenua'ivinidi 'idia, ta ba'e 'inega ena nuakolokolo ina alamani aqiaqiea, mana Yaubada tuta lova 'inega 'iva'ava'aidi ena nuanua 'inega be yaqisa mahalaya ina toa ana 'ataqia. <sup>24</sup> 'Inega ba'e yani diavona ina 'ifoqe ena tomotauyavo vevenua'ivinidi 'idia, ita'a me Diu ta wese taudi mali qabu 'idia.

<sup>25</sup> \* Yaubada ena vona ba'e taudi mali qabu weaqidi kana 'itea ena tovesimasimana Osea ena vona 'inega vonaya,

“Tomeqabu taudi lova  
ge egu tomotauyavo,  
ba'itagana ena gabedi  
egu tomotauyavo.

Ta tomeqabu taudi lova  
ge eda veyolubedi,  
e ba'itagana taudi wese  
ena veyolubedi.”

<sup>26</sup> \* Ta wese Osea vonaya,  
“Lova taha di'we 'inaya yavonedia,  
'Omi'a ge egu tomotauyavo.’

Ta ba'itagana  
omo'e di'we nana 'inaya navonedia,  
'Omi'a Yaubada mayawaina  
ta Toatoa Vatayana natunavo.’ ”

<sup>27</sup> \* Ta me Isileli weaqidi Yaubada ena tovesimasimana Aisea 'enana waiwainega simana 'ifoqe vonaya,

“Vonahaqiaqi,  
me Isileli adi qabu  
kavona gelasa balabalaya 'idewani,  
ta 'idiega 'evisa dimo  
Yaubada na'etoyavuidi,  
<sup>28</sup> mana eda Kaiwabu  
ena luvine 'ebel'ovoa  
nave'ifoqeyea di'we nana  
ana totoayavo 'idia  
ta lukwayavonega naluveawalidi  
lova ena vona 'idewani.”

<sup>29</sup> \* Ta wese Aisea ba'e yani nana weaqina vonaya,

“Lova eda Kaiwabu Tovewaiwai  
'evisa damo awafeleda  
be mayawaida katoa.

Ta 'eguma gebu,  
e 'inega qabuda daluvegwamumuida  
kavona me Sodoma  
be me Gomola 'idewani.”

*Me Isileli Iesu Valena inogea*

<sup>30</sup> Egu vona diavona 'idiega yani qabuna ni'a yave'itemi Yaubada ena venua'ivina taudi me Diu weaqidi. 'Inega egu vona 'ebel'ovoa ba'e yani nana weaqina ona noqolia. Taudi mali qabu ge taha 'eda'eda ida salia sabi veaqiaqi Yaubada matanaya, ta tua edi

\* 9:25: Ose 2:23 \* 9:26: Ose 1:10 \* 9:27: Ais 10:22-23 \* 9:29: Ais 1:9

vetumaqana 'inega ivetunutunuqa matanaya. <sup>31</sup> Ta 'esi me Diu ivetafe'wa waiwai luvine ana 'abiboda 'inaya, be vonigo ida vetunutunuqa Yaubada matanaya, ta ge adi fata be ida vetunutunuqa matanaya luvine ana 'abiboda 'inega. <sup>32\*</sup> Ta ivetafe'wa 'wayoqa, mana ge nuanuadi ina vetunutunuqa vetumaqana 'inega, ta 'esi nuanuadi edi fewa luvine weaqina 'inega ina vetunutunuqa Yaubada matanaya. Ta edi noga 'inega kavona be 'aqedi ida 'evetufei dabo 'inaya ta ida be'u. <sup>33\*</sup> Vonahaqiaqi, ba'e yani nana weaqina Aisea vonaya, "Onoqoli,

Ielusalema 'inaya  
 dabo ena a'uya,  
 ta tauna dabo nana 'inaya  
 tomotau 'aqedi ina vetufedi  
 ta ina be'u.  
 Ta aiqabu dabo nana  
 ina vetumaqanea,  
 e ge wese ina nuavita,  
 mana tola'ai Yaubada lova  
 vona fofofolei ana aqiaqi  
 ina 'itea."

## 10

'Etoyavua tomotau qabudi weaqidi

<sup>1</sup> Taigwavo be novugwavo, nuanuagu qiduana egu tomotauyavo me Diu qabudi 'etoyavua ina lobe, 'inega yavevenoqi waiwai Yaubada 'inaya 'etoyavua nana weaqina. <sup>2</sup> Edi awafela waiwaina Yaubada ana alamani weaqina ni'a yahalamani aqiaqiea. Ta Yaubada ena nuanua taudi weaqidi ge ida alamania, 'inega itauya gei, <sup>3</sup> mana Yaubada ena 'eda'eda tomotau eda vetunutunuqa matanaya weaqina ge ida 'awahaqiaqiea. 'Inega taudi edi nuenuaga nuanuadi ina vetunutunuqa Yaubada matanaya luvine ana matayaga 'inega. Ta ba'e 'inega Yaubada ena 'eda vetunutunuqa weaqina ivakesiea. <sup>4</sup> Vonahaqiaqi, ni'a kahalamania ba'e 'itagana tomotau ge daluaqiaqiedi be luvine ina 'abibodedi edi vetunutunuqa Yaubada matanaya weaqina, mana Keliso luvine ana 'abiboda givelua'uya ena 'aliga 'inega. E 'inega aiqabu ivetumaqanea ni'a ivetunutunuqa Yaubada matanaya.

<sup>5\*</sup> Eda vetunutunuqa Yaubada matanaya luvine ana 'abiboda 'inega weaqina Mosese ba'e 'idewani vona 'aiqa vonaya, "Tomeqabu luvine qabudi ina 'abibodedi, e taudi luvine diavona 'idiega yawai vataya ina lobe." <sup>6\*</sup> Ta vetunutunuqa Yaubada matanaya vetumaqana Keliso 'inega weaqina Buki Nugwenugweina vonaya, "Tau'uyega ge una voneuya, 'Ana 'ita be taha toga navane mahalaya.'" (Be Keliso na'ebe'ewei nawebui miea ada 'etoyavua weaqina.) <sup>7</sup> Ta wese Buki nana vonaya, "Tau'uyega ge una voneuya, 'Togama nawebui bwa'obwa'o 'aya otaqinaya?" (Be vonigo Iesu na'ebe'ewei namiea to'aliga edi di'we 'inega.) Ba'e 'idewani ge kana nuanua 'aiqa, mana Keliso ni'a webui mai sabi 'etoyavuida, ta wese ni'a ya'itoto 'evivi 'aligega. <sup>8</sup> Ta 'esi 'eguma taha toga Keliso ni'a vetumaqanea, e 'inega ana fata be Buki Nugwenugweina ena vona navetutumea navonaya, "Etoyavua vetumaqana 'inega Valena tomotau ni'a vadi'wedi'wedi, ta Vale nana sofadiega ni'a ivonavonayea ta wese giwalidia ni'a 'eno'eno." E ba'e Vale nana vetumaqana Iesu Keliso 'inaya weaqina ni'a asimasiwana 'ifoqeyea tomotau 'idia.

<sup>9</sup> Ta Vale nana ana alamani ba'e: 'Eguma tomotau matadia 'awauyega una simana 'ifoqe vonigo Iesu tauna eu Kaiwabu, ta wese 'eguma giwaliuyega una vetumaqana vonigo Yaubada Iesu giveya'itotoya 'aligega, e 'inega Yaubada na'etoyavuii. <sup>10</sup> Mana eu vetumaqana giwaliuya 'inega una vetunutunuqa Yaubada matanaya, ta eu simana 'ifoqe 'inega 'etoyavua una lobe. <sup>11\*</sup> 'Idewani Buki Nugwenugweina Keliso weaqina vonedaya, "Togama vevetumaqana 'inaya, e tauna ena vetumaqana vuaqina ge wese

\* 9:32: Ais 8:14 \* 9:33: Ais 8:14; 28:16; 1Fit 2:6 \* 10:5: Luvu 18:5 \* 10:6: Luve 30:12-14 \* 10:11: Ais 28:16

na'ita 'avei, mana Yaubada ena vona fofofola adi aqiaqi na'ifoqe 'inaya." <sup>12\*</sup> Vonahaqiaqi, taudi me Diu ta wese mali qabu ge ida vedumaduma matanaya, mana eda Kaiwabu 'aidegana. Ta aiqabu ina venoqiea iula weaqina e 'inega ena veyoluba aqiaqi otaqina nanei kavovodi, <sup>13\*</sup> mana Buki Nugwenugweina ana to'wayavi taha 'idiega ana wawa Ioeli vonaya, "Ai qabu ina venoqi Kaiwabu ana wawa 'inega 'etoyavua ina lobe." "

<sup>14</sup> Ta ma'oda, nage me Diu adi fata be Iesu ina venoqiea 'etoyavua weaqina 'eguma ge ida vetumaqanea? Gebu, ge adi fata. Ta ma'oda, nage adi fata be ina vetumaqanea 'eguma Valena ge ida noqolia? Gebu, ge adi fata. Ta wese ma'oda, nage adi fata be Vale nana ina noqolia 'eguma ge taha toga nalugaihiea 'idia? Gebu, ge adi fata. <sup>15\*</sup> Ta ma'oda, nage ana fata be taha tolugaihi natauya 'idia be Vale nana naneidi 'eguma Yaubada ge taha tolugaihi davetunei? Gebu, ge ana fata! E ba'e yani nana weaqina Buki Nugwenugweina vonayea, "Vonahaqiaqi, ana tolugaihi edi mai yani aqiaqi otaqina." <sup>16\*</sup> Vonahaqiaqi, Vale nana mai me Diu 'idia ta vaidi ge ida 'awahaqiaqiea, mana Yaubada ena tovesimasimana Aisea wese vonayea,

"Kaiwabu,  
ana 'ita kavona  
ema lugaihi Vale nana weaqina  
tomotau 'evisa dimo ivetumaqanea."

<sup>17</sup> 'Inega kahalamania, Keliso Valena ana lugaihi 'inega tomotau edi vetumaqana i'ewe'ewea, ta ba'e Vale nana mai Yaubada ena tolugaihiavo 'idiega.

<sup>18\*</sup> Nage taha toga 'imiega navonaya, "Ta ma'oda me Diu weaqidi, nage taudi Iesu Valena ge ida noqolia?" Ta yavona aqiaqiemi, ni'a inoqolia mana Buki Nugwenugweina vonaya,

"Tolugaihi edi simana  
ni'a yawala tomotau qabudi 'idia,  
ta vona diavona ni'a i'ifoqe  
di'we taha taha 'idia."

<sup>19\*</sup> Ta nage wese taha toga navonaya,  
"Nage me Diu nuadi ge da'eqa'u aqiaqiea  
Vale nana weaqina?"

Ta yavona aqiaqiemi, nuadi ni'a 'eqa'uya, mana Yaubada Mosese ena tuta 'inaya me Diu weaqidi vonaya,

"Me Diu edi ve'ifi'ifi ena give'ena'ia  
egu veyoluba 'inega taudi ge me Diu 'idia,  
ta wese me Diu ena givegamosalidi  
egu veyoluba 'inega  
taudi ge me Diu 'idia,  
mana me Diu ivonaya be  
taudi ge me Diu tovekwavakwava."

<sup>20\*</sup> Ta wese Aisea me ena giwalifatu Yaubada ena vona taudi ge me Diu weaqidi vonaya,  
"Tomeqabu ge ida sali dadana weaqigu,  
e taudina ina lobegu.

Ta wese tomeqabu ge ida venoqiegu  
iula weaqina,  
e taudi 'idia ena ve'ifoqeyegu."

<sup>21\*</sup> Ta me Diu weaqidi Yaubada vonaya,  
"Tuta kuena nuanuagu be  
ena 'ebe'ewedi ina mai 'iguya,  
ta taudi ge ida matayagegu

\* 10:12: Via 15:9 \* 10:13: Ioe 2:32 \* 10:15: Ais 52:7 \* 10:16: Ais 53:1 \* 10:18: Same 19:4 \* 10:19:  
Luve 32:21 \* 10:20: Ais 65:1 \* 10:21: Ais 65:2

ta wese egu nuanua taudi weaqidi inogea.”

## 11

### *Yaubada ena nuakolokolo me Diu weaqidi*

<sup>1</sup>\* 'Inega ena vetala'aiemi, nage Yaubada ena tomotau me Diu ni'a nogedi? Gebu'e otaqa! Ona nuave'avinia ya'a taugu wese Diu 'olotogu, ta ya'a Ebelamo tubuna ta wese Beniamina ena gade 'inega, ta Yaubada ge danogegu.

<sup>2</sup> Vonahaqiaqi, Yaubada tuta ana 'ebeve'ale 'inaya ena tomotauyavo maduvenu-a'ivinedi 'etoyavua weaqina, 'inega ba'e 'itagana ge wese danogedi. Buki Nugwenugweina ena vona ba'e weaqina ona nuave'avinidi tuta nana Yaubada ena tovesimasimana Ilaitia me Diu weaqidi vetalabudabuda Yaubada 'inaya vonaya, <sup>3</sup>\* “Kaiwabu, eu tovesimasimanayavo qabudi ni'a iluve'aligidi, ta eu 'ebevegubayavo ibwega yavuledi. Ta ya'a eu tovesimasimana agu 'aidegamo yatoatoa, ta ba'e 'itagana nuanuadi ya'a wese ina luve'aligigu.” <sup>4</sup>\* Ta ona nuave'avinia Yaubada ba'e 'idewani Ilaitia ena vona ve'iea vonaya, “Ge una nuanua, mana ya'a tomotau adi qabu seveni tausani (7,000) taudi wese ge taha tuta ida iwa'odu tokwalui Balo\* 'inaya ni'a yaha'udumedumedi itoatoa weaqigu.”

<sup>5</sup> Ta ba'e 'itagana wese vaidi me Diu vevenua'ivinidi Yaubada ena nuakolokolo 'inega 'etoyavua ni'a ilobea, mana me Diu qabudi Yaubada ge ida nogei. <sup>6</sup>\* Ta 'eguma 'etoyavua ni'a ilobea Yaubada ena nuakolokoloyega, e 'inega ge wese taudiega edi viaqa aqiaqina 'inega. Mana 'eguma edi viaqa 'inega 'etoyavua ida lobei, e 'inega 'etoyavua nana ge Yaubada ena nuakolokolo 'inega da'ifoqe.

<sup>7</sup> 'Inega me Diu edi toa ba'e 'idewana: Vonahaqiaqi, qabudi isalisali waiwai Yaubada ena nuakolokolo weaqina, ta ena venua'ivina 'inega 'evisa dimo nuakolokolo nana ilobea. Ta me Diu 'eali dina Yaubada nuadi 'egiveatufia, 'inega ge wese ida nuanua tauna weaqina. <sup>8</sup>\* Ba'e weaqina Buki Nugwenugweina simana vonaya, “Yaubada me Diu nuadi giveatufidi,

ta ana laba ba'e 'itagana  
matadi 'eumabodea  
be 'inega ge adi fata be  
'etoyavua ana 'eda ina 'itei,  
ta wese teniqadi 'egibodea  
'inega Yaubada ena vona  
ge adi fata be ina noqoli.”

<sup>9</sup>\* Ta wese kini Deibida ba'e yani nana weaqina simanea, vonaya,

“Yaubada, nuanuagu nuadi  
una giveatufidi edi sagali 'unena  
ana qaiawa 'inega,  
ta qaiawa nana 'inega ina vonaya be  
vonigo edi toa aqiaqi otaqina.

Ta qaiawa nana 'inega kavona  
taudiega ni'a isi'wedi,  
mana voaladiavo ina luveafedi  
ta ina kafidi.

Ta edi gagasa 'inega luvematasabu  
ina lobei edi luveifana  
ana 'etofwafwa 'inega.

<sup>10</sup> Nuanuagu matadi una umea

\* 11:1: 1Sam 12:22; Same 94:14; Fil 3:5 \* 11:3: 1Kin 19:10,14 \* 11:4: 1Kin 19:18 \* 11:4: Tuta nana me Isileli ilugu Kenani 'inaya, 'inega di'we nana ana totoayavo edi tokwalui Balo “Baal” ihiwa'odu 'inaya. 'Inega me Isileli wese ive'ale iwa'odu Balo nana 'inaya, ta Yaubada otaqa inuafania. \* 11:6: Gal 3:18 \* 11:8: Luve 29:4; Ais 29:10 \* 11:9: Same 69:22-23

'inega eu viaqa aqiaqidi weaqidi  
ge adi fata be ina 'itedi,  
ta gwavudi una givekuyuya  
nakuyu veiveifa tuta qabuna  
vita taha taha adi 'avala 'idiega.”

<sup>11</sup> \* 'Inega nage ona vonaya be Yaubada ena tomtauyavo vevenua'ivinidi ni'a ida be'u vataya edi luveifana tauna 'inaya weaqina. Ta ge 'idewani ona nuanua 'aiqa, mana Yaubada ena viaqayavo 'idiega nuanuana 'etoyavua ana 'eda nave'ifoqeyea taudi mali qabu 'idia. E ba'e 'inega me Diu 'etoyavua nana ina 'itea, 'inega taudi wese nuadi na'ewea be nuanuadi ina 'ewa aqiaqiea. <sup>12</sup> Ta ona nuaia, 'eguma tomtau qabudi bwa'obwa'oya Yaubada ena veyoluba qiduana ni'a ilobea me Diu edi luveifana ta wese edi be'u 'inega, e 'inega ona alamani aqiaqiea nawale tuta nana me Diu qabudi vevenua'ivinidi ina nuagivila be 'etoyavua Ieisu 'inega ina 'awahaqiaqiea, 'inega Yaubada ena veyoluba qidua va'ina nave'ifoqeyea tomtau qabuda 'idaya.

<sup>13</sup> Ta wese nuanuagu omi'a ge me Diu vaina yani weaqidi ena vonemi. Yaubada ni'a venua'ivinegu be yavetoaletuyana omi'a weaqimi. Ta ena venua'ivina weaqigu ya'awahaqiaqiea ta yavetafe'wa waiwai weaqina, <sup>14</sup> mana nuanuagu qiduana taha 'eda'eda ena lobei, 'inega taudi me Diu omi'a ge me Diu ami 'etoyavua ina 'itea, ta taudi wese ina nua'ewa weaqina sabi 'ewana. Ta egu fewa nana 'inega nage Yaubada egu tomtau me Diu vaidi na'etoyavuidi. <sup>15</sup> Vonahaqiaqi, 'eguma me Diu edi noga 'inega Yaubada 'etoyavua ni'a ve'ifoqeyea mali tomtau bwa'obwa'oya 'idia, e 'inega kana alamani aqiaqiea be tuta nana me Diu Keliso ina 'awahaqiaqiea adi 'etoyavua weaqina, e 'inega Yaubada me Diu wese na'awahaqiaqi 'eviviedi. 'Inega kavona ina yawaha 'evivi edi 'aliga 'inega.

<sup>16</sup> Vonahaqiaqi, Yaubada Ebelamo givegwalea, e 'inega tubunavo qabudi wese gwalagwaladi. Egu vona ba'e ena givesimatalia 'imia, onoqolia! 'Eguma taha toga falawa nawayavilei, ta falawa nana 'inega dibuna na'ewei navegubayea Yaubada weaqina, e 'inega falawa qabuna wese ni'a vegwalagwala. Ta wese 'idewani 'aiwe, mana 'eguma 'aiwe kwalamina gwalagwalana, e 'inega wese laqanavo gwalagwaladi. <sup>17</sup> \* Vona sesebai taha ena neimi omi'a ge me Diu weaqimi. Taudi me Diu kavona taha 'aiwe olibe vaoqaya tabotabo. Ta omi'a ge me Diu kavona muta'wa ana olibe. 'Inega tonivaoqa vaoqa ana olibe laqana bai yavuledi, ta 'esi olibe muta'wa laqana 'ewedi be tubwedi vaoqa nana ana olibe 'inaya. E ba'e 'inega omi'a wese Yaubada ena vona fofofola veyoluba qiduana weaqina Ebelamo be tubunavo 'idia ni'a o'ewea, mana omi'a vaoqa ana olibe 'inaya ni'a otubwe, ta olibe nana bodona 'inega emi waiwai o'ewe'ewea.

<sup>18</sup> Vonahaqiaqi, omi'a laqa diavona baibai yavulidi oilafedi. 'Inega yavonevonemi, ge ona nuavane ba'e ilafa nana weaqina. Ta 'esi ona nuave'avinia omi'a kavona 'aiwe laqana ta ge kwalamina, mana omi'a laqana ge ami fata be kwalama ona iuledi, ta 'esi kwalama omi'a iuiulemi. <sup>19</sup> 'Inega nage ona vonaya, "Yaubada omo'e laqa diavona bai yavuledi ta 'inega ima'a ni'a ailafedi." <sup>20</sup> Vonahaqiaqi 'idewani, ta ge ona nuafania ba'e laqa diavona taudi me Diu Yaubada bai yavuledi, mana ge ida vetumaqanea, ta omi'a oilafedi mana ovetumaqanea. 'Inega ge taumiega ona nuavane weaqimi, ta 'esi ona 'itamaki aqiaqiemmi be yaqisa omi'a ge ona veilaqe me Diu 'idewani. <sup>21</sup> Mana 'eguma Yaubada 'aiwe nana laqa otaqinavo ni'a bai yavuledi, e 'inega omi'a wese nabai yavulemi 'eguma ona nogea.

<sup>22</sup> \* E ba'e vona sesebai nana 'inega kana alamani aqiaqiea Yaubada tauna Tonu-akolokolo ta wese Toluvine falafalana, mana Yaubada me Diu luvine falafalana neidi. Ta omi'a ge daluvinemi, mana ena 'eda ami 'etoyavua weaqina o'awahaqiaqiea, 'inega nuakolokoloyemi. Ta vonahaqiaqi, omi'a wese ana fata be naluvematasabumi 'eguma ena nuakolokolo ona nogea. <sup>23</sup> Vonahaqiaqi, taudi me Diu 'etoyavua ana 'eda lova ni'a inogea, ta 'eguma ina nuagivila ta 'eda nana ina 'awahaqiaqiea, e 'inega Yaubada natubwe

\* 11:11: Via 13:46 \* 11:17: Efe 2:11-19 \* 11:22: Ion 15:2,4

'eviviedi 'aiwe nana 'inaya. Tauna ana fata be ena waiwaiega ba'e yani nana naviaqia.  
<sup>24</sup> Ana 'ita ge daluaqiaqiei 'eguma taha toga olibe muta'wa laqana nada'a yavulei ta laqa nana natubwea ena 'aiwe aqiaqina 'inaya. Ta vonahaqiaqi, ba'e yani nana Yaubada viaqia omi'a ge me Diu 'imia, mana omi'a kavona olibe muta'wa laqana, ta 'esi tubwemi ena 'aiwe aqiaqina 'inaya. Ta 'eguma Yaubada ba'e yani nana ni'a viaqia omi'a weaqimi, 'inega ona alamani aqiaqiea nuanuana qiduana me Diu natubwe 'eviviedi tauna 'inaya, mana tauna edi 'aiwe aqiaqi.

*Yaubada ena nuakolokolo tomotau qabuda weaqida*

<sup>25</sup> Egwavo omi'a ge me Diu, nuanuagu qiduana Yaubada ena viaqayavo 'ebenuavoqana me Diu weaqidi ona alamani aqiaqiedi, mana 'eguma ona alamanidi, 'inega ge taumi weaqimi ona nuavane ta ona vonaya,

“Ima'a aqiaqi otaqima,  
 ta 'abiboda taudi me Diu.”

Ta nuanuagu ona alamanian vonigo me Diu nawale me edi deba 'i'wana itoatoa. Ta ba'e 'idewani ina toatoa ana laba omi'a ge me Diu ami yau ana 'etofwafwa na'ifoqe Yaubada ena nuanua 'inega. <sup>26</sup>\* Ta ba'e 'inega me Isileli qabudi 'etoyavua ina lobe, mana Buki Nugwenugweina 'inaya Aisea simana vonaya,

“To'etoyavua namai ima'a  
 me Diu 'imega,  
 ta tauna me Isileli  
 edi viaqa veifana  
 na'ewa yavulea 'idiega.”

<sup>27</sup>\* Ta wese Aisea vonaya,  
 “Inega ya'a Yaubada  
 ena vona fofofolei  
 be edi ilivu luveifana weaqina  
 ena nuataqodi.”

<sup>28</sup> Vonahaqiaqi, me Diu 'ealidi nawale Vale Aqiaqina Keliso weaqina ivevevoalanea. Ta edi noga 'inega omi'a ge me Diu oveaqiaqi otaqa, mana Yaubada ena iula o'ewa kavovoya. Ta ona nuave'avinia me Diu taudi Yaubada ena tomotauyavo vevenua'ivinidi. Ta wese veveyolubedi, mana ena vona fofofolayavo i'ewedi tubudiavo Ebelamo be, Aisake ta wese Iakobo 'idiega. <sup>29</sup> Ba'e 'idewani yavona 'aiqemi, mana 'eguma Yaubada taha yani ni'a neida, nage wese ni'a venua'ivineda be tauna maega kana toa, e 'inega nei kavovo nana be gaba nana ge wese na'ewa 'eviviedi. <sup>30</sup> Lova omi'a ge me Diu Yaubada ovevoalanea, ta tuta nana me Diu Yaubada ena nuakolokolo inogea, e 'inega omi'a nuakolokolo nana o'ewa kavovoya. <sup>31</sup> Ta ba'e 'itagana wese 'idewani taudi me Diu Yaubada ivevoalanea. Ta nawale taha tuta 'inaya taudi wese Yaubada ena nuakolokolo ina 'ewa kavovoya omi'a 'idewani. <sup>32</sup> Yaubada tomotau qabuda awafeleda be taudega kayoqonida eda noga 'inega, be yaqisa taunega ana fata be ena nuakolokolo nave'itayea 'idaya.

*Awatubo Yaubada 'inaya*

<sup>33</sup>\* Vonahaqiaqi,  
 ge taha toga 'idewani Yaubada!  
 Tauna ena alamani qidua otaqina be,  
 ena nuanua aqiaqi otaqina  
 ta wese ena kaikaiwabu qidua va'inena.

Ge taha toga ana fata ena luvineavo  
 be ena 'eda'edayavo nahalamanidi!

<sup>34</sup>\* 'Idewani Buki Nugwenugweina simana vonaya,  
 “Nage taha toga ana fata be  
 Yaubada ena nuanuayavo nahalamanidi?”

\* 11:26: Ais 59:20-21 \* 11:27: Ais 27:9; Iel 31:33-34 \* 11:33: Ais 55:8-9 \* 11:34: Ais 40:13; 1Kol 2:16

Ta wese nage taha toga  
ana fata be nalugaihia?

Ge taha toga.”

<sup>35</sup>\* Ta wese vonaya,

“Ge taha toga ana fata be  
taha yani aqiaqi otaqina  
Yaubada naneia be 'inega  
Yaubada luaqiaqiea  
be tomotau nana nave'iea.”

<sup>36</sup>\* Ba'e vona diavona Yaubada weaqina vonahaqiaqi, mana yani qabuna tauna 'inega i'ifoqe, ta kuyavata qabuna ena waiwai 'inega nawale itoatoa. Ta ba'e yani diavona itoatoa ana awatubo weaqina.

'Inega Yaubada kana awatuboya  
tuta vataya 'idia.

Vonahaqiaqi, eda nuanua 'idewani!

## 12

### *Yawaida kana awafelea Yaubada weaqina*

<sup>1</sup>\* Egwavo, ni'a yave'itemi Yaubada ena nuakolokolo 'idaya weaqina, 'inega nuanuagu qiduana 'wafimi qabuna ona vefewedi yani qabuna aqiaqina be gwalagwalana weaqina. E 'inega taumiega ona ve'ineiemu Yaubada 'inaya kavona guba mayawaina 'idewani, e ba'e 'inega ona giveqaiawe. Mana 'eguma taumi ona nuaia Yaubada ena viaqa aqiaqi otaqina 'imia weaqina, e 'inega ge yani vitana weaqina eda vevenoqiemi, waisa? <sup>2</sup>'Inega bwa'obwa'o ana ilivu luveifadi ge ona vetutumedi! Ta 'esi ona awafelemi Yaubada 'inaya be 'inega emi nuanuayavo nagive'evaunidi, be 'inega ona vetomotau 'evau. Ta ba'e 'inega ami fata be Yaubada ena nuanua weaqimi ona alamania ta ona viaqia. Ta wese ba'e 'inega ona alamania tola'ai aqiaqina matanaya be 'inega ona giveqaiawe. Ta wese emi ve'evau 'evivi 'inega ami fata ona alamania ma'oda ona toa 'aiqa.

<sup>3</sup>\* Yaubada ena nuakolokolo 'inega yavetovaletuyana, 'inega ya'a egu luvine 'inega omi'a 'aidega 'aidega yavonavona waiwaina 'imia: Ge taumi emi nuanua 'inega ona a'uvaneqemi, ta 'esi ona nuanua aqiaqi tuta nana taumi weaqimi onuanua. Omi'a 'aidega 'aidega emi vetumaqana ni'a o'ewea Yaubada ena nuanua 'inega, e 'inega wese 'aidega 'aidega emi vetumaqana ana 'etofwafwa 'inega taumiega emi aqiaqina ona 'etofwafwea. <sup>4</sup>\* Ebevetalatutula ba'e ena neimi: Ita'a tomotau 'wafida 'inaya du'u 'eala i'eno'eno, ta du'u 'aidega 'aidega me edi fewa. <sup>5</sup> Ta wese Keliso 'wafina 'idewani. Ita'a tovetumaqana kavona Keliso 'wafina du'unavo, ta 'aidega 'aidega eda fewa dumadumana be dumadumana, 'inega du'u taha taha kaveveiuula, mana ita'a 'wafi 'aidegana.

<sup>6</sup>\* Yaubada ena nuakolokolo 'inega ita'a 'aidega 'aidega eda alamani be eda waiwai neida sabi vefewadi tauna ena nuanua 'inega. Ta wese 'idewani wila'a taha taha tomotau taha taha neida. 'Inega 'eguma Yaubada au wila'a neiu ena vona sabi simana 'ifoqeyedi, e 'inega una simana 'ifoqeyedi 'eguma eu vetumaqana 'inega ualamani aqiaqiea vona nana Yaubada 'inega mai. <sup>7</sup> Ta 'eguma Yaubada au wila'a neiu mali tomotau sabi iuladi, e 'inega una iula aqiaqiedi. Ta 'eguma Yaubada au wila'a neiu ena vona ana ve'ita weaqina, e 'inega una ve'ita aqiaqiedi. <sup>8</sup> Ta 'eguma Yaubada vona iula ana wila'a ni'a neiu, e 'inega tomotau una vona iuledi. Ta 'eguma Yaubada 'iwavo ana wila'a ni'a neiu, e 'inega eu kulufa ge una vegagaledi. Ta 'eguma Yaubada vanugweta ana wila'a ni'a neiu, e 'inega tomotau una vanugwetedu eu waiwai qabuna 'inega. Ta 'eguma nuakolokolo ana wila'a Yaubada ni'a neiu, e 'inega me eu qaiawa tomotau una nuakolokoloyedi.

\* 11:35: Iob 41:11 \* 11:36: 1Kol 8:6 \* 12:1: Lom 6:11,13; 1Fit 2:5 \* 12:3: 1Kol 12:11; Efe 4:7; Fil 2:3 \* 12:4: 1Kol 12:12,27 \* 12:6: 1Kol 12:4-11; 1Fit 4:10-11

<sup>9</sup> Tomotau giwali otaqiuyega una veyolubedi, ta gebu u'ava 'inega. Viaqa luveifadi una veoalenedi, ta 'esi viaqa aqiaqi otaqidi adi viaqa una kafi'i'ihidi. <sup>10</sup>\* Ta ma emiavo ona veyoluba aqiaqiemi kavona taimiavo be novumiavo oveveyolubedi 'idewani. Ta me emi awafela emiavo ona 'amayaba aqiaqiedi, ta 'abiboda omi'a. <sup>11</sup> Ta ge ona vegwavu'ai emi fewayavo 'idia, ta 'esi me emi gwavubiga aqiaqi ona vetofewa eda Kaiwabu weaqina. <sup>12</sup>\* Ona qaiawa, mana ni'a oalamani aqiaqiea Yaubada ena nuanua aqiaqina weaqimi tuta maimai 'inaya nave'ifoqeyea 'imia, 'inega ba'e yani nana weaqina oba'eba'e. Ta wese me emi bibitaqo ona toa 'eguma vita taha taha ina 'ifoqe 'imia, ta ge ona lua'u venoqi Yaubada 'inaya. <sup>13</sup>\* Ta 'eguma Yaubada ena tomotauyavo vaina yani weaqina ina kusa, e 'inega ona iuledi. Ta 'eguma wagawaga imaimai, e 'inega ona 'ebe'ewedi emi vanueavo 'idia ta ona ve'ainidi be wese edi 'ebe'eno ona 'iva'ava'aia weaqidi.

<sup>14</sup>\* Ta 'eguma tomotau vita ina neimi mana omi'a Iesu ana to'abibodayavo, e 'inega ge ona vona ve'alatedi, ta 'esi ona venoqi Yaubada 'inaya be navona veyolubedi. <sup>15</sup> Ta tuta nana tomotau iqaiqaiawa 'inega luaqiaqiemi be wese omi'a taudi maega ona qaiawa. Ta 'eguma tomotau inuanuavita, 'inega luaqiaqiemi be omi'a ona iuledi be edi nuavita ona 'avalea taudi maega. <sup>16</sup>\* Ma emiavo ona toadaumwala. Ta ge ona nuavane taumi weaqimi, ta 'esi tomotau kavokavovo maega ona veiaiana aqiaqi. Ta ge taumiega ona vonemia be omi'a toalamani aqiaqi.

<sup>17</sup>\* Ta 'eguma tomotau ina veilivu veifemi 'inega omi'a ge ona ve'iedi ilivu veifana 'inega. Ta tuta qabuna emi ilivu ona 'itamaki aqiaqiedi be yaqisa tomotau ina 'awahaqi-aqiemi. <sup>18</sup> Inega una lumata'i'ihui be yaqisa ge taha luveifana nage ve'ae'aetoga 'iuyega na'ifoqe, ta 'esi una tovo waiwai be tuta qabuna toadaumwala ilivuna una toayea tomotau qabudi maega.

<sup>19</sup>\* Egwavo ye, ge taha tuta taumiega ami mebu ona 'ewa, ta 'esi mebu nana ona ve'ineiea Yaubada 'inaya, mana tauna taha 'aubena 'inaya toveilivu veifa nalu-vematasabudi. Ta ba'e weaqina Buki Nugwenugweina simana vonaya, "Ya'a Kaiwabu mebu nana weaqina luaqiaqiegu be taugu ena 'ewea. Ta tomeqabu luveifana ni'a iviaqia ya'a ena ve'iedi." <sup>20</sup>\* Buki Nugwenugweina vonaya,

"Eguma voalau nabotana  
 e 'inega una ve'ainia,  
 ta 'eguma magana nayafaia  
 e 'inega una venumea.  
 Mana 'eguma ba'e 'idewani  
 una viaqia 'inaya,  
 e 'inega una giveiniyauyauea  
 ena viaqa luveifana 'iuya weaqina."

<sup>21</sup> Ge una awafeleu ilivu luveifana 'idia be ina luvineu, ta 'esi una vewaiwai va'inedi eu viaqa aqiaqi otaqidi 'idiega.

## 13

### *Toluvineavo edi luvine kana* 'abibodedi

<sup>1</sup>\* Omi'a emi gabemaniavo ona matayagedi, mana Yaubada ena nuanua 'inega toluvineavo bwa'obwa'oya a'udi be ina luvine. Ta gabemaniavo qabudi Yaubada ena venua'ivina 'inega iluviluvine. <sup>2</sup> Inega tomeqabu gabemani diavona edi luvine ge ida matayagedi, e taudi wese Yaubada ena nuanua inogea, ta ba'e 'inega taudiega adi luvematasabu imimiea 'idia. <sup>3</sup>\* Toaqiaqidi ge edi 'iumo be toluvineavo ina mwaninivedi, ta 'esi taudi tolueifadi ina mwaniniva 'idia, mana taudi luvine ibwegebwegea. 'Inega 'eguma ge nuanuami toluvineavo ona mwaninivedi, e 'inega edi nuanua ona matayagedi.

\* 12:10: 1Fit 1:22    \* 12:12: 1Te 5:16-18    \* 12:13: 1be 13:2    \* 12:14: Md 5:44; 1Kol 4:12    \* 12:16: Vos 3:7  
 \* 12:17: 1Te 5:15    \* 12:19: Luve 32:35; Md 5:39    \* 12:20: Vos 25:21-22; Md 5:44    \* 13:1: Tai 3:1; Vos 8:15  
 \* 13:3: 1Fit 2:13-14



Ta emi matayaga 'inega ina 'awahaqiaqiemi. <sup>4</sup> 'Inega toluvineavo Yaubada a'udi sabi iulami. Ta 'eguma omi'a yani luveifana oviaviaqia 'inega luaqiaqiemi be ona mwaninivedi, mana luvematasabu ona lobe'a 'idiega. Vonahaqiaqi, toluvine diavona taudi Yaubada ena tofewayavo, ta Yaubada ana diavilavila toluveifadi edi viaqayavo weaqina adi luvematasabu ina ve'ifoqeyea 'idia. <sup>5</sup> 'Inega luaqiaqiemi be gabemaniavo ona matayagedi, mana 'eguma ge ona matayagedi e 'inega luvematasabu ona lobe'a. Ta wese giwalimiega ni'a oalamani aqiaqiea ita'a tomotau luaqiaqieda be gabemaniavo kana matayagedi.

<sup>6</sup> \* Ta wese ba'e 'iu nana 'inega ona takesi gabemani 'idia, mana mane nana 'inega edi tofewayavo ivevemaisidi be yaqisa fewa nana Yaubada ni'a neidi adi fata ina viaqia. <sup>7</sup> 'Inega luaqiaqiemi be 'eguma gabemani 'idiega luvine 'eno'eno yani taha taha adi vemaisa weaqina, e 'inega ona vemaisa. 'Inega 'eguma gabemani takesi weaqina ina vonemi, e 'inega ona vemaisa. Ta wese 'eguma takesi ina a'uya kulufa taha taha adi maisa weaqina, e 'inega wese ona vemaisa. Ta wese luaqiaqiemi be tomeqabu adi luaqiaqi be 'amayaba ina lobe'a 'imiega, e 'inega taudi ona 'amayabedi.

<sup>8</sup> \* Vonahaqiaqi, ami loaga qabudi ona vemaisa 'ovoidi, ta 'esi yani ta'a mona ge wese ana fata be ona vemaisa 'ovoi, e ba'e yani nana veyoluba ilivuna emiavo maega. Mana ge taha toga ana fata be iana naveyoluba va'inei ta navoneaya, "Ba'e ta'iwa, egu veyoluba ana 'ebelu'ovoa!" Ta 'esi 'eguma iau una veyoluba aqiaqiea, e 'inega Yaubada ena luvine qabudi adi aqiaqi una ve'ifoqeyea veyoluba nana 'inega. <sup>9</sup> \* Yaubada ena luvine vonaya, "Ge una luabu be, ge una luv'e'aliga be, ge una vanawala be, ge una nuagovaqa." Ba'e luvine diavona ta wese vaina luvine adi bwagila luvine 'aidegana 'inega vonaya, "Tomotau ona veyolubedi 'idewani taumi oveveyolubemi!" <sup>10</sup> \* Vonahaqiaqi, veyoluba ilivuna ge wese ana fata be tomotau nagiveluveifedi, ta 'esi ilivu nana ana viaqa 'inega Yaubada ena nuanua ena luvine qabudi weaqidi adi aqiaqi kana ve'ifoqeyea.

<sup>11</sup> \* Egwavo, ba'e yani diavona ona viaqidi, mana oalamani aqiaqiea tuta luveifana 'inaya katoatoa. 'Inega ge ona 'eno motaiva, mana ada 'etoyavua bwa'obwa'o ana visiqayavo 'inega ni'a vadi'weda. Vonahaqiaqi, lova tuta nana kave'ale Ieisu kavetu-maqanea, e 'inega 'etoyavua nana ana 'aubena tufwana luluvai 'idega, ta ba'itagana ni'a mai di'wedaya. <sup>12</sup> \* Tuta goyona 'inaya ilivu luveifana ana tuta nahawala ta 'etoyavua ana 'aubena namai 'idaya, 'inega velovelovana ilivuna 'inaya ge ona toa. Ta 'esi emi ilivu luveifadi ona nogedi ta ona veyavuledi kavona kaleko bwavubwavudi 'idewani. Nuanuagu ilivu simasimalidi 'idiega ona vebaba 'idewani toveilivu aqiaqidi ivevababa. Ta ba'e ilivu diavona 'idiega Yaubada navabodebodemi Seitani ena nuanua luveifadi 'idiega.

<sup>13</sup> \* Nuanuagu kana veilivu aqiaqi be yaqisa tomotau qabudi ina 'iteda 'inega ina 'awahaqiaqieda eda ilivu simasimalidi 'idiega. E 'inega ge ona lugu tonuma edi toa va'auta 'idia be go'ila waiwaina ona numa 'oda'odaqa be 'inega 'unu'unumi ina luveifa. Ta wese ge ona velamo'eno kavokavovo be, ge ona ve'ae'aetoga be, wese nuagovaqa ilivuna 'idia ge ona awafelemi! <sup>14</sup> \* Ta 'esi luaqiaqieda be kana awafeleda eda Kaiwabu Ieisu Keliso 'inaya, ta ena ilivu 'inega kana vekaleko be yaqisa eda nuanuayavo qabudi tauna na'abiluvinedi, e 'inega tomotau Ieisu ina 'itea ita'a eda ilivu aqiaqidi 'idiega. 'Inega ge wese emi nuanua ona awafeledi ilivu bwavubwavudi be nuanua luveifadi adi viaqayavo 'idia.

## 14

### *Tomotau ge kana awawebuiedi*

\* 13:6: Md 22:21 \* 13:8: Md 22:39-40; Iem 2:8 \* 13:9: 'Ifu 20:13-15,17; Luve 5:17-19,21 \* 13:10: 1Kol 13:4-7 \* 13:11: Efe 5:14; 1Te 5:6-7 \* 13:12: 1Ion 2:8 \* 13:13: Lk 21:34; Efe 5:18 \* 13:14: Gal 3:27

<sup>1</sup>\* Tomeqabu edi vetumaqana dawalilina ona 'awahaqiaqiedi, ta ge wese ona ve'ae'ae-toga taudi maega 'eguma vaina yani weaqidi ivenuana magilafu ta omi'a ba'e yani diavona weaqidi emi nuanua dumadumana. <sup>2</sup>\* 'Ebevetalatutula ba'e ona noqolia: Taha toga ena vetumaqana 'inega 'abwaga qabuna 'awahaqiaqiedi be 'ai'ainidi. Ta wese mali tomotau ena vetumaqana 'inega ge nuanuana yubai na'ainidi, mana 'eguma yubai na'ainia e 'inega ana lutonova naluveifa Yaubada matanaya. <sup>3</sup>\* 'Inega tomeqabu edi nuanua 'inega yani qabuna i'awahaqiaqiea be i'ai'ainidi, ge daluaqiaqiedi be mali tomotau ina awawebuiedi 'eguma vaina yani ge nuadi be ina 'ainidi. Ta wese 'idewani tomeqabu vaina yani ge ida 'ainidia, adi luaqiaqi be ediavo ge ina 'awaluveifedi 'eguma yani qabuna i'ai'ainidi. Mana Yaubada qabu magilafudina ni'a 'awahaqiaqiedi. <sup>4</sup>\* Ge wese daluaqiaqieu be Yaubada ena tofewa una luvinea ba'e yani diavona weaqina, mana tauna Kaiwabu ena tofewa, 'inega ena Kaiwabu ana luaqiaqi be ena viaqayavo na'awahaqiaqiedi nage na'awaluveifedi. Ta tofewa nana ana fata yani qabuna aqiaqina naviaqia, mana Kaiwabu ena waiwai 'inega fewafewa.

<sup>5</sup>\* Taha wese 'ebevetalatutula ena neimi: Vaina tomotau ivonaya be vaina 'aubena gwalagwaladi be kana nuanua qiduana weaqidi, ta 'abiboda mali 'aubena. Ta vaidi ivonaya be 'aubena qabudi ge wese ida vedumaduma. 'Inega omi'a ge ona luvinedi, mana ba'e yani nana weaqina tomotau 'aidega 'aidega taunega ena nuanua navetonova aqiaqiea be 'inega ana fata navonaya, "E vonahaqiaqi, 'aubena taha taha adi alamani ba'e 'idewani!" <sup>6</sup> Tomeqabu inuanua be taha 'aubena 'inaya ina tafwalolo, e 'inega eda Kaiwabu 'inaya itafwatafwalolo. Ta tomeqabu 'abwaga be yubai taha taha i'ai'ainidi, e taudi eda Kaiwabu ana 'amayaba weaqina i'ai'ai, mana ilulukaiwa Yaubada 'inaya 'abwaga nana weaqina. Ta tomeqabu vaina 'abwaga inogenogedi Kaiwabu ana 'amayaba weaqina, taudi wese nuanuadi Kaiwabu ina giveqaiawe, mana taudi wese ilulukaiwa Yaubada 'inaya adi 'abwaga weaqina.

<sup>7</sup> Ita'a tomotau ge taudega ada giveqaiawa weaqina kada toatoa, ta 'esi katoatoa Yaubada sabi giveqaiawana yawaida 'inega. Ta wese 'idewani ge daluaqiaqieda be tauda eda nuanua 'inega kana luvine ma'oda kana 'aliga 'aiqa, nage totutaya kana 'aliga, ta 'esi Yaubada ena nuanua 'inega kana 'aliga be kana giveqaiawe. <sup>8</sup>\* Vonahaqiaqi, 'eguma nawale mayawaida katoatoa, e 'inega Yaubada kana giveqaiawe yawaida 'inega. Ta 'eguma kana 'aliga, e 'inega eda Kaiwabu kana giveqaiawe 'aliga nana 'inega. 'Inega ge taha tola'ai 'eguma mayawaida nage 'ali'aligida, mana ita'a qabuda Kaiwabu ena tomotauyavo. <sup>9</sup> Ba'e 'iuna weaqina Keliso 'aliga weaqida ta 'abibodanaya ya'itoto 'evivi, yaqisa ana fata be nave-Kaiwabu ita'a mayawaida weaqida be wese to'aliga weaqidi.

<sup>10</sup>\* 'Inega tola'ai weaqina omi'a me Diu taudi ge me Diu tovetumaqana oluluvinedi edi ilivu weaqina? Ta wese omi'a ge me Diu tola'ai weaqina me Diu ovonavona webuiedi taudi edi ilivu weaqina? Nawale Yaubada natoabui luvine ana 'ebetoa 'inaya, ta ita'a qabuda kana tovololo matanaya be naluvineda. <sup>11</sup>\* Mana Buki Nugwenugweina 'inaya Aisea Yaubada ena vona simanea vonaya,

"Kaiwabu vonaya,  
 'Yavona fofofola aqiaqiemi,  
     tomotau qabudi tuqatuqadiega  
     ina sobadi mataguya,  
     ta meadiega ina simana 'ifoqe  
     vonigo ya'a Yaubada Otaqa.'"

<sup>12</sup> 'Inega kana alamani aqiaqiea, tomotau taha taha taudega eda viaqayavo be eda vonayavo ta wese eda nuanuayavo qabudi weaqidi kana simana 'ifoqeyedi Yaubada 'inaya. <sup>13</sup> Vonahaqiaqi, Yaubada tomotau qabuda naluvineda, 'inega omi'a ge tomotau

\* 14:1: Lom 15:7    \* 14:2: Nug 9:3-4    \* 14:3: Kol 2:16    \* 14:4: Md 7:1; Iem 4:11-12    \* 14:5: Gal 4:10-11  
 \* 14:8: Gal 2:20    \* 14:10: 2Kol 5:10    \* 14:11: Ais 45:23; Fil 2:10-11

ona luvinedi edi toa vataya weaqina. Ta 'esi taumiega ona vonemia, "Ge taha tuta wese iagu taha ena givebe'uyei be 'inega luveifana naviaqi."

<sup>14</sup> \* Ya'a eda Kaiwabu Iesu maega ni'a ave'aidega, 'inega yahalamani aqiaqiea ge taha 'etoboda da'eno'eno 'abwaga nage yubai adi 'ai weaqidi. Ta 'eguma taha toga ena vetumaqana 'inega nanuaia be vaina 'abwaga nage yubai ge daluaqiaqiei be na'ainidi, e 'inega tauna 'inaya 'abwaga nana be yubai nana yani luveifana. <sup>15</sup> \* Ta 'eguma taha iau tovetumaqana eu 'ai 'inega ana lutonova ge aqiaqina, e 'inega 'amayaba ilivuna ge uda viaqia 'inaya. Ta una nuave'avinia Keliso 'aliga tomotau nana weaqina, 'inega ena veiaiana Yaubada maega ge una givelua'ui eu 'ai 'inega. <sup>16</sup> 'Inega o'a nage nuanuau vaina 'abwaga una 'ainidi, ta iau ena vetumaqana weaqina 'abwaga nana unogea, mana ge nuanuau iau ana lutonova una giveluveifei. E ba'e noga nana 'inega tomotau ina 'awahaqiaqieu. <sup>17</sup> Mana eda 'ai be eda numa ge taha yani qiduana 'eguma Yaubada ena luvine 'ayanaya katoatoa. Ta 'esi eda toa tunutunuqina edavo maega, be nuadaumwala ta wese qaiawa Niboana Gwalagwalana ena iula 'inega yani qidua otaqina Yaubada 'inaya. <sup>18</sup> Ta 'eguma taha toga Keliso weaqina fewafewa ba'e ilivu diavona 'idiega, e 'inega Yaubada naqaiawa weaqina, ta wese tomotau ina 'awahaqiaqiea.

<sup>19</sup> \* 'Inega ita'a tovetumaqana kana vetafe'wa waiwai toadaumwala weaqina 'ekalesia nuaninaya, ta tuta qabuna ma edavo kana givewaiwaieda vona iula 'idiega.

<sup>20</sup> \* Yaubada ena viaqayavo tovetumaqana 'idia ge una qeuni eu 'ai 'inega. Ta una nuave'avinia, 'abwaga be yubai be yani qabuna 'ai'aidi ge taha luveifana 'idia da'eno'eno. Ta o'a luveifana una viaqia 'eguma eu 'ai 'inega taha tomotau una givebe'uyei be 'inega ena vetumaqana nanogea. <sup>21</sup> 'Inega ge daluaqiaqieu be yubai una 'ai, nage 'oine una numa, nage yani taha taha una viaqidi 'eguma viaqa diavona 'idiega ana fata be tovetumaqana taha una givebe'uyei.

<sup>22</sup> Nage o'a eu vetumaqana 'inega unuanua be eu viaqayavo qabudi yani aqiaqidi Yaubada matanaya. E 'inega luaqiaqieu be eu nuanuayavo una a'udi o'a be Yaubada nuanimia. Vonahaqiaqi, Yaubada me ena qaiawa qiduana weaqiu 'eguma eu viaqayavo 'idiega au fata be ge wese 'wamomo una lutonovi matanaya, mana ualamani aqiaqiea yani aqiaqina uviaviaqidi. <sup>23</sup> Ta 'eguma taha toga navenuana magilafu vaina yani adi 'ai weaqina, e 'inega luaqiaqiea be yani diavona ge wese na'ainidi. Ta 'eguma na'alataya be na'ainidi, e 'inega luvine nalobea Yaubada matanaya, mana 'eguma ena viaqa ge dave'aidega ena vetumaqana maega, e 'inega luveifana ni'a viaqia.

## 15

*Mali tomotau kana a'unugwetedi ta 'abiboda ita'a*

<sup>1</sup> Vaina 'idega eda vetumaqana waiwaina eda 'ai be yani taha taha weaqidi. Ta luaqiaqieda be ge taudega eda nuanua kana viaqidi, ta 'esi tomeqabu edi vetumaqana dawalilina 'abwaga be 'ai weaqidi kana iuledi. <sup>2</sup> \* 'Inega ita'a 'aidega 'aidega luaqiaqieda be mali tomotau kana giveqaiawedi edi nuanua ana viaqa 'inaya. Mana 'eguma edi nuanua kana viaqia, ta viaqa nana 'inega iula ina lobea, e 'inega kana givewaiwaiedi edi vetumaqana eda Kaiwabu 'inaya weaqina. <sup>3</sup> \* Ba'e yani diavona kana viaqidi, mana Keliso tauna eda 'ebevetalatutula. Tauna ge danuanua ena qaiawa be ena nuanuayavo weaqidi, ta tuta nana tomotau i'awaluveifea 'inega ge danuanua ena toa aqiaqina weaqina, ta 'esi Tamana ena nuanua viaqia. Buki Nugwenugweina ba'e weaqina simana vonaya, "Tomeqabu i'awaluveifeu, ya'a wese i'awaluveifegu." <sup>4</sup> \* Ba'e yani diavona weaqina lova Buki Nugwenugweina 'inaya Yaubada ena tovesimasimanayavo i'wayavia sabi ve'itada. Ta ba'e vona diavona wese adi fata ina givewaiwaieda eda lu'ita vane 'inaya Yaubada ena vona fofofola weaqina, ta me eda bibitaqo kaba'eba'eyedi.

\* 14:14: Via 10:15; Tai 1:15 \* 14:15: 1Kol 8:11-13 \* 14:19: Lom 12:18; 15:2 \* 14:20: 1Kol 8:13 \* 15:2: 1Kol 10:24,33 \* 15:3: Same 69:9 \* 15:4: 2Tim 3:16

<sup>5</sup> Ba'e waiwai nana be wese bibitaqo nana Yaubada 'inega ka'ewea, 'inega yavevenoqi 'inaya be naiulemi 'inega toadaumwala ilivuna 'inaya ma emiavo ona toatoa. Ta Ieisu Keliso ena ilivu be ena nuanua yawaimi 'inega ona veilivuyea 'aidega 'aidega nuanimia. <sup>6</sup> 'Inega ami fata be qabumi ona luvetuba ta bonami 'aideganega eda Kaiwabu Ieisu Keliso Tamana Yaubada ona awatuboya.

<sup>7</sup> \* 'Inegana omi'a me Diu ta wese omi'a ge me Diu taumiega ma emiavo ona 'awahaqiaqiemi, 'idewani Keliso ni'a 'awahaqiaqiemi, ta ba'e 'inega Yaubada awatubona nalohea emi ilivu aqiaqina 'inega. <sup>8</sup> \* Ta ona nuave'avinia Keliso mai kavona tofewa kavovo 'idewani me Diu 'idia sabi ve'itadi vonigo Yaubada ena vona fofofola qabudi vonahaqiaqi, ta ge taha 'idiega ana fata be nabwegei. <sup>9</sup> \* Ta wese mai be yaqisa taudi mali qabu adi fata Yaubada ina awatuboya ena nuakolokolo qiduana 'idia weaqina. Ba'e weaqina kini Deibida Buki Nugwenugweina 'inaya vonaya, "Ya'a nuanuagu ena awatubou taudi mali qabu nuanidia.

Ta 'evosiega au wawa ena awatuboya."

<sup>10</sup> \* Ta wese Mosese Buki Nugwenugweina 'inaya vonaya, "Omi'a ge me Diu ona qaiawa Yaubada ena tomotauyavo taudi me Diu maega."

<sup>11</sup> \* Ta wese Deibida vonaya, "Omi'a ge me Diu qabumi Kaiwabu ona awatuboya, ta wese tomotau qabumi bwa'obwa'oya ona awatuboya."

<sup>12</sup> \* Ta wese Yaubada ena tovesimasimana Aisea vonaya, "Nawale Iese ena gade 'inega taha toga na'ifoqe navetoluvine, ta tauna tomotau qabudi naluvinedi, ta taudi ge me Diu ina lu'ita vane 'inaya."

<sup>13</sup> 'Inega yavevenoqi weaqimi Yaubada tauna emi lu'ita vane ana Tonei nagive-qaiawemi ta wese nuadaumwala naneimi, mana tauna ovevetumaqanea. Ta wese nuanuagu lu'ita vane nana nave'ena'i, ta 'imiega na'afwataiwaqa Niboana Gwalagwalana ena waiwai 'inega.

*Faulo ena 'wayavi 'iuna*

<sup>14</sup> Taigwavo be novugwavo, yahalamani aqiaqiea Yaubada ena nuakolokolo 'inega tuta qabuna ilivu aqiaqi otaqidi oviaviaqidi. Ta tola'ai Yaubada nuanuana be ona alamania, e yani diavona ba'e ni'a oalamanu aqiaqiedi 'inega ami fata mali tomotau yani diavona ba'e oveve'itedi. <sup>15-16</sup> \* Vonahaqiaqi, ilivu aqiaqidi tuta qabuna ovevefewedi, ta tua me egu giwalifatu nuanuagu ba'e yani diavona weaqidi wese ena vebibina 'eviviemu. Egu nuanua ba'e, mana ya'a Yaubada ena nuakolokolo 'inega yavetovaletuyana Ieisu Keliso weaqina omi'a ge me Diu weaqimi. 'Inega Ieisu Valena Aqiaqina yamiea 'imia ta kavona toveguba yavegubayemi 'idewani guba meilana aqiaqi otaqina Yaubada matanaya. Ta ba'e 'inega qaiqaiawa weaqimi, mana Niboana Gwalagwalana 'inega ni'a ovevunavunaqa. <sup>17</sup> 'Inega yaqaiawa qiduana egu fewa Yaubada weaqina, mana ya'a Ieisu Keliso maega. <sup>18</sup> Ge nuanuagu ena vonavane yani taha taha weaqidi, ta 'esi nuanuagu be ena vonavane Keliso ena viaqayavo 'iguyega weaqidi. Vonahaqiaqi, ya'a taudi mali qabu ni'a yamiedi Yaubada 'inaya Vale Aqiaqina ana lugaihi 'inega ta wese egu ilivu aqiaqina 'idia 'inega. Ta ba'e lugaihi nana 'inega Yaubada ivelumamatayagea. <sup>19</sup> Taudi mali qabu inuagivila

\* 15:7: Lom 14:1 \* 15:8: Md 15:24 \* 15:9: Via 3:25; 2Sam 22:50; Same 18:49 \* 15:10: Luve 32:43 \* 15:11: Same 117:1 \* 15:12: Ais 11:10; Ve 5:5 \* 15:15-16: Lom 1:5; 11:13

Yaubada ena viaqa 'ebenuavoqana 'idiega, ta ba'e yani diavona Yaubada viaqidi 'iguyega, ta ive'ebe'ita mali qabu 'idia Yaubada ena waiwai weaqina. Ta ba'e yani diavona i'ifoqe Niboanina Gwalagwalana ena waiwaiega. Vonahaqiaqi, Keliso Valena ni'a yalugaihiea 'abaga qiduana Ielusalema 'inega be luvivila tauya ana laba di'we agona Ililikumi 'inaya, ta ba'e luvivila nana 'inega Yaubada ena nuanua weaqigu yaviaqa 'ovoia.

<sup>20</sup> \* Ya'a egu nuanua waiwaina be ena lugaihiea 'abaga diavona lova ge taha toga Keliso ana wawa dalugaihiea 'idia. 'Inegana ge nuanuagu be Vale nana ena lugaihiei taha 'abaga 'inaya 'eguma taha tomotau 'ekalesia ni'a 'wadia 'abaga nana 'inaya. Mana 'eguma 'abaga nana 'inaya ya'a wese ena lugaihi, e 'inega kavonaya be taha tomotau ena avutugu dakakali ta ya'a nonoqina 'inaya egu vanue eda yoqoni. <sup>21</sup> \* 'Inega ya'a Buki Nugwenugweina ena vona Keliso weaqina ya'abi'abibodea vonaya,

"Tomeqabu Vale nana  
ge taha toga dasimanei 'idia,  
e taudina ina alamani aqiaqiea.

Ta wese tomeqabu lova Vale nana  
ge ida noqolia,  
e taudina nuadi na'eqa'uya  
Vale nana weaqina."

*Faulo nuanuana me Loma navayausidi*

<sup>22</sup> \* Vonahaqiaqi, lova nuanuagu be eda vayausimi, ta ge agu fata mana yalugaihi dadana 'abaga diavona 'idia, 'inega ya'ive'ove'o wawasai. <sup>23</sup> Tuta kuena yaba'eba'e sabi wai be ena 'itemi. Ta ba'e 'itagana egu fewa Yaubada weaqina ni'a yalu'ovoia ba'e di'we diavona 'idia, e 'inega ba'e tuta nana 'inaya nuanuagu qiduana be ena vayausimi emi 'abaga Loma 'inaya. <sup>24</sup> Ta yanuanua be nugweta ena tauya di'we qiduana Sifeini 'inaya. Ta tauya nana nuandinaya ena 'ita nugwetemi. Ta eda toa 'inaya kana veiaiana ta kana toa tufwana tuta kuena, ta tuta nana ena nogemi e ona iulegu mane 'inega egu tauya nana weaqina.

<sup>25-26</sup> \* Vonahaqiaqi, ena wai ta nugweta luaqiaqiegu be ena tauya Ielusalema 'inaya ta 'abaga nana ana tovetumaqanayavo adi nei kavovo me Masidonia ta wese me Akaya 'idiega ena neidi. Edi nuanua qiduana be ina iuledi, mana Ielusalema ana 'ekalesia edi toa vitana valena inoqolia, 'inega nuanuadi qiduana ina veyolubedi mane 'inega. <sup>27</sup> \* Ba'e nei kavovo nana me Guliki me edi qaiawa ivegogonea me Ielusalema weaqidi, mana lova Iesu Valena Aqiaqina i'ewea me Diu tovetumaqana itoatoa Ielusalema 'inaya 'idiega, ta ba'e Vale nana 'inega me Guliki niboanidi igiveqaiawedi. 'Inega me Guliki adi lutonova kavona adi loaga da'eno'eno me Diu 'idia, e 'inega nuanuadi ina iuledi edi toa vitana 'inaya mane nana 'inega. <sup>28</sup> Vonahaqiaqi, me Guliki edi iula aqiaqi otaqina me Ielusalema weaqidi ya'a taugu nimaguyega ena ve'ifoqeyea 'idia. Ta 'abibodanaya ena tauya Sifeini weaqina e 'inega ena lugu emi 'abaga Loma 'inaya be ena vayausimi. <sup>29</sup> \* Ta yahalamani aqiaqiea egu wai nana 'inaya Keliso ena veyoluba qiduana vuaqina qabuda kana lutonova aqiaqiea.

<sup>30</sup> \* Egwavo, ita'a qabuda eda Kaiwabu Iesu Keliso ena tomotauyavo. Ta wese Yaubada Niboanina Gwalagwalana 'inega ita'a 'aidega 'aidega veyoluba ilivuna kaviaviaqia nuani-daya. 'Inega yanoqinoqiemmi be Yaubada 'inaya ona venoqi waiwai egu tauya Ielusalema 'inaya weaqina, be 'inega ge taha vita ena lobei di'we nana 'inaya. <sup>31</sup> Nuanuagu be ona venoqi weaqigu be yaqisa Yaubada nava'abo'abogu di'we Iudia ana totoayavo taudi Yaubada ge ida matayagea 'idiega. Ta wese ona venoqi be yaqisa di'we nana ana tovetumaqanayavo nei kavovo nana me Guliki 'idiega ina 'awahaqiaqiea ta me edi qaiawa ina 'ewea. <sup>32</sup> Ba'e yani diavona weaqidi nuanuagu ona venoqi weaqigu. 'Inega 'eguma

\* 15:20: 2Kol 10:15-16 \* 15:21: Ais 52:15 \* 15:22: Lom 1:13 \* 15:25-26: 1Kol 16:1; 2Kol 8:1; 9:2,12; Via 24:17 \* 15:27: 1Kol 9:11 \* 15:29: Lom 1:11 \* 15:30: 2Kol 1:11; Kol 4:3; 2Te 3:1

Yaubada nahawafelegu me egu qaiawa ena wai 'imia. Ta wai nana 'inaya taudega kana vona iuleda be kana givewaiwaieda. <sup>33</sup> Egu nuanua qiduana be nuadaumwala ana Yaubada omi'a qabumi naiulemi ta maega ona toatoa. Vonahaqiaqi, egu nuanua 'idewani.

## 16

*Faulo ena lukaiwa enavo 'idia*

<sup>1</sup> Nuanuagu ena vematamagilafuyemi novuda Foebi weaqina. Ta ona alamania novuda nana vavine aqiaqina Yaubada ena fewa 'inaya, 'inega ya'awahaqiaqiea. Tauna 'ekalesia taha ana wawa Senikila ana dikoni. <sup>2</sup> Ta nuanuagu ona 'ebe'ewea ita'a tovetumaqana eda ilivu 'inega, mana tauna wese eda Kaiwabu ena tomotau taha. Ta 'eguma taha yani 'inega nakusa, e 'inega ona 'abivitea, mana tauna 'evisa tomotau ni'a iuledi edi nuanua taha taha 'idia, ta ya'a wese iula qiduana ni'a yalobea 'inega.

<sup>3</sup> \* Nuanuagu Filisila ma moqanedi Akwila egu lukaiwa ona simanayea 'idia. Lova magilafudina maega afewa leisu Keliso weaqina. <sup>4</sup> Vonahaqiaqi, vaina tuta veilage yalobea ta taudi tuta diavona 'idia ge ida nogegu, ta 'esi magilafudina i'ali'aliga 'waqi weaqigu. Ta ge agu 'aidega eda lulukaiwa 'idia edi iula weaqina, ta 'esi taudi mali qabu edi 'ekalesia qabuna 'inega wese ilulukaiwa 'idia iula nana weaqina.

<sup>5</sup> Ta wese egu vekaiwa ona simanea tovetumaqana qabudi 'idia ivava'auta Filisila ma moqanedi edi vanuea.

Ta wese ia otaqigu Efenetusi egu lukaiwa ona vonea. Tauna di'we Eisia 'inega maduветumaqana leisu 'inaya, ta 'abiboda vaidi tomotau.

<sup>6</sup> Novuda Meli egu lukaiwa ona simanea 'inaya. Tauna vetafe'wa waiwai omi'a sabi iulami.

<sup>7</sup> Ta wese egu tomotauyavo Anidokosi be Iunia egu lukaiwa 'idia. Lova taudi vanue 'e-beyoqona 'inaya maega atoa. Taudi adi 'awahaqiaqi be adi 'amayaba ilobelobea leisu ena tovaletuyanayavo qabudi 'idiega. Magilafudina Keliso imaduvetumaqanea, ta 'abiboda ya'a.

<sup>8-9</sup> Iagu Amifilatusi wese egu lukaiwa ona simanea 'inaya. Iagu nana yaveyoluba aqiaqiea mana tauna wese Kaiwabu ena tomotau ya'a 'idewani.

Ta wese Ebanosi ona vekaiwa 'inaya, tauna lova maega afewa 'aidega Keliso weaqina.

Ta wese egu veyoluba ona simanea ia aqiaqigu Sitakisi 'inaya.

<sup>10</sup> Ta wese Afelesi egu lukaiwa ona simanea 'inaya. Tauna 'oloto aqiaqina, ta vita taha taha ni'a vebaedi ta ena vetumaqana ge danogei, e 'inega Keliso 'oloto nana 'awahaqiaqiea.

Ta wese egu lukaiwa qiduana ona simanea tovetumaqanayavo qabudi 'idia Alisitobulusi maega itoatoa ena vanuea.

<sup>11</sup> Ta wese Elodioni egu lukaiwa ona simanea 'inaya, tauna wese Diu 'olotona 'idewani ya'a.

Ta tovetumaqanayavo itoatoa iagu Nasiusi ena vanue 'inaya egu lukaiwa 'idia ona simanea.

<sup>12</sup> Ta vivine magilafudi Tilifena be Tilifosa egu lukaiwa ona simanea 'idia, ba'e vivine diavona nawale ivevetafe'wa waiwai eda Kaiwabu weaqina.

Ta wese egu lukaiwa ona simanea Fesisi 'inaya, tauna wese ena fewa waiwaina eda Kaiwabu weaqina.

<sup>13</sup> \* Ta wese Lufasi egu vekaiwa ona simanea 'inaya, tauna to'abiboda aqiaqina eda Kaiwabu ena fewa 'inaya.

Ta inana wese egu lukaiwa 'idia. Vonahaqiaqi, iveilivu aqiaqiegu kavonaya be ya'a natu otaqidi.

<sup>14</sup> Ta wese egu lukaiwa ona simanea Asinikilito be Filigoni be Elimesi be Fatalobasi be Elimasi ta wese Yaubada ena tomotauyavo qabudi maega itoatoa 'idia.

\* 16:3: Via 18:2 \* 16:13: Mk 15:21

<sup>15</sup> Ta wese egu lukaiwa ona simanea Filologusi ma moqanena Iulia be Nelusi ma novuna be Olimifasi ta wese tovetumaqana qabudi maega itoatoa 'idia.

<sup>16</sup> \* Ta omi'a to'ekalesia ma emiavo venima sicutuyega ona lukaiwa 'idewani ita'a tovetumaqana eda ilivu aqiaqina 'inega.

*Faulo ena vebibina* 'ebelu'ovoa

<sup>17</sup> \* Egwavo, wese taha yani weaqina nuanuagu qiduana ena vonemi. Onoqoli, ona 'itamaki aqiaqiemi tomotau luveluveifadi weaqidi, mana taudi edi lugaihi be wese edi ve'ita 'inega 'ekalesia ana tovetumaqanayavo ivetoasi'iedi. Taudi edi ve'ita 'inega tovetumaqana edi vetumaqana igiveluveifea, mana edi ve'ita ge dave'aidega ve'ita tunutunuqina maega, 'idewani ve'ita nana lova ni'a o'ewea tove'ita aqiaqidi 'idiega. 'Inega taudi maega ge ona veiaiana, ta 'esi ona toasi'i 'idiega. <sup>18</sup> \* Ba'e tove'ita diavona ge eda Kaiwabu Keliso weaqina ida fewafewa, ta 'esi taudiega edi nuanua weaqina ifewafewa. Taudi edi vona yafayafa be wese vona adi noqola aqiaqina 'idiega tomotau iu'au'avedi, mana tomotau diavona ge ida alamaniana vonigo tove'ita dina edi vona ge Yaubada ena nuanua 'inega. <sup>19</sup> \* Tomotau qabudi ni'a ialamani aqiaqiea omi'a eda Kaiwabu ena vona ovematamatayagea, ta ba'e weaqina yaqaiawa 'ena'ina. Nuanuagu qiduana nuami na'eqa'u aqiaqiei be yaqisa ami fata yani qabuna aqiaqina ona viaqidi, ta ilivu luveifana adi viaqayavo ge nuanuagu ona viaqidi.

<sup>20</sup> \* Ta 'eguma toluveifa diavona ona nogedi, e 'inega nuadaumwala ana Yaubada tuta goyona ena waiwaiega Seitani naha'uwebuiea 'aqemi 'ayanaya ta navamemea.

Ta yavevenoqi weaqimi be eda Kaiwabu Iesu Keliso ena veyoluba na'eno'eno omi'a 'imia.

<sup>21</sup> \* Iagu Timoti maega afewafewa Keliso weaqina, ta tauna ena lukaiwa vetunei waiwai 'imia. Ta wese egu tomotauyavo Lusiasi be Iasoni ta wese Sosifata inuaimi 'inega edi vekaiwa ivetunei waiwai 'imia.

<sup>22</sup> Faulo ena leta ba'e ya'a Tetiasi ya'wayavia waiwai 'imia. Ta nuanuagu wese ena lukaiwa 'imia, mana ya'a wese taimi taha Keliso 'inega.

<sup>23-24</sup> \* Ya'a Faulo iagu Gaiasi ena vanuea yatoatoa, ta wese tovetumaqana qabudi ba'idia ivava'auta tafwalolo weaqina. Ta tauna wese ena lukaiwa vetunei waiwai 'imia. Ta wese 'abaga nana ana mane ana to'itamaki ana wawa llastasi lulukaiwa 'imia, ta wese 'idewani Kwatusi ena lukaiwa vetunei waiwai 'imia.

<sup>25</sup> \* Yaubada ana fata be nagivewaiwaiemi, ta ba'e waiwai nana weaqina yavevelu-lu'uyayea tuta nana Iesu Keliso Valena Aqiaqina yalulugaihiea tomotau 'idia. Ta ba'e Vale nana Yaubada ena nuenuega 'waivea 'imiega tuta ana 'ebeve'ale 'inega. <sup>26</sup> Ta ba'itagana ba'e Vale nana ana alamaniana Yaubada ni'a give'ifoqeyea taudi mali qabu koyadi 'idia di'we taha taha 'idia be yaqisa adi fata Keliso ina vetumaqanea ta ina matayagea. Ta ba'e yani diavona edi 'ifoqe weaqina lova tovesimasimanayavo imadusimanea Buki Nugwenugweina 'inaya Yaubada Toatoa Vatayana ena luvine be wese ena nuanua 'inega. <sup>27</sup> 'Inega luaqiaqieda be Yaubada kana awatuboya! Tauna ana 'aidega otaqa Toalamani aqiaqi. Vonahaqiaqi, Iesu Keliso ena viaqayavo 'idaya weaqina eda awatubo vataya Yaubada 'inaya na'eno'eno tuta qabuna 'idia. Vonahaqiaqi, eda nuanua 'idewani.

\* 16:16: 1Kol 16:20; 1Fit 5:14 \* 16:17: Md 7:15; Tai 3:10 \* 16:18: Fil 3:19; 2Fit 2:3 \* 16:19: Lom 1:8; 1Kol 14:20 \* 16:20: Nug 3:15 \* 16:21: Via 16:1-2; 19:22; 20:4 \* 16:23-24: Via 19:22; 1Kol 1:14 \* 16:25: Efe 1:9; 3:5,9; Kol 1:26; Lom 1:5

## Faulo ena leta nugweta me Kolinita 'idia

### *Leta ana alamani weaqina*

Kolinita taha 'abaga di'we Akaya gamonaya, ta me Loma edi 'ebeluvine ana 'abaga qiduana be kaikaiwabuna. 'Inega 'abaga nana 'inaya tomotau qabudi itoatoa, ta tovegimwane be, tovekaikaiwabu ta wese toluvineavo qiduqiduadi edi 'abaga. Ta totoa 'abaga mali di'we be mali di'we 'idiega iva'uta mai 'abaga nana 'inaya. Ta taudi 'ebeiwa'odu taha taha be, wese ilivu dumadumadi be dumadumadi, ta wese mali nuanua be mali nuanua imiedi. Faulo ena luvivila vemagilafuna 'inaya Iesu Valena ana lugaihi weaqina 'ekalesia 'wadia 'abaga nana 'inaya. Ta 'abibodanaya me Kolinita vona ta wese vetala'ai letayega ivetunei 'inaya, mana 'ekalesia ana ilivu be yani taha taha weaqina nuadi ge da'eqa'uya. Ta wese Faulo edi ilivu weaqina noqolia, 'inega nuanuana nagivetunuqidi. 'Inegana Faulo ba'e leta nana 'wayavia me Kolinita 'idia, mana nuanuana nave'ita aqiaqiedi 'ekalesia yawaina ana ve'eda weaqina. 'Inega ve'itedi yani taha taha weaqina 'idewani ve'aidega be, veiaiana be, vaqivaqidi edi toa aqiaqina be, Niboana Gwalagwalana ena wila'a be, veyoluba ilivuna be, nei kavovo ta wese Iesu ena ya'itoto 'evivi weaqina ve'itedi. E ba'e leta nana ana 'iu.

### *Leta gamona*

1:1-9 Vematamagilafu be venoqi lukaiwa maega

1:10-4:21 Vetoatoasi'i 'ekalesia gamonaya

5:1-7:40 Velamo'eno kavokavovo be susu yawaidi weaqina

8:1-11:1 Tovetumaqana be wese tonoga weaqidi

11:2-14:40 Tafwalolo ana ve'eda ta wese awatubo weaqina

15:1-58 Iesu ena ya'itoto 'evivi 'aligege ta wese tovetumaqana edi ya'itoto 'evivi

16:1-4 Nei kavovo to'ekalesia di'we Iudia 'idia

16:5-24 Faulo ena nuanua be ena vona 'ebelu'ovoa

### *Lukaiwa*

<sup>1</sup> Lova Yaubada ena nuanua 'inega ya'a Faulo venua'ivinegu be yavetovaletuyana Iesu Keliso weaqina. Ta leta ba'e ya'a ta wese taida Sositeni 'imega.

<sup>2</sup> Ta ba'e leta nana waiwai omi'a Yaubada ena 'ekalesia 'abaga qiduana Kolinita 'inaya otoatoa weaqimi. Omi'a Yaubada ni'a venua'ivinemi ena tomotauyavo ta givegwalemi Iesu Keliso ena viaqa 'inega, 'idewani tomotau di'we qabudi 'idia itoatoa ni'a givegwaledi 'eguma taudi wese eda Kaiwabu Iesu Keliso ana wawa ivetumaqanea. Taudi be wese ita'a eda Kaiwabu 'aidegana.

<sup>3</sup> Avevenoqi weaqimi Tamada Yaubada be eda Kaiwabu Iesu Keliso nuakolokolo ta wese nuadaumwala ina neimi.

### *Faulo ena lukaiwa Yaubada 'inaya me Kolinita weaqidi*

<sup>4</sup> Omi'a weaqimi yalulukaiwa Yaubada 'inaya tuta qabuna, mana ena nuakolokolo qiduana neimi emi veiaiana Iesu Keliso 'inega. <sup>5-6</sup> Lova Iesu Keliso Valena alugaihi aqiaqiea 'imia, ta Vale nana ovetumaqanea e 'inega vave'abi aqiaqi yawaimi 'inaya. Ta emi ve'aidega Iesu maega 'inega emi viaqayavo qabudi iveaqiaqi otaqa, 'idewani emi vonayavo venua'ewa'ewa, ta wese emi alamani Yaubada be, Keliso ta wese tovetumaqana edi totoa weaqina veaqiaqi otaqa. <sup>7</sup> 'Inegana Yaubada Niboanina Gwalagwalana ena wila'a qabudi ge taha 'idiega oda kusa, ta eda Kaiwabu Iesu Keliso ena 'ifoqe mai weaqina emi nuanua waiwaina 'inega oba'eba'eye. <sup>8</sup> \* Tauna nagivewaiwaiemi ana laba tuta 'ebeluvine 'inaya, be yaqisa ge taha toga ana fata nave'ewemi tuta nana eda Kaiwabu Iesu Keliso ena 'aubena qiduana 'inaya na'evivi namai bwa'obwa'oya. <sup>9</sup> \* Vonahaqiaqi,

\* 1:8: 1Te 3:13; 5:23 \* 1:9: 1Ion 1:3; 1Te 5:24



Yaubada ba'e yani diavona naviaqidi weaqimi, mana tauna ma ana vetumaqana. Ta tauna ni'a venua'ivinemi veiaiana aqiaqina 'inaya, Natuna Ieisu Keliso eda Kaiwabu 'inega.

*Faulo nuanuana ina ve'aidega*

<sup>10</sup>\* 'Inega egwavo, egu nuanua waiwaina ba'e ona noqolia! Eda Kaiwabu Ieisu Keliso ana wawega yavonemi ona lua'u ve'ae'aetoga nuanimia. Nuanuagu ona ve'aidega be yaqisa vetoatoasi'i ge wese na'eno'eno 'ekalesia gamonaya. Ta 'esi ma emiavo emi toa nave'aidega ta wese emi nuanua 'aideganega yani qabuna ona viaqidi. <sup>11</sup> Egwavo, egu nuanua ba'e 'idewani mana Kiloi edi susu 'inega vaidi tomotau ni'a ivematamagilafuyegu emi ve'ae'aetoga weaqina. <sup>12</sup>\* Emi ve'ae'aetoga ba'e 'idewani, vaina ovonaya, "Ima'a Faulo a'abi'abibodea!" ta vaina ovonaya, "Ima'a Afolosa a'abi'abibodea!" ta vaina ovonaya, "Ima'a Fita a'abi'abibodea!" ta wese vaina ovonaya, "Ima'a Keliso a'abi'abibodea!"

<sup>13</sup> Ba'e 'inega ana 'ita kavona Keliso foa adi yau o'abi'abibodedi, waisa? Nage ya'a Faulo itutuve'ewegu 'etoluai 'inaya weaqimi? Gebu'e otaqa! Nage ya'a Faulo agu wawega babitaiso o'ewea? Gebu'e otaqa! <sup>14</sup>\* Vonahaqiaqi, ya'a Kilisifasi be Gaiusi magilafudimo yagivebabitaisodi lova tuta nana omi'a ya'a maega katoatoa, ta ge taha toga wese 'imiega eda givebabitaisoi. Ta ba'e weaqina yalulukaiwa Yaubada 'inaya, <sup>15</sup> fole wese vaina 'imiega oda vonaya, "Ya'a Faulo ana wawega yababitaiso." <sup>16</sup>\* (Ei, nuagu fania, Setefano me ena susuyavo wese yagivebabitaisodi, ta yanuaia ge taha toga wese baibitaiso da'ewei 'iguyega, ta adi 'aidegamo.) <sup>17</sup> Keliso ge davetunegu tomotau 'idia sabi babitaisodi, ta 'esi vetunegu 'idia sabi lugaihi weaqina. Ta Vale nana ge eda lugaihiea taugu egu vona 'inega, ta 'esi Yaubada ena venuaha'u 'inega, fole Keliso ena 'aliga 'etoluai 'inaya Valena ena waiwai eda givedawalilia.

*Yaubada ena waiwai kana* 'itea Keliso ana 'etoluai 'inaya

<sup>18</sup>\* Vonahaqiaqi, Keliso ena 'aliga 'etoluai 'inaya Valena ana noqola kavona yani kavokavovo taudi 'aliga ana 'eda 'inega itautauya 'idia. Ta 'esi ita'a 'eto'etoyavuida Yaubada ena waiwai kahalamani aqiaqiea Vale nana 'inega. <sup>19</sup>\* Mana Buki Nugwenugweina 'inaya Yaubada vonaya,

"Ya'a toalamani qiduqiduadi bwa'obwa'oya  
edi alamani ena luveawalia,  
ta wese toalamani aqiaqi  
edi nua'eqa'u ena 'ewa yavulea."

<sup>20</sup>\* Ba'e vona diavona vonahaqiaqi, 'inega kana nuanua: Tola'ai na'ifoqe taudi toalamani qiduqiduadi 'idia? Ta tola'ai na'ifoqe Mosese ena luvine ana tove'itayavo 'idia? Ta wese tola'ai na'ifoqe tove'ae'aetoga waiwai ta aqiaqidi 'idia ba'e bwa'obwa'oya itoatoa? Vonahaqiaqi, Yaubada ba'e qabu diavona edi alamani ni'a veyani kavokavovoyea, <sup>21</sup>\* mana ana 'aidegamo Toalamani aqiaqi, ta ena nuanua ba'e 'idewani: Bwa'obwa'o ana tomotauyavo ge adi fata be taudi edi alamaniega tauna ina alamani aqiaqiei. 'Inegana Yaubada nuanuana tovetumaqana na'etoyavuidi Natuna ena 'aliga 'etoluai 'inaya Valena 'inega. Ta Yaubada ema lugaihi kavokavovo vefewea sabi 'etoyavuidi. <sup>22</sup> Taudi me Diu nuanuadi 'ebe'ita mahalega ina 'itedi, ta taudi ge me Diu alamani isalisalia. <sup>23</sup>\* Ta ima'a Ieisu ana tutuve'ewa 'etoluai 'inaya Valena alulugaihiea qabu diavona 'idia, 'inega me Diu nuadi luveifa, ta taudi ge me Diu lugaihi nana i'awaluveifea. <sup>24</sup>\* Ta Yaubada me Diu be wese taudi ge me Diu ni'a gabedi sabi 'etoyavuidi. Ta tomeqabu 'idiega gaba nana ni'a i'awahaqiaqiea, e taudi Yaubada ena waiwai ni'a ivebaea Keliso 'inega, ta wese Keliso nana 'inega Yaubada ena alamani aqiaqi otaqina ialamani aqiaqiea. <sup>25</sup>\* Tomotau vaidi ivonaya be Yaubada ena viaqa, viaqa kwavakwavana tuta nana Natuna awafelea

\* 1:10: Fil 2:2 \* 1:12: 1Kol 3:4; Via 18:24-28 \* 1:14: Via 18:8; Lom 16:23 \* 1:16: 1Kol 16:15 \* 1:18: Lom 1:16 \* 1:19: Ais 29:14 \* 1:20: Ais 19:12; 33:18; 44:25; Iob 12:17 \* 1:21: Md 11:25 \* 1:23: Lom 9:32; 1Kol 2:14 \* 1:24: Kol 2:3 \* 1:25: 2Kol 13:4

'etoluai 'inaya. Ta Yaubada ena alamani tomotau edi alamani veqidua va'inea. Ta wese 'idewani tuta nana Natuna awafelea 'etoluai 'inaya, 'inega tomotau ivonaya be Yaubada ena viaqa dawalilina. Ta vonahaqiaqi, Yaubada ena viaqa ba'ena tomotau edi viaqayavo qabudi veqidua va'inea.

<sup>26</sup> \* Egwavo, ona nuaia lova omi'a ge ami wawamo, 'inega tomotau ivonaya be emi qabu 'inega ge 'ealimi toalamani, ta ge 'ealimi toluvine, ta wese ge 'ealimi gade kaikaiwabuna 'idiega oda vi'oi, ta tua Yaubada gabemi. <sup>27</sup> Vonahaqiaqi, bwa'obwa'o ana tomotauyavo ivonaya be omi'a tomotau kwavakwavami. Ta Yaubada tovekwavakwava venua'ivinedi bwa'obwa'o ana toalamaniavo sabi giveiniyauyaunidi. Ta wese bwa'obwa'o ana totoayavo ivonaya be omi'a dawalilimi. Ta 'esi Yaubada todawalilidi venua'ivinedi bwa'obwa'o ana tovewaiwaiavo sabi giveiniyauyaunidi. <sup>28</sup> Bwa'obwa'o ana totoayavo vaidi tomotau i'ita webuiedi ta wese iveyani kavovoyedi, e taudina Yaubada venua'ivinedi. Ta ba'e 'idewani Yaubada viaqia bwa'obwa'o ana totoayavo edi nuanua sabi luveawalina. <sup>29</sup> \* Yaubada ena nuanua ba'e 'idewani be yaqisa ge taha toga matanaya ana fata taunega nagivaneyei.

<sup>30</sup> \* Yaubada ena viaqa 'inega luvetubemi Iesu Keliso maega. Ta Keliso nana Yaubada ena alamani aqiaqi otaqina ve'itayea 'idaya. Ta Iesu ena viaqa 'inega ni'au kave-tunutunuqa ta wese gwalagwalada Yaubada matanaya. Ta wese Iesu eda luveifanayavo 'idiega ni'a 'etoyavuida. <sup>31</sup> \* 'Inega Buki Nugwenugweina ena vona kana 'abibodea vonaya, "Eguma taha toga nuanuana navonavane ana 'etoyavua weaqina, e 'inega luaqiaqiea be eda Kaiwabu ana 'aidega otaqa ana wawa nagivaneyea."

## 2

*Keliso ena* 'aliga 'etoluai 'inaya yani qidua otaqina

<sup>1</sup> Tovetumaqana ye, lova Yaubada ena vona 'wai'waivina Iesu weaqina maduve'ifo-qeyea 'iguya, ta 'abibodanaya yamai 'imia Valena sabi lugaihina. Ta ge vona qiduquduadi nage ve'ita vitavitadi 'idiega Vale nana eda simanei 'imia. <sup>2</sup> Mana tuta nana yamai 'imia 'inega egu nuanua waiwaina ena lugaihi Iesu Keliso Valena Aqiaqina ta ana tutuve'ewa weaqina, ta ge taha wese tola'ai weaqina. <sup>3</sup> \* Vonahaqiaqi, ya'a me egu dawalili ta me egu mwaniniva ta wese me egu dedela qiduana ya'ifoqe 'imia. <sup>4</sup> \* Ta egu lugaihi be egu ve'ita ge eda neimi totoa bwa'obwa'o edi alamani 'inega nage vona nua'ewa'ewadi 'idiega, ta 'esi Yaubada Niboanina ena waiwaiega. <sup>5</sup> Ba'e 'idewani yaviaqia, be yaqisa emi vetumaqana ana avutugu ona a'uya Yaubada ena waiwai 'inaya, ta gebu tomotau edi alamani 'inega.

*Yaubada ena alamani aqiaqi neida Niboana Gwalagwalana* 'inega

<sup>6</sup> Ta ima'a alamani aqiaqi Yaubada 'inega aveve'itayea tovetumaqana fa'alidi 'idia. Ta ba'e alamani nana gebu bwa'obwa'o ana alamani 'idewani, ta wese gebu bwa'obwa'o ana toluvineavo edi alamani 'idewana, mana toluvine diavona Yaubada naluveawalidi. <sup>7</sup> Vonahaqiaqi, ima'a taudi totoa bwa'obwa'o edi alamani 'inega ge ada ve'itemi, ta 'esi Yaubada ena alamani aqiaqi 'wai'waivina 'inega. Ba'e alamani nana lova Yaubada 'waivea tomotau 'idiega, ta ba'e 'itagana ima'a alamani nana asimasimanea 'imia. Yaubada alamani nana ena nuenuega madu'iva'ava'aia eda 'ebeveaqiaqi otaqa weaqina, ta 'abiboda bwa'obwa'o viaqia. <sup>8</sup> Ta bwa'obwa'o ana toluvineavo ge taha toga 'idiega nuana da'eqa'ui ba'e alamani nana weaqina, mana 'eguma nuadi da'eqa'uya, e 'inega ge wese eda Kaiwabu aqiaqi otaqina ida tutuve'ewei 'etoluai 'inaya. <sup>9</sup> \* Ta ge ida alamania. 'Inega Buki Nugwenugweina taudi weaqidi simana vonaya, "Tola'ai Yaubada lova 'iva'ava'aia taudi ana toveyolubayavo weaqidi ge taha toga da'itei,

\* 1:26: Md 11:25; Iem 2:5 \* 1:29: Efe 2:9 \* 1:30: Iel 23:5-6 \* 1:31: Iel 9:24 \* 2:3: Via 18:9; 2Kol 10:1

\* 2:4: 1Te 1:5 \* 2:9: Ais 64:4

ta ge taha toga danoqoli  
ta wese ge taha toga nuana da'eqa'ui."

<sup>10</sup> Ta ima'a tovaletuyana yani nana ni'a ahalamania, mana Yaubada Niboanina 'inega give'ifoqeyea 'imaya. Vonahaqiaqi, Niboani nana yani qabuna Yaubada weaqina ana fata nagive'ifoqeyedi 'imaya, mana tauna yani qabuna alahalamanidi, ta wese Yaubada ena nuanua 'wai'waividi alamani aqiaqiedi. <sup>11</sup> Kana nuaia ita'a tomotau weaqida. Ge taha toga ana fata mali tomotau ena nuanua nahalamania, ta 'esi tomotau nana niboanina 'inaya toatoa ana 'aidega ena nuanuayavo ana toalamani. Ta wese 'idewani Yaubada weaqina. Ge taha toga Yaubada ena nuanuayavo ana fata nahalamanidi, ta 'esi Niboanina ana 'aidega yani qabuna alahalamanidi Yaubada ena nuanua weaqina. <sup>12</sup> Ima'a gebu bwa'obwa'o niboanina ada 'ewei, ta 'esi Niboana Yaubada 'inega ni'a a'ewea. Vonahaqiaqi, Niboani nana a'ewea be yaqisa ena iula 'inega Yaubada ena nei kavovo qabudi 'imaya weaqidi nuama na'eqa'uya. <sup>13</sup> 'Inega yani diavona weaqidi ba'e 'itagana asimasimana 'imia ge totoa bwa'obwa'o edi alamani 'inega, ta 'esi Yaubada Niboanina 'inega. Ta ima'a taudi tovetumaqana fa'alidi 'eguma taha yani Yaubada Niboanina weaqina nuanuama ana givesimatalia 'idia, e 'inega Niboana nana ena vona 'inega agigivesimatalia. <sup>14</sup> Ta 'eguma taha toga yawaina ge dahawafelea Yaubada 'inaya, e 'inega tomotau nana ge ana fata Yaubada ena ve'ita aqiaqidi Niboanina 'inega na'awahaqiaqiedi. Tauna yani diavona weaqidi nuana nawale ge da'eqa'ui, 'inega ge wese danuanua weaqidi, mana ve'ita nana adi aqiaqi ge ada fata kana alamanidi 'eguma Yaubada Niboanina 'idaya ge datoatoa. <sup>15</sup> Ta 'eguma taha tomotau Yaubada Niboanina 'inaya toatoa, e 'inega ana fata yani qabudi weaqidi nuana navetonova aqiaqiea, be 'inega nahalamania tola'ai aqiaqina ta wese tola'ai lueweifana. Ta ge taha toga ana fata tomotau nana na'awaluveifei ena viaqa aqiaqidi weaqidi. <sup>16</sup> \* Mana Buki Nugwenugweina vonaya,

"Togama ana fata be  
eda Kaiwabu ena nuanua  
nahalamania?

Ge taha toga!

Ta wese togama ana fata be  
eda Kaiwabu navonei  
tola'ai naviaqi?

Ge taha toga!"

Ta ima'a ama fata ba'e yani diavona ana alamanidi, mana ima'a ema nuanua 'idewani Keliso ena nuanua.

### 3

*Faulo be Afolosa Keliso ena tofewayavo* 'ekalesia 'inaya

<sup>1</sup> Egwavo, lova ge agu fata be ena ve'itemi 'idewani yaveve'ita taudi Yaubada Niboanina 'idia toatoa. Ta 'esi yave'itemi kavona omi'a totoa bwa'obwa'o edi ilivuyega oveveilivu 'aiqa. Mana ana 'ita kavona omi'a nuami nawale ge da'eqa'uya tovetumaqana edi ilivu weaqina, e 'inega emi toa Keliso ena 'ekalesia gamonaya kavona gogama sususudi.

<sup>2</sup> \* 'Inega lova gebu 'abwaga otaqa eda ve'ainimi, ta 'esi kavona susu yaneimi, mana omi'a ge ami fata be 'abwaga falafalana oda 'aini. Ta wese ba'itagana nawale ge ami fata, <sup>3</sup> \* mana omi'a emi toa nawale kavona totoa bwa'obwa'o edi ilivu 'idewana. Emi 'ekalesia nuaninaya ve'ifi'ifi be wese ve'ae'aetoga ilivu diavona i'eno'eno. Ta ba'e 'inega omi'a kavona totoa bwa'obwa'o, waisa? <sup>4</sup> \* Mana vaina 'imiega ovonaya, "Ima'a Faulo a'abi'abibodea!" Ta vaina ovonaya, "Ima'a Afolosa a'abi'abibodea!" Ta ba'e ilivu nana 'inega, ana 'ita kavona omi'a totoa bwa'obwa'o edi ilivu 'idewani, waisa?

<sup>5</sup> \* Ona nuaia, nage Afolosa yani qiduana? Gebu! Nage ya'a Faulo yani qiduana? Gebu! 'Inega tola'ai weaqina ogivaneyema? Mana ima'a tomotau kavokavovo ta

\* 2:16: Ais 40:13 \* 3:2: Ibe 5:12-13; 1Fit 2:2 \* 3:3: 1Kol 1:10-11 \* 3:4: 1Kol 1:12 \* 3:5: Via 18:4,11,27-28

Yaubada ena tofewayavo. Eda Kaiwabu ima'a magilafuma ema fewayavo neima 'inega aviaviaqidi. Ta ema lugaihi 'inega ove'ale Keliso ovetumaqanea. <sup>6</sup> Ta ema fewa 'imia kavona vaoqa ana fewa 'idewani, mana ya'a Faulo Yaubada ena vona vewanina ya'wadia be Afolosa vewani nana 'itamakia, ta Yaubada givetaboya. <sup>7</sup> 'Inega to'wadi nana be wese to'itamaki nana ge yani qiduana, ta 'esi Yaubada yani qiduana, mana tauna yani qabudi adi togivetabo. <sup>8</sup> \* 'Inega to'wadi nana be wese to'itamaki nana iveveiuula ta edi fewa 'iuna 'aidegana. Ta edi gwavubiga ana 'etofwafwa 'inega ve'ia dumadumana be dumadumana ina lobe Yaubada 'inega. <sup>9</sup> Mana ima'a Yaubada maega afewafewa, ta omi'a kavona Yaubada ena vaoqa. Ta wese omi'a kavona Yaubada ena vanue.

<sup>10</sup> Vona sesebai 'ekalesia ana yoqona weaqina ona noqolia, e ba'e: Yaubada ena veyolubega alamani neigu vanue ana yoqona weaqina, 'inega fewa nana yaviaviaqia. Ya'a vanue nana ana 'oqolayavo yavetovolodi, ta ba'itaga Yaubada ena tofewayavo 'oqola diavona 'idia i'e'eyoqona. Ta to'eyoqona 'aidega 'aidega luaqiaqiea be taunega nanuanua aqiaqi ma'oda 'e'eyoqona 'aiqa. <sup>11</sup> \* Ge taha toga ana fata mali 'oqola navetovoloi, mana ni'a vevetovolona, e omo'e 'oqola nana tauna Iesu Keliso. <sup>12</sup> 'Eguma taha to'eyoqona yoana aqiaqidi ta falafaladi 'idiega na'eyoqona ta wese 'eguma taha to'eyoqona yoana kavokavovo 'idiega na'eyoqona, <sup>13</sup> \* e 'inega luvine ana 'aubena 'inaya to'eyoqona 'aidega 'aidega edi fewayavo kana 'itedi vunavunaqaya. Ta 'aubena nana namai 'aiwe saesaelina maega, ta ba'e 'aiwe nana 'inega Yaubada to'eyoqona 'aidega 'aidega edi fewayavo nagabu tonovidi. <sup>14</sup> Ta 'eguma 'aiwe saesaelina ge ana fata to'eyoqona taha ena vanue na'alai, e 'inega tauna ve'ia aqiaqina na'ewea. <sup>15</sup> Ta 'eguma taha to'eyoqona ena vanue 'aiwe saesaelina na'ala 'ovoia, e 'inega tauna ge taha ve'ia nalobei. Vonahaqiaqi, to'eyoqona nana veilaqe qiduana na'ifoqe 'inaya be tuta goyona da'aliga, ta tua Yaubada ena nuakolokolo 'inega 'etoyavua nalobe, ta kavona 'aiwe saesaelina 'inega dadenadena.

<sup>16</sup> \* Nage ge oda oalamaniana omi'a qabumi Yaubada ena vanue gwalagwalana ta Niboanina 'imia toatoa? <sup>17</sup> 'Eguma taha toga Yaubada ena vanue naqeunia, e 'inega tomotau nana luvematasabu qiduana nalobe Yaubada 'inega, mana Yaubada ena vanue gwalagwalana be vunavunaqina, ta ba'e vanue nana omi'a tovetumaqana.

<sup>18</sup> Ge nuanuagu taha toga taunega nau'vei navonaya, "Ya'a toalamaniana aqiaqi!" Vaina 'imiega ovonaya be omi'a toalamaniana aqiaqi mana emi alamani kavona totoa bwa'obwa'o edi alamani ana 'etofwafwa 'idewani. Ta egu nuanua ge ona nuavane emi alamani weaqina, ta 'esi taudi Yaubada ge ida alamaniana ona awafeledi be ina 'awakwawakwawayemi, be yaqisa Yaubada matanaya ona vetoalamaniana aqiaqi. <sup>19</sup> \* Egu vona ba'e 'idewani, mana totoa bwa'obwa'o edi alamani yani kavokavovo Yaubada 'inaya. Buki Nugwenugweina ba'e yani nana weaqina simana vonaya, "Tomotau Yaubada ge ida alamaniana ivonaya be taudi toalamaniana aqiaqi. Ta vonahaqiaqi, Yaubada ena nuanua 'inega taudiega isi'wesi'wedi alamani nana 'inega", <sup>20</sup> \* ta wese vonaya, "Eda Kaiwabu ni'a alamaniana bwa'obwa'o ana toalamaniana edi alamani yani kavokavovo." <sup>21</sup> 'Inega ge wese daluaqiaqiemi be ami tovanugwetayavo bwa'obwa'oya weaqidi ona vonavane, mana yani qabuna aqiaqidi ni'a o'ewedi emi toa aqiaqina weaqina. <sup>22</sup> E ana 'ebvetalatutula ba'e: Ya'a Faulo be, Fita ta wese Afolosa amai 'imia sabi ve'itami. Ta wese Yaubada yani qabuna 'iva'ava'aidi bwa'obwa'oya emi toa aqiaqina weaqina. 'Inega ge taha tola'ai 'eguma mayawaimi otoatoa, nage ona 'aliga, mana Yaubada ena tomotauyavo yawai vataya naneidi. Ta tola'ai na'ifoqe 'imia ba'e tuta nana 'inaya, ta wese tuta maimai 'inaya, e Yaubada yani diavona navefewedi emi aqiaqina weaqina, <sup>23</sup> mana omi'a Keliso weaqina, ta Keliso Yaubada weaqina.

## 4

*Keliso ena tovaletuyanayavo edi fewa*

\* 3:8: Md 16:27; Efe 2:20-22      \* 3:11: Ais 28:16; 1Fit 2:4-6      \* 3:13: 1Kol 4:5      \* 3:16: 1Kol 6:19; 2Kol 6:16  
\* 3:19: Iob 5:13      \* 3:20: Same 94:11

<sup>1</sup> Ge ona vonaya vonigo ima'a tove'ita tomotau qiduqiduama, ta 'esi ona nuaia ima'a Keliso ena tofewayavo 'idewani. Tauna vetumaqanema be veyoveyoa neima, 'inega ena nuanua 'wai'waividi agigivesimatalidi 'imia. <sup>2</sup> \* Ni'a kahalamaniamia, 'eguma taha tofewa navetovanugweta, 'inega luaqiaqiea be me ena gwavubiga fewa nana naviaqia ena kaiwabu weaqina. <sup>3</sup> Egwavo, ya'a me egu gwavubiga egu fewa yaviaqia nuanimiamia, waisa? Vaina 'imiega ovonaya be ya'a egu fewa aqiaqina yaviaqia emi 'ekalesia 'inaya, ta vaina ovonaya be ge aqiaqina. Ta ya'a ge eda nuanua qiduana 'eguma omi'a nage mali qabu o'awahaqiaqiegu nage gebu. Ta wese ya'a ge agu fata be tauguyega eda 'awahaqiaqiegu. <sup>4</sup> Ta taugu agu lutonova aqiaqina Yaubada matanaya, mana egu alamani ana 'etofwafwa 'inega yanuaia be ge taha fewa luveifana eda viaqi emi 'ekalesia 'inaya. Ta ge eda alamani aqiaqiei 'eguma ya'a tofewa tunutunuqigu. Ta eda Kaiwabu ana 'aidegamo egu ilivu qabuna alamani aqiaqiedi, 'inega taunamo ana fata naluvinegu.

<sup>5</sup> \* 'Inega omi'a ge taha tomotau weaqina ona vonaya, "Ba'e tofewa nana aqiaqina, ta omo'ena luveifana." Ta 'esi luaqiaqiemi be ona ba'eba'e Keliso ena 'aubena weaqina. Mana tauna velovelovana ana ilivu 'wai'waividi nagive'ifoqeyedi vunavunaqaya, ta wese nuanua luveifadi 'wai'waividi tomotau giwalidiega nagive'ifoqeyedi. Ta 'aubena nana 'inaya tomotau qabudi awatubo ina lobeia Yaubada 'inega edi viaqayavo adi aqiaqina 'inega.

*Ge tauda kana givaneyeda*

<sup>6</sup> \* Egwavo, iada Afolosa ta ya'a ave'ebe'ita 'imia be yaqisa 'imega taha vona Buki Nugwenugweina ena simana ona alamani aqiaqiea, vonaya, "Buki nana ana 'wayavi ona 'abibodea ta ge emi nuenugea ona luvetomanei." Mana 'eguma vona nana ona 'abiboda aqiaqiea 'inega ge ona nuavane ta ona vonaya, "Ima'a ema tovanugweta aqiaqina, ta 'abiboda omi'a emi tovanugweta." <sup>7</sup> \* Mana taumiega ge ona vonaya vonigo omi'a tomotau aqiaqimi, ta 'abiboda mali qabu. Yani qabuna 'imia i'eno'eno ge taumiega oda 'ewei, ta 'esi Yaubada ena nei kavovo 'inega ni'a o'ewedi. Ta 'eguma yani qabuna nei kavovoyega ni'a olobedi, 'inega tola'ai weaqina taumiega ogivaneyemi kavona omi'a emi waiwaiega oda 'ewedi?

<sup>8</sup> Omi'a me Kolinita ovonaya be yani qabudi emi toa aqiaqina weaqina ni'a oda 'ewedi, waisa? Ta gebu! Ta wese ovonaya be Niboana Gwalagwalana ena wila'a qabudi ni'a oda 'ewedi, waisa? Ta gebu! Ta wese ovonaya vonigo ni'a oda vetovanugweta 'ekalesia gamonaya, be taumiega ami fata ona vanugwetemi. Omi'a emi ilivu kavona ni'a oda vekini. Vonahaqiaqi, egu nuanua qiduana vonigo oda vekini, 'inega qabuda 'ekalesia ana vanugweta weaqina eda fewa dave'aidega. Ta gebu! <sup>9</sup> Ta ana 'ita kavona ima'a tovaletuyanayavo Yaubada daha'uma tomotau qabudi 'abibodadia. Ta kavona ida kafima ida yoqonima ta toluavia 'abibodadiega ida lihima ida tautauyema sabi luve'aligima tomotau matadia. Ta omo'e 'inaya ina vevekovema ta wese ina kolukolua. Ta yani ba'e 'ifo'ifoqe totoa bwa'obwa'o qabudi matadia, ta wese Yaubada ena tovale'ewayavo matadia.

<sup>10</sup> Ima'a Keliso ena tofewayavo tomotau i'awakwawakwawayema, ta emi ve'aidega Keliso maega 'inega, taumiega ovonaya be omi'a toalamani aqiaqi, waisa? Ta gebu! Tomotau ivonaya be ima'a dawalilima, ta omi'a ovonaya be waiwaimi, waisa? Ta gebu! Tomotau i'amayabemi, ta ima'a ge taha 'amayaba ada lobeia 'idiega. <sup>11</sup> \* Lova 'inega be ana laba ba'itagana botana qiduana alobelobeia, ta wese magama kwavukwavuqa. Ama kaleko eabuabudi, ta tomotau ivunuvunuqima, ta wese ge ema 'ebe'enomo. <sup>12</sup> \* Taumega afewafewa waiwai ama 'abwaga weaqina. Tomotau ivonavona ve'alatema, ta ima'a avonavona veyolubedi. Tomotau ivevevoalanema, ta ima'a me ema bibitaqo atovotovololo'i'ita. <sup>13</sup> Tomotau i'awa'awa luveifema, ta ima'a avonavona 'eviviedi vona biganega. Ta ana laba ba'itagana tomotau iveilivu veifema kavona ima'a qaina kavokavovo 'idewani.

\* 4:2: Lk 12:42 \* 4:5: 1Kol 3:8 \* 4:6: Lom 12:3 \* 4:7: Lom 12:6 \* 4:11: 2Kol 11:23-27 \* 4:12: 2Te 3:8; Md 5:44

<sup>14</sup> Ba'e yani diavona weaqina ge eda 'waya'wayavidi 'imia sabi giveiniyauyaunimi, ta 'esi nuanuagu egu vona ona nua'eqa'u aqiaqiedi, mana omi'a kavona natu otaqigwavo.

<sup>15</sup>\* Nage tove'ita 'ea'ealidi ni'a ive'itemi Keliso weaqina, ta tamamiavo ge 'ealidi, ta 'esi ya'a agu 'aidegamo tamami, mana Iesu Keliso Valena Aqiaqina ana lugaihi 'imia 'inega yavetama weaqimi. <sup>16</sup>\* 'Inegana yavevenoqiemu qiduana ona vetutumegu.

<sup>17</sup>\* Vonahaqiaqi, egu nuanua ba'e weaqina Timoti yavetunei waiwai 'imia. Tauna ya'awanatunea ta yaveyolubea qiduana. Tauna ma ana vetumaqana, ta ena gwavubiga Keliso weaqina yahalamani aqiaqiea. Timoti nave'ita 'eviviemu egu toa vauvauna Keliso maega weaqina. Ba'e ve'ita nana yaveve'itayea 'ekalesia taha taha di'we qabudi 'idia.

<sup>18</sup> Vaina 'imiega ovonaya, "Faulo ge wese navayausa 'evivieda." 'Inega onuavane ta taumi emi nuanua oviaviaqidi. <sup>19</sup> Ta 'esi ya'a tuta kukusana 'inaya ena wai 'imia ena vayausimu 'eguma eda Kaiwabu ena nuanua wese 'idewani. Ta omo'e tuta nana 'inaya tonuavane diavona ena 'ita aqiaqiedi 'eguma Yaubada ena waiwaiega edi viaqayavo iviaviaqidi, nage ivonavonamo. <sup>20</sup>\* Mana tuta nana kahawafeleda Yaubada ena luvine 'inaya, 'inega wese ena waiwai neida be yaqisa ada fata ena ilivu kana 'abibodea ta ena fewa kana viaqia. Ta 'eguma ita'a kana vonamo ta ena fewa ge kana viaqi, e ba'e 'inega ana 'ita kavona ita'a ge ena tomotauyavo. <sup>21</sup> Isana ma'oda ena veilivu 'aiqemi tuta nana ena wai 'imia? Vonahaqiaqi, 'eguma nawale onuanua vane, e 'inega luaqiaqiegu be ena luvematasabumi. Ta 'eguma ona nuawebui, e 'inega me egu veyoluba be wese egu nuanua biganega ena veilivu aqiaqiemu.

## 5

### *Taha ilivu luveifa otaqina* 'ekalesia gamonaya

<sup>1</sup>\* Vale taha weaqimi ni'a yanoqolia, ta vale nana luveifa otaqina. Tomotau ivonegu vonigo taha 'oloto emi 'ekalesia gamonega tamana moqanena maega ivelamo'eno. Vonahaqiaqi, ba'e ilivu nana luveifa otaqina, mana tomotau Yaubada ge ida alamania ba'e ilivu nana ge wese ida viaqia. <sup>2</sup> 'Inega luaqiaqiemu be ona nuavita ta wese ona dou ilivu nana weaqina, ta tua omi'a nawale me emi nuavane otoatoa. Ta tola'ai weaqina 'oloto nana ge oda a'u'ifoqeyei 'ekalesia 'inega?

<sup>3</sup>\* Ya'a yatoa luluvai 'imiega, ta niboanigu 'inega kavona omi'a maega kada toatoa. 'Inega 'oloto nana luvine ni'a yaneia ena luveifana weaqina. <sup>4-5</sup>\* Iesu Keliso ana wawega ona toa va'auta, 'inega ya'a niboanigu omi'a maega kana toatoa ta Iesu Keliso ena waiwai na'eno'eno nuanimia. 'Inega 'oloto nana ona a'u'ifoqeyea 'ekalesia 'inega kavona be oda ve'ineiea Seitani 'inaya. 'Inega ena luveifana nahalamani aqiaqiea be ena nuanua 'wafi ena qaiawa weaqina nanogea ta nanuagivila 'inega 'etoyavua nalobea eda Kaiwabu ena 'aubena 'inaya.

<sup>6</sup>\* Ta omi'a ge daluaqiaqiemu be ona nuavane, mana 'oloto nana nawale 'ekalesia gamonaya okafikafia. Vona sesebai ba'e ena neimi: Isiti goyona 'inega falawa qabuna ana fata nadidina. <sup>7</sup>\* 'Inega nuanuagu isiti nugwenugweina ona 'ewa yavulea 'ekalesia 'inega, be 'inega omi'a ona vevauvau kavona falawa ge ana isitimo 'idewani. Ta yavona aqiaqiemu, omi'a 'idewanina ni'a otoatoa, mana Yaubada Keliso ni'a vegubayea kavona 'Auvivia Sagalina ana lami 'idewani eda luveifana weaqina. <sup>8</sup>\* 'Inega 'Auvivia Sagalina ana 'abwaga kana 'ainia, ta gebu beledi isiti maega kana 'ainia, mana belidi nana ilivu luveifana be wese nuanua luveifadi ana beledi. Ta 'esi beledi ge ana isitimo kana 'ainia, mana beledi nana ilivu aqiaqina be wese vonahaqiaqi ana beledi.

<sup>9</sup> Egu leta lova ya'wayavia wai 'imia 'inaya yavematamagilafuyemu gebu tovelamo'eno kavokavovo maega ona veqabu 'aidega. <sup>10</sup> Ta vematamagilafu nana 'inaya ge eda vona taudi Yaubada ge ida vetumaqanea weaqidi, mana taudi bwa'obwa'o ni'a iluveagatuna'ia,

\* 4:15: Gal 4:19    \* 4:16: Fil 3:17    \* 4:17: Via 19:22    \* 4:20: 1Kol 2:4    \* 5:1: Luvu 18:7-8; Luvu 22:30  
\* 5:3: Kol 2:5    \* 5:4-5: 1Tim 1:20    \* 5:6: Gal 5:9    \* 5:7: Ais 53:7; 1Fit 1:19    \* 5:8: Luvu 16:3

ta tuta qabuna ivevelamo'eno be, ivevemanuguba be, ivanavanawala ta wese edi yaubada kavokavovoyavo iawahawatubodi. Mana 'eguma taudi weaqidi eda vematamagilafuyemi emi veqabu 'aidega weaqina, e 'inega bwa'obwa'o oda nokea, mana taudi qabu qiduadi, <sup>11</sup>\* ta 'esi tomotau taudiega igabedi tovetumaqana weaqidi yavematamagilafuyemi. Ta edi ilivuyavo 'idewani velamo'eno be, vemanuguba be, yaubada kavokavovo iawahawatubodi be, 'aivegila be, go'ila waiwaina ana numa ta wese vanawala ilivu diavona iviaviaqidi. 'Inega taudi tomotau diavona ge wese maega ona 'ai vediu!

<sup>12-13</sup>\* Ge daluaqiaqiegu be Yaubada ana tovemwageavo ena luvinedi nage aqiaqidi nage luveifadi. Ta 'esi Yaubada taunega naluvinedi. Ta omi'a 'ekalesia luaqiaqiemu be taumi ma emiavo ona luvinemi. Buki Nugwenugweina ba'e yani nana weaqina simana vonaya, "Eguma taha toga navelamo'eno kavokavovo 'inega ona a'usi'iea ami qabu 'inega."

## 6

### *Kotu weaqina tovetumaqana nuanidia*

<sup>1</sup> Wese yani taha weaqina ena vonemi. 'Eguma taha vita nage ve'ae'aetoga na'ifoqe tovetumaqana magilafumi nuanimia, 'inega ge wese daluaqiaqiemu be ona tauya toluvineavo taudi Yaubada ge ida alamania matadia vita nana sabi givetunuqina, ta 'esi luaqiaqiemu be ona tauya 'ekalesia ana toluvineavo 'idia ta vita nana ona givetunuqia. <sup>2</sup>\* Nage ge oda alamania nawale taha tuta 'inaya ita'a tovetumaqanayavo totoa bwa'obwa'o qabudi kana luvinedi Yaubada ena nuanua 'inega. Ta 'eguma tuta maimai 'idia tomotau qabudi ona luvinedi, 'inega tola'ai weaqina ami vitayavo ge ami fata taumi ma emiavo ona givetunuqidi? <sup>3</sup> Nage nuami nawale ge da'eqa'ui ita'a tovetumaqana mahala ana tovale'ewayavo wese kana vekotudi. 'Inega luaqiaqiemu be vita kavokavovo 'ekalesia gamonaya ami fata taumiega ona givetunuqidi, waisa? <sup>4</sup> 'Inega tola'ai weaqina otautauya toluvine ge ida tafwalolo 'idia ami vitayavo sabi givetunuqidi? <sup>5</sup> Ba'e yani diavona yavonayedi 'imia sabi giveiniyaunimi. Nage ge taha toalamani aqiaqi 'ekalesia gamonaya datoatoa be ve'ae'aetoga diavona ana fata nagivetunuqidi be naluvinemi? <sup>6</sup> Ta omi'a egu nuanua ge oda viaqia, mana tovetumaqana taha iana tautauyea toluvine taudi Keliso ge ida vetumaqanea matadia sabi luvinena.

<sup>7</sup> Ba'e ilivu nana 'inega taumiega ni'a ogivedawalilimi. Ta luaqiaqiemu be 'eguma taha toga yani luveifana naviaqia 'imia, 'inega ge ona vekotui. Ta wese 'eguma taha toga nau'avemi be emi kulufayavo na'ekilidi ge wese ona vekotui. <sup>8</sup> Ta 'esi omi'a taumi ma emiavo wese luveifana oviaviaqia, mana u'avega kulufa taha taha o'ewe'ewedi tovetumaqana emiavo 'idiega.

<sup>9</sup>\* Ni'a oalamani aqiaqiea taudi toluveifadi ge wese Yaubada ena 'Ebeluvine 'inaya ina lugu, waisa? 'Inega taumiega ge ona u'avemi, mana tovelamo'eno be, yaubada kavokavovo adi toiw'odu be wese toluabu ge adi fata ina lugu 'Ebeluvine nana 'inaya. Ta wese 'oloto 'eguma 'wafidi ina awafeledi mali tomotau 'idia mane weaqina ge adi fata ina lugu. Ta wese 'eguma 'oloto be 'oloto ina velamo'eno 'inega ge adi fata ina lugu. <sup>10</sup> Ta wese tovanawala be, tovevanuguba be, go'ila waiwaina ana tonuma be, tovegila be wese taudi u'avega kulufa i'ewe'ewedi ge taha toga 'idiega adi fata be ina lugu 'Ebeluvine nana 'inaya. <sup>11</sup>\* Lova omi'a vaimi wese ba'e ilivu diavona oviaqidi, ta ba'itagana luveifa diavona Keliso 'utuyavuledi 'imiega 'inega vunavunaqimi. Ta eda Kaiwabu Ieisu Keliso be wese Yaubada Niboanina edi viaqa 'idiega ni'a ovetunutunuqa Yaubada matanaya.

'Wafida kana awafeledi Yaubada weaqina

<sup>12</sup>\* Vaina 'imiega ovonaya, "Ilivu qabudi ana fata kana viaqidi." Ta yavonevonemi, vaina ilivu ge wese naiulemi. Vonahaqiaqi, ilivu qabuna ada fata kana viaqidi, ta

\* 5:11: 2Te 3:6; Tai 3:10 \* 5:12-13: Luve 13:5; 17:7 \* 6:2: Ve 20:4 \* 6:9: Gal 5:19-21; Efe 5:5; Ve 22:15  
\* 6:11: Tai 3:3-7 \* 6:12: 1Kol 10:23

ge daluaqiaqieda 'eguma ilivu diavona ina vetoluvine 'idaya. <sup>13</sup> \* Vaina tomotau 'imiega ovonaya, "Eguma gamogu nuanuana 'abwaga, e 'inega 'abwaga ya'ai'ai, ta wese 'idewani 'eguma 'wafigu nuanuana vavine, e 'inega 'wafigu ena nuanua yaviaviaqia." Vonahaqiaqi, Yaubada gamoda be wese 'abwaga 'iva'ava'aidi, ta nawale taha tuta 'inaya naluveawalidi. Ta Yaubada 'wafida ge da'iva'ava'aidi velamo'eno kavokavovo ana ilivu weaqina, ta 'esi 'wafida 'iva'ava'aia eda Kaiwabu weaqina, ta eda Kaiwabu 'wafida nana ena aqiaqina weaqina nuanua. <sup>14</sup> \* Ta Yaubada ena waiwaiega 'wafida nagiveya'itotodi 'idewani lova eda Kaiwabu giveya'itotoya 'aliga 'inega. <sup>15</sup> \* Omi'a oalamani aqiaqiea ita'a 'wafida eda vetumaqana 'inega ni'a kaluvetubedi Keliso maega. Ta 'inega ma'oda, nage ana fata taha tovetumaqana 'wafina ni'a luluvetubana Keliso maega ta nahawafelea tokodada 'inaya ta ina velamo'eno? Gebu! <sup>16</sup> \* Ta wese ni'a oalamani aqiaqiea 'eguma taha 'oloto navelamo'eno tokodada maega, e 'inega magilafudina ni'a ive'wafi 'aidega. Mana Buki Nugwenugweina 'inaya Yaubada vonaya, "Magilafudi ni'a ive'aidega." <sup>17</sup> \* Ta 'esi 'eguma taha tomotau naluvetuba eda Kaiwabu maega, e 'inega niboanidiega tawa ive'aidega.

<sup>18</sup> Luaqiaqieda be velamo'eno ilivuna 'inega kana dena! Ba'e ilivu nana ilivu luveifadi qabudi 'idiega luveifa otaqina, mana ilivu nana 'inega tau'u 'wafiu ugigiveluveifea. <sup>19</sup> Nage ge oda alamania 'wafimi Niboana Gwalagwalana ena vanue? Ta Niboana nana 'imia toatoa Yaubada ena nei kavovo 'inega neimi. Vonahaqiaqi, Yaubada tauna emi Kaiwabu, 'inega ge taumiega ona luvine, ta 'esi Yaubada naluvine, <sup>20</sup> \* mana maisa qidua va'inena 'inega gubaufemi. 'Inega luaqiaqiemi be 'wafimiega Yaubada ana wawa ona awatuboya.

## 7

### *Ve'ita vaqi weaqina*

<sup>1</sup> Lova leta 'inega yani taha taha weaqidi ovetala'aiegu, ta ba'e egu ve'ia 'imia. 'Oloto luaqiaqiedi 'eguma ge ina vaqi. <sup>2</sup> Ta velamo'eno kavokavovo ana ilivu veqidua va'ine emi 'abagaya, 'inega ami luaqiaqi be 'oloto 'aidega 'aidega navaqi be ma moqanena ina toatoa, ta wese vivine 'aidega 'aidega 'idewani, luaqiaqiedi be ina vaqi ta vavine taha taha ma moqanedi ina toatoa.

<sup>3</sup> 'Eguma vavine vaqivaqidi edi nuanua ma moqanedi ina 'eno, e 'inega 'oloto nana nahawafela edi nuanua 'inaya. Ta wese 'idewani 'eguma me'olotona nuanuana moqanena maega ina 'eno, e 'inega ina awafela moqanedi ena nuanua weaqina. <sup>4</sup> Vavine vaqivaqidi 'wafidi ge taudi adi 'aidega ida luvinea, ta 'esi moqanedi wese luluvinea. Ta wese 'idewani 'oloto vaqivaqina 'wafina ge tauna ana 'aidega daluvinea, ta 'esi moqanena wese iluluvinea. <sup>5</sup> 'Inega 'oloto moqanena edi nuanua weaqina ge na'etobodedi, ta wese 'idewani vavine moqanedi ena nuanua weaqina ge ina 'etobodei. Ta 'eguma magilafudi ina veqae ta edi nuanua 'aidegana 'inega ina vonaya, "Kana 'enosi'i ta kana awafeleda venoqi 'inaya." E aqiaqina 'idewana, ta tuta kukusana namo 'inaya ina toasi'i, mana nawale Seitani nasitonovidi 'inega ilivu luveifana ina viaqia. Egu ve'ita ba'e 'idewani 'imia, mana ge ami fata taumiega ona 'itamaki aqiaqiemi tuta kuena 'inaya. <sup>6</sup> O'itei, egu ve'ita diavona ba'e 'inega ge luvine waiwaina eda neineimi be ona matayaga aqiaqiei, ta 'esi ba'e 'idewani egu lugaihi 'imia. <sup>7</sup> Ta egu nuanua qiduana tomotau qabudi ina 'abibodegu ta ge ina vaqi 'idewani ya'a ge eda vaqi. Ta ita'a tomotau qabuda ada wila'a ge 'aidegana, ta 'esi vaina adi wila'a Yaubada neidi be ina vaqi, ta wese vaina adi wila'a Yaubada neidi be ge ina vaqi 'inega kavona doqai ina toatoa.

<sup>8</sup> Ta wese ena ve'itemi taudi doqai be wadawada'e edi toa weaqina. Luaqiaqiedi be adi 'aidega ina toa 'idewani ya'a. <sup>9</sup> \* Ta 'eguma ge adi fata 'wafidi ina luvinedi 'inega

\* 6:13: 1Te 4:3-5 \* 6:14: Lom 8:11; 1Kol 15:20; 2Kol 4:14 \* 6:15: Efe 5:30 \* 6:16: Md 19:5 \* 6:17: Ion 17:21-23; Lom 8:9-11 \* 6:20: 1Kol 7:23; 1Fit 1:18-19 \* 7:9: 1Tim 5:14



luaqiaqiedi be ina vaqi, mana ge adi luaqiaqi 'eguma edi nuanua waiwaina 'inega ina awafeledi velamo'eno kavokavovo ana ilivu 'inaya.

<sup>10</sup>\* Ta vaqivaqidi wese taha luvine waiwaina yaneineidi. Ta ge ya'a 'iguyega, ta 'esi eda Kaiwabu 'inega. Ta luvine nana ana alamani ba'e: Vavine vaqivaqidi moqanedi ge ina vesa'ili. <sup>11</sup> Ta tua 'eguma moqanedi ina nogea 'inega luaqiaqiedi be adi 'aidega ina toa, ta ge wese mali 'oloto maega ina vaqi 'evivi. Ta 'eguma nuanuadi 'oloto, e 'inega ina 'evivi adi sa'ila 'inaya. Ta wese 'idewani 'oloto vaqivaqidi ge wese moqanediavo ina nogedi.

<sup>12</sup> Wese taha yani weaqina ena ve'itemi. (Ta ve'ita nana ya'a 'iguyega, ta ge eda Kaiwabu 'inega.) 'Ebevetalatutula ba'e ona noqolia: Tovetumaqana me'olotona vaqivaqina ma moqanena itoatoa, ta vavine dina leisu ge ida vetumaqanea. Ta edi nuanua ma moqanedi ina toatoa, 'inega tovetumaqana nana ge ana fata navesa'ilidi. <sup>13</sup> Ta wese 'idewani 'eguma vavine tovetumaqana moqanedi maega itoatoa, ta 'oloto nana ge davetumaqana leisu 'inaya. Ta 'eguma 'oloto nana nuanuana moqanena maega ina toatoa, e 'inega vavine dina ge adi fata moqanedi ina vesa'ili. <sup>14</sup> Egu luvine ba'e 'idewani, mana 'oloto nana moqanena edi vetumaqana 'inega ni'a vevunavunaqa. Ta wese 'idewana vavine taudi ge ida vetumaqana, moqanedi ena vetumaqana 'inega ivevunavunaqa. Ta ba'e 'inega natudiavo ge bwavubwavudi, ta 'esi taudi wese ni'a ivevunavunaqa Yaubada matanaya. <sup>15</sup>\* Ta 'eguma vaqivaqidi itoatoa ta taha 'idiega ge davetumaqana Yaubada 'inaya ta tauna nuanuana moqanena nanogea, e 'inega tovetumaqana nana ge daluaqiaqiei be moqanena na'etobodei, ta 'esi nahawafelei natauya. Ta 'eguma ba'e yani nana na'ifoqe 'inega tovetumaqana nana me'olotona nage mevavinena vaqi ana luvine ge wese na'etobodedi. Vonahaqiaqi, Yaubada venua'ivineda toadaumwala weaqina.

<sup>16</sup>\* Vavine tovetumaqana, ge ami fata be ona alamani aqiaqiei 'eguma moqanemi 'etoyavua nalobea emi vetumaqana 'inega. Ta wese 'idewani, o'a 'oloto tovetumaqana ge au fata be una alamani aqiaqiei 'eguma moqaneu 'etoyavua ina lobea eu vetumaqana 'inega.

*Yaubada ena venua'ivina tomotau* 'idia weaqina

<sup>17</sup> Ni'a yavonemi vaqi ana luvine weaqina, ta eda Kaiwabu toa dumadumana be dumadumana 'idia ni'a a'uda. 'Ebevetalatutula ba'e ona 'itea: Vaida vaqivaqida, ta vaida doqai, vaida me Diu, ta vaida ge me Diu, vaida tofewa yoqoyoqonida kaiwabuyavo weaqidi, ta vaida yavuyavuida. 'Inega 'eguma 'ebetoa diavona lova 'idia katoatoa tuta nana Yaubada gabeda, e 'inega ge wese 'ebetoa diavona kana nogedi. Ba'e luvine nana 'ekalesia 'aidega 'aidega 'idia yaveve'itedi. <sup>18</sup> 'Eguma taha Diu 'olotona me Diu edi ilivu 'inega 'wafina ni'a ida'ea ta 'abibodanaya ve'ale leisu vetumaqanea, 'inega da'a nana weaqina ge wese nanuanua, ta 'esi natoatoa 'idewani. Ta wese 'idewani 'eguma taha 'oloto ve'ale leisu vetumaqanea ta 'wafina ge ana da'amo, e 'inega ge wese nanuanua da'a nana weaqina. <sup>19</sup>\* Vonahaqiaqi, 'eguma taha toga 'wafi ana da'a ni'a 'ewea 'inega ge wese yani 'ena'ina, ta wese 'eguma taha toga 'wafi ana da'a ge da'ewei 'inega wese ge taha yani 'ena'ina. Ta yani qidua va'inena ba'e ona alamanian: Yaubada ena luvineavo kana matayagedi.

<sup>20</sup> 'Inega omi'a tomotau 'aidega 'aidega luaqiaqiemu be ona toatoa 'idewani lova otoa tuta nana Yaubada ena gaba onoqolia, ta ge wese emi toa ona givedumedumei. <sup>21</sup> 'Inega 'eguma o'a taha kaiwabu ena tofewa yoqoyoqonina 'idewani utoatoa tuta nana Yaubada gabeu, e 'inega toa nana weaqina ge una nuanua, ta 'esi una 'awahaqiaqiea. Ta 'eguma au fata be yavua una lobea, e 'inega yavua nana ge wese una nogei. <sup>22</sup>\* 'Inega ge taha tola'ai 'eguma taha toga natoatoa tofewa yoqoyoqonina 'idewani tuta nana eda Kaiwabu gabeu, mana eda Kaiwabu leisu ena viaqa 'idiega 'etoyavua lobea ena ilivu luveifadi 'idiega. Ta 'eguma o'a yavuyavuii tuta nana eda Kaiwabu gabeu, 'inega ba'itagana kavona o'a

\* 7:10: Md 5:32 \* 7:15: Lom 14:19 \* 7:16: 1Fit 3:1 \* 7:19: Lom 2:25; Gal 5:6; 6:15 \* 7:22: Fim 16; 1Fit 2:16

Keliso ena tofewa yoqoyoqonina. <sup>23</sup> Yaubada maisa qiduana 'inega gubaufemi, 'inega ge ona awafelemi tomotau 'idia be ina kafimi tofewa yoqoyoqonimi 'idewani. <sup>24</sup> 'Inega taigwavo be novugwavo, lova tuta nana Yaubada gabemi emi 'ebetoyavo dumadumadi be dumadumadi 'idia otoatoa. Ta ba'e 'ebetoa diavona ona 'awahaqiaqiedi ta ge ona givedumedumedi, mana ba'itagana omi'a Yaubada maega otoatoa.

<sup>25</sup> Ta wese emi vetala'ai iahaba edi toa weaqina ena ve'iea. Ge taha luvine eda Kaiwabu 'inega ena neimi, ta 'esi ya'a egu nuanua 'inega ena ve'itemi. Ta Kaiwabu ena nuakolokoloyega alamani aqiaqi neigu, 'inega ona vetumaqana aqiaqiegu ve'ita nana 'inaya. <sup>26</sup> Tuta ba'ena tuta vitana, 'inega nuanuagu taudi nawale ge ida vaqi luaqiaqiedi be 'idewani ina toatoa. <sup>27</sup> Ta tua 'eguma vaqivaqiu 'inega moqaneu ge una nogedi, ta wese 'idewani 'eguma nawale ge uda vaqi, 'inega vaqi weaqina ge una nuanua. <sup>28</sup> Ta 'eguma nuanuau be una vaqi 'inega Yaubada eu nuanua wese na'awahaqiaqiea. Ta wese 'idewani 'eguma iahaba taha nuanuana navaqi, e 'inega Yaubada ena nuanua wese 'idewani na'awahaqiaqiea. Ta vonahaqiaqi, vaqivaqidi vaqi ana vitayavo ilobelobedi, 'inega nuanuagu omi'a vita diavona ge wese ona lobedi fole ina kafimi.

<sup>29</sup> Taigwavo be novugwavo, egu ve'itayavo adi alamani ba'e: Tuta ni'a vekusakusa wawasai. 'Inega omi'a vaqivaqimi tuta ba'itagana 'inega emi vaqi ge wese na'etobodemi Yaubada ena fewa weaqina. <sup>30</sup> Ta omi'a tonuavita, ami vita ge wese na'etobodemi emi vetafe'wa Yaubada weaqina. Ta omi'a toqaiawa, emi qaiawa 'inega ge wese Yaubada ena fewa ona nuafania. Ta omi'a tovekaikaiwabu, emi kulufa qiduana ge ina vesitaqomi be Yaubada ena nuanua ona nuafania. <sup>31</sup> \* Ta wese omi'a bwa'obwa'o ana yaniavo tuta qabuna ovevefewedi, ge daluaqiaqiemu 'eguma yani diavona nuami ina 'ewei, mana bwa'obwa'o ba'e be wese yani qabuna 'inaya i'eno'eno tuta goyona ina awala. <sup>32</sup> Egu nuanua ba'e: Ge ona nuanua qiduana emi toa bwa'obwa'o ba'e 'inaya weaqina. Kana nuaia taha 'oloto ge vaqivaqina weaqina, tauna ena nuanua qabuna a'ua'uya eda Kaiwabu ena fewa weaqina, ta wese nuanua ma'oda 'inega ena Kaiwabu nagiveqaiawe. <sup>33</sup> Ta taha 'oloto vaqivaqina tauna bwa'obwa'o ana yaniavo weaqidi nuanua qiduana, ta wese nuanua qiduana ma'oda 'inega moqanena nagiveqaiawedi. <sup>34</sup> 'Inega 'oloto nana ena nuanuayavo yani magilafudi 'idia a'ua'udi, eda Kaiwabu ana giveqaiawa weaqina, ta wese moqanena adi giveqaiawa weaqina. 'Inega ge ana fata navetafe'wa waiwai Keliso weaqina. Ta wese 'idewani vavine ge vaqivaqina nage iahabana tauna ana fata tuta qabuna nanuanua eda Kaiwabu ena fewa weaqina. Tauna nanuanua ma'oda 'inega niboanina be wese giwalina nahawafeledi eda Kaiwabu 'inaya. Ta vavine vaqivaqidi taudi tuta qabuna edi nuanua ia'ua'uya bwa'obwa'o ana yaniavo 'idia, ta wese ma'oda 'inega moqanedi ina giveqaiawei.

<sup>35</sup> Ba'e ve'ita diavona ge eda vonavonayedi ami 'etoboda weaqina, ta 'esi nuanuagu ena iulemi be yaqisa ge ona tauya gei. Nuanuagu emi tuta ge ona awafelei yani kavokavovo 'idia, ta 'esi yawaimi qabuna ona awafelea eda Kaiwabu ena fewa weaqina. <sup>36</sup> 'Eguma 'oloto taha nuanuana ana gabuinoqa navaqia, mana iahaba nana vaqi ana tuta mo'ita nanogea, ta wese 'oloto nana ge ana fata 'wafi ena nuanua taunega naluvinei. E 'inega luaqiaqiea be maega ina vaqi. Ba'e 'inega 'oloto nana ge taha wese luveifana naviaqi. <sup>37</sup> Ta 'eguma taha 'oloto ena nuanua 'inega ge nuana ana gabuinoqa maega ina vaqi, ta wese 'wafi ena nuanua ana fata naluvinea, e 'inega tauna wese ena nuanua 'inega yani aqiaqina viaqia. <sup>38</sup> Egu vona ana alamani ba'e: Aqiaqina 'eguma taha 'oloto ana gabuinoqa navaqia. Ta aqiaqi otaqina 'eguma taha 'oloto nuanuana ana 'aidega natoatoa.

<sup>39</sup> \* Vavine ma moqanedi itoatoa kavona yoqoyoqonidi, 'inega ge ana fata ina nogei mana nawale moqanedi mayawaina toatoa. Ta 'eguma moqanedi yawaina nagumwala 'inega vavine dina kavona yavuyavuidi ta adi fata taudi edi nuenuaga ina vaqi ukamana mali 'oloto maega. Ta luaqiaqiedi be Keliso ana tovetumaqana taha maega ina vaqi. <sup>40</sup> Vonahaqiaqi, vaqi yani 'ebeqaiawa, ta yanuaia vavine dina nawale me edi qaiawa

\* 7:31: 1Ion 2:17 \* 7:39: Lom 7:2-3

qiduana ina toatoa 'eguma ge ina vaqi 'evivi. Ta yanuaia ya'a wese Yaubada Niboanina 'inega yaveve'ita 'imia.

## 8

*Ve'ita yubai vei'odi ivegubayedi tokwalui* 'idia weaqina

<sup>1</sup>\* Taigwavo be novugwavo, emi vetala'ai yubai vei'odi ivegubayedi tokwalui 'idia weaqina ba'e yavonavona 'eviviemi. Omi'a ovonaya, "Qabuda me eda alamani." Ta yavona aqiaqiemi, alamani 'inega taumiega ogigivaneyemi, ta 'esi veyoluba 'inega kana vewaiwai. <sup>2</sup>\* Vonahaqiaqi, 'eguma taha toga 'imiega taunega navonaya, "Ya'a yani qabuna weaqidi yahalamani aqiaqiedi!" 'Inega yavonemi tomotau nana ge taha yani diavona weaqidi dahalamani aqiaqiei. <sup>3</sup> Ta 'esi 'eguma taha toga Yaubada naveyolubea, e 'inega Yaubada tomotau nana alamani aqiaqiea.

<sup>4</sup>\* 'Inega egu ve'ita yubai ivegubayedi tokwalui 'idia weaqina ona noqolia. Nage ana fata yubai nana kana 'aini nage gebu? 'Inega yavonemi ita'a qabuda ni'a kahalamani aqiaqiea Yaubada ana 'aidega otaqa toatoa, ta wese kahalamania tokwalui taudi 'ebeiwa'odu kavokavovo. <sup>5</sup> Vaidi tomotau ivonaya be yaubada 'eala be wese kaiwabu 'eala bwa'obwa'oya be mahalaya ida toatoa. Vonahaqiaqi, tomotau diavona Yaubada otaqa ge ida vetumaqanea 'inega edi 'ebeiwa'odu 'eala. <sup>6</sup>\* Ta ita'a ni'a kahalamani aqiaqiea Yaubada ana 'aidega otaqa toatoa. Tauna Tamada, ta ena 'iva'ava'ata 'inega kuyavata qabudi i'ifoqe. Ta wese ita'a tomotau qabuda 'iva'ava'aida tauna weaqina 'inega ena nuanua kana viaqia. Ta wese eda Kaiwabu ana 'aidega otaqa toatoa, tauna Iesu Keliso. Ta Keliso nana 'inega Yaubada kuyavata qabuna 'iva'ava'aidi, ta wese ita'a tomotau Keliso nana 'inega yawaida ka'ewea.

<sup>7</sup> Ta ba'e yani diavona weaqina tovetumaqana vaidi nuadi nawale ge da'eqa'ui, 'inega ivenuana magilafu edi 'ai weaqina. Taudi lova 'inaya edi tokwalui 'idia ihiwaiwa'odu, ta wese yubai ivevegubayedi 'idia. 'Inega ba'itagana 'eguma yubai vei'odi i'ai'adi lutonova kavona tokwalui taha iawahawatuboya, mana lova edi ilivu 'idewana. 'Inega ivenuana magilafu vei'o nana ana 'ai weaqina 'eguma yani aqiaqina Yaubada matanaya, nage yani luveifana. Ta adi lutonova kavona ida 'wamomo 'idewani. <sup>8</sup> Vonahaqiaqi, ge ana fata be kana vanaqo Yaubada di'wenaya eda 'ai 'abwaga be yubai vei'odi 'idiega. Mana Yaubada ge wese na'awahaqiaqieda eda 'ai 'inega, ta 'esi eda vetumaqana 'inega. 'Inega ge yani qiduana 'eguma yubai vei'odi ka'ai'ainidi nage kana nogedi. <sup>9</sup>\* Ni'a oalamaniana ge taha 'etoboda da'eno'eno emi 'ai weaqina. Ta 'esi omi'a taumi emi nuenuaga yani taha taha ami fata ona 'ainidi. Ta yani qiduana ba'e ona noqolia, emi 'ai nana 'inaya taumiega ona 'itamaki aqiaqiemi be yaqisa ge taha toga ena vetumaqana dawalilina 'ai weaqina ona gibebe'uyei.

<sup>10</sup> Omi'a emi alamani 'inega ovonaya, "Ita'a ada fata yubai vei'odi kavegubayedi kana 'ainidi." Vonahaqiaqi, ami fata, ta ona 'itamakimi, mana 'eguma ona lugu tokwalui edi vanue 'ebeiwa'odu 'inaya yubai vei'odi sabi 'ai, ta taha iami ena vetumaqana dawalilina na'itemi 'inega nuana na'ewea vei'o nana ana 'ai weaqina be na'ainia. Ta tuta nana 'ai'ai 'inega ana lutonova taunega lutonovia ge aqiaqina. <sup>11</sup>\* Ba'e iami nana ena ilivu nugwenugweina weaqina Keliso ni'a 'aliga. Ta omi'a emi alamani 'inega iami nana ogivebe'uyea, mana 'ai nana 'inega kavona ena veiaiana Yaubada maega taunega dabwegei. <sup>12</sup> Ta ba'e ilivu nana 'inega yani luveifana oviaqia, mana iami nana ena nuanua ogivevitea. Tauna 'ai nana 'inega ana lutonova ge aqiaqina. Ba'e 'inega luveifa nana wese oviaqia Keliso 'inaya, mana iami nana Keliso ena tomotau. <sup>13</sup>\* Ta ya'a ge nuanuagu tovetumaqana taha ena nuanua ena givevitei egu 'ai 'abwaga nage yubai 'idiega. 'Ebevetalatutula ba'e ona noqolia: Tovetumaqana taha ge nuanuana yubai vei'odi na'ai'ai, mana 'eguma na'ai ana lutonova naluveifa Yaubada matanaya kavona

\* 8:1: Via 15:29 \* 8:2: Gal 6:3 \* 8:4: Gal 4:8; Luve 4:39; 6:4 \* 8:6: Efe 4:5,6 \* 8:9: Lom 14:13-15; Gal 5:13

\* 8:11: Lom 14:15,20 \* 8:13: Lom 14:21

da'wamomo 'idewani. Ta 'eguma na'itegu ya'ai'ai, e 'inega taunega navonaya, "Ya'a wese ena 'ai." Ta tuta nana na'ai 'ovoa, e 'inega ana lutionova naluveifa. 'Inega ya'a lutionova nana 'iuna. Ta ge wese nuanuagu tovetumaqana taha ena nuanua ena givevitei. 'Inegana 'eguma taha toga egu 'ai yubai vei'ona 'inega ena givebe'uya, e 'inega ge wese taha tuta 'inaya yubai vei'odi ena 'ai'ai.

## 9

*Keliso ena tovaletuyanayavo edi ilivu*

<sup>1</sup>\* Vaidi tomotau egu fewa ge ida 'awahaqiaqiea. Ta yavona aqiaqiemi, ya'a Ieisu Keliso ena tovaletuyana aqiaqi taha. 'Inega ge taha toga ana fata naluvinegu, ta 'esi Keliso ana 'aidega. Ya'a eda Kaiwabu taugu mataguyega ya'itea, ta tauna weaqina yavevetafe'wa waiwai. Ta egu fewa vuaqina omi'a, mana fewa nana 'inega ni'a Ieisu ovetumaqanea, waisa? <sup>2</sup>\* 'Inega omi'a ona alamani aqiaqiea ya'a Keliso vetunegu yawai 'imia ena tovaletuyana 'idewani. Egu vona ba'e 'iuna, mana egu lugaihi 'inega ni'a oluvtuba Keliso maega.

<sup>3</sup> Ta ana 'ita vaidi to'ekalesia nawale ivenuana magilafu egu fewa be wese egu luvine weaqina, 'inega ba'e 'idewani yavonavona 'aiqa 'imia: <sup>4</sup>\* Banaba be wese ya'a magilafuma Yaubada ena tofewayavo, 'inega luaqiaqiema be ama 'abwaga ta wese ama go'ila ana lobedi omi'a tovetumaqana 'imiega, waisa? <sup>5</sup> Eda Kaiwabu ena tovaletuyanayavo ma moqanediavo taudi wese tovetumaqana be, eda Kaiwabu tainavo ma moqanediavo taudi wese tovetumaqana ta wese Fita ma moqanena qabudi iluvivila dadana di'we taha taha 'idia Ieisu Valena weaqina. 'Inega ona nuaia, nage ima'a ge daluaqiaqiema be edi ilivu ana 'abibodei be moqanemavo maega ana luvivila di'we taha taha 'idia? Vonahaqiaqi, ima'a wese ama luaqiaqi! <sup>6</sup> Tovaletuyana qabudi adi iula ilobelobedi tovetumaqana 'idiega. 'Inega ona nuaia, nage ya'a be wese Banaba ama iula taumega ana lobebe? Gebu'e otaqa! Ima'a wese luaqiaqiema be iula ana lobebe omi'a tovetumaqana 'imiega.

<sup>7</sup> 'Ebevatalatutula ba'e ona 'itedi: Toluaviayavo adi 'abwaga be wese adi kaleko ge taudiega edi mane 'inega ida gimwagimwanedi, ta 'esi tuta qabuna gabemani edi 'ivenonoqa 'inega kulufa diavona i'ewe'ewedi. Ta wese tovaqqa luaqiaqiea be taunega ena vaoqa 'inega ana 'abwaga na'ai. Ta wese 'idewani yubai adi to'itamaki luaqiaqiedi be yubai diavona ina madu'ainidi. <sup>8</sup> Egu vona ba'e ge ya'a egu nuanua 'inega eda vonavonayedi, ta 'esi Yaubada ena Buki wese ba'e yani nana weaqina vonavona, <sup>9</sup>\* mana lova Mosese 'wayavia vonaya, "Eguma bulumakau 'alabwatana iuiuleu witi ana fewa 'inaya, e 'inega 'awana ge una yoqonia ta 'esi luaqiaqieu be vaina witi vuaqina una awafelea 'inaya be na'ainidi." Ta omi'a ona nuaia, nage Yaubada bulumakau adi 'aidega weaqidi nuanua? <sup>10</sup>\* Ana 'ita gebu, Yaubada ena vona ba'e 'inega wese ima'a ena tofewayavo weaqima vonavona. Tovaqqa ta wese dawana ana to'itamaki ifewafewa, mana inuaia nawale bolimana ana tuta 'inaya adi 'abwaga aqiaqina ina lobebe.

<sup>11</sup>\* Ta ima'a Yaubada ena tofewayavo wese 'idewani ena vona a'wadidi niboanimi 'idia, 'inega luaqiaqiemi be ona iula 'eviviema, waisa? <sup>12</sup>\* Emi tove'itayavo adi iula aqiaqina tuta qabuna ilobelobedi 'imiega. Ta ima'a amaduwai 'imia ta Ieisu Valena alugaihiea 'imia, 'inega luaqiaqiemi be iula qidua va'inena oda neima, waisa? Vonahaqiaqi, luaqiaqiema be ama fata yani qabuna ada 'ewedi 'imiega. Ta ima'a ge taha tuta ama 'abwaga weaqina ada veidaida dadana 'imia. Ta 'esi ima'a vita qabudi abibitaqodi, mana ge nuanuama tomotau ina vonaya, "Faulo ma enavo Ieisu Valena ilulugaihiea edi vegedi 'abwaga sabi 'ai weaqina ta wese kulufa ana 'ewa weaqina, 'inega edi lugaihi nana Keliso weaqina kana nogea."

\* 9:1: Via 22:17-18; 26:16; 1Kol 15:8-9 \* 9:2: 2Kol 3:2-3 \* 9:4: Lk 10:8 \* 9:9: Luve 25:4; 1Tim 5:18 \* 9:10: 2Tim 2:6 \* 9:11: Lom 15:27 \* 9:12: Via 20:34; 2Kol 11:9

<sup>13</sup> \* Ni'a oalamani aqiaqiea taudi Yaubada ena Vanue Gwala 'inaya ifewafewa adi 'abwaga i'ewe'ewea vanue nana 'inega, mana 'abwaga diavona tomotau imimiedi ia'ua'uluguyedi sabi veguba ta 'inega dibuna i'ai'ai. Ta wese 'idewani toveguba yubai ivevegubayedi 'ebeveguba 'inaya luaqiaqiedi be yubai diavona 'idiega adi fata dibuna ina 'ainidi. <sup>14</sup> \* Ta wese 'idewani eda Kaiwabu ena luvine 'inega Iesu Valena ana tolugaihiavo luaqiaqiedi be Vale nana ana tovetumaqanayavo tolugaihi diavona ina iuledi yani taha taha 'idiega, mana vuaqina aqiaqina ilobelobea Vale nana 'inega. <sup>15</sup> Vonahaqiaqi, Kaiwabu ena luvine 'inega luaqiaqiegu be yani qabuna eda 'ewedi 'imiega, ta ge taha tuta luvine nana eda vefewea egu toa weaqina. Ta wese egu leta ba'e 'inega ge nuanuagu omi'a ba'itagana egu fewa 'imia weaqina ona ve'iegu kulufa taha taha 'idiega. Ya'a tuta qabuna yalulugaihi 'imia, ta ge taha yani eda 'ewei 'imiega nage oda vemaigigu, waisa? Egu ilivu ba'ena weaqina tauguyega yagivaneyegu. 'Inega 'eguma ena 'aliga e ba'e yani goyona 'iguya, ta 'esi yani qiduana 'iguya ge taha toga na'etobodegu egu vonavane 'iuna weaqina. <sup>16</sup> \* Yaubada ena venua'ivina 'inega Iesu Valena yalulugaihiea, 'inega ge agu fata be ya'a taugu ena givaneyegu ba'e fewa nana weaqina. Mana eda Kaiwabu taunega vonegu fewa nana ena viaqia, 'inega ge agu fata be fewa nana ena nogei. Ta vonahaqiaqi, luvematasabu qiduana ena lobe'a 'eguma Vale nana ge wese ena lugaihiea tomotau 'idia.

<sup>17</sup> Ta 'eguma taugu egu nuenuaga Vale nana eda lugaihiea tomotau 'idia, e 'inega luaqiaqiegu be ve'ia eda lobe'a. Ta 'esi Yaubada venua'ivinegu be vetumaqanegu ena nuanua ena viaqia. 'Inega ge wese agu fata be fewa nana ena nogei. <sup>18</sup> Nage onuanua agu ve'ia weaqina, waisa? 'Inega agu ve'ia weaqina ena vemamatamagilafuyemi: Vonahaqiaqi, ya'a tolugaihi taha, 'inega luaqiaqiegu be yani qabuna agu fata eda 'ewedi lugaihi nana 'inega, ta tua ge wese ve'ia 'idewani 'abwaga nage mane weaqina eda nuanua. Ta 'esi Vale nana ana lugaihi 'inega yaqaiqaiawa qiduana, ta qaiawa nana tauna ta'iwa agu ve'ia.

<sup>19</sup> Ya'a egu fewa weaqina ge taha ve'ia eda 'ewei 'imiega. 'Inega ge taha toga ana fata naluvinegu, ta 'esi tauguyega yahawafelegu yavetofewa kavovo tomotau qabudi 'idia sabi 'ebe'ewadi ina mai Keliso 'inaya adi 'etoyavua weaqina. <sup>20</sup> \* 'Inega tuta nana me Diu maega atoatoa, e 'inega ya'a kavona Diu 'edewani, ta edi ilivu ya'abi'abibodea be yaqisa ana fata ena 'ebe'ewedi Keliso 'inaya. Ta tuta nana Mosese ena luvine ana tomatayagayavo maega atoatoa, e 'inega edi ilivuyega yaveilivu. Ta edi luvineavo ge daluvinegu, mana ya'a Keliso ena tofewa taha. Ta tua edi ilivu ya'abi'abibodedi be yaqisa ana fata ena 'ebe'ewedi ina mai Keliso 'inaya. <sup>21</sup> Ta wese tuta nana taudi ge me Diu maega atoatoa edi ilivu 'inega yaveilivu aqiaqi 'inega nuadi ya'ewea. Taudi Mosese ena luvine ge ida matayagedi. Ta veilivu nana 'inega egu vona ivetumaqanea, e ba'e 'inega yamiedi Keliso 'inaya. Ta ya'a Yaubada ena luvineavo ge eda veyani kavokavovoyedi, mana ya'a Keliso ena luvine ana to'abiboda.

<sup>22</sup> \* Ta wese tuta nana todawalili maega atoatoa 'inega ya'a wese yavetodawalili. Ta egu veilivu nana 'inega egu vona ivetumaqanedi, e ba'e 'inega wese yamiedi Keliso 'inaya. Vonahaqiaqi, qabu taha taha ge eda givenu'wedi edi ilivuyavo weaqina, ta 'esi yaveiana aqiaqiedi, 'inega ana fata tomotau qabudi ena miedi Keliso 'inaya adi 'etoyavua weaqina. <sup>23</sup> Ba'e yani diavona yaviaviaqidi Iesu Valena Aqiaqina ana giveqidua weaqina be yaqisa tovetumaqana qabumi maega Yaubada ena veyoluba kana lobedi.

<sup>24</sup> Ni'a oalamania laha taha taha ma adi luvineavo, 'inega ona nuaia 'eguma qabu taha ina vihila 'inega 'idiega 'aideganamo nanugweta 'inega ve'ia na'ewea, waisa? 'Inega o'a wese ba'e 'idewani una vihila 'aiqa ve'ia nana sabi 'ewana. <sup>25</sup> \* Tolaha qabudi taudiega i'ita'itamakidi laha ana luvine weaqina, 'idewani edi 'ai be, edi 'eno ta wese yani taha taha 'idiega, e 'inega ina vewaiwai, mana nuanuadi ina nugweta be laha ana ve'ia aqiaqina ina 'ewedi. Ta ve'ia nana tomotau nimadiega iviaviaqia, 'inega nawale naveyani kavokavovo. Ta ita'a tovetumaqana kavivihila ve'ia 'eno'eno vatayana weaqina. <sup>26</sup> 'Inega ya'a taugu ge

\* 9:13: Luve 18:1-3 \* 9:14: Md 10:10; Gal 6:6 \* 9:16: Iel 20:9 \* 9:20: Via 21:20-26 \* 9:22: 2Kol 11:29

\* 9:25: Fil 3:14; 2Tim 4:7-8; 2:4-5

eda vihila kavokavovo, ta 'esi egu masi 'iawaguya ya'itea, 'inega 'eda tunutunuqina 'inega yavivihila ana 'ebeluo'ova weaqina. Kana nuaia tofwaiki aqiaqi weaqina, mana tauna ge dafwaiki kavokavovo, ta 'esi nimana ena inoqa 'aidega 'aidega 'idia nuanuana ana avia navunuqia. Ya'a wese 'idewani tofwaiki nana, mana ge nuanuagu fewa nana Yaubada neigu ana masi ena lu'waqiei. <sup>27</sup> \* 'Inegana 'wafigu taugu yaluvinea be ya'itamaki aqiaqiea kavona tolahe aqiaqi 'idewani, ta ge eda awafelei yani kavokavovo 'idia. Mana ge yani aqiaqina 'eguma ya'a yalulugaihi tomotau 'idia 'etoyavua ana 'eda weaqina, ta taugu vona diavona ge eda 'abibodedi, 'inega ge taha ve'ia ena lobei.

## 10

### *Ge kana iwa'odu tokwalui 'idia*

<sup>1</sup> \* Taigwavo be novugwavo, ge ona nuafania tola'ai lova 'ifoqe tubudavo me Diu 'idia tuta nana di'we Itifita inogea ta Mosese maega itautauya di'we 'ava'ava 'inaya. 'Inega Yaubada gawata qiduana vetunei webui ve'igwa'uyedi. Ta gawata nana ena vanugweta 'inega itautauya. Ta wese Yaubada ena waiwaiega Mwade'wa Bweabwealina a'usi'iea 'inega kavona 'eda 'ifoqe nuaninaya ta qabudi ayahayanega ivaukamana. <sup>2</sup> Ta vaukamana nana 'inaya gawata be Mwade'wa Bweabwealina 'inega ibabitaiso edi veto'abiboda Mosese 'inaya weaqina. <sup>3</sup> \* Ta wese me Diu tuta 'aidega 'aidega adi 'abwaga ana wawa "mana" i'ewe'ewea Yaubada ena waiwaiega ta i'ai'ainia. <sup>4</sup> \* Ta wese 'idewani tuta 'aidega 'aidega 'idia adi go'ila 'aidegana 'inega inumanuma. Go'ila nana Yaubada ena waiwaiega dabo 'inega 'ifoqe matadia, ta dabo nana tuta qabuna taudi maega tauya nana 'inaya. Ta dabo nana tauna Keliso. <sup>5</sup> \* Ta tubudavo diavona edi viaqayavo 'idiega Yaubada ge daqaiawa weaqidi, 'inega 'idiega 'eala i'aliga di'we 'ava'avaya.

<sup>6-7</sup> \* Ta ba'e yani diavona ive'ebe'ita 'idaya be yaqisa ita'a edi ilivu luveifana ge kana 'abibodedi. Vaidi 'idiega edi tokwalui iawatubodi, ta ilivu nana ge kana viaqi, mana Buki Nugwenugweina vonaya, "Tomotau diavona itoabui i'ai'ai ta inumanuma, 'inega iya'itoto ta iouou edi tokwaluiavo matadia." <sup>8</sup> \* Ta wese ge kana velamo'eno kavokavovo 'idewani tubudavo vaidi iviaqia, mana ilivu nana weaqina tomotau adi yau tuweniti teli tausani (23,000) i'aliga 'aubena 'aidegana 'inaya. <sup>9</sup> \* Ta wese eda Kaiwabu ge kana sitonovi 'idewani tubudavo vaidi iviaqia edi ilivu luveifana 'inega. Vona aqiaqi, luveifa nana iviaqidi 'inega mwata i'ifoqe i'utedi 'inega i'elu'aliga. <sup>10</sup> \* Ta wese ge kana vetalabudabuda 'idewani tubudavo vaidi iviaqia, mana edi vetalabudabuda weaqina Yaubada luv'e'aliga ana tovale'ewa vetunei webui 'idia ta luv'e'aligidi. <sup>11</sup> Tubudavo luvematasabu waiwaina ilobedi edi ilivu weaqina, ta ba'e yani diavona 'waya'wayavina Buki Nugwenugweina 'inaya ivonavona waiwai ita'a lagata vauvauda 'idaya, mana bwa'obwa'o ba'ena ena tuta 'ebeluo'ova ni'a vadi'weda.

<sup>12</sup> 'Inega 'eguma taha toga taunega weaqina nanuaia navonaya, "Ya'a me egu vetumaqana waiwaina yatovolo'i'ita!" E 'inega taunega na'itamaki aqiaqiea fole luveifa diavona 'idiega nabe'u. <sup>13</sup> Ta tuta nana sitonova taha taha una lobedi ta nuanuau yani luveifana una viaqia, e 'inega una alamani aqiaqiea ge o'a au 'aidega 'iuya da'ifo'ifoqe, ta 'esi tovetumaqana qabudi sitonova diavona wese ilobelobedi. Yaubada lova vona fofofolayeda ge wese nanogeda, ta ba'e vona fofofola nana ge wese nabwegei. 'Inega ge wese nahawafeleu sitonova waiwai va'inena 'inaya, ta 'esi au 'etofwafwa 'inaya. Ta wese tuta nana sitonova ulobelobedi 'inega Yaubada naiuleu be dena ana 'eda nave'iteu 'inega sitonova nana 'inega una dena, ta ge wese una be'u.

<sup>14</sup> 'Inega egwavo, tokwalui adi iwa'odu ona nogea. <sup>15</sup> Yonavona 'imia kavona omi'a toalamani aqiaqi, 'inega omi'a ami fata egu vona ba'e ena vonayedi ta ona a'uvidividinidi

\* 9:27: Lom 8:13; 13:14 \* 10:1: 'Ifo 13:21-22; 14:22-29 \* 10:3: 'Ifo 16:35 \* 10:4: 'Ifo 17:6; Naba 20:11 \* 10:5: Naba 14:29-30 \* 10:6-7: 1Kol 10:11; Naba 11:4,34; 'Ifo 32:6 \* 10:8: Naba 25:1-9 \* 10:9: Naba 21:5-6 \* 10:10: Naba 16:41-49

'eguma vonahaqiaqi nage gebu. <sup>16\*</sup> Ta ona nuaia, tuta nana kavava'auta eda Kaiwabu ena 'Ai weaqina 'inega 'abwaga nana ana tovewila'a nugweta vedi ma 'oinena na'ewei navona veyolubei Yaubada 'inaya, ta 'abiboda kana numea. 'Inega kavona Iesu sulalina kada numei eda 'ebe'ita ena 'aliga weaqina, ta sulala nana 'inega kave'aidega maega. Ta wese 'idewani beledi, mana beledi nana kana gitomwei kana 'ainia, e 'inega kavona Keliso 'wafina ni'a kada 'aini, 'inega wese maega kave'aidega. <sup>17\*</sup> Ita'a qabuda beledi 'aidega nana 'inega ka'ai'ai, ta ba'e beledi nana 'inega qabuda kave'wafi 'aidega. <sup>18\*</sup> Ta kana nuaia me Isileli edi ilivu weaqina, mana taudi edi yubai ivegubayedi ta i'ainidi, ta 'ai nana 'inega qabudi ive'aidega.

<sup>19\*</sup> Egu vona nana ba'e 'iuna ena givesimatalia 'imia. Ya'a ge eda vonevonemi tomotau edi tokwalui edi waiwai kavona Yaubada otaqa ena waiwai 'idewani. Ta wese ge eda vonevonemi tomotau edi veguba tokwalui 'idia yani aqiaqina nage yani qiduana. <sup>20\*</sup> Gebu'e otaqa! Ta 'esi yavonevonemi edi vegubayavo iviaviaqidi niboana luveifadi 'idia weaqina, ta gebu Yaubada otaqa 'inaya. 'Inega ge nuanuagu taha toga 'imiega taudi maega ona luvetuba ta ona veiaiana. <sup>21\*</sup> Mana ge ana fata eda Kaiwabu ana vediega ona numa, ta wese Seitani enavo adi vediega ona numa. Wese 'idewani ge ana fata 'abwaga kana 'ai eda Kaiwabu ena teboloyega, ta wese Seitani enavo edi teboloyega. <sup>22\*</sup> Nage ita'a nuanuada eda Kaiwabu kana vediavilevilea? Nage ita'a kana vewaiwai va'inea, waisa? Yavonevonemi, gebu'e otaqa!

*Edavo weaqidi kana nuanua ta ge taudamo weaqida*

<sup>23\*</sup> Nage vaina 'imiega ovonaya, "Iesu ena viaqayavo 'idiega yavuyavuigu yatoatoa me Diu edi luvine be wese edi ilivu 'idiega, 'inega luaqiaqiegu be yani qabuna agu fata ena viaqidi." Vonahaqiaqi, au fata, ta viaqa diavona vaina ge wese ina ve'ebeiu'ia. Ta wese vaina 'imiega ovonaya, "Agu fata yani taha taha ena viaqidi." Vonahaqiaqi, au fata, ta vaina yani ge wese ina iuleu. <sup>24\*</sup> Ge tau'umo eu 'ebeqaiawa weaqina una nuanua, ta 'esi luaqiaqieu be una nuanua ma'oda 'inega emwavo wese una giveqaiawedi.

<sup>25</sup> Ta omi'a ba'e 'idewani ona viaqia: 'Eguma yubai vei'odi adi 'ebegimwane 'inega una gimwane sabi 'ai, e 'inega weaqina ge tau'u una vetala'aieu una vonaya, "Ma'inega yubai nana mai, nage tokwalui adi veguba weaqina, nage gebu?" Mana 'eguma tau'u ba'e yani nana weaqina una vetala'aieu 'inega tau'u wese una nuaia nage yani aqiaqina uviaviaqia nage yani luveifana. <sup>26\*</sup> Ta 'esi au fata una 'ainia, mana Buki Nugwenugweina vonayea, "Eda Kaiwabu bwa'obwa'o 'iva'ava'aia, ta wese yani diavona i'eno'eno bwa'obwa'o debanaya eda Kaiwabu 'inega imai."

<sup>27</sup> 'Eguma taha toga ge davetumaqana Keliso 'inaya ta na'ebe'eweu ena vanuea 'ai weaqina, e 'inega ena gaba una 'awahaqiaqiea. 'Inega 'eguma toyani matauya naha'uya ge weaqina una vetala'ai ta 'esi una 'ainia. Ta ge wese tau'u una nuanua una vonaya, "Nage yani luveifana yaviaqia ba'e 'ai nana 'inega?" <sup>28\*</sup> Ta 'eguma taha toga 'ai nana 'inaya navematamagilafuyeu navonaya, "Ba'e yubai nana ni'a ivegubayea tokwalui 'idia." E 'inega yubai nana ge una 'aini ta 'esi una nogea, mana 'eguma tomotau nana nahalamaniana o'a taha tovetumaqana ta tua yubai nana u'ainia, e 'inega tauna una givenuenuea. <sup>29</sup> Unoqolia, ge wese eda voneu 'ai nana 'inega yani luveifana uda viaqi, ta 'esi tovetamatagilafu nana nanuaia o'a ni'a luveifana uviaqia.

Nage taha toga 'imiega una vonaya, "Ge taha toga daluaqiaqiei be ena nuanua 'ai weaqina naluvinegu egu viaqayavo 'idia, be 'inega vaina ena nogedi ta vaina ena 'awahaqiaqiedi, mana ya'a taugu agu fata be ena venua'ivina toyani luaqiaqiegu nage toyani ge daluaqiaqiegu. <sup>30\*</sup> Ta 'eguma Yaubada 'inaya agu 'abwaga be yubai weaqina

\* 10:16: Md 26:26-28 \* 10:17: Lom 12:5 \* 10:18: Luvi 7:6 \* 10:19: 1Kol 8:4 \* 10:20: Luve 32:17; Ve 9:20  
 \* 10:21: 2Kol 6:15-16 \* 10:22: Luve 32:21 \* 10:23: 1Kol 6:12 \* 10:24: Lom 15:1-2 \* 10:26: Same 24:1  
 \* 10:28: 1Kol 8:7 \* 10:30: 1Tim 4:4

yalulukaiwa, e 'inega tola'ai weaqina vaina tomotau ina 'aivegilegu?" <sup>31</sup>\* 'Inega ya'a Faulo yavona aqiaqiemi, tola'ai ka'ai'aini ta tola'ai kanumenumea, ta wese yani qabudi kaviaviaqidi, e kana viaqidi Yaubada sabi awatubona. <sup>32</sup>\* 'Inega me Diu be taudi ge me Diu ta wese Yaubada ana tovetumaqanayavo qabudi ge ona givenuavitedi emi viaqayavo be wese emi ilivuyavo 'idiega. <sup>33</sup>\* Ta wese ya'a 'idewani nuanuagu tomotau qabudi ena giveqaiawedi egu viaqayavo qabudi 'idiega. 'Inegana ge eda nuanua qiduana tangu egu aqiaqi weaqina, ta 'esi tomotau qabudi edi veaqiaqi weaqina yanuanua, be yaqisa 'etoyavua ina lobe Yaubada 'inega.

## 11

### *Tafwalolo ana ve'eda aqiaqi*

<sup>1</sup>\* Omi'a egu ilivu ona vetutumedi, 'idewani ya'a Keliso ena ilivu yavevetutumedi.

<sup>2</sup>Omi'a me Kolinita yaqaiawa weaqimi, mana omi'a ge oda nuafanigu, ta egu ve'ita ita'a tovetumaqana eda toa weaqina lova yave'ita ukamanedi 'imia omatamatayagedi.

<sup>3</sup>\* Ta taha yani weaqina nuanuagu ona nua'eqa'uya, e ba'e: Keliso tauna 'oloto adi toludebana. Ta vivine adi toludebana 'oloto. Ta Yaubada tauna Keliso ana toludebana. <sup>4</sup>Omo'e 'inega 'oloto ge wese daluaqiaqiedi 'eguma debadi ina umedi tuta nana ivevenoqi nage Yaubada ena vona isimasimana 'ifoqeyea. Mana 'eguma debadi ina umedi 'inega ge taha 'amayaba ida ve'itayei Keliso 'inaya, tauna adi toludebana. <sup>5</sup> Ta vivine 'idia dumadumana. Taudi tuta qabuna debadi ma umana tuta nana ivevenoqi nage Yaubada ena vona isimasimana 'ifoqeyea. Mana 'eguma debadi ge ana umamo, e 'inega ge taha 'amayaba ina ve'itayei moqanediavo 'idia, 'inega adi 'ita ge aqiaqina, ta 'esi kavona taha vavine debana kwelikwelina. <sup>6</sup> Vonahaqiaqi, 'eguma taha vavine ge nuanuadi debadi ina umei, e 'inega luaqiaqiedi be debadi qabuna ina da'a yavulea. Mana vivine 'idia debadi ana da'a yavula nage kweli vekawawa yani 'ebeiniyauyau, e 'inegana debadi ina umea. <sup>7</sup>\* Ta 'oloto debadi ge ina umedi tafwalolo ana tuta 'inaya, mana Yaubada 'oloto viaqia ana 'ita tauna 'idewani, ta wese 'oloto viaqia tauna ena ilivu 'idewani. Vonahaqiaqi, Yaubada nuanuana 'amayaba nalobe 'oloto adi 'ita 'inega. Ta 'esi vivine debadi ina umedi, mana taudi edi awafela moqanediavo edi luvine 'ayanaya ina ve'itayea ba'e ilivu nana 'inega. <sup>8</sup>\* Egu vona ba'e 'iuna, mana Yaubada 'oloto ge daviaqi vavine 'inega, ta 'esi vavine viaqia 'oloto 'inega. <sup>9</sup> Ta wese ge 'oloto daviaqi vavine weaqina, ta 'esi vavine viaqia 'oloto ana iula weaqina. <sup>10</sup> Vonahaqiaqi, Yaubada ena tovale'ewayavo vivine dina ivevekovedi, 'inega vivine luaqiaqiedi be debadi ina umedi, ta ba'e 'inega taudiega ina ve'itayedi vonigo moqanediavo edi luvine 'ayanaya itoatoa.

<sup>11</sup> Ta ita'a eda toa eda Kaiwabu ena qabu gamonaya vivine taudi yani qiduana 'oloto weaqida, ta wese 'idewani 'oloto yani qiduana vivine weaqidi, mana kaveveiuila eda toa 'inaya. <sup>12</sup> Vona ba'e vonahaqiaqi, mana vavine Ibi 'oloto 'inega 'ifoqe, ta 'abiboda 'oloto qabudi vivine 'idiega ivi'oi, ta yani qabuna Yaubada ena 'iva'ava'ata 'inega i'ifoqe.

<sup>13</sup> 'Inega tau'u una nuaia, nage vivine adi luaqiaqi be ina venoqi Yaubada 'inaya tomotau matadia ta debadi ge adi umamo? Gebu adi fata! <sup>14-15</sup> Nage ge oda alamania vivine debadi kuena adi 'ita aqiaqina weaqina. Mana Yaubada debadi kuena neidi adi kia ana uma weaqina. Ta ni'a kahalamani aqiaqiea 'oloto ge adi luaqiaqi be debadi navekue, mana ba'e ilivu nana 'inega 'oloto Yaubada ena 'iva'ava'ata 'unu iveyani kavokavovoyea. <sup>16</sup> Ta 'eguma taha toga nuanuana nave'ae'aetoga egu ve'ita ba'e yani diavona weaqidi, 'inega ya'a ta wese Yaubada ena 'ekalesiyavovo maega avona aqiaqiemi: Ba'e 'idewani Yaubada ahawahawatuboya, ta gebu mali ve'eda 'inega.

*Kaiwabu ena 'ai ana luvine  
(Madiu 26:26-29; Maki 14:22-25; Luke 22:14-20)*

\* 10:31: Kol 3:17 \* 10:32: Lom 14:13 \* 10:33: 1Kol 9:20-22 \* 11:1: 1Kol 4:16 \* 11:3: Nug 3:16; Efe 5:23  
\* 11:7: Nug 1:26-27 \* 11:8: Nug 2:18-23



<sup>17</sup> Ta wese ilivu taha weaqina ena vematamagilafuyemi. Ta ilivu nana weaqina ge agu fata ena qaiawa weaqimi. Mana tuta nana ovava'auta tafwalolo weaqina 'inega vita 'ifo'ifoqe nuanimia. <sup>18</sup> \* Valemi yanoqolia, mana vaina tomotau imai ivonegu emi va'autayavo 'idia vetoatoasi'i 'ifo'ifoqe nuanimia. Ta vona diavona weaqimi vaina yavetumaqanedi, ta vaina gebu. <sup>19</sup> Ta vetoatoasi'i nana weaqina ge nuagu davoqana, mana yahalamania ba'e 'inega kana 'ita aqiaqiedi tomeqabu 'eda tunutunuqina 'inega itautauya, ta tomeqabu gebu.

<sup>20</sup> Vonahaqiaqi, tuta nana ovava'auta eda Kaiwabu ena 'ai weaqina omi'a ovonaya be 'ai aqiaqina oda viaviaqi, ta gebu. Ta 'esi 'ai nana 'inaya kavona tomotau 'aidega 'aidega taunega ana 'abwaga da'ai'aini. <sup>21</sup> Mana tuta nana ovava'auta, 'inega vaina 'imiega ami 'abwaga otaqa omiea o'ai'ai ta gamomi kokoko, ta vaina ma botanimi, ta wese vaina onumanuma qiduanu 'inega ovekwavakwava. <sup>22</sup> Ma'oda omi'a? Kavona ge emi vanuemo, waisa? Ba'e ilivu nana 'inega Yaubada ena tomotauyavo ge oda 'amayabedi, mana taudi lukwalukwadi adi 'abwaga goyona imimiea i'ai'ai, 'inega ogiveiniyauyaunidi. Nage ba'e ilivu nana weaqina agu fata ena awatubomi? Gebu'e otaqa! Ta 'esi nuanuagu omi'a emi vanueavo 'idia ona 'ai nugweta, ta 'abiboda ona lugu vanue tafwalolo 'inaya Kaiwabu ena 'ai weaqina.

#### *Eda Kaiwabu ena 'ai ana ve'eda aqiaqi weaqina*

<sup>23-24</sup> Lova eda Kaiwabu Iesu ena 'ai ana 'eda taunega ve'itayea 'iguya, 'inega ya'a wese ni'a yave'itemi. Velovelovani nana 'inaya tuta goyona be Iudasa eda Kaiwabu Iesu nasuluvea, ta nugweta Iesu beledi 'ewei lukaiwa Yaubada 'inaya ta gitomwei ena tovaletuyanayavo matadia ta vonedia, "Ba'e 'wafigu yahawafelea omi'a weaqimi ona 'ainia. Ba'e 'idewani ona viaqa 'aiqa agu 'ebenuave'avina weaqina." <sup>25</sup> \* 'Ai gumwala 'inega wese 'idewani 'oine ma vedina 'ewei vonedi vonaya, "Yaubada ena luvine vauvauna ba'e sulaligu ma vedina 'inega yagigive'ifoqeyea 'imia. Ta 'abo totuta 'inaya wese ona numea, e 'inega ona nuave'avinigu." <sup>26</sup> Ta tuta nana beledi nana o'ai'ainia be 'oine nana onumenumea, e 'inega eda Kaiwabu ena 'aliga weaqina osimasimana 'ifoqeyea ana laba na'evivi namai.

<sup>27</sup> \* Ta tomeqabu beledi nana i'ai'ai kavovoya ta wese 'oine nana inumanuma kavovoya taudi tomotau diavona eda Kaiwabu ge ida 'amayabea, mana 'wafina be sulalina iveyani kavokavovoyea, 'inega taudi ni'a luveifana iviaqia. <sup>28</sup> 'Inega togama nuanuana eda Kaiwabu ena 'ai ana 'ebenuave'avina na'ainia, e 'inega nugweta taunega giwalina na'ita aqiaqiea. E 'abiboda ana fata beledi nana na'ainia ta wese 'oine nana nanumea. <sup>29</sup> Mana 'eguma taha toga Iesu 'wafina ena 'aliga 'iuna ge nahalamani aqiaqiea ta tua beledi nana na'ainia be 'oine nana nanumea, e 'inega tomotau nana taunega luvematasabuya. <sup>30</sup> Vonahaqiaqi, ba'e 'inega 'eala 'imiega ivevihiqa be idawalili, ta wese vaina yawaidi ni'a gumwala.

<sup>31</sup> Ta eda Kaiwabu ena 'ai ana tuta 'inaya 'eguma nugweta taudega giwalida kana lutonova aqiaqiea, e 'inega ge wese Yaubada naluvematasabuda. <sup>32</sup> \* Ta 'esi ita'a ba'itagana luvine be wese luvematasabu kalobelobea eda Kaiwabu 'inega, be yaqisa ge luvine waiwaina nawale kana lobei tuta 'ebelu'ovoa 'inaya taudi tovegwavu'ai maega. <sup>33</sup> 'Inega egwavo, tuta nana ona va'auta eda Kaiwabu ena 'ai weaqina, 'inega emiavo ona ba'eyedi ina mai ta 'abwaga otaqa taudi maega ona 'ai. Ta 'abibodanaya eda Kaiwabu ena 'ai ana 'ebenuave'avina ona 'ainia. <sup>34</sup> Ta 'eguma taha toga nabotana veiveifa ta ge ana fata enavo naba'eba'eyedi vanue tafwalolo 'inaya, e 'inega tauna ena vanuea na'ai nugweta, ta 'abibodanaya nalugu 'ai nana weaqina enavo maega, fole Yaubada ena luvine nalobei.

Ta nawale ena wai 'imia, 'inega wese vaina yani weaqidi onuanua ena givesimatalidi weaqimi ta ena vebibinemi.

\* 11:18: 1Kol 1:10-12 \* 11:25: 'Ifo 24:6-8; Ibe 8:8-13 \* 11:27: Ibe 10:29 \* 11:32: Ibe 12:5-6

## 12

*Ada wila'a Niboana Gwalagwalana ena nei kavovo 'inega*

<sup>1</sup> Egwavo, tuta ba'e 'inaya emi vetala'ai Niboana Gwalagwalana ena fewa tomotau 'idaya weaqina ena givesimatalia 'imia, mana nuanuagu nuami na'eqa'uya ba'e yani nana weaqina. <sup>2</sup>\* Ni'a oalamanina lova ma'oda otoatoa 'aiqa tuta nana Iesu nawale ge oda vetumaqanea. Ta emi ilivu 'inega taumiega otayya gei ta tubumiavo edi tokwalui ge edi veqaemo 'idia oiwaiwa'odu. <sup>3</sup>\* 'Inega nuanuagu ma'oda 'inega ona alamani aqiaqiea 'eguma Yaubada Niboanina tomotau edi vona 'inega 'ifo'ifoqe, mana ge taha toga ana fata Iesu navona ve'alatei 'eguma tauna Niboana Gwalagwalana 'inega vonavona. Ta wese ge taha toga ana fata navonaya, "Iesu tauna egu Kaiwabu" 'eguma Niboana Gwalagwalana ge datoatoa tomotau nana giwalinaya.

<sup>4</sup>\* Vonahaqiaqi, wila'a taha taha mali fewa be mali fewa weaqina ka'ewedi, ta wila'a diavona i'ifo'ifoqe mai Niboana Gwalagwalana ana 'aidega 'inega. <sup>5</sup> Ita'a tovetumaqana eda fewa dumadumana be dumadumana 'ekalesia gamonaya, ta qabuda eda Kaiwabu ana 'aidega weaqina kafewafewa. <sup>6</sup> Yaubada mali fewa be mali fewa viaviaqidi 'idega, ta wese Yaubada ana 'aidega fewa diavona 'iudi. <sup>7</sup> Tovetumaqana taha taha ada wila'a 'aidega 'aidega Niboana Gwalagwalana 'inega ka'ewedi ita'a 'ekalesia qabuda ada iula weaqina.

<sup>8</sup> 'Inega taha tovetumaqana ana wila'a Niboana 'inega ana fata nuanua simasimatalina nasimaneana enavo adi iula weaqina, ta wese taha tomotau ana fata alamani qiduana na'ewea Niboanina 'aidegana 'inega. <sup>9</sup> Taha tomotau ana wila'a vetumaqana qiduana. Ta wese taha tomotau ana wila'a 'inega ana fata tomotau nagiveaqiaqiedi. <sup>10</sup> Taha tomotau ana wila'a 'inega ana fata yani 'ebenuavoqana naviaqidi, ta taha tomotau ana wila'a 'inega ana fata Yaubada ena vona nasimana 'ifoqeyedi. Taha tomotau ana wila'a 'inega ana fata nahalamani aqiaqiea 'eguma taha toga vonavona Yaubada Niboanina ena waiwaiega, nage mali niboana 'inega. E taha tomotau ana wila'a 'inega ana fata navona mali mea be mali mea 'idiega, ta taha tomotau ana wila'a 'inega ana fata veqae diavona nagiviledi. <sup>11</sup>\* Ba'e wila'a diavona Niboana Gwalagwalana 'aidegana 'inega i'ifoqe. Tauna ana 'aidega ena nuenuaga vewila'ayedi tomotau taha taha 'idia.

'Wafi 'aidegana ta du'unavo 'eala

<sup>12</sup>\* Tomotau 'wafina du'unavo 'eala wawasai, ta du'u diavona qabudi iluvetuba 'inega ive'wafi 'aidega. Ita'a Yaubada ena tomotauyavo wese 'idewani, mana ita'a tomotau 'aidega 'aidega qabu qidua va'ineda, ta ni'a kaveqabu 'aidega Keliso maega. 'Inega kavona ita'a Keliso 'wafina. <sup>13</sup>\* Vaina 'idega me Diu, vaina ge me Diu, vaina 'idega tofewa kavovo, ta wese vaina yavuyavuida. Ta qabuda Niboanina 'aidegana 'inega babitaiso ni'a ka'ewea.

<sup>14</sup> Vonahaqiaqi, tomotau 'wafina ge du'u 'aideganamo, ta 'esi du'unavo 'eala. <sup>15</sup> 'Eguma taha 'aqe navonaya, "Ya'a ge 'wafi du'una mana ya'a 'aqe ta ge nima." Ta ba'e vona nana 'inega ge wese 'aqe nana ana fata taunega davetoasi'iei 'wafi du'unavo 'idiega. <sup>16</sup> Ta wese 'idewani 'eguma teniqa taha navonaya, "Ya'a ge 'wafi du'una taha, mana ya'a taniqa ta ge mata." Ta ba'e vona nana 'inega ge wese ana fata taunega davetoasi'iei 'wafi du'unavo 'idiega. <sup>17</sup> Kana nuaia, 'eguma 'wafida mata daisina, ma'oda 'inega kana noqola 'aiqa? Ta wese 'idewani 'eguma 'wafida teniqa daisina, ma'oda 'inega kana yaoqa 'aiqa?

<sup>18</sup> Ta 'esi Yaubada 'wafida viaqidi du'u taha taha 'idiega, ta du'u diavona a'udi tauna ena nuanua 'inega. <sup>19</sup> Kana nuaia, 'eguma du'uda 'aideganamo, 'inega ma'oda navetomotau 'aiqa? <sup>20</sup> Vonahaqiaqi, du'u 'eala, ta 'wafi 'aidegana. <sup>21</sup> Matada ge ana fata nimada navoneaya, "Ge nuanuagu o'a!" Ta wese 'idewani 'unu'unuda ge ana fata 'aqeda navoneaya, "Ge nuanuagu o'a!"

<sup>22</sup> Vonahaqiaqi, vaina du'uda weaqidi kanuanua kavonaya dawalilidi ta yani kavokavovo. Ta ge 'idewani ona nuanua, mana taudi wese edi fewa yani qiduana 'wafida

\* 12:2: Aba 2:18-19 \* 12:3: 1Ion 4:2-3 \* 12:4: Lom 12:6 \* 12:11: 1Kol 7:7 \* 12:12: 1Kol 10:17 \* 12:13: Gal 3:28

ana iula weaqina. <sup>23</sup> Du'uda vaina ge nuanuada kana awatubodi, mana kavonaya be taudi ge yani qiduana, ta tua du'u diavona ka'ita'itamaki aqiaqiedi. Ta wese du'uda vaina kaumeumedi, mana taudi weaqina kainiyauyau, 'inega ge nuanuada tomotau ina 'itedi. <sup>24</sup> Ta 'esi du'uda vaina weaqidi ge kada iniyauyau, e 'inega ge kada nuanua weaqidi be kana umedi. Ta Yaubada 'wafida du'unavo luvetubedi, 'inega du'u diavona kanuaidi kavonaya be yani kavokavovo, e taudi wese awatubo be 'itamaki aqiaqi ilobelobe, <sup>25</sup> be yaqisa ge taha vetoatoasi'i na'ifoqe du'u qabudi nuanidia, ta 'esi qabudi edi nuanua 'aidegana 'inega ina veiuiula. <sup>26</sup> 'Inega 'eguma du'u taha visiqā nalobe, e 'inega du'u qabudi visiqā nana ina vebaea. Ta wese 'idewani 'eguma du'u taha awatubo nalobe, e 'inega du'u qabudi maega ina qaiawa.

<sup>27</sup> \* Ni'a o'itea, omi'a qabumi Keliso 'wafina, ta wese omi'a 'aidega 'aidega du'unavo. <sup>28</sup> \* Ta Yaubada ena 'ekalesia gamonaya tomotau venua'ivinidi fewa taha taha weaqina. Nugweta tovaletuyana, ta vemagilafuna tovesimasimanayavo, ta vetoina tove'ita. Ta wese vaina venua'ivinedi adi fata yani 'ebenuavoqana ina viaqidi, ta vaina adi fata tomotau ina giveaqiaqiedi, ta vaina adi fata ediavo ina iuledi, ta vaina adi fata to'ekalesia ina vanugwetedi, ta wese vaina adi fata mali mea be mali mea ina veqaeyedi. <sup>29</sup> Nage to'ekalesia qabudi ina tovaletuyana? Gebu! Nage to'ekalesia qabudi ina vetovesimasimana? Gebu! Nage qabudi ina vetove'ita? Gebu! Nage qabudi adi fata yani 'ebenuavoqana ina viaqidi? Gebu! <sup>30</sup> Nage to'ekalesia qabudi Niboana Gwalagwalana adi wila'a neidi 'inega adi fata tovevihiqa ina giveaqiaqiedi? Gebu! Nage qabuda ada fata mali bona be mali bona ge kada alamanidi kana veqaeyedi? Gebu! Nage qabuda ada fata bona taha taha ge kada alamanidi kana giviledi? Yavonemi, gebu'e otaqa! <sup>31</sup> \* Ta nuanuagu emi nuanua ona a'uya Niboana ena wila'a aqiaqi otaqidi 'idia. 'Inega ba'itagana taha yani aqiaqi otaqina 'ekalesia yawaina weaqina ena ve'itemi, e ba'e yani nana ana wawa veyoluba.

## 13

### *Veyoluba weaqina*

<sup>1</sup> 'Eguma agu fata totoa bwa'obwa'o bonadi taha taha 'idiega ena veqae, ta wese Yaubada ena tovale'ewayavo bonadiega ena veqae, ta ge egu veyolubamo tomotau weaqidi, e 'inega egu vonayavo adi noqola kavona be sagali ida lavulavua kavokavovoi nage bea ida mu'emu'e kavokavovoi. <sup>2</sup> \* Nage agu wila'a Niboana Gwalagwalana 'inega agu fata Yaubada ena vona ena simana 'ifoqeyedi tomotau 'idia, ta ge egu veyolubamo, e 'inega ya'a kavona yani kavokavovo. Ta 'eguma agu fata Yaubada ena nuanua qabuna ta wese yani qabuna 'wai'waividi ena alamani aqiaqiedi, ta ge egu veyolubamo, e 'inega ya'a yani kavokavovo 'idewani. Ta wese 'eguma agu fata egu vetumaqanega bwanaga ena vonedi ta ina toa iqa, ta ge egu veyolubamo, e 'inega ya'a egu viaqayavo yani kavokavovo. <sup>3</sup> 'Eguma egu kulufa qabuna ena vewila'ayedi lukwalukwadi 'idia, ta wese 'wafigu ena awafelea 'ebeveguba 'inaya, ta ge egu veyolubamo, e 'inega egu viaqayavo 'idiega ge taha ve'ia aqiaqina ena lobei.

<sup>4</sup> 'Eguma taha toga iana veyoluba aqiaqiea, e 'inega toveyoluba nana diana ge namaduvilei iana ena viaqayavo weaqidi, ta 'esi me ena bibitaqo ta wese atulafu 'avana. Toveyoluba ge taha vebwalaou 'inaya da'eno'eno, ta ge wese taunega dagivaneyea. <sup>5</sup> Toveyoluba aqiaqi ge nuanuana iana naveilivu veifei, ta ge taunega weaqina danuanua ta 'esi iana weaqina, ta ge wese ena gamosoalamo, be wese tomotau edi viaqa veifa 'inaya weaqidi ge danuaidi. <sup>6</sup> \* Toveyoluba aqiaqi ge taha tuta daqaiawa ilivu lueifana weaqidi, ta 'esi ilivu tunutunuqina weaqidi qaiqaiawa. <sup>7</sup> \* Toveyoluba aqiaqi vita qabudi ge adi fata ina awatayei ena ilivu aqiaqidi adi viaqa 'inega. Tauna tuta qabuna me ena vetumaqana

\* 12:27: Lom 12:5 \* 12:28: Efe 4:11-12 \* 12:31: 1Kol 14:1 \* 13:2: Md 17:20 \* 13:6: Lom 12:9 \* 13:7: 1Fit 4:8

yani taha taha weaqidi be, tuta qabuna me ena lu'ita vane, ta wese tuta qabuna me ena bibitaqo, ta ge ina awala tauna 'inega.

<sup>8</sup> Nawale taha tuta 'inaya wila'a taha taha Niboana Gwalagwalana 'inega ina awala. 'Inega Niboana Gwalagwalana ena wila'a Yaubada ena vona ana simana 'ifoqe weaqina nahawala. Ba'itagana tomotau Niboana Gwalagwalana ena wila'a 'inega adi fata mali bona be mali bona ge ida alamanidi iveveqaevedi, ta nawale tuta maimai 'inaya ba'e wila'a nana nahawala. Ta wese Niboana Gwalagwalana ena wila'a 'inega ba'itagana tomotau adi fata yani qabuna ina alamania, ta tuta maimai 'inaya ba'e wila'a nana wese nahawala. Ta 'esi veyoluba ilivuna ana 'aidega ge wese ena awalamo. <sup>9</sup> Ba'e wila'a diavona edi awala 'iuna mana tuta ba'e 'inaya Niboana Gwalagwalana ena iula ka'ewe'ewea, ta tua ge ada fata yani qabuna weaqidi kana alamanidi. Ta wese ena iula 'inega Yaubada ena vona kasimasimana 'ifoqeyedi, ta tua ge ada fata be kana simana 'ifoqe aqiaqiedi. <sup>10</sup> Ta 'esi tuta 'ebeluo'ova 'inaya wila'a qabudi ina awala, mana omo'e tuta nana 'inaya Yaubada ena waiwai 'inega yani qabuna naveaqiaqi otaqa.

<sup>11</sup> 'Ebevetalatutula ba'e 'inega egu vonayavo ena givesimatalia 'imia. Egu tuta gwama 'inaya egu veqae kavona gogama edi veqae, be egu nuanua 'idewani gogama, ta wese egu viaqayavo kavona gogama edi ilivu. Ta tuta nana yave'ena'i 'inega gogama edi ilivu yanogedi. <sup>12</sup> Ba'e 'itagana yani qabuna ka'ite'itedi kavona be velovelovana 'inaya kada 'ite'itedi, ta 'inega ge ada fata be kana 'ita aqiaqiedi, ta 'esi tuta maimai 'inaya yani qabuna kana 'ita aqiaqiedi. Ta wese 'idewani ba'e 'itagana egu alamani tufwana, ta omo'e tuta nana 'inaya yani qabuna ena alamani aqiaqiea, 'idewani Yaubada ni'a alamani aqiaqiegu.

<sup>13</sup> \* Ta yani ba'e toidi ina 'eno vataya: Vetumaqana be, lu'ita vane ta wese veyoluba. Ta toi dina 'idiega veyoluba tauna veqidua va'inedi.

## 14

*Niboana Gwalagwalana ena wila'a* 'ekalesia ana iula weaqina

<sup>1</sup> \* Egwavo, veyoluba ana aqiaqi ni'a oalamani aqiaqiea, 'inega veyoluba ena ilivu ona 'abiboda aqiaqiea. Vonahaqiaqi, Niboana Gwalagwalana ena wila'ayavo qabudi ona toho waiwai adi 'ewa weaqidi, ta 'idiega Yaubada ena nuanua ana simana 'ifoqe wila'a nana weaqina ona sali nugwetea. <sup>2</sup> Mana tomeqabu bona taha taha ge ida alamanidi ta tua adi fata ina veqaevedi, taudi ge tomotau 'idia ida vonavona, mana tomotau diavona vona diavona ge ida alamanidi, ta 'esi Yaubada 'inaya ivonavona. Tovona nana Niboana Gwalagwalana ena waiwaiega vonavona, ta vona diavona adi alamani 'wai'waiwidi tomotau 'idia. <sup>3</sup> Ta tomeqabu Niboana ena wila'a 'inega adi fata Yaubada ena nuanua ina simana 'ifoqeyedi, e taudi edi vona 'inega ediavo igivewaiwaiedi, ta ivona iuledi ta wese edi nuanua yani taha taha weaqina 'idiega igiveaqiaqiedi.

<sup>4</sup> Taha tomotau Niboana ena wila'a 'inega ana fata mali bona veveqaevea, e tauna vona nana 'inega taunega gigivewaiwaiea. Ta 'esi taha toga Niboana ena wila'a 'inega ana fata Yaubada ena nuanua nasimana 'ifoqeyedi, e tauna 'ekalesia qabuna gigivewaiwaiedi. <sup>5</sup> Nuanuagu omi'a qabumi Niboana ena wila'a 'inega bona taha taha ami fata ona veqaevedi. Ta vonahaqiaqi, egu nuanua qiduana qabumi ami fata Niboana ena wila'a 'inega Yaubada ena nuanua ona simana 'ifoqeyedi. Mana ba'e wila'a nana yani qiduana 'ekalesia weaqidi, ta 'abiboda veqae bona taha taha 'idiega. Ta 'eguma taha toga ana fata bona nana nagivilea, e 'inega wese yani aqiaqi otaqina, mana givila nana 'inega 'ekalesia qabudi iula ina lobe.

<sup>6</sup> Egwavo, 'eguma ena vayausimi ta mali bona 'inega ena veqae 'imia 'inega tola'ai ana aqiaqi? Ge taha! Ta 'esi 'eguma ena wai 'imia ta Yaubada ena ve'ita 'iguya ena ve'ita ukamanea 'imia, nage alamani aqiaqina ena neimi, nage Yaubada ena nuanua ena simana 'ifoqeyea 'imia, nage ve'ita tunutunuqina ena neimi, e ba'e yani diavona 'idiega

\* 13:13: 1Te 1:3 \* 14:1: 1Kol 12:31; 14:39

ana fata be ena iulemi. <sup>7</sup> Ebevetalatutula taha ena neimi, e ba'e: Vaina yani yawai geqadi 'idewani 'ebelaha loli be gitaha taudi ma butudi, ta 'eguma tolaha ge ina vefewa aqiaqiedi, e 'inega adi noqola naluveifa ta tovineneqa ge adi fata ina alamania to'evosi ana aniqo ilahalahayei, waisa? <sup>8</sup> Ta wese 'idewani 'eguma avia ana tuta 'inaya bea ina mu'e veifea, e 'inega togama na'iva'ava'ata avia weaqina? Ge taha toga! <sup>9</sup> Ta wese 'idewani omi'a. Ma'oda 'eguma o'a tomotau 'idia bona taha ge ida alamania una veqaeyea 'idia? Ma'oda 'inega adi fata eu vona ina alamani 'aiqei? Ge adi fata, ta 'esi kavona uda vonavona kavokavovo 'idia.

<sup>10</sup> Vonahaqiaqi, bona 'eala wawasai kana lobedi bwa'obwa'o debanaya. Ta tomeqabu iveveqaeyedi, e taudi 'idia bona diavona tunutunuqidi ta wese ma adi alamani. <sup>11</sup> Ta ya'a weaqigu bona diavona ge taha adi simatala 'iguya. Ge agu fata tovana diavona edi veqae ena alamanidi, ta wese 'idewani taudi, ge adi fata ya'a egu vona ina alamania 'eguma bonagu 'inega yaveveqae 'idia. <sup>12</sup> Omi'a nuanuami qiduana Niboana Gwalagwalana ena wila'ayavo naneimi ona 'ewedi. E ba'e yani aqiaqi otaqina. Ta nuanuagu wila'a taha taha adi fata 'ekalesia ina givewaiwaiea ona sali aqiaqiedi, ta ona venoqi Yaubada 'inaya adi 'ewa weaqidi.

<sup>13</sup> Ta wese 'eguma taha toga ana wila'a 'inega ana fata taha bona 'wai'waivina naveqaeyea, e luaqiaqiea be wese navenoqi givila ana wila'a weaqina be yaqisa bona nana veveqaeyea ana fata taunega nagivilei ta nagivesimatalia 'ekalesia qabudi 'idia, 'inega vona nana ina alamania ta ina vewaiwai. <sup>14</sup> Mana 'eguma yavevenoqi bona taha 'wai'waivina 'inega, ta bona nana ge eda alamania, e 'inega niboaniguyega yavevenoqi Yaubada 'inaya.

<sup>15</sup> 'Inega tola'ai ena viaqi? Nuanuagu qiduana yani magilafudi ena viaqidi. Nuanuagu ena venoqi mali bonayega niboanigu 'inega, ta wese bonaguyega. Ta nuanuagu ena 'evosi mali bonayega niboanigu 'inega, ta wese bonaguyega. <sup>16</sup> Ona nuaia, 'eguma taha toga 'imiega mali bona 'inega uvevenoqi niboaniu 'inega Yaubada 'inaya, e 'inega ma'oda emwavo venoqi nana ina alamania ta ina 'awahaqiaqiei? Ge adi fata. <sup>17</sup> Nage o'a eu venoqi mali bona 'inega aqiaqi otaqina, ta ma'oda emwavo? Taudi venoqi nana 'inega ge taha iula ida lobei.

<sup>18</sup> Omi'a Yaubada Niboanina ena iula 'inega mali bona be mali bona 'idiega ovonavona, ta ya'a mali bona adi toveqaeavo yaveqidua va'inedi, ta ba'e weaqina yalulukaiwa Yaubada 'inaya. <sup>19</sup> Ta 'esi 'eguma kana toava'auta tafwalolo weaqina, e 'inega ge nuanuagu vona kuena mali bona 'inega ena neimi, ta 'esi vona kukusana simasimalidi bonamiega ena 'inamedi 'imia.

<sup>20</sup> \* Egwavo, gogama gogoyodi ge ida nuanua qiduana yani taha taha weaqina, 'inega omi'a ge ona vegogama tuta nana ba'e yani diavona weaqina onuanua, mana taudi nua kavokavovodi itoatoa ta yani qabuna weaqina ge nuadi da'eqa'uya. Ta 'esi omi'a tuta nana Niboana Gwalagwalana ena wila'a weaqidi onuanua, e 'inega ona nuanua kavona tomotau edi nuanua fa'alina 'idewani. <sup>21</sup> \* Buki Nugwenugweina vonaya,

“Ya'a Kaiwabu egu tomotau  
me Diu mali bona 'inega  
ena vona 'idia,  
ta wese ena vona 'idia  
mali tomotau meadiega.

Ta ge nuanuadi egu vona  
ina noqoli,  
'inega yavona 'wayoqa 'idia.”

<sup>22-23</sup> \* Yavona aqiaqiemi, Niboana Gwalagwalana ena wila'a mali bona weaqina tomotau neidi, ta wila'a nana taha 'ebe'ita taudi ge ida vetumaqana weaqidi, ta gebu tovetumaqana weaqidi. Mana 'eguma omi'a tovetumaqana ovava'auta tafwalolo weaqina

\* 14:20: Efe 4:14 \* 14:21: Ais 28:11-12 \* 14:22-23: Via 2:13

ta qabumi mali bona be mali bona ge oda alamanidi 'idiega ovonavona, ta vaina tomotau ge ida vetumaqana ilugu mai ivivineneqemi ta ilivu nana ge ida alamania, e 'inega ina vonemia, "Aa, omi'a ni'a ovekwavakwava!" <sup>24</sup> \* Ta 'esi Niboanina ena wila'a Yaubada ena nuanua ana simana 'ifoqe weaqina yani aqiaqi otaqina taudi ge ida vetumaqana weaqidi. Mana 'eguma qabumi otawatafwalolo ta Yaubada ena nuanua osimasimana 'ifoqeyedi, ta taudi ge ida vetumaqana nage ge taha ida alamania tafwalolo weaqina ilugu mai ta vona diavona inoqonoqolidi. E 'inega emi simana 'idiega nuadi na'eqa'uya ta edi luveifana ina alamani aqiaqiea. <sup>25</sup> Ta wese tuta nana emi simana inoqonoqolidi edi nuanuayavo 'wai'waividi giwalidiega ina 'ifoqe ta tuqatuqadiega ina sobadi ta ina simana 'ifoqe ina vonemia, "Vonahaqiaqi, Yaubada omi'a maega!"

*Tafwalolo ana ve'eda tunutunuqina*

<sup>26</sup> \* Egwavo, egu ve'ita diavona ana bwagila ba'e 'idewani: Tuta nana ona va'auta tafwalolo weaqina, e 'inega taha tomotau na'evosi. Ta taha tomotau nave'ita. Ta taha tomotau ve'ita Yaubada 'inega nave'ita ukamanea 'imia. Ta taha tomotau mali bona Yaubada Niboanina 'inega naveqaeyea, ta wese taha tomotau bona nana nagivilea ta nagivesimatalia. Ta ba'e yani diavona omi'a 'ekalesia ami 'ebegivewaiwai. <sup>27</sup> Ta emi va'auta nana 'inaya 'eguma vaina 'imiega nuanuadi mali bona 'idiega ina vona, e 'inega magilafudi nage toidi 'aideganega 'aideganega ina tovolu ina vona. Ta 'abibodanaya taha tomotau natovolu vona diavona nagiviledi ina simatala qabumi 'imia. <sup>28</sup> Ta 'eguma ge taha bona nana ana togivila datoatoa, 'inega ge taha toga wese natovolu ta mali bona 'inega navonavona. 'Inega luaqiaqiea be nagenu'wana emi tafwalolo 'inaya, ta 'esi tauna nuanega naveqae mali bona 'inega Yaubada 'inaya, 'inega ge taha toga nanoqoli.

<sup>29</sup> \* Ta wese emi tafwalolo 'inaya Yaubada ena nuanua ana tovesimasimanayavo magilafudi nage toidi ina simana 'imia, ta omi'a simana diavona ona vineneqa aqiaqiedi 'eguma Yaubada 'inega 'ifo'ifoqe, nage mali niboana 'inega. <sup>30</sup> Ta 'eguma taha tomotau Yaubada ena nuanua simasimana 'ifoqeyedi, ta iana taha ve'ita Yaubada 'inega 'eweae, e 'inega tosimana nana natoabui, nagenu'wana ta iana ve'ita nana nagivesimatalia 'ekalesia 'imia. <sup>31</sup> Mana 'eguma ba'e 'idewani ona viaqia, e 'inega tovesimasimana qabudi adi fata ina tovolu, ta 'aidega 'aidega ina simana be yaqisa simana nana 'inega qabumi alamani ona 'ewei ta nagivewaiwaiemi. <sup>32</sup> Ta ge ona nuafania Yaubada ena tovesimasimanayavo niboanidi 'inega adi fata taudiega ina luvinedi, e 'inega wese adi fata ina ba'eba'e ana laba iadi nalua'u 'inega wese 'aidega 'aidega ina tovolu sabi simana. <sup>33</sup> Mana Yaubada ge nuanuana ada wila'a Niboana Gwalagwalana 'inega kana vefewa veifedi, ta 'esi nuanuana kana vefewedi 'eda tunutunuqina 'inega be yaqisa toadaumwala kana lobeae.

<sup>34</sup> \* Ta Yaubada ena 'ekalesia qabudi 'idia vivine ina toagenu'wana tafwalolo ana tuta 'inaya, mana ge daluaqiaqiedi be ina veqae. Ta 'esi ina awafeledi moqanediavo 'idia, Buki Nugwenugweina ena simana 'idewani. <sup>35</sup> Ta 'eguma vivine nuanuadi taha yani weaqina ina alamania, 'inega luaqiaqiedi be tafwalolo 'abibodanaya moqanediavo ina vetala'aiedi edi vanuea. Mana 'eguma tafwalolo ana tuta 'inaya ina vona, e 'inega taudiega ina giveiniyauyaunidi.

<sup>36</sup> Ma'oda, nage Yaubada ena vona omi'a me Kolinita 'imiega 'ifoqe mai? Ana 'ita, gebu! Nage omi'a ami 'aidega vona diavona o'ewedi. Yavonemi, gebu otaqa! <sup>37</sup> \* Ta 'eguma taha toga 'imiega unuaia be o'a Yaubada ena nuanua ana tosimana aqiaqi, nage o'a uvonaya be Niboana Gwalagwalana ena waiwai tuta qabuna 'iuya fewafewa. E 'inega una alamani aqiaqiea, ba'e vona diavona ge ya'a egu nuenuega eda 'wayavidi, ta 'esi eda Kaiwabu luvinegu be 'inega ya'wayavidi. <sup>38</sup> Ta 'eguma taha toga vona diavona nanogedi, e 'inega Yaubada wese tomotau nana nanogea.

\* 14:24: Ion 16:8 \* 14:26: 1Kol 12:8-10 \* 14:29: 1Te 5:21 \* 14:34: 1Kol 11:3; 1Tim 2:12 \* 14:37: 1Ion 4:6

<sup>39</sup> 'Inega egwavo, 'eguma tafwalolo ana tuta 'inaya nuanuami qiduana Yaubada ena nuanua ona simana 'ifoqeyedi 'inega luaqiaqiemi be ona viaqia. Ta wese 'eguma emiavo nuanuadi mali bona be mali bona ge ida alamanidi 'idiega ina vonavona, e 'inega gebu ona awatayedi. <sup>40</sup> Ta luaqiaqiemi be tuta nana ovava'auta yani qabuna ona viaqidi tafwalolo ana ve'eda aqiaqi 'inega 'idewani ni'a yave'ita 'aiqemi.

## 15

*Keliso ena ya'itoto* 'evivi 'aligege weaqina

<sup>1</sup> Egwavo, tuta ba'e nuanuagu Iesu Valena Aqiaqina weaqina ena lu'eviviea 'imia. Ba'e Vale nana lova yalugaihiea 'imia ta o'ewa aqiaqiea be wese ovetumaqanea. Ta ba'itagana Vale nana 'inaya otovolo'i'ita. <sup>2</sup> Vonahaqiaqi, 'eguma ba'e Vale nana ona vetumaqana aqiaqiea be ona kafi'i'ihia 'inega 'etoyavua ona lobe. Ta 'eguma Vale nana ona nokea, e 'inega emi vetumaqana yani kavokavovo 'idewani.

<sup>3</sup> \* Iesu Valena ana avutugu yamadunoqolia, ta 'abibodanaya avutugu nana yave'itemi, mana Vale nana yani qiduana weaqina simanea, e ba'e: Iesu eda luveifana qabudi weaqidi 'aliga, 'idewani lova Buki Nugwenugweina simana 'ifoqeyea. <sup>4</sup> \* Ta Buki nana wese simanayea Keliso itavunia, ta 'aubena vetoina 'inaya Yaubada giveya'itoto 'eviviea 'aligege, <sup>5</sup> \* 'inega Fita matanaya 'ifoqe ta 'itea, ta 'abiboda wese 'ifoqe taudi Tuwelo dina matadia. <sup>6</sup> Ta 'abibodanaya tuta nana ana to'abibodayavo adi yau faibi anidedi (500) iva'auta 'aideganaya, e 'inega matadia 'ifoqe. Ta 'idiega vaina ni'a i'aliga, ta 'ea'ealidi nawale mayawaidi itoatoa. <sup>7</sup> \* 'Inega wese 'ifoqe Iemesa 'inaya, ta 'abibodanaya 'ifoqe tovaletuyana qabudi matadia. <sup>8</sup> \* Ta 'ebel'ovoa wese 'iguya 'ifoqe mai ya'itea. Ta ya'a kavona gwama davi'oi galigali'e ge ena tuta dalobei 'idewani. <sup>9</sup> \* Vonahaqiaqi, tovaletuyana qabudi iveqidua va'inegu, ta ge daluaqiaqiegu be ina gabegu tovaletuyana, mana ya'a Yaubada ena tomotauyavo lova yavevoalanedi.

<sup>10</sup> \* Ta 'esi Yaubada ena nuakolokolo 'inega veilivu aqiaqiegu ta yavetovaletuyana 'inaya. Ta ena nuakolokolo qiduana 'iguya ge eda vefewa kavokavovoyei. Ta 'esi ma vuaqina, mana ya'a tovaletuyana qabudi edi fewa 'inega yaveqidua va'inedi. Ta egu fewa nana qiduana ge taugu egu waiwai 'inega, ta 'esi Yaubada ena veyoluba 'iguya 'inega. <sup>11</sup> Tovaletuyana vaina wese ni'a ilugaihi 'imia. Ta ge wese taha tola'ai 'eguma taudi edi lugaihi 'inega Iesu Valena ovetumaqanea nage ya'a egu lugaihi 'inega, mana Vale nana 'aidegana alugaihiea 'imia.

*To'aliga edi ya'itoto* 'evivi

<sup>12</sup> Ta 'eguma lova ima'a ema lugaihi 'inaya asimana 'imia Keliso ni'a ya'itoto 'evivi 'aligege, 'inega tola'ai weaqina vaina 'imiega ovonavona vonigo ge taha toga ana fata naya'itoto 'evivi 'aligege? <sup>13</sup> Mana 'eguma tomotau 'aligege ge ina ya'itoto 'evivi, 'inega wese Keliso 'aligege ge daya'itoto 'evivi. <sup>14</sup> Ta wese 'eguma Keliso ge daya'itoto 'evivi, e 'inega ema lugaihiavo 'imia yani kavokavovo, ta wese emi vetumaqana 'iu geqana. <sup>15</sup> Ta 'eguma ge taha toga ana fata naya'itoto 'evivi 'aligege, e 'inega ima'a tovaletuyanayavo Yaubada weaqina ni'a au'avemi, mana ima'a alugaihi 'imia Yaubada Keliso giveya'itotoya 'aligege weaqina. Ta 'eguma omi'a emi nuanua ba'e 'idewani, 'inega Yaubada Keliso ge dagiveya'itoto 'eviviei. <sup>16</sup> Mana 'eguma to'aliga ge adi giveya'itotomo, 'inega wese Yaubada Keliso ge dagiveya'itotoi. <sup>17</sup> Ta 'eguma Keliso ge dagiveya'itotoi, 'inega emi vetumaqana ge ana aqiaqimo, ta 'esi omi'a nawale me emi luveifana otoatoa, ge adi nuataqomo. <sup>18</sup> Ta wese 'eguma omi'a ba'e 'idewani onuanua 'aiqa, e 'inega tovetumaqana yawaidi ni'a gumwala taudi i'waiva vataya. <sup>19</sup> Ta 'eguma eda lu'ita vane Keliso 'inaya ge tuta maimai weaqina, ta 'esi eda toa ba'idia bwa'obwa'oya namo weaqina, e 'inega ita'a nuakolokoloda, ta 'abiboda mali tomotau.

\* 15:3: Ais 53:5-12 \* 15:4: Md 12:40; Via 2:24-32 \* 15:5: Lk 24:34; Md 28:16-17 \* 15:7: Via 1:3-4 \* 15:8: Via 9:3-6 \* 15:9: Efe 3:8; 1Tim 1:15 \* 15:10: 2Kol 11:23

<sup>20</sup> Ta vonahaqiaqi, Yaubada Keliso ni'a giveya'itoto 'eviviea 'aligega! 'Inega ve'ebe'ita 'idaya tovetumaqana yawaidi ni'a gumwala taudi wese nawale nagiveya'itoto 'eviviedi.

<sup>21</sup> \* O'itei, 'oloto 'aidegana ana wawa Adama 'inega 'aliga 'ifoqe bwa'obwa'oya, ta wese taha 'oloto ana wawa Keliso 'inega ya'itoto 'evivi 'ifoqe, mana Keliso nana maduya'itoto 'evivi 'aligega. <sup>22</sup> Tomotau qabuda kana 'aliga, mana ita'a Adama enavo ta wese eda ilivu 'aidegana. Ta wese 'idewani tovetumaqana qabuda kana yawaha 'evivi 'aligega, mana ni'a kave'aidega Keliso maega. <sup>23</sup> \* Ta ya'itoto 'evivi ana ve'eda ba'e 'idewani na'ifoqe 'aiqa: Yaubada ni'a Keliso giveya'itoto 'eviviea, ta tuta nana na'evivi namai bwa'obwa'oya 'inega wese ena tomotauyavo ina ya'itoto 'evivi 'aligega.

<sup>24</sup> E 'inega tuta 'ebel'ovoa nave'ale. Ta tuta nana 'inaya Keliso niboana luveifadi adi toluvineavo be, toluvine qabudi ge nuanuadi Yaubada, ta wese yani qabudi waiwai naluveawalidi. Ta 'abibodanaya ena 'Ebeluvine nave'ineiea Tamana Yaubada 'inaya. <sup>25</sup> \* Mana Yaubada ena nuanua 'inega Keliso naluvine ana laba voalanavo qabudi navewaiwai va'inedi, 'inega ena luvine 'ayanaya ina toatoa. <sup>26</sup> \* Ta Keliso ana avia 'ebel'ovoa ana wawa 'aliga, ta Keliso 'aliga nana navewaiwai va'inei ta naluveawalia. <sup>27</sup> \* Mana Buki Nugwenugweina vonaya, "Yaubada 'abiluvine neia 'inega yani qabudi ina toatoa ena luvine 'ayanaya." Ta vona diavona adi noqola kavona Keliso Tamana Yaubada daluluvinei. Ta vona diavona adi alamani ba'e: Keliso ge wese Tamana daluvinei, mana Tamana toludebana, ta 'esi ena 'abiluvine neia Natuna 'inaya. <sup>28</sup> Ta tuta nana Keliso yani qabudi ni'a vewaiwai va'inedi ta ena 'abiluvine 'ayanaya itoatoa, e 'inega taunega nahawafelea Tamana ena 'abiluvine 'ayanaya. 'Inega Yaubada ana 'aidega kuyavata qabudi naluvinedi ta wese na'itamakidi.

<sup>29</sup> Omi'a vaina ovonaya vonigo ge taha toga ana fata 'aligega naya'itoto 'evivi. 'Inega tola'ai weaqina to'aliga weaqidi babitaiso o'ewe'ewei? Tola'ai ana aqiaqi?

<sup>30</sup> \* 'Eguma emi vona vonahaqiaqi, 'inega tola'ai weaqina tuta qabuna ya'a ma egwavo yawaima ahawahawafelei 'ebeveilae 'inaya? <sup>31</sup> Egwavo, 'aubena 'aidega 'aidega 'idia Ieisu Valena weaqina ya'ali'aliga 'waqi. Ta tua me egu 'asima'ala yaqaiqaiawa. Ba'e vona diavona vonahaqiaqi, mana omi'a be ya'a ni'a kave'aidega Keliso Ieisu maega, tauna eda Kaiwabu. <sup>32</sup> \* Ta tuta nana 'abaga Efeso 'inaya yatoatoa, 'inega vaina tomotau kavona yubai sasasadi maega avevedavi. Ta ge ana aqiaqimo 'iguya 'eguma vedavi nana 'inaya eda 'aliga, ta gebu eda vetumaqana tuta maimai 'inaya tovetumaqana qabuda 'aligega kana ya'itoto 'evivi. Mana 'eguma ge eda vetumaqana 'inega ya'a wese eda vona 'idewani vaina tomotau ivonaya,  
"Kana 'ai kana numa,  
mana 'ibe kana 'aliga."

<sup>33</sup> Ta ba'e vona nana ge wese ona 'abibodei. Eda vona qiduana taha 'eno'eno vonaya, "Tomotau luveifadi maega ge ona veiaiana, mana nawale edi ilivu luveifadi ina veukamemi, 'inega omi'a emi ilivu aqiaqidi ina awala." <sup>34</sup> Nuanuagu emi nuanua ina vetunutunuqa lova 'idewani, ta wese emi ilivu luveifadi ona nogedi. Ta yavonemi, luaqiaqiemi be ona iniyauyau, mana vaina 'imiega Yaubada ge oda alamania.

*Ya'itoto* 'evivi ana tuta 'inaya 'wafida navevauvau

<sup>35</sup> Nage taha toga navetala'ai navonaya, "Ma'oda 'inega to'aliga adi fata ina ya'itoto 'evivi? Ta ma'oda 'wafidi ana 'ita?" <sup>36</sup> \* Ba'e vetala'ai nana kavona tovekwavakwava edi vetala'ai. Kana nuaia, tuta nana vewana kana daunia 'eguma tubuna ge namadudavula bwa'obwa'o gamonaya ta na'aliga, e 'inega ge ana fata natabo ta 'waena kana 'itei. <sup>37</sup> Ni'a kahalamania, 'eguma boada nage 'abwaga taha taha kana 'wadidi, e 'inega gebu ma 'abwagana kana 'wadia, ta 'esi vewaninamo. <sup>38</sup> 'Abiboda ina tabo ta 'abwagadi Yaubada ena nuanua 'inega adi 'ita taha taha ina 'ifoqe. <sup>39</sup> Ta wese 'idewani yani qabuna mayawaidi

\* 15:21: Lom 5:12    \* 15:23: 1Te 4:16; Ve 20:5    \* 15:25: Md 22:44    \* 15:26: Ve 20:14    \* 15:27: Same 8:6  
\* 15:30: Lom 8:36    \* 15:32: Ais 22:13    \* 15:36: Ion 12:24



'wafidi adi 'ita taha taha. Ita'a tomotau 'wafida taha be, yubai kawakawalidi 'wafidi taha be, manuqa 'wafidi taha, ta wese 'iqana 'wafidi ana 'ita dumadumana.

<sup>40</sup> 'Idewani wese mahala ana totoayavo 'wafidi taha. Ta wese ita'a totoa bwa'obwa'oya 'wafida taha. 'Inega 'eguma 'wafi diavona kana 'itedi kana giveleleqedi 'inega adi 'ita dumadumana be dumadumana. Toota mahalaya 'wafidi adi 'ita aqiaqi otaqina, ta ita'a totoa bwa'obwa'oya 'wafida adi 'ita dumadumana, ta tua 'wafida adi 'ita wese aqiaqi otaqina. <sup>41</sup> Baba'au ena simatala ana 'ita taha, ta wai'ena ena simatala ana 'ita taha, ta wese 'wadi'wadima edi simatala ana 'ita taha. Ta 'wadi'wadima 'aidega 'aidega adi 'ita be wese edi simatala dumadumana be dumadumana.

<sup>42</sup> Ta wese 'idewani nawale na'ifoqe to'aliga 'idia tuta nana ina ya'itoto 'evivi. Mana 'wafidi 'ali'aligina itavunia nadavula, ta nawale tuta nana Yaubada nagiveya'itoto 'eviviedi 'aligega 'wafi vauvauna 'inega ina ya'itoto 'evivi. Ta ba'e 'wafi nana 'eno'eno vatayana, ge ena awalamo. <sup>43</sup> \* To'aliga kana tavunia 'wafina ana 'ita ge aqiaqina, ta 'esi tuta nana 'aligega naya'itoto 'evivi 'inega 'wafina ana 'ita aqiaqi otaqina. Wese 'idewani to'aliga kana tavunia 'wafina dawalilina, ta tuta nana naya'itoto 'evivi 'inega 'wafina waiwaina. <sup>44</sup> Ita'a tomotau bwa'obwa'oya katoatoa ma 'wafida. Ta nawale kana 'aliga, 'inega ya'itoto 'evivi 'aligega ana tuta 'inaya 'wafida naveniboana. Mana ni'a kahalamania bwa'obwa'o 'wafina tauna eda toa bwa'obwa'oya weaqina. Ta nawale 'wafi vauvauna eda toa vataya mahalaya weaqina Yaubada naneida, ta ba'e 'wafi nana Niboana Gwalagwalana 'inega nayawaha 'evivi.

<sup>45</sup> \* Buki Nugwenugweina ena simana vonaya, "Oloto nugwenugweina ana wawa Adama Yaubada ena 'iva'ava'ata 'inega vetomotau mayawaina", ta Adama 'ebel'uova ana wawa Keliso, tauna yawai vataya ana tonei Niboana Gwalagwalana 'inega. <sup>46</sup> 'Wafida eda toa mahalaya weaqina ge kada madu'ewei, ta vonahaqiaqi 'wafida eda toa bwa'obwa'oya weaqina ka'ewa nugwetedi, ta 'abiboda 'wafida vauvauna mahala weaqina kana 'ewedi. <sup>47</sup> Yaubada 'oloto nugwenugweina Adama viaqia bwa'obwa'o fwayaqaunega, 'inega tauna totoa bwa'obwa'o. Ta 'esi Adama 'ebel'uova tauna mahalega mai. <sup>48</sup> Tomotau qabuda 'wafida eda toa bwa'obwa'oya weaqina 'idewani Adama 'wafina. Ta wese tuta maimai 'inaya 'wafida mahala ana toa weaqina kana 'ewea 'idewani Keliso 'wafina. <sup>49</sup> Tuta ba'e 'inaya ita'a totoa bwa'obwa'o 'wafida adi 'ita 'idewani Adama ana 'ita, mana tauna bwa'obwa'o 'olotona. Ta nawale tuta maimai 'inaya ada 'ita 'idewani mahala 'olotona tauna Keliso.

<sup>50</sup> Egwavo, yavona aqiaqiemi, ge ada fata 'wafi otaqida ma vei'ona ta wese ma sulalina kana luguyei Yaubada ena 'Ebeluvine 'inaya. Mana 'wafida nawale ina davula ta ina awala, 'inega ge ada fata kana luguyedi di'we 'ebetoa vataya 'inaya.

<sup>51</sup> \* \* Nuanuagu taha yani 'ebenuavoqana ena vona 'ifoqeyea 'imia Yaubada 'inega. Ovineneqa! Ita'a tovetumaqana qabuda ge kana 'aliga, ta 'esi nawale qabuda kana vedumaduma. <sup>52</sup> Ba'e yani nana na'ifoqe lukwayavonega, kavona be namala da'wai. Ta tuta nana 'inaya bea ana mu'e 'ebel'uova ina mu'ea. Mana tuta nana bea nana nadou 'inega tovetumaqana lova i'aligaya fusa dumadumana 'inega ina ya'itoto 'evivi. Ta 'abibodanaya ita'a mayawaida katoatoa 'wafida adi 'ita wese navedumaduma be yaqisa ge wese ana fata kana 'aliga. <sup>53</sup> \* Mana Yaubada ena nuanua 'inega 'wafida davudavulidi be 'ali'aligidi nagivedumedumedi eda toa vataya mahalaya weaqina, 'inega ge wese adi fata ina 'aliga.

<sup>54</sup> \* Ta tuta nana 'wafida 'ali'aligina ina vevauvau 'idewani 'wafi ge adi fata ina 'aliga 'evivi, e 'inega Yaubada ena vona ana aqiaqi na'ifoqe vonaya, "Yaubada 'aliga ena waiwai

vewaiwai va'inea ta luveawalia!"

<sup>55</sup> \* "Aliga, eu waiwai ma'inaya?"

\* 15:43: Fil 3:20-21 \* 15:45: Nug 2:7 \* 15:51: Md 24:31 \* 15:51: 1Te 4:15-17 \* 15:53: 2Kol 5:4 \* 15:54: Ais 25:8 \* 15:55: Ose 13:14

Ana 'ita ni'a awala.  
'Aliga, eu 'ebevedavi ma'inaya?

Ana 'ita ni'a awala!"

<sup>56</sup>\* Mana 'aliga ena waiwai ilivu luveifana 'inega maimai, ta ilivu luveifana ena waiwai Mosese ena luvine 'inega maimai. <sup>57</sup> Ta kana lukaiwa qiduana Yaubada 'inaya, mana Ieisu Keliso eda Kaiwabu ena waiwai 'inega 'aliga ena waiwai kavewaiwai va'inea.

<sup>58</sup> 'Inega egwavo, ona tovoloi'ita ta ge ona nidoa. Tuta qabuna me emi gwavubiga eda Kaiwabu ena fewa weaqina, mana ni'a oalamani aqiaqiea fewa nana eda Kaiwabu 'inaya ge wese yani kavokavovo, ta 'esi ma vuaqina.

## 16

### *Nei kavovo Yaubada ena tomotauyavo weaqidi*

<sup>1</sup>\* Tuta ba'e 'inaya nuanuagu ena vona 'evivemi emi vetala'ai mane ana nei kavovo weaqina Yaubada ena tomotauyavo 'abaga Ielusalema 'inaya itoatoa weaqidi. Ta omi'a nei kavovo nana ona viaqia 'idewani lova me Galetia yavonedi iviaqia. <sup>2</sup> Sabate 'aidega 'aidega tomotau taha taha ena mane ena fewa ana ve'ia 'inega taunega vaina naluluveaqea. 'Eguma taha toga mane qiduana ni'a 'eweae, e 'inega wese mane tufwana 'ala'ena'ina naluluveaqea. Ta 'eguma taha toga mane goyona lobeae, e 'inega mane tufwana goyona naluluveaqea. Ba'e 'idewani ona viaqa 'aiqa, 'inega ge taha nei kavovo kana viaqi tuta nana ena vavausimi, ta 'esi mane nonoqina ona neigu. <sup>3</sup> Ta emi 'ekalesia gamonaya taudi ma adi vetumaqana ona venua'ivinedi nei kavovo nana ina 'ewei ina tauyeva Ielusalema 'inaya. Ta ona ba'eba'eyegu ena wai 'imia, 'inega vaina leta ena 'wayavidi ina tauyedi. 'Inega me Ielusalema ina alamani aqiaqiea nei kavovo nana ana vefewa weaqina. <sup>4</sup> Ta 'eguma omi'a onuaia luaqiaqiegu be ya'a wese ena tauya Ielusalema 'inaya, e 'inega taudi maega ana tauya.

### *Faulo ena nuanua*

<sup>5</sup>\* Egu nuanua be ena vavausimi, ta nugweta ena tauya di'we Masidonia 'abaganavo 'idia sabi 'itadi, ta 'abiboda omi'a. <sup>6</sup>\* Ta egu toa ana liva omi'a maega ge eda alamani aqiaqiei, e 'inega ge agu fata ena simana weaqina 'imia. Ta ana 'ita nawale omi'a maega kana toatoa ta guga'u ana tuta nave'ale, e 'inega tufwana kana toa 'amana. Ta 'abiboda emi iula 'inega ona vetunegu ena tauya wese vaina 'abaga 'idia. <sup>7</sup> Ta ge nuagu vemaniniega vavausa nana ena viaqi ta lukwayavonega ena nogemi. Ta 'esi nuanuagu tuta kuena omi'a maega kana toatoa 'eguma eda Kaiwabu wese ena nuanua 'idewani. <sup>8</sup> 'Inega ba'idia 'abaga Efeso 'inaya ena toa ana laba Fenitikosi Sagalina nagumwala, ta 'abiboda ena wai sabi 'itami. <sup>9</sup>\* Ba'e 'abaga nana 'inaya ana fata be fewa qiduana ena viaqia Yaubada weaqina, mana me Efeso tufwana qabudi ni'a inuagivila ta Ieisu ivetumaqanea. Ta wese vaina agu aviayavo itoatoa, 'inega nuanuagu Ieisu Valena ena nei vatayedi.

<sup>10</sup>\* 'Eguma Timoti nawai 'imia e 'inega ona veilivu aqiaqiea ta ona 'amayabea, mana tauna wese eda Kaiwabu weaqina fewafewa 'idewani ya'a yafewafewa. <sup>11</sup>\* 'Inega ge taha toga 'imiega iada nana na'ita kavokavovoyei! Ta 'esi ona iulea ta me ena nuadaumwala ona vetunei na'evivi namai 'iguya, mana Timoti ta wese Ieisu ana to'abibodayavo vaina maega yaba'eba'eyedi. <sup>12</sup>\* Ta wese taida Afolosa weaqina ena vematamagilafuyemi. Ya'alakeikeiea dawai davavausimi vaina edavo iwaiwai maega. Ta 'itagana ge nuana nawai, ta 'eguma taha tuta 'inaya meaqana, e 'inega nawai.

### *Faulo ena vona 'ebeluo'ova*

\* 15:56: Lom 7:13    \* 16:1: Lom 15:25-26; 2Kol 8:1-9    \* 16:5: Via 19:21    \* 16:6: Lom 15:24    \* 16:9: Via 19:8-10; 2Kol 2:12    \* 16:10: 1Kol 4:17    \* 16:11: 1Tim 4:12    \* 16:12: 1Kol 3:6

<sup>13</sup> Egwavo, ona 'itamaki aqiaqiemi, ta emi vetumaqana 'inaya ona tovoloi'ita. Ta wese me emi giwalifatu be me emi waiwai ona toatoa. <sup>14</sup> Ta emi viaqa qabudi veyolubega ona viaviaqidi.

<sup>15-16</sup> \* Ni'a oalamaniana di'we Akaya 'inaya Setefano me ena susuyavo taudi imadunua-givila Keliso 'inaya. Ta ni'a iawafeledi Yaubada ena tomotauyavo adi iula weaqina. Egwavo, egu noqi waiwaina 'imia, ba'e taudi tomotau diavona ona awafelemi 'idia, ta wese ona awafelemi tomeqabu taudi maega ifewafewa Yaubada weaqina 'idia. <sup>17-18</sup> Yaqaiawa qiduana tuta nana Setefano be, Fotioneto ta wese Akaiko i'ifoqe 'iguya. Toi dina iluseanimi ta iulegu mana omi'a 'abagaya otoatoa. Ta wese niboanigu igiveqaiawea 'idewani omi'a igiveqaiawemi. Ba'e tomotau diavona luaqiaqiedi be 'awahaqiaqi ta wese 'amayaba ina lobe'a 'imiega edi fewa aqiaqidi weaqina.

<sup>19</sup> \* 'Ekalesia qabudi di'we Eisia 'inaya edi lukaiwa ivetunei waiwai 'imia. Iada Akwila ma moqanena Filisila ta wese vaina tovetumaqana maega ivava'auta tafwalolo weaqina edi vanuea. E taudi wese edi lukaiwa qiduana eda Kaiwabu ana wawega 'imia. <sup>20</sup> Ta wese edavo qabudi edi lukaiwa 'imia. Omi'a qabumi 'aidega 'aidega veyolubega ma emiavo ona lukaiwa venima sicutuyega.

<sup>21</sup> Ta wese ya'a Faulo egu lukaiwa 'imia, ta lukaiwa nana taugu nimaguyega ya'wayavia waiwai 'imia.

<sup>22</sup> \* 'Eguma taha toga eda Kaiwabu ge daveyolubei 'inega nawale Yaubada ena nualuveifa 'inega tomotau nana naluvemasabuya 'aiwe 'ala'alata 'inaya. Kaiwabu ye, nuanuama una mai!

<sup>23</sup> Nuanuagu eda Kaiwabu Iesu ena nuakolokolo 'imia na'eno'eno.

<sup>24</sup> Egu veyoluba qabumi 'imia Keliso Iesu ana wawega.

---

\* 16:15-16: 1Kol 1:16      \* 16:19: Via 18:2,18,26      \* 16:22: Gal 1:8-9; Ve 22:20

## Faulo ena leta vemagilafuna me Kolinita 'idia

### *Leta ana alamani weaqina*

Faulo ena leta vemagilafuna tufwana me ena nuavita 'wayavia me Kolinita 'idia. To'ekalesia vaidi Faulo igivenuavitea, mana ivonaya be tauna ge Yaubada ena tovale-tuyana aqiaqi. Ta wese tove'ita 'e'eu'au'avididi ilugu 'ekalesia nana 'inaya, e 'inega wese vona waiwaina neidi ma'oda ina vetumaqana 'aiqa. Tua ta wese ena qaiawa weaqidi 'wayavia 'idia, 'inega ba'e leta nana 'inaya edi veiaiana weaqina givesimatalia, ta wese vematamagilafuyedi ena vayausa 'idia weaqina. Ta wese Faulo venoqiedi nei kavovo ana a'u weaqina, mana ni'a iawafela be me Ielusalema ina iuledi edi toa vitana weaqina. Ta wese Faulo taunega ena toa vitana Ieisu Valena weaqina givesimatalia 'idia.

### *Leta gamona*

1:1-11 Vematamagilafu be lukaiwa ta wese venoqi

1:12-7:16 Faulo be Kolinita ana to'ekalesiayavo

8:1-9:15 Nei kavovo tovetumaqana di'we ludia 'inaya weaqidi

10:1-13:10 Faulo ana veyoveyova tovaletuyana 'idewani taunega vata'ita'iea

13:11-13 Vona 'ebeluo'ova

### *Faulo ena lukaiwa*

<sup>1</sup> Leta ba'e ya'a Faulo ta wese taida Timoti 'imega. Lova Yaubada tauna ena nuenuega venua'ivinegu 'inega yavetoaletuyana Ieisu Keliso weaqina. Ima'a leta nana a'wayavia waiwai omi'a 'ekalesia 'abaga qiduana Kolinita 'inaya otoatoa, ta wese Yaubada ena tomotauyavo gwalagwalami di'we Akaya 'inaya otoatoa.

<sup>2</sup> Nuanuagu Tamada Yaubada be wese eda Kaiwabu Ieisu Keliso edi nuakolokolo be edi nuadaumwala ina neimi.

### *Yaubada ena iula 'idaya*

<sup>3</sup> \* Eda Kaiwabu Ieisu Keliso Tamana Yaubada kana awatuboya. Tamada Yaubada tauna nuakolokolo 'iuna, ta wese tauna ada Toiula aqiaqi. <sup>4</sup> Tauna eda toa vitana qabudi 'idiega iuiuleda be 'inega ita'a wese ada fata edavo kana iuledi ba'e iula nana 'inega tuta nana taudi wese toa vitana ilobelobea. <sup>5</sup> \* Ta ona alamani aqiaqiea 'eguma Keliso weaqina yuvaqa kalobelobea, e 'inega wese Yaubada iula qidua va'inena naneida Keliso 'inega. <sup>6</sup> 'Inega tuta nana vita qiduana alobelobea, e 'inega nawale ana aqiaqina ta wese 'etoyavua Keliso 'inega ona lobeava vita diavona 'idiega. Mana Yaubada ena iula 'imaya 'inega ama fata vona iula ana neimi. E ba'e 'inega omi'a ami fata vita diavona ona bibitaqodi 'idewani ima'a abibitaqodi. <sup>7</sup> Omi'a be ima'a eda toa vitana 'aidegana kalobelobedi, 'inega ahalamani aqiaqiea omi'a wese iula nana 'aidegana ona lobeava 'idewani ima'a alobelobea Yaubada 'inega.

<sup>8</sup> \* Egwavo, nuanuagu be ona alamaniana lova vita qidua va'inena alobea tuta nana di'we Eisia 'inaya atoatoa. Ta vita diavona 'idiega avonaya be ge ama fata ana vewaiwai vai'nedi, ta 'esi kavonaya be ada 'aliga 'idiega. <sup>9</sup> Vonahaqiaqi, tuta goyona be ada 'aliga, ta ba'e toa vita nana 'ifoqe 'imaya yaqisa ge taumega ema waiwai ana vetumaqanei, ta 'esi Yaubada ena waiwai 'inaya ana vetumaqana, mana tauna ana fata be 'ali'aligidi nagiveya'itoto 'eviviedi. <sup>10</sup> \* Ta vonahaqiaqi, Yaubada 'etoyavuima veilaqe qidua otaqina 'inega. E 'inega ahalamani aqiaqiea wese tuta maimai 'idia 'idewani na'etoyavuima. <sup>11</sup> Ta omi'a ona iulema emi venoqi 'inega Yaubada 'inaya ima'a weaqima. E ba'e 'inega tomotau qabudi ina lukaiwa Yaubada 'inaya, mana ina alamani aqiaqiea Yaubada omi'a qabumi emi venoqiavo ni'a ve'iedi, e 'inega iula qiduana alobea.

### *Faulo ena nuanua givilea ena vayausa weaqina*

\* 1:3: Lom 15:5 \* 1:5: Same 34:19 \* 1:8: Via 19:23; 1Kol 15:32 \* 1:10: 2Tim 4:18

<sup>12</sup> Ima'a taumega agigivaneyema, mana ahalamani aqiaqiea ema ilivu be wese ema viaqayavo tomotau qabudi 'idia tunutunuqina Yaubada matanaya. Ta vonahaqiaqi, ema veiaiana omi'a maega tuta qabuna tunutunuqa otaqina ta ge wese ada u'avemi nage ada veilivu veifemi. Yani qabuna aviaqidi Yaubada ena nuakolokolo 'inega, ta gebu totoa bwa'obwa'o edi alamani 'inega. <sup>13-14</sup>\* Ema letayavo 'imia simasimatalidi ta vona diavona adi alamani meaqadi, 'inega ema 'wayavi qabuna ami fata be ona alamani aqiaqiedi. Lova nuami ge da'eqa'uya ema viaqayavo vaidi weaqidi, ta ana 'ita wese ba'itagana nawale ge oda alamani aqiaqiema. Ta nuanuagu qiduana nuami na'eqa'uya 'inega nawale Iesu ena 'evivi mai ana 'aubena 'inaya ona vonavane ima'a weaqima, 'idewani wese ima'a ana vonavane omi'a weaqimi 'aubena nana 'inaya.

<sup>15</sup> Ba'e yani diavona yaveveqaeyedi ni'a oalamanidi, 'inega yavonaya be eda wai eda vyausimi, mana nuanuagu be tuta magilafuna 'idia eda giveqaiawemi. <sup>16</sup>\* Mana lova egu tauya di'we Masidonia weaqina vonigo eda vyausimi tauya nana nuaninaya, ta wese yavonaya be eda vyausa 'evivemi egu tauya di'we Iudia 'inaya. Ta ba'e vyausa nana 'idiega ami fata be oda iulegu egu 'eda weaqina. Ta ge eda wai.

<sup>17</sup> 'Inega nage taumiega ovetala'aiemi ovonaya, "Tola'ai weaqina Faulo ena nuanua givilea be 'inega ge damai sabi vyausima?" Nage ovonaya be taugu egu nuanua ge eda alamani aqiaqiei? Ta wese nage ovonaya be ya'a kavona bwa'obwa'o ana ilivu ana to'abiboda taha, mana bwa'obwa'o ana tomtauyavo iawafela be ivonaya, "Ao", ta edi nuenuaga inoga be ivonaya, "Gebu." <sup>18</sup> Yaubada ena vona tuta qabuna vonahaqiaqi, ta ya'a wese egu vona qabuna vonahaqiaqi. 'Inega 'eguma ya'a ena vona "Ao", e 'inega vona nana wese vonahaqiaqi, <sup>19</sup>\* mana Yaubada Natuna Iesu Keliso ge taha tuta "Ao" da'inanea ta 'abibodanaya ena nuanua dagivilei be davonaya "Gebu." E ba'e Iesu nana weaqina ya'a Faulo, be Timoti ta wese Sailasa ni'a alugaihiea 'imia. Mana ba'e Iesu nana 'inaya vonahaqiaqi namo 'eno'eno. <sup>20</sup>\* Vonahaqiaqi, Yaubada ena vona fofofolayavo qabudi adi aqiaqi ni'a give'ifoqeyedi Natuna 'inega. Ta ba'e 'inega Keliso ana wawa 'inega kavonavonaya, "Ao, vonahaqiaqi, ema nuanua 'idewani!" tuta nana Yaubada kahawahawatuboya. <sup>21</sup> Kahalamani aqiaqiea omi'a be ima'a Yaubada ena nuanua 'inega ni'a kave'aidega Keliso maega, mana tauna ena nuanua 'inega venua'ivineda ena tomtauyavo 'idewani. <sup>22</sup>\* Ta Yaubada taunega ana 'ebe'inana ni'a a'uya giwalidaya, ta 'ebe'inana nana ana alamani Niboanina Gwalagwalana. Ta ba'e Niboani nana maduneida, 'inega kana alamani aqiaqiea be nawale wese yani qabuna aqiaqina naneida.

<sup>23</sup> Yaubada giwaligu qabuna alamani aqiaqiea, ta wese alahalamania ya'a tuta qabuna yavonavona aqiaqi. 'Inega ena vematamagilafuyemi tola'ai weaqina ge eda vyausimi. 'Iuna mana ge nuanuagu lugwae waiwaina eda neimi. <sup>24</sup>\* Ima'a ge nuanuama be ana luvinemi emi vetumaqana weaqina ma'oda ona vefewa 'aiqei, mana ni'a ahalamania omi'a emi vetumaqana 'inega otovolo'i'ita. Ta 'esi nuanuama omi'a maega kana fewa 'aidega, 'inega qaiawa qiduana ona lobe.

## 2

<sup>1</sup>\* 'Inega tauguyega yavonaya, "Ana 'ita ge ena tauya me Kolinita 'idia sabi vyausa 'eviviedi, mana ge nuanuagu wese ena givenuavitedi." <sup>2</sup> Mana 'eguma ya'a egu vyausa 'inega eda givenuavitemi, e 'inega omi'a ge ami fata be oda giveqaiawegu, waisa? <sup>3</sup> Lova egu leta 'inaya me egu nuavita ta wese ma mataelugu vona waiwaina yaneimi. Ta egu leta 'iuna, mana ge nuagu tauguyega eda wai be oda givenuavitegu egu vona waiwaina 'imia weaqina, mana omi'a luaqiaqiemi be ona giveqaiawegu. Ta yahalamani aqiaqiea 'eguma ya'a me egu qaiawa qiduana, e 'inega omi'a wese oqaiqaiawa. <sup>4</sup>\* Vonahaqiaqi, me egu

\* 1:13-14: 2Kol 5:12; Fil 2:16 \* 1:16: 1Kol 16:5-6 \* 1:19: Via 18:5 \* 1:20: Ve 3:14 \* 1:22: Efe 1:13-14; 2Kol 5:5 \* 1:24: 1Fit 5:3 \* 2:1: 1Kol 4:21 \* 2:4: Via 20:31

nuavita ta wese me egu dou lova leta nana ya'wayavia 'imia. Ta leta nana ge eda 'wayavi sabi givenuavitami, ta 'esi nuanuagu ona alamanian ya'a yaveveyolubemi qiduana.

*Taha* 'oloto ena luveifana ana nuataqo weaqina

<sup>5</sup> Lova taha 'oloto emi 'ekalesia gamonega luveifana viaqia. Ta yavona aqiaqiem 'oloto nana ena viaqa veifa 'inega qabumi givenuavitemi, ta wese ya'a tufwana lutionova nana 'ewegu. <sup>6</sup> Ta 'eala 'imiega emi nuanua 'aideganega ove'aidega ana luvine weaqina. Ta wese luvine nana ni'a ogive'ifoqeyea 'inaya, e 'inega yavonemi, ta'iwa, ge wese ona luvematasabu 'eviviei. <sup>7</sup> Ta 'esi ba'itagana ona nuataqoya ta wese ona vona iulea, mana 'eguma ge ona 'ewa 'eviviei 'ekalesia gamonaya nawale nanuavita qiduana 'inega ge ana fata be naveaqiaqi 'evivi. <sup>8</sup> 'Inega nuanuagu qiduana emi veyoluba qiduana ona ve'ita aqiaqiea 'oloto nana 'inaya.

<sup>9</sup> Vonahaqiaqi, lova leta nana 'inaya yavonemi 'oloto nana ana luvematasabu weaqina. Ta vona nana 'inega tufwana yasitonovimi, mana nuanuagu ena alamani aqiaqiea 'eguma egu vona qabuna nawale omatamatayagedi. <sup>10</sup> 'Inega 'eguma omi'a ena luveifana weaqina ona nuataqoya, e 'inega ya'a wese ena nuataqoya. Vonahaqiaqi, 'oloto nana luveifa nana wese viaqia 'iguya, ta ya'a wese ni'a yanuataqoya. Ta wese Keliso ni'a alamanian ya'a 'oloto nana ni'a yanuataqoya. Ba'e 'idewani yaviaqia omi'a ami iula weaqina, <sup>11</sup>\* mana 'eguma nuataqo ilivuna ge nuada kada viaqi 'ekalesia gamonaya, e 'inega nawale Seitani nalugu gamonaya, ta vita nana nakafia ta nagiveqiduea. Vonahaqiaqi, Seitani ena nuanua govaqa luveifadi weaqida ni'a kahalamanian.

*Faulo ena simana ena toa kukusana* 'abaga Tiloasi 'inaya weaqina

<sup>12</sup>\* Lova egu luvivila 'inaya Keliso Valena sabi lugaihina ya'ifoqe 'abaga Tiloasi 'inaya. Ta omo'e 'inaya eda Kaiwabu 'awa siwa'ea Vale nana ana lugaihi weaqina. <sup>13</sup>\* Ta ya'a gebu me egu nuadaumwala eda toatoa, mana 'abaga nana 'inaya taida Taitusi ge eda lobei. 'Inega me Tiloasi yalukafoiedi ta yatutuvila yatauya di'we Masidonia weaqina iada nana sabi salina.

*Yaubada ena tovaletuyanayavo givewaiwaiedi*

<sup>14</sup> Alulukaiwa Yaubada 'inaya, mana ema ve'aidega Keliso maega Yaubada tuta qabuna vavanugwetema ta gigivewaiwaiema Valena ana vedavi weaqina. Ta Keliso nana 'inega ema viaqayavo qabudi 'idia avewaiwai. Ta ma'inaya atautauya Yaubada vevefewema eda Kaiwabu Valena Aqiaqina ana yawala dadana weaqina, 'inega Vale nana kavona kemwata meilana aqiaqina tomotau ida yaoyaoqia. <sup>15-16</sup>\* Tomotau vaidi 'etoyavua ana 'eda 'inaya itautauya, ta wese vaidi veilaqe vataya ana 'eda 'inaya itautauya. Ima'a Keliso weaqina alulugaihi tomotau matadia, 'inega yawaima kavona bunama meilana aqiaqi otaqina ta Keliso vevegubayea Yaubada 'inaya. E ba'e 'inega ima'a kavona bunama meilana aqiaqi otaqina tomeqabu Vale nana i'awahaqiaqiea 'idia. Ta tomeqabu Vale nana inogenogea, e taudi 'idia ima'a kavona 'uluma meilana 'idewani. Vonahaqiaqi, 'eguma kana nuaia ge taha toga ana fata be lugaihi ana fewa naviaqa aqiaqiei, mana fewa vita otaqina. <sup>17</sup> Tomotau 'eala Yaubada ena vona ilulugaihiea, ta edi lugaihi 'iuna ge tomotau adi 'etoyavua weaqina, ta 'esi nuanuadi mane ina lobeia lugaihi nana 'inega. Ta ima'a ema ilivu gebu tou'ava diavona 'idewani, mana Yaubada ena vona alulugaihiea tomotau adi 'etoyavua weaqina, ta ge taha mali 'iuna weaqina. Ima'a ni'a ave'aidega Keliso maega, e 'inega yani qabuna aviaviaqidi ama Toluvetune Yaubada matanaya.

### 3

<sup>1</sup>\* Nage egu vona diavona adi noqola kavona ima'a tovaletuyana taumega ada givivaneyema? Ta gebu! Vonahaqiaqi, omi'a nuanuami vaidi tomotau leta ina miedi 'imia emi 'ebe'awahaqiaqi 'idia weaqina, ta wese nuanuami omi'a vaidi tomotau edi leta

\* 2:11: Lk 22:31 \* 2:12: Via 14:27; 1Kol 16:9 \* 2:13: Via 20:1 \* 2:15-16: Lk 2:34; 2Kol 3:5-6 \* 3:1: 2Kol 5:12; Via 18:27

ona 'wayavidi edi 'ebe'awahaqiaqi weaqina. Ta ima'a tovaletuyana ge daluaqiaqiema be taha leta ana neimi emi 'ebe'awahaqiaqi 'imaya weaqina. <sup>2\*</sup> Ta 'esi omi'a tovetumaqana taumina kavona ema leta 'waya'wayavina giwalimaya, mana me Kolinita qabudi i'ite'itemi, e 'inega ema fewa aqiaqina nuanimia ialamani aqiaqiea. <sup>3\*</sup> Vonahaqiaqi, omi'a taumiega oveve'itayemi kavona taha leta 'waya'wayavina Keliso 'inega, ta ima'a a'iva'ava'aia. Ta ba'e 'wayavi nana ge da'ifoqe 'ebe'wayavi 'inega, ta 'esi Yaubada mayawaina Niboanina 'inega. Ta wese 'wayavi nana ge da'ifoqe dabo beabeana 'inaya, ta 'esi tomotau giwalidia.

<sup>4</sup> Yani qabuna weaqina ni'a avonemi, ta ahalamani aqiaqiea vona diavona vonahaqiaqi, mana ema vetumaqana qiduana ni'a aha'uya Yaubada 'inaya Keliso ena viaqayavo 'idiega. <sup>5</sup> Ta ima'a ge ada vonavona vonigo tauma ema waiwai 'inega yani 'eno'eno vatayadi ada viaqidi. Ta vonahaqiaqi, yani diavona aviaviaqidi, mana ema waiwai Yaubada 'inega a'ewe'ewe. <sup>6\*</sup> Tauna ena nuenuega givewaiwaiema be 'inega ama fata ana vetofewa ena luvine vauvauna weaqina tomotau 'idia. Ba'e luvine nana gebu Mosese ena luvine 'waya'wayavidi 'idewani, ta 'esi Yaubada Niboanina 'inega. Mana luvine nugwenugweina ana 'ebelu'ovoa 'aliga, ta 'esi Yaubada yawai vataya ni'a neida Niboanina 'inega ena luvine vauvauna 'inaya.

*Luvine vauvauna ena simatala waiwai otaqina*

<sup>7\*</sup> Luvine nugwenugweina ana luvineavo Yaubada 'wayavidi dabo beabeadi 'idia. Ta omo'e luvine nana 'inega tomotau 'aliga ilobe. Vonahaqiaqi, tuta nana Mosese luvine diavona 'ewedi, e 'inega simatala waiwaina 'ifoqe 'inaya. Ta me Isileli ge adi fata be Mosese 'iawana ina 'itei, mana Yaubada ena simatala waiwaina Mosese 'iawana 'afwalia. Tuta goyona 'inaya be simatala nana nahawala, ta tua me Isileli nawale 'iawana ge adi fata be ina 'itei. <sup>8</sup> E ba'e 'inega kana alamani aqiaqiea tuta nana Niboana Gwalagwalana yawai vataya luvine vauvauna 'inega neineida, e 'inega wese simatala waiwai otaqina 'ifo'ifoqe. <sup>9\*</sup> 'Eguma luvine nugwenugweina simasimatalina, ta tua 'aliga miea. E 'inega kana alamani aqiaqiea luvine vauvauna ena simatala simasimatala otaqina, mana ba'e luvine nana 'inega ni'a kavetunutunuqa Yaubada matanaya. <sup>10</sup> Vonahaqiaqi, 'eguma luvine magilafudina edi simatala kana giveleleqedi 'inega kana alamania luvine nugwenugweina ena simatala ge 'idewani luvine vauvauna ena simatala, mana luvine vauvauna ena simatala simasimatala otaqina. <sup>11</sup> 'Eguma luvine nugwenugweina simasimatalina, ta tua Yaubada a'usi'iea mana awahawalina, e 'inega kana alamani aqiaqiea luvine vauvauna ena simatala simasimatala otaqina, mana tauna ge ena awalamo.

<sup>12</sup> Luvine vauvauna ena simatala na'eno vataya, 'inega me ema giwalifatu Yaubada ena vona alulugaihiea. <sup>13\*</sup> Ima'a ge Mosese 'idewani, mana tuta nana luvine 'ewedi 'inega 'iawana simatala, ta taunega 'iawana 'afwalia be yaqisa me Isileli ge adi fata be simatala nana ena vegoyo ina 'itei. <sup>14</sup> Ta me Isileli nuadi 'eluatufa, ta wese ba'itagana 'idewani tuta nana luvine nugwenugweina iavoavoya. Kavona be 'afwala nana nuadi da'afwali 'inega nuadi nawale ge da'eqa'uya ta ge adi fata be Yaubada ena vonahaqiaqi ina alamania. Ta ba'e 'afwala nana ge taunega ana fata be na'ewa yavulei, ta 'esi vetumaqana Keliso namo 'inaya 'inega ana fata na'ewa yavulea. <sup>15</sup> Vonahaqiaqi, ba'itagana wese 'idewani tuta nana Mosese ena 'wayaviavo iavoavoya, 'inega kavona 'afwala nana giwalidi nawale 'afwa'afwalia, 'inega nuadi nawale ge da'eqa'uya.

<sup>16\*</sup> Ta 'eguma taha toga nanuagivila be eda Kaiwabu navetumaqanea, e 'inega Yaubada 'afwala nana na'ewa yavulea. <sup>17\*</sup> Vonahaqiaqi, eda Kaiwabu tauna Niboana, ta ma'inaya Kaiwabu Niboanina toatoa, e omo'e 'inaya wese toa yavuyavuina 'eno'eno. <sup>18</sup> 'Inega ita'a tovetumaqana qabuda 'afwala nana ni'a awala 'idega, 'inega eda Kaiwabu ena simatala

\* 3:2: 1Kol 9:2 \* 3:3: 'Ifo 24:12; Iel 31:33; Isi 36:26-27 \* 3:6: Iel 31:31; 1Kol 11:25; Ion 6:63 \* 3:7: 'Ifo 34:29 \* 3:9: Luvine 27:26; Lom 1:17 \* 3:13: 'Ifo 34:33 \* 3:16: 'Ifo 34:34 \* 3:17: Ion 8:36; Lom 8:2

aqiaqi otaqina ni'a ka'itea ta wese kahalamani aqiaqiea. Niboana Gwalagwalana 'idaya toatoa, ta tuta qabuna gigive'evaunida be yaqisa eda Kaiwabu ena simatala 'inega ita'a wese kana simatala, ta ba'e simatala nana tuta qabuna naveve'ena'i 'imia.

## 4

*Yani kaikaiwabuna* 'ulena gamonaya

<sup>1</sup> Yaubada ena nuakolokolo 'inega ba'e fewa nana neima, e 'inega ge wese ada lua'u fewa nana ana viaqa weaqina. <sup>2</sup>\* Ta 'esi ima'a viaqa 'wai'waividi be 'ebeiniyauyau adi viaqa ni'a anogedi. Ta wese tomotau ge ada u'avedi ema fewa 'inega, ta ge taha tuta Yaubada ena vona ada givedumedumea. Yaubada ni'a alamania ima'a ema vona tomotau 'idia tuta qabuna vonahaqiaqi. E ba'e 'inega tomotau ina alamani aqiaqiea ima'a ma ama vetumaqana. <sup>3</sup> Vaidi tomotau ivonaya be Vale nana alulugaihiea 'idia 'wai'waivina ta ana alamani vitana. Ta 'eguma taha toga ba'e 'idewani nuanua 'aiqa, e 'inega tauna kavona luluve'waivina ta 'aliga ana 'eda 'inaya tautauya. <sup>4</sup>\* Seitani tauna bwa'obwa'o ana yaubada luveifana, ta tomeqabu ge ida vetumaqana nuadi 'egiveatufidi, 'inega ge adi fata be Vale simasimalatina ena simatala ina 'itei. Ta ba'e Vale nana ena simatala tauna Keliso ena simatala qiduana simasimalatina. Ta Keliso nana tauna Yaubada ana ma'ama'ayau.

<sup>5</sup> 'Inega ima'a ge taumega weaqima ada lulugaihi, ta 'esi Iesu Keliso weaqina alulugaihiea tomotau 'idia, ta avonevonedu vonigo tauna Kaiwabu. Ta wese avonevonedu ima'a avetofewa 'imia, ta ema vetofewa 'iuna, mana Keliso yani aqiaqi otaqidi maduviaqia 'imaya. <sup>6</sup>\* Lova Yaubada vonaya, "Simatala, velovelovana qiduana gamonega una simatala!" Ta Yaubada ba'e simatala nana a'uya giwalidaya 'inega nuada giqa'uya, ta ba'e 'inega ni'a kalamania Yaubada ena simatala aqiaqi otaqina kana 'itea Iesu Keliso 'iawana 'inaya.

<sup>7</sup>\* Ba'e yani nana ni'a aveqaeyea 'imia yani aqiaqi otaqina weaqima, kavona yani kaikaiwabuna. Ta ba'e kaikaiwabu nana 'eno'eno 'ulena gamonaya. Ta ba'e 'ulena nana ima'a weaqima vonavona. Ta ba'e 'inega tomotau ina alamania ima'a ema waiwai ge 'imega da'ifoqe, ta 'esi Yaubada 'inega. <sup>8</sup>\* Ima'a tuta qabuna vita taha taha alobelobedi, ta vita diavona ge adi fata be ina givebe'uyema. Ta wese vaina tuta nuama voqana ma'oda ana viaqa 'aiqa ema fewa 'inaya, ta tua Yaubada ena fewa ge ada lua'uya. <sup>9</sup> Keliso ana aviayavo tuta qabuna ivevevoalanema, ta Yaubada ge taha tuta danogema. Ta wese ivunuvunuqa veiveifema, ta ge adi fata ina luve'aligima. <sup>10</sup>\* Ba'e vita diavona 'idiega Iesu ena veilaqe visiqina ima'a wese 'wafima 'inaya avevebaea tauna 'idewani, e ba'e 'inega Iesu ena toa ma'ama'ayauna tomotau adi fata ina 'itea 'imega. Ima'a vita diavona abibitaqodi, mana nuanuama Iesu yawaina ana ve'ita 'ifoqeyea tomotau 'idia.

<sup>11</sup>\* Vonahaqiaqi, tuta qabuna 'aliga vadi'wedi'wema ema vetofewa Iesu 'inaya weaqina. E ba'e 'inega Iesu yawaina be ena toa tomotau ina 'itea 'wafima dawalilidi be 'ali'aligidi 'idiega. <sup>12</sup> Egwavo, vonahaqiaqi, ima'a a'ali'aliga 'waqi, ta ba'e 'inega omi'a yawai vataya ni'a olobea.

<sup>13</sup>\* Ima'a tuta qabuna alulugaihi, ta ema vetumaqana 'idewani Same ana to'wayavi ena vetumaqana, ta tauna vonaya, "Ya'a Yaubada yavetumaqanea, 'inegana yasimasimana."

<sup>14</sup>\* Lova Yaubada eda Kaiwabu Iesu giveya'itotoya 'aligega, ta ni'a ahalamani aqiaqiea ba'e Yaubada nana ima'a omi'a maega wese nagiveya'itoto 'evivieda 'aligega, 'inega na'ebe'eweda natauyeda Iesu 'iawanaya. <sup>15</sup> Ta ba'e vita diavona alobelobedi abibitaqodi omi'a emi veaqiaqi weaqina, be yaqisa tomotau qabudi Yaubada ena nuakolokolo ina alamani aqiaqiea. Ta ba'e 'inega tomotau diavona ina lukaiwa Yaubada 'inaya, ta wese ana awatubo 'idiega nave'ena'i.

\* 4:2: 2Kol 2:17; 1Te 2:5      \* 4:4: Efe 2:2; Kol 1:15; Ibe 1:3      \* 4:6: Nug 1:3; Ais 9:2; 2Kol 3:18      \* 4:7: 2Kol 5:1  
\* 4:8: 2Kol 1:8; 7:5      \* 4:10: 1Kol 15:31      \* 4:11: Lom 8:36      \* 4:13: Same 116:10      \* 4:14: 1Kol 6:14



<sup>16</sup>\* 'Inega ema fewa Keliso weaqina ge ada lua'uya. Vonahaqiaqi, vita diavona 'wafima tuta qabuna gigivedawalilidi, ta 'esi 'aubena 'aidega 'aidega 'idia avevevauvau niboanima 'inaya. <sup>17</sup>\* 'Eguma eda toa vitana kana giveleleqea tuta maimai maega, e 'inega kavona vita diavona ba'idia bwa'obwa'oya yani goyona, mana nawale tuta maimai 'idia ba'e vita diavona 'idiega kana lugu di'we 'ebeqaiawa vataya 'inaya. <sup>18</sup>\* 'Inega vita diavona ba'itagana kalobelobedi ge ada nuanua qiduana weaqidi, ta 'esi alulu'ita vane yani 'eno'eno vatayadi ge adi 'itamo weaqidi. Mana vita diavona ba'itagana kalulutonovidi tuta goyona ina awala, ta 'esi tuta maimai 'inaya qaiawa vataya ge ena awalama kana lobe.

## 5

'Wafi vauvauna weaqina

<sup>1</sup>\* Ita'a ba'idia bwa'obwa'oya katoatoa ma 'wafida, ta 'wafi diavona kavona didi. 'Inega 'aliga ana tuta 'inaya 'wafida ina awala, ta nawale tuta maimai mahala 'inaya vanue vauvauna 'inaya kana toa. Ta vanue nana tauna 'wafida 'eno'eno vatayana ge tomotau nimadiege ida viaqi, ta 'esi Yaubada taunega 'iva'ava'aia weaqida. <sup>2</sup>\* Ta eda didi diavona weaqidi kavesiniqaiqai, 'inega kalulu'ita vane eda vanue 'eno'eno vatayana mahalaya weaqina. <sup>3</sup> Ba'e vanue diavona 'idiega Yaubada naveaqeda. 'Inega ita'a niboanida ge wese 'wafi geqana natoatoa mahalaya. <sup>4</sup> Tuta nana ba'idia bwa'obwa'oya katoatoa 'inega kavesiniqaiqai 'wafida 'ali'aligidi weaqidi. Ta ge nuanuada kana 'aliga be kana ve'wafi geqa, ta 'esi vesiniqaiqai nana 'iuna mana nuanuada 'wafi vauvauna 'inaya kana lugu, e 'inega 'wafida 'ali'aligidi kana nogedi 'wafi 'eno'eno vatayadi adi 'ewa weaqina. <sup>5</sup> Vonahaqiaqi, Yaubada taunega ni'a 'iva'ava'aida ba'e vea'ugivila nana weaqina. Ta ma'oda 'inega kana alamani aqiaqiei ba'e yani nana na'ifoqe 'idaya? Egwavo, kana alamani aqiaqiea mana Yaubada Niboana Gwalagwalana maduneida. Ta 'eguma Niboanina ni'a neida, e 'inega nawale wese 'wafi vauvauna naneida.

<sup>6</sup>\* Vonahaqiaqi, ita'a bwa'obwa'o 'wafina 'inaya katoatoa, 'inega wese katoa luluwai eda Kaiwabu 'inega ta ge kada 'itea. <sup>7</sup> 'Inega 'ita ge yani qiduana 'idaya, ta 'esi vetumaqana yani qiduana 'idaya eda toatoa bwa'obwa'oya weaqina. <sup>8</sup>\* Vonahaqiaqi, ni'a kahalamani aqiaqiea tuta maimai 'inaya 'wafi vauvauna kana 'ewedi, 'inega nuanuada qiduana be bwa'obwa'o 'wafinavo 'idiega kana dena, mana 'eguma ba'e 'wafi nana kana nokea, e 'inega kana toa eda Kaiwabu maega ena 'abaga 'inaya. <sup>9</sup>\* Ta ge taha tola'ai 'eguma ba'idia bwa'obwa'oya katoatoa, nage 'wafi vauvauna ni'a ka'ewea be mahalaya katoatoa eda Kaiwabu maega. Ta 'esi yani qiduana tuta qabuna tauna kana giveqaiwea, <sup>10</sup>\* mana qabuda nawale kana tovolu Keliso matanaya be naluvineda. 'Inega ita'a 'aidega 'aidega luvine kana 'ewea bwa'obwa'o 'wafina ana viaqa 'inega. E 'inega nave'ieda eda viaqa aqiaqidi weaqidi, ta wese eda viaqa luveifana weaqidi.

*Tomotau kana miedi Yaubada* 'inaya be maega ina veiana 'evivi

<sup>11</sup> Ima'a Kaiwabu a'amayabea, 'inega avevetafe'wa waiwai tomotau nuadi sabi givilana be ina vetumaqanea. Yaubada giwalima be wese ema nuanua qabuna alamani aqiaqiedi, ta yanuaia omi'a wese giwalimiega oalamani aqiaqiema. <sup>12</sup> Ge nuanuama be taumega ana givaneqema, ta 'esi nuanuama omi'a ona vonavane weaqima be yaqisa ami fata tomeqabu ivonavane bwa'obwa'o ana alamani weaqina ona ve'iedi. Ba'e tomotau diavona ivonavona vane tomotau adi 'ita weaqina, ta ge ida nuanua tola'ai 'eno'eno tomotau giwalidia. <sup>13</sup> Vaidi tomotau ivonaya be ima'a tovekwavakwava. Ta ge ada nuanua qiduana edi 'awaluveifa weaqina, mana yani qabuna aviaviaqidi e ba'e Yaubada weaqina aviaqia. Ta 'eguma ima'a ge kwavakwavama, e 'inega omi'a ami iula weaqina. <sup>14</sup> Keliso ena veyoluba qiduana tomotau weaqida nuama 'ewea, ta ba'e veyoluba nana

\* 4:16: Efe 3:16 \* 4:17: Lom 8:17-18 \* 4:18: Kol 1:16 \* 5:1: 2Kol 4:7 \* 5:2: Lom 8:23 \* 5:6: Ibe 11:13-16 \* 5:8: Fil 1:23 \* 5:9: Kol 1:10; 1Te 4:1 \* 5:10: Tolug 12:14

'abi'abiluvinema. Mana ni'a ahalamania tauna ana 'aidega tomotau qabuda weaqida 'aliga, 'inega ita'a qabuda wese kavona kada 'aliga tauna maega. <sup>15</sup>\* Vonahaqiaqi, tauna tomotau qabuda weaqida 'aliga be yaqisa tomeqabu yawai vauvauna i'ewe'ewea ge taudi adi giveqaiawa weaqina ina toatoa, ta 'esi edi toa 'inaya Keliso ina giveqaiawea, mana Keliso nana 'aliga, ta 'abibodanaya wese Yaubada giveya'itoto 'eviviea weaqidi.

<sup>16</sup> Lova tuta nana Keliso nawale ge eda vetumaqanei 'inega yavonaya be tauna tomotau kavokavovo kavona totoa bwa'obwa'o taha 'idewani. Ta ba'itagana ge wese 'idewani eda nuanua 'aiqa Keliso weaqina. 'Inega ba'itagana ge wese 'idewani ada nuanua 'aiqa tomotau weaqidi kavona totoa bwa'obwa'o inuanua 'aiqa tomotau weaqidi. <sup>17</sup>\* 'Inega 'eguma taha toga Keliso maega ni'a ive'aidega, e 'inega tomotau nana ni'a vevauvau 'evivi. Tauna ena toa nugwenugweidi ni'a awala, ta 'esi ilivu vauvauna be wese nuanua vauvauna ni'a i'ifoqe 'inaya.

<sup>18</sup>\* Ba'e vevauvau nana Yaubada 'inega 'ifoqe. Tauna veiana 'evivieda Keliso ena viaqa 'inega. Ta 'inega taha fewa Yaubada ni'a neima, ta fewa nana ana alamani ba'e: Tomotau ana miedi 'inaya be maega ina veiaiana 'evivi. <sup>19</sup>\* Mana Yaubada Keliso ena viaqa 'inega totoa bwa'obwa'o qabuda veiana 'evivieda tauna maega. 'Inega ba'itagana eda luveifana qabuna Yaubada ge wese danuave'avinidi, ta 'esi ni'a nuataqodi. Ta Yaubada venua'ivinema be veiaiana 'evivi Valena ana lugaihiea tomotau 'idia. <sup>20</sup> Ima'a avetosimana Keliso weaqina, kavona be Yaubada taunega 'imega davonavona tomotau 'imia. 'Inega Keliso ana wawa 'inega avevenoqiemi omi'a Yaubada maega ona veiaiana 'evivi! <sup>21</sup>\* Vonahaqiaqi, Keliso ge taha tuta luveifana daviaqia. Ta tua Yaubada Keliso nana ve'ewea kavona toluveifana taha 'idewani, e 'inega 'aliga lobeia ita'a eda luveifana weaqidi. Ta Keliso nana ena viaqa nana 'inega ni'a kavetunutuquqa Yaubada matanaya.

## 6

<sup>1</sup> Ima'a afewafewa Yaubada maega, 'inega avevenoqiemi waiwaina Yaubada ena nuakolokolo valena ge ona nogei. <sup>2</sup>\* Mana Yaubada Buki Nugwenugweina 'inaya vonaya, "Egu wai sabi nuakolokolomi weaqina

ana tuta tauguyega yavenua'ivinea,  
ta 'aubena nana 'inaya emi noqi yanoqolia.

Ta wese 'aubeni nana 'inaya yawai ta yaiulemi ami 'etoyavua weaqina."

Vonahaqiaqi, ba'itagana Yaubada nuanuana naiulemi, mana ba'itagana 'etoyavua ana 'aubena!

### *Faulo vita taha taha lobedi*

<sup>3</sup> Ima'a tovaletuyana taumega a'itamaki aqiaqiema luveifana 'idiega ema toa be wese ema fewa 'idia. Mana ge nuanuama tomotau ina vetalabudabuda weaqima ta ina vonaya, "Ana 'ita Faulo 'elavidi taudi gebu leisu ena tovaletuyana aqiaqi, mana edi ilivu luveifana weaqina ni'a kanoqolia." <sup>4</sup> Vonahaqiaqi, ge aqiaqina 'eguma tomotau ina venuana magilafu ema viaqayavo weaqidi. Ta 'esi nuanuama qiduana tomotau ina 'itema ta ina 'awahaqiaqiema ima'a vonahaqiaqi Yaubada ena tofewayavo. 'Inega vita be, vevoalana ta wese nuavita qabudi abibitaqodi. <sup>5</sup>\* Ta vita diavona adi alamani ba'e: Tomotau ivunuvunuqima be, vanue 'ebeyoqona 'inaya ia'ua'uluguyema be, togamosoala qabudi ivevevoalanema. Ta wese ema fewa qiduana 'inega tuta goyona be ada tafefwai be, ge ada 'eno aqiaqi ta wese ma botanima. <sup>6</sup>\* Ima'a Yaubada ni'a 'awahaqiaqiema ema ilivu vunavunaqidi 'idiega, be wese 'awahaqiaqiema ema alamani Keliso Valena Aqiaqina weaqina. Ima'a voalamavo edi ilivu luveifana 'imaya 'idiega abibitaqoma, ta wese tomotau qabudi anuakolokoloyedi. Ima'a tuta qabuna Niboana Gwalagwalana ena iula 'inega afewafewa, ta wese tomotau qabudi aveveyolubedi. <sup>7</sup> Ta wese me

\* 5:15: Lom 14:7-8 \* 5:17: Lom 8:1; Gal 6:15 \* 5:18: Lom 5:10 \* 5:19: Lom 3:23-25 \* 5:21: Ibe 4:15

\* 6:2: Ais 49:8 \* 6:5: 2Kol 11:23-27 \* 6:6: 1Tim 4:12

ema gwavubiga vonahaqiaqi alulugaihiea. Ta tuta qabuna Yaubada ena waiwai 'inega afewafewa. Ima'a ema 'ebeluvia ema ilivu tunutunuqina, ta ilivu diavona 'idiega voalamavo atalatala'avudi ta wese 'idiega avabodebodema. <sup>8</sup> Ima'a tuta qabuna Yaubada weaqina afewafewa. Ta ge taha tola'ai 'eguma tomotau ina awatuboma nage ina 'awaluveifema, tua ta Yaubada weaqina afewafewa. Ta wese ge taha tola'ai 'eguma ina vegilema nage ina 'awahaqiaqiema. Ima'a tuta qabuna avonavona aqiaqi, ta taudi ivonaya be ima'a to'eu'au'ava. <sup>9</sup>\* Tomotau ni'a ialamani aqiaqiema, ta tua iveilivuyema kavona be ge ida alamanima. Ima'a 'aliga di'wenaya atoatoa, ta tua nawale mayawaima. Ta wese tomotau ivunuvunuqima ta tua ge ada 'aliga. <sup>10</sup> Ima'a 'ebenuavita tuta qabuna alobelobedi, ta tua nawale me ema qaiawa. Ima'a lukwalukwama, ta tua tomotau agivekaikaiwabuyedi. Ima'a ge ema kulufamo, ta tua Yaubada ena nuakolokolo 'inega yani aqiaqi otaqina ni'a alobea.

<sup>11</sup> Emavo me Kolinita ye, ima'a ema nuanua qabuna ni'a asimana 'ifoqeyedi 'imia, ta giwalimega aveveyolubemi qiduana. <sup>12</sup> Vonahaqiaqi, ima'a ema veyoluba 'imia ge ada lua'uuya, ta 'esi omi'a emi veyoluba 'imaya ni'a ogivelua'udi. <sup>13</sup>\* Nuanuagu ena vona 'imia kavona omi'a natugwavo. Ima'a giwalima qabuna ni'a aneimi, 'inega nuanuagu omi'a wese giwalimi ona neima. Vonahaqiaqi, giwalimi ge ona vegagaledi!

*Ge kana luvetuba taudi ge ida vetumaqana maega*

<sup>14</sup>\* Ge ona luvetuba taudi ge ida vetumaqana maega. Nage toveilivu aqiaqi be toveilivu veifa edi nuanua 'aidegana? Gebu! Ta wese 'idewani simatala be velovelovana ge ida ve'aidega, waisa? <sup>15</sup> Nage toadaumwala kana 'itea Keliso be Seitani nuanidia? Gebu! Ta wese 'idewani tovetumaqana be taudi ge ida vetumaqana edi ilivu be wese edi nuanua ge dave'aidega. <sup>16</sup>\* Ta wese ge ana fata be Yaubada otaqa be yaubada kavokavovo ina ve'aidega Vanue Gwalagwalana 'inaya. Nage ge oda alamania ita'a Yaubada mayawaina ena vanue gwalagwalana? Mana ba'e 'idewani Yaubada vonaya,

“Ya'a taudi maega ana toa,  
ta ena luyaba dadana nuanidia.

'Inega ya'a edi Yaubada,  
ta taudi egu tomotauyavo.

<sup>17</sup>\* 'Inega Kaiwabu vonemi omi'a  
ona 'ifoqe mai toveilivu veifa 'idiega  
ta ona vetoasi'iemi taudi 'idiega.

Ta edi kulufa luveifadi ge ona gitonovidi,  
ta wese edi ilivu bwavubwavuna  
ge ona viaqidi.

'Inega ena 'ebe'ewemi egu 'abaga 'inaya.

<sup>18</sup>\* E 'inega ya'a Tamami,  
ta omi'a natugwavo.

Ba'e 'idewani  
ya'a Kaiwabu Tovewaiwai yavonavona 'aiqa.”

7

<sup>1</sup> Egwavo, ba'e vona fofofola diavona Yaubada ni'a neida, 'inega luaqiaqieda be taudega kana givevunavunaqida yani qabuna bwavubwavudi 'idiega, mana yani diavona adi fata 'wafida be wese niboanida ina giveluveifedi. Ta wese kana vetafe'wa waiwai eda ilivu tunutunuqidi adi giveaqiaqi weaqina, mana ita'a Yaubada kamwaninivea 'inega ka'amayabea.

*Faulo ena qaiawa me Kolinita edi nuagivila weaqina*

\* 6:9: 2Kol 4:10 \* 6:13: 1Kol 4:14 \* 6:14: Efe 5:11 \* 6:16: 1Kol 3:16; Luvi 26:12 \* 6:17: Ais 52:11; Ve 18:4 \* 6:18: 2Sam 7:14; Iel 31:9

<sup>2</sup> Nuanuama qiduana giwalimi ona siwa'edi 'imaya. Ima'a ge taha toga 'imiega ada giveluveifei. Ge taha toga ada ve'ita veifei be datoasi'i ena vetumaqana 'inega, ta wese ge taha toga ada u'vei. <sup>3</sup> Egu vona diavona ba'e 'idiega ge nuanuagu ona 'wamomo, mana ni'a yavonemi omi'a tuta qabuna giwalimaya otoatoa. Vonahaqiaqi, ima'a aveveyolubemi qiduana, 'inega 'aliga ge ana fata navetoasi'iema 'imiega, ta wese ge taha yani eda toa bwa'obwa'oya ana fata be navetoasi'iema 'imiega. <sup>4</sup> Ya'a ge eda venuana magilafu emi vetumaqana Keliso 'inaya weaqina, ta wese omi'a weaqimi yavonavona vane tomotau 'idia. Omi'a tuta qabuna ogigivewaiwaiegu, ta wese egu toa vitana 'idiega ogigiveqaiawegu.

<sup>5</sup>\* Tuta nana alugu di'we Masidonia 'inaya, 'inega ge taha tuta ada veyawai, mana tuta qabuna vita taha taha alobedi. Ta mali tomotau maega ave'ae'aetoga, ta wese taumega amwaniniva. <sup>6</sup> Yaubada tauna tonuavita adi togivewaiwai. 'Inega Yaubada nana iagu Taitusi ena mai 'iguya 'inega giveqaiawegu ta wese givewaiwaiegu. <sup>7</sup> Vonahaqiaqi, Taitusi ena mai weaqina yaqaiawa, ta wese omi'a weaqimi yaqaiawa gegoyo, mana simana 'iguya emi iula 'inaya weaqina. Ta wese vonegu emi lututa egu vayausa weaqina be, emi nuagivila emi veilivu veifa 'iguya weaqina, ta wese emi nuave'avina waiwaina weaqigu, e 'inega egu qaiawa veqidua va'ine.

<sup>8</sup>\* Lova egu leta nugwenugweina 'inega yagivenuavitemi, 'inega agu lutonova luveifa ta ya'wamomo leta nana weaqina ta taugu yalugwaeyegu yavonaya, "Tola'ai weaqina leta nana yavetunei me Kolinita 'idia?" Ta 'abibodanaya ge eda nuanua 'evivi leta nana ana vetune weaqina. <sup>9</sup> Ta 'esi ba'itagana yaqaiqaiawa leta nana ana vetune weaqina. Ge eda qaiawa egu givenuavita 'imia weaqina, ta 'esi yaqaiqaiawa mana nuavita nana 'inega nuami 'eqa'uya ta 'inega onuagivila ta oveilivu aqiaqi. Yaubada ena nuanua be ba'e nuavita nana ona lutonovia, mana ilivu diavona oviaqidi ge aqiaqidi. 'Inega ge eda giveluveifemi leta nana 'inega, ta 'esi vona diavona 'idiega oveaqiaqi. <sup>10</sup>\* Vonahaqiaqi, nuavita wese yani aqiaqina, mana Yaubada ana fata nuavita nana navefewea eda nuagivila weaqina, ta nuagivila nana 'inega 'etoyavua ana 'eda kana salia. 'Inega ba'e nuavita nana weaqina ge daluaqiaqieda be kana 'awaluveifei. Ta 'esi ge aqiaqina 'eguma kana nuavita eda ilivu luveifadi weaqidi ta ge kana nuagivila, e 'inega eda vedeba 'i'wana vuaqina 'aliga.

<sup>11</sup> 'Inega o'itei, Yaubada awafelemi ba'e nuavita nana 'inaya, ta vuaqina yani aqiaqi otaqina weaqimi, mana tauna 'inega nuanuami qiduana Yaubada ona giveqaiawea emi ilivu 'idiega ta wese emi vona 'idiega. Ta wese nuavita nana 'inega taumiega ni'a ogivetunuqimi. Ta wese nuavita nana ve'itemi emi luveifana weaqina, e 'inega luveifa nana weaqina diami vilea. Ta wese nuavita nana 'inega mwaniniva olutonovia. Ta wese nuavita nana 'inega nuami 'eqa'uya ta 'inega vona ovetunea egu vayausa 'evivi 'imia weaqina. Ta wese nuavita nana 'inega ni'a o'awahaqiaqiegu ya'a emi tovaletuyana. Ta wese nuavita nana 'inega lova taha 'oloto ena luveifana weaqina ni'a oluvementasabuya. Ta ba'e viaqa diavona 'idiega ni'a ove'itegu omi'a yani qabuna aqiaqina oviaqia nuavita nana 'inega. <sup>12</sup> Lova egu leta nugwenugweina ge eda 'wayavia 'imia sabi veqae taha 'oloto ena luveifana weaqina, ta wese ge eda 'wayavia sabi vonami togama nuavita lobe'a 'oloto nana ena luveifana 'inega, ta 'esi egu 'wayavi 'iuna mana nuanuagu emi gwavubiga 'imaya Yaubada matanaya ona alamani aqiaqiea. <sup>13</sup> Ba'e gwavubiga nana 'inega waiwai ta wese qaiawa ni'a alobea.

Ta wese Taitusi ena qaiawa omi'a weaqimi ema qaiawa luvetomanea, mana vonema ma'oda o'ebe'ewea ta wese emi iula 'inaya weaqina vonema. Ta ba'e 'inega lutonova aqiaqi otaqina oneia. <sup>14</sup> Lova yavonavane Taitusi 'inaya weaqimi. Ta ena vayausa 'imia 'abibodanaya 'evivi mai 'iguya ta egu vonavane weaqimi 'awahaqiaqiea, mana yani qabuna ni'a yavonayea omi'a weaqimi taunega ni'a 'itedi 'imia. <sup>15</sup> 'Inega ba'itagana Taitusi veveyolubemi qiduana, ta 'ala'alalanuai emi 'amayaba 'inaya tuta nana o'ebe'ewa.

\* 7:5: 2Kol 2:13 \* 7:8: 2Kol 2:4 \* 7:10: Md 27:3-5; Ibe 12:16-17

Ta wese 'ala'alanuaiemi ma'oda ena ve'ita o'awahaqiaqiea ta omatayagea weaqina. <sup>16</sup> 'Inega yaqaiqaiawa qiduana weaqimi, mana yahalamani aqiaqiea omi'a emi viaqayavo qabudi ona viaqidi ilivu tunutunuqina 'inega.

## 8

*Tovetumaqana edi nei kavovo weaqina*

<sup>1</sup>\* Egwavo, nuanuagu ena vonemi ma'oda 'inega 'ekalesia taha taha di'we Masidonia gamonaya Yaubada ena nuakolokolo ive'itayea totafwalolo itoatoa 'abaga taha taha 'idia. <sup>2</sup> Vonahaqiaqi, taudi me Masidonia tuta vitana be wese vita taha taha ilobedi, ta wese lukwalukwadi, ta tua edi qaiawa qiduana 'inega nuanuadi mali tomotau ina iuledi. <sup>3-4</sup> 'Inega imai 'imaya ta ivenoqiema 'eguma ana fata be taudi wese edi nei kavovo ina viaqia Ielusalema ana tovetumaqanayavo weaqidi. Ta yavona aqiaqiemi, mataguyega ya'itedi edi nei kavovo qiduana adi fata 'inega iviaqia, ta wese ma ana luvetomana ia'uya. Ta ge taha toga ena luvine 'inega ba'e 'idewani ida viaqi, ta 'esi taudi edi nuenuega. <sup>5</sup> Vonahaqiaqi, nei kavovo qiduana ia'uya, ta wese nuama igivevoqania yani taha aqiaqi otaqina weaqina, mana nugweta taudiega iawafeledi eda Kaiwabu 'inaya ta wese ima'a 'imaya, mana nuanuadi Yaubada ena nuanua weaqidi ina alamaniana ta ina viaqia.

<sup>6</sup> Lova iada Taitusi wai 'imia ta ena ve'ita 'inega givewaiwaiemi emi nei kavovo weaqina. E 'inega Taitusi wese anoqiea avonaya, "Nuanuama o'a me Kolinita una vayausa 'eviviedi, ta una vona iuledi edi nei kavovo ana lu'ovoa weaqina." <sup>7</sup>\* Omi'a me Kolinita yani qabuna ami fata. Omi'a emi vetumaqana waiwaina, ta wese emi vonayavo aqiaqi otaqidi. Omi'a emi alamani qiduana, ta wese togwavubiga. Omi'a emi veyoluba agona 'imaya. 'Inega nuanuagu wese emi nuakolokolo 'inega ona vewaiwai emi nei kavovo ana viaqa 'inaya. <sup>8</sup> Egwavo, ni'a yavematamagilafuyemi di'we Masidonia ana 'ekalesiyavo weaqidi ma'oda inei kavovo 'aiqa. Ta ge eda luvine be omi'a wese 'idewani ona viaqia, ta 'eguma emi nuanua be ona nei kavovo aqiaqi 'idewani taudi, e 'inega ena alamani aqiaqiea omi'a emi veyoluba tomotau 'idia wese yani aqiaqi otaqina, ta ge u'ava.

<sup>9</sup>\* Omi'a eda Kaiwabu Iesu Keliso ena veyoluba be wese ena nuakolokolo qiduana ni'a oalamani aqiaqiea. Tauna tovekaikawaiwabu otaqa, ta tua omi'a weaqimi ena kaikawaiwabu nogea ta velukwalukwa. Ta ena velukwalukwa 'inega ni'a ovekaikawaiwabu.

<sup>10</sup> Egu nuanua omi'a nei kavovo nana ya'wala gumwala ni'a ove'alea e wese ona lu'ovoa. Mana omi'a ba'e nuanua nana ogivevi'oinia, ta omi'a wese 'ekalesia qabudi onugwetedi nei kavovo nana ana a'u 'inaya. <sup>11</sup> Vonahaqiaqi, mane nana ana lugwagwa weaqina me emi waiwai ta wese me emi qaiawa ove'alea. 'Inega wese emi waiwaiega nei kavovo nana ona lu'ovoa. Ta nuanuagu nei kavovo nana ona a'uya emi mane ana 'etofwafwa 'inega. <sup>12</sup>\* Ta ge ona nuafania 'eguma nuanuami qiduana ona nei kavovo tomotau sabi iuladi, e 'inega Yaubada ona giveqaiawea 'eguma mane oa'ua'uya ami fata 'inega. Vonahaqiaqi, Yaubada ge daluvine be mane qiduana ona a'uya 'eguma ge mane qiduana 'imia da'eno'eno, ta 'esi nuanuana tola'ai ni'a 'imia 'eno'eno e ami 'etofwafwa 'inega ona nei kavovo.

<sup>13-14</sup> Ta yahalahalamania ba'itagana omi'a mane qiduana 'imia, 'inega luaqiaqiemi be me Ielusalema ona iuledi. Ge eda vonavona vonigo emi mane qabuna ona nei kavovoyea be taumiega ona givevitemi emi toa 'inaya, ta 'esi nuanuagu iula nana 'inega toa aqiaqina ina lobeia omi'a emi toa 'idewani. 'Inega mali tuta 'inaya 'eguma omi'a toa vitana ona lobeia, e taudi wese adi fata be ina iula 'eviviemu. Ta ba'e 'inega taudi maega ona veiuula. <sup>15</sup>\* Ba'e yani nana weaqina Buki Nugwenugweina simana vonaya, "Tomeqabu 'abwaga qiduana ilugwagwea ge taha wese tufwa ida lobei, ta 'esi tomeqabu 'abwaga goyona ilugwagwea, e taudi ge ida botana."

*Taitusi ma enavo edi fewa*

\* 8:1: Lom 15:26; 2Kol 9:1-2 \* 8:7: 1Kol 16:1-2 \* 8:9: Md 8:20; Fil 2:6-7 \* 8:12: Mk 12:43-44 \* 8:15: 'Ifo 16:18

<sup>16</sup> Yalulukaiwa qiduana Yaubada 'inaya Taitusi weaqina, mana Yaubada iada nana ena qaiawa ta wese ena waiwai neia ami iula weaqina, 'idewani ya'a wese yaqaiqaiawa ta yanuanua weaqimi. <sup>17</sup> Ta ema venoqi Taitusi 'inaya ena vayasa 'evivi 'imia weaqina 'awahaqiaqiea. Vonahaqiaqi, taunega wese ena nuanua qiduana be navayausimi. <sup>18</sup> Taha wese 'oloto avevetunea Taitusi maega. Ba'e 'oloto nana wese taha tovetumaqana. Tauna lugaihi 'avana, ta ena lugaihi Iesu Valena weaqina 'ekalesia 'aidega 'aidega i'awahaqiaqiea. <sup>19</sup> Ta 'ekalesia qabudi 'oloto nana ivenua'ivinea be tauna maega ana tauya me Ielusalema 'idia nei kavovo nana sabi neidi. Ta ba'e viaqa nana 'inega eda Kaiwabu awatubo nalobea, ta wese viaqa nana 'inega ina alamani aqiaqiea ima'a nuanuama qiduana ana iuledi. <sup>20</sup> Ema vemata'weabu 'iuna mana ge nuanuama tomotau nei kavovo nana weaqina ina venuana magilafu nage ina ve'ewema. <sup>21</sup> Ta 'esi nuanuama eda Kaiwabu naqaiawa be wese na'awahaqiaqiema ema ilivu tunutunuqina mane ana 'itamaki weaqina, ta wese nuanuama tomotau ina 'awahaqiaqiema ba'e weaqina.

<sup>22</sup> Ni'a avonemi iada Taitusi be wese tolugaihi nana iwaiwai sabi vayausimi. Ta wese 'oloto taha vetoidi avetunea taudi maega iwaiwai 'imia. Tuta qabuna ena fewa be wese ena viaqa qabudi 'idiega taunega ve'itayea tauna togwavubiga aqiaqi, 'inega a'awahaqiaqiea. Tauna lova ena nuanua be omi'a me Kolinita naiulemi, ta ba'itagana ena nuanua ba'e weaqina veago va'ine, mana valem noqolia ta alamani aqiaqiea emi awafela weaqina. <sup>23</sup> Ta 'eguma vaidi tomotau ina vetala'aiemi Taitusi weaqina, e 'inega ona simana 'idia ya'a iada nana maega afewafewa 'aidega ami iula weaqina. Ta 'eguma wese ina vetala'aiemi magilafudina weaqidi, 'inega ona vonedi taudi 'ekalesia edi tovaletuyanayavo Iesu Valena weaqina. Ta edavo dina edi fewa 'inega Keliso awatubo nalobea <sup>24</sup> \* Ima'a 'ekalesia qabudi 'idia weaqimi avonavona vane emi ilivu aqiaqidi weaqina. 'Inega toi dina ona 'ebe'ewedi be ona veyoluba aqiaqiedi. Ta ba'e 'inega 'ekalesia qabudi ina alamani aqiaqiea ima'a ema vonavane weaqimi ge wese u'ava, ta 'esi vonahaqiaqi.

## 9

### *Me Kolinita edi nei kavovo me Ielusalema weaqidi*

<sup>1</sup> \* Ya'a ge daluaqiaqiegu be ena 'wayavi 'evivi 'imia emi nei kavovo Yaubada ena tomotauyavo 'abaga Ielusalema 'inaya weaqidi, <sup>2</sup> mana ni'a yahalamaniam omi'a nuanuami qiduana me Ielusalema ona iuledi. Ta omi'a weaqimi ni'a yavonavane me Masidonia 'idia ta yavonedi omi'a me Akaya emi nei kavovo ni'a o'iva'ava'aia ya'wala gumwala 'inaya. Ta wese yavonedi omi'a me emi waiwai ta wese me emi qaiawa nei kavovo nana ogivevi'oinia. Ta ba'e 'inega to'ekalesia Masidonia 'inaya ni'a ogivewaiwai ta wese ovenua'ewedi, e 'inega taudi wese ni'a ive'ale sabi iula. <sup>3</sup> 'Inega taidavo toi dina yavetunedi iwaiwai sabi 'itami, mana ni'a yavonavane weaqimi yavonedi omi'a ni'a o'iva'ava'ata ta oba'eba'e. 'Inega nuanuagu egu vonavane omi'a weaqimi vuaqina ina 'ita aqiaqiea, <sup>4</sup> mana ge ana 'ita aqiaqina 'eguma ya'a vaidi me Masidonia maega ana wai ta nei kavovo nana nawale ge ana 'iva'ava'aimo. Vonahaqiaqi, yani 'ebeiniyauyau 'iguya, ta wese yani 'ebeiniyauyau 'imia, mana ni'a yavonavane weaqimi. <sup>5</sup> E 'inega yanuanua be taidavo toi dina yavetune nugwetedi sabi 'itami, mana nuanuagu ena alamani aqiaqiea 'eguma emi vona fofofola mane nana weaqina ni'a o'iva'ava'aia. Ta nuanuagu veyolubega ona nei kavovo, ta gebu 'alakeikei 'inega.

<sup>6</sup> \* Ta ona nuave'avinia, 'eguma tonitalaqa vewana 'evisa namo nadaunia, e 'inega wese 'abwaga goyona nalobea. Ta 'eguma taha toga vewana qiduana nadaunia, e 'inega wese 'abwaga qiduana nalobea. <sup>7</sup> 'Inega omi'a 'aidega 'aidega taumi ona nuanua ma'oda ona nei kavovo 'aiqa. Ta mane nana ge ona a'u me emi nuavita nage lukei 'inega, ta 'esi qaiawega, mana togama qaiawega ena mane a'ua'uya, e ba'e tomotau nana Yaubada 'awa'awa aqiaqiea ena ilivu aqiaqina weaqina. <sup>8</sup> Ta Yaubada ana fata be yani taha taha

\* 8:24: 2Kol 7:13-14 \* 9:1: 2Kol 8:1-7 \* 9:6: Vos 11:24-25

naneimi emi toa weaqina, e 'inega omi'a ge taha yani 'inega ona kusa, ta 'esi tuta qabuna ami iula ma luvetomanina ona lobeia, e 'inega omi'a ami fata be iula qiduana ona a'uya viaqa aqiaqidi taha taha weaqidi. <sup>9\*</sup> 'Idewani Buki Nugwenugweina vonaya,

“Taha toga 'eguma nei kavovo agona  
lukwalukwadi neineidi,  
e tauna ena viaqa aqiaqi otaqina  
ba'e ge nahawala.”

<sup>10\*</sup> Yaubada tauna vewana tovaoga neineia, ta vewana nana 'inega 'abwaga 'ifoqe 'ai weaqina. Ta wese 'idewani Yaubada omi'a vewana qiduana naneimi ta ina ve'eala. 'Inega bolimana qidua va'inena Yaubada nalobeia emi ilivu aqiaqidi 'idiega.

<sup>11\*</sup> Vonahaqiaqi, Yaubada nagivekaikawabuyemi yani qabuna 'idiega emi toa 'inaya. Ta ba'e 'inega ami fata ona nei kavovo aqiaqi tuta nana vita taha taha i'ifo'ifoqe. Ta tuta nana emi nei kavovo ana tauyeya totoa vita 'idia 'inega ina lukaiwa qiduana Yaubada 'inaya. <sup>12</sup> 'Inega emi nei kavovo 'inega yani aqiaqina magilafudi kana 'itedi, e ba'e: Yaubada ena tomotauyavo tola'ai 'inega ikusa adi fata ina lobeia, ta wese edi qaiawa qiduana 'inega ina lukaiwa Yaubada 'inaya. <sup>13</sup> Emi viaqa aqiaqina 'idiega tomotau ina 'awahaqiaqiemi, mana ba'e 'inega emi vetumaqana ina 'itea ta ina alamani aqiaqiea ge yani kavokavovo ta 'esi vonahaqiaqi. 'Inega emi matayaga Iesu Valena weaqina be wese emi iula qiduana taudi 'idia weaqina ina lukaiwa Yaubada 'inaya. <sup>14</sup> 'Inega giwali otaqidiega ina venoqi weaqimi Yaubada 'inaya, mana ena nuakolokolo qidua va'inena ni'a neimi.

<sup>15</sup> Ta luaqiaqieda be kana lukaiwa Yaubada 'inaya, mana tauna Natuna nei kavovoyea 'idaya, ta ba'e nei kavovo nana ana maisa ge kana vona!

## 10

### *Faulo taunega vata'ita'iea*

<sup>1\*</sup> Egwavo, Keliso ena ilivu nuvana ta wese me ena nuawebui, 'inega ya'a tauguna wese ilivu diavona 'idiega yavenoqiemi egu vona ba'e leta nana 'inaya ona noqola aqiaqiedi. Ni'a yahalamania vaina 'imiega ovonaya, “Faulo ena letayavo 'idiega vona falafaladi 'inega vonavona 'idaya, ta 'eguma taunega namai 'idaya, e nawale namwaniniva.” <sup>2\*</sup> Ta nawale ena wai sabi vyausimi. 'Inega yavenoqiemi, ona awafelegu be me egu nuawebui ena wai kana toa. Ta 'eguma vaina 'imiega ona ve'ewema ona vonaya vonigo ima'a tovaletuyana ema viaqayavo aviaviaqidi kavona Yaubada ana tovefwage edi viaqa 'idewani, ta ge kavona tovetumaqana edi ilivu 'idewani. E 'inega vona waiwai 'idiega ena lugaihihi.

<sup>3</sup> Vonahaqiaqi, ima'a tovaletuyana wese bwa'obwa'oya atoatoa omi'a 'idewani. Ima'a avevedavi toluveifana maega, ta gebu totoa bwa'obwa'o edi nuanua 'inega be edi ilivu 'inega ada vevedavi. <sup>4\*</sup> Ima'a ge tomotau edi 'ebevedavi ada vefewedi ema vedavi 'inaya Seitani maega, ta 'esi ima'a Yaubada ena 'ebevedavi waiwai avevefewedi Seitani ena waiwai sabi bwega yavulina. <sup>5</sup> Ima'a Yaubada ena nuanua ahalamani aqiaqiea. Ta vaidi tomotau ba'e alamani nana weaqina ive'ae'aetoga ta taudi edi nuanua weaqina inuavane. Ta ima'a Yaubada ena 'ebevedavi 'inega ba'e tomotau diavona edi nuanuayavo luveifadi agivelua'udi, ta 'inega aveve'itedi be edi nuanua 'inaya Keliso namo ina matayagea. <sup>6</sup> Emi 'ekalesia gamonega tomotau koyadi ema ve'ita Keliso weaqina ni'a ivelumamatayagea ta i'awahaqiaqiea. Ta vaidi nawale ge Keliso ida matayagea, e 'inega tomotau diavona ana luvematasabudi.

<sup>7</sup> Omi'a tomotau adi 'ita 'inega oveveqaevedi. 'Inega vaina 'imiega ivonaya be taudi vonahaqiaqi Keliso ena tomotauyavo, ta ima'a gebu. Ta yavona aqiaqiemi, nuanuagu nuadi na'eqa'uya ta ina alamania ima'a wese Keliso ena tomotauyavo 'idewani taudi. <sup>8\*</sup>

\* 9:9: Same 112:9 \* 9:10: Ais 55:10 \* 9:11: 2Kol 1:11; 4:15 \* 10:1: 1Kol 2:3 \* 10:2: 1Kol 4:21 \* 10:4: Efe 6:13-17 \* 10:8: 2Kol 13:10

Ba'e egu vona diavona nage adi noqola kavona tufwana eda nuavane ima'a tovaletuyana ema 'abiluvine Keliso neima weaqina. Ta ba'e 'abiluvine nana neima sabi givewaiwaiemi, ta gebu sabi giwebuiemi. E 'inega ya'a ge eda 'wamomo egu vona diavona weaqidi.

<sup>9</sup> Ge ona vonaya be ya'a egu leta adi 'wayavi 'iuna vonigo nuanuagu ena givemwaninivemi, <sup>10</sup> mana vaidi tomotau ivonaya, "Ge kana nuanua Faulo weaqina. Tauna ena leta 'idiega vona waiwaidi neineida ta wese vona diavona 'idiega luviluvineda. Ta 'esi 'eguma taunega namai 'idaya, e 'inega kana 'itea ge ena waiwaimo be wese ena lugaihi ge ana aqiaqimo!" <sup>11</sup> Ta yavona aqiaqiemi, nuanuagu ba'e tomotau diavona ina alamani aqiaqiea tola'ai ilulutonovia ema leta 'inega, e ba'e lutionova nana ge wese navedumaduma 'eguma ima'a omi'a maega kana toatoa ta ana tovolu nuanidia sabi lugaihidi. Mana ema vona be wese ema ilivu ge davedumaduma ema leta 'idiega 'eguma omi'a maega kana toatoa.

<sup>12</sup> Ima'a ge nuanuama ana givелеleqema tonuavane maega, mana taudiega ivonaya be taudi adi 'aidega aqiaqi otaqidi, ta taudiega ma ediavo igiveleleqedi. Ta wese adi qabu gamonaya taudiega ma ediavo edi luvine ia'udi ta i'abi'abibodedi, ta ge ida nuanua mali tomotau edi luvine weaqidi. Ta ba'e viaqa diavona viaqa kwavakwava.

<sup>13</sup>\* Vonahaqiaqi, ima'a tovaletuyana wese anuanua vane, ta ge ama 'etofwafwa ema nuavane weaqina ada nogei. Ta 'esi Yaubada ena 'etofwafwa 'inega anuanua vane ema fewa nana neima weaqina. 'Inega ama fata ana nuavane, mana Yaubada nuanuana ba'e fewa nana ana viaqia wese omi'a weaqimi. <sup>14</sup> Ima'a ge ama fata be ada vonavane 'eguma lova ge ada wai 'imia sabi fewa. Ta vonahaqiaqi, ima'a tovaletuyana luluvaiega amaduwai 'imia ta Keliso Valena Aqiaqina aneimi. <sup>15</sup> Ima'a tauma ema fewa aqiaqina 'imia weaqina avonavona vane, ta ge ada vonavane mali tomotau edi fewa weaqina. Ta 'esi nuanuama qiduana emi vetumaqana nave'ena'i, ta wese nuanuama ema fewa nuanimia nave'ena'i, <sup>16</sup> be yaqisa ama fata emi di'we 'inega ana 'ifoqe be ana tauya sabi lugaihi mali di'we 'idia lova ge taha toga Vale Aqiaqina dalugaihiea 'idia, mana ge daluaqiaqiema be taumega ana givaneyema 'eguma taha toga Vale nana ni'a lugaihiea di'we nana 'inaya. <sup>17</sup>\* Ba'e yani nana weaqina Buki Nugwenugweina simana vonaya, "Eguma taha toga nuanuana nanuavane, e 'inega luaqiaqiea be eda Kaiwabu namo ena viaqayavo weaqidi nanuavane." <sup>18</sup>\* Tomotau edi nuavane taudimo weaqidi ge taha ana aqiaqimo, ta 'esi 'eguma eda Kaiwabu taha toga na'awahaqiaqiea, e 'inega tauna aqiaqi otaqina.

## 11

*Faulo ena vona tovaletuyana* 'e'eu'au'avidu weaqidi

<sup>1</sup> Egwavo, nage ovonaya be ya'a egu vona kavona be tovekwavakwava edi vona. 'Inega nuanuagu ona bibitaqomi, ta egu vona ba'e ona noqolia. <sup>2</sup>\* Ya'a me egu ve'ifi'ifi yatoatoa 'idewani Yaubada ena ve'ifi'ifi, mana omi'a 'ekalesia kavona taha iaba matayauyona ni'a yagabuinoqia taha 'oloto weaqina ta maega ina vaqi, ta ba'e 'oloto nana tauna Keliso. <sup>3</sup>\* Ba'e 'iuna 'inega giwaligu a'ala weaqimi, ta yanuaia nawale tove'ita luveifadi edi ve'ita 'inega emi awafela Keliso weaqina ona nogea, ta ona tauya gei 'idewani lova taha mwata Ibi u'avedi 'inega itauya gei. <sup>4</sup>\* Ana 'ita kavona omi'a tomotau edi ve'ita taha taha o'awahaqiaqiedi, waisa? Taudi ge ida lugaihi Iesu aqiaqi weaqina 'idewani ima'a ema lugaihi, ta 'esi mali Iesu weaqina ilulugaihi ta ovevetumaqanedi. Ta wese lova Niboana Gwalagwalana weaqina alugaihimi ta Yaubada 'inega o'ewea. Ta ba'itagana mali niboana o'awahaqiaqiea. Ta wese lova ema lugaihi Iesu Valena Aqiaqina weaqina onoqolia ta o'awahaqiaqiea, ta ba'itagana ana 'ita kavona mali vale ovevetumaqanea. <sup>5</sup>\* Taudiega igabedi tovaletuyana aqiaqi otaqidi, ta yanuaia taudi edi ve'ita be edi alamani 'idiega ge

\* 10:13: Lom 12:3    \* 10:17: Iel 9:24; 1Kol 1:31    \* 10:18: 1Kol 4:4    \* 11:2: Efe 5:26-27    \* 11:3: Nug 3:4,13  
\* 11:4: Gal 1:8-9    \* 11:5: 1Kol 15:10; 2Kol 12:11



ida veqidua va'inegu. <sup>6</sup>\* Ya'a lova ge eda sikulu veqae nage lugaihi weaqina, ta toyani weaqina yalulugaihi, e yani diavona yahalamani aqiaqiedi. Ta yanuaia omi'a wese ni'a oalamani aqiaqiea ya'a egu vonayavo vonahaqiaqi, mana ema ve'ita 'inega be wese ema viaqa taha taha 'idiega ni'a ave'ita 'ifoqeyedi 'imia.

<sup>7</sup>\* Lova yawai 'imia Iesu Valena ana lugaihi weaqina, ta gebu maisa nage 'abwaga 'imiega weaqina eda nuanua. Ta 'esi tauguyega yagiwebuiegu ta yavetofewa omi'a weaqimi, mana nuanuagu ena givaneqemi be yaqisa ona alamaniana omi'a yani qiduana. Ta ona nuaia nage luveifana yaviaqia ba'e viaqa nana 'inega, waisa? <sup>8</sup>\* 'Ekalesia taha taha edi nei kavovo 'iguya ya'awahaqiaqiea ta ya'ewea, ta mane nana yavefewea sabi iulami be yaqisa ge taha maisa weaqina eda venoqiemi. E ba'e 'inega kavonaya eda vanawala 'ekalesia diavona 'idiega. <sup>9</sup> Lova tuta nana ya'a omi'a maega katoatoa yani qabuna 'idiega yakusa, ta ge eda noqiemi iula weaqina. Ta 'esi iula yalobea taigwavo 'idiega tuta nana imai 'iguya di'we Masidonia 'inega. Vonahaqiaqi, lova ge taha tuta eda venoqiemi iula weaqina, ta wese ba'itagana nage tuta maimai 'idia ge wese ena venoqiemi iula weaqina. <sup>10</sup> Ya'a Keliso yahalamani aqiaqiea, mana ni'a maega ave'aidega. 'Inega yavona aqiaqiemi, ge taha toga di'we Akaya gamonega ana fata na'etobodegu egu nuavane ba'e yani diavona weaqidi. <sup>11</sup> Nage vaina 'imiega ovonaya, "Faulo ba'e 'idewani vona 'aiqa, mana ge daveyolubeda!" Ta yavona aqiaqiemi, Yaubada ni'a alamani aqiaqiea ya'a yaveveyoluba aqiaqiemi!

<sup>12</sup> Lova ge eda venoqiemi iula weaqina ta wese ba'itagana ge nuanuagu ena venoqiemi iula weaqina. Ta egu noga 'iuna mana ge nuagu tovaletuyana luveifadi ina nuavane ina vonaya taudi edi fewa be ima'a ema fewa 'aidegana. Ta yavona aqiaqiemi taudi be ima'a ema fewa ge dave'aidega, mana taudi tuta qabuna mane be iula taha taha weaqina ivevenoqiemi, waisa? <sup>13</sup> Vonahaqiaqi, taudi tovaletuyana 'eu'au'avididi ta tofewa luveifadi! Ta nuanuadi edi fewa be wese edi ilivu 'inega ona 'ita 'inamedi vonigo taudi Keliso ena tovaletuyanayavo. Ta 'esi iu'au'avemi. <sup>14</sup> Ta ge nuami navoqana edi ilivu weaqina, mana Seitani wese ana fata naveilivu kavonaya be Yaubada ena tovale'ewa simasimatalina 'idewani. <sup>15</sup> 'Inega ge kana nuavoqana 'eguma Seitani ena tofewayavo wese 'idewani ina veilivu 'aiqa kavonaya be taudi Yaubada ena tofewayavo, ta adi 'ita kavona yani aqiaqina ida viaviaqidi. Ta nawale tuta maimai 'inaya ve'ia qiduana ina lobebe edi ilivu luveifana ana 'etofwafwa 'inega.

*Faulo ena nuavane ena toa vitana weaqina*

<sup>16</sup> Egwavo, nuanuagu wese ena vona 'eviviehi, ge taha toga 'imiega una vonaya be ya'a kwavakwavagu. Ta tua 'eguma ona nuaia vonigo ya'a kwavakwavagu, e 'inega egu vekwavakwava ona 'awahaqiaqiea, 'inega ya'a wese nuanuagu tufwana ena nuavane weaqigu 'idewani tovaletuyana 'e'eu'au'avididi taudiega inuanua vane. <sup>17</sup> Egu vonavane taugu weaqigu gebu eda Kaiwabu ena nuanua 'inega, mana ya'a egu vona kavona be tokwava taha ena vona. <sup>18</sup> Tomotau qabudi inuanua vane edi viaqayavo bwa'obwa'oya weaqidi, e 'inega ya'a wese nuanuagu ena nuavane 'idewani taudi. <sup>19</sup> Ba'e 'idewani yavona 'aiqa 'imia, mana omi'a tovaletuyana kwavakwavadi me emi qaiawa edi ve'ita onoqonoqolia ta o'abi'abibodea, ta taumiega ovonaya be omi'a toalamani aqiaqi, ta 'esi gebu! <sup>20</sup> Omi'a tovaletuyana luveifadi ge oda givelua'udi tuta nana iveilivu veifemi kavona omi'a edi tofewa kavovo be, emi kulufa qabudi i'ekilidi be, ivekaiwabu omi'a weaqimi be, iawawebuiemi be wese i'aunanavemi, ta omi'a obibitaqomi. <sup>21</sup>\* 'Inega ya'a me egu iniya'au yavonevonemi ima'a ge me ema giwalifatu be ilivu diavona ada viaqidi 'idewani taudi iviaqia 'imia, waisa?

Vonahaqiaqi, tovaletuyana luveifadi me edi giwalifatu inuavane edi viaqayavo weaqidi, 'inega ya'a wese kavona tokwava taha me egu giwalifatu vaina yani weaqina ena vonavane. <sup>22</sup> Taudiega igabedi me Ibeliu, waisa? Ta wese ya'a 'idewani. Taudiega

\* 11:6: 1Kol 2:1,13 \* 11:7: 1Kol 9:18 \* 11:8: Fil 4:15-16; 2Kol 12:13 \* 11:21: Fil 3:5

igabedi me Isileli, waisa? Ta wese ya'a 'idewani. Ta wese taudi Ebelamo tubunavo, waisa? Ta wese ya'a 'idewani. <sup>23</sup> \* Ta wese ivonaya vonigo taudi Keliso weaqina ivetofewa, waisa? Ta yavonevonemi ya'a egu vetofewa Keliso weaqina veqidua va'inedi. Nage egu vona ana noqola kavona tokwava taha ena vona, ta yavona aqiaqiemi, ya'a egu lugu vanue 'ebeyoqona 'inaya Keliso weaqina 'eala wawasai, ta 'abiboda taudi. Ta wese vunuqa 'eala wawasai ge adi avomo ni'a yalobedi, ta 'abiboda taudi. Ta wese tuta qabuna ya'ali'aliga 'waqi. <sup>24</sup> \* Ta wese me Diu tuta ana yau faibi ikafigu ta iluvematasabugu wayo metametanega. Ta luvematasabu dina ana alamani ba'e: Nugweta imaduvunuqa dadanegu ana yau 39. Ta wese 'idewani tuta vemagilafuna be, vetoina be, vefoana ta wese 'ebeluo'ova vunuqa 39 yalobedi. <sup>25</sup> \* Ta wese tuta toi 'idia 'aiweyega ivunuqigu. Ta wese taha tuta 'inaya daboyega iludabogu. Ta wese tuta toi 'idia veilage wagega yalobea mwade'waya. Ta taha tuta 'inaya velovana 'aidegana be wese 'aubena 'aidegana 'alu'alu dadanegu malavetaya. <sup>26</sup> \* Ta wese 'eda kuena yatautauyia egu luyaba dadana di'we taha taha 'idia. Ta luyaba nana 'inaya 'ebeveilage yalobedi 'idewani seuseu be wese tovanawala 'idiega. Ta wese vita taha taha yalobedi egu tomotauyavo me Diu 'idiega, ta wese taudi ge me Diu 'idiega. Ta wese 'ebeveilage yalobedi 'abaga qiduquadi ta di'we 'ava'avana 'idia, ta wese mwade'wa 'inaya wedilia be nufula qiduquadi igiveluveifegu. Ta wese 'ebeveilage yalobedi tovaletuyana 'eu'au'avidu 'idiega.

<sup>27</sup> Vonahaqiaqi, egu fewa vitana 'inega visiqe be siniqaiqi yalobea, ta wese velovelovana vaina 'idia ge eda 'eno aqiaqi. Vaina tuta ge agu 'abwagamo 'inega yabotana, ta wese vaina tuta magagu kwavuqa mana ge agu go'ilamo. Ta wese vaina tuta guga'u vunuqigu, mana egu luyaba dadana 'inaya ge egu bwahamo ta wese agu kaleko eabuabudi.

<sup>28</sup> Vonahaqiaqi, toa vitana qabudi ni'a yalobedi, ta vita diavona adi luvetomana 'ekalesia taha taha, mana tuta qabuna yanuanua qiduana Yaubada ena tomotauyavo weaqidi ma'oda itoatoa 'aiqa. <sup>29</sup> Ta tuta nana tovetumaqana taha nadawalili, 'inega kavona ya'a wese eda dawalili. Ta wese tuta nana tovetumaqana taha natauya gei ta nabe'u, e 'inega nuagu vita qiduana.

<sup>30</sup> Ta 'eguma ya'a taugu weaqigu ena nuavane, 'inega nuanuagu ena nuavane yani diavona igigivedawaliligu weaqidi. <sup>31</sup> Yaubada eda Kaiwabu Iesu Tamana kana awatuboya tuta qabuna. Tauna ni'a alamania egu vona ba'e vonahaqiaqi. <sup>32</sup> \* Ta wese 'ebetalatutula taha ena vonemi egu toa vitana weaqina. Lova tuta nana 'abaga Damasiko 'inaya yatoatoa 'inega 'abaga nana ana kini ana wawa Alitasi ena gavana ana to'itamakiavo luvinedi be 'abaga nana ana 'awayavo ina 'itamaki aqiaqiedi be yaqisa ina kafigu. <sup>33</sup> Ta ge adi fata, mana egwavo vaina iusegu kwalisi taha 'inaya ta 'abaga nana ana sifa debanega ana 'ebelubo'e 'inega wayoyega ivekaliligu yawebui bwa'obwa'oya ta 'idiega yadena.

## 12

### *Faulo mahala* 'itea

<sup>1</sup> Wese nuanuagu vaina yani weaqidi ena vonavane. Vonahaqiaqi, nuavane ilivuna ge yani aqiaqina, ta nuanuagu ena vematamagilafuyemi vaina yani weaqidi, ta ba'e yani diavona eda Kaiwabu taunega ve'ifoqeyea, ta wese ena nuanua simana 'ifoqeyea 'iguya. <sup>2</sup> Taha 'oloto yahalamani aqiaqiea, tauna Keliso ena tomotau. Ta ba'e 'oloto nana ya'wala 14 gumwala 'inaya Yaubada ena waiwaiega mahala deba otaqinaya givaneyea. Ta ge eda alamania 'eguma ma 'wafina vaneqa nage niboaninega, ta 'esi Yaubada ana 'aidegamo alamani aqiaqiea. <sup>3-4</sup> Ta ya'a yahalamani aqiaqiea 'oloto nana Yaubada givaneyea Faladaisi 'inaya, ta ge eda alamania 'eguma ma 'wafina nage niboaninega vaneqa, ta 'esi Yaubada ana 'aidega alahalamania. Ta oa'e 'inaya vaina yani 'ebenuavoqana noqolidi. Ta Yaubada 'etobodea ge taha yani weaqina ana fata naveqaeyedi. <sup>5</sup> Ta tola'ai 'ifoqe

\* 11:23: Via 16:23 \* 11:24: Luve 25:3 \* 11:25: Via 16:22; 14:19 \* 11:26: Via 9:23; 14:5 \* 11:32: Via 9:23-25

ba'e 'oloto nana 'inaya weaqina nuanuagu ena vonavane, ta ge nuanuagu tauguyega ena nuavane. Ta 'esi 'eguma ena vonavane taugu weaqigu 'inega nuanuagu egu dawalili namo weaqina ena nuavane.

<sup>6</sup> Vonahaqiaqi, yani koya weaqidi agu fata be ena vonavane. Ta ge taha toga ana fata be nagabegu tokwava 'eguma yani diavona weaqidi yavonavonavane, mana yani diavona ni'a i'ifoqe aqiaqi mataguya. Ta ge nuanuagu ena vonavane ba'e yani diavona weaqidi, mana ge nuagu tomotau ina givaneyegu ba'e 'ita nana weaqina ta ina 'awahaqiaqiegu, ta 'esi nuanuagu egu fewa be wese egu lugaihi 'idiega ina givaneyegu. <sup>7</sup>\* Vonahaqiaqi, yani aqiaqi otaqina Yaubada ena ve'ita 'inega ni'a i'ifoqe 'iawaquya. Ta Yaubada ge nuanuana be ya'a taugu ena givaneyegu ba'e yani diavona weaqina, 'inega Yaubada Seitani awafelea taha niboana luveifana luvetunei 'iguya ta visiqā neigu be yaqisa ge taugu weaqigu ena nuavane.

<sup>8</sup> Ta ya'a tuta toi 'idia ni'a Yaubada yavenoqiea be visiqā nana na'ewa yavulea 'iguyega. <sup>9</sup>\* Ta Yaubada vona ve'iegu vonaya, "Yani 'aideganamo luaqiaqieu, ta ba'e yani nana egu nuakolokolo. Mana ya'a egu waiwai ana fata ena vefewea o'a 'iuya tuta nana dawalili ulobelobea." E 'inega yaqaiqaiawa ta yanuavane egu dawalili weaqina, mana dawalili nana 'inega Keliso ena waiwai ana fata be navefewea 'iguyega. <sup>10</sup> Vonahaqiaqi, yaqaiqaiawa qiduana dawalili 'inaya be, awagila 'inaya be, veilivu veifa 'inaya be, vevoalana 'inaya ta wese vita be visiqā taha taha 'idia, 'eguma ba'e yani diavona Keliso weaqina yavevebaedi. Mana tuta nana yadawadawalili, e 'inega wese Keliso gigivewaiwaiegu.

#### *Faulo ena nuanua Kolinita ana to'ekalesia weaqidi*

<sup>11</sup>\* Egu nuavane 'inega yaveilivu kavona tokwava taha 'idewani, ta omi'a emi viaqa 'inega ba'e 'idewani yaveilivu 'aiqa. Ya'a kavona tomotau kavokavovo, ta omi'a luaqiaqiemu be oda 'awahaqiaqiegu, mana emi tovaletuyana 'eu'au'avidi ge ida veqidua va'inegu. <sup>12</sup>\* Lova tuta nana omi'a maega katoatoa 'inega yani taha taha 'idiega taugu yave'ita 'ifoqeyegu ya'a tovaletuyana aqiaqi ta Yaubada taunega ena nuanua 'inega vetunegu yawai 'imia. 'Inega me egu bibitaqo 'ebe'ita be, viaqa waiwai ta wese yani 'ebenuavoqana yaviaqidi omi'a 'ekalesia nuanimia. <sup>13</sup>\* Egu luvivila 'inaya 'ekalesia 'aidega 'aidega 'idia tuta qabuna ilivu 'aidegana 'inega yaveilivu 'aiqedi. Ta omi'a wese ilivu nana ni'a olobea 'iguyega. Ta yani 'aideganamo ge eda viaqi nuanimia, mana ge taha tuta emi toa eda givevitei 'idewani mali 'ekalesia edi toa yagivevitea, mana taudi 'idiega iula taha taha ya'ewea. Ta ba'e egu luveifana 'imia weaqina ona nuataqogu, waisa?

<sup>14</sup> Egwavo, tuta ba'e 'inaya nuanuagu egu vayausa vetoina ena viaqia 'imia. Ta vayausa nana 'inaya emi toa ge nuanuagu ena givevitei iula taha taha 'idiega. Mana ge nuanuagu emi mane nage emi kulufa, ta 'esi nuanuagu omi'a. Ba'e egu vona ena givesimatalia vona sesebai ba'e 'inega. Gogama goyogoyodi ge daluaqiaqiedi be 'abwaga ina gimwane inadiavo be tamadiavo weaqidi, ta 'esi ina be tama luaqiaqiedi be natudiavo adi 'abwaga ina nei kavovodi. <sup>15</sup> 'Inega egu vayausa 'imia 'inaya me egu qaiawa yani qabuna 'iguya i'eno'eno ena vefewedi omi'a ami iula weaqina, ta wese tauguyega ena awafelegu 'imia niboaniami edi veaqiaqi weaqina. Ta 'eguma ya'a egu awafela 'inega egu veyoluba qiduana yave'ifoqeyea 'imia, e 'inega omi'a emi veyoluba 'iguya ge ona givegoyoi, waisa?

<sup>16</sup> Omi'a ni'a oalamani aqiaqiea lova egu wai 'inaya ge eda givevitemi egu toa weaqina. Ta vaina 'imiega nawale inuaia be u'avega yani taha taha eda 'ewedi 'imiega taugu weaqigu. <sup>17</sup> Ta wese lova taidavo yavetunedi iwai sabi iulami. Ta ona nuaia, nage taudi vaina yani i'ewedi 'imiega ya'a taugu weaqigu? <sup>18</sup>\* Ta wese lova taida Taitusi yavenoqiea be navayausimi, 'inega tovetumaqana taha maega yavetunedi iwai. Ta ona nuave'avinia Taitusi weaqina, nage tauna ena wai 'inega taunega weaqina vaina yani 'imiega u'avega

\* 12:7: Iob 2:6 \* 12:9: Fil 4:11-13 \* 12:11: 2Kol 11:5 \* 12:12: Lom 15:19 \* 12:13: 2Kol 11:9 \* 12:18: 2Kol 8:6,16-18

'ewedi ta vefewedi tauna ena veaqiaqi weaqina? Vonahaqiaqi, gebu! Mana taida nana be ya'a ema ilivu be wese ema viaqayavo ge ida vedumaduma.

<sup>19</sup> Ta nage ovonaya be ima'a ema vona diavona ba'e 'idewanina, mana nuanuama taumega ana vata'ita'iema. Gebu'e otaqa! Ta 'esi ima'a ba'e 'idewani avonavona 'aiqemi, mana ima'a Keliso ena tofewayavo, ta ahalamani aqiaqiea Yaubada ema vona noqolia ta 'awahaqiaqiea. Egwavo, ema viaqayavo qabudi aviaviaqidi sabi givewaiwaiemi. <sup>20</sup> Tuta qabuna yanuanua qiduana weaqimi, mana yanuaia nawale egu wai 'inaya vaina ilivu luveifadi ena lobedi omi'a 'ekalesia nuanimia, 'idewani ve'ae'aetoga be, ve'ifi'ifi be, diavilavila be, vemanuguba be, 'awaluveifa be, vevonavona be, nuavane ta wese vaina ilivu luveluveifadi. Ta 'eguma ba'e ilivu diavona ena lobedi nuanimia 'inega adi ve'ia 'iguyega weaqidi ge wese ona qaiawa. <sup>21</sup>\* Vonahaqiaqi, giwaligu tufwana visiqa egu wai 'evivi weaqina, ta yanuaia Yaubada matanaya ena iniyauyau omi'a emi ilivu weaqidi, mana wai nana 'inaya ena lobemi lova 'idewani, ta ge oda nuagivila ilivu luveifa diavona 'idiega 'idewani ilivu bwavubwavudi be velamo'eno kavokavovo. Ta wese yanuanua be 'wafi ena nuanua ilivu luveifana weaqina nawale me emi qaiawa oviaviaqidi, ta ge oda nogedi.

## 13

*Faulo ena vematamagilafu 'ebelu'ovoa*

<sup>1</sup>\* Ni'a yavonemi tuta vetoina ena wai sabi vayausimi. 'Idewani Buki Nugwenugweina simana vonaya, "Eguma taha toga nuanuana mali tomotau natauyea toluvine matadia taha luveifana weaqina, e 'inega luaqiaqiea be wese luveifa nana ana to'ita adi yau magilafudi nage toidi na'ewedi, ta edi simana 'ifoqe 'inega tomotau nana luvine nalobea."

<sup>2</sup> Lova egu vayausa vemagilafuna 'inaya ilivu luveifana ana toviaqayavo vona waiwaina ni'a yaneidi. Ta wese ba'itagana toluveifadi be tomotau qabudi egu vona waiwaina yalulu'eviviea 'idia: Ba'e egu vayausa vetoina 'inaya ge wese ena nuakokoloyedi, ta 'esi luvematasabu ina lobe. <sup>3</sup> Omi'a nuanuami ona alamani aqiaqiea 'eguma Keliso veveqae ya'a 'iguyega. Ta yavona aqiaqiemi, vayausa nana 'inaya egu viaqayavo ona 'itedi, ta 'idiega ona alamania ya'a Keliso ena tovona. Ta wese Keliso nana ge dawalilina emi viaqa luveifadi weaqidi, ta 'esi 'iguyega ena waiwai nave'itemi sabi givetunuqimi. <sup>4</sup>\* Vonahaqiaqi, lova Keliso me ena dawalili 'aliga 'etolui 'inaya, ta ba'itagana Yaubada ena waiwaiega mayawaina toatoa. Ima'a ni'a ave'aidega Keliso maega, 'inega wese dawalilima, ta tauna maega atoatoa 'inega Yaubada ena waiwai ni'a a'ewea, ta ba'e waiwai nana ana vefewea ami givetunuqa weaqina.

<sup>5</sup>\* Taumiega luaqiaqiemi be ona 'ita aqiaqiemi 'eguma ovetumaqana aqiaqi Keliso 'inaya, nage gebu. Ta 'eguma ge ami fata ona vonaya, "Iesu Keliso ita'a maega!" e 'inega ge wese me emi vetumaqana aqiaqi Keliso 'inaya. <sup>6</sup> Ta nuanuagu ona alamani aqiaqiea ima'a taumega ni'a a'ita aqiaqiema ema vetumaqana weaqina, ta Yaubada vetumaqana nana ni'a alamania 'inega 'awahaqiaqiema Keliso ena tofewayavo.

<sup>7</sup> Ima'a avevenoqi Yaubada 'inaya weaqimi be ge taha luveifana ona viaqi. Ta ba'e venoqi nana ge ada 'inanea sabi ve'ita 'ifoqeyema vonigo ima'a ema fewa nuanimia aqiaqi otaqina Yaubada matanaya. Nage ana 'ita kavona ima'a fewa ge aqiaqina ada viaqia nuanimia, ta 'esi ba'e 'idewani avevenoqi 'aiqa weaqimi, mana nuanuama viaqa aqiaqidi ona viaqidi. <sup>8</sup> Ima'a tovaletuyana ge ama luaqiaqi be ema waiwai ana a'uya Yaubada ena vonahaqiaqi adi 'etoboda weaqina, ta 'esi luaqiaqiema be tuta qabuna vona diavona ana simasimanedi be yaqisa tomotau ina noqolidi. <sup>9</sup> Ge taha tola'ai 'eguma ima'a dawalilima, ta 'esi yani qiduana 'imaya 'eguma omi'a ona vewaiwai. 'Inega avevenoqi weaqimi Yaubada 'inaya be omi'a ona veilivu aqiaqi. <sup>10</sup>\* 'Abiboda be ena wai, ta nugweta leta ba'e 'inega yalulugaihimi, mana wai nana 'inaya ge nuanuagu vona waiwaina 'inega

\* 12:21: 2Kol 13:2 \* 13:1: Luve 19:15; Md 18:16; 1Tim 5:19 \* 13:4: Fil 2:7-8 \* 13:5: 1Kol 11:28 \* 13:10: 2Kol 10:8

ena lugwaeyemi. Lova eda Kaiwabu 'abiluvine neigu, ta egu wai 'inaya nuanuagu 'abiluvine nana 'inega ena givewaiwaiemi, ta ge nuanuagu 'abiluvine nana 'inega emi vetumaqana ena qeuni.

*Faulo ena lukafoi* 'ekalesia 'idia

<sup>11</sup> Egwavo, egu vona ana 'ebel'ovoa ba'e: Nuanuagu qiduana me emi qaiawa ona toatoa. Emi ilivu luveifadi ona nogedi ta ona veilivu aqiaqi. Ma emiavo vona 'inega ona veiuuula. Ta wese nuadaumwalega ona toa 'aideganaya. Ta ba'e 'inega veyoluba be daumwala ana Yaubada nuanimia natoatoa.

<sup>12</sup> Omi'a 'ekalesia ma emiavo ona lukaiwa venima sibutu 'inega ita'a eda ilivu 'inega. Tovetumaqana qabudi ba'idia itoatoa wese edi lukaiwa 'imia. <sup>13</sup> Yavevenoqi weaqimi be eda Kaiwabu Iesu Keliso ena nuakolokolo be, Yaubada ena veyoluba ta wese Nihoana Gwalagwalana ena veiaiana omi'a qabumi ona lutonovia.

## Faulo ena leta me Galetia 'idia

### *Leta ana alamani weaqina*

Lova Faulo ena luvivila nugwenugweina di'we Galetia 'inaya lugaihi Iesu ena 'aliga ta wese ena tovolu 'evivi weaqina. 'Inega me Galetia vaina Iesu Valena ivetumaqanea. Ta 'abibodanaya Faulo nogedi ta wese luvivila vaina di'we 'idia sabi lugaihi. 'Abibodanaya vaina me Diu imai Galetia 'inaya, ta Faulo ena ve'ita i'awaluveifea ta ivonaya vonigo Mosese ena luvineavo ina 'abibodedi ta wese 'wafi ana da'a 'inega ina vetunutunuqa Yaubada matanaya. Yani ba'e weaqina me Diu ive'ae'aetoga tovetumaqanayavo maega. 'Inega Faulo nuana vita tovetumaqanayavo weaqidi ta wese diana vilea me Diu edi ve'ita weaqina. 'Inega leta ba'ena 'wayavia ta vetunei tovetumaqanayavo 'idia ina 'itea ta ina avoya. 'Inega ina alamania 'eguma Iesu Keliso ivevetumaqanea, 'inega Yaubada naqaiawa ta na'awanatunedi, ta ge me Diu edi luvine ana 'abiboda 'inega ta 'esi vetumaqana Iesu 'inaya 'inega. Faulo nuanuana tovetumaqanayavo me Diu edi u'ava 'inega ina 'evivi Iesu ena 'eda aqiaqina 'inaya. Ba'e 'iuna 'inega Faulo leta nana 'wayavia.

### *Leta gamona*

1:1-10 Vona lukaiwa ta wese ana alamani aqiaqi

1:11-2:21 Faulo simana 'ifoqe ena vetoaletuyana weaqina

3:1-4:31 Yaubada nagiveaqiaqieda eda vetumaqana 'inega ta ge luvine adi 'abiboda 'idiega

5:1-6:10 Luveifana ena luvineyega Keliso 'etoyavuida ta Niboana Gwalagwalana ena nuanua kana 'abibodea

6:11-18 Faulo ena lukafoi ta wese ena nuanua 'ena'ena'idi adi givesimatala

### *Lukaiwa*

<sup>1</sup> Leta ba'e ya'a tovaletuyana Faulo 'iguyega. Ta ya'a ge tomotau edi venua'ivina nage edi luvine 'inega eda vetoaletuyana. Yaubada Tamada Iesu Keliso 'aligega ni'a giveya'itotoya, ta taudina edi gabega yavetoaletuyana. <sup>2</sup> Ya'a ta wese edavo qabudi ba'idia atoatoa ema lukaiwa to'ekalesia qabumi 'imia otoatoa di'we Galetia 'inaya.

<sup>3</sup> Nuanuagu nuakolokolo be nuadaumwala ona 'ewea Tamada Yaubada ta wese Iesu Keliso 'idiega. <sup>4</sup> \* Ba'e Iesu nana Yaubada Tamada ena nuenuega awafelea 'aliga 'inaya sabi 'etoyavuida bwa'obwa'o ena ilivu luveifana qabudi 'idiega. <sup>5</sup> Ba'e 'iuna 'inega awatubo qabuna Yaubada kana neineia tuta vataya 'idia. Vonahaqiaqi, eda nuanua 'idewani.

### *Vale Aqiaqina 'aideganamo*

<sup>6</sup> Ya'a yo'aligu qiduana weaqimi! Mana Yaubada Natuna Keliso ena veyolubega be wese ena nuakolokoloyega venua'ivinemi, ta omi'a ge tuta kuena 'abibodanaya Yaubada onogea ta vale dumadumana o'awahaqiaqiea. <sup>7</sup> \* Vonahaqiaqi, Vale Aqiaqina 'aideganamo 'eno'eno, ta ge taha wese! Ba'e 'idewani yavona 'aiqa 'imia, mana vaina tomotau iu'avemi nuanuadi Vale Aqiaqi Otaqina Keliso weaqina ina givedumedumea. <sup>8</sup> Ta 'eguma taha toga nage ya'a, nage Yaubada ena tovale'ewa mahalega vale dumadumana ana lugaihiea ami 'etoyavua weaqina, ta lugaihi nana ge davelelelea lova Vale nana yasimanea 'imia, e 'inega tauna luaqiaqiea nalugu 'aiwe 'ala'alata 'inaya. <sup>9</sup> Lova avonemi, ta ba'itaga wese ena vona 'evivimi: 'Eguma taha toga vale dumadumana nasimanea ta ge davelelelea Vale nana lova yasimanea 'imia maega, e 'inega tauna nalugu 'aiwe 'ala'alata 'inaya.

<sup>10</sup> O'itei, egu vona 'inega ge eda nuanua 'eguma tomotau ina 'awahaqiaqiegu. Gebu'e otaqa! Ta 'esi egu nuanua qiduana Yaubada na'awahaqiaqiegu! Mana 'eguma nuanuagu tomotau ina 'awahaqiaqiegu 'inega ge wese ana fata ena vetofewa Keliso weaqina.

### *Ma'oda 'inega Faulo vetoaletuyana*

\* 1:4: Gal 2:20 \* 1:7: Via 15:1,24

<sup>11</sup> \* Egwavo, yavona aqiaqiemi, Vale Aqiaqina yalulugaihiea 'imia ge tomotau edi nuenuega. <sup>12</sup> Ta 'esi Ieisu Keliso taunega Vale nana ve'itegu, ta ge tomotau 'idiega.

<sup>13</sup> \* Ni'a oalamanian lova ya'a me Diu edi ilivu tuta qabuna ya'abibodea, ta Yaubada ena tomotauyavo yavevoalenedi ta nuenuagu ena fofola 'ovoidi. <sup>14</sup> Ya'a egu lagata gamonaya me Diu edi ilivu be wese luvine adi 'abiboda yahalamani aqiaqiedi ta wese tuta qabuna yaviaqidi, mana nuenuagu qiduana tubudavo edi ilivu ena matayaga aqiaqiedi.

<sup>15</sup> Lova tuta nana nawale ge eda vi'oi ta Yaubada ena nuakolokoloyega venua'ivinegu ta gabegu ena vetofewa weaqina. <sup>16</sup> Ta ena nuenuega Natuna give'ifoqeyea 'iguya be yaqisa ya'a Valena Aqiaqina ena simanea taudi ge me Diu 'idia. Ta tuta nana 'inaya ge eda tauya tomotau 'idia sabi vetala'aiedi Vale ba'e weaqina. <sup>17</sup> Ta ge wese eda tauya Ielusalema 'inaya taudi imaduvetovaletoyana 'idia, ta 'esi yatauya vavava di'we Aleibia 'inaya. Ta 'abibodanaya ya'evivi 'abaga Damasiko 'inaya. <sup>18</sup> \* 'Inega ya'wala toi 'abibodanaya ya'watovu Ielusalema 'inaya Fita sabi vayahausina ta wese nuenuagu ena alamani aqiaqiea be 'inega tauna maega ana vetaina Keliso ana wawa 'inega. Ta omode 'aubena ana yau 15 maega atoa. <sup>19</sup> Ta wese eda Kaiwabu Ieisu taina Iemesa\* yalobea, ta ge taha wese tovaletuyana eda 'itedi.

<sup>20</sup> Yaubada matanaya yavona aqiaqiemi egu 'wayavi ge wese u'ava, ta 'esi yani qabuna vonahaqiaqi.

<sup>21</sup> Egu vayahausa iagu Fita 'inaya 'abibodanaya ya'watovu yatauya di'we Silia be wese Silisia 'idia. <sup>22</sup> Ta tuta nana 'inaya Keliso ena to'ekalesiyavo di'we Iudia gamonaya nawale ge ida alamanigu. <sup>23</sup> Ta yani 'aideganamo weaqigu inoqolia tomotau edi veqae 'idiega ivonaya, "Tauna lova vevoaleneda ni'a nuagivila, ta Vale Aqiaqina lova nuenuana nahawatayea tuta ba'e 'inaya taunega lulugaihiea tomotau 'idia." <sup>24</sup> 'Inega to'ekalesiyavo Yaubada iawatuboya ya'a egu nuagivila weaqina.

## 2

### *Tovaletuyanayavo Faulo ena lugaihi i'awahaqiaqiea*

<sup>1</sup> 'Inega ya'wala 14 'abibodanaya wese ya'evivi yatauya Ielusalema 'inaya. Ta tuta nana 'inaya Banaba maega atutuvila atauya, ta wese Taitusi ya'ebe'ewea 'inega toima a'watovu 'abaga nana weaqina. <sup>2</sup> Ta egu tauya 'iuna mana Yaubada taha ve'ita 'inega vemata-magilafuyegu ena tauya Ielusalema 'inaya. Ta omo'e 'inaya 'ekalesia ana tovanugweta dimo maega atoava'auta. 'Inega egu lugaihi Vale Aqiaqina taudi ge me Diu 'idia weaqina yagivesimatalia 'idia. Mana nuenuagu lugaihi nana ina alamanian ta ina 'awahaqiaqiea be yaqisa egu fewa ge ina 'awa yani kavokavovoyei. <sup>3</sup> Ta i'awahaqiaqiegu! Agu to'weabu nana Taitusi tauna Guliki 'olotona, ta tovanugweta dina ge luvine waiwaina ida neia 'wafi ana da'a weaqina.

<sup>4</sup> Ta 'eguma vaina tou'ava ge ida lugulugu 'ekalesia gamonaya, 'inega 'wafi ana da'a ana luvine ge taha toga daveqae 'eviviei. Ta tou'ava diavona ivonaya be taudi Keliso ana to'abibodayavo. Ta taudi gebu, mana edi u'avega ilugu 'ekalesia gamonaya sabi lufonufonuyema, nuenuadi ema toa aqiaqina Keliso Ieisu 'inega ina 'itea. Ta edi nuenua qiduana vonigo ina yoqonima me Diu edi ilivuyavo 'idiega. <sup>5</sup> Ta edi luvineavo 'idiega ge taha ana tufwa ada 'awahaqiaqiedi ta 'esi anogedi, mana ge nuenuama nawale ina mai 'imia, ta Vale Aqiaqina ina givedumedumea weaqimi.

<sup>6</sup> Ta va'auta nana 'inaya 'ekalesia ana tovanugwetayavo egu lugaihi weaqina ge taha wese vona ida 'inanei, mana egu lugaihi tunutunuqina. Vonahaqiaqi, tovanugweta diavona tomotau matadia adi wawa 'ena'ena'idi, ta tua ge wese eda mwaninivedi, mana tomotau qabuda Yaubada matanaya 'aidegada. <sup>7</sup> Vonahaqiaqi, tuta nana tovanugweta dina i'itegu 'inega ni'a ialamanian Yaubada venua'ivinegu Vale Aqiaqina ana lugaihi taudi ge me Diu 'idia, 'idewani wese Fita Yaubada ni'au venua'ivinea sabi lugaihi me

\* 1:11: 1Kol 15:1-5 \* 1:13: Via 8:3 \* 1:18: Via 9:26-27 \* 1:19: Ba'e Iemesa nana Ieisu taina, be inana Meli ta tamana Iosefa.

Diu dimo 'idia. <sup>8</sup> Mana Yaubada ena nuenuega be ena waiwaiega yavetovaletuyana taudi ge me Diu weaqidi, 'idewana wese Fita vetovaletuyana taudi me Diu weaqidi. <sup>9</sup> 'Inega tuta nana 'ekalesia ana tovanugwetayavo 'ena'ena'idi adi wawa Iemesa be, Fita ta wese Ioni Yaubada ena wila'a 'iguya lugaihi weaqina i'ita lobe, inega Banaba be ya'a i'awahaqiaqiema ta taudi maega ave'aidega Yaubada ena fewa weaqina. 'Inega ahawafela ima'a ana fewa taudi ge me Diu weaqidi, ta taudi ina fewa me Diu weaqidi. <sup>10</sup> Ta yani 'aideganamo weaqina ivenoqiema vonigo ge ana nuafanidi taudi lukwalukwadi adi iula weaqina. 'Inega tuta qabuna 'idia ba'e yani nana weaqina yavevetafe'wa waiwai.

*Faulo Fita talamatea* 'abaga Anitioki 'inaya

<sup>11-12</sup> Lova 'abaga qiduana Anitioki 'inaya yatoatoa, ta 'abibodanaya wese Fita mai. Ta ena mai 'unu 'inaya ena ilivu qabudi aqiaqidi, ta tovetumaqana taudi ge me Diu maega i'ai'ai vegogona. Ta 'abibodanaya wese Iemesa enavo vaina me Diu imai 'abaga nana 'inaya. Ta Fita mwaniniva me Diu weaqidi, 'inega ge me Diu 'idiega vasi'i, mana ni'a alamania taudi me Diu ge nuanuadi ina veiaiana ge me Diu maega, mana taudi luvine 'wafi ana da'a weaqina ge ida 'abibodei. Ta ba'e vasi'i nana 'inega Fita ilivu luveifana viaqia. <sup>13</sup> 'Inega wese vaina me Diu Fita ena ilivu luveifana i'abibodea, ta ge nuanuadi taudi ge me Diu maega ina 'ai vegogona, ta wese Banaba ilivu nana 'abibodea mana tauna wese mwaniniva me Diu weaqidi.

<sup>14</sup> Ta tuta nana Fita be, Banaba ta wese me Diu qabudi ya'itedi Keliso Valena Aqiaqina ana vonahaqiaqi ge ida 'abibodei, 'inega tomtau qabudi matadia Fita yatalamatea yavoneaya, "Iagu, o'a Diu 'olotou waisa? Ta me Diu edi ilivu ni'au unogedi, ta di'we taha taha 'idia taudi ge me Diu edi ilivu uvevetutumedi. Ta tola'ai weaqina taudi ge me Diu ululukeyedi nuanuau be me Diu edi ilivu ina 'abibodei? <sup>15</sup> Vonahaqiaqi, o'a be ya'a me Diu natudiavo, ta ge kada vi'oi mali tomtau 'idiega, kavona taudi ge me Diu, mana Mosese ena luvine ge ida 'abibodei. <sup>16</sup> Ita'a me Diu ni'a kavetumaqana Iesu 'inaya kahalamani aqiaqiea Yaubada tomtau ge da'awahaqiaqiedi Mosese ena luvine 'inega, ta 'esi eda vetumaqana Iesu Keliso 'inaya 'inega. Mana ita'a eda vetumaqana ni'a kaha'uya Iesu 'inaya, be 'inega Yaubada na'awahaqiaqieda. Ta ge Mosese ena luvine ana 'abiboda 'inega, mana ge taha toga ana fata navetunutunuqa Yaubada matanaya luvine ana matayaga 'inega.

<sup>17</sup> "Ita'a me Diu nuanuada kana veaqiaqi Yaubada matanaya eda vetumaqana Iesu Keliso 'inaya 'inega. Ta tuta nana kamai 'inaya, e 'inega nuada 'eqa'uya ita'a toluveifada. 'Inega ma'oda, nage Iesu kana ve'ewea vonigo tauna tauyeda luveifa nana 'inaya? Gebu'e otaqa! <sup>18</sup> Ya'a 'eguma Mosese ena luvineavo lova yanogedi ta ba'itagana ena vetumaqana 'eviviedi, e 'inega ya'a Yaubada ena nuanua ana toqeu. <sup>19</sup> Lova nuanuagu Mosese ena luvineavo ena kafi'i'ihidi, ta luvine dina adi 'abiboda 'idiega ge wese agu fata eda vetunutunuqa Yaubada matanaya, ta 'esi kavona 'ali'aligigu luvine diavona adi 'abiboda 'idiega. Ta Keliso giyavuiqu luvine diavona 'idiega, ta ba'itagana mayawaigu Yaubada maega atoatoa. <sup>20</sup> Vonahaqiaqi, ya'a Keliso maega itutuve'ewema 'etoluai 'inaya, 'inega ge yawaiguyega eda toatoa, ta 'esi Keliso yawaina 'iguya 'eno'eno. 'Itaga ba'e yawai nana 'inega ma 'wafigu yatoatoa me egu vetumaqana Yaubada Natuna Iesu Keliso 'inaya, mana Iesu ena veyolubega taunega yawaina awafelea ta weaqigu 'aliga. <sup>21</sup> 'Inegana Yaubada ena veyoluba ge eda nogei. Mana 'eguma ana fata Mosese ena luvineavo 'idiega kada vetunutunuqa Yaubada matanaya, 'inega Keliso ena 'aliga kavona yani kavokavovo ge 'iunamo."

### 3

*Iesu* 'inega kana vetunutunuqa Yaubada matanaya

<sup>1</sup> Omi'a me Galetia, kwavakwavami! Mana lova Iesu Keliso ena 'aliga 'etoluai 'inaya yave'ita aqiaqiemi, 'inega nuami 'eqa'uya ta yani qabuna 'etoyavua weaqina simasimatalina 'imia. Ta ba'itagana ma'oda? Nage taha toga nuami givekwavea,



waisa? <sup>2</sup> Inega yani 'aidegana weaqina nuanuagu ena vetala'aiemi. To'edega Niboana Gwalagwalana o'ewei? Nage Mosese ena luvineavo ana 'abiboda 'inega? Nage Ieisu Valena Aqiaqina ana noqola be ana vetumaqana 'inega? <sup>3</sup> Ma'oda 'inega ovekwavak-wava? Lova emi tafwalolo ove'alea Niboana Gwalagwalana ena waiwaiega, 'inega tola'ai weaqina ba'itagana nuanuami ona veaqiaqi Yaubada matanaya taumi emi waiwaiega, a? <sup>4</sup> Yahalamania omi'a visiqqa be vita ni'au olobedi emi vetumaqana Keliso 'inaya weaqina. Ta ge nuanuagu emi vetumaqana ona nogei, mana yanuaia vita diavona 'idiega wese ve'ia aqiaqina ni'a olobea!

<sup>5</sup> Inega wese ena vetala'aiemi, nage Yaubada Niboana Gwalagwalana neimi ta wese vaina yani 'ebenuavoqana viaqidi nuanimia Mosese ena luvine ana 'abiboda 'inega? Gebu'e otaqa! Ta 'esi Yaubada ba'e yani diavona neimi mana omi'a Ieisu Valena onoqolia ta ovetumaqanea. <sup>6\*</sup> Kana nuaia Ebelamo weaqina, mana Buki Nugweta simanea vonaya, "Ebelamo Yaubada matayagea, 'inega Yaubada 'awahaqiaqiea tauna 'oloto tunutunuqina matanaya." <sup>7</sup> Inega ona alamani aqiaqiea aiqabu Yaubada ivevetumaqanea ta imatamatayagea, e taudi Ebelamo natunavo. <sup>8</sup> Buki Nugwenugweina madusimana 'ifoqeyea vonigo taudi ge me Diu ina vetunutunuqa Yaubada matanaya edi vetumaqana 'inega. Ta vale aqiaqina ba'e yani nana weaqina lova Yaubada maduvona fofofolayea Ebelamo 'inaya tuta nana voneaya, "Tomotau qabudi veyoluba ina lobe'a 'iuyega." <sup>9</sup> Ebelamo tovetumaqana taha, ta ena vetumaqana 'inega veyoluba lobe'a, e 'inega tovetumaqana qabudi wese veyoluba nana ina lobe'a tauna 'idewani.

<sup>10</sup> Ta tomeqabu ivonaya be Mosese ena luvine ina matayagedi 'inega ina vetunutunuqa Yaubada matanaya, taudina nawale vematasabu qiduana ina lobe'a, mana Buki Nugwenugweina simanea vonaya, "Tomeqabu luvine qabudi ge ida 'abibodedi Yaubada ena luvine 'waya'wayavina ana Buki 'inega nawale navona ve'alatedi." <sup>11</sup> Vonahaqiaqi, ge taha toga ana fata navetunutunuqa Yaubada matanaya Mosese ena luvine ana 'abiboda 'inega, mana Buki Nugwenugweina vonaya, "Tomeqabu ni'au ivetunutunuqa Yaubada matanaya edi vetumaqana 'inega, e taudina yawai vataya ina lobe'a." <sup>12</sup> Luvine ana 'eda ge wese ana fata be naveiaiana vetumaqana ana 'eda maega. Luvine ana 'eda Buki Nugwenugweina 'inaya simanea vonaya, "Eguma nuanuau luvine ana 'abiboda 'inega yawai vataya una lobe'a, e 'inega luvine qabudi una matayagedi." <sup>13</sup> Ta ge taha toga ana fata be luvine qabudi na'abibodedi. 'Inega Yaubada ena luvine 'inega vona ve'alateda, 'inega ge wese ada fata be ena 'Ebeluvine kana 'itei. Ta tuta nana 'etoluai 'inaya Ieisu itutuve'ewea 'inega tauna ilafeda ta wese gubaufeda, ta ita'a weaqida vona ve'alata nana lobe'a, mana Buki Nugwenugweina 'inaya i'wayavia vonaya, "Tomeqabu itutuve'ewedi 'etoluai 'inaya vona ve'alata ni'a ilobe'a." <sup>14</sup> Ieisu Keliso ena viaqa ba'e 'inega taudi ge me Diu veyoluba ilobe'a 'idewani Yaubada lova vona fofofolayea veyoluba nana weaqina Ebelamo 'inaya. 'Inega ita'a wese eda vetumaqana 'inega Niboana Gwalagwalana kana 'ewea Yaubada ena vona fofofola 'inega.

#### *Luvine ta wese vona fofofola weaqina*

<sup>15</sup> Egwavo, 'ebevetalatutula taha eda ilivu 'inega ena neimi, e ba'e 'idewani: 'Eguma 'oloto magilafudi edi nuanua nave'aidega ta ina vona fofofola taha yani weaqina ta adi wawa ina 'wayavidi tomotau matadia fefwai 'inaya, e 'inega ge taha toga ana fata vona 'aidegana goyosikwana na'ewa yavulei leta nana 'inega, nage mali yani 'inega naluvetubei. Wese Yaubada 'idewani, mana tauna gebu ana fata ena vona fofofola 'inega taha yani naqeuni. <sup>16</sup> Wese 'idewani Yaubada vona fofofola Ebelamo ta natuna 'idia. Ta Yaubada vona fofofola nana 'inaya ge davona, "Ebelamo natunavo 'idia", ta 'esi natuna ana 'aidega weaqina vonavona, e taunana Keliso. <sup>17</sup> Egu vona ana alamani ba'e 'idewani: Yaubada ena vona fofofola madua'uya Ebelamo 'inaya, 'inega ya'wala 430 'abibodanaya Mosese ena luvine 'ifoqe. Ta luvine nana ge ana fata Yaubada ena vona fofofola na'weuni nage nagivedumedumei. <sup>18\*</sup> Yaubada ena veyoluba ge daneida luvine ana 'abiboda

\* 3:6: Nug 15:6      \* 3:18: Lom 4:14

'inega, ta 'esi ada veyolubayavo neineida mana lova ena vona fofofola 'idewani. 'Inega wese Ebelamo 'idewani veyoluba qiduana 'ewea Yaubada ena vona fofofola 'inega.

*Luvine ena mai* 'iuna weaqina

<sup>19</sup> 'Inega tola'ai weaqina luvine 'ifoqe? Ana alamani ba'e: Luvine nana Yaubada ve'ifoqeyea 'idaya nuanuana nave'iteda eda luveifanayavo weaqidi. Ta tomotau ivefewea ana laba Ebelamo 'aqegigina 'ifoqe, lova ena vona fofofola 'idewani. Ta luvine nana Yaubada ena tovale'ewayavo 'idiega Mosese 'ewea, ta 'inega Mosese ve'ineia tomotau 'idia. <sup>20</sup> Ta Yaubada ena vona fofofola ana nei dumadumana, mana Yaubada ena vona fofofola ge taha toga daneia be 'inega Ebelamo da'ewei, ta 'esi Yaubada taunega Ebelamo neia.

<sup>21</sup> \* Ge kana vonaya be Mosese ena luvine Yaubada ena vona fofofola davevoalanei. Gebu'e otaqa! Mana 'eguma tomotau luvine taha 'inega adi fata yawai vataya ida lobe, e 'inega tomotau qabudi wese adi fata ida vetunutunuqa Yaubada matanaya luvine nana ana 'abiboda 'inega. <sup>22</sup> Ta 'esi Buki Nugwenugweina simana 'ifoqeyea vonigo tomotau qabuda eda ilivu luveifana kafi'ihida. 'Inega Iesu Keliso ana tovetumaqana dimo Yaubada ena vona fofofola nagive'ifoqeyea 'idia ta ina lobe.

<sup>23</sup> \* Lova tuta nana vetumaqana nawale ge kada alamania 'inega Mosese ena luvine yoqonida, 'inega toa vitadi kalobedi ana laba Yaubada vetumaqana nana ve'ifoqeyea 'idaya. <sup>24</sup> 'Inega luvine nana kavona ada to'itamaki be wese eda tove'ita 'idewana sabi vanugweteda Iesu Keliso 'inaya ana laba namai bwa'obwa'oya. Ni'a maia ta kavetumaqanea, 'inega ni'a kavetunutunuqa Yaubada matanaya. <sup>25</sup> 'Inega ba'itagana vetumaqana ana tuta ni'a 'ifoqe, ta luvine ana 'itamaki ni'a 'idega awala.

*Eda vetumaqana* 'inega Yaubada 'awanatuneda

<sup>26</sup> Omi'a Keliso Iesu ovetumaqanea, ta emi vetumaqana 'inega Yaubada ni'au 'awanatunemi. <sup>27</sup> Ta tomeqabu babitaiso i'ewea Iesu Keliso ana wawega ni'a ive'aidega maega, ta kavona be Keliso yawaina ida veaqei. <sup>28</sup> E ba'e 'inega ge taha vetoatoasi'i nuanidaya da'eno'eno. 'Inega me Diu ta taudi ge me Diu qabu 'aidegana, ta tofewa kavovo be tomotau qiduiduadi 'aidegadi, ta wese 'oloto be vivine 'aidegada, mana qabuda Iesu Keliso 'inega kave'aidega. <sup>29</sup> \* 'Eguma omi'a Iesu Keliso maega otoatoa, 'inega omi'a wese Ebelamo tubunavo 'idewana, ta Yaubada ena vona fofofola Ebelamo 'inaya ona 'ewea.

#### 4

<sup>1</sup> Egu vona diavona adi alamani ba'e 'idewani: 'Eguma taha toga ena tuta gwama 'inaya tamana tuta naha'uya totuta 'inaya ena 'ebeluvine naha'ukamanei natuna 'inaya, ta ge tuta kuena 'abibodanaya tamana yawaina nagumwala, e 'inega gwama nana ge ana fata 'ebeluvine nana na'itamakia, mana nawale ana tuta ge dalobei. E 'inega tauna naba'eba'e ta natoatoa kavona tofewa kavovo 'idewana, <sup>2</sup> ta ana to'itamakiavo namatayagedi ana laba lova tamana tuta nana a'uya na'ifoqe, e 'inega 'ebeluvine nana taunega naluvinedi, mana ni'a veago. <sup>3</sup> \* Lova tuta nana Keliso nawale ge damai bwa'obwa'oya, 'inega ita'a wese eda toa kavona gwama nana 'idewani, ta tubudavo edi ilivu be wese edi 'ebeiwa'odu 'idia kavetofewa. <sup>4-5</sup> \* Ta wese Yaubada lova ena nuenuega taha tuta a'uya Natu Otaqina navetunei bwa'obwa'o 'inaya. Ta ba'e tuta nana 'inaya Natuna vetunei mai vi'oi taha vavine 'inega, ta vetomotau be luvine qabudi vetofewa 'idia. E vetunei mai 'idaya sabi gubaufada, mana luvine qabudi iyoqonida. Ba'e yani nana viaqia, mana nuanuana qiduana na'awanatuneda.

<sup>6</sup> \* Vonahaqiaqi, omi'a Yaubada natunavo. Ba'e 'iuna 'inega Yaubada Natuna Niboanina vetunei giwalimia, 'inega ba'itaga ami fata Yaubada ona 'awa-Tamanea ona voneaya, "Tamagu ye, Tamagu!" <sup>7</sup> 'Inega ba'itagana omi'a ge wese tubudavo edi luvine 'idia ona

\* 3:21: Lom 8:2-4   \* 3:23: Gal 4:3   \* 3:29: Lom 4:13   \* 4:3: Kol 2:20   \* 4:4-5: Ion 1:14; Lom 1:3   \* 4:6: Lom 8:15-17

vetofewa, mana omi'a Yaubada natunavo. 'Inega wese tola'ai 'inaya 'eno'eno nawale naneimi ena vona fofofola 'idewani.

*Faulo nuanua qiduana me Galetia weaqidi*

<sup>8</sup> Omi'a ge me Diu lova Yaubada ge oda alamaniana, ta ovetofewa emi yaubada kavokavovo 'idia, ta taudi ge 'idewani Yaubada otaqa. <sup>9</sup> Ta ba'itaga Yaubada aqiaqi ni'au oalamaniana — nage kana vona Yaubada alahalamanimi — 'inega tola'ai weaqina nuanuami ona 'evivi niboana kavokavovo dawalilidi 'idia, ta ina luviniemi? <sup>10</sup> \* 'Inega o'odu'odu vaina 'aubena 'idia be, vaina wai'ena 'idia be, vaina ya'wala 'idia ta wese mali tuta be mali tuta 'idia. <sup>11</sup> 'Inega yanuvaita weaqimi, ta yanuaia nage egu fewa qiduana omi'a weaqimi 'inega ge taha ana aqiaqi na'ifoqe.

<sup>12</sup> Egwavo, nuanuagu qiduana omi'a ona toa 'idewani ya'a yatoatoa. Lova ya'a omi'a 'idewani luvine taha ana to'abiboda, ta ba'e 'itaga ya'a yavuyavuihu luvine nugwenugweidi 'idiega, 'inega yavenoqiemi egu ilivu ona 'abibodei.

Lova egu lugaihi nugweta 'imia ge oda veilivu veifegu. <sup>13</sup> Ta ona nuaia, lova yamaduwai 'imia, ta wai nana ana 'iu mana yavevihu, ta tua vihu nana 'inega Iesu Valena Aqiaqina yawiea ta yalugaihiea 'imia. <sup>14</sup> Vonahaqiaqi, vihu qiduana 'ewegu, ta ge oda veilivu veifegu ta wese ge oda nogegu. Ta 'esi me emi qaiawa o'itamaki aqiaqiegu ta o'ebe'ewegu kavona ya'a Yaubada ena tovale'ewa taha 'idewani, ta wese kavona Iesu Keliso tau otaqina damai. <sup>15</sup> Vonahaqiaqi, o'awaienegu ta qaiawa qiduana kalobea tutadiavo 'idia. Omi'a veyolubega yani qabuna ovaihu 'iguya, ta yahalamaniana omi'a ami fata wese matami oda 'egiounidi ta oda neigu matagu adi ilafa weaqidi. Ta ba'itaga ma'inaya qaiawa nana oa'uya? <sup>16</sup> Ana 'ita ovevoalanegu egu vonahaqiaqi 'imia weaqina, waisa?

<sup>17</sup> Ta tove'ita taudi tovevihu ivetafe'wa waiwai weaqimi nuanuadi ona vaukama edi ve'ita 'inaya. Ta ba'e yani nana ge aqiaqina weaqimi, mana nuanuadi taudimo ona 'abiboda aqiaqiedi, ta ge nuanuadi ya'a egu ve'ita ona 'abibodei. <sup>18</sup> Lova ya'a omi'a maega katoatoa ta oawafelemi egu ve'ita aqiaqina 'inaya, waisa? Ta ya'a egu nuanua qiduana omi'a ve'ita nana wese ona 'abiboda aqiaqiea 'eguma ya'a yatoa luvai 'imiega. <sup>19</sup> Natugwavo, giwaligu visivisiqa tuta qabuna weaqimi emi vaukama weaqina. Vonahaqiaqi, visiqi nana kavona taha vavine ma gamona ena tuta lobea be nauweta. Lova tuta nana yamaduwai 'imia ta onuagivila ilivu nugwenugweina 'idiega ta omai Iesu 'inaya, e 'inega agu lutonova wese 'idewana, mana kavona yavenatunemi yani aqiaqina 'inaya. Ta venatuna nana 'abibodanaya kavona qaiawa qiduana yalutonova, 'idewani wese ina taha taha adi lutonova edi venatuna 'abibodanaya. Ta ba'itagana o'evivi ilivu nugwenugweina 'idia, 'inega wese yuvaqa waiwaina 'iguya yalulunonova weaqimi ana laba Keliso yawaina navuaqa aqiaqi 'imia, e 'inega nuagu naveaqiaqi 'evivi. <sup>20</sup> Nuanuagu qiduana 'eguma ya'a omi'a maega ba'itaga kada toatoa, be 'inega oda nuagivila, mana ge nuanuagu wese ena lugwaeyemi. Ta ba'itagana ge eda alamaniana ma'oda ena viaqa 'aiqa 'imia, mana yatoa luvai 'imiega.

*Faulo ena vona sesebai vivine magilafudi Ega be Sela weaqidi*

<sup>21</sup> Vaina tomatou 'imiega nawale nuanuami Mosese ena luvineavo ona 'abibodei, mana onuaia vonigo ona vetunutunuqa 'idiega. Ana 'ita luvine dina adi alamani ge oda alamaniana, waisa? <sup>22</sup> \* Ta Buki Nugwenugweina simana vonigo Ebelamo ma natunavo me'ome'olotodi magilafudi itoatoa. Taha vi'oi ena tofewa kavovo adi wawa Ega 'idiega, ta wese taha vi'oi vavine yavuyavuidi moqane aqiaqina adi wawa Sela 'idiega. <sup>23</sup> \* Ta Ebelamo natuna ena tofewa Ega 'idiega ena vi'oi kavona tomatou qabuda eda vi'oi 'idewana. Ta natuna ana wawa Aisake vi'oi vavine yavuyavuidi Ebelamo moqane otaqina adi wawa Sela 'idiega. Ta ba'e vi'oi nana Yaubada ena vona fofofola vauqina 'inega. <sup>24</sup> Ba'e yani diavona kavona vona sesebai. Vivine magilafudina ive'ebe'ita Yaubada ena vona

\* 4:10: Lom 14:5; Kol 2:16 \* 4:22: Nug 16:15; 21:2 \* 4:23: Lom 9:7-9

fofofola magilafudi weaqidi, ta ana alamani ba'e: Ega vavine yoqoyoqonidi, taudi kavona bwanaga Sainai edi di'we Aleibia 'inaya, mana bwanaga nana 'inaya lova me Diu Mosese ena luvine i'ewea, ta luvine nana ana 'abiboda 'inega taudiega iyoqonidi. <sup>25</sup> Ta ba'itagana me Ielusalema taudi wese kavona bwanaga nana, mana Ielusalema ana totoayavo taudi wese Mosese ena luvine i'abi'abibodea, 'inega taudi wese yoqoyoqonidi kavona Ega. <sup>26</sup> \* Ta Sela vavine yavuyavuidi kavona Ielusalema mahalaya, mana mahala ana Ielusalema 'abaga yavuyavuina, ta Sela taudi inada. <sup>27</sup> \* Ta yani ba'e weaqina Buki Nugwenugweina simana vonaya,

“O'a vavine gagaliu,  
     una qaiawa qiduana,  
     ta bonau qiduanega una kolua.

O'a venatuna ana visiq'a ge taha  
     ana tufwa uda lutonovia.

Ta nawale natumwavo  
     ina ve'eala otaqa,  
     ta 'abiboda vivine qabudi natudiavo.”

<sup>28</sup> \* 'Inega egwavo, omi'a wese vona fofofola ana gogamayavo 'idewana Aisake, mana inana gagalina, ta 'abibodanaya Yaubada ena vona fofofola 'inega Aisake ivenatunea. <sup>29</sup> \* Ta vavine yoqoyoqonidi natudi Isimeli taina Aisake vevoalanea. Ba'e wese taha 'ebe'ita weaqida, mana Isimeli ena vi'oi kavona tomotau qabuda eda vi'oi 'idewani. Ta Isimeli taina vevoalanea, mana tauna Yaubada ena vona fofofola 'inega vi'oi. Vonahaqiaqi, ba'itagana wese 'idewani, mana ita'a kavi'oi Niboana Gwalagwalana 'inega, ta eda vetumaqana 'inega ni'a kavetunutunuqa Yaubada matanaya, 'inega luvine nugwenugweina vetunutunuqa Yaubada matanaya weaqina ana to'abibodayavo ivevoalaneda. <sup>30</sup> Ta Buki Nugwenugweina gamonaya simana vonaya, “Tofewa mevavinedi ma natudi ona 'wavinidi ina 'ifoqe! Ta vavine yavuyavuidi natudi yani qabuna na'ewea tamana 'inega, mana ge wese ana fata magilafudi 'ebeluvine nana ina 'abiluvineyei.” <sup>31</sup> 'Inega egwavo, ita'a ge Isimeli 'idewana, mana tauna tofewa yoqoyoqonidi natudi. Ta 'esi ita'a kavona Aisake, mana ita'a vavine yavuyavuidi natudiavo, ta Yaubada ni'a 'awahaqiaqieda eda vetumaqana 'inega.

## 5

*Keliso* 'inega yavuyavuida katoatoa

<sup>1</sup> Vonahaqiaqi, Iesu Keliso li'amida luvine adi vematamatayaga 'idiega, 'inega yavuyavuimi ona toatoa. 'Inega ona tovoloi'ita, ta ge wese ona 'evivi 'wafi ana da'a ana luvine ana 'abiboda 'inaya, mana luvine dina ina yoqonimi.

<sup>2</sup> Ya'a Faulo egu vona ona noqola aqiaqiea! 'Eguma omi'a 'wafi ana da'a ilivuna nawale oviaviaqia sabi vetunutunuqa Yaubada matanaya, e 'inega Iesu Keliso ena iula 'imia oveyani kavokavovoyedi. <sup>3</sup> Wese yavona aqiaqiem, 'eguma ona awafelemi 'wafi ana da'a 'inaya, 'inega wese Mosese ena luvine qabudi ona matayagedi. <sup>4</sup> Ta 'eguma nuanuami taumiega ona vetunutunuqa Yaubada matanaya luvine adi vematamatayaga 'inega, e 'inega wese Iesu 'inega taumiega oa'usi'iem. Ta wese Yaubada ena veyoluba 'inega taumiega ovetoa 'ifoqeyemi. <sup>5</sup> Ta ita'a Iesu ni'a kavetumaqanea Yaubada matanaya kana vetunutunuqa eda vetumaqana 'inega, ta yani ba'e weaqina tuta qabuna kaba'eba'e Niboana Gwalagwalana ena iula 'inega. <sup>6</sup> \* Mana tuta nana eda vetumaqana kaha'uya Iesu Keliso 'inaya, 'inega 'wafi da'ada'ana nage ge ana da'amo ge yani qiduana Yaubada matanaya. Ta yani qiduana ba'e, eda vetumaqana 'inega veyoluba vuaqina na'ifoqe 'idega.

<sup>7</sup> Omi'a lova vetumaqana ana 'eda aqiaqina 'inaya ovihila waiwai. Ta ba'e 'itaga togama awatayemi 'inega vonahaqiaqi ana 'eda ge 'inega oda vivihila, ta 'esi otauya

\* 4:26: Ibe 12:22; Ve 21:2,10      \* 4:27: Ais 54:1      \* 4:28: Nug 15:4-5; Lom 9:7      \* 4:29: Nug 21:9-10; Ion 8:35

\* 5:6: 1Kol 7:19; Gal 6:15

gei mali 'edega. <sup>8</sup> Ba'e awataya nana gebu Yaubada 'inega, mana lova tauna gabemi toa yavuyavuina 'inaya. <sup>9</sup>\* 'Inega ona 'itamaki aqiaqiemu ve'ita luveifana 'inega, mana isiti goyona 'inega ana fata falawa qabuna nagivedidinia. <sup>10</sup>\* Ta eda Kaiwabu nuagu ni'a givesimatalia be vonigo ona 'evivi 'eda aqiaqina 'inaya, ta egu ve'ita Iesu Keliso weaqina wese ona 'abibodedi. Ta toawataya nana venuana magilafu miea 'imia tauna nawale vematasabu qiduana Yaubada 'inega nalobea. <sup>11</sup> Egwavo, 'eguma 'wafi ana da'a nawale eda lulugaihiea 'inega me Diu ge wese ida vevoalanegu. Ta vonahaqiaqi, ba'itagana Iesu Keliso ena 'aliga 'etoluai 'inaya yalulugaihiea, ta ba'e weaqina inualuveifa ta ivevoalanegu. <sup>12</sup> Vonahaqiaqi, taudi ami toawataya dina luaqiaqiedi 'eguma yani qabuna ina da'a yavulei 'idiega.

<sup>13</sup>\* Egwavo, Yaubada ni'a venua'ivinemi 'inega omi'a yavuyavuimi. Ta ge ona nuanua be vonigo ami yavua nana 'inega 'wafi ana ilivuyavo 'inaya ona awafelemi. Ta 'esi luaqiaqiemu veyoluba 'inega ma emiavo ona veiuuula. <sup>14</sup>\* Mana luvine qabudi 'idiega luvine 'aideganamo bwagilidi vonaya, "Tomotau qabudi una veyolubedi 'idewani tau'u uveveyolubeu." <sup>15</sup> Ta 'eguma ba'e luvine nana ona nogea ta taumiega nuanimia ona vevedavi, e 'inega nawale emi toa ona giveluveifa otaqia.

*Yaubada Niboanina vuaqina ta 'wafi ilivuna vuaqina*

<sup>16</sup> 'Inega yavona aqiaqiemu, ami luaqiaqi be Niboana Gwalagwalana navanugwetemi, be yaqisa ge ona awafelemi 'wafi ena nuanua 'idia. <sup>17</sup>\* Mana 'wafi ena nuanua luveifadi Niboana Gwalagwalana ivevoalanea, ta wese 'idewana Niboana Gwalagwalana 'wafi ena nuanua luveifadi vevoalanedi. 'Inega yawaida 'inaya yani magilafudina ivevedavi ta eda nuanuayavo ivevelihilihiedi, 'inega tola'ai nuanuada kana viaqia, e yani diavona ge kada viaqidi. <sup>18</sup> Ta 'eguma Niboana Gwalagwalana navanugwetemi 'inega Mosese ena luvine 'ayanaya ge oda toatoa.

<sup>19</sup>\* Ta 'wafi ena nuanuayavo ni'a kahalamanidi 'idewani velamo'eno kavokavovo be, nuanua bwavubwavudi be, viaqa 'ebeiniyauyau be, <sup>20</sup> iwa'odu tokwalui 'idia be, lu'afo'a be, balavu be, fu'ela be, vevoalana be, ve'ifi'ifi be, diavilavila be, vemanuguba be, vetoatoasi'i be, <sup>21</sup> nuagovaqa be, go'ila waiwaina ana numa 'oda'odaqa be, velamo'eno kavokavovo go'ila waiwaina ana numa 'inega be ou kavokavovo 'inega, ta wese vaina ilivu luveifadi 'idiega. Lova ba'e ilivu diavona weaqidi yahawatayemi, ta wese ba'itagana yavonavona 'eviviemu: Ba'e ilivu luveifa diavona adi toviaqayavo ge adi fata ina lugu Yaubada ena 'Ebeluvine gamonaya.

<sup>22</sup> Ta 'esi 'eguma Niboana Gwalagwalana naluvineda 'inega vuaqina aqiaqidi ina 'ifoqe 'idega 'idewani, veyoluba be, qaiawa be, nuadaumwala be, bibitaqo be, veiuuula be, ilivu aqiaqina be, gwavubiga be, <sup>23</sup> ilivu nuvana, ta wese Yaubada Niboanina ena waiwaiega ada fata taudega kada 'etobodeda tuta nana 'wafi ena nuanuayavo nuanuadi ina luvineda. Ta 'eguma ba'e ilivu diavona Niboana Gwalagwalana 'inega kana viaviaqidi 'inega ge taha luvine ana fata navekotuda. <sup>24</sup>\* Ta tomeqabu ni'a ilivetuba Iesu maega 'wafi ena ilivu luveifana 'idewani nuagovaqa be vemata'eala ni'a inogedi, ta 'etoluai 'inaya itutuve'ewedi kavonaya Iesu maega ida 'aliga. <sup>25</sup> Niboana Gwalagwalana yawaida vauvauna ni'a neida, 'inega kana awafeleda ena vanugweta 'inaya. <sup>26</sup>\* 'Inega ge tauda ada wawa kana givaneyei, nage edavo kana ve'wafi siniqaiqaiedi, nage tomotau edi kulufa kana 'ita govaqidi.

## 6

*Kana veiuuula*

<sup>1</sup>\* Egwavo, 'eguma taha toga 'imiega yani luveifana naviaqia, e 'inega omi'a Yaubada Niboanina 'imia toatoa iami nana ona 'itea ta bonami biganega ta wese emi viaqa aqiaqidi

\* 5:9: 1Kol 5:6 \* 5:10: Gal 1:7; 2Kol 11:15 \* 5:13: 1Fit 2:16 \* 5:14: Luvi 19:18; Lom 13:9 \* 5:17: Lom 7:15-23 \* 5:19: 1Kol 6:9-10 \* 5:24: Lom 6:6; Kol 3:5 \* 5:26: Fil 2:3 \* 6:1: Md 18:15

'idiega ona givetunuqia. Ta ona 'itamakimi, fole omi'a wese nawale sitonova ona lobe. <sup>2\*</sup> 'Eguma ma emiavo vita taha taha ona lobedi 'inega taumiega ona iulemi. Ta 'eguma ba'e 'idewani ona viaqia, e 'inega Keliso ena luvine ni'a ovematamatayagea. <sup>3</sup> Ta 'eguma taha tomotau kavokavovo taunega ana wawa nagivaneqea ta navonaya, "Ya'a agu wawa qiduana!" e 'inega taunega u'avea. <sup>4</sup> 'Inega tomotau 'aidega 'aidega taumi emi viaqayavo weaqidi ona nuanua aqiaqi nage aqiaqidi nage luveifadi. Ta 'eguma aqiaqina 'inega ona qaiawa emi viaqa weaqidi, ta ge ona giveleleqedi mali tomotau edi viaqa maega. <sup>5\*</sup> Mana tomotau 'aidega 'aidega ena viaqayavo adi vita taunega na'avalea.

<sup>6\*</sup> Tomeqabu Yaubada ena vona 'inega iveve'itemi luaqiaqiemi be ona iuledi emi kulufa aqiaqidi taha taha 'idiega.

<sup>7\*</sup> Gebu tau'u una u'avei! Mana ge ana fata Yaubada una u'avei. Tomotau toyani ina vaoqia, e nawale wese ina bolimania. <sup>8</sup> 'Eguma taha toga ena ilivu luveifana vewanina navaoqia, e nawale vuaqina luveifana nalobe ta tauna ena toa naluveifa otaqa. Ta 'eguma taha toga ena ilivu aqiaqidi 'idiega Niboana Gwalagwalana nagiveqaiawe ta ilivu aqiaqidi vewanina navaoqidi, e 'inega tauna nawale yawai vataya nalobe. <sup>9</sup> 'Inega ge wese 'wafimi navesiniqaiqai Yaubada ena fewa weaqina ta wese ge ona lua'u, ta 'esi tuta qabuna fewa diavona kana viaviaqidi, mana nawale bolimana ana tutaya vuaqa aqiaqina kana lobe. <sup>10</sup> 'Inega 'eguma ada fata tomotau iula kana neidi, e 'inega kana iuledi, ta wese eda iula qidua va'inena Yaubada ana tovetumaqanayavo tuta qabuna kana neidi.

*Faulo ena lukafoi ta wese ena vematamagilafu 'ebel'u'ovoa*

<sup>11</sup> 'Wayavi ba'ena ona 'itedi matana qiduquadi 'idiega ya'a taugu nimaguyega ya'wayavidi. <sup>12</sup> Vaina tomotau nuanuadi omi'a 'wafi ana da'a ona 'ewea, mana nuanuadi me Diu ina 'awahaqiaqiedi, ta wese imwaniniva me Diu ina vevoalantedi 'eguma ve'ita 'aideganamo Ieisu ena 'aliga weaqida 'etoluai 'inaya ina 'abibodea. <sup>13</sup> Ta ona nuaia, taudi da'a ana to'ewayavo luaqiaqiedi be Mosese ena luvine ina 'abibodedi, ta ge ida matayagedi. Ta nuanuadi 'wafimi ona luda'ea be yaqisa taudiega adi wawa ina givaneyea ta ina vonaya, "Ima'a ema vona 'inega luda'a i'ewea ta ilugu ema qabu gamonaya." <sup>14</sup> Ta ya'a gebu ena vonavane yani ba'e weaqina, ta 'esi yani 'aideganamo weaqina nuanuagu ena vonavane, e ba'e eda Kaiwabu Keliso ena 'aliga 'etoluai 'inaya weaqina. Mana Keliso ena 'aliga 'inega egu ilivu luveifana qabudi ni'au luve'aligidi, 'inega yanogedi ge nuanuagu wese ena viaqa 'eviviedi, ta 'esi kavonaya be eda 'aliga ilivu diavona 'idiega. <sup>15\*</sup> Vonahaqiaqi, nage 'wafimi ni'a ida'ei nage ge ida da'ei, e ba'e ge yani qiduana. Ta 'esi yani qiduana ba'e, Yaubada ena viaqa 'inega ni'au give'evaunida. <sup>16</sup> Nuanuagu tomeqabu luvine ba'e ina 'abibodea nuadaumwala be wese nuakolokolo Yaubada 'inega ina lobe. Taudi Yaubada ena qabu vauvaudi.

<sup>17\*</sup> Ba'itagana be tuta maimai 'idia ge nuanuagu taha toga wese nagivevitegu ba'e yani diavona 'idiega, mana kima ba'e 'wafiguya ya'ewedi Ieisu ana 'abiboda weaqina.

<sup>18</sup> Egwavo, nuanuagu eda Kaiwabu Ieisu Keliso ena nuakolokolo niboanimi 'idia na'eno vataya. Vonahaqiaqi, egu nuanua 'idewani.

\* 6:2: Lom 15:1   \* 6:5: Lom 14:12   \* 6:6: 1Kol 9:11,14   \* 6:7: Lom 8:13   \* 6:15: Gal 5:6; 2Kol 5:17   \* 6:17: 2Kol 4:10

## Faulo ena leta me Efeso 'idia

### *Leta ana alamani weaqina*

Faulo ena leta ba'e wayavia, mana nuanuana me Efeso ina alamani aqiaqiea vonigo nawale Yaubada 'iva'ava'ata qabudi mahalaya be wese bwa'obwa'oya naluve'aidegedi, ta Keliso tauna kuyavata qabuna adi ludebana. Ta wese Faulo nuanuana navematamagila-fuyedi be ina veilivu aqiaqi 'idewani Yaubada lova tomotau venua'ivinedi ina toatoa, ta ba'e yani nana na'ifoqe 'eguma ina ve'aidega Keliso maega. Nugweta Faulo ena simana ve'aidega weaqina 'inaya vonedi ma'oda Yaubada Tamada ena tomotauyavo venua'ivina 'aiqedi, ta wese ma'oda edi luveifayavo nuataqo 'aiqedi be wese ma'oda 'etoyavua ni'a iloba 'aiqei Natuna Iesu Keliso 'inega. Ta wese ba'e leta nana 'inega Faulo me Efeso ve'itedi Yaubada ena vona fofofola adi aqiaqi na'ifoqe Niboana Gwalagwalana 'inega. Ta wese vona sesebai 'inega nuanuana nave'itedi 'ekalesia Keliso maega ive'aidega, 'inega vonedi vonigo 'ekalesia kavona 'wafi taha, ta Keliso tauna toludebana. Ta wese 'ekalesia kavona vanue ta Keliso tauna ana 'oqola. Ta wese 'ekalesia kavona taha vavine ta moqanena Keliso. Ba'e yani diavona kana 'ita aqiaqiedi Keliso ena veyoluba be, ena guba be, ena nuataqo be, ena nuakolokolo, ta wese ena tunutunuqa 'idiega. Ta wese Faulo ve'iteda ma'oda 'inega ada avia Seitani kana vewaiwai va'inea.

### *Leta gamona*

1:1-2 Vematamagilafu be lukaiwa

1:3-3:21 Keliso ta ena 'ekalesia

4:1-6:9 Toa vauvauna Keliso 'inega

6:10-20 Yaubada ena 'ebevedavi adi vefewa

6:21-24 Vona 'ebeluo'ova ta venoqi

### *Lukaiwa*

<sup>1</sup>\* Leta ba'e ya'a Faulo 'iguyega omi'a Yaubada ena tomotauyavo 'abaga Efeso 'inaya otoatoa. Ya'a Yaubada ena nuanua 'inega yavetovaletuyana ada To'etoyavua Iesu weaqina.

<sup>2</sup> Nuanuagu omi'a Yaubada Tamada be eda Kaiwabu Iesu Keliso edi nuakolokolo be wese edi nuadaumwala na'eno'eno 'imia.

'Etoyavua Keliso 'inega

<sup>3</sup>\* Egwavo, Yaubada kana awatuboya, tauna eda Kaiwabu Iesu Keliso Tamana. Tauna vona veyolubeda ta yani qabuna aqiaqina Niboanina Gwalagwalana 'inega neida mahalega, mana ita'a Keliso maega. <sup>4</sup>\* Lova Yaubada maduvenua'ivineda Keliso 'inega, ta 'abiboda bwa'obwa'o be yani qabuna 'iva'ava'aidi. 'Inega ita'a vonigo gwalagwalada ta gebu ada 'ebeve'ewamo 'iawanaya. <sup>5</sup>\* Yaubada ena veyolubega maduvenua'ivineda sabi 'awanatuneda Iesu Keliso 'inega, mana lova 'inega ena nuanua 'idewani, ta ba'e yani nana weaqina qaiawa gegoyo.

<sup>6</sup> 'Inega Yaubada kana awatuboya ena nuakolokolo qiduana weaqina, ta ba'e nuakolokolo nana nei kavovoda, mana ita'a Natu Otaqina maega. <sup>7-8</sup>\* Ta Natuna sulalinea gubaufeda eda luveifayavo 'idiega ta nuataqoda, mana tauna ena nuakolokolo qidua va'inena neida, ge ana fata be kana 'etolivei. Ta yani ba'e viaqia ena alamani qidua va'inena 'inega, mana ni'au alamani aqiaqiea toyani ada luaqiaqi. <sup>9</sup>\* Ta Yaubada ena nuanua 'wai'waivina lova 'inega ni'au lu'ifoqeyea 'idaya. Ena nuanua aqiaqina ba'e 'idewani, ta yani qabuna Iesu Keliso 'inega viaqia. <sup>10</sup>\* Ta ena nuanua nana ana alamani ba'e 'idewani: Tuta nana Yaubada ena nuanua 'wai'waivina nalu'ovoia 'inega ena

\* 1:1: Via 18:19-21; 19:1 \* 1:3: Efe 2:6 \* 1:4: Ion 15:16 \* 1:5: Ion 1:12 \* 1:7-8: Efe 2:7; Kol 1:14 \* 1:9: Lom 16:25 \* 1:10: Kol 1:16,20

'iva'ava'ata qabudi mahalaya be bwa'obwa'oya Iesu Keliso ena luvine waiwaina 'inega nava'auqidi 'aideganaya.

<sup>11</sup> \* Ita'a Iesu Keliso maega ni'a kave'aidega mana kavetumaqanea. Ta ba'e 'inega Yaubada 'awa'awa natuneda, mana lova maduvenua'ivineda ena nuanua 'idewani. Ta ba'itaga ena nuanua ana 'ebel'u'ova ni'a 'ifoqe, mana tauna ena nuanua nugwenugweina ge ana fata nanogei. <sup>12</sup> Ena nuanua ba'e mana ita'a kamadulu'ita vane Keliso 'inaya be kavetumaqanea, 'inega luaqiaqieda be Yaubada Tamada simasimatala otaqina kana awatuboya.

<sup>13</sup> Ta wese omi'a Vale Aqiaqina ami 'etoyavua weaqina Keliso 'inega ni'au onoqolia. Ta tuta nana ovetumaqanea 'inega Yaubada Niboanina Gwalagwalana neimi, tauna ami 'ebe'inana. <sup>14</sup> \* Ba'e 'ebe'ina nana 'inega kana alamania ada ve'ia nawale mahalaya Yaubada 'inega kana 'ewea lova ena vona fofofola 'idewana. Ta wese ba'e 'inega kana alamania ita'a Yaubada ena tomotauyavo ni'au gubaufeda. 'Inega wese ba'e weaqina Yaubada ena aqiaqi otaqa kana awatuboya.

### *Faulo ena noqi*

<sup>15-16</sup> Lova yanoqolia omi'a emi vetumaqana eda Kaiwabu Iesu 'inaya weaqina, ta wese emi veyoluba Yaubada ena tomotauyavo weaqidi. Ta omo'e tuta nana 'inega be ana laba ba'itagana ge wese eda lua'u venoqi weaqimi. Ta egu venoqi nana 'inaya tuta qabuna yalulukaiwa weaqimi. <sup>17</sup> \* Ta yavevenoqi Yaubada eda Kaiwabu Iesu Keliso Tamana simasimatalina 'inaya be Niboanina naneimi 'inega nuami nagiq'a'uya, be yaqisa tauna ona alamani aqiaqiea. <sup>18</sup> Ta wese yavevenoqi weaqimi be nuami na'eqa'ui be yaqisa yani qabuna aqiaqidi Yaubada ni'a 'iva'ava'aia weaqimi ona alamani aqiaqiea. Ta ge ona venuana magilafu yani diavona weaqina, mana ena gaba 'imia 'inega ni'a 'awanatunemi. Ta wese yavevenoqi ena veyoluba qiduana ona alamania, mana veyoluba nana vona fofofolea ena tomotauyavo 'idia. <sup>19</sup> \* Ta wese yavevenoqi weaqimi be yaqisa Yaubada ena waiwai otaqa ita'a ana tovetumaqanayavo weaqida ona alamani aqiaqiea. Ba'e waiwai nana 'inega Yaubada <sup>20</sup> \* Keliso 'aligege giveya'itoto 'eviviea, ta mahalaya ena 'ebetoa neia 'ataqinaya. <sup>21</sup> \* Ba'e 'inega Yaubada luvine be waiwai Keliso neia, be tauna Tamana ena tovale'ewayavo be, Seitani ena tovale'ewayavo be, niboana qabudi be, taudi adi wawa 'ena'ena'idi, ta wese yani qabuna vetoluvine va'inedi ba'itagana ta wese tuta maimai 'idia. <sup>22</sup> \* Vonahaqiaqi, Yaubada luvine be waiwai Keliso neia, 'inega yani qabudi luviluvinedi, ta wese venua'ivinea be tauna 'ekalesia ana toludebana. <sup>23</sup> \* Ta 'ekalesia taudi Keliso du'unavo. Ta 'ekalesia yawaina qabuna Keliso 'inega 'ewea, mana tauna yani qabuna yawaidi adi Tonei.

## 2

### *Iesu Keliso 'inega kayawaha 'evivi*

<sup>1</sup> \* Lova omi'a kavona 'ali'aligimi emi luveifayavo 'idiega, mana Yaubada ge oda matayagea. <sup>2</sup> \* Vonahaqiaqi, lova bwa'obwa'o ana ilivu luveifana oviaviaqidi, mana omi'a taha toluvine omatayagea, ta tauna bwa'obwa'o be mahala nuaninaya ana toluvine. Ta niboanina fewafewa Yaubada ana tonoga giwalidia 'inega ge nuanuadi Yaubada ina matayagei. <sup>3</sup> \* Tomotau qabuda lova wese 'idewani taudi, ta tuta qabuna 'wafi ena ilivu luveifana ka'abi'abibodea. Ta taudega tola'ai eda nuanua e 'inega wese kaviaviaqidi. 'Inega luaqiaqieda be Yaubada ena diavilavila kada lobe, mana ita'a luveluveifada 'idewani totoa bwa'obwa'o qabudi.

\* 1:11: Lom 8:28-29 \* 1:14: 2Kol 1:22 \* 1:17: Kol 1:9 \* 1:19: Kol 1:11 \* 1:20: Same 110:1; 2Kol 13:4; Kol 2:12 \* 1:21: Kol 1:16; 2:10 \* 1:22: Same 8:6 \* 1:23: Efe 4:10; Lom 12:5; Kol 1:18 \* 2:1: Kol 1:21; 2:13 \* 2:2: Kol 3:7; Tai 3:3 \* 2:3: Kol 3:6



4-5 \* 'Inega kavona taudega kada luve'aligida eda luveifayavo 'idiega. Ta tuta nana Yaubada Iesu giveya'itoto 'eviviea e 'inega ita'a wese giveyawaha 'evivieda ena nuakolokolo 'inega, ta wese ena veyoluba qiduana 'inega. Omo'e 'inega ba'itagana ita'a Keliso maega, mana Yaubada ena nuakolokolo qiduana 'inega 'etoyavuida. 6 \* Vona aqiaqi, lova niboanida 'ali'aligidi, ta ba'itagana mayawaidi, mana Yaubada giveya'itoto 'evivieda Keliso maega. Ta ena viaqa ba'e 'inega ni'a vetoeda mahalaya Natuna di'wenaya, mana ita'a Keliso Iesu maega. 7 'Inega tuta maimai 'inaya ena nuakolokolo qidua va'inena nave'itayea tuta nana 'etoyavua kana lobeia Keliso Iesu 'inega. 8 Mana ena nuakolokolo 'inega ni'au 'etoyavumi emi vetumaqana 'inega. Ta gebu taumiega emi viaqa 'idiega, ta 'esi Yaubada ena nei kavovo 'inega. 9 \* 'Inega ge taha toga taunega ana fata nagivaneyei navonaya, "Ya'a taugu egu viaqayavo 'idiega 'etoyavua ni'au yalobeia." 10 \* Vonahaqiaqi, ba'itagana toa aqiaqi otaqina tawa kalobeia Yaubada ena viaqa 'inega, mana Keliso Iesu 'inega give'evaunida be 'iva'ava'aida fewa aqiaqidi sabi viaqidi, mana lova ena nuanua madua'uya 'idewani.

*Iesu Keliso* 'inega kaveqabu 'aidega

11 Ta ge ona nuafania vonigo lova omi'a ge me Diu emi vi'oi 'inega otoasi'i me Diu edi qabu 'idiega. Taudi nimadiega natudiavo me'ome'olotodi 'wafidi iluluda'ea. Ba'e ilivu nana 'inega taudiega igivaneyedi, ta omi'a ivegilemi mana 'wafimi ge ana luda'amo. 12 \* Ta omo'e tuta diavona 'idia Keliso 'inega otoasi'i, be omi'a kavona wagawaga 'idewani, 'inega ge oda toa Yaubada ena tomtau vevenua'ivinidi edi qabu gamonaya. Ta wese Yaubada ena luvine be wese ena vona fofofola Buki Nugwenugweina gamonaya 'idiega otoa luluvai. 'Inega ge taha yani weaqina oda lu'ita vane, ta wese emi toa bwa'obwa'o ba'e 'inaya Yaubada ge oda alamania. 13 \* Vona aqiaqi, lova Yaubada 'inega otoa luluvai, ta ba'itagana Iesu Keliso sulalinega ni'au miemi di'wenaya. 14 \* Keliso tauna eda 'ebenuadaumwala, ta ima'a me Diu ta omi'a ge me Diu ve'aidegeda. Lova kavona taha 'ali vetoasi'ieda, ta ba'itagana Keliso taunega 'ali nana qeunia. 15 \* Mosese ena luvine 'inega vebibina ta wese vona waiwaina 'eala i'eno'eno, ta Keliso ena 'aliga 'inega ba'e yani diavona luveawalidi, ta 'esi nuanuana qabu magilafuda naluve'aidegeda tauna 'inega. Ta ba'e 'inega toadaumwala miea 'idaya. 16 \* Ta wese eda veqabu 'aidega 'inega Iesu mieda Yaubada 'inaya be tauna maega kaveiaiana 'evivi. Ta ena 'aliga 'etoluaia 'inega eda vetoatoasi'i luveawalia. 17 \* 'Inega Iesu mai ta tomeqabu itoa luluvai Yaubada 'inega lugaihidi toadaumwala weaqina, ta wese tomeqabu Yaubada di'wenaya itoatoa ba'e toadaumwala nana weaqina lugaihidi. 18 Ta Iesu ena viaqa 'inega qabuda me Diu ta wese ge me Diu ada fata kana veiaiana Tamada maega Niboanina 'aidegana 'inega.

19 \* 'Inegana omi'a ge me Diu ba'itagana ge wagawagami, mana ni'a oveiaiana Yaubada ena tomtauyavo maega, ta oveqabu 'aidega ena gade 'inaya. 20 \* Ita'a Yaubada ena vanue, ta vanue nana ana avutugu ena tovaletuyanayavo be wese ena tovesimasimanayavo. Ta Iesu Keliso tauna vanue nana ana 'oqola waiwaina. 21 \* Ta ita'a tovetumaqana kavona vanue ana yoanayavo, ta Keliso yoana diavona 'etubwetubwedi, ta ena fewa 'inega Vanue Gwalagwalana yoqonia Kaiwabu weaqina. 22 \* Ta omi'a ge me Diu wese emi vetumaqana 'inega Iesu tawa tubwemi kavona vanue 'idewani, ta vanue nana 'inaya Yaubada Niboanina ni'au ve'abaga toatoa.

### 3

*Faulo ena fewa taudi ge me Diu* 'idia

1 \* Ya'a Faulo egu lugaihi omi'a ge me Diu 'imia weaqina ia'uluguyegu vanue

\* 2:4-5: Lom 6:11-13 \* 2:6: Kol 2:12 \* 2:9: 1Kol 1:29-31; 2Tim 1:9 \* 2:10: Tai 2:14 \* 2:12: Kol 1:21; Lom 9:4 \* 2:13: Kol 1:20 \* 2:14: 1Kol 12:13 \* 2:15: Kol 2:14 \* 2:16: Kol 1:20,22 \* 2:17: Ais 57:19; Sek 9:10 \* 2:19: Efe 3:6 \* 2:20: 1Kol 3:11 \* 2:21: 1Kol 3:16 \* 2:22: 1Fit 2:5 \* 3:1: Fil 1:7,13

'ebeyoqona 'inaya yatoatoa.

<sup>2</sup>\* Ta yahalamani aqiaqiea valegu ni'a onoqolia ya'a Yaubada ena nuakolokolo 'inega agu veyoveyoya ba'e neigu be ena viaqia ami iula weaqina. <sup>3</sup>\* Ta ni'au yavonemi leta ba'e ana 'ebeve'ale 'inaya ma'oda 'inega Yaubada taunega ena nuanua 'wai'waivina lu'ifoqeyea 'iguya. <sup>4</sup> Ta 'eguma ba'e leta nana ona avo 'ovoia, e 'inega ana fata nuami na'eqa'uya ya'a egu alamani Yaubada ena nuanua Keliso weaqina. <sup>5</sup> Lova lagata nugwenugweidi Yaubada ena nuanua 'wai'waivina ge dasimana 'ifoqeyei 'idia. Ta ba'itagana Niboana Gwalagwalana 'inega give'ifoqeyea ena tovesimasimanayavo be wese ena tovaletuyanayavo gwalagwaladi 'idia. <sup>6</sup>\* Ta Yaubada ena nuanua 'wai'waivina ana alamani ba'e 'idewani: Vale Aqiaqina ana vetumaqana 'inega omi'a ge me Diu ana fata be Yaubada ena veyoluba naneimi 'idewani ima'a me Diu ni'a alobelobe. Lova ita'a weawalida kavona qabu magilafuna, ta ba'itagana ni'au kaveqabu 'aidega. 'Inega Yaubada ena vona fofofola Iesu Keliso 'inega ita'a qabuda weaqida.

<sup>7</sup>\* Yaubada ena nuakolokoloyega be wese ena waiwaiega egu fewa aqiaqi otaqina neigu, 'inega ena nuenuaga Vale Aqiaqina yasimasimana dadanea. <sup>8</sup>\* Ta ona nuaia, ya'a ge daluaqiaqiegu be to'ekalesia qabudi gamodiega Yaubada danuakolokoloyegu. Ta tua, ena nuanua 'idewani, 'inega ba'e fewa nana neigu. E 'inega omi'a ge me Diu Vale Aqiaqina yalulugaihiea 'imia be yaqisa Yaubada ena kaikaiwabu ge ena awalamo ona 'ita lobe Keliso 'inega. <sup>9</sup> 'Inega Yaubada venua'ivinegu be ena nuanua 'wai'waivina tuta 'ebeve'ale 'inega ena givesimatalia tomotau koyadi 'idia, tauna yani qabudi adi Toviaqa. <sup>10</sup> Ta Yaubada nuanuana ena 'ekalesia 'inega ena alamani qidua va'inena nave'itayea bwa'obwa'o be mahala nuanina ana toluvineavo be wese ana tovewaiwaiavo 'idia. <sup>11</sup> Ba'e Yaubada ena nuanua tuta 'ebeve'ale 'unu 'inega, ta ba'itagana eda Kaiwabu Iesu Keliso 'inega ni'au give'ifoqeyea. <sup>12</sup>\* Ta Keliso 'inega ada fata me eda giwalifatu kana 'ifoqe Yaubada 'iawanaya. Ba'e yani nana ana fata mana Keliso kavetumaqanea. 'Inega ge kana venuana magilafu eda 'ifoqe matanaya weaqina, ta 'esi me ena qaiawa na'atumieda. <sup>13</sup> 'Inega yavevenoqiemi ge ona nuavita egu toa vitana weaqina, mana vita nana 'inega yani aqiaqi otaqina ona lobe.

#### *Faulo ena venoqi to'ekalesia weaqidi*

<sup>14</sup> Ta tuta nana Yaubada ena alamani qiduana be wese ena nuanua aqiaqi otaqina weaqina yanuanua, e 'inega yasobadi ta yavevenoqi Tamagu 'iawanaya, <sup>15</sup> mana tauna 'inega gade qabudi mahalaya ta wese bwa'obwa'oya itoatoa. <sup>16</sup> Ta yanoqinoqiea tauna ena waiwai qidua otaqina ge ena awalamo Niboanina Gwalagwalana 'inega nagivewaiwaiemi emi nuanua 'inaya, <sup>17</sup>\* be yaqisa Keliso nave'abaga giwalimia emi vetumaqanega. Ta wese yavevenoqi weaqimi Yaubada ena veyoluba 'imia natabo, <sup>18-19</sup> 'inega omi'a be to'ekalesiayavo qabudi maega waiwai ona 'ewe Yaubada 'inega be yaqisa Keliso ena veyoluba ona alamani aqiaqiea ana baba be, ena kue be, ena vane be wese ena webui. Vonahaqiaqi, Keliso ena veyoluba ge taha toga ana fata ana 'etoliva dahalamanina, ta yavevenoqi weaqimi veyoluba nana ona lutonovia, 'inega Yaubada ena waiwai otaqa be ena ilivu aqiaqi otaqidi naluveagatuna'imi.

<sup>20</sup> Vonahaqiaqi, Yaubada kana awatuboya! Mana ena waiwai 'eno'eno 'idaya, ta waiwai nana 'inega ana fata yani qabuna naviaqidi weaqida. 'Eguma ita'a me eda venuana magilafu kavevenoqi 'inaya vaina yani weaqidi, e ba'e yani diavona wese ana fata. <sup>21</sup> Ta wese yavevenoqi Yaubada awatubo qiduana nalobe ita'a to'ekalesia qabuda 'idega, ta wese Keliso Iesu ena viaqayavo 'idaya 'idiega. Ta awatubo nana na'eno vataya lagata be lagata 'idia. Vonahaqiaqi, eda nuanua 'idewani.

\* 3:2: Kol 1:25    \* 3:3: Efe 1:9-10; Kol 1:26    \* 3:6: Efe 2:13,16-19    \* 3:7: Kol 1:25    \* 3:8: 1Kol 15:9-10  
\* 3:12: Lom 5:2; Ibe 10:19-20    \* 3:17: Ion 14:23; Kol 1:23; 2:7

## 4

*Keliso* 'inega kave'aidega

<sup>1</sup>\* Ya'a yoqoyoqonigu yatoatoa Vale Aqiaqina ana lugaihi weaqina. Vona aqiaqi, Yaubada ana luaqiaqi be awatubo nalobea 'idega, 'inegana yavevenoqiemu emi ilivu ona 'itamaki aqiaqiedi, mana ami gaba ge damai taha tomotau kavokavovo 'inega, ta 'esi Yaubada gabemi ta venua'ivinemi ena tomotauyavo 'idewani. 'Inega ge taha toga nave'ewemi emi ilivu weaqina, mana tuta qabuna emi ilivu tunutunuqina. <sup>2</sup>\* Me emi nuawebui ta me emi ilivu nuvana ona toatoa. Ta wese tomotau ge ona nogedi tuta nana luveifana iviaviaqia 'imia, ta 'esi veyolubega ona bibitaqomi. <sup>3</sup>\* Ta tuta qabuna Niboana Gwalagwalana 'inega ona ve'aidega, ta toadaumwala 'inega taumiega ma emiavo ona luvetuba. <sup>4</sup> Ita'a to'ekalesia ni'au kave'wafi 'aidega, ta qabuda Niboana Gwalagwalana 'aidega nana ka'ewea. 'Idewani wese yani 'aidegana weaqina me eda vetumaqana kalulu'ita vane, ta ba'e yani nana weaqina Yaubada gabeda. <sup>5</sup> Ta eda Kaiwabu ana 'aidega otaqa, ta eda vetumaqana 'aigedana ta wese eda babitaiso 'aidegana. <sup>6</sup>\* Ta wese Yaubada Tamada ana 'aidega otaqa, be tauna ada Toluvine, ta ena fewa viaviaqidi 'idega, ta wese ita'a tomotau qabuda Yaubada maega katoatoa Niboanina 'inega.

<sup>7</sup>\* Ita'a tovetumaqana qabuda Keliso waiwai neida fewa taha taha weaqina, ta tauna ena nuanua 'inega wila'a taha taha vewila'ayea to'ekalesia 'aidega 'aidega 'idaya. <sup>8</sup>\* Ba'e weaqina Buki Nugwenugweina vonaya,

“Tuta nana vaneqa debanaya

'inega voalanavo yoqoyoqonidi

'ebe'ewedi tauyedi,

ta ena tomotauyavo

wila'a taha taha neidi.”

<sup>9</sup>\* Ta Buki nana ena vona “vaneqa debanaya” tola'ai ana alamani? E ana alamani ba'e: Keliso nugweta webui mai bwa'obwa'o gamo otaqinaya. <sup>10</sup> Ta towebui nana wese vane mahala deba otaqinaya, be yaqisa tauna Yaubada ena 'iva'ava'ata qabudi naluvinedi di'we qabuna 'idia. <sup>11</sup>\* Ta Keliso 'ekalesia ana tomotauyavo 'idiega venua'ivinidi be vaina ivetovaletuyana, ta vaina ivetosimana, ta vaina Vale Aqiaqina iyawala dadanea, ta vaina ivemesinale ta wese vaina ivetove'ita. <sup>12</sup> Ba'e tofewa diavona Keliso veyoedi be Yaubada ena tomotauyavo ina 'iva'ava'aidega ena fewa weaqina, be yaqisa Keliso 'wafina taudi 'ekalesia ina tabo waiwai. <sup>13</sup>\* Ta edi fewa ba'ena ge nalua'u ana laba to'ekalesia qabuda vetumaqana 'aidegana 'inaya kana ve'aidega, ta wese edi fewa ge nalua'u ana laba eda alamani nave'aidega Yaubada Natuna weaqina. Ba'e yani magilafudi 'idiega kana tabo waiwai Keliso 'inaya, ta kana veilivu aqiaqi kavona tauna ena ilivu 'idewani.

<sup>14</sup> Ba'e 'inega ita'a eda ilivu ge wese gogama edi ilivu 'idewani. Mana lova eda alamani dawalilina 'inaya ve'ita dumadumadi be dumadumadi nidoeda, mana vaidi to'eu'au'ava edi ve'ita nua'ewa'ewana, ta gamonaya luveifana 'eno'eno. <sup>15</sup>\* Ta 'esi luaqiaqieda be veyolubega vonahaqiaqi kana veqaeyea, 'inega eda ilivu qabuna ina veaqiaqi Keliso ena ilivu 'idewani. Ita'a 'ekalesia Keliso 'wafina, ta tauna 'wafi nana debana. <sup>16</sup> Keliso ena nuanua 'inega du'u qabudi walowaloqega iluvetuba aqiaqi. Ta 'eguma du'u 'aidega 'aidega edi fewa iviaviaqi ta iveveiuula, e 'inega 'wafi nana qabuna taunega veyolubega tabotabo.

*Ilivu* 'itu'ituwaina ta vauvauna

<sup>17</sup>\* 'Inega wese Kaiwabu ana wawega yavona aqiaqiemu, ilivu luveifadi ona lua'udi, ta tomeqabu Yaubada ge ida vetumaqanea edi ilivuyavo ge ona 'abibodedi, mana taudi edi nuanua kavokavovo 'idiega ge taha vuaqa aqiaqina da'ifoqe. <sup>18</sup> Ta edi nuanua qabudi velovelovanidi, ta gebu Yaubada yawaina 'idia da'eno'eno, mana edi vedeba 'i'wana

\* 4:1: Kol 1:10 \* 4:2: Kol 3:12-13 \* 4:3: Kol 3:14-15 \* 4:6: 1Kol 12:6 \* 4:7: Lom 12:3,6 \* 4:8: Same 68:18 \* 4:9: Ion 3:13 \* 4:11: 1Kol 12:28 \* 4:13: Kol 1:28 \* 4:15: Kol 1:18; 2:19 \* 4:17: 1Fit 4:3; Lom 1:21

'inega ni'au ivekwavakwava. <sup>19</sup> 'Inegana taudi ge ida alamania tola'ai aqiaqina nage tola'ai luveifana, ta 'esi taudiega ive'ineiedi ilivu bwavubwavuna 'idia. Ta tuta qabuna ilivu luveifadi nuadi 'ewea, ta nuanuadi ilivu diavona ina luvetomanidi.

<sup>20</sup> Ta ni'a yahalamania lova ve'ita o'ewea Keliso ena ilivu aqiaqina weaqina, 'inega ge wese ilivu luveifadi ona viaqidi. <sup>21</sup> Omi'a yani qabuna Iesu weaqina ni'au onoqolia, ta wese oalamani aqiaqiea ge taha u'ava 'inaya da'eno'eno. <sup>22</sup> \* 'Inega ilivu luveifana lova oviaqidi ona nogedi, mana omo'e ilivu diavona igiveluveifa otaqimi ta taumiega ou'avemi. <sup>23</sup> \* Ta 'esi luaqiaqiemu be emi nuanuayavo ta wese giwalimi ina vevauvau 'evivi. <sup>24</sup> \* Ta wese luaqiaqiemu be ona veilivu aqiaqi ta Yaubada ena ilivu ona vetutumedi, mana tauna ena nuanua 'inega ni'a give'evaunimi, ta omi'a 'iva'ava'aimi kavona tauna 'idewani. 'Inega ona vetunutunuqa be ona vevunavunaqa ta wese tuta qabuna vonahaqiaqi 'awamiega na'ifo'ifoqe.

#### *Toa vauvauna ta aqiaqina*

<sup>25</sup> \* 'Inega 'eu'au'ava ona nogei ta 'esi ma emiavo ona vonahaqiaqi taumiega nuanimia, mana ita'a qabuda Keliso 'wafina du'unavo. <sup>26</sup> \* Ta 'eguma diami navilea ge ona awafelemi ilivu luveifana 'inaya, ta 'esi ami diavilavila ona givetunuqia, ta 'abiboda ona 'eno, <sup>27</sup> mana diavilavila nana 'inega Seitani ana fata navetoluvine 'imia. <sup>28</sup> Ta tovanawalayavo ina lua'u vanawala! Ta 'esi fewa aqiaqidi nimadiega ina viaqidi, ta fewa diavona adi ve'ia 'idiega tovelukwalukwa ina iuledi. <sup>29</sup> \* Ta ge wese sofamiega vona luveifadi ona 'inamedi, ta 'esi vonahaqiaqi otaqina tomotau adi givewaiwai weaqina ona vonayedi, be yaqisa emi vonayavo ina ve'ebeiuila tovineneqa 'idia. <sup>30</sup> \* Ta ge Niboana Gwalagwalana ona givenuavitei emi ilivu 'inega, mana tauna ami 'ebe'inana. Ta nawale taunana 'inega Yaubada na'etoyavuida tuta 'ebeluvine 'inaya. <sup>31</sup> \* 'Inega nualuveifa be, diavilavila be, gamohoqala be, vetalafululu be, ve'ae'aetoga, ta wese ilivu luveifana qabudi ona nogedi. <sup>32</sup> \* Ta 'esi taumiega ma emiavo ona veyolubemi nuakolokoloyega, ta tomotau 'ekalesia gamonaya edi luveifana ona nuataqodi, 'edewana Yaubada emi luveifayavo Keliso 'inega ni'au nuataqodi.

## 5

#### *Toa simasimatalina*

<sup>1</sup> \* Yaubada ena veyolubega ni'a 'awanatuna aqiaqiemu, 'inega ena ilivu ona vetutumea. <sup>2</sup> \* Ta taumiega ona veyolubemi 'edewana Keliso veyoluba 'aiqeda tuta nana yawaina awafelea, ta taunega vegubayea Yaubada 'inaya weaqida. Ba'e veguba nana kavona egaga taha meilana aqiaqi otaqina, ta Yaubada nuana 'onea.

<sup>3</sup> 'Inega ilivu luveifana 'idewani velamo'eno kavokavovo be, vemanuguba ta wese yubai edi ilivu 'idewani ge ona viaqidi, mana ilivu diavona ge taha wese Yaubada ena tomotauyavo daluaqiaqiedi. <sup>4</sup> Ta ge wese ona tuyeqa nage ona vona kavokavovo, nage ona ve'awafaifaila, mana vona diavona gebu daluaqiaqiemu. Ta 'esi emi vonega ona lukaiwa Yaubada 'inaya. <sup>5</sup> \* Yavona aqiaqiemu, tovelamo'eno kavokavovo be taudi edi ilivu kavona yubai 'idewani ta wese tovevemanuguba ge adi fata ina lugu Keliso be Yaubada edi 'Ebeluvine 'inaya. (Vonahaqiaqi, tovevemanuguba ge taha tuta Yaubada dahawatuboi, ta 'esi yani qabuna 'inaya 'eno'eno 'idia iwaiwa'odu.)

#### *Simatala weaqina*

<sup>6</sup> \* Ta wese 'eguma taha toga ba'e ilivu diavona weaqidi nau'avemi navonemia, "Ami fata ona viaqidi." e 'inega vona diavona ge ona vetumaqanedi, mana nawale ilivu diavona adi toviaqayavo Yaubada ana diavilavila ina lobe. <sup>7</sup> 'Inegana tou'ava diavona

\* 4:22: Lom 8:13; Kol 3:9      \* 4:23: Lom 12:2      \* 4:24: Nug 1:26; Kol 3:10      \* 4:25: Kol 3:8-9; Sek 8:16      \* 4:26: Same 4:4; Iem 1:19-20      \* 4:29: Kol 4:6      \* 4:30: Ais 63:10; 1Te 5:19; Efe 1:13-14      \* 4:31: Kol 3:8      \* 4:32: Md 6:14; 18:22-35; Kol 3:12-13      \* 5:1: Md 5:48      \* 5:2: Ibe 10:10; 'Ifo 29:18      \* 5:5: 1Kol 6:9-10; Kol 3:5      \* 5:6: Kol 2:4,8; Lom 1:18

edi viaqayavo ge wese ona viaqidi. <sup>8</sup> \* Omi'a lova velovelovana 'inaya otoatoa, ta ba'itagana ni'au ovaukamana Yaubada ena simatala 'inaya, e 'inega emi ilivu 'idiega tomotau ona ve'itayedi simatala 'inaya otoatoa. <sup>9</sup> Mana ilivu aqiaqidi be tunutunuqidi ta wese vonahaqiaqi i'ifo'ifoqe simatala nana 'inega. <sup>10</sup> Ta wese ona sali aqiaqi be yaqisa eda Kaiwabu ena nuanua ona alamani aqiaqiea, ta wese ona viaqia. <sup>11</sup> Velovelovana ana viaqa kavokavovo ge taha wese 'idiega ona viaqidi, ta 'esi ona simana 'ifoqeyedi 'atamanaya. <sup>12</sup> Tomeqabu Yaubada ge ida vetumaqanea ba'e ilivu diavona 'ebeiniyauyau iviaviaqidi. Ta ita'a tovetumaqana 'eguma ilivu diavona kana veqaevedi ada lutonova ge aqiaqina, ta 'esi kana iniyauyau. <sup>13</sup> \* Ta 'eguma simatala nana ilivu diavona guguvesimatalidi, e 'inega ada fata edi luveifana kana alamani aqiaqiedi, <sup>14</sup> \* mana 'eguma simatala nana ilivu luveifana naguvesimatalia, 'inega luveifa nana ge ana fata naoukwaiva, ta 'esi simatala nana 'inega kana 'ita aqiaqiea. Ba'e 'iuna 'inega Buki Nugwenugweina vonaya, "O'a to'eno motaiva u'enovila! 'Aligega uya'itoto, ta Keliso naguvesimataliu."

<sup>15</sup> \* 'Inega emi ilivu ona 'itamaki aqiaqiedi, ta taudi ge edi nua'eqa'umo edi ilivu ge ona 'abibodedi, ta 'esi taudi tonua'eqa'u aqiaqi ona 'abibodedi. <sup>16</sup> Ta 'eguma tuta aqiaqina ona lu'awaiea viaqa aqiaqina weaqina, e 'inega yani nana ona viaqia, mana ba'itagana tuta luveifana 'inaya katoatoa. <sup>17</sup> 'Inega gebu ona vekwavakwava, ta 'esi eda Kaiwabu ena nuanua weaqimi ona alamani aqiaqiea.

<sup>18</sup> \* Ta go'ila waiwaina ge ona numa 'oda'odaqa, mana bena'e yani 'ebeveilaqe, ta 'esi ona awafelemi Niboana Gwalagwalana 'inaya ta tauna naluveagatuna'imi be wese na'abiluvinemi. <sup>19</sup> \* 'Inega ma emiavo ona 'evosi Buki Same 'inega be, Buki 'Evoli 'inega ta wese 'evosi vauvaudi tafwalolo weaqina 'idiega, ta ma emi qaiawa giwalimiega ona 'evosi eda Kaiwabu 'inaya. <sup>20</sup> \* Ta tuta qabuna Yaubada Tamada 'inaya ona lukaiwa yani qabuna weaqidi eda Kaiwabu Iesu Keliso ana wawega.

### *Vaqivaqidi adi luvine*

<sup>21</sup> \* Ta omi'a vaqivaqimi ona veawahawafelayemi ma moqanemiavo nuanimia, ta ba'e 'inega emi 'amayaba ona ve'itayea eda Kaiwabu 'inaya.

<sup>22</sup> \* Omi'a vivine vaqivaqimi ona awafelemi moqanemiavo 'idia kavona emi awafela Keliso 'inaya 'idewani <sup>23</sup> \* mana 'oloto tauna moqanena debadi, 'idewani Keliso tauna 'ekalesia debana, ta 'ekalesia tauna Keliso 'wafina, ta Keliso tauna 'ekalesia ana To'etoy-avua. <sup>24</sup> Ta ita'a to'ekalesiyavo kahawafeleda Keliso 'inaya, e 'inega wese 'edewanina vivine ina awafeledi moqanediavo 'idia.

<sup>25</sup> \* Ta omi'a vaqivaqimi me'olotomi moqanemiavo ona veyolubedi, 'edewana Keliso ena 'ekalesia veyoluba aqiaqiea, ta weaqina awafela 'aliga 'inaya. <sup>26</sup> \* Tauna 'ekalesia nana givegwalea be givevunavunaqia babitaiso be wese Yaubada ena vona 'idiega. <sup>27</sup> \* Ba'e yani nana Keliso viaqia, mana nuanuana ena qabuyavo to'ekalesia nawale na'iteda ge bwavubwavuda ta ge wese yani luveifana 'idaya, ta 'esi vunavunaqida be gwalagwalada, ta wese ge taha ada 'ebeve'ewamo. <sup>28</sup> Ta wese 'idewana ita'a me'olotoda luaqiaqieda be moqanedavo kana veyolubedi 'edewana tauda 'wafida kaveyolubea. Mana 'eguma taha 'oloto moqanena veveyolubedi, e 'inega wese taunega veveyolubea. <sup>29</sup> Mana ge taha toga taunega 'wafina davevoalanea, ta 'esi tuta qabuna 'ita'itamakia ta veve'ainia ana iula weaqina. Ta wese 'edewana Keliso ita'a to'ekalesiyavo tuta qabuna 'ita'itamakida, <sup>30</sup> mana ita'a tauna 'wafina du'unavo. <sup>31</sup> \* "Ba'e 'iuna 'inega 'oloto tamana be inana nanogedi, ta 'esi moqanena maega ina luvetuba, 'inega magilafudi ina

\* 5:8: Efe 2:13; Kol 1:13; 1Fit 2:9; Ion 12:36 \* 5:13: Ion 3:20-21 \* 5:14: Ais 26:19; Lom 13:11 \* 5:15: Kol 4:5  
 \* 5:18: Lk 21:34 \* 5:19: Kol 3:16 \* 5:20: Kol 3:17 \* 5:21: 1Fit 5:5 \* 5:22: Kol 3:18; 1Fit 3:1 \* 5:23:  
 1Kol 11:3; Efe 1:22; 4:15 \* 5:25: Kol 3:19; 1Fit 3:7 \* 5:26: Tai 3:5 \* 5:27: 2Kol 11:2; Kol 1:22 \* 5:31: Nug  
 2:24; Md 19:5

ve'wafi 'aidega.” <sup>32</sup>\* Egu vona ba'e kavona vona sesebai 'wai'waivina, ta vona nana ana alamani Keliso be wese ita'a to'ekalesiyavo weaqida yavonavona. <sup>33</sup>'Inega wese yavona 'eviviemi, omi'a 'oloto moqanemiavo ona veyolubedi 'idewani taumiega oveveyolubemi, ta omi'a vivine moqanemiavo ona 'amayabedi.

## 6

*Ina be tama ta wese gogama adi luvine*

<sup>1</sup>\* Omi'a gogama, inamiavo ta tamamiavo ona matayagedi, mana Kaiwabu ena nuanua 'idewani. Ba'e ilivu nana luaqiaqiemi be ona viaqia. <sup>2</sup>\* Buki Nugwenugweina simana vonaya, “Tamau ta inau una 'amayabedi.” Ba'e luvine vefaibina Yaubada ena luvineavo teni 'idiega. Ta luvine nana gamonaya vona fofofola taha 'eno'eno ana tomatayaga weaqidi. <sup>3</sup>Ta vona fofofola nana ana noqola ba'e 'idewani: 'Eguma tamau be inau una 'amayabedi, “inega me eu qaiawa tuta kuena una toa bwa'obwa'oya.”

<sup>4</sup>\* Ta wese omi'a tama yavonevonemi, emi ilivu 'inega natumiavo ge ona vediav-ileviledi. Ta 'esi edi ve'ena'i nuaninaya eda Kaiwabu ena luvineavo ta ena nuanuayavo ona ve'itedi.

*Kaiwabu ta tofewa kavovo adi luvine*

<sup>5</sup>\* Omi'a tofewa kavovo emi kaiwabuyavo bwa'obwa'oya ona 'amayabedi, ta me emi gwavubiga edi nuanua ona viaqia, kavona Keliso weaqina oda fewafewa. <sup>6</sup>Tuta qabuna ona vetafe'wa waiwai emi kaiwabuyavo weaqidi. Ge taha tola'ai 'eguma ivevekovemi, nage ge ida vevekovemi, ta tua tuta qabuna me emi gwavubiga ona vetafe'wa 'idia, mana ba'e Yaubada ena nuanua. <sup>7</sup>Ta wese me emi qaiawa aqiaqi ona fewa 'idia, kavonaya Keliso weaqina oda fewafewa ta ge tomotau weaqidi. <sup>8</sup>\* Ona nuave'avinia nawale eda Kaiwabu 'inega tomotau 'aidega 'aidega, taudi tofewa kavovo ta wese taudi yavuyavuidi adi ve'ia ina 'ewea edi fewa aqiaqidi 'idiega.

<sup>9</sup>\* Ta omi'a kaiwabuyavo emi tofewa kavovo ona veilivu aqiaqiedi, ta gebu ona awavedidigedi. Ta ge ona nuafania vonigo omi'a be wese emi tofewayavo qabumi emi Kaiwabu mahalaya toatoa, ta tauna tomotau qabuda luvine 'aideganega luluvineda.

*Yaubada ena kulufa 'ebevedavi weaqina*

<sup>10</sup>Egwavo, egu ve'ita ana 'ebelu'ovoa ba'e: Eda Kaiwabu ena waiwai qidwana 'inega ona vewaiwai. <sup>11</sup>\* Ta Yaubada ena kulufa 'ebevedavi qabudi ona veaqedi be yaqisa tuta qabuna ami fata ona tovoloi'ita Seitani ena u'avayavo 'idiega. <sup>12</sup>\* Mana eda vedavi gebu tomotau otaqa maega, ta 'esi toluvine luveifadi be, tovewaiwai be, yani qabudi bwa'obwa'o velovelovaninaya itoatoa maega, ta wese bwa'obwa'o be mahala nuaninaya ana niboanayavo luveifadi maega kavevedavi. <sup>13</sup>Ba'e 'iuna 'inega Yaubada ena 'ebevedavi qabuna ona veaqedi be yaqisa tuta luveifana 'inaya Seitani ge ana fata navunuqimi, ta vedavi nana 'abibodanaya nawale me emi waiwai ona tovoloi'ita.

<sup>14</sup>\* 'Inega ona 'iva'ava'aimi ta vonahaqiaqi 'inega ona vegadi'wana, ta lumalumami ona 'aubodebodedi ilivu tunutunuqina 'inega. <sup>15</sup>\* Ta ami 'aqeyafayafa Vale Aqiaqina daumwalina ona veaqea, be yaqisa me emi 'iva'ava'ata ona tovoloi Vale nana ana yawala dadana weaqina. <sup>16</sup>Ta wese emi vetumaqana ona ve'etonugwetea tauna emi 'ebevebaba be yaqisa Seitani ena gita so'uso'udi nalutuhuyedi ta na'ebaidi 'inega ge ana fata ina 'idawemi. <sup>17</sup>\* Ta 'etoyavua 'inega debami ona 'aubwaea, ta wese Niboana Gwalagwalana ena kefata ona 'ewea, e bena'e Yaubada ena vona. <sup>18</sup>\* Tuta qabuna Niboana Gwalagwalana ena iula 'inega ona venoqi ba'e yani diavona weaqidi. Ta ge

\* 5:32: Ve 19:7 \* 6:1: Kol 3:20 \* 6:2: Luve 5:16 \* 6:4: Kol 3:21; Same 78:4; Vos 22:6 \* 6:5: Kol 3:22-23; Tai 2:9-10; 1Fit 2:18 \* 6:8: 2Kol 5:10; Kol 3:24-25 \* 6:9: Kol 4:1; Lom 2:11 \* 6:11: Lom 13:12; 2Kol 10:4 \* 6:12: 1Fit 5:8-9 \* 6:14: Ais 11:5; 59:17; 1Te 5:8 \* 6:15: Lom 10:15 \* 6:17: Ibe 4:12 \* 6:18: Lk 18:1; Kol 4:2; 1Te 5:17

matami nadune, ta 'esi taumi ma emiavo ona 'itamakimi. Ta me emi bibitaqo ge ona lua'u venoqi tovetumaqana qabudi weaqidi. <sup>19</sup>\* Ta wese ya'a weaqigu ona venoqi, be yaqisa me egu giwalifatu Vale Aqiaqina ana alamani 'wai'waivina agu fata ena vona 'ifoqeyea. <sup>20</sup>\* Ba'e Vale nana weaqina vanue 'ebeyoqona 'inaya ia'uluguyegu. 'Inega ona venoqi Yaubada 'inaya, be yaqisa ge ena mwaniniva tuta nana Vale nana ena simana 'ifoqeyea, mana ba'e agu veyoveyoya.

*Faulo ena lukafoi*

<sup>21</sup>\* Ta Tikiosi yavevetunea 'imia, be yaqisa yani qabuna ona alamania ya'a egu toa weaqina ta wese tola'ai yaviaviaqia. Tauna ia otaqigu, ta wese eda Kaiwabu ena tofewa gwavubiga 'avana. <sup>22</sup> Ta egu vetune 'iuna mana nuanuagu ona alamani aqiaqiea ma'oda atoatoa 'aiqa, ta wese Tikiosi ena vona iula 'inega nagivewaiwaiemi.

<sup>23</sup> Egwavo, egu nuanua Yaubada Tamada be wese eda Kaiwabu Iesu Keliso edi nuadaumwala be veyoluba vetumaqana maega omi'a to'ekalesia 'imia. <sup>24</sup> Ta wese nuanuagu Yaubada ena nuakolokolo nawebui omi'a tomeqabu eda Kaiwabu Iesu Keliso tuta qabuna oveveyolubea 'imia, ta veyoluba nana gebu ena awalamo.

---

\* 6:19: Kol 4:3-4; 2Te 3:1      \* 6:20: 2Kol 5:20; Fim 9      \* 6:21: Via 20:4; Kol 4:7-8; 2Tim 4:12

## Faulo ena leta me Filifai 'idia

### *Leta ana alamani weaqina*

Leta ba'ena Faulo 'wayavia me Filifai 'idia taudi Ieisu ana tovetumaqanayavo Loma ena 'ebeluvine di'we taha ana wawa Masidonia 'inaya itoatoa. Lova ena luvivila 'inaya 'ekalesia 'wadia ba'e 'abaga nana 'inaya (Viaqa da'a 16). Ta 'wayavi ba'ena ana tuta 'inaya Faulo nawale vanue 'ebeyoqona gamonaya toatoa. Ta tua me ena qaiawa toatoa, 'inega nuanuana nalukaiwa 'idia mana lova tuta nana toa vitana lobeia iula ivetunei 'inaya. Ta wese vale noqolia vonigo vaina ve'ita ge aqiaqina ni'a 'ifoqe 'ekalesia nuanidia ta vaidi ivonaya be Mosese ena luvine nugwenugweidi ina matayagedi fole ge adi fata be 'etoyavua ina lobei. Omo'e 'iuna 'inega Faulo ena leta ba'e vetunea 'idia, be yaqisa edi vetumaqana Ieisu Keliso 'inaya nagivewaiwaiea be 'inega mali ve'itayavo 'idiega ge ina be'u. Ta wese Faulo ena qaiawa be ena lukaiwa me Filifai weaqidi ba'e leta nana 'inega simanea, mana lova taudi maega iveiuiula Vale Aqiaqina ana fewa weaqina.

### *Leta gamona*

1:1-11 Lukaiwa be venoqi

1:12-26 Faulo ena toa be ana luttonova weaqina

1:27-2:18 Tovetumaqana edi toa Keliso maega

2:19-30 Faulo ena nuanua Timoti be Efafoditasi weaqidi

3:1-4:9 'Itamaki aqiaqi voaladiavo be 'ebeveilaege 'idiega

4:10-20 Faulo ena qaiawa enavo me Filifai weaqidi

4:21-23 Vona 'ebeluo'ova

### *Faulo ena vekaiwa me Filifai 'idia*

<sup>1</sup>\* Leta ba'e ya'a Faulo ta Timoti 'imega, ima'a To'etoyavua Ieisu Keliso ena tofewa. Ta leta ba'ena a'wayavia waiwai omi'a me Filifai Yaubada ena tomotauyavo 'imia, ta wese 'ekalesia ana toludebanayavo be emi dikoniavo 'idia.

<sup>2</sup> Egu nuanua Tamada Yaubada be eda Kaiwabu Ieisu Keliso edi veyoluba be wese nuadaumwala ina neimi.

### *Faulo ena venoqi*

<sup>3</sup> Tuta nana yanuaimi 'inega yalulukaiwa egu Yaubada 'inaya. <sup>4</sup> Ta egu venoqi diavona tuta qabuna me egu qaiawa giwaliguya, <sup>5</sup> mana omi'a emi vetumaqana 'unu 'inega, be ana laba ba'e 'itagana ovetoiula aqiaqi 'iguya Vale Aqiaqina ana veyawala weaqina.

<sup>6</sup>\* Yaubada fewa aqiaqidi ni'a ve'aledi 'imiega, ta yahalamani aqiaqiea wese 'idewani naviaqa 'aiqa ana laba Ieisu Keliso ena 'aubena qiduana 'inaya na'evivi namai. Ta 'aubena nana 'inaya fewa diavona nalu'ovoidi.

<sup>7</sup> Vonahaqiaqi, luaqiaqiege be ena qaiawa weaqimi, mana omi'a nuagu o'ewea. Omi'a qabumi oiuiulegu Yaubada ena fewa weaqina, mana ya'a vanue 'ebeyoqona 'inaya yatoatoa. Ta wese lova oiulegu tuta nana yavuyavuigu yatoatoa ta Ieisu Valena yalulugaihiea tomotau 'idia. Ta wese omo'e tuta nana 'inaya vaidi tomotau Vale nana ivegeqea ta ya'a yavata'ita'iea, e 'inega ge oda nogegu, ta 'esi iula yalobeia 'imiega. E ba'e weaqina Yaubada ena veyoluba qiduana qabuda 'idaya. <sup>8</sup> Yaubada ni'a alamani aqiaqiea nuanuagu ena 'itemi, mana qabumi yaveveyolubemi 'idewani Keliso ena veyoluba 'imia.

<sup>9</sup> Ta yavevenoqi emi veyoluba taumiega nuanimia naveve'ena'i, 'inega emi alamani be emi nua'eqa'u wese naveve'ena'i. <sup>10</sup>\* Mana nuanuagu ona alamani aqiaqiea ma'oda ona venua'ivina 'aiqa yani taha taha weaqidi, be yaqisa ona veilivu aqiaqi ilivu vunavunaqidi 'idiega, e 'inega gebu ami 'ebeve'ewamo ana laba Keliso na'evivi namai. <sup>11</sup> Ta nuanuagu Ieisu Keliso 'inega ilivu tunutunuqina vuaqina naluveagatuna'imi, 'inega weaqimi tomotau Yaubada ina awatuboya be ina 'awahaqiaqiea.

\* 1:1: Via 16:12-40 \* 1:6: 1Kol 1:8 \* 1:10: 1Te 5:23



*Faulo ena qaiawa Keliso Valena weaqina*

<sup>12</sup> Egwavo, nuanuagu be ona alamani aqiaqiea vonigo vita diavona ni'a yalobedi ive'ebeiula Vale Aqiaqina ana veyawala dadana tomotau 'idia weaqina. <sup>13</sup>\* Mana toluvine qiduana Sisa ena 'abaga kaikaiwabuna 'inaya 'abaga nana ana to'itamakiavo ta wese tomotau qabudi ba'idia Loma itoatoa ni'a inoqolia vonigo Keliso weaqina ia'uluguyegu vanue 'ebeyoqona gamonaya. <sup>14</sup> Ta agu yoqona ba'e 'inega Kaiwabu ana tovetumaqana qabudi ivewaiwai ta me edi giwalifatu Yaubada ena vona ilulugaihiea.

<sup>15</sup> Vaidi tomotau ive'ifi'ifiegu 'inega Iesu Valena ilulugaihiea, ta vaina wese edi nuanua aqiaqinega Vale nana ilulugaihiea. <sup>16</sup> Ta tolugaihi aqiaqi taudi ilulugaihi mana iveveyolubegu, ta wese ni'au ialamania eda Kaiwabu miegu ba'idia Vale Aqiaqina ana vata'ita'i weaqina. <sup>17</sup> Ta taudi tove'ifi'ifi ge taha 'iuna aqiaqina 'inega ida lulugaihi, ta 'esi nuanuadi adi wawa ina givaneyea be egu toa ba'idia vanue 'ebeyoqona 'inaya ina givevitea.

<sup>18</sup> Ta ge taha tola'ai 'eguma ve'ifi'ifiega nage veyolubega Keliso Valena ilulugaihiea, mana Iesu Keliso weaqina ilulugaihiea. E ba'e weaqina tuta qabuna yaqaiqaiawa. <sup>19</sup>\* Mana yahalamania emi venoqi be Iesu Keliso Niboanina ena iula 'idiega nawale vita ba'e 'inega 'etoyavua ena lobeaa.

*Faulo ena toa 'iuna weaqina*

<sup>20</sup> Egu nuanua waiwaina be ge taha yani 'ebeiniyauyau ena viaqi, ta 'esi nuanuagu tuta qabuna me egu giwalifatu ena tovololo'ita Keliso weaqina kavona lova 'idewani. Ta wese nuanuagu egu viaqayavo 'idiega Keliso awatubo nalobeaa 'eguma mayawaigu, nage ena 'aliga. <sup>21</sup>\* Vonahaqiaqi, 'eguma bwa'obwa'oya mayawaigu yatoatoa, e 'inega Keliso weaqina yatoatoa, mana tauna yawaigu 'iuna. Ta ge taha luveifana 'eguma eda 'aliga, mana yani aqiaqi otaqina ena lobeaa. <sup>22</sup> Ta 'eguma bwa'obwa'oya yatoatoa ta yafewafewa Keliso weaqina 'inega vuaqa aqiaqidi 'iguyega i'ifo'ifoqe mai. 'Inega ge eda alamania tola'ai luaqiaqiegu. <sup>23</sup>\* 'Inega yani magilafudina weaqidi yanuanua waiwai. Nuanuagu be bwa'obwa'o ba'e ena nokea ta Keliso maega ana toa, mana toa aqiaqi otaqina. <sup>24</sup> Ta wese luaqiaqiea 'eguma weaqimi mayawaigu bwa'obwa'oya eda toatoa sabi iulami. <sup>25</sup> 'Inega yahalamania aqiaqiea omi'a ya'a maega kana toatoa be yaqisa ena iulemi be ona qaiawa emi vetumaqana Keliso 'inaya weaqina. <sup>26</sup> 'Inega tuta nana ena 'evivi mai 'imia e ona qaiawa qidua va'ina Iesu Keliso ena viaqa 'iguya weaqina.

*Ona toa 'idewani mahala ana qabuyavo edi toa*

<sup>27</sup>\* Ta yani qiduana ba'e, luaqiaqiemi be ona 'itamaki aqiaqiemi be yaqisa emi ilivu 'idiega tomotau Keliso Valena ina 'awahaqiaqiei. Ta 'eguma nawale ena vayausimi nage vale mimo ena noqolia, 'inega ena alamania omi'a otovololo'ita emi nuanua 'aideganega ta ovevetafe'wa Vale Aqiaqina weaqina. <sup>28</sup> Ta gebu wese Keliso ana aviayavo ona mwaninivedi, ta 'esi me emi giwalifatu ona toatoa. Yani ba'e 'inega ina alamania taudi nawale ina veilaqe vataya. Ta 'esi omi'a ami 'etoyavua ona lobeaa Yaubada 'inega, <sup>29</sup>\* mana ni'au awafelemi vetumaqana Keliso 'inaya, ta wese awafelemi be visiqaa ona lutonovia Keliso weaqina. <sup>30</sup> Lova egu toa vitana ta wese egu visiqaa Keliso weaqina o'itea, ta ba'itagana nawale onoqonoqolia 'idewani yatoatoa. Ta ba'itagana omi'a wese vita be visiqaa 'idewana olobaloba 'aiqea Keliso weaqina.

## 2

*Ve'aidega ona lobeaa nuawebui 'inega*

<sup>1</sup> Omi'a Keliso maega ni'a ove'aidega ta ba'e 'inega ni'a ovewaiwai. Ta wese Keliso ena veyoluba qiduana weaqimi 'inega ni'a givenuahaqiaqiemi. Ta Niboana Gwalagwalana maega ni'a oveiaiana, ta wese nuakolokolo be veyoluba nuanimia ni'a 'eno'eno.

\* 1:13: Via 28:30 \* 1:19: 2Kol 1:11 \* 1:21: Gal 2:20 \* 1:23: 2Kol 5:8 \* 1:27: Efe 4:1; 1Te 2:12 \* 1:29: Via 16:19-40

<sup>2</sup> Vonahaqiaqi, ba'e yani diavona ni'a i'ifoqe 'imia, e 'inega nuami 'aideganega be taumi emi veyolubega be wese emi fewa luvetuba 'inega ona giveqaiawa otaqigu. <sup>3\*</sup> 'Inega ge ona nuanua taumi weaqimi ta wese ge ona nuavane. Ta 'esi luaqiaqiemu be ma emiavo ona giwebuemi ta mali tomotau weaqidi ona nuanua. <sup>4\*</sup> Ta ge taumimo emi toa aqiaqi weaqina ona nuanua. Ta 'esi mali tomotau edi toa weaqina wese ona nuanua ta ona iuledi.

*Isisu ena nuawebui*

<sup>5</sup> Ta omi'a luaqiaqiemu be emi nuanua ta wese emi viaqayavo ina ve'aidega 'idewani Isisu ena nuanuayavo be wese ena viaqayavo.

<sup>6\*</sup> Vonahaqiaqi, Isisu tauna Yaubada 'idewani,  
ta ena 'ebetoa kaikaiwabuna  
mahala 'inaya ge dakafi'i'ihia.

<sup>7\*</sup> Ta 'esi Isisu taunega vetomotau kavovo,  
ta vetofewa tomotau 'idewana  
tuta nana mai bwa'obwa'oya.

<sup>8\*</sup> Mai tomotau 'idewani ta taunega giwebuiea  
ta yani qabuna matayagea,  
ta wese 'aliga ana 'eda 'etoluai 'inaya matayagea.

<sup>9\*</sup> Omo'e 'inega Yaubada givaneqea  
mahala deba otaqinaya ta wawa neia,  
tauna wawa nana ge taha wese wawa 'idewana.

<sup>10\*</sup> 'Inegana tomotau qabuda totoa mahala  
be totoa bwa'obwa'o ta wese to'aliga bwa'obwa'o 'ayanaya  
tuqatuqadega kana sobadi  
ta kana iwa'odu Isisu ana wawa 'inaya.

<sup>11\*</sup> Ta qabuda 'awadega kana simana 'ifoqe  
Isisu Keliso tauna Kaiwabu.

Ba'e 'inega Yaubada Tamada kana awatuboya.

*Ilivu simasimalidi kana ve'itayea totoa bwa'obwa'oya weaqidi*

<sup>12</sup> Egwavo, lova omi'a ya'a maega katoatoa 'inega tuta qabuna egu ve'ita o'abiboda aqiaqiedi. Ta ba'itaga yatoa luluvai 'imiega ta luaqiaqiemu be ona 'itamaki aqiaqiemu ta me emi 'amayaba be me emi mwaniniva ona vetafe'wa waiwai ami 'etoyavua weaqina, <sup>13</sup> mana Yaubada ena nuanua ni'a a'uya giwalimia. 'Inegana nuamuami tauna ona matayagea. Ta wese waiwai neimu be yaqisa ami fata ena nuanua ona viaqia sabi giveqaiawana.

<sup>14</sup> Ta emi fewa qabudi 'idia ge ve'ae'aetoga 'inega nage vetalabudabuda 'inega ona viaqidi, <sup>15\*</sup> be yaqisa ge taha toga ana fata nave'ewemi. Omi'a Yaubada natunavo ge taha yani luveifana ona viaqi, mana omi'a tomotau ge tunutunuqidi be wese ge aqiaqidi nuanidia otoatoa. 'Inega ona tovolu matadia ta ona simatala kavona 'wadi'wadima mahalaya weaqidi. <sup>16</sup> Vona mayawaina ona simana 'ifoqeyea tomotau 'idia be yaqisa tuta nana Isisu na'evivi namai ya'a ena qaiawa qiduana, mana 'eguma vona nana ona kafi'i'ihia 'inega egu fewa weaqimi ge daveyani kavokavovo. <sup>17</sup> Omi'a emi vetumaqana 'inega taumiega yawaimi oawafela aqiaqiedi emi fewa Yaubada weaqina. Ta ya'a 'eguma yawaigu eda awafelei 'aliga 'inaya emi vetumaqana weaqina, e nawale ena qaiawa qiduana omi'a weaqimi. <sup>18\*</sup> 'Inegana omi'a wese ya'a maega kana qaiawa.

*Timoti be Efafoditasi weaqidi*

\* 2:3: Gal 5:26 \* 2:4: 1Kol 10:24 \* 2:6: Ion 1:1-2; 17:5 \* 2:7: 2Kol 8:9; Ion 1:14 \* 2:8: Ibe 5:8; 12:2  
\* 2:9: Via 2:33; Efe 1:20-21; Ibe 1:3-4 \* 2:10: Lom 14:11 \* 2:11: Lom 10:9 \* 2:15: Dan 12:3; Fil 1:10 \* 2:18:  
Fil 3:1; 4:4

<sup>19</sup> 'Eguma eda Kaiwabu Ieisu ena nuanua 'idewani ya'a egu nuanua, e 'inega nawale Timoti ena vetunei nawai 'imia. Ta tuta nana na'evivi namai 'iguya ta valemi ena noqolia, 'inega ena qaiawa qiduana. <sup>20</sup> Ge taha toga 'idewani Timoti maega ada toatoa. Tauna tuta qabuna nuanua qiduana ma'oda otoatoa 'aiqa. <sup>21</sup> \* Ta tomotau qabudi taudimo weaqidi inuanua, ta ge Ieisu Keliso ena nuanua weaqina. <sup>22</sup> Ta ni'au oalamaniana Timoti ena fewa aqiaqidi, mana taunega ve'itayedi matamia. Tauna kavona natu otaqigu, ta maega afewafewa Vale Aqiaqina weaqina. <sup>23</sup> Nuanuagu ena vetunei nawai 'imia, ta nugweta nuanuagu ena alamani aqiaqiea tola'ai nawale na'ifoqe 'iguya. <sup>24</sup> Ta eda Kaiwabu venuaha'u aqiaqiegu be tuta goyona ena wai 'imia.

<sup>25</sup> \* Ta ana 'ita emi tovale'ewa Efafoditasi lova ovetunei mai sabi iulagu ena vetune 'eviviei nawai. Tauna ia otaqigu be togwavubiga ta wese tovedavi taha Ieisu weaqina. <sup>26</sup> Ta ena 'evivi 'iuna, mana nuanuana qiduana na'itemi. Ta wese nuana vita mana ena vihiqa valena onoqolia. <sup>27</sup> Vonahaqiaqi, vihiqa qiduana 'ewea ta tuta goyona da'aliga. Ta Yaubada nuakokoloyea, ta wese ya'a nuakokoloyegu, mana 'eguma yawaina dagumwala nuagu davita qiduana. <sup>28</sup> Omo'e 'inega nuanuagu qiduana lukwayavonega iada ena vetunei nawai be yaqisa tuta nana ona 'ita 'eviviea ona qaiawa, ta wese ya'a egu nuavita tufwana nameaqana. <sup>29</sup> 'Inega Keliso ena veyolubega me emi qaiawa ona 'ebe'ewea. Vonahaqiaqi, tomotau 'idewani Efafoditasi ona 'amayabedi, <sup>30</sup> mana tauna yawaina awafelea veilage 'inaya Keliso ena fewa weaqina, ta tuta goyona da'aliga. Ta tua, tuta nana 'inaya vetafe'wa waiwai sabi iulagu, mana omi'a otoa luluvai, 'inega ge ami fata oda iulegu.

### 3

#### *Faulo ena simana luvine nugwenugweina weaqina*

<sup>1</sup> Egwavo, ona qaiawa, mana omi'a Ieisu Keliso maega! Ge wese daluveifa 'eguma lova ni'au ya'wayavia 'imia yani ba'e weaqina ta nuanuagu wese ena lu'eviviea. Ta 'esi egu vona ba'e navabodebodemi yaqisa ge ona be'u.

<sup>2</sup> 'Inega ona 'itamaki aqiaqiemi tomotau luveluveifadi 'idiega. Taudi 'wafi ana toda'a kavona kedewa sasasadi nuanuadi ina giveluveifemi <sup>3</sup> \* Ta 'eguma Yaubada 'inaya kaiwaiwa'odu Niboanina 'inega be, 'eguma Ieisu Keliso ana 'aidega kahawahawatuboya, ta wese 'eguma bwa'obwa'o ana ilivuyavo ge kana vetumaqanedi, e omo'e 'inega kahalamani aqiaqiea luda'a aqiaqi ni'a ka'ewea, mana ni'a kaveiaiana Ieisu maega.

<sup>4</sup> \* Vonahaqiaqi, agu fata be bwa'obwa'o ana ilivu weaqina eda vonavane, mana ya'a agu wawa tomotau qabudi adi wawayavo ludebana va'inedi. <sup>5</sup> \* Ya'a Isileli 'olotogu ta Beniamina ena gade 'inega. Ta ya'a Ibeliu aqiaqi, mana 'wafigu ida'ea 'aubena 'eita (8) egu vi'oi 'abibodanaya. Ta wese Falisi edi qabu gamonaya yalugu ta edi luvine qabudi ya'abiboda aqiaqiedi. <sup>6</sup> \* Omo'e 'inega Ieisu ana tovetumaqanayavo qabudi yavevoalanedi. Ta me Diu edi luvine qabudi yamatayagedi, 'inega ge taha agu 'ebeve'ewamo.

<sup>7</sup> \* Lova egu ilivu diavona ba'e yavonaya be yani qiduana weaqigu. Ta 'esi ba'itagana yani diavona iveyani kavokavovo, mana Keliso ena viaqayavo 'iguya 'idiega yaveaqiaqi otaqa. <sup>8</sup> Vonahaqiaqi, egu Kaiwabu Ieisu Keliso ana alamani yani aqiaqi otaqina, ta alamani nana bwa'obwa'o ana kaikaiwabu veaqiaqi va'inedi. 'Inega kaikaiwabu dina ya'awa yani kavokavovoyedi. 'Inega Keliso nana weaqina yani qabudi yanogedi. Ta 'esi nuanuagu Keliso namo, <sup>9</sup> \* be tauna maega ana toatoa. Ta gebu vonigo taugu egu ilivu tunutunuqina 'inega nage Mosese ena luvineyega eda vetunutunuqa Yaubada matanaya. Ta 'esi egu vetumaqana Keliso 'inaya 'inega Yaubada 'awatunutunuqegu. <sup>10</sup> \* 'Inega ya'a nuanuagu Keliso ena alamani aqiaqiea, ta ena ya'itoto 'evivi 'aligega ana waiwai ena

\* 2:21: 2Tim 4:10 \* 2:25: Fil 4:18 \* 3:3: Lom 2:29 \* 3:4: Via 22:3; 2Kol 11:18 \* 3:5: Lk 1:59; 2Kol 11:22; Via 23:6 \* 3:6: Via 8:3 \* 3:7: Md 13:44-46 \* 3:9: Lom 3:21-22 \* 3:10: Lom 6:3-5; 8:17

lutronovia. Iesu ena yuvaqa be wese ena 'aliga 'iudi mana Tamana ena nuanua matayagea ta weaqida 'aliga. 'Inega ya'a wese yahawafelegu yuvaqa be 'aliga 'idia 'idewani Iesu, mana ena nuanua yavematamatayagea. <sup>11</sup> 'Inega yanuaia nage wese ya'a nawale Yaubada nagiveya'itoto 'eviviegu 'aligea.

*Kana vetafe'wa waiwai be yaqisa ve'ia aqiaqina kana lobe*

<sup>12</sup> \* Ya'a Iesu Keliso ena ilivu nawale ge eda 'ewa aqiaqiedi, ta wese nawale ge eda vetunutunuqa aqiaqi. Lova ni'au Iesu Keliso 'ebe'ewegu 'inaya, 'inega 'itaga yalulu'ita vane ta yavevetafe'wa waiwai ve'ia aqiaqina weaqina. <sup>13</sup> Egwavo, yavona aqiaqiemi ba'e ve'ia nana nawale ge eda 'ewei. Ta nuanuagu qiduana ve'ia nana ena lobe. 'Inega ilivu nugwenugweidi ge nuagu ena nuaidi ta 'esi nuanuagu ena nuafanidi, ta tola'ai 'iawaguya 'eno'eno weaqina yavevetafe'wa. <sup>14</sup> \* Yaubada ena gaba 'inega nuanuagu egu vetafe'wa waiwai ana ve'ia eda 'ewei Iesu Keliso 'inega. Ta ve'ia nana ana alamani ba'e: Nawale toa aqiaqina ta wese toa vataya ena lobe mahalaya.

<sup>15</sup> \* Ta nuanuagu qiduana ita'a qabuda me eda vetumaqana waiwaina Keliso 'inaya luaqiaqieda 'eguma eda nuanua nave'aidega. Ta 'eguma vaina emi nuanua dumadumana, e 'inega Yaubada ana fata nuami nagiqa'udi. <sup>16</sup> Ta luaqiaqieda be eda vetunutunuqa Yaubada matanaya ana ve'ita Keliso 'inega kana kafi'i'ihia.

<sup>17</sup> \* Egwavo, egu ilivu ona vetutumea, ta taudi lova ilivu aqiaqina ni'au ave'itedi omi'a wese 'idewani ona ve'ilivu 'aiqa. <sup>18</sup> 'Inega tola'ai lova yavonayea 'imia wese ba'itagana ma mataelugu yavonavona 'evivie. Tomotau qabudi edi ilivuyega Keliso ivevoalanea. Ge nuanuadi ena 'aliga 'etoluai 'inaya valena ina 'awahaqiaqiea. <sup>19</sup> \* Taudiega iawafeledi 'wafi ena nuanuayavo 'inaya, kavona 'wafidi edi yaubada. Ta edi ilivu 'idiega taudiega iawalagaidi, ta 'esi luaqiaqiedi be ina iniyauyau, mana bwa'obwa'o ana qaiawa weaqina tuta qabuna inuanua. 'Inega Yaubada naluveawalidi 'aiwe 'ala'alata 'inaya. <sup>20</sup> \* Ta vonahaqiaqi, ita'a mahala ana tomotauyavo, 'inega tuta qabuna me eda qaiawa Iesu Keliso kaba'eba'eyea namai mahalega sabi 'etoyavuida. <sup>21</sup> \* Ta tuta nana namai 'inega 'wafida dawalilidi ta wese 'equeqeunidi nagive'evaunidi, ta 'inega 'wafida adi 'ita 'idewani Iesu 'wafina ana 'ita aqiaqi otaqina ta simasimalina. Yani ba'e naviaqia ena waiwai 'inega, mana tauna nawale yani qabudi naluvinedi be navewaiwai va'inedi di'we qabudi 'idia.

#### 4

<sup>1</sup> \* Egwavo ye, ni'au nuagu o'ewea ta yaveveyolubemi mana omi'a egu 'ebeqaiawa. 'Inega tola'ai ni'au yavonemi nuanuagu ona 'abibodedi, be vona diavona 'idiega ona tovoloi'ita eda Kaiwabu 'inaya, mana tauna omi'a maega.

*Faulo ena gaihi to'ekalesia 'idia*

<sup>2</sup> Ta vivine magilafudi adi wawa Iudia be Sinitiki yavenoqi 'idia yavonedi, "Ge wese ona ve'ae'aetoga ta 'esi ona veiaiana 'evivi, mana omi'a wese eda Kaiwabu ena tomotauyavo."

<sup>3</sup> \* Ta iagu o'a Keliso ena tofewa gwavugwavubigau, yanoqieu be vivine diavona una iuledi, mana lova taudi maega aveiuiula Vale Aqiaqina ana yawala tomotau 'idia weaqina. Ta wese Kelemeniti be vaina wese agu toiulayavo maega afewafewa. Taudi adi wawayavo 'waya'wayavidi 'eno'eno Yawai ana Buki gamonaya.

<sup>4</sup> Tuta qabuna ona qaiawa, mana omi'a eda Kaiwabu maega. Ta wese yavona 'evivie, ona qaiawa!

<sup>5</sup> \* Luaqiaqiemi be tomotau qabudi emi ilivu nuvana ina 'itea, mana eda Kaiwabu ena 'evivi mai ni'au vadi'wedi'weda.

\* 3:12: 1Tim 6:12,19 \* 3:14: 1Kol 9:24 \* 3:15: 1Kol 2:6 \* 3:17: 1Kol 4:16 \* 3:19: Lom 16:18 \* 3:20: Efe 2:6,19 \* 3:21: 1Kol 15:28,42-53 \* 4:1: 1Te 2:19-20 \* 4:3: Lk 10:20 \* 4:5: Ibe 10:37; Iem 5:8-9

<sup>6</sup>\* Ge taha tola'ai weaqina ona nuanua, ta 'esi luaqiaqiemi be me emi lukaiwa ona venoqi Yaubada 'inaya yani qabuna weaqidi. <sup>7</sup>\* 'Eguma ba'e 'idewani ona viaviaqa 'aiqa, e 'inega Yaubada ena nuadaumwala ona lutonovia, ta nuadaumwala nana tomotau edi nuanua veqidua va'inedi. Ta omi'a Iesu Keliso maega, 'inega giwalimi be wese nuami ina daumwala.

<sup>8</sup> Egwavo, taha wese gaihi ena neimi nuanuagu emi nuanuayavo ona a'udi yani aqiaqi otaqidi 'idia, be yani tunutunuqidi ta vunavunaqidi 'idia, be yani venua'ona'onadi weaqidi, be yani veveyolubadi weaqidi, be wese yani 'ama'amayabadi be 'ebeawatubo weaqidi ona nuanua aqiaqi. <sup>9</sup>\* Omi'a egu ve'itayavo ni'a o'itedi be, egu vonayavo ni'a onoqolidi ta wese tola'ai yaviaqidi ni'a oalamanidi, ta yani qabudi omi'a wese ona viaviaqidi, 'inega Yaubada ena nuadaumwala ona lobe.

*Faulo ena lukaiwa me Filifai* 'idia edi nei kavovo weaqina

<sup>10</sup> Vonahaqiaqi, lova tuta qabuna oiuiulegu ta onuakolokoloyegu, ta vaina tuta nuaninaya ge ami fata. 'Inega ba'itagana eda Kaiwabu ni'au giveqaiawegu, mana wese onuakolokolo 'eviviegu lova 'idewani. <sup>11</sup> Ba'e egu vona weaqina ge ona vonaya be Faulo ge taunega ana fata naiulei, mana toa qabudi 'wamiodi ni'a ya'ewedi, 'inega yani qabuna agu fata. <sup>12</sup> Tuta vitana 'idia nage tuta 'ebeqaiawa 'idia, nage ma gamotubuqigu, nage ma botanigu, nage kaikaiwabugu nage wese lukwalukwagu, ta yani qabuna ni'au yalutonovidi. <sup>13</sup>\* 'Inega yani qabuna agu fata, mana Yaubada 'inega tuta qabuna waiwai ya'ewe'ewea.

<sup>14</sup> Ta ni'au egu toa vita ba'e ogivemeaqania emi iula 'inega, ta weaqina yavekaiwa agona 'imia. <sup>15</sup>\* Ta ni'au oalamanida omi'a me Filifai tuta nana Vale Aqiaqina yamadumiea 'imia mane 'inega oiulegu tuta nana di'we Masidonia yanogea. Ta ge taha wese 'ekalesia di'we nana gamonaya ida iulegu, ta omi'a ami 'aidegamo oiulegu. <sup>16</sup> Ta wese lova tuta nana 'abaga Tesalonaika 'inaya yatoatoa 'inega tuta magilafudi oiulegu. <sup>17</sup> Egu vona diavona adi alamani ba'e: Ge nuagu luvine ena neimi be wese iula ona vetunei 'iguya, ta 'esi nuanuagu qidua ana ve'ia aqiaqi ona lobe emi nuakolokolo 'iguya weaqina. <sup>18</sup> Ta emi nei kavovo qidua otaqina lova Efafoditasi miea 'iguya ni'au yalobe, ta nawale mane qidua 'eno'eno. Ta nei kavovo nana kavona emi guba Yaubada 'inaya, ta meilana aqiaqi otaqina yaoqia, ta weaqina qaiawa. <sup>19</sup> Egu Yaubada yani qabuna naneimi 'wafimi weaqina be, niboanimi weaqina be wese emi toa weaqina, mana tauna yani diavona ana fata naneimi ena kaikaiwabu qidua va'inena Keliso Iesu 'inega. <sup>20</sup> 'Inega eda Yaubada Tamada kana awatuboya tuta qabuna 'idia ge ena 'ebel'ovoamo! Vonahaqiaqi, eda nuanua 'idewani.

*Faulo ena lukafoi*

<sup>21</sup> Egu veyoluba Yaubada ena tomotauyavo qabudi 'idia. Ta wese egwavo ba'ade maega atoatoa edi veyoluba 'imia. <sup>22</sup> Ta Yaubada ena tomotauyavo taudi ifewafewa toluvine qidua Sisa ena vanuea edi veyoluba qidua 'imia, ta wese 'idewani tovetumaqana qabudi edi veyoluba ivetunea 'imia.

<sup>23</sup> Nuanuagu eda Kaiwabu Iesu Keliso ena veyoluba omi'a maega. Vonahaqiaqi, egu nuanua 'idewani.

\* 4:6: Md 6:25-34; Kol 4:2    \* 4:7: Ais 26:3; Ion 14:27; Kol 3:15    \* 4:9: Lom 16:20    \* 4:13: 2Kol 12:10    \* 4:15: 2Kol 11:9

## Faulo ena leta me Kolose 'idia

### *Leta ana alamani weaqina*

Tuta nana Faulo 'abaga qiduana Loma 'inaya toatoa vanue 'ebeyoqona 'inaya, 'inega leta ba'e 'wayavia me Kolose weaqidi. Ta wese taha leta 'wayavia Filimoni weaqina, mana tauna Kolose 'olotona, 'inega leta magilafudi Tikiosi be wese Onesimo itauyedi Kolose 'inaya. 'Abaga Kolose kana lobeia Eisia ena di'we gamonaya ge luluvai 'abaga Efeso 'inega. Kolose ana tovetumaqanayavo ge Faulo ena lugaihi 'inega edi 'ekalesia ida 'abia. Ta 'esi tuta nana Faulo toatoa Efeso 'inaya e 'inega iana Efafasi vetunei tauya sabi lugaihi 'idia, 'inega tovetumaqana adi qabu veqidua. (1:7) Efafasi tauna 'abaga magilafudi 'idia fewa Kolose di'wenaya, adi wawa Lodisia ta wese Ilafolisi. (4:13) Ta ge taha tuta 'abaga diavona adi tomotauyavo Faulo da'itedi, 'inega weaqidi nuanua ta wese vevenoqi. Ta Efafasi tauya Faulo 'inaya sabi vayahusina vanue 'ebeyoqona 'inaya, 'inega simana tove'ita 'e'eu'au'avididi Kolose 'inaya itoatoa. 'Inega leta ba'e Faulo 'wayavia, mana ge nuanuana tove'ita 'e'eu'au'ava dina edi ve'ita ina 'abibodei fole nawale ina dawalili. Tove'ita luveifadi nuanuadi tovetumaqana me edi awatubo ina 'odu'odu tomotau 'ena'ena'idi 'idia ta wese Yaubada ena tovale'ewayavo 'idia, nage yani taha taha mahalaya itoatoa 'idia. Ta wese iu'au'ava ivonaya be vonigo Ieisu tauna gebu Yaubada Natuna, ta 'esia tauna Yaubada ena tovale'ewa taha. Ta wese to'eu'au'ava diavona nuanuadi me Kolose 'wafidi ina luda'ea, ta wese luvine vaina Mosese 'inega ina 'abibodedi. Ba'e leta nana 'inaya Faulo veve'ita me Kolose 'idia Keliso vonahaqiaqi tauna Yaubada 'idewani, ta edi ilivu be wese edi nuanua 'aidegana. Ta wese veve'itedi Keliso nana 'inega Yaubada yani qabuna viaqidi, ta wese vematamagilafuyedi tauna tovetumaqana qabudi adi Tovanugweta. Keliso ana 'aidega otaqa 'etoyavua ta wese toa aqiaqina ale'ituna. E leta nana 'iuna ba'e 'idewana.

### *Leta gamona*

1:1-14 Vematamagilafu be lukaiwa ta wese venoqi

1:15-23 Alamani Keliso weaqina ta wese ena viaqayavo

1:24-2:5 Faulo ena fewa tovetumaqana nuanidia

2:6-3:4 Keliso maega ina luvetuba ta tove'ita 'e'eu'au'avididi ina nogedi

3:5-4:1 Tovetumaqana ma'oda ina veilivu 'aiqa

4:2-18 Vebibina vaina ta wese ena 'alanuai

<sup>1</sup> Leta ba'e ya'a Faulo 'iguyega, ta wese taida Timoti 'inega. Yaubada venua'ivinegu 'inega ena nuenuega yavetovaletuyana Keliso Ieisu weaqina.

<sup>2</sup> Ta leta nana ya'wayavia omi'a emavo Yaubada ena tomotauyavo 'imia 'abaga Kolose 'inaya otoatoa. Omi'a me emi gwavubiga Keliso weaqina ovevetofewa, ta tauna maega ni'a oluvetuba. Nuanuagu Yaubada Tamada ena veyoluba ta wese ena nuadaumwala ona lutonovia.

### *Venoqi ta wese lukaiwa*

<sup>3</sup> \* Tuta nana avevenoqi weaqimi, 'inega tuta qabuna wese alulukaiwa eda Kaiwabu Ieisu Keliso Tamana 'inaya weaqimi, <sup>4</sup> mana ni'a anoqolia emi vetumaqana Keliso Ieisu 'inaya weaqina, ta wese emi veyoluba qiduana Yaubada ena tomotauyavo 'idia weaqina.

<sup>5</sup> \* Lova omi'a Ieisu Valena Aqiaqina ta tunutunuqina omadunoqolia, ta tutana 'inaya wese Vale nana ana 'ebeluita vane weaqina onoqolia. 'Inega emi vetumaqana ta wese emi veyoluba adi avutugu ba'e 'ebeluita vane nana mahalaya 'eno'eno aqiaqina. <sup>6</sup> Ta Vale nana Ieisu weaqina lova onoqolia nawale veveqidua ta yawala tautauya di'we qabudi 'idia. Vale nana ma vuaqina aqiaqi otaqina. Lova omi'a Vale nana 'inega onuagivila ta oveilivu aqiaqi, mana Yaubada ena nuakolokolo ni'a olutonovia ta oalamani aqiaqiea. Ta wese 'idewani ba'itaga tuta nana tomotau Vale nana inoqonoqolia taudi wese inuagivila ta iveilivu aqiaqi, mana Yaubada ena nuakolokolo ilulutonovia, 'inega vuaqa aqiaqi

\* 1:3: Efe 1:15-16 \* 1:5: Efe 1:13; 1Fit 1:4

otaqina 'ifo'ifoqe 'idiega. <sup>7</sup>\* Ta omi'a Vale nana onoqola 'unuyea iada Efafasi 'inega, mana tauna luseanima be Vale nana miea ta lugaihiea 'imia. Tauna iada nana gwavubiga 'avana, ta maega afewafewa Keliso weaqina. <sup>8</sup>Tauna ni'a vonema emi veyoluba qidwana tomotau 'idia weaqina, ta veyoluba nana Yaubada Niboanina Gwalagwalana 'inega neimi.

<sup>9</sup>\* Lova tuta nana amadunoqolia emi ilivu aqiaqina weaqina 'inega ave'ale venoqi Yaubada 'inaya weaqimi, ta nawale avevenoqi weaqimi. Ta wese avevenoqi Yaubada 'inaya nuami na'eqa'uya, be yaqisa ona alamani aqiaqiea ena nuanua omi'a weaqimi. Ta wese avevenoqi 'inaya alamani ona 'ewea yani taha taha weaqina Niboana Gwalagwalana ena ve'ita 'inega. <sup>10</sup>Ta alamani nana 'inega ami fata eda Kaiwabu ena nuanua tuta qabuna ona viaviaqidi, e 'inega ona giveqaiawea emi ilivu 'idiega. Ta tuta qabuna yani aqiaqidi ona viaqidi tomotau 'idia, mana ba'e ilivu nana 'inega vuaqa aqiaqina na'ifoqe, 'inega wese emi alamani Yaubada weaqina naveqidua 'imia. <sup>11</sup>\* Ta wese avevenoqi weaqimi Yaubada nagivewaiwaiemi tauna ena waiwai qiduanega, be yaqisa tuta nana vita taha taha ina 'ifoqe 'imia ge ona lugwavu'ai ta 'esi ona bibitaqomi. Ta nuanuama ona qaiawa <sup>12</sup>\* be ona lukaiwa Tamada 'inaya, mana givelubwinemi be yaqisa ami fata ena tomotauyavo maega ona toatoa ena 'Ebeluvine simasimalina 'inaya, mana 'Ebeluvine nana ena tomotauyavo adi vaufa. <sup>13</sup>\* Mana tauna 'etoyavuida Seitani ena 'ebeluvine velovelovanina 'inega, ta mieda Natu Otaqina ena 'Ebeluvine 'inaya. <sup>14</sup>\* Ta Natuna sulalinea gubaufeda ta wese tauna 'inega eda luveifana qabuna nuataqodi.

#### *Yaubada ena viaqayavo Keliso 'inega*

<sup>15</sup>\* Vonahaqiaqi, Yaubada ge ana 'itamo, ta 'esi Keliso tauna Yaubada ana 'ita 'idewani. Ta Yaubada ena viaqayavo qabudi 'idiega Keliso maduve'ifoqeyea ta wese a'uya yani qabuna adi toludebana 'idewani. <sup>16</sup>Mana Yaubada Keliso 'inega yani qabudi 'iva'ava'aidi mahalaya ta wese bwa'obwa'oya, vaina ka'ite'itedi ta vaina ge adi 'itamo 'idewani niboana taha taha be, toluvineavo be, kaiwabuyavo ta wese yani qabuna waiwai viaqidi. Ta ba'e yani diavona Yaubada 'iva'ava'aidi Keliso 'inega, ta wese tauna weaqina. <sup>17</sup>\* Inega ni'a kahalamania Keliso tauna nugweta toatoa, ta 'abiboda kuyavata qabudi i'ifoqe, ta tauna 'ita'itamakidi 'inega nawale itoatoa ta ena luvine i'abi'abibodea.

<sup>18</sup>\* Ita'a 'ekalesia Keliso 'wafina, ta tauna 'ekalesia debana. Ta wese tauna 'ekalesia yawaina 'iuna. Tauna Yaubada Natu Otaqina, ta Tamana madugiveya'itoto 'eviviea to'aliga 'idiega, 'inega tauna ana 'aidega yani qabudi adi toludebana aqiaqi. <sup>19</sup>\* Mana Yaubada ena waiwai be, ena kaikaiwabu be, ena ilivu ta wese yani qabuna aqiaqina 'inaya i'eno'eno wese nuanuana Natuna 'inaya ina 'eno'eno, e 'inega Tamana yani diavona neia. Vonahaqiaqi, Iesu tauna Yaubada 'idewani. <sup>20</sup>\* Ta wese Yaubada nuanuana Natuna ena 'aliga 'inega ena 'iva'ava'atayavo naveiana 'eviviedi, mana yani qabudi bwa'obwa'oya ta wese mahalaya Yaubada 'inega itoasi'i. 'Inega Natuna awafelea 'aliga 'etoluai 'inaya ta sulalina ena inoqa 'inega toadaumwala ve'ifoqeyea.

<sup>21</sup>\* Ta wese omi'a lova Yaubada 'inega otoa luluvai ta emi ilivu luveifana be wese emi nuanua luveifana 'idiega Yaubada ovevoalanea. <sup>22</sup>\* Ta Iesu 'wafina ena 'aliga 'inega Yaubada 'awaiana 'eviviemi. Ta yani ba'e 'inega ami fata ona tovolu matanaya vunavunaqimi ta gwalagwalami be wese ge ami 'ebeve'ewamo. <sup>23</sup>Lova Vale Aqiaqina onoqolia ta Keliso ovetumaqana aqiaqiea, 'inega luaqiaqiemi be vetumaqana nana ona kafi'i'ihia ta ona tovolu'i'ita Keliso 'inaya. 'Inega ona lu'ita vane Vale nana 'inaya ta ge ona venuana magilafu weaqina. Vale nana ni'au yawala tomotau qabudi 'idia bwa'obwa'oya. Ta Yaubada ya'a Faulu venua'ivinegu Vale nana ana lugaihi weaqina.

#### *Faulo ena fewa to'ekalesia weaqidi*

\* 1:7: Kol 4:12; Fim 23      \* 1:9: Efe 1:16-17      \* 1:11: Efe 1:19; 3:16      \* 1:12: Efe 1:11,18      \* 1:13: Lk 22:53; Efe 2:2      \* 1:14: Efe 1:7      \* 1:15: 2Kol 4:4; Ion 1:18      \* 1:17: Ion 1:1; 8:58      \* 1:18: Efe 1:22-23; Via 26:23; Ve 1:5  
\* 1:19: Kol 2:9      \* 1:20: Efe 1:10      \* 1:21: Lom 5:10; Efe 2:12      \* 1:22: Efe 5:27; Lom 5:10

<sup>24</sup> Ba'itagana me egu qaiawa visiqa yalulutonovia 'wafiguya weaqimi, mana ya'a 'wafigu ena visiqa nana 'inega Keliso ena visiqa 'ekalesia weaqidi yalulu'ovoia, ta 'ekalesia taudi Keliso 'wafina. <sup>25</sup> \* Yaubada venua'ivinegu ya'a ena tofewa kavovo 'idewani, 'inega fewa nana neigu be yani qabuna ena vona weaqina ena simana 'ifoqe aqiaqiedi omi'a ena 'ekalesiyavo 'imia. <sup>26</sup> \* Tuta lova 'inaya ta wese lagata be lagata edi tutaya vona ba'e 'wai'waivina ta ge ida alamania. Ta Yaubada nuanuana vona nana ana alamani nagive'ifoqeyea, 'inega ba'itaga ni'a 'ifoqe vunavunaqaya ena tomotauyavo 'idia. <sup>27</sup> Mana nuanuana qiduana ena tomotauyavo navonedi vonigo Keliso ena simatala qiduana be ena kaikaiwabu wese omi'a ge me Diu weaqimi. Ta Yaubada ena vona 'wai'waivina ana alamani ba'e: Keliso toatoa giwalimia, ta toa nana 'inega ona alamani aqiaqiea omi'a wese ena di'we simasimalina 'inaya ona lugu.

<sup>28</sup> 'Inega me ema alamani qiduana Yaubada 'inega Keliso weaqina asimasimanea tomotau qabudi 'idia. Ta vona waiwaiidi aneineiidi ta wese aveve'itedi be yaqisa tomotau 'aidega 'aidega tunutunuqidi ana tauyedi Yaubada matanaya. Ba'e yani nana ana fata ana viaqia aiqabu ni'a iveiaiana aqiaqi Keliso maega 'idia <sup>29</sup> \* Yani ba'e weaqina yavevetafe'wa, ta ge ya'a egu waiwiaega, ta 'esi Keliso ena waiwai 'inega givewaiwaiegu.

## 2

<sup>1</sup> Nuanuagu ona alamani aqiaqiea egu vetafe'wa omi'a ta wese 'abaga Lodisia ana to'ekalesiyavo weaqimi, be wese tomotau qabudi ge taha tuta ida 'itegu weaqidi. <sup>2</sup> Nuanuagu qiduana egu vona iula 'inega ina vewaiwai, ta wese nuanuagu veyolubega taudiega ma ediavo ina 'itavidi. 'Inega ge ina venuana magilafu, mana Yaubada ena nuanua 'wai'waivina ni'a ialamani aqiaqiea, e tauna Keliso. <sup>3</sup> \* Mana Keliso nana 'inaya Yaubada ena alamani qabuna ta wese ena nua'eqa'u qiduana 'wai'waividi i'eno'eno. E ba'e yani diavona kavona eda kulufa kaikaiwabudi.

<sup>4</sup> \* Yani diavona weaqidi yavonemi mana ge nuanuagu taha toga ena vona yafayafa 'inega nau'avemi nage nuami na'ewei. <sup>5</sup> \* Tomotaugu yatoa luluvai 'imiega, ta 'esi egu nuanua 'inega kavona be ya'a omi'a maega kada toatoa. Ta yaqaiawa qiduana emi toa aqiaqina be wese emi vetumaqana falafalana Keliso 'inaya weaqina.

*Yawai vauvauna be aqiaqina Keliso* 'inega kana lobe

<sup>6</sup> Iesu Keliso ni'a o'awahaqiaqiea tauna emi Kaiwabu, 'inega luaqiaqiemi be tuta qabuna tauna maega ona toatoa ta ena nuanua ona viaviaqidi. <sup>7</sup> \* Keliso tauna emi vetumaqana ana avutugu. 'Inega kwalamimi tauna 'inaya ina vave'abi. Ta tauna 'inaya ona tovololo'i'ita be yaqisa ona vewaiwai lova 'idewani ave'ita 'aiqemi. Ta tuta qabuna ona lulukaiwa qiduana Keliso 'inaya.

<sup>8</sup> Ona 'itamaki aqiaqiemi be yaqisa tomotau ge ina u'avemi taudi edi nuanua kavokavovo 'inega nage edi vona kavokavovo 'inega, mana ba'e yani diavona tomotau edi nuenuega ta wese bwa'obwa'o ana tovewaiwaiavo edi alamani 'inega, ta gebu Keliso 'inega. <sup>9</sup> \* Mana tuta nana Keliso vetomotau mai bwa'obwa'oya 'inega Yaubada ena kaikaiwabu be, ena waiwai be, ena nuanua be, ena ilivu ta wese yani qabuna aqiaqina 'inaya i'eno'eno a'ukamanedi Natuna 'inaya. Keliso vonahaqiaqi Yaubada 'idewani. <sup>10</sup> \* Ta omi'a ni'a ove'aidega Keliso maega, 'inega yani qabuna aqiaqidi ni'a o'ewedi ami 'etoyavua weaqina. Ta Keliso toluveifana ena tovale'ewayavo be wese niboana luveifadi qabudi vewaiwai va'inedi, e 'inega luviluvinedi.

<sup>11</sup> \* Me Diu nuanuadi 'wafi ana da'a kana viaqia lova Yaubada ena luvine 'idewani, mana ita'a ena tomotauyavo. Ta omi'a tuta nana Keliso maega oluветuba 'inega gebu 'wafi ana da'a oda 'ewea tomotau nimadiega, mana Keliso ena 'aliga 'inega emi nuanua

\* 1:25: Efe 3:2,7-8 \* 1:26: Lom 16:25-26; Efe 3:5,9 \* 1:29: Efe 3:7,20; Fil 4:13 \* 2:3: 1Kol 1:24,30 \* 2:4: Lom 16:18 \* 2:5: 1Kol 5:3 \* 2:7: Efe 3:17 \* 2:9: Ion 1:14,16 \* 2:10: Efe 1:21-22 \* 2:11: Lom 2:29



luveifadi Yaubada luveawalidi, ta ba'e 'inega Keliso ni'a da'a yavuledi. <sup>12</sup>\* Ta tuta nana babitaiso o'ewea 'inega kavonaya be Keliso omi'a maega ida tavunimi. Ta Keliso maega Yaubada giveya'itoto 'eviviami toa vauvauna 'inaya, mana ovetumaqana ena waiwai 'inaya. E ba'e waiwai nana 'inega lova Yaubada Keliso 'aligega giveya'itotoya. <sup>13</sup>\* Lova omi'a 'ali'aligimi emi luveifanayavo 'idiega, mana nawale ge adi da'amo. 'Inega Yaubada giveyawaha 'eviviami Keliso maega, ta eda luveifana diavona nuataqodi. <sup>14</sup>\* Ita'a Yaubada ena luvineavo 'waya'wayavidi kabwegebwegedi, ta ada ve'ia luaqiaqieda be kana 'aliga. Ta tuta nana Keliso 'aliga 'etoluai 'inaya weaqida, 'inega Yaubada eda luveifanayavo 'waya'wayavidi ma letana a'uvaneyedi ta Keliso maega tutuve'ewedi, e omo'e 'inega ada loaga Yaubada 'ewa yavuledi. <sup>15</sup> Keliso ena 'aliga 'etoluai 'inega Yaubada Seitani ma enavo taudi niboana luveifadi be, kwakwaia be wese yani qabudi luveluveifadi ge kada 'itedi edi waiwai a'uwebuiedi. Ta ba'e 'inega Yaubada toluveifadi qabudi giveiniyauyaunidi tomotau matadia, mana vewaiwai va'inedi.

*Tomotau edi ve'ita veifana ge ona 'abibodedi*

<sup>16</sup>\* 'Inega omi'a ge ona awafelemi tomotau edi luvine 'idia yani taha taha weaqidi 'idewani emi 'ai weaqina nage emi numa weaqina. Ta wese 'eguma nuanuadi vaina 'aubena ona 'amayabedi tafwalolo weaqina nage wai'ena vauvauna weaqina nage 'aubena 'ebeveyawai weaqina, e 'inega ge edi vona ona 'abibodedi. <sup>17</sup>\* Mana lova luvine diavona kavona 'aye'ayewa tomotau 'idia, ta ive'itedi tola'ai nawale na'ifoqe. Ta tuta nana Keliso mai, e 'inega adi alamani aqiaqi tauna 'inaya ni'au kalobedi. <sup>18</sup>\* 'Inega 'eguma tomotau ina vonemia, "Luaqiaqieda be tauda kana giwebuieda ta me eda 'amayaba kana iwa'odu Yaubada ena tovale'ewayavo 'idia, fole ve'ia aqiaqina ge kana lobei." 'Inega edi vona ge ona noqolidi. Taudi adi wawa igigivaneyedi, ta tuta qabuna edi ve'wayoqa weaqidi iveveqayedi ta ivonaya, "Yani qabudi Yaubada veve'itema 'inega ona 'amayabema." Ta gebu edi vona ona 'abibodei, mana edi vonayavo taudi edi nuenuaga 'ifo'ifoqe. <sup>19</sup>\* Taudi ge ida luvetuba 'ekalesia ana toludebana Keliso maega. Mana ita'a 'ekalesia Keliso 'wafina, ta ena luvine 'inega du'u 'aidega 'aidega tubwe be wese walowaloqa 'idiega kave'aidega ta kavewaiwai. Ta Yaubada ena nuanua 'inega ita'a Keliso du'unavo giveqideda be wese givewaiwaieda.

<sup>20</sup>\* Tuta nana Keliso 'aliga 'inega kavona omi'a maega oda 'aliga. 'Inega tauna bwa'obwa'o ana luvineavo 'idiega 'etoyavuimi. Ta omi'a ni'a oluvetuba Keliso maega, 'inega tola'ai weaqina nawale oawahawafelemi luvine taha taha 'idia 'idewani, <sup>21</sup> "Abwaga ba'e ge ona 'aini! Ge ona gudatonovi! Ge ona gitonovi!" <sup>22</sup>\* Luvine diavona yani awahawalidi weaqina, ta ge Yaubada 'inega ida 'ifoqe ta 'esi tomotau 'idiega, 'inega tomotau ivefewedi ta 'abibodanaya ina awala. <sup>23</sup> Vonahaqiaqi, luvine diavona adi 'ita kavona alamani aqiaqi 'inega ida 'ifoqe. Ta adi tove'itayavo u'vega ina vonemia, "Luaqiaqiemi taumi ona giwebuie mi ta ona vetafe'wa waiwai emi 'ebe'wa'odu 'idia, ta wese taumiega 'wafimi ona veilaqeyedi." Ta edi ve'itayavo ge ona 'abibodei, mana luvine diavona yani kavokavovo, ta ge adi fata emi nuanua 'wai'waividi be emi nuanua luveifadi 'idiega ina 'etoyavuimi. Ta 'esi Keliso ena viaqayavo 'idiega ana fata kana veaqiaqi.

3

*Toa vauvauna Keliso 'inega*

<sup>1</sup>\* Tuta nana Yaubada Iesu giveya'itotoya 'aligega, 'inega omi'a ana tovetu-maqanayavo wese giveya'itotomi yawai vauvauna 'inaya. 'Inega luaqiaqiemi emi nuanua ona a'uya mahala ana yaniavo 'idia, mana ba'itagana Iesu me ena luvine mahalaya ni'a toabui Yaubada 'ataqinaya. <sup>2</sup>\* 'Inega nuanuagu mahala ana toa weaqina nuami

\* 2:12: Lom 6:4    \* 2:13: Efe 2:1,4-5    \* 2:14: Efe 2:14-16; 1Fit 2:24    \* 2:16: Lom 14:1-13    \* 2:17: Ibe 8:5  
 \* 2:19: Efe 2:21; 4:16    \* 2:20: Gal 4:3,9; 1Tim 4:3    \* 2:22: Md 15:9    \* 3:1: Mk 12:36; 16:19; Efe 1:20    \* 3:2: Md 6:33

naluveagatuna'ia. Ta 'esi ge nuanuagu nuami na'ewei bwa'obwa'o ana yaniavo 'idia. <sup>3</sup> Mana tuta nana Keliso 'aliga 'inega wese emi nuanua luveifadi i'aliga, 'inega toa vauvauna be wese toa vataya olobea, ta omo'e 'inega ni'a ove'aidega Keliso maega. Ta toa nana kavona 'wai'waivina Keliso maega Yaubada 'inaya, mana Yaubada Keliso nawale ge dagive'ifoqeyea tuta vemagilafuna 'inaya. <sup>4</sup> Vonahaqiaqi, Keliso tauna yawaimi 'iuna, 'inega tuta nana me ena simatala kaikaiwabuna na'evivi namai bwa'obwa'oya, e 'inega wese omi'a Keliso maega ona 'ifoqe ena simatala diayaina 'inega.

<sup>5</sup> \* 'Inega bwa'obwa'o ana ilivu luveifadi 'imia nawale i'eno'eno ona luve'aligidi 'idewani velamo'eno kavokavovo be, nuanua bwavubwavudi be, vemata'eala be, nuanua luveifadi be wese vemanuguba, mana vemanuguba ilivuna kavona iwa'odu yaubada kavokavovo 'idia.

<sup>6</sup> 'Inega ba'e ilivu diavona ona luve'aligidi, mana adi toviaqayavo Yaubada ena diavilavila nawale ina lobe. <sup>7</sup> Lova tuta nana nawale yawaimi ge davevauvau omi'a wese ba'e ilivu diavona ana 'eda o'abibodea. <sup>8</sup> \* Ta ba'itagana luaqiaqiemi be wese vaina ilivu ona 'ewa yavuledi 'imiega 'idewani gamohoqala be, diavilavila be, givemwaniniva be, vegila, ta wese vona bwavubwavudi ge na'ifoqe sofamiega. <sup>9</sup> \* Omi'a 'ekalesia emi qabu gamonaya ge taha toga taina nage novuna nau'avei. Mana omi'a nuanua luveifadi be wese ilivu luveifadi nugwenugweidi ni'au ovata'idi, <sup>10</sup> \* ta ba'itaga ilivu vauvaudi be wese nuanua vauvaudi ni'a oveaqedi. Ta ba'e 'inega tuta qabuna ovevevauvau, ta oveveilivu aqiaqi kavona ami To'iva'ava'ata 'idewani. Ta omo'e 'inega tuta qabuna emi alamani veveqidua tauna weaqina. <sup>11</sup> \* 'Inega emi toa vauvauna 'inaya ge ona vonaya, "Taudi me Diu mali qabu, ta ita'a mali qabu", nage "Taudi 'wafidi da'ada'ana mali qabu, ta taudi 'wafidi ge ana da'amo mali qabu", nage "Wagawaga be tovemagabelalava mali qabu", nage "Tofewa yoqoyoqonidi mali qabu be tomotau yavuyavuidi mali qabu." Vonahaqiaqi, yani qiduana Keliso, mana qabuda bwagilida eda vetumaqana 'inega ta giwalidaya toatoa.

<sup>12</sup> \* Omi'a Yaubada venua'ivinimi ta givegwalemi ena tomotauyavo. Tauna veveyolubemi qiduana. 'Inega omi'a luaqiaqiemi ba'e 'idewani ona veilivu 'aiqa. Tuta qabuna tomotau ona 'ita nuaduyedi be, ona veilivu aqiaqiedi me emi nuawebui be, emi ilivu bigana ta wese ona bibitaqomi. <sup>13</sup> \* Omi'a 'ekalesia emi qabu gamonaya 'eguma taha toga yani luveifana ni'a viaqia, e 'inega ge ona vegilei ta 'esi ona nuataqoya. Ta ge ona nuafania lova Keliso ni'a nuataqomi, 'inega omi'a wese tomotau ona nuataqodi. <sup>14</sup> \* Vonahaqiaqi, ilivu diavona aqiaqi otaqidi. Ta wese taha yani ba'e ilivu diavona qabudi veqidua va'inedi, e tauna veyoluba ilivuna, mana veyoluba nana 'inega kaluветuba aqiaqi.

<sup>15</sup> \* Omi'a 'ekalesia Keliso 'wafina, ta tauna 'ekalesia debana. Ta Yaubada ni'a gabemi ena nuadaumwala 'inaya. 'Inega ona awafelemi daumwala nana 'inaya, be yaqisa emi nuanua naluvinedi. Ta yani ba'e weaqina tuta qabuna ona lulukaiwa. <sup>16</sup> \* Ta wese tuta qabuna vona qabudi Keliso 'inega giwalimia ona a'udi, 'inega Yaubada alamani aqiaqina naneimi. Ta alamani nana 'inega emiavo 'aidega 'aidega ona veve'itedi ta ona lulugaihidi, ta taudi wese 'idewani ina viaqia 'imia. Ta me emi qaiawa ona 'evosi Yaubada 'inaya Buki Same 'inega be, Buki 'Evoli 'inega ta wese vaina 'evosi vauvaudi tafwalolo weaqina 'idiega. E ba'e 'evosi diavona qabudi Niboana Gwalagwalana ena iula 'inega. <sup>17</sup> \* Ta emi viaqayavo be wese emi vonayavo qabudi ona viaqidi eda Kaiwabu leisu ana wawega, ta wese tauna ana wawega ona lukaiwa Yaubada Tamada 'inaya.

*Ma'oda tovetumaqana ma ediavo ina veilivu 'aiqa edi toa vauvauna 'inaya*

<sup>18</sup> \* Omi'a vivine vaqivaqimi ona awafelemi moqanemiavo edi vonayavo 'idia ta ona matayagedi. Ilivu ba'e ami luaqiaqi, mana omi'a eda Kaiwabu ena tomotauyavo.

\* 3:5: Lom 6:6,11; Efe 4:19; 5:3-6 \* 3:8: Efe 4:25-29; 5:4 \* 3:9: Efe 4:22,25 \* 3:10: Efe 4:24 \* 3:11: Gal 3:28 \* 3:12: 1Fit 2:9 \* 3:13: Efe 4:2,32 \* 3:14: Lom 13:8-10 \* 3:15: Fil 4:7; 1Kol 12:27; Efe 4:4 \* 3:16: Efe 5:19 \* 3:17: 1Kol 10:31; Efe 5:20 \* 3:18: Efe 5:22

19\* Ta omi'a 'oloto vaqivaqimi luaqiaqimi be moqanemiavo ona veyolubedi, ta ge taha tuta ona veilivu veifedi.

20\* Ta wese omi'a gogama, tamamiavo be inamiavo ona matayagedi edi vonayavo qabudi 'idia, mana ba'e eda Kaiwabu ena nuanua qiduana.

21\* Ta omi'a tama, natumiavo ge ona vediavileviledi, fole nawale ona givegamosoalidi ta ina vegwavu'aiemi.

22\* Ta wese omi'a tofewa kavovo emi kaiwabuyavo bwa'obwa'oya edi luvine qabudi ona matayagedi. Ta tuta nana matadia ofewafewa, 'inega me emi gwavubiga mana nuanuami ina 'awahaqiaqimi. Ta 'eguma ge ida vevekovemi 'inega ovevegwavu'ai. Ta 'esi ya'a nuanuagu tuta qabuna ona fewa aqiaqi 'idia, mana omi'a Yaubada o'amayabea.

23 Ta emi fewa qabudi me emi gwavubiga ona viaviaqidi kavona eda Kaiwabu Keliso weaqina ofewafewa, ta gebu tomotau weaqidi. 24 Ge ona nuafania nawale ve'ia ona lobeaa mahalaya Keliso 'inega, mana Keliso emi Kaiwabu otaqa, ta tauna weaqina ofewafewa.

25\* Ta 'eguma taha toga yani luveifana naviaqia, 'inega luveifa nana ana ve'ia nawale nalobeaa, mana Yaubada luvine 'aidegana 'inega tomotau qabuda luluvineda.

#### 4

1\* Omi'a kaiwabuyavo emi tofewa kavovo ona veilivu aqiaqiedi ta luvine 'aideganega ona luvinedi. Ta ona nuave'avinia omi'a wese emi Kaiwabu mahalaya toatoa.

#### *Venoqi ta wese Iesu Valena ana simana weaqina*

2\* Tuta qabuna ona awafelemi venoqi 'inaya. Ta tuta nana ovevenoqi ona 'itamakimi be yaqisa ge emi nuanua ina tautauya yani kavokavovo 'idia. Ta wese ona lukaiwa Yaubada 'inaya. 3\* Ta tuta nana ovevenoqi 'inega wese ima'a weaqima ona venoqi, be yaqisa Yaubada tuta aqiaqidi naneima 'inega ana fata Iesu Valena ana lugaihiea tomotau 'idia. Lova Vale nana kavona 'wai'waivina ta ba'itagana Yaubada ni'a give'ifoqeyea. E ba'e Vale nana ana lugaihi weaqina ia'uluguyegu vanue 'ebeyoqona 'inaya, ta nawale yoqoyoqonigu yatoatoa. 4 Luaqiaqiegu be Keliso weaqina ena lugaihi. 'Inega nuanuagu ona venoqi weaqigu, be yaqisa agu fata Iesu Valena ena givesimatala aqiaqiea tomotau 'idia, 'inega nuadi na'eqa'uya. 5\* Tomotau ge ida vetumaqana Keliso 'inaya maega otoatoa, 'inega omi'a me emi alamani aqiaqi emi ilivu taumiega ona 'itamakia. Ta 'eguma tuta aqiaqina ona lu'awaiea, e 'inega Keliso Valena ona vonayea 'idia, ta emi tuta ge ona mudali yani kavokavovo 'idia. 6\* Ta 'esi tuta nana Keliso Valena oveveqaeqeyea, e 'inega emi vona bigana ta nua'ewa'ewana 'inega ona simana 'idia. Ta luaqiaqimi be edi vetala'ai Keliso weaqina 'imia ami fata vona tunutunuqina 'idiega ona vona 'eviviedi.

#### *Faulo ena lukafoi*

7\* Iada Tikiosi nawale nawai ta valegu qabuna naveqaeqeyea 'imia. Tauna ia aqiaqida ta gwavubiga 'avana, ta maega afewafewa eda Kaiwabu Keliso weaqina. 8\* Iada nana yavetunei waiwai 'imia, mana nuanuagu omi'a ema toa weaqina ona alamani aqiaqiea. Ta ena vona 'inega naiulemi ta wese nagiveqaiawemi. 9\* Ta Tikiosi ma iana Onesimo yavetunedi iwaiwai. Onesimo nana ni'a oalamani aqiaqiea, mana tauna emi 'abaga 'olotona. Wese tauna ia aqiaqida ta gwavubiga 'avana. Ta yani qabuna i'ifo'ifoqe 'imaya ina simana aqiaqiedi 'imia.

10-11\* Ma iagu Alisitako vanue 'ebeyoqona ba'e 'inaya atoatoa. Ta Banaba nibaina Maki be wese Iosua tauna wese igabea Iusito maega atoatoa. Taudi edi lukaiwa 'imia. Me Diu tovetumaqana qabudi 'idiega toidimo ya'a maega afewafewa Yaubada ena 'Ebeluvine ana giveqidua weaqina. Ta toidina egu toa vitana 'inaya ihiulegu ta igivewaiwaiegu. (Lova

\* 3:19: Efe 5:25 \* 3:20: Efe 6:1 \* 3:21: Efe 6:4 \* 3:22: Efe 6:5-8 \* 3:25: Lom 2:11 \* 4:1: Efe 6:9  
 \* 4:2: Efe 6:18; Fil 4:6 \* 4:3: Lom 15:30; Efe 6:19 \* 4:5: Efe 5:15-16 \* 4:6: Efe 4:29; 1Fit 3:15 \* 4:7: Efe 6:21 \* 4:8: Efe 6:22 \* 4:9: Fim 10-12 \* 4:10-11: Via 12:12; 15:37-39; 13:13; 2Tim 4:11

ni'a yavematamagilafuyemi Maki weaqina 'eguma nawai 'imia, e 'inega me emi qaiawa ona 'ebe'ewei ona tauyea emi vanuea.)

<sup>12</sup>\* Ta Keliso ena tofewa taha emi qabu gamonega ana wawa Efafasi ena lukaiwa 'imia. Tauna tuta qabuna vevenoqi waiwai weaqimi, nuanuana Yaubada nagivewaiwaiemi ta ona tovolu'i'ita. 'Inega Yaubada ena nuanua qabudi ona alamani aqiaqiedi, ta ge ona venuana magilafu emi vetumaqana Keliso 'inaya weaqina. <sup>13</sup> Yavona aqiaqiemi, iada Efafasi ena fewa qiduana weaqimi yahalamani aqiaqiea, ta wese 'abagadiavo Lodisia be Ilafolisi ana totoayavo weaqidi. <sup>14</sup> Ta tovevhiqa adi togiveaqiaqi iada Luke be wese Dimasi magilafudi edi lukaiwa 'imia. <sup>15</sup> Nuanuama ema vekaiwa edavo 'abaga Lodisia 'inaya itoatoa ona simanea 'idia, ta wese ona lukaiwa to'ekalesia qabudi 'idia itoatoa va'auta vavine Nimifa ena vanuea.

<sup>16</sup> Emi leta ba'e ona avo nugwetea, ta 'abibodanaya ona vetunei natauya to'ekalesia Lodisia 'idia. Ta taha wese leta ni'a yavetunei me Lodisia 'idia, ta taudi leta nana nugweta ina avoya, ta 'abibodanaya ina vetunei nawai 'imia be omi'a wese ona avoya.

<sup>17</sup>\* Ta wese nuanuagu Akifasi ona voneaya, "Lova Keliso fewa neiu, 'inegana fewa nana weaqina una vetafe'wa waiwai ta una lu'ovoia."

<sup>18</sup>\* Egu lukafoi ba'e ya'a Faulu taugu nimaguyega ya'waya'wayavia. Ta ona nuave'avinigu ya'a vanue 'ebeyoqona 'inaya yatoatoa 'inega weaqigu ona venoqi. Ta ya'a wese yavevenoqi Yaubada 'inaya ena veyoluba qiduana naneimi.

---

\* 4:12: Kol 1:7; Fim 23-24    \* 4:17: Fim 2    \* 4:18: 1Kol 16:21

## Faulo ena leta nugweta me Tesalonaika 'idia

### *Leta ana alamani weaqina*

Taha 'abaga agona ana wawa Tesalonaika di'we Masidonia 'inaya. Ta Faulo ena luvivila 'inaya mai 'abaga nana 'inaya ta Iesu Valena lugaihiea 'idia. 'Inega Iesu ivetumaqanea 'abo 'ekalesia ive'alea. Faulo ena lugaihi weaqina me Diu ivevoalanea 'inega dena tauya 'abaga Belia 'inaya. 'Abibodanaya Faulo iana Timoti vetunea me Tesalonaika 'idia sabi vayausidi, nuanuana nahalamani aqiaqiea ma'oda itoatoa 'aiqa. Vayausidi gumwala 'inega 'evivi Faulo 'inaya ta vematamagilafuyea taudi me Tesalonaika me edi vetumaqana aqiaqi itoatoa, ta wese veyoluba 'avadi. 'Inega Faulo qaiawa weaqidi ta ena leta ba'e 'wayavia nuanuana nagivewaiwaiedi, mana taudi wese vevoalana ilobea edi vetumaqana Iesu 'inaya weaqina. Ta wese nuanuana nave'itedi Iesu ena 'evivi mai weaqina, mana vaidi to'ekalesia ivenuana magilafu tola'ai na'ifoqe 'ali'aligidi be wese mayawaidi 'idia mai nana 'inaya.

### *Leta gamona*

1:1 Vematamagilafu be venoqi

1:2-3:13 'Awahaqiaqi be awatubo

4:1-12 Vona waiwaina ilivu aqiaqi otaqina weaqina

4:13-5:11 Ve'ita Iesu Keliso ena 'evivi mai weaqina

5:12-22 Faulo ena vebibina 'ebelu'ovoa 'ekalesia 'inaya

5:23-28 Vona veyoluba be lukafoi

### *Vematamagilafu be lukaiwa*

<sup>1</sup> \* Leta ba'e ya'a Faulo be Sailasa ta wese Timoti 'imega waiwai omi'a Tesalonaika ana to'ekalesiyavo 'imia. Omi'a Tamada Yaubada ta wese eda Kaiwabu Iesu Keliso edi tomotauyavo. Avevenoqi weaqimi veyoluba ta wese nuadaumwala tuta qabuna na'eno'eno 'imia.

### *To'ekalesiyavo edi vetumaqana be edi ilivu weaqina*

<sup>2</sup> Tuta qabuna avevenoqi weaqimi Yaubada 'inaya, ta ema venoqi nana 'inaya ge ada lua'u lukaiwa weaqimi. <sup>3</sup> \* Ta tuta nana avevenoqi weaqimi Yaubada matanaya 'inega emi fewa emi vetumaqana vuaqina 'inega be, emi viaqayavo veyolubega ta wese ma'oda emi lu'ita vane Iesu ena 'evivi mai weaqina okafi'i'ihia anuanua ve'avinia.

<sup>4</sup> Emavo, ni'a ahalamania omi'a Yaubada tawa veyolubemi ta wese venua'ivinimi ena tomotauyavo 'idewani. <sup>5</sup> \* Mana tuta nana Vale Aqiaqina amiea 'imia ge ema vona namo 'inega Vale nana oda 'ewei, ta 'esi wese Niboana Gwalagwalana ena waiwaiega, e 'inega Vale nana o'awahaqiaqiea. Ta wese ema veilivu aqiaqi 'imia ni'a o'itedi, ta ba'e ilivu diavona 'idiega ni'a oalamania vona diavona vonahaqiaqi. <sup>6</sup> \* Vonahaqiaqi, tuta nana Vale nana o'ewea 'inega wese vaina vita maega olobedi, ta Vale nana Niboana Gwalagwalana ena qaiawa 'inega o'ewea, e ba'e 'inega ima'a be wese eda Kaiwabu ovetutumema. <sup>7</sup> E ba'e ilivu nana 'inega omi'a ove'ebe'ita aqiaqi Keliso ana to'abibodayavo itoatoa di'we Masidonia be Akaya 'idia. <sup>8</sup> Vonahaqiaqi, eda Kaiwabu Valena tawa 'imiega veqidua di'we Masidonia be Akaya 'idia, ta wese omi'a emi vetumaqana Yaubada 'inaya Valena ni'a ve'ena'i di'we qabuna 'idia. 'Inegana todi'we 'inaya atautauya ge wese taha tola'ai tomotau ada vonedi emi vetumaqana weaqina, mana vale nana ni'a inoqolia. <sup>9</sup> Ta taudiega isimasimana ma'oda omi'a lova o'ebe'ewa 'aiqema, ta wese ma'oda onuagivila 'aiqa emi tokwalui adi iwa'odu 'idiega, ta 'esi Yaubada mayawaina ta aqiaqina 'inaya oawafelemi ta ovetofewa weaqina. <sup>10</sup> Ta wese isimasimana emi lututa Yaubada Natuna

\* 1:1: Via 17:1    \* 1:3: 1Kol 13:13; Kol 1:4-6    \* 1:5: 1Kol 2:4-5    \* 1:6: Via 17:5-9

Ieisu ena 'evivi mai mahalega weaqina, tauna Yaubada giveya'itoto 'eviviea 'aligege. E ba'e Ieisu nana nawale na'etoyavuida Yaubada ena gamohoqala 'inega.

## 2

### *Faulo lova ena fewa Tesalonaika 'inaya*

<sup>1-2</sup> \* Taimavo be novumavo, ni'a oalamaniana lova me Filifai iveilivu veifema ta wese i'awaluveifema, 'inega vita qiduana alobea 'abaga nana 'inaya. 'Inega Filifai anogei ta awai omi'a me Tesalonaika sabi vayahausimi. Ta emi 'abaga 'inaya wese vevoalana alobea. Ta tua Yaubada giwalima givefatuya 'inega Ieisu Valena alugaihiea 'imia. Ta omi'a vuaqa aqiaqina ni'a alobea vayahausa nana 'inega. <sup>3</sup> Mana Vale nana aneimi ge taha ena luveifamo be ge taha u'ava ta ge wese venuana magilafu maega.

<sup>4</sup> \* Vonahaqiaqi, Yaubada ema fewa ba'e weaqina 'awahaqiaqiema, 'inega avetovale-tuyana weaqina be Vale Aqiaqina asimana 'ifoqeyea 'imia. Ta ema simana ge tomotau edi nuanua 'inega, ta 'esi Yaubada ena nuenuega. Mana Yaubada ema nuanuayavo giwalimaya ni'a alamanidi 'eguma aqiaqidi nage luveifadi. <sup>5</sup> Ta wese ni'a oalamaniana ge vona yafayafadi 'inega ada lugaihi 'imia emi nuagivila weaqina. Ta wese Yaubada ni'a alamaniana ge vevediega ada veiaianemi emi kulufayavo sabi 'ewadi. <sup>6</sup> Ta ema viaqayavo 'imia ta wese mali qabu 'idia ge tauma ama awatubo weaqina ada viaqidi. Vonahaqiaqi, ima'a Keliso ena tovaletuyanayavo luaqiaqiema be ada vetoluvine 'imia, ta ge ada viaqia. <sup>7</sup> Ta 'esi ima'a me ema nuawebui awai 'imia kavona taha vavine natudi i'ita'itamakia. <sup>8</sup> Omi'a nuama o'ewea qiduana, 'inega Ieisu Valena aneimi, ta wese taumega ahawafelema 'imia.

<sup>9</sup> \* Emavo, ona nuave'avinia lova omi'a maega katoatoa ta Ieisu Valena alugaihiea 'imia. Ta ge taha vita ada neimi ama 'itamaki weaqina, 'inega 'aubena be velovelovana qabuna 'idia afewa qiduana be taumega ave'ainima. <sup>10</sup> Omi'a taumiega ema ilivu ni'a oalahalamanidi, ta wese Yaubada alamani aqiaqiedi, mana ima'a simasimatalima ta tunutunuqima ta ge wese taha ema luveifamo. <sup>11</sup> \* Ta ni'a oalamaniana tomotau qabumi a'itamakimi 'idewani taha tama natunavo 'ita'itamaki aqiaqiedi. <sup>12</sup> 'Inega alugaihimi be avona iulemi ta wese avenoqiemi ona veilivu aqiaqi be yaqisa Yaubada na'awahaqiaqiemi, mana ni'a venua'ivinemi tauna ena 'Ebeluvine 'inaya ona lugu ta ena simatala qiduana ona 'itea.

<sup>13</sup> \* Emavo, tuta qabuna alulukaiwa Yaubada 'inaya, mana tuta nana ena vona alugaihiea 'imia e 'inega vona nana 'inaya oawafelemi. Ta vona nana o'awahaqiaqiea Yaubada 'inega mai, ta ge tomotau 'idiega. Vonahaqiaqi, ba'e Yaubada ena vona, ta omi'a tovetumaqana vona nana ena waiwai ni'a olutonovia. <sup>14</sup> \* Ta omi'a toa vitana alobea emi vetumaqana weaqina, 'idewani taudi Ieisu Keliso ana tovetumaqanayavo di'we Iudia 'inaya itoatoa vita nana wese ilobe. Mana to'ekalesia diavona vevoalana ilobe. Ta tomotauyavo me Diu 'idega, 'idewani omi'a wese vevoalana alobea emi tomotauyavo 'idiega emi vetumaqana weaqina. <sup>15</sup> \* Mana taudi me Diu lova Yaubada ena tovesimanasimanayavo iluve'aligidi, ta wese eda Kaiwabu Ieisu iveilivu veifea ta iluve'aligia, ta ba'itagana ima'a wese ivevoalanema ta ilu'wavinima. Ta wese tomotau qabudi ivevoalaneidi 'inega Yaubada ge daqaiawa edi ilivuyavo weaqidi. <sup>16</sup> Ta wese me Diu nuanuadi ema lugaihi taudi ge me Diu 'idia ina givelua'uya, mana ge nuanuadi mali qabu 'etoyavua ina lobei Yaubada ena gamosoala 'inega. 'Inega edi luveifanayavo veqidua otaqa ta Yaubada ena gamosoala ni'a ilobe.

### *Faulo nuanuana navayausa 'eviviedi*

<sup>17</sup> Emavo, lova anogemi ta tuta qabuna a'ala'alanuaiemi, 'inega ge tuta kuena ema tauya 'abibodanaya nuanuama ada 'ita 'eviviemi. <sup>18</sup> Vonahaqiaqi, nuanuama ada wai

\* 2:1-2: Via 16:19-24; 17:1-9 \* 2:4: Gal 1:10 \* 2:9: Via 20:34 \* 2:11: Via 20:31 \* 2:13: 2Te 2:13 \* 2:14: Via 17:5 \* 2:15: Via 9:23,29; 13:45,50; 14:2,5,19

'evivi sabi 'itami, 'inega ya'a Faulo yavetafe'wa waiwai vonigo eda wai, ta ge agu fata mana Seitani ema 'eda gibodea.

<sup>19</sup> \* Omi'a ema 'ebeluta vane ta wese ema 'ebeqaiawa 'iudi. Ta wese omi'a ema 'ebe'asima'ala tuta nana kana tovolu eda Kaiwabu Iesu matanaya ena 'evivi mai 'inaya.

<sup>20</sup> Vonahaqiaqi, awatubo be qaiawa weaqimi ana lobe.

### 3

<sup>1-2</sup> \* Tuta kuena 'inaya nuanuama be ada vyausimi, ta ge ana fata be ada wai 'imia. Ta wese valemi ge ada noqoli, 'inega giwalima a'ala weaqimi. E 'inega taida Timoti avetunea wai sabi 'itami, ta ya'a be Sailasa ba'ade 'abaga qiduana Ateni 'inaya atoa. Taida nana maega Yaubada weaqina afewafewa 'aidega Keliso Valena ana vetalasimasi-mana weaqina. Ta ena wai nana 'iuna mana nuanuama navona iulemi, be wese sabi givefa'alimi emi vetumaqana Keliso 'inaya weaqina. <sup>3</sup> \* Ta wese wai 'imia be yaqisa emi vetumaqana nana ge nadawalili tuta vitana 'idia. Ta ni'a oalamani aqiaqiea ita'a tovetumaqana vita diavona kana lobedi ta wese kana vebaedi. <sup>4</sup> Ta ona nuaia lova ima'a maega katoatoa amaduvonemi ba'e vita diavona ina 'ifoqe 'imia, ta ba'itagana vona nana ana aqiaqi ni'a o'itea ta ovebaedi.

<sup>5</sup> E ba'e vita diavona weaqidi yanuanua qiduana, 'inega Timoti yavetunei wai ta emi vetumaqana nahalamaniana ta valena namiea 'iguya. Mana giwaligu a'ala Seitani ena sitonovayavo 'inega nage ni'a odawalili ta ema vetafe'wa weaqimi daveyani kavokavovo.

<sup>6</sup> \* Ta Timoti ni'a 'evivi mai 'imiega ta valemi aqiaqina neima vonaya vonigo omi'a me Tesalonaika me emi vetumaqana waiwaina Keliso 'inaya otoatoa ta wese veyoluba 'avami. Ta wese vematamagilafuyema tuta qabuna ema vyausa nugwenugweina o'ala'alanuaiea, ta wese vematamagilafuyema nuanuami ona 'ita 'eviviema 'idewani ima'a wese nuanuama ana 'itemi.

<sup>7</sup> \* Emavo, ima'a wese vita be vevoalana ni'a alutonovia, ta tuta nana emi vetumaqana Keliso 'inaya valena anoqolia 'inega giwalima 'eta'ia ta wese aqaiawa qiduana. <sup>8</sup> Vona aqiaqi, emi tovolu 'i'ita Keliso 'inaya weaqina ama lutonova ni'a veaqiaqi.

<sup>9</sup> 'Inega Yaubada 'inaya ema lukaiwa weaqimi ge ana fata be ana givelua'ui, mana omi'a weaqimi Yaubada matanaya aqaiqaiawa gegoyo. <sup>10</sup> 'Inega 'aubena be velovelovana qabuna 'idia avevenoqi waiwai vonigo ana 'ita 'eviviemi, be 'eguma emi vetumaqana nawale ge davewaiwai otaqa, e 'inega nuanuama ana iulemi be yaqisa vetumaqana nana naluveagatuna'imi.

<sup>11</sup> 'Inega avevenoqi Tamada Yaubada be wese eda Kaiwabu Iesu 'idia ema 'eda ina siwa'ea 'inega ana fata ana vyausimi. <sup>12</sup> Ta wese avevenoqi Yaubada 'inaya vonigo eda Kaiwabu emi veyoluba nagive'ena'ia be na'afwataiwaqa omi'a weaqimi ta wese tomotau qabudi weaqidi, 'idewani ima'a ema veyoluba weaqimi 'afwa'afwataiwaqa. <sup>13</sup> E ba'e 'inega Keliso giwalimi nagivewaiwaiedi be yaqisa ami fata ona tovolu Tamada Yaubada matanaya ge ami 'ebeve'ewamo, ta 'esi vunavunaqa otaqimi ona toatoa tuta nana eda Kaiwabu Iesu na'evivi namai ena tomotauyavo gwalagwaladi maega.

### 4

#### *Yaubada kana giveqaiawe a ilivu aqiaqina 'inega*

<sup>1</sup> Emavo, wese taha yani qiduana weaqina ana vematamagilafuyemi. Eda Kaiwabu Iesu ana wawega avona waiwai 'imia emi ilivu aqiaqina 'inega ona toatoa, be yaqisa Yaubada naqaiawa weaqimi. Lova yani diavona weaqidi ni'a ave'itemi, ta ahalamaniana ilivu aqiaqidi oviaviaqidi. Ta ba'itagana agivenua'i'ihimi ilivu diavona ona givetomanedi. <sup>2</sup> Mana ema ve'itayavo lova eda Kaiwabu Iesu ana wawega aneimi ni'a oalamani aqiaqiedi.

\* 2:19: Fil 2:15-16; 4:1; 2Te 1:4 \* 3:1-2: Via 17:15; Via 16:1-3 \* 3:3: 2Tim 3:12 \* 3:6: Via 18:5 \* 3:7: 2Te 1:4

<sup>3</sup> \* Yaubada nuanuana taumiega ona vegwalemi, 'inega ge taha velamo'eno kavokavovo ona viaqi. <sup>4</sup> \* 'Inega qabumi ami fata 'wafimi ona 'itamaki aqiaqiedi tuta nana sitonova taha taha ona lobedi, ta me emi ilivu vunavunaqina ona toatoa 'inega tomotau ina 'awahaqiaqiemi. <sup>5</sup> Ta gebu me emi nuagovaqa 'idewana taudi ge ida tafwalolo, mana Yaubada ena 'eda ge ida alamania. <sup>6</sup> 'Inega omi'a to'ekalesiyavo ge taha toga 'imiega ana luaqiaqi be iana moqanena maega ina 'eno, fole Yaubada ena luvematasabu nalobei ilivu nana weaqina. E ba'e ilivu nana weaqina lova vona waiwaidi ni'au amaduneimi. <sup>7</sup> \* Mana Yaubada ge davenua'ivineda ilivu bwavubwavudi adi viaqa weaqina, ta 'esi ilivu vunavunaqina weaqina. <sup>8</sup> \* Ta 'eguma taha toga ba'e ve'ita diavona nanogedi 'inega tauna ge tomotau edi luvine dabwegei, ta 'esi Yaubada ena luvine, tauna Niboana Gwalagwalana neinei kavovomi.

<sup>9</sup> \* Emavo, egu leta ba'e 'inaya ge ena ve'itemi omi'a tovetumaqana ma'oda ma emiavo ona veyoluba 'aiqemi, mana ba'e veyoluba nana weaqina Yaubada taunega ni'au ve'itemi. <sup>10</sup> Vonahaqiaqi, Yaubada ena tomotauyavo qabudi di'we Masidonia gamonaya itoatoa ni'a oveveyolubedi, ta nuanuama qiduana veyoluba nana 'idia ona luvetomania. <sup>11</sup> \* Ta emi nuanuayavo ona a'udi yani toi 'idia, e ba'e: Me emi ilivu nuvana ona toatoa be, tomotau 'wafidi ge ona givesiniqaiqiedi, ta wese taumiega ona fewa emi toa weaqina, 'idewani lova ni'a avonemi. <sup>12</sup> 'Inega taudi Keliso ge ida vetumaqanea emi ilivu aqiaqina 'inega ina 'amayabemi. Ta omi'a ami iula weaqina gebu mali tomotau 'idia ona vetumaqana, mana taumiega ni'a oveveiuula.

*Eda Kaiwabu ena* 'evivi mai weaqina

<sup>13</sup> Emavo, nuanuama ona alamani aqiaqiea tola'ai nawale na'ifoqe taudi tovetumaqana aqiaqi 'ali'aligidi 'idia, be yaqisa ge ona nuavita 'idewani taudi ge ida vetumaqana to'aliga edi ya'itoto 'evivi 'inaya. <sup>14</sup> \* Ita'a kavetumaqana Iesu 'aligega ni'a ya'itoto 'evivi, 'inega wese kavetumaqana taudi edavo tovetumaqana ni'a i'aliga nawale Yaubada 'aligega nagiveya'itoto 'eviviedi tuta nana Iesu na'evivi namai bwa'obwa'oya. <sup>15</sup> \* Ta tola'ai ba'itagana aveve'itemi lova wese 'idewana Iesu ve'itema. Ta ve'ita nana ana alamani ba'e: Iesu ena 'evivi mai ana 'aubena 'inaya ita'a mayawaida bwa'obwa'o 'inega ge kana madutauya debanaya, ta 'esi taudi 'ali'aligidi ina nugweta. <sup>16</sup> Mana eda Kaiwabu taha vona qiduana nanoqolia Yaubada ena tovale'ewayavo adi tovanugweta ena gaba 'inega, ta tutana 'inaya Kaiwabu taunega nawebui mai mahalega. Ta wese Yaubada bea namu'ea, 'inega Keliso ana tovetumaqanayavo 'ali'aligidi ina maduya'itoto deba'unuyega. <sup>17</sup> Ta 'abiboda ita'a mayawaida taudi maega kana va'auta gawataya, ta oade 'inaya Iesu maega kana vellobaloba, 'inega tuta vataya tauna maega kana toatoa. <sup>18</sup> 'Inegana vona ba'e 'idiega ma emiavo taumiega ona vona iulemi ta ona givewaiwaiemi.

## 5

*Kana* 'iva'ava'aida eda Kaiwabu ena 'evivi mai weaqina

<sup>1</sup> Emavo, ge daluaqiaqiema be leta ba'e 'inega ana vematamagilafuyemi Iesu ena 'evivi mai ana 'aubena weaqina, <sup>2</sup> \* mana ni'a oalamani aqiaqiea eda Kaiwabu ena mai ana 'aubena naluveafeda 'idewani tovanawala edi mai velovelovana 'inaya. <sup>3</sup> \* Vonahaqiaqi, tuta nana tomotau ina vonaya, "Eda toa aqiaqi otaqina, ge taha tola'ai weaqina kana mwaniniva." E 'inega veilaqe qiduana naluveafedi navunuqidi 'idewani visiqa qiduana vavine gamwegamwe'idi naluveafedi sabi venatuna. Ta veilaqe nana 'inega totoa velovelovana ge taha toga 'idiega ana fata nadena.

<sup>4</sup> Ta emavo, omi'a ge velovelovana ana totoa, e 'inega eda Kaiwabu ena 'aubena ge wese naluveafemi kavona tovanawala ena mai 'idewani. <sup>5</sup> \* Omi'a qabumi simatala

\* 4:3: 1Te 5:23; 1Fit 1:16      \* 4:4: 1Kol 6:13      \* 4:7: 1Fit 1:15-16; Ibe 12:14      \* 4:8: Lk 10:16; 2Kol 1:22      \* 4:9: Ion 13:34      \* 4:11: Efe 4:28      \* 4:14: Lom 14:9; 1Kol 15:3-4,12      \* 4:15: 1Kol 15:51-52      \* 5:2: Md 24:42-43; 2Fit 3:10; Ve 3:3      \* 5:3: Md 24:39; Lk 21:34-35      \* 5:5: Lom 13:12



ana totoayavo ta wese 'aubena ana totoayavo. Ita'a tovetumaqana gebu velovelovana ana qabuyavo, 'inega ge nuanuada velovelovana ana ilivuyavo kana viaviaqidi. <sup>6</sup> 'Inega kana 'itamaki aqiaqieda, ta ge kana 'eno motaiva vaidi tomotau 'idewani. Ta 'esi me eda 'iva'ava'ata be wese me eda nuanua tunutunuqidi kana toatoa, <sup>7</sup> mana to'eno velovelovana 'inaya i'eno'eno, ta wese go'ila waiwaina ana tonuma velovelovana 'inaya inumanuma 'inega ivekwavakwava. <sup>8</sup> \* Ta ita'a 'aubena ana totoayavo luaqiaqieda be taudega kana 'itamakida. 'Inega veyoluba be vetumaqana eda 'ebevebaba, ta wese ni'a kalamania 'etoyavua kana lobeia Keliso 'inega, ta 'etoyavua nana 'inega 'unu'unuda kana 'aubwaea. <sup>9</sup> Mana Yaubada ge davenua'ivinida be ena gamohoqala naguiwaqa webuiei 'idaya, ta 'esi venua'ivineda be 'etoyavua kana lobeia eda Kaiwabu Iesu Keliso 'inega. <sup>10</sup> \* Vonahaqiaqi, tauna 'aliga weaqida, 'inega ge taha tola'ai 'eguma 'ali'aligida nage mayawaida katoatoa tuta nana na'evivi namai, mana 'aliga nana 'inega 'etoyavuida be yaqisa tauna maega kana toatoa. <sup>11</sup> 'Inega taumi ma emiavo ona vona iulemi be wese ona givewaiwaiemi, 'idewani ba'itagana ni'a oviaviaqia.

*Faulo ena nuanua ana* 'ebeluo'ova

<sup>12</sup> Emavo, nuanuama qiduana omi'a to'ekalesia ami tovanugwetayavo ona 'amayabedi. Taudi eda Kaiwabu Iesu venua'ivinidi ta ena fewa iviaviaqidi, ta omi'a tovetumaqana emi ilivu aqiaqina tuta qabuna ilulugaihimi. <sup>13</sup> Ta edi fewa qiduana weaqina ona givaneyedi be ona veyoluba aqiaqiedi. Ta omi'a to'ekalesia ge ona vedavi, ta 'esi taumi ma emiavo ona toadaumwala tuta qabuna. <sup>14</sup> \* Emavo, avevemamatamagilafuyemi tovegwavu'ai ona lugaihidi ge ina toa kavokavovo, ta 'esi ina fewafewa, ta tomwaninivayavo giwalidi ona givfatuya, ta todawalili ona iuledi. Ta ona awafelemi be ona vetofewa tomotau qabudi 'idia. Ta omi'a taumi ma emiavo ona bibitaqomi. <sup>15</sup> \* Ta 'eguma vaidi tomotau ina veilivu veifemi 'inega ge wese ona ve'iedi, ta 'esi tuta qabuna ma emiavo ta wese mali tomotau maega ona veilivu aqiaqiem.

<sup>16</sup> \* Tuta qabuna me emi qaiawa ona toatoa. <sup>17</sup> Ta tuta qabuna ona vevenoqi! <sup>18</sup> \* Ta 'eguma tuta aqiaqina nage vitana, ta tua tuta qabuna ona lukaiwa Yaubada 'inaya. Ba'e ena nuanua, mana omi'a Keliso ena tomotauyavo.

<sup>19</sup> \* Niboana Gwalagwalana ena fewa ge ona givelua'ui. <sup>20</sup> Ta 'eguma taha toga natovolo navonaya, "Niboana Gwalagwalana ena vona ba'e." E 'inega vona nana ge ona veyani kavokavovoyei, <sup>21</sup> \* ta 'esi vona nana ona lutonova aqiaqiea ta Yaubada ena vona maega ona givelleqea, ta 'eguma aqiaqina e 'inega ona kafi'ihia. <sup>22</sup> 'Inega yani qabuna luveifadi ona nogedi.

*Vona veyoluba be lukafoi*

<sup>23</sup> \* Egu nuanua qiduana toadaumwala ana Yaubada taunega emi ilivu qabuna 'idia nagivegwalemi. Ta yavevenoqi weaqimi niboanimi be emi nuanua ta wese du'umi qabuna ona 'itamaki aqiaqiedi, 'inega ge taha ami 'ebeve'ewamo tuta nana eda Kaiwabu Iesu Keliso na'evivi namai. <sup>24</sup> Yaubada ni'a venua'ivinimi, e 'inega ona vetumaqanea be yani diavona ana fata naviaqidi weaqimi.

<sup>25</sup> \* Emavo, nuanuama ona venoqi weaqima.

<sup>26</sup> Tuta nana emiavo tovetumaqana maega ona va'auta e 'inega venima sibusuyega ona lulukaiwa 'idia.

<sup>27</sup> Eda Kaiwabu ana wawega yaluviniemi leta ba'e ona avoya edavo tovetumaqana qabudi 'iawadia.

<sup>28</sup> Avevenoqi weaqimi eda Kaiwabu Iesu Keliso ena veyoluba omi'a qabumi maega.

\* 5:8: Ais 59:17; Efe 6:14,17 \* 5:10: Lom 14:8-9; 1Te 4:14 \* 5:14: 2Te 3:6,11 \* 5:15: Lom 12:17; 1Fit 3:9  
 \* 5:16: Fil 4:4 \* 5:18: Efe 5:20 \* 5:19: Efe 4:30 \* 5:21: 1Ion 4:1 \* 5:23: 2Te 3:3 \* 5:25: Kol 4:3; 2Te 3:1

## Faulo ena leta vemagilafuna me Tesalonaika 'idia

### *Leta ana alamani weaqina*

Faulo be Sailasa ta wese taidi Timoti maega itauya me Tesalonaika 'idia ta Iesu Valena ineidi, 'inega ivetumaqanea. Ta 'abiboda Faulo me Tesalonaika valedi noqolia nuadi nawale ge da'eqa'ui Iesu ena 'evivi mai bwa'obwa'oya weaqina, mana vaina tomotau ive'ita veifedi. 'Inega Faulo taha leta maduvetunei 'idia, ta 'abibodanaya wese edi leta ba'e vemagilafuna 'abaga Kolinita 'inega 'wayavia be yaqisa ina alamani aqiaqiea tola'ai na'ifoqe tuta 'ebeluo'ova 'inaya. Ta wese ba'e leta nana vetunea 'idia edi vetumaqana ana givewaiwai weaqina.

### *Leta gamona*

1:1-2 Vematamagilafu be venoqi

1:3-12 Awatubo be 'awahaqiaqi

2:1-17 Ve'ita Keliso ena 'evivi mai weaqina

3:1-15 Vona waiwaina tovetumaqana edi ilivu weaqina

3:16-18 Vona veyoluba be lukafoi

<sup>1</sup> Ya'a Faulo taidavo Sailasa be Timoti maega atoatoa, ta emi leta ba'e a'wayavia omi'a to'ekalesia otoatoa 'abaga qiduana Tesalonaika 'inaya weaqimi. Omi'a Yaubada Tamada be eda Kaiwabu Iesu Keliso edi tomotauyavo.

<sup>2</sup> \* Nuanuagu ona toadaumwala Yaubada Tamada be eda Kaiwabu Iesu Keliso edi veyoluba 'inega.

### *Keliso nawale namai be tomotau naluvinedi*

<sup>3</sup> Emavo, tuta qabuna alulukaiwa Yaubada 'inaya weaqimi. Ama luaqiaqi be 'idewani ana viaqia, mana emi vetumaqana tuta qabuna veve'ena'i, ta wese emi veyoluba nuanimia veve'ena'i. <sup>4</sup> \* Ta tuta nana atautauya di'we taha taha Yaubada ena tovetumaqanayavo 'idia, 'inega matadia ami wawa agigivaneyea ta avonevonedia, "Edavo me Tesalonaika taudi bibitaqo 'avadi ta wese tovetumaqana aqiaqi. Adi aviayavo 'idiega veilae be visiqalobelobedi, ta edi vetumaqana ge dadawalili, ta 'esi nawale waiwaina."

<sup>5</sup> Vonahaqiaqi, omi'a vevoalana qiduana ni'a olobea, ta Yaubada ena luvine 'inega taudi voalamiavo naluvematasabudi. Ta ba'e luvematasabu nana 'inega nave'iteda tauna tuta qabuna luvine aqiaqina be tunutunuqina 'inega luviluvine. Mana Yaubada ena viaqayavo tunutunuqidi tomotau qabuda 'idaya. Ta vita diavona ba'itagana olobelobedi 'idiega Yaubada 'iva'ava'ata vatayemi, 'inega luaqiaqiemi be nawale me emi qaiawa ona toa ena luvine 'ayanaya. <sup>6</sup> \* Tomeqabu ba'itaga vita ineineimi nawale Yaubada 'inega taudi wese vita ina lobe. Tomotau edi ilivu luveifana adi ve'ia tunutunuqina Yaubada naneidi, mana tauna ana 'aidega Toluvine Aqiaqi. <sup>7</sup> \* Ta tuta nana eda Kaiwabu Iesu ena tovale'ewayavo waiwaidi maega ina webui mai mahalega, e 'inega Yaubada veyawai omi'a be ima'a naneida. <sup>8</sup> \* 'Aiwe saesaelina maega ina mai, be tomotau Yaubada ivemwageyee naluvematasabudi. Ta wese taudi Vale Aqiaqina eda Kaiwabu Iesu weaqina ge ida matayagea naluvematasabudi. <sup>9</sup> \* Ta adi luvematasabu ba'e 'idewana: Tuta qabuna ina toasi'i Keliso 'inega ta veilae vataya ina lobe, 'inega ge wese ena simatala kaikaiwabuna ina 'itei. <sup>10</sup> \* Ta mai nana 'inaya awatubo qiduana nalobe ena tomotauyavo gwalagwaladi 'idiega, ta wese tovetumaqana ina nuavoqana tauna weaqina. Ta omi'a me Tesalonaika wese taudi maega Iesu ona awatuboya, mana lova Vale nana asimana 'ifoqeyea 'imia ta ovetumaqanea.

\* 1:2: Lom 1:7 \* 1:4: 2Kol 7:4; 1Te 2:19 \* 1:6: Lom 12:19 \* 1:7: 1Te 3:13 \* 1:8: Ais 66:15 \* 1:9: Ais 2:10 \* 1:10: Kol 3:4

<sup>11</sup>\* Ba'e yani diavona nawale ina 'ifoqe, 'inega ima'a tuta qabuna weaqimi avevenoqi eda Yaubada 'inaya. Mana lova nuave'avinimi be gabemi toa aqiaqina ana 'eda 'inaya. 'Inega avevenoqi 'inaya naiulemi be yaqisa 'eda nana ona 'abibodea. Ta wese avevenoqi 'inaya ena waiwaiega yani qabuna aqiaqidi nuanuami ona viaqidi emi vetumaqana 'inega, e ami fata ona viaqa 'ovoidi. <sup>12</sup> Ba'e 'idewani avevenoqi weaqimi be yaqisa eda Kaiwabu Iesu ana wawa ana awatubo naveqidua omi'a emi viaqayavo 'idiega, 'inega omi'a wese awatubo ona lobeia Keliso maega. Ba'e awatubo diavona ina 'ifoqe Yaubada be eda Kaiwabu Iesu Keliso edi veyoluba 'inega.

## 2

### *Luvine ana toqeu weaqina*

<sup>1</sup> Emavo, nuanuama ona alamani aqiaqiea eda Kaiwabu Iesu Keliso ena 'evivi mai weaqina, ta wese ma'oda kana toava'auta 'aiqa Iesu maega. <sup>2</sup> Ta ge ona nidoa nage giwalimi naha'ala 'eguma vaina tomotau ni'au ivonemi ivonaya, "Ima'a kavona ve'wayoqega alamani ni'a a'ewea vonigo Kaiwabu ena 'evivi ana tuta ba'e ni'au 'ifoqe." Ta wese 'eguma vaina tomotau ni'au ivonemi ivonaya, "Ima'a ema vona asimasimana 'ifoqeyea 'imia Yaubada 'inega." Ta wese 'eguma vaina tomotau ni'au ivonemi ivonaya, "Ima'a ve'ita a'ewea Faulo ma enavo edi letayega." E 'inega ge ona vetumaqanedi, mana i'e'eu'au'ava. <sup>3</sup>\* Gebu taha tomotau edi 'eu'au'ava nuami na'ewei, mana Keliso ena tuta 'evivi mai ge na'ifoqe ana laba tomotau qabudi Yaubada ina vevoalana aqiaqiea. Ta wese luvine ana toqeu nugweta na'ifoqe bwa'obwa'oya, ta 'abibodanaya Iesu na'evivi namai mahalega. Tauna toqeu nana Yaubada ena luvine 'inega nawale tuta 'ebel'ovoa 'inaya veilage vataya 'aiwe 'ala'alata 'inaya nalobeia. <sup>4</sup>\* Luvine ana toqeu taunega ana wawa nagivaneyea, ta Yaubada ana wawa be yani qabuna 'ebeiwa'odu tauna adi avia. 'Inega Yaubada ena Vanue Gwalagwalana gamonaya natoabui navonaya, "Ya'a ba'e taugu Yaubada."

<sup>5</sup> Nage ni'a onuafania lova tuta nana omi'a ya'a maega katoatoa ba'e yani diavona weaqidi ni'au yavonemi. <sup>6</sup> Ta toqeu nana nawale ge da'ifoqe mai. Ta ena awataya 'iuna ni'a oalamania, mana Yaubada toqeu nana ena tuta mai nawale ge dahawafelei 'inaya. <sup>7</sup> Vonahaqiaqi, toqeu nana ena viaqayavo waiwaidi 'waivega ni'au i'ifoqe bwa'obwa'oya. Ta viaqa diavona adi toawataya tauna nawale toatoa. Ta nawale tuta maimai 'inaya toawataya nana navasi'i, 'inega viaqa diavona lueifadi ina 'ifoqe aqiaqi. <sup>8-12</sup>\* Luvine ana toqeu na'ifoqe Seitani ena waiwaiega ta yani qabuna 'ebenuavoqana ta wese 'ebenua'ewa naviaqidi be tomotau nau'avedi. Toqeu nana mali yani be mali yani 'idiega tomotau qabudi nau'avedi, 'inega veilage vataya ana 'eda 'inaya ina tauya, mana tomotau diavona Vale Aqiaqina ana vonahaqiaqi ilugwavu'aiea 'inega 'etoyavua ge ina lobei. Ba'e 'iuna 'inega Yaubada nuadi nagivevoqania be u'ava diavona ina vetumaqanedi. 'Inega toqeu nana ana to'abibodayavo veilage vataya ana luvine ina lobeia, mana vonahaqiaqi ge ida vetumaqanei, ta 'esi ilivu lueifana ana viaqa nuadi na'ewea ta ina qaiawa weaqina. Ta 'abiboda eda Kaiwabu Iesu ena simatala diayainega na'evivi namai mahalega. Ta Iesu 'awana yaququlinega ta wese simatala nana 'inega toqeu nana naluveawalia.

### *Yaubada me Tesalonaika venua'ivinedi*

<sup>13</sup>\* Emavo, eda Kaiwabu veyolubemi 'inega ama luaqiaqi be tuta qabuna ana lulukaiwa Yaubada 'inaya weaqimi, mana lova tuta ana 'ebeve'ale 'inaya venua'ivinemi 'etoyavua weaqina. 'Inega yani magilafuna 'idiega 'etoyavua ona lobeia, e ba'e: 'Eguma Yaubada ena vonahaqiaqi ona vetumaqanea, ta wese 'eguma ona awafelemi Niboana Gwalagwalana ena givevunavunaqa 'inaya. <sup>14</sup> Yaubada ema lugaihi Vale Aqiaqina 'inega gabemi, e 'inega omi'a eda Kaiwabu Iesu Keliso ena aqiaqi otaqa navewila'ayea 'imia. <sup>15</sup> Emavo,

\* 1:11: Kol 1:9; 1Te 1:2-3 \* 2:3: 1Tim 4:1; 1Ion 2:18; 4:3 \* 2:4: Dan 11:36; Isi 28:2 \* 2:8-12: Ais 11:4; Ve 19:15; Ve 13:11-13 \* 2:13: 2Te 1:3; Efe 1:4

yani diavona ni'a yasimamedi weaqidi ona nuanua. 'Inega ona tovoloi'ita ta tola'ai ni'au ave'itemi ema vonega be wese ema letayega ona kafi'i'ihia.

<sup>16-17</sup> Egu nuanua qiduana eda Kaiwabu Iesu Keliso ta wese Tamada Yaubada giwalimi ina givefatuya ta ina givewaiwaiemi emi vonayavo be wese emi viaqayavo 'idia. Yaubada tauna Toveyoluba ta ena nuakolokolo 'inega vona 'ebeiuila vataya neida, ta wese 'ebelui'ta vane aqiaqina neida.

### 3

#### *Faulo nuanuana to'ekalesia ina venoqi weaqidi*

<sup>1</sup> Emavo, 'abiboda be ba'e leta nana ana lu'ovoia, ta nugweta wese taha yani weaqina ana vonemi. Nuanuama ona venoqi weaqima Yaubada 'inaya be yaqisa Iesu Valena alulugaihiea lukwayavonega nayawala di'we taha taha 'idia, ta Vale nana tomotau me edi 'amayaba ina 'ewea 'idewani lova omi'a o'ewea. <sup>2</sup> Ta wese nuanuama ona venoqi weaqima be Yaubada tomotau luveifadi be tokwava 'idiega nava'abo'aboma be yaqisa ge adi fata ina veilaqeyema, mana tomotau ge qabudi ida vetumaqana eda Kaiwabu 'inaya.

<sup>3</sup> Eda Kaiwabu tauna ma ana vetumaqana, 'inega ona vetumaqana aqiaqiea be nagivewaiwaiemi ta wese nava'abo'abomi Seitani ena viaqayavo 'idiega. <sup>4</sup> \* Ta eda Kaiwabu ena givenuaha'u 'inega ni'a ahalamani aqiaqiea vonigo omi'a yani diavona lova avonemi ona viaqidi, e nawale oviaviaqidi, ta tuta maimai 'inaya wese ona viaqidi.

<sup>5</sup> Nuanuama qiduana eda Kaiwabu nuami nagiqa'uya be yaqisa Yaubada ena veyoluba omi'a weaqimi ona alamani aqiaqiea. Ta wese nuanuama Keliso ena bibitaqo ona alamani aqiaqiea ta ona vetutumea.

#### *Vona waiwaidi lugwavu'ai weaqina*

<sup>6</sup> \* Emavo, ba'e ami luvine eda Kaiwabu Iesu Keliso ana wawega. Ta luvine nana ana alamani ba'e 'idewani: 'Eguma tovetumaqana emiavo vaina ge nuadi ina fewa, e 'inega ona toasi'i 'idiega, mana ema ve'ita ge ida 'abibodei, ta 'esi itoa kavokavovo. <sup>7</sup> \* Omi'a ni'a oalamani aqiaqiea ema ilivu ona vetutumedi, mana lova tuta nana ima'a omi'a maega katoatoa ge ada lugwavu'ai. <sup>8</sup> \* Tuta qabuna ami 'abwagega ove'ainima ta 'abwaga nana weaqina avemaisimi. Ima'a 'aubena ta wese velovelovana 'idia taumega afewa, mana ge nuama vita ana a'ui 'imia. <sup>9</sup> \* Vonahaqiaqi, luaqiaqiema ana fata ada venoqiemi iula weaqina. Ta ge ada viaqi, mana nuanuama taumega ana fewa, 'inega ima'a ema ilivu nave'ebe'ita weaqimi ta ona vetutumea. <sup>10</sup> Ta lova ima'a omi'a maega katoatoa taha luvine aneimi avonemia, "'Eguma taha toga ge nuana fewa, e 'inega ge ana luaqiaqi be na'ai."

<sup>11</sup> \* Ta vale ni'a anoqolia vaina emiavo 'imiega ivevegwavu'ai ta ge ida fewafewa, ta 'esi iluluyaba dadana, ta wese ediavo edi tuta ikafia edi veqae kavokavovo 'idiega. <sup>12</sup> \* 'Inega tovegwavu'ai dina eda Kaiwabu Iesu Keliso ana wawega aluvinedi ina veilivu aqiaqi, ta luaqiaqiedi ina toa baula ta ina ve'ale fewa, 'inega taudiega adi 'abwaga ina lobe.

<sup>13</sup> \* Emavo, omi'a viaqa aqiaqidi weaqidi gebu 'wafimi nasiniqaiqi be ona lugwavu'ai, ta 'esi me emi bibitaqo fewa diavona ona viaviaqidi. <sup>14</sup> 'Eguma taha tomotau ema ve'ita leta ba'e 'inega ge na'abibodei, e 'inega tauna ena ilivu weaqina ona simanea emiavo 'idia, 'inega ina alamaniana tauna togama. Ta tauna maega ge ona veiaiana, ta 'esi ona vetoasi'iea be yaqisa tauna nainiyauyau ilivu nana weaqina. <sup>15</sup> \* Emavo, 'oloto nana ge ona veilivu veifei kavona tauna voalami, ta 'esi omi'a tovetumaqana emi vonega ona awatayea mana tauna wese taida.

#### *Faulo ena vona ana 'ebelui'ovoia*

\* 3:4: 2Kol 7:16; Gal 5:10 \* 3:6: Lom 16:17 \* 3:7: Fil 3:17 \* 3:8: 1Te 2:9 \* 3:9: 1Kol 9:4; 1Te 1:6 \* 3:11: 1Tim 5:13 \* 3:12: 1Te 4:11 \* 3:13: Gal 6:9 \* 3:15: 1Te 5:14

<sup>16</sup> Eda Kaiwabu tauna nuadaumwala 'iuna, 'inega avevenoqi weaqimi tuta qabuna 'idia nuami nagivedaumwalia, ta wese nuanuama emi toa taha taha 'idia ba'e nuadaumwala nana ona lutonovia. Ta wese nuanuama eda Kaiwabu omi'a qabumi tuta qabuna maega ona toatoa.

<sup>17</sup> Ya'a Faulo taugu nimaguyega egu lukafoi 'imia ya'wayavia egu leta ba'e 'inaya. Lova egu leta qabudi wese 'edewani yaviaqidi be yaqisa ona alamani aqiaqiea ya'a taugu 'iguyega. Ta egu lukafoi ana noqola ba'e 'idewani:

<sup>18</sup> Yavevenoqi qabumi weaqimi eda Kaiwabu Iesu Keliso ena veyoluba tuta qabuna ona lulutonovia.

## Faulo ena leta nugweta Timoti 'inaya

### *Leta ana alamani weaqina*

Timoti di'we Eisia 'inega. Tamana Guliki 'olotona, ta inana taudi Diu vavinedi. Faulo ena luvivila vemagilafuna 'inaya Timoti lobe ta venua'ivinea ena tofewa 'idewani. (Viaqa 16:1-3) 'Abiboda Faulo taha fewa Timoti neia, 'inega tovetumaqanayavo 'abaga Efeso 'inaya na'itamakidi. Ba'e leta nana gamonaya Faulo Timoti vematamagilafuyea 'ekalesia ana tovanugwetayavo weaqidi ma'oda ina toa 'aiqa ta edi fewa weaqina. Ta wese vematamagilafuyea vaina tove'ita luveifadi weaqidi. Faulo nuanuana to'ekalesia ba'e to'eu'au'ava dina edi vona ge ina noqolia fole nawale edi vetumaqana nadawalili. Ta wese vebibinea tovetumaqanayavo ma'oda ina tafwalolo 'aiqa. Ta 'ebelu'ovoa wese Faulo Timoti vematamagilafuyea ena ilivu weaqina, mana tauna Keliso ana tovetumaqana adi to'itamaki, 'inega nave'ebe'ita aqiaqi 'idia. E leta nana 'iuna ba'e 'idewani.

### *Leta gamona*

1:1-2 Lukaiwa be vona veyoluba

1:3-11 Ve'ita komwakomwana weaqina

1:12-17 Yaubada ena nuakolokolo Faulo 'inaya

1:18-20 Timoti ena fewa be ana veyoveyoya

2:1-15 Tafwalolo ana ve'eda be totafwalolo edi ilivu

3:1-16 Tovanugweta be dikoni edi fewa be edi ilivu

4:1-16 Tove'ita luveifadi be tofewa aqiaqidi

5:1-6:21 'Itamaki be vanugweta 'ekalesia ana qabu taha taha 'idia

### *Lukaiwa*

<sup>1</sup> Leta ba'e ya'a Faulo Iesu Keliso ena tovaletuyana 'iguyega waiwai. Ta Yaubada ada To'etoyavua be Iesu Keliso eda 'ebelu'ita vane edi nuanua 'inega yavetovaletuyana.

<sup>2</sup> \* O'a Timoti ya'awanatuna aqiaqieu, mana o'a be ya'a Keliso ana tovetumaqana. Tamada Yaubada ta eda Kaiwabu Iesu Keliso edi veyoluba be, edi nuakolokolo ta wese edi nuadaumwala 'iuya.

### *To'eu'au'ava edi ve'ita weaqina*

<sup>3</sup> Lova tuta nana ni'au be ena nogeu ta ena tauya di'we Masidonia 'inaya yavebibineu yavonaya, "Gebu una tauya mali di'we 'inaya." Ta ba'itagana wese yavonevoneu ba'ade Efeso 'inaya una toatoa be tove'ita 'eu'au'avidu una awatayedi be ge mali vetumaqana weaqina to'ekalesia ina ve'itedi. <sup>4</sup> \* Ta wese una vonedi tubudavo velulu'uyadi ge ina veqayedi, be wese 'aqegigidavo adi wawayavo ge ina velulu'uyayedi, mana velulu'uya diavona 'idiega nawale ve'ae'aetoga na'ifoqe. Ba'e yani diavona ge wese nave'ebuiula Yaubada ena nuanua weaqina, mana tauna ena nuanua kana alamani aqiaqiea vetumaqana 'inega. <sup>5</sup> Egu vona ba'e 'iuna mana nuanuagu omi'a tovetumaqana qabumi veyoluba ilivuna naluveagatuna'imi. Ta ba'e veyoluba nana 'ifo'ifoqe giwalimi vunavunaqidi 'idiega. Ta wese ami fata veyoluba ilivuna ona viaqia 'eguma oalamani aqiaqiea tola'ai aqiaqina nage tola'ai luveifana. Ta wese vetumaqana aqiaqina 'inega ami fata veyoluba ilivuna ona viaqia tomotau 'idia. <sup>6</sup> Ta vaina tove'ita ba'e ilivu diavona ni'a inogedi, ta 'eda aqiaqina 'inega itauya gei veqae kavokavovo ana 'eda 'inaya. <sup>7</sup> Nuanuadi tomotau ina 'awahaqiaqiedi vonigo taudi Yaubada ena luvine ana tove'itayavo. 'Inega taudi me edi giwalifatu ivonavona, ta edi vonayavo be edi ve'itayavo taudiega ge ida alamani aqiaqiedi.

<sup>8</sup> \* Vonahaqiaqi, ni'a kahalamani aqiaqiea vonigo Yaubada ena luvineavo aqiaqi otaqidi 'eguma vefewedi tauna ena nuanua 'inega. <sup>9</sup> Mana luvine diavona Yaubada

\* 1:2: Via 16:1-3; Tai 1:4      \* 1:4: 1Tim 4:7; Tai 1:14      \* 1:8: Lom 7:12,16

ge daha'udi tunutunuqidi weaqidi, ta 'esi luvine ana toqeu be, tovanawala be, taudi Yaubada weaqina ge ida nuanua be, luluveifadi be, taudi ge ida tafwalolo be, taudi Niboana Gwalagwalana gebu 'idia datoatoa be, taudi inadiavo ta tamadiavo be wese mali tomotau adi toluve'aligayavo be, <sup>10</sup> tovelamo'eno kavokavovo be, 'oloto ma 'oloto ediavo ta vivine ma vivine ediavo ivelamo'eno be, taudi tomotau ivanavanawalidi ta ivevegimwaneyedi 'oloto kaikaiwabudi 'idia be, taudi iu'au'ava kotu 'inaya ta wese tomeqabu ve'ita tunutunuqina iqueuneidi, e ba'e toveilivu luveifa diavona weaqidi Yaubada luvine diavona a'udi. <sup>11</sup> Ba'e ve'ita diavona imai Vale Aqiaqina ta simasimalina 'inega. Lova eda Yaubada aqiaqi otaqina ya'a Faulo vetumaqanegu ta Vale nana neigu be yaqisa ena lugaihiea tomotau 'idia.

*Lukaiwa Yaubada 'inaya ena nuakolokolo weaqina*

<sup>12</sup> \* Ta wese eda Kaiwabu Iesu Keliso givewaiwaiegu egu fewa ba'e weaqina. 'Inega yalulukaiwa 'inaya, mana vetumaqanegu ta venua'ivinegu fewa nana weaqina. <sup>13</sup> \* Tuta lova gebu 'idewani, mana omo'e tuta nana 'inaya Keliso ya'awaluveifea, ta ena qabuyavo yavevoalaneidi, mana ge eda vetumaqanei. Ta tua Yaubada nuakolokoloyegu, mana yani diavona luveifadi yaviaqidi taugu egu kwava 'inega. <sup>14</sup> Ta vonahaqiaqi, eda Kaiwabu ena nuakolokolo qiduana neigu, ta wese vetumaqana be veyoluba Keliso Iesu 'inega luveagatuna'igu.

<sup>15</sup> \* Taha vona ena neimi, ta vona nana ge u'ava ta 'esi ami fata ona vetumaqanea ta ona 'awahaqiaqiea, e ana noqola ba'e: Keliso Iesu mai bwa'obwa'oya tomotau luluveifadi sabi 'etoyavuidi. Ta toluveifadi qabudi 'idiega ya'a yaluveifa va'inedi. <sup>16</sup> Vonahaqiaqi, lova ya'a luveifa otaqigu. Ta tua Yaubada nuakolokoloyegu, mana nuanuana ya'a ena ve'ebe'ita toluveifadi qabudi weaqidi ta Iesu Keliso ena bibitaqo ina 'itea, 'inega nuadi na'eqa'uya ta ina alamania taudi wese adi fata yawai vataya ina lobe'a 'eguma ina nuagivila be Keliso ina vetumaqanea kavona lova ya'a 'idewani. <sup>17</sup> Yaubada tauna eda Kini Toatoa Vatayana, ta ge ana 'itamamo be wese ge ena 'aligamo. Tauna ana 'aidega eda Yaubada, 'inega 'amayaba ta awatubo tuta qabuna kana neia. Vonahaqiaqi, eda nuanua 'idewani.

*Faulo Timoti ena fewa neia*

<sup>18</sup> Natugu Timoti, una nuave'avinia lova Yaubada ena tovesimasimanayavo eu fewa imadusimana 'ifoqeyea weaqiu. Ta ya'a wese simana nana ba'itagana yasimasimana 'eviviea 'iuya Yaubada ena fewa weaqina, be yaqisa o'a ba'e vona diavona 'idiega waiwai be iula una lobe'a tuta nana Yaubada ana avia Seitani ena tofewayavo maega ona vedavi. <sup>19</sup> Eu vetumaqana Keliso 'inaya una kafi'i'ihia, ta tuta qabuna tau'u una 'itamaki aqiaqieu be ge taha luveifana una viaqi, mana o'a eu nuenuega ni'a ualamaniania tola'ai aqiaqina be tola'ai luveifana. 'Inega 'eguma taha yani luveifana una viaqia 'inega au luttonova wese naluveifa, waisa? Ta vaina tomotau ge ida nuanua ba'e yani diavona weaqina, e 'inega taudiega edi vetumaqana igivedawalilia ta ibe'u. <sup>20</sup> \* Ta tobe'u diavona nuanidiega 'oloto magilafudi itoatoa, taha ana wawa Aiminio ta taha ana wawa Alekisana. Taudi ni'au yave'ineiedi Seitani 'inaya naluvematasabudi, be yaqisa nuadi na'eqa'uya ta gebu wese eda Kaiwabu ana wawa ina 'awaluveifei.

## 2

*Vematamaqilafu tafwalolo weaqina*

<sup>1</sup> Yani taha qiduana weaqina nuanuagu be ena voneu, e ba'e: Omi'a 'ekalesia ona venoqi Yaubada 'inaya tomotau qabudi weaqidi. Ta tuta nana ovevenoqi 'inaya weaqidi, e 'inega wese ona lukaiwa weaqidi. <sup>2</sup> Ta kiniavo be toluvineavo weaqidi wese ona venoqi, be yaqisa edi luvine tunutunuqina 'inega kana toa genu'wana be kana toadaumwala. Ta tuta qabuna me eda ilivu tunutunuqina, ta wese me eda 'amayaba

\* 1:12: Via 9:15; Gal 1:15-16; 1Kol 15:9-10 \* 1:13: Via 8:3; 9:1-5 \* 1:15: Lk 19:10 \* 1:20: 2Tim 4:14-15; 1Kol 5:5

Yaubada 'iawanaya. <sup>3</sup> Vonahaqiaqi, ba'e venoqi nana aqiaqi otaqina, mana Yaubada ada To'etoyavua ilivu nana nuana 'ewea, <sup>4</sup> mana nuanuana tomotau qabudi 'etoyavua ina lobei ta vonahaqiaqi ina alamani aqiaqiea.

<sup>5</sup> Vonahaqiaqi, Yaubada ana 'aidega otaqa toatoa,  
ta wese taha 'oloto ana 'aidega otaqa ana fata  
Yaubada be tomotau naluvetubedi,  
e tauna ana wawa Iesu Keliso.

<sup>6</sup>\* Keliso nana taunega yawaina awafelea  
tomotau qabuda weaqida sabi gubaufada  
eda ilivu luveifadi 'idiega.

Ta Vale ba'e Yaubada neida  
ena tuta aqiaqina 'inaya lova ena venua'ivina 'inega.

<sup>7</sup>\* 'Inega Vale nana weaqina Yaubada venua'ivinegu be yavetolugaihi ta yavetovale-tuyana taudi ge me Diu weaqidi, ta yave'itedi vetumaqana aqiaqi Iesu 'inaya weaqina.

<sup>8</sup>'Inega emi tuta va'auta 'idia nuanuagu 'oloto nimadi ina silagaidi ta me edi awafela aqiaqi ina venoqi Yaubada 'inaya. Ta tuta nana ina vevenoqi 'inega gamohogala nage ve'ae'aetoga ge giwalidia na'eno'eno. <sup>9-10</sup>\* Ta ge nuanuagu vivine ina 'ivala vivi'oi. Ta 'esi nuanuagu ina nuana aqiaqi edi vekaleko weaqina. Ta ge daluaqiaqiedi be edi 'ivala 'idiega adi awatubo ina lobei, 'idewani debadi ina ve'ivala vivi'oini nage bagi aqiaqidi nage dabo namanamalidi nage kaleko adi maisa qiduana 'idiega. Ta 'esi vivine totafwalolo luaqiaqiedi 'eguma tomotau ina awatubodi edi ilivu aqiaqidi weaqidi, ta gebu adi 'ita weaqina.

<sup>11</sup>Ta wese vivine luaqiaqiedi be tafwalolo gamonaya ina toa genu'wana ta edi nuana ina awafeledi ve'ita aqiaqina 'inaya ta ina vineneqea. <sup>12</sup>\* Vivine ge eda awafeledi be ina ve'ita tafwalolo 'inaya. Ta wese ge adi fata be 'oloto ina luvinedi, ta 'esi ina toa genu'wana, <sup>13</sup>\* mana Yaubada Adama maduviaqia, ta 'abiboda Ibi. <sup>14</sup>\* Ta wese ada avia Seitani lova vaoqa Ideni gamonaya ge Adama dau'avei, ta 'esi vavine u'avedi, e 'inega vavine dina 'idiega luveifana 'ifoqe. <sup>15</sup>Ta ba'itagana vivine edi venatuna 'inega Yaubada ana fata na'etoyavuidi. 'Eguma me edi vetumaqana be, me edi veyoluba, ta wese 'eguma edi ilivu vunavunaqina ta tunutunuqina, e 'inega Yaubada naiuledi.

### 3

'Ekalesia ana tovanugwetayavo edi fewa

<sup>1</sup>\* Vonahaqiaqi, 'eguma taha toga nuanuana navetoludebana 'ekalesia 'inaya, e 'inega nuanuana fewa aqiaqi otaqina naviaqia. <sup>2</sup>\* 'Inega 'ekalesia ana toludebana ana luvine ba'e 'idewana: Luaqiaqiea be ena ilivu tuta qabuna aqiaqina be, ge taha tuta mali vavine maega ina veiaiana, ta 'esi tuta qabuna moqanena maega ina toatoa be, taunega ena nuana tuta qabuna na'itamaki aqiaqiea. Tauna me ena alamani qiduana be, ena ilivu aqiaqina 'inega tomotau ina 'amayabea. Ta tauna wagawaga matadi, be wese tove'ita aqiaqina. <sup>3</sup>Ta ge ana fata be go'ila waiwaina nanuma 'oda'odaqa, ta wese gebu diana navilei, ta 'esi ena ilivu nuvana be gebu nave'ae'aetoga. Ta gebu bwa'obwa'o ana kaikaiwabu 'inaya nuana naha'ui. <sup>4</sup>Ta luaqiaqiea tauna ena susuyavo ana fata navanugwetedi. Ta wese natunavo ina 'amayabea be ena vona ina noqolia be ina velumatamatayagea. <sup>5</sup>Mana 'eguma ge ana fata ena susuyavo navanugwetedi, 'inega wese tauna ge ana fata Yaubada ena to'ekalesiyavo navanugweta aqiaqiedi, waisa? <sup>6</sup>Ta ge tovetumaqana vauvauna ona venua'ivinei be navetovanugweta, mana tauna nawale nanuavane venua'ivinana weaqina 'inega luvine nalobeia 'idewani lova Seitani luvine lobeia ena nuavane weaqina. <sup>7</sup>\* Ta 'eguma taha toga navetovanugweta e luaqiaqiea

\* 2:6: Lom 3:29-30; Gal 1:4 \* 2:7: Via 9:15; Gal 2:7-8; 2Tim 1:11 \* 2:9-10: 1Fit 3:3-5; 1Tim 5:10 \* 2:12: 1Kol 14:34 \* 2:13: Nug 2:7,21-22; 1Kol 11:8-9 \* 2:14: 2Kol 11:3 \* 3:1: Via 20:28 \* 3:2: Tai 1:6-9 \* 3:7: 2Kol 8:21



be taudi ge ida tafwalolo wese ina 'awahaqiaqiea ena ilivu weaqina. 'Inega tomotau tovanugweta nana ge ina 'awaluveifei, ta wese Seitani ge ana fata nagivebe'uyei.

<sup>8</sup> Idewani wese dikoni edi ilivu aqiaqina ina ve'ita 'ifoqeyedi tomotau matadia, 'inega tomotau qabudi ina 'amayabedi edi ilivu tunutunuqina 'inega. Ta ge ina vemeahaqila be go'ila waiwaina gebu ina lunuma 'oda'odaqa. Ta gebu ina vemanuguba mane weaqina. <sup>9</sup> Yaubada Iesu Valena ni'a give'ifoqeyea tomotau 'idaya. Ta dikoniavo luaqiaqiedi be giwalidi qabuna 'inega Vale nana ina vetumaqana aqiaqiea be ina kafi'i'ihia, ta ina matayagea. Ta wese ge ina venuana magilafu Vale nana weaqina, ta 'esi ina vetumaqana aqiaqiea. <sup>10</sup> Inega 'eguma nuanuami vaina tomotau ona venua'ivinedi be ina vedikoni, e nugweta 'ekalesia ana fewa vaina ona neidi ina viaqidi. Ta 'eguma to'ekalesia iqaiqaiawa edi fewa nana weaqina, e 'inega adi fata be ina vedikoni.

<sup>11</sup> \* Ta wese 'idewani dikoni moqanediavo tuta qabuna ilivu aqiaqina ina viaviaqidi, e 'inega tomotau qabudi adi fata ina 'amayabedi. Ta ge ina vetoatoa guguna ta ina vevonavona ma ediavo tomotau weaqidi. Luaqiaqiedi be taudiega ina 'itamakidi ilivu luveifana 'idiega. Ta wese ma adi vetumaqana edi viaqa qabuna 'idia.

<sup>12</sup> Ta dikoni luaqiaqiea be ge mali vavine maega ina veiaiana, ta 'esi tuta qabuna ma moqanena ina toatoa, ta wese ana fata natunavo be wese ena gadeavo navanugweta aqiaqiedi. <sup>13</sup> Ta dikoni ma edi gwavubiga taudi 'amayaba ina lobeia tomotau 'idiega, ta wese edi vetumaqana Iesu 'inaya me edi giwalifatu ina veqaeqea tomotau 'idia.

<sup>14</sup> Natugu, egu nuanua qiduana nawale ena wai 'iuya, ta nugweta eu leta ba'e ya'wayavia waiwai una 'itea. <sup>15</sup> Ta 'eguma ena 'ive'ove'o ba'e leta nana 'inega una alamania ita'a totafwalolo ma'oda kana veilivu 'aiqa Yaubada mayawaina ena qabu gamonaya. Ita'a to'ekalesiyavo Yaubada ena ve'ita aqiaqi otaqina 'inaya katovolo'i'ita 'idewani vanue 'oqola falafaladi 'idiega tovolo'i'ita be ge ana fata nabuini. <sup>16</sup> \* Vonahaqiaqi, eda vetumaqana ana alamani 'idaya yani 'ebenuavoqana. Ta yani qiduana Iesu Keliso weaqina ba'e:

Ni'a vetomotau,  
 ta Niboana Gwalagwalana ve'iteda  
 Iesu vonahaqiaqi Yaubada Natuna,  
 ta Yaubada ena tovale'ewayavo i'itea,  
 ta Vale nana yawala di'we taha taha 'idia  
 'inega tomotau inoqolia,  
 ta totoa bwa'obwa'o ivetumaqanea.  
 Ta 'abiboda Tamana 'ewa vaneqea mahalaya.

#### 4

##### *Tove'ita* 'e'eu'au'avidi weaqidi

<sup>1</sup> Niboana Gwalagwalana ni'a simana aqiaqiea nawale tuta ana 'ebel'ovoa 'inaya tomotau vaidi edi vetumaqana Keliso 'inaya ina nokea, ta 'esi niboana 'eu'au'avidi edi u'ava be niboana luveifadi edi ve'ita ina 'abibodedi. <sup>2</sup> Omo'e tove'ita diavona taudi tovemeahaqila vonigo nuanuadi ina tovoloto tomotau matadia ta ina 'awahaqiaqiedi. Ta edi u'avayavo weaqidi ge ida nuanua, mana u'ava ana 'eda 'wamiona ni'a i'ewe. 'Inega ge ida alamania tola'ai aqiaqina nage tola'ai luveifana, ta 'esi ana 'ita kavona mafu gegadi. <sup>3</sup> \* Ta edi u'ava 'inega tomotau iawatayedi vonigo ge ina vaqi, ta wese 'etoboda ia'uya vaina 'abwaga weaqina. Ta omi'a Keliso ana tovetumaqanayavo ve'ita aqiaqi otaqina ni'a oalamanian Yaubada 'abwaga koyadi 'iva'ava'aidi 'ai weaqina. 'Inega tuta nana ka'ewedi kana lukaiwa Yaubada 'inaya be kana 'ainidi, <sup>4</sup> mana Yaubada ena 'iva'ava'ata qabudi aqiaqi otaqidi, e 'inega ge taha yani 'idiega kana nogedi. Ta 'esi me eda qaiawa kana 'ewedi, ta weaqidi kana lukaiwa 'inaya, <sup>5</sup> mana Tamada yani qabudi ena vonega ta eda noqiega ni'au givevunavunaqidi.

\* 3:11: Tai 2:3    \* 3:16: Ion 1:14; Kol 1:23; Mk 16:19    \* 4:3: Nug 9:3; Lom 14:6; 1Kol 10:30-31

*Yaubada ena tofewayavo aqiaqidi edi ilivu*

<sup>6</sup> Ta ba'e yani diavona weaqidi 'eguma una givesimatalidi to'ekalesia 'idia, e 'inega o'a Iesu Keliso ena tofewa aqiaqiu, mana ve'ita tunutunuqidi vetumaqana Iesu 'inaya weaqina u'abi'abibodea, e omo'e 'inega niboaniu navewaiwai. <sup>7</sup>\* Tubudavo velulu'uyadi gebu Yaubada 'inega, ta ge taha yani aqiaqina na'ifoqe 'idiega. 'Inegana ge una nuanua weaqidi, ta 'esi yani qiduana ba'e: Tau'u tuta qabuna una vetafe'wa waiwai Yaubada ena ilivu sabi 'ewana. <sup>8</sup> Ta 'wafida ana givewaiwai yani aqiaqina ta niboanida ana givewaiwai yani aqiaqi otaqina, mana niboanida ana givewaiwai 'inega ve'ia aqiaqina kana lobe a eda toa bwa'obwa'oya ba'itagana weaqina, ta wese tuta maimai 'inaya. <sup>9</sup> Ba'e vona nana vonahaqiaqi, 'inegana luaqiaqieda be vona nana kana vetumaqanea be kana 'awahaqiaqiea ta weaqina ge kana venuana magilafu. <sup>10</sup>\* Ba'e yani nana weaqina kavetafe'wa waiwai, mana eda 'ebelu'ita vane ni'a kaha'uya Yaubada mayawaina 'inaya. Tauna tomotau qabudi adi To'etoyavua, ta vonahaqiaqi ita'a tovetumaqana ada To'etoyavua.

<sup>11</sup> Ba'e yani diavona una lugaihiedi ta una ve'ita aqiaqiedi tomotau 'idia, ta wese una luvinedi be ina matayagedi. <sup>12</sup>\* Timoti, o'a kilakaiu 'inega eu ilivu una 'itamakidi be yaqisa tomotau ge adi fata ina awawebuieu. Ta 'esi nuanuagu una ve'ebe'ita aqiaqi tovetumaqana 'idia eu vona aqiaqina 'inega be, eu viaqa aqiaqina 'inega be, eu veyoluba 'inega be, eu vetumaqana 'inega, ta wese eu ilivu vunavunaqina 'inega. E ba'e 'idiega tomotau ge adi fata ina 'ita webuieu, ta 'esi ina 'awahaqiaqieu o'a 'ekalesia ana tovanugweta aqiaqi. <sup>13</sup> Ta wese nuanuagu tafwalolo gamonaya Buki Gwala una avoya ta una lugaihiea ta una veve'itayea ana laba ena wai 'iuya. <sup>14</sup>\* Ta una nuave'avinia lova 'ekalesia ana tovanugwetayavo nimadi ia'uya 'wafiuya ta Yaubada ena nuanua isimana 'ifoqeyea Niboana Gwalagwalana ena wila'a 'iuya weaqina. Ta wila'a nana una vefewa aqiaqiea tomotau 'idia.

<sup>15</sup> 'Inega fewa nana weaqina gebu una lugwavu'ai ta 'esi una awafeleu 'inaya, 'inega tomotau ina vonaya, "Vonahaqiaqi, Timoti tauna gwavubiga 'avana!"

<sup>16</sup> Timoti, tuta qabuna tau'u una 'itamakiu ta wese au ve'ita una 'itamaki aqiaqiea, 'inega o'a be eu tovineneqayavo maega Yaubada na'etoyavuimi.

## 5

*To'ekalesia ma'oda adi 'itamaki?*

<sup>1</sup> Oloto 'eva'evaledi 'ekalesia gamonaya ge una talamatedi, ta 'esi bonau biganega una vona 'idia, kavona taudi tamamwavo. Ta wese kilakaiavo una veilivu aqiaqiedi kavona taimwavo. <sup>2</sup> Ta vivine 'eva'evaledi una 'amayabedi kavona taudi inamwavo, ta iahaba 'idia ge una venuana magilafu, ta 'esi una veilivu aqiaqiedi kavonaya novumwavo.

<sup>3</sup> Ta 'eguma wadawada'e itoatoa ta ge adi to'itamakimo, e 'inega omi'a 'ekalesia ona 'itamakidi. <sup>4</sup> Ta 'eguma taha wada'e natudiavo nage tubudiavo itoatoa, e 'inega taudi luaqiaqiedi be ina 'amayabedi ta ina 'itamakidi, mana lova goyogoyodia i'itamakidi, e 'inega edi 'itamaki ina ve'iea. Ba'e ilivu nana Yaubada ena 'ebeqaiawa. <sup>5</sup> Ta wada'e diavona adi 'aidega itoatoa ge taha toga da'itamakidi taudi ilulu'ita vane Yaubada 'inaya, ta tuta qabuna 'aubena ta wese velovelovana 'idia ivevenoqi 'inaya iula weaqina. <sup>6</sup> Ta wada'e taudi 'wafi ana qaiawa 'inaya iawafeledi nawale mayawaidi itoatoa, ta vonahaqiaqi kavona 'ali'aligidi mana niboanidi ni'a 'aliga edi ilivu luveifana 'inega. <sup>7</sup> 'Inega gaihi diavona ba'e una neidi be yaqisa ge taha toga edi ilivu weaqina na'awaluveifedi.

<sup>8</sup> 'Eguma taha 'oloto tovetumaqana tauna ena gadeavo ge da'itamakidi, e 'inega tauna toluveifana. Ta 'eguma moqanena be natunavo ge da'itamaki aqiaqiedi, e 'inega tauna ena luveifana veqidua va'ine, mana 'oloto nana Yaubada ena vona veyani kavokavovoyea, e 'inega tauna ena ilivu luveifa otaqina, ta 'abiboda taudi Yaubada ge ida vetumaqanea.

\* 4:7: 1Tim 1:4 \* 4:10: 1Tim 2:3-4 \* 4:12: Tai 2:15 \* 4:14: 2Tim 1:6

<sup>9-10</sup> Ta wadawada'e adi wawayavo una 'wayavia 'ekalesia ana buki 'inaya taudi adi ya'wala 60 ta 'inega vaneqa ni'a ilobedi. Ta wese taudi lova moqanedi 'aideganamo be, 'eguma edi ilivu 'inega tomotau i'awahaqiaqiedi be, 'eguma taudi ilivu aqiaqina natudiavo ive'itedi ta ilivu nana 'wamiona i'ewea be, 'eguma taudi wagawaga i'ebe'ewedi edi vanueavo be, 'eguma taudi edi gwavubiga qiduana Yaubada ena tomotauyavo 'idia be, 'eguma taudi tonuavita adi toiula be, 'eguma taudi iawafeledi yani aqiaqidi adi viaqa 'inaya, e ba'e wada'e diavona taudimo adi wawa una a'uya buki nana 'inaya.

<sup>11</sup> Ta wada'e taudi nawale ge ida vekofekofe adi wawa ge una a'uluguyei bukia, mana nawale taha 'oloto aqiaqina ina 'itea nuanuadi ina vaqi 'evivi, be 'inega lova taudi edi awafela Keliso 'inaya ina qeunia. <sup>12</sup> Ta ba'e 'inega edi vona fofofola ina bwegea. <sup>13</sup> \* Ta wese wada'e diavona nawale ina vegwavu'ai ta vanue taha taha 'idia ina lugu, ta ina vetoatoa guguna ta ina vevonavona tomotau weaqidi. Ta ba'e ilivu nana ge adi luaqiaqi. <sup>14</sup> \* 'Inega nuanuagu taudi iwada'e iahaba ina vaqi 'evivi, ta ina venatuna ta natudiavo ina 'itamaki aqiaqiedi, 'inega ada aviayavo gebu ina 'awaluveifeda wada'e diavona edi ilivu weaqina. <sup>15</sup> Mana wada'e iahaba vaidi ni'a itauya gei, ta 'esi Seitani ena 'eda 'inaya itautauya.

<sup>16</sup> Ta 'eguma taha vavine Keliso 'inaya ivetumaqana ta ena gade gamonaya vaina wada'e itoatoa, e 'inega ge taha luvine da'eno'eno be 'ekalesia wada'e diavona ina 'itamakidi, ta 'esi vavine nana luaqiaqiea be na'itamakidi. 'Inega 'ekalesia adi luaqiaqi be taudi wadawada'e ge edi tomotaumo ina 'itamakidi ta ina iuledi.

<sup>17</sup> 'Ekalesia ana tovanugwetayavo taudi gwavubiga 'avadi luaqiaqiedi be 'amayaba ta wese iula ina lobe. Ta tomeqabu ivetafe'wa waiwai Yaubada ena vona ana lugaihi be ana ve'ita weaqina, e luaqiaqiedi be 'amayaba ta wese iula ma ana luvetomana ina lobe. <sup>18</sup> \* Ba'e weaqina Yaubada ena luvine Buki Gwala 'inaya simanea vonaya, "Eguma bulumakau 'alabwatana fewafewa witi 'inaya, e 'inega 'awana ge una yoqoni wayoyega, ta 'esi una awafelei be vaina witi vuaqina na'ai." Ta wese vonaya, "Tofewa luaqiaqiedi be ve'ia ina lobe."

<sup>19</sup> \* Ge taha 'oloto ena ve'ewa una noqoli 'eguma 'oloto nana ana 'aidega 'ekalesia ana tovanugweta taha nave'ewea. Ta 'esi 'eguma tomotau magilafudi nage toidi tovanugweta taha ena luveifana weaqina ina simana aqiaqiea omi'a 'ekalesia matamia, e 'inega taudi edi vona ona noqolia. <sup>20</sup> \* Ta 'inega 'eguma tovanugweta taha ena luveifana o'ita lobe, e ona talamatea tomotau qabudi matadia, be yaqisa taudi ivevekova ina mwaniniva ta ge wese nuanuadi yani luveifana ina viaqia.

<sup>21</sup> Timoti, Iesu Keliso ta Yaubada me ena tovale'ewayavo gwalagwaladi matadia yavona waiwai 'iuya luvine diavona ni'a yaneiu una 'abiboda aqiaqiedi. Ta luvine 'aideganega una luvinedi, ta gebu vaina luvine waiwaina 'inega, ta vaina gebu. <sup>22</sup> Ta ge lukwayavonega nimau una a'ui taha tomotau 'wafinaya be una venua'ivinei nave-tovanugweta Yaubada ena fewa weaqina. Mana 'eguma tauna ena luveifana ge uda alamania, e nawale luveifa nana 'wai'waivina una 'itea ena fewa 'inaya. Ta omo'e 'inega tomotau nana ena luveifana o'a wese eu luveifana be tau'u au vita una a'uya. Ta wese o'a tau'u una 'itamaki aqiaqie.

<sup>23</sup> Ge go'ila namo una numa, ta 'esi luaqiaqie 'eguma 'oine goyona wese una numa gamou ena visiqa weaqina, mana tuta qabuna uvevevhiqa.

<sup>24</sup> Tomotau vaina edi luveifanayavo vunavunaqaya iviaviaqidi 'inega kahalamanani aqiaqiea taudi luvine ina lobe. Ta vaina tomotau 'waivega edi luveifanayavo iviaviaqidi ge ada fata kana 'itedi, ta tua taudi edi viaqayavo luveifadi nawale wese kana alamanidi. <sup>25</sup> Ta wese 'idewana vaina tomotau edi ilivu aqiaqina ni'au kahalamanidi mana vunavunaqaya iviaviaqidi, ta vaina tomotau edi viaqa aqiaqina 'wai'waivina ba'itagana ge kada 'itea, ta nawale kana alamanidi.

\* 5:13: 2Te 3:11 \* 5:14: 1Kol 7:9 \* 5:18: Luvu 25:4; 1Kol 9:9; Md 10:10 \* 5:19: 2Kol 13:1 \* 5:20: Efe 5:11

## 6

<sup>1</sup>\* Tovetumaqana ifewafewa ta ge taha mane ida lobei fewa nana weaqina, e luaqiaqiedi be edi kaiwabuyavo ina 'amayabedi ta ina matayagedi. 'Eguma gebu 'idewani nawale vaina tomotau eda ve'itayavo ina 'awaluveifedi, ta wese Yaubada ana wawa ina 'awaluveifea. <sup>2</sup>\* Ta 'eguma tofewa diavona edi kaiwabuyavo wese ivetumaqana Keliso 'inaya, e 'inega ge ina vonaya, "Kana vegwavu'ai, mana ita'a ta eda kaiwabuyavo maega eda vetumaqana 'aidegana, 'inega ge adi fata ina talamateda." Ta ge wese 'idewana ina nuanua 'aiqa, ta 'esi ina fewa waiwai, mana kaiwabu diavona edi aqiaqina ilobelobea tofewa diavona 'idiega, e taudi wese tovetumaqana ta i'awatainedi. E ba'e ilivuna 'inega tofewa edi toa naveaqiaqi. 'Inega nuanuagu ba'e yani diavona weaqidi una ve'itedi ta wese una noqi waiwai 'idia be ina viaqia.

*Tove'ita* 'e'eu'au'avidi weaqidi

<sup>3</sup>\* Ve'ita ba'ena una lugaihiea tomotau 'idia. Ta 'eguma vaidi tomotau edi ve'ita dumadumana, nage eda Kaiwabu Iesu Keliso ena vona tunutunuqidi ilivu aqiaqina ana 'abiboda weaqina ge ida 'abibodedi, e 'inega ve'ita nana ge ona matayagei. <sup>4</sup>Ta tomeqabu ba'e 'idewani iveve'ita e taudiega inuavane ta wese Yaubada ena vona ana avutugu gebu ida alamani aqiaqiea. Taudi edi nuanua qiduana vaina vona weaqidi ina ve'ae'aetoga. Ta ve'ae'aetoga nana 'inega vuaqina kana 'itea 'idewani ve'ifi'ifi be, gamohogala be, suluva ta wese vevoalana. <sup>5</sup>\* Ta tuta qabuna vita 'ifo'ifoqe tomotau diavona 'idiega, mana ve'ita aqiaqina ge ida alamania. Ta taudiega ivonaya be tafwalolo ana fewa 'inega bwa'obwa'o ana kaikaiwabu ina lobei.

<sup>6</sup>\* Ta ita'a tovetumaqana eda vekaikaiwabu dumadumana. 'Eguma taha toga nave'ale vetumaqana aqiaqi 'inega tauna ge nanuanua qiduana bwa'obwa'o ana kaikaiwabu weaqina, mana tauna Yaubada ena tomotau. Ta togama Yaubada maega ni'a iveiaiana e ba'e yani qiduana ta wese yani 'ebeqaiawa, ta kulufa nage mane agona yani kavokavovo. <sup>7</sup>\* Mana ita'a lova nima 'ava'avada kavi'oi bwa'obwa'oya, ta wese nawale 'aliga ana tuta 'inaya nima 'ava'avada bwa'obwa'o ba'e kana nogea. <sup>8</sup>Ta 'esi 'eguma ada 'abwaga ta ada kaleko, e ba'e ta'iwa ada luaqiaqi. 'Inega mali yani weaqidi gebu kana nuanua qiduana. <sup>9</sup>Ta tomeqabu vekaikaiwabu nuadi 'ewe'ewea nawale sitonova qiduana ina lutonovia, ta taudiega iyoqoyoqonidi be nawale veilae qiduana ina lobeia ta edi toa taudiega ina giveluveifea. <sup>10</sup>Mana mane ana nua'ewa yani qabuna luveifadi 'iuna, ta wese mane ana sali waiwai 'inega vaidi tomotau edi vetumaqana inogea, ta vita taha taha ilobedi.

*Vebibina* 'ebelu'ovoa Timoti 'inaya

<sup>11</sup>\* Timoti ye, o'a Yaubada ena tomotau, 'inega ilivu diavona luveifadi ni'a yavonayedi ge una viaqidi, ta 'esi ilivu aqiaqina be tunutunuqina ana 'eda una 'abibodea. 'Inega tuta qabuna una nuanua waiwai eu toa aqiaqina weaqina be, wese eu vetumaqana Keliso 'inaya navewaiwai be, eu veyoluba tomotau 'idia nave'ena'i be, eu bibitaqo navewaiwai, ta wese eu ilivu bigana 'inega una toatoa. <sup>12</sup>\* O'a Keliso ni'a uvetumaqanea, ta vetumaqana nana 'inega vaina tuta nage vita una lobedi. Ta vita diavona una vewaiwai va'inedi be yaqisa yawai vataya una lobeia, e ba'e au ve'ia. Mana toa nana weaqina tawa Yaubada venua'ivineu tuta nana eu vetumaqana Keliso 'inaya usimana 'ifoqeyea tomotau qabudi matadia. <sup>13</sup>\* Nuanuagu luvine taha ena neiu Yaubada matanaya, tauna yani qabuna mayawaidi adi Tonei, ta wese Keliso matanaya, tauna lova tovolu Fonitio Failato 'iawanaya tuta nana vetala'aiea 'inega simana aqiaqiea ena mai bwa'obwa'oya weaqina, ta wese vonea vonigo tauna Yaubada Natuna. <sup>14</sup>Ta luvine nana ana alamani ba'e: Nuanuagu yani qabudi ni'a yave'iteu una kafi'i'ihidi ta una matayagedi, 'inega ge taha toga ana fata nave'eweu tuta ba'e 'inega be ana laba Iesu Keliso na'evivi namai.

\* 6:1: Efe 6:5 \* 6:2: Fim 16 \* 6:3: Gal 1:6-9 \* 6:5: 2Tim 3:8; 4:4; Tai 1:14 \* 6:6: 1Tim 4:8; Fil 4:11-12; Ibe 13:5 \* 6:7: Iob 1:21 \* 6:11: 2Tim 2:22 \* 6:12: 1Kol 9:25-26; 2Tim 4:7 \* 6:13: Ion 18:36-37

<sup>15</sup>\* Mana nawale Yaubada taha 'aubena vevenua'ivinina 'inaya Ieisu nagive'ifoqeyea. Ta Yaubada nana aqiaqi otaqina be Toluvine Qiduana, ta wese tauna kiniavo edi Kini be kaiwabuyavo edi Kaiwabu. <sup>16</sup> Yaubada ge ena 'aligamo. Ta ena di'we ge taha toga ana fata na'itei, mana di'we nana ena simatala qiduana. Lova ge taha toga ana fata Yaubada da'itei, ta wese nawale ge taha toga na'itei. Tauna kana 'amayabea ta ena waiwai ge nahawala ta 'esi na'eno vataya. Vonahaqiaqi, eda nuanua 'idewani.

<sup>17</sup>\* Ta bwa'obwa'o ana tovekaikaiwabuyavo una vematamagilafuyedi ge ina nuavane edi kaikaiwabu weaqidi. Ta wese ge ina vetumaqana vonigo nawale 'ebeiula qiduana ina lobei edi kaikaiwabu 'idiega, mana kaikaiwabu diavona ina awala. Ta 'esi luaqiaqiedi be Yaubada ana 'aidega 'inaya ina lu'ita vane, mana Yaubada tauna Tonei aqiaqi, ta tuta qabuna iula neineida eda 'ebeqaiawa weaqina. <sup>18</sup> Ta wese tovekaikaiwabu dina una luvinedi edi kaikaiwabuyavo ge ina vemanugubayedi, ta 'esi luaqiaqiedi be me edi qaiawa ina vewila'ayedi tomotau 'idia adi iula weaqina. <sup>19</sup>\* Ba'e ilivu diavona 'idiega taudi adi ve'ia aqiaqina ina luveaqea mahalaya tuta maimai weaqina, be yaqisa toa aqiaqi otaqina ina lobe.

<sup>20</sup> Timoti, Yaubada vetumaqaneu eu fewa 'ekalesia gamonaya una viaqa aqiaqiedi, 'inega yani diavona Yaubada ni'a a'uya 'iuya una 'itamaki aqiaqiedi. Ta yani kavokavovo adi veqae weaqidi be wese alamani kavokavovo weaqidi ge ona ve'ae'aetogayedi Yaubada ana tovemwageavo maega. Taudiega ivonaya be ba'e alamani diavona vonahaqiaqi, ta Yaubada ena nuanua ge ida alamaniana. <sup>21</sup>\* Vaina tomotau alamani kavokavovo ana 'eda i'abi'abibodea. Ta ba'e 'inega edi vetumaqana Keliso 'inaya ni'a inogea.

Yaubada ena veyoluba qabumi 'imia.

---

\* 6:15: Ve 17:14 \* 6:17: Lk 12:20-21 \* 6:19: Md 6:20 \* 6:21: 1Tim 1:6; 2Tim 2:18

## Faulo ena leta vemagilafuna Timoti 'inaya

### *Leta ana alamani weaqina*

Faulo ena leta vemagilafuna ba'e Timoti 'inaya 'wayavia 'abaga agona Loma 'inega tuta nana vanue 'ebeyoqona 'inaya toatoa. Faulo ge taha luveifana daviaqi ta 'esi Ieisu Valena ana lulugaihi 'inega vanue 'ebeyoqona 'inaya ia'uluguyea. Timoti lova tauna Faulo 'inega Ieisu Valena noqolia ta vetumaqanea, 'inega vetoiula Faulo 'inaya. Ta 'abibodanaya Faulo Timoti a'uya 'abaga Efeso 'inaya to'ekalesia na'itamakidi. Ba'e leta nana 'inaya Faulo Timoti vonea vonigo tauna kavona Yaubada ena tovedavi taha. Ta wese vematamagilafuyea tomotau edi ilivu weaqina tuta 'ebel'ovoa 'inaya. Ta Faulo nuanuana Timoti Yaubada ena vona me ena giwalifatu tuta qabuna nalugaihiea, tuta aqiaqina 'idia ta wese tuta vitana 'idia. Ta 'eguma vita nalobeia tovegwavu'ai 'idiega tua ta nalugaihidi edi luveifana weaqina. Faulo Timoti givewaiwaiea 'inega wese navewaiwai Ieisu ana vetumaqana weaqina. Ta wese vematamagilafuyea nuanuana namai navayausia Loma 'inaya.

### *Leta gamona*

1:1-2 Vematamagilafu be venoqi

1:3-18 Faulo ena vona iula Timoti 'inaya

2:1-26 Toluavia aqiaqi Keliso weaqina

3:1-9 Tomotau edi ilivu be edi viaqa tuta 'ebel'ovoa 'inaya

3:10-4:8 Vebibina tafwalolo ana fewa weaqina

4:6-18 Faulo ena toa weaqina givesimatalia

4:19-22 Lukaiwa be vona veyoluba

### *Lukaiwa*

1-2\* Natugu Timoti ye, ba'e eu leta ya'a Faulo 'iguyega. Ya'a Yaubada ena nuanua 'inega yavetoaletuyana Ieisu Keliso weaqina. 'Inega Yaubada vetunegu sabi lugaihi Ieisu Valena weaqina, mana Yaubada ni'a vona fofofolea ita'a Ieisu 'inega toa aqiaqina kana lobeia. Nuanuagu Tamada Yaubada ta eda Kaiwabu Ieisu Keliso edi veyoluba ta wese edi nuakolokolo 'inega me eu nuadaumwala una toa.

### *Vona iula Timoti sabi givewaiwaina*

3\* Timoti, tuta qabuna 'aubena ta wese velovelovana 'idia me egu lukaiwa yavevenoqi Yaubada 'inaya weaqiu. Lova tubugwavo ivetofewa Yaubada 'inaya, ta ya'a wese ba'itaganaga egu nuanua vunavunaqina 'inega yavevetofewa Yaubada nana 'inaya. 4 Yanuaia lova tuta nana magilafuda katoatoa me eu dou yanogeu. Ta nuanuagu qiduana ena 'ita 'evivieu 'inega ena qaiawa. 5\* Yanuave'avinia o'a eda Kaiwabu uvetumaqanea inau Iunisi ta wese tubuhu Loise edi vetumaqana 'idewana. 'Inega yahalamani aqiaqiea eu vetumaqana waiwaina 'eno'eno. 6\* Lova nimagu yaha'uya 'iuya 'inega Niboana Gwalagwalana ena wila'a neiu eu fewa weaqina. 'Inega wila'a nana una givewaiwai 'eviviea kavona 'aiwe una mu'e saelia. 7\* Mana Yaubada ge taha niboana 'ebemwaniniva daneida, ta 'esi Niboana Gwalagwalana neida, ta ba'e Niboani nana 'inega kana vewaiwai be tomotau kana veyolubedi ta wese ada fata taudega kana 'itamakida.

8 Waiwai nana neiu, 'inega ge una iniyauyau eda Kaiwabu Valena ana simana weaqina, ta 'esi tuta qabuna una lulugaihiea. Ya'a ia'uluguyegu vanue 'ebeyoqona 'inaya Keliso Valena weaqina, ta weaqigu ge una iniyauyau. O'a wese vita taha taha una lobedi 'idewani ya'a, ta Yaubada ena waiwaiega una tovoloi'ita. 9\* Yaubada nana 'etoyavuida ta venua'ivineda toa vunavunaqina weaqina. Vonahaqiaqi, gebu ita'a eda aqiaqi 'inega

\* 1:1-2: Via 16:1; 1Tim 1:2 \* 1:3: Via 23:1 \* 1:5: Via 16:1 \* 1:6: 1Tim 4:14 \* 1:7: Lom 8:15 \* 1:9: Efe 2:8-9; Tai 3:5

davenua'ivineda, ta 'esi tauna ena nuenuega madugabeda ta 'abiboda kuyavata qabudi ena vonega i'ifoqe. Ba'e yani nana viaqia mana nuanuana nave'iteda ena nuakolokolo qiduana Iesu Keliso 'inega. <sup>10</sup> \* Ta ba'itagana ena nuania ni'a give'ifoqeyea ada To'etoyavua Iesu Keliso ena mai 'inega. Tauna 'aliga ena waiwai luveawalia, ta Vale Aqiaqina 'inega yawai vataya ana 'eda givesimatalia 'idaya.

<sup>11</sup> \* Yaubada ena nuenuega venua'ivinegu Vale Aqiaqina weaqina. 'Inega Vale nana weaqina yavetovaletuyana be, yavetolugaihi ta wese yavetove'ita. <sup>12</sup> Ta ba'e weaqina vanue 'ebeyoqona 'inaya yatoatoa ta vita yalulutonovia. Ta gebu eda iniyayau Vale nana weaqina, mana egu vetumaqana 'iuna Iesu yahalamani aqiaqiea. Ta wese yahalamania tauna ana fata egu fewa lova neigu na'itamaki aqiaqiea ana laba na'evivi namai ena 'aubena qiduana 'inaya. <sup>13</sup> Egu ve'ita lova yaneiu una kafi'i'ihia ta una vetutumei ta 'inega tomotau una ve'itedi. Ta ge una nuafania tuta qabuna me eu vetumaqana be me eu veyoluba una toatoa, mana o'a Iesu Keliso maega. <sup>14</sup> \* Eda vetumaqana 'inega Niboana Gwalagwalana 'idaya toatoa. Ta tauna ena iula 'inega ana fata eu fewa lova Yaubada neiu una 'itamaki aqiaqiea. <sup>15</sup> Ni'au ualamanania di'we Eisia ana tovetumaqanayavo qabudi inogegu, ta qabu dina 'idiega 'oloto magilafudi Faigelusi be Elimogini wese inogegu.

<sup>16</sup> Ta yavevenoqi eda Kaiwabu 'inaya Onesifolo me ena gadeavo nanuakolokoloyedi, mana tauna tuta qabuna vavayausigu ta ena vona 'inega givewaiwaiegu. Tauna ge taha tuta dainiyayau egu toa vanue 'ebeyoqona 'inaya weaqina. <sup>17</sup> Tuta nana mai ba'idia 'abaga Loma 'inaya 'inega weaqigu sali dadana ana laba lobegu. <sup>18</sup> 'Inega yavevenoqi eda Kaiwabu 'inaya ena 'aubena qiduana 'inaya 'oloto nana nanuakolokoloyea qiduana. Mana ni'a ualamanania aqiaqiea ena fewa 'ena'ina weaqigu 'abaga Efeso 'inaya.

## 2

### *Iesu Keliso ena toluavia aqiaqina*

<sup>1</sup> Natugu Timoti ye, o'a Iesu Keliso maega, 'inega ena nuakolokoloyega una vewaiwai. <sup>2</sup> Egu ve'ita yani qabudi weaqidi tomotau qabudi matadia ni'a unoqolidi. Ta ve'ita diavona una neidi taudi ka'awahaqiaqiedi ta wese ma adi vetumaqana 'idia, be 'inega adi fata ve'ita nana wese ina ve'ita ukamanea mali tomotau 'idia.

<sup>3</sup> \* Ta ita'a tovetumaqana kavona Iesu Keliso ena toluavia. 'Inega tuta nana vita kana lobedi kana tovoloi'ita me eda bibitaqo kavona taha tovedavi aqiaqina. <sup>4</sup> Vonahaqiaqi, o'a Iesu Keliso ena toluavia, 'inega ge una awafeleu bwa'obwa'o ana ilivu 'idia, mana ilivu diavona nuau ina 'ewea, 'inega ge au fata eu tovatatana una giveqaiawei. <sup>5</sup> \* Taha wese 'ebetalatutula yaneineiu: 'Eguma tolaha taha nuanuana nanugweta, e 'inega luaqiaqiea be laha ana luvine qabudi na'abiboda aqiaqiedi. Mana 'eguma gebu 'inega ge wese ana fata ve'ia namanamalina nalobei. <sup>6</sup> \* Wese 'idewani tovaqo, mana tauna luaqiaqiea be ena gwavubiga 'inega bolimana 'abwagana namadugudatonovia, ta 'abiboda enavo ina gudatonovia. <sup>7</sup> Egu vonayavo una nuaidi, mana eda Kaiwabu tauna ana fata yani qabudi weaqidi nuau nagiq'uya.

<sup>8</sup> \* Iesu Keliso una nuave'avinia, tauna kini Deibida ena gadeyega vi'oi, ta 'aligege ya'itoto 'evivi. E ba'e Vale nana Aqiaqina yalulugaihia. <sup>9</sup> \* Ta Vale nana ana lugaihi weaqina vita yalobeia 'inega iyoqonigu kavona ya'a toluveifana taha. Ta 'esi Yaubada ena vona gebu ana fata ina yoqoni. <sup>10</sup> 'Inega me egu bibitaqo yahawafelegu vita qabuna 'idia Yaubada ena tomotau venue'ivinidi weaqidi, be yaqisa adi fata 'etoyavua ina lobea Iesu Keliso 'inega. Ta 'etoyavua nana 'inega tuta qabuna Yaubada maega ina toatoa ena di'we simasimatala vatayana gamonaya.

<sup>11</sup> \* Vona ba'e ana fata be kana vetumaqanea:

\* 1:10: Ibe 2:14 \* 1:11: 1Tim 2:7 \* 1:14: 1Tim 6:20 \* 2:3: 2Tim 1:8 \* 2:5: 2Tim 4:8 \* 2:6: 1Kol 9:7  
\* 2:8: 1Kol 15:4; Lom 1:3 \* 2:9: Efe 3:1,13; Fil 1:12-14 \* 2:11: 2Kol 4:11

'Eguma leisu maega kana 'aliga,  
e 'inega tauna maega wese kana toa.

12\* 'Eguma vita kalobelobedi  
ta kana bibitaqoda vita diavona 'idiega,  
e 'inega leisu maega kana luvine.

Ta 'eguma ita'a leisu kana vegeqea,  
e 'inega tauna wese navegeqeda.

13\* Ta 'eguma ita'a  
leisu kana vegwavu'aiea,  
e 'inega ge wese nanogeda,  
mana tauna ge ana fata  
ena vona fofofola naqeunidi.

#### *Yaubada ena tofewa aqiaqidi*

14\* Yani qabuna Keliso weaqina ni'a yave'iteu nuanuagu eu to'ekalesia qabudi 'idia tuta qabuna una simana 'evi'eviviea. Ta Yaubada ana wawega una awatayedi be yaqisa ge vaina vona weaqidi ina ve'ae'aetoga, mana ve'ae'aetoga nana ge taha yani aqiaqina 'inega na'ifoqe be tomotau naiuledi, ta 'esi tovineneqa qabudi nagiveluveifedi. 15\* 'Inega wese una vetafe'wa waiwai Vale Aqiaqina ana ve'ita aqiaqi weaqina. Ta ge una iniyayau eu fewa weaqina, ta 'esi me eu gwavubiga Yaubada ena vona aqiaqina una givesimatala aqiaqiea, 'inega Yaubada na'awahaqiaqieu. 16\* Ta ge una lugu toveqae kavokavovo adi qabu 'idia, mana edi vona 'idiega ve'ae'aetoga 'ifo'ifoqe tomotau nuanidia ta Yaubada ena nuanua ivevenuafania. 17\* Ta toveqae dina edi ve'ita kavona bonu 'idewana. Nugweta bonu goyona ta 'abiboda naveqidua ta na'uluma, 'inega tomotau visiqa qidwana ina lutonovia. Ta 'oloto magilafudi adi wawa Aiminio ta Filitasi edi ve'ita omo'e 'idewani. 18 Mana ve'ita aqiaqina ana 'eda ni'a inogea ta edi lugaihi 'inaya ivonaya, "To'aliga edi ya'itoto 'evivi ana tuta aqiaqi ni'a 'ifoqe." Ta taudi edi u'ava 'inega vaina tomotau edi vetumaqana leisu 'inaya igivedawalilia.

19\* Ta Yaubada ena vonahaqiaqi ana avutugu falafalana 'waya'wayavina 'eno'enova vonaya, "Eda Kaiwabu alamani aqiaqiedi tomeqabu ena tomotauyavo." Ta wese vonaya, "Tomeqabu eda Kaiwabu 'inaya iawafeledi e luaqiaqiedi be edi ilivu luveifadi ina nogedi."

20 Vonahaqiaqi, vanue taha aqiaqina gamonaya kulufa qabudi i'eno'eno 'idewani gaeba be 'ulena. Vaina kulufa goula be siliba 'inega iviaqidi, ta vaina 'aiwe be bwa'obwa'o 'inega iviaqidi. Vaina sagali ana tuta weaqina, ta wese vaina 'aubena kavokavovo weaqina. 21 'Idewani wese tomotau, 'eguma taha toga ena ilivu luveifadi nanogedi ta taunega nagivevunavunaqia, e 'inega tauna kavona taha kulufa aqiaqina ta ena kaiwabu ana fata navefewea ena fewa aqiaqina weaqina.

22\* Timoti, o'a kilakaiu, ta kilakai ilivuna 'wafi ena qaiawa weaqina ge una viaqi. Ta 'esi luaqiaqieu be yani taha taha ana fata ina givewaiwaiu e ba'e yani diavona una viaqidi. 'Inega vetumaqana be veyoluba ta wese toadaumwala ilivu diavona una 'abibodedi. Ta tuta qabuna tomotau aqiaqidi maega ona toatoa, 'idewani taudi eda Kaiwabu leisu giwalidi vunavunaqina 'inega ivevenoqiea iula weaqina.

23\* Ta wese yavona 'evivieu, veqae kavokavovo be vona ge 'ebeiula una nogedi, mana ni'a ualamaniana vona diavona 'idiega ve'ae'aetoga be ve'ala'alamaqi'ai i'ifo'ifoqe. 24 Yaubada ena tofewayavo ge ina ve'ala'alamaqi'ai, ta 'esi tomotau qabudi ina nukolokoloyedi. Ta luaqiaqiedi be Yaubada ena vona tomotau ina ve'ita aqiaqiedi, ta wese luaqiaqiedi be tomotau edi ilivu weaqina ina bibitaqodi. 25 Ta Yaubada ena tofewayavo luaqiaqiedi be aiqabu Yaubada ena vona ivegeqea ilivu nuvana 'inega ina ve'itedi.

\* 2:12: Md 10:33    \* 2:13: Lom 3:3-4; Tai 1:2    \* 2:14: 1Tim 6:4; Tai 3:9    \* 2:15: 1Tim 4:6    \* 2:16: 1Tim 4:7  
\* 2:17: 1Tim 1:20    \* 2:19: Naba 16:5; Ion 10:14; 1Kol 8:3    \* 2:22: 1Tim 6:11    \* 2:23: 1Tim 4:7



'Inega ana fata Yaubada tovegeqa diavona giwalidi nagivilei ta ena vona aqiaqina ina vetumaqanea. <sup>26</sup>'Inega nuadi na'eqa'uya ta Seitani ena si'wa 'inega ina dena. Mana lova ena si'wa 'inega yoqoyoqonidi itoatoa ta ena nuanua iviaviaqidi.

### 3

*Tuta* 'ebelu'ovoa weaqina

<sup>1</sup>\* Nuanuagu una alamania tuta 'ebelu'ovoa 'inaya vita taha taha ina 'ifoqe. <sup>2</sup> Mana tuta nana 'inaya tomotau taudiega weaqidi ina nuanua, ta mane ana nuanua nuadi na'ewea. Ta wese nuavane 'avadi be, gagasa 'avadi be, awagila 'avadi be, gogama inadiavo be tamadiavo edi vona ge ina matayagedi be, tomotau iula ina lobedi ta ge ina lukaiwa iula nana weaqina, ta wese ge taha yani gwalagwalana ina 'amayabei. <sup>3</sup> Ge taha veyoluba kana 'itei 'idia, ta wese ge nuanuadi tomotau ina nuataqodi, ta 'esi tomotau ina awawebuiedi be tomotau ina vunuuqidi. Ge taha yani aqiaqina weaqina ina nuanua, ta taudiega ge adi fata be ilivu luveifana nage sitonova ina nogedi. <sup>4</sup> Ta wese tuta 'ebelu'ovoa 'inaya tomotau ediavo ina suluedi be, taudiega ilivu luveifana qabuna 'idia ina awafeledi be, me edi gagasa taudiega ina givaneyedi. Ta ge Yaubada weaqina ina nuanua, ta 'esi taudimo edi qaiawa weaqina ina nuanua. <sup>5</sup>\* Tomotau diavona kana 'itedi adi 'ita kavona totafwalolo, ta Yaubada ena waiwai ivegeqea. 'Inega Timoti nuanuagu una toasi'i 'idiega ta ge taha tola'ai una viaqi taudi maega.

<sup>6</sup> Ba'e tomotau diavona ilugulugu vanue taha taha 'idia, ta vivine edi vetumaqana dawalilina ivavayausidi sabi 'eu'au'avadi. Ta vivine dina me edi 'wamomo itoatoa, mana edi ilivu luveifana ana vita ilulutonovia, ta wese edi nuanua luveifadi 'idiega itauya kavokavovo. Ta tolugu diavona edi veaqila 'inega vivine diavona nuadi i'ewea. <sup>7</sup> Ba'e vivine dina ve'ita vauvaudi tuta qabuna i'abi'abibodedi, 'inega ge ana fata nuadi na'eqa'ui Yaubada ena vonahaqiaqi weaqina. <sup>8</sup>\* Vonahaqiaqi, toveaqila dina ve'ita aqiaqina iveaviea 'idewani lova 'oloto magilafudi me Itifita adi wawa Ianisi be Iamibilisi Mosese iveaviea. Toveaqila dina adi 'ita kavona tovetumaqana, ta edi vetumaqana ge tunutunuqina ta wese nuadi nawale ge da'eqa'uya. <sup>9</sup> Ta edi ve'ita luveifana ge adi fata be tuta kuena 'inaya ina ve'itayei, mana nawale tove'ita luveifadi qabudi Yaubada nagive'ifoqeyedi vunavunaqaya, 'idewani lova 'ifoqe Ianisi be Iamibilisi 'idia.

*Faulo simana* 'ifoqeyea tola'ai lova 'ifoqe 'inaya

<sup>10</sup> Ta o'a yawaigu ni'a ualamanani aqiaqiea, 'idewani egu ve'ita be, egu ilivu be, egu nuanua qiduana be, egu vetumaqana be, egu bibitaqo be, egu veyoluba ta wese egu 'alataya ni'a ualamanani. <sup>11</sup>\* Ta wese visiqa be tomotau edi vevoalana 'iguya ni'a ualamanani. Ba'e vita diavona yalobedi 'abaga Anitioki be Ikoniami be Lisitila 'idia, ta 'idiega Yaubada 'etoyavuiu. <sup>12</sup>\* Vonahaqiaqi, 'eguma taha toga Iesu Keliso maega itoatoa, ta nuanuana Yaubada ena 'eda na'abibodea, e 'inega tauna wese visiqa be vevoalana nalobedi. <sup>13</sup> Ta tomotau luveifadi be wese tove'ita 'eu'au'avidi edi luveifayavo nave'ena'i. Taudi tomotau ina u'avedi, ta wese taudiega ina u'avedi.

*Vebibina Timoti* 'inaya Yaubada ena vona weaqina

<sup>14</sup> Ta o'a ve'ita tunutunuqina ni'a u'ewedi ta ualahalamanani ve'ita diavona vonahaqiaqi. 'Inega una kafi'i'ihidi, mana ima'a au tove'itayavo ni'au ualamanani aqiaqiema. <sup>15</sup> O'a eu tuta gwama 'inega be ana laba ba'itagana Buki Nugwenugweina ena vonayavo ualamanani aqiaqiedi. Buki nana 'inega alamanani aqiaqi otaqina ni'a u'ewea, ta 'inega 'etoyavua ni'a ulobea eu vetumaqana Iesu Keliso 'inega. <sup>16</sup>\* Vonahaqiaqi, Buki Gwalagwalana ena vona qabudi Yaubada ena nuanua 'inega i'ifoqe. Vona diavona 'idiega ve'ita tunutunuqina kana 'ewea, 'inega vonahaqiaqi kana alamanani. Ta vona diavona 'idiega ada fata kana alamanani tola'ai aqiaqina be tola'ai luveifana. Ta wese vona diavona adi fata be nuada

\* 3:1: 1Tim 4:1    \* 3:5: Md 7:15,21; Tai 1:16    \* 3:8: 'Ifo 7:11    \* 3:11: Via 13:14-52; 14:5,8-20    \* 3:12: Md 16:24; Ion 15:20; Via 14:22    \* 3:16: Lom 15:4

ina luqa'uya 'inega eda luveifana kana alamanidi. Ta wese vona diavona adi fata ilivu tunutunuqina ana 'eda ina ve'iteda, be yaqisa yani aqiaqidi kana viaqidi. <sup>17</sup> Ba'e 'inega Yaubada nuanuana ena tomotauyavo na'iva'ava'ata aqiaqieda, be 'inega ada fata ena fewa aqiaqidi kana viaqidi.

## 4

*Yaubada ena vona ana lugaihi weaqina*

<sup>1</sup> Nawale Iesu Keliso ena 'evivi mai 'inaya tomotau 'ali'aligidi ta wese mayawaidi ina tovolu 'iawanaya ta naluvinedi. Tauna maimai naluvineda kavona Kini. 'Inega Yaubada be Iesu Keliso matadia yavematamagilafuyeu, <sup>2</sup> Yaubada ena vona una lugaihiea! Tuta qabuna una lulugaihi, tuta vitana 'idia ta wese tuta 'ebeqaiawa 'idia. Ta vona diavona 'idiega tomotau una givetunuqidi be una lugwaeyedi ta wese una vona iuledi. Ba'e yani diavona una ve'ita aqiaqiedi me eu bibitaqo. <sup>3</sup>\* Mana tuta maimai 'idia tomotau ge nuanuadi ve'ita aqiaqina ina noqoli, ta 'esi taudi edi nuanuayavo ina 'abibodedi. 'Inega taudiega edi tove'itayavo ina salidi, mana tove'ita diavona tomotau edi nuanua 'inega ina lugaihi 'idia, e 'inega lugaihi nana ina noqolia ta ina 'awahaqiaqiea. <sup>4</sup> Tomotau diavona ve'ita tunutunuqina ina nogei, ta 'esi nuanuadi qiduana tubudiavo edi velulu'uyayavo ina noqolidi be ina 'abibodedi. <sup>5</sup> Ta o'a tuta qabuna eu nuanua simasimatalinega una toatoa. 'Eguma vita una lobeia tomotau 'idiega Iesu weaqina 'inega ge una lua'u fewa tauna weaqina, ta 'esi una tovolu 'i'ita. Ta luaqiaqieu be una vetafe'wa waiwai Iesu Valena weaqina. Yaubada eu fewa neiu, 'inega fewa nana una lu'ovoia.

<sup>6</sup>\* Vonahaqiaqi, o'a una fewa Keliso weaqina, ta ya'a egu 'aubena ni'a vadi'wedi'wea be bwa'obwa'o ba'e ena nogea. 'Inega yawaigu ni'a yavegubayea Yaubada 'inaya. <sup>7</sup>\* Lova Yaubada egu fewa neigu ta ba'e fewa nana ni'a yalu'ovoia. Keliso Valena weaqina yavetoluavia ta vita taha taha yavewaiwai va'inedi. Ta egu vetumaqana Iesu 'inaya ge eda nogei, ta 'esi yakafi'i'ihia. <sup>8</sup>\* Ya'a ni'a yavetunutunuqa Yaubada matanaya, 'inega ilivu tunutunuqina ana ve'ia 'iva'ava'aina nawale ena 'ewea eda Kaiwabu ena 'aubena 'inaya. Tauna Toluvine tunutunuqina, 'inega ge agu 'aidegamo ve'ia naneigu, ta 'esi tomotau qabudi iba'eba'e ena 'ifoqe mai weaqina wese ve'ia nana ina lobeia.

*Vematamagilafu Timoti 'inaya*

<sup>9</sup> Timoti, nuanuagu qiduana una lukwayavoni una mai, <sup>10</sup>\* mana Dimasi ni'a be'u bwa'obwa'o ilivuna 'inaya ta nogegu tauya Tesalonaika 'inaya. Ta wese agu toiulayavo magilafudi ni'a inogegu, mana Keleseni tauya di'we Galetia 'inaya, ta wese Taitusi tauya di'we Dalemata 'inaya. <sup>11</sup> Ta Luke namo maega atoatoa. 'Inega eu mai 'inaya Maki una 'ebe'ewei ona mai, mana tauna toiula aqiaqina egu fewa 'inaya. <sup>12</sup> Ta Tikiosi ni'a yavetunei tauya Efeso 'inaya. <sup>13</sup>\* Ta eu mai nana 'inaya agu kwakwalufai una 'ewei una miea. Kwakwalufai nana lova yaha'uya iagu Kalifo ena vanuea 'abaga Tiloasi 'inaya. Ta wese nuanuagu egu bukiavo una miedi, ta yani 'ena'ina egu 'wayaviavo yubai 'wafidi 'inaya ge una venuafanidi.

<sup>14</sup>\* Taha 'oloto kainumu ana tovefewa ana wawa Alekisana lova vita qiduana neigu. 'Inega nawale Yaubada nave'iea ena viaqa veifana weaqina. <sup>15</sup> Ita'a Yaubada Valena kalulugaihiea, ta ba'e 'oloto nana Vale nana vevoalanea, 'inega tauna weaqina una 'itamaki aqiaqieu.

<sup>16</sup> Agu vekotu nugwenugweina 'inaya toluvine matadia ge taha toga daiulegu, ta 'esi tauguyega yavata'ita'iegu, mana tomotau qabudi imwaniniva 'inega inogegu. Ta ge nuanuagu Yaubada vita 'inega nave'iedi edi noga weaqina. <sup>17</sup> Ta 'esi kotu nana 'inaya eda Kaiwabu ana 'aidega iulegu ta givewaiwaiegu, be yaqisa Iesu Valena ana fata yalugaihiea taudi ge me Diu 'idia. Tauna 'etoyavuigu yubai laioni manimaninidi 'awadiega. <sup>18</sup> Ta wese

\* 4:3: 1Tim 4:1 \* 4:6: Fil 2:17 \* 4:7: 1Tim 6:12 \* 4:8: 1Kol 9:24-25 \* 4:10: 2Kol 8:23; Kol 4:14 \* 4:13: Via 20:6 \* 4:14: Ais 59:18; Lom 2:6

na'etoyavuigu toluveifana qabudi 'idiega, 'inega me egu aqiaqi na'ebe'ewegu naluguyegu ena 'Ebeluvine mahala 'inaya. Luaqiaqieda be eda Kaiwabu kana awatuboya tuta vataya 'inaya. Vonahaqiaqi, eda nuanua 'idewani!

*Lukafoi*

<sup>19</sup>\* Egu lukaiwa yavetunea Filisila ma moqanedi Akwila 'idia, be wese Onesifolo me ena gadeavo 'idia. <sup>20</sup>\* Elastasi nawale 'abaga Kolinita 'inaya toatoa. Ta Tilofimo yanogea 'abaga Milito 'inaya, mana vevihiqa. <sup>21</sup> Ta egu nuanua 'ena'ina una lukwayavoni una mai ta 'abiboda ibwalo'o ana tuta naye'ale. Edavo Ebulusi be, Fudenesi be, Linusi be novuda Kalodi ta wese tovetumaqana qabudi edi lukaiwa ivetunei waiwai 'iuya.

<sup>22</sup> Nuanuagu eda Kaiwabu niboaniu maega ina ve'aidega. Yaubada ena veyoluba qabumi 'imia.

---

\* 4:19: Via 18:2; 2Tim 1:16-17      \* 4:20: Via 19:22; 20:4; Lom 16:23

## Faulo ena leta Taitusi 'inaya

### *Leta ana alamani weaqina*

Taitusi tauna ge Diu 'olotona, ta Faulo ena luvivila 'inaya Taitusi maega iveloba ta magilafudi iveiaiana ta ifewa 'aidega Iesu Valena weaqina. 'Inega Faulo ena letayavo 'ekalesia taha taha 'idia Taitusi wawa nana 'waya'wayavina kana 'ita lobe, 'idewani me Kolinita be wese me Galetia edi leta 'idia.

Ta ba'e leta nana Faulo vetunea Taitusi 'inaya tuta nana bwanabwana Kiliti 'inaya fewafewa 'ekalesia gamonaya. Ta Faulo yani toi weaqina Taitusi vematamagilafuyea: Nugweta 'ekalesia ana tovanugwetayavo edi ilivu weaqina. Ta vemagilafuna ve'itea qabu taha taha 'ekalesia gamonaya ma'oda ina toa 'aiqa nuanidia. Ta vetoina vematamagilafuyea tovetumaqana edi ilivu weaqina, mana nuanuana to'ekalesia qabudi ina veilivu aqiaqi.

Leta gamona

1:1-4 Lukaiwa ta wese venoqi Taitusi 'inaya

1:5-16 Vebibina be ve'ita 'ekalesia ana tovanugweta weaqidi

2:1-15 Ve'ita qabu taha taha weaqina 'ekalesia gamonaya

3:1-11 Vebibina be ve'ita Taitusi weaqina

3:12-15 Vona 'ebeluvova ta vona veyoluba

### *Lukaiwa*

<sup>1</sup> Natugu Taitusi, eu leta ba'e ya'a Faulo 'iguyega. Ya'a Yaubada ena tofewa ta Iesu Keliso ena tovaletuyana. Ta egu fewa Yaubada weaqina Keliso vetunegu ena tomotauyavo venua'ivinidi 'idia sabi givewaiwaiedi edi vetumaqana 'inaya. Ta wese vetunegu 'idia sabi ve'itadi Iesu Valena ana vonahaqiaqi weaqina, be yaqisa tomotau diavona adi fata Yaubada ena nuanua ina alamani aqiaqiea be ina 'abibodea. <sup>2</sup> \* 'Inega ina lu'ita vane toa vataya weaqina, mana ba'e toa nana lova Yaubada maduvona fofofolayea 'idaya, ta 'abiboda bwa'obwa'o 'iva'ava'aia. Ta ba'e vona nana vonahaqiaqi, mana Yaubada ge wese ana fata nau'ava! <sup>3</sup> Lova 'inega Yaubada Iesu Valena ena 'ifoqe ana tuta taunega venua'ivinea. Ta tuta nana ni'a mai, e 'inega wese give'ifoqeyea, ta venua'ivinegu ta vetumaqanegu be Vale nana ena yawala dadanea tomotau qabudi 'idia. Ta ba'e Vale nana yalulugaihiea Yaubada ada To'etoyavua ena luvine 'inega.

<sup>4</sup> \* Taitusi, o'a be ya'a eda vetumaqana 'aidegana, ta ba'e vetumaqana nana 'inega ya'awanatuna aqiaqieu. Ta yavevenoqi weaqiu Tamada Yaubada be ada To'etoyavua Iesu Keliso ina nuakokoloyeu ta una toadaumwala.

### *Taitusi ana veyoveyoo Kiliti 'inaya*

<sup>5</sup> Bwanabwana Kiliti 'inaya yavaloveu be yaqisa eda fewa vaidu ge adi lu'ovoamo 'ekalesia taha taha 'idia o'a una lu'ovoia. Ta wese 'ekalesia ana tovanugweta una venua'ivinidi 'abaga taha taha 'idia ya'a egu vebibina ba'e 'inega. <sup>6</sup> \* 'Inega tovanugwetayavo una venua'ivinidi 'oloto taudi ge taha adi 'ebeve'ewamo. Ta moqanena 'aidega otaqina, ta natunavo ge toyafwauta 'idewani ta 'esi me edi vetumaqana, ta wese inana be tamana edi vona adi tomatayaga.

<sup>7</sup> Vonahaqiaqi, 'ekalesia ana toludebana Yaubada weaqina fewafewa, 'inega luaqiaqiea be ge taha luviefana 'inaya na'eno'eno. Ta ge navedeba 'i'wana be, ge diana navilei be, ge go'ila waiwaina nanuma 'oda'odaqa be, ge tomotau navunuqidi ta wese mane ge nuana na'ewei. <sup>8</sup> Ta 'esi luaqiaqiea be wagawaga na'itamakidi, ta nanua'ewa yani qabuna aqiaqina weaqidi. Ta wese ana fata be taunega na'itamaki aqiaqiea be naluvinea, ta luvine 'aideganega tomotau qabudi naluvinedi, ta ena ilivu vunavunaqina, ta wese ena nuanua be giwalina qabuna nahawafeledi Yaubada 'inaya. <sup>9</sup> Tauna lova ve'ita ma

\* 1:2: Kol 1:27 \* 1:4: 2Kol 8:23; Gal 2:3 \* 1:6: 1Tim 3:2-7; 2Tim 2:24-26

ana vetumaqana ni'a 'ewea, 'inega luaqiaqiea be ve'ita nana nakafi'i'ihia, 'inega ana fata be mali tomotau navona iuledi be nagivewaiwaiiedi ve'ita tunutunuqina 'inega. Ta wese 'eguma vaina tove'ita ve'ita tunutunuqina ge ida 'awahaqiaqiea be wese u'avega iveve'ita, e 'inega ana fata nagivetunuqidi.

<sup>10</sup>\* Mana ba'itagana tomotau 'eala ve'ita tunutunuqina ivevoalanea, ta edi ve'ita be wese edi vona kavokavovo 'inega tomotau i'e'eu'au'avedi. Ta ba'e tove'ita diavona 'ealidi 'idiega lova inuagivila ta ivaukamana Iesu Valena 'inaya ta ivetumaqanea. Ta vaidi 'idiega nawale ivonavona be ge taha toga ana fata 'etoyavua nalobei 'eguma 'wafi ana da'a ge da'ewei. <sup>11</sup>\* 'Inega edi vona kavokavovo weaqina una awatayedi. Edi ve'ita luveifana 'inega vaina susu ni'a itauya gei, ta edi ve'ita nana 'iuna nuanuadi mane ina lobe. <sup>12</sup> Taha toalamani qiduana me Kiliti 'idiega taunega ena tomotauyavo weaqidi vonaya, "Me Kiliti tuta qabuna i'e'eu'au'ava, ta edi ilivu kavona waqiwaqi, ta ge nuadi fewa, ta 'esi 'abwaga namo weaqina inuanua". <sup>13</sup>\* Ba'e vonahaqiaqi me Kiliti weaqidi, ta eu vona waiwaina 'inega una lugwaeyedi be yaqisa ina nuagivila ta edi vetumaqana navetunutuqina be wese navewaiwai. <sup>14</sup>\* Ta wese una awatayedi be me Diu tubudiavo velulu'uyadi ge ina 'abibodedi, ta wese tomeqabu vonahaqiaqi ana ve'ita inogea edi luvine ge ina matayagedi.

<sup>15</sup> Tomeqabu giwalidi be edi nuanua vunavunaqidi, e taudina yani qabuna vunavunaqina 'idia. Ta Vale Aqiaqina ana tonoga ge taha yani vunavunaqina 'idia da'eno'eno, ta ge ana fata ina 'wamomo tuta nana luveifana iviaviaqia, mana edi nuanua be wese giwalidi qabuna luveifana. <sup>16</sup>\* Taudi ivonaya vonigo Yaubada ni'a ialamania, ta 'esi edi viaqayavo 'idiega Yaubada ivegeqea. Taudi luveifa otaqidi ta luvine ivevegwavu'aiea, ta ba'e tomotau diavona ge taha yani aqiaqina adi fata ina viaqi.

## 2

*Ve'ita qabu taha taha* 'ekalesia gamonaya weaqidi

<sup>1</sup> Ta o'a Taitusi, luaqiaqieu be vonahaqiaqi qabudi Yaubada be Iesu weaqidi to'ekalesia una ve'itedi, ita'a tovetumaqana eda vetumaqana ana 'eda'eda 'inega. <sup>2</sup> 'Oloto 'ena'e-na'idi una vonedi taudiega ina 'itamaki aqiaqiedi be yaqisa ilivu luveifana ge ina viaqidi, ta 'esi tuta qabuna me edi ilivu aqiaqina tomotau matadia be yaqisa ina 'amayabedi. Taudi luaqiaqiedi be Yaubada ina vetumaqana aqiaqiea, ta wese veyoluba be bibitaqo 'avadi.

<sup>3</sup>\* Ta wese 'idewani vivine 'ena'ena'idi una vonedi be edi ilivu aqiaqina 'inega yani qabuna ina viaviaqia, 'inega tomotau ina 'itedi ina vonaya, "Vonahaqiaqi, omo'e vivine diavona Yaubada ena tomotauyavo!" Ta ge ina vevonavona mali tomotau weaqidi. Ta wese go'ila waiwaina ge ina numa 'oda'odaqa, ta 'esi ilivu aqiaqina be toa tunutunuqina ina ve'itayea mali tomotau 'idia. <sup>4</sup> Ta vivine dina luaqiaqiedi be vivine tovaqiwouwou ina ve'ita aqiaqiedi ma'oda 'inega moqanediavo be natudiavo ina veyoluba 'aiqedi. <sup>5</sup>\* Ta wese ina ve'itedi ma'oda 'inega taudiega ina 'itamaki aqiaqiedi ilivu luveifana ana viaqa 'inega, ta tuta qabuna vunavunaqidi Yaubada matanaya ina toatoa. Edi vanueavo ina 'itamakidi ta adi veyoveyoa ina viaqa aqiaqiedi, ta edi ilivu aqiaqina tomotau qabudi 'idia. Ta wese ina awafela aqiaqiedi moqanediavo 'idia ta edi luvine be edi nuanuayavo ina velumatamatayagedi. Ta 'eguma ba'e ilivu diavona ina viaqa aqiaqiedi 'inega ge taha toga ana fata Yaubada ena vona na'awaluveifei.

<sup>6</sup> Ta wese 'idewani kilakai una lugaihidi be taudiega tuta qabuna ina 'itamakidi ilivu luveifana adi viaqa 'idiega. <sup>7</sup>\* Ta wese o'a tau'u una ve'ebe'ita aqiaqi eu ilivu aqiaqidi 'idiega tomotau qabudi matadia. Ta eu vonayavo be wese eu viaqayavo ina velelelea eu ve'ita ta wese eu lugaihiavo maega, 'inega tomotau ina alamania eu fewa Yaubada

\* 1:10: 1Tim 4:7 \* 1:11: 1Fit 5:2; 2Tim 3:5-6 \* 1:13: 2Tim 4:2 \* 1:14: 1Tim 4:7 \* 1:16: 1Ion 1:6; 2:4  
\* 2:3: 1Tim 3:11 \* 2:5: Efe 5:22 \* 2:7: 1Tim 4:12

weaqina ge yani kavokavovo 'iuya, ta 'esi yani qiduana ta vonahaqiaqi. <sup>8</sup> \* Natugu, ve'ita tunutunuqina una ve'itayea tomotau 'idia, be yaqisa ge taha toga eu ve'ita weaqina navona vesivesinua. 'Inega tomeqabu nuanuadi ina ve'ae'aetoga eu ve'ita Ieisu Valena weaqina ina iniyauyau, mana ge taha luveifana adi fata ina lobei ita'a tovetumaqana 'idaya.

<sup>9</sup> \* Tofewa kavovo wese una vonedi me edi nuawebui edi kaiwabuyavo edi vona be edi luvine ina 'abibodedi be ina matayagedi. Ta ina toho be edi kaiwabuyavo ina giveqaiawedi edi viaqayavo qabudi 'idiega. Ta gebu ina vona 'eviviedi, <sup>10</sup> ta wese ge taha yani ina vanawali edi kaiwabuyavo 'idiega, ta 'esi tuta qabuna ma adi vetumaqana ta wese me edi gwavubiga ina toatoa. Ta 'eguma ba'e ilivu diavona 'idiega ada To'etoyavua Yaubada Valena ina ve'ita 'ifoqeyea, 'inega navenua'ewe'ewa tomotau 'idia.

<sup>11</sup> Yaubada ena veyoluba be wese ena nuakolokolo ni'a ve'ifoqeyea 'idaya, ta ba'e nuakolokolo nana 'inega Yaubada taha 'eda siwa'ea tomotau qabuda ada 'etoyavua weaqina. <sup>12</sup> \* Ta ba'e nuakolokolo nana 'inega Yaubada ve'iteda ita'a ilivu kavokavovo be wese nuania luveifadi 'wafi ana qaiawa weaqina kana nogedi. 'Inega taudega kana 'itamaki aqiaqieda be yaqisa ilivu luveifadi ge kana viaqidi, ta 'esi ilivu aqiaqidi ta tunutunuqidi kana viaqidi, ta kana awafeleda Yaubada 'inaya ta ena nuania kana viaqia. 'Inega kana giveqaiawea eda toa bwa'obwa'o ba'e 'inaya. <sup>13</sup> 'Inega ba'e 'idewani kana toatoa kana ba'eba'e taha 'aubena 'ebeqaiawa weaqina. Vonahaqiaqi, ba'e 'aubena nana 'inaya Yaubada ada To'etoyavua Ieisu Keliso ena simatala qidua va'inena 'inega na'evivi namai bwa'obwa'oya sabi 'etoyavuida eda toa vataya weaqina. <sup>14</sup> \* Ba'e Ieisu nana taunega yawaina awafelea weaqida tuta nana ena 'aliga 'inega 'etoyavuida eda luveifana qabuna 'idiega. Ta ba'e 'inega givevunavunaqida 'inega Yaubada ana fata na'ebe'eweda ena tomotauyavo 'idewani. Vonahaqiaqi, Ieisu yani qabuna aqiaqina ni'a viaqia weaqida, 'inega ita'a wese nuanuada qiduana yani qabuna aqiaqi otaqidi kana viaqidi.

<sup>15</sup> \* Taitusi, luaqiaqieu be ba'e ve'ita nana ni'a yavematamagilafuyeu una ve'ita aqiaqiea tovetumaqana qabudi matadia. Ta una vona iuledi ta una givewaiwaidi, ta wese tuta nana ilivu luveifana ina viaqia una lugwaeyedi eu 'abiluvine 'inega. 'Inega ge taha toga nahawawebuieu, ta 'esi tomotau qabudi ina 'amayabeu.

### 3

#### *Viaqa aqiaqina una viaqidi*

<sup>1</sup> \* Tovetumaqana una givenuaha'udi be ina awafeledi 'abaga ana toluvineavo 'idia. Ta wese edi luvine be edi vona ina 'abibodedi ta ina vematamatayagedi, ta tuta qabuna me edi 'iva'ava'ata ina toatoa yani qabuna aqiaqidi adi viaqa weaqina. <sup>2</sup> Ta wese una vonedi ge taha toga ina 'awaluveifei, ta 'esi ina toadaumwala ta ilivu nuvana 'inega ina veiaiana tomotau qabudi maega.

<sup>3</sup> \* Vonahaqiaqi, ita'a lova kwavakwavada ta lugwavu'ai 'avada, 'inega nuagovaqa luveifana weaqina be 'wafi ana qaiawa kavokavovo adi nua'ewa 'inega 'eda aqiaqina kanogea ta katauya gei. Ta wese lova eda toa 'inaya veavia be ve'ifi'ifi ilivu diavona iluvineda. Ta ita'a mali qabu kavevoalenedi, ta taudi wese 'idewani ivevoaleneda. <sup>4</sup> Ta ba'e ilivu luveifa diavona adi viaqa nuainaya Yaubada ada To'etoyavua ena veyoluba be ena nuakolokolo give'ifoqeyea 'idaya. <sup>5</sup> \* Ta 'etoyavuida gebu eda viaqa aqiaqidi weaqidi, ta 'esi tauna ena nuakolokoloyega. Vonahaqiaqi, Yaubada 'etoyavuida eda luveifana ana 'utuyavula 'inega ta wese eda vevauvau 'evivi Niboanina Gwalagwalana 'inega. <sup>6</sup> \* Ada To'etoyavua Ieisu Keliso ena viaqa qiduana 'inega Yaubada Niboanina Gwalagwalana guiwaqa aqiaqiea giwalidaya, ta ge taha davegagalei, <sup>7</sup> be yaqisa ana fata

\* 2:8: 1Fit 2:15 \* 2:9: 1Tim 6:1 \* 2:12: 1Ion 2:16 \* 2:14: Gal 1:4; 'Ifo 19:5; Luve 7:6; Isi 37:23; 1Fit 2:9 \* 2:15: 1Tim 4:12 \* 3:1: Lom 13:1-7; 1Fit 2:13-14 \* 3:3: 1Kol 6:9-11; Efe 2:1-2; 5:8 \* 3:5: 2Tim 1:9; Efe 5:26; Ibe 10:22 \* 3:6: Via 2:17-18

ba'e ena viaqa nana 'inega ta wese ena nuakolokolo 'inega nahawayavuida eda luveifana 'inega be na'awanatuneda. Ta ba'e 'inega toa vataya naneida. Ta ba'e toa nana weaqina kalulu'ita vane.

<sup>8</sup> Vona ba'e qabuna vonahaqiaqi ta ada fata kana vetumaqanedi, 'inega nuanuagu qiduana ba'e vona diavona tuta qabuna una lulugaihiedi. 'Inega Yaubada ana tovetumaqanayavo vona diavona ina 'abibodedi be ina awafeledi adi viaqa 'inaya. Ba'e ve'ita nana yani aqiaqina tomotau qabudi weaqidi, ta wese ana fata nave'ebaiula edi toa 'inaya. <sup>9</sup> \* Ta tomeqabu ive'ae'aetoga kavokavovo Mosese ena luvine weaqidi be 'aqegigidiavo adi wawayavo weaqidi ge taudi maega una luvetuba, mana ba'e yani diavona ge taha ida ve'ebaiula 'idaya, 'inega una nogedi. <sup>10</sup> \* 'Inega 'eguma taha toga ena ve'ae'aetoga 'inega vetoatoasi'i nave'ifoqeyea 'ekalesia nuaninaya e 'inega una awatayea. Ta 'eguma eu vona ge namatayagei, e 'inega wese tuta vemagilafuna una vona be nalua'u. Ta 'eguma eu luvine ge na'abibodei, 'inega eu tuta ge una mudali tove'ae'aetoga nana 'inaya, ta 'esi una noga otaqia. <sup>11</sup> Mana ena viaqayavo be wese ena vonayavo 'idiega ualamani aqiaqiea tauna tomotau nana ni'a tauya gei 'eda tunutunuqina 'inega. Ta ena luveifana ba'e 'inega taunega ni'a luvinea ana luvematasabu weaqina.

*Faulo ena vona ana* 'ebelu'ovoa ta ena veyoluba

<sup>12</sup> \* Nawale Atimasi nage Tikiosi ena vetunei nawai 'iuya au ilafa 'idewani. Ta tuta nana taha 'idiega nawai 'inega una toho waiwai be lukwayavonega una tutuvila tauya 'abaga Nikafolisi 'inaya, ta omo'e 'inaya kana veloba. Egu nuanua ba'e, mana guga'u ana tutaya ya'a 'abaga nana 'inaya ena toatoa. <sup>13</sup> \* Luvine ana toalamani tauna Senasi ta wese iana Afolosa una iula aqiaqiedi edi 'adau weaqina be yaqisa ge taha yani 'inega ina kusa tauya nana 'inaya. <sup>14</sup> \* Ta edavo tovetumaqana qabudi una ve'itedi tuta qabuna viaqa aqiaqidi ina viaviaqidi tomotau 'idia tuta nana vita taha taha ina lobedi, mana ge wese aqiaqina 'eguma kana toa kavokavovo ta eda vetumaqana vuaqina ge ana 'itamo.

<sup>15</sup> Tomotau qabudi ba'idia ya'a maega atoatoa edi veyoluba 'iuya. Ta ema lukaiwa una simanea edavo tovetumaqana qabudi 'idia.

Yavevenoqi Yaubada 'inaya be ena nuakolokolo be wese ena veyoluba omi'a qabumi maega.

\* 3:9: 2Tim 2:14,16 \* 3:10: Md 18:15-17 \* 3:12: Efe 6:21-22; Kol 4:7-8 \* 3:13: Via 18:24; 1Kol 3:5-6 \* 3:14: Efe 4:28

## Faulo ena leta Filimoni 'inaya

### *Leta ana alamani weaqina*

Filimoni taha wese Iesu ana tovetumaqana, tauna 'abaga Kolose 'inaya toatoa. Ta Filimoni ena tofewa kavovo ana wawa Onesimo 'inega dena tauya. Ta 'abiboda Onesimo Faulo lobe'a 'abaga qiduana Loma 'inaya. Faulo Iesu Valena ve'itea, 'inega Onesimo nuagivila ta Iesu vetumaqanea. Faulo nuanuana Onesimo nave'evivia natauya ena kaiwabu 'inaya. 'Inega vanue 'ebeyoqonega leta ba'e 'wayavia iana Filimoni weaqina, ta leta nana Onesimo natauyea Filimoni 'inaya naneia nahavoia, mana Faulo nuanuana Filimoni ena tofewa Onesimo ena luveifana nanuataqoya ta na'ebe'ewa 'eviviea ena vanuea.

### Leta gamona

1-3 Vematamagilafu be venoqi

4-7 Faulo ena qaiawa Filimoni weaqina

8-22 Faulo ena nuanua tofewa kavovo Onesimo weaqina

23-25 Lukaiwa be vona veyoluba

### *Lukaiwa*

<sup>1</sup> Ya'a Faulo leta ba'e ya'wayavia waiwai iagu Filimoni 'iuya. Ta wese Timoti ena lukaiwa vetunea waiwai 'iuya. O'a ta wese ima'a eda fewa 'aidegana Iesu Keliso weaqina. Ta ya'a ia'uluguyegu vanue 'ebeyoqona 'inaya Iesu Keliso Valena ana lugaihi weaqina. <sup>2</sup> \* Ema vekaiwa waiwai Iesu ana tovetumaqanayavo taudi tuta qabuna maega otoatoa va'auta eu vanuea 'idia. Ta wese avevekaiwa novuda Afia be taida Akifasi 'idia. Tauna ita'a maega kavetoluavia Iesu Keliso weaqina.

<sup>3</sup> Yavevenoqi weaqimi Tamada Yaubada be eda Kaiwabu Iesu Keliso 'idia, nuanuagu veyoluba ta toadaumwala ina neimi.

### *Filimoni ena veyoluba ta ena vetumaqana weaqina*

<sup>4-5</sup> Valeu ni'a yanoqolia eu vetumaqana Iesu Keliso 'inaya weaqina, ta wese eu nuakolokolo Yaubada ena tomotauyavo 'idia weaqina. 'Inega tuta qabuna egu venoqi 'inaya yalulukaiwa weaqiu Yaubada 'inaya. <sup>6</sup> Ta yavevenoqi una veiaiana aqiaqi tovetumaqana qabudi maega, be yaqisa una alamani aqiaqiea yani qabuna aqiaqina kalobelobedi Keliso 'inega, mana tauna maega ni'a kave'aidega. Ta nuanuagu ba'e yani nana 'inega Keliso awatubo nalobe'a tomotau 'idiega. <sup>7</sup> \* Taigu ye, eu veyoluba 'iguya 'inega qaiawa ni'a yalobe'a ta wese niboanigu 'inega yavewaiwai, mana o'a tuta qabuna Yaubada ena tomotauyavo giwalidi ugivefatuya ta wese ugiveqaiawedi.

### *Faulo ena venoqi Filimoni 'inaya Onesimo weaqina*

<sup>8-9</sup> Vonahaqiaqi, o'a Yaubada ena tomotauyavo uveveyolubedi 'inegana yavonevoneu: Ya'a Faulo Iesu Keliso ena tovaletuyana, ta Valena weaqina vanue 'ebeyoqona 'inaya yatoatoa. 'Inega Iesu ana wawega agu fata me egu giwalifatu ena luvineu be egu nuanua una viaqia. Ta mana o'a iagu, 'inega yaveyolubeu ta bonagu biganega yavonevoneu be egu nuanua una viaqia. <sup>10</sup> \* 'Inega yanoqieu Onesimo una nuakolokoloyea. Tauna ya'awanatunea, mana egu lugaihi ba'e vanue 'ebeyoqona 'inaya noqolia, 'inega nuagivila ta 'itagana taha tovetumaqana. <sup>11</sup> Lova ge dafewa aqiaqi 'iuya, ta ba'itagana ana fata nafewa aqiaqi magilafuda 'idaya.

<sup>12-13</sup> Onesimo yaveyolubea qiduana. Ta vonigo egu nuanua qiduana eda vegagalea daiulegu Iesu Valena dalugaihiea tomotau qabudi 'idia o'a au luseana, mana ya'a vanue 'ebeyoqona 'inaya yatoatoa. Ta tua me egu giwali visiq'a yahawafelei 'iuya yavetunei waiwai. <sup>14</sup> Ta 'eguma una vonaya, "Onesimo eda ve'evivia natauya Faulo naiulea." e

\* 1:2: Kol 4:17   \* 1:7: 2Kol 7:4   \* 1:10: Kol 4:9; 1Kol 4:15



'inega aqiaqina. Ta ge ena keieiu, ta 'esi 'eguma nuanuau tau'u eu nuanua 'inega una vetunea, e 'inega ena qaiawa. Ta 'eguma gebu, wese aqiaqina, 'inega tau'u una nuanua ma'oda una viaqa 'aiqa.

<sup>15</sup> Ana 'ita 'idewani, Onesimo nogeu tuta kukusana namo weaqina, ta ba'itagana ni'a 'evivi waiwai 'iuya ta maega ona toatoa tuta qabuna. <sup>16</sup> \* Vonahaqiaqi, lova tauna eu tofewa. Ta ba'itagana ge una veilivuyea kavona eu tofewa, mana tauna taha tovetumaqana ita'a 'idewani, ta 'esi kana 'awatainea. Tauna yaveveyolubea qiduana, 'inega o'a wese una veyoluba va'inea, mana ita'a qabuda eda Kaiwabu Keliso tainavo.

<sup>17</sup> 'Eguma o'a be ya'a ni'a kaveiaiana Keliso weaqina, e 'inega Onesimo una 'ebe'ewea eu vanuea kavona ya'a uda 'ebe'ewegu. <sup>18</sup> Ta 'eguma lova yani luveifana viaqia 'iuya nage taha yani vanawalia 'iuyega, e 'inega una vematamagilafuyegu be ena givetunuqia. <sup>19</sup> Ya'a Faulo taugu nimaguyega ba'e ya'wayavia. Yavona aqiaqieiu, tauguyega ena ve'ieiu! Ta wese tau'uyega una nuaia au aga 'iguya weaqina, mana lova egu lugaihi 'inega niboaniu veaqiaqi ta yawai vataya ulobea.

<sup>20</sup> Filimoni, egu nuanua ni'a unoqolia, ta nuanuagu una viaqia Keliso ana wawa weaqina. O'a 'idewani taigu mana kavetumaqana Keliso 'inaya, 'inega 'eguma egu nuanua nana una viaqia una giveqaiawa aqiaqiegu. <sup>21</sup> Ta ni'a yahalamani aqiaqiea egu nuanuayavo ya'wayavidi leta ba'e 'inaya una matayagedi, ta wese yahalamania vaina yani aqiaqidi eu nuenuaga una viaqidi.

<sup>22</sup> \* Ta wese taha egu nuanua una noqolia. Nuanuagu eu vanuea sifaufa taha una 'iva'ava'aia weaqigu, mana me egu vetumaqana yanuaia be Yaubada emi venoqi weaqigu nave'iea 'inega na'etoyavuigu ba'e vanue 'ebeyoqona 'inega, be yaqisa ena wai ena vayausimi.

<sup>23</sup> \* Efafasi maega atoatoa, tauna wese yoqoyoqonina mana Iesu Keliso Valena lugaihiea 'inega ikafia. Tauna ena lukaiwa vetunea 'imia. <sup>24</sup> \* Ya'a taidavo Maki be, Alisitako be, Dimasi ta wese Luke maega afewafewa. Ima'a ema fewa 'aidegana, ta taudi wese edi lukaiwa ivetunea 'imia.

<sup>25</sup> Yavevenoqi weaqimi eda Kaiwabu Iesu Keliso niboanimi nagivewaiwaiiedi ena veyolubega.

\* 1:16: 1Tim 6:2 \* 1:22: Fil 1:25; 2:24 \* 1:23: Kol 1:7 \* 1:24: Kol 4:10-14

## Me Ibeliu edi leta

### *Leta ana alamani weaqina*

Leta ba'e ana to'wayavi ge kada alamanian, mana ana wawa ge da'wayavia gamonaya. Ta to'wayavi nana leta nana 'wayavia me Ibeliu 'idia, ta leta nana gamonaya tuta qabuna 'inamedi me Diu, mana qabu 'aidegana. Ta ena 'wayavi 'iuna mana tovetumaqana vaidi ivenuana magilafu edi vetumaqana Keliso 'inaya weaqina, ta inuaia nage Iesu tauna ge Yaubada Natuna. 'Inega to'wayavi nana nuanuana qiduana nave'itedi vonigo Iesu tauna vonahaqiaqi Yaubada Natuna. Ta wese tauna Yaubada ena tovale'ewayavo be, Mosese be, toveguba qiduqiduadi be wese tovesimasimana qabudi veqidua va'inedi. Ta wese veve'itedi vonigo Iesu vetomotau ita'a 'idewani, 'inega eda toa vitana bwa'obwa'oya ni'a alamani aqiaqiedi. Ta ba'e leta nana 'inaya kana 'itea vonigo Yaubada ena vona fofofola vauvauna tomotau 'idaya ena vona fofofola nugwenugweina veqidua va'inea. Ta wese vaina 'ebevetalatutula neida tovetumaqana aqiaqiedi weaqidi Buki Nugwenugweina 'inega. E leta ana alamani ba'e 'idewana.

### *Leta gamona*

1:1-3 Iesu Keliso 'inega Yaubada taunega ve'ita 'ifoqeyea

1:4-2:18 Keliso Yaubada ena tovale'ewayavo veqidua va'inedi

3:1-4:13 Keliso tauna Mosese be Iosua veqidua va'inedi

4:14-7:28 Keliso toveguba qiduqiduadi veqidua va'inedi

8:1-9:22 Luvine vauvauna Keliso sulalinea luvine qabudi veqidua va'inedi

9:23-10:39 Yaubada ena veguba Keliso 'inega veguba qabudi veqidua va'inedi

11:1-12:29 Vetumaqana 'inega Yaubada tomotau 'awahaqiaqiedi

13:1-19 Tovetumaqana adi vebibina

13:20-25 Veniqi be vona 'ebel'ovoa

### *Iesu Keliso tauna Yaubada Natuna*

<sup>1</sup> Tuta lova 'inaya Yaubada 'eda taha taha 'idiega ta wese yani qabudi 'idiega ena vona tubudavo neidi ena tovesimasimanayavo 'idiega. <sup>2</sup> \* Ta ba'itaga tuta 'ebel'ovoa 'inaya Natuna 'inega simasimana 'idaya. Lova ba'e Natuna nana 'inega yani qabudi mahalaya be wese bwa'obwa'oya 'iva'ava'aidi, 'inega venua'ivinea be ena kuyavata qabudi na'ewedi. <sup>3</sup> \* Ta toyani Yaubada 'inaya i'eno'eno ba'itagana wese kana 'itea Natuna 'inaya, mana yani qabuna a'ukamamedi 'inaya 'idewani ena ilivu be, ena aqiaqina be wese ena kaikaiwabu simasimalina. Tauna wese ena vona waiwaina 'inega kuyavata qabudi nawale 'ita'itamakidi ta kafikafidi. Tauna eda luveifanayavo 'ewa yavuledi ena 'aliga 'inega, ta 'abibodanaya Tamana Toatoa Vanena 'ataqinaya toabui di'we gwalagwalana 'inaya. <sup>4</sup> \* Ta ba'e yani diavona 'inega tauna Yaubada ena tovale'ewayavo veqidua va'inedi, ta wese 'idewana wawa nana Yaubada neia tovale'ewayavo adi wawa veqidua va'inedi.

<sup>5</sup> \* Ba'e 'iuna 'inega Yaubada ena tovale'ewayavo qabudi 'idiega ge taha toga 'inaya davonei,

“O'a Natugu,

ba'itaga yavetama 'iuya.”

Ta wese Yaubada ge taha toga 'idiega davonei,

“Ya'a tauna tamana,

ta tauna ya'a natugu.”

<sup>6</sup> \* Ta tuta nana Yaubada ena 'unutau vetunei mai bwa'obwa'oya 'inega vonaya,

“Yaubada ena tovale'ewayavo qabudi

\* 1:2: Ion 1:3 \* 1:3: Ion 14:9; Kol 1:20; Ibe 8:1 \* 1:4: Fil 2:9 \* 1:5: Same 2:7; Via 13:33; 2Sam 7:14; 1Yani 17:13 \* 1:6: Luve 32:43; Lom 8:29

luaqiaqiedi be ina iwa'odu  
Natuna 'inaya."

7\* Ta Yaubada ena tovale'ewayavo weaqidi vonaya,  
"Taudi egu tovale'ewayavo  
yaviaqidi kavonaya nuba,  
ta egu tofewayavo  
kavonaya 'aiwe saesaelina."

8\* Ta Natuna weaqina vonaya,  
"O'a Yaubada eu luvine  
na'eno vataya.

Ta eu tomotauyavo una luvinedi  
luvine 'aideganega ta tunutunuqinega.

9 O'a ilivu be 'eda tunutunuqidi  
u'awahaqiaqiedi,  
ta luvine qabudi adi qeu  
unoga aqiaqiea.

'Inega ya'a Yaubada  
eu Yaubada yavenua'ivineu  
ta dede'wa 'ebeqaiawa  
ana gihiwaqa  
'inega yagiveqaiawe u qiduana,  
ta 'abiboda emwavo."

10\* Ta wese vonaya,  
"Kaiwabu,  
o'a tuta ana 'ebeve'ale 'inaya  
bwa'obwa'o u'iva'ava'aia  
ta wese tau'u nimaueyega mahala uviaqia.

11 Ba'e 'iva'ava'ata diavona ina awala,  
ta o'a una toa vataya.

Ta wese ina veyani kavokavovo  
'idewani kaleko 'itu'ituwaidi.

12 Ta o'a mahala be bwa'obwa'o  
una nunumidi kavonaya  
'afwala kuena 'idewani,  
ta ina 'waya 'idewani  
kaleko 'itu'ituwaidi.

Ta o'a ge taha tuta uda vedumaduma,  
ta wese yawaiu ge ena 'ebel'u'ovoamo."

13\* Ge taha tuta Yaubada ena tovale'ewayavo 'idia davonaya,  
"Utoabui 'ataqiguya ana laba  
au aviayavo ena miedi  
ena a'uwebuiedi 'aqeu 'ayanaya  
ta una luvinedi."

14\* Mana tovale'ewa diavona taudi niboniboana ta toiula, ta Yaubada vevetunedi  
tomotau 'idia sabi iuladi 'etoyavua ana 'ewa weaqina.

## 2

'Etoyavua ana 'eda ge kana nogei

1 Ba'e 'iuna 'inega luaqiaqieda be vona diavona ni'a kanoqolidi kana nua'i'ihidi, mana  
'eguma ge kana nua'i'ihidi e 'inega kavona malolo da'alu'alueda 'idiega. 2\* Lova Yaubada  
ena tovale'ewayavo ena vona isimana 'ifoqeyea tomotau 'idia. Ta vona nana vonahaqiaqi.

\* 1:7: Same 104:4    \* 1:8: Same 45:6-7    \* 1:10: Same 102:25-27    \* 1:13: Same 110:1    \* 1:14: Same 34:7;  
91:11    \* 2:2: Gal 3:19

'Inega tomotau taudi lova vona diavona iqeunidi nage ge ida matayagedi luvematasabu ilobe a luvine tunutunuqina 'inega edi qeu nana weaqina. <sup>3\*</sup> 'Inega ita'a ma'oda kana dena 'aiqa 'eguma simana nana aqiaqi otaqina 'etoyavua weaqina ge kana 'abiboda aqiaqiei? Mana 'etoyavua ana 'eda weaqina eda Kaiwabu Iesu taunega madusimanea. Ta simana nana ana tonuqolayavo i'awahaqiaqiea ta ivona 'ifoqeyea 'idaya. <sup>4\*</sup> Ta Yaubada ena simana nana 'etoyavua weaqina 'awahaqiaqiea ta givewaiwaiea yani 'ebenuavoqana 'idiega ta wese viaqa waiwai 'idiega. Ta wese Yaubada simana nana 'awahaqiaqiea Niboana Gwalagwalana ena nei kavovo ana vewila'a 'inega tomotau taha taha 'idia. Ta yani ba'e viaqia tauna ena nuenuega.

*Iesu vetomotau*

<sup>5</sup> Ni'a yavonemi nawale di'we vauvauna kana lobe. Ta di'we nana 'inaya Yaubada ena tovale'ewayavo ge davenua'ivinedi be ina luvinei. <sup>6\*</sup> Mana Buki Nugwenugweina 'inaya taha vona 'eno'eno vonaya,

“Yaubada ye,

ma'oda 'inega tomotau yani qidwana  
'iuya ta unuanua weaqidi?

Ta ma'oda 'inega tomotau natuna  
u'itamaki aqiaqiea?

<sup>7</sup> Tuta kukusana namo 'inaya  
ua'uwebuiea eu tovale'ewayavo 'ayadia.

Ta o'a ugivaneqea awatubo  
be wese 'amayaba 'inega.

<sup>8</sup> Ta luvine uneia be yani qabudi  
u'iva'ava'aidi na'abiluvinedi.”

Vonahaqiaqi, Yaubada ena vona ba'e ana alamani vonigo ena 'iva'ava'ata qabudi tomotau ina 'itamakidi, ta ge taha yani ina nogei. Ta tomotau edi 'itamaki Yaubada ena viaqayavo weaqidi ba'itagana nawale ge kada 'itei. <sup>9\*</sup> Ta 'esi Iesu ni'au ka'itea. Tauna lova tuta kukusana 'inaya Yaubada a'uwebuiea ena tovale'ewayavo 'ayadia, ta ba'itagana Yaubada Iesu givaneqea awatubo 'inega be wese 'amayaba 'inega, mana Yaubada ena nuakokoloyega Iesu 'aliga visiqina vebaea tomotau qabuda weaqida. <sup>10</sup> Yaubada tauna yani qabudi adi Toviaqa, ta yani diavona 'idiega awatubo lobelobe. Ta ena nuanua qidwana natunavo qabudi na'ebe'ewedi ina mai be maega ina toa ena di'we simasimatala otaqina 'inaya. 'Inega Yaubada yani aqiaqina viaqia tuta nana Natuna awafelea 'aliga visiqina 'inaya. Ta ba'e 'inega venua'ivinea tovanugweta aqiaqina, 'inega ana fata tomotau na'ebe'ewedi 'etoyavua ana 'eda 'inaya.

<sup>11\*</sup> 'Inega ba'e 'itaga Iesu ta wese aiqabu ni'au Yaubada givegwaledi, e taudi ni'a ivegade 'aidega. 'Inega Iesu ge wese nainiyauyau ena 'awataina be ena 'awanovuna 'idaya weaqina. <sup>12\*</sup> Mana Iesu Tamana 'inaya vonaya,

“Ya'a au wawa ena simana 'ifoqeyea  
taigwavo be novugwavo 'iawadia.

Ta ena awatubou tomotau nuanidia  
tuta nana ina va'auta sabi tafwalolo.”

<sup>13\*</sup> Ta wese Iesu vonaya,  
“Egu vetumaqana ena a'uya 'inaya.”

E 'inega wese vonaya,

“Ya'a ba'e,  
ta wese gogama qabudi  
Yaubada ni'a neigu maega atoatoa.”

\* 2:3: Ibe 10:29; 12:25 \* 2:4: Mk 16:20; 1Kol 12:4,11 \* 2:6: Same 8:4-6 \* 2:9: Fil 2:8-9 \* 2:11: Md 25:40  
\* 2:12: Same 22:22 \* 2:13: Ais 8:17-18

<sup>14</sup>\* Yaubada natunavo taudi tomotau ma 'wafidi ta ma sulalidi, 'inega Iesu ena vi'oi 'inega wese vetomotau ma 'wafina be ma sulalina. 'Inega 'aliga, mana tauna tomotau 'idewana. Ta omo'e 'inega Iesu ana fata 'aliga ana tovatatana Seitani ena waiwai naqeunia. <sup>15</sup>E ba'e 'inega Iesu ana fata tomeqabu tuta qabuna imwaniniva 'aliga weaqina na'etoyavuidi.

<sup>16</sup>'Inega ita'a kahalamani aqiaqiea Iesu mai Ebelamo tubunavo sabi iuladi, ta ge damai Yaubada ena tovale'ewa adi iula weaqina. <sup>17</sup>Ba'e 'inega Iesu luaqiaqiea be navetomotau otaqa ita'a tainavo be novunavo 'idewani, be yaqisa tauna ana fata ena nuakolokolo ta ena gwavubiga 'inega natovolo Yaubada matanaya kavona toveguba edi tovanugweta 'idewani. E 'inega tauna ana fata be guba naviaqia eda luveifana ana 'ewa yavula weaqina. <sup>18</sup>Vonahaqiaqi, Iesu ana fata be naiuleda tuta nana sitonova kana lobe, mana tauna ni'au visiqi be sitonova madulutonovidi.

### 3

#### *Iesu tauna Mosese veqidua va'inea*

<sup>1</sup>\* Omo'e 'inega taigwavo be novugwavo, omi'a Yaubada ena tomotauyavo venua'ivinemi mahala weaqina. Ona nuanua aqiaqi Iesu weaqina, tauna tuta qabuna kasimasimana 'ifoqeyea Yaubada vetunei mai 'idewana tovaletuyana be toveguba edi tovanugweta. <sup>2</sup>Yaubada Iesu venua'ivinea be ena fewa naviaqia. Ta Iesu taha togwavubiga, 'inega fewa nana viaqia 'idewani lova Mosese ena gwavubiga Yaubada ena tomotauyavo adi vanugweta 'inaya. <sup>3</sup>Vonahaqiaqi, Mosese ena fewa yani qiduana, ta Iesu ena fewa veqidua va'inea, 'inega luaqiaqiea be awatubo qiduana nalobe. 'Idewani wese 'eguma taha toga vanue aqiaqina nayoqonia e luaqiaqiea be awatubo qiduana nalobe, ta 'abiboda vanue nana ana awatubo mana ge taunega da'ifoqe. <sup>4</sup>Vonahaqiaqi, vanue qabudi ma adi to'eyoqona, ta 'esi Yaubada tauna yani qabudi adi Toviaqa.

<sup>5</sup>\* Mosese tauna tofewa aqiaqina ta wese togwavubiga. 'Inega Yaubada ena nuanua viaqa aqiaqiea ena tomotauyavo weaqidi. Ta Mosese ena fewa diavona ive'ebe'ita tola'ai Yaubada nawale nave'ita 'ifoqeyea tomotau 'idia. <sup>6</sup>Ta Keliso tauna Yaubada Natuna gwavubiga 'avana, 'inega Tamana ena tomotauyavo 'abiluvinedi. 'Inega ita'a wese Yaubada ena tomotauyavo 'idewana 'eguma me eda giwalifatu kana lu'ita vane Keliso 'inaya ta kana vetumaqana aqiaqiea. <sup>7</sup>\* Ba'e 'inega Niboana Gwalagwalana vonaya, "Eguma ba'itaga

Yaubada ena vona onoqonoqolia

<sup>8</sup>\* 'inega ge ona vedeba 'i'wana

'idewani lova me Isileli iviaqa 'aiqa

tuta nana Yaubada ena vona ilugwavu'aiea

ta ena bibitaqo isitonovia

di'we 'ava'avaya.

<sup>9</sup>Omo'e 'inaya ya'a Yaubada  
egu viaqa waiwaidi ya'wala 40 'idia i'itedi,  
ta tua nawale egu bibitaqo isitonovia  
edi vedeba 'i'wana 'inega.

<sup>10</sup>Ta ba'e 'iu nana 'inega  
taudi weaqidi diagu vilea,  
'inega yavonaya,  
'Taudi giwalidi tuta qabuna toa luluvai 'iguyega.  
Ta egu vonayavo be wese egu luvineavo  
ge nuanuadi be ina 'abibodedi.'

<sup>11</sup>\* Ta agu diavilavila weaqina

\* 2:14: 1Ion 3:8; Ve 12:10    \* 3:1: Ibe 4:14; 7:26    \* 3:5: Naba 12:7; Luve 18:15-19    \* 3:7: Same 95:7-11    \* 3:8: Ifo 17:7; Naba 20:2-5    \* 3:11: Naba 14:21-23

taha vona fofofola yaha'uya yavonaya,  
 'Taudi nawale ge adi fata be ina lugu  
 egu 'ebeveyawai 'inaya.' ”

<sup>12</sup> 'Inega omi'a taigwavo be novugwavo taumiega ona 'itamakimi be yaqisa ge nuanua luveifadi emi nuanua ina luveagatuna'idi, mana 'eguma nuanua luveifadi weaqina ona nuanua, e 'inega nawale emi vetumaqana navegoyo ta Yaubada mayawaina ona nogei. <sup>13</sup> Ta 'esi 'aubena 'aidega 'aidega 'idia taumiega ona vonavona iulemi, mana 'ibe ge kada alamanía nage tola'ai na'ifoqe 'idaya. Ta Buki Nugwenugweina vonaya “Ba'itaga” yani nana kana viaqia, e 'inega kana viaqia! 'Inegana ge taha toga 'imiega ena luveifana 'inega navedeba 'i'wana ta Yaubada nanogei. <sup>14</sup> Mana 'eguma Yaubada kana vetumaqanea ana laba tuta ena 'ebel'ovoa 'inaya 'edewani lova kamaduvetumaqanea, e 'inega ita'a Keliso ena gumagiavo ta yani qabuna i'eno'eno 'inaya wese ita'a eda yani. <sup>15</sup> \* Taha vona waiwaina ni'a kanoqolia kana nuai'ihia vonaya,

“Eguma ba'itagana  
 Yaubada ena vona onoqonoqolia,  
 'inega ge ona vedeba 'i'wana  
 'idewani lova tubumiavo  
 iviaqa 'aiqa tuta nana  
 Yaubada ena vona inoqolia  
 ta ilugwavu'aiea.”

<sup>16</sup> \* Isana aiqabu lova Yaubada ena vona inoqolia, ta vona nana inogea? Vonahaqiaqi, taudi tubumiavo lova Mosese 'ewa 'ifoqeyedi Itifita 'inega. <sup>17</sup> \* Ta wese tomeqabu Yaubada igivegamosoalia ya'wala 40 'idia? Taudi wese tubumiavo, ta edi veilivu veifa 'inega i'aliga 'ovoa di'we 'ava'avaya, waisa? <sup>18</sup> Ta aiqabu Yaubada vona fofofole di be ge ina lugu ena di'we 'ebeveyawai 'inaya? E ba'e vona nana taudi Yaubada ena vona ge ida vemamatayagea weaqidi. <sup>19</sup> 'Inega ni'a kahalamani aqiaqiea taudi Yaubada ge dahawafeledi be ina lugu ena di'we 'ebeveyawai 'inaya, mana ge ida vetumaqanea.

#### 4

##### *Yaubada ena vona fofofola veyawai weaqina*

<sup>1</sup> Ta ba'e vona fofofola nana Yaubada ena di'we 'ebeveyawai ana lugu weaqina nawale 'eno'eno. 'Inega ita'a kana 'itamaki aqiaqieda be yaqisa ge taha toga 'idega kana 'ita 'avei di'we nana ana lugu weaqina. <sup>2</sup> Ita'a wese Vale Aqiaqina di'we nana weaqina ni'au kanoqolia 'idewani lova me Isileli inoqolia. Ta taudi Vale nana iveyani kavokavovoyea, mana ge nuadi da'eqa'ui vonigo di'we nana 'inaya ina lugu vetumaqana 'inega. <sup>3</sup> \* Ta 'esi ita'a tovetumaqana ada fata be kana lugu ena di'we 'ebeveyawai 'inaya. Ta taudi ge ida vetumaqana weaqidi Yaubada vonaya,

“Egu gamosoala 'inega  
 vona fofofola waiwaina yavonayea,  
 'Taudi ge adi fata be egu di'we  
 'ebeveyawai 'inaya ina lugu!’ ”

Yaubada ena di'we 'ebeveyawai nawale 'eno'eno kuyavata qabudi adi 'iva'ava'ata 'unu 'inega, ta tua ba'e 'idewani vona 'aiqa.

<sup>4</sup> \* Kahalamani aqiaqiea Yaubada ena vona ba'e vonahaqiaqi, mana Buki Nugwenugweina 'inaya 'aubena vesevenina weaqina simana vonaya, “Ta 'aubena vesevenina 'inaya Yaubada ena fewa qabudi 'idiega veyawai.” <sup>5</sup> \* Ta wese Yaubada ena vona Buki Nugwenugweina 'inaya 'eno'eno vonaya, “Taudi nawale ge adi fata be ina lugu egu di'we 'ebeveyawai 'inaya.” <sup>6</sup> Vonahaqiaqi, taudi Vale Aqiaqina imadunoqolia ge ida lugu, mana Yaubada ena vona ge ida matayagei. Ta aiqabu Vale nana ivetumaqanea Yaubada

\* 3:15: Ibe 3:7-8    \* 3:16: Naba 14:1-35    \* 3:17: 1Kol 10:10    \* 4:3: Same 95:11; Ibe 3:11    \* 4:4: Nug 2:2  
 \* 4:5: Same 95:11

nawale nahawafeledi be adi fata di'we nana 'inaya ina lugu. <sup>7\*</sup> 'Inega Yaubada wese mali 'aubena a'uya ena di'we 'ebeveyawai ana lugu weaqina, e omo'e 'aubena nana ana wawa "Ba'itaga." Yaubada lova tubudavo 'idia simana ena di'we 'ebeveyawai weaqina, ta wese tuta kuena 'abibodanaya Deibida ena 'wayavi 'inega simana 'idaya, ta simana nana ni'au kanoqolia vonaya,

"Ba'itagana 'eguma Yaubada ena vona  
onoqonoqolia ge ona vedeba 'i'wana!"

<sup>8\*</sup> Vonahaqiaqi, lova Iosua me Isileli vanugwetedi di'we Kenani 'inaya. Ta 'eguma Kenani 'inaya di'we 'ebeveyawai vataya ida lobe, e 'inega 'abibodanaya Yaubada ge wese taha tuta 'ebeveyawai weaqina davonavona. <sup>9</sup> 'Inega vonahaqiaqi, Yaubada taha tuta 'ebeveyawai a'uya ena tomotauyavo 'idia, ta ba'e tuta nana nawale ge da'ifoqe 'idia, ta 'esi iba'eba'eyea. <sup>10\*</sup> Mana aqabu ina lugu Yaubada ena 'ebeveyawai 'inaya, e taudi edi fewa qabudi 'idiega ina veyawai, 'idewani wese Yaubada ena fewa 'inega veyawai ena 'iva'ava'ata 'unu 'abibodanaya. <sup>11</sup> Egwavo, kana vetafe'wa waiwai be 'inega kana lugu di'we 'ebeveyawai 'inaya, be yaqisa vaina 'idega ge kana 'ita 'avedi di'we nana 'inaya, mana tubudavo lova 'idewani Yaubada ena vona ge ida matayagea 'inega iluve'waiva.

<sup>12\*</sup> 'Inega Yaubada ena vona kana vemamatayagea, mana vona nana mayawaina ta wese me ena waiwai nawale fewafewa. Vonahaqiaqi, vona nana kavona kefata kainumu so'uso'una ma ala lualuana, 'inega ana fata na'alasusula nalugu eda nuanua be ada lutionova 'idia, be 'inega nave'iteda tola'ai aqiaqina be tola'ai luveifana. Ta wese vona nana ana fata nave'iteda 'eguma eda nuanua be eda ilivu aqiaqidi nage gebu. <sup>13</sup> Ge taha yani Yaubada ena 'iva'ava'ata qabudi 'idiega ana fata be ina oukwaiva 'iawanaya, ta 'esi Yaubada matanaya yani qabudi vunavunaqaya i'eno'eno. Ta nawale taha tuta 'inaya kana tovololo 'iawanaya ta kana simana 'ifoqeyea tola'ai ni'au kaviaqia.

#### *Keliso tauna eda Toveguba Qiduana*

<sup>14\*</sup> E 'inega eda vetumaqana Yaubada Natuna Ieisu 'inaya kana kafi'i'ihia, mana tauna eda Toveguba edi Tovanugweta ta ni'au vaneqa lugu mahalaya Tamana 'inaya. <sup>15</sup> Ta eda Toveguba edi Tovanugweta ba'e eda dawalili qabudi ni'au alamani aqiaqiedi, mana sitonova qabudi ba'itagana kalobelobedi lova tauna wese 'idewani lobedi. Ta tauna ge taha tuta dabe'u luveifana 'inaya. <sup>16\*</sup> 'Inega me eda giwalifatu kana valia kana mai nuakolokolo ana galiva kaikaiwabuna 'inaya. Omo'e 'inaya Yaubada ena nuakolokolo kana lobe, ta ena veyolubega nanuataqoda be 'inega wese naiuleda tuta nana vita kana lobedi.

## 5

<sup>1</sup> Toveguba edi tovanugweta tauna tomotau kavokavovo ta ana venua'ivina 'ewea be 'inega taha fewa naviaqia. Ta fewa nana ana alamani ba'e: Tauna tomotau qabudi be Yaubada nuanidia tovtovolo ta edi luveifana ana nuataqo weaqina edi nei kavovo a'udi 'ebeveguba 'inaya ta vevegubayedi. <sup>2</sup> Vonahaqiaqi, toveguba nana tauna wese tomotau ta dawalili lulutionovia kavona tomotau qabudi 'idewani. 'Inega ana fata toviaqa kavokavovo be wese tovagei vona biganega navona iuledi. <sup>3\*</sup> 'Inega luaqiaqiea be naveguba Yaubada 'inaya taunega ena luveifana weaqina be wese tomotau qabudi edi luveifayavo weaqidi. <sup>4\*</sup> Ge taha toga daluaqiaqiei be taunega naha'uvaneyei be 'inega tauna ena nuenuaga natovolo be navetoveguba qiduana. Ta 'esi Yaubada ena venua'ivina 'inega navetoveguba, 'idewani wese Yaubada Eloni venua'ivinea.

<sup>5\*</sup> Ta wese 'idewani Keliso ge taunega dagivaneqei kavona toveguba edi tovanugweta, ta 'esi Yaubada venua'ivinea ta voneaya,  
"O'a Natugu,

\* 4:7: Same 95:7-8 \* 4:8: Luve 31:7; Ios 22:4 \* 4:10: Ibe 4:4 \* 4:12: Efe 6:17; Ve 1:16; 19:13-15 \* 4:14: Ibe 3:1; 10:23 \* 4:16: Ibe 10:19 \* 5:3: Luvu 9:7; 16:6 \* 5:4: 'Ifo 28:1 \* 5:5: Same 2:7

ba'itaga una 'awatamanegu.”

<sup>6</sup>\* Ta wese taha vona Yaubada vonayea Buki Nugwenugweina 'inaya vonaya, “O'a tuta vataya ana Toveguba, 'idewani Melikisedeki.”

<sup>7</sup>\* Lova tuta nana Iesu bwa'obwa'oya toa 'inega me ena dou ta wese ma mataeluna venoqi Yaubada 'inaya vonigo 'aliga 'inega da'etoyavui. Ta Iesu tauna tonuawebui be tuta qabuna Tamana ena nuanua viaviaqia, 'inega Yaubada Natuna ena gaba noqolia ta 'aubena vetoina 'inaya 'aligega giveya'itoto 'eviviea. <sup>8</sup> Vonahaqiaqi, Iesu tauna Yaubada Natuna, ta tua vita lobedi. Ta vita diavona 'idiega vematamatayaga ana 'eda alamani aqiaqiea. <sup>9</sup> Ta ba'e 'eda nana 'inega Yaubada 'awahaqiaqiea tauna Toveguba Qiduana ta aqiaqi otaqina. E 'inega Iesu ana tomatayagayavo 'etoyavua vataya ina 'ewea tauna 'inega, mana tauna 'etoyavua 'iuna. <sup>10</sup> 'Inega Yaubada venua'ivinea kavona Toveguba edi Tovanutgweta 'idewana Melikisedeki.

#### *Niboanida ena tabo weaqina*

<sup>11</sup> Egu nuanua 'eala 'eno'eno ba'e yani diavona weaqidi be nuanuagu ena givesimalalidi 'imia, ta ge agu fata mana omi'a nuami ge da'eqa'ui lukwayavonega. <sup>12</sup>\* Vonahaqiaqi, omi'a lova ni'au Vale Aqiaqina omadunoqolia, 'inega luaqiaqiemi be mali tomotau oda ve'itedi. Ta ge ami fata, mana Vale nana ana avutugu ge oda alamania, 'inega ana 'ita be taha toga ve'ita nana nave'ita 'eviviem. Ta omi'a kavona gogama dilidilidi susuya isususu, ta ge adi fata 'abwaga falafaladi ina 'aini. <sup>13</sup> Ta 'eguma taha toga nawale susuya toatoa, e 'inega tauna ve'ita tunutunuqina ge dahalamani aqiaqiei, ta wese ge dahalamania tola'ai aqiaqina ta tola'ai luveifana. <sup>14</sup> Ta 'esi 'abwaga falafaladi tomotau taudi edi nuanua fa'alina weaqidi, mana taudi tovetumaqana edi ilivu ana 'eda 'inega tuta qabuna itautauya, be 'inega ni'au ialamania tola'ai aqiaqina ta tola'ai luveifana. E 'inega yani aqiaqi dimo iviaviaqidi.

## 6

<sup>1</sup> 'Inega ve'ita nugwenugweina Keliso weaqina ge wese kana lu'evi'eviviei, mana ni'au onoqolia. Ta 'esi kana tauya ve'ita tomotau taudi nuadi fa'alina adi ve'ita 'inaya, mana ge wese ilivu luveifana ana nuagivila weaqina nage vetumaqana Yaubada 'inaya weaqina adi ve'ita kana lu'eviviedi. <sup>2</sup> Ta ge wese ena ve'itemi vaina yani weaqidi 'idewani baba'itaiso weaqina be, nima ana a'u weaqina tomotau 'idia venoqi be vona veyoluba adi tuta 'inaya. Ta ge wese ena ve'itemi tomotau edi ya'itoto 'aligega weaqina nage Yaubada ena a'uvidividina tomotau edi toa vataya weaqina, mana ba'e ve'ita diavona ni'au onoqolidi. <sup>3</sup> Ta 'esi 'eguma Yaubada nahawafela, e 'inega kana tauya ve'ita 'ena'ena'idi 'idia, be yaqisa eda vetumaqana be eda alamani ina ve'ena'i.

<sup>4-6</sup>\* Ta ma'oda, 'eguma taha toga lova Iesu maduvetumaqanea ta 'abibodanaya nanogea, nage ana fata nanuagivila 'evivi? Gebu'e otaqa, mana 'eguma nuana ni'au 'eqa'ui, ta Niboana Gwalagwalana ni'au 'ewei, e wese Yaubada ena veyoluba ena vona 'inega ni'au lutonovia, ta wese Yaubada ena 'Ebeluvine ana waiwai ni'au lutonovia, ta tua 'eguma ba'e yanidiavo navegeqedi ta wese ena vetumaqana nanogea, e 'inega tauna ge wese ada fata kana givenuagivila 'eviviei. Mana taunana ena viaqa be ena noga 'idiega Yaubada Natuna Iesu tutuve'ewa 'eviviea 'etoluai 'inaya ta giveiniyauyauyeya tomotau qabudi matadia.

<sup>7</sup> Ita'a tomotau kavona vaoqa. 'Eguma 'wei ana tuta 'inaya vaoqa nana 'wei vevebigea e 'inega nawale tonivaoqa bolimana qiduana nalobea, mana Yaubada vaoqa nana 'inaya ena veyoluba ni'a guiwaqia. <sup>8</sup>\* Ta 'eguma vaoqa nana 'inaya talitali be wese vaina libi itabotabo, e 'inega naluveifa ta tonivaoqa vaoqa nana navona ve'alatea ta 'inega nagabu yavulea.

\* 5:6: Same 110:4; Ibe 6:20; 7:17 \* 5:7: Md 26:36-46; Fil 2:6-8 \* 5:12: 1Kol 3:1-3 \* 6:4-6: Md 12:31; Ibe 10:26-27; 1Ion 5:16 \* 6:8: Nug 3:17-18; Md 13:7,22



<sup>9</sup> Egwavo ye, vona waiwaina ba'e ni'au yaneimi onoqolia, ta yanuaia omi'a ge wese ona veilaqe vataya, ta 'esi yahalamani aqiaqiea yani qabuna aqiaqidi 'etoyavua maega nawale ona 'ewedi. <sup>10</sup> \* Ba'e 'idewani yavonavona 'aiqa 'imia, mana Yaubada tauna Toluvine tunutunuqina, e 'inega emi vetafe'wa waiwai tauna weaqina gebu nanuafania. Ta wese emi veyoluba tauna 'inaya ni'au ove'itayea tuta nana ena tomotauyavo ni'au oiuledi ta wese ba'itagana nawale oiuiuledi. <sup>11</sup> 'Inega nuanuagu qiduana ba'e ilivu diavona ge ona nogedi, ta tua me emi gwavubiga 'idewani ona viaviaqa 'aiqa ana laba tuta ana 'ebelu'ovoa 'inaya, be yaqisa ona alamani aqiaqiea emi lu'ita vane ana aqiaqi Yaubada nagive'ifoqeyea. <sup>12</sup> Ge nuagu ona lugwavu'ai, ta 'esi nuanuagu aiqabu taudi lova edi vetumaqana be wese edi bibitaqo 'idiega Yaubada ena vona fofofola ilobeana onavetutumedi.

#### *Yaubada ena vona fofofola vonahaqiaqi*

<sup>13</sup> \* 'Ebevatalatutula ba'e ona 'itea: Tuta nana Yaubada Ebelamo vona fofofolea, e 'inega taunega ana wawa 'inaya 'awatamatamana, mana ge taha toga tauna daveqidua va'inei, 'inega voneaya, <sup>14</sup> "O'a Ebelamo, yavona aqiaqieu nawale veyoluba qiduana una lobeana, mana 'iuyega tubumwavo yo'o qidua va'inedi ina 'ifoqe, ta ge taha toga ana fata nahavodi." <sup>15</sup> Ta Ebelamo me ena bibitaqo omo'e vona fofofola nana ba'eyea, e 'inega 'abibodanaya vuaqina lobeana.

<sup>16</sup> Ta tuta nana tomotau nuanuadi vona fofofola waiwaina ina 'inaneana, e 'inega taha toga tauna veqidua va'inedi ana wawega ivonavona 'inaya. E 'inega tomotau qabudi ialamani aqiaqiea ba'e vonahaqiaqi ta ve'ae'aetoga igigivelua'uya, mana ge taha wese wawa 'idewana. <sup>17</sup> Ta wese 'idewani Yaubada nuanuana qiduana tomotau ge ina venuana magilafu tuta nana vona fofofola neidi, ta 'esi ina alamani aqiaqiea ba'e vona nana vonahaqiaqi, ta vona fofofola nana weaqina Yaubada ge wese nuana nagivila. <sup>18</sup> \* Ena vona fofofola be wese ena 'awatamatamana i'eno'eno vataya. Vonahaqiaqi, ba'e yani magilafudina ge ana fata nagivedumedi, mana Yaubada tauna ge wese ana fata nau'ava. Ita'a aiqabu ni'au kadena ilivu luveifana 'inega ta tauna ena 'itamaki 'inaya ni'a kalugu, e ada fata be me eda giwalifatu Yaubada ena vona fofofola eda lu'ita vane weaqina kana kafi'i'ihia, ta weaqina ge wese kana venuana magilafu.

<sup>19</sup> \* Vonahaqiaqi, lu'ita vane nana kahalamani aqiaqiea ge u'ava, 'inega kana ba'e-ba'eyea. Eda vetumaqana lu'ita vane nana weaqina kavona waga ana lomu, 'inega ge wese niboanida nanidoa. Ba'e lu'ita vane nana 'iuna Ieisu, mana ba'e Ieisu nana Yaubada ena Vanue Gwala mahalaya ana Sifaufa Gwalagwala Otaqina ana bagina kalekoyega 'inaya madulugu. <sup>20</sup> Vonahaqiaqi, tuta nana Ieisu 'aliga 'etoluaia, 'inega kaleko nana eabu magilafuyea. E omo'e 'inega Ieisu ni'au lugu weaqida ta vetoveguba kavona Toveguba edi Tovanugweta. Ta Ieisu tauna tuta vataya ana Toveguba Qiduana, 'idewani Melikisedeki.

## 7

#### *Toveguba Melikisedeki weaqina*

<sup>1</sup> \* Ta Melikisedeki nana tauna 'abaga Salema ana kini ta wese Yaubada Toatoa Vanena ena toveguba. Avia ana tuta taha 'inaya Ebelamo vaina kini luvegwamumuidi vedavi 'inega. Ta tuta nana Ebelamo luaviayega 'evivi maimai 'inega Melikisedeki maega iveloba, ta tauna vona veyolubeana Ebelamo. <sup>2</sup> Ta Ebelamo avia nana 'inega kulufa qiduana miedi. Ta kulufa qabuna 'idiega guguna teni viaqidi, e 'inega guguna 'aidegana Melikisedeki 'inaya nei kavovoyea. Ta Melikisedeki ana wawa ana alamani "Ilivu tunutunuqina ana kini." Ta wawa nana ana alamani vemagilafuna, "Toadaumwala ana kini", mana tauna 'abaga Salema ana kini, ta wawa Salema ana alamani "Daumwala". <sup>3</sup> Ta ge taha buki nage leta dasimana tamana be inana taudi aiqabu, ta ge wese kada alamaniana ena gade weaqidi. Ta wese yawaina ana tuta ena 'ebeve'ale be ena 'ebelu'ovoa

\* 6:10: Ibe 10:32-34 \* 6:13: Nug 22:16-17 \* 6:18: Naba 23:19 \* 6:19: Luvi 16:2-3 \* 7:1: Nug 14:17-20

ge ana alamanimo. E 'inega tauna tuta vataya ana toveguba kavona Yaubada Natuna 'idewani.

<sup>4</sup> 'Inega kana nuaia Melikisedeki tauna 'oloto qiduana. Vonahaqiaqi, tubuda Ebelamo wese taha 'oloto qiduana, ta 'eguma yubai kameli adi yau anidedi (100) aviega 'ewedi 'inega 'idiega teni Melikisedeki 'inaya nei kavovoyea. Ta wese kulufa qabuna 'idiega 'idewani guguna 'aidegana a'uya Melikisedeki 'aqenaya. <sup>5</sup>\* Ta Mosese ena luvine 'inega toveguba qabudi Libai ena gadeyega adi luaqiaqi be tomotau qabudi me Isileli edi kulufa qabuna 'idiega guguna 'aidegana i'ewe'ewedi Yaubada weaqina. Vonahaqiaqi, toveguba qabudi Libai ena gadeyega taudi wese Isileli ana tomotauyavo. Taudi wese Ebelamo tubunavo, ta tua toveguba diavona guguna 'aidegana i'ewe'ewedi edi susu taha taha 'idiega. <sup>6</sup> Melikisedeki tauna gebu Libai ena gade 'inega, ta tua tauna wese guguna 'aidegana Ebelamo 'inega 'ewea. Ta 'abibodanaya Melikisedeki Ebelamo vona veyolubea, ta Ebelamo nana lova Yaubada ena vona fofofola ni'au madu'ewea. <sup>7</sup> Ta ge wese kana venuana magilafu vona veyoluba weaqina, mana ni'au kahalamani aqiaqiea 'eguma taha toga taha tomotau navona veyolubea, e 'inega tauna qiduana, ta 'abiboda vona veyoluba nana ana to'ewa.

<sup>8</sup> Taudi tovegubayavo tomotau edi kulufa qabuna 'idiega guguna 'aidegana i'ewe'ewedi. Vonahaqiaqi, toveguba dina taudi tomotau otaqa 'inega i'ali'aliga. Melikisedeki tauna wese guguna taha 'ewea, ta ge da'aliga, ta 'esi Buki Nugwenugweina vonaya vonigo nawale mayawaina toatoa. <sup>9</sup> Ta wese ana fata ba'e 'idewani kana vona 'aiqa: Libai tubunavo taudi guguna ana to'ewa, ta kavonaya taudi wese guguna taha Melikisedeki ineia tuta nana tubudi Ebelamo guguna 'aidegana nei kavovoyea Melikisedeki 'inaya. <sup>10</sup> Vona nana ana alamani ba'e: Libai nawale ge davi'oi tuta nana Ebelamo ena kulufa qabuna 'idiega guguna 'aidegana Melikisedeki neia. E ba'e 'inega kahalamania Libai tubunavo kavona lova 'inega edi nei kavovo ni'a ia'uya Ebelamo 'inega.

#### *Iesu tauna kavona Melikisedeki*

<sup>11</sup> Yaubada ena luvine ana avutugu me Isileli neidi toveguba edi viaqa 'inega. Ta tomotau ge adi fata ina vetunutunuqa Yaubada matanaya toveguba dina edi viaqa 'idiega, e 'inega Yaubada taha wese toveguba vetunei mai Melikisedeki 'idewani, ta toveguba nana ge Libai nage Eloni edi gadeyega. <sup>12</sup> Ta tuta nana toveguba 'evauna natoa 'ifoqe, e 'inega ana luaqiaqi be luvine wese navevauvau. <sup>13</sup> Mana toveguba nana ni'au kaveqaeyea tauna mali gade 'inega, ta gade nana ana qabuyavo gebu adi fata be ina vetofewa 'ebeveguba 'inaya. <sup>14</sup>\* Ta egu simana ana alamani aqiaqi ba'e 'idewani: Eda Kaiwabu Iesu mai Iuda ena gade 'inega, ta Mosese ge taha tuta dasimana gade Iuda weaqina tuta nana toveguba weaqidi veveqae.

<sup>15</sup> Ta tola'ai ni'au yaveqaeyedi adi alamani simasimalidi, mana toveguba taha vauvauna ni'au 'ifoqe, e tauna Melikisedeki 'idewani. <sup>16</sup> Vonahaqiaqi, luvine 'eno'eno Mosese 'inega vonaya vonigo tomotau Libai ena gade namo 'inega luaqiaqiedi be ina vetoveguba. Ta ba'e toveguba nana gebu Libai 'inega, mana tauna yawaina ena waiwai ge ena awalamo 'inega vetoveguba. <sup>17</sup>\* Ba'e yanidiavo simasimalina, mana Buki Nugwenugweina simana vonaya,

“O'a tuta vataya ana toveguba  
'idewani Melikisedeki.”

<sup>18-19</sup>\* Vonahaqiaqi, luvine nugwenugweidi dawalilidi ta vuaqa geqadi, mana ge ana fata 'idiega tomotau ina vetunutunuqa, 'inega Yaubada luvine diavona 'ewa yavuledi. Ta ba'itagana 'ebeluita vane aqiaqi otaqina luvine dina luve'iedi, e ba'e 'ebeluita vane nana 'inega ita'a kamieda Yaubada di'wenaya.

\* 7:5: Naba 18:21    \* 7:14: Ais 11:1; Md 2:6; Ve 5:5    \* 7:17: Ibe 5:6; Same 110:4    \* 7:18-19: Iem 4:8

<sup>20</sup> Ta tuta nana Ieisu vetoveguba e 'inega Yaubada vona fofofola waiwaina 'inanea, ta lova ge taha tuta ba'e 'idewani daviaqa 'aiqa mali tomotau 'idia tuta nana ivetoveguba.

<sup>21</sup> \* Ta Ieisu vetoveguba Yaubada ena vona fofofola waiwaina 'inega, vonaya,

“Ya'a Kaiwabu Yaubada  
vona fofofola waiwaina yaha'uya,  
'O'a tuta vataya ana toveguba.’

Ta ba'e vona nana weaqina  
ge wese egu nuanua  
ena vea'ugivilei.”

<sup>22</sup> \* Vona fofofola ba'e 'inega kana alamani aqiaqiea Yaubada Ieisu 'inega luvine vauvauna ta aqiaqi otaqina a'uya tauna be tomotau nuanidia, ge wese 'idewani Mosese ena luvine.

<sup>23</sup> Lova luvine nugwenugweina ana tuta 'inaya toveguba qabudi itoatoa, mana 'eguma taha na'aliga e 'inega toveguba vauvauna naluve'iea. <sup>24</sup> Ta Ieisu yawaina ge wese dagumwala ta 'esi natoa vataya, 'inega tauna ena fewa toveguba 'idewani ge taha toga naluve'iei. <sup>25</sup> \* 'Inega Ieisu ba'itagana ta wese tuta maimai 'idia ana fata be aiqabu imaimai Yaubada 'inaya tauna 'inega na'etoyavuidi. Ieisu nana ana fata, mana tauna Toatoa Vatayana ta tuta qabuna vevenoqi weaqida Yaubada 'inaya.

<sup>26</sup> Ieisu tauna Toveguba edi Tovanugweta ta aqiaqi otaqina weaqida. Ana fata naiuleda, mana tauna gwalagwalana ta ge wese ana 'ebeve'ewamo. Tauna ge taha luveifana daviaqia, 'inega Yaubada givaneqea mahalaya, ta totoa mahalaya veqidua va'inedi. <sup>27</sup> \* Ieisu tauna gebu toveguba edi tovanugweta 'idewani, mana taudi Mosese ena luvine 'inega 'aubena 'aidega 'aidega 'idia nugweta taudiega edi luveifana weaqina iveguba, ta 'abibodanaya wese tomotau qabudi edi luveifana weaqina iveguba. Toveguba qabudi adi luaqiaqi be ba'e 'idewani ina viaqa 'aiqa. Ta Ieisu gebu, mana tauna ge ena luveifamo, e 'inega veguba 'aideganamo viaqia tuta nana taunega vegubayea 'etoluai 'inaya weaqida. <sup>28</sup> Ta aiqabu ivenua'ivinedi toveguba edi tovanugweta 'idewani Mosese ena luvine 'ayanaya e taudi dawalilidi, 'inega ge adi fata be yani qabuna aqiaqidi ina viaqidi 'idewani Ieisu, mana taudi tomotau otaqa, ta tua venua'ivina ilobea. Ta luvine nana ana nei 'abibodanaya Yaubada Natuna venua'ivinea vona fofofola waiwaina 'inega. Ta tauna Toveguba edi Tovanugweta aqiaqi otaqina tuta vataya 'inaya.

## 8

### *Ieisu tauna eda Toveguba Qiduana*

<sup>1</sup> Egu vona ni'au onoqolia, ta vona nana fo'una ba'e: Yaubada Toatoa Vanena ena 'ebetoa kaikaiwabuna mahalaya toatoa, ta Ieisu tauna eda Toveguba edi Tovanugweta toabui Yaubada 'ataqinaya. <sup>2</sup> Ta omo'e 'inaya vetofewa Yaubada 'inaya Toveguba Qiduana 'idewani vanue 'ebeiwa'odu gwalagwala otaqina ana wawa Tabenakeli 'inaya. Ta vanue nana ge tomotau nimadiega ida yoqoni, ta 'esi Kaiwabu taunega viaqia.

<sup>3</sup> Bwa'obwa'o ana toveguba edi tovanugweta adi luaqiaqi be yubai 'idiega ina veguba Yaubada 'inaya, ta wese vaina yani ina nei kavovoyea. 'Inega ita'a eda Toveguba edi Tovanugweta ana luaqiaqi be wese taha yani navegubayea. <sup>4</sup> Ta 'eguma tauna nawale bwa'obwa'oya datoatoa, e 'inega ge wese davetoveguba, mana bwa'obwa'oya toveguba koyadi ni'au iveveguba me Diu edi luvine ana 'eda'eda 'inega. <sup>5</sup> \* Ta taudi edi fewa iviaviaqidi taha vanue gwala 'inaya, ta ba'e vanue nana kavona 'ebe'ita 'idewani, mana vanue nana veve'itayea mahala ana vanue 'ebeiwa'odu gwalagwala otaqina ana 'ita 'idewani. Lova Yaubada Mosese vona waiwaina neia tuta nana vanue 'ebeiwa'odu gwalagwalana ana wawa Tabenakeli bwa'obwa'oya nayoqonia, 'inega voneaya, “Una 'itamaki aqiaqieu, ta yani qabuna una viaqidi 'idewani lova yave'iteu bwanaga debanaya.” <sup>6</sup> \* Ta Ieisu ena fewa Tamana neia Toveguba Qiduana 'idewani, e 'inega

\* 7:21: Same 110:4; Ibe 5:6 \* 7:22: Ibe 8:6; 12:24 \* 7:25: Lom 8:34 \* 7:27: Ibe 5:3 \* 8:5: Kol 2:17; Ibe 10:1; 'Ifo 25:40 \* 8:6: Ibe 7:22

fewa nana bwa'obwa'o ana tovegubayavo edi fewa veqidua va'inea. Ta wese 'idewani luvine vauvauna weaqina, mana leisu luvine nana miea Yaubada 'inega ena tomotauyavo 'idia, ta luvine nana luvine 'itu'ituwaina veqidua va'inea, mana luvine vauvauna ena 'ebetunuvahala vona fofofola aqiaqi otaqina 'inega 'ifoqe.

<sup>7</sup> Ta 'eguma luvine 'itu'ituwaina ge wese ena luveifamo, e 'inega Yaubada ge wese luvine vauvauna daha'ui. <sup>8</sup>\* Ta Yaubada ena tomotauyavo 'itedi luvine 'itu'ituwaina 'inega ge ida vetunutuqa, 'inega vonaya,

“Ya'a Kaiwabu yavonemi

nawale taha 'aubena na'ifoqe  
be 'inega luvine vauvauna ena viaqia  
me Isileli be me Iuda maega.

<sup>9</sup> Lova luvine 'itu'ituwaina yaviaqia  
tubudiavo maega tuta nana  
nimaguyega ya'ewa 'ifoqeyedi  
yatauyedi di'we Itifita 'inega.

Ta luvine nana taudi ilugwavu'aiea,  
e 'inega yatoa gwavudi.

<sup>10</sup> Ta ya'a Kaiwabu,  
nawale 'aubena nana 'inaya  
luvine vauvauna ena viaqia  
me Isileli maega.

Ta egu luvineavo ena a'uya nuadia,  
ta wese giwalidia ena 'wayavia.

'Inega ya'a edi Yaubada,  
ta taudi egu tomotauyavo.

<sup>11</sup> 'Inega ge daluaqiaqiei be taha toga  
iana nave'itei navonaya,

'Kaiwabu una alamanial'

Ta wese ge daluaqiaqi be taha 'oloto  
ena susuyavo navonedia,  
'Omi'a Kaiwabu ona alamanial'  
mana tomotau qabudi ni'au ialamanigu,  
taudi tomotau kavokavovo  
be wese kaikaiwabudi.

<sup>12</sup> Ya'a edi viaqa veifa qabudi  
'idiega ena nuataqodi,  
ta edi ilivu luveifana qabuna weaqina  
ge wese ena nuave'avinidi.”

<sup>13</sup> Tuta nana Yaubada luvine vauvauna weaqina simana 'inega ana alamani ba'e 'idewani: Luvine 'itu'ituwaina ge wese kana vefewei, ta 'esi kana a'unaqoyea ta tuta goyona 'inaya nahawala, mana ena waiwai ni'au gumwala.

## 9

*Awatubo Yaubada* 'inaya luvine nugwenugweina 'inega

<sup>1</sup>\* Yaubada ena luvine nugwenugweina 'inaya luvine vaina a'udi me Isileli weaqidi ma'oda ina tafwalolo 'aiqa. Ta wese me edi vanue 'ebeiwa'odu ana wawa Tabenakeli, ta vanue nana bwa'obwa'oya taudiega iviaqia. <sup>2</sup> Ta ana sifaufa magilafuna. Ta sifaufa nugwenugweina igabea ana wawa Sifaufa Gwalagwalana. Ta gamonaya vaina kulufa ia'udi 'idewani odamu ana 'ebei'u ta wese tebolo taha. Ta tebolo nana debanaya beledi gigivegwalana ia'udi edi nei kavovo weaqina Yaubada 'inaya. <sup>3</sup>\* Ta sifaufa vemagilafuna igabea ana wawa Sifaufa Gwalagwala Otaqina. E ba'e sifaufa nana ana

\* 8:8: Iel 31:31-34 \* 9:1: 'Ifo 25:23-26:30 \* 9:3: 'Ifo 26:31-33

'ebelugu kalekoyega ibaginia, ta kaleko nana yubai vutuvutudiega iaqilia. <sup>4</sup> \* Ta sifaufa nana gamonaya taha 'ebeveguba goula 'inega iviaqia 'eno'eno, ta debanaya bunama taha ana wawa inisenisi meilana aqiaqina igabugabuya. Ta wese dedewaga 'aiwe lova goula 'inega i'afwalia ia'uya sifaufa nana gamonaya. Dedewaga nana ana wawa Aki, ta gamonaya dabo beabeadu magilafudi Yaubada ena luvineavo teni lova taunega 'wayavidi i'eno'eno. Ta wese gaeba goula 'inega 'eno'eno dedewaga nana gamonaya, ta gaeba nana gamonaya taha 'abwaga ana wawa mana 'eno'eno. Ta kulufa vetoina Eloni ena kewala 'eno'eno Aki nana gamonaya. Lova kewala nana kwavuuqina me Isileli gamonaya ia'uya, ta 'abiboda taunega ya'eva 'evivi. <sup>5</sup> \* Ta Aki nana ana 'auboda debanaya yani magilafudi adi 'ita kavona Yaubada ena tovale'ewa itoatoa adi wawa Selebimu, ta fafediega Aki nana ive'igwa'uya. Taudi ive'ebe'ita Yaubada ena simatala kaikaiwabuna weaqina. Ta toveguba qiduana yubai sulalidi 'inega 'auboda nana luitaitalia tomotau edi ilivu luveifana weaqina, 'inega Yaubada nanuataqodi. Ta ba'itagana ge ana fata be yani qabuna ba'e weaqina ena givesimatalidi 'imia.

<sup>6</sup> \* Ta tuta nana kulufa diavona ni'au i'iva'ava'aidi vanue 'ebeiwa'odu 'inaya, e 'inega toveguba sifaufa nugweta 'inaya ilugulugu ta edi fewayavo iviaviaqidi. <sup>7</sup> \* Ta Sifaufa Gwalagwala Otaqinaya gebu toveguba qabudi adi fata be ina lugu 'inaya, ta 'esi toveguba edi tovanugweta ta'a mona ana fata nalugu tuta 'aideganamo ya'wala 'aidega 'aidega 'idia. Ta luvine waiwaina 'eno'eno, ge ana fata nima 'ava'avana nalugu, ta 'esi yubai sulalidi nugweta na'ewei 'inega naluguyea. Ta sulala nana navegubayea Yaubada 'inaya taunega ena luveifana weaqidi, be wese tomotau edi luveifana weaqidi. Ta wese vaina luveifana iviaqidi edi nua kavokavovo 'inega ta ge ida alamanidi, e ba'e luveifa diavona weaqidi wese naveguba Yaubada 'inaya. <sup>8-9</sup> \* Ta Niboana Gwalagwalana yani ba'e 'idiega ve'ita aqiaqieda Sifaufa Gwalagwala Otaqina ana bagina ge da'ewa'ei tomotau kavokavovo weaqidi, mana nawale vanue 'ebeiwa'odu 'itu'ituwaina Tabenakeli ana luvine ivefefewedi. Ta ge ana fata be veguba nana 'inega tomotau adi lutiona naveaqiaqi. Ba'e wese taha 'ebe'ita tuta ba'e weaqina, mana veve'iteda nei kavovo qabudi be wese toveguba edi guba Yaubada 'inaya 'idiega ge wese adi lutiona daveaqiaqi, mana luveifana iviaqia, e 'inega vita ilulutiona Yaubada matanaya. <sup>10</sup> 'Inega ba'e veguba diavona 'idiega ge ida veaqiaqi otaqa, mana omo'e luvine diavona 'itu'ituwaidi taudi 'abwaga be go'ila ta wese 'wafi ena uweta weaqina. Ta luvine diavona tomotau luaqiaqiedi be ida 'abibodedi ana laba Yaubada ena 'eda'eda vauvauna dagive'ifoqeyea.

*Awatubo Yaubada* 'inaya ena luvine vauvauna 'inega

<sup>11</sup> Ta Keliso ni'a mai kavona Toveguba edi Tovanugweta 'idewani, 'inega toa aqiaqina ni'a kalobea. Ta tauna ni'a lugu mahala ana vanue 'ebeiwa'odu Tabenakeli 'inaya, ta vanue nana qiduana ta ana 'ita aqiaqi otaqina, mana ge tomotau nimadiega ida yoqoni bwa'obwa'o ba'e debanaya. Ta 'esi yoqoyoqona vatayana 'eno'eno Yaubada 'inega. <sup>12</sup> Ta Iesu Sifaufa Gwalagwala Otaqina 'inaya lugu tuta 'aideganamo, ta ge wese nalugu 'evivi. Tauna ge yubai goti nage bulumakau natudi sulalidi da'ewei ta dalugu daveguba, ta 'esi ena veguba nana taunega sulalina 'inega veguba. Ta ena lugu be ena veguba 'inega eda luveifana qabuna 'ewa yavula vatayedi.

<sup>13</sup> \* 'Eguma taha toveguba yubai goti be bulumakau sulalidi naluitaitalia tomotau 'wafidia, ta wese bulumakau ineya'alidi 'wafutodi na'ewei ta tomotau 'wafidi navekalivia 'inega 'wafidi ina veaqiaqi Yaubada matanaya, <sup>14</sup> \* e 'inega kana alamani aqiaqiea Iesu sulalina 'inega kana veaqiaqi otaqa, mana Iesu Niboana Gwalagwalana Toatoa Vatayana ena waiwai 'inega taunega vegubayea. Ba'e veguba nana aqiaqi otaqina Yaubada matanaya, mana Iesu sulalina ana fata eda nuanua nagive'evaunia 'inega ge

\* 9:4: 'Ifo 16:33; 25:10-16; 30:1-6; Naba 17:8-11; Luve 10:3-5 \* 9:5: 'Ifo 25:18-22 \* 9:6: Naba 18:2-6 \* 9:7: Luvi 16:2-34 \* 9:8-9: Ibe 10:1-2 \* 9:13: Luvi 16:15-16; Ibe 10:4; Naba 19:9,17-19 \* 9:14: 1Fit 1:18-19

wese ve'ita nugwenugweidi weaqidi kana nuanua, be yaqisa ada fata Yaubada mayawaina ena nuanuayavo kana viaqidi.

<sup>15</sup> Omo'e 'inega Keliso mai tomotau be Yaubada nuanidia sabi luvetubadi, ta luvine vauvauna give'ifoqeyea be yaqisa tomeqabu Yaubada ni'au venua'ivinedi veyoluba 'eno'eno vatayana weaqina ina lobe, mana lova 'idewani vona fofofolayea. E ba'e yani nana ana fata mana leisu ena 'aliga 'inega tomotau 'etoyavua ilobe, edi ilivu luveifana weaqina, mana luvine nugwenugweina 'inega ge adi fata 'etoyavua ida lobei.

<sup>16-17</sup> Ni'au kahalamania 'eguma taha toga luvine naha'uya ena kulufa be ena mane adi vewila'a enavo 'idia weaqina, 'inega enavo kulufa diavona ge adi fata ina 'ewedi ana laba ina alamani aqiaqiea tomotau nana ni'a 'aliga.

<sup>18</sup> E ba'e 'inega kana alamania luvine nugwenugweina Mosese 'inega ge ana fata navewaiwai 'eguma yubai sulalidi ge ida vefewea guba weaqina, mana sulala 'idewani 'ebe'ita 'aliga weaqina. <sup>19</sup> \* Mana nugweta Mosese luvine qabudi Yaubada 'inega simanedi tomotau 'idia, ta 'abibodanaya yubai goti ta wese bulumakau natudi sulalidi go'ila maega wayavilea. 'Inega taha 'aiwe ana wawa isofa laqanaya yubai sifi vutuvutudi bweabwealina 'inega fainia ta 'aubwa'uya sulala nana 'inaya, 'inega luitaitalea tomotau be wese Yaubada ena luvineavo ana buki 'inaya. <sup>20</sup> 'Inega Mosese tomotau vonedia, "Yaubada luvine ni'au neimi ta ona vemamatayagedi. Ta sulala ba'e luvine nana ana 'ebe'awahaqiaqi." <sup>21</sup> \* Ta wese 'idewani Mosese sulala ba'e 'inega vanue 'ebe'iw'odu Tabenakeli be wese kulufa qabuna vanue nana gamonaya i'eno'eno luitaitalidi. <sup>22</sup> \* Vonahaqiaqi, luvine ba'e 'idewani simana 'aiqa: Kulufa qabudi ivevefeweyedi ivevunavunaqa sulala 'inega. Ta wese 'idewana ge nuataqo kana lobei 'eguma sulala gebu nadau.

*Keliso ena 'aliga 'inega eda luveifana 'ewa yavuledi*

<sup>23</sup> \* Kulufa diavona Mosese vefewedi bwa'obwa'oya kavona mahalana kulufayavo 'anu'anunudi 'idewani, ta oade mahalaya kulufa otaqidi i'eno'eno. Ta Mosese ba'idia bwa'obwa'oya kulufa diavona yubai sulalidi 'inega givevunavunaqidi. Ta kulufa diavona mahalaya i'eno'eno guba aqiaqi otaqinamo 'inega ge adi fata be ina vevunavunaqa.

<sup>24</sup> Mana leisu ge dalugu vanue tafwalolo gwalagwalana taha 'inaya tomotau nimadiege iyoqonia. Vonahaqiaqi, bwa'obwa'o ana vanue tafwalolo kavona mahalana Vanue Gwalagwala Otaqina 'anu'anunu namo 'idewani. Ta 'esi Keliso lugu mahalaya, ta omo'e 'inaya Yaubada matanaya tofotofolo weaqida. <sup>25</sup> Me Diu edi toveguba edi tovanugweta lugulugu Sifaufa Gwalagwala Otaqina 'inaya ya'wala 'aidega 'aidega 'idia yubai sulalidiege sabi veguba. Ta Keliso ge tuta qabuna dalugu mahalaya be taunega dagubayei, ta 'esi ena lugu nana tuta 'aideganamo Tamana 'inaya. <sup>26</sup> \* Vonahaqiaqi, 'eguma Keliso toveguba davetutumedi e 'inega 'aliga ana visiqa dalutonova 'eviviea bwa'obwa'o ana 'iva'ava'ata 'unu 'inega be ana laba ba'itaga 'inaya. Ta gebu'e otaqa, mana tuta ana 'ebel'u'ova ana tuta vadi'wedi'wea 'inaya Keliso mai tuta 'aideganamo tomotau edi luveifana sabi 'ewa yavulina, ta omo'e tutana 'inaya taunega gubayea weaqida.

<sup>27</sup> Ta wese 'idewani Yaubada ena nuanua 'inega tomotau qabuda kana 'aliga tuta 'aideganamo 'inaya, ta 'abibodanaya ada luvine naneida. <sup>28</sup> 'Inega tuta 'aideganamo Yaubada Natuna awafelea ta vegubayea tomotau qabudi edi luveifana weaqina. Vonahaqiaqi, Keliso nawale na'evivi namai tuta vemagilafuna 'inaya, ta ge tomotau edi luveifana sabi 'ewa yavulina, ta 'esi taudi iba'eba'eyea sabi 'etoyavuidi.

## 10

*Yubai sulalidi ge ana fata tomotau edi luveifana na'ewa yavuledi*

<sup>1</sup> Lova luvine 'itu'ituwaina adi viaqayavo kavona leisu ena viaqa 'aye'ayewanamo, ta 'esi ba'itaga leisu ena viaqa 'inega yani aqiaqi otaqina ni'a 'ifoqe 'idaya. Mana luvine nana ge ana fata tomotau edi luveifana na'ewa yavulei. Tuta qabuna yubai ivevegubayedi

\* 9:19: 'Ifo 24:6-8 \* 9:21: Luvu 8:15,19 \* 9:22: Luvu 17:11 \* 9:23: Ibe 8:5; 10:1 \* 9:26: Ibe 10:10

ya'wala 'aidega 'aidega 'idia, ta totafwalolo diavona Yaubada di'wenaya imai ge ana fata be ida vevunavunaqa veguba diavona 'idiega.

<sup>2</sup> Mana 'eguma totafwalolo diavona veguba diavona 'idiega ana fata be ida vevunavunaqa aqiaqi, e 'inega luaqiaqiedi be viaqa diavona ida lua'uya, mana ge taha wese 'wamomo ida lutonovia edi luveifana weaqina Yaubada matanaya. <sup>3</sup> Ta gebu, ge ana fata be ida vevunavunaqa! Ta 'esi veguba diavona ya'wala 'aidega 'aidega 'idiega nuadi iluluqa'uya edi luveifana weaqina, <sup>4</sup>\* mana yubai goti be bulumakau 'alabwatadi sulalidi ge ana fata be tomotau edi luveifana na'ewa yavulei.

<sup>5</sup>\* E omo'e 'inega tuta nana Keliso mai bwa'obwa'oya 'inega Tamana 'inaya vonaya, "Veguba yubai 'idiega

be wese nei kavovo ge nuanuau,  
ta 'esi ya'a 'wafigu ni'a u'iva'ava'aia  
yahawafelea eu nuanua weaqina,  
<sup>6</sup> mana ge uda qaiawa yubai gabugabudi  
adi veguba tomotau edi luveifana  
adi 'ewa yavula weaqina.

Ta ge wese uda qaiawa nei kavovo  
tomotau edi luveifana  
ana 'ewa yavula weaqina.

<sup>7</sup> 'Inega yavonaya,  
'Yaubada ya'a ba'e.

Ni'a yamai eu nuanua

sabi viaqina 'idewani  
lova eu Buki Same ena simana.' "

<sup>8</sup> Ta Buki Nugwenugweina 'inaya Keliso maduvonaya, "Ge nuau veguba be nei kavovo qabudi, nage yubai gabugabudi nage wese vaina yani ivevegubayedi luveifana weaqidi." (Vonahaqiaqi, Mosese ena luvine 'inega guba qabudi weaqina simanayedi, ta tua viaqa diavona weaqidi nawale ge uda qaiawa.) <sup>9</sup> 'Inega wese vonaya, "Ya'a ba'e, ni'a yahawafelegu 'iuya be eu nuanua ena viaqia." E ba'e 'inega Yaubada luvine 'itu'ituwaina veguba weaqina 'ewa yavulea, ta 'esi luvine vauvauna a'u'ifoqeyea. <sup>10</sup>\* Iesu Keliso Yaubada ena nuanua qabuna viaqia. 'Inega tomotau qabuda ni'a kavevunavunaqa Yaubada matanaya tuta nana Iesu Keliso weaqida taunega 'wafina vegubayea tuta 'aideganamo, ta ge wese naguba 'evivi tuta maimai 'inaya.

<sup>11</sup>\* Luvine 'itu'ituwaina ana tutaya toveguba tuta qabuna itovotovolo 'ebeveguba di'wenaya ta iveveguba. Ta guba diavona ge adi fata tomotau edi luveifana ina 'ewa yavuledi. <sup>12</sup> Ta eda Toveguba Qiduana tuta 'aideganamo taunega vegubayea Yaubada 'inaya eda luveifana weaqina. Ta 'abibodanaya Tamana ana 'ataqia toabui. <sup>13</sup>\* E omo'e 'inaya Iesu ba'eba'e ana laba ana aviayavo Yaubada naha'uwebuiedi 'aqeyafayafanaya. <sup>14</sup> Mana veguba ba'e 'aidega nana 'inega Yaubada tomotau givevunavunaqa vatayedi, e 'inega taudi ena tomotauyavo gwalagwaladi.

<sup>15</sup> Ta wese Niboana Gwalagwalana ba'e yani diavona weaqina madusimana 'ifoqeyea vonaya,

"Kaiwabu Yaubada vonaya,

<sup>16</sup>\* 'Taha tuta 'inaya luvine vauvaudi  
ena viaqia egu tomotauyavo maega,  
ta luvine diavona giwalidia ena a'udi,  
ta wese nuadia ena 'wayavidi.'

<sup>17</sup>\* Ta wese vonaya,  
'Tomotau edi luveifanayavo

\* 10:4: Ibe 9:13 \* 10:5: Same 40:6-8 \* 10:10: Ibe 9:12 \* 10:11: 'Ifo 29:38 \* 10:13: Same 110:1  
\* 10:16: Iel 31:33; Ibe 8:10 \* 10:17: Iel 31:34

be wese edi viaqa ge aqiaqidi  
ena nuafanidi.’”

<sup>18</sup> Vonahaqiaqi, ’eguma Yaubada eda luveifana qabuna ni’a nuataqodi ’inega ge daluaqiaqieda be mali ’eda be mali ’eda kana salidi eda luveifana ana guba weaqina, mana ge taha wese ’eda da’eno’eno.

<sup>19</sup>\* Egwavo ye, ’inega me eda giwalifatu ada fata kana lugu Vanue Tafwalolo ana Sifaufa Gwalagwala Otaqina ’inaya Ieisu sulalina ’inega. <sup>20</sup>\* E ba’e ’inega tomotau ada fata ’eda vauvauna ta mayawaina ’inega kana lugu Yaubada ’inaya, mana ena ’aliga ’inega Sifaufa Gwalagwala Otaqina kalekoyega ibaginia siwa’ea weaqida.

<sup>21</sup> Vonahaqiaqi, Ieisu eda Toveguba Qiduana Yaubada ena tomotauyavo ’ita’itamakidi ta ’abi’abiluvinedi, <sup>22</sup>\* ’inega ge me eda venuana magilafu Yaubada kana valiei, ta ’esi kana valia me eda vetumaqana waiwaina ’inaya, mana eda ’wamomo ilivu luveifadi weaqina Ieisu sulalinea luitaitalidi ’inega ni’a kavevunavunaqa, ta wese go’ila aqiaqina ana uweta ’inega ’wafida ni’a vevauvau.

<sup>23</sup> Inega luaqiaqieda be eda lu’ita vane Ieisu weaqina kana kafi’ihia, ta ge wese kana nidonidoa, mana Yaubada ena vona fofofola ’idaya nawale na’ifoqe aqiaqi. <sup>24</sup> Ta ’esi luvibwaineda be kana nuanua aqiaqi ma’oda ’inega taudega kana vona iuleda, ta vona nana ’inega veyoluba ta wese viaqa aqiaqidi kana viaqidi edavo maega. <sup>25</sup>\* Inega tafwalolo ana va’auta ge kana lugwavu’aiei ’idewani vaidi tomotau ilulugwavu’aiea. Ta ’esi taudega kana vona iula aqiaqieda, mana Ieisu ena tuta ’evivi mai bwa’obwa’oya ni’a vadi’wedi’weda.

<sup>26</sup>\* Ta ’eguma ita’a Ieisu Valena ni’a ka’ewea ta wese kahalamani aqiaqiea ta tua nawale taudega eda nuanua ’inega ilivu luveifana kaviaviaqidi, e ’inega ge taha wese veguba da’eno’eno be ana fata eda luveifana na’ewa yavulei. <sup>27</sup>\* Ta ’esi me eda mwaniniva kana ba’eba’e ana laba vetala’ai qiduana ana ’aubena na’ifoqe, ’inega aiqabu Yaubada ivevoalanea ’aiwe ’ala’alata na’alaveawalidi. <sup>28</sup>\* Mosese ena luvine nugwenugweina ba’e ’idewana simana ’aiqa: ’Eguma taha toga luveifana viaqia, ta tomotau magilafudi nage toidi matadia yani nana viaqia, e ’inega ge wese nuakolokolo dalobei, ta ’esi iluve’aligia. <sup>29</sup>\* Inega kana nuaia tola’ai nawale na’ifoqe taha tomotau ’inaya ’eguma tauna Yaubada Natuna naveyani kavokavovoyea? Ta wese kana nuaia tola’ai nawale na’ifoqe taha tomotau ’inaya ’eguma Yaubada ena luvine vauvauna sulalina naveyani kavokavovoyea, mana sulali nana ’inega vevunavunaqa Yaubada matanaya. Ta wese kana nuaia tola’ai nawale na’ifoqe taha toga ’inaya ’eguma tomotau nana Niboana Gwalagwalana ’inega nuakolokolo lobelobeia ta na’awaluveifea? Vonahaqiaqi, tomotau nana luaqiaqiea be luvematasabu qidua va’inena nalobeia Yaubada ’inega.

<sup>30</sup>\* Mana Yaubada ena vona ni’a kahalamania vonaya, “Ya’a tomotau edi luveifana ena ve’iedi, ta wese ena ’ewa luai.” Ta wese vonaya, “Ya’a Kaiwabu egu tomotauyavo ena a’uvidividinidi.” <sup>31</sup> Vonahaqiaqi, yani ’ebemwaniniva qiduana ’eguma Yaubada mayawaina nimanega luvematasabu kana lobeia.

<sup>32</sup> Egwavo, ona nuaia lova tuta nana simatala ’ifoqe ’imia Ieisu valenega, ’inega wese vaina vita olutonovidi. Ta vita diavona ’idiega ge oda be’u, ta ’esi otovolo’i’ita. <sup>33</sup> Vaina tuta tomotau matadia i’awaluveifemi ta wese iveilivu veifemi. Ta wese vaina tuta emiavo oiuledi tuta nana vita ilobeia omi’a ’idewani. <sup>34</sup>\* Ta emiavo edi vetumaqana weaqina ia’uluguyedi vanue ’ebeyoqona ’inaya, ta omi’a onuakolokoloyedi ta ovayausidi. Ta wese tovanawala emi kulufayavo i’ekilidi. Ta ge oda nuavita, ta ’esi me emi qaiawa otoatoa, mana oalamani aqiaqiea yani ’eno’eno vatayadi ta aqiaqi otaqidi weaqimi mahalaya i’eno’eno.

\* 10:19: Ibe 4:16 \* 10:20: Md 27:51 \* 10:22: Luvi 8:30; Isi 36:25; Efe 5:26 \* 10:25: Ibe 3:13 \* 10:26: Ibe 6:4-8 \* 10:27: Ais 26:11 \* 10:28: Luve 17:6; 19:15 \* 10:29: ’Ifo 24:8; 1Kol 11:27-29; Md 12:30-32 \* 10:30: Luve 32:35-36; Same 135:14 \* 10:34: Md 6:20; 5:11-12



<sup>35</sup> Omi'a Iesu ovetumaqana aqiaqiea, 'inega vetumaqana nana ge ona felei, ta 'esi ona kafi'i'ihia, 'inega ve'ia aqiaqi otaqina Yaubada 'inega ona lobe. <sup>36</sup> Omi'a luaqiaqiemmi be me emi bibitaqo ona toatoa be yaqisa ami fata Yaubada ena nuanua ona viaviaqidi, e 'inega tola'ai vona fofofolayea 'imia ona 'ewedi. <sup>37</sup>\* Mana tuta ge kuena 'inaya,

“Tomai nana na'ifoqe,  
ta ge na'ive'ove'o.

<sup>38</sup> Aiqabu ni'a ivetunutunuqa mataguya  
e taudi edi vetumaqanega mayawaidi  
ina toatoa.

Ta aiqabu vita taha taha weaqidi  
imwaniniva be inogegu,  
e ba'e taudina weaqidi  
ge wese ena qaiawa.”

<sup>39</sup> Ta ita'a ge 'idewani tomotau Yaubada ivegwavu'aiea, mana taudi nawale ina lu-ve'waiva. Ta 'esi ita'a me eda vetumaqana katoatoa be 'inega 'etoyavua kana 'ewea.

## 11

### *Vetumaqana weaqina*

<sup>1</sup>\* Vetumaqana tola'ai? Eda vetumaqana Yaubada 'inaya ana alamani ba'e: Tauna eda 'ebelu'ita vane ge ana 'itamo, ta tua eda vetumaqana 'inega kahalamani aqiaqiea nawale eda lu'ita vane nana ana aqiaqi na'ifoqe 'idaya, 'inega ge wese kana venuana magilafu.

<sup>2</sup> Lova tuta nugwenugweina 'inaya Yaubada tomotau 'awahaqiaqiedi edi vetumaqana 'inega.

<sup>3</sup>\* Eda vetumaqana 'inega kahalamani aqiaqiea vonigo Yaubada ena vona 'inega kuyavata qabudi viaqidi, 'inega ba'itagana yani qabudi ka'ite'itedi lova i'ifoqe ge taha yani adi 'itamo 'idiega, ta 'esi ena vona 'inega i'ifoqe kavovo.

<sup>4</sup>\* Taha 'ebevetalatutula ena neimi: Eibolo ena vetumaqana 'inega guba aqiaqina a'uya Yaubada 'inaya, ta tuana Keni ena guba ge aqiaqina. 'Inega Eibolo Yaubada matanaya vetunutunuqa, mana guba nana 'awahaqiaqiea, ta Keni ena guba ge da'awahaqiaqiei. 'Inega vonahaqiaqi, Eibolo lova yawaina ni'a gumwala, ta ena vetumaqana ba'itagana nawale eda 'ebe'ita.

<sup>5</sup>\* Ta Inoki ena vetumaqana 'inegana Yaubada 'ewa vaneqea mahalaya ta ge 'aliga visiqina davebaei bwa'obwa'oya, 'inega tomotau ge adi fata Inoki ida lobei. Ta nugweta Yaubada qaiawa Inoki ena vetumaqana weaqina, 'inega 'awahaqiaqiea, ta 'abiboda 'ewa vaneqea mahalaya. <sup>6</sup> 'Inegana ge taha toga ana fata Yaubada nagiveqaiawei 'eguma ge davetumaqanei, mana 'eguma taha toga nuanuana namai Yaubada 'inaya e luaqiaqiea be navetumaqana aqiaqi vonigo Yaubada nana toatoa. Ta wese luaqiaqiea be navetumaqana vonigo Yaubada ana tosaliavo ve'ia aqiaqina naneidi.

<sup>7</sup>\* Ta wese Noa ena vetumaqana 'inega taha waga qiduana viaqia ena susuyavo sabi 'etoyavuidi. Tauna Yaubada ena vona matayagea tuta nana vonea veilage qiduana nawale na'ifoqe bwa'obwa'oya, lova ge taha 'idewani da'ifoqe. Ta waga nana 'inega Noa me ena gadeavo 'etoyavua ilobe veilage nana 'inega, ta mali qabu gebu, ta 'esi iveilage vataya. Ta Noa ena viaqa ba'e 'inega ve'iteda vonigo totoa bwa'obwa'o qabudi luveifadi, ta Noa ena vetumaqana 'inega Yaubada matanaya vetunutunuqa.

<sup>8</sup>\* Ta wese Ebelamo ena vetumaqana 'inega Yaubada matayagea tuta nana ena gaba noqolia ta voneaya vonigo ena di'we nanogei be natauya mali di'we 'inaya. Yaubada vona fofofola Ebelamo 'inaya be di'we nana na'ewea ta omo'e 'inaya nave'abaga. Ba'e di'we nana Ebelamo ge dahalamania ta tua vematamatayaga 'inega tauya. <sup>9</sup>\* Ta di'we vonavona fofofolana 'inaya Ebelamo ena didi yubai vutuvutudiega viaqia ta 'inaya toa

\* 10:37: Aba 2:3-4 \* 11:1: 2Kol 5:7 \* 11:3: Nug 1:1; Same 33:6; Ion 1:3 \* 11:4: Nug 4:3-10 \* 11:5: Nug 5:21-24 \* 11:7: Nug 6:13-7:1 \* 11:8: Nug 12:1-5 \* 11:9: Nug 35:12

kavona wagawaga. Ta wese 'idewani Aisake be Iakobo itoa 'aiqa, mana taudi wese vona fofofola nana ilobea Yaubada 'inega. <sup>10</sup> Ebelamo ba'e 'idewani toa 'aiqa, mana ena vetumaqana 'inega lu'ita vane taha 'abaga qiduana weaqina. Ta 'abaga nana Yaubada tauna ena nuenuega 'iva'ava'aia ta viaqia toatoa vatayana.

<sup>11</sup> \* Ebelamo ena vetumaqana 'inega ana fata navetamana. Tauna ni'a vekofekofe, ta moqanena Sela wese kofekofedi ta gagalidi. Ta Ebelamo alamani aqiaqiea Yaubada ena vona fofofola ge wese navenuafania, 'inega moqanena ivenatuna. <sup>12</sup> \* Vonahaqiaqi, Ebelamo tawa vekofekofe otaqa, ta tua ba'e 'oloto nana 'inega qabu qidua va'inena ivi'oi ta ive'eala kavona 'wadi'wadima mahalaya ta wese kavona gelasa balabalaya, ge ada fata kana avodi.

<sup>13</sup> \* Ba'e tomotau diavona me edi vetumaqana i'aliga. Ta yani diavona Yaubada ni'au vona fofofole di ge ida 'ewedi, ta ialamani aqiaqiea nawale ina lobedi, 'inega vona fofofola diavona iba'eba'eyedi, ta weaqidi iqaiawa. Ta taudiege tomotau 'idia isimana 'ifoqe edi toa bwa'obwa'oya kavona be wagawaga 'idewani. <sup>14</sup> Vonahaqiaqi, 'eguma wagawaga dina ba'e 'idewana ivona 'aiqa 'inega ada fata kana alamani aqiaqiea vonigo taudi edi 'abaga aqiaqi nawale isalisalia. <sup>15</sup> Ta taudi ge ida nuanua edi 'abaga 'ebe'itu'ituala weaqina, mana 'eguma edi nuanua 'idewana e 'inega adi fata be ida 'evivi 'abaga diavona 'idia, <sup>16</sup> ta 'esi taudi 'abaga aqiaqina isalia, e tauna 'abaga nana mahalaya. 'Inegana Yaubada ge dainiyauyau tomotau diavona edi 'awa-Yaubada 'inaya weaqina, mana tauna edi 'abaga qiduana ni'au 'iva'ava'aia mahalaya.

<sup>17</sup> \* Lova Yaubada Ebelamo 'inaya vona fofofolayea vonigo taha natuna navi'oi, e 'inega vi'oi. Ta tuta nana Yaubada Ebelamo sitonovia ta voneaya, "Natuhu 'aidega otaqina Aisake una vegubayea." E 'inega gwama nana ge davegagalea, ta 'esi ena vetumaqana 'inega awafelea. <sup>18</sup> Tauna gwama nana weaqina lova Yaubada vona fofofola vonaya, "Natuhu Aisake 'inega nawale eu gadeavo qabudi ina vi'oi." <sup>19</sup> \* Ta Ebelamo nuaia vonigo 'eguma natuna naluve'aligia e 'inega Yaubada ana fata nagiveyawaha 'eviviea. Ta vonahaqiaqi, ana 'ita kavona be Ebelamo natuna Aisake 'aligege da'ewa 'eviviea.

<sup>20</sup> \* Ta wese Aisake ena vetumaqana 'inega natunavo Iakobo ta Iso vona veyolubedi edi tuta maimai weaqina.

<sup>21</sup> \* Ta wese Iakobo ena vetumaqana 'inega Iosefa natunavo vona veyolubedi. E ba'e yani nana viaqia tuta nana ni'au vekofekofe be tuta goyona yawaina nagumwala. 'Inega vona veyoluba nana 'inaya ena kewala 'inaya atuve'alata ta iwa'odu Yaubada 'inaya.

<sup>22</sup> \* Ta wese Iosefa ena vetumaqana 'inega me Isileli vonedi edi 'ifoqe di'we Itifita 'inega weaqina. Ba'e yani nana viaqia tuta nana yawaina sabi gumwagumwalina. Ta wese vebibinedi vonigo luluna ina yakia tuta nana ina tutuvila.

<sup>23</sup> \* Ta wese Mosese inana be tamana edi vetumaqana 'inega natudi ia'ukwaivea wai'ena toi 'idia, mana gwama nana ge gwama kavokavovo 'idewani. Me Itifita edi kini ena luvine waiwaina ge ida mwaninivei ta 'esi gwama nana ia'ukwaivea.

<sup>24</sup> Ta wese Mosese ena vetumaqana 'inega tuta nana vekilakai ge nuana tomotau ina 'inane vonigo tauna me Itifita edi kini Felo tubuna, mana tauna ge Felo nana natuna natu otaqidi. <sup>25</sup> Mana Mosese ge nuana tuta kukusana 'inaya naqaiawa bwa'obwa'o ana ilivu luvifana weaqina, ta 'esi nuanuana Yaubada ena tomotauyavo edi toa vita gamonaya tauna wese maega ina toa. <sup>26</sup> Ta ge nuana Itifita ana kulufa kaikaiwabuna na'ewedi, ta 'esi nuanuana visiqqa navebaea Keliso weaqina, mana alamani aqiaqiea nawale ana ve'ia aqiaqina Yaubada 'inega nalobea. <sup>27</sup> Ta wese Mosese ena vetumaqana 'inega Itifita nogei ta tauya. Ta ge damwaniniva kini nana ena diavilavila weaqina, ta 'esi me ena giwalifatu tauya vavava, mana kavonaya be Yaubada da'itei 'iawanaya ena vetumaqanega. <sup>28</sup> \*

\* 11:11: Nug 18:11-14; 21:2; Lom 4:19 \* 11:12: Nug 15:5; 22:17 \* 11:13: Nug 23:4; 1Yani 29:15; Same 39:12; 1Fit 2:11 \* 11:17: Nug 21:12; 22:1-14 \* 11:19: Lom 4:17 \* 11:20: Nug 27:27-29,39-40 \* 11:21: Nug 47:31-48:20 \* 11:22: Nug 50:24-25; 'Ifo 13:19 \* 11:23: 'Ifo 1:22; 2:2 \* 11:28: 'Ifo 12:21-30

Ta wese Mosese ena vetumaqana 'inega me Isileli vonedi ma'oda 'Auvivia Sagalina ina viaqa 'aiqei, 'inega vebibinedi lami sulalinega edi 'awa ana dadala ina luitaitalea, be yaqisa luve'aliga ana tovale'ewa Yaubada 'inega me Isileli edi 'unutauyavo me'olotodi ge naluve'aligidi.

29 \* Ta wese me Isileli edi vetumaqana 'inega qabudi Mwade'wa Bweabwealina ivaukamanea bwa'obwa'o afailinega. Ta 'abibodadiEGA me Itifita ivamulitala'obedi sabi vaukamana, 'inega wese mwade'wa sivetuba 'evivi ta qabudi yagwataqodi.

30 \* Ta wese me Isileli edi vetumaqana 'inega 'abaga Ieliko ana 'ali qiduana ta waiwaina iluvivilia 'aubena seveni 'idia, e 'inega 'ali nana 'avalabwegea.

31 \* Ta wese tokodada Leabi ena vetumaqana weaqina me Isileli ge ida vunuqia, mana lova edi tolufonufonu magilafudi Leabi 'ebe'ewedi ta a'ukwaivedi ena vanuea.

32 \* 'Inega 'evisa wese 'ebevetalatutula tovetumaqana weaqidi ena simanei 'imia? 'Eguma Gidioni\* be, Balaki† be, Samisoni‡ be, Iefeta§ be, kini Deibida be, Samuela ta wese Yaubada ena tovesimasimana qabudi edi vetumaqana weaqina ena velulu'uyayei 'imia, e 'inega nawale tuta ena givekue va'inea. 33 \* Taudi tovetumaqana diavona edi vetumaqana 'inega mali di'we maega ivedavi ta ivewaiwai va'inedi ta luvine tunutunuqina 'inega i'abiluvinedi, 'inega Yaubada ena vona fofofolayavo ilobedi. Ta wese yubai laioni sasasadi iluvinedi be ge adi fata 'awadi ina la'ei. 34 \* Ta wese 'aiwe yamwayamwana qiduana adi fata ina 'weunidi, be wese adi fata adi aviayavo 'idiega ina dena be yaqisa ge ina luve'aligidi kefatega. Ta edi tuta dawalili 'inaya Yaubada givewaiwai, 'inega vedavi ana tutaya adi aviayavo ivewaiwai va'inedi ta i'wavina yavuledi. 35 \* Ta wese vetumaqanega vivine vaidi moqanediavo luluve'waividi 'aligea iloba 'eviviedi. Ta wese vaidi tovetumaqanayavo iveilaqe, mana adi aviayavo isitonovidi be vonigo Yaubada ida vegeqea. Ta ge nuanuadi Yaubada ina nogei, 'inega taudiega iawafeledi veilaqe 'inaya, mana ialamania vonigo nawale 'aligea ina ya'itoto 'evivi 'inega yawai aqiaqi otaqina ina lobe. 36 \* Ta wese vaidi tovetumaqanayavo tomotau igivenu'wedi ta gwavudi i'esitevea 'ebevunuqa 'inega. Ta wese vaidi seni 'inega iyoqonidi ta ia'uluguyedi vanue 'ebeyoqona gamonaya. 37 \* Ta vaidi tovetumaqanayavo lukwalukwadi yubai goti be sifi 'wafidiega ivekaleko ta iluvivila dadana. Ta tuta qabuna vita ilobedi adi aviayavo 'idiega, ta wese tomotau iveilivu veifedi. Vaidi daboyega i'auve'aligidi, ta vaidi iluda'a magilafuyedi ta wese vaidi kefatega iluve'aligidi. 38 Tovetumaqana diavona bwa'obwa'o ana ilivu ge daluvibwainedi, mana taudi tomotau aqiaqi otaqidi. 'Inega di'we tomotau geqana be wese bwanaga 'idia iluyaba dadana. Ta wese vetoa bwa'obwa'o gamonaya be vatu'ubu 'idia itoa dadana.

39 Ba'e tomotau diavona Yaubada 'awahaqiaqiedi edi vetumaqana 'inega. Ta ge taha toga 'idiega ena vona fofofolayavo dalobedi edi tuta toaya, 40 mana Yaubada ena nuenuega yani aqiaqi otaqina ni'a venua'ivinea weaqida, be yaqisa taudi be ita'a maega kana vetunutunuqa otaqa Yaubada ena nuanua 'idewana.

\* 11:29: 'Ifo 14:21-31 \* 11:30: Ios 6:12-21 \* 11:31: Ios 2:1-21; 6:21-25; Iem 2:25 \* 11:32: Toluv 6:11-8:32; 4:6-5:31; 13:2-16:31; 11:1-12:7; 1Sam 1:1-1Kin 2:11 \* 11:32: Gidioni "Gideon" Yaubada venua'ivinea vonigo me Isileli na'etoyavuidi adi aviayavo 'idiega. Ta Gidioni venuana magilafu, ta Yaubada 'ebe'ita taha taha 'idiega ve'itea be navetovamatana. 'Inega toluavia 'evisa dimo maega adi aviayavo ivewaiwai va'inedi. (Toluv da'a 6, 7 be 8) † 11:32: Balaki "Barak" tauna lova me Isileli toluavia adi tovatatana taha, ta vamatantedi avia ana tuta 'inaya, ta adi aviayavo iluvegwamumuidi. (Toluv da'a 4 be 5.) ‡ 11:32: Samisoni "Samson" tauna 'oloto tovevawai otaqa ta me Diu adi tovanugweta qiduana. Ta waiwai nana 'iuna mana Yaubada inana vonedi be natudi debana ge ina da'ei, ta vona nana imatayagea. (Toluv da'a 13-16) § 11:32: Iefeta "Jephthah" tauna toluavia qiduana, ta 'abiboda vetoluvine me Isileli 'idia. (Toluv da'a 11) \* 11:33: Dan 6:1-27 \* 11:34: Dan 3:23-27 \* 11:35: 1Kin 17:17-24; 2Kin 4:25-37 \* 11:36: 1Kin 22:26-27; Iel 20:2; 37:15; 38:6 \* 11:37: 2Yani 24:21

## 12

*Yaubada ena luvematasabu* 'inega tomotau givetunutunuqidi

<sup>1</sup>\* Omo'e tovetumaqana diavona qabudi itoavivilida ta ivevekoveda ta iveve'ebe'ita 'idaya vetumaqana ana 'eda'eda weaqina. 'Inega luaqiaqieda be yani qabuna igigiveviteda kana 'ewa yavuledi, ta wese ilivu luveifana iyoqoyoqonida kana nogedi, ta bibitaqoyega kana vihila tunutunuqa eda 'ebelua'u 'inaya, tauna 'ebelua'u nana Yaubada ni'a madua'uya weaqida. <sup>2</sup>'Inegana luaqiaqieda be Iesu ana 'aideganamo 'inaya kana 'ita'ita, mana tauna eda vetumaqana ana 'ebeve'ale be ana 'ebelua'ovoa. Iesu tuta nana bwa'obwa'oya toatoa tuta qabuna vita lobe, ta ena viaqa ge dalua'u. Ta me ena bibitaqo taunega awafelea veilaqe 'inaya 'etoluia, ta ge dainiyauyau veilaqe nana weaqina, ta 'esi qaiawa, mana alamani aqiaqiea nawale toa vataya aqiaqina nalobe. 'Inega ba'itagana Iesu toatoa mahalaya Yaubada ena 'ebetoa kaikaiwabuna 'ataqinaya.

<sup>3</sup>'Inega ona nuaia Iesu, tauna tomotau luveifadi edi veilivu veifa 'inaya bibitaqodi, e 'inega omi'a wese me emi bibitaqo ona toatoa, ta emi vetumaqana ge ona givelua'ui. <sup>4</sup>Vonahaqiaqi, tuta qabuna ilivu luveifana ana toluline nuanuana ona awafelemi luveifana ana viaqa 'inaya, ta luveifa nana 'inega taumiega ovabodebodemi, 'inega 'aliga ana visiqqa nawale ge oda lutonovi.

<sup>5</sup>\* Ta ana 'ita be kavona omi'a Yaubada natunavo ena vona iula ni'au onuafania vonaya, "Natugu,

Kaiwabu ena gaihi 'iuya

ge una veyani kavokavovoyei,  
ta wese ena lugwae 'iuya ge una 'odolei,

<sup>6</sup>mana aiqabu Kaiwabu veveyolubedi  
e 'inega wese gaigaihidi,  
ta aiqabu 'awanatunedi  
e wese luluvematasabudi."

<sup>7</sup>\* 'Inega Yaubada ena luvematasabu 'imia weaqina luaqiaqiemi be ona bibitaqodi, mana luvematasabu nana 'inega ona alamania vonigo omi'a natunavo. Ta 'eguma kana nuaia gogama weaqidi, vonahaqiaqi taudi tamadiavo iluluvematasabudi edi vetunutunuqa weaqina. <sup>8</sup>Yaubada natunavo qabudi luluvematasabudi, ta 'eguma omi'a ge wese naluvematasabumi, e 'inega ana 'ita kavona omi'a lu'eda gogamami ta wese omi'a ge natunavo. <sup>9</sup>Vonahaqiaqi, ita'a qabuda ma tamatamadavo bwa'obwa'o ba'e 'inaya igaihaihida ta ka'amayabedi, 'inega luaqiaqiea be me eda qaiawa kana awafeleda niboanida Tamadi mahalaya ena gaihi 'inaya, e 'inega mayawaida kana toa.

<sup>10</sup>Eda tuta gwama 'inaya tamadavo bwa'obwa'oya tuta kukusana namo 'inaya ilugaihida edi alamani ana 'etofwafwa 'inega. Ta 'esi Yaubada ena gaihi tuta qabuna aqiaqina be wese tunutunuqina ita'a weaqida, be yaqisa kana veilivu aqiaqi Yaubada ena ilivu gwalagwalana 'idewani. <sup>11</sup>\* Vonahaqiaqi, tuta nana luvematasabu kalobelobedi 'inega ge kada qaiawa weaqidi, ta 'esi kanuanuavita. Ta luvematasabu nana 'abibodanaya ana ve'ia vuaqa aqiaqina kana lobe 'idewani ilivu aqiaqina be toadaumwala.

<sup>12-13</sup>\* 'Inega emi dawalili ona nogei, ta 'esi emi vetumaqana ona kafi'i'ihia ta wese 'aqemi edi dedela 'inega ona tovoloi'ita! Ta "eda tunutunuqina 'inega ona tauya", be yaqisa taudi dawalilidi 'abibodamiega imaimai ge ina be'u ta 'esi ina vewaiwai.

*Yaubada ena vona kana noqola aqiaqiedi*

<sup>14</sup>Ona vetafe'wa waiwai be tomotau qabudi maega ona toadaumwala, ta wese ilivu vunavunaqina be gwalagwalana ona salia, mana tomotau bwavubwavudi ge adi fata Kaiwabu ina 'itei. <sup>15</sup>Emiavo maega taumiega ona 'itamaki aqiaqiemi be yaqisa ge taha toga 'imiega Yaubada ena nuakolokolo na'ita'avei. Ta wese ona 'itamakimi be yaqisa ge taha toga 'imiega naveilivu kavokavovo kavona tuva ena bada 'idewani, mana 'eguma

\* 12:1: 1Kol 9:24-25 \* 12:5: Vos 3:11-12; Iob 5:17; Ve 3:19 \* 12:7: Luve 8:5 \* 12:11: Iem 3:17-18 \* 12:12-13: Ais 35:3; Vos 4:26

'idewanina nawale qabumi ilivu nana nabademi. <sup>16</sup>\* Ta wese taumiega ona 'itamakimi be yaqisa ge taha toga 'imiega navelamo'eno kavokavovo. Ta wese ge taha toga 'imiega Iso 'aqena natalaqi, mana tauna Yaubada weaqina ge danuanua. Iso tauna Aisake ena 'unutau, 'inega luvibwainea be tamana ena 'ebeluvine ta wese ena kulufa qabuna da'ewedi da'abiluvinedi. Ta botana tomania 'inega 'ebeluvine nana ta wese kulufa diavona vegimwaneyedi taina 'inaya 'ai 'aidegana namo weaqina. <sup>17</sup>\* 'Abibodanaya Iso nuanuana vonigo tamana ena vona veyoluba da'ewea, ta ge ana fata mana tamana nogea. 'Inega Iso dou 'wayoqa tamana 'iawanaya, mana viaqa luveifana ni'a viaqia, ta ge ana fata viaqa nana nagiveaqiaqi 'eviviei.

<sup>18</sup>\* Omi'a ge taha tuta oda mai bwanaga Sainai 'inaya be matamia oda 'itei. Ta wese ge oda mai bwanaga nana 'inaya be 'aiwe saesaelina oda 'itei, ta wese ena velovelovana be ena lugawagawata be wese ena veyaqina ge oda 'itei. <sup>19-20</sup>\* Ta tuta nana ena luvineavo i'ewea, e 'inega wese bea butuna waiwaina bona taha maega inoqolia vonedia, "Eguma taha toga nage taha yubai bwanaga ba'e navatonovia, e 'inega luaqiaqiea be daboyega ona luve'aligia." Ta tuta nana me Isileli Yaubada ena vona ba'e inoqolia 'inega inoqiea vonigo nalua'u, mana ena vona ge nuanuadi wese ina noqola 'eviviei. <sup>21</sup>\* Vonahaqiaqi, yani diavona i'ifoqe me Isileli 'iawadia i'itedi ta imwaniniva, ta wese Mosese giwalina a'ala 'inega vonaya, "Ya'a yamwaniniva ta yadededela."

<sup>22</sup> Omi'a ge oda mai bwanaga Sainai 'inaya, ta 'esi omai bwanaga Saioni 'inaya, Yaubada mayawaina ena 'abaga qiduana 'inaya. Omo'e 'abaga nana mahala ana Ielusalema. Ta wese omai va'auta qiduana 'inaya Yaubada ena tovale'ewayavo qabu va'inedi me edi qaiawa 'idia. <sup>23</sup> Ta wese omi'a ni'a omai Yaubada ena tomotauyavo vevenua'ivinidi 'idia edi toava'auta qaiqaiawina 'inaya, taudi adi wawayavo 'waya'wayavina mahalaya. Ta wese omai Yaubada 'inaya, tauna tomotau qabuda ada Toluvine. Ta wese omai tomotau aqiaqidi niboanidi Yaubada ni'a givetunuqidi 'idia. <sup>24</sup>\* Ta wese omai leisu 'inaya, tauna luvine vauvauna ana Tonei ta tovtovolo tomotau be Yaubada nuanidia. Ta wese omai leisu sulalina ana luitaitala 'inaya. Ba'e sulali nana 'inega nuataqo be yani qabuna aqiaqidi kana lobedi, ta ge Eibolo sulalina 'idewani, mana sulalina tuana ana luvematasabu weaqina gabagaba.

<sup>25</sup>\* 'Inega ona 'itamaki aqiaqiemi, be tauna mahalega vonavona 'idaya ena vona ge ona nogei. Lova me Isileli Mosese ena lugaihi 'idia inogea e 'inega vita ilobea. Ta ba'itagana Yaubada mahalega lulugaihi 'idaya, 'inega vonahaqiaqi, 'eguma ena vona kana lugwavu'aiea, nawale vita qidua va'inena kana lobea. <sup>26</sup>\* Tuta nana Yaubada vonavona bwanaga Sainaiega, 'inega bonana ena waiwaiega bwa'obwa'o qabuna veni'i. Ta ba'itagana taha wese vona fofofola viaqia vonaya, "Nawale taha tuta 'inaya bwa'obwa'o ena veni'i 'eviviea, ta ge bwa'obwa'o namo ena veni'ia, ta 'esi mahala maega." <sup>27</sup> Vona nana ana alamani ba'e 'idewani: Tuta maimai 'inaya kuyavata qabudi bwa'obwa'oya ina veni'i. Ta vaina yani ge adi fata ina veni'i, e ba'e yani diavona ina 'eno vataya.

<sup>28</sup> 'Inegana luaqiaqiea be me eda lukaiwa kana toatoa, mana eda 'Ebeluvine ni'a ka'ewea Yaubada 'inega ge wese ana fata naveni'i. Ta wese luaqiaqieda be Yaubada kana giveqaiawea eda awatubo 'amayabega ta wese mwaninivega, <sup>29</sup>\* "mana eda Yaubada tauna kavona 'aiwe saesaelina", 'inega ana fata naluvegwamumuida.

## 13

### *Ilivu aqiaqina weaqina*

<sup>1</sup> Tuta qabuna taumiega ma emiavo ona veveyolubemi, mana omi'a Keliso ena qabuyavo. <sup>2</sup>\* Ta ge ona venuafanidi wagawagayavo. Taudi wese ona 'ebe'ewedi

\* 12:16: Nug 25:29-34 \* 12:17: Nug 27:30-40 \* 12:18: 'Ifo 19:16-20; Luve 4:11-12 \* 12:19-20: 'Ifo 20:18-21; Luve 5:22-27; 'Ifo 19:12-13 \* 12:21: Luve 9:19 \* 12:24: Ibe 8:6; Nug 4:10 \* 12:25: Ibe 2:1-3; 10:26-29 \* 12:26: Aga 2:6 \* 12:29: Luve 4:24; 9:3 \* 13:2: Lom 12:13; Nug 18:1-8; 19:1-3

emi vanuea, mana ba'e ilivu nana 'inega tonivanue vaidi Yaubada ena tovale'ewayavo ihiuledi, ta ge ida alamanua vonigo wagawaga diavona taudi Yaubada 'inega i'ifoqe. <sup>3</sup> Ta wese emiavo yoqoyoqonidi vanue 'ebeyoqona gamonaya itoatoa ona nuaidi kavonaya omi'a taudi maega oda toatoa. Ta wese emiavo tomotau iveilivu veifedi ona nuaidi kavonaya omi'a wese 'idewani ida veilivu veifemi.

<sup>4</sup>\* Vaqi ana luvine qabumi ona 'amayabea. 'Inega omi'a vaqivaqimi ge ona velamo'eno kavokavovo, mana nawale taudi tovelamo'eno kavokavovo be toluabuyavo Yaubada naluvematasabudi.

<sup>5</sup>\* Mane ge nuami na'ewei, ta 'esi tola'ai ni'au olobedi ona qaiawa weaqidi, mana Yaubada ni'au vonaya,

“Ge taha tuta ena venuafanimi  
ta ge wese ena nogenogemi.”

<sup>6</sup>\* 'Inegana me eda giwalifatu aqiaqi kana vonaya,

“Kaiwabu tauna agu toiula!

Ge taha yani weaqina ena mwaniniva.

Ta tomotau ge taha tola'ai adi fata  
ina viaqi 'iguya.”

<sup>7</sup>\* Ami tovanugwetayavo ona nuave'avinidi, mana taudi lova Yaubada ena vona imaduve'itayea 'imia. 'Inega edi ilivu aqiaqina vuaqina weaqina ona nuanua, ta ilivu diavona ona vetutumedi. <sup>8</sup> Iesu Keliso ge taha tuta davedumaduma. Tauna lova be ba'itagana ta wese tuta vataya 'inaya 'aidegana. <sup>9</sup>\* 'Inega ge wese mali ve'ita be mali ve'ita nuami ina sinaqonaqoyei. Ta 'esi tuta qabuna niboaniami ina vewaiwai Yaubada ena nuakolokolo 'inega, ta ge 'abwaga ana luvineavo 'idiega, mana ba'e luvine diavona ge taha adi aqiaqimo niboaniami 'idia.

<sup>10</sup> Ita'a me eda 'ebeveguba, ta 'ebeveguba nana 'inega Vanue Gwalagwalana bwa'obwa'oya ana tovegubayavo ge daluaqiaqiedi be ina 'ai. <sup>11</sup>\* Me Diu edi ilivu 'inega toveguba edi tovanugweta yubai sulalinamo luguyea Sifaufa Gwalagwala Otaqina gamonaya be tomotau edi luveifana weaqidi veguba. Ta yubai nana gabu yavulea 'abaga gwalagwalana ana 'ali gwavunaya. <sup>12</sup>\* Ta wese Iesu 'idewana, mana tauna 'aliga visiqina vebaea Ielusalema ana 'ali gwavunaya, ta ba'e 'inega ita'a tomotau givegwaleda sulalinea. <sup>13</sup>\* 'Inega ita'a wese luaqiaqieda be toa aqiaqina ana 'abaga kana nogei ta kana tauya Iesu 'inaya 'ali gwavuya be ena 'aliga 'etoluai 'inaya iniyauyauna kana vebaea tauna 'idewana. <sup>14</sup>\* Mana bwa'obwa'o ba'e gebu eda 'abaga aqiaqi, 'inega ita'a kavonaya wagawaga. Ta 'esi kalulu'ita vane eda 'abaga toatoa vatayana mahalaya weaqina, tauna nawale na'ifoqe namai.

<sup>15</sup>\* 'Inegana Iesu ana wawega Yaubada kana awahawatuboya, ta tuta qabuna kana gigivaneqea, mana ba'e awatubo nana ita'a eda guba aqiaqi otaqina 'inaya. <sup>16</sup>\* Viaqa aqiaqi otaqidi ge wese ona nuafanidi, ta emi kulufayavo 'idiega mali tomotau ona iuledi, mana ba'e ilivu nana kavona guba Yaubada 'inaya, ta guba nana weaqina qaiqaiawa.

<sup>17</sup>\* Ami tovanugwetayavo ona vematamatayagedi, ta tola'ai ivonevonemi e ona vi-aqidi, mana tovanugweta diavona niboaniami i'ita'itamakidi, be nawale vetala'ai qiduana ana 'aubena 'inaya ina tovolu Yaubada matanaya ta edi vanugweta weaqina ina simana 'ifoqe 'inaya. 'Inegana omi'a luaqiaqiemu be ami tovanugweta diavona edi fewa ona givemaqania be yaqisa me edi qaiawa ina fewafewa, ta edi fewa ge ona givevitei. Mana 'eguma edi fewa ona givevitedi, e 'inega omi'a wese nawale ge taha tola'ai aqiaqina ona lobei Yaubada 'inega tuta nana navetala'aiedi ta ina simana 'ifoqe weaqimi 'inaya.

\* 13:4: Efe 5:5      \* 13:5: Luve 31:6,8; Ios 1:5      \* 13:6: Same 118:6      \* 13:7: 1Kol 4:16      \* 13:9: Lom 14:17  
\* 13:11: Luvi 16:27      \* 13:12: Ion 19:17      \* 13:13: Ibe 12:2      \* 13:14: Ibe 11:10,16; 12:22      \* 13:15: Same  
50:14,23      \* 13:16: Fil 4:18      \* 13:17: 1Te 5:12

<sup>18</sup> \* Nuanuagu ona venoqi Yaubada 'inaya weaqima. Ta ni'a ahalamani aqiaqiea ge taha yani luveifana ada viaqi 'imia, 'inega Yaubada matanaya ama lutionova aqiaqina, be nuanuama qiduana tuta qabuna ilivu nana ana kafi'i'ihia. <sup>19</sup> Ta wese nuanuagu qiduana ona vevenoqi Yaubada 'inaya be yaqisa lukwayavonega ena 'evivi wai 'imia.

*Vona veyoluba*

<sup>20-21</sup> \* Yavevenoqi toadaumwala ana Yaubada 'inaya na'iva'ava'aimi yani qabuna aqiaqina 'idiega, be yaqisa ami fata ena nuanua ona viaqia. Ta wese yavevenoqi Yaubada 'inaya be Iesu Keliso ena waiwaiega ilivu aqiaqidi vuaqina ina 'ifoqe 'idega, mana ba'e yani diavona ena 'ebeqaiawa. Yaubada eda Kaiwabu Iesu giveya'itoto 'eviviea 'aligega. Tauna to'itamaki sifi aqiaqi otaqina, ta sulalinega Yaubada ena vona fofofola vauvauna 'eno'eno vatayana viaqia weaqida. 'Inega Iesu Keliso kana awahawatuboya tuta vataya 'inaya. Vonahaqiaqi, eda nuanua 'idewani.

<sup>22</sup> Egwavo ye, ba'e emi leta ya'wayavia ami givewaiwai weaqina, ta yanoqinoqiemmi be yani diavona ni'a yasimanedi ona noqola aqiaqiedi ta ona 'abibodedi.

<sup>23</sup> Nuanuagu wese ona alamania iada Timoti vanue 'ebeyoqona 'inega yavua ni'a lobe, ta 'eguma nalukwayavoni namai ba'idiana, e nawale ya'a maega ana wai 'imia.

<sup>24</sup> Ema veyoluba yavetunea waiwai ami tovanugwetayavo be wese Yaubada ena tomotauyavo qabumi 'imia. Ta wese tovetumaqana me Itali edi veyoluba ivetunea 'imia.

<sup>25</sup> Yaubada ena veyoluba qabumi 'imia.

---

\* 13:18: Via 24:16; 2Kol 1:12      \* 13:20-21: Iel 32:40; Isi 37:26; 1Fit 2:25

## Iemesa ena leta

### *Leta ana alamani weaqina*

Iemesa tauna Iesu taina, ta totafwalolo Ielusalema 'inaya edi tovanugweta 'ena'ina. Tauna leta ba'e 'wayavia Iesu ana tovetumaqanayavo qabudi di'we taha taha 'idia itoatoa weaqidi. Nuanuana nave'itedi 'eguma Iesu weaqina toa vitana nage 'ebesitonova ilobelobedi ina qaiawa, mana ba'e vita diavona 'idiega edi vetumaqana navewaiwai. Ta ge vetumaqana namo weaqina dave'itedi, ta 'esi edi ilivu wese navetunutunuqa, 'inega Iemesa vonedi Yaubada ena vona ge ina noqoliamo, ta 'esi vona diavona wese ina viaqidi. 'Inega lukwalukwadi ina iuledi ta ge vekaikaiwabu nuadi na'ewei, mana nawale tovekaikaiwabu edi kaikaiwabu nahawala, ta edi ilivu luveifana weaqina Yaubada naluvematasabudi. Ta wese tovetumaqana dina ve'itedi ilivu aqiaqidi adi viaqia weaqidi, be wese vetumaqana weaqina vona sesebaiega ve'itedi.

### *Leta gamona*

1:1 Lukaiwa

1:2-8 Vetumaqana ta alamani qiduana

1:9-11 Lukwalukwadi be tovekaikaiwabu

1:12-18 Sitonova weaqina

1:19-27 Noqola ta viaqa

2:1-13 Vona waiwaina ve'idi'idi weaqina

2:14-26 Vetumaqana be viaqa

3:1-18 Tovetumaqana ta meana

4:1-5:20 Tovetumaqana edi ilivu

<sup>1</sup>\* Ya'a Iemesa Yaubada ta wese eda Kaiwabu Iesu Keliso edi tofewa kavovo. Ba'e emi leta ya wayavia waiwai omi'a gade tuwelo 'imia ni'a owegawaga di'we 'aidega 'aidega 'idia. Kaiwa qiduana 'imia.

### *Sitonova be alamani ta wese vetumaqana*

<sup>2</sup>\* Egwavo, ona qaiawa tuta nana sitonova vitadi oobelobedi, <sup>3</sup>\* mana ni'a oalamaniana 'eguma emi vetumaqana ona kafi'i'ihia sitonova nana 'inaya, e 'inega wese bibitaqo ilivuna ana fata nave'ena'i 'imia ta emi vetumaqana nagivewaiwaiea. <sup>4</sup> 'Inega emi bibitaqo wese tuta maimai 'inaya na'eno'eno, mana ilivu nana 'inega emi vetumaqana navefalafala. Ta ba'e 'inega ge taha wese 'ebedawalili 'imiega na'ifoqe.

<sup>5</sup>\* Ta 'eguma taha toga 'imiega alamani qiduana ge da'eno'eno 'inaya Yaubada ena nuanua adi viaqa weaqina, e 'inega navenoqi 'inaya ta alamani nana naneaia, mana Yaubada qaiqaiawa tuta nana kavevenoqi 'inaya, ta eu venoqi weaqidi ge wese navegagala. <sup>6</sup> Ta tomeqabu ivevenoqi Yaubada 'inaya ge ina venuana magilafu venoqi nana ana ve'ia weaqina, ta 'esi ina vetumaqana waiwai be Yaubada 'inega ve'ia ina lobeia, mana tomeqabu ivenuana magilafu taudi kavona nufula malavetaya yaqina 'alu'alua dadanedi. <sup>7</sup> Mana 'eguma taha toga navenuana magilafu eda Kaiwabu ena nei ana fata weaqina, e 'inega tomotau nana ge taha wese yani weaqina naba'eba'e be vonigo Kaiwabu 'inega nalobei. <sup>8</sup> Vonahaqiaqi, ba'e tovenuana magilafudina edi viaqayavo qabuna 'idia inidonidoa, mana ge adi fata be edi vetumaqana ina a'u aqiaqiei Yaubada 'inaya, e 'inega inuanua nage ina venoqi 'inaya nage gebu.

### *Tovekaikaiwabu be lukwalukwadi*

<sup>9</sup> Eguma tovetumaqana taha ana wawa goyona, ta tua luaqiaqiea be naqaiawa, mana Yaubada ni'a givaneqea. <sup>10</sup>\* Ta wese 'ekalesia gamonaya taha tovekaikaiwabu luaqiaqiea be naqaiawa, mana Yaubada tovekaikaiwabu nana ni'a a'uwebuiea ena kaikaiwabu 'idiega. Vonahaqiaqi, tovekaikaiwabu nawale ina awala kavona libi ididi, <sup>11</sup> mana ni'a

\* 1:1: Md 13:55; Gal 1:19; Via 15:13; 1Fit 1:1 \* 1:2: Lom 5:3-5 \* 1:3: 1Fit 1:7 \* 1:5: Vos 2:3-6 \* 1:10: Ais 40:6-7



kahalamaniana tuta nana baba'au nayayaqa navane 'inega ena 'weava waiwainega libi ididi ina mwatuqu ta ina avuta, ta wese adi vaiqavu ana 'ita aqiaqina nahawala. Ta wese 'idewana tovekaikaiwabu, mana ivetafe'wa waiwai edi kulufa kaikaiwabudi adi 'ewa weaqina, ta viaqa nana gamonaya ina 'aliga, e 'inega edi vetafe'wa kavona yani kavokavovo.

### *Sitonova weaqina*

<sup>12</sup> Tomeqabu sitonova qabudi ilobelobedi ta ibibitaqodi e ina qaiawa, mana adi ve'ia nawale Yaubada 'inega yawai vataya ina lobe. Ba'e Yaubada ena vona fofofola taudi ana toveyoluba weaqidi. <sup>13</sup> Ta tutana sitonova 'aidega 'aidega olobelobedi 'inega ge ona vonaya, "Ba'e sitonova nana Yaubada 'inega mai." Vonahaqiaqi, ge 'idewani ona vona 'aiqa, mana Yaubada ge taha tuta sitonova dalobea luveifana ana viaqa weaqina. Ta wese 'idewani Yaubada ge taha tuta tomotau dasitonovidi luveifana ana viaqa 'inaya. <sup>14</sup> Ta 'esi tuta nana sitonova na'ifoqe 'idaya ilivu luveifana ana viaqa weaqina, 'inega tauda eda nuanua govaqa 'inega 'ifo'ifoqe, ta ba'e nuanua nana lihilihida. <sup>15</sup> Ta ba'e nuanua nana veve'ena'i e 'inega luveifa nana kaviaviaqia, ta luveifa nana vuaqina 'aliga. <sup>16</sup> 'Inega egwavo, ona 'itamaki aqiaqiemu be yaqisa ge taumiega ona u'avemi.

<sup>17</sup> Ta ona nuave'avinia, nei kavovo qabudi ta wese veyoluba aqiaqi otaqidi qabudi mahalega imaimai Yaubada 'inega, tauna mahala ana simatala qabudi adi To'iva'ava'ata. Ta Yaubada ge taha tuta davedumaduma be vaina tuta dasimatala be vaina tuta davelovanea, ta 'esi ana 'ita 'aidegana 'eno'eno vatayana. <sup>18</sup> \* 'Inega tauna ena nuenuega toa vauvauna be aqiaqina neida tuta nana leisu Valena ana vonahaqiaqi kave'ale kavetumaqanea. Ta ba'e 'inega ena 'iva'ava'ata qabudi 'idiega venua'ivineda natunavo aqiaqi otaqida, ta 'abiboda kuyavata qabudi.

### *Vona ana noqola be ana viaqa*

<sup>19</sup> Egwavo, vona ana noqola yani aqiaqi otaqina, ta 'abiboda veqae. 'Inega ge ona maduveqae, ta 'esi luaqiaqiemu be tomotau edi vona ona vineneqa aqiaqiedi, ta 'abiboda ona veqae. Ta wese ge lukwayavonega diami navilei, <sup>20</sup> \* mana tomotau adi diavilavila ge dave'ebeiuila 'idia edi 'abiboda Yaubada ena nuanua ana viaqa weaqina. <sup>21</sup> \* 'Inega emi ilivu be emi nuanua bwavubwavudi ona nogedi, ta 'esi emi ilivu nuvana 'inega Yaubada ena vona lova giwalimia 'wadia ona 'awahaqiaqiea, mana ba'e vona nana ana fata na'etoyavuumi.

<sup>22</sup> \* Ta vona nana ge ona noqoliamo, mana 'eguma ona noqolia ta ge ona 'abibodei be ona viaqi, e 'inega kavona taumiega ou'au'avemi. <sup>23</sup> Vonahaqiaqi, 'eguma taha toga vona nana nanoqolia ta ge naviaqidi, 'inega tauna kavona taha 'oloto gelasi 'inaya 'iawana 'ite'itea. <sup>24</sup> 'Itea gumwala 'abo tauya, ta tuta kukusana 'inaya 'iawana ana 'ita ni'a nuafania. <sup>25</sup> \* Yaubada ena luvine aqiaqi otaqinega eda luveifana qabudi 'ewa yavuledi, ta tomeqabu luvine nana i'ita aqiaqiea ta ge ida nuafania ta 'esi iviaviaqia, e ba'e tomotau diavona me edi qaiawa ina toatoa, mana nawale Yaubada navona veyolubedi vona nana ana 'abiboda weaqina.

<sup>26</sup> \* Ta 'eguma taha toga navona be tauna totafwalolo aqiaqi, ta ge ana fata meana naluvinei, e 'inega tomotau nana taunega u'au'avea, ta ena tafwalolo yani kavokavovo, mana ena tafwalolo 'inega ge ana fata 'etoyavua nalobei. <sup>27</sup> Ta 'esi 'eguma totafwalolo taha me ena vetumaqana aqiaqi, 'inega tauna luaqiaqiea be gogama fovafovadi be wese vivine wadawada'edi adi vitayavo 'idiega naiuledi. Ta wese ana fata taunega na'etobodea bwa'obwa'o ana ilivu luveifadi 'idiega, e 'inega ilivu diavona ge adi fata be ina vaikamana 'inaya. Vonahaqiaqi, ba'e vetumaqana nana vuaqina weaqina Yaubada Tamada 'awahaqiaqiea ta qaiqaiawa.

\* 1:18: Ion 1:13 \* 1:20: Tolug 7:9 \* 1:21: Kol 3:8; 1Fit 2:1 \* 1:22: Md 7:26; Lom 2:13 \* 1:25: Lom 8:2; Iem 2:12 \* 1:26: Same 141:3

## 2

*Tomotau qabudi kana veilivu aqiaqiedi nuanua 'aideganega*

<sup>1</sup>\* Egwavo, 'eguma omi'a eda Kaiwabu Iesu Keliso aqiaqi otaqina ana tovetu-maqanayavo, 'inega ge wese vaina tomotau ona veilivu veifedi, ta vaina ona veilivu aqiaqiedi. <sup>2</sup> 'Ebevetalatutula ba'e ona noqolia: Tomotau magilafudi ilugulugu emi vanue tafwalolo 'inaya, ta taha 'idiega tovekaikaiwabu ana bagi viaviaqina goula 'inega ta ana kaleko adi 'ita aqiaqina, ta vemagilafuna tauna lukwalukwana ta ana kaleko bwavubwavudi. <sup>3</sup> 'Inega 'eguma tauna ana kaleko adi 'ita aqiaqina ona 'amayabea ta ona voneaya, "Kaiwabu, o'a 'ebetoa aqiaqina 'inaya una toabui." Ta lukwalukwana nawale ona voneaya, "O'a omo'e 'inaya una tovolu nage sitaya una toabui." <sup>4</sup> Vonahaqiaqi, 'eguma tomotau ge nuanua 'aideganega be ilivu 'aideganega ona veilivu 'idia, e 'inega omi'a yani luveifana oviaviaqia, waisa?

<sup>5</sup>\* Egwavo, egu vona ba'e ona noqolia. Yaubada tomotau lukwalukwadi bwa'obwa'oya venna 'ivinedi, be edi vetumaqana waiwaina 'inega nawale na'ebe'ewedi ina lugu ena 'Ebeluvine 'inaya, mana Yaubada 'Ebeluvine nana vona fofofolayea ana toveyolubayavo weaqidi. <sup>6</sup> Omi'a tuta qabuna tomotau lukwalukwadi o'awa'awa webuiedi. Ta ona nu-ave'avinia, tomeqabu vita ineineimi, lukwalukwadi nage tovekaikaiwabu? Vonahaqiaqi, taudi tovekaikaiwabu vita taha taha ineineimi, ta wese dibu'i'imega itautayemi toluvine matadia sabi vekotumi. <sup>7</sup> Omi'a Iesu Keliso ena tomotauyavo, ta tovekaikaiwabu Iesu ana wawa aqiaqina i'awa'awa luveifea.

<sup>8</sup>\* Yaubada nuanuana taha luvine Buki Nugwenugweina 'inega kana 'abibodea vonaya, "Emwavo una veyolubedi 'edewana tau'u uveveyolubeu." Mana ba'e luvine nana luvine qabudi veqidua va'inedi. <sup>9</sup>\* Ta 'eguma vaina tomotau oveilivu aqiaqiedi ta vaina gebu, 'inega luvine nana ni'a oqeunia ta Yaubada matanaya luveifana oviaqia. <sup>10</sup>\* Ta 'eguma taha toga luvine qabuna kafi'ihidi, ta 'aideganamo naqeunia, e 'inega kavona wese luvine qabudi ni'a qeunidi. <sup>11</sup>\* Mana Yaubada nana vonaya, "Ge ona luabu!" Ta tauna wese vonaya, "Ge ona luve'aliga!" Ta 'eguma ona luabu ta ge ona luve'aliga, e bena'e 'inega ena luvine qabudi ni'a oqeunidi.

<sup>12</sup>\* Ita'a qabuda Yaubada ena 'aubena vetala'ai 'inaya navenuanuayeda eda vona be wese eda viaqa qabuna 'idiega. Ta tomeqabu Yaubada ena luvine ibwegea taudi luvematasabu ina lobe, ta tomeqabu ena luvine i'abibodea taudi na'etoyavuidi, mana eda vonayavo be eda viaqayavo 'idiega toa yavuyavuina kana lobe. 'Inega emi vona be emi viaqa qabudi weaqidi ona nuanua aqiaqi, mana nawale 'aubena nana 'inaya Yaubada ena luvine ana to'abibodayavo ena veyolubega navona yavuidi. <sup>13</sup>\* Mana 'eguma taha toga tomotau ge nanuakolokoloyedi 'inega Yaubada wese 'idewana 'oloto nana ge nanuakolokoloyei vetala'ai ana 'aubena 'inaya. Ta 'esi 'eguma taha toga tomotau nuakolokoloyedi e 'inega Yaubada tomotau nana wese nanuakolokoloyea 'aubena nana 'inaya.

*Vetumaqana viaqa maega*

<sup>14</sup> Egwavo, tola'ai ana aqiaqi 'eguma taha toga navonaya, "Ya'a me egu vetumaqana", ta ena vetumaqana 'inega ge taha vuaqa aqiaqina da'ifoqe? Vonahaqiaqi, ba'e vetu-maqana nana 'inega ge ana fata 'etoyavua nalobei. <sup>15</sup>\* 'Ebevetalatutula ba'e ona 'itea: Ma'oda 'eguma taimiavo nage novumiavo emi 'ekalesia gamonega taudi ge adi kalekomo ta wese ge adi 'abwagamo, <sup>16</sup> ta ona vonedia, "Yaubada ena nuadaumwala 'imia, ta ona 'ai aqiaqi ta ona vekaleko." Ta 'eguma ge kana iuledi ba'e yani diavona 'idiega, e 'inega eda vona nana tola'ai ana aqiaqi? <sup>17</sup> Ta wese 'idewana vetumaqana weaqina, mana 'eguma vetumaqana namo ta ge ana viaqamo, 'inega vetumaqana nana kavona 'ali'aligina.

\* 2:1: Via 10:34; Iem 2:9 \* 2:5: 1Kol 1:26-28 \* 2:8: Md 19:19; Gal 5:14 \* 2:9: Luve 1:17 \* 2:10: Luvi 19:37; Naba 20:7-12,24; Md 5:19 \* 2:11: 'Ifo 20:13-14; Lom 13:9 \* 2:12: Gal 6:2; Iem 1:25; 1Fit 2:16 \* 2:13: Md 5:7; 18:32-35 \* 2:15: 1Ion 3:17

<sup>18</sup> \* Nage taha toga 'imiega ena nuanua dumadumana ta navonaya, "Taha toga me ena vetumaqana, ta wese taha toga viaqa aqiaqina ana toviaqa." E 'inega ena voneaya, "Eguma taha tomotau ena vetumaqana 'inega gebu viaqa aqiaqina da'ifo'ifoqe, 'inega ya'a ma'oda ena vetumaqana ena alamani 'aipei?" Ta ya'a egu vetumaqana yaveve'ita 'ifoqeyea egu viaqa aqiaqidi 'inega. <sup>19</sup> O'a uvetumaqana uvonaya, "Yaubada 'aidega otaqina toatoa!" E bena'e vonahaqiaqi, ta ge una nuafania niboana luveifadi taudi wese 'idewana edi vetumaqana, ta me edi mwaniniva itatatava matanaya. <sup>20</sup> O'a kwavakwavau! Yavona aqiaqieu, ana 'ita nawale nuau ge da'eqa'uya, mana 'eguma uvetumaqana namo ta viaqa aqiaqina ge una viaviaqidi, 'inega eu vetumaqana yani kavokavovo.

<sup>21</sup> \* 'Ebevetalatutula ba'e ona noqolia: Tubuda Ebelamo ena viaqa tunutunuqina Yaubada 'itea 'inega 'awahaqiaqiea, mana natuna Aisake awafelea vonigo dagubayea Yaubada 'inaya. <sup>22</sup> \* Ba'e 'inega una alamania Ebelamo ena vetumaqana be ena viaqa ive'aidega, ta ena viaqa aqiaqina 'inega ena vetumaqana ve'ifoqeyea. <sup>23</sup> \* 'Inega Buki Nugwenugweina ena simana ana aqiaqi 'ifoqe vonaya, "Ebelamo Yaubada vetumaqanea, ta ena vetumaqana 'inega Yaubada 'awatunutunuqea." Ta wese 'awaianea, <sup>24</sup> 'inega kana alamani aqiaqiea Yaubada tomotau na'awahaqiaqieda eda viaqa aqiaqidi 'idiega ta ge eda vetumaqana namo 'inega.

<sup>25</sup> \* 'Ebevetalatutula taha wese kana 'itea: 'Abaga Ieliko 'inaya lova taha vavine tokodada ana wawa Leabi toatoa. Vavine nana Iosua ena tolufonufonu magilafudi iuledi ta ena vanuea a'ukwaivedi fole ida veilaqe, ta 'abiboda vetunedi i'evivi mali 'edega. Ta ba'e viaqa nana 'inega Yaubada vavine nana 'awahaqiaqiea.

<sup>26</sup> Ta wese kana nuaia 'wafida weaqina, mana 'eguma niboanida gebu 'inaya datoatoa e 'inega 'wafi nana kavona 'ali'aligina. Ta wese 'idewana eda vetumaqana weaqina, mana 'eguma vetumaqana 'inega viaqa aqiaqina ge na'ifoqe e 'inega kavona vetumaqana nana 'ali'aligina.

### 3

#### *Meada kana* 'itamakidi

<sup>1</sup> Egwavo, 'evisa mimo ona vetove'ita Yaubada ena vona weaqina 'ekalesia gamonaya, mana ve'ita veyoveyoa taha qiduana. Ni'a kalamania nawale vetala'ai ana 'aubena 'inaya Yaubada tomotau qabuda naluvineda eda vona be eda viaqa 'idiega. Ta Yaubada tove'ita qabudi edi fewa 'inaya vevekova aqiaqiedi, ta ve'ita nana 'inega ena nuanua tunutunuqina 'inega naluvinedi. <sup>2</sup> Vonahaqiaqi, qabuda luveifana kaviaviaqia, ta 'eguma taha toga meanega ge taha vona luveifana da'ifo'ifoqe, e 'inega tauna 'oloto tunutunuqina ta ana fata 'wafina qabuna naluvinea.

<sup>3</sup> 'Ebevetalatutula taha kana 'itea yubai osi weaqidi, mana osi adi 'ebegivetunuqa ana kainumu ma wayona 'awadia kana a'uya. Ta vonahaqiaqi, kainumu nana yani goyona, ta yubai nana qiduana, ta tua ana fata kainumu nana 'inega kana sivetunuqi to'edia natauya.

<sup>4</sup> Taha wese 'ebevetalatutula kana nuaia: Waga yani qiduana ta ana fwaloa yani goyosikwana. Ta ma'inaya tofwaloa nuanuana natauya, e fwaloa nana 'inega nagivetunuqi natauya. Ta wese 'eguma yaqina nage nufula qiduana navunuvunuqa ana fata fwaloa nana 'inega nagivetunuqi natauya. <sup>5</sup> 'Idewana wese meada yani goyona du'uda qabudi 'idiega, ta ana fata tomotau nagiveluveifa otaqidi ena vonavane 'inega.

Ta wese 'idewani 'aiwe saesaelina meana goyona 'inega kiweli kana tuinia, ta ana fata kiweli qiduana na'ala 'ovoia. <sup>6</sup> \* Meada kavona 'aiwe saesaelina goyona, ta ena luveifana ana waiwai 'inega ana fata eda toa qabuna nagiveluveifea. Meada nana ena ilivu luveifana veveukamea du'uda qabuna 'idia. E 'inega ena 'ebeve'ale kavona 'aiwe saesaelina goyona 'abaga 'ala'alata vatayana 'inega 'ifo'ifoqe.

\* 2:18: Gal 5:6 \* 2:21: Nug 22:9-12 \* 2:22: Ibe 11:17-18 \* 2:23: Nug 15:6; 2Yani 20:7; Ais 41:8 \* 2:25: Ios 2:1-21; Ibe 11:31 \* 3:6: Md 12:36-37; 15:11,18-19

<sup>7</sup> Ita'a tomotau ada fata vaina yubai kana 'ivegumegumeidi taudi 'idewana bawe waqiwaqi be, manu be, yubai kawakawalidi, ta wese mwade'wa ana yubaiavo kana 'ewedi kana 'itamakidi 'inega kana luvinedi. <sup>8</sup> \* Ta meada ge taha toga ana fata na'ivegumegumei be naluvinei, mana tuva badabadana meada ni'a luveagatuna'ia, 'inega ana 'ivegumegumeta vitana. <sup>9</sup> Vonahaqiaqi, vaina tuta meadana 'inega Tamada eda Kaiwabu kahawahawatuboya, ta wese vaina tuta meadana 'inega tomotau Yaubada 'iva'ava'aidi tauna ana 'ita 'idewani kavonavona ve'alatedi. <sup>10</sup> 'Inega o'itei, meada 'aidega nana 'inega awatubo be wese vona ve'alata i'ifo'ifoqe. Egwavo, ba'e ilivu nana ana 'ita ge wese aqiaqina. <sup>11</sup> Ta kana nuaia salufa weaqina, mana salufa 'awana 'aidegana 'inega ge wese ana fata go'ila aqiaqina be go'ila badabadana 'aideganega ina 'ifoqe. <sup>12</sup> Egwavo, wese 'idewani 'aiwe vuaqidi, mana 'ala'ai 'inega ge ana fata mwakikoi vuaqina na'ifoqe, ta wese 'idewani naqo'ai ge ana fata 'ala'ai vuaqina 'inega na'ifoqe. Ta wese 'idewani ge ada fata be go'ila aqiaqina kana goinia salufa volavolana 'inega.

#### *Alamani Yaubada 'inega*

<sup>13</sup> Togama toalamani aqiaqi otaqina omi'a nuanimiega? Yavona aqiaqiemi, 'eguma taha toga 'imiega taunega navonaya, "Ya'a me egu alamani aqiaqi ta Yaubada ena nuanua yahalamani aqiaqiedi." E 'inega tauna ena ilivu nuvana 'inega ena vona ta wese ena viaqa qabudi 'idiega nave'ebe'ita aqiaqi tomotau qabudi 'idia ena alamani weaqina. Ta 'eguma ba'e 'edewani naviaqia, e 'inega tomotau nana toalamani aqiaqi otaqina! <sup>14</sup> Ta 'esi 'eguma taha toga ve'ifi'ifi giwalinaya 'eno'eno ta wese taunega ana wawa ena veqidua weaqina nuanua, e 'inega tomotau nana taunega veve'ita 'ifoqeyea ena vonavane ena alamani qiduana weaqina ge vonahaqiaqi, ta 'esi tauna tou'ava. <sup>15</sup> Vonahaqiaqi, ba'e ilivu diavona ge ida ve'aidega Yaubada ena alamani qiduana maega, ta 'esi i'ifo'ifoqe totoa bwa'obwa'o edi ilivu 'inega ta wese Seitani ena nuanua 'inega. <sup>16</sup> Mana 'eguma ve'ifi'ifi be nuavane ilivu diavona kana viaqidi nawale wese vevoalana na'ifoqe ta ilivu luveifadi taha taha wese kana viaqidi.

<sup>17</sup> Ta 'eguma taha toga ena alamani mahalega mai 'inega Yaubada ena venuaha'u 'inega ilivu aqiaqidi ta vunavunaqidi viaviaqia. Ba'e alamani nana 'inega ge wese vevoalana na'ifoqe, ta 'esi alamani nana 'inega kana veaqiaqi ta nuadaumwala be nuawebui 'inega edavo maega kana veiaiana aqiaqi. Ta wese ba'e alamani nana vuaqina 'inega edavo kana nuakolokoloyedi be maega kana veuiiula, ta wese edavo edi nuanua kana 'amayabea. Ta wese 'eguma taha toga toalamani aqiaqi 'inega ge taha u'ava 'inaya da'eno'eno, ta 'esi tauna tomotau qabudi ilivu 'aideganega veve'ilivu aqiaqiedi. <sup>18</sup> \* 'Eguma toadaumwala vewanina kana 'wadia 'ekalesia 'inaya e 'abibodanaya ilivu aqiaqidi be tunutunuqidi kana bolimania to'ekalesia 'idiega.

## 4

#### *Kana tauya Yaubada di'wenaya*

<sup>1</sup> \* Ma'oda 'inega ve'ae'aetoga be vedavi 'ifo'ifoqe nuanimia? Ana 'ita 'wafimi edi nuanua luveifana weaqina ge ami fata be taumiega ona 'abiluvinemi, ta 'esi oawahawafelemi 'idia ta iluviluviniemi, waisa? <sup>2</sup> Emiavo edi kulufa o'ite'itedi ta omi'a wese nuanuami yani diavona, ta ge ami fata ona 'ewedi, 'inega onuanua sabi luve'aligidi. Ta yani diavona weaqidi onuanua govaqa qiduana ta ge ami fata ona 'ewedi, e 'inega emiavo maega ove'ae'aetoga be ovevedavi sabi 'ewadi, ta nawale ge oda lobedi, mana ge oda venoqi Yaubada 'inaya yani diavona weaqidi. <sup>3</sup> Ta wese tuta nana ovevenoqi ge emi noqi adi ve'ia oda lobedi, mana ba'e emi nuanua be Yaubada ena nuanua ge ida ve'aidega, ta 'esi yani diavona weaqidi ovevenoqi bena'ena taumiega emi qaiawa weaqina.

<sup>4</sup> \* Omi'a kavona taha vavine moqanedi ida nogei ta mali 'oloto maega ivelamo'eno kavokavovo, mana omi'a Yaubada onogea ta bwa'obwa'o ana kulufa be ana ilivu luveifadi

\* 3:8: Lom 3:13 \* 3:18: Md 5:9; Ibe 12:11 \* 4:1: Lom 7:23 \* 4:4: Lom 8:7; IJon 2:15

nuami 'ewe. Ta ni'a oalamaniamomeqabu ba'e ilivu luveifa diavona iviaviaqia taudi Yaubada ivevoalanea. 'Inega wese tomeqabu bwa'obwa'o ana yaniavo nuadi 'ewe ge adi fata be Yaubada maega ina veiaiana. <sup>5</sup> Vonahaqiaqi, ba'e ilivu nana weaqina Buki Nugwenugweina simana vonaya,

“Niboana Gwalagwalana  
Yaubada a'uya 'idaya,  
'inegana 'eguma ita'a  
kana nogei ta kana vaukamana  
bwa'obwa'o ana qaiawa 'inaya,  
'inega Niboana nana nave'ifi'ifida.”

<sup>6</sup>\* Ta Yaubada nuanuana qiduana ena iula 'inega ba'e ilivu diavona kana nogedi, mana Buki Nugwenugweina ena simana vonaya,

“Yaubada tonuavane vevoalanedi  
ta 'esi tonuawebui nuakokoloyedi be iuiuledi.”

<sup>7</sup>\* 'Inega ona awafelemi Yaubada 'inaya. Ta Seitani ena nuanua ona nogea, 'inega tauna wese nanogemi ta nadena natauya. <sup>8</sup>\* Ta ona tauya Yaubada di'we otaqinaya, 'inega tauna wese namai di'wemia. Omi'a luveifana ana toviaqayavo nimami ona 'utudi, ta wese omi'a tovenuana magilafu giwalimi ona givevunavunaqidi. <sup>9</sup> Emi luveifana weaqina ona nuavita ta ona dou. Emi dagi ona givelua'uya, ta 'esi ona dou! Ta ge wese ona qaiawa, ta 'esi ona nuavita! <sup>10</sup>\* Ta ilivu nuvana 'inega ona iwa'odu Kaiwabu matanaya be 'inega tauna nagivaneqemi.

*Tomotau ge kana 'awaluveifedi*

<sup>11</sup> Egwavo, tovetumaqana emiavo ge ona 'awaluveifedi, mana 'eguma taha toga taina na'awaluveifea nage naluvinea e tauna Yaubada ena luvine veyani kavokavovoyea ta taunega luvine nana 'awa'awa luveifea. 'Inegana ge taha toga daluaqiaqiei be taunega Yaubada ena luvine naluvinei nage nahawagilei. Ta 'esi tomotau qabuda ada luaqiaqi be Yaubada ena luvineavo kana vematamatayagedi. <sup>12</sup>\* Yaubada ana 'aidega luvine ana Toviaqa be wese Toluvine Qiduana. Ta wese tauna ana 'aidega otaqa ana fata tomotau na'etoyavuidi nage naluve'aligidi. 'Inega omi'a ma'oda, nage luaqiaqiemibe emiavo ona 'awaluveifedi nage ona ve'ewedi? Gebu!

*Ge kana vonavane*

<sup>13</sup>\* Onoqola aqiaqiegu, mana vaina taumiega ogivaneqemi ovonaya, “Ba'itagana nage 'ibe kana tauya taha 'abaga qiduana 'inaya, ta ya'wala 'aidegana omode kana toa, ta eda kulufa kana vegimwaneyedi be yaqisa eda mane qiduana kana 'ewe.” <sup>14</sup>\* Ta gebu oda alamaniamatola'ai 'ibe na'ifoqe 'imia, mana ita'a tomotau yawaida 'idewani gawata na'ifoqe ta tuta goyona nahawala. <sup>15</sup> Ta 'esi luaqiaqiemibe me emi nuawebui ba'e 'edewani ona vonaya, “Eguma Kaiwabu ena nuanua be mayawaida kana toatoa, e 'inega kana tutuvila kana tauya ta yani taha taha kana viaqidi.” <sup>16</sup> Ta ba'itagana ovonavona vane emi nuanuayavo weaqidi, ta ona nuave'avinia vonavane yani luveifana.

<sup>17</sup>\* 'Inega ba'e ona alamani aqiaqiea: 'Eguma tomotau ilivu aqiaqina ana viaqa ni'a ialamaniamatage ida viaqi, e 'inega ba'e yani luveifa otaqina Yaubada matanaya.

## 5

*Tovekaikaiwabu adi vematamagilafu*

<sup>1</sup> Omi'a tovekaikaiwabu ba'e egu simana ona noqola aqiaqiea. Emi tuta vitana nawale namai 'inega weaqina ona duvoyavoya, <sup>2</sup>\* mana emi kulufayavo ina davula ta wese ami kaleko adi 'ita aqiaqidi digwadigwa'i ina 'ainidi. <sup>3</sup> Emi goula ta emi siliba ina luveifa otaqa,

\* 4:6: Vos 3:34; 1Fit 5:5 \* 4:7: Efe 6:12 \* 4:8: Sek 1:3; Mal 3:7; Ais 1:16 \* 4:10: Iob 5:11; 1Fit 5:6 \* 4:12: Lom 2:1; 14:4 \* 4:13: Lk 12:18-20 \* 4:14: Vos 27:1; Same 39:5,11 \* 4:17: Lk 12:47 \* 5:2: Md 6:19

ta vetala'ai ana 'aubena 'inaya ba'e kulufa diavona adi 'ita luveifana nave'ebe'ita omi'a weaqimi emi vemanuguba ta wese emi veilivu veifa weaqina, ta luveifa nana nave'aiwe ta 'wafimi na'ala 'ovoia. Vonahaqiaqi, tuta 'ebel'u'ova ni'a vadi'weda ta omi'a ge oda nuanua aqiaqi tuta nana weaqina, ta 'esi kulufa qidua va'ina oluluveaqedi.

<sup>4</sup>\* Onoqolia! Emi vaoqa ana tofewayavo ou'au'avedi ta bolimana 'abibodanaya ge oda vemaisidi, 'inega tofewa diavona edi dou qiduana eda Kaiwabu Yaubada Tovewaiwai ni'a noqolia. <sup>5</sup>\* Emi toa bwa'obwa'oya tuta qabuna kulufa aqiaqi otaqidi olobelobedi ta oqaiqaiawa weaqidi, ta wese o'ai'ai aqiaqi ta otubutubuqa kavona yubai tomotau iveve'ainidi sabi luve'aligidi. Ta omi'a wese 'idewani yubai taumiega ni'a o'iva'ava'aimi ami luve'aliga weaqina. <sup>6</sup> Ta wese tomotau tunutunuqidi ta 'ilu'ilumaiqidi otauyedi toluvine matadia ta iluve'aligidi. Ba'e tomotau diavona ge adi fata be taudiega ida vata'ita'iedi, ta 'esi emi nuenuega 'aliga ilobe.

#### *Bibitaqo ilivuna yani qiduana*

<sup>7</sup>\* Egwavo, luaqiaqiemi be me emi bibitaqo ona ba'eba'e eda Kaiwabu ena 'evivi mai ana tuta weaqina, 'idewani tovaqqa me ena bibitaqo kulaka ana tuta 'inaya ba'eba'e totuta 'inaya 'wei nawebui ta vaoqa navetabo aqiaqei, ta 'abiboda bolimana ana tutaya 'abwaga qiduana nalobe. <sup>8</sup>\* 'Inega omi'a wese ona bibitaqomi ta me emi giwalifatu ona tovolu'i'ita, mana eda Kaiwabu ena 'evivi mai ana tuta ni'a vadi'wedi'weda.

<sup>9</sup> Ta egwavo, ge taha toga iana weaqina nalumugi fole luvine nalobei. Vonahaqiaqi, Toluvine Qiduana ni'a 'ifoqe 'awayo tovotovololu. <sup>10</sup> 'Inega ona nuave'avinia tovesimasimana qabudi eda Kaiwabu weaqina ivetosimana ta vita qiduana ilobedi tomotau 'idiega, ta ibibitaqodi ta wese itovololu'i'ita edi vetumaqana 'inaya. Ba'e emi 'ebe'ita bibitaqo weaqina veilage ana tuta 'inaya. <sup>11</sup>\* Ta tomeqabu edi vetumaqana adi fata ina kafi'i'ihia tuta vitana 'idia e anuaia taudina toqaiawa aqiaqi. 'Ebevetalatutula Iobi kana 'itea, mana veilage be vita taha taha lobedi ta me ena bibitaqo vita diavona nuanidia toa. E 'inega Kaiwabu Iobi nana ena bibitaqo weaqina ena toa vitana givilea ta ena tuta 'ebel'u'ova 'inaya giveqaiawe, mana Kaiwabu Tonuakolokolo ta wese Toveyoluba.

<sup>12</sup>\* Egwavo, taha yani qiduana weaqina ena vonemi. Emi vona fofofola 'idia ge ona 'awatamatamana mahala ana wawega, nage bwa'obwa'o yaninavo adi wawega, nage wese vaina yani adi wawa 'inega! Ta 'esi 'eguma nuanuami vona fofofola taha ona 'awahaqiaqiea 'inega ona vona, "Ao ena viaqia!" E 'inega wese vona fofofola nana ona viaqia. Ta wese 'idewani 'eguma ge nuanuami ona vona fofofola 'inega ona vonaya, "Gebu, ge nuanuagu ena viaqi!" Ta ba'e 'inega ge wese luvematasabu ona lobei Yaubada 'inega.

#### *Venoqi yani qiduana*

<sup>13</sup> 'Eguma taha toga 'imiega vita lulutonovia 'inega luaqiaqiea be navenoqi Yaubada 'inaya vita nana weaqina. Ta wese 'eguma taha toga me ena qaiawa e luaqiaqiea be 'evosi 'inega nalukaiwa Yaubada 'inaya. <sup>14</sup>\* Ta wese 'eguma taha toga 'imiega navevhiqa 'inega 'ekalesia ana tovanugwetayavo nagaba va'auqidi ina mai ta weaqina ina venoqi Yaubada 'inaya, ta wese dede'wega 'wafina ina 'e'abi'abia Kaiwabu ana wawega. <sup>15</sup>\* Ta tovenoqi diavona me edi vetumaqana ina venoqi, e 'inega Yaubada tovevhiqa nana nagiveaqiaqiea. Ta 'eguma 'evisa luveifana ni'a viaqidi 'inega Yaubada wese nanuataqoya.

<sup>16</sup> 'Aidega 'aidega taumiega emi luveifana ona simana 'ifoqeyedi emiavo 'idia, ta 'abibodanaya qabumi ona venoqi Yaubada 'inaya be yaqisa ona veaqiaqi 'evivi. Vonahaqiaqi, tomeqabu Yaubada matanaya ni'a ivetunutuqu e taudi edi venoqi taha yani waiwaina, e 'inega ana fata tomotau ina veaqiaqi.

\* 5:4: Luve 24:14-15 \* 5:5: Lk 16:19 \* 5:7: Iel 5:24; Luve 11:14 \* 5:8: Lom 13:11-12; 1Fit 4:7 \* 5:11: 'Ifu 34:6; Iob 1:21-22; 2:10; Same 103:8 \* 5:12: Md 5:34-37 \* 5:14: Mk 6:13 \* 5:15: Md 17:18-20

<sup>17</sup> \* 'Ebevetalatutula taha venoqi ena waiwai weaqina kana 'itea tovesimasimana Ilaitia ena viaqa 'inega. Tauna tomotau otaqa ita'a 'idewani, ta ena nuanua qabuna 'inega venoqi waiwai Yaubada 'inaya vonigo ge taha 'wei nawebui bwa'obwa'oya. 'Inega Yaubada venoqi nana ve'iea ta 'wei ge dawebui ya'wala toi ta wai'ena sikisi 'idia. <sup>18</sup> \* Ta 'abiboda venoqi 'evivi Yaubada 'inaya, 'inega mahalega 'wei webui mai bwa'obwa'o iwaloloya ta 'abwaga qabudi itabo aqiaqi vaoqaya.

<sup>19</sup> \* Egwavo, 'eguma taha toga 'imiega Iesu ena 'eda aqiaqina ni'a nogea, 'inega omi'a iami nana ona 'ebe'ewa 'eviviei ta 'eda nana ona ve'ita 'eviviea. <sup>20</sup> \* Ta ona alamani aqiaqiea, 'eguma taha toga toluveifana taha na'ebe'ewa 'eviviea Iesu 'inaya, e 'inega tomotau nana toluveifa nana na'etoyavuaia 'aliga vataya 'inega. Ta wese ba'e 'inega Yaubada toluveifa nana ena luveifana qabudi nanuataqodi ta na'ewa yavuledi.

---

\* 5:17: 1Kin 17:1; 18:1    \* 5:18: 1Kin 18:42-45    \* 5:19: Gal 6:1    \* 5:20: Vos 10:12; 1Fit 4:8

## Fita ena leta nugweta

### *Leta ana alamani weaqina*

Ba'e Fita ena 'wayavi 'inega ve'iteda Iesu tauna ena ilivu qabuna aqiaqina, ta tua bwa'obwa'oya toa vitana lobe. Ta Fita ena leta ba'e 'wayavia enavo 'idia mali di'we be mali di'we 'inaya ivewagawaga itoatoa, mana taudi wese toa vitana ilobelobe edi vetumaqana weaqina. 'Inega nuanuana nagivewaiwaiedi ena 'wayaviega, e 'inega vonedi Iesu Valena Aqiaqina ge ina nuafania, mana Vale nana 'inega adi fata ina lu'ita vane tuta maimai weaqina, mana omo'e tuta nana 'inaya toa aqiaqina Iesu ena 'aliga be ena ya'itoto 'evivi 'inega ina lobe. Ta 'eguma ba'e yani diavona aqiaqi otaqina ina nuave'avinidi 'inega adi fata toa vitana be vevoalana 'idiega ina tovoloi'ita. Ta 'abibodanaya Iesu ena 'aubena qiduana 'inaya nave'ia aqiaqiedi.

Ta wese Fita ba'e leta nana ana to'ewayavo vona waiwaina neidi be ina veilivu aqiaqi mana taudi Keliso ena tomotauyavo.

Leta gamona

1:1-2 Vematamagilafu be venoqi

1:3-12 'Ebeqaiawa qiduana tovetumaqana weaqidi

1:13-2:10 Toa vunavunaqina be gwalagwalana weaqina

2:11-4:19 To'ekalesia adi veyoveyoa tuta vitana 'idia

5:1-11 Vanugweta be ilivu nuvana weaqina

5:12-14 Vona veyoluba

### *Lukaiwa*

<sup>1</sup> Ya'a Fita Iesu Keliso ena tovaletuyana.

Ba'e egu leta 'imia, omi'a Yaubada ena tomotauyavo ovesagawaga di'we taha taha 'idia 'idewani Fonito be, Galetia be, Kafadosia be, Eisia ta wese Bitania 'idia. <sup>2</sup> \* Omi'a lova Tamada Yaubada vena'ivinemi ena tomotauyavo 'idewani, ta Niboana Gwalagwalana 'inega ni'a givevunavunaqimi Natuna sulalinega, ta Iesu Keliso ena vona ni'a omamatayagea.

Nuanuagu Yaubada ena veyoluba be wese ena nuadaumwala naveqidua va'ine 'imia.

### *Kana lu'ita vane* 'etoyavua weaqina

<sup>3-4</sup> \* Eda Kaiwabu Iesu Keliso Tamana Yaubada kana awatuboya, mana ena nukolokolo qiduana 'inega ni'a kavi'oi 'evivi, ta wese 'ebeluita vane mayawaina neida, mana Iesu Keliso 'aligege giveya'itoto 'eviviea. Ta mahala 'inaya Yaubada taha yani aqiaqi otaqina ta vunavunaqina a'uveaqea omi'a weaqimi, ta ba'e yani nana ana maisa ge kana vona, ta ge ana fata nadavula nage naluveifa ta ge wese nahawala. <sup>5</sup> \* Ta Yaubada ena waiwaiega na'itamakimi ana laba 'etoyavua ona lobe, mana omi'a ovevetumaqanea. Ba'e 'etoyavua nana nagive'ifoqeyea tuta 'ebeluo'ova 'inaya tomotau qabuda matadaya.

<sup>6</sup> \* 'Inega ba'e weaqina ona qaiawa qiduana, mana ba'idia bwa'obwa'oya tuta kukusana namo 'ebesitonova vitadi olobelobedi, ta nawale gebu. <sup>7</sup> \* Ba'e vita diavona 'idiega emi vetumaqana Iesu 'inaya weaqina Yaubada nasitonovimi be vetumaqana nana ana waiwai na'itea, kavona dabo goula 'aiwe 'ala'alainega igabugabu tonovidi. Ta omi'a emi vetumaqana yani qiduana Yaubada matanaya, mana goula yani awahawalina. Ta 'eguma emi vetumaqana nawale waiwaina 'eno'eno 'ebesitonova diavona 'abibodanaya, e 'inega tuta nana Yaubada Iesu Keliso nagive'ifoqeyea tomotau qabudi matadia 'inega awatubo be 'amayaba naneimi ta wese ena simatala aqiaqi otaqina ona 'itea. <sup>8</sup> \* Keliso nana ge taha tuta oda 'itei ta tua nawale oveveylubea, ta ba'itagana wese ge oda 'itei ta tua

\* 1:2: Lom 8:29; 2Te 2:13 \* 1:3-4: Kol 1:12 \* 1:5: Ion 10:28; 17:11 \* 1:6: 1Fit 5:10; Iem 1:2 \* 1:7: Vos 17:3; Sek 13:9; Mal 3:3; Iem 1:3 \* 1:8: Ion 20:29; 2Kol 5:7



ovevetumaqanea. Ta emi qaiawa qiduana weaqina ge kana vona,<sup>9</sup> mana emi vetumaqana ana ve'ia 'inega 'etoyavua ona lobeaa.

<sup>10</sup>\* Lova Yaubada 'etoyavua nana 'iva'ava'aia weaqimi, ta ena tovesimasimana ivona fofofolayea 'imia. Ta taudi yani qabuna 'etoyavua nana weaqina ge ida alamaniana, 'inega taudiega isali aqiaqiea. <sup>11</sup>\* Ta Keliso Niboanina ni'a maduvonedi Ieisu ena veilae weaqina ta wese tola'ai aqiaqi otaqina na'ifoqe 'abibodanaya. Ta taudi inuanua qiduana vona nana ana alamani weaqina, ta wese toyani aqiaqi otaqina na'ifoqe veilae nana 'abibodanaya. 'Inega inuanua totuta 'inaya be, ma'oda 'inega ta wese togama 'inega 'etoyavua nana na'ifoqe. <sup>12</sup> Ta Yaubada tovesimasimana diavona ve'itedi ba'e yani nana ge na'ifoqe taudi edi tutaya, ta 'esi 'abibodadia omi'a emi tutaya. Yani nana lova ivonayea ni'a onoqolidi Vale Aqiaqina ana tolugaihiavo 'idiega. Ta taudi Vale nana ilugaihiea Niboana Gwalagwalana ena waiwaiega mahalega. Ta yani diavona aqiaqidi weaqidi ni'a isimana 'imia e wese Yaubada ena tovale'ewayavo nuanuadi ina alamani aqiaqiea.

### *Ilivu vunavunaqina*

<sup>13</sup> 'Inega ba'e yani diavona weaqina emi nuanua ona 'iva'ava'aidi ta wese omi'a ma emiavo ona 'itamaki aqiaqiem. Ta ona lu'ita vane ami 'etoyavua Yaubada 'inega weaqina, mana ba'e 'etoyavua nana naneimi tuta nana Ieisu Keliso nagive'ifoqeyea. <sup>14</sup>\* Omi'a Yaubada ona vemamatayagea. Lova nuami ge da'eqa'ui Yaubada ena nuanua weaqina ta 'esi mwagemwagem, e 'inega ilivu luveifana oviaqidi. 'Inegana ba'itaga ge wese ona 'evivi ilivu luveifa diavona 'idia. <sup>15</sup> Ta 'esi yani qabuna oviaviaqidi, e ilivu gwalagwalana 'inega ona viaqidi, 'idewani ami Togaba Yaubada ena ilivu gwalagwalana. <sup>16</sup>\* Mana Buki Nugwenugweina 'inaya vonaya, "Ona vegwalemi mana ya'a gwalagwalagu."

<sup>17</sup>\* Ta ge ona nuafania Yaubada ena luvine 'aidegana ta tunutunuqina 'inega tomotau qabuda naluvineda. Eda viaqayavo 'idiega nawale Yaubada ena luvine 'inega naluvineda nage aqiaqida nage luveifada. Tauna Yaubada nana tuta qabuna ogabea Tamami emi venoqi 'inaya, e 'inega luaqiaqiem be ona 'amayabea tuta qabuna bwa'obwa'o ba'e 'inaya, mana omi'a otoatoa wagawaga 'idewana. <sup>18</sup> Lova omi'a tubumiavo 'idiega ilivu ge aqiaqina o'ewe. Ta ni'a oalamaniana Yaubada gubaufemi ilivu luveifanega be 'etoyavuumi. Ta ge taha yani awahawalidi 'idewani mwali nage bagi 'idiega dagubaufemi. <sup>19</sup>\* Ta 'esi Yaubada gubaufemi Keliso sulalina aqiaqinega. Mana Keliso nana kavonaya sifi natudi lami ana 'ita aqiaqi otaqina, ge taha ena luveifamo. <sup>20</sup>\* 'Inega Yaubada Keliso maduvenua'ivinea ena fewa ba'e weaqina, ta 'abiboda bwa'obwa'o 'iva'ava'aia. Ta ba'itagana tuta ana 'ebelu'ovoa 'inaya Keliso mai ita'a weaqida. <sup>21</sup>\* Ta Keliso nana 'inega Yaubada ovetumaqanea, mana tauna giveya'itoto 'eviviea 'aligega, ta ana galiva kaikaiwabuna ta simasimalina 'inaya a'uya. 'Inega ami fata be emi vetumaqana be wese emi lu'ita vane me emi alamani aqiaqi ona a'udi Yaubada 'inaya.

<sup>22</sup>\* Omi'a Vale Aqiaqina ena vonahaqiaqi ovelumatamatayagea, ta matayaga nana 'inega ni'a ovevunavunaqa emi ilivu luveifana 'idiega, ta ba'e 'inega ami fata emiavo tovetumaqana oveveyoluba aqiaqiedi. Ta 'inega luaqiaqiem be giwalimiega taumiega 'aidega 'aidega ona veyolubemi. <sup>23</sup> Omi'a ni'a ovi'oi 'evivi, ta ge bwa'obwa'o ana tomotau awahawalidi 'idiega, ta 'esi Tamada ena vona mayawaina 'eno'eno vatayana 'inega. Ta Tamada Yaubada ge ana fata na'aliga. <sup>24</sup>\* 'Idewani Buki Nugwenugweina ena simana vonaya,

"Tomotau qabudi 'idewani libi,  
     ta adi 'ita aqiaqi otaqina  
     kavona libi ididi.  
 Ta libi diavona nawale

\* 1:10: Md 13:16-17   \* 1:11: Same 22; Ais 53; Lk 24:26-27   \* 1:14: Lom 12:2; Efe 2:3; 4:17-18   \* 1:16: Luvi 11:44-45; Md 5:48   \* 1:17: Lom 2:11; Ve 2:23   \* 1:19: Via 20:28; Ibe 9:12-14   \* 1:20: 2Tim 1:9-10; Efe 1:4  
 \* 1:21: Ion 14:6; Lom 5:1-2   \* 1:22: Ion 13:34; Lom 12:10   \* 1:24: Ais 40:6-8

ina 'aliga ta wese ididina  
 ina mwatuqu ta ina avuta.  
<sup>25</sup> Ta 'esi Kaiwabu ena vona  
 'eno'eno vatayana.”

Ta Vona nana ni'a onoqolia Vale Aqiaqina ana tolugaihi 'idiega.

## 2

<sup>1</sup>\* 'Inega emi luveifanayavo 'idewani 'eu'au'ava be, givemwaniniva be, vonavane be, ve'ifi'ifi be, vetalafululu ta wese ilivu luveifadi qabudi ona nogedi. <sup>2</sup> Ta 'esi luaqiaqiemini niboanimita ana susu aqiaqina ona salia emi nuanua qabuna 'inega kavonaya be gogama dilidilidi susu weaqina idoudou, ta ba'e susu nana 'inega niboanimita ina tabo ta ona vewaiwai ami 'etoyavua weaqina. <sup>3</sup>\* Vonahaqiaqi, eda Kaiwabu ena nuakolokolo ni'au olutonovia.

'Oqola mayawaina

<sup>4</sup> 'Inega ona mai Keliso 'inaya, tauna 'oqola mayawaina. Toota bwa'obwa'o inogea, ta Yaubada 'inaya ba'e 'oqola nana yani aqiaqi otaqina, 'inega venua'ivinea. <sup>5</sup>\* Omi'a ba'itagana Yaubada vefewemi kavona 'oqola mayawaidi 'idewani, ta omi'a 'imiega ena vanue gwalagwalana yoqoyoqonia Niboanimita 'inega. E 'inega omi'a kavona toveguba gwalagwalami, be ona veguba Yaubada 'inaya Niboanimita ena nuanua 'inega. Ta ba'e viaqa nana 'inega Yaubada emi gubayavo na'awahaqiaqiedi Iesu Keliso 'inega. <sup>6</sup>\*

'Idewani Buki Nugwenugweina 'inaya vonaya,

“O'itea 'oqola ba'e aqiaqina  
 ta vevenua'ivinina  
 yaha'unugwetea vanue ana yoqona weaqina  
 'abaga Ielusalema 'inaya,  
 ta tomeqabu ivetumaqana 'inaya  
 ge wese ina iniyauyau.”

<sup>7</sup>\* Ta omi'a ba'e 'oqola nana ni'au ovetumaqanea, 'inega ve'ebeiuila qiduana weaqimi. Ta tomeqabu 'oqola ba'e 'inaya ge ida vetumaqana Buki Nugwenugweina weaqidi simana vonaya,

“Lova 'oqola nana vanue ana to'eyoqona inogea,  
 ta ba'itagana Yaubada 'oqola nana  
 ni'au vetovolo nugwetea.”

<sup>8</sup>\* Ta wese vonaya,

“Oqola ba'e 'inaya tomotau  
 'aqedi ina vetufea ina be'u.”

Ta edi be'u 'iuna mana ge nuanuadi Vale Aqiaqina ina 'abibodei. 'Inega lova Yaubada ena nuanua 'inega luvine a'uya vonigo ba'e yani nana na'ifoqe 'idia.

*Yaubada ena tomotau vevenua'ivinidi*

<sup>9</sup>\* Ta 'esi omi'a gebu taudi 'idewani, mana omi'a Yaubada ena qabu vevenua'ivinimita, 'inega omi'a Toluvine Qiduana ena tovegubayavo ta ena tomotauyavo gwalagwalami. 'Inega luaqiaqiemini be Yaubada ena nuakolokolo qiduana weaqina ona simanea tomotau 'idia, mana di'we velovelovana 'inega gabemi ta 'ewa 'ifoqeyemi ta ena simatala aqiaqi otaqina 'inaya a'umi. <sup>10</sup>\* Vonahaqiaqi, lova omi'a ge oda tootoa Yaubada ena tomotauyavo 'idewani, ta ba'itagana omi'a ena tomotauyavo. Ta wese lova Yaubada ena nuakolokolo ge oda lobei, ta ba'itagana ni'au o'ewea.

<sup>11</sup>\* Egwavo, omi'a 'idewani wagawaga bwa'obwa'o ba'e 'inaya otoatoa. Ta ba'e egu vona waiwaina 'imia: Emi nuanua luveifadi giwalimiega ona nogedi, mana nuanua

\* 2:1: Efe 4:22; Iem 1:21 \* 2:3: Same 34:8 \* 2:5: Efe 2:21-22; Ve 1:6 \* 2:6: Ais 28:16; Efe 2:20 \* 2:7: Same 118:22 \* 2:8: Ais 8:14 \* 2:9: Luve 7:6; 14:2; Ais 9:2; Tai 2:14; Via 26:18; Efe 5:8 \* 2:10: Ose 2:23 \* 2:11: Gal 5:17,24

luveifadi niboaniami iveveaviedi. <sup>12</sup>\* Omi'a taudi ge ida vetumaqana maega otoatoa, ta luaqiaqiemu be emi ilivu ta wese emi toa nuanidia weaqina taumiega ona 'itamaki aqiaqiemu. Taudi iveve'ewemi ta ivonaya vonigo omi'a emi viaqayavo ge aqiaqidi, ta 'esi tuta nana emi viaqayavo aqiaqi otaqidi ina 'itedi e 'inega 'abiboda Yaubada ina awatuboya tuta nana na'evivi namai bwa'obwa'oya tomotau sabi luvineda.

*Toluvineavo be kaiwabuyavo kana 'amayabedi*

<sup>13</sup>\* Omi'a luaqiaqiemu be toluvineavo ta wese tovanugwetayavo qabudi bwa'obwa'oya ona velumatamatayagedi. 'Inega kini ena luvine ona 'abibodea, mana ba'e eda Kaiwabu ena nuanua. <sup>14</sup> Ta wese toluvineavo 'idewana gavana ona 'abibodedi, mana kini nana gavana dina venua'ivinedi be yaqisa taudi toluveifadi ina luvematasabudi ta tomotau aqiaqidi awatubo ina lobeza gavana diavona 'idiega. <sup>15</sup>\* Yaubada nuanuana omi'a taudi tovenwage edi 'awaluveifa weaqimu ona givelua'udi emi viaqayavo aqiaqidi 'idiega. Mana nuanuadi ina ve'ewemi, ta ge wese adi fata 'eguma tuta qabuna ilivu aqiaqidi oviaviaqidi. <sup>16</sup> Ta omi'a ni'a Yaubada yavuimi, 'inega taumi ona luvinemi ta ge ilivu luveifadi 'idia ona awafelemi. Ta 'esi ona fewa 'idewani omi'a Yaubada ena tofewa kavovoyavo. <sup>17</sup>\* 'Inega tomotau qabudi ona 'amayabedi, ta emiavo me edi vetumaqana ona veyolubedi. Ta wese Yaubada ona 'amayabea ta ona mwaninivea, mana tauna 'iva'ava'aida. Ta wese kini ona 'amayabea.

<sup>18</sup>\* Ta omi'a tofewa kavovo, emi kaiwabuyavo ona 'amayabedi be edi luvine tuta qabuna ona 'abibodea. Tola'ai ina vonemi e ona viaqia. Ta ge kaiwabuyavo aqiaqidi adi 'aidega ona 'abibodedi, ta wese taudi kaiwabuyavo luveifadi edi luvine ona vematamatayagea. <sup>19</sup> Mana 'eguma fewa aqiaqina oviaviaqia ta tua ina veilivu veifemi 'inega Yaubada ona vetumaqanea qiduana ta ona bibitaqomi, mana ba'e yani qiduana matanaya. <sup>20</sup>\* Vonahaqiaqi, 'eguma emi viaqa luveifana 'inega ina vunuqimu be ona bibitaqomi, e bena'e ge yani agona Yaubada matanaya, mana veilaqe nana ami luaqiaqi. Ta 'esi 'eguma emi ilivu aqiaqina 'inega ina vunuqimu be ona bibitaqomi, e 'inega Yaubada naqaiawa weaqimu. <sup>21</sup>\* Yaubada ni'au gabemi ilivu ba'e ona 'abibodea, mana Keliso weaqida visiqa qiduana lutonovia, ta ba'e 'inega ve'ebe'ita weaqimu, e 'inega yaenega ona tauya.

<sup>22</sup>\* "Tauna ge taha ena luveifamo ta wese ge taha u'ava 'awanega da'ifoqe."

<sup>23</sup>\* Ta tuta nana tomotau Keliso i'awaluveifea 'inega ge wese dave'iedi. Ta wese tuta nana ivunuqia ge diana davilei 'idia, ta 'esi Yaubada vetumaqana aqiaqiea, mana tauna ena luvine tunutunuqina. <sup>24</sup>\* Vonahaqiaqi, Keliso ana 'aidega ma 'wafina eda luveifana 'avalea 'etoluai 'inaya, e omo'e 'inega eda luveifana qabuna luveawalidi, be yaqisa ada fata ilivu tunutunuqina 'inega kana tauya. Ta ana 'abia 'awa'ivina 'inega ni'au giveaqiaqieda. <sup>25</sup>\* Vonahaqiaqi, lova omi'a 'idewana sifi luluve'waivimi, ta ba'itagana To'itamaki Sifi be 'Ekalesia ana Toludebana ni'a 'ewa 'eviviemu 'inaya. Tauna yawaimu qabuna ana To'itamaki.

### 3

*Vaqivaqidi adi luvine*

<sup>1-2</sup>\* Ta wese 'idewani omi'a vivine vaqivaqimu moqanemiavo ona 'amayabedi ta ona matayagedi. Ta 'eguma moqanemiavo Yaubada ena vona ge ida vetumaqanea, 'inega omi'a emi ilivu tunutunuqina ta simasimalina ona ve'itedi. 'Inega emi ilivu aqiaqidi 'idiega ina nuagivila ta Yaubada ina vetumaqanea. <sup>3</sup>\* Omi'a vivine 'wafimu adi 'ebeve'ivala 'idewani debamu ana amo nage bagi viaviaqina goula, nage kaleko adi

\* 2:12: Md 5:16 \* 2:13: Tai 3:1 \* 2:15: 1Fit 3:16 \* 2:17: Lom 12:10 \* 2:18: Efe 6:5 \* 2:20: 1Fit 3:14,17 \* 2:21: Md 16:24; Ion 13:15 \* 2:22: Ais 53:9 \* 2:23: Ais 53:7; 1Fit 3:9 \* 2:24: Lom 6:11; Ais 53:5-6 \* 2:25: Isi 34:5-6; Md 9:36; Ion 10:14; Ibe 13:20-21 \* 3:1-2: Efe 5:22 \* 3:3: 1Tim 2:9

'ita aqiaqina ge yani qiduana, <sup>4</sup> ta 'esi omi'a giwalimi ona ve'ivalidi 'ivala 'eno'eno vatayadi 'idiega, ta ona alamanía ba'e yani qiduana Yaubada matanaya. <sup>5</sup> E ba'e 'idewana lova vivine totafwalolo taudi Yaubada ivetumaqanea giwalidi ive'ivalia ilivu nuvana be nuawebui 'idiega, ta wese moqanediavo i'amayabedi be imatayagedi. <sup>6</sup>\* Wese 'idewana Sela moqanedi Ebelamo ena vona imatayagea ta i'awakaiwabuyea. Ta 'eguma omi'a emi ilivu aqiaqina ta ge taha yani weaqina ona mwaniniva, e 'inega omi'a Sela natudiavo.

<sup>7</sup>\* Ta wese 'idewani, omi'a 'oloto vaqivaqimi moqanemiavo maega otoatoa ona nuanua weaqidi, mana taudi edi waiwai be edi nuanua ge omi'a 'oloto 'idewani. 'Inega luaqiaqiemi be ona 'amayabedi ta ona 'itamakidi, mana omi'a be moqanemiavo maega yawaimi 'aidegana Yaubada ena veyolubega neimi. Ta vonahaqiaqi, 'eguma moqanemiavo ona ve'ilivu aqiaqiedi omo'e 'idewani, e 'inega Yaubada emi venoqi wese nanoqolidi.

*Vita kana lobeá viaqa aqiaqina 'inega*

<sup>8</sup> Egu ve'ita ba'e ni'a onoqolia, 'inega nuanuagu omi'a qabumi emi nuanua 'aideganega ona toatoa, ta 'eguma taha toga 'imiega naveilaqe nage vita nalobeá, e 'inega qabumi ona nuakolokoloyea. Ta me emi nuawebui ta wese ilivu nuvana 'inega ma emiavo taumiega ona veyolubemi. <sup>9</sup> 'Eguma tomotau vaina ina ve'ilivu veifemi 'inega ge ona ve'iedi. Ta wese 'eguma vaina ina vona veifemi ge wese ona ve'iedi, ta 'esi omi'a ona vona veyolubedi vona aqiaqina 'inega. Ba'e Yaubada ena nuanua 'idewana, 'inega nawale ami veyoluba ona 'ewea tauna 'inega, <sup>10</sup>\* mana 'idewana Buki Nugwenugweina ena simana vonaya,

“Eguma taha toga nuanuana be  
naqaiawa 'aubena qabuna 'idia,  
e 'inega luaqiaqiea be  
vona kavokavovo be 'eu'au'ava nalua'udi.

<sup>11</sup> Tauna ena ilivu luveifadi nanogedi  
ta 'esi viaqa aqiaqidi naviaqidi tomotau 'idia.

Ta wese navetafe'wa waiwai  
toadaumwala weaqina tomotau qabudi maega.

<sup>12</sup> Mana eda Kaiwabu tuta qabuna  
tunutunuqidi 'ita'itamakidi,  
ta wese edi noqi noqonoqolia,  
ta taudi luveluveifadi nogenogedi.”

<sup>13</sup> Togama ana fata be nagiveluveifemi 'eguma omi'a yani aqiaqina nuanuami ona viaqidi? <sup>14</sup>\* Ta tua nage tomotau ina veilaqeyemi emi ilivu aqiaqidi weaqina, e 'inega ona qaiawa ta ge ona mwaniniva weaqidi. <sup>15</sup> Ta 'esi Keliso ona awatuboya, tauna yawaimi ana Kaiwabu 'idewana. Ta tuta qabuna me emi 'iva'ava'ata ona toatoa, mana 'eguma taha toga namai navetala'aiemi emi lu'ita vane 'iuna weaqina, e 'inega emi ilivu nuvana 'inega lu'ita vane nana ona givesimatalia 'inaya. <sup>16</sup>\* Ge taha yani luveifana ona viaqi, be yaqisa ami fata tuta qabuna ma ami luttonova aqiaqina Yaubada matanaya ona tovotovolo. Ta 'eguma tomotau ina 'awaluveifemi mana omi'a Keliso ana to'abibodayavo, e 'inega nawale ina iniyauyau edi 'awaluveifa nana weaqina. <sup>17</sup> 'Eguma Yaubada nahawafelemi luvematasabu 'inaya emi viaqa aqiaqina 'idiega, e 'inega yani aqiaqina weaqimi, ta 'esi 'eguma luvematasabu nana ona lobeá viaqa veifana 'idiega e 'inega ge taha ana aqiaqimo Yaubada matanaya, mana luvematasabu nana taumiega osalisali.

<sup>18</sup> Ta ona nuaia Keliso weaqina, tauna ge taha ena luveifamo, ta eda luveifana weaqina 'aliga tuta 'aidegana 'inaya, ta ge wese na'aliga 'evivi. E omo'e 'inega 'ebe'eweda Yaubada 'inaya. Keliso 'wafina iluve'aligia ta Tamana giveyawaha 'eviviea Niboanina 'inega. <sup>19</sup> Ta Keliso Niboanina 'inega tauya niboana yoqoyoqonidi edi 'ebetoa 'inaya ta lugaihi 'idia, <sup>20</sup>\* mana taudi lova Yaubada ena vona ge ida vetumaqanea. Tuta nana

\* 3:6: Nug 18:12 \* 3:7: Efe 5:25 \* 3:10: Same 34:12-16 \* 3:14: Ais 8:12-13; Md 5:10; 1Fit 2:20; 4:14 \* 3:16: 1Fit 2:12 \* 3:20: Nug 6:1-7:24

Noa waga viaviaqia 'inega Yaubada me ena bibitaqo tomotau ba'eba'eyedi vonigo ida nuagivila, ta gebu. 'Inega qabudi seuseu 'inaya igavivila ta tomotau adi yau 'eita (8) dimo seuseu nana 'inega Yaubada 'etoyavuidi. <sup>21</sup> Go'ila ba'ena ve'ebe'ita babitaiso weaqina, mana babitaiso 'inega Yaubada 'etoyavuida. Ta babitaiso nana ge dave'ebe'ita 'wafida ana 'utu weaqina, ta 'esi ana alamani ba'e: Ada fata Yaubada matanaya kana tovotovolo ma ada lutonova aqiaqina ta kana venoqiea iula weaqina, mana giwalida vunavunaqina. Ta ba'e babitaiso nana na'etoyavuimi Iesu Keliso ena ya'itoto 'aligea ana waiwai 'inega. <sup>22</sup> Keliso ni'a vaneqa mahalaya ta ba'itagana Yaubada 'ataqinaya toatoa, ta Tamana ena tovale'ewayavo be tolumineavo ta wese yani qabuna waiwai Keliso ivelumamatayagea.

## 4

*Yaubada weaqina kana veilivu aqiaqi*

<sup>1</sup> \* Vonahaqiaqi, Keliso 'wafinega visiqa lobe, 'inegana omi'a wese emi nuanua ona givewaiwaiiedi kavonaya Iesu, ta ona 'iva'ava'aimi visiqa weaqina. Mana 'eguma 'wafimi ona awafelea visiqa 'inaya 'idewana Keliso, e 'inega emi luveifana ni'au onogea. <sup>2</sup> 'Inega tuta qabuna bwa'obwa'oya katoatoa kana awafeleda Yaubada 'inaya, ta ena nuanua kana viaqia ta ge wese tauda eda nuagoavaq luveifadi kana 'abibodedi. <sup>3</sup> \* Lova emi ilivu kavonea taudi velovelovana ana totoayavo edi ilivu 'idewani velamo'eno kavokavovo be, nuanua 'wai'waivina be, go'ila waiwaina ana numa be, veiaiana luveifana be, veilivu kavokavovo ana viaqayavo, ta wese iwa'odu tokwalui 'idia. <sup>4</sup> Ta ba'itagana ba'e ilivu luveifa diavona ni'au onogedi, 'inega vaina emiavo oveyaulovodi, mana omi'a ge wese nuanuami yani luveifana taudi maega ona viaqidi kavona lova 'idewani, e 'inega i'awa'awa luveifemi. <sup>5</sup> \* Ta ona nuaia nawale tomotau mayawaidi be wese 'ali'aligidi ina tovololo Yaubada matanaya ta edi ilivuyavo ina simana 'ifoqeyedi, 'inega naluvinedi edi viaqa diavona weaqidi. <sup>6</sup> Ba'e 'iuna 'inega to'aliga Vale Aqiaqina inoqolia lugaihi 'inega. Mana taudi lova tuta nana nawale ma 'wafidi itoatoa e 'aliga ana luvine ilobe tomotau qabuda 'idewani. Ta lugaihi nana 'inega adi fata niboanidi 'inega ina toatoa 'idewani Yaubada toatoa.

<sup>7</sup> \* Vonahaqiaqi, tuta 'ebelu'ovoa ni'a vadi'wedi'weda, 'inega omi'a ona nuanua aqiaqi ta emi ilivu taumi ona 'itamakia be yaqisa ami fata ona venoqi Yaubada 'inaya. <sup>8</sup> \* Taha ilivu ona alamani aqiaqiea mana ba'e ilivu nana ilivu qabudi veqidua va'inedi, e ba'e: Luaqiaqiemi be ona veyoluba aqiaqiemi emiavo maega, mana veyoluba ilivuna ana fata luveifana qabuna na'ewa yavuledi. <sup>9</sup> \* Ta wese tomotau ona gaba 'uma'umaiiedi emi vanuea, ta ge me emi lumugi. <sup>10</sup> \* Yaubada ena nei kavovo 'inega ami wila'a 'aidega 'aidega ni'a neimi, 'inega wila'a diavona ona vefewedi be emiavo ona iuledi, 'inega emi viaqayavo 'idiega Yaubada ena nuakolokolo ona ve'itayea 'idia. <sup>11</sup> 'Eguma taha toga Yaubada ena wila'a 'inega navetolugaihi, e 'inega tauna Yaubada ena vona nalugaihi aqiaqiea tomotau 'idia. Ta wese 'eguma taha toga navetoiula Yaubada ena wila'a 'inega, e 'inega tauna tomotau naiula aqiaqiedi Yaubada ena waiwaiega. 'Inega emi fewa qabuna 'idiega Yaubada ina awatuboya Iesu Keliso ana wawega. Ta luaqiaqieda be tuta vataya 'inaya kana awahawatuboya, mana tauna ena waiwai ge wese nahawala. Vonahaqiaqi eda nuanua 'idewani.

*Iesu ana to'abibodayavo ina veilaqe*

<sup>12</sup> Egwavo ye, ba'itagana 'ebesitonova vitavitadi be wese veilaqe taha taha olobelobedi. Ta ge ona vonaya, "Tola'ai weaqina ba'e yani diavona i'ifo'ifoqe 'idaya? Ge taha toga davonema!" Vonahaqiaqi, ba'e vita diavona weaqidi ge ona nuavoqana, mana ita'a tovetumaqana ada luvine 'idewani, be vita diavona kana lobedi. <sup>13</sup> \* Mana Iesu

\* 4:1: Lom 6:2,7 \* 4:3: Efe 2:2-3 \* 4:5: Via 10:42 \* 4:7: Lom 13:11-12 \* 4:8: 1Fit 1:22 \* 4:9: Ibe 13:2  
\* 4:10: Lom 12:6-8 \* 4:13: Via 5:41; Iem 1:2; 1Fit 1:6-7

Keliso veilaqe lobe'a 'idewani omi'a wese veilaqe olobelobe'a, be yaqisa ona qaiawa qiduana tuta nana na'evivi namai me ena simatala aqiaqi otaqina be wese me ena luvine waiwaina. <sup>14</sup>\* Ta 'eguma tomotau ina 'awaluveifemi emi vetumaqana Keliso weaqina, tua ta ona qaiawa, mana Yaubada Niboanina simasimalina 'imia toatoa. <sup>15</sup> Ta omi'a ge daluaqiaqiemi 'eguma luvematasabu ona lobe'a yani luvifana adi viaqa 'idiega 'idewana luv'aliga be, vanawala be, vedavi ta wese 'eguma tomotau ona ve'wafi siniqaiqaiedi. <sup>16</sup> Ta 'esi luaqiaqiemi 'eguma luvematasabu ona lobe'a mana omi'a tovetumaqana, 'inega ge ona iniyauyau emi vetumaqana weaqina, ta 'esi Yaubada ona awatuboya mana omi'a Keliso ena tomotauyavo.

<sup>17</sup> Vetala'ai ana tuta ni'a vadi'wedi'weda, ta Yaubada ena tomotauyavo namaduveta-la'aiedi. Ta 'abiboda taudi Vale Aqiaqina ge ida velumatamatayagea edi luvifana ana ve'ia vita otaqina ina lobe'a. <sup>18</sup>\* Ta Buki Nugwenugweina 'inaya simana vonaya, "Eguma 'etoyavua ana loba tufwana vitana taudi aqiaqidi 'idia, 'inega ma'oda na'ifoqe 'aiqa taudi luveluveifadi be ge tunutunuqidi 'idia?"

Vonahaqiaqi, ge adi fata 'etoyavua ina lobei."

<sup>19</sup> 'Inega omi'a 'eguma Yaubada ena nuanua 'inega luvematasabu ona lobe'a, 'inega ona awafelemi ami To'iva'ava'ata 'inaya, mana tauna ma ana vetumaqana, 'inega na'itamaki aqiaqiemi. Ta fewa aqiaqidi ba'itagana oviaviaqidi wese tuta qabuna 'idia ona viaviaqidi.

## 5

### *Yaubada ena tomotauyavo adi 'itamaki*

<sup>1</sup> Omi'a 'ekalesia ana tovanugwetayavo ba'e ami vematamagilafu 'iguyega emi fewa weaqina. Ya'a wese taha 'ekalesia ana tovanugweta, ta mataguyega Keliso ena veilaqe ya'itea. Ta nawale tuta maimai 'inaya Yaubada yani qabuna aqiaqi otaqina Keliso 'inaya 'eno'eno nagive'ifoqeyea, 'inega omo'e tuta nana 'inaya ya'a wese aqiaqi nana 'inaya ena toa. <sup>2</sup>\* Yaubada ena tomotauyavo qabudi neimi ta ona vanugweta aqiaqiedi kavonaya be taudi 'idewani sifi ta omi'a adi to'itamaki, mana Yaubada ena nuanua 'idewani. Ta ge ona vegwavu'ai, ta 'esi me emi nuanua aqiaqina ona vanugwetedi. Ta wese ge ona nuanua ve'ia weaqina, ta 'esi ona awafela aqiaqiemi fewa nana 'inaya, mana omi'a Yaubada weaqina ofewafewa. <sup>3</sup>\* Ta gebu luvine waiwaina 'inega ona vanugwetedi vaidi kaiwabu edi vanugweta 'idewani, ta 'esi omi'a luaqiaqiemi be ilivu aqiaqina ona ve'itedi 'inega ina 'abibodemi. <sup>4</sup> Ta tuta nana sifi adi To'itamaki Qiduana na'ifoqe namai, e 'inega ami ve'ia aqiaqi otaqina 'eno'eno vatayana tauna 'inega ona 'ewea.

<sup>5</sup>\* Omi'a kilakai tomotau 'eva'evaledi ona 'amayabedi ta ona matayagedi. Ta qabumi ma emiavo ona veiuuila ilivu nuvana 'inega, mana Buki Nugwenugweina ena simana vonaya, "Yaubada aiqabu adi wawa taudiega ia'uvaneqea nanogedi, ta tomeqabu me edi nuawebui naveyolubedi."

<sup>6</sup>\* 'Inega taumiega ona giwebuiemi ta ona awafelemi Yaubada nimana waiwai otaqina 'ayanaya, 'inega tauna ena tuta vevenua'ivinina 'inaya nagivaneyemi. <sup>7</sup>\* Ta emi nuavita qabudi Yaubada nimanaya ona a'uya be 'inega na'ewa yavuledi, mana tauna ami To'itamaki aqiaqi.

<sup>8</sup>\* Omi'a me emi 'iva'ava'ata ona toatoa, ta ona 'itamakimi ami avia Seitani 'inega. Mana tauna kavonaya yubai laioni sasasana muta'waya yabayaba ta salisali dadana nuanuana tomotau navunuqi na'ainia. <sup>9</sup>\* Emi vetumaqana 'inega ona tovolol'i'ita 'inega ami fata be Seitani ona nogea. Ta ona nuaia edavo weaqidi taudi bwa'obwa'o ana

\* 4:14: 1Fit 2:20 \* 4:18: Vos 11:31 \* 5:2: Ion 21:15-17; Via 20:28 \* 5:3: 2Kol 1:24; Fil 3:17; Tai 2:7 \* 5:5: Vos 3:34; Efe 5:21; Iem 4:6 \* 5:6: Md 23:12; Lk 14:11; Iem 4:10 \* 5:7: Md 6:25-30 \* 5:8: 1Te 5:6 \* 5:9: Efe 6:11-13; Iem 4:7

di'we qabudi 'idia itoatoa. Taudi wese leisu ivetumaqanea ta vetumaqana nana weaqina veilaqe be vita ilobelobedi. <sup>10</sup> Yaubada tauna veyoluba 'iuna ni'au gabemi ena 'abaga simasimatalina ta 'eno'eno vatayana 'inaya Keliso 'inega. Ta emi veilaqe tuta kukusana 'abibodanaya Yaubada nagiveaqiaqiemibe, navetovolo 'ihimi ta wese nagivewaiwaiemi, e 'inega avutugu ge ena nidoamo 'inaya ona toatoa. <sup>11</sup> Tauna ena waiwai ge ena awalamo, ta 'esi 'eno'eno vatayana. Vonahaqiaqi, eda nuanua 'idewani.

*Vona veyoluba*

<sup>12</sup> \* Ya'a taida Sailasa ena iula 'inega ba'e egu leta goyona ya'wayavia waiwai 'imia. Yahalamania tauna 'oloto togwavubiga ta aqiaqina. Egu leta ba'e 'iuna be nuanuagu ona alamania Yaubada ena veyoluba 'imia weaqina. Ta egu vona iula ba'e 'inega ona alamani aqiaqiea veyoluba nana tuta qabuna omi'a maega. Ge taha yani ana fata navetoasi'iemi veyoluba nana 'inega.

<sup>13</sup> \* Ta wese tovetumaqana qabudi 'abaga ba'e Loma 'inega edi vona veyoluba 'imia. Taudi omi'a maega Yaubada ni'au venua'ivinemi. Ta wese natugu Maki ena vona veyoluba 'imia. <sup>14</sup> Omi'a 'aidega 'aidega ma emiavo taumiega ona vona veyolubemi be ona lukaiwa venima sibusu 'inega.

Ta nuanuagu omi'a Keliso ena tomotauyavo me emi nuadaumwala ona toatoa.

---

\* 5:12: Via 15:22,37-40      \* 5:13: 2Tim 4:11; Via 12:2,25; 13:13

## Fita ena leta vemagilafuna

### *Leta ana alamani weaqina*

Fita ena leta nugweta 'inaya Ieisu ana to'abibodayavo vematamagilafuyedi ma'oda ina toa 'aiqa tuta nana vita ilobelobedi tomotau 'idiega. Ta ba'e ena leta vemagilafuna 'inaya vematamagilafuyedi vaidi tove'ita 'e'eu'au'avidi weaqina, mana ilugulugu 'ekalesia taha taha 'idia, ta tovetumaqana iveve'ita veifedi. Ta wese Fita ba'e leta nana 'inaya Yaubada ena tomotauyavo vematamagilafuyedi Ieisu ena 'evivi mai bwa'obwa'oya weaqina.

### Leta gamona

1:1-2 Vematamagilafu be venoqi

1:3-15 Tovetumaqana ina veilivu aqiaqi

1:16-21 Buki Gwala ena vona ge tomotau edi nuanua 'inega

2:1-22 Tove'ita 'eu'au'avidi weaqidi

3:1-18 Keliso ena 'evivi mai bwa'obwa'oya

### *Lukaiwa*

<sup>1</sup> Leta ba'e ya'a Saimoni Fita 'iguyega, ya'a Ieisu Keliso ena tofewa kavovo be wese ena tovaletuyana. Ta ya'wayavia omi'a ni'a ovetunutunuqa eda Yaubada ta wese ada To'etoyavua Ieisu Keliso matadia. Ta ba'e vetunutunuqa nana 'inega vetumaqana 'aidegana ni'a ineida.

<sup>2</sup> Yavevenoqi weaqimi nuanuagu emi alamani Yaubada ta wese eda Kaiwabu Ieisu Keliso weaqidi nave'ena'i 'imia, 'inega veyoluba ta wese toadaumwala ina neimi.

### *Alamani 'inega ilivu naveaqiaqi*

<sup>3</sup> Ieisu ena waiwaiega yani qabuna ni'a neida be yaqisa ada fata kana toa Yaubada ena nuanua 'idewani. Ba'e toa nana ada fata mana ita'a Yaubada ni'a kahalamaniana. Tauna venua'ivineda ena tomotauyavo 'idewani 'inega ena aqiaqina ta wese ena ilivu tunutunuqina ni'a vewila'ayea 'idaya. <sup>4</sup> Ta wese ba'e waiwai nana 'inega ena vona fofofola aqiaqi otaqidi neida, be yaqisa vona fofofola diavona 'idiega nuanua luveifadi be ilivu luveifadi qabudi kana nogedi ta kana veilivu Yaubada ena ilivu 'idewani.

<sup>5</sup> Vonahaqiaqi, Yaubada yani qabuna ni'a viaqia weaqida ena veyolubega, e 'inega ona toho waiwai be emi vetumaqana ona luvetomanea ilivu aqiaqina 'inega, ta ilivu nana 'inega alamani aqiaqi Yaubada weaqina navuaqa yawaimi 'inaya, <sup>6</sup> \* ta alamani nana 'inega taumiega ami fata ona 'itamakimi, ta 'eguma ami fata taumiega ona 'itamakimi, e 'inega taumiega ami fata ona bibitaqomi, ta bibitaqo nana 'inega ami fata be emi ilivu navevunavunaqa 'idewani Yaubada ena ilivu, <sup>7</sup> ta vevunavunaqa nana 'inega ami fata ona veiaiana aqiaqi tovetumaqana qabudi maega, ta veiaiana nana 'inega ami fata tomotau qabudi ona veyolubedi. <sup>8</sup> 'Eguma ba'e ilivu diavona 'imia ina ve'ena'i otaqa, 'inega emi alamani eda Kaiwabu Ieisu Keliso weaqina wese nave'ena'i, ta ba'e alamani nana 'inega vuaqa aqiaqina ina 'ifoqe, ta ona ve'ebeiula tomotau 'idia adi 'etoyavua weaqina. <sup>9</sup> Ta 'eguma ba'e ilivu diavona ge 'imia ida 'eno'eno, e 'inega omi'a kavonaya matami kwayakwayadi, ta wese kavona be oda venuafania lova Yaubada givevunavunaqimi emi luveifanayavo 'idiega.

<sup>10</sup> 'Inega egwavo, ona vetafe'wa waiwai be ilivu aqiaqidi ona viaqidi 'inega tomotau ina 'itemi ta ina vonaya vonigo omi'a vonahaqiaqi Yaubada ni'a venua'ivinemi be ena qabu gamonaya otoatoa. Ta 'eguma egu vonayavo ba'e ona matayagedi e nawale ge wese ona be'u. <sup>11</sup> 'Inega 'abibodanaya Yaubada me ena qaiawa na'ebe'ewemi ona lugu eda Kaiwabu be ada To'etoyavua Ieisu Keliso ena 'Ebeluvine 'eno'eno vatayana gamonaya.

<sup>12</sup> Omi'a vona diavona lova o'ewedi ni'au oalahalamanidi ta nawale okafi'i'ihidi, ta tua nuanuagu tuta qabuna ena vematamagilafuyemi ba'e yani diavona weaqidi.

\* 1:6: Gal 5:22-23



<sup>13</sup> Vonahaqiaqi, yanuaia luaqiaqiegu be tuta qabuna ba'e yani diavona weaqidi nuami ena luluqa'udi ana laba bwa'obwa'o ba'e ena nogea, <sup>14</sup>\* mana yahalamaniana tuta goyona be yawaigu nagumwala, 'idewani eda Kaiwabu Ieisu Keliso ni'a ve'itegu. <sup>15</sup> 'Inega ena vetafe'wa waiwai be yani diavona ba'e ge ona nuafanidi, ta wese nuanuagu egu 'aliga 'abibodanaya ona nuave'avinidi be ona kafi'i'ihidi.

*Yaubada ena vona yani aqiaqi otaqina*

<sup>16</sup>\* Lova eda Kaiwabu Ieisu Keliso ena waiwai be wese ena 'evivi mai weaqidi asimana 'imia. Ta ema simana diavona ge tomotau edi velulu'uya 'idiega ada vonayedi, ta 'esi Keliso ena waiwai matamega a'itea, ta weaqina asimana aqiaqiea 'imia. <sup>17-18</sup>\* Lova tuta nana Ieisu maega bwanagaya atoatoa, 'inega Yaubada bonana mahalega taumega anoqolia, vonaya, "Ba'e Natu Otaqigu, tauna yaveveyolubea qidua be weaqina yaqaiqaiawa agona." Ta ba'e vona diavona 'inega Tamada Yaubada Natuna awatuboya ta wese 'amayabea.

<sup>19</sup> Ba'e 'iuna 'inega Yaubada ena tovesimasimanayavo edi simana Ieisu Valena weaqina avetumaqana aqiaqiea. Ta Vale nana kavonea odamu simatalina velovelovana gamonaya. 'Inega luaqiaqiemu be tovesimasimana diavona edi vonayavo i'wayavidi ona nuanua aqiaqi weaqidi ana laba Keliso ena 'evivi mai ana 'aubena 'inaya. Tauna ena simatala qidua otaqina 'inega nuami nagivesimatalidi kavona be 'ubwana 'awa'awai otaqaya vanevane ta bwa'obwa'o guguvesimatalia. <sup>20</sup> Ta yani qidua otaqina nuanuagu ona alamani aqiaqiea, vonigo Yaubada ena tovesimasimanayavo edi vonayavo qabudi Buki Nugwenugweina gamonaya, ge taudi 'idiega ida vevi'oni, <sup>21</sup>\* mana Yaubada ena vona tovesimasimana 'idiega ge taha tuta da'ifoqe taudi edi nuenuaga, ta 'esi Niboana Gwalagwalana tosimana diavona venuaha'uyedi 'inega Yaubada ena vona isimana 'ifoqeyedi.

## 2

*Tove'ita 'e'eu'au'avidi weaqidi*

<sup>1</sup>\* Ta wese lova Isileli gamonaya tovesimasimana 'e'eu'au'avadi itoa, e wese 'idewana nawale tove'ita 'e'eu'au'avadi omi'a nuanimia ina toatoa. Taudi nawale 'waivega edi nuanuayavo luveifadi Yaubada weaqina ina ve'itayedi be vonigo emi vetumaqana ina qeunidi. Ta wese Ieisu Keliso ge nuanuadi ina 'awahaqiaqiei vonigo tauna edi Kaiwabu, tauna lova sulalinea gubaufedi edi luveifana 'inega. Ta 'esi ba'itagana Togubaufa nana ivegeqea. E ba'e ilivu nana 'inega taudi edi veilaqe ni'a vadi'wedi. <sup>2</sup> Ta Yaubada ena tomotauyavo 'idiega 'ea'ealidi nawale tove'ita 'e'eu'au'ava dina edi ve'ita luveifadi be wese edi ilivu 'ebeiniyauyau ina 'abibodedi. Ta wese vaidi tomotau Keliso ena ve'ita aqiaqina ina 'awaluveifea. <sup>3</sup> Ba'e tove'ita diavona taudi tove'ita manuguba ta nawale ina u'avemi edi vona yafayafana 'inega, mana nuanuadi emi mane be emi kulufa ina 'ewedi. Ta lova Yaubada adi luvine ni'a a'uya be tuta goyona naluveawalidi.

<sup>4</sup>\* Mana Yaubada ena tovale'ewayavo ge da'itedimo tuta nana iluveifana matanaya. Ta 'esi mahalega felawebuiedi 'abaga veifana 'inaya, ta oi'idia watu'ubu velovelovaninaya yoqoyoqonidi ina toatoa ana laba luvine qidua ana 'aubena na'ifoqe.

<sup>5</sup>\* Taha wese 'ebevetalatutula ba'e ona noqolia: Lova tuta nugwenugweina 'inaya Yaubada bwa'obwa'o qabuna luveawalia, mana tomotau qabudi edi ilivu luveifa otaqina. 'Inega Noa tomotau qabudi lugaihidi be ina nuagivila, mana 'eguma gebu nawale Yaubada naluvematasabudi ena luvine tunutunuqina 'inega. Ta tomotau qabudi inoga, e 'inega Yaubada seuseu qidua 'inega luveawalidi. Ta 'esi Noa ena susuyavo maega adi yau 'eita (8) Yaubada 'etoyavuidi. <sup>6-8</sup>\* Ta wese 'abibodanaya Yaubada 'abaga Sodoma be Gomola ana tomotauyavo luvine neidi 'inega 'aiwe 'ala'alainega gabu yavuledi. Ta

\* 1:14: 2Kol 5:1; Ion 21:18-19 \* 1:16: Md 17:1-5 \* 1:17-18: Md 17:5 \* 1:21: 2Tim 3:16; 1Fit 1:11-12 \* 2:1: Md 24:11; Iud 4 \* 2:4: Iud 6 \* 2:5: Nug 6:1-8:22; 2Fit 3:6 \* 2:6-8: Nug 19:24; Iud 7; Nug 19:1-16

tuta nana 'inaya taha 'oloto ana wawa Lota toluveifadi maega itoatoa. Tauna edi ilivu luveifana 'ite'itedi 'inega 'wafina siniqaiqai. Ta ena ilivu tunutunuqina weaqina Yaubada 'etoyavuia. Ba'e 'inega toveilaqe diavona ive'ebe'ita weaqida tola'ai nawale na'ifoqe tomotau 'idaya 'eguma Yaubada ena luvine kana veilivu kavokavovoyedi. <sup>9</sup> 'Inega o'itea, eda Kaiwabu ni'a alamania ma'oda 'inega toveilivu aqiaqidi na'etoyavuidi adi vitayavo 'idiega, ta wese ni'a alamani aqiaqiea ma'oda 'inega toveilivu luveifadi naluvematasabu 'aiqedi ana laba luvine qiduana ana 'aubena na'ifoqe.

<sup>10</sup> \* Ta vonahaqiaqi, ba'e luvematasabu nana na'ifoqe tomeqabu Yaubada ena luvine iveveyani kavokavovoyea ta 'esi 'wafi ena qaiawa kavokavovo weaqina inuanua ta luveifa diavona iviaviaqidi. Ta ba'e tove'ita 'e'eu'au'ava dina debadi 'i'wanina ta wese me edi gagasa, 'inega totoa mahalaya simasimalidi ge ida 'amayabedi, ta 'esi tuta qabuna i'awa'awa luveifedi. <sup>11</sup> \* Vonahaqiaqi, Yaubada ena tovale'ewayavo tove'ita 'e'eu'au'avidi ivewaiwai va'inedi, ta ge taha tuta 'awaluveifega ida ve'ewedi eda Kaiwabu matanaya.

<sup>12</sup> \* Ba'e tove'ita diavona kavona yubai ge taha edi alamanimo, mana yubai ge taha yani weaqina ida nuanua. Ta yubai adi luvine be tomotau ina kafidi ta ina luve'aligidi. Ta wese 'idewani nawale na'ifoqe taudi tove'ita luveifadi 'idia, mana alamani aqiaqi ge da'eno'eno 'idia. 'Inegana taudi wese kavona yubai ina 'elu'aliga kavovo edi 'awaluveifa totoa mahalaya 'idia weaqina.

<sup>13</sup> Taudi edi ve'ita 'inega Yaubada ena tomotauyavo igiveluveifedi, ta giveluveifa nana 'inega nawale adi ve'ia luvematasabu qiduana ina lobe. Taudi edi 'ebeqaiawa yani qabuna luveifadi 'idiega, ta 'aubenaya iviaviaqidi 'wafidi ana giveqaiawa weaqina nage adi lutonova ana giveaqiaqi weaqina. Ta tuta nana taudi maega o'ai'ai 'inega edi ilivu luveifana 'inega igigivebwavumi. Ta edi givebwavu nana 'imia weaqina iqaiqaiawa.

<sup>14</sup> Ta tuta qabuna matadiega luabu ilivuna iviaviaqia, ta ba'e ilivu nana ge datomanidi be adi fata ina lua'u. Ta tomotau me edi vetumaqana goyona ivevesi'wayamidi ilivu luveifana 'inaya. Taudi kulufa be yani qabudi i'ewe'ewedi tomotau 'idiega edi luvaivai gogona 'inega, mana ba'e ilivu nana ialamani aqiaqiea. Ta ilivu diavona luveifadi weaqidi Yaubada ni'a vona ve'alatedi. <sup>15</sup> \* Taudi 'eda tunutunuqina ni'a inogea ta itauya gei, 'inega kavonaya Beoli natuna Balami ena 'edega itautauya. Tauna ena mane nuanuana nalobe. Ta ilivu luveifana 'inega. <sup>16</sup> \* Ta Balami nana ena tauya gei lua'uya tuta nana ena yubai doniki tomotau bonadiega lugwaeyea ena ilivu luveifana weaqina.

<sup>17</sup> \* Ba'e to'eu'au'ava dina kavona salufa go'ila geqana, ta wese kavona gawata yaqina mu'emu'e dadanedi 'idewani, ta 'idiega ge taha 'wei dawebui. Edi vona fofofola qabudi 'idiega ge taha vuaqi dimo. 'Inegana taudi nawale ina tauya velovelovana qidua otaqina gamonaya, 'idewana lova Yaubada ni'a 'iva'ava'aia weaqidi be ina toa. <sup>18</sup> Ta tuta qabuna ivonavona gagaha edi ilivu luveifadi weaqidi, ta ilivu luveifa dina kavonaya ma'wa. Ta ilivu nana 'inega tonuagivila vauvaudi ivesi'wayamidi be ilihi 'eviviedi imai edi ilivu luveifana nugwenugweina 'wafi ana qaiawa 'inaya. <sup>19</sup> Tove'ita 'eu'au'ava diavona tuta qabuna ivona fofofola toa yavuyavuina weaqina, ta 'esi taudiega edi ilivu luveifadi 'idiega nawale yoqoyoqonidi itoatoa. Mana 'eguma taha toga ge ana fata yani luveifana nanogei, e 'inega tauna kavona yoqoyoqonina luveifa nana 'inega.

<sup>20</sup> \* Vonahaqiaqi, 'eguma taha toga ena ilivu luveifadi nanogedi ena alamani eda Kaiwabu be ada To'etoyavua Iesu Keliso 'inaya weaqina be nanuagivila, e 'inega tomotau nana yani aqiaqi otaqina viaqia. Ta 'eguma wese na'evivi ena ilivu nugwenugweina 'inaya, e 'inega ba'itagana tomotau nana luveifa otaqa, ta 'abiboda lova ena luveifana.

<sup>21</sup> \* 'Inega luaqiaqiea 'eguma tomotau nana ilivu tunutunuqina ge damadualamania. Mana ge taha wese ana aqiaqimo 'eguma ilivu tunutunuqina ni'a alamania ta luvine gwalagwaladi adi alamani ni'a 'ewedi, ta 'abiboda luvine diavona nanogedi! <sup>22</sup> \* 'Inega

\* 2:10: Iud 7-8,16 \* 2:11: Iud 9 \* 2:12: Iud 10 \* 2:15: Naba 22:7; Iud 11; Ve 2:14 \* 2:16: Naba 22:28-35  
\* 2:17: Iud 12-13 \* 2:20: Md 12:45 \* 2:21: Lk 12:47-48 \* 2:22: Vos 26:11

vona sesebai ba'e ivevona aqiaqi tomotau nana weaqina ivonaya, "Kedewa luiwaqina taunega na'ai 'eviviea." ta wese vonaya, "Eguma taha bawe kana veuweia, e 'inega tuta kukusana 'inaya navemwatefula 'evivi."

### 3

*Kaiwabu ena* 'evivi mai ana 'aubena weaqina

<sup>1</sup> Egwavo, ba'e egu leta vemagilafuna ya'wayavia waiwai 'imia. Ta leta diavona ya'wayavidi mana nuanuagu qiduana be nuami ena 'ewedi yani qabuna simasimalidi 'idia, ta wese nuanuagu yani diavona ge ona nuafanidi. <sup>2</sup>\* Nuanuagu ona nuave'avinia tola'ai lova Yaubada ena tovesimasimanayavo ivonayea 'imia. Ta wese eda Kaiwabu be ada To'etoyavua ena luvine 'imia o'ewea emi tovaletuyanayavo 'idiega ge ona nuafania.

<sup>3</sup>\* Ta nuanuagu qiduana yani taha weaqina nuami na'eqa'u aqiaqiea. Tuta 'ebel'ovoa 'inaya vaidi tomotau luveifadi ina 'ifoqe 'imia, ta edi nuanua luveifana qabudi ina viaqidi. Ta wese ina givenu'wemi ta ina vonemia, <sup>4</sup>\* "Ieisu lova vona fofofola vonigo na'evivi namai, waisa? 'Inega ma'oda vona fofofola nana, ta tauna ma'inaya? Tamamavo ni'a i'aliga 'ovoa, ta ema toa bwa'obwa'oya ge davedumaduma, ta 'esi ana 'ita'itana 'idewani lova 'iva'ava'ata ana 'ebeve'ale 'inega." <sup>5-6</sup>\* Togivenu'wa diavona ni'a ialamania vonigo Yaubada ena vonega mahala 'iva'ava'aia, ta wese ialamania vonigo Yaubada ena vonega go'ila vea'usi'iei ta bwa'obwa'o ayahayana 'ifoqe. Ta 'abiboda go'ila nana 'inega Yaubada bwa'obwa'o qabuna luveawalia seuseu qiduana 'inega. Ba'e yani diavona ni'a ialamani aqiaqiea ta tua, edi nuenuega ba'e alamani nana ivevegeqea.

<sup>7</sup> Ta wese lova Yaubada ena nuanua 'inega mahala be bwa'obwa'o venua'ivinedi be nawale nagabu yavuledi 'aiwe 'ala'alaina 'inega luvine qiduana ana 'aubena 'inaya. Ta wese 'aubena nana 'inaya Yaubada tomotau qabuda naluvineda, be tomeqabu ge ida 'amayabea naluvinedi ta naluveawalidi.

<sup>8</sup>\* Egwavo, yani 'aidegana weaqina ge ona nuafania. Eda Kaiwabu 'inaya ya'wala tausani (1,000) kavonaya 'aubena 'aidegana, ta 'aubena 'aidegana kavonaya ya'wala tausani (1,000) 'idewani. <sup>9</sup>\* Vaidi tomotau ivonaya, "Ana 'ita kavona Kaiwabu ena vona fofofola ena 'evivi mai weaqina gigive'ove'oyea!" Ta eda Kaiwabu ge dagive'ove'o, ta 'esi me ena bibitaqo nawale ba'eba'e weaqimi, mana ge nuanuana taha toga naveilaqe vataya. 'Inega Yaubada tomotau qabuda 'etoyavua ana tuta givekuea weaqida be yaqisa ada fata kana nuagivila. <sup>10</sup>\* Ta eda Kaiwabu ena 'evivi mai ana 'aubena ge ana alanimimo, ta ena 'ifoqe mai kavonaya tovanawala edi mai. Ta omo'e 'aubena nana 'inaya mahala nahawala butuna qiduana maega kavona yavalata. Ta yani qabudi mahalaya itoatoa 'aiwe 'ala'alata na'ala 'ovoidi. Ta wese bwa'obwa'o be yani qabuna 'iva'ava'aidi i'eno'eno 'inaya Yaubada ena luvine 'inega ina awala.

<sup>11</sup> Vonahaqiaqi, kuyavata qabudi nawale ina awala, 'inega omi'a luaqiaqiemi be ona nuanua qiduana ma'oda ona veilivu 'aiqa, mana Yaubada nuanuana ilivu gwalagwalana be tunutunuqina 'idiega ona toatoa.

<sup>12</sup> Omi'a Yaubada ena 'aubena oba'eba'eyea, 'inega luaqiaqiemi be ona vetafe'wa waiwai Ieisu Valena ena yawala dadana weaqina be yaqisa 'aubena nana ona madugive'ifoqeyea. Ba'e 'aubena nana 'inaya mahala nahawala 'aiwe 'ala'alata 'inega, ta ena luyayaqega kuyavata qabudi ina 'eluyagwa 'ovoa. <sup>13</sup>\* Ta ita'a mahala be wese bwa'obwa'o vauvaudi kaba'eba'eyedi, 'idewana lova Yaubada vona fofofolayedi. Ta tomeqabu ni'a ivetunutuqia Yaubada matanaya 'abaga nana 'inaya ina toa.

<sup>14</sup> Egwavo, nawale oba'eba'e vona fofofola diavona edi mai weaqidi. 'Inega ona vetafe'wa waiwai be emi toa navevunavunaqa otaqa Yaubada matanaya, ta ge wese ami 'ebeve'ewamo. Ta wese tauna maega ona toadaumwala. <sup>15-16</sup>\* Ta ona nuave'avinia, eda

\* 3:2: Iud 17 \* 3:3: 1Tim 4:1; Iud 18 \* 3:4: Md 24:48 \* 3:5-6: Nug 1:6-9; Nug 7:11; 2Fit 2:5 \* 3:8: Same 90:4 \* 3:9: Aba 2:3; 1Tim 2:4 \* 3:10: Lk 12:39; 1Te 5:2; Md 24:29,35 \* 3:13: Ais 65:17; 66:22; Ve 21:1,27 \* 3:15-16: Lom 2:4

Kaiwabu me ena bibitaqo nawale mahalaya ba'eba'e, be yaqisa ana fata tomotau qabudi 'etoyavua ina lobe, ta 'abiboda ena vona fofofola diavona naviaqidi. Ba'e leta nana ya'wayavia kavona lova iada Faulo ena 'wayavi 'imia 'etoyavua weaqina Yaubada ena alamani aqiaqina 'inega. Ta tola'ai yavonayedi 'imia ba'itagana, e tauna lova ena letayavo qabudi 'idia ni'a simanedi. Ena vonayavo vaidi adi alamani vitana. Ta tovefwage edi vetumaqana kavona gawata da'alu'alua dadanei, e ba'e taudi Faulo ena vona adi alamani igivedumedumedi. 'Inega tomotau diavona edi ve'ita leta diavona 'idiega ge 'idewana lova Faulo maduve'itayedi 'imia. Ta wese 'idewani vaina vona Buki Nugwenugweina gamonaya igividoidi 'inega vona diavona adi alamani ivedumaduma, ta ba'e ilivu nana ana ve'ia nawale Yaubada naluvegwamumuidi.

<sup>17</sup>\* Egwavo, omi'a ba'e yani diavona ni'a oalamanidi, 'inega tove'ita luveifadi 'idiega ona 'itamakimi, be yaqisa ge ina vesi'wayamimi edi ilivu luveifadi 'idia. Mana 'eguma ona 'abibodedi nawale emi avutugu falafalana ona nopei ta ona be'u. <sup>18</sup>Ta 'esi nuanuagu be emi alamani naveqidua eda Kaiwabu be ada To'etoyavua Iesu Keliso weaqina. Ta wese nuanuagu Keliso ena veyoluba 'imia naveago. Luaqiaqieda be tauna kana awahawatuboya ba'itagana be wese tuta vataya 'idia. Vonahaqiaqi, eda nuanua 'idewani.

---

\* 3:17: Mk 13:5; 1Kol 10:12

## Ioni ena leta nugweta

### *Leta ana alamani weaqina*

Ba'e leta nana Ieisu ana to'abiboda Ioni 'inega. Ba'e Ioni nana wese ena leta vemagilafuna be vetoina 'wayavidi. Ta wese buki taha Ieisu Valena Aqiaqina weaqina be Ve'ita buki nana taunega 'wayavidi.

Ta ba'e leta nana 'wayavia mana nuanuana to'ekalesia navona iuledi ma'oda ina ve'aidega 'aiqa Yaubada ta Natuna Ieisu Keliso maega. Ta wese ve'ita tunutunuqina neidi Ieisu weaqina, mana tove'ita luveifadi ilugu tovetumaqana adi qabu gamonaya, ta taudi edi ve'ita 'inega ivonaya vonigo Ieisu ge davetomotau tuta nana mai bwa'obwa'oya. Ta wese edi ve'ita luveifana 'inega ivonaya vonigo ge taha toga ana fata be 'etoyavua nalobei 'eguma tomotau nana nanuanua ena toa bwa'obwa'oya weaqina. Ta Ioni tovetumaqanayavo vematamagilafuyedi ba'e ve'ita nana luveifa otaqina, 'inega ge wese ina matayagei, mana fole vetoatoasi'i na'ifoqe edi veiaiana 'inaya.

Ta wese simana 'idia Ieisu tauna vonahaqiaqi vetomotau tuta nana mai bwa'obwa'oya. Ta wese vona waiwaina neidi ma'oda ma ediavo veyoluba ilivuna 'inega ina toa 'aiqa. Leta gamona

1:1-4 Vona mayawaina

1:5-2:29 Simatala be velovelovana weaqina

3:1-24 Yaubada natunavo be Seitani natunavo weaqidi

4:1-6 Vonahaqiaqi ta u'ava weaqina

4:7-21 Veyoluba ana ilivu weaqina

5:1-21 Vetumaqana ta venoqi weaqina

### *Vona mayawaina*

<sup>1</sup>\* Ya'a ta wese tovaletuyana qabudi maega avevematamagilafuyemi taha toga Valena weaqina. 'Abiboda be bwa'obwa'o na'ifoqe, ta tauna nugweta toatoa. Ba'e Vale nana ima'a ni'au anoqolia ta matamega a'itea, ta wese nimamega agitonovia. Tauna Yaubada ena Vona, ta ba'e Vona nana Vona mayawaina. <sup>2</sup>\* Ba'e Yawai nana lova Tamada maega itoatoa, ta Yaubada ena nuenuega Yawai nana give'ifoqeyea 'imaya vetomotau e 'inega tomotau qabudi adi fata ina 'itea. Ima'a amadu'itea e 'inega ba'itagana ba'e Yawai nana toatoa vatayana asimasimana 'ifoqeyea 'imia. <sup>3</sup> Yani ba'ena ima'a matamega a'itea ta teniqamega anoqolia, 'inega weaqina avonevonemi be yaqisa omi'a be ima'a kana veiaiana aqiaqi. Ta eda veiaiana nana Yaubada Tamada be Natuna Ieisu Keliso taudi maega.

<sup>4</sup>\* Ba'e yani diavona weaqina a'waya'wayavidi 'imia be yaqisa omi'a be ima'a kana qaiawa, e 'inega eda qaiawa naveqidua va'ine.

### *Yaubada ena simatala 'inaya kana toa*

<sup>5</sup>\* Ieisu Keliso Vale Aqiaqina neima, 'inega Vale nana asimasimana 'ifoqeyea 'imia, ta ana alamani ba'e: Yaubada tauna simasimalina, ta ge taha ana tufwa velovelovana 'inaya da'eno'eno. <sup>6</sup>\* 'Inega 'eguma taudega kana vonaya vonigo ita'a ni'au Yaubada maega kaluvetuba ta kaveveiaiana, ta nawale velovelovana ana ilivu 'inaya katoatoa, e 'inega ita'a to'eu'au'ava eda vona 'idiega ta wese eda viaqayavo 'idiega. <sup>7</sup> Ta 'esi 'eguma Yaubada ena simatala 'inaya katoatoa 'idewani taunega wese ena simatala 'inaya toatoa, e 'inega ita'a ma edavo kaveveiaiana aqiaqi. Ta Ieisu Yaubada Natuna sulalinea givevunavunaqida luveifana qabudi 'idiega.

\* 1:1: Ion 1:1 \* 1:2: Ion 1:14 \* 1:4: Ion 16:24 \* 1:5: 1Tim 6:16; Iem 1:17 \* 1:6: 1Ion 2:4

<sup>8</sup> \* Ta 'eguma ita'a kana vonaya, "Ge taha eda luveifamo", e 'inega taudega kau'au'aveda ta Yaubada ena vonahaqiaqi kanogenogea. <sup>9</sup> Ta 'esi 'eguma eda luveifanayavo kana simana 'ifoqeyedi Yaubada 'inaya, e 'inega tauna luveifa diavona na'ewa yavuledi be nanuataqoda, ta wese na'awatunutuqeda. Tauna ana fata ba'e yani diavona naviaqidi, mana tauna ma ana vetumaqana ta wese tauna Toluvine tunutuqina. <sup>10</sup> Ta 'eguma taudega kana vonaya vonigo ita'a ge taha luveifana kada viaqia, e 'inega ita'a Yaubada kave'ewea vonigo tauna tou'ava. Ta ba'e vona nana 'inega Yaubada ena ve'ita aqiaqi ge kada 'awahaqiaqiea ta ve'ita nana giwalidaya ge da'eno'eno.

## 2

### *Keliso tauna ada toiula*

<sup>1</sup> \* Natugwavo ye, emi leta ba'e ya'wayavia waiwai 'imia be yaqisa ge taha luveifana ona viaqidi. Ta 'eguma taha toga 'idega luveifana naviaqia, e 'inega wese taha toga tunutuqina navenoqi ana nuataqo weaqina Tamada Yaubada matanaya, e ba'e taunana Iesu Keliso. <sup>2</sup> \* 'Inega Yaubada eda luveifana nanuavetavunidi, mana Natuna Iesu vegubayea eda luveifanayavo weaqidi, be wese totoa bwa'obwa'oya qabudi weaqidi.

<sup>3</sup> 'Eguma ita'a Yaubada ena luvineavo kana vemamatayagedi e 'inega kana alamani aqiaqiea tauna vonigo ia otaqida. <sup>4</sup> Ta 'eguma taha toga navonaya, "Ya'a Yaubada yahalamani aqiaqiea", ta ena luvineavo ge da'abibodedi, e 'inega tauna tou'ava ta Yaubada ena vonahaqiaqi ge dahalamania. <sup>5</sup> \* Ta 'esi 'eguma Yaubada ena vona kana 'abibodea, e 'inega eda veyoluba tauna 'inaya naveaqiaqi otaqa. <sup>6</sup> 'Inega 'eguma taha toga navonaya, "Ya'a Yaubada ia otaqigu maega atoatoa", e 'inega luaqiaqiea be naveilivu aqiaqi kavona Iesu ena ilivu 'idewani.

### *Luvine veyoluba weaqina*

<sup>7</sup> \* Egwavo, luvine vauvauna weaqina ge eda 'waya'wayavi 'imia, ta 'esi luvine nugwenugweina lova omadunoqolia tauna yalu'eviviea, ta luvine nana ni'au oalamania, mana Yaubada 'inega 'ifoqe. <sup>8</sup> \* Ta luvine nana 'inaya yani vauvauna weaqina ena givesimatalia 'imia, mana ba'e veyoluba nana ana aqiaqi Keliso 'inaya ni'a a'itea, ta wese omi'a 'imia a'ite'itea, mana velovelovana ana ilivu ni'a awala 'imiega, ta 'esi simatala aqiaqi ni'a 'ifoqe yawaimi 'inaya.

<sup>9</sup> \* 'Inega 'eguma taha toga navonaya, "Ya'a simatala 'inaya yatoatoa!" ta 'abibodanaya taina naveilivu veifea kavona voalana, e 'inega tauna tou'ava ta nawale velovelovana 'inaya toatoa. <sup>10</sup> \* Ta 'eguma o'a taiu uveveylubea, 'inega simatala 'inaya utoatoa. Ta ba'e ilivu nana 'inega ge taha luveifana nagivebe'uyeu. <sup>11</sup> \* Ta 'esi 'eguma taiu una vevoalanea, 'inega nawale velovelovana 'inaya utoatoa, ta ge uda alamanca ma'inaya utautauya, ta 'esi kavonaya uda luvewaiva, mana velovelovana matau uma bodea.

<sup>12</sup> Natugwavo ye, egu vona ba'e ya'wayavia waiwai 'imia,  
mana emi luveifanayavo Yaubada ni'a nuataqodi Iesu ana wawega.

<sup>13</sup> Omi'a kaiwabuyavo, ba'e egu vona ya'wayavia waiwai 'imia.  
'Abiboda be bwa'obwa'o na'ifoqe ta nugweta Keliso toatoa,  
ta ba'e Keliso nana Toatoa Vatayana ni'au oalamania.

Ta kilakaiavo ye, vona ba'e ya'wayavia waiwai 'imia,  
mana omi'a toluveifana ni'au ovewaiwai va'inea.  
Natugwavo ye, egu vona ba'e ya'wayavia waiwai 'imia,  
mana omi'a Tamada Yaubada oalamani aqiaqiea.

<sup>14</sup> Kaiwabuyavo, egu vona ba'e ya'wayavia waiwai 'imia.  
'Abiboda be bwa'obwa'o na'ifoqe ta nugweta Keliso toatoa,  
ta ba'e Keliso nana Toatoa Vatayana ni'a oalamani aqiaqiea.

\* 1:8: Same 32:5; Vos 28:13      \* 2:1: Ibe 7:25-26; 9:24      \* 2:2: Ion 1:29; Kol 1:20; 1Ion 4:10      \* 2:5: Ion 14:21,23  
\* 2:7: Ion 13:34; 2Ion 5-6      \* 2:8: Lom 13:12; Ion 1:9      \* 2:9: 1Ion 4:20      \* 2:10: Lom 14:13      \* 2:11: Ion 12:35

Kilakaiavo ye, egu vona ba'e ya'wayavia waiwai 'imia,  
mana omi'a Keliso ovetumaqana aqiaqiea ta 'inaya otovolo'i'ita.  
Yaubada ena vona 'imia 'eno'eno, ta toluveifana ovewaiwai va'inea.

<sup>15</sup>\* Egwavo ye, bwa'obwa'o ba'e ana ilivu nuami ge na'ewei, mana 'eguma ilivu diavona nuami na'ewea e 'inega Tamada Yaubada ona venuafania ta ge ona veyolubei. <sup>16</sup>\* Vonahaqiaqi, bwa'obwa'o ilivunavo 'idewani inabo govaqa be, kulufa adi nua'ewa be wese nuavane ge Tamada 'inega ida 'ifoqe, ta 'esi totoa bwa'obwa'o luveluveifadi 'idiega. <sup>17</sup>\* Bwa'obwa'o ba'e nawale nahawala, ta wese bwa'obwa'o ana nuanuayavo luveifadi ina awala, ta tomeqabu Yaubada ena nuanua iviaviaqia ina toa vataya.

#### *Keliso voalanavo*

<sup>18</sup>\* Natugwavo ye, tuta ana 'ebelu'ovoa ni'au mai vadi'weda, ta lova 'imega ni'au onoqolia vonigo Keliso voalana nawale na'ifoqe. Vonahaqiaqi, Keliso voalanavo 'eala ni'a i'ifoqe 'idewani tove'ita 'e'eu'au'avididi be wese vaidi ge nuanuadi Keliso. 'Inega kahalamani aqiaqiea tuta ana 'ebelu'ovoa ni'a 'ifoqe mai. <sup>19</sup>\* Ta ma'oda 'inega kana alamaniana vonigo Keliso voalanavo ni'a i'ifoqe mai? Egu vona ba'e ona noqolia: Voalanavo dina lova ita'a maega katafwatafwalolo, ta Keliso ge ida vetumaqana aqiaqiea, mana 'eguma taudi edi vetumaqana ita'a eda vetumaqana 'idewani, e 'inega ge ida nogeda, ta 'esi ita'a eda veiaiana gamonaya nawale ida totoa. Ta edi noga 'inega taudiega ive'itayedi vonigo ge taha toga 'idiega ita'a maega.

<sup>20</sup>\* Ta omi'a ge taudi 'idewani, mana Niboana Gwalagwalana Keliso 'inega ni'a o'ewea, e 'inega omi'a qabumi ena vonahaqiaqi oalamani aqiaqiea. <sup>21</sup>\* 'Inega egu leta ba'e ge eda 'wayavia 'imia sabi ve'itami vonahaqiaqi weaqina, ta 'esi ya'wayavia 'imia mana Yaubada ena vonahaqiaqi ni'a give'ifoqeyea 'imia. Ta wese leta nana ya'wayavia 'imia, mana omi'a ni'a oalamani aqiaqiea to'eu'au'ava edi ve'ita luveifana ge wese da'ifoqe ve'ita tunutunuqina 'inega.

<sup>22</sup>\* Nage omi'a taumiega ovetala'aiemi ovonaya, "Togama tou'ava luveifa otaqina?" Ta yavona aqiaqiemii, 'eguma taha toga Iesu navegeqea navonaya, "Iesu tauna gebu To'etoyavua." e 'inega tomotau nana tou'ava aqiaqi. Ta 'eguma taha toga ba'e 'idewani navona 'aiqa, e 'inega tauna Keliso voalana. Ta ena vona 'inega Tamada be wese Natuna maega vevegeqedi. <sup>23</sup>\* Egu vona ba'e simasimatalina, mana 'eguma taha toga Yaubada Natuna navegeqea, 'inega ge ana fata be tomotau nana Tamana maega ina ve'aidega. Ta 'eguma taha toga Keliso na'awahaqiaqiea vonigo tauna Yaubada Natuna, e 'inega Tamana Yaubada tomotau nana wese na'awahaqiaqiea ta 'aideganaya ina totoa.

<sup>24</sup>\* 'Inega yavona aqiaqiemii, lova ve'ita Iesu Keliso Valena weaqina omadunoqolia, ta ba'e Vale nana tuta qabuna ona nuaia ta wese ona kafi'i'ihia. Mana 'eguma tuta qabuna Vale nana ona nuaia, 'inega omi'a veiaiana aqiaqi 'inaya ona totoa Yaubada Natuna maega, ta wese Tamana Yaubada maega. <sup>25</sup>\* Ta 'eguma ba'e 'edewani kana toa 'aiqa, 'inega Keliso ena vona fofofola taha ana aqiaqi kana 'ita lobeia, ta vona nana ana alamaniana ba'e: Ita'a yawai vataya kana lobeia mahalaya.

<sup>26</sup>\* Ba'e yani diavona weaqidi egu vona waiwaina 'inega ya'wayavia waiwai 'imia, be 'inega ona alamaniana vonigo to'eu'au'ava dina nuanuadi qiduana edi ve'ita 'inega ona tauya gei. <sup>27</sup>\* Ta ge daluaqiaqiemii 'eguma taha wese tomotau nave'itemi, mana lova Niboana Gwalagwalana Keliso 'inega o'ewea, ta Niboana nana nawale giwalimia totoa. Ta ba'e 'inega ve'ita tunutunuqina ni'a oalamani aqiaqiea, mana Niboana Gwalagwalana ge ana fata nau'aveda, ta 'esi ve'ita aqiaqi otaqina neida. 'Inega yavona aqiaqiemii, emi ve'aidega Keliso maega ge ona givedawalilia, ta 'esi ona givewaiwaiea 'idewani Niboana Gwalagwalana ni'a vonemi.

\* 2:15: Lom 8:7    \* 2:16: Lom 13:14    \* 2:17: Md 7:21    \* 2:18: Md 24:5,24; 2Ion 7    \* 2:19: Via 20:30  
\* 2:20: 1Kol 2:15; 2Kol 1:21; 2Ion 2    \* 2:22: 1Ion 4:3; 2Ion 7    \* 2:23: Ion 5:23; 1Ion 4:15; 5:1    \* 2:27: Ion 16:13

*Ita'a Yaubada Natunavo*

<sup>28</sup> Inega wese yavonavona 'eviviemi: Natugwavo ye, lova Keliso maega ni'a ove'aidega, 'inega ba'itagana ta wese tuta maimai 'idia luaqiaqiem be 'idewanina ona toatoa be yaqisa ge kana mwaniniva ta wese ge kana iniyauyau tuta nana Keliso na'evivi namai bwa'obwa'oya. <sup>29</sup>\* Ta ni'a oalamani aqiaqiea Keliso ena viaqa ta wese ena vona qabudi tunutunuqidi. 'Inega wese ona alamani aqiaqiea be tomeqabu yani tunutunuqina iviaviaqia, e ba'e taudina Yaubada natunavo.

## 3

<sup>1</sup>\* Kana nuaia Tamada Yaubada ena veyoluba qiduana weaqida, mana omo'e 'inega ni'a 'awanatuneda. Vonahaqiaqi, ita'a natu otaqinavo. Ta totoa bwa'obwa'o ge ida alamanida vonigo ita'a Yaubada natunavo, mana taudi Yaubada ivemwageyea.

<sup>2</sup>\* Egwavo ye, vonahaqiaqi Yaubada ni'a 'awanatuneda, ta tuta maimai 'inaya ita'a ge kada alamani aqiaqiea ma'oda ada 'ita na'ifoqe 'aiqa. Ta yani 'aidegana ni'a kahalamania, nawale Keliso ena tuta 'evivi mai 'inaya tauna kana 'ita aqiaqiea, e 'inega ita'a wese kana vedumaduma ta ada 'ita na'ifoqe kavona tauna 'idewani. <sup>3</sup>'Inega tomeqabu ilulu'ita vane ba'e yani nana weaqina luaqiaqiedi be edi ilivu ina givevunavunaqidi 'idewani Keliso, mana tauna ena ilivu vunavunaqina.

<sup>4</sup> Ta tomeqabu ilivu luveifana iviaviaqia, e taudi Yaubada ena luvine ana tobwega. Vonahaqiaqi, toluveifadi be luvine ana tobwega edi luveifana yani 'aidegana Yaubada matanaya. <sup>5</sup>\* Ta wese ni'a oalamani aqiaqiea Keliso mai eda ilivu luveifadi sabi 'ewa yavulidi. Ta tauna ge taha wese ena luveifamo. <sup>6</sup>'Inega tomeqabu Keliso maega ni'a ive'aidega ge daluaqiaqiedi be luveifana ina viaqidi. Ta 'eguma luveifana nawale iviaviaqidi, e 'inega taudina nuadi nawale ge da'eqa'uya Keliso weaqina tauna togama.

<sup>7</sup> Natugwavo ye, ona 'itamaki aqiaqiem be yaqisa ge taha toga nave'ita veifemi ta ona tauya gei. Ta 'esi 'eguma taha toga ena viaqayavo tunutunuqidi, e 'inega tomotau nana ni'a vetunutunuqa Yaubada matanaya, 'idewani Iesu tunutunuqa otaqina Yaubada matanaya. <sup>8</sup>\* Ta tomeqabu ilivu luveifana iviaviaqidi e taudi Seitani ena qabuyavo, mana Seitani tuta ana 'ebeve'ale 'inega be ana laba ba'itagana tauna ilivu luveifana ana toviaqa aqiaqi. Ba'e 'iuna 'inega Yaubada Natuna vetunei mai bwa'obwa'oya Seitani ena viaqayavo sabi 'ewa yavulidi. <sup>9</sup>\* Ta 'eguma Yaubada taha tomotau ni'a 'awanatuneda 'inega ge daluaqiaqiei be wese luveifana naviaviaqi, mana Yaubada yawaina tomotau nana giwalinaya 'eno'eno. Yavona aqiaqiem, tomotau nana ge wese ana fata otaqa be yani luveifana naviaviaqi, mana Yaubada ni'a 'awanatuneda! <sup>10</sup> E ba'e 'inega ada fata be kanahalamani aqiaqiedi tomeqabu Yaubada natunavo, ta wese tomeqabu Seitani natunavo, mana 'eguma taha toga yani luveifana viaviaqia e 'inega tauna ge wese Yaubada natuna. Ta wese 'eguma taha toga taina ge naveyolubei, e 'inega tauna ge Yaubada natuna.

*Luaqiaqieda be edavo kana veyolubedi*

<sup>11</sup>\* Tuta nana lova ove'ale Iesu ovetumaqanea 'inega taha vale omadunoqolia, ta vale nana ana alamani ba'e: Luaqiaqieda be edavo maega kana veyolubeda. <sup>12</sup>\* Ta ge kana veilivu veifa Keni 'idewani, mana Keni nana Seitani ena qabu gamonaya. Ta Keni nana taina vunuaqia, ta ena luve'aliga 'iuna ve'ifi'ifi, mana taina ena viaqa aqiaqina, ta 'esi tauna yani luveifana viaqia. <sup>13</sup>\* 'Inega taigwavo, ge ona nuavoqana 'eguma totoa bwa'obwa'o ina vevoalaneda.

<sup>14</sup>\* Ta ni'a kahalamani aqiaqiea ita'a 'aliga ena waiwai 'inega ni'a katoasi'i ta yawai aqiaqina ena di'we 'inaya katoatoa, mana ita'a taidavo kaveveyolubedi. Ta 'esi 'eguma taha toga taina ge daveyolubea, e 'inega tomotau nana nawale 'aliga ena waiwai 'ayanaya

\* 2:29: 1Ion 3:10 \* 3:1: Ion 1:12-13; 16:3 \* 3:2: 2Kol 3:18 \* 3:5: Ion 1:29; 1Fit 2:22-24; 1Ion 2:2 \* 3:8: Ion 8:44 \* 3:9: 1Ion 5:18 \* 3:11: Ion 13:34 \* 3:12: Nug 4:8 \* 3:13: Ion 5:18-19 \* 3:14: Ion 5:24



toatoa. <sup>15</sup>\* Vonahaqiaqi, 'eguma taha toga taina navevoalanea, e 'inega tauna kavona toluve'aliga otaqa. Ta ni'a kahalamani aqiaqiea toluve'aliga ge adi fata yawai vataya ina lobei.

<sup>16</sup>\* Ta wese veyoluba ilivuna ni'a kahalamania, mana Keliso yawaina awafelea ta weaqida 'aliga. 'Inega luaqiaqieda be ita'a wese yawaida kana awafelea taidavo weaqidi.

<sup>17</sup>\* Ta ona nuave'avinia 'eguma taha tovekaikaiwabu toatoa, ta iana toa vitana lobeia, ta ge taha iula daneia, 'inega ge wese ana fata be navonaya, "Ya'a toveyoluba!" Mana Yaubada ena veyoluba giwalinaya ge da'eno'eno.

<sup>18</sup>\* Natugwavo, eda veyoluba edavo 'idia ge vona namo 'inega, ta 'esi eda viaqa maega.

#### *Me eda giwalifatu Yaubada matanaya*

<sup>19</sup> Ta 'eguma edavo kaveveyolubedi eda viaqega, e 'inega kana alamani aqiaqiea Yaubada ena vonahaqiaqi 'inaya katoatoa. Ta ba'e 'inega ada fata be me eda nuadaumwala kana toatoa Yaubada maega. <sup>20</sup> 'Eguma me eda giwali a'ala katoatoa eda luveifana weaqina, ta tua ana fata be eda nuanua naveaqiaqi, mana Yaubada ena veyoluba eda giwali a'ala veqidua va'inea, ta wese eda viaqayavo ni'a alamani aqiaqiedi.

<sup>21</sup>\* Egwavo, 'eguma ni'a kahalamani aqiaqiea ita'a ge taha luveifana kada viaqia, e 'inega eda nuanua aqiaqinega ta wese me eda giwalifatu ana fata kana mai Yaubada di'wenaya. <sup>22</sup> Ta 'eguma tola'ai nuanuada be weaqina kana venoqi 'inaya, 'inega wese yani nana naneida, mana ita'a ena luvineavo kamatamatayagedi, ta wese eda ilivu 'inega kagigiveqaiawe. <sup>23</sup>\* Ta Yaubada ena luvine waiwaina 'idaya ba'e 'idewani: Natuna Ieisu Keliso kana vetumaqanea, ta wese edavo maega kana veveyolubeda. <sup>24</sup>\* Ta tomeqabu Yaubada ena luvineavo i'abi'abibodedi e taudi Yaubada maega itoatoa, ta wese Yaubada toatoa taudi maega. Ta ma'oda 'inega kana alamani aqiaqi 'aiqei Yaubada ita'a maega katoatoa? Ada fata, mana Niboanina ni'a neida.

## 4

### *Vonahaqiaqi niboanina ta wese u'ava niboanina*

<sup>1</sup>\* Egwavo, tomotau qabudi ge ona vetumaqanedi 'eguma ina vonaya, "Ya'a Yaubada Niboanina Gwalagwalana 'iguya toatoa." Ta 'esi nugweta edi vonayavo ona vineneqa aqiaqiedi, e 'inega ami fata be ona alamani aqiaqiea 'eguma ba'e niboani nana Yaubada 'inega nage gebu, mana to'eu'au'ava qabudi ni'a i'ifoqe ta edi u'vega ivonaya vonigo taudi Yaubada 'inega isimasimana. <sup>2</sup>\* Ta ada fata be kana alamani aqiaqiea 'eguma Yaubada 'inega isimasimana nage gebu, mana 'eguma taha toga Ieisu Keliso 'awahaqiaqiea tauna mahalega mai bwa'obwa'oya vetomotau otaqa, 'inega tomotau nana ena ve'ita ni'a 'ewea Niboana Gwalagwalana 'inega. <sup>3</sup>\* Ta 'esi 'eguma taha toga ba'e yani diavona Ieisu weaqina navegeqea, e 'inega tomotau nana ena ve'ita ge wese Yaubada 'inega, ta 'esi Keliso ana avia niboanina ena givenuaha'u 'inega veve'ita. Lova onoqolia Keliso ana avia ena mai weaqina, ta yavona aqiaqiem, tauna ni'a mai ta bwa'obwa'oya ena viaqayavo ba'itagana viaviaqidi.

<sup>4</sup>\* Natugwavo, omi'a Yaubada ena tomotauyavo, ta tomeqabu niboana luveifana 'inega isimasimana ni'a ovewaiwai va'inedi, mana Yaubada Niboanina 'idaya toatoa tauna Tovewaiwai otaqa, ta 'abiboda Seitani niboanina. <sup>5</sup>\* Tomeqabu Seitani niboanina 'inega iveveqae, e taudi bwa'obwa'o ana tomotauyavo 'inega bwa'obwa'o ana nuanuayavo weaqina iveveqae, ta totoa bwa'obwa'oya qabudi bonadi inoqonoqolia ta i'awa'awa aqiaqiea. <sup>6</sup> Ta ita'a 'esi Yaubada ena tomotauyavo, ta tomeqabu Yaubada ialamani aqiaqiea e taudi eda vona i'awahaqiaqiea. Ta tomeqabu Yaubada ge ida alaman, e taudi eda vona ge ida 'awahaqiaqiea. Omo'e 'inega kana alamani aqiaqiea 'eguma taha tomotau

\* 3:15: Ve 21:8 \* 3:16: Ion 13:1; Gal 1:4 \* 3:17: Luve 15:7 \* 3:18: Iem 2:15-16 \* 3:21: Ibe 4:16 \* 3:23: Ion 6:29; 13:34 \* 3:24: 1Ion 4:13 \* 4:1: Md 7:15; 1Ion 2:18; 2Ion 7; 1Te 5:21 \* 4:2: 1Kol 12:3 \* 4:3: 1Ion 2:18 \* 4:4: Md 12:29; 1Ion 5:4-5 \* 4:5: Ion 8:47; 15:19

Yaubada Niboanina 'inaya toatoa, mana ba'e Niboani nana Yaubada ena vonahaqiaqi 'awahaqiaqiea. Ta wese kana alamani aqiaqiea 'eguma taha tomotau niboana luveifana 'inaya toatoa, mana ba'e niboani nana Yaubada ena vonahaqiaqi ge da'awahaqiaqiea.

*Yaubada tauna veyoluba* 'iuna

<sup>7</sup> Egwavo, qabuda kana veyolubeda, mana Yaubada veyoluba 'iuna. 'Inega tomeqabu mali tomotau iveveyolubedi, e taudi Yaubada natunavo, ta wese taudi Yaubada ialamani aqiaqiea. <sup>8</sup> Ta tomeqabu mali tomotau ge ida veyolubedi, e taudi Yaubada ge ida alamaia, mana Yaubada veyoluba 'iuna. <sup>9</sup>\* Ta ena veyoluba give'ifoqeyea 'idaya Natuna 'inega, mana Natuna 'aidega otaqina vetunei mai bwa'obwa'oya, be yaqisa ita'a tauna 'inega mayawaida kana toatoa. <sup>10</sup>\* Veyoluba aqiaqi ana alamani ba'e ona noqolia: Ita'a Yaubada ge kada maduveylubei, ta 'esi tauna maduveylubeda, 'inega Natuna awafelei mai ta vegubayea eda luveifana sabi 'ewa yavulina.

<sup>11</sup> Egwavo, Yaubada ni'a veyolubeda qiduaana, 'inega luaqiaqieda be ita'a wese ma edavo kana veyoluba aqiaqieda. <sup>12</sup>\* Ge taha toga totoa bwa'obwa'oya Yaubada da'itea. Ta 'eguma ita'a ma edavo kaveveylubeda aqiaqieda, e 'inega Yaubada 'idaya toatoa. Ta ena veyoluba giwalidaya 'inega ana fata be ena nuenuega navefeweda.

<sup>13</sup>\* Ta wese ni'a kahalamani aqiaqiea ita'a Yaubada maega kave'aidega katoatoa, ta tauna wese 'idaya toatoa, mana Niboanina ni'a neida. <sup>14</sup> Ta ima'a matamega Yaubada Natuna ni'au a'itea, 'inega tauna weaqina asimasimana 'imia vonigo Tamana vetunei mai bwa'obwa'oya tauna tomotau qabuda ada To'etoyavua 'idewani. <sup>15</sup> 'Eguma taha toga Iesu na'awahaqiaqiea tauna Yaubada Natuna, e 'inega Yaubada tomotau nana maega ni'a ive'aidega. <sup>16</sup> Ta Yaubada ena veyoluba 'idaya ni'au kahalamani aqiaqiea ta wese kavevetumaqanea.

Vonahaqiaqi, Yaubada tauna veyoluba 'iuna. Ta tomeqabu veyoluba ilivuna 'idia 'eno'eno, e taudi Yaubada maega ni'a ive'aidega.

<sup>17</sup> Ta 'eguma Yaubada maega katoatoa 'inega eda veyoluba ita'a nuanidaya ta wese edavo maega naveago ta wese naveaqiaqi otaqa. 'Inega vetala'ai ana 'aubena 'inaya ge wese kana mwaniniva, ta 'esi ada fata be me eda giwalifatu kana tovolu Yaubada matanaya, mana eda ilivu ba'idia bwa'obwa'oya kavona Keliso ena ilivu 'idewani. <sup>18</sup> Ta 'eguma ita'a toveylubeda aqiaqi, 'inega ge kana mwaniniva mana veyoluba aqiaqi ana fata mwaniniva na'ewa yavulea. Ta 'esi 'eguma veyoluba aqiaqi ge 'idaya da'eno'eno, 'inega luaqiaqieda be kana mwaniniva vetala'ai ana 'aubena 'inaya.

<sup>19</sup> Yaubada maduveylubeda ta 'inega ita'a wese Yaubada be tomotau kaveveylubedi. <sup>20</sup> 'Eguma taha toga navonaya, "Ya'a Yaubada yaveveylubea!" ta taina vevevoalanea, e 'inega tauna tou'ava, mana taina tuta qabuna 'ite'itea ta ge daveylubeda aqiaqiea, e 'inega tou'ava nana ge wese ana fata Yaubada naveylubei, mana ge taha tuta da'itea. <sup>21</sup>\* Yaubada luvine ni'a neida ta ana alamani ba'e: Tomeqabu Yaubada iveveylubea, e luaqiaqiedi be wese taidiavo ina veyolubedi.

## 5

*Iesu ana to'abibodayavo bwa'obwa'o ilivuna ivewaiwai va'inea*

<sup>1</sup>\* Tomeqabu Iesu i'awahaqiaqiea ta wese ivetumaqanea vonigo tauna To'etoyavua, e ba'e tomotau diavona Yaubada natunavo. Ta wese tomeqabu Yaubada Tamada iveveylubea, e taudi wese natunavo iveveylubedi. <sup>2</sup> Ma'oda 'inega kana alamani aqiaqiei 'eguma ita'a Yaubada natunavo kaveveylubeda aqiaqiedi? Ada fata kana alamani aqiaqiea 'eguma Yaubada kaveveylubea ta wese ena luvineavo kavematamatayagedi. <sup>3</sup>\* Egu vona 'imia ba'e 'idewanina mana 'eguma ita'a Yaubada kaveveylubeda aqiaqiea, e 'inega wese ena luvine kana vemamatamatayagedi. Ta luvine diavona adi matayaga ge

\* 4:9: Ion 3:16 \* 4:10: Lom 5:8-10; 1Ion 2:2 \* 4:12: Ion 1:18 \* 4:13: 2Kol 1:22; 1Ion 3:24 \* 4:21: Mk 12:29-31 \* 5:1: 1Ion 4:15 \* 5:3: Ion 14:15,23-24

vitana, ta 'esi meaqana, <sup>4</sup> mana tomeqabu Yaubada ni'a 'awanatunedi e taudi bwa'obwa'o ana ilivuyavo ivewaiwai va'inedi. Ta omo'e waiwai nana i'ewea edi vetumaqana 'inega. <sup>5</sup> Kana nuuaia, tomeqabu adi fata be bwa'obwa'o ana ilivuyavo ina vewaiwai va'inedi? Vonahaqiaqi, tomeqabu Ieisu ivetumaqanea vonigo tauna Yaubada Natuna adi fata ilivu diavona ina nogedi.

*Vetumaqana Yaubada Natuna 'inaya*

<sup>6</sup>\* Ieisu Keliso mahalega mai bwa'obwa'oya go'ila ta wese sulala 'inega, mana babitaiso 'ewea go'ilega, ta 'abibodanaya ena 'aliga 'inaya sulalina inoqa. 'Inega ge damai go'ila namo 'inega, ta 'esi go'ila be wese sulala 'idiega mai. Ba'e yani diavona weaqina Yaubada Niboanina simasimana aqiaqiea 'idaya, mana Niboanina tuta qabuna veve'ita aqiaqieda ta ge wese ana fata nau'aveda. <sup>7</sup> E ba'e 'inega yani toi ni'a ive'ita aqiaqieda Ieisu weaqina: <sup>8</sup>\* Yaubada Niboanina be, go'ila ta wese sulala, ta edi ve'ita 'aidegana. <sup>9</sup>\* Ta 'eguma tomotau edi simana kavevetumaqanea, e 'inega ana fata be wese Yaubada ena simana kana vetumaqana aqiaqiea, mana Yaubada tauna ma ana vetumaqana. Vonahaqiaqi, Yaubada ena simana 'idaya yani qiduana, mana tauna 'inega 'ifo'ifoqe, ta ena simana ge yani kavokavovo weaqina, ta 'esi Natuna weaqina simasimana. <sup>10</sup>\* Tomeqabu Ieisu ivetumaqanea vonigo tauna Yaubada Natuna, e ba'e tomotau diavona giwalidia ni'a ialamani aqiaqiea Yaubada ena ve'ita 'idia vonahaqiaqi. Ta tomeqabu Yaubada ena vona Natuna weaqina ge ida vetumaqanei, e taudina ivonaya be Yaubada tauna tou'ava aqiaqi.

<sup>11</sup> Ta simana nana ana alamani ba'e: Yaubada toa vataya ni'a neida, ta toa vataya nana Natuna 'inega kana lobeia. <sup>12</sup>\* 'Inega tomeqabu Yaubada Natuna maega ni'a ive'aidega, e taudi yawai vataya ni'a ilobeia. Ta tomeqabu nawale ge ida ve'aidega Natuna maega, e taudina ge adi fata be yawai vataya ina 'ewei.

*Venoqi be yawai vataya weaqina*

<sup>13</sup>\* Egu leta ba'e ya'wayavia waiwai omi'a Yaubada Natuna ana tovetumaqanayavo 'imia, be yaqisa ona alamani aqiaqiea omi'a yawai vataya ami luaqiaqi. <sup>14</sup>\* Ta wese ita'a me eda giwalifatu Yaubada 'iawanaya, mana kalamani aqiaqiea tuta nana kavevenoqi 'inaya taha yani weaqina, e 'inega noqonoqolida 'eguma ita'a eda nuanua kavona tauna ena nuanua 'idewani. <sup>15</sup> Vonahaqiaqi, ni'a kahalamania eda noqiavo qabudi noqonoqolidi, 'inega wese kana alamani aqiaqiea eda venoqiavo nave'iedi.

<sup>16</sup>\* Vaina luveifana adi ve'ia 'aliga ta vaina gebu. 'Inega 'eguma iau tauna tovetumaqana una 'itea yani luveifana viaviaqia, ta luveifa nana 'inega ge 'aliga ana ve'ia nalobei, e 'inega o'a luaqiaqieu be una venoqi Yaubada 'inaya iau nana weaqina, e 'inega Yaubada nahawafelea be mayawaina natoatoa. Ba'e 'ebevetalatutula nana taudi luveifana iviaqia weaqidi ta ana ve'ia ge 'aliga ida lobei. Ta 'esi vaina luveifana adi ve'ia 'aliga. Ta ge eda vonemi be ona venoqi ba'e luveifa nana ana toviaqa weaqina.

<sup>17</sup> Vonahaqiaqi, viaqa luveifadi qabudi tuta qabuna luveifadi, ta vaina 'idiega adi ve'ia ge 'aliga.

<sup>18</sup>\* Ta kahalamania tomeqabu Yaubada ni'a 'awanatunedi ge wese luveifana ina viaqa 'eviviei, mana Yaubada Natuna 'ita'itamaki aqiaqiedi, e 'inega Seitani ge ana fata be nagiveluveifedi.

<sup>19</sup> Ta wese ni'a kahalamania vonigo ita'a Yaubada natunavo, ta bwa'obwa'o ilivuna ana to'abibodayavo qabudi taudi Seitani ena 'abiluvine 'ayanaya itoatoa.

<sup>20</sup> Ta wese kahalamani aqiaqiea vonigo Yaubada Natuna ni'au mai 'idaya ta givenua'e-qa'uda be yaqisa ita'a Yaubada otaqa kahalahalamania. Ta ita'a ni'a kave'aidega Yaubada otaqa ta wese Natuna Ieisu Keliso maega, mana tauna Yaubada aqiaqi, ta yawai vataya 'iuna.

\* 5:6: Ion 1:29-34 \* 5:8: Ion 15:26 \* 5:9: Ion 5:32-37 \* 5:10: Ion 5:36-40; Gal 4:6 \* 5:12: Ion 3:36  
\* 5:13: Ion 20:31 \* 5:14: Ion 14:13-14; 1Ion 3:21-22 \* 5:16: Md 12:31 \* 5:18: 1Ion 3:9

<sup>21</sup> Natugwavo, taumiega ona 'itamaki aqiaqiemu tokwalui adi iwa'odu 'inega.

## Ioni ena leta vemagilafuna

### *Leta ana alamani weaqina*

Ba'e Ioni ena 'wayavi vemagilafuna vetunea taha 'ekalesia be wese ana totafwaloloy-avo 'idia. Ta ge taha wawa daha'uya ena lukaiwa 'inaya, ta 'esi "Vavine ma natumwavo" 'wayavia, ta ana alamani ba'e 'idewani: "Vavine" taha vona sesebai 'ekalesia weaqina, ta "Natumwavo" wese vona sesebai 'ekalesia nana ana tomotauyavo weaqidi.

Ta wese Ioni ge taunega ana wawa da'wayavia ta 'esi "Emi kaiwabu" 'wayavia. Ioni ba'e 'edewani viaqia, mana ba'e 'inega tovetumaqana voaladiavo ge adi fata be ina alamania togama leta ba'e ana to'wayavi, ta wese ge adi fata be ina alamania tomeqabu leta nana ana to'ewa.

Ioni ena leta ba'e 'inaya simana to'ekalesia 'idia taudiega ma ediavo ina veyolubedi, be wese vonedi Iesu Valena tunutunuqina ina kafi'i'ihia. Ena nuanua 'edewani mana vaidi tomtau 'e'eu'au'avididi edi ve'ita luveifana. 'Inega wese vonedi be ge ina veiaiana tove'ita diavona maega, mana 'eguma ina veiaianedi, e 'inega kavona edi ve'ita nana ida 'awahaqiaqiei.

### *Leta gamona*

1-3 Lukaiwa

4-6 Veyoluba ilivuna yani qidua va'inena

7-11 Vona waiwaina ve'ita luveifana weaqina

12-13 Vona 'ebelu'ovoa

### *Lukaiwa*

<sup>1</sup> Ya'a emi kaiwabu leta ba'e ya'wayavia waiwai, o'a Vavine ni'au Yaubada venua'ivineu ta wese natumwavo maega 'imia.

Yavevevolubemi qiduana 'edewani wese taudi vonahaqiaqi ana 'eda ana to'abibodayavo ivevevolubemi, <sup>2</sup> mana Yaubada ena vonahaqiaqi omi'a be ya'a giwalidaya 'eno'eno, ta ba'e vonahaqiaqi nana 'idaya 'eno'eno vatayana.

<sup>3</sup> Nuanuagu Yaubada Tamada ta Natuna Iesu Keliso edi nuakolokolo be edi veyoluba ta wese edi nuadaumwala ona alamani aqiaqiea nuanimia. Ba'e yani diavona ina luveagatuna'ida 'eguma Iesu Valena Aqiaqi Otaqina kana 'abibodea, ta wese 'eguma ita'a ma edavo kavevevolubeda.

### *Vonahaqiaqi ta veyoluba weaqina*

<sup>4</sup> \* Yaqaiqaiawa qiduana, mana ni'a yanoqolia natumwavo vaina ve'ita tunutunuqina i'abi'abibodea, 'idewani lova Tamada ena nuanua give'ifoqeyea 'idaya. <sup>5</sup> \* Ta o'a Vavine yavevenoqieu edavo maega qabuda kana veyolubeda! Ba'e luvine nana ge yani vauvauna weaqina, ta lova ni'au omadunoqolia. <sup>6</sup> Ta veyoluba nana ana alamani ba'e: Ita'a 'eguma Yaubada ena nuauyavo be wese ena luvineavo kamatamatayagedi, e 'inega ita'a veyoluba nana ana toviaqayavo, mana tauna ni'a luvineda be ma edavo kana veyolubeda, 'idewani lova omadunoqolia.

<sup>7</sup> \* To'eu'au'ava 'eala ni'au i'ifoqe bwa'obwa'o ena di'we qabuna 'idia. Ba'e tomtau diavona ivonaya vonigo Iesu Keliso ge damai bwa'obwa'oya kavona tomtau otaqa 'edewani. Ta 'eguma taha toga 'edewani navona 'aiqa, e 'inega tauna tou'ava ta wese Keliso voalana. <sup>8</sup> 'Inega ona 'itamaki aqiaqiemi to'eu'au'ava dina 'idiega, be yaqisa emi vetafe'wa waiwai Yaubada weaqina ana ve'ia ge ona 'ita 'avei, ta 'esi luluveagatuna'ina ona lobe. <sup>9</sup> Ta 'eguma taha toga Keliso ena ve'ita 'inaya ge datoatoa, e 'inega taunana ge wese Yaubada maega ida ve'aidega. Ta 'esi 'eguma taha toga Keliso ena ve'ita kafi'i'ihia, e ba'e tomtau nana Yaubada Tamada be wese Natuna maega ni'a ive'aidega.

\* 1:4: 3lon 4 \* 1:5: 1lon 2:7 \* 1:7: 1lon 4:1-3

<sup>10</sup> 'Inega 'eguma taha toga nawai 'imia ta ba'e ve'ita nana 'inega ge nave'itemi, e 'inega ge ona 'ebe'ewei emi vanuea, ta wese ge ona lukaiwa 'inaya kavona taimi 'idewani.

<sup>11</sup> Ta 'eguma taha toga tou'ava nana na'awatainea ta na'ebe'ewea ena vanuea, e 'inega tonivanue nana tauna tou'ava nana ena ve'ita luveifana ana toiula.

*Vona* 'ebelu'ovoa

<sup>12</sup> Nuanuagu be yani qabuna weaqina ena vonemi, ta ge nuanuagu ba'e leta nana 'inega yani diavona weaqidi ena 'wayavi 'imia, ta 'esi yanuaia be ya'a tauguyega ena wai 'imia. 'Inega omi'a be ya'a kana veqae, e ba'e 'inega taudega kana giveqaiawa aqiaqieda.

<sup>13</sup> Lova Yaubada taiu venua'ivinea e tauna natunavo edi veyoluba ivetunei waiwai 'iuya.

## Ioni ena leta vetoina

### *Leta ana alamani weaqina*

Ioni ena leta ba'e gamonaya ge ana wawa da'wayavia, ta 'esi taunega gabea kaiwabu. Ta leta nana vetunei waiwai taha 'oloto ana wawa Gaiusi 'inaya. Ioni Gaiusi nana 'awahaqiaqiea, mana tauna tovetumaqana qabudi adi toiula aqiaqi.

Ta wese vematamagilafuyea taha 'oloto ana wawa Diotilifi weaqina, mana 'oloto nana ge nuanuana Ioni be wese tovaletuyana qabudi edi vona na'abibodedi, ta 'esi nuanuana navetovanugweta 'ekalesia nuanidia, ta wese wagawaga be toveyausa qabudi awahawatayedi tafwalolo 'inaya.

### Leta gamona

1-4 Lukaiwa be venoqi

5-8 Ioni tovetumaqana Gaiusi 'awahaqiaqiea

9-10 Taha 'oloto luveifana ana wawa Diotilifi

11-12 Taha 'oloto aqiaqina ana wawa Dimitiliasi

13-15 Vona 'ebelu'ovoa

### *Lukaiwa*

<sup>1</sup>\* Ya'a emi kaiwabu leta ba'e ya'wayavia waiwai o'a iagu Gaiusi 'iuya. Vonahaqiaqi, yaveyoluba aqiaqieu.

<sup>2</sup> Iagu ye, yavevenoqi weaqiu be ge taha vihiqa nage veilaqe una lobei, ta wese nuanuagu eu toa be wese eu fewa qabuna 'idia me eu qaiawa una toatoa 'idewani uqaiqaiawa eu veiaiana Yaubada maega weaqina. <sup>3</sup>\* Lova vaina tovetumaqana ba'idia imai ta ivelulu'uya o'a weaqiu ma'oda Yaubada ena nuanua u'abiboda aqiaqiea. Ta ba'e 'inega igiveqaiawa otaqigu, ta wese isimana 'iguya o'a vonahaqiaqi ana 'eda 'inega utautauya.

<sup>4</sup> Vaina yani ana fata be ina giveqaiawegu, ta agu 'ebegiveqaiawa qiduana omi'a natugwavo, mana Yaubada ena vonahaqiaqi ana 'eda 'inega otautauya.

### *Toiula be toawagila weaqina*

<sup>5</sup> Iagu, eu iula be eu ilivu tovetumaqana diavona 'idia weaqina yaqaiqaiawa, mana ba'e ilivu nana 'inega tau'u uve'ita 'ifoqeyeu o'a togwavubiga. Vaidi 'idiega ge uda alamanidi, ta tua wese taudi uiuiuledi tuta nana i'ifoqe eu 'abagaya. E ba'e eu ilivu nana weaqina yaqaiawa gegoyo. <sup>6</sup>\* Ta tuta nana i'evivi imai eu iula qiduana ta wese eu veyoluba 'idia weaqina isimana aqiaqiea to'ekalesiyavo 'idia. Ta nuanuagu wese tuta maimai 'idia Yaubada ena tofewayavo 'idewani una veilivu 'aiqedi. Ta 'eguma ina nogemi ina tauya mali 'abaga 'inaya, 'inega luaqiaqiemi be ma nima 'onenidi ina tutuvila ina tauya, mana ba'e 'inega Yaubada ona giveqaiawea. <sup>7</sup>\* Taudi Keliso ena fewa weaqina iluluvivila dadana di'we taha taha 'idia, ta ge taha iula ida 'awahaqiaqiei Yaubada ana tovefwageavo 'idiega. <sup>8</sup>'Inega luaqiaqieda be ita'a kana iuledi, ta ba'e 'inega qabuda kana ve'aidega be kana fewa Yaubada ena vonahaqiaqi ana yawala dadana weaqina.

<sup>9</sup>Lova wese leta 'inega ni'a yavematamagilafuyemi ma'oda toluvivila dina kana veilivu 'aiqedi, ta Diotilifi nuanuana be taunega navetovanugweta, 'inega egu vematamagilafu be wese egu luvine ba'e yani diavona weaqidi veveyani kavokavovoyedi. <sup>10</sup>'Inega tuta nana ena wai 'imia kana toava'auta ta Diotilifi ena ilivuyavo weaqidi ena vonemi, mana vevevonavona dadanema be, awahawa gilema be wese 'awa'awa luveifema. Vonahaqiaqi, ena ilivu luveifa otaqina ba'e viaviaqidi. Ta wese taha ilivu luveifa va'inena viaviaqia, mana toluvivila dina awatayedi vonigo ge ina lugu 'ekalesia gamonaya, ta wese to'ekalesia taudi nuanuadi toluvivila dina ina 'ebe'ewedi 'ekalesia gamonaya

\* 1:1: Via 19:29; Lom 16:23 \* 1:3: 2lon 4 \* 1:6: Tai 3:13 \* 1:7: 1Kol 9:11-12

e wese taudina Diotilifi nana 'eto'etobodedi, ta 'abibodanaya wese a'u'ifoqeyedi edi 'ekalesia nana 'inega.

<sup>11</sup> \* Iagu ye, ilivu luveifadi ge una vetutumedi, ta 'esi toaqiaqidi edi ilivu aqiaqina una vetutumea. Vonahaqiaqi, tomeqabu taudi ilivu aqiaqidi iviaviaqidi, e taudina Yaubada ena tomotauyavo. Ta 'esi tomeqabu taudi ilivu luveifana iviaviaqidi, e taudina Yaubada ge ida alama. <sup>12</sup> Ta Dimitiliasi tauna 'oloto aqiaqina, ta tomotau qabudi i'awahaqiaqiea. Tauna Yaubada ena vonahaqiaqi ana 'eda 'inega tautauya, ta ba'e tauya nana 'inega taunega ve'ita 'ifoqeyea tauna 'oloto tunutunuqina. Ta ima'a wese 'oloto nana a'awahaqiaqiea mana ena ilivu be wese ena viaqa qabuna aqiaqi otaqina. Ta omi'a ni'a oalamani aqiaqiea ima'a ema vonayavo tuta qabuna vonahaqiaqi.

*Vona* 'ebelu'ovoa

<sup>13</sup> \* Nuanuagu be yani qabuna weaqina ena voneu, ta ge nuanuagu ba'e leta nana 'inega yani diavona weaqidi ena 'wayavi 'iuya. <sup>14</sup> Ta 'esi nuanuagu qiduana ena wai ena vyausiu, 'inega magilafuda kana veqae.

<sup>15</sup> Nuanuagu Yaubada ena nuadaumwala 'iuya na'eno'eno. Emwavo qabudi ba'idia maega atoatoa edi lukaiwa 'iuya. Ta ya'a wese egu lukaiwa una simanea egwavo 'aidega 'aidega taudi maega otoatoa 'idia.

---

\* 1:11: 1lon 3:6-10 \* 1:13: 2lon 12



## Iuda ena leta

### *Leta ana alamani weaqina*

Leta ba'e ana to'wayavi Iuda, ta taunega vonaya, "Ya'a Iemesa taina ta Iesu Keliso ena tofewa kavovo."

Iuda ba'e ena leta 'iuna mana nuanuana tovetumaqana ina alamani aqiaqiea tomotau 'eu'au'avididi edi ve'ita be wese edi ilivu ge ina 'abibodei. Ba'e leta nana ana noqola kavona Fita ena leta vemagilafuna 'idewani, mana Iuda wese leta nana ana toavo 'idia vona waiwaina neidi vonigo edi vetumaqana ana avutugu ge ina qeuni, ta 'esi ina kafi'i'ihia. Leta gamona

1-2 To'wayavi be wese to'ewa weaqidi

3-16 Ilivu be ve'ita ta wese tove'ita luveifadi weaqina

17-23 Vona iula be vebibina

24-25 Vona veyoluba be awatubo

### *Lukaiwa*

<sup>1\*</sup> Leta ba'e ya'a Iuda 'iguyega. Ya'a Iemesa taina ta Iesu Keliso ena tofewa kavovo.

Ta ya'waya'wayavia omi'a Yaubada Tamada ni'a gabemi ta ena veyoluba 'inaya otoatoa 'imia, ta wese Iesu Keliso ena 'itamaki 'ayanaya otoatoa.

<sup>2</sup> Egu nuanua qiduana Yaubada ena nuakolokolo be, ena nuadaumwala ta wese ena veyoluba naveqidua 'imia.

### *Tove'ita luveifadi adi luvine*

<sup>3</sup> Egwavo ye, egu nuanua 'ena'ina be eda 'wayavi 'imia ita'a ada 'etoyavua weaqina. Ta 'esi ba'itagana nuanua vauvauna ni'a 'ifoqe 'iguya luaqiaqiegu be ena vona iulemi be yaqisa ami fata Iesu Valena Aqiaqina ana vonahaqiaqi ona vata'ita'iea tove'ita 'e'eu'au'avididi edi ve'ita 'inega. Ta ba'e vonahaqiaqi nana lova Yaubada ve'ifoqeyea ena tomotauyavo 'idia, ta vona nana ge wese ana fata be navedumaduma. <sup>4\*</sup> Vonahaqiaqi, egu nuanua 'idewani, mana vaidi tomotau taudi tove'ita 'e'eu'au'avididi ni'a ilugu mai nuanimia, ta taudi ivonaya vonigo Yaubada ena nuakolokolo 'inega ada fata be ilivu luveifadi kana viaqidi. Ta ba'e tomotau diavona adi luvine waiwaina lova Yaubada ni'a madua'uya, mana taudi eda Kaiwabu Iesu Keliso ivevegeqea.

<sup>5\*</sup> Nuanuagu vaina yani weaqina ena vonemi. Ba'e yani diavona ni'a oalamanidi, ta tua nuanuagu nuami ena luqa'uya be ona nuave'avinidi. Lova eda Kaiwabu ena tomotauyavo 'ewa 'ifoqeyedi di'we Itifita 'inega. Ta 'abibodanaya taudi 'idiega ge ida vetumaqanea luv'aligidi. <sup>6\*</sup> Ta wese lova Yaubada mahala ana tovale'ewayavo 'abiluvine neidi, ta vaidi 'idiega ivetalabudabuda ba'e 'abiluvine nana ana 'etofwafwa weaqina. E 'inega adi tuvada inogea, mana Yaubada a'uwebuiedi 'abaga velovelovana 'inaya, ta omo'e 'inaya yoqoyoqonidi ina toatoa ana laba luvine qiduana ana 'aubena na'ifoqe. <sup>7\*</sup> Ta ge ona nuafania lova tola'ai 'ifoqe 'abaga Sodoma be Gomola ta wese vaina 'abaga di'weddia, mana 'abaga diavona 'idia velamo'eno kavokavovo ilivuna veqidua va'ine. Ta ba'e 'abaga diavona Yaubada ena luvematasabu ilobea 'aiwe 'ala'alaina 'inega. Ta ba'e yani diavona ive'ebe'ita 'idaya 'aiwe 'ala'alata vatayana nawale na'ifoqe toluveifadi 'idia.

<sup>8</sup> Ta tove'ita diavona ni'a ilugu mai nuanimia taudi 'wafidi iawafelea velamo'eno kavokavovo be wese ilivu bwavubwavuna 'idia, mana ivonaya vonigo 'wayoqega vebibina ni'a ilobea ba'e ilivu nana weaqina. E ba'e 'inega Yaubada ena 'abiluvine iveyani kavokavovoyea, ta wese mahala ana totoayavo simasimatalidi i'awaluveifedi. <sup>9\*</sup> Ta wese ona nuave'avinia lova tuta nana Yaubada ena tovale'ewayavo adi tovanugweta

\* 1:1: Md 13:55 \* 1:4: Gal 2:4; 2Fit 2:1 \* 1:5: 'Ifo 12:51; Naba 14:29-30 \* 1:6: 2Fit 2:4 \* 1:7: Nug 19:1-25; 2Fit 2:6,10 \* 1:9: Dan 10:13,21; 12:1; 2Fit 2:11; Ve 12:7; Sek 3:2

ana wawa Maikeli tauna Seitani maega ive'ae'aetoga Mosese 'wafina weaqina, e 'inega Maikeli giwalina ge dafatu be Seitani dave'ewei ena vona ve'alata weaqina, mana ni'a alamania vonigo ena Kaiwabu me ena 'abiluvine qidua va'inena, ta 'inega Maikeli Seitani 'inaya vonaya, "Egu Kaiwabu nalugwaeyeu!" <sup>10</sup>\* Ta ba'e tove'ita diavona 'eguma vaina yani weaqina nuadi nawale ge da'eqa'ui, e 'inega yani diavona ivona ve'alatedi ta wese iawagiledi. Ta ba'e viaqa nana 'inega taudi kavona yubai, mana yubai yani qabuna iviaviaqia edi nuanua kavokavovo 'inega. Ta ba'e ilivu nana 'inega tomotau diavona taudiega iveveilaqeyedi.

<sup>11</sup>\* Vonahaqiaqi, ba'e tove'ita diavona nawale veilaqe qiduana ina lobe! Taudi Keni ena ilivu luveifana ivetutumea, mana tauna taina luve'aligia. Ta wese kavona Balami ena ilivu luveifana ivetutumea, mana yani taha taha iviaviaqidi mane ana 'ewa weaqina. Ta wese taudi edi ilivu kavona Kola\* 'idewani, mana tauna Mosese ena luvine ge da'abibodei 'inega veilaqe lobe. Ta wese taudi edi noga 'inega ina veilaqe kavona Kola ena veilaqe 'idewani.

<sup>12</sup>\* Ba'e tove'ita diavona tuta nana omi'a maega ovava'auta veiaiana ana 'ai weaqina ona 'itamaki aqiaqiemi mana taudi adi fata emi toa aqiaqina ina bwega yavulea 'idewani lai ana fata waga nabwega yavulea. Ta wese ge ida nuanua tomotau weaqidi, ta 'esi taudiega weaqidi inuanua. Ta ba'e ilivu diavona weaqina ge ida iniyauyau. Ta wese ba'e toluveifa diavona kavona gawata kwaukwauyau yaqina 'alu'alua dadanea, ta 'wei geqana. Ta wese taudi kavona 'aiwe vuavuaqina, ta ana tuta 'inaya ge davuaqa. Vonahaqiaqi, ba'e tomotau diavona kavona 'ali'aligidi, mana vuaqa geqadi ta wese kwalamidi abuabu yavulina bwa'obwa'oyega. <sup>13</sup> Taudi kavona nufula waiwai, ta edi ilivu luveifana 'inega vaina yani bwavubwavuna igive'ifoqeyea 'idewani nufula ena waiwaiega balabalaya vunuvunuqa ta fulona bwavubwavuna ma qainina 'ifo'ifoqe. Ta wese taudi kavona 'wadi'wadima luluve'waividi mahalega iavuavuta. Ta Yaubada edi toa vataya di'we velovelovana 'inaya ni'a 'iva'ava'aia.

<sup>14</sup>\* Ta ba'e tomotau diavona weaqidi Adama ena gade vesevenina 'inega tubuna Inoki simana 'ifoqeyea vonaya,

"Vonahaqiaqi, nawale Kaiwabu ena tovale'ewayavo gwalagwaladi ta avo 'wayoqidi maega ina mai.

<sup>15</sup> "Tauna totoa bwa'obwa'o qabudi naluvinedi edi viaqa aqiaqidi be wese edi viaqa luveifadi 'inega. Ta tomeqabu Yaubada i'awaluveifea ta wese edi viaqa luveifana weaqina Yaubada taunega naluvinedi, mana edi vona 'inega be wese edi veilivu 'inega Yaubada ena nuanua ibwegea."

<sup>16</sup> Ba'e tomotau diavona yani qabuna weaqina ivetalabudabuda ta wese mali tomotau edi viaqa weaqina ilulumugi. Ta 'eguma nuanuadi ilivu luveifana ina viaqidi, e 'inega edi nuanua i'abi'abibodea ta iviaviaqidi. Taudiega igigivaneqedi, ta wese tomotau ivevemea 'ealedi, mana ba'e 'inega nuanuadi tomotau ina 'awahaqiaqiedi be yani taha taha ina neidi.

### *Vona iula be vebibina*

<sup>17</sup> Egwavo, ona nuave'avinia tola'ai lova eda Kaiwabu Iesu Keliso ena tovale-tuyanayavo imadusimana 'imia, <sup>18</sup>\* ivonemi ivonaya, "Tuta 'ebelu'ovoa 'inaya tomotau ina 'ifoqe 'imia ta ina givenu'wemi, ta tomotau diavona edi nuanua govaqa ina viaqidi, mana eda Kaiwabu ena nuanua ilulugwawu'aiea." <sup>19</sup> Ba'e qabu diavona 'idiega vetoatoasi'i 'ifo'ifoqe tovetumaqana nuanidia. Ta wese ge ida nuanua ilivu aqiaqina weaqina, ta 'esi ilivu luveifana tuta qabuna 'abi'abiluvinedi, ta Niboana Gwalagwalana ge datoatoa 'idia.

\* 1:10: 2Fit 2:12 \* 1:11: Nug 4:7-8; 1Ion 3:12; Naba 16:1-35 \* 1:11: Kola "Korah" Mosese ma tuana Eloni vevoalenedi. 'Inega Yaubada diana vilei ta bwa'obwa'o luvinei 'elalami tuata Kola nana ma ana to'abibodayavo isamwaku iwebui. (Naba da'a 16) \* 1:12: 2Fit 2:13,17 \* 1:14: Nug 5:18,21-24 \* 1:18: 2Fit 3:3

<sup>20</sup> \* Egwavo, luaqiaqiemu be tuta qabuna taumiega ma emiavo ona vona iulemi ta ona givewaiwaiemu Iesu Valena Aqiaqina 'inega, mana Vale nana Yaubada neimi. Ta tuta nana ovevenoqi, e 'inega Niboana Gwalagwalana ena waiwaiega ona venoqi. <sup>21</sup> Omi'a Yaubada ena veyoluba 'inaya ona toatoa. Luaqiaqiemu be eda Kaiwabu Iesu Keliso ena nuakolokolo weaqina ona ba'eba'e, mana nuakolokolo nana 'inega yawai vataya naneimi.

<sup>22</sup> Aiqabu ivenuana magilafu edi vetumaqana weaqina e ona nuakolokoloyedi. <sup>23</sup> \* Ta vaidi tomotau 'aiwe 'ala'alaina 'inega ona lihi efaledi ta ona 'etoyavuidi. Ta wese vaidi tomotau ona nuakolokoloyedi, ta taumiega ona 'itamaki aqiaqiemu tuta nana oiuiuledi, mana ba'e tomotau diavona edi ilivu bwavubwavuna iviaviaqidi, 'inega wese adi kaleko ni'a ivebwavubwavu 'wafidi 'inega. E 'inega luaqiaqiemu be ona 'itamaki aqiaqiemu fole omi'a wese ilivu diavona ona viaqidi.

*Awatubo be vona veyoluba*

<sup>24</sup> Yaubada kana awahawatuboya, mana tauna ana fata otaqa na'itamakida be yaqisa ge kana be'u. Tauna wese ana fata vunavunaqida be tunutunuqida me eda qaiawa na'ebe'eweda ena di'we simasimalina 'inaya. <sup>25</sup> \* Vonahaqiaqi, Yaubada ana 'aidega otaqa ada To'etoyavua eda Kaiwabu Iesu Keliso ena viaqa 'inega. Luaqiaqieda be Yaubada kana awahawatuboya, mana tauna simasimalina be, Tovewaiwai va'ine ta wese Toluvine Qiduana tuta lova 'inega be ba'itagana ta wese tuta vataya 'inaya. Vonahaqiaqi, eda nuanua 'idewani.

---

\* 1:20: Kol 2:7      \* 1:23: Sek 3:2; Ve 3:4      \* 1:25: Lom 16:27; 2Fit 3:18

## Yaubada ena Ve'ita Ioni 'inaya

### *Buki ana alamani weaqina*

Ioni ena 'wayavi ba'e 'inega kana alamania tola'ai 'ifoqe 'inaya tuta nana italafelea bwanabwana Fatimosi 'inaya, mana me Loma ni'a ikafia ta ia'uya bwanabwana nana 'inaya. Ta ena toa 'iuna mana Yaubada ena vona ta wese Iesu Valena yawala dadanea di'we taha taha 'idia. (1:9)

Ta Ioni nana wese Iesu Valena ana to'wayavi, ta wese ena leta kukusadi toidi 'wayavidi vaina 'ekalesia 'idia. Ta ba'e buki nana ana avutugu magilafuna kana 'itedi: Da'a 1 'inega be da'a 3 'inaya Ioni 'ekalesia ana yau seveni 'idia 'wayavia sabi vona iuladi be sabi givetunuqidi, ta wese nuanuana edi vetumaqana 'inaya ina tovoloi'ita tuta nana vevoalana ina lobei. Ta da'a 4 'inega be da'a 22 'inaya Yaubada ena ve'ita Ioni 'inaya weaqina. 'Inega Ioni kavona ve'wayoqega yani taha taha matanaya i'ifoqe 'itedi tuta maimai weaqina ta wese tomotau edi toa vataya weaqina.

Ta ba'e buki nana 'inaya Yaubada ena ve'ita Ioni 'inaya ge 'idewani Buki Gwalagwalana qabudi gamonaya, ta 'esi kavona ma'ama'ayau 'inega yani qabuna weaqidi ve'ita 'ifoqeyea 'iawanaya. Ta Ioni matanaya ve'ita 'eala 'itedi Seitani ena vevoalana Yaubada 'inaya. Ta wese 'itea ma'oda 'inega Yaubada Seitani ma enavo navewaiwai va'inedi, ta wese ma'oda naluvematasabu 'aiqedi. Ta buki nana ana 'ebelu'ovoa 'inaya vematam-agilafuyeda Iesu me ena luvine waiwaina na'evivi mai bwa'obwa'oya. 'Inega mahala be wese bwa'obwa'o vauvaudi ina 'ifoqe, ta omo'e 'inaya Yaubada ena tomotauyavo toa vataya aqiaqi otaqina ina lobei.

### *Buki gamona*

1:1-8 Buki ba'e ana 'wayavi 'iuna, ta wese lukaiwa 'ekalesia 'idia

1:9-3:22 Ve'ita nugweta ta wese leta 'ekalesia adi yau seveni 'idia

4:1-8:1 Fefwai nunumina adi bwedi adi yau seveni

8:2-11:19 Bea adi yau seveni imu'edi

12:1-13:18 Mwata gegoyo be yubai luveifadi magilafudi

14:1-15:8 Ve'ita taha taha Yaubada 'inega

16:1-21 Yaubada ana diavilavila gaeba adi yau seveni 'idia

17:1-20:10 Yaubada 'abaga Babiloni be, yubai luveifana be, tovesimasimana luveifana ta wese Seitani vewaiwai va'inedi

20:11-15 Luvine be luvematasabu 'ebelu'ovoa

21:1-22:5 Mahala vauvauna be, bwa'obwa'o vauvauna ta wese Ielusalema vauvauna

22:6-21 Vona 'ebelu'ovoa

### *Vematamagilafu*

<sup>1</sup>\* Nugweta Yaubada ve'ita Iesu Keliso neia tola'ai nawale na'ifoqe, ta 'abibodanaya Iesu ena tovale'ewa taha vetunea ena tofewa Ioni 'inaya ba'e yani diavona sabi ve'itana, <sup>2</sup> ta 'ebelu'ovoa Ioni Iesu ena tofewayavo qabudi ba'e yani diavona weaqidi simana 'ifoqe 'idia. Ta yani diavona ni'a 'itedi, ta wese Iesu ena viaqayavo weaqina be Yaubada ena vonayavo Ioni simana 'ifoqe aqiaqiedi. <sup>3</sup>\* Ta tomeqabu ba'e 'wayavi nana Yaubada 'inega ina avoya totoa va'auta matadia luaqiaqiedi be me edi qaiawa ina totoa. Ta wese tomeqabu ba'e yani diavona inoqonoqolidi ta ina nuave'avinidi, e taudi wese adi fata ina qaiawa, mana ge tuta kuena 'inaya ba'e yani diavona Yaubada nagive'ifoqeyedi.

*Ioni ena lukaiwa* 'ekalesia adi yau seveni 'idia

<sup>4</sup>\* Ba'e 'wayavi nana ya'a Ioni 'iguyega omi'a 'ekalesia ami yau seveni 'imia di'we Eisia gamonaya.

\* 1:1: Ve 22:6 \* 1:3: Ve 22:7,10 \* 1:4: 'Ifo 3:14-15; Ve 3:1; 4:5

Egu nuanua qiduana omi'a nuakolokolo be nuadaumwala Yaubada 'inega ona lobe. Tauna tuta 'ebeve'ale be, tuta ba'itagana ta wese tuta vataya ana Yaubada. Ta wese nuanuagu ba'e toa diavona ona lobedi niboana adi yau seveni 'idiega. Taudi Yaubada ana galiva kaikaiwabuna 'iawanaya itoatoa. <sup>5</sup>\* Ta wese nuanuagu Iesu Keliso 'inega nuakolokolo nana be nuadaumwala nana ona 'ewa aqiaqiedi. Tauna tuta qabuna tovonahaqiaqi. Ta ba'e Iesu nana maduya'itoto 'aligega, ta wese tauna toluvine qabudi bwa'obwa'oya veqidua va'inedi.

Tauna veveyolubeda qiduana, ta yawaina be sulalina awafelea weaqida, e ba'e 'inega eda ilivu luveifadi 'idega 'ewa yavuledi. <sup>6</sup>\* Ta Iesu ni'a venua'ivineda ena tomotauyavo ta wese ena tovegubayavo 'idewani, be yaqisa kana vetofewa Yaubada Tamana 'inaya. Iesu kana awatuboya tuta vataya 'inaya, mana tauna Tovewaiwai ta tuta vataya ana Toluvinu Qiduana! Vonahaqiaqi, eda nuanua 'idewani.

<sup>7</sup>\* O'itei, Iesu mahalega maimai gawatega.  
Tomotau qabudi ina 'itea,  
ta wese taudi lova  
ana to'idawayavo ina 'itea.  
Ta totoa bwa'obwa'oya qabudi  
me edi nuavita ina dou tauna weaqina.  
Vonahaqiaqi, ba'e yani diavona ina 'ifoqe aqiaqi.

<sup>8</sup>\* Eda Kaiwabu Yaubada vonaya, "Ya'a Alofa be Omega, yani qabuna edi 'ebeve'ale ta edi 'ebelu'ovoa!" Ta wese tauna tuta ba'itagana be tuta lova ta wese tuta maimai ana Yaubada. Ta tauna Tovewaiwai va'ine.

*Ioni Tomotau Natuna* 'ite'itea

<sup>9</sup>Ya'a iami Ioni be omi'a ni'a kave'aidega Keliso maega. Ta ita'a qabuda me eda bibitaqo visiqa be wese veilaqe 'aidegana kalobelobebe eda fewa Iesu 'inaya weaqina. Ta me Loma ikafigu ta ia'ufelegu taha bwanabwana ana wawa Fatimosi 'inaya, ta omo'e 'inaya yatoa. Ta egu toa 'iuna mana Yaubada ena vona ta wese Iesu Valena yayawala dadanea di'we qabuna 'idia. <sup>10</sup>Inega Kaiwabu ena 'aubena taha 'inaya Nihoana Gwalagwalana 'iguya 'ifoqe yalutonovia, ta tutana 'inaya bona qiduana gwavuguyega yanoqolia ana noqola kavona bea 'idewana, <sup>11</sup>ta voneguya, "Yani qabuna u'ite'itedi fefwai 'inaya una 'wayavidi, ta leta diavona una vetunedi ina tauya 'ekalesia adi yau seveni 'idia, taudi Efeso be, Simulina be, Feligamo be, Tiatila be, Salidesi be, Filadelifia ta wese Lodisia 'idia."

<sup>12</sup>Inega yatunugivila tovana nana sabi'itana, 'inega simatala ana 'ebea'u goula 'inega ana yau seveni ya'itedi. <sup>13</sup>\* Ta nuanidia taha tomotau tovtovolo ya'itea ta ana 'ita kavona tomotau natuna me'olotona 'idewani. Ta ana kwakwalufai kuena otonega be webui 'aqenaya, ta lumalumana 'inaya ana gadi'wana goula 'inega ya'itea. <sup>14</sup>\* Ana kia be wese debana wadawadaea otaqina, ta matana adi 'ita kavona 'aiwe saesaelina. <sup>15</sup>Ta 'aqena adi 'ita kavona taha kainumu namanamalina 'idewani, ana 'ebegabu 'inaya ida gabui davevunavunaqa. Ta bonana ana noqola kavona yaqisi butuna danununuqa. <sup>16</sup>\* Ta ana 'ataqia 'wadi'wadima adi yau seveni kafikafidi, ta 'awanega taha kefata ala lualuana 'ifoqe, ta 'iawana ana 'ita kavona vala ena simatala waiwaina baba'auya 'idewani.

<sup>17</sup>\* Ta tuta nana tomotau nana ya'itea 'inega yagivelukabwebwe 'aqenaya kavona 'ali'aligigu. Ta ana 'ataqi si'otoia 'iguya ta vonegu vonaya, "Ge una mwaniniva. Ya'a 'ebeve'ale be 'ebelu'ovoa, <sup>18</sup>ta mayawaigu yatoatoa. Lova ya'aliga, ta u'itei ba'itagana ya'a mayawaigu ta totoa vatayagu. Ta nimaguya 'aliga ta wese di'we 'ebe'aliga vataya ana wawa Edesi ana kihi yakafikafia.

\* 1:5: Kol 1:18; Same 89:27 \* 1:6: 1Fit 2:9; Ve 5:10; 20:6 \* 1:7: Dan 7:13; Sek 12:10; Md 24:30; Ion 19:34-37; 1Te 4:17 \* 1:8: Ve 21:6; 22:13 \* 1:13: Dan 7:13; 10:5 \* 1:14: Isi 43:2; Dan 7:9; 10:6; Ve 2:18; 19:12 \* 1:16: Ibe 4:12; Ve 2:12; 19:15 \* 1:17: Ais 44:6; 48:12; Ve 2:8; 22:13

<sup>19</sup> “Inega ba'e yani diavona ni'a u'itedi una 'wayavidi fefwai 'inaya, ta wese toyani ba'itagana u'ite'itedi, ta wese tola'ai nawale na'ifoqe tuta maimai 'idia weaqina. <sup>20</sup> Ta tola'ai ni'au u'itedi ena givesimalalidi 'iuya. 'Wadi'wadima seveni adi yau nimaguya u'itedi adi alamani taudi 'ekalesia adi yau seveni adi tovale'ewayavo. Ta simatala ana 'ebea'u goula 'inega wese adi yau seveni ni'a u'itedi adi alamani taudi 'ekalesia seveni weaqidi.

## 2

### *Me Efeso edi leta*

<sup>1</sup>\* “Taha leta una 'wayavia 'abaga Efeso 'ekalesia ana tovale'ewa 'inaya be una vonaya:

Vale ba'e maimai tauna 'wadima seveni adi yau kafikafidi 'ataqinega, ta simatala ana 'ebea'u goula 'inega adi yau seveni nuanidiega tautauya, tauna ba'e ena simana 'imia vonaya, <sup>2</sup>\* Emi viaqayavo qabudi ni'a yahalamani aqiaqiedi, ta wese emi vetafe'wa waiwai ya'a weaqigu me emi gwavubiga ni'a ya'itedi. Ta emi noga tomotau luveifadi weaqidi ya'itea, ta wese tomeqabu taudiega igabedi tovaletuyana aqiaqidi ni'a otovodi 'inega edi u'ava oalamani aqiaqiea. <sup>3</sup> Ta wese me emi bibitaqo fewa vitavitadi ta qiduquduadi oviaqidi agu wawa weaqina, ta 'idiega ge oda dawalili.

<sup>4</sup> Ta yani 'aideganamo ge aqiaqina 'imia ya'itea, vonigo lova tuta nana ove'ale ovetumaqanegu 'inega oveyolubegu qiduana, ta 'esi ba'itagana emi veyoluba 'iguya ni'au vegoyo. <sup>5</sup>\* Ta veyoluba nana ona nuave'avinia, mana ena vegoyo 'inega ni'a obe'u. 'Inega ona nuagivila, ta viaqa diavona omaduviaqidi ona lu'eviviedi. Ta 'eguma ge ona nuagivila, e 'inega ena wai be emi simatala ana 'ebea'u ena 'ewa yavulea 'imiega. <sup>6</sup> Ta yahalamania taha wese yani aqiaqina oviaqia, mana Nikoleitani me ena qabuyavo edi ilivu ni'a onogea 'edewana wese ya'a ilivu diavona yanogedi.

<sup>7</sup>\* 'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi. Ta tomeqabu ilivu luveifana ina vewaiwai va'inea, e taudi ena awafeledi be Yawai ana 'Aiwe vuaqina ina 'ainia, ta 'aiwe nana tovtovolo Yaubada ena vaoqa ana wawa Faladaisi 'inaya.

### *Me Simulina edi leta*

<sup>8</sup> “Taha leta una 'wayavia 'abaga Simulina 'ekalesia ana tovale'ewa 'inaya be una vonaya,

Vale ba'e maimai tauna 'ebeve'ale be 'ebelu'ovoa 'inega, tauna lova 'aliga ta ni'a ya'itoto 'evivi ta mayawaina toatoa. Tauna ba'e ena simana 'imia vonaya, <sup>9</sup>\* Ni'au yahalamania emi toa vitana be wese emi velukwalukwa, ta 'esi ona nuave'avinia omi'a kaikaiwabumi mana yahalamanimi. Ta wese ni'au yahalamania vonigo vaidi Seitani ena qabuyavo i'awa'awa luveifemi. Taudiega igabedi vonigo me Diu, ta taudi gebu, ta 'esi taudi Seitani ena qabuyavo. <sup>10</sup>\* Omi'a tuta maimai 'idia visiqa ona lobe, ta ba'e yani diavona weaqidi ge ona mwaniniva. Nawale vaina 'imiega Seitani naha'uluguyemi vanue 'ebeyoqona 'inaya. Ta 'aubena teni 'idia nasitonovimi vita be visiqa 'idiega. Ta vita diavona 'idiega nage ona 'aliga 'waqi, ta tua emi vetumaqana ge ona nopei, ta 'esi ona tovolovola 'ita ana laba 'aliga, be 'inega yawai vataya ena neimi.

<sup>11</sup>\* 'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi. Ta tomeqabu ilivu luveifana ina vewaiwai va'inea, e taudi ge wese 'aliga vemagilafuna nagiveluveifedi.

\* 2:1: Ve 1:16 \* 2:2: 1Ion 4:1 \* 2:5: Ve 3:3 \* 2:7: Nug 2:9; Ve 22:2,19 \* 2:9: 2Kol 11:14-15; Ve 3:9  
\* 2:10: 2Tim 4:8; Iem 1:12 \* 2:11: Ve 20:14; 21:8

*Me Feligamo edi leta*

<sup>12</sup> “Taha leta una 'wayavia 'abaga Feligamo 'ekalesia ana tovale'ewa 'inaya be una vonaya,

Vale ba'e maimai tauna me ena kefata ala lualuana 'inega, tauna ba'e ena simana 'imia vonaya, <sup>13</sup> Ni'au yahalamaniana omi'a otoatoa taha 'abaga Seitani ena 'ebeluvine gamonaya. Ta 'abaga nana 'inaya lova taha agu tosimana aqiaqi ana wawa Anitifasa toluveifadi iluve'aligia. Ta omo'e tuta nana 'inaya omi'a emi vetumaqana 'iguya ge oda vegeqea, ta 'esi nawale okafi'i'ihia.

<sup>14</sup> \* Ta 'esi emi ilivu vaina weaqidi ge eda qaiawa, mana Balami ena ve'itayavo nawale okafikafidi. Lova ena ve'itayavo Balakia 'abibodedi, 'inega me Isileli ilivu luveifana ve'itedi be 'abwaga vevegubana tokwalui 'idia taudiega i'ainia be wese ivelamo'eno kavokavovo, e ba'e ilivu diavona 'inega ibe'u. <sup>15</sup> Ta wese 'idewani vaina emi 'ekalesia gamonega Nikoleitani me ena qabuyavo edi ve'ita luveifana i'abi'abibodedi. <sup>16</sup> 'Inega nuanuagu ba'itagana ilivu diavona 'idiega ina nuagivila. Ta 'eguma gebu, 'inega lukwayavonega ena wai be kefata nana 'awaguyega 'ifo'ifoqe 'inega ena luaviedi.

<sup>17</sup> \* 'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi. Ta aqabu Seitani ivewaiwai va'inea, e taudi 'abwaga 'wai'waivina ana wawa mana ena neidi. Ta wese dabo wadawadaeadi ena neidi, ta dabo diavona 'idia wawa vauvauna ena 'wayavia. Ta dabo nana ana to'ewa dimo wawa nana ina alamaniana.

*Me Tiatila edi leta*

<sup>18</sup> \* “Taha leta una 'wayavia 'abaga Tiatila 'ekalesia ana tovale'ewa 'inaya be una vonaya,

Vale ba'e maimai Yaubada Natuna 'inega, tauna matana adi 'ita kavona 'aiwe saesaelina ta wese 'aqena kavona kainumu 'aye'ayea 'idewani. <sup>19</sup> Tauna ba'e ena simana 'imia vonaya, Emi viaqayavo ni'au yahalamanidi be, emi veyoluba be, emi vetumaqana be, emi fewa ta wese emi bibitaqo. Ta yahalamaniana ba'itagana emi viaqayavo aqiaqi otaqidi, ge 'idewani lova.

<sup>20</sup> \* Ta 'esi ge eda qaiawa taha yani weaqina, mana vavine Iesibeli ena vona o'awahaqiaqiea vonigo tauna Yaubada ana tosimana taha. Ta tauna gebu, mana vavine nana egu tofewayavo lihidi ilugu ilivu luveifadi 'inaya 'idewani velamo'eno kavokavovo ta wese 'abwaga vevegubana tokwalui 'idia 'inega veve'ainidi. <sup>21</sup> Ta vavine nana ena tuta ni'a yaneia ena nuagivila weaqina, ta tua ge nuana velamo'eno ilivuna nanogei. <sup>22</sup> 'Inega ya'a vavine nana ena a'uya vihiqa luveifa otaqina ana 'ivi 'inaya, be tomeqabu tauna maega luabu ilivuna ina viaqia e visiq qiduana ina lobe. E ba'e 'idewani ena viaqia 'eguma edi ilivu luveifadi 'idiega ge ida nuagivila. <sup>23</sup> \* Ta wese ana to'abibodayavo ena luve'aligidi be 'inega 'ekalesia qabudi ina alamanigu ya'a tomotau qabudi edi nuanua qabuna giwalidia yahalahalamaniana. Ta wese qabumi 'imia ena ve'iemi emi ilivuyavo adi 'etofwafwa 'idiega.

<sup>24</sup> Ta me Tiatila aqabu omi'a ba'e ilivu diavona ge oda viaviaqidi be wese Seitani ena ve'itayavo 'wai'waividi ge oda alamanidi, e omi'a ge wese ami 'ava'avala vitana ena luvetomanei. <sup>25</sup> \* Ta 'esi omi'a emi ilivu aqiaqidi ona kafi'i'ihidi ana laba ena 'evivi mai.

<sup>26</sup> \* Ta wese taha toga Seitani navewaiwai va'inea be egu nuanua naviaqia ana laba tuta 'ebeluvine 'inaya, e tomotau nana 'abiluvine be waiwai ena neia bwa'obwa'o ana di'we qabuna 'idia. <sup>27</sup> Buki Nugwenugweina vonaya,  
‘Tauna tomotau qabudi naluvinedi

\* 2:14: Naba 22:1-25:3; 31:16 \* 2:17: 'Ifo 16:4,14-15,33-34; Ion 6:48-50; Ais 62:2 \* 2:18: Ve 1:14-15  
\* 2:20: 1Kin 16:31; 2Kin 9:22 \* 2:23: Same 7:9; Iel 17:10; Ve 20:12-13 \* 2:25: Ve 3:11 \* 2:26: Same 2:8-9

kewala viaviaqina kainumu 'inega,  
ta na'aufisalidi kavona 'ulena 'idewani.'

<sup>28</sup>\* Ta ya'a wese 'idewani 'abiluvine ni'a ya'ewea Tamagu 'inega, e 'inegana agu fata be tomotau nana 'awa'awai ana 'ubwana ena neia.

<sup>29</sup>'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi.

### 3

#### *Me Salidesi edi leta*

<sup>1</sup>\* "Leta taha una 'wayavia 'abaga Salidesi 'ekalesia ana tovale'ewa 'inaya be una vonaya,

Vale ba'e maimai tauna Yaubada Niboanina seveni be wese 'wadima seveni 'inaya itoatoa 'inega. Tauna vonemi vonaya, Emi viaqayavo ni'au yahalamanidi ta wese valem i yanoqolia vonigo mayawaimi. Ta 'esi gebu, mana niboanimiti 'ali'aligidi. <sup>2</sup>'Inega 'eno'enyega ona ya'itoto, ta tola'ai yani goyona 'imia nawale 'eno'eno ona givewaiwaiea. Ta wese yahalamania emi viaqayavo vaina Yaubada 'iawanaya ge tunutunuqidi. <sup>3</sup>\* Lova ve'ita o'ewea be onoqolia, ta ba'e ve'ita nana ona nuave'avinia ta wese ona matayagea, 'inega ona nuagivila. Ta 'eguma ge ona ya'itoto, 'inega nawale ena wai be ena luveafemi kavona tovanawala 'edewana, ta egu tuta wai 'imia ge oda alamania.

<sup>4</sup>\* Ta omi'a me Salidesi 'imiega 'evisa mimo ami kaleko ge oda givebwavudi. 'Inega luaqiaqiemi be nawale omi'a ya'a maega kana tauya ma ada kaleko wadawadaeana, mana Yaubada ni'a 'awahaqiaqiemi. <sup>5</sup>\* Ta wese 'idewana tomeqabu Seitani ivewaiwai va'inea, e taudi adi kaleko wadawadaeana wese ina veaqedi, ta adi wawa ge ena 'weu yavuledi Yawai ana Buki 'inega, ta 'esi adi wawayavo ena simana 'ifoqeyedi Tamagu be ena tovale'ewayavo matadia, mana taudi vonahaqiaqi egu tomotauyavo.

<sup>6</sup>'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi.

#### *Me Filadelfia edi leta*

<sup>7</sup>\* "Taha leta una 'wayavia 'abaga Filadelfia 'ekalesia ana tovale'ewa 'inaya be una vonaya,

Vale ba'e maimai tauna gwalagwalana ta tunutunuqina 'inega, ta wese taunana nimanaya kini Deibida ena kihi kafikafia. Ta 'eguma 'awa nasiwa'ea ge taha toga ana fata be nagudui, ta wese 'eguma 'awa nana naguduya ge taha toga ana fata nasiwa'ei. Ta vonemi vonaya, <sup>8</sup>\* Emi viaqayavo ni'au yahalamanidi ta wese yahalamania vonigo tufwana ni'a odawalili. Ta tua egu vonayavo nawale o'abi'abibodedi ta wese ge oda vegeqegu. 'Inega 'awa ni'a yasiwa'ea weaqimi, ta ge taha toga ana fata be nagudui.

<sup>9</sup>\* Onoqola aqiaqiegu! Nawale Seitani ena qabuyavo vaina 'idiega ena awafeledi be ina mai 'imia. Taudiega ivonaya vonigo taudi me Diu, ta 'esi iu'au'ava mana taudi ge me Diu. 'Inega ena luvinedi be ina iwa'odu 'iawamia be 'awadiega ina simana 'ifoqeyea vonigo ni'a ialamani aqiaqiea ya'a yaveveyolubemi qiduana. <sup>10</sup>\* Lova ni'a yavonemi me emi bibitaqo ona toatoa. Ta nawale tuta vitana na'ifoqe bwa'obwa'oya be tomotau qabudi 'ebesitonova ina lobedi. Ta ya'a tuta diavona 'idiega ena vabodebodemi, mana egu vona ovematamatayagea.

\* 2:28: Ve 22:16 \* 3:1: Ve 1:4,16 \* 3:3: Md 24:43-44; Ve 2:5; 16:15; 1Te 5:2 \* 3:4: Iud 23 \* 3:5: 'Ifo 32:32-33; Md 10:32; Lk 12:8 \* 3:7: Ais 22:22 \* 3:8: 1Kol 16:9 \* 3:9: Ve 2:9 \* 3:10: Lk 21:19; 2Tim 2:12



<sup>11</sup> Ya'a tuta goyona ena wai, ta toyani 'imia 'eno'eno e ona kafi'i'ihia be yaqisa ge taha toga ana fata yani diavona adi ve'ia 'imiega na'ewa yavulei. <sup>12</sup>\* Ta tomeqabu ilivu luveifana ivewaiwai va'inedi e taudina ena vetovolodi 'idewani 'oqola egu Yaubada ena Vanue Gwalagwalana 'inaya, ta omo'e 'inaya ina toa vataya. Ta egu Yaubada ana wawa ta wese ya'a agu wawa vauvauna ena 'wayavia 'oqola dina 'idia. Ta egu Yaubada ena 'abaga Ielusalema vauvauna tuta goyona mahalega nawebui mai egu Yaubada 'inega. Ta ya'a ena 'awahaqiaqiedi taudi toni'abaga aqiaqi 'abaga nana 'inaya.

<sup>13</sup> 'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi.

*Me Lodisia edi leta*

<sup>14</sup> "Taha leta una 'wayavia 'abaga Lodisia 'ekalesia ana tovale'ewa 'inaya be una vonaya,

Vale ba'e maimai tauna igabea 'Ameni' 'inega. Tauna tosimana tunutunuqina ta Yaubada ena 'iva'ava'ata qabuna ana toluvine. Ta vonemi vonaya, <sup>15</sup>\* Emi viaqayavo be wese emi toa qabudi ni'a yahalamani aqiaqiedi. Ta emi veyoluba 'iguya gebu 'wea'weavina ta wese gebu fayou'una. Ta nuanuagu qiduna taha 'idiega oda venua'ivinea. <sup>16</sup> Ta 'esi omi'a kavona go'ila lemwalemwana, mana emi veyoluba 'iguya ge 'wea'weavina nage fayou'una. 'Inega ya'a kavona yani kavokavovo weaqimi, ta ba'e 'inega 'awaguyega ena gida'wa yavulemi. <sup>17</sup>\* Ta omi'a taumi weaqimi ovonaya, "Ita'a kaikaiwabuda, ta ge taha yani 'inega kada kusa, ta 'esi yani qabuna 'idaya 'eno'eno!" Ta yavona aqiaqiem, nawale nuami ge da'eqa'uya, mana niboanimi 'inaya omi'a lukwalukwami be, nuakolokolomi be, sikesikewami be, matami kwayakwayana ta wese ma'igonegonemi. <sup>18</sup>\* 'Inega yalulugaihimi be 'iguyega dabo goula ni'a agivevunavunaqia 'aiwe 'ala'alaina 'inega ona gimwane be 'inega ona vekaikaiwabu, ta wese kaleko wadawadaeadi ona gimwanedi be ona veaqedi 'inega ge wese ona vema'igonegone 'evivi. Ta wese mulamula ona gimwane be matami ona 'e'abi'abia, 'inega ina veaqiaqi ta ana fata ona 'ita 'evivi.

<sup>19</sup>\* Ya'a tomeqabu yavevevolubedi, e wese ya'a adi togivetunuqa be adi tolugaihi. 'Inega emi luveifanayavo 'idiega ona nuagivila ta 'esi ya'a weaqigu ona vetafe'wa waiwai. <sup>20</sup>\* Onoqoli! Ya'a 'awa 'inaya yatovotovolo ta ya'au'auveida'a. 'Eguma taha toga bonagu una noqolia ta 'awa nana una siwa'ea, e 'inega ena lugu wai eu vanuea ta o'a be ya'a kana 'ai.

<sup>21</sup> Ta 'eguma taha toga toluveifana navewaiwai va'inea 'inega tomotau nana luaqiaqiea be ya'a maega ana toabui agu galiva kaikaiwabuna 'inaya, 'idewani ya'a wese toluveifa nana ni'a yavewaiwai va'inea ta Tamagu ana galiva kaikaiwabuna 'inaya maega atoatoa.

<sup>22</sup> 'Inega 'eguma taha toga Niboana Gwalagwalana ena vona 'ekalesia 'idia nanoqolia, e 'inega tomotau nana luaqiaqiea be ba'e vona diavona adi alamani nasali aqiaqiedi."

## 4

*Awatubo mahalaya*

<sup>1</sup>\* Kaiwabu ena vona 'iguya gumwala, 'inega taha 'awa wa'awa'ana ya'itea, ta omo'e 'awa nana mahala ana 'ebelugu. Ta bona nana yanoqola 'eviviea ana noqola kavona bea butuna danununuqa ta vonegu vonaya, "U'watovu mai 'iguya ta tola'ai nawale na'ifoqe tuta maimai 'idia ena ve'iteu." <sup>2</sup>\* Ba'e tuta nana 'inaya Yaubada Niboanina ena waiwai yalutonovia 'ifoqe mai 'iguya luveagatuna'igu, 'inega mahalaya taha galiva kaikaiwabuna

\* 3:12: Ais 62:2; 65:15; Ve 14:1; 21:2 \* 3:15: Lom 12:11 \* 3:17: 1Kol 4:8; Lk 12:21 \* 3:18: Ais 55:1 \* 3:19: 1Kol 11:32; Ibe 12:6; Ve 2:5 \* 3:20: Ion 14:23 \* 4:1: Ve 1:1,19 \* 4:2: Ais 6:1

ya'itea, ta 'inaya taha tomotau toabui toatoa. <sup>3\*</sup> Ta ana 'ita kavona dabo kaikaiwabudi adi wawa yasifa be kanelieni, ta ana galiva kaikaiwabuna siaebadi simasimalina sivivilia, ta ana simatala namanamalina kavona dabo kaikaiwabuna ana wawa emelodi 'idewani. <sup>4\*</sup> Ta wese galiva kaikaiwabudi adi yau 24 itoa vivilia. Ta galiva diavona 'idia kaiwabu adi yau wese 24 itoatoa, ma adi kaleko wadawadaeadi ta debadi ana biatuli namanamalidi goula 'inega. <sup>5\*</sup> Ta tomotau nana ana 'ita kavona dabo namanamalidi ana galiva 'inega namala 'wai'waia ta yavalata butuna 'ifo'ifoqe. Ta galiva nana 'iawanaya odamu seveni isaesaela, e taudi ive'ebe'ita Yaubada Niboanina adi yau seveni weaqidi. <sup>6\*</sup> Ta wese ana galiva kaikaiwabuna 'iawanaya taha yani ana 'ita 'idewana mwade'wa daumwalina ya'itea, ta ana 'ita kavona gelasi 'aye'ayea. Ta galiva nana di'wenaya yani 'iva'ava'aidi mayawaidi adi yau foa itovolo vivilia, ta du'udi qabuna ma matadi.

<sup>7</sup> Ta 'iva'ava'ata diavona adi 'ita ba'e 'idewani: Taha ana 'ita 'idewani laioni, ta taha 'idewani bulumakau, ta wese taha 'iawana ana 'ita kavona tomotau, ta vefoana kavona magisubu dayewayewa. <sup>8\*</sup> Ba'e foadina 'aidega 'aidega fafedi ana yau sikisi, ta fafe diavona 'idia mata 'eala debanaya ta wese 'ayanaya. Ta 'aubena be wese velovelovana 'aidega 'aidega 'idia ge ida lua'u 'evosi, ta adi 'evosi ba'e 'idewani:

“Eda Kaiwabu Yaubada Tovewaiwai tauna  
Gwala, Gwala, Gwala.  
Tauna tuta lova, be ba'itagana,  
ta wese tuta maimai 'idia toatoa.”

<sup>9</sup> Toatoa Vatayana ana galiva kaikaiwabuna 'inaya toabui, ta tuta qabuna 'iva'ava'ata diavona ba'e 'evosi nana 'inega awatubo be 'amayaba ta wese lukaiwa ineineia. <sup>10\*</sup> Ta tuta nana 'iva'ava'ata diavona i'evos'evosi 'inega kaiwabu diavona 24 igivelukabwebwe, ta Toatoa Vatayana ana galiva kaikaiwabuna 'iawanaya iawahawatuboya. Ta debadi adi biatuliavo namanamalidi ia'uwebuiedi galiva kaikaiwabuna 'iawanaya, ta ivonaya,

<sup>11</sup> “O'a ema Kaiwabu ta ema Yaubada  
luaqiaqiema be ana awatubou  
ta ana 'amayabeu,  
mana o'a eu waiwaiega  
ta wese eu nuenuega kuyavata  
qabuna u'iva'ava'aidi i'ifoqe,  
'inega ba'itagana nawale itoatoa.”

## 5

### *Fefwai nunumina ta Yaubada ena Lami*

<sup>1\*</sup> 'Inega fefwai nunumina ya'itea galiva kaikaiwabuna ana totoa ana 'ataqia, ta fefwai nana ma di'wena 'waya'wayavidi, ta ana 'ebewedi ve'alata adi yau seveni. <sup>2</sup> Ta wese taha tovale'ewa waiwaina ya'itea tauna bonana qiduanega simana 'ifoqeyea vonaya, “Togama ana luaqiaqi be bwedi ba'e na'ewa yavuledi ta fefwai nunumina natanai?” <sup>3</sup> Ta vonahaqiaqi, ge taha toga dalobei mahalaya nage bwa'obwa'o debanaya nage 'ayanaya ana luaqiaqi be fefwai nana natanai ta nahavoi. <sup>4</sup> 'Inega nuagu vita aqiaqi ta yadou, mana ge taha toga dalobei be ana luaqiaqi fefwai nana datanai ta gamona da'itei. <sup>5\*</sup> 'Inega kaiwabu diavona taha 'idiega voneguya, “Ge una dou, yubai Laioni Iuda ena gade 'inega tauna kini Deibida 'aqegigina ana fata, mana tauna toluveifana ni'a vewaiwai va'inea. E 'inega luaqiaqiea be fefwai nunumina ana bwedi adi yau seveni na'ewa yavuledi ta natanai.”

<sup>6\*</sup> 'Inega taha Lami ya'itea tovtovolo galiva kaikaiwabuna nuani otaqinaya, ta 'iva'ava'ata taudi foa mayawaidi ta wese kaiwabu 24 dina itoa vivilia. Ta Lami nana ana 'ita kavona ida luve'aligi. Ta donana adi yau seveni ta wese matana seveni, ta ba'e

\* 4:3: Isi 1:28    \* 4:4: Ve 3:18    \* 4:5: Isi 1:13; Sek 4:2; Ve 1:4; 8:5; 11:19; 16:18    \* 4:6: Isi 1:5-10,22; 10:14  
\* 4:8: Ais 6:2,3; Isi 1:18; 10:12    \* 4:10: Ve 7:10; 19:4    \* 5:1: Ais 29:11; Isi 2:9-10    \* 5:5: Nug 49:9; Ais 11:1,10;  
Ve 22:16    \* 5:6: Sek 4:10; Ion 1:36; Ve 13:8

yani diavona ive'ebe'ita Yaubada Niboaninavo adi yau seveni weaqidi, ta seveni dina lova ni'a vetunedi di'we qabuna 'idia bwa'obwa'o debanaya. <sup>7</sup> Ta Lami nana tauya galiva kaikaiwabuna ana totoa 'inaya, ta ana 'ataqiega fefwai nunumina 'ewea. <sup>8</sup> \* Ni'a 'ewea, 'inega 'iva'ava'ata diavona mayawaidi ta wese kaiwabu diavona Lami nana matanaya tuqatuqadiega isobadi ta ihiwa'odu 'inaya. Qabudi edi 'ebelaha ana wawa afi nimadia ikafikafidi, ta wese me edi gaeba viaviaqidi goula 'inega, ta gaeba diavona luluveagatuna'idi dede'wa meilana aqiaqi otaqina 'inega. Ta ba'e meilanana ana alamani taudi Yaubada ena tomotauyavo edi venoqi.

<sup>9</sup> \* 'Inega taha 'evosi vauvauna i'evosiea ivonaya,  
 "O'a luaqiaqieu be fefwai nunumina una 'ewea,  
 ta ana bwedi una 'ewa yavuledi,  
 mana ni'au iluve'aligi.

Ta eu 'aliga be wese sulaliu 'inega,  
 tomotau ni'a ugubaufedi Yaubada weaqina,  
 ta tomotau diavona mali bona be,  
 mali di'we be, mali gade be, wese mali 'wafi 'idiega.

<sup>10</sup> \* Ta o'a uvenua'ivinedi be eu 'Ebeluvine gamonaya  
 ina vetoveguba Yaubada ena fewa weaqina,  
 ta wese di'we qabuna bwa'obwa'oya ina 'abiluvinedi."

<sup>11</sup> \* 'Inega wese Yaubada ena tovale'ewayavo avo 'wayoqidi be kaiwabu diavona ta wese 'iva'ava'ata diavona galiva kaikaiwabuna itovolo vivilia ya'itedi, <sup>12</sup> ta edi 'evosi bonadi qiduanega yanoqolia ivonaya,  
 "Lami nana ni'a iluve'aligia  
 tauna kana 'amayabea.

Luaqiaqiea be awatubo ta wese 'amayaba nalobea 'idega,  
 mana tauna tovewaiwai be,  
 to'abiluvine be, tovekaikaiwabu  
 ta wese toalamani aqiaqi."

<sup>13</sup> E 'inega Yaubada ena 'iva'ava'atayavo qabudi mahalaya be, bwa'obwa'oya be, bwa'obwa'o 'ayanaya ta wese mwade'waya yanoqolidi i'evosiea ivonaya,  
 "Tauna galiva kaikaiwabuna 'inaya totoa  
 ta wese Lami nana kana awatubodi  
 ta kana 'amayabedi,  
 mana taudi tovekaikaiwabu  
 ta wese tovewaiwai tuta vataya 'idia."

<sup>14</sup> 'Inega 'iva'ava'ata foa mayawai dina ivonaya, "Vonahaqiaqi, ema nuanua 'idewani." Ta wese kaiwabu diavona isobadi ta ihiwa'odu 'inaya.

## 6

*Fefwai nunumina ana bwedi sikisi Lami nana 'ewa yavuledi*

<sup>1</sup> \* Ta Lami nana ya'itea tuta nana bwedi nugwenugweina seveni dina 'idiega 'ewa yavulea, 'inega 'iva'ava'ata diavona taudi foa mayawaidi taha 'idiega yanoqolia bonana kavona yavalata vonaya, "Umai!" <sup>2</sup> \* 'Inega 'iawaguya yubai osi wadawadaeana ya'itea. Osi nana gwavunaya ana togelu me ena tufu totoa, ta ana biatuli debanaya ia'uya. 'Inega osiega vihila tauya ta voalanavo qabudi maega ivedavi ta vewaiwai va'inedi.

<sup>3</sup> Ta tuta nana Lami nana bwedi vemagilafuna 'ewa yavulea, 'inega 'iva'ava'ata diavona foa 'idiega wese taha yanoqolia vonaya, "Umai!" <sup>4</sup> 'Inega wese taha osi ya'itea bweabwealina 'ifoqe. Ta Yaubada ena waiwai ta wese kefata kuena osi ana togelu neia, 'inega

\* 5:8: Ve 8:3-4; Same 141:2 \* 5:9: Same 96:1; 98:1 \* 5:10: 'lfo 19:6; Ais 61:6; Ve 1:6; 20:6 \* 5:11: Dan 7:10; lbe 12:22 \* 6:1: Ve 4:7; 5:1,6 \* 6:2: Sek 1:8; 6:1-6

ana fata be toadaumwala na'ewa yavulei bwa'obwa'oyega be yaqisa tomotau taudiega ina vedavi ta ina luve'aligidi.

<sup>5</sup> Ta tuta nana Lami nana bwedi vetoina 'ewa yavulea, 'inega wese gaba yanoqolia 'iva'ava'ata vetoina 'inega vonaya, "Umai!" 'Inega taha osi kwaukwausina ya'itea, ta ana togelu nimanaya kulufa ana 'ebesikele kafikafia. <sup>6</sup> 'Inega taha bona yanoqolia 'iva'ava'ata diavona mayawaidi foa 'idiega vonaya, "Abwaga witi ana vita kilo 'aidegina ana maisa navaneqa kavona taha tomotau ena fewa 'aubena 'aidegina ana ve'ia 'idewani. Ta 'abwaga bali\* kilo toi weaqina ana maisa lelelea kavona 'aubena 'aidegana ana fewa ana ve'ia 'idewani. Ta 'esi dede'wa ta wese 'oine adi maisa kavona lova 'idewani ta ge wese navedumaduma!"

<sup>7</sup> Ta tuta nana Lami nana bwedi vefoana 'ewa yavulea 'inega wese 'iva'ava'ata mayawai dina 'idiega vefoana bonana yanoqolia vonaya, "Umai!" <sup>8</sup>\* 'Inega yavevekova ta wese taha osi ya'itea 'ifoqe ta 'wafina lukovuya kavona to'aliga 'wafidi. Ta osi nana ana togelu ana wawa 'Aliga, ta 'abibodanega taha tomotau to'aliga edi di'we ana wawa Edesi 'inega talatala'obe. Ta Yaubada magilafudina 'abiluvine neidi vaina di'we bwa'obwa'oya weaqina, e 'inega adi fata di'we diavona adi totoa ina luve'aligidi vedavi be, botana be, vihiqa ta wese yubai sasasadi 'idiega.

<sup>9</sup> Ta tuta nana Lami nana bwedi vefaibina 'ewa yavulea, 'inega Vanue Gwalagwalana ana 'ebeveguba 'ayanaya tomotau niboanidi ya'itedi itoatoa. Ta taudi ni'a i'aliga Yaubada ena vona weaqina ta wese edi simana Iesu Valena weaqina. <sup>10</sup> Ta bonadi qiduanega igaba ivonaya, "Kaiwabu Tovewaiwai, o'a gwalagwalau ta wese o'a vonahaqiaqi. Ima'a tuta kuena aba'eba'e, ta ai tuta 'inaya ama toluve'aliga una luvemasabudi? Nage wese nawale ana ba'eba'e?" <sup>11</sup>\* Edi gaba gumwala, 'inega 'aidega 'aidega kaleko wadawadaeadi kuekuena Kaiwabu neidi, ta vebibina i'ewea wese tuta kukusana 'inaya ina veyawai ana laba wese ediavo taudi Iesu ena tofewayavo Seitani ena qabuyavo ina luve'aligidi kavona taudi tomatu'aliga 'idewani. Mana adi yau ana 'etofwafwa nawale ge ida lobe.

<sup>12</sup>\* Ta wese Lami nana ya'itea bwedi vesikisina 'ewa yavulea. 'Inega mwani'ini'i waiwaina 'ifoqe, ta vala lukwausia kavona 'ulena kwausina 'idewani, ta wese wai'ena lubwealia kavona sulala 'idewani. <sup>13</sup>\* Ta mahala ana 'wadi'wadimayavo iavuavuta kavona be 'ala'ai vuaqina gali'ena yaqina waiwaina dayuei ta dahavuavuta. <sup>14</sup>\* 'Inega mataguya mahala ya'itea awahawala, ta ana 'ita kavona taha toga fefwai taha danunumia di'we magilafuna 'idiega, ta bwanaga be wese bwanabwana qabudi edi 'ebetoa inogedi. <sup>15</sup>\* Ta bwa'obwa'o ana kiniavo be, ana toluvineavo be, ana tovanugwetayavo be, ana tovekaikawaiwabuyavo be, avia ana tovanamanayavo ta wese tofewa kavovoyavo be tomotau yavuyavuidi qabudi idena bwanaga 'idia, ta dabo qiduquduadi nuanidia be wese watu'ubu 'idia ioukwaiva. <sup>16</sup>\* Ta tomotau diavona bwanaga be dabo qiduquduadi igabedi, ivonaya, "Elubuini omi 'imaya o'autoqoma ta oa'ukwaivema, be yaqisa galiva kaikawaiwabuna ana totoa 'iawana ge ana 'itei, ta wese Lami nana ana diavilavila 'imaya ge nuama ana 'itei. <sup>17</sup>\* Mana magilafudi adi diavilavila ana 'aubena qiduana ni'a mai. Nage taha toga ana fata be 'aubena nana navewaiwai va'inei? Gebu, ge taha toga ana fata!"

## 7

### *Tomotau adi yau anidedi fotifoa tausani (144,000) weaqidi*

<sup>1</sup>\* Ba'e yani diavona 'abibodanaya, 'inega Yaubada ena tovale'ewa adi yau foa ya'itedi itovotovolo bwa'obwa'o ana kona foa 'idia. Ta tovale'ewa dina bwa'obwa'o ana

\* 6:6: Bali "barley" ana 'ita kavona witi, ta vuaqina tomotau daboyega ifiaqidi 'inega vefalawa ta adi beledi igabuya. Ta beledi bali 'inega ena waiwai ge 'idewani witi 'inega. \* 6:8: Isi 14:21; 5:12; Iel 15:1-3 \* 6:11: Ve 7:9,13; 19:14 \* 6:12: Md 24:29; Via 2:20; Ve 11:13; 16:18 \* 6:13: Ais 34:4 \* 6:14: Ve 16:20 \* 6:15: Ais 2:10,19,21 \* 6:16: Lk 23:30 \* 6:17: Ioe 2:11; Mal 3:2 \* 7:1: Iel 49:36; Dan 7:2

yaqina adi yau foa itovolo bodedi, be yaqisa ge taha yaqina da'ifoqe bwa'obwa'oya be mwade'waya ta wese 'aiwe 'idia. <sup>2</sup> 'Inega wese taha tovale'ewa ya'itea vanemai baba'au ena 'ebeyayaqega. Ta ba'e tovale'ewa nana Yaubada mayawaina ana 'ebe'inana miea. 'Inega bonana qiduanega gaba 'ifoqe Yaubada ena tovale'ewa adi yau foa 'idia. Ba'e taudina Yaubada ni'a luvine neidi be adi fata bwa'obwa'o be wese mwade'wa ina luveawalidi. <sup>3\*</sup> 'Inega tovale'ewa nana vonedi vonaya, "Oba'eba'e! 'Abiboda yaqina ona awafeledi bwa'obwa'o be mwade'wa ta wese 'aiwe ina giveluveifedi, ta nugweta ima'a Yaubada ena tofewayavo adi 'ebe'inana adi kia 'inaya ana a'uya." <sup>4\*</sup> 'Inega taudi Yaubada ana 'ebe'inana ni'a i'ewea adi kia 'inaya adi yau yanoqolia 'idewani anidedi fotifoa tausani (144,000), ta taudi me Isileli gade 12 'idiega.

<sup>5</sup> 'Inega Iuda ena gadeyega tomotau adi yau tuwelo tausani (12,000) 'ebe'ina nana i'ewea,

ta Lubeni ena gade 'inega 12,000,

ta Gada ena gade 'inega 12,000,

<sup>6</sup> ta Aseli ena gade 'inega 12,000,

ta Nafitalai ena gade 'inega 12,000,

ta Manasa ena gade 'inega 12,000,

<sup>7</sup> ta Simioni ena gade 'inega 12,000,

ta Libai ena gade 'inega 12,000,

ta Isaka ena gade 'inega 12,000,

<sup>8</sup> ta Sebuloni ena gade 'inega 12,000,

ta Iosefa ena gade 'inega 12,000,

ta Beniamina ena gade 'inega wese tomotau adi yau 12,000 Yaubada ana 'ebe'inana i'ewea.

*Qabu qidua va'inedi Yaubada be Lami iawahawatubodi*

<sup>9</sup> Avo gumwala 'inega wese taha qabu qiduadi ya'itedi. Ta qabu diavona di'we taha taha 'idiega be, gade taha taha 'idiega be, 'wafi taha taha 'idiega ta wese bona taha taha 'idiega. Adi kaleko wadawadaeana ta kuekuena, ta nimadia magimagi 'waena ikafikafia. Ta qabu diavona adi yo'o qidua va'inena 'inega ge taha toga ana fata be nahavodi. Taudi itovotovolo Yaubada ana galiva kaikaiwabuna be Lami nana 'iawadia, <sup>10\*</sup> ta bonadi qiduanega igaba ivonaya,

"Yaubada totoa galiva kaikaiwabuna 'inaya

ta wese Lami nana 'idiega 'etoyavua ni'a kalobea!"

<sup>11</sup> Ta Yaubada ena tovale'ewayavo qabudi galiva kaikaiwabuna be kaiwabu 24 dina ta wese 'iva'ava'ata foa mayawai dina itoa vivilidi, ta 'avalata'idi tuqatuqadiega isobadi galiva nana 'iawanaya ta Yaubada iawatuboya, <sup>12\*</sup> ta ivonaya,

"Vonahaqiaqi,

ima'a Yaubada a'ama'amayabea be a'evos'evosi 'inaya

ena alamani qiduana weaqina.

Ahawahawatuboya ta alulukaiwa 'inaya,

mana tauna Tovewaiwai ta wese Toluvine Qiduana

tuta vataya 'idia.

Vonahaqiaqi, ema nuanua 'idewani."

<sup>13</sup> 'Inega kaiwabuyavo 24 dina taha 'idiega vetala'aiegu vonaya, "Omo'e qabu dina adi kaleko wadawadaeana, taudi tomeqabu? Ta ma'inega imai?"

<sup>14\*</sup> 'Inega yavona 'eviviea yavonaya, "Kaiwabu, o'a tau'u ualahalamanidi, ta ya'a gebu." 'Inega vonegu vonaya, "Omo'e tomotau diavona taudi visiq'a be, yuvaqa be, vevoalana ta wese 'aliga ana tuta 'inega i'ifoqe mai. Ta taudi adi kalekoyavo ni'a ilu'utudi Lami sulalinega, 'inega ni'a ivewadawadaeya. <sup>15</sup> 'Inegana, ba'itagana taudi Yaubada ana galiva

\* 7:3: Isi 9:4,6; Ve 9:4    \* 7:4: Ve 14:1,3    \* 7:10: Ve 4:10; 5:6-7    \* 7:12: Ve 5:12    \* 7:14: Dan 12:1; Md 24:21

kaikaiwabuna 'iawanaya itovotovolo,  
ta 'aubena be wese velovelovana qabuna 'idia  
iawahawatuboya ena Vanue Gwalagwalana 'inaya.

Ta totoa galiva nana tuta qabuna  
taudi maega ina toatoa ta navabodebodedi.

16\* Ge taha tuta 'inaya ina botana  
nage magadi nakwavuqa,  
ta ge wese veilaqe nage visiqe ina lobei  
baba'au nage vaina yani 'wea'weavidi 'idiega.

17\* Mana Lami nana tovtovolo  
galiva kaikaiwabuna 'iawanaya  
tauna adi to'itamaki sifi,  
be na'itamakidi natauyedi salufa 'inaya,  
ta salufa nana tauna go'ila mayawaina.

Ta Yaubada mataeludi naluya'waia matadiega."

## 8

### *Bwedi vesevenina weaqina*

<sup>1</sup> Ta tuta nana Lami nana bwedi vesevenina 'ewa yavulea, 'inega yani qabudi mahalaya 'elovedi ta igenu'wana, ta tufwana tuta 'alakuena kavona 30 miniti 'idewani ge taha veqae nage giveketala butuna da'ifoqe. <sup>2</sup> 'Inega Yaubada ena tovale'ewayavo adi yau seveni ya'itedi, taudi 'iawanaya itovotovolo, ta Yaubada bea adi yau seveni neidi.

<sup>3</sup> \* 'Inega taha wese tovale'ewa 'ifoqe mai tovtovolo 'ebeveguba di'wenaya, ta tauna taha gaeba viaviaqina goula 'inega kafikafia. 'Inega taha toga dede'wa qiduana neia sabi veguba 'ebeveguba nana viaviaqina goula 'inega galiva nana 'iawanaya. Ta ba'e dede'wa nana Yaubada ena tomtauyavo edi venoqi maega vevegubayea 'ebeveguba nana 'inaya. <sup>4</sup> 'Inega dede'wa nana 'auna be wese Yaubada ena tomtauyavo edi venoqi tovale'ewa nana nimanega vanevane Yaubada 'iawanaya. <sup>5</sup> \* 'Inega tovale'ewa nana 'aiwe 'ala'alaina 'ebeveguba nana 'inega 'ewei ta gaeba nana luveagatuna'ia, ta 'abibodanaya felawebuiea bwa'obwa'oya. 'Inega yavalata be, namala be wese mwani'ini'i 'ifoqe, ta butudi nunuqa qiduana.

### *Yaubada ena tovale'ewayavo bea imu'edi*

<sup>6</sup> 'Inega Yaubada ena tovale'ewayavo seveni dina i'iva'ava'ata edi beayavo sabi mu'edi.

<sup>7</sup> \* 'Inega taha iadi ena bea mu'ea, e 'inega 'wei kavona dabo gomogomona ta wese 'aiwe 'ala'alaina sulala maega wayawayavilana iavuta webui bwa'obwa'oya. Ta bwa'obwa'o ena di'we toi 'eno'eno, ta di'we taha toi dina 'idiega 'ala'ovoia, ta wese 'aiwe qabudi taha di'we 'inaya 'ala'ovoia, ta 'esi libi bwa'obwa'o di'we qabuna 'idia 'ala'ovoia.

<sup>8</sup> 'Inega tovale'ewa vemagilafuna wese ena bea mu'ea. Ta tuta nana mu'ea 'inega taha yani ana 'ita kavona bwanaga qiduana 'ala'alaina 'ifoqe ta buini webui mwade'waya. Ta mwade'wa ena di'we toi 'eno'eno, ta di'we taha 'idiega vesulala. <sup>9</sup> Ta ba'e di'we nana gamonaya yani qabuna mayawaidi i'aliga, ta wese waga qabudi debanega ivivihila iawala.

<sup>10</sup> 'Inega tovale'ewa vetoina wese ena bea mu'ea, 'inega taha 'wadima gegoyo ena 'alata kavona odamu mahalega 'avalata'i webui go'ila be salufa 'idia. Bwa'obwa'o ena di'we toi 'eno'eno, ta di'we taha 'idiega 'wadima nana webui mai go'ila be salufa 'idia. <sup>11</sup> \* 'Wadima nana ana wawa Badabadana. Ta di'we nana 'inaya webui e omo'e 'inaya wese di'we toi i'eno'eno. Ta taha 'idiega go'ila be wese salufa qabudi ivebadabada, ta tomtau qabudi go'ila nana inumea i'elu'aliga, mana badabadana.

\* 7:16: Ais 49:10 \* 7:17: Ais 25:8; Same 23:2; Ve 21:4 \* 8:3: Ve 5:8; 'Ifu 30:1-3 \* 8:5: Luvi 16:12; 'Ifu 19:16-19; Ve 11:19; 16:18 \* 8:7: Isi 38:22; Ioe 2:30; 'Ifu 9:23-26 \* 8:11: Iel 9:15

<sup>12</sup>\* 'Inega tovale'ewa vefoana wese ena bea mu'ea. Vala 'inaya ena di'we toi 'eno'eno, ta di'we taha toi dina 'idiega veilage qiduana 'ifoqe vala nana 'inaya. Ta wese 'idewani 'ifoqe wai'ena be 'wadi'wadima 'idia. 'Inega di'we vetoina vala, be wai'ena ta wese 'wadi'wadima 'idiega velovelovana 'ifoqe 'idia. 'Aubena be wese velovelovana adi tuta toi 'eno'eno, ta tuta toi dina 'idiega tuta 'aidegina 'inaya ge taha simatala dasimatala 'aubena be wese velovelovana 'idia. <sup>13</sup>\* 'Inega ya'ita vane ta magisubu taha ya'itea yewayewa mahalaya, ta ena gaba qiduana yanoqolia vonaya, "Aioi, veilage, veilage! Toota bwa'obwa'oya veilage qiduana ona lobe, mana Yaubada ena tovale'ewa wese toidi edi beayavo tuta goyona ina mu'edi."

## 9

<sup>1</sup>\* Ta wese Yaubada ena tovale'ewa vefaibina ena bea mu'ea, 'inega 'wadima taha ya'itea ni'a 'eta'ia mahalega webui mai bwa'obwa'oya. Ta kihi ni'a 'ewea vetoa kuena ge ana 'ebel'ovoamo ana wawa Abisi\* ana 'awa weaqina. <sup>2</sup>\* Ta tuta nana vetoa nana ana 'awa siwa'ea 'inega 'au vili'waunia vaneqa kavona didiala katuinia 'idewani. 'Inega baba'au be wese yani qabuna bwa'obwa'o be mahala nuanidia velovana bodedi.

<sup>3</sup> Ta 'au nana gamonega wakifou i'ifoqe bwa'obwa'oya, ta waiwai i'ewea kavona bunelala edi waiwai 'idewani. <sup>4</sup>\* Ta wese vematamagilafu i'ewea vonaya, "Libi be, 'aiwe ta wese yani qabuna tabotabodi ge ona giveluveifedi, ta 'esi luaqiaqiemu be tomeqabu taudi Yaubada ana 'ebe'inana adi kia 'inaya ge da'eno'eno ami fata ona giveluveifedi." <sup>5</sup> Ta wakifou diavona wese vona i'ewea vonaya, "Tomotau diavona ge ona luve'aligidi, ta 'esi luaqiaqiemu be visiqqa namo ona neidi wai'ena faibi 'idia kavona bunelala edi 'uta ana visiqqa 'idewani." <sup>6</sup>\* Ta tuta nana ba'e yani diavona na'ifoqe 'inega tomeqabu visiqqa nana ni'a ilulutonovia nuauadi taudiega ina luve'aligidi, ta ge adi fata. Vonahaqiaqi, 'aliga ina sali 'wayoqea.

<sup>7</sup>\* Wakifou diavona adi 'ita kavona osi 'idewana, ta ni'a i'iva'ava'ata sabi luavia. Ta adi kia 'inaya taha yani ana 'ita kavona biatuli kaikaiwabuna viaviaqina goula 'inega. Ta 'iawadi adi 'ita kavona tomotau 'iawadi. <sup>8</sup>\* Ta wutuwutudi ana 'ita kavona vivine debadi 'idewani, ta aladi kavona yubai laioni aladi. <sup>9</sup>\* Ta lumalumadi ana lubodaboda ana 'ita kavona kainumu 'idewani. Ta fafedi butuna ena nunuqa kavona osi qabudi waga lihilihi 'inega ida vivihila sabi luavia. <sup>10</sup> Ta yiqudi ana 'ita kavona bunelala yiqudi me edi 'ebe'uta, ta 'ebe'uta nana 'inega adi fata be tomotau ina givevisiqidi wai'ena faibi 'idia. <sup>11</sup> Ta adi tovanugweta tauna vetoa nana ge ana 'ebel'ovoamo ana toluvine. Ana wawa me Ibeliu bonadiega Abadoni, ta me Guliki bonadiega ana wawa Afoloni, ta wawa diavona adi alamani "Togiveluveifa".

<sup>12</sup> Veilage taha ni'a gumwala, ta wese veilage magilafudi imaimai.

<sup>13</sup> 'Inega Yaubada ena tovale'ewa vesikisina ena bea mu'ea. Ta tuta nana mu'ea, 'inega taha bona yanoqolia 'ebeveguba viaviaqina goula 'inega. Ta bona nana yanoqolia 'ifoqe 'ebeveguba nana donana adi yau foa 'inega, ta 'ebeveguba nana tovtovolo Yaubada 'iawanaya. <sup>14</sup> 'Inega tovale'ewa vesikisina wese bona nana noqolia vonaya, "Seitani ena tovale'ewayavo adi yau foa yoqoyoqonidi una li'amidi. Taudi go'ila qiduana Eufaleti 'inaya itoatoa." <sup>15</sup>\* Ta foa dina li'ama ilobe ba'e tuta nana weaqina, ta wese 'aubena ba'e weaqina, ta wese wai'ena ba'e weaqina, ta wese ya'wala ba'e weaqina. Ta adi li'ama 'iuna, mana taudi 'iva'ava'aidi itoatoa tomotau sabi luve'aligidi. Ta totoa bwa'obwa'oya qabudi ge ida luve'aligidi. Bwa'obwa'o di'wenavo toi 'eno'eno, ta toi dina gamodiega di'we 'aidegana ana totoayavo iluve'aligidi.

\* 8:12: Isi 32:7; Ve 6:12-13 \* 8:13: Ve 9:12; 11:14 \* 9:1: Ve 20:1 \* 9:1: Ta Abisi wawa nana ana alamani ba'e: Niboana luveluveifadi edi 'ebetoa ana laba luveatasabu qiduana ana tuta 'inaya. \* 9:2: Nug 19:28; Ioe 2:2,10 \* 9:4: Ve 7:3 \* 9:6: Iob 3:21; Iel 8:3 \* 9:7: Ioe 2:4 \* 9:8: Ioe 1:6 \* 9:9: Ioe 2:5 \* 9:15: Ve 8:7-12

<sup>16</sup> Ta tovedavi qabu qidua va'inedi igaba va'auqidi. Ta simana taha adi yau weaqina yanoqolia 'idewani 200 milioni, ta qabudi osiega ni'a igelu. <sup>17</sup> Ta kavona ve'wayoqega togelu dina ta wese osi dina ya'itedi, ta adi 'ita ba'e 'idewani: Togelu dina vaidi lumalumadi adi lubodaboda adi 'ita bweabwealina kavona 'aiwe saesaelina, ta vaidi adi lubodaboda wafuwafulina, ta wese vaidi kowukowuna. Ta osi dina 'unu'unudi ana 'ita kavona laioni 'unu'unudi 'idewani. 'Aiwe saesaelina ma 'auna ta wese dabo 'wea'weavidi adi wawa salofa meilana luveifa otaqina osi diavona 'awadiega 'ifo'ifoqe. <sup>18</sup> Ta ba'e yani diavona 'idiega bwa'obwa'o ana tomotauyavo i'aliga. Ta ge tomotau qabudi ida 'aliga, ta 'esi bwa'obwa'o di'wenavo toi gamodiega di'we 'aidegana ana totoayavo i'elu'aliga, mana 'aiwe nana be, 'au nana ta wese dabo nana osi dina 'awadiega 'elu'ifoqe. <sup>19</sup> 'Inega 'awadiega ta wese yiqudiega 'aliga ena waiwai 'ifoqe, mana yiqudi kavona mwata ma 'unu'unudi, 'inega wese yiqudiega adi fata be tomotau ina luve'aligidi.

<sup>20</sup> \* Ta tomeqabu ba'e veilaqe diavona 'idiega ge ida 'aliga taudi ge nuanuadi be edi viaqayavo nimadiega ina nogedi be ina nuagivila. 'Inega ge ida lua'u iwa'odu niboana luveifadi be wese edi tokwalui 'idia. Ba'e edi 'ebeiw'odu iviaqia goula be, siliba be, kainumu be, dabo ta wese 'aiwe 'idiega, ta ba'e yani diavona ge adi fata be ina noqola, ta ge adi fata be ina 'ita, ta wese ge adi fata be ina tauya. <sup>21</sup> Ta wese ilivu luveifadi 'idewana luve'aliga be, kwakwaia be, lu'afo'a be, velamo'eno kavokavovo ta wese vanawala ilivu diavona ge ida lua'udi.

## 10

### *Yaubada ena tovale'ewa taha fefwai nunumina goyona nimanaya*

<sup>1</sup> 'Inega wese taha Yaubada ena tovale'ewa waiwaina ya'itea mahalega webuwebui mai. Taha gawata qiduana tovale'ewa nana tala'afwalia, ta wese siaebadi debanaya ya'itea. Ta 'iawana ana 'ita kavona vala ena simatala, ta 'aqena adi 'ita kavona 'oqola 'ala'alaidi. <sup>2</sup> Ta 'ataqinega fefwai goyona tanatanaina kafikafia. 'Inega 'aqena ana 'ataqi a'uya mwade'waya, ta ana keli bwa'obwa'o 'inaya a'uya. <sup>3</sup> 'Inega bonana qiduanega gaba kavona yubai laioni edi bo'o 'idewani. Bo'o gumwala 'inega yavalata seveni adi yau wese edi dudu 'inega ive'iea. <sup>4</sup> \* Tuta goyona be ba'e yavalata diavona edi ve'ia eda 'wayavia, ta 'inega wese taha bona yanoqolia mahalega vonegu vonaya, "Yavalata diavona edi dudu adi alamani ge una 'wayavia, ta 'esi tau'u nuauya una nuave'avinidi!"

<sup>5</sup> \* Ta tovale'ewa nana ni'a ya'itea tovtovolo mwade'waya be wese bwa'obwa'oya, tauna nimana ana 'ataqi silagaia mahalaya, <sup>6</sup> e 'inega 'awatamatamana tauna Toatoa Vatayana 'inaya, tauna mahala 'iva'ava'aia be wese yani qabuna gamonaya, ta wese bwa'obwa'o be wese yani qabuna gamonaya, be wese mwade'wa ta wese yani qabuna gamonaya. Ta tovale'ewa nana vonaya, "Yaubada ge wese tuta naha'unaqoyei, <sup>7</sup> \* mana tuta nana Yaubada ena tovale'ewa vesevenina wese ena bea namu'ea, 'inega ena nuanua 'wai'waivina nagive'ifoqeyea, 'idewani lova ena tovesimasimanayavo 'idia simanea."

<sup>8</sup> 'Inega wese bona nana mahalega yanoqola 'eviviea voneguya, "Utayua tovale'ewa nana 'inaya tovtovolo mwade'waya be bwa'obwa'oya, ta nimanega fefwai nana tanatanaina u'ewei!"

<sup>9</sup> \* 'Inega yatauya tovale'ewa nana 'inaya ta yavenoqiea be fefwai nana goyona naneigu. 'Inega voneguya, "E ba'e, u'ewei ta u'aini. Ta 'awauya ana 'ai yafayafana kavona mu'awa 'idewani, ta 'esi gamouya visiqa una lutonovia."

<sup>10</sup> 'Inega fefwai nana nunumina ya'ewei ya'ainia ta yatonea. Ta tovale'ewa nana ena vona 'iguya vonahaqiaqi, mana 'awaguya ana 'ai yagudatonovia yafayafa otaqina, ta tuta nana yatonea 'inega gamoguya visiqa qiduana yalutonovia. <sup>11</sup> Gumwala, 'inega wese voneguya, "Luaqiaqieu be wese una simana 'ifoqe ma'oda Yaubada naviaqa 'aiqa qabu taha taha 'idia, ta wese di'we taha taha 'idia, ta wese bona taha taha ana toveqaeavo 'idia, be wese toluvine qidudidi 'idia."

\* 9:20: Ve 16:9,11; Same 115:4-7; 135:15-18; Dan 5:23 \* 10:4: Dan 12:4,9 \* 10:5: Luve 32:40; Dan 12:7 \* 10:7: Emo 3:7 \* 10:9: Isi 2:8-3:3



## 11

*Yaubada ana tosimanayavo magilafudi*

<sup>1</sup>\* 'Abibodanaya 'aiwe kuena 'ebe'etoliva ya'ewea ta wese vona taha yanoqolia vonegu vonaya, "Una tauya Yaubada ena Vanue Gwalagwalana 'inaya ta vanue nana una 'etolivei, ta wese 'ebeveguba vanue nana gamonaya una 'etolivei. Ta tomeqabu omo'e 'inaya ihiwaiwa'odu wese una avodi. <sup>2</sup>\* Ta Vanue Gwalagwalana 'atamanina ge una 'etolivei, mana bena'e di'we nana Yaubada ni'a awafelea taudi ge me Diu weaqidi. 'Inega ba'e qabu diavona Yaubada ena 'abaga gwalagwalana Ielusalema ina luvinea wai'ena 42 'idia.

<sup>3</sup>"Ta ya'a egu tovesimasimana magilafudi ena givewaiwaiiedi ta egu nuanua ina simana 'ifoqeyea 'aubena adi yau 1,260 'idia. Ta adi kaleko ina veaqedi kavona wadawada'e be sibasibauwa adi kaleko 'idewani."

<sup>4</sup>\* Ba'e tovesimasimana dina taudi 'aiwe olibe magilafudina be wese simatala ana 'ebea'u magilafudina itovotovolo bwa'obwa'o ana Kaiwabu 'iawanaya. <sup>5</sup>\* Ta 'eguma tomtau nuanuadi be ina giveluveifedi, e 'inega 'aiwe 'ala'alaina 'awadiege na'ifoqe ta voala diavona na'ala 'ovoidi. Vonahaqiaqi, ba'e 'aliga nana na'ifoqe tomeqabu nuanuadi tovesimasimana dina ina veilaqeyedi. <sup>6</sup>\* Ta ba'e magilafudina luvine be waiwai ni'a i'ewea ta adi fata mahala ina gibodea, 'inega ge wese 'wei na'wei'wei tuta nana Yaubada ena nuanua isimasimana 'ifoqeyea 'aubena 1,260 'idia. Adi fata go'ila ina luvinedi be ina vesulala, ta wese adi fata be visiqā taha taha ina vetunedi bwa'obwa'oya, ta taudi edi nuenugea ina luvine ai tuta be ai tuta 'idia ba'e yani diavona ina viaviaqidi.

<sup>7</sup>\* Ta tuta nana edi simana ina lu'ovoia, 'inega vetoa nana kuena ana wawa Abisi ana totoa yubai veifana navanemai ta magilafudina natala'avudi navewaiwai va'inedi ta nafofolidi. <sup>8</sup>\* Ta 'o'oadi ina 'eno kavokavovo 'abaga qiduana ana 'eda 'inaya. Ta 'eguma tomtau 'abaga nana ivelulu'uyayea 'inega vona sesebaiege ana wawa igabea Sodoma be Itifita, mana omo'e 'abaga nana 'inaya lova edi Kaiwabu 'aliga lobeā 'etolui 'inaya. <sup>9</sup>Ta 'aubena toi ma ana tufwa 'idia tomtau di'we qabudi 'idiege be, bona qabudi 'idiege be, gade qabudi 'idiege ta wese 'wafi taha taha 'idiege 'o'oa dina ina vevekovedi 'abaga nana 'inaya, ta ge taha toga dahawafela adi tavuna weaqina. <sup>10</sup>Ta bwa'obwa'o ana totoayavo qabudi ina qaiawa gegoyo Yaubada ena tovesimasimanayavo edi 'aliga weaqina, mana totoa diavona vita ilobeā tosimana dina 'idege 'aubena 1,260 'idia, ta ba'itagana ni'a i'aliga. E 'inegana tomtau diavona taudiege ma ediavo qaiawega ina vekolukolua ta wese edi kulufayavo ina vewila'ayea nuanidia.

<sup>11</sup>\* Ta 'aubena toi ma ana tufwa 'abibodanaya Yaubada tovesimasimana magilafudina givewawaha 'eviviedi iya'itoto ta itovolo. Ta tomtau qabudi i'itedi 'inega imwaniniva qiduana. <sup>12</sup>\* 'Inega magilafudina taha bona waiwaina inoqolia mahalega 'ifoqe vonedi vonaya, "O'watovu mai ba'idia!" 'Inega gawatega voaladiavo matadia ivaneqa mahalaya. <sup>13</sup>\* Ta tuta nana ivanevaneqa 'inega mwani'ini'i waiwaina 'ifoqe 'abaga nana 'inaya. Ta 'abaga nana di'wenavo adi yau teni, ta 'aideganamo teni dina 'idiege qeu yavulea, ta di'we nana 'inaya tomtau adi yau 7,000 i'aliga. Ta tomeqabu mwani'ini'i nana 'inega ge ida 'aliga imwaniniva qiduana ta idedela, ta Yaubada mahalaya iawatuboya.

<sup>14</sup>\* Veilaqe vemagilafuna ni'a gumwala, ta wese vetoina tuta goyona namai.

*Yaubada ena tovale'ewa vesevenina ena bea mu'ea*

<sup>15</sup>\* 'Inega Yaubada ena tovale'ewa vesevenina ena bea mu'ea ta mahalega gaba waiwaiwai yanoqolia ivonaya, "Eda Kaiwabu ta wese ena Keliso vevenua'ivinina bwa'obwa'o di'wenavo qabuna ni'a i'abiluvinea,

\* 11:1: Isi 40:3; Sek 2:1-2 \* 11:2: Lk 21:24; Ve 13:5 \* 11:4: Sek 4:11-14 \* 11:5: 2Sam 22:9; Same 97:3 \* 11:6: 1Kin 17:1; 'Ifo 7:17-20; 1Sam 4:8 \* 11:7: Dan 7:21; Ve 12:17; 13:7; 17:8 \* 11:8: Lk 13:34 \* 11:11: Isi 37:5,10 \* 11:12: 2Kin 2:11 \* 11:13: Ve 6:12; 16:18 \* 11:14: Ve 9:12 \* 11:15: 'Ifo 15:18; Same 10:16; Dan 2:44; 7:14

ta tauna tuta vataya 'idia na'abiluvine."

<sup>16</sup> Kaiwabu diavona 24 adi yau adi galiva kaikaiwabudi 'idia nawale itoatoa, ta tuta nana ba'e gaba nana inoqolia 'inega Yaubada 'iawanaya 'avalata'idi ta tuqatuqadiega isobadi ta iawatuboya <sup>17</sup> ivonaya,

"Ema Kaiwabu Yaubada Tovewaiwai,  
o'a utoatoa tuta lova 'inega  
be wese tuta ba'itagana 'idia.

Alulukaiwa qiduana 'iuya,  
mana o'a eu waiwai qiduana ugive'ifoqeyea  
ta ni'a uve'ale 'abiluvine.

<sup>18</sup>\* Tomotau ge ida vetumaqaneu diadi vilea,  
ta ba'itagana o'a au diavilavila ni'a mai.

Ta wese vetala'ai ana tuta  
ni'a mai 'ali'aligidi 'idia.

Ta eu tofewayavo taudi tovesimasimana  
adi ve'ia aqiaqina ana tuta ni'a mai,  
ta o'a ve'ia nana una neidi.

Ta wese eu tomotauyavo  
'ena'ena'idi be goyogoyodi  
ta au wawa ana to'amayabayavo maega  
adi ve'ia aqiaqina una neidi.

Ta 'esi bwa'obwa'o ana togiveluveifa  
edi tuta ni'a mai be una luveawalidi."

<sup>19</sup>\* 'Inega Yaubada ena Vanue Gwalagwalana mahalaya sisiwa'ana ya'itea, ta gamonaya ena luvine ma dedewagana ana wawa Aki 'eno'eno. Ta wese namala 'wai'waia be, yavalata dududu be, butuna waiwai be, mwani'ini'i ta wese 'wei gomomododi ta falafaladi kavona dabo i'ifoqe.

## 12

### *Vavine ta wese mwata luveifana ta qiduana*

<sup>1</sup> 'Inega taha yani ya'itea mahalaya, ta yani nana ge yani kavokavovo ta 'esi yani 'ebenuavoqana. Taha vavine ya'itea baba'au 'inega vekaleko, ta 'aqena 'ayanaya wai'ena ya'itea, ta debana 'inaya biatuli viaviaqina 'wadima tuwelo 'inega. <sup>2</sup>\* Vavine nana ma gamona ta visiqa qiduana lulutonovia, 'inega doudou mana tuta goyona nauweta.

<sup>3</sup>\* Ta lukwayavonega wese taha yani 'ebenuavoqana ya'itea mahalaya. 'Inega mwata taha luvaluva ta bweabwealina mataguya 'ifoqe. Ta 'unu'ununa adi yau seveni, ta donana adi yau teni, ta 'unu'ununa 'inaya biatuli adi yau wese seveni. <sup>4</sup>\* Ta yiqunega 'wadi'wadima 'auveavuidi mahalega. Mahala ena di'we toi, ta toi dina 'idiega di'we 'aidegana 'inega 'wadi'wadima 'auveavuidi iavuta bwa'obwa'oya. Ta mwata nana vavine 'iawanaya toatoa ba'ena, mana nuanuana gwama nana na'ainia tuta nana navi'oi.

<sup>5</sup>\* 'Inega vavine nana gwama me'olotona venatunea, ta omo'e gwama nana tomotau qabudi bwa'obwa'oya naluvinedi ena waiwai qiduana 'inega. Tuta goyona be mwata nana gwama nana datonea, ta 'inega Yaubada ena tovale'ewa gwama nana neboya ta givaneyea Yaubada 'inaya, ta ana galiva kaikaiwabuna 'inaya. <sup>6</sup>'Inega inana idena itauya di'we tomotau geqana 'inaya, ta omo'e 'inaya Yaubada taha 'abaga ni'a 'iva'ava'aia adi 'itamaki weaqina 'aubena 1,260 'idia.

<sup>7</sup>\* 'Inega vedavi ve'ale mahalaya Yaubada ena tovale'ewayavo be mwata ma enavo nu-anidia. Ta tovale'ewa qabudi adi tovatatana ana wawa Maikeli vanugwetedi vedavi nana gamonaya. <sup>8</sup> Ta mwata nana me ena qabuyavo ge adi fata be Maikeli ma enavo ina

\* 11:18: Same 110:5; Lom 2:5; Same 115:13 \* 11:19: Ibe 9:4; Ve 8:5; 15:5; 16:21 \* 12:2: Mai 4:10 \* 12:3: Dan 7:7 \* 12:4: Dan 8:10 \* 12:5: Same 2:9; Ve 19:15 \* 12:7: Iud 9

vewaiwai va'inedi. Ta 'esi Maikeli 'elavidi edi waiwaiega mwata nana ma enavo i'wavinidi i'ifoqe mahalega. <sup>9</sup>\* 'Inega mwata nana qiduana ifelawebuiea bwa'obwa'oya. Tauna mwata nugwenugweina, ta ana wawa igabea Diabolo be wese Seitani, ta tauna totoa bwa'obwa'o qabudi u'au'avedi. Ta enavo qabudi wese ifelawebuiea.

<sup>10</sup>\* 'Inega taha bona waiwaina mahalega yanoqolia gaba vonaya,  
 "Lova 'inega kalulututa ada 'etoyavua weaqina,  
 ta ba'itagana eda Yaubada 'inega  
 'etoyavua vataya mai 'idaya.

Tauna Tovewaiwai ta ena 'Ebeluvine  
 ni'a give'ifoqeyea ta luluvine.

Yaubada lova vona fofofolea  
 taha Kini na'ifoqe mai 'idaya,  
 ta ba'itagana vona nana ana aqiaqi ni'a 'ifoqe,  
 mana Keliso ni'a mai 'idaya  
 ta 'abiluvine 'ewea Yaubada 'inega.

Ta Keliso nana ena 'abiluvine 'inega  
 Seitani felawebuiea bwa'obwa'oya.

Seitani wese ana wawa Tove'ewa,  
 mana tauna 'aubena be wese  
 velovelovana qabuna 'idia  
 edavo tovetumaqana veve'ewedi  
 Yaubada matanaya.

<sup>11</sup> Ta tovetumaqana dina tove'ewa nana  
 ivewaiwai va'inea,  
 mana Lami nana ena 'aliga  
 ta wese sulalina 'inega adi luvematasabu  
 ni'a 'avalea edi luveifana weaqina.

Vonahaqiaqi, tovetumaqana dina  
 ge ida nuanua yawaidi weaqina,  
 ta 'esi iawafeledi Lami nana  
 Valena ana simana 'ifoqe weaqina,  
 ta ba'e 'inega tove'ewa nana ivewaiwai va'inea.

<sup>12</sup>\* 'Inega mahala ta wese ana totoayavo  
 ona qaiawa qiduana!

Ta 'esi veilage ta visiqe na'ifoqe  
 bwa'obwa'o ta wese mwade'wa 'idia,  
 mana mwata luveifana ni'a webui mai 'imia  
 ma ana diavilavila,  
 mana alamani aqiaqiea ena tuta ni'a vekusakusa."

<sup>13</sup> Ta tuta nana mwata nana nuana 'eqa'uya ena webui mai bwa'obwa'oya weaqina,  
 'inega vavine dina gwama me'olotona ni'a ivenatunea talatala'obedi. <sup>14</sup>\* Ta Yaubada  
 magisubu agona fafena neidi, 'inega iyewa itauya di'we tomotau geqana 'inaya, ta omo'e  
 'abaga nana Yaubada ni'a 'iva'ava'aia sabi 'itamaki weaqina, ta wese 'abaga nana 'inaya  
 navabodebodedi wai'ena 42 'idia mwata nana ana diavilavila 'inega.

<sup>15</sup> 'Inega mwata nana 'awanega go'ila qiduana 'ifoqe ta seuseu inoqa, mana ena nuanua  
 qiduana vonigo vavine dina nagivedamanidi ina 'aliga. <sup>16</sup> Ta iula ilobea bwa'obwa'o  
 'inega, mana 'awana 'elalamia qiduana ta go'ila nana numa 'ovoia. <sup>17</sup>\* 'Inega mwata wese  
 diana vilevilea qiduana vavine dina 'idia ta 'ifoqe tauya tubudiavo sabi luaviadi, taudi  
 Yaubada ena luvineavo ivematamatayagedi ta wese Iesu ena vonahaqiaqi ikafi'i'ihia.

<sup>18</sup> Ta mwata nana totoa mwade'wa balabalanaya.

\* 12:9: Nug 3:1,14; Lk 10:18; Ve 20:2 \* 12:10: Job 1:9-11; Sek 3:1 \* 12:12: Ais 44:23; 49:13 \* 12:14: Dan  
 7:25; 12:7 \* 12:17: Ve 11:7

## 13

*Yubai veifana mwade'wega* 'ifoqe

<sup>1</sup>\* 'Inega yavevekova ta yubai luveifana taha ya'itea mwade'wega fweula. Ta donana adi yau teni, ta 'unu'ununa adi yau seveni, ta donana qabudi ma adi biatuli ta wese 'unu'ununa 'aidega 'aidega 'idia wawa luveifana 'waya'wayavidi i'eno'eno, ta wawa diavona Yaubada iawavegilea. <sup>2</sup>\* Yubai nana ya'itea ana 'ita 'idewana lefedi, ta 'aqena adi 'ita 'idewani yubai bea\* 'aqedi, ta 'awana 'idewani yubai laioni 'awadi. Ta mwata nana ena waiwai be, ana galiva kaikaiwabuna ta wese ena luvine qiduana neia.

<sup>3</sup>\* Ta yubai nana mwade'wega 'unu'ununa taha ana 'ita kavona veveilaqena be tuta goyona da'aliga, ta bonuna ni'au ihila ta veaqiaqi 'evivi. E omo'e 'inega tomotau qabudi nuadi 'ewea ta i'abibodea. <sup>4</sup> Ta tomotau qabudi wese mwata nana iawahawatuboya, mana ena luvine qabuna ni'a ve'ineiea yubai mwade'wega 'inaya. 'Inega yubai nana wese iawahawatuboya ivonaya, "Gebu taha toga ena waiwai yubai ba'e 'idewani. Ta wese ge taha toga ana fata be naluavia 'inaya!"

<sup>5</sup>\* Ta yubai nana ni'au awafela 'ewea be ana fata navonavane ta wese nahawagila, ta awafela nana 'inega ba'e 'awaluveifa diavona naviaqidi wai'ena 42 'idia.

<sup>6</sup> 'Inega yubai nana Yaubada 'inaya yani qabuna weaqina 'awaluveifea, 'idewani ana wawa weaqina be, ena 'abaga mahalaya weaqina, ta wese mahala ana totoayavo 'awaluveifedi. <sup>7</sup>\* Ta awafela lobe a vonigo Yaubada ena tomotauyavo naluaviedi be navewaiwai va'inedi. Ta wese luvine 'ewea 'inega ana fata be qabu taha taha, be bona taha taha adi toveqaeavo be, 'wafi taha taha ta wese di'we taha taha na'abiluvinedi. <sup>8</sup>\* Ta totoa bwa'obwa'o qabudi taudi Yaubada ge ida vetumaqanea yubai nana 'inaya ina iwaiwa'odu, omo'e tomotau dina gebu adi wawa da'eno'eno Yawai Bukina gamonaya. Ta ba'e buki nana Lami nana lova iluve'aligia ena buki, mana buki ba'e gamonaya tovetumaqana adi wawa lova madu'wayavia, ta 'abiboda bwa'obwa'o viaqia.

<sup>9</sup> Tomeqabu omi'a ma teniqami ba'e vona diavona ona noqolidi ta adi alamani ona sali aqiaqiedi.

<sup>10</sup>\* Ta tomeqabu lova Yaubada ena venua'ivina 'inega  
ina kafidi ta ina a'uluguyedi vanue 'ebeyoqona 'inaya,  
e luaqiaqiedi be ina toa vanue 'ebeyoqonaya.

Ta wese tomeqabu lova Yaubada ena venua'ivina 'inega  
'aliga ina lobe a kefata 'inega,  
e luaqiaqiedi be ina 'aliga kefattega.

Ta tovetumaqanayavo luaqiaqiedi be me edi bibitaqo edi vetumaqana Yaubada 'inaya ina kafi'i'ihia.

*Yubai luveifana bwa'obwa'oyega* 'ifoqe

<sup>11</sup> 'Inega taha wese yubai luveifana ya'itea, bwa'obwa'oyega 'ifoqe mai. Ta donana magilafuna 'idewana lami donadi, ta bonana 'idewani mwata bonadi. <sup>12</sup> Ba'e yubai nana yubai mwade'wega ena waiwai vefewea sabi luvine, 'inega totoa bwa'obwa'o qabudi luvine neidi be yubai mwade'wega 'inaya ina iwa'odu, tauna lova veilaqe lobe a ta ni'a veihila ta veaqiaqi 'evivi. <sup>13</sup>\* 'Inega yubai nana mwade'wega vaina yani 'ebenuavoqana waiwai viaqidi 'idewani 'aiwe saesaelina viaqia, ta tomotau qabudi ivevekova ta matadia 'aiwe nana mahalega 'avalata'ia webui mai bwa'obwa'oya. <sup>14</sup> E ba'e yani diavona ni'a viaqidi yubai mwade'wega ena awafela 'inega, ta ba'e 'inega totoa bwa'obwa'o qabudi u'avedi. Ta wese luvinedi tokwalui taha ina viaqia ana 'ita kavona yubai

\* 13:1: Ve 12:3; 17:3,7-12 \* 13:2: Dan 7:4-6 \* 13:2: Bea "bear" taha yubai qiduana be waiwaina ta wese manimaninina ana fata tomotau navunuqidi. Ge kana lobe i eda di'we 'inaya, ta 'esi vaina di'we 'idia totoa, ta lova wese Isileli 'inaya toa. \* 13:3: Ve 17:8 \* 13:5: Dan 7:8,25; 11:36; Ve 11:2 \* 13:7: Ve 11:7  
\* 13:8: Same 69:28; Ve 17:8; 20:12,15; 21:27 \* 13:10: Iel 15:2; 43:11; Ve 14:12 \* 13:13: Md 24:24; 1Kin 18:24-39; Ve 19:20

veifana mwade'wega, tauna lova kefataga veilage lobeana ta 'aliga 'waqi, ta ni'a yawaha 'evivi. <sup>15</sup> 'Inega iviaqia, ta yubai bwa'obwa'oyega awafela 'ewea 'inega tokwalui nana yawaina neia be yaqisa ana fata navona. Ta 'abiboda tokwalui nana tomotau luvinedi be ina iwa'odu 'inaya, ta 'eguma ina noga 'inega 'aliga ina lobeana. <sup>16</sup> \* Ta wese totoa bwa'obwa'o qabudi 'idewani tomotau kavokavovo be wese taudi adi wawa 'ena'ina, ta wese kaikaiwabudi be lukwalukwadi, ta wese tofewa kavovo be yavuyavuidi luvine neidi be taha 'ebe'inana 'ataqidia nage adi kiaya ina 'ewea. <sup>17</sup> Ta 'ebe'inana nana ana alamani ba'e: Tomeqabu ba'e luvine nana inogea, e ge wese adi fata be ina gimwane nage ina vegimwane. Ta 'ebe'inana 'inaya yubai nana mwade'wega ana wawa nage wawa nana ana naba na'eno.

<sup>18</sup> Vonahaqiaqi, 'eguma ba'e yani diavona weaqina nuada na'eqa'uya, e 'inega nugweta alamani qidwana Yaubada 'inega kana 'ewea. 'Inega taha toalamani aqiaqi ana fata yubai nana ana naba nanua'eqa'uya, mana naba nana tomotau taha ena naba. Ta tauna ena naba 666.

## 14

### *To'etoyavua ena tomotauyavo adi 'evosi*

<sup>1</sup> 'Inega Lami nana ya'itea bwanaga Saioni debanaya tofotofolo, ta wese tomotau adi qabu 144,000 maega itoatoa. Ba'e qabu diavona Lami nana ana wawa ta wese Tamana ana wawa 'waya'wayavina adi kia 'inaya. <sup>2</sup> \* 'Inega mahalega bona taha yanoqolia, ta ana noqola kavona go'ila be wese yavalata ida nununuqa. Ta wese bona nana ana noqola kavona tomotau edi 'ebelaha afi 'inega idalalalaha. <sup>3</sup> \* Ba'e qabu diavona galiva kaikaiwabuna be, 'iva'ava'ata diavona foa adi yau, ta wese kaiwabuyavo adi yau 24 'iawadia itovolo, ta 'evosi taha vauvauna i'evosiea. Ta 144,000 dimo 'evosi nana ialamania, ta 'esi mali tomotau ana vonayavo be wese ana anigo ge ida alamania, mana Yaubada qabu diavona ni'a 'etoyavuidi bwa'obwa'o 'inega. <sup>4</sup> Ta omo'e tomotau diavona ge taha tuta taudiega ida givebwavudi ilivu luveifadi 'idiega, ta 'esi edi toa Yaubada matanaya tuta qabuna vunavunaqina. Ba'e qabu dina Lami nana i'abiboda aqiaqiea ena tauya 'aidega 'aidega 'idia. Ta tomotau qabudi 'idiega eda Kaiwabu ba'e qabu dina ni'a madugubaufedi, e 'inega taudina kavona Yaubada be Lami nana edi bolimana nugwenugweina. <sup>5</sup> Taudi ge taha toga ida u'avei, ta wese ge taha adi 'ebeve'ewamo.

### *Yaubada ena tovale'ewa toidi edi simana*

<sup>6</sup> 'Inega wese Yaubada ena tovale'ewa taha ya'itea mahalega yewayewa, ta Vale Aqiaqina 'eno'eno vatayana miea simanea totoa bwa'obwa'o qabudi 'idia, 'idewani qabu taha taha be, bona taha taha be, 'wafi taha taha be, wese di'we taha taha 'idia. <sup>7</sup> Ta tovale'ewa nana bonana qiduanega vonaya, "Yaubada ona 'amayabea be ona awatuboya, mana vetala'ai ana tuta ni'a mai. Ta mahala be, bwa'obwa'o be, mwade'wa ta wese go'ila ihinoinoqa adi To'iva'ava'ata 'iawanaya ona iwa'odu."

<sup>8</sup> \* 'Inega tovale'ewa vemagilafuna ya'itea iana 'abibodanega 'ifoqe ta gaba vonaya, "Abaga qidwana Babiloni ni'a luveifa otaqa, mana 'abaga nana totoa bwa'obwa'o qabudi maega velamo'eno kavokavovo ilivuna iviaviaqia ta nuadi 'ewa aqiaqiea."

<sup>9</sup> \* Tovale'ewa magilafudina 'abibodadiege wese vetoina 'ifoqe, e tauna wese gaba vonaya, "Tomeqabu ihiwaiwa'odu yubai nana mwade'wega ta ena tokwalui 'inaya, ta wese ana 'ebe'inana adi kiaya nage nimadia 'eno'eno, <sup>10</sup> \* e ba'e taudi Yaubada ena 'oine waiwaina 'inega ina numa, ta ba'e 'oine nana ve'ebe'ita Yaubada ana diavilavila weaqina, ta ni'a iwaqia diavilavila ana gaeba 'inaya. Ta wese 'aiwe saesaelina be dabo 'wea'weavidi adi wawa salofa tomotau dina 'wafidia ina vebaea Yaubada ena tovale'ewayavo be ena Lami 'iawadia. <sup>11</sup> \* Ta 'wafidi 'ala'alaia 'auna vanevane vatayana, ta edi visiqa qidwana

\* 13:16: Ve 14:9-11; 16:2; 20:4 \* 14:2: Ve 1:15; 19:6 \* 14:3: Ais 42:10; Ve 5:9; 7:4 \* 14:8: Ais 21:9; Iel 51:7-8; Ve 17:2; 18:2,3 \* 14:9: Ve 13:12-17 \* 14:10: Ais 51:17,22; Iel 25:15-16; Same 75:8; Isi 38:22; Nug 19:24; Ve 16:19; 20:10; 21:8 \* 14:11: Ais 34:10

ge dalu'ovoa 'aubena nage velovelovana 'idia, mana taudi yubai nana veifana me ena tokwalui 'idia ihiwaiwa'odu, ta wese ana wawa ana 'ebe'inana 'eno'eno 'idia. <sup>12</sup> \* Ta tomeqabu leisu ivetumaqanea ta Yaubada ena luvineavo 'inaya itovolo'i'ita, e taudi ena tomotauyavo, ta me edi bibitaqo ina toatoa 'eguma ba'e yani diavona na'ifoqe 'idia."

<sup>13</sup> 'Inega mahalega taha bona yanoqolia vonaya, "Ba'e una 'wayavia: Tomeqabu eda Kaiwabu me edi gwavubiga i'abi'abibodea ta 'aliga ina lobe, e adi fata ina qaiawa."

Ta wese Yaubada Niboanina vonaya, "Vonahaqiaqi, taudi qaiqaiawidi, mana ina veyawai edi vetafe'wa waiwai be wese vita taha taha 'idiega, ta wese edi gwavubiga ana ve'ia ina lobe."

*Yaubada totoa bwa'obwa'o nabolimanidi*

<sup>14</sup> \* 'Inega yavevekova ta gawata wadawadaeana 'ifoqe. Ta gawata nana 'inaya taha toga ya'itea toabui debanaya ana 'ita kavona tomotau natuna 'idewani. Ta 'unu'ununaya ana biatuli kaikaiwabuna goula 'inega 'eno'eno, ta nimanaya ena naifi so'uso'una kafikafia. <sup>15</sup> Ta wese taha tovale'ewa Vanue Gwalagwalana 'inega 'ifoqe mai, ta gaba vane tauna gawata debanaya toatoa 'inaya ta voneaya, "Eu naifi una vefewea bolimana weaqina, mana ana tuta ni'a 'ifoqe bwa'obwa'oya!" <sup>16</sup> Ta 'inega 'oloto nana gawatega ena naifi talaqayea bwa'obwa'o qabuna 'inaya, ta 'inega bolimana va'auqidi.

<sup>17</sup> 'Inega taha wese tovale'ewa Vanue Gwalagwalana mahalaya 'inega 'ifoqe mai, tauna wese me ena naifi so'uso'una. <sup>18</sup> \* 'Inega taha wese tovale'ewa 'ebeveguba di'wenega mai, tauna 'aiwe 'ala'alaina ana tolumine. Ta bonana qiduanega gaba tovale'ewa nana me ena naifi 'inaya, vonaya, "Eu naifiega bwa'obwa'o ana 'oine vuaqina una da'edi laqanega, mana ni'a bwealia." <sup>19</sup> 'Inega tovale'ewa nana ena naifiega 'oine vuaqina bwa'obwa'oya da'edi, ta 'ebememe qiduana gamonaya siviledi. Ta ba'e 'ebememe nana ve'ebe'ita Yaubada ana diavilavila weaqina. <sup>20</sup> \* Ta 'oine vuaqina koyadi ivamemedi 'ebememe nana 'inaya 'abaga qiduana gwavunaya. Ta 'ebememe nana gamonega sulala inoinoqa kavona seuseu ana liva teli anidedi (300) kilomita 'idewani, ta sulala nana ena vane bwa'obwa'oyega be yubai osi 'otonaya 'idewani.

## 15

'Evosi vauvauna mahalaya

<sup>1</sup> 'Inega taha wese 'ebenuavoqana qiduana mahalaya ya'itea. Yaubada ena tovale'ewa adi yau seveni ya'itedi, ta 'ebeveilaqe luveifadi wese adi yau seveni nimadia ikafikafidi. Ta veilaqe diavona iveve'iteda Yaubada ana diavilavila ana 'ebel'ovoa weaqina.

<sup>2</sup> 'Inega wese taha yani ya'itea ana 'ita kavona mwade'wa daumwalina kavona gelasi ta wayawayavilana 'aiwe saesaelina maega. Ta mwade'wa nana di'wenaya qabu itovotovololo, ta ba'e qabu dina taudi yubai luveifana mwade'wega ta ena tokwalui be wese ana wawa ana naba ni'a ivewaiwai va'inedi. Ta qabu dina nimadia 'ebelaha afi ikafikafidi, ta afi dina Yaubada 'inega ni'a i'ewedi. <sup>3</sup> \* Ta qabudi Yaubada ena tofewa Mosese ana 'evosi ta wese Lami nana ana 'evosi i'evosiea ivonaya,

"Kaiwabu Yaubada o'a Tovewaiwai.

Eu viaqayavo qabudi aqiaqi otaqidi

ta wese 'ebenuavoqana.

Ta eu ilivu qabuna aqiaqidi ta tunutunuqidi,

ta wese di'we taha taha ululuvinedi.

<sup>4</sup> \* Kaiwabu ye, tomotau qabudi ina 'amayabeu

ta au wawa ina awatuboya,

mana o'a au 'aidega otaqa gwalagwalau.

'Inega totoa bwa'obwa'o qabudi ina mai

ta matauya ina iwa'odu,

\* 14:12: Ve 13:10 \* 14:14: Dan 7:13 \* 14:18: Ioe 3:13 \* 14:20: Ais 63:3; Ve 19:15 \* 15:3: 'Ifo 15:1; Same 139:14; 145:17 \* 15:4: Iel 10:6-7; Same 86:9

mana eu viaqayavo tunutunuqidi  
ni'au ugive'ifoqeyedi tomotau matadia.”

'Ebeveilaqe ana yau seveni ifelawebuiedi bwa'obwa'oya

<sup>5</sup> \* 'Inega yavevekova ta Yaubada ena Vanue Gwalagwalana mahalaya ya'itea, ta gamonaya Yaubada ena Sifaufa Gwalagwalana ana wawa Tabenakeli sisiwa'ana ya'itea. <sup>6</sup> Ta Vanue Gwala nana 'inega tovale'ewa i'ifoqe ta 'ebeveilaqe seveni dina imiedi. Ta adi kaleko wadawadaeadi ta 'wanegalina toitoi. Ta lumalumadia adi 'ivala gadi'wana goula 'inega isivivilia. <sup>7</sup> 'Inega 'iva'ava'ata foa mayawai dina taha 'idiega gaeba viaviaqina goula 'inega adi yau seveni vewila'ayedi tovale'ewa seveni dina 'idia, ta gaeba taha taha gamodia Yaubada Toatoa Vatayana ena diavilavila luveagatuna'idi. <sup>8</sup> \* Ta Yaubada ena waiwai be ena simatala aqiaqi otaqina 'auna Vanue Gwalagwalana gamona luveagatuna'ia. Ta ge taha toga ana fata be nalugu gamonaya ana laba tovale'ewa seveni dina 'ebeveilaqe diavona adi yau wese seveni ina guiwaqa 'ovoidi bwa'obwa'o debanaya.

## 16

<sup>1</sup> Ta Vanue Gwalagwalana 'inega bona taha qiduana yanoqolia vonavona tovale'ewa seveni dina 'idia vonaya, “Ona tauya be Yaubada ena diavilavila ma gaebana adi yau seveni ona guiwaqidi bwa'obwa'oya.”

<sup>2</sup> \* 'Inega taha tovale'ewa nugweta tauya, ta ena gaeba bwa'obwa'oya guiwaqia. Ta tomeqabu ihiwaiwa'odu yubai nana ena tokwalui 'inaya ta wese ana 'ebe'inana adi kiaya 'eno'eno, e taudina bonu luveifa otaqidi ta yuvayuvaqidi 'idia 'ifoqe.

<sup>3</sup> \* Ta tovale'ewa vemagilafuna wese ena gaeba 'ewei 'inega mwade'waya guiwaqia. 'Inega mwade'wa nana qabuna vesulala ana 'ita kavonaya to'aliga taha sulalina, e 'inega yani qabudi mayawaidi mwade'waya i'elu'aliga.

<sup>4</sup> 'Inega tovale'ewa vetoina wese ena gaeba 'ewei ta go'ila inoinoqidi be wese salufa 'idia guiwaqia, 'inega qabudi wese ivesulala. <sup>5</sup> Ba'e tovale'ewa nana tauna go'ila ana tolumine, ta bonana yanoqolia, vonaya,

“Yaubada ye, o'a Gwalagwalau,  
o'a tuta lova 'inega ta wese  
tuta ba'itagana 'idia utoatoa.

Eu luvine tunutunuqina 'inega  
ludematasabu ba'ena uve'ifoqeyea,  
<sup>6</sup> mana totoa bwa'obwa'o eu tovesimasimanayavo  
ta wese eu tomotauyavo iluve'aligidi  
ta sulalidi igiveinoqia.

'Inega adi ve'ia ni'au uneidi  
be vonigo sulala ina numa,  
ta ve'ia nana adi luaqiaqi otaqa.”

<sup>7</sup> \* 'Inega taha bona yanoqolia 'ebeveguba 'inega vonaya,  
“Kaiwabu Yaubada o'a Tovewaiwai otaqa.

Vonahaqiaqi, eu luvine tunutunuqidi  
ta tomotau dina adi luaqiaqi veilaqe nana.”

<sup>8</sup> 'Inega tovale'ewa vefoana ena gaeba 'ewei ta baba'au 'inaya guiwaqia, ta ba'e 'inega Yaubada baba'au nana veiwadiwaulia be ana fata tomotau na'alaidi. <sup>9</sup> \* Ta baba'au nana ena 'wea'weava qiduana 'inega tomotau 'ala'alaidi, 'inega Yaubada i'awaluveifea mana tauna ena luvine 'inega veilaqe diavona i'ifoqe, ta tua ge ida nuagivila be Yaubada ida awatuboya.

\* 15:5: 'Ifo 38:21 \* 15:8: 1Kin 8:10-11; 2Yani 5:13-14; Ais 6:4 \* 16:2: 'Ifo 9:10; Ve 13:12-17 \* 16:3:  
'Ifo 7:17-21 \* 16:7: Same 19:9; Ve 15:3 \* 16:9: Ve 9:20-21

<sup>10</sup>\* 'Inega tovale'ewa vefaibina ena gaeba guiwaqia yubai nana mwade'wega ni'a 'ifoqe mai ana galiva kaikaiwabuna 'inaya, ta 'inega ena 'ebeluvine qabuna velovelovanea. Ta visiqa nana 'inega tomotau taudiega meadi i'e'ute'utea, <sup>11</sup> ta bonu diavona be edi yuvaqa qiduana weaqina Yaubada i'awaluveifea. Ta ge ida nuagivila edi ilivu luveifana 'inega.

<sup>12</sup>\* 'Inega tovale'ewa vesikisina ena gaeba 'ewei ta go'ila qiduana ana wawa Eufaleti 'inaya guiwaqia, ta go'ila nana qabuna yafaia. Ta ba'e 'inega vaina toluvine qiduquduadi baba'au ena 'ebeyayaqega adi fata be go'ila nana ina vaikamania. <sup>13</sup> Ta niboana luvluveifadi toidi adi 'ita kavona bwebwe ya'itedi i'ifoqe mai mwata 'awanega, be wese yubai nana mwade'wega 'awanega, ta wese tovesimasimana 'e'eu'au'avina 'awanega i'ifoqe. <sup>14</sup>\* Ba'e niboana diavona toidi adi fata be yani 'ebenuavoqana ina viaqia. Ta itauya bwa'obwa'o ana toluvine qiduquduadi 'idia sabi gaba va'auqidi, mana nuanuadi taudi maega ina luvetuba ta Kaiwabu Ieisu ina luaviea Yaubada Tovewaiwai ena vetala'ai ana 'aubena 'inaya.

<sup>15</sup>\* Ovineneqa! Nawale ya'a Ieisu egu mai kavona tovanawala 'edewani, mana mai nana ana tuta ge taha toga dahalamaniana. 'Inega au kaleko una 'iva'ava'ata ta una ba'eba'e be yaqisa egu mai ana tuta 'inaya ge una iniyauyau tomotau nuanidia, ta 'esi au fata be una qaiawa, mana o'a ge ma'igonegoneu.

<sup>16</sup>\* 'Inega niboana luveifadi toi dina toluvineavo qiduquduadi maega itoa va'auta taha di'we 'inaya, ta di'we nana Ibeliu bonadiega igabea ana wawa Amagedoni.

<sup>17</sup> 'Inega tovale'ewa 'ebeluo'ova vesevenina wese ena gaeba 'ewei ta mahala be bwa'obwa'o nuanidia guiwaqia. Ta 'inega bona taha waiwaina galiva kaikaiwabuna Vanue Gwalagwalana gamonega 'ifoqe vonaya, "Ni'a yaviaqa 'ovoia." <sup>18</sup>\* Ta tuta nana 'inaya namala namalia be yavalata butuna qiduana dudu, ta wese mwani'ini'i qiduana 'ifoqe, lova ge taha tomotau ida 'itei ta ida lutonovia ba'e 'idewani. <sup>19</sup>\* 'Inega 'abaga qiduana Babiloni 'etomwea ta ana di'we toi i'ifoqe, ta wese 'abaga taha taha bwa'obwa'o debanaya mwani'ini'i nana ena waiwaiega giveluveifedi 'elubwegebwegedi. Ta 'abaga qiduana Babiloni ena luveifana Yaubada ge danuafania, e 'inega 'oine ma vedina venumea, ta 'oine nana ba'e Yaubada ena diavilavila qiduana. <sup>20</sup>\* Ta wese bwanabwana qabudi iawala, be bwanaga qabudi ivedumi'a. <sup>21</sup>\* Ta wese 'wei falafalana ta gomogomona kavona dabo qiduquduadi 'aidega 'aidega adi vita 50 kilo 'idewani mahalega iavuta iwebui mai tomotau 'idia ta iveilaqeyedi. E 'inega tomotau diavona Yaubada ivona ve'alatea, mana ba'e veilae nana luveifa otaqina.

## 17

'Abaga Babiloni kavona vavine taha tokodada

<sup>1</sup>\* Yaubada ena tovale'ewa seveni dina edi gaebayavo ni'a iguiwaqidi bwa'obwa'oya, e 'inega taha iadi mai 'iguya ta voneguya, "Umai, katauya taha 'abaga ena ve'iteu go'ila koya di'wenaya 'eno'eno. Ta 'abaga nana kavona taha vavine tokodada, ta ena ilivu luveifadi 'inega luvematasabu nalobea ta ena luvine kana 'itea. <sup>2</sup>\* Ta bwa'obwa'o ana toluvine qiduquduadi qabudi vavine nana maega ivelamo'eno kavokavovo. Ta wese totoa bwa'obwa'o qabudi 'idewani ilivu nana iviaqia maega, ta kavona davenumedi ilivu nana ana 'oine 'inega ta qabudi ida numa kwavakwava."

<sup>3</sup>\* 'Inega Yaubada Niboanina luveagatuna'igu ta tovale'ewa nana tauyegu di'we 'ava'ava 'inaya. Ta omo'e 'inaya taha vavine ya'itea taha yubai veifana bweabweala otaqina gwavunaya toabui toatoa. Yubai nana 'unu'ununa adi yau seveni, ta donana adi

\* 16:10: 'Ifo 10:22; Ais 8:21-22 \* 16:12: Ais 11:15 \* 16:14: Ve 19:19 \* 16:15: Md 24:43-44; Ve 3:3  
 \* 16:16: Sek 12:11 \* 16:18: Ve 4:5; 8:5 \* 16:19: Ve 14:10 \* 16:20: Ve 6:14 \* 16:21: 'Ifo 9:23-24; Ve 11:19 \* 17:1: Iel 51:12-13 \* 17:2: Ais 23:17; Iel 51:7; Ve 14:8 \* 17:3: Ve 13:1



yau teni. Ta 'wafina qabuna 'inaya wawa 'waya'wayavidi i'eno'eno Yaubada ana 'awalu-veifa weaqina. <sup>4\*</sup> Ta vavine nana ana kaleko magilafuna ya'itea taha qimwaqimwalina ta wese taha bweabweala otaqina, ta ana 'ivala adi 'ita aqiaqi otaqina goula 'inega be, dabo namanamalidi ta wese bagi kuekuedi 'idiega. Ta nimanaya taha vedi viaviaqina goula 'inega kafikafia, ta vedi nana luluveagatuna'ina ilivu bwavubwavudi be wese velamo'eno kavokavovo ilivuna 'idiega. <sup>5</sup> Ana kia 'inaya taha wawa 'waya'wayavina 'eno'eno, ta ana alamani 'wai'waivina, ta ana vona ba'e 'idewani,

‘BABILONI TAHA ‘ABAGA QIDUANA,  
TA ‘ABAGA NANA VIVINE TOKODADA INADI  
BE WESE BWA‘OBWA‘O ANA ILIVU LUVEIFANA QABUDI INADI.’’

<sup>6\*</sup> Vavine nana ya'itea ni'a vekwawakwava veiveifa. Ta ena kwava 'iuna mana Yaubada ena tomotauyavo taudi lova ivesimasimana Iesu Valena weaqina sulalidi numea. Ta me egu nuavoqana aqiaqi vavine nana yavevekovea.

<sup>7\*</sup> 'Inega tovale'ewa nana vetala'aiegu vonaya, "Tola'ai weaqina unuavoqana? Vavine nana ta wese yubai nana 'unu'ununa adi yau seveni ta donana teni gwavunaya toatoa adi alamani ena givesimatalia 'iuya. <sup>8\*</sup> Yubai nana tawadega u'itea e ba'itagana ni'a 'waiva, mana ni'a webui vetoa ge ana 'ebelu'ovoamo 'inaya, ta nawale navanemai na'ifoqe ta natauya ana 'ebeluveawala 'inaya. Lova Yaubada Yawai ana Buki maduviaqia, ta 'abiboda kuyavata qabudi 'iva'ava'aidi. Ta tomeqabu adi wawayavo ge da'eno'eno buki nana 'inaya, e taudi ina nuavoqana qiduana yubai nana ena 'ifoqe 'evivi weaqina, mana lova yubai nana 'waiva, ta nawale ina 'ita 'eviviea.

<sup>9</sup> "Ba'e yani diavona au fata una alamani aqiaqiedi 'eguma nuau na'eqa'u aqiaqiei. Yubai nana 'unu'ununa seveni dina taudi ive'ebe'ita 'abaga nana ana bwanagayavo adi yau seveni weaqina, ta vavine nana luviluvinedi. Ta wese bwanaga diavona ive'ebe'ita toluvine qiduquduadi adi yau seveni weaqina. <sup>10</sup> Ta toluvine seveni dina 'idiega faibi ni'a ibe'u, ta vesikisina ba'itagana luviluvine, ta vesevenina nawale ge dava'ifoqe, ta 'esi tuta goyona na'ifoqe, ta tuta kukusana namo naluvine. <sup>11</sup> Ta yubai nana bweabweala otaqina tauna lova toatoa ta ba'itagana ni'a 'waiva, e taunana toluvine ve'etitina. Ta ena ilivu be ena viaqa kavona toluvine seveni dina 'idewani, 'inega tauna wese nawale luvine waiwaina nalobea ta Yaubada naluveawalia.

<sup>12\*</sup> "Ta donana adi yau teni ni'a u'itedi e taudi ive'ebe'ita toluvine qiduquduadi wese adi yau teni weaqidi, ta nawale ge ida va'ifoqe be edi luvine dave'ale. Taudi nawale venua'ivina ina lobea edi vetoluvine weaqina, ta tuta kukusana namo kavona auwa 'aidegana ina luvine yubai nana maega. <sup>13</sup> 'Inega teni dina ina va'auta ta edi nuanua 'aideganega edi waiwai be wese edi 'abiluvine ina awafelea yubai nana 'inaya. <sup>14</sup> 'Inega qabudi Yaubada ena Lami ina luaviea. Ta Lami nana ena tomotauyavo maega toluvine dina ta wese yubai nana ina vewaiwai va'inedi, mana Lami nana tauna kaiwabuyavo qabudi edi Kaiwabu, ta wese toluvine qiduquduadi adi Toluvin Qiduana."

<sup>15</sup> 'Inega tovale'ewa nana wese vonegu vonaya, "Go'ila diavona ni'a u'itedi tokodada nana 'idia toatoa, e taudi ive'ebe'ita totoa bwa'obwa'o qabudi di'we taha taha 'idia itoatoa, ta wese bona taha taha iveveqaeyedi. <sup>16\*</sup> Ta yubai nana donana teni maega ni'a u'itedi, ta taudina tokodada nana ina vevoalanea, ta ena kulufa qabuna be wese ana kaleko ina 'ekili 'ovoidi 'inega ma'igonegonena. Ta wese vei'ona ina 'ainia ta 'abiboda luluna ina felei 'aiwea na'ala 'ovoia. <sup>17</sup> Ba'e yani diavona ina 'ifoqe Yaubada ena nuanua 'inega, mana ena nuanua ba'e a'uya toluvine teni dina edi nuanua 'inaya. E 'inega edi 'abiluvine iawafelea yubai nana 'inaya, be yaqisa Yaubada ena nuanua tuta maimai weaqina ana aqiaqi na'ifoqe. <sup>18</sup> Ta vavine nana ni'a u'itea kavona uda ve'wayoqa, e tauna veve'ebe'ita 'abaga taha qiduana weaqina, ta 'abaga nana bwa'obwa'o ana toluvineavo qabudi luviluvinedi."

\* 17:4: Iel 51:7; Ve 18:16 \* 17:6: Ve 18:24; 19:2 \* 17:7: Ve 13:1 \* 17:8: Dan 12:1; Ve 11:7; 13:7 \* 17:12: Dan 7:7,24 \* 17:16: Ve 18:8

## 18

'Abaga Babiloni ena luveifa

<sup>1</sup> 'Inega wese taha tovale'ewa ya'itea mahalega webuwebui mai. Tauna me ena luvine qiduana, ta wese ena simatalega bwa'obwa'o qabuna guvesimatalia. <sup>2</sup> \* Ta bonana qiduanega gaba vonaya,

“Abaga qiduana Babiloni  
ni'au luveifa otaqa!

Ta Seitani ena tofewayavo

be niboana luveifadi,  
ta wese manu yubai 'ali'aligidi  
adi to'ai ni'a ive'abagea,

<sup>3</sup> mana bwa'obwa'o ena di'we qabudi  
'abaga nana ena ilivu luveifadi

be bwavubwavudi ana 'oine 'inega ni'a inuma.

Ta bwa'obwa'o ana toluvine qiduqiduadi

qabudi maega ivelamo'eno kavokavovo,  
mana 'abaga nana kavona tokodada taha 'idewani.

Ta 'abaga nana ena vekaikaiwabu 'inega

bwa'obwa'o ana tovegimwane qabudi  
edi kaikaiwabu qiduadi ni'a ilobedi.”

<sup>4</sup> \* 'Inega mahalega wese taha bona yanoqolia vonaya,

“Egu tomotauyavo,

omi'a bena'e 'abaga nana 'inega  
ona 'ifoqe fole ena luveifana navaukamana 'imia  
be ana luvematasabu luveifa nana weaqina  
wese omi'a ona lobe.

<sup>5</sup> \* Mana 'abaga nana ena luveifana veagovi vaneqa

kavona mahala ena vane 'idewani,  
ta ena ilivu luveifadi Yaubada ge danuafania.”

<sup>6</sup> \* Ta wese tovale'ewa nana vonaya,

“Abaga omo'e tola'ai ni'a viaqia 'imia,  
e omi'a wese 'edewana ona ve'ia 'aiqea,  
ta 'eguma tauna taha yani ni'a viaqia 'imia,  
e 'inega ana ve'ia magilafuna ona viaqia 'inaya.

Tauna ena 'oine luveifana 'inega tomotau venumedi,

ta 'eguma vedi 'aidegana 'inega venumedi,  
e 'inega omi'a vedi magilafuna 'inega ona venumea.

<sup>7</sup> \* Tauna ena kaikaiwabu agona

be wese ena qaiawa qiduana  
ni'a lobe ena toa 'inaya,  
e 'inega ena kaikaiwabu  
ta ena qaiawa adi 'etofwafwa 'inega  
ana ve'ia ona neia visiqa be wese nuavita 'idiega.

Mana taunega ena gagaha 'inega vonaya,

'Ya'a kavona kwini yatoatoa,  
ta ge wese ena vewadawada'e,  
ta wese ge taha tuta 'inaya  
dou nage nuavita ena lobedi.'

<sup>8</sup> \* 'Inega taha 'aubena 'inaya vita taha taha

\* 18:2: Ve 14:8; Ais 13:21; 34:11-14; Iel 50:39 \* 18:4: Ais 48:20; Iel 50:8; 51:6,45; 2Kol 6:17 \* 18:5: Nug 18:20-21;

Iel 51:9 \* 18:6: Same 137:8; Iel 50:15,29; 2Te 1:6 \* 18:7: Ais 47:7-9 \* 18:8: Ve 17:16

ina luveafei ina 'ifoqe 'idewani dou be,  
botana ta wese 'aiwe 'ala'alaina na'alaia.  
Mana Kaiwabu Yaubada Tovewaiwai otaqa

vavine nana naluvinea ta ana ve'ia naneia.”

<sup>9</sup> \* “Ta bwa'obwa'o ana toluvine qiduiduadi taudi vavine nana maega ni'a ive-lamo'eno kavokavovo ta wese iqaiawa kavokavovo ena kaikaiwabu weaqidi, e taudi 'abaga nana weaqina ina duvovoyoya be ina dou mana ni'a 'ala'alaina ta 'auna vanevane i'itea. <sup>10</sup> Ta toluvine diavona me edi mwaniniva tufwana luluvaia ina tovololo ina 'itea, ta ina vonaya,

'Aioi! Aioi!

'Abaga qiduana ta waiwaina

Babiloni ana luvine lukwayavonega ni'a lobeal!

<sup>11</sup> \* “Ta wese bwa'obwa'o ana tovegimwaneavo 'abaga nana weaqina ina nuavita ta ina dou, mana ge taha toga wese datoatoa be edi kulufa nagimwanedi, <sup>12</sup> \* 'edewani goula be, siliba be, dabo kaikaiwabudi be, bagi be, mwali be, kaleko sulu wadawadaeadi be, kaleko sulu kaikaiwabudi qimwaqimwalidi ta bweabweala otaqidi be, 'aiwe meiladi aqiaqina be, dona qiduiduadi be, dabo wadawadaeadi be, 'aiwe adi maisa 'ena'ina be, kainumu kofa ta 'aeni be wese vaina kainumu namanamalidi. <sup>13</sup> Ta wese vane 'idewani kemwata be, dedemusi be, keninitu be, kedimona be, dede'wa meiladi aqiaqina 'idewani inisenisi be mulo be, 'au meilana aqiaqina be, dede'wa 'aiwe olibe vuaqina 'inega be, 'oine be, falawa witi be, bulumakau be, sifi be, osi be, waga lihilihi, ta wese edi tofewa kavovo ge taha toga nagimwanedi. Vonahaqiaqi, tovegimwane diavona tomotau ikafidi ta 'abibodanaya ivegimwaneyedi tovekaikaiwabu 'idia.

<sup>14</sup> “Inega tovegimwane diavona ina gaba 'abaga nana 'inaya ina vonaya, Yani qabuna adi 'ita aqiaqi otaqidi eu 'ebenua'ewa ni'a iawala. Ta kulufa kaikaiwabudi uawatubo aqiaqiedi ge wese una 'ita 'eviviedi. <sup>15</sup> \* Vonahaqiaqi, tovegimwane diavona edi kaikaiwabu qiduana 'abaga nana 'inega ni'a ilobedi, e taudi me edi mwaniniva ina tovololo luluvaiega ta 'abaga nana ana luvematasabu waiwaina ina 'itea. Ta me edi dou be wese me edi duvovoyoya ina vonaya,

<sup>16</sup> \* 'Aioi! Aioi!

O'a 'abaga qiduana lova ive'ivaliu

kaleko sulu adi maisa qiduana

wadawadaeadi be bweabweala otaqidi 'idiega,

ta wese bagi viaviaqina goula

be dabo kaikaiwabudi 'idiega,

<sup>17</sup> \* ta lukwayavonega eu kaikaiwabu diavona iawala.’

“Ta wese toniwaga be, waga ana tofewayavo be, togelu ta wese tomeqabu edi toa weaqina mane ilobelobedi edi fewa 'inega mwade'waya, e ba'e qabu diavona luluvaiega ina tovololo, <sup>18</sup> \* ta 'abaga nana 'auna ina 'itea ta ina 'alabwau ina vonaya, 'Lova ge taha 'abaga ana 'ita aqiaqi otaqina omo'e 'abaga nana 'idewani, ta ba'itagana ma'oda?’ <sup>19</sup> Inega edi nuavita 'inega 'unu'unudi 'inaya bwa'obwa'o fwayana ina a'uya be ina dou qiduana ta ina vonaya,

'Aioi! Aioi!

'Abaga qiduana veilaeqegogyo ni'a lobeal!

Omo'e 'abaga nana 'inega

toniwaga qabudi edi kaikaiwabu ilobedi,

ta lukwayavonega edi kaikaiwabu diavona

iluve'waiva vataya.

<sup>20</sup> \* 'Inega totoa mahala ona qaiawa!

\* 18:9: Isi 26:17; 27:30-35 \* 18:11: Isi 27:36 \* 18:12: Isi 27:12-13,22 \* 18:15: Isi 27:31,36 \* 18:16: Ve 17:4 \* 18:17: Ais 23:14; Isi 27:27-29 \* 18:18: Isi 27:32 \* 18:20: Ais 44:23; Luve 32:43; Iel 51:48

Omi'a Yaubada ena tomotauyavo,  
 be ana tovesimasimanayavo  
 be ena tovaletuyanayavo qabumi ona qaiawa,  
 mana lova visiqa 'abaga nana 'inega olobea,  
 ta ba'itagana ena veilivu veifa 'imia  
 weaqina Yaubada ni'a ve'iea.' ”

21\* 'Inega Yaubada ena tovale'ewa waiwaina taha dabo qidua va'inena silagaia inoqei  
 webui mwade'waya ta vonaya,

“Abaga qiduana Babiloni una be'u  
 ba'e dabo nana 'edewana,  
 be ge wese taha toga na'ita 'evivieu.

22\* 'Inega eu qaiawa nahawala,  
 mana ge taha wese 'evosi nage 'ebelaha  
 'idewani afi be, loli be, sagali  
 ta wese bea ana mu'e na'ifoqe 'iuyega.

Fewa taha taha adi toalamaniavo  
 ge wese ina toatoa 'iuya,  
 ta wese witi ana 'ebememe  
 butuna ana noqola nahawala.

23\* Ta ge taha tuta wese odamu  
 edi simatala nasimatala 'iuya.

Ta wese gebu tovaqi mevavinedi be me'olotodi  
 bonadi qaiqaiawana na'ifoqe 'iuyega.

Vonahaqiaqi, eu tovegimwaneavo bwa'obwa'o  
 ana tovegimwaneavo qabudi iveqidua va'inedi,  
 ta wese eu lu'afo'a 'inega di'we qabudi  
 ana totoayavo iu'avedi.

24\* Ta wese Yaubada ena tovesimasimanayavo  
 taudi ena nuanua isimana 'ifoqeyedi uluve'aligidi  
 ta sulalidi inoqa eu 'edayavo 'idia.

Vonahaqiaqi, o'a eu nuanua 'inega  
 Yaubada ena tomotauyavo iluve'aligidi  
 bwa'obwa'o ena di'we qabudi 'idia.”

## 19

### *Totoa mahalaya Yaubada iawahawatuboya*

1 Yaubada ena tovale'ewa ena vona gumwala, ta 'abiboda vekolukolua qiduana  
 mahalega yanoqolia kavona qabu qiduana bonadi, ta ivonaya,

“Aleluia!”\*

Yaubada kana awatuboya,  
 tauna ada To'etoyavua  
 ta Toatoa Vanena ta wese Tovewaiwai.

2\* Tauna ena luvine tunutunuqina  
 ta aqiaqi otaqina ni'a ve'ifoqeyea,  
 mana vavine nana tauna tovelamo'eno dididiga  
 ena velamo'eno kavokavovo  
 'inega bwa'obwa'o qabuna giveluveifea,  
 ta wese 'abaga nana 'inaya

\* 18:21: Iel 51:63-64; Isi 26:21    \* 18:22: Ais 24:8; Isi 26:13    \* 18:23: Iel 7:34; 16:9; 25:10    \* 18:24: Iel 51:49;  
 Ve 17:6    \* 19:1: Tuta nana me Diu Yaubada iawahawatuboya 'inega ibwaubwau ivonaya, “Aleluia”. Ta  
 bona lbeliu 'inega ana alamani “Yaubada kana awatuboya”.    \* 19:2: Luve 32:43; Ve 6:10

Yaubada ena tomotauyavo luve'aligidi.  
Ta ba'e luveifa diavona weaqidi  
Yaubada luai 'eweavavine nana 'inaya."

<sup>3</sup> Ta wese qabu dina ikolua ivonaya,

"Aleluia!

Yaubada kana awatuboya,  
mana 'abaga qiduana ni'a 'ala 'ovoia  
ta 'auna tuta qabuna vanevane."

<sup>4</sup> 'Inega kaiwabu diavona adi yau 24 be wese 'iva'ava'ata foa mayawai dina tuqatuqad-  
iega isobadi Yaubada 'iawanaya, tauna ana galiva kaikaiwabuna 'inaya toatoa, ta ivonaya,  
"Vonahaqiaqi,

ema nuanua 'idewana.

Aleluia!"

*Lami nana ena vaqi 'abwagana*

<sup>5</sup> 'Inega galiva kaikaiwabu nana 'inega taha bona mai, vonaya,

"Omi'a Yaubada ena tofewayavo

ami wawa 'ena'ena'idi be ami wawa goyogoyodi

ta wese omi'a ana to'amayabayavo qabumi ona awatuboya."

<sup>6</sup> \* 'Inega wese kavona qabu qiduana bonadi yanoqolia, ta adi noqola kavona go'ila  
inoinoqa butuna, ta wese kavona yavalata butuna nununuqa, ta ivonaya,

"Aleluia! Yaubada kana awatuboya,

mana tauna eda Kaiwabu Tovewaiwai

ta wese Toluvine Qiduana.

<sup>7</sup> \* Kana qaiawa be kana awatubo aqiaqiea

ta wese ana wawa kana givaneqea,

mana Lami ena vaqi ana tuta ni'a 'ifoqe,

ta ana gabuinoqa taunega

ni'a 'ivala edi vaqi weaqina,

<sup>8</sup> ta ana gabuinoqa nana ni'au

ana kaleko wadawadaeana

ta kaikaiwabuna Yaubada neia."

(Ta kaleko nana ana alamani Yaubada ena tomotauyavo edi ilivu tunutunuqina.)

<sup>9</sup> \* 'Inega tovale'ewa nana vonega vonaya, "Ba'e 'idewani una 'wayavi 'aiqea: Tome-  
qabu omi'a Yaubada ni'a gabemi Lami nana ena vaqi 'abwagana 'inaya ona qaiawa." Ta  
wese tovale'ewa nana vonaya, "Simana ba'e vonahaqiaqi, ta Yaubada 'inega maimai."

<sup>10</sup> \* 'Inega yagivelukabwebwe 'aqenaya sabi iwa'odu 'inaya, ta voneguya, "Ge wese  
'edewana una viaqi, mana ya'a wese Yaubada ena tofewa kavona o'a be wese tovetu-  
maqana qabudi Iesu Valena isimana 'ifoqeyea. Ta 'esi luaqiaqieu be Yaubada 'inaya una  
iwa'odu, mana tauna ena vonahaqiaqi Iesu weaqina give'ifoqeyea, ta ba'e vona nana  
Yaubada ena tomotauyavo isimasimane Niboana Gwalagwalana ena venuaha'u 'inega."

*Yubai osi wadawadaeana be ana togelu*

<sup>11</sup> \* 'Inega mahala ya'itea 'e'ewa'ana, ta 'inaya yubai osi wadawadaeana ya'itea, ta  
ana togelu ana wawa igabea, "Ilivu tunutunuqina ta ma ana vetumaqana." Mana  
tauna ena luvine tunutunuqina 'inega tomatu luvinedi, ta wese avia ana tuta  
'inaya luvine tunutunuqina 'inega luvine. <sup>12</sup> \* Ta matana adi 'ita kavona 'aiwe  
saesaelina, ta 'unu'ununaya ana biatuli kaikaiwabudi 'eala i'eno'eno. Ta wese taha  
wawa 'waya'wayavina 'inaya 'eno'eno, ta ge taha toga wawa nana dahalamanina, ta 'esi  
ana 'aidegamo alahalamanina. <sup>13</sup> \* Ana kwakwalufai ma sulalina, ta ana wawa igabea

\* 19:6: Ve 14:2 \* 19:7: Ais 61:10; Ve 21:2 \* 19:9: Md 22:2-3 \* 19:10: Via 10:25-26; Ve 22:8-9 \* 19:11:  
Ve 1:5; 6:2; Same 96:13; Ais 11:4 \* 19:12: Dan 10:6; Ve 1:14; 2:17 \* 19:13: Ais 63:1-3; Ion 1:1,14

“Yaubada ena Vona”. <sup>14</sup> Inega mahala ana toluaviayavo ma adi kaleko wadawadaeadi ta vunavunaqidi edi osi wadawadaeadi 'idiega adi Tovamatana i'abibodea. <sup>15</sup> \* Ta Tovamatana nana 'awanega kefata so'uso'una 'ifo'ifoqe, ta kefata nana 'inega totoa bwa'obwa'o di'we qabudi 'idia navewaiwai va'inedi, ta ena luvine falafalana 'inega naluvinedi. Tauna voalanavo namemedi kavona 'oine vuaqina imemedi 'ebememe 'inaya. Ta Yaubada Tovewaiwai ena nuenuega ba'e 'idewani Tovamatana nana 'inega naluvematasabudi, mana Yaubada diana vilea tomotau diavona edi luveifana weaqina. <sup>16</sup> \* Ta ana kwakwalufai 'inaya ta wese fianaya ana wawa 'waya'wayavina 'eno'eno vonaya,

“OLOTO BA'E TOLUVINE QABUDI EDI TOLUVINE,  
TA WESE KAIWABU QABUDI EDI KAIWABU.”

<sup>17</sup> \* Inega wese taha tovale'ewa ya'itea baba'au 'inaya tovtovolo ta manu iyewayewa dadana mahalaya 'idia gabagaba, ta vonedia, “Ova'auta omai Yaubada ena 'ai qiduana 'inaya, <sup>18</sup> be 'inega ona 'ai toluvine qiduquadi vei'odi be, toluavia adi tovmatanayavo vei'odi be, toluavia waiwai vei'odi be, osiavo be adi togeluyavo vei'odi, ta wese tomotau qabudi 'idiega 'idewani tofewa kavovo be yavuyavuidi vei'odi ona 'ai be, tomotau adi wawa 'ena'ena'idi ta wese taudi adi wawa goyogoyona vei'odi ona 'ai.”

<sup>19</sup> Inega yubai nana lova mwade'wega vanemai ta wese bwa'obwa'o ana toluvineavo qiduquadi me edi toluaviayavo ya'itedi ni'a i'ava'uta sabi vedavi osi wadawadaeana ana Togelu be ena toluaviayavo maega. <sup>20</sup> \* Vonahaqiaqi, lova yubai nana ena tovesimasimana 'e'eu'au'avina vaina yani 'ebenuavoqana viaqidi yubai nana ena wawega ta wese ena waiwaiega. Ta wese tovesimasimana nana tomeqabu yubai nana ena naba ni'a i'ewea ta wese ena tokwalui 'inaya ihiwaiwa'odu u'ava aqiaqiedi. Ta vedavi nana 'inaya osi wadawadaeana ana Togelu me ena toluaviayavo yubai nana ta ena tovesimasimana nana maega ikafidi. Ta magilafudi mayawaidi ifelawebuiedi lavu saesaelina 'inaya, ta ba'e lavu nana saesaela dabo 'wea'weavidi adi wawa salofa 'idiega. <sup>21</sup> Ta osi wadawadaeana ana Togelu 'awanega kefata nana 'ifoqe, 'inega ana aviayavo qabudi luve'aligidi. Ta 'abiboda manu qabudi iwebui mai ta 'o'oadi i'anidi gamodi 'elukoko.

## 20

### *Ya'wala tausani (1,000) weaqina*

<sup>1</sup> \* Ta 'inega Yaubada ena tovale'ewa wese taha ya'itea mahalega webui mai. Ta nimanaya vetoa kuena ge ana 'ebel'ovoamo ana wawa Abisi ana kihi ta wese seni taha vitana kafikafidi. <sup>2</sup> \* Inega tovale'ewa nana mwata qiduana ta bweabwealina kafia ta yoqonia, ta 'idewani natoa ya'wala tausani (1,000) 'idia. Ta mwata nana tauna mwata nugwenugweina, ta wese ana wawayavo igabea Diabolo ta wese Seitani. <sup>3</sup> Inega tovale'ewa nana ena seni 'inega Seitani yoqonia ta felawebuiea vetoa nana 'inaya, ta 'awana lokea. Inega wese Yaubada ana 'ebe'inana a'uya 'awanaya, be yaqisa Seitani ge ana fata na'ifoqe be tomotau nau'ava 'eviviedi ya'wala tausani (1,000) 'idia. Ta ya'wala diavona ina gumwala, 'inega ina li'amia be yavuyavuina natoatoa tuta kukusana namo weaqina.

<sup>4</sup> \* Ta wese galiva kaikaiwabudi ya'itedi, ta galiva diavona 'idia tomotau itoatoa taudi 'abiluvine ni'a i'ewea sabi luvine. Ta ba'e tomotau diavona taudi niboana, mana lova Iesu Valena ana simana weaqina magadi ida'ea ta i'aliga. Vonahaqiaqi, edi 'aliga 'iuna mana taudi lova ge ida iwa'odu yubai veifana 'inaya, nage ena tokwalui 'inaya. Ta wese ge nuadi yubai nana ena naba adi kiaya nage nimadia ida a'uya. Ta 'aligege iya'itoto 'evivi, 'inega Keliso maega iluvine ya'wala tausani dina (1,000) 'idia. <sup>5</sup> Lova ge taha toga daya'itoto 'evivi 'aligege, ta ba'e tomotau diavona edi ya'itoto nana ve'itayea ya'itoto 'evivi nugwenugweina to'aliga qabudi 'idiega, mana to'aliga qabudi ge ida ya'itoto 'evivi

\* 19:15: Same 2:9; Ve 1:16; 14:20      \* 19:16: Ve 17:14      \* 19:17: Isi 39:17-20      \* 19:20: Ve 13:12-17; 20:10  
\* 20:1: Ve 9:1      \* 20:2: Nug 3:1; Ve 12:9      \* 20:4: Dan 7:9,22,27; 1Kol 6:2; Ve 13:17

ana laba ya'wala tausani (1,000) nagumwala. <sup>6\*</sup> Vonahaqiaqi, Yaubada ena tomotauyavo vaina ina ya'itoto 'evivi ya'itoto nugwenugweina 'inaya. E taudi luaqiaqiedi be ina qaiawa qiduana, mana ge ana fata be ina veilaqe 'aliga vemagilafuna 'inaya. Ta 'esi ina fewa toveguba 'idewani Yaubada be Keliso weaqidi, ta 'inega Keliso nana maega ina luvine ya'wala tausani (1,000) gamonaya.

*Seitani ana luvematasabu vataya*

<sup>7</sup> Ya'wala tausani dina (1,000) ina gumwala, e 'inega Yaubada Seitani nahawafelei ta nali'ami na'ifoqe vetoa ge ena 'ebelu'ovoamo Abisi 'inega. <sup>8\*</sup> Na'ifoqe natauya bwa'obwa'o ana di'we taha taha 'idia, ta di'we diavona adi wawa Gogi ta Magogi. Ta tomotau qabudi itoatoa di'we diavona 'idia nau'avedi 'inega nagaba va'auqidi vedavi weaqina. Ta toluavia diavona avo 'wayoqidi, mana adi yau kavona gelasa balabalaya. <sup>9\*</sup> 'Inega mataguya me edi gagasa itautauya bwa'obwa'o qabuna 'idia, ta 'inega i'ifoqe Yaubada ena 'abaga veyolubea qiduana 'inaya, ta omo'e 'inaya ena tomotauyavo ni'a iva'auta itoatoa, ta itovolo vivilidi. Ta 'esi 'aiwe 'ala'alaina mahalega 'avalata'ia webui ta Seitani me ena qabuyavo luveawalidi. <sup>10\*</sup> Ta Yaubada ena tomotauyavo adi tou'ava tauna Diabolo nana wese ifelawe buiea lavu 'ala'alaina 'inaya, ta ena 'alata dabo 'wea'wevidi salofa 'idiega. Ta lavu nana 'inaya enavo ni'a imadufelawe buiedi 'idewani yubai nana mwade'wega vanemai ta wese ena tovesimasimana 'e'eu'au'avina maega. Ta lavu nana gamonaya toi dina visiqa ina lobeata tuta vataya 'inaya.

*Yaubada ena luvine 'ebelu'ovoa*

<sup>11</sup> 'Inega galiva kaikaiwabuna gegoyo ta wadawadaeana ya'itea, ta galiva nana ana totoa wese ya'itea. 'Inega bwa'obwa'o be wese mahala idena totoa galiva nana 'inega, ta ge taha edi 'ebeoukwaivamo, 'inega i'eluawala. <sup>12\*</sup> 'Inega wese to'aliga qabudi ya'itedi, taudi adi wawa 'ena'ena'idi ta wese taudi adi wawa goyogoyodi, ta itovotovolo galiva nana matanaya, ta 'inega galiva ana totoa buki tanaidi. 'Inega taha wese buki tanaia, e ba'e buki nana Yawai ana Buki. Ta buki diavona madutanai gamodia to'aliga diavona edi ilivuyavo 'waya'wayavina 'eno'eno, ta ilivu diavona 'idiega adi luvine i'ewea. <sup>13\*</sup> Ta tomeqabu lova i'aliga mwade'waya qabudi i'ifoqe mai, mana mwade'wa nana ge ana fata nakafidi. Ta wese 'aliga be deba'unu ge wese adi fata be to'aliga diavona ina kafi'i'ihidi. 'Inega qabudi itovolo Yaubada matanaya ta adi luvine ilobeata edi ilivu adi 'etofwafwa 'inega. <sup>14</sup> 'Inega 'aliga be deba'unu wese ifelawe buiedi lavu 'ala'alai nana 'inaya. Ta ba'e lavu nana tauna 'aliga vemagilafuna. <sup>15</sup> Ta tomeqabu adi wawa ge ana 'wayavimo Yawai ana Buki gamonaya taudi wese ifelawe buiedi lavu 'ala'alaina 'inaya.

## 21

*Mahala be bwa'obwa'o vauvaudi*

<sup>1\*</sup> 'Inega mahala vauvauna be bwa'obwa'o vauvauna ya'itedi mana mahala be bwa'obwa'o nugwenugweidi ni'au iawala, ta wese mwade'wa 'idewani ni'a awala. <sup>2\*</sup> 'Inega 'abaga gwalagwalana ya'itea, tauna Ielusalema vauvauna mahalega webuwebui mai Yaubada 'inega. Ta ni'au veveaiqavuna kavona tovaqi mevavinena davaiqavu ta moqanena maega ina velobaloba. <sup>3\*</sup> Ta galiva kaikaiwabuna 'inega taha bona qiduana yanoqolia vonaya, "Ba'itagana Yaubada ena 'abaga ni'a 'ifoqe ena tomotauyavo 'idia. Ta tauna tomotau diavona maega ina toatoa, ta taudina ena tomotauyavo, ta tauna edi Yaubada. <sup>4\*</sup> Be 'inega mataeludi naluya'waia, mana gebu wese 'aliga nage visiqa nage dou 'idia na'ifoqe, mana toa nugwenugweina ni'au awala."

\* 20:6: Ve 1:6 \* 20:8: Isi 38:2,9,15-16 \* 20:9: 2Kin 1:10 \* 20:10: Same 11:6; Ve 19:20; 21:8 \* 20:12: Dan 7:9-10; Md 25:31-46; Via 17:31; 2Kol 5:10; Ve 13:8 \* 20:13: Lom 2:6; 1Fit 1:17; Ve 2:23; 22:12 \* 21:1: Ais 65:17; 2Fit 3:13 \* 21:2: Ais 52:1; 61:10; Ibe 11:10; 12:22; Ve 3:12 \* 21:3: Luvi 26:11-12; Isi 37:27; Sek 2:10; 2Kol 6:16 \* 21:4: Ais 35:10; 65:19; Ve 7:17

<sup>5</sup> \* 'Inega galiva kaikaiwabuna ana totoa vonaya, "Yani qabudi ena give'evaunidi!" Ta wese vonaya, "Vona ba'ena una 'wayavidi, mana ma adi vetumaqana ta wese vonahaqiaqi." <sup>6</sup> \* Ta wese vonegu vonaya, "Ya'a egu nuanuayavo qabudi ni'a yaviaqa 'ovoidi. Ya'a Alofa be Omega, yani qabuna edi 'ebeve'ale be edi 'ebelu'ovoa. Ta togama magana luayahaya yawai go'ilina ena nei kavovoya be nanuma salufa 'inega. <sup>7</sup> \* Ta togama Seitani vewaiwai va'inea ba'e yani diavona na'ewedi 'iguyega, ta tauna na'awatamanegu ta ya'a ena 'awanatunea. <sup>8</sup> \* Ta 'esi tomwaniniva be, tomeqabu ni'a ilua'u agu vetumaqana be, tokodada be, toluve'aliga be, tovelamo'eno kavokavovo be, tobalavu ta wese tokwakwaia be, taudi tokwalui 'idia ihiwaiwa'odu ta wese tou'ava, e ba'e qabu diavona edi 'ebetoa lavu 'ala'alaina, ta lavu nana dabo salofa 'wea'weavidi 'inega 'ala'alata. E omo'e 'aliga nana tauna 'aliga vemagilafuna."

### *Ielusalema vauvauna*

<sup>9</sup> 'Inega Yaubada ena tovale'ewa adi yau seveni lova 'ebeveilaqe ma gaebadi wese adi yau seveni iguiwaqidi bwa'obwa'oya 'idiega taha iadi mai 'iguya vonaya, "Umai katauya, Lami nana ana gabuinoqa ena ve'iteu."

<sup>10</sup> \* 'Inega Niboana Gwalagwalana ena waiwai luveagatuna'igu ta tovale'ewa nana 'ebe'ewegu tauyegu taha bwanaga qiduana ta kuena debanaya, ta 'abaga simasimalina ve'itegu, tauna Ielusalema mahalega webuwebui mai Yaubada 'inega. <sup>11</sup> \* Yaubada ena simatala kaikaiwabuna 'abaga nana guvesimalia, ta ana 'ita kavona dabo kaikaiwabuna namanamalina ana wawa yasifa, ta vevegili 'wana'wana 'edewani gelasi. <sup>12</sup> \* Ta 'abaga nana ni'a 'ali'alina dabo 'inega, ta 'ali nana qiduana ta kuena ta ana 'awayavo adi yau tuwelo, ta Yaubada ena tovale'ewa wese adi yau tuwelo 'awa diavona 'ita'itamakidi. Ta wese me Isileli edi gade adi yau tuwelo adi wawayavo 'waya'wayavidi 'eno'eno 'awa taha taha 'idia. <sup>13</sup> 'Abaga nana ana 'awayavo toidi di'we 'aidega 'aidega 'idia. 'Inega baba'au ena 'ebeyayaqega 'awa toi be, baba'au ena 'ebewebuiega 'awa toi be, bolimanega 'awa toi ta wese yalasiega 'awa toidi i'eno'eno. <sup>14</sup> Ta 'abaga nana ana 'ali ena 'ebevewaiwai dabo qiduqiduadi adi yau tuwelo vevetovolodi itovotovolodi, ta dabo diavona 'idia Lami nana ena tovaletuyana adi yau tuwelo adi wawayavo 'waya'wayavidi 'eno'eno.

<sup>15</sup> \* Tovale'ewa nana nawale maega aveveqae, ta 'ebe'etoliva viaviaqina goula 'inega nimanaya kafikafia, be 'inega 'abaga nana be, ana 'awayavo ta wese ana 'ali na'etolivedi. <sup>16</sup> Ta tutana 'abaga nana 'etolivea 'inega 'itea ena vekue be, ena vane ta wese ana baba adi 'etoliva lelelea, ta 'etoliva diavona tutausani tuanidedi kilomita (2,200) 'idewani. <sup>17</sup> 'Inega tovale'ewa nana wese 'abaga nana ana 'ali 'etolivea, ta ana bado 65 mita 'edewana. Ta tovale'ewa nana tomotau edi sa'wa 'inega 'ali nana sa'wea.

<sup>18</sup> \* 'Abaga nana ana 'ali iviaqia dabo kaikaiwabuna ana wawa yasifa 'idiega, ta 'ali nana gamonaya viaviaqina goula daisina 'inega, ta namanamalina kavona gelasi 'idewana. <sup>19</sup> Ta 'ali nana ive'ivalia mali dabo be mali dabo kaikaiwabudi 'idiega. Ta ba'e dabo diavona ma adi wawayavo adi 'ita 'inega, ta wawa diavona ba'e 'idewani: Taha dabo ana wawa yasifa be, vemagilafuna safaia be, vetoina agate be, vefoana emelodi be, <sup>20</sup> vefaibina onikisi be, vesikisina kanelieni be, vesevenina kilisoliti be, ve'etitina belio be, venainina tofasi be, vetenina kilisofasi be, velevenina diasenita ta wese vetuwelona ana wawa ametisi. <sup>21</sup> Ta 'awa diavona adi yau tuwelo viaviaqidi felo\* 'inega. Ta 'awa 'aidegana wese felo 'aidegana 'inega ni'a iviaqia. Vonahaqiaqi, felo 'aidega 'aidega 'ena'ena'idi. Ta 'abaga nana ana 'eda qiduana qabuna goula daisina vevegili 'wana'wana 'edewani gelasi.

\* 21:5: 2Kol 5:17 \* 21:6: Ais 55:1; Iel 2:13; Ion 7:37; Ve 1:8,17; 22:17 \* 21:7: 2Sam 7:14; 1Yani 17:13; Same 89:26-27 \* 21:8: Md 25:41; Ve 20:15; 22:15 \* 21:10: Isi 40:2 \* 21:11: Ais 60:1-2,19 \* 21:12: Isi 48:30-35 \* 21:15: Isi 40:3; Ve 11:1 \* 21:18: Ais 54:11-12 \* 21:21: Felo: Dimudimu bonadiega igabea ana wawa "perl". Ba'e felo nana kana lobea sumwa'wa aqila gamonaya, ana 'ita kavona dabo gomogomona, wadawadaena ta namanamalina. Ba'e felo nana ana maisa qiduana, ta tomotau ivefewea edi 'ivala weaqina, kavona bagi nage adi nili 'idewani.



<sup>22</sup> Ta ge taha Vanue Gwalagwalana eda 'itei 'abaga nana gamonaya, mana Kaiwabu Yaubada Tovewaiwai be Lami nana taudi 'abaga nana ana Vanue Gwalagwalana. <sup>23</sup> \* Baba'au be wai'ena ge daluaqiaqiedi be 'abaga nana ina guvesimatali, mana Yaubada ena simatala kaikaiwabuna ni'a guguvesimatalia, ta wese Lami nana ve'ebesimatala 'abaga nana 'inaya. <sup>24</sup> \* Ta simatala nana 'inega totoa bwa'obwa'o ina totoa, be bwa'obwa'o ana toluvine qiduquadi edi kaikaiwabuyavo ina miedi 'abaga nana 'inaya. <sup>25</sup> \* Ta 'abaga nana ana 'awayavo tuta qabuna sisiwa'a vatayana, mana ge taha velovelovana da'eno'eno 'inaya. <sup>26</sup> Ta totoa bwa'obwa'o qabudi edi kulufa adi 'ita aqiaqi otaqina ta wese edi kaikaiwabuyavo ina miedi 'abaga nana gamonaya. <sup>27</sup> \* Ta ge taha yani luveifana ana fata nalugu 'abaga nana 'inaya. Ta wese ge taha toveilivu veifa nage to'eu'au'ava adi fata be ina lugu. Ta 'esi tomeqabu taudi adi wawayavo 'waya'wayavidi ni'a 'eno'eno Lami nana ena Buki gamonaya Yawai vataya weaqina, e taudi adi 'aidega ina lugu 'abaga nana 'inaya.

## 22

### *Go'ila be wese* 'aiwe mayawaidi

<sup>1</sup> \* Ta 'inega tovale'ewa nana ve'itegu yawai ana go'ila, ta go'ila nana vevegili 'wana'wana, ta inoinoqa Yaubada be Lami nana adi galiva kaikaiwabuna 'inega, <sup>2</sup> \* ta Ielusalema vauvauna ana 'eda nuaninega inoqa tauya. Ta go'ila nana nanavinavo 'idia yawai ana 'aiweavo itovotovolo. Ta 'aiwe diavona vuaqa taha taha ivuavuaqedi tuta ana yau tuwelo 'idia ya'wala 'aidegana gamonaya, mana wai'ena 'aidega 'aidega 'idia ivuavuaqa. Ta 'aiwe nana 'waena tomotau qabudi bwa'obwa'oya edi mulamula, tauna 'inega iveveaqiaqi.

<sup>3</sup> Ta vonahaqiaqi, ge taha yani luveifana na'eno'eno 'abaga nana 'inaya, mana Yaubada ena luvine 'inega ni'a iawala. Ta Yaubada be Lami nana adi galiva kaikaiwabuna 'abaga nana 'inaya na'eno'eno, ta Yaubada ena tofewayavo ina iwa'odu 'inaya. <sup>4</sup> \* Be wese 'iawana ina 'itei ta tauna ana wawa 'waya'wayavina na'eno'eno adi kiaya. <sup>5</sup> \* Ge taha tuta wese velovelovana na'ifoqe, ta ba'e 'inega baba'au be odamu ge daluaqiaqiedi 'abaga nana 'inaya, mana Kaiwabu Yaubada tauna edi simatala, ta maega ina luvine tuta vataya 'inaya.

### *Iaisu ena mai*

<sup>6</sup> \* 'Inega tovale'ewa nana vonegu vonaya, "Ba'e vona diavona vonahaqiaqi ta wese ada fata kana vetumaqanedi. Eda Kaiwabu Yaubada ena tovesimasimanayavo Niboanina neidi, ta ena tovale'ewa vetunei mai ena tofewayavo 'idia sabi ve'itadi tola'ai nawale na'ifoqe."

<sup>7</sup> \* Ta Iaisu vonaya, "Onoqoli, tuta goyona ena wai. Ta tomeqabu egu vona ba'e Buki nana 'inaya tuta ba'itagana be wese tuta maimai weaqina ivematamatayagedi luaqiaqiedi be ina qaiawa."

<sup>8</sup> \* Ya'a Ioni ba'e yani diavona yanoqolidi ta ya'itedi. Ta yani qabuna edi 'ifoqe 'abibodanaya yagivelukabwebwe tovale'ewa nana 'aqenaya sabi iwa'odu, mana yani diavona ni'a ve'itegu. <sup>9</sup> Ta vonegu vonaya, "Ge una iwa'odu 'iguya, mana ya'a wese Yaubada ena tofewa kavona o'a be tovesimasimana ta wese ba'e Buki nana ana tomatayagayavo 'idewani. 'Inega luaqiaqieu be Yaubada 'inaya una iwa'odu." <sup>10</sup> Ta wese voneguya, "Yaubada ena vonayavo ba'e Buki nana 'inaya tola'ai nawale na'ifoqe bwa'obwa'oya be mahalaya weaqina ge una a'ukwaivedi tomotau 'idiega, mana vona diavona adi aqiaqi ana tuta ni'a vadi'wedi'wea. <sup>11</sup> \* Ta tomeqabu ba'itagana ilivu luveifadi iviaviaqidi, e

\* 21:23: Ais 60:19-20; Ve 22:5      \* 21:24: Ais 60:3,5      \* 21:25: Ais 60:11      \* 21:27: Ais 52:1; Isi 44:9; 1Kol 6:9-10  
 \* 22:1: Isi 47:1      \* 22:2: Isi 47:12; Nug 2:9; Sek 14:8; Ioe 3:18      \* 22:4: Md 5:8; Ve 3:12      \* 22:5: Dan 7:18,27; Ve 5:10; 20:6; 21:23,25      \* 22:6: Ve 1:1      \* 22:7: Ve 1:3      \* 22:8: Ve 19:10      \* 22:11: Dan 12:10

taudi wese tuta qabuna luveifa nana ina viaviaqia, ta tomeqabu edi ilivu bwavubwavudi ba'itagana iviaviaqidi, e taudi wese tuta qabuna ilivu nana ina viaviaqidi. Ta 'esi tomeqabu ba'itagana ilivu aqiaqidi iviaviaqidi, e taudi wese tuta qabuna ilivu aqiaqidi ina viaviaqidi, ta aiqabu edi ilivu vunavunaqidi, e taudi wese tuta qabuna edi ilivu vunavunaqina ina viaviaqidi.”

<sup>12</sup>\* 'Inega Ieisu vonaya, “Nawale ena wai, be 'inega tomotau adi ve'ia ena neidi edi ilivu adi 'etofwafwa 'inega, <sup>13</sup>\* mana ya'a Alofa be Omega, ta wese ya'a yani qabuna ana 'ebeve'ale ta ana 'ebel'uova.”

<sup>14</sup>\* “Ta tomeqabu adi kaleko kuekuena ni'a ilu'utudi ta ivevauvau otaqa ina qaiawa, mana adi luaqiaqi be yawai 'aiwena vuaqina ina 'ainia ta wese luaqiaqiedi be 'abaga nana ana 'awayavo 'idiega ina lugu. <sup>15</sup> Ta 'abaga nana gwavunaya taudi toveilivu veifa ina toatoa 'idewani tobalavu be, tokwakwaia be, tovelamo'eno kavokavovo be, toluve'aliga, be tokwalui adi toiwa'odu ta wese taudi iu'au'ava edi vona 'inega be wese edi viaqa 'inega.”

<sup>16</sup>\* “Ya'a Ieisu, egu tovale'ewa ni'au yavetunei ba'e yani diavona sabi simanedi 'iuya, ta 'inega o'a una simanedi 'ekalesia 'idia. Ya'a kini Deibida ena gadeyega ta ya'a wese 'awa'awai ana 'ubwana.”

<sup>17</sup>\* 'Inega Niboana Gwalagwalana ta Lami nana ana gabuinoqa ivonaya, “Umai!” Be wese tomeqabu ba'e vona nana inoqolia luaqiaqiedi be ina vonaya, “Umai!” Ta tomeqabu magadi yafaia ina mai, mana yawai go'ilina ina 'ewa kavovoi be ina numa.”

<sup>18</sup>\* Ta tomeqabu ba'e Buki nana ena vona ni'a onoqolia tola'ai nawale na'ifoqe bwa'obwa'oya be, mahalaya ta wese tomotau 'idia e ba'e egu vematamagilafu waiwaina 'imia. Vona diavona 'waya'wayavidi ba'e Buki nana gamonaya i'eno'eno gebu wese taumi emi nuanua 'inega ona luvetomanedi, fole visiqi dina Buki ba'e gamonaya simanedi, nawale Yaubada wese naluvefofoya 'imia. <sup>19</sup> Ta wese ge taha toga vona taha ba'e Buki nana gamonega na'ewa yavuledi, fole Yaubada wese tomotau nana ana 'iwavo yawai ana 'aiwe 'inega na'ewa yavulea. Ta wese ena 'ebetoa 'abaga gwalagwalana gamonaya be yani qabudi aqiaqidi Buki ba'e ni'a simanedi nawale 'inega na'ewa yavuledi.”

<sup>20</sup>\* Ieisu ba'e vona diavona ni'a simana 'ifoqeyedi ta 'awahaqiaqiedi, ta tauna vonaya, “Ao, tuta goyona ena wai!” Vonahaqiaqi ema nuanua 'edewana. Kaiwabu Ieisu, umai!

<sup>21</sup> Eda Kaiwabu Ieisu ena veyoluba Yaubada ena tomotauyavo 'imia.”

---

\* 22:12: Ais 40:10; Iel 17:10; Ve 2:23      \* 22:13: Ais 44:6; Ve 1:8,17; 21:6      \* 22:14: Nug 2:9; 3:22      \* 22:16: Naba  
 24:17; Ais 11:1,10; Lom 1:3; Ve 2:28; 5:5      \* 22:17: Ais 55:1; Ve 21:6      \* 22:18: Luve 4:2; 12:32      \* 22:20: Md  
 24:30-31; 1Kol 16:22

## Read the New Testament daily

### *January*

date	Scripture
1	Madiu 1:1-2:12
2	Madiu 2:13-3:6
3	Madiu 3:7-4:11
4	Madiu 4:12-25
5	Madiu 5:1-26
6	Madiu 5:27-48
7	Madiu 6:1-24
8	Madiu 6:25-7:14
9	Madiu 7:15-29
10	Madiu 8:1-17
11	Madiu 8:18-34
12	Madiu 9:1-17
13	Madiu 9:18-38
14	Madiu 10:1-23
15	Madiu 10:24-11:6
16	Madiu 11:7-30
17	Madiu 12:1-21
18	Madiu 12:22-45
19	Madiu 12:46-13:23
20	Madiu 13:24-46
21	Madiu 13:47-14:12
22	Madiu 14:13-36
23	Madiu 15:1-28
24	Madiu 15:29-16:12
25	Madiu 16:13-17:9
26	Madiu 17:10-27
27	Madiu 18:1-22
28	Madiu 18:23-19:12
29	Madiu 19:13-30
30	Madiu 20:1-28
31	Madiu 20:29-21:22

### *February*

date	Scripture
1	Madiu 21:23-46
2	Madiu 22:1-33
3	Madiu 22:34-23:12
4	Madiu 23:13-39
5	Madiu 24:1-28
6	Madiu 24:29-51
7	Madiu 25:1-30
8	Madiu 25:31-26:13
9	Madiu 26:14-46
10	Madiu 26:47-68
11	Madiu 26:69-27:14
12	Madiu 27:15-31
13	Madiu 27:32-66
14	Madiu 28:1-20
15	Maki 1:1-28
16	Maki 1:29-2:12
17	Maki 2:13-3:6
18	Maki 3:7-30
19	Maki 3:31-4:25
20	Maki 4:26-5:20
21	Maki 5:21-43
22	Maki 6:1-29
23	Maki 6:30-56
24	Maki 7:1-23
25	Maki 7:24-8:10
26	Maki 8:11-9:1
27	Maki 9:2-29
28	Maki 9:30-10:12

date	Scripture
1	Maki 10:13-31
2	Maki 10:32-52
3	Maki 11:1-26
4	Maki 11:27-12:17
5	Maki 12:18-37
6	Maki 12:38-13:13
7	Maki 13:14-37
8	Maki 14:1-21
9	Maki 14:22-52
10	Maki 14:53-72
11	Maki 15:1-47
12	Maki 16:1-20
13	Luke 1:1-25
14	Luke 1:26-56
15	Luke 1:57-80
16	Luke 2:1-35
17	Luke 2:36-52
18	Luke 3:1-22
19	Luke 3:23-38
20	Luke 4:1-30
21	Luke 4:31-5:11
22	Luke 5:12-28
23	Luke 5:29-6:11
24	Luke 6:12-38
25	Luke 6:39-7:10
26	Luke 7:11-35
27	Luke 7:36-8:3
28	Luke 8:4-21
29	Luke 8:22-39
30	Luke 8:40-9:6
31	Luke 9:7-27

date	Scripture
1	Luke 9:28-50
2	Luke 9:51-10:12
3	Luke 10:13-37
4	Luke 10:38-11:13
5	Luke 11:14-36
6	Luke 11:37-12:7
7	Luke 12:8-34
8	Luke 12:35-59
9	Luke 13:1-21
10	Luke 13:22-14:6
11	Luke 14:7-35
12	Luke 15:1-32
13	Luke 16:1-18
14	Luke 16:19-17:10
15	Luke 17:11-37
16	Luke 18:1-17
17	Luke 18:18-43
18	Luke 19:1-27
19	Luke 19:28-48
20	Luke 20:1-26
21	Luke 20:27-47
22	Luke 21:1-28
23	Luke 21:29-22:13
24	Luke 22:14-34
25	Luke 22:35-53
26	Luke 22:54-23:12
27	Luke 23:13-43
28	Luke 23:44-24:12
29	Luke 24:13-53
30	Ioni 1:1-28

date	Scripture
1	Ioni 1:29-51
2	Ioni 2:1-25
3	Ioni 3:1-21
4	Ioni 3:22-4:3
5	Ioni 4:4-42
6	Ioni 4:43-54
7	Ioni 5:1-23
8	Ioni 5:24-47
9	Ioni 6:1-21
10	Ioni 6:22-40
11	Ioni 6:41-71
12	Ioni 7:1-29
13	Ioni 7:30-52
14	Ioni 7:53-8:20
15	Ioni 8:21-30
16	Ioni 8:31-59
17	Ioni 9:1-41
18	Ioni 10:1-21
19	Ioni 10:22-42
20	Ioni 11:1-53
21	Ioni 11:54-12:19
22	Ioni 12:20-50
23	Ioni 13:1-30
24	Ioni 13:31-14:14
25	Ioni 14:15-31
26	Ioni 15:1-27
27	Ioni 16:1-33
28	Ioni 17:1-26
29	Ioni 18:1-24
30	Ioni 18:25-19:22
31	Ioni 19:23-42

date	Scripture
1	Ioni 20:1-31
2	Ioni 21:1-25
3	Viaqa 1:1-26
4	Viaqa 2:1-47
5	Viaqa 3:1-26
6	Viaqa 4:1-37
7	Viaqa 5:1-42
8	Viaqa 6:1-15
9	Viaqa 7:1-29
10	Viaqa 7:30-50
11	Viaqa 7:51-8:13
12	Viaqa 8:14-40
13	Viaqa 9:1-25
14	Viaqa 9:26-43
15	Viaqa 10:1-33
16	Viaqa 10:34-48
17	Viaqa 11:1-30
18	Viaqa 12:1-23
19	Viaqa 12:24-13:12
20	Viaqa 13:13-41
21	Viaqa 13:42-14:7
22	Viaqa 14:8-28
23	Viaqa 15:1-35
24	Viaqa 15:36-16:15
25	Viaqa 16:16-40
26	Viaqa 17:1-34
27	Viaqa 18:1-21
28	Viaqa 18:22-19:12
29	Viaqa 19:13-41
30	Viaqa 20:1-38



date	Scripture
1	Viaça 21:1-16
2	Viaça 21:17-36
3	Viaça 21:37-22:16
4	Viaça 22:17-23:10
5	Viaça 23:11-35
6	Viaça 24:1-27
7	Viaça 25:1-27
8	Viaça 26:1-32
9	Viaça 27:1-20
10	Viaça 27:21-44
11	Viaça 28:1-31
12	Loma 1:1-17
13	Loma 1:18-32
14	Loma 2:1-24
15	Loma 2:25-3:8
16	Loma 3:9-31
17	Loma 4:1-12
18	Loma 4:13-5:5
19	Loma 5:6-21
20	Loma 6:1-23
21	Loma 7:1-14
22	Loma 7:15-8:6
23	Loma 8:7-21
24	Loma 8:22-39
25	Loma 9:1-21
26	Loma 9:22-10:13
27	Loma 10:14-11:12
28	Loma 11:13-36
29	Loma 12:1-21
30	Loma 13:1-14
31	Loma 14:1-23

date	Scripture
1	Loma 15:1-21
2	Loma 15:22-16:7
3	Loma 16:8-27
4	1 Kolinita 1:1-17
5	1 Kolinita 1:18-2:5
6	1 Kolinita 2:6-3:4
7	1 Kolinita 3:5-23
8	1 Kolinita 4:1-21
9	1 Kolinita 5:1-13
10	1 Kolinita 6:1-20
11	1 Kolinita 7:1-24
12	1 Kolinita 7:25-40
13	1 Kolinita 8:1-13
14	1 Kolinita 9:1-18
15	1 Kolinita 9:19-10:13
16	1 Kolinita 10:14-11:1
17	1 Kolinita 11:2-16
18	1 Kolinita 11:17-34
19	1 Kolinita 12:1-26
20	1 Kolinita 12:27-13:13
21	1 Kolinita 14:1-17
22	1 Kolinita 14:18-40
23	1 Kolinita 15:1-28
24	1 Kolinita 15:29-58
25	1 Kolinita 16:1-24
26	2 Kolinita 1:1-11
27	2 Kolinita 1:12-2:11
28	2 Kolinita 2:12-17
29	2 Kolinita 3:1-18
30	2 Kolinita 4:1-12
31	2 Kolinita 4:13-5:10

date	Scripture
1	2 Kolinita 5:11-21
2	2 Kolinita 6:1-13
3	2 Kolinita 6:14-7:7
4	2 Kolinita 7:8-16
5	2 Kolinita 8:1-15
6	2 Kolinita 8:16-24
7	2 Kolinita 9:1-15
8	2 Kolinita 10:1-18
9	2 Kolinita 11:1-15
10	2 Kolinita 11:16-33
11	2 Kolinita 12:1-10
12	2 Kolinita 12:11-21
13	2 Kolinita 13:1-14
14	Galetia 1:1-24
15	Galetia 2:1-16
16	Galetia 2:17-3:9
17	Galetia 3:10-22
18	Galetia 3:23-4:20
19	Galetia 4:21-5:12
20	Galetia 5:13-26
21	Galetia 6:1-18
22	Efeso 1:1-23
23	Efeso 2:1-22
24	Efeso 3:1-21
25	Efeso 4:1-16
26	Efeso 4:17-5:2
27	Efeso 5:3-33
28	Efeso 6:1-24
29	Filifai 1:1-26
30	Filifai 1:27-2:18

date	Scripture
1	Filifai 2:19-3:6
2	Filifai 3:7-4:1
3	Filifai 4:2-23
4	Kolose 1:1-20
5	Kolose 1:21-2:7
6	Kolose 2:8-23
7	Kolose 3:1-17
8	Kolose 3:18-4:18
9	1 Tesalonaika 1:1-2:9
10	1 Tesalonaika 2:10-3:13
11	1 Tesalonaika 4:1-5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitusi 1:1-16
27	Taitusi 2:1-14
28	Taitusi 2:15-3:15
29	Filimoni 1:1-25
30	Ibeliu 1:1-14
31	Ibeliu 2:1-18

date	Scripture
1	Ibeliu 3:1-19
2	Ibeliu 4:1-13
3	Ibeliu 4:14-5:14
4	Ibeliu 6:1-20
5	Ibeliu 7:1-19
6	Ibeliu 7:20-28
7	Ibeliu 8:1-13
8	Ibeliu 9:1-10
9	Ibeliu 9:11-28
10	Ibeliu 10:1-18
11	Ibeliu 10:19-39
12	Ibeliu 11:1-16
13	Ibeliu 11:17-31
14	Ibeliu 11:32-12:13
15	Ibeliu 12:14-29
16	Ibeliu 13:1-25
17	Iemesa 1:1-18
18	Iemesa 1:19-2:17
19	Iemesa 2:18-3:18
20	Iemesa 4:1-17
21	Iemesa 5:1-20
22	1 Fita 1:1-12
23	1 Fita 1:13-2:10
24	1 Fita 2:11-3:7
25	1 Fita 3:8-4:6
26	1 Fita 4:7-5:14
27	2 Fita 1:1-21
28	2 Fita 2:1-22
29	2 Fita 3:1-18
30	1 Ioni 1:1-10

date	Scripture
1	1 Ioni 2:1-17
2	1 Ioni 2:18-3:2
3	1 Ioni 3:3-24
4	1 Ioni 4:1-21
5	1 Ioni 5:1-21
6	2 Ioni 1:1-13
7	3 Ioni 1:1-14
8	Iuda 1:1-25
9	Ve'ita 1:1-20
10	Ve'ita 2:1-17
11	Ve'ita 2:18-3:6
12	Ve'ita 3:7-22
13	Ve'ita 4:1-11
14	Ve'ita 5:1-14
15	Ve'ita 6:1-17
16	Ve'ita 7:1-17
17	Ve'ita 8:1-13
18	Ve'ita 9:1-21
19	Ve'ita 10:1-11
20	Ve'ita 11:1-19
21	Ve'ita 12:1-18
22	Ve'ita 13:1-18
23	Ve'ita 14:1-20
24	Ve'ita 15:1-8
25	Ve'ita 16:1-21
26	Ve'ita 17:1-18
27	Ve'ita 18:1-24
28	Ve'ita 19:1-21
29	Ve'ita 20:1-15
30	Ve'ita 21:1-27
31	Ve'ita 22:1-21